

Dios pejumelivaisibaxuto pejanalivaisi- baxuto

Guahibo New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

SAN MATEO.....	4
SAN MARCOS.....	65
SAN LUCAS.....	100
SAN JUAN	163
HECHOS	204
ROMANOS.....	260
1 CORINTIOS	286
2 CORINTIOS	313
GÁLATAS	330
EFESIOS	341
FILIPENSES.....	350
COLOSENSES	356
1 TESALONICENSES	362
2 TESALONICENSES	367
1 TIMOTEO.....	370
2 TIMOTEO.....	377
TITO	382
FILEMÓN	385
HEBREOS.....	387
SANTIAGO	407
1 SAN PEDRO.....	414
2 SAN PEDRO.....	422
1 SAN JUAN	427
2 SAN JUAN	433
3 SAN JUAN	434
JUDAS.....	436
APOCALIPSIS	439

SAN MATEO

Jesucristo pijasalinaivimi yabara pelivaisi

1 Mapalivaisije Jesucristo pijasalinaivimi pelivaisi. Jesucristo rabaja Davidpijinë pemomoxiyajuvënënë. Davidpijinë pijinia Abrahampijinë pemomoxiyajuvënënë. ² Copiaya Abrahampijinëmi xaina pexënato. Pevënë Isaac. Isaacpijinë juya pexënato xaina. Pevënë Jacob. Jacobpijinë juya pexi xaina. Pexiyajuvënënë pevënë Judá. Judápijinë pematapijinëbeje, pejuyapijivi ata, xaina. ³ Judápijinë juya pexënato xaina. Itsanë pevënë Fares. Itsanë Zara. Bajaraponëmi beje penapijiva pevënë Tamar. Farespijinë juya pexënato xaina. Pevënë Esrom. Esrompijinë juya pexënato xaina. Pevënë Aram. ⁴ Arampijinë juya pexënato xaina. Pevënë Aminadab. Aminadabpijinë juya pexënato xaina. Pevënë Naasón. Naasónpijinë juya pexënato xaina. Pevënë Salmón. ⁵ Salmónpijinë juya pexënato xaina. Pevënë Booz. Boozpijinë penapijiva pevënë Rahab. Boozpijinë juya pexënato xaina. Pevënë Obed. Obedpijinë penapijiva pevënë Rut. Obedpijinë juya pexënato xaina. Pevënë Isaí. ⁶ Isaípijinë juya pexënato xaina. Pevënë David. Bajaraponëmi nacuaeveitsinëmi. Davidpijinë yacajërëta Uríaspijinë pijavami. Nexata bajarapajivibeje juya pexënato xainabeje. Pevënë Salomón. ⁷ Salomónpijinë juya pexënato xaina. Pevënë Roboam. Roboampijinë juya pexënato xaina. Pevënë Abías. Abíaspijinë juya pexënato xaina. Pevënë Asa. ⁸ Asapijinë juya pexënato xaina. Pevënë Josafat. Josafatpijinë juya pexënato xaina. Pevënë Joram. Jorampijinë juya pexënato xaina. Pevënë Uzías. ⁹ Uzíaspijinë juya pexënato xaina. Pevënë Jotam. Jotampijinë juya pexënato xaina. Pevënë Acáz. Acázpijinë juya pexënato xaina. Pevënë Ezequías. ¹⁰ Ezequíaspijinë juya pexënato xaina. Pevënë Manasés. Manaséspijinë juya pexënato xaina. Pevënë Amón. Amónpijinë juya pexënato xaina. Pevënë Josías. ¹¹ Josíaspijinë juya pexi xaina. Pexiyajuvënënë pevënë Jeconías. Jeconías pematapijinë, pejuyapijivi ata, xaina. Pamatacabi Israel nacuapijivi cobecëbiaya caponatsi Babilonia nacuayabelia, bajarapamatacabi naexana Jeconíaspijinë. ¹² Bajaraxuacujinae Jeconíaspijinë juya pexënato xaina. Pevënë Salatiel. Salatielpijinë juya pexënato xaina. Pevënë Zorobabel. ¹³ Zorobabelpijinë juya pexënato xaina. Pevënë Abiud. Abiudpijinë juya pexënato xaina. Pevënë Eliaquim. Eliaquimpijinë juya pexënato xaina. Pevënë Azor. ¹⁴ Azorpijinë juya pexënato xaina. Pevënë Sadoc. Sadocpijinë juya pexënato xaina. Pevënë Aquim. Aquimpijinë juya pexënato xaina.

Pevënë Eliud. ¹⁵ Eliudpijinë juya pexënato xaina. Pevënë Eleazar. Eleazarpijinë juya pexënato xaina. Pevënë Matán. Matánpijinë juya pexënato xaina. Pevënë Jacob. ¹⁶ Jacobpijinë juya pexënato xaina. Pevënë José. Bajaraponëmi María pamona. Bajarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi. ¹⁷ Nexata Abrahampijinëmita petaxuxuabicujinae jivi penaexanaponaejava, trecenëta naexana Davidpijinë. Bajaraxuacujinae icatsia Davidpijinëmita petaxuxuabicujinae jivi penaexanaponaejava, trecenëta icatsia naexana Jeconíaspijinë. Pamatacabi Israel nacuapijivi cobecëbiaya caponatsi Babilonia nacuayabelia, naexana Jeconíaspijinë. Bajaraxuacujinae icatsia Jeconíaspijinëmita petaxuxuabicujinae jivi penaexanaponaejava, trecenë pijavata naexana Jesucristo jane baja, ponë Dioso athëbëvetsica itoroba jivi pecapanepaenexa.

Pacuenia Jesús naexana yabara pelivaisi

¹⁸ Jesucristo itsa naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajënaeyabeje, María nayapëtane penacoxitsijava Espiritu Santo pejamatabëcueneta. ¹⁹ José, María jane baja pamonanexa, bitso penajamatabëcuenerevibinë. Bajaraxuata José apo jitsipae daxitajivi pitabara ta pevajanupaebijava María penacoxitsijava. Nexata picani José bēpēnēa jamatabējumai tsaponapona:

—Itsanējavabelia María nacoxita. Nexata ajumejibia copatsianajë. Apo pitsinë baja tsane María tajavanexa, jamatabējai picani bēpēnēa tsaponapona José.

²⁰ Pamatacabi abaxë José bajarapacuenia najamatabëxainapona, majitsinaebota José tsitanaitajëtatsi Dioso pitorobinëtsica, ángel. Nexata ángel jumaitsi Joséjavabelia:

—José, xamë raja Davidpijinë pemomomë. Pëtsa cujunavame nepitsijava María nijavanexa. Tsipaji raja panacuetu María yacotaponapona, Espiritu Santo saya pejamatabëcueneta nacoxita. ²¹ Bajarapova exanaena penacuetonëyo. Vënërubianame bajarapanacuetonëyo Jesús. Tsipaji raja bajaraponë capanepaena daxita pijajivi pibisiacuene pexanaeneconimivecu.

²² Bajarapacuenia María penacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi

bajayata tajëvelia bajarapanacuetonëyo yabara jumait-si mapacueniaje:

²³ Petiriva apo naperabëquenatsinejeva pebijavabelia, nacoxitsiana. Exanaena penacuetonëyo. Vënërubianat-si Emanuel. “Emanuel,” pejaijume: “Dioso nacayajava,” pejaijume, jai bajayata tajëvelia profetanëmi Dioso pe-jamatabëcueneta, jai ángel majitsinaebota Joséjavabelia.

²⁴ Nexata José piamajitsinaecujinae naëcota. José jumecovënëta pacuenia itorobatsi ángel. Nexata baja José pijaboyaberena María barëpata pijavanexa. ²⁵ Itsi-ata abaxë José apo imoxoyobi pijava penamataxainae-nacuetonëyo pevecuanaexanaevajënaeyatsi. Bajara-panacuetonëyo jane baja José vënëruba JESUS.

Pacuenia tulupu perubenaejava pecanaëcobivi naje-tarubena petaenexa Jesúsnyëyo yabara pelivaisi

2 Jesús naexana Belén tomarata, Judea nacuata peecaetomarata. Bajarapamatacabi nacuaeveitsinë Herodes Judeanacua eveta. Nexata Jesús penaexanaecujinae, pebijivi, tulupu perubena-ejava pecanaëcobivi, pata tajënacujavavetsina. Pata Jerusalén tomarajavabetsina. ² Tulupu perubenaejava pecanaëcobivi yanijobapona jivijavabelia:

—¿Detsa jota barëecatsi panacuetonëyo naexana judíovi pepo pevetsinënexa? Payapëtaniji bajara-ponëyo penaexanaejava. Tsipaji baja cajena pataniji bajaraponëyo penaexanaejavata penaitajësituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajara-ponëyo, bajaraponëyo pitabarata yaiyataeya pata-matabacabëta patatonubenaenexa, jai tsaponae jivi-javabelia tulupu perubenaejava pecanaëcobivi.

³ Nexata Herodes, Judeanacua pevetsinë, vënëlivaisi-tane tulupu perubenaejava pecanaëcobivi bajara-pacuenia pejumaitsaponaejava jivijavabelia Jesúsnyëyo yabara. Nexata Herodes bitso najamatabëxaina. Daxi-ta Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacer-dotevi penamatacaitorobivi, judíovi pecujarubivi yaja-va, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Baj-arajota Cristo naexanaena,” jai? jai Herodes.

⁵ Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Dioso-jumepaebinëmi profetanëmi tajëvelia vajunupaeba ba-jaraponë penaexanaejavanexa Belén tomarata. Bajay-ata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

⁶ Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyayataetomaratsi tsane, jai baja cajena

mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

⁷ Bajaraxuacujinae Herodes muetsia junata tajë-nacuavetsina pepatsivi, tulupu perubenaejava pecanaëcobivi. Nexata Herodes jumaitsi tulupu pe-rubenaejava pecanaëcobivijavabelia:

—¿Detsa baja pajuametobeje xaina bajarapat-uluputo penaitajësicujinae? jai.

⁸ Nexata petsipaebicujinaetsi Herodes itorobalia ba-jarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabi-aname, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucae-jitsianë bajaraponëyo pitabarata, jai Herodes tulupu perubenaejava pecanaëcobivijavabelia.

⁹ Nexata jane baja tulupu perubenaejava pecanaëco-bivi ponalia Belén tomarabelia. Nexata bajarapamon-ae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapa-monae matabanajetarucatsi. Matapania itsajota Jesús-nyëyo pena barëecatsi pematatsënëatsia, bajarapat-uluputo rucojopa. ¹⁰ Tulupu perubenaejava pecanaë-cobivi itsa tane bajarapatuluputo, bitso barëya. ¹¹ Nex-ata bajarapamonae boyalia itsa joneya, tane Jesús-nyëyo, pena yajava. Nexata tulupu perubenaejava pecanaëcobivi yaiyataeya pematabacabëta tonubena-junua Jesúsnyëyo pitabarata. Bajaraxuacujinae pecapat-sicajonixi matapana, penamatamotsijavanë pejebica-jonixi. Nexata Jesúsnyëyo rajuta orojavanë. Rajutanua petuxujuvijavabeje. Itsajava inciensovënëjave. Itsajava mirravënëjave. ¹² Bajaraxuacujinae tulupu perubena-ejava pecanaëcobivi meravi majitsinaebota Dioso itave-tatsi penaviabianiva nacuaeveitsinë Herodesjavabelia. Nexata tulupu perubenaejava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsnyëyo Egipto nacuyabelia yabara pelivaisi

¹³ Tulupu perubenaejava pecanaëcobivi penaviabicu-jinae, Dioso pijaángel meravi José majitsinaebota tsi-tanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja pe-nacuetonëyo, pena yajava. Barënajetabajiravare Egip-to nacuyabelia. Bajarajotalia barëponaponaeneme. Matapania icatsia itsa catsipaebianatsi, barënaviat-siaremena. Tsipaji raja nacuaeveitsinë Herodes tsiquir-inëyo tsimaxërenajitsiatsi pebeyaxuabinexatsi, jai áng-el Joséjavabelia.

¹⁴ Nexata José nonotapuna. Piamajitsinaemeravi baja José barëpona Jesúsnyëyo, pena yajava. Barënajetajiri-ava Egipto nacuyabelia. ¹⁵ Bajarajotalia José barëponapona bajayajebi. Matapania baja Herodes it-sa tëpa, José barëpatsijitsiarena Israel nacuyaberena. Bajarapacuenia tocopiapatatsi tsipaji baja cajena ba-

jayata Diosojumepaebinēmi profetanēmi Dioso pejamatabēcueneta tajēvelia jumaitsi Jesús yabara mapacueniaje: “Taxēnato icatsia junatsiarenajē penaviatsinexa Egipto nacuverena,” jai ra Dioso, jai baja cajena bajayata tajēvelia profetanēmi Jesús yabara.

Pacuenia nacuaevetsinē Herodes pijajivi itoroba pebinacuetoxi pebeponaenexa yabara pelivaisi

¹⁶ Nacuaevetsinē Herodes picani jumaitsi tulupu perubenaejava pecanaēcobivijavabelia: “Itsa pacaxitarabianame bajarapanacuetonēyo, panevajunucapon aeremena,” jai picani Herodes Jesúsñēyo yabara. Itsiata tulupu perubenaejava pecanaēcobivi caxitajarabi ata Jesúsñēyo, apo vajunucaponae Herodesjavabelia. Nexata Herodes itsa yapētane tulupu perubenaejava pecanaēcobivi apo pevajunucaponaejavatsirena, caxitajarabi ata Jesúsñēyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonējava ata. Daxita papebinacuetoxi abaxē apo xinae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bजारapacuenia Herodes pijajivi itoroba pebinacuetoxi pebeponaenexa, Jesúsñēyo picani peyajavabeyaxuabinexatsi. Tsipaji tulupu perubenaejava pecanaēcobivi Herodesjavabelia tsipaeba paepatota taxuxuaba petaejava tuluputo. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinēmi profeta Jeramíaspijinē bajayata tajēvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinē peyaquinaelivaisita tajēvelia jumaitsi mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabēxainaejava. Tsipaji pexi totēpaenatsi, jai bajayata tajēvelia profeta Jeramíaspijinē peyaquinaelivaisita pexoxibeponaejavanexatsi yabara bajarapatomarata.

¹⁹ Nacuaevetsinē baja Herodes pepuatēpae, Dioso icatsia pijaáγγελ itoroba Joséjavabelia. Nexata áγγελ meravi majitsinaebota José tsitanaitajētatsi Egipto nacuata. ²⁰ Nexata áγγελ jumaitsi Joséjavabelia:

—José, nonotapunare. Barēponaename baja tsiquirinēyo, pena yajava. Barēnaviaremelia baja icatsia Israel nacuyabelia. Tēpa rabaja ponē picani jamatabēbeyaxuabatsi tsiquirinēyo, jai áγγελ majitsinaebota Joséjavabelia.

²¹ Nexata baja José nonotapuna. Barēpona tsiquirinēyo, pena yajava. José icatsia barēnaviata Israel nacuyabelia. ²² Nacuaevetsinēmi Herodespijinē pexēnato pevēnē Arquelao. Nexata Arquelao eveta Judeanacua paxa pevēnamuto. Nexata José itsa vēnēlivaisitane nacuaevetsinēmi Herodespijinē pexēnato pevetsijava Judeanacua, José cujunava Jesúsñēyo pebarēponaejava Judea nacuyabelia. Majitsinaebota

José Dioso itavetatsi Jesúsñēyo pebarēponaeyaniva Judea nacuyabelia. Nexata José barēpona Jesúsñēyo Galilea nacuyabelia. ²³ José itsa barēpata Jesúsñēyo Galilea nacuyabelia, Nazaret tomarata barēpatajopa pebarēecaenexa Nazaret tomarata. Bजारapacuenia José Nazaret tomarata itsa barēeca Jesúsñēyo, copiapata jane baja pacuenia baja cajena bajayata Diosojumepaebivimi profetavi tajēvelia jumaitsi. Diosojumepaebivimi profetavi bajayata baja cajena tajēvelia jumaitsi Jesús yabara mapacueniaje: “Ponē Dioso itorobijitsiatsica jivi pecapanepaenexa, bajaraponē yabara jivi jumai tsane: ‘Mara ponēje Nazaret tomara-pijinēje,’ jai tsane,” jai baja cajena bajayata tajēvelia profetavimi Jesús yabara.

Pacuenia Juan jivibautisabinē Dioso pitorobilivaisi jivi tsipaeba petusato nacuata yabara pelivaisi

3 Jesús itsa baja xaina bejamatabēcuenē treinta pavaibeje, Juan jivibautisabinē najetaruca Judea nacuatusatojava. ² Juan jivibautisabinē Dioso pitorobilivaisi jivi tsipaebanajetaruca. Jumai tsanajetaruca mapacueniaje:

—Dioso rabaja pijajivi pevetsimatacabinexa, imoxoyo baja pevajēnae pecopiapatsinexa. Nexata baja pacopabare pibisiacuene paneexanabiabijava. Panajamatabēcuenepēnēyorore Diosojavabelia, jai tsanajetaruca Juan jivijavabelia.

³ Bजारapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinēmi profeta, Isaíaspijinē, bajayata tajēvelia yaquina Juan pelivaisi. Juan jivibautisabinē Dioso pitorobilivaisi jivi petsipaebanajetarucaejavanexa yabara, yaquina. Profeta Isaíaspijinē peyaquinaelivaisita tajēvelia jumaitsi mapacueniaje:

Tanejumelivaisipaebinē vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenē. Batoroviaexananua namuto. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeyarena,” jai tsane tanejumelivaisipaebinē, jai profeta Isaíaspijinē bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

⁴ Juan naxatata camellonata pexanaejava. Naepacēta cuerobocoto. Pexaejava ēbosese, jabēra yajava. ⁵ Juan petsipaebilivaisi pejumetaenexatsi, muxunapatabiatsi Jerusalén tomarapijivi, Judea nacupijivi ata, Jordánmene imoxoyopijivi ata. ⁶ Nexata bajarapamonae pibisiacuene pexanaejavami, roviaia Diosojavabelia navecuapaebapona. Nexata bajarapamonae Juan bautisabapona Jordán meneta.

⁷ Jivibitsaētoxfaneto pata Juanjavaberena pebautisabinexa picani Juan. Bजारapamonae apo jumecovēnētsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan itsa nacabautisabiana, Dioso nacacapanepaenata, jamatabējai.

Nexata Juan itsa tane ayaibitsaëtohaneto fariseovi, saduceovi ata, pepatsijavarena Juan picani pebautisabinexa, nexata Juan jumaiti bajarapamonaejavabelia:

—¡Panejamatábécuenenavëxaniabivi! Pacuenia jomo rëcëpa itsa tane isoto petajuenajetaruaejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexa. ⁸Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatábécuene pënëyorotsijava Diosojavabelia. ⁹Jamatábécuene navëxaniabiaya pëtsa panajumaitisimë: “Vaxaitsi cajena Abrahampijinë pemomoxitsi. Nexata Dioso nacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexananapame, nexata bajarapacuene apo pacatonamata-motsi tsipae Diosojavabelia papecacapanepaenexa. Dioso baja cajena caëjëpatsi jivi pexanaenexa mapai-botonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso. ¹⁰Peubinaenë pexainaenë itsa apo tonacuaititsi pexaniacuai, nicata sipalita daxita ponaenë apo tonacuaititsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuat-si. Bajara pijinia pacuenia paxamë ata Dioso pacaxu-abiana infiernojavabelia papecatajuenexa, Dioso apo panejumecovënëtsivi. ¹¹Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Naja-matabécuenepënëyorotanua Diosojavabelia. Itsiata baitsi jane ponë tacovëverena najetarucaena, tabautisabivi Espíritu Santo tsijamatábëjoneyaexanaenatsi, pitarunutsicotia yajava. Xanë raja saya beveliajamatábécuenenë bajaronëvecua. Nexata bajarapone vecuaauranë pijazapato ata tatocaponaenexa beprijavitonëcuenianë. ¹²Arrozxainanë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevereve-caeisotojavabelia, jai Juan daxita bajarapamonaejavabelia.

Pacuenia Juan bautisaba Jesús yabara pelivaisi

¹³Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan. ¹⁴Juan picani apo jitsipae pebautisabijava Jesús. Juan nexata jumaiti Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

¹⁵Itsiata Jesús jumaiti Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús. ¹⁶Nexata jane baja Juan bautisaba Jesús. Jesús pebautisabicujinaetsi nonotajuna menevetsina. Bajarapaepato Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi. ¹⁷Nexata Juan jumetane athëbëvetsica Dioso pejumaitisijava: “Mara ponë taxë-nato tasivanëje. Sivajamatábécuenebarëyanë bitso,” pejaijava.

Pacuenia Jesús jamatabécueneëjëbatsi dovathi yabara pelivaisi

4 Jesús pebautisabicujinaetsi, Espíritu Santo ponaeyaexanatsi petusato nacujavabelia. Bajarabelia ponaeyaexanatsi pejamatabécueneëjëbinexatsi dovathi.

²Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani. ³Nexata dovathi Jesús imoxoyotatsi pejamatabécueneëjëbinexatsi Jesús picani pibisiacuene pexanaenexa. Dovathi jumaiti Jesúsjavabelia:

—Itsa pepacuene Dioso pexënatomë, itorobare mapai-botonëje penaexanaenexa pan, jai dovathi.

⁴Jesús nexata jumaiti dovathijavabelia:

—Jume raja. Dioso raja pejumelivaisibaxutota jumait-si mapacueniaje: “Jivi raja apo namatavenonae ëpexaejava pexanaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevecaejava,” jai raja Dioso pejumelivaisibaxutota, jai Jesús dovathijavabelia.

⁵Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia. ⁶Nexata templobo matatutatsia dovathi icatsia jumaiti Jesúsjavabelia:

—Itsa pepacuene Dioso pexënatomë, jirevaremeca irabereca. Bajarapacuenia jirevaremeca irabereca tsipaji xamë nitsacueneyaniva pecaevetsinexa Dioso pejumelivaisibaxutota jumaiti mapacueniaje:

Dioso itorobianica pijaángelevi pecaevetsinexa. Nexata ángelevi pecobeta cayotsiana pecataxutsaquit-siyaniva ibotonëjavabelia, jai Dioso pejumelivaisibaxu-

tota xamë pecaevetsinexa ángelevi, jai dovathi Jesús-javabelia.

⁷Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuene-nävëxaniabiaya pijacuata apo bejamatabëjumaitsi: ‘Xanë Dioso jamatabëcueneëjësianajë. Nexata ex-anaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

⁸Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi daxitanacuanë. Daxita bajarapanacuanëta daxitacueni pexainaejava yajavatsitajëtatsi. ⁹Nexata icatsia dovathi jumaitsi Jesúsjavabelia:

—Ayaijamatabëcuenenenë netaeya taitabarata nematabacabëta itsa netonucajuame, nexata daxita mapanacuanëtaje, daxitacueni xua xaina, cayajavara-jutsianatsi, jai dovathi Jesúsjavabelia.

¹⁰Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajëcae pematabacabëta caenë pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

¹¹Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

¹²Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuayabelia. ¹³Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabalónvënë nacuabeje Nef-talivënë nacuabejavata. Capernaumtomara eca pucaxanetoitapata. ¹⁴Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

¹⁵⁻¹⁶Zabalón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëtoxonetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianat-

si itsa tsipaebianatsi Diosojavabelia pecapanepaelivaisinexatsi, jai tajëvelia Isaíaspijinë peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëpijivijavabelia.

¹⁷Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuene pënëyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi

¹⁸Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanëbeje nacaebananëbeje, Simónbeje Andrésbeje. Simón itsavënë Pedro. Bajaraponëbeje daxitamatacabi canacujitsia dujuai yamatajucabiabibeje. Dujuai peyamatajucabiabijavatabeje, yamatajucaponaponabeje. ¹⁹Nexata Jesús jumaitsi Simónbeje Andrésbejevavabelia:

—Naxanitsia. Panepënaponarebeje. Nexata pacucujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

²⁰Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepëta.

²¹Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacaebananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucaejanexabeje. Nexata icatsia Jesús junata Santiagobeje Juanbeje. ²²Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepëta.

Pacuenia Jesús livaisi tsipaeba jivi ayaibitsaëtoxonetojavabelia yabara pelivaisi

²³Jesús jane baja najetaruca daxita Galilea nacujava. Dioso pitorobilivaisi tsipaebapona judíovi penacae-tuatabiabinëjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi. ²⁴Nexata daxita Siria nacujava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyjavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae.

²⁵Nexata Jesús pënaponatsi jivi ayaibitsaëtoxoneto Galilea nacujajivi, Decápolis nacujajivi ata, Jerusalén tomarapijivi ata, Judea nacujajivi ata, Jordánmene itsapanaverenapijivi ata.

Pacuenia Jesús jivi livaisi tsipaeba petsutoyenepanajavata yabara pelivaisi

5 Jesús itsa tane jivibitsaëtoxañeto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatatsi. ² Nexata Jesús taxuxuaba livaisi petsipaebijava. ³ Jesús jumaitsi pijajivijavabelia mapacueni-aje:

—Jamatabëcuenebarëya tsavanapae tsane pamonaepicani mapanacuata yajamatabëcuenebëjai tsavanapae pibisiacuene pexanabiabijava. Bajarapamonaenona Dioso pijanacuayabetsia.

⁴ Jamatabëcuenebarëya tsavanapae tsane pamonaepicani mapanacuata bejamatabëjiobi tsavanapae itsamonae pibisiacuene petoexanaexaetsi. Bajarapamonaenona Dioso jamatabëcueneavenonaenatsi.

⁵ Jamatabëcuenebarëya tsavanapae tsane pamonaepo jamatabëbëjai tsabiabi mapanacuata, itsacueniababiabi atatsi itsamonae. Apo cuenecanaviatabiabinua. Bajarapamonaenona Dioso pijanacuata pacuenia Dioso najumecapanepaeya jumaitsi bajarapamonaenona yabara.

⁶ Jamatabëcuenebarëya tsavanapae tsane pamonaepicani mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacueni.

⁷ Jamatabëcuenebarëya tsavanapae tsane pamonaepicani mapanacuata itsamonae ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonaenona.

⁸ Jamatabëcuenebarëya tsavanapae tsane pamonaepicani mapanacuata epexaniacuene pexanaenexa najamatabëxainabiaba. Bajarapamonaenona taena Dioso.

⁹ Jamatabëcuenebarëya tsavanapae tsane pamonaepicani mapanacuata penaitoyavimi ata, nabarajamatabëcuene xanepanaeyaexanapona. Bajarapamonaenona yabara: “Taxi,” jai tsane Dioso.

¹⁰ Jamatabëcuenebarëya tsavanapae tsane pamonaepicani mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonaenona jona Dioso pijanacuayabetsia.

¹¹ Patajajivixaemë, itsamonae pibisiacuena itsa pacabaracuaicuajai, itsiata pajamatabëcuenebarëyamë tsavanapae tsane. Bajarapamonaenona pacabejiobiaexanaenona ata tsane, najumetsënëtsi-aya pacabaracuaicuajai atanua tsane, itsiata pajamatabëcuenebarëyamë tsavanapae tsane. ¹² Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi

¹³ Icatsia Jesús jumaitsi petsutoyenepanajavata pijajivi ayaibitsaëtoxañetojavabelia:

—Yajobenona xanepana vaxaexabinexa pevi piabejeyaniva. Paxamë rabaja pijinia bepayajomë tsavanapae mapanacuapijivijavabeliaje, mapanacuapijivibitso piabejeyaniva pibisiacuene pexanaeneconiyabara. Paxamë xaniavaetsia panetsipaebavanapaxaenona Dioso pejumelivaisi, bajarapamonaenona bitso pibisiacuene apo exanaenona. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacueniejavayonexa ata baja apo xanepanaenona tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacueniejavayonexa ata, apo paxanepanaemë tsipae.

¹⁴ Pacuenia piatayotsicotia itayota piataquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame piajamatabëcueneitayotsianame. Bajarapacuenia pajamatabëcueneitayotsianame itsa patsitajinavanapae name xaniavaetsia daxitajivi pitabarata. Petsutojumata peccaetomara acuenebi penacaranatecaejava tsipae. ¹⁵ Itsajivi ata lámparabë pitanojotsicujinaenona, apo etsi cajoniënëalia. Biji rajane athëbëyo etsia daxitaboënë pitayotecaenexa. ¹⁶ Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonaenona pacacuenetaena pexaniacuene paneexanavanapaejavava. Nexata bajarapamonaenona itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonaenona paneaxa, athëbëtatsia peccaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibitsaëtoxañetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisibeje. ¹⁸ Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitane toyo ata, Dioso apo itothianenona tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapat-

siana daxita xua Dioso tajëvelia najumecapanepaeya jumaitsi bajarapalivaisitabeje. ¹⁹ Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia. ²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava matatoxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, baja paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

Pacuenia Jesús muxujioba pijajivi pecopatsinexa penabaraanaepanabiabijava yabara pelivaisi

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia. ²² Itsiata baitsi jane xanë pacatsipaebatsi mapacueniaje. Pajivi baraanaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuena, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi infierno isotojavabelia.

²³ Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacuene paneexanaejava, nexata mapacuenia paexanaenameje. ²⁴ Altarvënëjava pitabarata abaxë papuenerere ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

²⁵ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaneconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara picani pacaneconitsijitsia. Bajarapacuenia xaniavaetsia panabarëcuaicuaijamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponae nexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ²⁶ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojobinë itsava pejaitsiyaniva pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai. ²⁸ Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabëjai, bajarapone naneconita Diosojavabelia. Nexata najëpaeya naneconitabeje Diosojavabelia ponëbeje pepacuene itsavajavabelia pibisiacuene pevitota exana pijavavecua.

²⁹ Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxuabinexa bajarapaitaxuto, padaxitaperabëtojivimë Dioso papecaxuabiyaniya infiernojavabelia. ³⁰ Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papecaxuabiyaniya infiernojavabelia, jai Jesús pijajivijavabelia.

Pacuenia Jesús pijajivi muxujioba penacojobinë pijava pexuabiyaniya yabara pelivaisi

³¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinëta penajumecopatsilivaisi. ³² Itsiata baitsi jane xanë mapacuenia pacatsipaebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajarapone naneconita Diosojavabelia pijava pexuabixae. Petiriva pamona pexuabix-

aetsi, nacojobijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi

³³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Panijasalinaivimi penajumetsënëtsiyaniva, bajayata Moiséspijinë panijasalinaivimijavabelia jumaitsi mapacueniaje: “Itsa baja pepacuene najumecapanepaeya panavajunupaebame xua paexanaejitsiamë, itsamonae papecajumexaniataenexa itsa pajumaitsimë: ‘Xaniajanë raja. Cajumaitsi mapacueniaje Dioso pitabarata,’ itsa pajamë, pëtsa epatua panajamatabëcopatame bajaraxua paexanaenejevamë,” jai bajayata Moiséspijinë panijasalinaivimijavabelia. ³⁴ Itsiata baitsi jane xanë mapacuenia pacaitorobatsije. Najumecapanepaeya itsa panavajunupaebame xua paexanaejitsiamë, roviaia panavajunupaebare. Pëtsa pematatsënëa itsajumeyo ata yajava pajumaitsimë jivi papecajumexaniataenexa. Papecajumexaniataenexa itsajivi pëtsa pajumaitsimë mapacueniaje: “Xaniajanë raja. Cajumaitsi mapacueniaje Dioso pitabarata,” pajamë pëtsa. Pëtsa pajumaitsimënu: “Xaniajanë raja. Cajumaitsi mapacueniaje athëbënacua pevënëta,” pajamë pëtsa. Tsipaji bajarajotatsia Dioso eca pijatronovënëjavata, itsajota ecabiaba pitorobinexa pijajivi. ³⁵ Pëtsa pajumaitsimënu: “Xaniajanë raja. Cajumaitsi mapacueniaje mapairaje pevënëta,” pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevënëta. Tsipaji Jerusaléntomara Dioso pepo nacuaeavetsinë pijatomara. ³⁶ Pëtsa pajumaitsimënu: “Xaniajanë caje-na. Itsa apo xaniajanë tsane, nexata nacaevetsianajë tanematathinaxuabinexamë tatëpaenexa,” pajamë pëtsa. Tsipaji panematabocoto ata Dioso eveta. Nexata paxamë apo pacacajëpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. ³⁷ Itsa pepacuene paexanaejitsiamë, “Jājā, exanaenajë,” pajamë roviaia. Itsa apo pajamatabëexanaemë, “Jume, apo exanaenë tsane,” pajamë roviaia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

Pacuenia Jesús pijajivi muxujioba pecuenecanaviatsiyaniva itsajivi itsacueniabi atatsi yabara pelivaisi

³⁸ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijianatsi, juya bajarapajivi namatamoitaxutobijianae. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi. ³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabarapacabiaxuaba anaeya, nexata icatsia itsanenia ata papecaitarapacataxuabinexa, panaitabaracaevere. ⁴⁰ Itsajivi itsa pacaneconitsijitsia jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa. ⁴¹ Vajabitsaë itsa pacacaponaeaexana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare. ⁴² Bitso bepejio-bijivi itsa pacavajëta itsacuenëjavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

⁴³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitoiyavi,” jai bajayata Dioso Moiséspijinëta penajumecopatsilivaisi. ⁴⁴ Itsiata baitsi jane xanë mapacuenia pacaitorobatsije. Pasivamëre papecaitoiyavi ata. Pamonaë ata pibisiacuenia pacabaracuaicuajai, bajarapamonae paxamë xaniavaetsia pabaracuaicuajamëre. Pamonaë ata pacaitoya, bajarapamonae pexaniacuene patoexanare. Pamonaë ata pibisiacuenia pacabijatane, pibisiacuene pacaexanaë ata, patovajëre Diosojavabelia peyavenon-aenexatsi. ⁴⁵ Bajarapacuenia nexata paneaxa, athëbë-tatsia peecaenë, papeximëcuenia patsitajinavanapae-name. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisijamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso pibisiacuene exana. Itsiata bajarapamonae ata asiva piasivavitsi. ⁴⁷ Xaniavaetsia itsa pacopiapitsipame

ēpaneyapētaevi, nexata pexaniacuene apo paex-
anaemē tsipae pamonae Dioso apo pejumecovēnētsi-
vivecua. Tsipaji Dioso apo pejumecovēnētsivi ata xani-
avaetsia copiapitabiaba peyapētaevitsi. ⁴⁸ Pacuenia ja-
matabēcueneitsi pejamatabēcuenexanepanaenē,
paneaxa, athēbētatsia peecaenē, bajara paxamē ata
pajamatabēcueneitsimēre, jai Jesús pijajivijavabelia.

**Pacuenia Jesús pijajivi muxujioba pexaniacuene pex-
anaenexa yabara pelivaisi**

6 Icatsia Jesús jumaitsi petsutoyenepanajavata pija-
jivi ayaibitsaētoخانetojavabelia:

—Xania baja tsane! Pētsa pexaniacuene paexaname
saya jivi papecacuenetaenexa, “Maponē bitso pexania-
jamatabēcuenenēje,” papecasivajamatabējainexa saya
paneexanaejava yabara. Bajarapacuenia itsa paex-
anaejitsipame, nexata paneaxa, athēbētatsia
peecaenējavabelia, apo paxainamē tsipae itsacuene-
javayo ata, pexaniacuenejavayo, papecarajutsinexa
athēbētatsia. ² Bajaraxuata itsa payavenoname bepe-
jiovivi, pētsa panavajunupaebame daxitajivijavabelia
paneyavenonaejava bepejiovivi. Itsamonae xua exana,
navajunupaebabiaba daxitajivi pitabarata judíovi pe-
nacaetuatabiabinējava, callejava ata. Bajarapamonae
navajunupaebabiaba bepejiovivi peyavenonaejava,
bepexaniajamatabēcuenevi saya petaenexatsi jivi. Xa-
niananē pacuenia pacatsipaebijitsiatsi. Pamonae ba-
jarapacuenia navajunupaebabiaba, bajarapacuenia
penavajunupaebabiabixae, Diosojavabelia apo xainae
tsane athēbētatsia perajutsijavanexatsi. ³ Itsa
payavenoname bepejiovivi, pētsa panavajunupaeb-
ame itsajivijavabelia ata, bitso papecayapētaejivijav-
abelia ata. ⁴ Muetsia payavenonare bepejiovivi. Nexata
paneaxa, papecataenē muetsia paneexanaejava ata,
pacarajutsiana bepejiovivi muetsia paneyavenonae-
matamo, jai Jesús pijajivijavabelia.

**Pacuenia Jesús pijajivi tsipaeba pacuenia Diosojav-
abelia vajēcaejitsia yabara pelivaisi**

⁵ Icatsia Jesús jumaitsi petsutoyenepanajavata pijajivi
ayaibitsaētoخانetojavabelia:

—Itsa pavajēcame Diosojavabelia, pētsa pavajēcame
pacuenia itsamonae vajēcabiaba. Bajarapamonae saya
jema vajēcabiaba Diosojavabelia jivi petaenexatsi
Dioso bepejumecovēnētsivi. Bajarapamonae jitsipabia-
ba nucaeya pevajētsinexa Diosojavabelia daxitajivi
pitabarata judíovi penacaetuatabiabinējava, calle
penaepacaxitajarabijava ata. Bajarapacuenia vajēcabi-
aba Diosojavabelia Dioso bepejumecovēnētsivi
petaenexatsi jivi. Xaniajanē pacuenia pacatsipaebijitsi-
atsi. Pamonae bajarapacuenia exanabiaba, baja-
rapacuenia pexanaexae, Diosojavabelia apo xainae
tsane athēbētatsia perajutsijavanexatsi. ⁶ Nexata pax-
amē Diosojavabelia itsa pavajēcame, pacaenēmē
canacujitsia, pajonemeya panijaboyalia. Pabaupax-
atare. Bajaraxuacujinae pavajēcare paneaxajavabelia.
Nexata paneaxa pacayajava tsane bajarajota. Nexata

paneaxa, papecataenē muetsia paneexanaejava ata,
pacarajutsiana bajaraxua paneexanaematamo.

⁷ Itsa pavajēcame Diosojavabelia, pētsa napēna
pavajēcame saya piapianaxa panevajēcaejava pacue-
nia Dioso apo peyapētaevi vajēcabiaba. Dioso apo
peyapētaevi jamatabēcuenenavēxaniabiaya ja-
matabējumai tsabiabi: “Itsa bitso apia vajavajēcaejava
Diosojavabelia, nexata matapania Dioso nacajumetae-
na vajavajēcaejava,” jamatabējai tsabiabi Dioso apo
peyapētaevi. ⁸ Pētsa bajarapacuenia paxamē paja-
matabēcueneitsimē. Panevajēcaevajēnaeya ata raja
paneaxa, Dioso, yapētane xua panamatavenoname.
⁹ Bajaraxuata itsa pavajēcame Diosojavabelia, pavajēre
mapacueniaje:

Taxamē, athēbētatsia neecaenē, jitsipajē pecayai-
ataejava daxitajivi. ¹⁰ Jitsipajē naxanitsiayo pecopiapat-
sijava daxita nijajivi nevetsijava mapanacuataje. Jitsipa-
jē daxitajivi mapanacuata nejetsipaecuenia pecatoex-
anabiabinexa, pacuenia baja athēbētatsia nijajivi nejit-
sipaecuenia catoexanabiaba, bajarapacuenia peca-
toexanavanapaenexa mapanacuapijivi ataje. ¹¹ Ajena,
pamatacabinexa, panerajure pataxaejavanexa pacue-
nia panamatavenonajē. ¹² Panevecuaajibiaexanare
pibisiacuene pataexanaeconimi. Pacuenia paxanē
pajamatabēcuenecaevajē, pabarajamatabēcuenex-
anepananua, itsamonae paxanējavaberena pibisi-
acuene patanexanaejava, bajara pijinia pacuenia xamē
ata nitabarata pibisiacuene pataexanaejava ja-
matabēcuenecaevare. Panebarajamatabēcuene
xanepanarena. ¹³ Panevecuatsare dovathi pataneja-
matabēcueneējēbibaniva. Panecapanepare jane pibisi-
acuenevecua. Pamatacabi xamē taxuxuabianame daxi-
ta nijajivi nevetsijava mapanacuataje, nejamatabēcue-
nesaēta evetsianame. Nexata nijajivi jumai tsane xamē
yabara: “Dioso cajena bitso ayaijamatabēcuenenē,” jai
tsane. Bajarapacuenia nijajivi evetsianame daxitam-
acabijavabelianexa, pajamē tsane mapacueniaje itsa
pavajēcame Diosojavabelia, jai Jesús pijajivijavabelia.

¹⁴ Jesús icatsia jumaitsi pijajivijavabelia:

—Nexata paxamē itsamonae pibisiacuene pacaex-
anae ata, pajamatabēcuenecaevare. Pabaraja-
matabēcuenexanepanarena. Nexata paxamē itsa-
monae pibisiacuene papecaexanaejava, itsa paja-
matabēcuenecaevianame, itsa pabaraja-
matabēcuenexanepanaenamenua, nexata paneaxa,
athēbētatsia peecaenē, pitabarata pibisiacuene pane-
exanaejava jamatabēcuenecaeviana. Pacabaraja-
matabēcuenexanepanaenanua. ¹⁵ Paxamē itsa apo pa-
jamatabēcuenecaevimē tsane itsamonae pibisiacuene
papecaexanaejava, itsa apo pabarajamatabēcuenex-
anepanaemēnua tsane, nexata paneaxa ata apo ja-
matabēcuenecaevi tsane. Apo pacabaraja-
matabēcuenexanepanaenua tsane, pitabarata pibisi-
acuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajë-tapona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënuu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bजारapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaeje Dioso bitso pejumecovëñëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bजारapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovëñëtsivi, bajarapacuenia vajëcabiaba.

¹⁷ Paxamë itsa apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenua xaniavaetsia.

¹⁸ Bजारapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavanapaenexa itsamatacabi ayajava pexainaenexa athëbëtatsia yabara pelivaisi

¹⁹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa pacaetuataponame ayajava panexainaejavanexa mapanacuataje. Tsipaji pacatobijianaejitsipa piucubaxaevi. Pacatotasibijitsipatsinua. Pacatonacobetoxotsipanua penacobetoxotsivi. ²⁰ Dioso jane xaniavaetsia patonacuenebavanapare. Nexata Diosojavabelia ayajava pexaniacuene paxainaename athëbëtatsia. Nexata bajarajotatsia apo pacatobijianae tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane.

²¹ Panacuatacia pacatoxaniavaeta panexainaejavanexa, bajarapanacua panejamatabëëthëtovetsina pajamatabënjinavanapaename, jai Jesús pijajivijavabelia.

Pacuenia vajaitaxuto belámparabë yabara pelivaisi

²²⁻²³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxujioaba bitso pejitsipaeyaniva palata yabara pelivaisi

²⁴ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejejavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaeyava palata, jai Jesús pijajivijavabelia.

Pacuenia Dioso pijajivi eveta mapanacuataje yabara pelivaisi

²⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënjinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa. ²⁶ Pataema baratsui monae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsui monae matatoxenetsia papecarajutsinexa daxita xua panamatavenoname! Bजारaxuata pëtsa bitso pasivanajamatabëxainame ëpanexaejavanexa.

²⁷ ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ Bजारaxuata pëtsa bitso pasivanajamatabëxainame ëpanenaxatabijavanexa. Pacanaëjëre pacuenia vitsabapona pematono vayafojava. Bजारapamatono apo natsijumanacuenebi. Penaxatatsijavanexa ata apo natsijumaexanae. ²⁹ Bajayata nacuaevetsinëmi Salomónpijinë, bitso pexainaenëmi. Naitabëtsiaya naxatabiabi bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso

aitabë mapamatonotoxije. ³⁰ Paxamë bevelia panejumecovënëtsivi Dioso, asaëya bepajumecovënëtamè Dioso papecaevetsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata Dioso pacaxatabiana piatibëjava ita pajumecovënëtamè Dioso. ³¹ Bajaraxuata pëtsa jamatabëbëjajia pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa. ³² Pamonae Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpenxabijavanexa ata. Itsiata baitsi jane paneaxa paxainame, athëbëtatsia peccaenë. Bajaraponë yapëtane daxita xua panamatavenoname. ³³ Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravia pitsijavata pacatocopiapatsijitsia. Tsipaji xua caematacabi canacujitsia nacatocopiapatabiaba vajajamatabëcuenebëjainexa, ayaijava baja tsabiabi. Bajaraxuata ajena pitsijavata apo besivajamatabëcuenebëjaisi xua meravia pitsijavata nacatocopiapatsijitsia, jai Jesús pijajivijavabelia.

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi

7 Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:
—Pëtsa panataneme pepacueni bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi ita paxainame, Dioso bitso ayaicuenia pacananeconitsiaexanaejitsipa. ² Itsamonae pexanaejava xaniavaetsia payapëtaenejevamë, pëtsa pabaracuaicuijamë mapacueniaje: “Bajarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene ita paexaname, itsamonae pijinia bajarapacuenia pacabaracuaicuijai tsipae. ³ Bajaraxuata paxamë pepacueni bepaneaneconijibivi nataeya pëtsa pamuxujiobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴ Nexata paxamë ata ayaineconixaneto ita paxainame, nexata itsajivijavabelia apo bepajumaitsimë: “Papibisiacuene exaname, copare baja,” apo bepajamë. ⁵ Yamaxëitojorobiaya saya bepexaniajamatabëcuenevi nataeya pacuaicuijamë tsabiabi. Itsa-

monae pijaneconi yabara pabaracuaicuijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pëtsa matavëjëa patsipaebaponame Dioso pejumelivaisi, pamonae patsipaebi atamë, apo yayatae bajarapalivaisi. Tsipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonae apo yayatae Dioso pejumelivaisi, patsipaebi atamë. Pacuenia marrano ata ita rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonae, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëtaponaejitsia yabara pelivaisi

⁷ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pavajëtaponare Diosojavabelia bajayajebi ata pacuenia bajayajebi ata pajaitsipame panecaxitajarabinexa ita pacatonaxuaba itsacuenejavayo. Pavajëtaponare Diosojavabelia asaëyata pacuenia asaëyata padocodocotsipame baupa papecatobaupatsinexa ita baupa xatatanuta. ⁸ Bajarapacuenia asaëyata pavajëtaponare Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

⁹ Paxamë papebijivimë panexi panexinaevi. Panëxënatonëyo ita pacavajëta panbë, apo panacoxirajutsimë tsipae iboto. ¹⁰ Itsa pacavajëta dujuainëyo, apo panacoxirajutsimë tsipae jomo. ¹¹ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peccaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene ita pavajëtamè.

¹² Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatabëcuene jëpa Dioso Moiséspijinëta penajumecopatsilivaisi. Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

Tsquiribaupayo epatajërëtsialia yabara pelivaisi

¹³ Icatsia Jesús jumaitsi petsutoyenepanajavata pijajivi ayaibitsaëtoخانetojavabelia:

—Pajonemeya tsquiribaupayojavalia panepatsinexa Dioso pijanacuayabelia. Tsipaji pinijibaupa, pinijinamutonua, pata infiernojavabelia. Nexata jivi ayaibitsaëtox-

anetonë bajaraxuayo jonepona. ¹⁴ Pabaupa tsiquirib-aupayo, tsiquirinamutoyonua, bajarapanamuto pata matacabi apo peverevereaejava pexainaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

Pacuenia peubinaenë itsa nacuita, nayapëtane pavirianaecuene yabara pelivaisi

¹⁵ Icatsia Jesús jumaiti petsutoyenepanajavata pijajivi ayaibitsaëtoxanetojavabelia:

—Xania panayajivitaema. Pamona saicayacuenia Dioso pejumelivaisivecua jivi tsipaebapona, bajarapamonaenajumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi patsipaebaponaenajë,” pacajai tsabiabi. Bajarapamonaenajë Dioso pejumecovënëtsivi cuenecataeya najonena paxamëjavaberena. Itsiata baitsi jane pacuenia nevëthë pi-anaepanaevi jamatabëcueneitsi, bajara jamatabëcueneitsi. Jamatabëpacacopatsiaexana Dioso panejumecovënëtsijavami. ¹⁶ Vaxaiti rabaja yapëtanetsi mapacueneje. Peubinaenë itsa nacuita, yapëtanetsi ponaecuai xanepana vajaxaenexa. Nexata bajaraponaenajë cuaixanetsi. Ponaenajë pijinia pibisiacuai nacuita, yapëtanetsi piabejecuene. Nexata bajaraponaenajë apo cuaixaetsi. Nexata pacuenia peubinaenë itsa nacuita, nayapëtane ponaecuai xanepana vajaxaenexa, bajara pijinia pacuenia paxamë payapëtaename pacuenia jamatabëcueneitsi bajarapamonaenajë itsa pacuenaenajë xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponaenajë pexanianaenajë, pexanianaenajë pijinia nacuita vajaxaenexa. Ponaenajë pijinia pibisianaenajë, ëpiabejecuai nacuita. ¹⁸ Pexanianaenajë pexanianaenajë nacuita. Apo nacuita piabejecuai. Pibisianaenajë pijinia apo nacuita pexanianaenajë. ¹⁹ Daxita ponaenajë nacuita pibisiacuai, apo vajaxaenajë, yapëtanetsi. Nexata daxita bajaraponaenajë nicanatsi. Nexata tajuitatsi isotota. ²⁰ Bajara pijinia pacuenia paxamë ata payapëtaename itsa pacuenaenajë xua exanavanapa pamonaenajë saicayacuenia Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi

²¹ Icatsia Jesús jumaiti petsutoyenepanajavata pijajivi ayaibitsaëtoxanetojavabelia:

—Daxita pamonaenajë: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata pamonaenajë exanavanapa taxa, athëbëtatsia peecaenë, pejitsipaecuenaenajë, ëbajarapamonaenajë jonena taxa pijanacuayabetsia. ²² Pamatacabi copiapatsianaenajë pijaneconi pexainaevi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumaiti tsane: “Pata-

jatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsaponaenajë. Nevënëtanua pinijicuene pataexanaenajë, Dioso pesaëta paxanaponaenajë,” nejai tsane jivi ayaibitsaëtoxanetonë. ²³ Itsiata baitsi jane xanë jumaiti tsane bajarapamonaenajë: “Apo pacayapëtaetsi cajena paxamë. Pan-vecuaponaenajë pibisiacuene paneexanabiabivi,” janë tsane bajarapamonaenajë, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

²⁴ Jesús icatsia jumaiti petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsianaenajë patacatsipaebilivaisi, nexata itsa exanaenajë taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaenajë, peyapëtaexaenajë itsajota pijabo exanetsijitsia pibubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponaenajë bo pexanaenajë apo nacueratsi. ²⁵ Bo peveretetsicujinaenajë ayaiemaxaneto jopa. Menianë avajubua tsaponaenajë. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. ²⁶ Pajivi nejumetaenajë ata patacatsipaebilivaisi, apo nejumecovënëtsi tsane, nexata itsa apo exanaenajë tsane taitorobicuenia, bajarapajivi nacueratsianaenajë. Pacuenia tajetabota bo pexanetsinë nacuerata bo pexanaenajë, bajara itsi tsane. Ponë tajetabota pijabo exaneta, yapëtaenajë emarapae pecopiapatsijavanexa, bajaraponaenajë nacuerata bo pexanaenajë. ²⁷ Tsipaji bo peveretetsicujinaenajë ayaiemaxaneto jopa. Menianë avajubua tsaponaenajë. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacuenaenajë pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi patsipaebijava, pejumetaevitsi bitso jamatabëcuenenabenajë. ²⁹ Jesús pejumetaevitsi bitso jamatabëcuenenabenajë tsipaji Jesús livaisi tsipaeba pinijijamatabëcuene pexanaenajë. Apo tsipaebi pacuenia judíovi pecujarubivi tsipaebabiaba.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

8 Itsa baja Jesús runaica petsutojumavetsica, jivi ayaibitsaëtoxaneto pënaponaenajë. ² Nexata imoxoyotatsi bajayajebi bitso peperabëtsabanaenë. Pitabaraenajë pematatabacabëta tonucatsi. Bitso peperabëtsabanaenë jumaiti Jesúsjavabelia:

—Jesús, cacaëjëpa raja tanejamatejemayaexanaenajë. Itsa jitsipame, nejamatejemayaexanaenajë mapavitanevecuajë, jai bitso peperabëtsabanaenajë.

³ Nexata Jesús pecobeta perabëjayalia bitso peperabëtsabanaenajë. Jesús jumaiti bajaraponaenajëjavabelia:

—Jājā, jitsipajē cajena. Jamatejemamē rabaja, jai Jesús bajayajebi bitso peperabētsabanaenējavabelia. Bajarapacuenia Jesús pejumaitisjavata peperabētsabanaenēmi baja perabēxanepananajereca. ⁴ Nexata icatsia Jesús jumaitsi bajaraponējavabelia: —Nejumetaema. Pētsa tsipaebame itsajivijavabelia ata tacajamatejemayaexanaejava. Naitajētsiaremelia jane sacerdotenējavabelia, templobota pepacuenebinējavabelia. Nexata jivi yapētaena pepacuene baja pecavecuajibijava niavitanejavami. Diosonexa rajuremelia ofrenda sacerdotenējavabelia pecavecuajibiaexanaexae niavitanejavami. Bajara tsipaji pacuenia bajayata vajasalinainēmi Moiséspijinē nacaitoroba. Nexata sacerdotenē cataena pecavecuajibijava baja niavitanejavami, jai Jesús bajaraponējavabelia.

Pacuenia vajabitsaē pijacapitán pijabota petonacuenebaponaponaenētsi, Jesús tojamatejemayaexana yabara pelivaisi

⁵ Itsa baja Jesús pata Capernaum tomarabelia, Romano nacupijivajabitsaēvi pijacapitán Jesús imoxoyorenatsi pevajētsinexatsi. ⁶ Vajabitsaēvi pijacapitán bitso ayaicuenia vajēta Jesúsjavabelia. Jumaitsi:

—Petuxanenē, tajajivitonē raja tajabota camata boboca. Bitso cuenabatsi. Piniijicuenia navixaetaeyabiaba, jai.

⁷ Nexata Jesús jumaitsi capitánjavabelia:

—Xanē ponaenajē nijaboyabelia. Nexata catojamatejemayaexanaenatsi nijajivitonē, jai Jesús.

⁸ Nexata capitán jumaitsi Jesúsjavabelia:

—Petuxanenē, xanē raja bitso beveliajamatabēcuenenēnē xamēvecua. Nexata apo xanepanae tsipae ne-jonejava tajaboyabelia. Nexata saya maveliaje ēnijume itorobare. Nexata tajajivitonē netojamatejema tsane. ⁹ Xanē ata xainajē taneitorobabiabivi taneitorobicuenia tajumecovēnētabiabinexa. Xanē ata juya xainajē vajabitsaēvi tajajivi taitorobicuenia tanetoexanabiabinexa. Nexata itsa itorobajē caenē vajabitsaēnē peponaenexa, bajaraponē ponabiaba. Itsa junarenajē itsanē vajabitsaēnē pepatsinexa xanējavaberena, bajaraponē patabiabarēna. Itsa itorobajē tajajivitonē tanetoexanaenexa itsacuenejavayo, nexata netoexanabiaba. Bajara pijinia pacuenia xamē ata nexanaenexa cacaējēpa. Nexata saya maveliaje ēnijume itorobare saya ēnijumeta tajajivitonē tanetojamatejemayaexanaenexamē, jai capitán Jesúsjavabelia.

¹⁰ Jesús itsa jumetane bajarapacuenia capitán pejumaitisjavatsi, nexata Jesús jamatabēcuenenabenajaca. Nexata Jesús jumaitsi pepēnaponaevitsijavabelia:

—Xaniajanē pacuenia pacatsipaebijitsiatsi. Israel nacupijivi nejumecovēnētsi ata, itsiata caeto ata apo caxitajarabaxuabinē xanējavaberena bitso tanesivana-jamatabēcuenecopatsinē pacuenia mapacapitán nesivajamatabēcuenecopatsiaya jumaitsi. ¹¹ Nexata pacatsipaebatsi paneyapētaenexa. Apo judíovi ata raja, ayaibitsaētoxonetonē daxitanacuanēpijivi, Dioso jumecovēnētsiana. Nexata apo judíovi ata capanepae-

natsi Dioso pijanacuayabetsia. Nexata bajarapamonae Dioso pijanacuataatsia, Abrahampijinē yajava, nabani-ana. Isaacpijinē ata, Jacobpijinē ata yajava, nabaniana. ¹² Itsiata baitsi jane judíovi, pamonaē picani Dioso athēbētatsia toxaniavaetatsi peyajavajinavanapaenexatsi, bajarapamonae caranata apo jumecovēnētsi Dioso. Nexata bajarapamonae infiernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepēnaponaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanējavaberena nesivanajamatabēcopatsi-aya jumaitsimē tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonē baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromae-banucaejavatsi camata. ¹⁵ Nexata Jesús cobejayata peromaebanucaevatsi. Jesús pecobejayatsijavata, bajarapova vecuajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

Pacuenia ayaibitsaēto jivi, piavitanevi, Jesús jamatejemayaexana yabara pelivaisi

¹⁶ Itsa baja ajena meravitsia, Jesúsjavaberena tocapatatsi ayaibitsaēto dovathi peyajavajinavanapaevi. Caejumeta saya Jesús caecuenia dovathi vecuacapit-sapa bajarapamonae. Bajarajota jamatejemayaexanana daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinēmi profeta Isaíaspijinē tajēvelia vajunupaeba. Profeta Isaíaspijinē bajayata tajēvelia jumaitsi mapacueniaje: “Bajaraponē nacavecuajibiaexanaena vajaavitanejavami,” jai bajayata tajēvelia Isaíaspijinē Jesús yabara.

Pacuenia picani Jesús jamatabēpēnaponatsi itsamonae yabara pelivaisi

¹⁸ Nexata Jesús itsa tane jivi ayaibitsaēto pematatoy-oronaejavatsi, pijajivi junata pepēnaxuabinexatsi pucaxaneto itsapanabelia. ¹⁹ Nexata bajarapaepatota judíovi pecujarubinē Jesús imoxoyorenatsi. Judíovi pecujarubinē jumaitsi Jesúsjavabelia:

—Petuxanenē, itsabelia poname, capēnaponaenatsi cajena, jai.

²⁰ Nexata Jesús jumaitsi judíovi pecujarubinējavabelia:

—Itsa nepēnaponaejitsipame, apo napatabiabinē tsipae tajabota nenacueraevetabiabinexa. Tsipaji tajabo apo xainaenē. Namo pijamēthēanē xaina pepatabiabinexa pemajitabiabinexa. Baratsui ata pe-

matapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubivijavabelia.

²¹ Nexata Jesús pijajiviyajuvënë jumaitsi Jesúsjavabelia:

—Tajatuxanenë, caepatoyo abaxë necopare tamëthësinexa taxa petëpaenë, jai.

²² Jesús nexata jumaitsi pijajivitonëjavabelia:

—Naxanitsia. Nepënaponare. Copare matacabi apo peverevereaejava apo pexainaevinexa pemëthëcaenexatsi nijamonaemi itsa tēpa, jai Jesús pijajivitonëjavabelia.

Pacuenia Jesús itaveta joviboxaneto, malataca yajava, piyajavami yabara pelivaisi

²³ Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. ²⁴ Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëaberena mera epabajarabapona. Itsiata Jesús jamatejema majitanuca. ²⁵ Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. ²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijinëbeje, dovathivi peyajavaponaponaenëbeje, Jesús vecuacapitsapa Gerasa nacuata yabara pelivaisi

²⁸ Jesús pijajivi barëpata pucaxaneto itsapanabelia, Gerasa nacuayabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava. ²⁹ Nexata dovathivi peyajavaponaponaenëbeje vavajibeje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaematacabinexavajënaeya patame patanenaneconitsiaexanaenamëbeje? jaibeje Jesúsjavabelia dovathivi peyajavaponaponaenëbeje.

³⁰ Nexata bajarajota, imoxoyo petsutojavata, marranobitsaëtoхането xaevanapa. ³¹ Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëtoханетоjavabelia, jai.

³² Nexata Jesús jumaitsi dovathivijavabelia:

—Paponare baja panejonenexa marranobitsaëtoханетоjavabelia, jai.

Nexata bajaraponëbeje dovathivi vecuapitsapatsibeje. Nexata baja marranobitsaëtoханетоjavabelia junua dovathivi. Nexata daxita bajara pamarranobitsaëtoханетоми cujinaeyeca. Pucaxaneto itapajanitua areca othopareca. Bajarajota daxita marranobitsaëtoханетоми meneta bubuna.

³³ Bajara pamarranobitsaëtoханетоми pevetavana-paevi, rëcëpeca. Itsa bajarapamonae Gadara tomabilia pata, tsipaeba pacuenia tane. Tsipaebanua pacuenia Jesús dovathivi vecuacapitsapa dovathivi peyajavaponaponaenëbeje. ³⁴ Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecuca, jai bajarapamonae Jesúsjavabelia tsipaji cujunavatsi.

Pacuenia Jesús jamatejemayaexana petabusipacuenabinëtsi yabara pelivaisi

9 Jesús runareca jera ënëabereca. Nicabilia puca itsapanabelia. Pata nexata pijatomarabelia. ² Bajarajota Jesús tocapatatsi petabusipacuenabinëtsi. Pacamayota bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, jamatabëcuenenabëyamëre. Pibisiacuene rabaja nexanaeconimi cavecuajibiaexanatsi, jai Jesús petabusipacuenabinëtsijavabelia.

³ Nexata judíovi pecujarubivi itsa jumetaeyena bajarapacuenia Jesús pejumatsijava, najamatabëxainena.

—Maponë Jesúsje Dioso apo pejitsipaecuenia cuaicuaijai, jamatabëjai tsenae judíovi pecujarubivi Jesús yabara.

⁴ Jesús jamatabëcueneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene. ⁵ Paxamë apo pacacajëpa ata itsajivi pibisiacuene pexanaeconimi panevecuajibiaexanaenexa, pacacajëpa picani saya jema panejumatsinexa petabusipacuenebinëtsijavabelia mapacueniaje: “Cavecuajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo yapëtae tsipae saya jema panejumatsijava. Itsiata

baitsi jane itsa apo pacacaējēpae panejamateje-mayaexanaenexa petabusipacuenebinētsi, acuenebi panejumaitsinexa bajaraponējavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimē ata, itsa apo jamatejema tsipae bajaraponē, nexata daxitajivi pacayapētaejitsipa apo papecacāējēpaecuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanē Daxitajivi Pematapijinēnē, mapanacuata necaējēpa tavecuajibiaexanaenexa itsajivi pibisiacuene pexanaeneconimi ata pacuenia baja exanajē maponējavabeliaje. Nexata patanecueneyapētaenexamē tanecaējēpaecuene tavecuajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianē maponēje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinēt-sijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinēmitsi nonotapuna. Pijaboyabelia baja pona. ⁸ Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomē, bitso ayaijamatabēcuenenēmē. Tsipaji jivi caējēpaeyaexaname pinijicuene pexanaenexa, jai.

Pacuenia Jesús pijajivitonēnexa junata Mateo yabara pelivaisi

⁹ Jesús baja vecuapona itsajota jamatejemayaexana petabusipacuenabinētsi. Nexata Jesús penajetarucavata taeyeta Mateo. Mateo gobierno pejamatabēcuene impuestomatamo pematamoyanijobabiabinē. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepēnaponare, jai.

Jejai Mateo. Nexata nonotapuna. Mateo baja napona Jesús pepēta.

¹⁰ Nexata Mateo junata Jesús pebarēnabaninexa pijabota. Nexata Mateo pijabota Jesús pexaejava naxane. Mateo pijabota naena ayaibitsaēto gobierno pejamatabēcuene jivijavabelia impuestomatamo petomatamoyanijobivi. Itsamonae ata nanabane, piamajamatabēcuenebejevi. Jesús pijajivi nayajavaeca bajarapamesajavata. ¹¹ Nexata fariseovi itsa tane bajarapacuenia, jamatabēcuenenavēxaniabiaya jumaitsi Jesús pijajivijavabelia:

—Papecacujarubinē rabaja Jesús naneconita Diosojavabelia. Tsipaji gobierno pejamatabēcueneta impuestomatamo pematamoyanijobabiabivijavata, piamajamatabēcuenebejevijavatanua, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumaitsijava. Nexata Jesús jumaitsi fariseovijavabelia:

—Pevaēbinē raja apo vaēbi pejamatabējemavi. Pevaēbinē raja piavitanevi vaēba. Bajara pijinia xanē ata itsinē. Sivapatajopajē tajunatsinexa pibisiajamatabēcuenevi pecapanepaenexatsi Diosojavabelia.

¹³ Paponare. Palebianame Dioso pejumelivaisibaxuto. Nexata payapētaename pajamatabēcuene yabara jumaitsi Dioso pejumelivaisibaxutota mapacueniaje: “Jitsipajē paneitaxutotsoniataejava itsamonae. Apo jitsipañē saya patanetobeyabiabijavamē dajubicuene ofrendacuenia patanerajutabiabinexamē,” jai Dioso pejumelivaisibaxutota. Xanē raja apo sivapatajopañē tajunatsinexa pamonaē baja aneconijibi tsavanapae. Biji rajane sivapatajopajē tajunatsinexa pijaneconi pexainaevi. Junataponajē bajarapamonae pecopabinexa pibisiacuene pexanaejava penajamatabēcuenepeñeyorotsinexa Diosojavabelia, jai Jesús fariseovijavabelia.

Pacuenia Jesús yanijobatsi pamatacabibeje jivi vajētaponā Diosojavabelia pexaejava apo pexaeyabiabixae yabara pelivaisi

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

—Petuxanenē, paxanē pataxaejava apo paxaeyabiabinē pamatacabibeje pavajētaponajē Diosojavabelia. Bajara pijinia itsi fariseovi ata pamatacabibeje vajētaponā Diosojavabelia. Pexaejava apo xaeyabiabi. ¿Detsa xuajitsia xamē nijajivi pamatacabibeje vajētaponā Diosojavabelia pexaejava xaeyabiaba? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxē yajavaecatsi pejananacasabinē. Itsiata baitsi jane pejananacasabinē itsa tsimaxēpatsipatsi pevecuacapon-aenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabēxainaejitsipa pevecuacaponaxaetsi. Bajara pijinia itsi tajajivi ata. Tayajavaponaponaeepato abaxē apo atsobabiabi pexaejava pamatacabibeje Diosojavabelia vajētaponā. Itsiata pamatacabi xanē necaponae baja bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabēxainaeaxae, jai Jesús Juan pijajivijavabelia.

¹⁶ Nexata Juan pijajivi perujamatabēcuene baja pe-navecuacopatsinexa, Jesús livaisi tsipaeba comparacióncuenia, Juan pijajivi pejumecovēnētsinexa ēpejanalivaisi, Jesús petsipaebilivaisi. Juan pijajivi anijajamatabēcuenebeje pexainaeyaniva, perujujamatabēcuene baja pecopabinexa, Jesús livaisi tsipaeba comparacióncuenia. Perujamatabēcuene yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapana perujunaxatatsiesetojavabelia, nexata pejanapana yanarobotsipa perujuesetojavaverena. Nexata bi-

ji bitso pinijivojoto titinaejitsipa. ¹⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bjarapacuenia Jesús jumaiti Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

Pacuenia Jesús copiaya namutoepatota jamatejemaayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

¹⁸ Jesús livaisi petsipaebanucavata Juan pijajivijavabelia, judíovi penacaetuatabiabibo pevetsinë parena Jesúsjavaberena. Nexata bajaraponë Jesús pitabarata yayataeya pematabacabëta nucajunua. Jumaiti Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

¹⁹ Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona.

²⁰ Nexata Jesús namutua penajetarucavata, pepëneverena imoxoyotatsi petiriva, piavitaneva. Bajarapova pijanacuenecapunaecujinaetsi doce baja pavaibeje xaina. Nexata bajarapova Jesús pepënevèlia ponataba, jivibitsaëtoxfaneto tuatuajëjavalia. Nexata bajarapova tojayataba Jesús penaxatatsijavacopia.

²¹ Bjarapacuenia tojayataba Jesús penaxatatsijavacopia tsipaji bajarapova jamatabëjumaiti mapacueni-aje:

—Itsa tojayatabianajë Jesús penaxatatsijavacopia, nexata tavitanejavami nevecuaajibi tsane, jamatabëjai bajarapova.

²² Nexata Jesús napënyorotaxuaba. Taenuta bajarapova. Nexata Jesús jumaiti bajarapovajavabelia:

—Jamatabëcuenebarëyamëre. Xamë nesivajamatabëjumaitimë: “Itsa tojayatabianajë Jesús penaxatatsijava, nexata tavitanejavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bjarapacuenia Jesús pejumaitisjavata bajarapova jamatejema baja. ²³ Bajaraxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayomi pemëthëtsinexa piobinexa. Tanenua jivi bitso pinijicuenia pematantueyabavanapaejava petëpaevayomi.

²⁴ Nexata Jesús jumaiti bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitisjava. ²⁵ Jesús nexata bajarapamonae bovecua pitsapaeyaexana. Nexata itsaxuayolia petëpaevayomi boca, Jesús joneya. Cobepita petëpaevayomi. Bajarapovayo baja namatacota. ²⁶ Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabiabibo pevetsinë pijabovecuaje, anijanëbeje bitso pitaxutotsëcënaenëbeje Jesús pënaponatsi. Bjaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaiibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaiti bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitisibeje Jesúsjavabelia:

—Jājā, payapëtanijibeje cajena, jaiibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumaiti bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuene copatsiaya panesivanajamatabëcainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaiti:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecuaje pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaebiaexana apo pecuaicuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsëcënaenëmibeje, nexata icatsia itsamonae Jesús tocapare-natsi apo pecuaicuaijainë. Bjaraponë dovathi peyavajaponaponanë. ³³ Nexata apo pecuaicuaijainë Jesús dovathi itsa vecuacupitsapa, cuaiicuaijai baja xaniavaetsia. Nexata petaevitsi bitso jamatabëcuenenabenajaca. Najumaiti bajarapamonae:

—Caeto ata cajena Israel nacuata itsajivi ata apo tae mapitsicueneje, najai bajarapamonae.

³⁴ Itsiata baitsi jane fariseovi jamatabëcuenenavëxaniabiaya jumaitsi Jesús yabara:

—Mara ponëje dovathi jivivecua capitsapabiaba dovathivi pepo penamatacaitorobinë pesaëta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

³⁵ Jesús najetaruca daxita tomaranëjava, tsiquirito-maraxijava ata. Nexata bajarapatomaranëjava judíovi penacaetuatabibonëjava pexanialivaisi Jesús jivi tsi-paebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitane pexinaevimi.

³⁶ Jesús jivi itsa tane, itaxutobejibiatane. Tsipaji jivi bitso baja cajena cuerana. Apo caëjëpaetsinua jivi penatoexanaenexa itsacuenjavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoxoneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

³⁷ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayajava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoxoneto. Itsiata baitsi jane Dioso panetonacuenebivi pacaeviyomëbeje saya. ³⁸ Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

Pacuenia Jesús pijajivi ayaibitsaëtoxonetoyajuvënëvi itapeta saya doce ponëbeje apóstolevinexa yabara pelivaisi

10 Jesús pijajivi ayaibitsaëtoxonetoyajuvënëvi junata saya doce ponëbeje Jesús pebarënacaetutsinexa. Jesús pijajivi pecaëjëpaejamatabëcuenetsi jamatabëcuenecaëjëpaeaxana dovathi peyajavajinavanapaevi pevecuacapitsapaponaenexa, pejamatejemayaexanaponaenexanua daxitaviriavitane peca-punaevitsi.

² Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapijinë. Itsanëbeje pijinia Santiagobeje Juanbeje nacabananëbeje, Zebedeo pexënatobeje. ³ Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobierno pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënato. Itsanë pevënë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevënë Judas Iscariote. Bajaraponë bexëajavabelia canajetsijitsiatsi Jesús pijavajabitsaë pecobeyabelia pebaxuabinexatsi.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

⁵ Jesús pijajivi pitorobivajënaeya jumaitsi pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. ⁶ Paponare jane Israel nacuapijivijavabelia. Pacuenia ovejabitsaëtoxoneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. ⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatocabinexa. ⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacaëjëpaeaxanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata.

¹⁰ Pëtsa pacaponame panijadoro ata. Saya pajumaponename caenaxatatsi. Panenataxuxatatsijava ata, pataxunaponaename caejava. Naebayo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

¹¹ Itsa papatabiabianame pinijitomarata, tsiquirito-marayojavata ata, bajarajota pajaitabiabianame ponë peyaiyataenëtsi. Nexata bajaraponë pijabota pama-jitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename.

¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavana-paenexa,” pajamë tsabiabi tsane. ¹³ Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diosojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuat-sapërëvarëbianame. Bajarapacuenia itsa panataxuat-sapërëvarëbianame, bajarapatomarapijivi yapëtaena Diosojavabelia penaneconitsicue ne apo papecacopiapitsixae papecanamuxunaevetsinexa panetsipaebili-

vaisi. ¹⁵ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaeivi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodomata tomarapijivimi, Gomorra tomarapijivimi ata, bajarapaneconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

Pacuenia Jesús pijajivi bejiobiaexanaejitsiatsi yabara pelivaisi

¹⁶ Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiabivijavabelia. Pacuenia ovejaji tsiayaitsi itsa jinavanapa pianaepanaevi nevëthë tuatuajëata, bajarapaitsimë tsane. Nexata pacuenia unupijivi nayajivitaeyajinavanapa pitsacueni abiyantivatsi, bajara paitsimë tsane. Pacuenia ata ucuaneconijibia jinavanapa, bajara paitsimë tsavanaepae tsane. ¹⁷ Xania baja tsane. Patajajivixaemë raja jivi pacaneconitsiana papecananeconitsiaexanaenexa. Nexata itsajota nacaetuatabiaba tomara pevetsivi, bajarabelia pacacaponae. Judíovi penacaetuatabiabi bonëjava pacajumatitibabeyabiabiana penaneconitsivi pejumaconitabiabimacata. ¹⁸ Patajajivixaemë pacanubiananua nacuaevetsivi pitabarata, presidentevi pitabarata ata. Bajarajota nexata xanë talivaisi patsipaebianame bajarapamonaejavabelia, apo judíovi ata pitabarata. ¹⁹ Itsiata baitsi jane itsa pacanubiana nacuaevetsivi pitabarata, pëtsa pajamatabëbëjamë panenayajivicuaicuaijainexa bajarapamonaejavabelia. Tsipaji raja paepatota panayajivicuaicuaijamëjitsia, bajarapaepatota Dioso pejamatabëcueneta pacacuaicuaijaiyaexanaena. ²⁰ Itsa panayajivicuaicuaijamë tsane, paxamë panijacuata apo pacuaicuaijamë tsane. Espiritu Santo raja pacacuaicuaijaiyaexanaena.

²¹ Itsamonae pematapijivi, pejuyapijivi ata, canajetsiana nacuaevetsivijavabelia pebexuabinexatsi. Itsamonae nacoxicanajetsiana nacuaevetsivijavabelia pebexuabinexatsi. Itsamonae canajetsiana paxa, pena ata, nacuaevetsivijavabelia pebexuabinexatsi.

²² Daxita nacuapijivi pacaitoya tsane patajajivixaemë. Pajivi bejiobiaexanae atatsi tsane, itsiata itsa casaë tsaponaponae tsane tanejumecovënëtsijava, bajarapajivi capanepaenatsi Dioso pijanacuayabetsia. ²³ Itsa patomarata pacabejiobiaexanaena, bajarapatomaravecua parëcëpecaename itsatomarabelia. Xaniajanë pacuenia pacatsipaebijitsiatsi. Daxita Israel nacuata penaetomaranëjava abaxë patsipaebiveretsinejevamë pexanalivaisi, xanë, Daxitajivi Pematapijinë, itacarajeta icatsia patsianicajë.

²⁴ Itsajivi ata apo jamatabëcuenematatoxenetsi pecujarubinëtsi. Itsajivi ata pijinia itsanë itsa pijajivitonë, apo jamatabëcuenematatoxenetsi pijatuxanenë.

²⁵ Pacuenia pecujarubinë itsamonae copiaya bejiobiaexanatsi, bajarapacuenia icatsia bajaraponë pecu-

jarubivi ata bejiobiaexanaenatsi. Pacuenia petuxanenë copiaya bejiobiaexanatsi, bajarapacuenia icatsia pijajivitonë ata cotocaevi bejiobiaexanaenatsi. Xanë panijatuxanenë: “Beelzebú, daxita dovathivi pijatuxanenë,” nejai tsabiabi itsamonae. Nexata pijinia patajajivixaemë bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

Pacuenia Jesús pijajivi tsipaeba pecujunaviyaniva pebexuabijavatsi yabara pelivaisi

²⁶ Icatsia Jesús jumaitsi pijajivijavabelia:

—Pëtsa pacujunavame jivi, pacaatiobi ata. Daxita xua jivi muetsia pibisiacuene exana, bexëjavabelia cueneyapëtaeponaenatsi daxitajivi. ²⁷ Palivaisianë muetsia vajeapatojavata pacatsipaebaponatsi, bajarapalivaisianë paxamë pinijijumeta patsipaebaponae name jivi penacaetuatabiabiavata. ²⁸ Pëtsa pacujunavame jivivevi ata. Bajarapamonae pacabexuabi ata tsipae, acuenebi matavëjëa papecaitsacueni abinexa pepo panejamatabëcuenejavabelia. Biji rajane pacujunavare Dioso, ponë caëjëpatsi papecaxuabinexa infiernojavabelia papecabexuabicujinae.

²⁹ Anijanëbeje baratsuitobeje namatamota saya caepalatanëyo. Itsiata baitsi jane caenë ata baratsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva baratsui ata.

³⁰ Dioso cajena bitso pacaasiva baratsui matatoxenetsia. Nexata panematanatoxi ata, caematanatoyo canacujitsia, Dioso namataëjëta. ³¹ Bajaraxuata pëtsa pacujunavame itsacuenejavayo ata. Tsipaji paxamë Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxinae Jesús pijajivicuene yabara pelivaisi

³² Icatsia Jesús jumaitsi pijajivijavabelia:

—Daxita pamonaetajajivi, jivi pitabarata itsa navajunupaebiana tajajivicuene, xanë ata vajunupaebiana jë bajarapamonae tajajivicuene taxa, athëbëtsia peecaenëjavabelia. ³³ Pamonaetajajivi: “Xanë cajena Jesús apo pijajivitonë,” jai tsane, nexata pijinia bajarapamonae yabara xanë jumaitsinë tsane taxa Diosojavabelia: “Mara pamonaetajajivije,” janë tsane, jai Jesús pijajivijavabelia.

Pacuenia Jesús apo penajuajumecovënëtsixae, nacaemonae ata apo najamatabëcuenëjëpae tsane yabara pelivaisi

³⁴ Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenëjëpaeya pejinavanapaeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenëjëpae tsane pamonaetajajivijavabelia apo nejumecovënëtsi, nacaemonae ata.

Napijavajabitsaë tsane namataenetsia. ³⁵ Xanë apo tanenajuajumecovënëtsixaebeje, pebibeje paxabeje apo najamatabëcuenejëpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejëpaebeje tsane. Pamebeje ata pecopenabeje apo najamatabëcuenejëpaebeje tsane. ³⁶ Nexata xanë apo tanenajuajumecovënëtsixae, caejivi canacujitsia beprijavajabitsaëjivi tae-natsi pijamonaejivi ata.

³⁷ Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexënato, pexënatoyo ata, piasivajava matatoxenetsia, bajarapajivi apo tajajivi tsane. ³⁸ Pajivi nejumecovënëtsi ata, pecajunavi apo nepënaponae tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejioxiaexanaeyanatsi, pebeyaxuabiyativatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

Pacuenia Dioso matamotsijitsiatsi pamonaë xaniavaetsia copiapita Jesús pijajivi yabara pelivaisi

⁴⁰ Icatsia Jesús jumaiti pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi necopiapitsiana, bajaraxua taxa Dioso tane pecopiapitsijavatsi.

⁴¹ Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacuenë matamotsianatsi Dioso, jai Jesús pijajivijavabelia.

Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi

11 Jesús baja najumevereta pijajivi doce ponëbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuata penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia.

³ Juan itoroba pijajivi peyani-jobinexa Jesúsjavabelia. Nexata Juan pijajivi jumaiti Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebaona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaiti Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia. ⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpavimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeconomyvecuatipaebaponajë bepejiojivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. ⁶ Pajumaitsimënu tsane Juanjavabelia: “Jesús raja jumaiti: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaiti jivijavabelia mapacueniaje:

—Itsa paponame petusato nacuayabelia, pamatacabi Juan ponapona petusato nacuata, ¿detsa pitsicuene pajamatabënaponaremëlia panetaenexa bajarajotalia? ¿Paponaremëlia tsaja saya panetaenexa musuli penajëabijava jovibota? ⁸ Itsa apo paponaremëlia panetaenexa musuli penajëabijava jovibota, ¿detsa nexata pitsicuene panetaenexa paponaremëlia? ¿Paponaremëlia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenieje. Pamonaë naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava. ⁹ ¿Detsa nexata xua pajamatabënaponaremëlia panetaenexa petusato nacuayabelia? Paponaremëlia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuenë jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitisijava ata xanëjavaberena Juan yabara, Dioso pejumelivaisibaxutota jumaiti mapacueniaje:

Itorobianajë nevajënaeyabelia tanejumelivaisipabinënexa, jivi pecatsivajënaë najamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisi paebanajetarucavexa yabara.

¹¹ Xaniajanë pacuenia pacatsipaebijitsiatsi. Juan ayai-jamatabëcuenenë mapanacuataje. Nexata bajayata Juan pevajënaeya paprofetavi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa nejumecovënëta tacapanepaejavanexa, bajarapajivi ayaijamatabëcuenejivi Dioso exanaenatsi Juan matatoxenetsia.

¹² Juan jivibautisabinë petaxuxuabijavaveliacujinae, Dioso pitorobilivaisi jivi petsipaebanajetaruaejava mapamatacabijavaberena ataje, ayaibitsaëtoخانeto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonae pejumecovënëtsiyaniva Dioso pitorobilivaisi. ¹³ Juan penaexanaevajënaeya, daxita Diosojumepaebivimi profetavi tajëvelia vajunupaebapona itsamatacabi Dioso pijajivi pevetsijavanexa. Dioso Moiséspijinëta penajumecovetsilivaisi ata, tajëvelia vajunupaeba Dioso pijajivi pevetsijavanexa. ¹⁴ Itsa baja jamatabëpajumecovënëtaeme, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaitsi mapacueniaje: “Elíaspijinë icatsia patsiana,” jai. Bajarapacuenia tajëvelia itsa jumaitsi, Juan jivibautisabinë yabara jumaitsi. Tsipaji pacuenia jamatabëcueneitsi profeta Elíaspijinë, bajara jamatabëcueneitsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia. ¹⁵ Pajivi jamatabënejumeyapëtane patacatsipae-bilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: “Bajarapamonae abaxë saya bepejevaxijivixi, pajivixi tomara tuatuajëjaba banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. ¹⁷ Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. ¹⁸ Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “Juan raja dovathi yajavaponapona!” pajamë tsabiabi jamatabëcuenenavëxaniabiaya. ¹⁹ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “Pataema maponëje! Ayaijava xaeyabiaba. Ayaira matavëjëa apaeyabiabanua piaita-

jibinexa. Barënajamatabëcuenejëpanua gobierno pejamatabëcuene impuestomatamo pematamoyanijoba-biabi. Pamonaeta piagamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcuene-ta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniajajamatabëcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovënëtsitsi yabara pelivaisi

²⁰ Itsatomaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatomaranëpijivi apo copabi pibisiacuene pexanabiabi- java. Apo najamatabëcuenepënëyorotsi Diosojavabelia. Nexata Jesús ajumesaëya jumaitsi bajara patomaranëpijivijavabelia:

²¹ ¡Bitso bepajibimë tsane paCorazín tomarapijivimë! ¡Bitso bepajibimë tsane paBetsaida tomarapijivimë ata! Pinijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabi- java. Apo panajamatabëcuenepënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneita- jëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexanabiabineconi. ²² Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë pinijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëtota matatoxenetsia Dioso bitso ayaicuenia pacananeconitsiaexanaena. ²³ Paxamë paCapernaum tomarapijivimë, jamatabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infiernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsi-

pa pibisiacuene pexanaejava. Naja-matabëcuenepënyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeneconi yabara. Nexata abaxë mapamatacabi ataje jivi jinavanapaejitsipa bajarapatomarata. ²⁴ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainae-vi, ayaiacuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaiacuenia pacananeconitsiaexanaena, jai Jesús patomarapijivijavabelia apo jumecovënëtsitsi.

Pacuenia Jesús pijajivi junata pejamatabëcuenesaëyaexanaenexa pejamatabëcuenecueranae-javavecua yabara pelivaisi

²⁵ Jesús pevajëtsijavata paxa Diosojavabelia jumaitsi: —Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamona bitso apo penacujarubivi ata, yapëtaeayaexanaename nevetsijavanexa daxita nijajivi mapanacuataje. Bajarapamonae yapëtaeayaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicuene yabaraje. ²⁶ Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

²⁷ Icatsia Jesús jumaitsi pijajivijavabelia: —Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcueneitsinë, Dioso pexënatonë. Caenë taxa Dioso nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcueneitsi. Caenënë xanë, pexënatonë, jamatabëcueneyapëtaniji. Pamonae tojitsipajë tayapëtaeayaexanaenexa pacuenia taxa Dioso jamatabëcueneitsi, bajarapamonae ata yapëtaeayaexanaponaenajë. ²⁸ Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacuene paneexanabiabijava yabara, xanëjavaberena paponare paneajamatabëcuenesaënexa icatsia. ²⁹ Bueyubeje banavësijumacaevetabeje petsivësijumabuatsinexatsibeje yugovënëjava penacuenebinexabeje. Bajara pijinia pacuenia paxamë ata panajamatabëcuenecaevere patacatsijamatabëcuenebuatsinexa patacatsipaebilivaisi. Panejumecovënëtsianame pacuenia pacaitorobatsi patanetonacuenebinexamë. Nexata panevajënaeyabelia panejamatabëcueneyapëtaeponaename. Tsipaji xanë xaniavaetsia pacatsipaebaponaenatsi. Xanë beayaijamatabëcuenenë apo nataenë. Nexata bajarajota panajamatabëcueneevetsianame paneajamatabëcuene-saënexa icatsia. ³⁰ Pacuenia bueyu tsivësijumabuatsi yugovënëjava petoyapëtanepanaenexatsi penacuenebijava, bajara pijinia pacuenia paxamë ata

pacatoyapëtanepanaeayaexanaenatsi paneexanaenexa xua pacaitorobijitsiatsi, jai Jesús pijajivijavabelia.

Pacuenia Jesús pijajivi trigoxu namutua siricanajetarubena penacueraevetsimatacabita yabara pelivaisi

12 Judíovi penacueraevetsimatacabita Jesús, pijajivi yajava, najetaruca trigo pabianëjava. Jesús pijajivi bitso piajani. Nexata trigoxu siricanajetarubena. Xuxaeyabuatapona. ² Nexata fariseovi tane Jesús pijajivi pesiricanajetarubenaëjava trigoxu. Nexata fariseovi jumaitsi Jesúsjavabelia:

—Taema mapamonaëje. Dioso Moiséspijinëta penajumecopatsilivaisi vajanacaitavetsicuene nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacueneje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarpacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso piajani? ⁴ Davidpijinë joneya Dioso pijatemploboyalia. Nexata Dioso pijatemplobonëta, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyani-va Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia. ⁵ ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacuenebivi, penacueraevetsimatacabita ata apo nacueraevetabiabi. Penacueraevetsimatacabita sacerdotevi nacuenebabiabi ata templobota, itsiata apo naneconitsi Diosojavabelia. ⁶ Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobomatatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajë paneitaxutotsoniataenexa itsamonae ata. Apo jitsipaenë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dios Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso pi-ajanixae, trigoxu xane. ⁸ Nexata xanë, Daxitajivi Pe-matapijinënë, netoxanepana cajena tatsipaebinexa xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

**Pacuenia Jesús jamatejemayaexana pebi pecobetsa-
saquenaenë yabara pelivaisi**

⁹ Trigo pabianëjavata Jesús livaisi petsipaebicujinae fariseovijavabelia, Jesús baja vecuapona pabianë. Nexata Jesús joneya judíovi penacaetuatabiboyalia.

¹⁰ Nexata bajarajota pebi naeca, pecobetsaquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcueneëjëbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaiti fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaiti jane? ¹² ¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaiti pecobetsaquenaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaejavami baja ajibi. ¹⁴ Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabibovecua. Nexata jane baja fariseovi najumejaita Jesús pebeyaxuabinexatsi.

**Pacuenia Diosojumepaebinë profetanë bajayatami
tajëvelia vajunupaebatsi Jesús yabara pelivaisi**

¹⁵ Jesús jamatabëcueneypëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëtoxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebianiva itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi itsa jumeitaveta petsipaebianiva itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaiti. Dioso pejumaitisijava Jesús yabara profeta Isaíaspijinë bajayata tajëvelia jumaiti mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenebarëyanë. Espiritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsi-
paebiana tananeconitsiaexanaejavanexa daxita pibisiacuene pexanaevi. ¹⁹ Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. ²⁰ Pamonae xanë tajumelivaisi pejumecovënëtsijava abaxë apo aja-

matabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabito copiapatsianatsi bajaraponë pijajivi pevetsimatacabineca, xaniavaetsia bajaraponë evetsiana daxita pijajivi.

²¹ Nexata daxitajivi, apo judíovi ata, sivanajamatabëcueneconpatsianatsi bajaraponë peganepaenexa, jai bajayata tajëvelia profeta Isaíaspijinë Dioso pejumaitisijava Jesús yabara. Bajarapacuenia bajayata tajëvelia jumaiti Isaíaspijinë peyaquinaebaxutota.

**Pacuenia itsamonae Jesús yabara jamatabëcuene-
navëxaniabiaya jumaiti: “Beelzebú raja pesaëta Jesús
dovathi jivivecua capitsapapona,” jai yabara pelivaisi**

²² Jesús tocapatatsi bitso pitaxutotsëcënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja. ²³ Jivi itsa tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaiti Jesús yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonae Jesús yabara.

²⁴ Nexata fariseovi itsa jumetane bajarapacuenia jivi pejumaitisijava, fariseovi jumaiti jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuene-
navëxaniabiaya Jesús yabara.

²⁵ Jesús jamatabëcueneypëtane pacuenia fariseovi sivanajamatabëxainatsi. Nexata Jesús jumaiti fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepjavajabitsaënë taejitsipatsitsi pijajivi. Itsajamatabëcuene vecuaxinaejitsipa pijajivi. Pesaë ata apo xainaponae tsipae. ²⁷ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitisijava xanë yabara. ²⁸ Espiritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsisijava paxamë tuatuajëta, jai Jesús fariseovijavabelia.

²⁹ Fariseovi pecanaējētsinexa Jesús bitso pi-asaēnēcuene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caējēpaetsi pejonenexa bitso pi-asaēnē pijaboyalía peyacajērētsinexa xua xaina pijabota. Itsiata itsa patsipa bajaraponē matatoxenetsia bitso piasaēnē, nexata cobecētabuatsipatsi. Taxucētabuatsipatsi yajava. Matapania bajarapacuenia yacajērētsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaējivi. Tsi-paji apo taneyavenonaeyacaetuatsixae, jivi nevecuanacayajata Dioso picani pejumecovēnētsiviminexa.

³¹ Bajaraxuata pacatsipaebijitsiatsi, Dioso caējēpatsi daxitajivi pibisiacuene pexanaeconimi pevecuaajibi-aexanaenexa. Pibisiacuenia jivi Dioso baracuaicuaijai ata, bajarapaneconi ata Dioso caējēpatsi pevecuaajibi-aexanaenexa. Itsiata baitsi jane pajivi pibisiacuenia baracuaicuaijai Espiritu Santo, pacuenia paxamē pajumaitsimē, Dioso apo vecuaajibiaexanae tsane bajarapaneconi. ³² Pajivi pibisiacuenia nebaracuaicuaijai ata, xanē, Daxitajivi Pematapijinēnē, bajarapaneconi ata itsiata Dioso vecuaajibiaexanaenatsi itsa vajēta Diosojavabelia. Itsiata baitsi jane pajivi pibisiacuenia baracuaicuaijai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenē itsa nacuita, nayapētane pavirianaecuene yabara pelivaisi

³³ Icatsia Jesús jumaitsi fariseovijavabelia:

—Pexaniavirianaenē itsa ubatsi, nacuita pijinia pexaniacuai. Ponaē pijinia pibisianaē, nacuita pibisiacuai. Caevirianaē canacujitsia yapētanetsi itsa nacuita.

³⁴ Bajara pijinia pacuenia paxamē ata dovathi papijajivimē, panayapētaneme panejamatabēcuenebejejava. Nexata apo pacacajēpae panecuaicuaijainexa pexaniacuene yabara. Pajamatabēcuene bēpēnēa panejamatabēēthētota panajamatabēxainame, panecuibovojotuatsina pitsapa panecuaicuaijainexa. ³⁵ Itsamonae pijinia majamatabēcueneitsije. Pacuenia vajaubinaē, pexanianaē, pexaniacuai pijinia nacuita, bajara pijinia jamatabēcueneitsi itsamonae. Ponē pexaniajamatabēcuenenē, pexaniacuene yabara cuaicuaijai. Tsi-paji pexaniajamatabēcuene xaina pejamatabēēthētota. Ponē pijinia pibisiamatabēcuenenē pibisiacuene yabara cuaicuaijai. Tsi-paji pibisiamatabēcuene najamatabēxaina pejamatabēēthētota. ³⁶ Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaēvi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuaijajava yabara.

³⁷ Pibisiacuenia panecuaicuaijajava yabara Dioso pacananeconitsiaexanaena. Pexanialivaisi itsa pacuaicuaijamē tsabiabi tsane, nexata paneconijibimē tsane Diosojavabelia, jai Jesús fariseovijavabelia.

Pacuenia pibisiamatabēcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi

³⁸ Fariseovi, judíovi pecujarubivi ata, jumaitsi Jesús-javabelia:

—Jesús, pajitsipajē patataenexa Dioso pesaēta pinijicuene nexanaejava, patacayapētaenexa pepacuene Dioso athēbēvetsica pecaitorobinēcuenetsica, jai bajarapamonaē.

³⁹ Jesús nexata jumaitsi bajarapamonaējavabelia:

—Bitso pibisiacuene paneexanaēvi, Dioso panejumecovēnētsijavami panecopabivi. Paneitorobame picani Dioso pesaēta pinijicuene taexanaejava patacatsitaexanaenexa pataneyapētaenexamē Dioso pepacuene athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinēmi profeta Jonáspijinē exanatsi, bajara ēpitsicuene taneexanaejava pacatsitajētsianatsi. ⁴⁰ Bajayata Jonáspijinē boca ayainē dujuainē pēnēta acueyabi pamatacabibeje, acueyabi pameravibeje yajava. Bajara pijinia pacuenia xanē ata, Daxitajivi Pematapijinēnē, bocaenajē mēthēta acueyabi pamatacabibeje, acueyabi pameravibeje yajava. ⁴¹ Bajayata Nínive tomarapijivimi itsa jumetane Dioso pitorobilivaisi, Jonáspijinē petsipaebilivaisi, copaba pibisiacuene pexanaejava. Najamatabēcuene pēnēyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaēvi. Panijaneconi panexainaēvi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecaneconitsinexa Dioso apo panejumecovēnētsivi. Xanē majotaje ponaponajē, bitso ayajamatabēcuenenēnē Jonáspijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panajamatabēcuene pēnēyorot-simēnua pibisiacuene paneexanaejavavecua. Bajaraxuata ayaineconi paxainame Diosojavabelia. ⁴² Pamatacabi Dioso naneconitsiaexanaena pijaneconi pexainaēvi, bajayata peponaponaevami, Saba nacuaipijivi pevet-sivami, nonotapunaena Diosojavabelia papeconitsinexa Dioso apo panejumecovēnētsivi. Bajarapova pacaneconitsiana. Tsi-paji bajayata bajarapovami tajē nacuataverena ata muxunarena pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē majotaje ponaponajē, bitso ayajamatabēcuenenēnē Salomónpijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panamuxunaevetsimēnua. Bajaraxuata Dioso pacananeconitsiaexanaena, jai Jesús tajēvelia fariseovijavabelia, judíovi pecujarubivijavabelia ata.

Pacuenia dovathi jivitonë pevejamatabëpitsapaecuji-naetsi, icatsia naviarena pecovëyaberena petsijamatabëcaenexatsi icatsia yabara pelivaisi

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonenexa penacueraevetsinexa bajaraponëjavata. Itsa apo caxitajarabi ponëjavabelia tsijamatabëjonejitsia, nexata dovathi jamatabëjumaitsi: ⁴⁴ “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonenexatsi. Dovathi baja caevëa itsa naviarena, caxitajaraba peyjavaponaponaenëmitsi. Nexata peyjavaponaponaenëmitsi pejamatabëëthëto, dovathi tane bepënësajinecaebo, bepënëxaniavaetetsibo, bepiracajuetsibo. ⁴⁵ Nexata dovathi icatsia sivapona peyajavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëecatsi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia tocopiapatsianatsi pamonaeeconoxae jinavanapa, piacujirubejevi, jai Jesús fariseovijavabelia, judíovi pecujarubivijavabelia ata.

Pacuenia Jesús pejuyapijivi, pena yajava, nubena bojumavelia yabara pelivaisi

⁴⁶ Jesús abaxë jivi livaisi itsa tsipaeba bo ënëtuatua-jëalia, pata Jesús pejuyapijivi, pena yajava. Nexata bojumavelia nubena bajarapamonaee. Jamatabëbarëcuaicuaijaitsi picani Jesús. ⁴⁷ Nexata itsajivi Jesús tsipaebatsi.

—Patajatuxanenë, ena raja, nejuyapijivi yajava, nuca bojumaverena. Bajarapamonaee pina jitsipa pecabarëcuaicuaijajava, jaitsi Jesús.

⁴⁸ Nexata Jesús jumaitsi petsipaebijivitsijavabelia:

—¿Detsa pitsijamatabëcuenevi taena, tajuyapijivinuua? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijavabelia:

—Mara jane pamonaee taenajivije, tajuyapijivinuua.

⁵⁰ Tsipaji raja pajivi exana taxa, athëbëtatsia peecaenë, pitorobicueniatsi, bajarapajivi cajena tajuyapijinë, tajuyapijiva, taenanua, jai Jesús petsipaebijivitsijavabelia.

Pacuenia Jesús jivi livaisi tsipaeba pabi peubinë pelivaisicuenia yabara pelivaisi

13 Jesús baja itsa najumevereta jivijavabelia livaisi petsipaebijava, pitsapa baja bajarapabovecua. Pona baja itsajavabelia. Nexata Jesús ecojopa pucaxaneto itapata. ² Nexata pucaitapata jivi ayaibitsaëtotox-

aneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtotoxaneto nubena tajetabovelialia. ³ Nexata Jesús daxitacuene livaisianë tsipaeba jivijavabelialia. Jesús jumai tsaponaee bajarapamonaeejavabelialia macpacueniajaje:

—Peubinë pona pabiabelialia peubinexa. ⁴ Nexata itsa pata pabita, peubixu pexucayabajabarabicuenialia ubanajetaruca. Pexucayabajabarabijavata itsaxu othopa pabi tuatuajëjava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepijia juva. Tsipaji bitso ira apo aitayaë. ⁶ Nexata icotialia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepiariareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenialia itsa yajavajuvata, bitso xanëebotonë matacënëratsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsialia nacuaia. Itsabotonë capitsapa cien paxutoyobeje tsaponaee. Itsabotonë capitsapa sesenta paxutoyobeje tsaponaee. Itsabotonë capitsapa treinta paxutoyobeje tsaponaee. ⁹ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsialia, jai Jesús bajarapalivaisi petsipaebivijavabelialia.

Pacuenia yabara Jesús jivijavabelialia livaisi tsipaeba ëcomparacióncuenialia yabara pelivaisi

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelialia:

—Patajatuxanenë, jivijavabelialia livaisi itsa tsipaebame, ¿detsa xuajitsialia tsipaebame ëcomparacióncuenialia? jai Jesús pijajivi.

¹¹ Nexata Jesús jumaitsi pijajivijavabelialia:

—Paxamë rabaja xaniavaetsialia Dioso pacayapëtaeyaexana Dioso papijajivimë papecaevetsijava. Itsiata itsamonaee apo yapëtaee bajarapacuenialia. ¹² Pajivi xaniavaetsialia nejumeyapëtane tatsipaebilivaisi, bajarapajivi icatsialia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsialia.

¹³ Bajaraxuata livaisi itsa tsipaebajë bajarapamonaee, ëcomparacióncuenialia tsipaebajë. Nexata bajarapamonaee tae ata Dioso pesaëta pinijicuenialia taexanaejava, itsiata apo yapëtaee pajamatabëcuene yabara exanajë pinijicuenialia taexanaejava. Namuxunaevetsi ata tatsipaebilivaisi, itsiata apo jumeyapëtaee pajamatabëcuene xaina tatsipaebilivaisi. ¹⁴ Bajarapacuenialia apo jumeyapëtaee tsipaji jane baja tocopiapatatsi pacuenialia bajayata tajëvelialia Diosojumepaebinëmi profeta Isafaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isafaspijinë peyaquinaelivaisita jumaitsi mapacueniajaje:

Bajarapamonaee picani jumetaena. Itsiata apo jumeyapëtaee tsane xua yabara tsipaebianatsi. Bajarapamonaee taena picani. Itsiata apo yapëtaee tsane pajaj-

matabëcuene xaina petaejava. ¹⁵ Bajarapamonaē aja-matabëcuenetaja tsane. Bajaraxuata benamuxuacabi-aya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua taena. Jumeyapëtaejitsipanua palivaisi jumetaena. Pejamatabëëthëtojavavetsina jumeyapëtaejitsipa. Nexata xanëjavaberena najamatabëcuenepënëyorotsipa perujujamatabëcuenevecua. Nexata xanë jamatabëcuene xanepanaeyaexanaejitsipajë, jai bajayata tajëvelia Isaíaspijinë peyaquinaelivaisita xua yabara tsipaebajë bajarapamonaē apo tanejumeyapëtaejavanexa yabara.

¹⁶ Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. ¹⁷ Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaevetavanapa tanetaenexa picani tapatsijavatsica. Itsamonae ata aneonijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tëpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisianë, bajarapamonaemi tëpa baja, jai Jesús pijajivijavabelia.

Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi

¹⁸ Icatsia Jesús jumaitsi pijajivijavabelia: —Xaniavaetsia panenamuxunaevere panejumeyapëtaenexa pajamatabëcuene xaina palivaisi pacatsipabatsi pabita peubinë pelivaisicuenia. ¹⁹ Pamonaē jumetaē ata Dioso pejumelivaisi, itsiata itsa apo jumeyapëtaē pejamatabëëthëtota, bajarapamonaē bepiothopaexu pabi tuatuajëjava penajetarucaenamutumata. Nexata najetaruca dovathi. Nexata bajarapamonaē tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. ²⁰ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonaē jumetane Dioso pitorobilivaisi. Nexata picani bajarapalivaisi barëyaya jumecovënëta. ²¹ Itsiata baitsi jane pacuenia irabereca apo atabunepiariaca paxu othopa ibopananëjumata, nexata nabijiana, bajara tsijamatabëcueneitsitsi bajarapamonaē Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëtavanapae. ²² Pacuenia pijinia paxu othopa xanëebacabomijavata, itsa juva, bit-

so matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonaē Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonaē. Tsipaji Dioso xaniavaetsia apo tojivananapae. ²³ Pacuenia pijinia itsi paxu othopa pexani-airata, bajara tsijamatabëcueneitsitsi itsamonae Dioso pitorobilivaisi. Bajarapamonaē jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonaē Dioso pitorobilivaisi, jai Jesús pijajivijavabelia.

Pacuenia peubijava tuatuajëa piabejejava juva yabara pelivaisi

²⁴ Dioso apo pejumecovënëtsivi, pamonaē najivanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajarapamonaē Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibitsaëtoxanetojavabelia. Jesús jumaitsi mapacueniaje:

—Mara pacuene jëpaje Dioso pijajivi pevetsijavaje. Pabi pexainaenë, ëpexaniaviriatrigoxu uba pijapabita. ²⁵ Itsiata baitsi jane daxitajivi pemajitsijavata meravi, pabi pexainaenë pijavajabitsaënë tojunuatsi pijapabita. Nexata toubatsi trigo tuatuajëjava pibisiavirijava, betrigobotonë pecataejava. Bajaraxuacujinae vemaxëpona baja. ²⁶ Nexata trigoxu juva. Vitsaba. Itsa baja trigobotonë namatonota, nexata matapania bajarajota nayapëtanë pibisiavirijava yajava penamatonotsijava. ²⁷ Nexata pabi pexainaenë pijajivi pata petsipaebinxatsi. Pabixainaenë pijajivi jumaitsi: “Nijapabita ubame ëpexaniaviriatrigoxu. ¿De tsæta pacuenia pitsapa pibisiavirixu pibisiajava peyavajuvinxaxa trigojava?” jai pabixainaenë pijajivi. ²⁸ Nexata pabixainaenë jumaitsi pijajivijavabelia: “Tajavajabitsaënë raeta bajaraxua uba,” jai. Nexata pabixainaenë pijajivi jumaitsi: “¿Jitsipame tsaja bajaraxua pataxunajava?” jai. ²⁹ Itsiata baitsi jane pabixainaenë jumaitsi pijajivijavabelia: “Jume. Tsipaji panexunajavata payajavaxunaejitsipame trigobotonë. ³⁰ Copatsianatsi abaxë penacuaitsinexa. Nexata penotsimatacabi itorbianaenë tanetonotsivi copiaya pecaetsinexa piabejejava. Pepacunuanë exanaena. Bajaraxuacujinae bajaraxua tajuitsiana. Bajaraxuacujinae ëtrigoxu netonotsiana taetabiabibota tanetoetsinexa,” jai pabixainaenë pijajivijavabelia, jai Jesús jivi ayaibitsaëtoxanetojavabelia.

**Pacuenia mostazaxutoyo pejuvicujinae, mostazanae
bepijia vitsaba yabara pelivaisi**

³¹ Jesús livaisi tsipaeba comparacióncuenia jivi ayaibitsaëtoxfanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxfaneto naexanaena. Pabi pexainaenë mostazaxu uba pijapabita.

³² Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajarapon-aeta. Pematapenanë exana bajaraponaemaxërananëjava. Bajara pijinia itsane jivi ata. Bepijia ayaibitsaëto Dioso pijajivi naexanaena, jai Jesús jivi ayaibitsaëtoxfanetojavabelia.

**Pacuenia pan pexanaematabënexa, levaduravënëjava
fufunaeyaexana yabara pelivaisi**

³³ Jesús livaisi tsipaeba comparacióncuenia jivi ayaibitsaëtoxfanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa, acueyabi patarroxanetobeje trigobononë matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata levaduravënëjava yacaëjëpa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjëpa daxitanacuanëjava Dioso pijajivi pevetsicuenia, jai Jesús jivi ayaibitsaëtoxfanetojavabelia.

**Pacuenia Jesús jivi livaisi tsipaebabiaba comparación-
cuenia yabara pelivaisi**

³⁴ Jesús itsa tsipaeba jivijavabelia Dioso pijajivi pevetsijavanexa, livaisianë tsipaeba bapona ëcomparacióncuenia. ³⁵ Bajarapacuenia Jesús jivi livaisianë itsa tsipaeba bapona ëcomparacióncuenia, tocopiapatatsi jane baja pacuenia Dioso jumepaebinë profetanë bajayata tajëvelia yaquina Jesús petsipaeba baponaëjavanexa yabara. Jesús comparacióncuenia jivi livaisi petsipaeba baponaëjavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuenia Dioso nacua pexanaëjavaveliacujinae itsajivi ata abaxë apo yapëtae, jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaeba baponaëjavanexa yabara.

**Pacuenia Jesús pijajivi yapëtaeyaexana paja-
matabëcuene xaina palivaisi tsipaeba trigobotonë tu-
atuajëa pejuvijava pelivaisicuenia yabara pelivaisi**

³⁶ Jesús naviabiaexana jivi ayaibitsaëtoxfaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare paja-matabëcuene xaina palivaisi tsipaebame jivi ayaibitsaëtoxfanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë. ³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë, Dioso pijanacuayabetsia pejonevinexa yabara jumaitsinë.

“Pibisiaviriajava pejuvijava,” itsa janë, dovathi pijajivinexa yabara jumaitsinë. ³⁹ “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua pevereverecaëjavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. ⁴⁰ Nexata pacuenia piabejéjava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje pevereverecaematacabi. ⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamonaë pibisiacuene pexanabiabivi. Pamonaë ata itsamonajavabelia pibisiacuene exanaeyaexana, bajarapamonae ata taevetsinacua netovecuajutsiana tajaángelevi.

⁴² Bajarapamonae xuabianatsi infiernojavabelia. Bajarajota nuena. Navonosiniana bitso penavixaetaexae. ⁴³ Pamonaë jumecovënëtsiajinavanapa Dioso pitorobicueniatsi, bajarapamonae perabënitayotsiana taxa Dioso pijanacuataatsia. Pacuenia matacabipijijuumeto naitayota, bajarapacuenia perabënitayotsiana. Pajivi jamatabënejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

⁴⁴ Icatsia Jesús comparacióncuenia jumaitsi pijajivijavabelia:

**Pacuenia pebi caxitajaraba bitso penamatamotsijavanë,
itsanë irata pemëthëtetsijavami, yabara pelivaisi**

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëjavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataacateta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexinaëjavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso

namatamotanua, xuanë bajaraponë bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotanua, jai Jesús pijajivijavabelia.

Perlavënëjava bitso penamatamotsijava yabara pelivaisi

⁴⁵ Icatsia Jesús jumaiti pijajivijavabelia:

—Pacuenia itsi bitso pexaniavirijava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniavirijavanë juya pecanajetapon-aenexa. ⁴⁶ Nexata itsa caxitajarabaxuaba pexaniaviria-perlajava, bitso penamatamotsijava, pona pijaboyabelia pecanajetsinexa daxita pexinaejavami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

⁴⁷ Icatsia Jesús comparacióncuenia jumaiti pijajivijavabelia:

—Dujuai peyamatajucaejavata, pibisiaviriadujuai itsa yamatajuta, bavecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. ⁴⁸ Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona be-mapirejavabelia. Pibisiaviriadujuai pijinia xuabapona.

⁴⁹ Bajara pijinia itsane nacua peverevecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. ⁵⁰ Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujujavanë ata, yabara pelivaisi

⁵¹ Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaiti:

—Jājā, pacajumeyapëtanetsi rabaja, jai.

⁵² Nexata Jesús jumaiti pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexinaenë pijabovetua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomarabelia, yabara pelivaisi

⁵³ Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. ⁵⁴ Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacaetuatabibibota. Nexata pejumetaevitsi sivajamatabëcuenenabena-jacatsi. Nexata bajarapamonae Jesús jamatabëcuenabiatanetsi. Bajarapamonae Jesús yabara najumaiti mapacueniaje:

—¿De tsaeta jota maponë nacujaruba peypätaenexa mapalivaisije? ¿De tsaeta pacuenia caējëpatsi mapacuenia Dioso pesaëta pinijicuene pexanaenexaje? ⁵⁵ Maponëje vaxaitsiyajuvënëne, carpinteronëmi pexënato. Maponëje María pexënato. Bajaraponë pejujapijivi, Santiago, José, Simón, Judas. ⁵⁶ Papetiriavi ata vajatomarata jinavanapa, maponëje pejujapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexata Jesús jumaiti bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovënëtsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

Pacuenia Juanpijinë jivibautisabinëmi beyaxuabatsi yabara pelivaisi

14 Herodes, Galileanacia pevetsinë. Nexata Herodes Jesús vënëlivaisitanetsi Dioso pesaëta pinijicuene pexanaponaejava. ² Nexata Herodes pijajivijavabelia jamatabëcuenenavëxaniabiaya jumaiti Jesús yabara:

—Juanpijinëmi raeta jivibautisabinëmi icatsia asaë petëpaecujinae. Bajaraxuata caējëpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaiti tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejababiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejujapijinë. Nexata Herodes pejujapijinë pijava yacajërëta. ⁴ Nexata Herodes pejujapijinë pijava peyacajërëtsixae, Juanpijinë abaxë itsa apo vaetabitsi, Herodes muxujioba. Juanpijinë jumaiti Herodesjavabelia:

—Acuenebi raja nejuyapijinë pijava nepitsijava, jai Juanpijinë Herodesjavabelia.

⁵ Bajarapacuenia Juanpijinë Herodes pemuxujiobixae, Herodes picani jamatabëbeyaxuabatsi Juanpijinë. Itsiata baitsi jane abaxë apo beyaxuabitsi. Tsipaji Herodes cujanava jivi. Daxitajivi Juanpijinë yapëtanetsi Diosojumepaebinëcuene. ⁶ Nexata Herodes itsa najamatabënapita penaexanaematacabi, fiesta exana. Herodes junata jivi ayaibitsaëto. Nexata bajarapafiestamatacabi pejonëyo, pijava pexënatoyo, pijacujirucuenia caevayo yavajibaxita Herodes pejunatsivi pitabarata. Nexata Herodes bitso barëitajitsipa peyavajibijava pejonëyo. ⁷ Nexata Herodes najumecapanepaeya pexaniajaijumeta jumaitsi pejonëyojavabelia:

—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejonëyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

⁹ Bajarapacuenia Herodes pejonëyo itsa jumaitsi, Herodes bejamatabëjio bi tsanajetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejonëyojavabelia pexaniajaijumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë. ¹¹ Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejonëyojavabelia. Bajarapova juya pena rajuta. Nexata baja Herodíasva yapëtanecapanepaeya baja Juanpijinë pebeyaxuabijavatsi.

¹² Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaebinexa Juanpijinë pebeyaxuabijavatsi.

Pacuenia Jesús pexaejava rajuta cinco mil ponëbeje yabara pelivaisi

¹³ Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëtoخانeto yapëtanecapanepaeya pejonëyojavabelia. Matatsënëa najetarubena pepëjaitshivitsi Jesús. ¹⁴ Itsa Jesús nonotajuna jeravecu, tane jivibitsaëtoخانeto. Nexata Jesús itaxutobejiobiatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberenaje, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia. ²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejibijavanë. Nexata vënëba doce xuabeje bemapirecuenia pexanaejavanë.

²¹ Pamonae pexaejava xane, ayaibitsaëtoخانeto. Cinco mil ponëbeje namataëjëtatsi xaniavaetsia. Petirivai, pejevaxi ata, apo namataëjëtsitsi.

Pacuenia Jesús mene itaboxoya najetaruca yabara pelivaisi

²² Jesús jivi ayaibitsaëtoخانeto pexaejava perajutsicujinae, Jesús pijajivi bepïjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia. ²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bajaraxuacujinae bajayacunua, ajena matabacijitsia, Jesús pijajivi pecovëvelia imoxoyotana-jetaruca. Jesús najetaruca mene itaboxoya. ²⁶ Jesús pijajivi itsa tanetsi mene itaboxoya penajetarucajava, nabenaajaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalialia, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecu runareca meniabereca. Lia mene itaboxoyalialia pepatsinexa Jesúsjavabelia. ³⁰ Itsiata baitsi jane Pedro itsa tane jovibo piasaëjava, bitso

cujunavataba. Nexata bubunanajereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

³¹ Bepijia Jesús cobepitajaraba. Jumaitsi Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumeebiataneme? jai Jesús.

³² Nexata baja Jesúsbeje Pedrobeje jera ënëabelia it-sa nonoliabeje, joviboxanetomi baja ajibi tsaxuabi.

³³ Nexata daxita jerata peponaevi pematatabacabëta tonubena Jesús pitabarata. Jumaitsi bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi

³⁴ Jesús, pijajivi yajava, pata puca itsapanabelia. Pata Genesaret nacuata. ³⁵ Genesaret nacuapijivi it-sa yapëtanetsi Jesúscuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena. ³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonaevi Jesús penaxatatsijavacopia tojayataponatsi, jamatejema tsaponae piavitanejavavecu.

Pacuenia Jesús tsipaeba xua jivi jamatabëcuenebiji-jianatsi yabara pelivaisi

15 Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaitsi Jesúsjavabelia:

² —Jesús, nijajivi naneconita Diosojavabelia. Tsi-paji nijajivi apo jumecovënëtsiajinavanapae vajasalinaivi pijacuene. Nijajivi it-sa xane pexaejava, xane anijatonë napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecatsitecaenexa. ⁴ Dioso Moiséspijinëta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baitsi jane paxamë jivi pamuxubijiapeneta biabame peyaiyataeyaniva paxajivi, penajivi ata. Paxamë jivijavabelia pajumatsimë tsabiabi mapacueniaje: “Axa, ena ata, it-sa cavajëta neyavenonaenexa, nexata it-sa apo jitsipaemë neyavenonaejava, jumatsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacara-

jutsinexabeje,’ jamë tsane neyavenonaeyaniva,” pajamë tsabiabi jivijavabelia. ⁶ Nexata caranata Dioso pejumatsijume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsi-paji paxamë patsipaebaponame saicaya vajasalinaivi pijalivaisi. ⁷ ¡Paxamë saya jivi paneyamaxëitjorobivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumatsijava paxamë yabara, profeta Isaíaspijinë peyaquinaelivaisita jumaitsi mapacueniaje:

⁸ Bajarapamonae nejjitsipaena saya pijumeta. Itsiata pepo tanejjitsipaenamatabëcuene nevecuatajë tsane.

⁹ Saya baitsi bajarapamonae pijajumatsita tsane:

“Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuene pijilivaisi. Pepo taitorobilivaisi apo tsipaebi tsane, jai tajëvelia Isaíaspijinëpeyaquinaelivaisita Dioso pejumatsijava paxamë yabara, jai Jesús fariseovijavabelia, judíovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeyapëtaenexamë patacatsipaebilivaisi. ¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebiji-jianaetsi. Apo vënananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabëcuenebiji-jianatsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava it-sa cajumetane bajarapacuenia nejumatsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitsäcënaevi. Nexata bepematacaponaevi pitatsäcënaevi pijinia. Pitatsäcënaenë it-sa matacaponaejitsipa itsanë pijinia pitatsäcënaenë, nexata najuajopaejitsiparecabeje mëthëxanetojavareca. Pabita piabejejava it-sa juva, nexata yatabutopaya jonatsi vajaveretsinexa. Bajara pijinia pacuenia taxa, athëbëtsatsia peecaenë, verebi-abianatsi daxita bajarapamonae, jai Jesús pijajivijavabelia fariseovi yabara.

¹⁵ Pedro nexata jumaitsi Jesúsjavabelia:

—Patajatuxanenë, paneyapëtaeyaxanare pajamatabëcuene xaina palivaisi tsipaebame jivijavabelia. Palivaisi baitsi jumatsimë: “Xua jivi xane pecuibota, apo jamatabëcuenebiji-jianaetsi,” jamë, jai Pedro Jesúsjavabelia.

¹⁶ Nexata Jesús jumaitsi:

—¿Paxamë ata tsarovia abaxë apo panejumeyapëtaemë? ¹⁷ Daxitacuene xua jivi xane pecuibovojotota, junua pecotsorotuabereca. Bajaraxuacujinae vecuapitsapatsi. ¹⁸ Baitsi rajane xua jivi pecuibuatsina pitsapa

pecuaicuaijainexa pacuenia najamatabëxaina pejamatabëëthëtoavetsina, bajara jane xua jivi jamatabëcuenebijianatsi. ¹⁹ Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaenexa. Pitsapa jivi pebeyaxuabijamatabëcuenenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatæ jamatabëcuenenexa. Pitsapa penacobetoxotsijamatabëcuenenexa. Pitsapa itsamonæ pexanaejavayabara najumetsënëtsiaya pepæbijamatabëcuenenexa. Pitsapa itsamonæ yabara najumetsënëtsiaya pebaracuicuaijai jamatabëcuenenexa. Daxita bajarapajamatabëcuenepitsapa jivi pejamatabëëthëtojavavetsina. ²⁰ Daxita bajarapajamatabëcuenenexa jivi jamatabëcuenebijianatsi. Jivi raja pexæjava xæ ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíoava. Bajarapova Jesúsjavaberena pata. Piniijumeta bajarapova jumaitssi Jesúsjavabelia:

—¡Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaitssi Jesúsjavabelia: —Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaitssi bajarapovajavabelia: —Dioso baja cajena nitoroba tayavenonaenexa ëjudíovi, Israel nacuapijivi, pamonæ Dioso tane beoveja. Tsipaji bajarapamonæ Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaitssi Jesúsjavabelia: —¡Petuxanenë, neyavenonare! jai.

²⁶ Nexata Jesús jumaitssi bajarapovajavabelia: —Apo xanepanae copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonæjitsipatsi, nexata pacuenia pejevaxi pexæjavaminexa yacajërëtsipajë tarajutsinexa avirixijavabelia, bajara itsinë tsipæ, jai Jesús bajarapovajavabelia.

²⁷ Itsiata baitsi jane bajarapova ajumesæ tsaponæ. Icatsia jumaitssi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainaenëtsi pexæyecaemesa bëxëpanareca piothopaepërë. Bajara pijinia pacuenia

itsiata itsanacuapijiva atanë, neyavenonare, jai bajarapova Jesúsjavabelia.

²⁸ Nexata icatsia Jesús jumaitssi bajarapovajavabelia: —¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

Pacuenia Jesús jamatejemayaexana ayaibitsætoxaneto piavitanevi yabara pelivaisi

²⁹ Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatsia Jesús ecojopa. ³⁰ Nexata jivi ayaibitsætoxaneto pata Jesúsjavaberena. Tocapatatsi pejayuyayunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijai. Tocapatatsinua penabejenaevi. Tocapatatsinua ayaibitsætoxaneto piavitanevi. Bajarapamonæ tojebatsi Jesús pitabarata. Nexata Jesús jamatejemayaexana daxita bajarapamonæ. ³¹ Nexata jivi jamatabëcuenenabenajaca itsa tane pecuaicuaijaiapo pecuaicuaijaiivimi. Jesús xanepanaeyaexana penabejenaevimi ata. Xanepanaeyaexana pejayuyayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi itsa tane bajarapacuenenexa, jumaitssi Diosojavabelia: “Diosomë, bitso ayaijamatabëcuenenëmë, paIsrael nacuapijivinë patajaDiosomë,” jai bajarapamonæ.

Pacuenia Jesús rajuta pexæjava bejamatabëcuenenexa cuatro mil pajivibeje yabara pelivaisi

³² Jesús jivi ayaibitsætoxaneto pënjinanavanapatsi. Nexata Jesús junata pijajivi. Jumaitssi pijajivijavabelia mapacueniaje:

—Netsitabejiobi baja rovia mapamonæje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatssi. Pexæjava xaenejeva, apo jitsipænë taitorobijava peponaenexa pijabonëjavabelia. Namuto epatua meta cuenabijitsipatsi piajani, jai Jesús pijajivijavabelia.

³³ Nexata Jesús pijajivi jumaitssi:

—¿Detsa jane pacuenia pexæjava tocaxitajarabi-anatsi mapajivibitsætoxanetoje? Majotaje ajibi pexæjava. Tsipaji itsajivi ata pijabo apo xinae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitssi:

—Siete papanbëbeje paxainajë, dujuainëxi yajava, jai.

³⁵ Nexata Jesús itoroba daxitajivi penaenexa irata.

³⁶ Nexata Jesús pita siete papanbëbeje, dujuainëxi yajava. Nexata Jesús jumaitssi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacaponae pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoxanetojavabelia. ³⁷ Daxita bajarapamonae nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ³⁸ Pamonae pexaejava xane, ayaibitsaëtoxaneto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtatsi. ³⁹ Pexaecujinae pexaejava, Jesús baja naviabiayaexana jivi. Nexata Jesús runareca jera ënëabereca. Pona baja Magdala nacuyabelia.

Pacuenia fariseovibeje saduceovibeje Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

16 Fariseovibeje saduceovibeje pata Jesúsjavabere-na. Nexata bajarapamonae Jesús jamatabëcueneëjëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peypapëtaenexatsi Dioso pepacuenia athëbëvetsica pitorobinëcuenetsitsica.

² Nexata Jesús jumaitssi bajarapamonaejavabelia:

—Pamatacabi caniviyo itaboxo tsobia, paxamë pajumaitssimë tsabiabi: “Meravia pexaniamatacabi tsane. Tspaji itaboxo tsobia,” pajamë tsabiabi. ³ Pamatacabi bajayacunua nacuitaboxo itacaënanuca, pajumaitssimë tsabiabi: “Ajena anacuayaijitsia daxita matacabi. Tspaji nacuitaboxo itacaënanuca,” pajamë tsabiabi. Payapëtaneme picani xaniavaetsia pacuenia matacabi itsijitsia. Tspaji itarërëbo pepitsapaexae, payapëtaeyabiabame. Itsiata baitsi jane patae atamë Juan jivibautisabinëmi pexanaponaejava, xanë ata taexanaponaejava patae atamë, itsiata apo payapëtaemë Dioso athëbëvetsica taneitorobinëcuenetsica. ⁴ Bitso pibisiamatabëcuene xaina pamonae copaba Dioso pejumecovënëtsijavami. Bajarapamonae picani nitoroba Dioso pesaëta pinijicuene taexanaejava tatsitaexanaenexa taneyapëtaenexa pepacuenia Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara ëpitsicuene taneexanaejava, tsitajëtatsianajë, jai Jesús petëpaecujinae icatsia Dioso piasaëyaexanaejavanexatsi yabara. Jesús baja nexata bajarapamonae vecuapona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

⁵ Jesús pijajivi nicabilia puca itsapanabelia. Nexata nacofënëta pamarue. Apo caponae pan. ⁶ Nexata Jesús pijajivi muxujioba pejumecovënëtsiyaniva fariseovi, saduceovi ata, itsa tsipaebatsi saicayacuenia Dioso pe-

jumelivaisivecua. Jesús jumaitssi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitssi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsiyaniva. ⁷ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumaitssijume yabara. Jesús pijajivi jamatabëcuenenavëxaniabiaya najumaitssi:

—Jesús nacajumaitssi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitssi pan apo vajacaponae, najai Jesús pijajivi jamatabëcuenenavëxaniabiaya.

⁸ Jesús pijajivi jamatabëcuenenavëxaniabiaya pejumaitssijava levadura yabara. Nexata Jesús jumaitssi pijajivijavabelia:

—¿Detsa xuajitsia panajumaitssimë: “Baja raeta pacuenia Jesús nacajumaitssi pan apo vajacaponae,” panajamë? ¿Apo payapëtaemë tspaji tanecaëjëpaejava taexanaenexa pan itsa namatavenonatsi! ⁹ Paxamë abaxë apo panejumeyapëtaemë. ¿Apo panajamatabënapitsimë tspaji pacuenia exanajë pamatacabi pan namatavenonatsi? Tsicobetsanajë cinco papanbëmibeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë? ¹⁰ ¿Apo panajamatabënapitsimënuua tspaji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajarapamatacabi pavënëbame peyajuvënënacopabijavanë bemapirecuenia pexanaejavanë? ¹¹ Itsa pacajumaitssitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitssi, pan yabara apo pacajumaitssitsi, jai Jesús pijajivijavabelia.

¹² Nexata jane baja Jesús pijajivi xaniavaetsia jumeyapëtanetsi. Nexata Jesús pijajivi najumaitssi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

Pacuenia Pedro jumaitssi Jesúsjavabelia: “¿Xamë raja Cristomë!” jai yabara pelivaisi

¹³ Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitssi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁴ Nexata Jesús pijajivi jumaitssi:

—Itsamonae xamë yabara jumai tsabiabi: “Juan-pijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepae-

binëmi raeta, profeta Elíaspijinë, ponëmi bajayata ponapona, icatsia asaë," jai tsabiabi. Itsamonae pijinia jumai tsabiabi: "Diosojumepaebinëmi raeta profeta Jeremiaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënë icatsia asaë," jai tsabiabi itsamonae xamë yabara, jai Jesús pijajivi.

¹⁵ Nexata Jesús jumaiti pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

¹⁶ Nexata Simón Pedro jumaiti Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

¹⁷ Jesús nexata jumaiti Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji itsajivi ata apo cayapë-taeyaexanae xanë taneyapëtaenexamë Cristocuenenë. Biji rajane taxa, athëbëtsia peecaenë, cayapë-taeyaexana. ¹⁸ Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajajajebi jamatabësaë tsecae, bajara pijinia itsane tajajivi tanejumecovënëtsivi Cristocuenenë. Nexata dovathi apo jamatabëcuenematatoxenetsitsi tsane. ¹⁹ Pacuenia bau-paevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuaipijilivaisianë. Xua itavetsianame mapanacuataje, bajaraxua Dioso ata athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús Pedrojavabelia.

²⁰ Nexata Jesús pijajivi jumeitaveta petsipaebiyaniva itsajivijavabelia ata: "Mara ponë Cristoje, Dioso athëbëvetsica pitorobinëtsica jivi pecapanepaenexa," pejaiyaniva.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

²¹ Jesús pebeyaxuabijavanexatsi, tajëvelia navajunupaeba pijajivijavabelia. Jumaiti mapacueniaje:

—Ponaejitsianë Jerusalén tomarabelia. Nexata bajarajotalia nebejioaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesús tajëvelia pijajivijavabelia.

²² Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaiti Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

²³ Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyotrotsia jumai tsanucac Pedrojavabelia:

—¡Dovathi, nevecuanatixire! Nejamatabëcuenejëbijijsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

²⁴ Nexata Jesús jumaiti pijajivijavabelia:

—Pajivi jitsipa tanepënaponaejava, bajarapajivi copatsi pejitsipaecuenia penajamatabëxainabiabijavami. Exanaponaponaetaitorobicuenia. Najamatabëcueneveretsinua, bejioaexanaejitsia atatsi, beyaxuabijitsia atatsinua, Dioso pejumelivaisi yabara piamatabëcuenesaë tsaponaponaenexa. Nexata jane baja xuacujinae nepënaponaena. ²⁵ Pajivi exanaponapona penatojitsipaecuenia, apo xainae tsane matacabi apo pevererecaejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matacabi apo pevererecaejava. ²⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuenie xainae ata, mapanacuapijicuenieje, itsiata nacuerata. Tsipaji pexainaecuenie apo capanepae tsanetsi Diosojavabelia. Tsipaji acueniebi tsane itsajivi ata pematamotsinexa penaxuabiyaniva Diosovecua. ²⁷ Xanë, Daxitajivi Pematapijinënë, yajavapatsianicajë taxa Dioso pijapenivenivenaecotia. Yajavapatsianicajënuua tajaängelevi. Nexata matamotaponaenajë caejivi canacujitsia, tanetonacueniebi. Naneconitsiaexanaenajë pijinia pijaneconi pexainaevi. ²⁸ Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajajivi ayaibitsaëtoxaneto naexanaena. Nexata paxamëyajuvënëvi pepuatae tsane xanë tajajivi ayaibitsaëtoxaneto taevetsijava, tēpaena, jai Jesús pijajivijavabelia.

Pacuenia Jesús caepatoyo perabënivenivenataba yabara pelivaisi

17 Jesús petëpaejavanexa tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyapijinë Juan. ² Nexata petsutojumatsia Jesús perabënivenivenareca bajarapamonae pitabarata. Pacuenia matacabipijijuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai. ³ Nexata bajarajota Jesús pijajivi tane bajayata petëpaenëmibeje, Moiséspijinëbeje Elíaspijinëbeje. Jesús barëcuaicuaijaisi bajaraponëbeje. ⁴ Nexata Pedro jumaiti Jesúsjavabelia mapacueniaje:

—¡Patajatuxanenë, pijacuaxae panebarëponame! Itsa jitsipame, pacatoexanaenatsi acueyabi pabobërëto-beje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁵ Itsa abaxë Pedro cuaicuaijai tsanucac, penaitayotsi-itarërëbo mataacataxuabatsi daxita bajarapamonae.

Nexata bajarapamonae jumetane bajarapaitarërëbojavavetsica Dioso pejumaitisijava: “Mara ponë taxëna-to, tasivanëje. Bitso sivajamatabëcuenebarëyanë. Pa-jumetaema bajaraponë,” pejaijavatsica bajarapamonae jumetane.

⁶Jesús pijajivi ita jumetane bajarapacuenia Dioso pejumaitisijavatsica, irataeya othopa irata. Jesús pijajivi bitso najunaviaca. ⁷Nexata Jesús imoxoyolia pijajivi. Jayalia. Jumaitis pijajivijavabelia:

—Panonobapunare. Pëtsa pajunavame, jai Jesús pijajivijavabelia.

⁸Nexata Jesús pijajivi ita naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

⁹Nexata Jesús pijajivi ita barërunanucaponaica pet-sutojumavetsica, jumeitaveta pijajivi. Jumaitis pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰Nexata Jesús pijajivi yanijoba Jesúsjavabelia. Jumaitis:

—Patajatuxanenë, çdetsa xuajitsia judfovi pecujarubivi jumai tsabiabi: “Bajayata ponëmi ponapona, Elfaspjinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacapanepaenënexa jane baja,” jai tsabiabi? jai Jesús pijajivi.

¹¹Nexata Jesús jumaitis pijajivijavabelia:

—“Copiata Elfaspjinë patsiana. Nexata bajaraponë jamatabëcuenexanetsiana daxitajivi,” ita jai, Juan-pijinëmi jivibautisabinëmi yabara jumaitis. Xaniajai rabaja pacuenia judfovi pecujarubivi jumaitis. ¹²Xaniajanë pacuenia pacatsipaebijitsiatsi. Elfaspjinë rabaja patajopa. Itsiata jivi apo yapëtaetsi ponëcuene. Nexata pacuenia jivi jitsipa pexanaenexa bajaraponëjavabelia, exana baja. Beyaxuabatsi. Bajara pijinia pacuenia xanë ata, Daxitajivi Pematapijinënë, nebejiobiaexanaena bajarapamonae, jai Jesús pijajivijavabelia.

¹³Nexata Jesús pijajivi jumeyapëtanetsi. Nexata Jesús pijajivi jamatabëjumaitis:

—“Elfaspjinë rabaja patajopa,” ita jai Jesús, Juan-pijinëmi jivibautisabinëmi yabara jumaitis, jamatabëjai Jesús pijajivi.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

¹⁴Jesús pijajivi, acueyabi ponëbeje, barënaviata pet-sutojumavetsica. Nexata bajarapatsutoxanetotabuta vajënaeevetatsi jivi ayaibitsaëttoxaneto. Nexata pebi Jesús imoxoyorenatsi. Bajaraponë Jesús yayiataeya pematatabacabëta nucajunua Jesús pitabarata. Bajaraponë jumaitis Jesúsjavabelia:

¹⁵—Jesús, netoitaxutotsoniataema taxënatonëyo. Netodevacababiabatsi raja. Bitso bejiobi tsabiabi. Anijatonë isotuabelia natajuitabiaba. Itsajavata menialia jopabiabalia. ¹⁶Nijajivijavaberena picani capatajë tane-

tojamatejemayaexanaenexa. Itsiata baitsi jane apo cajëpaeitsi tanetojamatejemayaexanaenexa, jai bajaraponë Jesúsjavabelia.

¹⁷Nexata Jesús jumaitis pijajivijavabelia:

—iPaxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecajëpae pejevaxinë panevecuacapitsapaenexa dovathi. iPaneajamatabëcuenetajavi baja rovia! Pexaniajailivaisivecua saicayacuenia panajamatabëxainame. çDetsa paepatojebi abaxë paxamëjavata ponaponaenajë? çDetsa paepatojebi abaxë paxamëjavabelia ajamatabëcuenesaënë tsaponapona tsane patanejumecovënësinexamë? Panetocarenamëre pejevaxinë, jai Jesús pijajivijavabelia.

¹⁸Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

¹⁹Bajaraxuacujinae Jesús pijajivi barëcuaiçaiçatsi pi-jaepatojavata. Jesús pijajivi jumaitis:

—Patajatuxanenë, çdetsa xuajitsia meta paxanë apo panecajëpae patavecuacapitsapaenexa dovathi? jai Jesús pijajivi.

²⁰Nexata Jesús jumaitis pijajivijavabelia:

—Apo pacacajëpae pejevaxinë panevecuacapitsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata ita pajumecovënëtsipame Dioso papecayavenonaejavanexa, nexata pacacajëpaejitsipa Dioso pesaëta pinijicuene paneexanaenexa. Nexata ita pajumaitisimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” ita pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapëbeje tsipae ita pepacuene xaniavaetsia pajumecovënëtsipame Dioso papecayavenonaejavanexa. ²¹Mara paviriadovathije apo jitsipae pepit-sapaejava. Matapania panexaejava apo paxaemë tsipae pamatacabibeje asaëyata Diosojavabelia pavajë-taponame dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajëvelia navajunupaeba pe-beyaxuabijavanexatsi yabara pelivaisi

²²Jesús abaxë pijajivi ita barëponapona Galilea nacuata, pijajivijavabelia tajëvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana it-samonae pecobeyabelia. ²³Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matocabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi ita jumetanetsi bajarapacuenia Jesús penavajunupaebaponaejava petëpaejavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pe-matamoyanijobabiabi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomata-mo judíovi matamobabiaba templobo pevetsivijavabelia? jaitsi.

²⁵ Pedro nexata jumaitsi:

—Jājā. Matamotabiaba cajena, jai.

Nexata Pedro joneya Jesús peecaeboyalia. Nexata Pedro pejonejavatalia Jesús peecaeboyalia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaeetsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaevjavabelia nacuaeetsivi pijajivi yanijobabiaba impuestomatamo? ¿Nacuaeetsivi tsaja pijamonaejavabelia? Itsa jume, ¿saicayavijavabelia tsaja, nacuaeetsivi pevetsinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaeetsivi raja pijajivi impuestomatamo yanijobabiaba saicayavijavabelia, nacuaeetsivi pevetsinacuata pejinavanapaevijavabelia. Apo yanijobabiabi nacuaeetsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaeetsivi pijamonae apo matamotsitsi impuestomatamo, bajara pijinia pacuenia xanë ata apo jitsipañë picani tamatamotsinexa impuestomatamo templobo pevetsivijavabelia taxa Dioso pijatemploboxae. ²⁷ Itsiata baitsi jane xamë matamotsianame itsajivi ata vajancabaraanaepanaeyanivabeje. Liamëre pucaxanetojavabelia. Ejëbianame culupabota. Padujuainëyo copiaya catoxaena, jutsianame. Pecuibota caxitarabianame palatanëyo. Bajarapapalatanëyota caëjëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

Pacuenia Jesús pijajivi jumaitsi: “¿Detsa ponë paxanëyajuvënëne panevecuaayaijamatabëcuenenë?” jai Jesúsjavabelia yabara pelivaisi

18 Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënëne bitso ayaijamatabëcuenenë tsane daxitavecua Dioso pijanacuatatsia? jai.

² Nexata Jesús junata pejevaxinëyo. Pijajivi tuatuajëta nuteta pejevaxinëyo. ³ Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuene copata Diosojavabelia Dioso pevetsinexatsi. Nexata paxamë itsa apo panajamatabëcuene pënëyorotsimë tsane perujujamatabëcuenevecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia. ⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije. ⁵ Pajivi copiapita tanejumecovënëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapit-sipejavaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicë-tatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsianiva Diosojavabelia pibisiacuene itsa exanaeyaexana tanejumecovënëtsiviyajuvënëvi.

⁷ Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ Bajaraxuata panecobeta, panetaxuta ata, pibisiacuene itsa paexaname, panacobecacure. Panataxucacure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo peverevereaeisotojavabelia. ⁹ Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxu-abinè pelivaisicuenia yabara pelivaisi

¹⁰ Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejumecovènètsijivixi. Saya beveliajamatabècuenevi taeyabiaba. Pètsa bajarapacuenia paxamè ata bijiaya pataneme tanejumecovènètsivi. Bijiaya pètsa pataneme mapitsipejevaxinèyo ataje, tanejumecovènètsijiviyoy. Tsipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athèbètatsia peecaenè, pitabarata jinavanapa. ¹¹ Xanè, Daxitajivi Pematapijinènè, patajopajè tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaèjère mapacueneye. Pebi xinaejitsipa cien ponèbeje oveja. Nexata itsa toyajuvènènaxuabijitsipatsi caenè, oveja pexainaenè puenetsipa noventa y nueve ponèbeje oveja. Bajaraxuacujinae jaitsipa petonaxuabinètsi. ¹³ Xaniajanè pacuenia pacatsipaebijitsiatsi. Bajaraponè itsa caxitajarabijitsipa pijaoveja, petonaxuabinèmitsi, bitso barèyataejitsipa. Nexata noventa y nueve ponèbeje, apo petonaxuabivitsi, pesivajamatabècuenebarèyajava, matatoxenetsia bitso sivajamatabècuenebarèya tsipae petonaxuabinèmitsi. ¹⁴ Bajara pijinia pacuenia paneaxa ata, athèbètatsia peecaenè, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovènètsivi, jai Jesús pijajivibelia.

Pacuenia Dioso pejumecovènètsijivi bebarajamatabècuenexanepana, itsacueniabi atatsi itsajivi, yabara pelivaisi

¹⁵ Icatsia Jesús jumaitsi pijajivijavabelia:

—Itsanè Dioso pejumecovènètsinè pibisiacuene papecatoexanaejava, itsa pavènèlivaisitaename, xaniavaetsia payanijobianame caenèjavata. Nexata xaniavaetsia itsa panabarècuaicuaijamèbeje, panabarajamatabècuene xanepanaenamebeje. ¹⁶ Xaniavaetsia itsa apo pacabarècuaicuaijai tsane, nexata Dioso pejumecovènètsinè pajunatsianame caenè, anijanèbeje ata, paneyajavaponaenexa pibisiacuene papecatoexanaenèjavabelia pemuxujobinexatsi. Nexata bajaraponèbeje pacajumetaena xaniavaetsia panebarècuaicuaijajava pibisiacuene papecatoexanaenèjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename. ¹⁷ Ponè pibisiacuene pacatoexana, itsa apo namuxunaevetsi tsane paneyajavaponaenèbeje ata pemuxujobijava, nexata daxita Dioso pejumecovènètsivi penacaetuatsijavata, payanijobianame papiibisiacuene pacatoexana. Nexata ponè pibisiacuene muxujobianatsi. Bajaraponè itsa apo namuxunaevetsi tsane, muxujobi atatsi Dioso pejumecovènètsivi, nexa-

ta bajaraponè pataename Dioso apo pejumecovènètsinècuenia. Panavecuaitavetsianame pepatsiyani-va panenacaetuatsijavata, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Xaniajanè pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athèbènacuatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athèbènacuatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanèmèbeje itsa panajamatabècuenejèpamebeje xua pavajètsijitsiamèbeje Diosojavabelia, nexata taxa, athèbètatsia peecaenè, pacajumecovènètsianabeje xua pavajètamebeje. ²⁰ Tsipaji itsajota anijajivibeje, acueyabi ata, nacaetuata, tanejumecovènètsivi, bajarajota xanè bajarapamonae yajavaecaenajè, jai Jesús pijajivijavabelia.

²¹ Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenè, panetsipaebame rabaja. Panejumaitsimè mapacueniaje: “Itsajivi Dioso pejumecovènètsijivi pibisiacuene itsa pacaexanaena, pajamatabècaevianame. Barajamatabècuenexanepanaeya pataename. Itsa pavènèlivaisitaename pibisiacuene papecatoexanaejava, xaniavaetsia payanijobianame caenèjavata. Nexata xaniavaetsia itsa panabarècuaicuaijamèbeje, panabarajamatabècuene xanepanaenamebeje,” panejamè. ¿Detsa xuabeje pibisiacuene nexanae ata, pibisiacuene netoexanae atanua, jamatabècaevianajè barajamatabècuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaitsi Pedrojavabelia:

—Siete xuabejenexa yabara apo jumaitsinè. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabècaevare barajamatabècuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

Ponè apo jitsipae pebarajamatabècuenexanepanaenexa itsanèjavabelia yabara pelivaisi

²³ Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatsia pijajivijavabelia exanaena pacuenia nacuaevetsinè pijajivijavabelia baexana. Nacuaevetsinè jitsipa piamoneyabivitsi pematomtsinexatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamona amoneyabatsi. Nexata pijajivi tobarèparenatsi ponè bitso ayaijava amoneyabatsi, baitsi millones de pesos piamoneyabinètsi. ²⁵ Nexata bajaraponè apo xinae pematomtsijavanexatsi. Nexata nacuaevetsinè itoroba pijajivi. Jumaitsi: “Mara ponè bitso ayaijava niamoneyabaje. Nexata pacanajetaxuabianame dajubicuenia itsamonaejavabelia amoneya pet-

onacuenebaponaenexa daxitamatacabijavabelianexa. Daxita pexi, pijava ata, pecobecovë ata yajava, pacana-jetaxuabianame. Bajarapacuenia pitsianajë tsiquiri-javayo ata taneamoneyabijavamatamo," jai nacuaevetsinë pijajivijavabelia. ²⁶ Nexata ponë amoneyaba, nacuaevetsinë pitabarata pematabacabë-ta nucajunua. Pinijicuenia vajëta nacuaevetsinëjavabelia. Jumaitsi: "Nejamatabëcueneevere abaxë. Camatamotsianatsi rabaja daxita xua camoneyabatsi," jai. ²⁷ Nexata nacuaevetsinë itaxutotsoniatane pi-moneyabinëtsi. Nexata nacuaevetsinë jumaitsi pi-moneyabinëtsijavabelia: "Daxita rabaja tanea-moneyabijavamë, iquinajë. Nexata baja apo nematamotsimë tsane," jai nacuaevetsinë pi-moneyabinëtsijavabelia. Bajaraxuacujinae copata baja penavi-atsinexa. ²⁸ Nexata bajaraponë penaviatsinexa, ajena pitsapalia nacuaevetsinë pijabovëcua, caxitajarabaxua-ba itsanë penajuanacuenebabiabinëbeje nacuaevetsinë pijajava. Bajaraponë nexata jamatabëjumaitsi: "Maponë tsiquirijavayovajëto nia-moneyabi ataje, yanijobianajë tanematamotsinexa," jamatabëjai. Nexata cuibocamisavaetaba. Cuibocuet-saca asaëyata. Jumaitsi bajaraponëjavabelia: "Nematamore taneamoneyabijavamë," jai. ²⁹ Nexata pi-moneyabinëtsi bajaraponë pitabarata pematabacabë-ta nucajunua. Pinijicuenia vajëta. Jumaitsi: "Nejamatabëcueneevere abaxë. Camatamotsianatsi raja itsi-ata daxita xua camoneyabatsi," jai. ³⁰ Itsiata baitsi jane bajaraponë pi-moneyabinëtsi apo itaxutotsoniatæ. Barëpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita pi-moneyabijavatsi. ³¹ Nexata nacuaevetsinë pijajivi ita tane bajarapacuenia pexanaejava penajua nacuenebabiabinëbejejavabelia, bajarapamonæ bitso najamatabëxaina. Nexata nacuaevetsinë pijajivi ponalia petsipaebinxæ bajaraxua pijatuxanenëjavabelia. ³² Nexata nacuaevetsinë pijajivi ita tsipaebatsi, itoroba icatsia pijajivi petojunatsinexatsi bajaraponë. Nexata ita tocapatatsi, nacuaevetsinë jumaitsi bajaraponëjavabelia: "Nijamatabëcuenebejenë baja rovia. Catoiquinatsi rabaja picani taneamoneyabijavamë. Tsipaji pinijicuenia neva-jëtame. ³³ Pacuenia caitaxutotsoniatanetsi, bajara pijinia pacuenia itaxutotsoniatæjitsipame pecaamoneyabinë," jai nacuaevetsinë. ³⁴ Nexata nacuaevetsinë bitso baraanaepana millones de pesos pi-moneyabinëtsijavabelia. Nexata nacuaevetsinë jumaitsi pijajivijavabelia: "Bajaraponë pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena epematamoveretsijavabelianexa daxita tanea-moneyabijava," jai nacuaevetsinë, jai Jesús pijajivijavabelia.

³⁵ Jesús icatsia jumaitsi pijajivijavabelia:

—Bajara pijinia pacuenia paxamë ata taxa, athëbë-tatsia peecaenë, pacaexanaena, ita apo pajamatabë-caevimë tsane panebarajamatabëcuene

xanepanaenexa pamonaæ pacaitsacueniaba, jai Jesús pijajivijavabelia.

Pacuenia Jesús jivi livaisi tsipaeba penacojobinë pijava pexuabiyaniava yabara pelivaisi

19 Jesús pijajivi pemuxujiobicujinae pebarajamatabëcuene xanepanaenexa itsamonæ itsacueniabi atatsi, Jesús baja pona Galilea nacuavecua. Jesús nexata pata Judea nacuaavelia, Jordánmene itsapanabelia. ² Jivi ayaibitsaëtoxaneto pënaponatsi. Bajarajotalia Jesús jamatejemayaexana piavitanevi.

³ Nexata fariseovi Jesús imoxoyorenatsi. Jamatabëcueneëjëbiaya yanijobatsi. Jesús bijiaya ita jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinë pijava pexuabinexa itsacuenëjavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimë tsipaji paneypætaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueniaje: "Pebi ita nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi," jai Dioso pejumelivaisibaxutota. ⁶ Nexata Dioso apo tæ beanijajivibeje. Becaejivi saya tane Dioso. Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinë copata penacojobinë petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabëcuenetajaxæ, Moiséspijinë pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa. ⁹ Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixæ. Nexata pijava pexuabinë ita nacojoba icatsia itsavajavabelia, bajaraponë pibisiacuene exana pevitota. Tsipaji pepo pijavavecua jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsipaji itsanë pijavami pita, po-va abaxë Dioso totanetsi itsanë pijavacuenia, jai Jesús fariseovijavabelia.

¹⁰ Nexata Jesús pijajivi jumaitsi Jesúsjavabelia:

—Ita bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojobi, jai Jesús pijajivi.

¹¹ Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamona Dioso jamatabëcueneyavenonatsi. ¹² Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caējëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caējëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuenecaējëpatsi nacojiobinejeva peponapon-aenexa ëDioso pijacuene petonacuenebinexa, bajara-ponë nejumecovënëtsi, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi

¹³ Jesúsjavaberena itsamonae pejevaxijivixi tocapataponatsi Jesús pecobeta pejayataponanexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamona jitsipa pejonejava Dioso pijanacuayabetsia, bajara pijinia pacuenia jumeabinejeva, xaniavaetsia bejumecovënëta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapon pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecuca.

Pacuenia pevëjëato, bitso pexainanë, cuaicuaijai Jesúsjavabelia yabara pelivaisi

¹⁶ Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainanexa matababi apo peverevereaejava? jai pevëjëato.

¹⁷ Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainanexa matababi apo peverevereaejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

¹⁸ Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecuca. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame.

¹⁹ Axa yayiataema. Ena ata yayiataema. Asivamëre it-

sajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

²⁰ Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

²¹ Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaname bitso nexainaejava Dioso pijanacuataetsia. Bajaraxuacujinae nepënaponaname, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsijava, najamatabëxainaejava baja vecuapona Jesús. Tsipaji pevëjëato daxitacuene bitso pexainanë. Nexata pevëjëato apo jamatabëjumecovënëtsi palivaisi Jesús tsipaeba.

²³ Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainanë, tsiayapëbejetsi bitso penajamatabëcuenecopatsinexa Diosojavabelia pecapanepanexatsi Dioso pijanacuayabetsia. ²⁴ Icatsia matavëjëa pacajumaitsi. Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainanë acuenebi tsane pejonejava Dioso pijatomarabetsia, jai Jesús pijajivijavabelia.

²⁵ Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexinaevi ata itsa apo panepae tsane Diosojavabelia? jai.

²⁶ Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caējëpaetsi pijacuata penapanepanexa Diosojavabelia. Caenë Dioso caējëpatsi. Dioso raja caējëpatsi daxitacuene pexanaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxinaejavami. Nexata baja pacapënajinavanapatsi. ¿Detsa xua meta panerajutsiana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatababi daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatababi paxamë ata, doce paponëmëbeje patanepënajinavanapaevimë, paenaename, pacaenëmë canacujitsia, panijatronota vajanajuaevetsinexa xua evetsianajë. Nexata paxamë paenaename jueznëcuenia pananeconitsiaexanaenexa pijaneconi pexinaevi. Pananeconitsiaexanaename Israelpijinëmi pexi, doce ponëmibeje, pemomoxi. ²⁹ Daxita pamonaetajamatabëcueneta

pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonae rajutsianatsi ayaijava bitso pepuenetsijavanëmi matatoxenetsia. Caejavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua matacabi apo peverevereaejava. ³⁰ Pamonae aeconoxae mapamatacabitaje ayaijamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae itsamatacabi Dioso ayaijamatabëcuenevi exanaenatsi, jai Jesús pijajivijavabelia.

Pacuenia Jesús livaisi tsipaeba pabi pexainaenë petonacuenebivitsi najëpaeya pematamotsijava pelivaisicuenia yabara pelivaisi

20 Icatsia Jesús jumaiti pijajivijavabelia: —Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijava pijanacuatatsia, jëpa mapalivaisije. Pabixaneto pexainaenë ponapona. Ajena matacabi tsarucaponae, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapæba caedenario. Jejai nexata bajarapamonae. Nexata itoroba pijapabiabelia petonacuenebinexatsi. ³ Bajaraxuacujinae juameto baja tajë itsa rucaina, a las nueve, naropota icatsia. Taenuba tomara tuatuajëta pebijivi, saya jema pejinavanapævi. ⁴ Nexata jumaiti bajarapamonaejavabelia: “Paxamë ata paponaremelia tajapabiabelia. Panetonacuenebianame. Pacamatomotsianatsi raja xaniavaetsia,” jai pabixainaenë. ⁵ Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabëcuene a las tres, junata icatsia itsamonae. Bajarapamonae ata ponalia petonacuenebinexatsi. ⁶ Bajaraxuacujinae, caniviyo, bejamatabëcuene a las cinco, pabixainaenë icatsia pona tomara tuatuajëareca. Caxitajarabaxuaba icatsia pebijivi, saya jema pejinavanapævi. Nexata pabixainaenë jumaiti bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamë?” jai. ⁷ Nexata bajarapamonae jumaiti: “Tsipaji itsajivi ata apo panejunatsi patatonacuenebinexa,” jai. Nexata pabixainaenë jumaiti: “Paxamë ata paponaremelia tajapabiabelia patanetonacuenebinexamë. Pacamatamotsianatsi raja xaniavaetsia,” jai pabixainaenë. Nexata bajarapamonae jejai. Ponalia petonacuenebinexatsi. ⁸ Nexata baja juameto itsa tabujuniya, pabixainaenë jumaiti pijajivitonëjavabelia: “Junare baja tanetonacuenebivi. Matamobare baja. Copiaya matamobare pamonae pepacotocævi pejonevi. Pamonae pepacopiaya pejonevi cotoævi matamobianame,” jai pabixainaenë pijajivitonëjavabelia. ⁹ Nexata pamonae pepacotocævi junua a las

cinco penacuenebinexa, parena pematamobinexatsi. Nexata caenë canacujitsia matamobatsi caedenario. ¹⁰ Nexata daxita pamonae bajayacunua pepacopiaya junua penacuenebinexa, pepacotocævi juya parena pematamobinexatsi. Nexata bajarapamonae jamatabëjumaiti: “Caedenario meta pematatsënëa vaxaitsi nacamatamobiana. Tsipaji copiaya vaxaitsi junuatsi vajanacuenebinexa,” jamatabëjai bajarapamonae. Itsiata baitsi jane bajarapamonae ata, caenë canacujitsia, matamobatsi caedenario tsaponae. ¹¹ Nexata bajarapamonae penacuenebimatamo baja itsa nota, baraanaepana pabixainaenëjavabelia. ¹² Jumaiti bajarapamonae: “Mapamonae cotoævi pepatsivi, nacueneba saya caehora. Paxanë baja rovia ayaicuenia panacuenebajë. Icotia daxitamatacabi panetsajava. Itsiata mapamonae matamobame pacuenia panematomobame,” jai bajarapamonae. ¹³ Itsiata baitsi jane pabixainaenë jumaiti bajara pamonaeayjuvënëjavabelia: “Itsacueneyavayo ata pibisiacuene apo pacaexanaetsi. Patacayunatsijavata patanetonacuenebinexamë, caedenario pacatsipaebatsi patacamatomotsinexa patanetonacuenebimatamomë. Nexata baja bajarapacuenia pacarajutatsi. ¹⁴ Panijamatamo baja papitame. Paponare baja panijabonëjavabelia. Pamonae cotoævi junua tanetonacuenebinexa, bajarapamonae ata matamobajë pacuenia pacamatamobatsi. Bajarapacuenia matamobajë pacuenia xanë jitsipajë. ¹⁵ Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamonae ayaijava tarajutsixae? jai pabixainaenë petonacuenebivitsi yajuvënëjavabelia. ¹⁶ Bajara pijinia pacuenia Dioso ata, pacuenia jitsipa, exanaena pijajivijavabelia. Pamonae mapanacuata ayaijamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonae pijinia mapanacuata beveliajamatabëcuenevi tanetsi, bajarapamonae itsamatacabi Dioso ayaijamatabëcuenevi exanaenatsi. Bajarapacuenia Dioso exanaena tsipaji picani jivi ayaibitsaëttoxaneto Dioso junata. Itsiata bajarapamonaeayjuvënëvi, caejiviyobeje saya, Dioso jumecovënëta, jai Jesús pijajivijavabelia.

Pacuenia icatsia Jesús tajëvelia navajunupaeba pebexuabijavanexatsi yabara pelivaisi

¹⁷ Jesús pona Jerusalén tomarabelia. Nexata Jesús, pijajivi ayabitsaëto yajava, najetaruca namutua, itsamonae yajava. Nexata bajarapamonaevecua ëpijajivi, doce ponëbeje, Jesús junata pimoxoyotsinexatsi. Nexata Jesús pebexuabijavanexatsi, tajëvelia navajunupaeba pijajivijavabelia. Jesús jumaiti mapacueniaje:

¹⁸ —Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanë neneconitsiana tanebexuabinexa. ¹⁹ Bajaraxuacujinae icatsia necanajetsiana itsanacuaverena pepatsivi

pecobeyabelia. Bajarapamonae necanecaponaena. Nejumatitibabena penaneconitsivi pejumaconitabiabi-macata. Bajaraxuacujinae cruzajavabelia necobematabiabarutsiana tatēpaenexa. Itsiata baitsi jane tanebeyaxuabicujinae, acueyabi matababita, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajēta Jesúsjavabelia pexaniacuene petoexanaenexatsi yabara pelivaisi

²⁰ Santiagobeje Juanbeje paxa pevēnē Zebedeo. Nexata bajaraponēbeje pena barēliatsibeje Jesúsjavabelia. Bajarapova pematatabacabēta nucajunua Jesús pitabarata. Vajēta pexaniacuene petoexanaenexatsi.

²¹ Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxēnatobeje nemuxuneneta penaecaenexabeje panenajuaevetsinexa. Itsanē tocopatsianame necujanenia peecaenexa. Itsanē tocopatsianame netsavenononia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamēbeje apo payapētaemēbeje xua pavajēcaeyaexanamebeje ena xanējavaberena. ¿Pacacaējēpabeje tsaja panenacaevetsinexabeje papecabejobi-aexanaenexabeje pacuenia xanē nacaevetsianajē tanebejibiaexanaenexa? ¿Pacacaējēpabejenua tsaja panenacaevetsinexabeje papecabeyaxuabinexabeje pacuenia xanē nacaevetsianajē tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsiibeje:

—Jājā, panecaējēpabeje cajena, jaiibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamēbeje rabaja. Paxamēbeje pacabejibi-aexanaenabeje pacuenia xanē nebejibiaexanaena. Pacabeyaxuabianabejenua pacuenia xanē nebeyaxuabiana. Itsiata baitsi jane xua panevajētamebeje pane-naecaenexabeje, itsanē tacujanenia, itsanē tatsavenononia, bajaraxua Dioso apo netocopatsi pataca-tocopatsinexabeje. Tsipaji raja taxa Dioso ēpitapetsivinexa abaxē bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponēbeje Jesús pijajivi vēnētane pepēya bajaraxua Santiagobeje Juanbeje Jesúsjavabelia pevajēcaejavabeje. Nexata bajarapamonae jamatabēcuenebaraanaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapētaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaenē jinavanapa pevetsinacuanējava. Nexata bajarapanacuanē pevetsivi ayai-

jamatabēcuenevi nataeyabiaba. Xua jamatabēitoroba pevetsinacuanējava pejinavanapaevi petoexanaenexatsi, ajumesaēya itorobabiaba petoexanaenexatsi.

²⁶ Pētsa paxamē bajarapamonae cuenejēpaeya bajarapacuenia paexaname itsamonaejavabelia. Biji rajane ponē paxamēyajuvēnēnē jitsipa ayaijamatabēcuene-nē penaexanaenexa daxita paxamēvecua, bajaraponē daxita paxamē bepanijajivitonēcuenia bepacayavenonabiaba. ²⁷ Ponē paxamēyajuvēnēnē jitsipa penaexanaenexa papecanamatacaitorobinēnēxa, bajaraponē daxita paxamē bepanijajivitonēcuenia bepacayavenonabiaba. ²⁸ Tsipaji rabaja xanē ata, Daxitajivi Pematapijinē atanē, apo patajopaenē jivi taneyavenonaenexa. Biji rajane xanē patajopajē tayavenonaenexa daxitajivi. Patajopajē tasivatēpaenexa jivi ayaibitsaēto-xaneto pibisiacuene pexanaeneconimi taneconimatamotsinexa, jai Jesús pija-jivijavabelia.

Pacuenia Jesús itaxutoxanepanaeyaexana bitso pitaxutotsēcēnaenēbeje, apo petaenēbeje, yabara pelivaisi

²⁹ Jesús, pijajivi yajava, pitsapa Jericó tomaravecua. Nexata jivi ayaibitsaēto pēnaponatsi. ³⁰ Panamutojava Jesús najetaruca, bajarapanamutojavata ecabeje bitso pitaxutotsēcēnaenēbeje, apo petaenēbeje. Nexata bajaraponēbeje itsa jumetanebeje bajarapanamutua imoxoyo Jesús penajetarucajava, vavajaiibeje tsecae.

—¡Jesús, Davidpijinē pemomomē, paneitaxutotsioni-ataemabeje! jaiibeje tsecae pitaxutotsēcēnaenēbeje.

³¹ Jivi picani jumeitavetsibeje pemoyanexabeje tsecae. Itsiata biji bitsoyo orijibia vavajaiibeje tsecae.

—¡Jesús, Davidpijinē pemomomē, paneitaxutotsioni-ataemabeje! jaiibeje tsecae Jesúsjavabelia.

³² Nexata Jesús muxunanucojopa. Junata pitaxutotsēcēnaenēbeje. Jesús jumaitsi bajaraponēbejejavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponēbeje jumaitsiibeje Jesúsjavabelia:

—Jesús, pajitsipajēbeje pataitaxutoxanepanaejavabeje, jaiibeje tsecae.

³⁴ Nexata Jesús itaxutotsioniatane bajaraponēbeje. Jesús itaxutojayata bajaraponēbeje. Bajarajota caecuenia bajaraponēbeje itaxutoxanepanabeje baja. Nexata bajaraponēbeje Jesús pepēta naponabeje.

Pacuenia Jesús pata Jerusalén tomarata yabara pelivaisi

21 Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarata. Patsutojumata nubena olivonaenē, bajarapatsutoyenapanata eca Betfagétomara. Nexata Betfagé tomarata Jesús jumaitsi pijajivitonēbejejavabelia mapacueniaje:

² —Paponarebeje mapatomarayo ecaliajejavabelia. Bajarajotalia, ajena papatsiaremeliabeje, pataen-

sianamebeje burro pecetanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane. ³ “¿Detsa xuajitsia burrobeje paisinamebeje?” ita pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Bajarapacuenia Jesús ita jumaiti, tocopiapatatsi jane baja pacuenia Diosojumepaebinëmi profetanë bajayata tajëvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanëmi bajayata peyaquinaelivaisita jumaiti mapacueniaje:

⁵ Pajumaitsimë tsane Jerusalén tomarapijivijavabelia: “Pataename pepo paneevetsinë paxamëjavaberena penajetarucaejava. Beveliajamatabëcuenenëcuenia najetarucaena. Pejanaburroyota yapatanajetarucaena,” pajamë tsane Jerusalén tomarapijivijavabelia, jai bajayata tajëvelia profetanëmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonëbeje liabeje. Jumecovënëtabeje pacuenia Jesús itorobatsibeje. ⁷ Yamaëya carenabeje burro, pexënatonëyo yajava. Nexata bajarapaburrobeje Jesús pijajivi tsijumajeba pijacama,” pajamë tsane Jerusalén tomarapijivijavabelia, jai bajayata tajëvelia profetanëmi peyaisajumavelia penaxatabijavanë. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayaibitsaëtoxaneto, pijacamisajumavelia penaxatabijavanë, Jesús pevajënaeya namutua yerequejebapona. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayataeya pecopiapitsinexatsi. ⁹ Jesús penajetarucaejavata jivi ayaibitsaëtoxaneto Jesús pevajënaeya namataxainaeya najetarubena. Itsabitsaëtoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumaiti tsanajetarubena:

—¿Dioso yavenonaenatsi maponëje, pepo nacuaevetsinëmi Davidpijinë pemomo! ¿Dioso yavenonaenatsi maponë najetarucaje nacua pevetsinënexa Dioso pejamatabëcueneta! Nexata vaxaitsi pexaniajamatabëcuene rajutatsi Diosojavabelia, jai tsanajetarubena bajarapamonae.

¹⁰ Nexata Jesús ita pata Jerusalén tomarata, daxita Jerusalén tomarapijivi jamatabëcuenenabenajaca. Nexata nayanijoba.

—¿Detsa meta maponë najetarucaje? najai bajarapamonae.

¹¹ Nexata jivi jumaiti:

—Jesús ra manajetarucaje, Diosojumepaebinë profetanë. Galilea nacuada peecaetomara, Nazaret tomarapijinë, jai bajarapamonae.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinu, yabara pelivaisi

¹² Jesús ita pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxitaiti:

—Jesús ra manajetarucaje, Diosojumepaebinë profetanë. Galilea nacuada peecaetomara, Nazaret tom bajarapamonae Jesús pitsapaeyaexana templobovecua. Palata pecambiabibiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

¹³ Jesús jumaiti bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaiti mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitisijava Dioso pejumelivaisibaxutota. Itsiata baitsi jane paxamë yamaxëitojorobiaya panacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁴ Bajarajota templobota Jesús imoxoyorenatsi pitaxutotsëcënaevi, pejayuyayunaevinua. Nexata Jesús bajarapamonae xanepanaeyaexana. ¹⁵ Templobota nubena sacerdotevi. Nubena judíovi pecujarubivinu. Bajarapamonae taenubena Jesús pitaxutotanepanaeyaexanaejava pitaxutotsëcënaevi. Taenubenanua Jesús pexanepanaeyaexanaejava pejayuyayunaevi. Jumetaenubenanua pejevaxi templobota pevavajaijavata pejumaitisijava Jesús yabara: “¿Dioso yavenonaenatsi maponëje, pepo nacuaevetsinëmi Davidpijinë pemomo!” pejaijava Jesús yabara. Bajaraxuata sacerdotevi baranaepanatsi Jesús. Judíovi pecujarubivi ata baranaepanatsi Jesús.

¹⁶ Nexata bajarapamonae jumaiti Jesúsjavabelia:

—¿Tsipaji apo jumetaemë mapapejevaxi xamë yabara pejumaitisaponaejavaje? ¿Apo necajumeitavetsi? jai.

Nexata Jesús jumaiti bajarapamonaejavabelia:

—Jãjã. Jumetaniji picani. Itsiata apo jumeitavetsinë. ¿Paxamë tsipaji Dioso pejumelivaisibaxuto apo palebimë paneyapëtaenexa pacuenia tajëvelia jumaiti xanë yabara bajarapapejevaxi pevavajaijavaxana? Dioso pejumaitisijava xanëjavaberena, tajëvelia Dioso pejumelivaisibaxutota jumaiti mapacueniaje:

Pejevaxi, mitoapaenacuetoxi ata, naxëanaeyaexanaename penaxëanaejavata xamëjavaberena pecajumaitsinexa: “Ayaijamatabëcuenenëmë bitso,” peca-jainexa, jai Dioso pejumelivaisibaxutota xanëjavaberenana Dioso pejumaitisijava. Bajaraxuata mapapejevaxije jumaiti bajarapacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaevecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

Pacuenia Jesús bijataenuta higuerae piacuaijibixae yabara pelivaisi

¹⁸ Jesús pijajivi Betania tomarata pebarëmajitsicujinae, meravia pitsijavata, bajayacunua, Jesús pijajivi barëlia icatsia Jerusalén tomarabelia. Jesús nexata namutua penajetarucæjavata, piajani. ¹⁹ Jesús nexata taenuta higuerae namuto muxuneneta. Nexata Jesús imoxoyolia higuerae, pecuai itsa xaina, pexaenexa. Pecuai itsiata apo xainae higuerae. Èpebaxu saya tsanucæ. Bajaraxuata nexata Jesús jumaiti higueraejavabelia:

—¡Xamë baja apo nacuaitsimë tsane! jai Jesús.

Bjarapacuenia Jesús pejumaitisjavata, bepíjia higuerae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabēcuenenabenajaca. Nexata Jesús pijajivi nayanijoba.

—¿Detsa pacuenia maponae bepíjia tēpanajerecaje? najai.

²¹ Nexata Jesús jumaiti pijajivijavabelia:

—Xaniajanë pacuenia pacatsipaebijitsiatsi. Itsa pajamatabējumaitisimë tsipae Dioso yabara: “Dioso nejumecovēñetsiana xua vajētsianajë Diosojavabelia,” itsa pajamatabējamë tsipae, nexata paxamë ata pacacæjēpaejitsipa paneexanaenexa pacuenia exanajë mapahigueraejavabeliaje. Itsiata èbjarapacuenepaneexanaenexa, apo pacacæjēpae tsipae. Pematatsēnëa itsacuenejavanēnua paneexanaenexa, pacacæjēpaejitsipa. Nexata itsa pajumaitisimë tsipae mapatsutojavabelia ataje: “Natixire majotavecuaaje. Pucaxanetojavabelia jopare,” itsa pajamë tsipae, pacajumecovēñetsipa. Nexata mapatsuto ataje paneitorobicuenia pacajumecovēñetsipa. ²² Nexata daxitacuene xua pavajētsianame Diosojavabelia, pasivajamatabējumaitisimë tsane mapacueniaje: “Xua vajētajë Diosojavabelia, pepacuene Dioso nejumecovēñetsiana,” pasivajamatabējamë tsane. Nexata xua pavajētsianame Diosojavabelia, Dioso pacajumecovēñetsiana, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi

²³ Jesús junua temploboyalía. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaiti Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapatemplobopanabovecuaje? jai bajarapamonae Jesúsjavabelia.

²⁴ Nexata Jesús jumaiti bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuenepane. ²⁵ ¿Jipatsa jane pejamatabēcueneta Juanpijinë jivi bautisabaponapona? ¿Dioso tsaja peja-

matabēcueneta? Itsa jume, ¿jivi tsaja pejamatabēcueneta? jai Jesús bajarapamonaejavabelia.

Nexata epamonae nabarēcuaijai. Najumaiti:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēñetsimë Juanpijinë pepaebilivaisi?” nacajai tsipae. ²⁶ “Jivi raja saya pejamatabēcueneta Juanpijinë jivi bautisabaponapona,” itsa jai tsipaetsi, nexata jivi belia nacabeyejebijitsipa. Bjarapacuenia nacabeyejebijitsipa tsipaji raja Juanpijinë yabara daxitajivi sivajamatabējumaiti: “Juanpijinë raja pepacuene Diosojumepaebineñemi,” sivajamatabējai, najai sacerdotevi, judíovi pijaancianovi yajava.

²⁷ Nexata saya bajarapamonae jumaiti Jesúsjavabelia:

—Apo payapētaenë ponë Juanpijinë itorobatsi jivi pebautisabaponaenexa, jai.

Nexata Jesús jumaiti bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuenepane, jai Jesús.

Pacuenia Jesús jivi livaisi tsipaeba anijanēbeje pexēnato-beje pexainaenë pelivaisicuenia yabara pelivaisi

²⁸ Jesús icatsia jumaiti sacerdotevijavabelia, judíovi pijaancianovijavabelia ata:

—Panejumecanaejētsianame palivaisi aeconoxae pacatsipaebijitsiatsi. Pebi xaina anijanēbeje pexēnato-beje. Nexata pexēnatojavabelia jumaiti: “Taxēnato, ajena netonacuenebianame tajauvabacabota,” jai pexēnatojavabelia. ²⁹ Nexata bajaraponë paxajavabelia jumaiti: “¡Jume! ¡Apo jitsipaenë tanacuenebijava! jai. Itsiata xuacujinae bajaraponë icatsia najamatabēxaina. Nexata jamatabējumaiti: “Xanë baja rovia pibisi-ajamatabēcuene najamatabēxainajë. Nexata baja ponajë taxa tatonacuenebinexa,” jamatabējai. Naropota baja penacuenebinë. ³⁰ Bajaraxuacujinae pexēnato-beje pexainaenë pona icatsia itsanë pexēnatojavabelia. Bjaraponëjavabelia ata jumaiti: “Taxēnato, ajena netonacuenebianame tajauvabacabota,” jai pexēnatojavabelia. Nexata jejai itajara pexēnato. Itsiata apo ponae. ³¹ ¿Detsa ponë bajaraponëbejeyajuvēñenë paxa jumecovēñeta? jai Jesús bajarapamonaejavabelia.

Nexata bajarapamonae jumaiti Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovēñeta, jai.

Nexata Jesús jumaiti bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamona copabiana pibisiacuene pexanabiabijavami, pamona najamatabēcuenepēñeyorotsiana Diosojavabelia. Impuestomatamo gobierno pejamatabēcuene petomatamoyanijobabiabivimi ata jonena Dioso pijanacuayabetsia itsa najamatabēcuenepēñeyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabēcuenepēñeyorota Diosojavabelia pibisiacuene

pexanabiabijavamivecua. Itsiata baitsi jane paxamë apo pajonemë tsane. ³² Juanpijinë jivibautisabinë patajopa Dioso pejumelivaisi papecatsipaebinexa panenamatabëcuene pënëyorotsinexa pibisiacuene paneexanabiabijavavecua. Itsiata paxamë apo pajumecovënëtsimë bajarapalivaisi. Itsiata bajarapalivaisi jumecovënëta impuestomatamo gobierno pejamatabëcuene pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatabëcuene pënëyorotsimë panejumecovënëtsinexa Dioso, jai Jesús bajarapamonaejavabelia.

Pacuenia exana pijamatabëcuenebejevi, itsanë pijauvacababo petoevetsivi, yabara pelivaisi

³³ Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenë pijairata uba ayaibacaboboxaneto uvavënëjava. Bajaraxuacujinae pijaira matatoyorotsia, ibopanaxanetonë mataropotsia pefaratsijavata, yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvacababo tuatuajëta exananuta piapiabotsia, penacuaiitsimatacabi itsa tonaveretatsi, athëbëyo pevetaabiabeaenexa pijauvacababo.

‘Nexata bajaraponë itsamonae evetsiaexana pijauvacababo. Uvacababo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvacababo pexainaenë petoevetsivitsijavabelia. Nexata uvacababo pexainaenë tajë nacuyabelia pona. ³⁴ Itsa baja uvacababo pexainaenë yapëtane pecopiapatsijava uvacuai penaveretsimatacabi penotsinexa, nexata uvacababo pexainaenë itoroba pijajivi. Itoroba petoevetsivitsijavabelia petsicobetsatsinexatsi. ³⁵ Nexata uvacababo pexainaenë pijajivi uvacababo petoevetsivitsi totaicat-si. Caenë bajarapamonae yajuvënëne toconibabiatsi. Itsanë pepacuene tobeyaxuabatsi. Itsanë ibotonëta totseconatsi. ³⁶ Nexata uvacababo pexainaenë icatsia itsabitsaëto pijajivi itorobalia. Bajara icatsia pacuenia exana uvacababo pevetsivi.

³⁷ Nexata uvacababo pexainaenë itoroba icatsia pexënato jane baja. Uvacababo pexainaenë jamatabëjumaitsi: “Netoyaiyataena meta taxënato,” jamatabëjai. ³⁸ Itsiata baitsi jane uvacababo petoevetsivitsi uvacababo pexainaenë pexënato ata apo toyaiy-ataetsi. Itsa tane uvacababo pexainaenë pexënato, bajarapamonae najumaitsi: “Mara ponëje paxa pevënamuto paxa pijauvacababo pitsipaje. Naxanitsia. Beyaxuabatsi. Nexata raja vaxaitsi vajauvacababo tsane,” najai uvacababo petoevetsivitsi. ³⁹ Nexata icat-

sia uvacababo pexainaenë pexënato ata tovaetabatsi. Caponaliatsi bajarapauvacababo pënëyabelia. Nexata uvacababo pexainaenë pexënato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanijoba sacerdotevijavabelia, judíovi pijaancianovijavabelia ata. Jesús jumaitsi:

—Uvacababo pexainaenë itsa patsiarena, ¿de tsaeta xua exanaena uvacababo petoevetsivitsijavabelia? jai Jesús bajarapamonaejavabelia.

⁴¹ Nexata bajarapamonae jumaitsi Jesúsjavabelia:

—Pijauvacababo raeta pexainaenë apo itaxutotsoni-atae tsane. Nexata verebiabiana bajarapamonae mi pibisiacuene pexanaevi. Nexata icatsia itsamonae evetsiaexanaena bajarapauvacababo. Nexata uvacuai penaveretsimatacabi bajarapamonae itsa nota, tsicobetsatsianatsi pacuenia baja tocaëjëtatsi uvacababo pexainaenë perajutsinexatsi, jai bajarapamonae.

⁴² Nexata Jesús jumaitsi bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuat-siana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaët-siana botabu daxita itsaibo matatoxenetsia. Vajatuxanenë Dioso raja exanaena bajarapacuene. Nexata bitso nacatsita pexaniacuene tsane bajarapacuene, jai tajëvelia Dioso pejumelivaisibaxutota xanë yabara.

‘Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvacababo pexainaenë icatsia itsamonae evetsiaexanaena, bajara pijinia pacuenia Dioso exanaena paxamëjavabelia. Xua picani Dioso pacaevetsiaexana, copiarucaena. Nexata juya itsamonae Dioso evetsiaexanaena bajaraxua, pamonaen xaniavaetsia jumecovënëta Dioso pitorobicueniatsi. ⁴⁴ Pamonaen apo nejumecovënëtsi Dioso pexënato cuenenë, bajarapamonae bitso bejamatabëjiovi tsane apo tanejumecovënëtsixae. Pacuenia ibotojumata pefirapecaejivi, itsa tsapatecatsi, pevixae bitso yanabejiovi, bajara itsane. Pamonaen naneconitsiaexanaenajë, bajarapamonae pepacuene naxuabiana daxitamatacabijavabelianexa. Pacuenia iboto pamatacënëbinëtsi apo asaë, bajara itsane, jai Jesús bajarapamonaejavabelia.

⁴⁵ Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumait-sijava, bajarapamonae jamatabëjumai tsenae: “Vaxaitsi yabara raeta jumaitsi,” jamatabëjai tsenae bajarapamonae.

⁴⁶ Nexata picani bajarapamonae Jesús jamatabëvaetabatsi. Itsiata bajarapamonae jamatabëjumaitsi: “Bajaraponë jivi tanetsi Diosojumepaebinëcuene. Nexata nacaitacueniabijitsipa vaxaitsi itsa vaetabijitsipatsi maponëje,” jamatabëjai tsenae bajarapamonae. Bajaraxuata Jesús apo vaetabitsi.

Pacuenia Jesús jivi livaisi tsipaeba penacasabifiesta pexanaenë pelivaisicuenia yabara pelivaisi

22 ¹⁻² Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajara-pacuenia Jesús tsipaeba bajarapamonae peypä-taenexa pacuenia itsamatacabi itsijitsia, pamatacabi Dioso pijajivi evetsiana. Jesús jumaiti mapacueniaje: —Pepo nacuaevetsinë fiesta exana pexenato petonacasabifiestanexatsi. ³ Nexata nacuaevetsinë jumaiti pijajivijavabelia: “Pamonae baja tajëvelia junatajë, patsipaebare baja tanetopatsinexarena fiestanexa jane baja,” jai nacuaevetsinë pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevetsinë pijajivi naviabarena petsipaebinexa pijatuxanenëjavabelia. ⁴ Nexata nacuaevetsinë itsamonae icatsia pijajivi itorobalia pesivaponaenexalia. Nacuaevetsinë jumaiti pijajivijavabelia: “Pajumaitsimë tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponaremelia, pajamë tsane tajunatsivijavabelia,” jai nacuaevetsinë pijajivijavabelia. ⁵ Itsiata baiti jane bajarapamonae icatsia sivapona atalia, nacuaevetsinë pejunatsivi apo jejai. Pejunatsiviyajuvenënë itsanë pona pijapabianëjavabelia. Itsanë pijinia pona penavijatsinexa. ⁶ Itsamonae nacuaevetsinë pijajivi taicatsi. Bejiobiaexanatsi pibisiacuenia. Beyejebatsi baja belia. ⁷ Bajaraxuata nexata nacuaevetsinë bitso baraanaepana pejunatsivimijavabelia. Nexata nacuaevetsinë itorobalia vajabitsaëvi pebenexa pamonae tobeyejebatsi pijajivi. Itorobanua pijatomaranëmi ata petotajuitsinexa. ⁸ Bajaraxuacujinae nacuaevetsinë icatsia pijajivijavabelia jumaiti: “Daxitacuene baja picani veretejebiaexanajë taxënato penacasabifiestanexa. Itsiata baiti jane tajunatsivimi apo netopatsirena. ⁹ Paponaremelia pinijicallexanetonëjavabelia. Nexata daxita pamonae pacaxitarabaponaename bajarapacallexanetonëjava, paju-nataponaename taxënato penacasabifiestajavaberena pepatsinexa,” jai nacuaevetsinë pijajivijavabelia. ¹⁰ Nexata nacuaevetsinë pijajivi ponalia. Najetarubena callexanetonëjava. Junatapona daxita pamonae caxitarabapona. Junatapona pijamatabëcuenebejevi, pejamatabëcuenexanepanaevi ata. Nexata bajarapamonae barëpona fiesta pexanaebojavabelia. Nexata pabota fiesta exana, venëca jivi. ¹¹ Nexata nacuaevetsinë jonena bajarapaboyarena petaenexa petopatsivitsi. Daxita pamonae topatatsi, jumapata xua banaxataba itsa pona penacasabifiestajavabelia. Nexata nacuaevetsinë taenuta bajarajota itsanë, saicayavirijava penaxatatsinë. Apo naxatatsi xua naxataba daxita. ¹² Nexata nacuaevetsinë jumaiti bajaraponëjavabelia: “¿Detsa xuajitsia najunuame apo nenaxatatsinë pacuenia daxita naxataba penacasabifiestajavaberena penajonevi?” jai nacuaevetsinë. Nexata bajaraponë moya nuca. ¹³ Nexata nacuaevetsinë ju-

maitsi mesa pevetsivijavabelia: “Maponë pataxucëreje. Pacobecëre yajava. Paxuaremelia bopënëyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevetsinë. ¹⁴ Pacuenia fiesta pexanaenë ayaibitsaëtoxoneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaëtoxoneto junata pijajivinexa. Itsiata saya caejiviyobeje jumecovënëtatsi, jai Jesús sacerdotevijavabelia, judíovi pijaancianovijavabelia ata.

**Pacuenia Jesús jamatabëcuenejëbiaya yanijobatsi im-
puestomatamo pematamotsijava yabara pelivaisi**

¹⁵ Fariseovi nacaetuata penabarëcuaijuainexa. Bajarapamonae najamatabëcuenejëpa Jesúsjavabelia jamatabëcuenejëbiaya peyanijobinexa. Nexata Jesús bi-jiaya itsa jumecanaviata, Jesús picani peneconitsinexatsi nacuaevetsinëjavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatabëcuenejëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcuenejëbiaya jumaiti:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. ¹⁷ Panetsipaebare pacuenia najamatabëxainame mapacuene yabaraje. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcuenejëbiaya Jesúsjavabelia.

¹⁸ Itsiata baiti jane Jesús jamatabëcueneyapëtane bajarapamonae jamatabëcuenejëbiaya peyanijobijavatsi peneconitsinexatsi picani. Nexata Jesús jumaiti bajarapamonaejavabelia:

—Paneyamaxëitojorobivi, ¿detsa xuajitsia jamatabëcuenejëbiaya paneyanijobame? ¹⁹ Panetsitajëre pitsipalatanëyota pamamatotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. ²⁰ Jesús itsa tane bajarapalatanëyo, nexata jumaiti bajarapamonaejavabelia:

—¿Jipatsa mapitabaraje, pevënënu, ruca mapalatanëyoyumataje? jai Jesús.

²¹ Nexata bajarapamonae jumaiti Jesúsjavabelia:

—Romanonacua raja pepo pevetsinë pitabara, pevënënu, jai.

Nexata Jesús jumaiti bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitisjavata. Nexata baja copatatsi Jesús

jamatabëcueneëjëbiaya peyanijobijavatsi. Naviaba baja bajarapamonae.

Pacuenia Jesús tsipaeba jivi petëpaecujinae icatsia pi-asaëjavanexa yabara pelivaisi

²³ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaiti mapacueniaje:

²⁴ —Jesús, Moiséspijinë bajayata vajanacatoyaquinaelivaisi, jumaiti mapacueniaje: “Ponë pematapijinë pepua penacojobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁵ Nexata jinavanapa ënaceomonae siete ponëbeje paxanëjavata. Pepo matapijinë copiaya nacojoba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami. ²⁶ Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia tëpa daxita siete ponëmibeje nacaemonaemi, bajarapova pepitaponaevi. Itsiata itsanë ata pexi apo xinae bajarapovajavabelia. ²⁷ Bajaraxuacujinae bajarapova ata tëpa baja. ²⁸ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapomonaeyajuvënënë pijava tsane bajarapova bajarapamatacabi? Daxita pamonaemi siete ponëmibeje nacaemonaemi pitapona picani bajarapovami, jai saduceovi Jesúsjavabelia.

²⁹ Nexata Jesús jumaiti saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaiti. Apo payapëtaemënu pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. ³⁰ Pamatacabi raja petëpaevimi Dioso icatsia asaëyaexanaenatsi, apo nacojobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojobinexatsi. Bajarapamonae nacojobinejeva, jinavanapaena athëbëtatsia pacuenia angelevi jinavanapa. ³¹ Itsa pepacuene paxamë xaniavaetsia paneyanijobame paneyapëtaenexa Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Dioso jumaiti. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapamonae yabara bajayata Dioso jumaiti Moiséspijinëjavabelia mapacueniaje: ³² “Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso

bajayata petëpaevimi yabara. Bajarapacuenia Dioso pejumaitisixae, nayapëthane bajarapamonae bajayata tëpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia, jai Jesús saduceovijavabelia.

³³ Jivi ayaibitsaëtoxfaneto itsa jumetane bajarapacuenia Jesús pejumaitisijava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi nacaetuata penabarëcuaicuaijainexa. Nexata fariseovi najumejaita pacuenia yanijobijitsia Jesúsjavabelia. ³⁵ Nexata fariseoviyajuvënënë, judíovi pecujarubinë, Jesúsjavabelia jamatabëcueneëjëbiaya yanijoba. Jumaiti Jesúsjavabelia mapacueniaje:

³⁶ —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

³⁷⁻³⁸ Jesús nexata jumaiti judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaiti mapacueniaje: “Pasivamëre panijatuxanenë panijaDioso daxita panejamatabëthëtöjavavetsina, daxita panejamatabëcueneta ata, daxita panenamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaiti icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. ⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaevimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi

⁴¹ Fariseovi penacaetuatsijavata, fariseovijavabelia Jesús pijacuata nayabarajumaiti mapacueniaje:

⁴² —¿Detsa pacuenia pasivanajamatabëxainaname Cristo itsa patsianica? ¿Jipatsa pexënatö tsane? nayabarajai Jesús pijacuata fariseovijavabelia.

Nexata fariseovi jumaiti Jesúsjavabelia:

—Davidpijinë pemomo tsane, jai.

⁴³ Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitsijava Cristo yabara, Davidpijinë Espiritu Santo pejamatabëcueneta tajëvelia jumaitsi mapacueniaje:

⁴⁴ Dioso jumaitsi tajatuxanenëjavabelia:

“Ecare abaxë tacujuanenia. Vecatsivajënae jumecov-ënëtsiaexanaenatsi abaxë copiaya nijavajabitsaë ni-torobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

⁴⁵ Nexata Davidpijinë bajayata Cristo yabara: “Taj-
jatuxanenë,” ita jai, nexata Cristo, Davidpijinë apo pe-
momo. Tsipaji baja cajena saicaya Cristo Dioso pexë-
nato, nayabarajai Jesús pijacuata fariseovijavabelia
fariseovi pecanaëjëtisnexa Cristo Dioso pexëna-
tocuene.

⁴⁶ Nexata itsanë ata fariseoviyajuvënënë Jesús apo
jumepitsitsi caejumeyo ata. Bajaraxuacujinae fariseovi,
saduceovi ata, cujunava Jesúsjavabelia baja ja-
matabëcueneëjëbiaya livaisi peyanijobijava.

**Pacuenia Jesús tsipaeba fariseovijavabelia, judíovi
pecujarubivijavabelia ata, bajarapamonae
penaneconitsijava Diosojavabelia yabara pelivaisi**

23 Jesús jumaitsi jivi ayaibitsaëtojavabelia, pijajivi-
javabelia ata:

² —Judíovi pecujarubivi, fariseovi ata, Dioso toco-
patatsi jivi xaniavaetsia peyapëtaeyaexanaponaenexa
pajamatabëcuenelivaisi xaina Dioso Moiséspijinëta pe-
najumecopatsilivaisimi. ³ Nexata pajumecovënët-
sianame daxita pacuenia bajarapamonae pacatsipae-
bapona. Itsiata baitsi jane pëtsa paexaname pacuenia
bajarapamonae exanavanapa. Tsipaji xua bajarapa-
monae pacaitaveta paxamë paneexanaeyaniva, ba-
jaraxua itsiata bajarapamonae exanabiaba. ⁴ Pali-
vaisianë ayapëbeje itsajivi ata pejumecovënëtsinexa,
bajarapalivaisianë pacatsipaebabiaba panejumecov-
ënëtsinexa. Pamonaë bajarapacuenia pacatsipaeba, it-
sanë ata bajarapamonaeyajuvënënë apo jamatabëna-
jinae pexanaenexa bajarapacuenia. ⁵ Daxita xua ba-
jarapamonae exana, exanabiaba saya jivi petaenexat-
si. Bajarapamonae jamatabëjumai tsabiabi: “Bajaraxua
itsa exanaenatsi, jivi nacayaiyataena,” jamatabëjai
tsabiabi. Bajarapamonae pitapata, pecofiata ata, beca-
jonixicuenia pexanaejavaxita yacajonia cëbarubeje-
babiaba Diosojumelivaisi peyaquinaebaxutoxi. Bajara-
pamonae itsamonae matatoxenetsia paju-
manavaitabënexa, piapiafleco pijanavatabuyalia
cëbarubabiaba. Bajarapacuenia bitso jitsipabiaba pex-
anabiabinexa. ⁶ Bajarapamonae itsa najunatatsi fiesta-
javabelia penanabaninexa, nexata jitsipabiaba pe-
naenexa pexaniavirijavanëta. Nexata natsiitapetabia-
ba penaenexa peyaiyataevitsi penaenexa petsinubija-
vanëta. Bajarapamonae itsa najoneyabiaba judíovi pe-
nacaetuatabibibota, jitsipabiaba penaenexa peyaiy-
ataevitsi penaenexa petsinubijavanëta. ⁷ Bajarapa-
monae bitso jitsipabiaba jivi pebjacobinexatsi yaiy-

ataeya callejava ata. “Patanecujarubinë,” pejaijavatsi
ata, bitso jitsipabiaba, jai Jesús mapacueniaje fariseovi
yabara, judíovi pecujarubivi ata yabara.

⁸ Icatsia Jesús jumaitsi jivi ayaibitsaëtojanetojav-
abelia, pijajivijavabelia ata:

—Pëtsa paxamë pajitsipame jivi papecajumaitsinexa
paxamëjavabelia: “Patanecujarubinë,” papecajainexa.
Tsipaji daxita paxamë bepanacaemonaemë Dioso
panejumecovënëtsivixae. Xanë, caenënë Cristonë,
athëbëvetsica Dioso taneitorobinëtsica jivi taca-
panepaenexa, panexainame patacucujarubinënexa.

⁹ Itsanë ita pacacujaruba, “Axa,” pajamë pëtsa bajara-
ponëjavabelia. Tsipaji caenë paneaxa paxainame,
ponë eca athëbëtatsia. ¹⁰ Pëtsa pajitsipame itsamonae
papecajumaitsinexa: “Jivi pevetsinë,” papecajainexa.

¹¹ Tsipaji xanë, caenënë Cristonë, patacaevetsinë. ¹¹ Ponë
paxamëyajuvënënë pacavecuayajamatabëcuenenë,
bajaraponë pacayavenonabiaba padaxitamë. ¹² Pajivi
daxitajivi matatoxenetsia pijacuata ayaija-
matabëcuenejivi natane, bajarapajivi itsamatacabi
daxitajivivecu beveliamatabëcuenejivi Dioso ex-
anaenatsi. Pajivi pijinia daxitajivivecu pijacuata beveli-
ajamatabëcuenejivi natane, bajarapajivi itsamatacabi
daxitajivi matatoxenetsia ayajamatabëcuenejivi Dioso
exanaenatsi, jai Jesús jivi ayaibitsaëtojanetojavabelia,
pijajivijavabelia ata.

¹³ Jesús icatsia jumaitsi fariseovijavabelia, judíovi
pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë
judíovi panecujarubivi, pafariseovimënu, ayaineconi
panatsixainame Diosojavabelia! Pacuenia bo babau-
paxatata jivi pejoneyaniva, bajara bepacuenia paxamë
paexaname. Itsamonae jitsipae ata pejonenexa Dioso
pijanacuayabetsia, apo pacopatsimë pejonenexa
saicayalivaisi panecujarubixae. Paxamë ata apo pajitsi-
paemë panejonenexa Dioso pijanacuayabetsia.

¹⁴ ¡Paxamë saya jivi paneyamaxëitojorobivi! ¡Paxamë
judíovi panecujarubivi, pafariseovimënu, ayaineconi
panatsixainame Diosojavabelia! Yamaxëitojorobiaya
pavecuannotabiabame pamonajivi pevecuatëpaevanët-
si pecobecovëjavaximi. Bajaraxuacujinae pinijicuenia
itajara Diosojavabelia pavajëcabiabame. Itsiata pepo
panexaniajijamatabëcueneta apo pavajëcabiabimë
Diosojavabelia. Bajarapacuenia pavajëcabiabame saya
jivi papecataenexa Dioso itajara bitso bepanejumecov-
ënëtsivi. Bajaraxuata bitso ayaicuenia Dioso
pacananeconitsiaexanaena pamatacabi Dioso
naneconitsiaexanaena daxita pamonaë Dioso apo pe-
jumecovënëtsivi.

¹⁵ ¡Paxamë saya jivi paneyamaxëitojorobivi! ¡Paxamë
judíovi panecujarubivi, pafariseovimënu, ayaineconi
panatsixainame Diosojavabelia! Palivaisi pacajinavana-
pame, caejivi ata panejumecovënëtsiaexanaenexa, pa-
paccuenejëpaenexanua, ayaicuenia daxitajava jivi
patsipaebarutame. Nexata pajivi pacajumecovënëta,
bajarapajivi pevajënaeyabelia bitso naneconitapona
Diosojavabelia. Nexata paxamë panejamatabëcueneta
bajarapajivi paxamë matatoxenetsia bitso Dioso

naneconitsiaexanaenatsi pexuabinexatsi infernojavabelia.

¹⁶ ¡Paxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamona! Nexata paxamë panecujarubijamatabëcueneta bajarapamona pananeconitsiaexaname Diosojavabelia. ¡Bajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena templobo pevënëta,’ jai, apo itsacuene. Bajarapajivi pejumaitcovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena templobopijiorojavanë pevënëta,’ jai, bajara jane xua abeje. Nexata bajarapajivi exanae pejumaitcovëya penaneconitsiyaniva Diosojavabelia,” pajamë tsabiabi jivijavabelia. ¹⁷ Pajamatabëcuene navëxaniabame raja saya bajarapacuenia itsa pajumaitsimë. Biji rajane templobo beyaiatanetsi bajarapatemlobopijiorojavanë matatoxenetsia. Bajarapaorojavanë ata yayiatanetsi. Tsipaji bajarapaorojavanë templobopijiorojavanë. ¹⁸ Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi altarpvënëjava pevënëta,’ jai, apo itsacuene. Bajarapajivi pejumaitcovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsitsi altarpvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitcovëya penaneconitsiyaniva Diosojavabelia,” pajamë tsabiabinua jivijavabelia. ¹⁹ Paneamatabocotajavi, bepaneitatsëcënavanapaevinua panejamatabëthëtota. Biji rajane beyaiatanetsi altarpvënëjava, bajarapaaltarpvënëjavajumata pebuatsiofrenda matatoxenetsia. Bajarapaofrenda ata yayiatanetsi. Tsipaji altarpvënëjavajumata boca. ²⁰ Pajivi jumaitsi: “Cajumaitsitsi altarpvënëjava pevënëta,” jai, caecuenia yajavavënëjona bajarapaaltarpvënëjavajumata pebocaeofrenda. ²¹ Pajivi pijinia najumecapanepaeya jumaitsi pejumexaniataenexatsi: “Cajumaitsitsi templobo pevënëta,” jai, caecuenia yajavavënëjona bajarapatemplobota peponaonaenë Dioso. ²² Pajivi pijinia najumecapanepaeya jumaitsi pejumexaniataenexatsi: “Cajumaitsitsi athëbëtsatsia panacua pevënëta,” jai, caecuenia yajavavënëjona Dioso pijatrono. Caecuenia yajavavënëjonanua Dioso, ponë ecabiaba bajarapatronota pitorobabiabinexa pijajivi.

²³ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuenia Diosojavabelia. Daxitaviria paneubi-

javaxi ata, diez xuabejeyajuvënëjava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamë, apo pajumecovënëtsimë itsalivaisianë, Dioso papecatonajumecopatsilivaisianë, palivaisianë picani bitso Dioso pacatojitsipa panejumecovënëtsinexa. Bajarapalivaisianë picani pacaitoroba itsamonaejavabelia pexaniacuene pane-toexanabiabinexa. Pacaitorobanua picani paneitaxutotsoniataeyabiabinexa itsamonae ata. Pacaitorobanua picani xaniavaetsia panenajamatabëcuenecopatsinexa Diosojavabelia. Bajarapacuenia picani bepaexanavanapame pacopatsinejevamë bajaraxua, ofrendacuenia panerajutabiabijava Diosojavabelia.

²⁴ ¡Paxamë apo payapëtae atamë Dioso pejumelivaisi, jamatabëcuenenavëxaniabiaya pacujarubabiabame itsamona! Palivaisianë Dioso najumecopata panejumecovënëtsinexa, bajarapalivaisianë yajuvënëlivaisixi, saya beveliajamatabëcuenelivaisixi, pacaasaëmë tsvanapae. Palivaisianë picani Dioso bitso pacatojitsipa panejumecovënëtsinexa, caranata panamuxujematame. Nexata panecujarubivi panecujarubicuenia pexanavanapaexae, panecujarubivi ata naneconita Diosojavabelia pacuenia paxamë pananeconitame Diosojavabelia.

²⁵ ¡Paxamë jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! “Najamatabëcuenebiji naejitsipajë Diosojavabelia,” panejamatabëjitsabiabixae, panecaxaevajënae panecaxaenëanë, taza ata, naniavelia paquiatabiabame xaniavaetsia panijasalinaicuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaëjitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Itsiata baitsi jane panejamatabëthëtota bëpënëa panajamatabëxainabiabame pibisiacuene. Panajamatabëxainabiabame itsanë pecobecovë paneyacajëreëtsinexa. Panajamatabëxainabiabamenua panexainaenexa ayajava ëpaxamënexa. ²⁶ Paxamë pafariseovimë, bepaneitaxutotsëcënaevi panejamatabëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bajaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi panejamatabëcuenexuirajibinexa. Nexata bajaraxuacujinae pacajamatabëcuenecaëjëpaena paneexanaenexa ëpexaniacuene pacuenia Dioso pacaitoroba.

²⁷ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënu, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamona caiquina peniojairata bajarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bajaraxua apo jitsipaetsi vajajayatsinexa. Bajara pijinia paxamë ata Dioso patsitajamatabëcueneitsimë. ²⁸ Itsamona naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëthëtota

bëpënëa panajamatabëxainabiabame jivi paneyamaxëitojorobivini. Itsajava ata pematatsënëa pibisiacuene paneexanaenexa, panajamatabëxainabiabame.

²⁹ ¡Paxamë saya jivi paneyamaxëitojorobivi! ¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata mëthëca. Nexata mapamatacabitaje bajarapapofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapapofetavimi. Pamonaemi ata bajayata tëpa, pamonaeaneconijibia pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi. ³⁰ Bajarpacuenia itabëtsiaya paneexanaecujinae, jivijavabelia pajumaitsimë tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabipajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuene më bajayata pamonaemi beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë. ³² Paxamë ata papibisiajamatabëcuenevixaemë, xanë ata jamatabëpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamë bitso pibisiacuene paneexanaevi! Pacuenia jomo rëcëpeca itsa tane petajunenajetarucæjava isoto, bajara paitsimë. Itsiata apo papanepaemë tsane infiernovecua panijaneconi yabara. ³⁴ Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaexanaevitsi. Pacatoitorobianatsinua picani xanë talivaisi papecatsipaebivinexa. Itsiata baitsi jane bajarapamonaeyajuvënëvi itsamonae pabeyaxuabaponaename. Itsamonae cruzajavabelia pacobematabiaxuaababiabianame. Itsamonae paju-matitibabeyabiabianame penaneconitsivi panejumacanitabiabimacata judíovi penacaetuatabibonëjava. Itsamonae pabaraponabiabianame itsa tomaranëjavabelia ata panebejiobiaexanaenexa. ³⁵ Bajarapacuenia nexata paxamë ayaineconi panatsixainaname Diosojavabelia. Daxita pamonaeaneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamë pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsamonae ata, Dioso pitabarata aneconijibia pejinavanapaevimi. Nexata bexëjavaberena ata Berequíaspjinë pexënatomi, Zacaríaspijinë, panijasalinaivi beyaxuaba. Zacaríaspijinëni panijasalinaivimi

beyaxuaba templobopanabota, templobobeje al-tarvënëjavabeje tuatujëta. ³⁶ Xaniajanë pacuenia pacatsipaebijitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamë aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

Pacuenia Jesús najamatabëxainaeya sivanua Jerusalén tomarapijivi yabara pelivaisi

³⁷ Jesús najamatabëxainaeya sivanua Jerusalén tomarapijivi. Jumaitsi pesivanuejavata mapacueniaje: —¡Pajerusalén tomarapijivimë, pabeyabiabame Diosojumepaebivimi profetavi! ¡Ibotonëta ata patsec-onabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacaetuatsinexa, patacapanepaenexa picani panijaneconivecua! ¡Itsiata baitsi jane paxamë apo pajejamë cajena! ³⁸ Panejumetaema. Dioso rabaja pacacopata papecaevetabijavami. Nexata baja panijatemplotota Dioso apo ponapona. ³⁹ Xaniajanë pacuenia pacatsipaebijitsiatsi. Paxamë rabaja apo panetaemë tsane matavëjëa. Matapania itsa panejumecovënëtsianame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënu tsane: “Dioso, bitso yavenonare maponë najetarucæje, nejamatabëcueneta penajetarucænë,” itsa panesivajamatabëjamë tsane xanë yabara, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

Pacuenia Jesús pijajivi tajëvelia tsipaeba itsamatacabitsanacuapijivi templobo pexuabijavanexatsica yabara pelivaisi

24 Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi: —Patajatuxanenë, templobo nataema pemuxuneneta penaeboxanetonë ata, jai. ² Nexata Jesús tajëvelia vajunupaeba itsamatacabitsanacuapijivi bajarapaboxanetonëni pepenetsijavanexatsica. Jesús jumaitsi pijajivijavabelia mapacueniaje: —Xaniajanë pacuenia pacatsipaebijitsiatsi. Daxita raja paboxanetonë pataneme, bajarapaboxanetonëni itsamatacabitsanacuapijivi penetsianica irabetsica. Nexata paibotonë catsanaruba mapaboxanetonëtaje, itsaiboto ata pejumavereca apo boca tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

³ Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi.

Nexata Jesús pijajivi jumaitsi:

—Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaëjitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁵ Tsipaji raja peyamaxëitojorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana.

⁶ Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepïjia bajara-pamatacabi mapanacuaje abaxë apo vereverecajuni tsane. ⁷ Mapanacuaje pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitanecuene ata najetarucaena itsanacuanëjava. Ira najëbiana ayaicuenia itsanacuanëjava. ⁸ Daxita bajarapacuene itsa pataename, saya abaxë taxuxu-abaponaena piayaicuenie, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacaponaena nacuaevetsivijavabelia papecabebiobianexaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë. ¹⁰ Nexata bajarapamatacabita jivi ayaibitsaëto navecuacopabiana tanejumecovënëtsijava. Namataenetsia naitoya tsane. Namataenetsia nacanajetsiana nacuaevetsivi pecobeyabelia. ¹¹ Nexata ayaibitsaëto najetarubenaena jivi petsipaebaponavexa saicalivaisi Dioso pejumelivaisivecua. Be-Diosojumelivaisipaebivicuenia tsipaebaponaena. Bajarapamonae yamaxëitojorobiana jivi ayaibitsaëto-aneto. ¹² Jivi pibisiacuene pexanavanapaevi, pevajënaeyabelia ayaibitsaëto-aneto tsaponae tsane. Nexata ayaibitsaëto Dioso pejumecovënëtsivi, namataenetsia penaasivajava vereverecaponaena. ¹³ Itsiata pajivi ajamatabëcuenesaë tsane Dioso pejumecovënëtsijava

petëpaejavabelianexa, bajarapajivi Dioso capanepaenatsi. ¹⁴ Itsamonae daxita nacuanëjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja mapanacua vereverecaenaje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁵⁻¹⁶ Icatsia Jesús tajëvelia vajunupaeba papiayaicuenie itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi profeta Danielpijnë piayaicuenie tajëvelia pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuenie vajunupaeba mapalivaisitaje.) Nexata paxamë itsa pataename bajarapapiayaicuenie penucaejava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia. ¹⁷ Pajivi pijabojumata athëbëyo ecaya, itsa vënëlivaisitaena bajarapapiayaicuenie penucaejava templobota, bajarapajivi perunaecujinaetsica, bepïjia najetabajiraviana. Pëtsa joneya pijaboyalia pejuetsinexa pecobecovë. ¹⁸ Pajivi pijinia nacuenebaponapona pijapabita, itsa vënëlivaisitaena bajarapapiayaicuenie penucaejava templobota, bepïjia najetabajiraviana. Pëtsa naviata pijaboyabelia pejuetsinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi! ²⁰ Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuenie. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. Pavajëcarenuva penacueraevetsimatacabita bajarapapiayaicuenie papecatocopiapatsiyaniva, nexata papecatoayapëbejeyaniva. ²¹ Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua yatuucutsiana jivi bitso nabejiobitsiaya pejinavanapaematacabianëminexa bitso jivi nabejiobitsiaya pejinavanapaeyaniva. Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuenie itsamatacabi copiapatsijitsia mapanacuataje.

²³ Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumait-si tsane: “Pataema. Mara Cristo nucaje,” itsa pacajai tsane, pëtsa pajumecovënëtaeme. Itsa pacajumait-sinua tsane: “Bajarajota nuca Cristo,” itsa pacajai tsane, pëtsa pajumecovënëtaeme. ²⁴ Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonae pepacuenie Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.

²⁵ Tajëvelia rabaja maje pacatsipaebatsije. ²⁶ Nexata itsamonae itsa pacajumai tsane: “Cristo raja ponapona petusato nacuatalla. Naxanitsia. Panataename,” itsa pacajai tsane, pëtsa paponaremelia. Itsa pacajumait-sinua tsane: “Cristo raja ponapona mapaënëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtaeme. ²⁷ Payapëtaneme rabaja mapacuenieje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë. ²⁸ Payapëtaneme rabaja mapacuenie ataje. Quequeremonae bepimia bayapëtaneme itsajota petuxutsaebinë boca. Nexata bajarajota bepimia banacaetuana. Bajara pijinia pacuenia daxitanacuanëpijivi tajajivi bepimia yapëtaena tapatsijavatsica. Nexata bepimia nacaetuanaena xanëjavaberena, jai Jesús pijajivijavabelia tajëvelia penavajunupaebijavata icatsia pepatsijavanexatsica.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

²⁹ Jesús tajëvelia navajunupaeba itsamatacabi icatsia pepatsijavanexatsica. Jesús jumait-si pijajivijavabelia mapacueniaje:

—Xanë tapatsivajënaetsica jivi taena pecujunav-icuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae, matacabi pijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. ³⁰ Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuenta pecajunavi pijaneconi yabara. Nexata bajarapapatota, xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë. ³¹ Bajaraxuacujinae trompeta itsa najumetsiana ayajumeta, itorobianajë tajaängelevi. Angelevi daxitanacuanëjavaverena xanëjavaberena netocaetuatsiana tajajivi, pamonae Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumait-si pijajivijavabelia mapacueniaje:

—Pacanaëjere pacuenia itsi higueraanae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica. ³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecea tsane. Matapania xua tajëvelia vajunupaebajë itsa baja copiapatsiana, bajarapamonae jane baja vereverecea. ³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenevëxaniabiana. Tsipaji jemata itaboxo, ira yajava, vereverecea. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumait-sinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumait-si pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, Ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtaneme, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumait-si pijajivijavabelia mapacueniaje:

—Pacuenia bajayata jemata itsi pamatacabi Noëpijinënë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë.

³⁸ Pamatacabi Noëpijinënë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noëpijinënë ëpijamonae pinijibarcoxanetojavabelia barëjunua. ³⁹ Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtaneme jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë.

⁴⁰ Nexata bajarapamatacabitata anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi Ángelevi. Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najacuabanucaenabeje caejavata. Nexata tanejumecovënëtsiva pit-

sianatsi ángelnë. Apo tanejumečovënëtsiva copatanut-sianatsi.

⁴² Nexata nejamatabëcueneevetsiaya panecopiaeve-tavanapaename. Tsipaji raja apo panevajënaeyapë-taemë tsane paepatota xanë panijatuxanenë icatsia patsijitsianëtsica. ⁴³ Pacanaëjère mapacueneje. Bo pex-ainaenë itsa yapëtaejitsipa paepatota meraví pijaboy-aberena patsijitsia pecobecovë petonacobetox-otsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. ⁴⁴ Bajara pijinia pacuenia pax-amë ata najamatabëcuenexaniavaetsiaya panecopi-aevetavanapaename. Tsipaji xanë, Daxitajivi Pematapi-jinë, paepatota apo panejamatabënjajinaemë tapat-sijavanexatsica, jemata icatsia patsianicajë, jai Jesús pi-jajivijavabelia tajëvelia penavajunupaebijavata it-samatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba petuxa-nenë pijajivitonëbeje pelivaisicuenia yabara pelivaisi

⁴⁵ Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivi-javabelia tsipaeba copiaevetsiaya petonacueneba-vanapaenexatsi icatsia pepatsimatacabitsicajav-abelianexa. Jesús jumaiti mapacueniaje:

—Petuxanenë pijajivitonë, ponë xaniavaetsia pijatux-anenë pecovëta tonacuenebaponaponaena, maja-matabëcueneitsi tsaneje. Bajaraponë itsaja-matabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pi-jatuxanenë pijajivi pecovëta tovetaponaponaena pia-batabiabinexa pexaejava caematacabi canacujitsia pacuenia pijatuxanenë itorobatsi. ⁴⁶ Bajaraponë bitso barëya tsane pamatacabi pijatuxanenë patsiana, xani-avaetsia pijajivi petoetaponaponaexae pecovëta. ⁴⁷ Xaniajanë pacuenia pacatsipaebijitsiatsi. Ponë xani-avaetsia tonacuenebianana pijatuxanenë pecovëta, ba-jaraponë evetsiaexanaenatsi daxita xua xaina pijatuxa-nenë. ⁴⁸ Itsa bajaraponë piamatabëcuenebejenë tsi-pae, nexata pijatuxanenë pecovëta jamatabëjumaiti tsipae: “Tajatuxanenë ajibi tsarucae tsane bajayajebi,” jamatabëjai tsipae. ⁴⁹ Nexata toconibabeyabiabijitsipa pijatuxanenë pijajivi. Ayaijava xaeyabiabijitsipa. Naapaeyabiabijitsipanua piatajibivita. ⁵⁰ Nexata itsajota apo jamatabënjajinae tsipae pijatuxanenë pepatsija-vanexa, patsipa pijatuxanenë. ⁵¹ Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicue-nia naneconitsiaexanaenatsi, bajarapacuenia pijatuxa-nenë naneconitsiaexanaejitsipatsi. Nexata natsinuejit-sipa. Navonosinijitsipanua bitso penavixaetaexae, jai Jesús pijajivijavabelia petuxanenë pijajivitonëbeje peli-vaisicuenia petsipaebijavata.

Bajarapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimat-acabitsicajavabelianexa.

Pacuenia Jesús pijajivi livaisi tsipaeba diez papejanav-abeje pijalámparabëxi pecaponaevi pelivaisicuenia yabara pelivaisi

25 Jesús icatsia jumaiti pijajivijavabelia: —Pamatacabi icatsia patsianicajë, tajajivi peyapëtaexae tapatsijavanexatsica, jamatabëcue-neaitavaya necopiaevetavanapaena. Itsamonae tajajivi yapëtae ata tapatsijavanexatsica, itsiata jamatabëcue-neaitavaya apo necopiaevetavanapae tsane. Bajara-pacuene yabara pacatsipaebianatsi mapalivaisije. Diez papejanavabeje yapëtane itsava pejanava penacasabi-javanexa. Nexata diez papejanavabeje pijalámpara-bëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca pe-nacasabivanexa. Bajarajota vajënaeevetsijitsia pepatsi-java penacasabinënexa. Nexata itsa ponabeje pe-nacasabijivibejenexa, bajarapapejanavi penapon-aenexa bajarapajivibeje pepëta penacasabifiestajav-abelia. ²⁴ Bajarapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicaponae itsa tovereverecatsi aceitera peepatsinexa icatsia pijalám-parabëxijavabelia. Cinco pijinia povabeje peyapëtaex-ae petsicaponaejavanexa aceiteranë pijalámparabëx-inexa, tsicapona. ⁵ Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámpara-bëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. ⁶ Bajaraxuacujinae ayaimeravi tuatujëta jumetane pevavajajava. “¡Naje-taruca rajane baja penacasabinënexa! ¡Papitsapareme-na jane baja panecopiapitsinexa!” pejaijava jumetane. ⁷ Nexata daxita bajarapapetiriavi nonobapuna pecopi-apitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pi-jalámparabëxi ayaicotia exana. ⁸ Nexata papetiriavi apo tsicaponae aceiteranë, jumaiti aceiteranë petsi-caponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai bajarapamona. ⁹ Itsiata aceiteranë petsicaponaevi jumaiti: “Jume. Apo caëjë-pae. Paxanë ata meta apo panetocaëjëpae tsipae. Pa-ponaremelia. Panijacuata pacomuare itsajotalia cana-jetabiaba aceiteranë,” jai aceiteranë petsicaponaevi pi-jalámparabëxinexa. ¹⁰ Nexata papetiriavi aceiteranë apo tsicaponae pijalámparabëxinexa, ponalia aceiter-anë pecomuacaenexa. Nexata pecovëta pe-nacasabinënexa patanajetaruca. Nexata papetiriavi aceiteranë tsicapona pijalámparabëxinexa, napona ba-ja penacasabifiestanexa pexanaebojavabelia. Pe-jonecujinaelia baupaxatata. ¹¹ Bajaraxuacujinae aceit-eranë pijalámparabëxi petsicomuacaevi pata. Nexata bajarapapetiriavi jumaiti penacasabinënexajavabelia: “¡Panetobaupare! ¡Panetobaupare! jai tsanubenae bo-jumavelia. ¹² Nexata penacasabinënexa jumaiti: “Xani-

ajanë pacuenia pacatsipaebijitsiatsi. Apo pacayapë-taetsi cajena paxamë," jai bajarapapetirivijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaevetavanapaename. Tsipaji apo payapë-taemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

Pacuenia Jesús pijajivi livaisi tsipaeba pijapalata pijajivi pevetsiaexanaenë pelivaisicuenia yabara pelivaisi

¹⁴ Jesús icatsia jumaitsi pijajivijavabelia:

—Tacovëta patajajivimë, itsamonae ata, pamona ta-jajivi, panetonacuenebianame. Nexata pamatacabi icatsia patsianicajë, pacuenia pacasivanajamatabëx-ainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenë ita ponaejitsia tajënacuyabelia, junata pijajivi. Evetsiaexana pijapalata peto-evetsinexatsi pecovëta.

¹⁵ Caenë canacujitsia evetsiaexanapona peto-canacuenebinexatsi pecovëta pacuenia bajarapamonae caëjëpatsi. Nexata petuxanenë pijinia evetsiaexana cinco mil ponëbeje pepovi, bitso penamatamotsivi. It-sanë pijinia evetsiaexana dos mil ponëbeje. Itsanë pijinia evetsiaexana mil ponëbeje. Bajaraxuacujinae petuxanenë pona tajënacuyabelia.

¹⁶ Nexata jane baja ponë evetsiaexana cinco mil ponëbeje, canacueneba jane baja pecovëta bajarapalata. Nexata pematatsënëa topitsapatsi icatsia itsac-inco mil ponëbeje. Nexata baja daxitata diez mil ponëbeje caejavata. ¹⁷ Bajara pijinia pacuenia itsanë canacueneba dos mil ponëbeje. Nexata pematatsënëa topitsapatsi icatsia itsados mil ponëbeje. ¹⁸ Itsiata bait-si jane ponë toeveta mil ponëbeje, pona pematayatsinexa pijatuxanenë pijapalata. Matayatsia mëthëta irata.

¹⁹ Bexëa nexata najetaruca petuxanenë. Junata pijajivi peyapëtaenexa pacuenia toevetatsi pecovëta pijapalata. ²⁰ Copiaya pata ponë cinco mil ponëbeje evetsiaexanatsi. Nexata bajaraponë tocanaviata pijatuxanenëjavabelia diez mil ponëbeje. Jumaitsi bajaraponë pijatuxanenëjavabelia: "Nevetsiaexaname cinco mil ponëbeje tacatoevetsinexa. Bajara macatocanaviatatsi bajarapalataje. Catocanaviatatsi yajava icatsia itsac-inco mil ponëbeje, xua nacanabajë bajarapalata," jai bajaraponë pijatuxanenëjavabelia. ²¹ Nexata petuxanenë jumaitsi: "Xanepana rabaja. Xaniavaetsia neto-evetaponaponame. Itsajamatabëcuene apo najamatabëxainamë. Tsiquirijavayo ata xaniavaetsia neto-evetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata," jai petuxanenë pijajivitonëjavabelia. ²² Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia: "Nevetsiaex-

aname dos mil ponëbeje tacatoevetsinexa. Bajara macatocanaviatatsi bajarapalataje. Catocanaviatatsi yajava icatsia itsados mil ponëbeje, xua nacanabajë bajarapalata," jai bajaraponë pijatuxanenëjavabelia. ²³ Nexata petuxanenë jumaitsi: "Xanepana rabaja. Xaniavaetsia neto-evetaponaponame. Itsajamatabëcuene apo najamatabëxainamë. Tsiquirijavayo ata xaniavaetsia neto-evetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata," jai petuxanenë pijajivitonëjavabelia.

²⁴ Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia: "Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubiaexanabiabijava nexata bajarapamonae pejamatabëcueneata ayaijava palata pecatopitsapaenexa. Bajara pijinia pacuenia xanë ata nevecuapitsipame xua nacanabijitsipajë nijapalata ita canacuenebijitsipajë. ²⁵ Bajaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije," jai bajaraponë pijatuxanenëjavabelia. ²⁶ Nexata petuxanenë jumaitsi: "Tajajivitonë atamë, itsiata ajamatabëcuenebejemë. Afaetabimënu. Xamë baja cajena yapëtaneme tajajivi taubiaexanabiabijava, taubiaexanabiabijava nexata bajarapamonae pejamatabëcueneata ayaijava palata tanetopitsapaenexa.

²⁷ Bajaraxuata xanepanaejitsipa ita netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacov-aetsijamatabëcuene netocanaviatsipa tajapalata pematatsënëa," jai petuxanenë pijajivitonëjavabelia.

²⁸ Nexata petuxanenë jumaitsi bajarajota penubenaevijavabelia: "Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tsipaji bajaraponë caëjëpatsi taneto-evetsinexa pematatsënëa. ²⁹ Tsipaji pajivi ayaijava baja xaina, pematatsënëa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponë tajajivitonëje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosiniananua bitso penavixaetaexae," jai petuxanenë, jai Jesús comparacióncuenia pijajivijavabelia.

Bajarapacuenia Jesús jumaitsi pamona pijaneconi pexainaevi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaevi yabara pelivaisi

³¹ Jesús tajëvelia navajunupaeba pacuenia itsamatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinënë, icatsia ita najetarucaenajë daxitanacua taevetsinexa, ángelevi nematatoronaeya yajavanajetarucaenajë. Nexata ecaenajë tajapenivenivenaetronovënëjavata. ³²⁻³³ Nexata

daxitanacuanëpïjivi caetuatsianatsi taitabarata. Tsat-aponanajë bajarapamonae. Oveja pevetsinë ovejave-cua chivo saicaya tsatapona. Nexata oveja pevetsinë petsavenonenia chivo nubenaeyaexana. Pecujanenia pijinia oveja nubenaeyaexana. Bajara pijinia pacuenia xanë tsataponaenajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenonenia nubenaeyaexanaenajë. Dioso pijinia pejumecovënëtsivi tacujanenia nubenaeyaexanaenajë. ³⁴ Nexata jumaitsinë tsane tacujanenia penubenaevijavabelia, Dioso pejumecovënëtsivi: "Nax-anitsia. Paxamë taxa papecaitaxutotsoniataevi. Payajavajinavanapaename taxa pijanacuatatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapi-tame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconit-sivi pejebabiabibota, papatame patanetaenexamë," janë tsane tacujanenia penubenaevijavabelia. ³⁷ Nexata bajarapamonae nejumai tsane: "Tajatuxanenë, ¿detsa pacujinae niajanijavata patajacarajutsi nexaejava?" nejai tsane. ¿Detsa pacujinae mera nejitsipaejavata patajacarajutsi mera? nejai tsane. ³⁸ Itsa jume, nejumai tsane: "¿Detsa pacujinae itsanacuaverena nepatsinë patajacacopiapitsi xaniavaetsia?" nejai tsane. Itsa jume, nejumai tsane: "¿Detsa pacujinae pi-jibijavata bitso nenaxatatsijava patajacarajutsi nenaxatatsijavanexa?" nejai tsane. ³⁹ Itsa jume, nejumai tsane: "¿Detsa pacujinae niavitanejavata patajaponae patacaevetsinexa?" nejai tsane. Itsa jume, nejumai tsane: "¿Detsa pacujinae pecaetsijavata penaneconit-sivi pejebabiabibota patajaponae patacataenexa?" nejai tsane. ⁴⁰ Nexata xanë jumaitsinë tsane bajarapamonaejavabelia: "Xaniajanë pacuenia pacatsipaebijitsi-atsi. Daxita xua patoexaname paneyavenonaenexa tajajiviyajuvënëjivi, beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë," janë tsane.

⁴¹ Nexata tatsavenonenia penubenaevi, Dioso apo pejumecovënëtsivijavabelia, jumaitsinë tsane: "Pan-vecuanatsare panijaneconi paneyajavajinavanapaevi. Paponaremelia apo peverevereaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. ⁴² Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera. ⁴³ Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë," janë tsane tatsavenonenia penubenaevijavabelia. ⁴⁴ Nexata bajarapamonae pijaneconi peyajavajinavanapaevi nejumai tsane: "Tajatuxanenë, ¿detsa pacujinae niajanijavata apo pacarajutsitsi nexaejava?" nejai tsane. Itsa jume, nejumai

tsane: "¿Detsa pacujinae mera nejitsipaejavata mera apo pacarajutsitsi?" nejai tsane. Itsa jume, nejumai tsane: "¿Detsa pacujinae itsanacuaverena nepatsinë, apo pacacopiapitsitsi xaniavaetsia?" nejai tsane. Itsa jume, nejumai tsane: "¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?" nejai tsane. Itsa jume, nejumai tsane: "¿Detsa pacujinae niavitanejavata, apo paponanë patacaevetsinexa?" nejai tsane. Itsa jume, nejumai tsane: "¿Detsa pacujinae penaneconitsivi pejebabiabibota pecaetsijavata, apo paponanë patacataenexa?" nejai tsane bajarapamonae. ⁴⁵ Nexata xanë jumaitsinë tsane bajarapamonaejavabelia: "Xaniajanë pacuenia pacatsipaebijitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë," janë tsane pijaneconi peyajavajinavanapaevijavabelia. ⁴⁶ Bajaraxuacujinae bajarapamonae ponaena penaneconitsijavajinavanapaenexa daxitamatacabijavabelianexa. Pamonae Dioso pejumecovënëtsivi, bajarapamonae Dioso rajutsianatsi matacabi apo peverevereaejava, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

Pacuenia picani Jesús pijavajabitsaë jamatabë-vaetabatsi yabara pelivaisi

26 Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabi-abarutsijavanexatsi. Jesús jumaitsi pijajivijavabelia mapacueniaje:

² —Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necanajetsiana itsamonae pecobeyabelia tanecobematabiabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabi-abarutsijavanexatsi.

³ Nexata bajarapaepatota nacaetuata sacerdotevi penamatacaitorobivi. Nacaetuata judíovi pecujarubivinuua. Nacaetuata judíovi pijaancianovinua. Daxita bajarapamonae nacaetuata Caifásvënënë pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota daxita bajarapamonae najumejaita. Penajumetsënësilivaisita picani Jesús jamatabëvaetabatsi pebeyaxuabinexatsi. ⁵ Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitacueniabiyana, najai daxita bajarapamonae.

Pacuenia Jesús petiriva tsimataepanatsi petuxujuvia-ceitera yabara pelivaisi

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. ⁷ Nex-

ata Jesús petiriva cobenaimoxoyorenatsi petuxujuvia-ceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi ita taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiobivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaiti pijajivijavabelia:

—¿Detsa xuajitsia bajarapacuenia pajumaitisimë bajarapova pexanaejava yabara? Mara povaje pexaniacuene nexanae. ¹¹ Daxitamatacabi raja bepejiobivi jivananapa itsaxuayo pajinapaname. Itsiata baitsi jane xanë daxitamatacabi apo ponaponanë tsane paxamëjavata. ¹² Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. ¹³ Xaniajanë pacuenia pacatsipaebijitsiatsi. Daxitanacuanëjava tajajivi ita paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. ¹⁵ Nexata Judas jumaiti sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia ita canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nexata bajaraxuacujinae Judas Jesús naitaxutocaeveysia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barënanabane pijajivi pecopiarutsinabani baja pebeyaxuabivajënaetsi yabara pelivaisi

¹⁷ Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

¹⁸ Nexata Jesús jumaiti pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitisimë tsane bo pexainaenëjavabelia mapacueniaje: “Vajanacacujarubinë raja jumaiti: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

¹⁹ Nexata baja Jesús pijajivi pona pacuenia Jesús jumaiti. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jene baja.

²⁰ Nexata baja ajena meraviyotsia, Jesús pijajivi, doce ponëbeje, barëeca mesa muxuneneta. ²¹ Nexata pexaeyenaejavata Jesús jumaiti pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

²² Nexata Jesús pijajivi bejamatabëjibireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

²³ Nexata Jesús jumaiti pijajivijavabelia:

—Ponëbeje peneta caecuenia panajuacajabutsiana-jëbeje panbë platojavabelia, bajaraponë necanajetsiana tajavajabitsaë pecobeyabelia. ²⁴ Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaiti. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë ita apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

²⁵ Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaiti:

—Petuxanenë, ¿xanë tsaja tsane? jai.

Nexata Jesús jumaiti:

—Jājā, xamë rabaja tsane, jai.

²⁶ Pexaeyenaejavata Jesús pita panbë. Jesús jumaiti Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsënëquejeba bajarapanbë. Rajuta pijajivi. Jesús jumaiti pijajivijavabelia:

—Paxaema. Mara tavitoje, jai.

²⁷ Bajaraxuacujinae icatsia Jesús copavënëjavata yapita piapaeranexa. Diosojavabelia jumaiti:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaiti pijajivijavabelia:

—Papaema padaxitamë maporaje. ²⁸ Tsipaji tajana othopaena jivi ayaibitsaëtoخانeto pibisiacuene pexanaeconi pevecuaajibiaexanaenexatsi. Nexata tatë-

paejava pejamatabëcueneta, jivi yapëtaena pepacuenene xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebexuabijavanexatsi.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi

³⁰ Jesús pijajivi barënaexëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsiptaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaënë tsane. Nexata paxamë panevājēnaeyabelia, copiata ponaenajë Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaaje caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, naniaanaevëpata, vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanívenëjavata yabara pelivaisi

³⁶ Jesús pijajivi pecunameravita yajavapata Getsemanívenëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapa-

matabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainaejava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

³⁹ Nexata Jesús caenë pevājēnaeyabelia icatsia tsiquirirjavayo ponataba. Nexata Jesús irataeya bocajunua pevājëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajibicueneta. Daxitacuene raja cacaëjëpa nexanaenexa. Nexata necapanepare bajarapabejio-bicueenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavabelia pevājëtsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caeepatoyo ata paneaitavatsenaenexa? ⁴¹ Pëtsa pamajitame. Paitavamëre. Pavajëre Diosojavabelia papecayavenon-aenexa pibisiacuene paneexanaeyaniva. Tsiptaji raja dovathi pacajamatabëcuenëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovëyabelia pevājëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajibicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsiptaji baja Jesús pijajivi bitso itamajitsipana. ⁴⁴ Nexata abaxë bajarapamonaevi pemajitanubenaevjavata, Jesús icatsia pona pecovëyabelia pevājëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xuabeje vajëta. ⁴⁵ Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinë, necanajetsijitsia pibisiacuene pexanaevi pecobeyabelia. ⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi

⁴⁷ Jesús pijavajabitsaë pevaetabijavatanexatsi, cuaicuaijai tsanucae pijajivijavabelia. Nexata bajara-paepatota patanajetaruca Judas, Jesús pijajivi doce ponëbejeyajuvënëni. Judas pënanajetarubenatsi jivi ayaibitsaëtoxaneto. Bajarapamonaeyajuvënëni itsamonaë canajetarubena espadanë. Itsamonaë canajetarubena naëbonë yajava. Bajarapamonaë itorobatsi sacerdotevi penamatacaitorobivi, judíovi pijaancianov-inua. ⁴⁸ Judas pebarërenavajënaë bajarapamonaë, copiaya baja cajena Judas tsipaëba pacuenia bajarapamonaë yapëtaejitsia Jesús cuene. Judas jumaitsi mapacueniajaje:

—Ponë raja peneta bajacobiaya itabaratsutsunexu-abianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevijavabelia pebarërenavajënaë.

⁴⁹ Nexata jane baja Judas itsa patanajetaruca, exana pacuenia jumaitsi pematacanajetarucaevijavabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesús cuene. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtsi xaniavaetsia pecaponaenexatsi.

⁵¹ Bajarajota Jesús pijajiviyajuvënëni pijaespada navemaronotaxuabina. Muxuyoropaëbiaxuaba sacerdotevi pepo penamatacaitorobinë pijajivitonë.

⁵² Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsi-paji pamonaë namaxëvanita espadata, daxita bajarapamonaë juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaëvinexa tanetoitorobinexatsica, nexata tavajëtsiepatota netoitorobijitsipaica bitso ayaibitsaëtoxanetonë ángelevi. ⁵⁴ Itsa vajëtsipajë taxa Diosojavabelia taneitoitorobinexatsica taneyavenonaëvinexa, nexata baja apo netocopiapatsi tsipae pacuenia Dioso pejumelivaisibaxutota tajëvelia nevajunupaëba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaëvitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naëbonë yajava, patanevaetabixamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaëbabiabatsi templobota. Itsiata bajarapamatacabi apo panevaetabimë. ⁵⁶ Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaëba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatsi, daxita Jesús pijajivi xuabarëcëpecatsi pacuenia baja cajena Jesús tajëvelia jumaitsi pijajivijavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

⁵⁷ Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetuana judíovi pecujarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonaë pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

⁵⁹ Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonaë nayanijoba.

—¿Jipatsa yapëtaëne Jesús pibisiacuene pexanaëjava, paneconi yabara beyaxuabijitsiatsi? najai tsaponae.

Itsiata bajarapamonaë apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. ⁶⁰ Ayaibitsaëto pata penajumetsënëtsilivaisi pepaëbinexa Jesús yabara. Itsiata caelivaisi ata najumëjëpaëya apo paëbi bajarapamonaë. Nexata bajarapamonaë apo caxitajarabi paneconi yabara Jesús naneconitsiaexanaëjitsiatsi pebeyaxuabiaexanaenexatsi. Bajaraxuacujinaë belia anianëbeje caelivaisi najumëjëpaëya neconitatsibeje.

⁶¹ Jumaitsidebeje bajaraponëbeje Jesús yabara:

—Maponë jumaitsi: “Xanë necaëjëpa taxuabinexatsica Dioso pijatemplobo. Necaëjëpanua acueyabi mat-acabita icatsia taveretetsinexa itsabo,” jai maponëje, jai beje bajaraponëbeje Jesús yabara.

⁶² Nexata jane baja sacerdotevi pepo penamatacaitorobinë nonotapuna bajarapamonaë pitabarata. Nexata jumaitsi Jesúsjavabelia:

—¿Apo yapëtaëmë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsidebeje? jai sacerdotevi pepo penamatacaitorobinë.

⁶³ Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaëbinexamë nexaniajaijumeta. Itsajume, Diosojavabelia naneconitsianame. Panenavajunupaëbare xaniavetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

⁶⁴ Nexata Jesús jumaitsi:

—Jājā, xanē rabaja pacuenia nejumlahsimē. Nexata icatsia pacajumaisitsi. Paxamē raja panetaename xanē, Daxitajivi Pematapijinēnē, taecaejava Dioso pecujuanenia, daxitajamatabēcuene pecaējēpaenētsi. Panetaenamenua tanajetarucaejava athēbēvetsica itarērēbota, jai Jesús.

⁶⁵ Bajarapacuenia Jesús pejumlahsijava ita jumetane, sacerdotēvi pepo penamatacaitorobinē penaxatatsijava anaeya titinaxuaba. Bajarapacuenia titinaxuaba pi-anaepanaexae Jesús pejumlahsijava yabara. Nexata sacerdotēvi pepo penamatacaitorobinē jumaisi daxita penacaetuatsivijavabelia:

—Mara ponē Dioso apo pejitsipaecuenia cuaicuajijaje. Dioso bepexēnato nataeya cuaicuajijai. Pijacuata rabaja naneconita bajarapacuenia pecuaicuajiaxae. Pematatsēnēa baja apo namatavenonaetsi itsamonae vajanacatsipaebinexa paneconi yabara maponēje naneconitsiaexanaejitsiatsi. Paxamē rabaja pajumetaneme maponēje Dioso apo pejitsipaecuenia pecuaicuajijajava. ⁶⁶ ¿Detsa nexata paxamē pajamatabēitsimē? jai sacerdotēvi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaisi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētscicujinaetsi itabaratsaquibabeponatsi pecobethaitonēta. Itsamonae itabarapacabiexuababiabatsi.

⁶⁸ Nexata bajarapamonae jumai tsaponae Jesúsjavabelia:

—Xamē raja ita Cristomē, athēbēvetsica Dioso ita pecaitorobinētsica jivi necapanepaenexa, nexata vënëjonare ponē caitabarapacabiexuaba! jai tsaponae bajarapamonae.

Pacuenia Pedro nayavajunuaxaina Jesús pijajivitonēcuene yabara pelivaisi

⁶⁹ Itsa abaxē Jesús sacerdotēvi pepo penamatacaitorobinē pijabo ēnētuaatuaējēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro cujirenatsi. Bajarapova jumaisi Pedrojavabelia:

—Xamē ata rabaja naponaponame Jesúsata, Galilea nacuapijinēta, jai.

⁷⁰ Nexata Pedro itsiata nayavajunuaxaina Jesús pijajivitonēcuene. Daxita bajarajota penubenaevi pitabarata Pedro jumaisi:

—Xanē cajena apo yapētaenē pacuene yabara nejumlahsimē, jai.

⁷¹ Sacerdotēvi pepo penamatacaitorobinē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapayaracaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsava, bajarapabota penacuenebiva, Pedro taenu-

tatsi. Nexata bajarapova ata Pedro yabara icatsia jumaisi bajarajota penubenaevijavabelia:

—Mara ponē ata naponapona Jesúsataje, Nazaret tomarapijinēta, jai bajarapova.

⁷² Nexata icatsia Pedro nayavajunuaxaina Jesús pijajivitonēcuene. Pedro jumaisi:

—Xaniajanē. Dioso pitabarata cajumaisitsi. Apo yapētaenē cajena bajaraponē, jai.

⁷³ Bajaraxuacujinae icatsia, caepatoyocujinae, bajarajota penubenaevi cujibarēcēpaliatsi Pedro. Jumaisi bajarapamonae:

—Xaniajai raeta baja cajena. Xamē Jesús pijajiviyajuvēnēnēmē. Tsiapaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

⁷⁴ Nexata Pedro jumaisi:

—Itsa apo xaniajanē tsipae paxamējavabelia, nexata Diosojavabelia naneconitsipajē. Apo yapētaenē cajena bajaraponē, jai Pedro.

Itsa baja Pedro najumevereta bajarapacuenia pejumlahsijava, vacara fiaba. ⁷⁵ Nexata bajarajota Pedro najamatabēnapitajaraba Pedrojavabelia Jesús pejumlahsijava mapacueniaje: "Ajena rabaja, pameravi, vacara pe-fiabivajēnaeya, nayavajunuaxainaename tajajivitonēcuenemē. 'Xanē cajena apo yapētaenē bajaraponē,' jamē tsane xanē yabara acueyabi xuabeje," pe-jajijava Jesús Pedrojavabelia, Pedro najamatabēnapitajaraba. Nexata baja Pedro pitsapalia bo matatoyorotsia peyacaranatsijava pēnēyabelia. Pinijicuenia Pedro nua.

Pacuenia Jesús caponaliatsi Pilatojavabelia yabara pelivaisi

27 Ajena baja matacabi tsarucaponae, sacerdotēvi penamatacaitorobivi, judiōvi pijaancianovi yajava, najamatabējēpa pacuenia exanaejitsia Jesús pe-beyaxuabiaexanaenexatsi. ² Nexata Jesús cobecētsiaya caponaliatsi nacuaevevtsinē Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaē pecobeyabelia. Bajaraponē ita tane Jesús penaneconitsijava pebeyaxuabinexatsi, nexata bitso najamatabēxaina. Nexata pona petocanaviatsinexa perajutsipalatamitsi, treinta ponēbeje pepo palatanēanē, bitso penamatamotsinēanē. Tocanaviatsijitsia sacerdotēvi penamatacaitorobivijavabelia, judiōvi pijaancianovijavabelia ata. ⁴ Judas jumaisi bajarapamonaejavabelia:

—Pibisiacuene baja rovia exanajē. Bajaraponē itsacuenejavayo ata apo exanaenejeva, panecobeyabelia baja canajetaxuabajē, jai Judas.

Nexata bajarapamonae jumaisi Judasjavabelia:

—iPaxanē raja patajamatabēcueneta apo naneconitsimē tsane! Xamē raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsi-palatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamonae.

⁷ Nexata bajarapamonae najamatabëjèpa bajarapalatanëanëta pecomuatsinexa ira. Nexata bajarapamonae bajarapalatanëanëta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa tëpa Jerusalén tomarata, bajarapairata pemëthëtabiabinexa. ⁸ Bajaraxuata mapamatacabijavaberena ataje vënëruba bajarapaira mapejumaitsivënëje: “Papalata pejamatabëcueneta jivitonë beyaxuabatsi, bajarapalata pecomuatsiira,” pejaivënë vënëruba. ⁹ Bajarapacuenia itsa comuata bajarapaira, copiapata jane baja pacuenia Diosojumepaebinëmi profeta Jeremíaspijinë bajayata tajëvelia vajunupaeba bajarapalata. Profeta Jeremíaspijinë baja cajena bajarapalata yabara tajëvelia jumaiti mapacueniaje: “Israelnacu pevetsivi rajutsiana jivitonë pecanajetsinëjavabelia treinta ponëbeje, pepo platananitota pexanaenëanë. Bajarapalatanëanë icatsia bajarapamonae pitsiana. ¹⁰ Nexata bajarapalatanëanëta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremíaspijinë tajëvelia pevajunupaebijavata Jesús pematamopitsipalatanexatsi.

Pacuenia Jesús nutatsi Pilato pitabarata yabara pelivaisi

¹¹ Jesús nutatsi nacuaevetsinë Pilato pitabarata. Nexata Pilato jumaiti Jesúsjavabelia:

—¿Xamë tsaja judíovi pepo nevetsinë? jai Pilato.

Nexata Jesús jumaiti Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaiti Jesúsjavabelia:

—¿Apo jumetaemë tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapëtae pacuenia Pilato exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi

¹⁵ Nacuaevetsinë Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi vajëtabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenë copatabiaba jivi pesivajamatabëcuenexanepanaenexatsi. ¹⁶ Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenë, Barrabásvënënë. Bajaraponë bitso piacujirubejenëcueneta yapëtanetsi daxitajivi. ¹⁷ Nexata daxita Jerusalén tomarapijivi penacaetuatsijavata Pilato jumaiti:

—¿Detsa ponë pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponë yabara jivi jumaiti: “Cristo raja athëbëvetsica Dioso pitorobinëtsitsica jivi pecapanepaenexa,” jaitsi? jai Pilato bajarapamonaejavabelia.

¹⁸ Pilato jamatabëjumaiti:

—Xua Jesús exanaponapona, sacerdotevi penamatacaitorobivi cueneitoyatsi. Bajaraxuata netocaparena, jamatabëjai.

¹⁹ Pilato abaxë eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitisirena mapacueniaje: “Copare bajaraponë, ponë itsacueneneconiyato apo penaneconitsinë. Ajena raja, meravi, amajitsinaebejenë bajaraponë yabara,” jaitisirena Pilato pijava. Nexata picani Pilato jamatabëcopatha Jesús.

²⁰ Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxuabinexatsi, jai tsaponae bajarapamonae.

²¹ Nexata nacuaevetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapitsapaenexa? jai Pilato.

Nexata bajarapamonae jumaiti:

—Panetocapitsapare Barrabás, jai.

²² Pilato nexata jumaiti bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorbatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaiti Pilatojavabelia:

—¡Cruzajavabelia cobematabiabarutsiaexanare! jai bajarapamonae.

²³ Nexata Pilato jumaiti bajarapamonaejavabelia:

—¿Detsa pitsineconi yabara cobematabiabarutsiaex-
anaejitsipajë cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

²⁴ Pilato tane piamjesaëjava bajarapamonae. Muxu-
jiobi ata, apo jumecovënëtsitsi. Bitsoyo biji caranata
bajarapamonae jamatabënanaecajematapona bajara-
patomarata. Nexata Pilato penacobequiatsinexa, pija-
jivi itoroba petocarenanexatsi mera. Pilato nacobe-
quiata daxitajivi pitabarata bajarapamonae peypä-
taenexa Jesús apo penaneconitsiaexanaecuene. Pilato
jumaitsi bajarapamonaejavabelia:

—Xanë raja tajamatabëcueneta apo beyaxuabiaex-
anaenë tsane maponëje, planeconijibinë. Paxamë
panejamatabëcueneta pabeyaxuabiaexanaename, jai
Pilato.

²⁵ Nexata daxita bajarapamonae jumaitsi:

—¡Itsa bajaraponë planeconijibinë Diosjavabelia,
nexata bajaraponë patabeyaxuabineconi jema panet-
sijumajopaena, pataxi yajava! jai bajarapamonae Pila-
tojavabelia.

²⁶ Nexata baja Pilato tocopata Barrabás pepit-
sapaenexa penaneconitsivi pejebabiabibovecua.
Itorobanua vajabitsaëvi ayaicuenia Jesús peju-
matitibabenexatsi penaneconitsivi pejumaconitabiabi-
macata. Bajaraxuacujinae Pilato tocopata baja Jesús
vajabitsaëvi pecobematabiabarutsinexatsi cruzajav-
abelia.

²⁷ Nexata baja Pilato pijajivi, vajabitsaëvi, Jesús
caponaliatsi nacuaevetsinë Pilato pijaboxanetojav-
abelia. Nexata bajarajota Jesús matatoyorotsia nacaet-
uatatsi daxita vajabitsaëvi. ²⁸ Jesús penaxatatsijava va-
jabitsaëvi vejumajonotatsi saicayajava pexatatsinexat-
si. Nexata jane baja vajabitsaëvi Jesús quenetsiataeya
xatatatsi petsobiajava benacuaevetsinëcuenia
petaenexatsi. ²⁹ Becoronacuenia pemataxatatsinexatsi,
peejuvitoyoroto tsimataexanatsi. Bajarapatoyoroto
Jesús mataxatatatsi. Tsiocerutatsinua naebo pecujua-
nenia benacuaevetsinëcuenia petaenexatsi. Nexata
bepeyaiyataecueniatsi bajarapamonae pematatabacä-
ta tonubenatsi Jesús pitabarata. Quenetsiataeya jumai
tsaponaetsi:

—¡Bajaco, judíovi pepo pevetsinë! jai tsaponaetsi ba-
jarapamonae.

³⁰ Suabaponatsi. Vecuapitatsi naebo. Bajarapanaebo-
ta mataconitajarababiabatsi. ³¹ Bajarapacuenia
quenetsiataeya pecapocaponaeucujinaetsi, vejuma-
jonotatsi baja pexatatsijavatsi. Jesús baja icatsia
xatatatsi penaxatatsijava. Caponaliatsi jane baja
pecobematabiabarutsinexatsi cruzajavabelia.

**Pacuenia jane baja Jesús cruzajavabelia cobematabi-
abarutatsi yabara pelivaisi**

³² Vajabitsaëvi Jesús itsa caponaliatsi tomaravecua,
namutota caxitajaraba Simónvënëñë, Cirene tomarapi-
jinë. Nexata vajabitsaëvi Simón itorobatsi, pacruzajav-

abelia Jesús cobematabiabarutsijitsiatsi, peyavenon-
aeyacaponaeenexa.

³³ Jesús caponaliatsi Gólgotavënë tsutojavabelia, ba-
jarapatsutojumata pecobematabiabarutsinexatsi
cruzajavabelia. “Gólgota,” itsa jai hebreojumeta, mapa-
jumetaje pejumaitisijume: “Jivimatasipatsuto,” pejai-
jume. ³⁴ Bajarajota picani Jesús rajutatsi vinora, pe-
matajërëabira piatsaxarata. Jesús picani rajutatsi bitso
penavixaetaeyaniva pecobematabiabarutsijavatatsi
cruzajavabelia. Jesús pajane bajarapora. Itsiata apo
apae.

³⁵ Nexata jane baja Jesús vajabitsaëvi cobematabi-
abarutatsi cruzajavabelia. Bajaraxuacujinae vajabit-
saëvi bajarajota canamuxusita beibotoxi. Bajarapacue-
nia canamuxusita peypätaenexa ponë pitaponaejitsia
caejava canacujitsia Jesús penaxatatsijavami, xua
jumaponapona. Bajarapacuenia vajabitsaëvi natsico-
betsana Jesús penaxatatsijavami. Bajarapacuenia va-
jabitsaë itsa natsicobetsana Jesús penaxatatsijavami,
tocopiapatatsi jane baja pacuenia Diosojumepaebinë-
mi profetanë bajayata tajëvelia vajunupaeba Jesús pe-
naxatatsijava. Jesús penaxatatsijava yabara, profetanë-
mi bajayata tajëvelia jumaitsi mapacueniaje: “Natsico-
betsanaena penaxatatsijava. Canamuxusitsiana bei-
botoxi peypätaenexa ponë pitaponaejitsia,” jai profe-
tanëmi. ³⁶ Bajaraxuacujinae vajabitsaëvi bajarajota
evetena penaitaxutocaevetsinexatsi Jesús. ³⁷ Bajarajota
Jesús pematatabocoto matatsënëyo cruzajavata,
yaquinaruta tablapayota itsamonae ata peypä-
taenexa pajamatabëcuene yabara naneconitsiaexanat-
si Jesús. Jumai tsarutsi peyaquinaeitane cruzajavata
mapacueniaje: “Mara ponë Jesúsje, judíovi pepo
pevetsinë,” jai tsarutsi Jesús yabara.

³⁸ Anijanëbeje penacobetoxotsinëbeje Jesús yajava-
cobematabiabarutatsi. Caenë canacujitsia pijacruzata
rubatsi. Bajaraponëbeje Jesús pemuxuneneta rutatsi-
beje. Itsanë Jesús pecujuanenia rutatsi. Itsanë Jesús
petsavenonenia rutatsi. ³⁹ Jesús pecobematabiabarut-
sijavatatsi cruzajavabelia, bajaraxuayo penajetarube-
naevi Jesús itaropitsiaya bijataeyabiabatsi. ⁴⁰ Jumai
tsabiabi bajarapamonae:

—Xamë raja imata jumaitsimë: “Xuabianicajë tem-
plobo. Acueyabi matababita icatsia veretetsianajë
itsabo,” jamë. Nacapaneppure jane baja nijacuata. Itsa
xaniajai Dioso pexënatomë, nexata cruzajavavetsica
runaimica, jai tsabiabi Jesúsjavabelia bajaraxuayo pe-
najetarubenaevi.

⁴¹ Bajara pijinia pacuenia sacerdotevi penamata-
caitorobivi capocaponatsi Jesús. Judíovi pecujarubivi
ata capocaponatsi. Fariseovi ata capocaponatsi. Judíovi
pijaancianovi ata capocaponatsi Jesús. Épamonae na-
jumaitsi:

⁴² —Maponëje itsamonae yabara jumai tsabiabi: “Ca-
panepaenajë jivi,” jai tsabiabi. Caranata pijacuata pe-
nacapanepaenexa apo caëjëpaetsi. Itsa xaniajai Israel
nacuapijivi pepo pevetsinë, nexata aeconoxae cruza-
javavetsica runaenica vajataenexa. Nexata jane baja
jumecovënëtsianatsi Cristonëcuene. ⁴³ Bajaraponë

pina najamatabëcuenecopata Diosojavabelia peyavenonaenexatsi. “Xanë raja Dioso pexënatonë,” jai tsabiabinua. Nexata taenatsi aeconoxae Dioso peca-panepaejavatsi, najai bajarapamonae capocaponaeya Jesús yabara.

⁴⁴ Ponëbeje penacobetoxotsinëbeje Jesús yajava-cobematabiabarutatsi, bajaraponëbeje ata Jesús bi-jataerucatsibeje bajarapacuenia.

Pacuenia baja Jesús tēpa yabara pelivaisi

⁴⁵ Jesús baja itsa tēpaejitsia, ajena matonejejitsia, daxita nacuanëjava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. ⁴⁶ Nexata paepatota icatsia nacua napebeta, bajarapaepatota pinijicuenia Jesús aējai. Jumaitsi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapa-jumetaje pejumaitsiyume: “TajaDioso, tajaDioso, ¿detsa xuajitsia baja tajaepato necopatame?” pejaiyume.

⁴⁷ Nexata itsamonae bajarajota penubenaevi bijiya jumetane bajarapacuenia Jesús pejumaitsiyava. Nexata saya jamatabëcuenenavëxaniabiaya jumaitsi bajarapamonae:

—Mara ponë junata profeta Elíaspijinëmi, Dioso jumepaebinëmi, jai bajarapamonae.

⁴⁸ Nexata bajarapamonaeyajuvënënë bepijia cuji-naelia pecarenanexa esponjavënëjava. Nexata esponjavënëjava jabutaba piajatuvinorayalia. Bajaraxuacujinae esponjavënëjava naeboupita cëtaruta. Toyotsiatsi Jesús petsutsuninexa picani bajaraxua. ⁴⁹ Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonae capocapon-
aeya.

⁵⁰ Icatsia Jesús pinijicuenia aējai. Bajaraxuacujinae jane baja Jesús tēpanajereca. ⁵¹ Paepatota Jesús tēpanajereca, bajarapaepatota templobo ënëtuatua-jëalia peyatuucutarutsipana, ayaiapaëbërëpanaxaneto, titititica tuatuajëareca, athëbëvetsicacujinae irabereca. Ira najëaba. Ibotoxanetonë ata sarapajunu-junua. ⁵²⁻⁵³ Ayaibitsaëto Dioso pepua pejumecovënët-sivi petëpaevimi pemëthëanë ata napananubena. Nexata Jesús acueyabi matababita icatsia itsa asaë petëpaecujinae, pamona pemëthëanë napananubena, bajarapamonae ata cotocaevi asaë. Nexata pitsapa mëthëvetsina. Nexata bajarapamonae pona Jerusalén tomarabelia. Bajarajotalia naitajëbapona jivi ayaibitsaëtojavabelia.

⁵⁴ Jesús cruzata petëpaejavata vajabitsaëvi pijacapitán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexata bajarapamonae itsa tane ira penajëabijava, itsajavanë ata itsa taepona, bajarapamonae bitso junava. Jumaitsi:

—Matsaena ponë tēpaje, pepacuene baja rovia Dioso pexënato, jai bajarapamonae.

⁵⁵ Bajarajota petiriavibitsaëtoxfaneto tajiyoverena taenubena Jesús petëpaejava. Bajarapapetiriavi Jesús pepëta napona Galilea nacuaverena, Jesús peyavenon-aevimitsi. ⁵⁶ Bajara papetiriavibitsaëtoxfaneto tuatua-jëta nanubena mapamatabëxëyoje. Itsava Mariävënëva, Magdala tomarapijiva. Itsava icatsia Mariävënëva. Bajarapova Santiagobeje Josëbeje pena. Itsava pijinia Salomëvënëva. Bajarapova pijinia Santiagobeje Juanbeje pena. Bajarapova Salomëvënëva, Zebedeo pijava.

Pacuenia Jesús petëpaenë mëthëtatsi yabara pelivaisi

⁵⁷ Itsa baja caniviyotsia, José, Arimatea tomarapijinë, pona nacuaeetsinë Pilatojavabelia. Bajaraponë José bitso pexainaenë pexinaejava. José jumecovënë-taponapona Jesús Cristocuene. ⁵⁸ Nexata José itsa pata nacuaeetsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. ⁵⁹ Nexata José cruzajavavetsica pitsica Jesús petëpaenë. Mataquion-aeya daxitanëreca matabacëba pexaniaviria piapi-asábanapanata, piaxuirajibpanata. ⁶⁰ Bajaraponë José, pamatacabi tēpa pemëthëtsinexatsi picani, iboitapanitojavata pinijibovaju toexanabuatatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijibopanaxaneto José tixirena. Yavajuvëpaacatabuata. Nexata baja José navitapa pijaboyabelia. ⁶¹ Bajarajota ibovaju itapajavata eecabeje anijavabeje ëMariävënëvabeje. Itsava María, Magdala tomarapijiva.

Pacuenia vajabitsaëvi Jesús pemëthë evetavanapa yabara pelivaisi

⁶² Pascuafiesta pejonematababinexa pevajënaeya pamatacabi, judíovi baja banacuenevereta penacuenebija-
java. Nexata baja pamatacabi judíovi banacuenevereta penacuenebija, bitso baja itsa caniviyotsia, sacer-dotevi penamatacaitorobivi, fariseovi ata, ponalia Pila-tojavabelia. ⁶³ Nexata bajarapamonae jumaitsi Pilatojavabelia Jesús yabara:

—Pamatacabi abaxë bajaraponë asaë tsaponaponae bitso najumetsënëtabiaba. Jumai tsabiabi: “Tatëpaecu-jinae, acueyabi matababita, icatsia asaënë tsane,” jai tsabiabi. Bajarapejumaitsiyava paxanë apo panacofënëtsinë. ⁶⁴ Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matababijavabelia, bajaraponë pecapabimatababijavabelia. Nexata acuenebi tsane pijajivi meravi pe-jutsinexatsi mëthëvecua. “Namatacota rabaja Jesús,” pejaijava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënët-sipa copiaya Jesús penajumetsënët-sijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxfaneto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, paya-javaponare. Nexata paitorobare bajarapamonae Jesús pemëthë pevetsinexa xaniavaetsia, jai.

⁶⁶ Nexata bajarapamonae vajabitsaevi barëponalia Jesús pemëthëjavabelia. Bajarapamonae pemaëtoupi catsataruta Jesús pebuatsiibovajutsi pevëpaacatsiibopanajumata. Itsaupi pijinia catsata iboitapajanitovabelia. Bajarapacuenia exana peyapëtaenexa petixitsijava muetsia Jesús peyavajuvëpa acatabuatsiibopanatsi. Bajaraxuacujinae itoroba vajabitsaëvi Jesús pemëthëvëpa pevetavanapaenexa.

Pacuenia Jesús petëpaecujinae icatsia asaë yabara pelivaisi

28 Judíovi baja penacueraevetsimatacabi itsa verevereca, meravia pitsijavata, bajayacunua, ajena matacabi tsarucaponae, María, Magdala tomara pijiva, itsaMaría yajava, taeyojopaliabeje Jesús pebuatsiibovajutsijavabelia. ² Jemata ira najëaba. Tsiptaji Dioso pijaánel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvëpa acatsiibopanaxanetomi. Bajaraxuacujinae ángel eca bajarapabopanajumata. ³ Bajaraponë ángel naitayota. Pacuenia yamaxëcotia itsi, bajara cotiaitsi ángel. Penaxatatsijava niojai daxita peniojaijava matatoxenetsia. ⁴ Vajabitsaë, pamonaevetanubena Jesús pebuatsiibovajutsivëpa, itsa tane ángel, neconecojai pecajunavi. Bobenajunua bepetëpaevi. ⁵ Nexata ángel jumaitssi petirivabejevabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. ⁶ Ajibi raja tsarucacajotaje. Asaë rabaja icatsia pacuenia baja cajena tajëvelia jumaitssi. Parenamërebeje panetaenexabeje itsajota picani buatasti. ⁷ Bajaraxuacujinae paliamëbeje tsane bepíjia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacaxitarabianame,” pajamëbeje tsane pijajivijavabelia. Bajarapalivaisiyo xainajë patacatsipaebinexabeje, jai ángel bajarapovabejevabelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinexabeje Jesús pijajivijavabelia. ⁹ Bajarapovabeje namutualia pecujinaejinaenajetarucacajavatabeje, Jesús jemata tsitanaitajëtatsibeje. Nexata bajarapovabeje kujitabaliabeje Jesúsjavabelia. Bajacobatsibeje. Nexata pematatabacabëta nucajunuabeje. Sitaicaliabeje yayiataeya Jesús pecopiapitsinexabeje bajarapacuenia. ¹⁰ Jesús nexata jumaitssi bajarapovabejevabelia:

—Pëtsa pajunavamebeje. Paliamërebeje tajajivijavabelia. Pajumaitsimëbeje tsane tajajivijavabelia: “Jesús raja jumaitssi. Paponaeremelia pina Galilea nacuayabelia. Baja pina jotalia pacacaxitarabiana Jesús,” pajamëbeje tsane tajajivijavabelia, jai Jesús.

Pacuenia vajabitsaëvi navajunupaeba yabara pelivaisi

¹¹ Paepatota ëMaríavënëvabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsiviyajuvënëvi, pona tomarabelia. Bajarapamonae tsipaeba sacerdotevi penamatacaitorobivijavabelia pacuenia tane bajarapamonae. ¹² Nexata sacerdotevi penamatacaitorobivi pona judíovi pijaancianovijavabelia penabarëcuaiicuaijainexa penajamatabëjëpaenexa pacuenia exanaejitsia. Nexata jane baja bajarapamonae najamatabëcuenejëpa. Nexata bajarapamonae rajuta ayaijava palata vajabitsaëvijavabelia.

¹³ Bajarapamonae jumaitssi vajabitsaëvijavabelia:

—Jivijavabelia pajumaitsimë tsane: “Meravi pataitajajitsita, Jesús pijajivi pata. Nexata bajarapamonae jutta Jesús petëpaenë,” pajamë tsane. ¹⁴ Nexata nacuaevetsinë Pilato itsa jumetaena mapajumeje, paxanë itsiata pacayavenonaenatsi itsacuene papecaexanaeyaniva, jai bajarapamonae vajabitsaëvijavabelia.

¹⁵ Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa pacuenia itorobatsi. Nexata vajabitsaëvi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponae jivijavabelia.

Bajarapacuenia vajabitsaevi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanajetarubenaenexatsi daxitanacuanëjava yabara pelivaisi

¹⁶ Jesús pijajivi once ponëbeje pona Galilea nacuayabelia. Jesús pijajivi pona petsutojumabelia, patsutojumatalia Jesús caxitajarabiapaebatsi. ¹⁷ Nexata bajarapatsutojumata Jesús pijajivi itsa taenuta Jesús, yayiataeya pitabarata pematatabacabëta tonubena. Itsiata itsamonae Jesús pijajiviyajuvënëvi jamatabëcuene navëxaniabiaya jamatabëjumaitssi:

—Apo Jesús meta, jamatabëjai.

¹⁸ Nexata Jesús pijajivi kujirena. Jumaitssi pijajivijavabelia:

—Dioso baja cajena nevetsiaexana daxitacuene athëbëtatsia, daxita mapanacuajava ataje, taevetsinexa. ¹⁹ Nexata pacaitorobatsi. Paponare daxitanacuanëjava daxitanacuanëpijivi tajumelivaisi patanetotsipaebinexamë tanejumecovënëtsinexa. Bajarapamonae pabautisabaponaenename taxa pevënëta, xanë ata pexënatonë tavënëta, Espiritu Santo ata pevënëta. ²⁰ Bajarapamonae patsipaebaponaenename pejumecovënëtanapaenexa daxita pacuenia pacaitorobatsi. Pëtsa panacofënëtame daxitamatacabi patacayajavaponaponaajava. Nacua pevereverecaejav-

abelianexa ata pacayajavaponaponaenatsi, jai Jesús pijivijavabelia.

SAN MARCOS

Pacuenia Juan jivibautisabinë jivi livaisi tsipaeba petusato nacuata yabara pelivaisi

1 Mara pacuenia taxuxuaba pexanialivaisi, Jesucristo Dioso pexënato pelivaisije.

² Bajayata Diosojumepaebinëmi, profeta Isaíaspijinë, tajëvelia yaquina Dioso pejumaitisijava pexënatojavabelia. Dioso jumaitisije pexënatojavabelia mapacueniaje:

Itorobianajë nevajënaeyabelia tanejumelivaisipaebinënexa. Catsivajënaexanebijitsia nijanamuto. ³ Nexata tanejumelivaisipaebinë vavajai tsane petusato nacuata. Jumaitisije tsane jivijavabelia: “Jivi baxaneba panamutoverena najetaruaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaebinë xamë yabara, jai bajayata tajëvelia Dioso pexënatojavabelia pejumaitisijava Juan jivibautisabinë jivijavabelia Dioso pejumelivaisi petsipaebanajetaruaejavanexa yabara.

⁴ Bajaxuata nexata Juan jivibautisabinë Dioso pejumelivaisipaebinë najetaruca petusato nacujava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabëcuenepënëyorore Diosojavabelia. Bajaxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

⁵ Nexata ayaibitsaëttoxaneto Judea nacupijivi, Jerusalén tomarapijivina, muxunaponabiabatsi Juan petsipaebilivaisi penamuxunaevetabiabinexatsi. Nexata bajarapamonae pibisiacuene pexanaejavami, rovia Diosojavabelia navecuapaebapona. Bajaxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacëta cuerobocoto. Pexaejava ëbose, jabëra yajava. ⁷ Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya beveliajamatabëcuenenënë bajaraponëvecua. Nexata vecuaauranë bajaraponë beprijavitonënë tanataenexa. Nexata auranë pijazapato ata tataxujonotsinexa. ⁸ Xanë raja saya pacabautisabatsi merata. Ponë rajane xanëcujinae patsiana, bajaraponë pacatsi-

jamatabëjoneyaexanaponaena Espíritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetaruaejavanexa.

Pacuenia Juan bautisaba Jesús yabara pelivaisi

⁹ Jesús najetaruca Nazaret tomaraverena, Galilea nacuata peecaetomaraverena. Nexata Juan bautisaba Jesús Jordán meneta. ¹⁰ Jesús pebautisabicujinaetsi menevetsina penonotajunaejavata, tane itaboxo penapatsijava. Bajarajota Jesús tane Espíritu Santo ata perunaejavatsica pematatsënëatsica beucucuto. ¹¹ Jesús jumetanenua athëbëvetsica Dioso pejumaitisijavatsi: “Xamë raja taxënomë, bitso tacaasivanë. Bitso casivajamatabëcuenëbarëyatsi,” pejaijavatsi.

Pacuenia Jesús jamatabëcuenëjëbatsi dovathi yabara pelivaisi

¹² Jesús Juan pebautisabicujinaetsi, bepijiayo Espíritu Santo ponaeyaexanatsi petusato nacujavabelia. ¹³ Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenëjëbatsi pibisiacuene pexanaenexa. Bajaxuacujinae ángelevi runaica Jesús peyavenon-aenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

¹⁴ Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacujavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. ¹⁵ Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuenepënëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi

¹⁶ Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje

nacaebananëbeje, Simónbeje Andrésbeje. Bajaronëbeje daxitamatacabi canacujitsia dujuai yamatajucabiababeje. ¹⁷ Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacucujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaronëbeje pijajeraënëta xanebanucabeje dujuai peyamatajucaejavabeje. ²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyajavaponaponaenë Jesús jamatejemayaexana yabara pelivaisi

²¹ Nexata Jesús, pijajivi yajava, pata Capernaum tomarabelia. Judíovi penacaetuatabiboyalia. Nexata bajarajota Jesús jivi livaisi tsipaeba. ²² Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. ²³ Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

²⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

²⁵ Jesús nexata jumeitaveta dovathi. Jumaitsi:
—¡Moyamëre! ¡Vecuapitsapare baja maponëje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonëvecua. ²⁷ Nexata daxitajivi bajarapacuenie ita tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneneje? ¿Detsa mapitsipejanacujarubicueneneje? ¡Maponëje Jesús, beDioso pitorobinëtsisical! ¡Dovathi ata jumecovënëtatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepíjia Jesús vënëlivaisitanetsi Dioso pesaëta pinijicuenie pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi

²⁹ Jesús baja pitsapa judíovi penacaetuatabibovecua. Nexata Santiagobeje Juanbeje Jesús yajavapona. Jesús bana napona Simónbeje Andrésbeje pijaboyabelia. ³⁰ Nexata Simón pijabota Simón pijava pena Jesús bana pevajënae romaebanucatsi camata. Nexata itsamonae bepíjia Jesús tsipaebarecëpatsi bajarapova peromaebanucacajavatsi. ³¹ Nexata Jesús imoxoyotabalia peromaebanucacajavatsi. Cobeyotsiaya matakota. Nexata bajarajota peromaebanucacajavatsi vecuajivi tsanajetsisireca baja domae. Nexata bajarapova Jesús bana pexaejava toexanatsi.

Pacuenia ayaibitsaëto jivi piavitanevi Jesús jamatejemayaexana yabara pelivaisi

³² Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua. ³³ Daxita tomarapijivi Jesús pepatsibota baupajavaberena nacaetuata. ³⁴ Nexata Jesús jamatejemayaexana ayaibitsaëto daxitacuenenitane pexainaevimi. Vecuacapitsapanua dovathi peyajavajinavanapaevi. Jesús apo tocopatsi dovathi pecuaicuaijainexa jivijavabelia pevajunupaebiyativatsi. Tsipaji dovathi xaniavaetsia Jesús yapëtanetsi Dioso pexënatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

³⁵ Pepo bajayacunua, abaxë ita apo napebetsi matacabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matacabi baja. ³⁶ Itsa baja matacabi, Simónbana Jesús pëjaitaponalia. ³⁷ Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

³⁹ Nexata daxita Galilea nacuajava Jesús jivi tsipaebapona Dioso pitorobilivaisi judíovi penacaetuatabibonëjava. Jesús jivi dovathi vecuacapitsapaponanua.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

⁴⁰ Jesús imoxoyorenatsi bajayajebi bitso peperabëtsabanaenë. Nexata bajaraponë pematabacabëta nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

⁴¹ Nexata Jesús bajaraponë itaxutobejibiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

⁴² Bajarapacuenia Jesús pejumaitsijavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi.

⁴³ Nexata baja Jesús naviatsiaexana bajaraponë. Pini-jicuenia Jesús muxujioba bajaraponë penaviatsivajë-naeya. Jesús jumaitsi:

⁴⁴ —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenenbinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacueni baja pecavecuaajibijava niavitanejavami, jai picani Jesús bajayajebi bitso peperabëtsabanaenëmijavabelia.

⁴⁵ Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoخانeto pematoyoronaeyanivatsi. Jesús saya ponapona tomanë pi-ajibijava. Itsiata cajena daxita nacuanëjavaverena jivi muxunapatabiabatsi Jesús.

Pacuenia Jesús jamatejemayaexana petabusipacuenabinëtsi yabara pelivaisi

2 Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. ² Nexata jivibitsaëtoخانeto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. ³ Nexata cuatro ponëbeje parena, camayota peyavëtaranajetarubenaevi petabusipacuenenbinëtsi. ⁴ Nexata petabusipacuenabinëtsi acuenebi bajarapamonae pecapatsijava Jesús pitabarayabelia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatu javavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenenbinëtsi. ⁵ Jesús jamatabëcueneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenenbinëtsijavabelia Jesús jumaitsi mapacueniajaje: —Tajabanenë, pibisiacuene rabaja nexanaeneconimi cavecuaajibiaexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumaitsijava, nexata jamatabëcuenenavëxaniabiaya bëpënëa jamatabëjumai tsenae mapacueniajaje:

⁷ —Maponëje Jesús Dioso apo pejitsipaecuenia cuacuajai. Itsanë ata cajena apo caëjëpaetsi itsajivi

pibisiacuene pexanaeneconimi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacueni, jamatabëjai tsenae bajarapamonae.

⁸ Jesús jamatabëcueneyapëtane bajarapamonae jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeneconimi tavecuaajibiaexanaenexa. ⁹ Paxamë apo pacacaëjëpae ata itsajivi pibisiacuene pexanaeneconimi panevecuaajibiaexanaenexa, pacacaëjëpa picani saya jema panejumaitsinexa petabusipacuenenbinëtsijavabelia mapacueniajaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjëpae panejamatejemayaexanaenexa petabusipacuenenbinëtsi, acuenebi panejumaitsinexa bajaraponëjavabelia mapacueniajaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipae apo papecacaëjëpaeacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliajaje. Nexata patanecueneyapëtaenexamë tanecaëjëpaeacuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenenbinëtsijavabelia:

¹¹ —Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

¹² Nexata bajarapacuenia Jesús pejumaitsijavata petabusipacuenenbinëtsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacueni, jamatabëcuenenabenajaquena. Bajarapamonae jumai tsenae mapacueniajaje:

—Dioso cajena bitso ayaijamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

Pacuenia Jesús pijajivitonënexa junata Levívënëne yabara pelivaisi

¹³ Jesús pona pucaxaneto itapajavabelia. Nexata jivi ayaibitsaëtoخانeto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. ¹⁴ Bajaraxuacujinae penajetarucavejavata Jesús taeyeta Levívënëne, Alfeo pexënato. Leví eca pabota gobierno pejamatabëcuene jivijavabelia matamoyani-

jobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

¹⁵ Nexata Leví junata Jesús pebarënananinexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuene jivijavabelia impuestomatamo pematomoyanijobabiabivi. Itsamonae ata nanabane piajamatabëcuenebejevi. Nexata Jesús pijajivi nabarëca bajarapamonaejavata. ¹⁶ Nexata fariseovi, judíovi pecujarubivinu, Jesús taeyetatsi daxita bajarapamonaejavata pijajivi penabarënananecaejava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematomoyanijobabiabivijavata, piajamatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

¹⁷ Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonaebaja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava penajamatabëcuenepeñeyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëta-pona Diosojavabelia pexaejava apo pexaeyabiabixae yabara pelivaisi

¹⁸ Itsamatacabi Juan pijajivi, fariseovi pijajivinu, pexaejava apo xaevanapae pamatacabibeje Diosojavabelia vajëcapona. Nexata itsamonae Jesúsjavaberena pata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinu, pexaejava apo xaejabiabi pamatacabibeje Diosojavabelia vajëta-pona. ¿Detsa xuajitsia itsiata xamë nijajivi pexaejava xaejabiabi pamatacabibeje Diosojavabelia vajëta-pona? jai Jesús peyanijobivitsi.

¹⁹ Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae. ²⁰ Itsiata baitsi jane itsa pejananacasabinë tsimaxëpatsipatsi pevecuacaponenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëta-pona. Itsiata pamatacabi xanë necaponaena bajarapamon-

aevecua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús peyanijobivitsijavabelia.

²¹ Nexata bajarapamonae perujujamatabëcuene baja pecopabinexa, Jesús livaisi tsipaeba comparacióncuenia bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeyaniva perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapanan yanarobotsipa perujuesetojavaverena. Nexata bitso pinijivojoto titinaejitsipa. ²² Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonae pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja penacopabinexa.

Pacuenia Jesús pijajivi namutua siricanajetarubena trigoxu penacueraevetsimatacabita yabara pelivaisi

²³ Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoxu siricanajetarubena. Xuxaeyabuatapona. ²⁴ Nexata fariseovi jumaitsi Jesúsjavabelia:

—¡Taema mapacuenieje! Dioso Moiséspijinëta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacuenieje, jai fariseovi Jesúsjavabelia.

²⁵ Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarpacuenia exanae ata, itsiata apo pibisiacuene. Tsipaji bitso piyani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebarëponaponaevi yajava, exana pamatacabi bitso piyani? ²⁶ Davidpijinë joneya Dioso pijatemployalia pamatacabi Abiatarpijinë daxita sacerdotevi penamatacaitorobinë tsaponaponae. Nexata Dioso pijatemploboënëta, mesajumata, bobena Diosonexa ofrendacuena petojebipanbëanë. Bajarpapanbëanë itsajivi ata apo tocopatsitsi pexaenexa penaneconitsiyani Diosojavabelia. Ésacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacuer-
aevetsinexa. Tsipaji Dioso yapètane pacuenia jivi na-
matavenona penacueraevetsinexa. Dioso apo exanae
jivi saya jema peyaiyataenexa penacueraevetsimata-
cabianë. ²⁸ Nexata xanë, Daxitajivi Pematapijinë, ne-
toxanepana cajena tatsipaebinexa pacuene xanepana
jivi pexanaenexa penacueraevetsimatacabita ata, jai
Jesús fariseovijavabelia.

Pacuenia Jesús jamatejemayaexana pebi pecobet- saquenaenë yabara pelivaisi

3 Penacueraevetsimatacabita Jesús joneya judfovi
penacaetuatabiboyalia. Nexata bajarajota pebi
naeca pecobetsaquenaenë. ² Nexata Jesús naitaxuto-
caevetatsi fariseovi petaenexatsi pecobetsaquenaenë
pejamatejemayaexanaejava penacueraevetsimatacabi-
ta. Nexata Jesús pecobetsaquenaenë ita jamateje-
mayaexana penacueraevetsimatacabita, “Jesús raja
naneconita Diosojavabelia. Tsipaji penacueraevetsi-
matacabita nacueneba,” pejainexa bajarapamonae.

³ Nexata Jesús jumaitsi pecobetsaquenaenëjavabelia:
—Nonotapunare. Nucare mapamonae pitabarataje,
jai.

⁴ Nexata Jesús jumaitsi fariseovijavabelia:

—Penacueraevetsimatacabita ata xanepana vajaex-
anaenexa pexaniacuene. Xanepana vajajamateje-
mayaexanaenexa piavitanevi, jai Jesús fariseovijav-
abelia.

Nexata fariseovi Jesús apo jumepitsitsi. ⁵ Nexata
Jesús anaeya naécota bajarapamonae. Bajaraxuacuj-
nae Jesús bejamatabëjibireca. Tsipaji yapètane pija-
matabëcuenetajajava fariseovi. Nexata Jesús jumaitsi
pecobetsaquenaenëjavabelia:

—Namaxërovire, jai.

Nexata pecobetsaquenaenë namaxërovita. Bajarajo-
ta cobexanepananajereca baja. Pecobetsaquenaejava-
mi ajibi. ⁶ Nexata fariseovi ita tane Jesús pecobex-
anepanaeyaexanaejava pecobetsaquenaenë, fariseovi
anaepana. Nexata bajarapabovecua pitsapa. Pona
penabarëcuaijuainexa nacuaevevtsinë Herodes pija-
jivijavabelia. Bajarapamonae najumejaita Jesús pe-
beyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto ita-
payabelia. Nexata Jesús pënaponaliatsi ayaibitsaëtox-
aneto Galilea nacuapijivi. ⁸ Nexata Jesús pënaponaliat-
si Judea nacuapijivinu, Jerusalén tomarapijivinu,
Idumea nacuapijivinu, Jordánmene itsapanaverenapi-
jivinu, imoxoyo Tiro tomaravecua pejinavanapaevin-
ua, imoxoyo Sidón tomaravecua pejinavanapaevinua.
Daxita bajarapamonae Jesús pënaponaliatsi tsipaji
Jesús vënëlvaisitanetsi Dioso pesaëta pinijicuene pex-
anaponaejava. ⁹ Nexata Jesús pijajivi itoroba jera
petoxaniavaetarutsinexatsi menetareca. Itsa bajarapa-
jivibitsaëtoxaneto Jesús bitso matacënënaponatsi, nex-

ata bajarapamo ënëabereca Jesús perunaenexareca.

¹⁰ Jesús baja ayaibitsaëto piavitanevi jamatejemayaex-
ana. Bajaraxuata itsamonae, piavitanevi, Jesúsjav-
abelia natorotaponabiaba pejayatsinexatsi.

¹¹ Dovathi peyajavajinavanapaevi Jesús ita taeyabia-
batsi, bajarapamonae irata othopabiaba Jesús
pitabarata. Bajarapamonae aëjai tsabiabi.

—Xamë tsaena Dioso pexënatomë, jai tsabiabi
dovathi peyajavajinavanapaevi.

¹² Nexata Jesús jumeitaveta bajarapamonae. Jumait-
si:

—“Dioso raja pexënato,” pajamë pëtsa xanë yabara
itsajivijavabelia, jai Jesús bajarapamonaejavabelia.

Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pe- livaisi

¹³ Jesús pijajivi ayaibitsaëtoxanetoyajuvënëvi, doce
saya ponëbeje, itapeta apóstolevinexa. Jesús pitapetsi-
vajënae apóstolevinexa, junaya petsutojumabetsia.
Bajaravetsica Jesús junatanuca ponëbeje jamatabëi-
tapeta apóstolevinexa. Nexata pamonae Jesús itapeta
apóstolevinexa, junaya petsutojumabetsia, Jesúsjav-
abetsia. ¹⁴ Nexata Jesús caetuata caebitsaëtoyo, doce
ponëbeje pijajivi, pepënjinavanapaevinexatsi. Jesús
itorobijitsianua bajarapamonae daxitanacuanëjava jivi
petsipaebanajetarubenaenexa Dioso pitorobilivaisi.

¹⁵ Jesús pijajivi jamatabëcuenecaëjëpaeyaexana Dioso
pesaëta pejamatejemayaexanaponaeenexa piavitanevi.
Jamatabëcuenecaëjëpaeyaexananua Dioso pesaëta
dovathi jivi pevecuacapitsapaponaeenexa. ¹⁶ Jesús pi-
jaapóstolevi, doce ponëbeje, mapevënëanëje. Copiaya
ponë pevënë Simón. Bajaraponë Jesús vënëruba it-
savënë, Pedro. ¹⁷ Itsanë Santiago. Itsanë Juan. Santi-
agobeje Juanbeje nacaebananëbeje, Zebedeo pexëna-
tobeje. Bajaraponëbeje Jesús vënëruba Boanerges.
“Boanerges,” ita jai, bajarapamonae pijajumeta ma-
pajumetaje pejumaitisijume: “Yamaxë pexënatobeje,”
pejaijume. ¹⁸ Itsanë pevënë Andrés. Itsanë Felipe. It-
sanë Bartolomé. Itsanë Mateo. Itsanë Tomás. Itsanë
Santiago, Alfeo pexënato. Itsanë Tadeo. Itsanë Simón,
celotenë. ¹⁹ Itsanë Judas Iscariote. Bajaraponë bexëa-
javabelia Jesús canajetsijitsiatsi pijavajabitsaë
pecobeyabelia pebeyaxuabinexatsi.

Pacuenia itsamonae Jesús yabara jamatabëcuene- navëxaniabiaya jumaitsi: “Beelzebú raja pesaëta, Jesús dovathi jivivecua capitsapapona,” jai yabara pelivaisi

²⁰ Jesús boya joneya pijajivi yajava. Icatsia jivibitsaë-
toxaneto nacaetuata. Nexata acuenebi Jesús pijajivi
pebarënananijava. ²¹ Itsamonae Jesús yabara jumaitsi:
“Jesús raja matajemabatsi,” jai. Nexata bajarapacuenia
itsamonae Jesús yabara pejumaitisijava, Jesús pijamonae
vënëlvaisitanetsi. Nexata Jesús pijamonae ponare-
na Jesúsjavaberena pebarëponaenexatsilia picani.

²² Judíovi pecujarubivi, Jerusalén tomaraverena pe-ponaevi, jamatabëcuenenavëxaniabiaya Jesús yabara jumaitisi:

—Mara ponë Jesúsje, Beelzebú yjavaponapona. Beelzebú raja daxita dovathivi pevetsinë. Bajaraxuata Jesús Beelzebú pesaëta dovathi jivivecua capitsapapona, jai judíovi pecujarubivi jamatabëcuenenavëxaniabiaya Jesús yabara.

²³ Nexata Jesús junata bajarapamonae jamatabëcuenenavëxaniabiaya pejumaitisijava pecanaëjëtsinexa. Nexata bajarapamonaejavabelia Jesús jumaitisi mapacueniaje:

—Beelzebú raja dovathivi jivivecua apo capitsapapona tsipae. Tspaji Beelzebú dovathi jivivecua itsa capitsapaponaejitsipa, nexata Beelzebú bepjavajabitsaë taejitsipa pijajivi. ²⁴ Pacanaëjère mapacuenije. Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. ²⁵ Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepjavajabitsaë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamonae pecanaëjëtsinexa Jesús bitso piasaëncuene dovathi matatoxenetsia, Jesús icatsia jumaitisi bajarapamonaejavabelia mapacueniaje:

—Itsajivi ata apo caëjëpaetsi pejonenexa bitso piasaëncë pijaboyalia peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaëncë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaëncë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

²⁸ Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuena jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. ²⁹ Itsiata baitsi jane pajivi pibisiacuena baracuaicuaijai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matabijavabelianexa, jai Jesús bajarapamonaejavabelia.

³⁰ Bajarapacuenia Jesús jumaitisi tspaji Jesús Espíritu Santo yjavaponapona atatsi, judíovi pecujarubivi jumaitisi Jesús yabara: “Jesús raja Beelzebú yjavaponapona,” jai. Nexata bajaraxuata bajarapamonae naneconita Espíritu Santojavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

³¹ Jesús pejuyapijivi, pena yajava, pata Jesúsjavabere-na. Itsiata bajarapamonae boyalia apo jonelia Jesús

penucaeboyalia. Nexata bajarapamonae junatsiaexana Jesús pejumetaeyenaevitsijavabelia. ³² Nexata pamonaev Jesús petsipaebilivaisi matatoyorotsia jumetaeyenatsi, Jesúsjavabelia jumaitisi:

—Patajatuxanenë, ena raja, nejuyapijivi yajava, nuca patapënëverena. Cajaita raja xamë, jai bajarapamonae Jesúsjavabelia.

³³ Nexata Jesús jumaitisi bajarapamonaejavabelia: —¿Detsa pitsijamatabëcuenevi taena, tajuyapijivinua? jai Jesús.

³⁴ Bajaraxuacujinae Jesús naëcota pematatoyorotsiaenaevitsi. Jumaitisi bajarapamonaejavabelia:

—Mara jota pamonaev xanëjavata penaevije, bajarapamonae jane taenajivi, tajuyapijivinua. ³⁵ Tspaji raja pamonaev exana pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

Pacuenia Jesús jivi livaisi tsipaeba peubinë pelivaisicuenia yabara pelivaisi

4 Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoxaneto nacaetuata itsajota Jesús livaisi tsipaebanuca. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto tajetabovelia nubena. ² Nexata Jesús daxitacuene livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

³ —Panenamuxunaevere mapalivaisije. Peubinë pona pabiabelia peubinexa. Nexata itsa pata pabita, peubixu pexucayabajarabicuenia ubanajetaruca. ⁴ Nexata pexucayabajarabijavata itsaxu othopa pabituatuajëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. ⁶ Nexata icotia bitso itsa ataju, nexata bajarapaxu juvi ata, tsaquenapona. Tspaji irabereca bitso apo atabunepepiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yjavajuva, bitso xanëebotonë matacënënatsi peubijavami. Nexata peubijava apo xainae pecuai. ⁸ Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

⁹ Nexata icatsia Jesús jumaitisi jivibitsaëtoxanetojavabelia:

—Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi

¹⁰ Jesús livaisi petsipaebicujinae, jivibitsaëtoxaneto baja Jesús vecuanaviabatsi. Nexata Jesús pijaepato barënacopata doce ponëbeje pijajivi, itsamonae itsiata

yajava. Nexata bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai bajarapamonae Jesúsjavabelia.

¹¹ Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenae abaxë daxitajivi apo yapëtae. Baitsi ra saicaya pamonaepo apo tajajivi, tsipaebajë livaisianë ècomparacióncuenia. ¹² Bajaraxuata nexata bajarapamonae tae ata Dioso pesaëta pinijicuenae taexanaejava, itsiata apo yapëtae pajamatabëcuene yabara exanajë pinijicuenae taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatabëcuenecopatsiyaniva Diosojavabelia pibisiacuene pexanaeconimi Dioso pevēcuaajibiaexanaeyanivatsi, jai Jesús.

Pacuenia Jesús yapëtaeyaexana pijajivi, itsamonae yajava, pajamatabëcuene xaina palivaisi tsipaeba peubinë pelivaisicuenia yabara pelivaisi

¹³ Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. ¹⁵ Pacuenia itsi pabita peubixu, paxu othopa pabi tuatuajëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëbatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitat-si bajarapalivaisimi, petsijamatabëbilivaisimitsi.

¹⁶ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. ¹⁷ Itsiata baitsi jane pacuenia irabereca apo atabunepiariaca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuenae pejamatabëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajë-

naeyabelia apo jumecovënëtanapae. ¹⁸ Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. ¹⁹ Itsiata baitsi jane bitso jamatabëcueneenatsi mapanacuapijicuenae yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuenae bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ²⁰ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabë pelivaisicuenia yabara pelivaisi

²¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—Itsajivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboënë pitayotecaenexa. ²² Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponanë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë. ²³ Pajivi jamatabënejumeyapëtane patacatsipaebilivaisi, xaniavaetsia nenamuxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. ²⁵ Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevetsicueña yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucaya-jabajarabanajetaruca. ²⁷ Peubinë peubicujinae vemaxëmajitabiaba meravi canacujitsia. Naëcotabiaba matababita. Bajarapacuenia panepapona matababitanë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva. ²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta. ²⁹ Itsa baja yaniona peubijava, penotsivi pona penotsinexa. Tsi-paji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepíjia vitsaba yabara pelivaisi

³⁰⁻³¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepíjia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepíjia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepíjia vitsaba mostazanae, bajara pijinia itsane Dioso pijajivi ata. Bepíjia Dioso pijajivi ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecua. ³² Itsiata baitsi jane mostazanae itsa juva, bepíjia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxërananëjavata. Bajara pijinia itsane jivi ata. Bepíjia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ëcomparacióncuenia yabara pelivaisi

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. ³⁴ Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

Pacuenia Jesús itaveta joviboxaneto, malataca yajava, piayaijavami yabara pelivaisi

³⁵ Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonaë pënaponatsi itsajeranëta. ³⁷ Nexata pinijijoviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona. ³⁸ Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

³⁹ Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. ⁴⁰ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsi-paji apo payapëtaemë Dioso papecaevetsijava? jai Jesús.

⁴¹ Nexata Jesús pijajivi najunaviaca bajarapacuenie petaexae. Èpamonaë najumaitsi:

—¿De meta tsi-paji maponëje? ¡Itaveta jovibo, malataca ata! ¡Jumecovënëtsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponaenë, Jesús vecuacapitsapa Gerasa nacuata yabara pelivaisi

5 Jesús pijajivi barëpata pucaxaneto itsapanabelia, Gerasa nacuayabelia. ² Nexata Jesús jerajavavetsina nonotajuna. Pebi dovathivi peyajavaponaponaenë, cujitabarenatsi jivimëthëanëjavaverena. ³ Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. ⁴ Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutajarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsi-paji bitso asaë. ⁵ Bajaraponë petsutonëjava, jivi petëpaevi pemëthëcaejava, matababijebi, meravijebi yajava, ponaponabiaba. Vavajai tsabiabaponaponaë. Ibotonëjavabelia natsaquibajarababiabaponapona. ⁶ Bajaraponë itsa taetaba Jesús penajetarucaejava, nexata tajëverena cujinaëponarena Jesúsjavaverena. Jesús pitabarata pe-

matabacabëta nucajunua. ⁷ Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata. Nejamatabëcuenebejibitsipame, jai dovathivi peyajavaponaponanë Jesúsjavabelia.

⁸ Bajarapacuenia jumaitsi dovathivi peyajavaponaponanë tsipaji Jesús jerajavavetsina penonotajunaevavata, dovathivi peyajavaponaponanë pemataenaevjavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesús.

⁹ Nexata Jesús jumaitsi bajaraponëjavabelia:

—¿Detsa pavënëme? jai.

Nexata dovathivi peyajavaponaponanë navënëpae-ba.

—Tavënë raja Legión. Tsipaji raja bitso paayaibitsaëto-xanetonë, jai dovathivi peyajavaponaponanë.

¹⁰ Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecu. ¹¹ Nexata bajarajota, imoxoyo petsutojavata, marranobitsaëto-xaneto xaevanapa. ¹² Dovathivi bitso vajëca Jesúsjavabelia.

—Paneitorobare marranobitsaëto-xanetojavabelia. Panetocopare patajonenexa bajara pamarranobitsaëto-xanetojavabelia, jai dovathivi.

¹³ Nexata Jesús tocopata pacuenia dovathivi vajëcatisi. Dovathivi baja pebi vecuapitsapecatsi. Nexata baja marranobitsaëto-xanetojavabelia dovathivi junua. Bajara pamarranobitsaëto-xaneto jinavanapa anijamilbeje ponëbeje. Nexata daxita marranobitsaëto-xanetomi cujinaeyeca. Pucaxaneto itapajanituareca othopareca. Nexata daxita marranobitsaëto-xanetomi meneta bubuna.

¹⁴ Bajara pamarranobitsaëto-xanetomi pevetavana-paevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacuenia. ¹⁵ Nexata dovathivi peyajavaponaponanëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. ¹⁶ Pamonae cuenetantsi Jesús pejamatejemayaexanaevajava dovathivi peyajavaponaponanëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëto-xanetojavabelia. ¹⁷ Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecu, jai Gerasa nacuapijivi Jesúsjavabelia tsipaji cujunavatsi.

¹⁸ Jesús baja itsa runareca jera ënëabereca, ponë dovathivi peyajavaponaponanëmi, bitso picani navajëca Jesús pepëta penaponanexa. ¹⁹ Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonae tsipaebare papinijicuenie Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponanëmijavabelia.

²⁰ Nexata baja dovathivi peyajavaponaponanëmi pona. Taxuxuaba penavajunupaebijava papinijicuenie Jesús exanatsi. Bajaraponë navajunupaebaona Decápolisvënë nacujava. Decápolisvënë nacuata eca diez patomarabeje. Daxitajivi jamatabëcuenenabena-jaca itsa jumetanetsi bajaraponë penavajunupaebaponaevajava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

²¹ Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëto-xaneto Jesús matatoyoronatsi. ²² Nexata bajarajota napatajopa Jairovënëne. Bajaraponë judïovi penacaetuatabiabibo pevetsiviyajuvënëne. Jairo itsa taetaba Jesús, nexata Jairo pematabacabëta yaiyataeya Jesús pitabarata nucajunua. ²³ Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

²⁴ Jejai Jesús. Jesús nexata napona Jairo pepëta. Nexata jivibitsaëto-xaneto Jesús pepënaponaevitsi matatoyorotsia cënënanajetarubenatsi. ²⁵ Bajarapajivibitsaëto-xaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. ²⁶ Bitso nexata bajarapova bejiobi pexainacuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitaneuene. Biji caranata pevajënaeyabelia capunaponatsi piavitaneuene.

²⁷ Nexata bajarapova jumetane itsamonae pecuaicuaijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëto-xaneto tuatujëalia. Nexata bajarapova tojayataba Jesús penaxatatsijava. ²⁸ Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanejavami nevecuaajibi tsane,” jamatabëjai. ²⁹ Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. ³⁰ Jesús ata nayapëtane pesaëta pejamatejemayaexanaevajava pepënëyabelia. Nexata pejayatabijavatatsi Jesús napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

³¹ Nexata Jesús pijajivi jumaitsi:

—Taneme rabaja jivibitsaëtoxañeto pecacënënanaje-tarubenaëjava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³² Jesús naëcobaruta daxitajivijava petaenexa pajivi tojayatabatsi penaxatatsijava. ³³ Nexata bajarapova neconecojai tsanucæ pecajunavi penayapëtaexæ Jesús pejamatejemayaexanaëjavatsi. Nexata bajarapova najetabarena Jesús pitabarayaberena. Pematatabëta nucajunua. Nexata daxita pacuene exana, bajarapova tsipaëba Jesúsjavabelia. ³⁴ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitanëjavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaitsanucæjavata namutoepatota, Jairo pijaboverena peponævi mataenë-natsi. Bajarapamonæ jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonæ Jairojavabelia.

³⁶ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Naja-matabëcuenecopare saya ëxanëjavaberena nexënatoyavo pectoasaënexa, jai Jesús Jairojavabelia.

³⁷ Nexata Jesús, pajivibitsaëtoxañeto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaëbananëbeje. ³⁸ Itsa baja Jesús palia Jairo pijaboyabelia, tane jivibitsaëto pinijijumeta pematantueyabijava petëpaevayo. ³⁹ Jesús itsa joneya boyalia, jumaitsi bajarapamonæjavabelia:

—Pëtsa bitso pamatanueyabame. Pejanava raja apo tëpæ. Saya raja majitanuca, jai Jesús tsipaji yapëtane Jesús piasaëyaexanaëjavanexa bajarapovayo.

⁴⁰ Bajarapacuenia Jesús pejumaitsiyava, bajarapamonæ saya jumecapocaponatsi. Nexata daxita Jesús bovecua pitsapaëyaexana. Itsaxuayolia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya. ⁴¹ Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsiyume: “Pejanava, nonotapunare,” pejaijume.

⁴² Bajarapacuenia Jesús pejumaitsiyavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuenia itsa tane. ⁴³ Nexata Jesús pinijicuenia jumaitsi:

—Pëtsa itsajivi ata patsipaëbame mapacuenieje, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexæjava rajure, jai.

Pacuenia Jesús naviata pijanacuayabelia, Nazaret tomarabelia, yabara pelivaisi

6 Jesús baja, pijajivi yajava, pona Capernaum tomaravecua. Naviata pijanacuayabelia, pe-vitsabitomarabelia. ² Judíovi penacueraevetsimatacabi-ta Jesús taxuxuaba jivi livaisi petsipaëbijava judíovi penacuetaabiabibota. Ayaibitsaëtoxañeto pejumetaevitsi sivajamatabëcuenenabenajacatsi. Nexata bajarapamonæ Jesús jamatabëcuenenabenajacatsi. Bajarapamonæ Jesús yabara najumaitsi mapacueniaje:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacuenieje? ¿Pitsipinijicuenie maponë exanaje, vaxaitsi abaxë caeto ata apo taetsi! ¿Matapania matanetsije! ³ Maponëje vaxaitsiyajuvënënë. Carpin-teronë. María pexënato. Bajaraponë pejuyapijivi Santiago, José, Judas, Simón. Papetiriavi ata vajatomarata jivananapa, bajaraponë pejuyapijivi, najai bajarapamonæ Jesús yabara.

Nacaetomarapijivixæ, bajarapamonæ Jesús apo jumexaniataetsi. ⁴ Nexata Jesús jumaitsi bajarapamonæjavabelia:

—Bajara maitsabiabije. Diosojumepæbivi profetavi itsanacuapijivi yayataeyabiabatsi. Itsiata pijanacuapijivi, pijaviriavi, pijamonæ ata, apo yayataeyabiabitsi, jai Jesús.

⁵ Nexata Jesús bajarajota jivi ayaibitsaëtojavabelia pinijicuenie pexanaëjava apo tsitaexanae. Tsipaji apo jumecovënëtsi. Saya caejiviyobeje piavitanevi pecobeta jayata. Jamatejemaya exana. ⁶ Nexata Jesús bitso najamatabëxaina. Tsipaji jivi apo jumecovënëtsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaëbanajetaruca.

Pacuenia Jesús pijajivi itoroba Dioso pitorobilivaisi jivi petsipaëbanajetarubenaenexa yabara pelivaisi

⁷ Jesús junata pijajivi doce ponëbeje penacueta-atsinexa. Nexata Jesús pijajivi itoroba anijanëbeje tsaponæ. Jesús pijajivi pecaëjëpæjamatabëcuenetsi jamatabëcuenecaëjëpæyaexana dovathi peyajavajinavanapævi pevecuacapitsapaponaenexa. ⁸ Jesús jane baja pijajivi penaropobivajënæ, Jesús jumaitsi pijajivijavabelia mapacueniaje:

—Pëtsa itsacueniejava ata pacaponame panijanamu-tonexa. Pëtsa pacaponame panemarue ata, dorota, palata ata. Ënaëboyoya saya pacaponare. ⁹ Itsiata pataxunaponare panenataxuxatabijava. Cæjava panenaxatatsijava pajumaponare. Pëtsa anijacamisabeje pacaponame. ¹⁰ Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponæname, bajarapabovecua papitsapæname. ¹¹ Patomarata apo pacacopiapitsi tsane, itsa apo jitsipaënu tsane papecanamuxunævetsinexa panetsipaëbilivaisi, nexata paponæname bajarapatomaravecua. Paneponævajënæ bajarapatomarata

panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabi Dioso jivi naneconitsiaexanaena, bajaramatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajëtotota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajaramatacabi Dioso matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

¹² Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabëcuenepënëyorore Diosojavabelia, jai tsaponae.

¹³ Jesús pijajivi dovathi peyajavajinavanapaevi vecuacapitsapapona. Piavitanevi ata mataexabapona aceiteranëta. Bajarapacuenia Jesús pijajivi jamatejemayaexanapona piavitanevi.

Pacuenia bajayata Juanpijinë jivibautisabinëmi beyaxuabatsi yabara pelivaisi

¹⁴ Herodes, Galileanacua pevetsinë. Nexata Herodes jumetane itsamonae jamatabëcuenenavëxaniabiaya pejumaitsijava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa,” pejaijava itsamonae jamatabëcuenenavëxaniabiaya Jesús yabara, Herodes jumetane.

¹⁵ Itsamonae pijinia jumai tsaponae Jesús yabara: —Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumai tsaponae Jesús yabara: —Diosojumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonae.

¹⁶ Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes itsa jumetane, Herodes ata jamatabëcuenenavëxaniabiaya jumai Jesús yabara:

—Maraeta Juanpijinëmije, ponëmi bajayata xanë tajajivi vësiucutaxuabiaexanajë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

¹⁷ Bajarapacuenia Herodes jumai tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta. ¹⁸ Nexata Herodes pejuyapijinë pijava

peyacajërëtsixae, Juanpijinë abaxë itsa apo vaetabitsi, muxujioba Herodes. Juanpijinë jumai Herodesjavabelia:

—Acuenebi raja nejuyapijinë pijava nepitsijava,” jai Juanpijinë Herodesjavabelia.

¹⁹ Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë itsa ponapona penaneconitsivi pejebabiabibota, bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi. ²⁰ Tsipaji Herodes yapëtae Juanpijinë bitso pejamatabëxanepanaenëcuene. Nexata Herodes yayatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë itsa cuaicuaijai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniaveretsia namuxunaevetabiaba. ²¹ Nexata pamatacabi Herodes namatabënapita penaexanaematacabi, najamatabëxaina pexaniafiesta pexanaenexa. Bajarapafiestajava Herodes junata pijaboyaberena jivi ayaibitsaëttoxaneto penabaninexa. Junata Herodes pijajivi, pamona toevetatsi pijairanë. Junata vajabitsaëvi pevetsivinua. Junata petuxanevinua, Galilea nacua pejinavanapaevi. Nexata bajarapafiestajavata Herodíasva toyapëxanepanatsi Juanpijinë pebeyaxuabiaexanaenexatsi.

²² Herodíasva toyapëxanepanatsi tsipaji pexënatoyo joneya Herodes pejunatsivi pebarënanabenecejavalia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejionëyo peyavajibijava. Nexata Herodes najumecapanepaeya pexaniajaijumeta jumai pejionëyojavabelia:

—Nevajëre xua jitsipame. Carajutsianatsi raja.

²³ Pacuenejava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatuaejëjava carajutsianatsi, jai Herodes najumecapanepaeya pejionëyojavabelia.

²⁴ Nexata bajarapovayo pitsatabalia. Jumai pena-javabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumai:

—Juan jivibautisabinë pematabocoto vajëre, jai.

²⁵ Nexata bepiglia bajarapovayo jopajoneya Herodes peecaejavabelia. Jumai Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

²⁶ Nexata Herodes pinijicuenia bejamatabëjioi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumai pejionëyojavabelia pexaniajaijumeta daxita pejunatsivi pitabarata. ²⁷ Nexata Herodes bepiglia itoroba vajabitsaënë petocarenanexatsi Juan pematabocoto.

²⁸ Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtae capanepaeya baja Juanpijinë pebeyaxuabijavatsi.

²⁹ Nexata Juanpijinë pijajivi itsa vënëtanetsi pebexuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

Pacuenia Jesús pexaejava rajuta cinco mil ponëbeje yabara pelivaisi

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa. ³¹ Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacuer-aevetsianatsi caepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoخانetonë topatabiabatsi. Itsamonae navi-abaponabiaba. Itsamonae juya patabiaba. Nexata Jesús pijajivi pebarënanabinexa, apo cuenecaëjëpabi-abitsi. ³² Nexata Jesús ëpijajivi jerata yajavapona itsabelia jivi ajibi. ³³ Itsiata jivi ayaibitsaëtoخانeto pë-tanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae. ³⁴ Itsa baja Jesús bana nonobajunaya jeravecua, Jesús tane jivibitsaëtoخانeto. Nexata Jesús bajarapamonae itaxutobejibiatane. Nexata Jesús bajarapamonae sivajamatabëjumaitsi mapacueniaje:

—Pacuenia baitsi ovejibitsaëtoخانeto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia. ³⁵ Itsa baja bitso caniviyotsia, Jesús pijajivi cujibarenatsi. Jumaitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xinae. ³⁶ Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaeñajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata. ⁴⁰ Nexata bajarapamonae pepobitsaëtonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajara-pacuenia caebitsaëto canacujitsia enapona. ⁴¹ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuajivaxi ata tsicobetsana jivijavabelia. ⁴² Daxita xani-avaetsia nabane. ⁴³ Bajaraxuacujinae Jesús pijajivi caet-uata pan, dujuai yajava, jivi peyajuvënëcopabejibijavanë. Nexata vënëba doce xuabeje bemapirecuenia pexanaejavanë. ⁴⁴ Pamonae pexaejava xane, ayaibitsaëtoخانeto. Itsiata ëpebijivi namataëjëtatsi cinco mil ponëbeje.

Pacuenia Jesús mene itaboxoya najetaruca yabara pelivaisi

⁴⁵ Jesús jivi ayaibitsaëtoخانeto pexaejava perajutsicujinae, Jesús pijajivi bepimia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanduca bajarajota. ⁴⁶ Itsa baja jivi napëvereta penavi-abijava, Jesús junaya petsutojumabetsia pevajëtsinexa Diosojavabelia. ⁴⁷ Itsa baja bitso meravi, Jesús pijajivi pucaxaneto itapavecua tajë baja yanajetarubenalialia. Jesús abaxë bajarapaepatota caenë nacopatanducarena pucaxanetoitapatarena. ⁴⁸ Nexata Jesús tane pijajivi petoayapëbejejavatsi pevaetsijava. Tsipaji bitso joviboxaneto ayai pevajënaeverena. Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Rovia picani xenetsijitsia. ⁴⁹ Jesús pijajivi itsa tanetsi mene itaboxoya penajetarucaejava, Jesús pijajivi jamatabëjumaitsi:

—¡Petëpaenëmi raeta pejumape najetaruca! jamatabëjai.

Nexata Jesús pijajivi vavajai tsaxuabi ayajumeta.

⁵⁰ Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

⁵¹ Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pini-jicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. ⁵² Jesús baja picani pijajivi copiaya tane, pan tsiquirijavayomi ata, jivibitsaëtoخانetojavabelia Jesús perajutsijava. Itsi-ata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuenenajunaviaca. Abaxë bajarapamonae ajamatabëcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi

⁵³ Jesús pijajivi jerata yajavapata puca itsapanabelia. Pata Genesaret nacuyabelia. Peyapatsijera bajarajota puca itapata querataruta. ⁵⁴ Nexata Jesús, pijajivi yaja-

va, nonotajunaya jeravecu. Bajarajota bepíjia jivi yapêtanetsi Jesúscuene. ⁵⁵ Nexata Jesús pepatsijava penatsipaebinexa, navajunucacujinaejinaruta daxita bonêjava. Nexata piavitanevi pijacamaxita yavêtacarapatatsi itsajota jivi jumetane Jesús pepatsijava. ⁵⁶ Jesús pata tsiquiritomaraxijava, pinijitomaranêjava ata, tomarapênêya penaebonêjava ata. Daxitajava, itsa patomarata Jesús patabiaba, bajarapatomaranêjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponêje pecatojayatsinexa nenaxatatsijavacopia, jai tsabiabi.

Nexata daxita pamonaes Jesús penaxatatsijavacopia tojayataponatsi, jamatejema baja tsaponae piavitanejavamivecu.

Pacuenia Jesús tsipaeba xua jivi jamatabêcuenebijanatsi yabara pelivaisi

7 ¹⁴ Daxita judíovi catsiteca pijasalinaivimi pijacuene. Judíoviyajuvênêvi, pamonaes fariseovi naexana, bajarapamonaes bitso catsiteca pijasalinaivimi pijacuene daxita judíovi matatoxenetsia. Jamatabêcuenenavêxaniabiaya jamatabêjumai tsabiabi:

—Itsa catsitecajê tajasalinaivimi pijacuene, nexata Dioso aneconijibia netaena, jamatabêjai tsabiabi.

Nexata bajarapamonaes pijasalinaicuenia anijatonê xaniavaetsia itsa apo napênanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinae, bajarapamonaes pijasalinaicuenia xaniavaetsia itsa apo napênanacobequiatsi, pexaejava apo xaeyabiabi. Bajarapamonaes pematatsênêa navitsia itsacujiruxi ata, pijasalinaivimi pijacujiru, catsiteca. Bajarapamonaes tazaxi, mera peyajebinêanê ata, pecasetsinêanê ata, camanê ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonaes tane Jesús pijajivi judíovi pijasalinaicuenia anijatonê napênanacobequiatsinejeva penabanijava. Bajaraxuata bajarapamonaes jumaisi Jesúsjavabelia:

—Jesús, nijajivi naneconita Diosojavabelia. ⁵ Tsipaji nijajivi apo jumecovênêtsiajinavanapae vajasalinaivi pijacuene. Nijajivi itsa xane pexaejava, anijatonê napêna apo nacobequiatabiabi, jai bajarapamonaes Jesúsjavabelia.

⁶ Jesús nexata jumaisi bajarapamonaesjavabelia:

—¡Paxamê saya jivi paneyamaxêitojorobivi! Diosojumelivaisipaebinêmi profeta Isaíaspijinê baja cajena bajayata tajêvelia xaniavaetsia pacavajunupaeba. Bajayata Dioso tajêvelia pejumaisijava paxamê yabara profeta Isaíaspijinê peyaquinaelivaisita jumaisi mapacueniaje:

Bajarapamonaes nejitsipaena saya pijumeta. Itsiata pepo tanejitsipaejamatabêcuene nevecuatajê tsane.

⁷ Saya baitsi bajarapamonaes pijajumaisita tsane: “Pacajitsipatsi,” nejai itajara tsane. Itsiata apo xaniajai

tsane. Bajarapamonaes saya jivi tsipaebaponaena pejamatabêcuenebijilivaisi. Pepo taitorobilivaisi apo tsipaebi tsane, jai tajêvelia Dioso pejumaisijava paxamê yabara Isaíaspijinê peyaquinaelivaisita, jai Jesús bajarapamonaesjavabelia.

⁸ Jesús icatsia jumaisi fariseovijavabelia, judíovi pecujarubivijavabelia ata:

—Paxamê Dioso papecaitorobicuenia apo paexanaemê. Caranata êvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinêanê. Xaniavaetsia paquiatabiabame tazaxi ata. Pematatsênêa navitsia itsacujiru ata pacatsitecame. ⁹ Apo pajumecovênêtsimê Dioso pitorobilivaisi vajasalinaivi pijacuene panecat-sitecaenexa. Apo pajumecovênêtsi atamê Dioso pitorobilivaisi, jamatabêcuenenavêxaniabiaya pajamatabêjumaisimê tsabiabi: “Pexaniacuene raja exana-jê,” pajamatabêjamê tsabiabi. ¹⁰ Bajayata Dioso najumecopata Moiséspijinêta. Bajarapalivaisi jumaisi:

“Axa yayataema. Ena ata yayataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinêta penajumecopatsilivaisi. ¹¹⁻¹² Itsiata baitsi jane paxamê jivi pamuxubijipenetabiabame peyaiyataeyaniva paxajivi, penajivi ata. Paxamê pajumaisimê tsabiabi mapacueniaje: “Axa, ena ata, itsa cavajêta neyavenonaenexa, nexata itsa apo jitsipaemê neyavenonaesjava, jumaisimê tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajê baja tarajutsinexa Diosojavabelia. Nexata baja acuenebi patacarajutsinexabeje,’ jamê tsane neyavenonaeyaniva,” pajamê tsabiabi jivijavabelia. ¹³ Nexata caranata Dioso pejumaisijume: “Axa yayataema. Ena ata yayataema,” pejaijume, paxamê jivi pacopabiaexanaponame. Tsipaji paxamê patsipaebaponaes saicaya vajasalinaivimi pijalivaisi. Itsalivaisianê ata pematatsênêa saicayacuenia patsipaebaponaes Dioso pitorobilivaisivecu, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaisi jivijavabelia:

—Daxita paxamê panenamuxunaevere xaniavaetsia patanejumeyapêtaenexamê. ¹⁵ Xua jivi pecuibota xane, pexaejavênêa napêna anijatonê apo nacobequiatsi ata, apo jamatabêcuenebijianaetsi. Apo vênananeconitsi Diosojavabelia. Baitsi rajane xua jivi najamatabêxaina pejamatabêêthêtovetsina, xua ata pibisiacuenia cuaicuajai, bajara baitsi jane xua jivi bajaratabêcuenebijianaetsi. ¹⁶ Pajivi jamatabênejumeyapêtane patacatsipaebilivaisi, nenamuxunaevetsi xaniavaetsia, jai Jesús.

¹⁷ Itsa baja Jesús jivivecu natixita, boya joneya. Nexata boyalia pijajivi yanijobatsi bajarapalivaisi. ¹⁸ Nexata Jesús jumaisi pijajivijavabelia:

—¿Paxamê ata tsarovia abaxê apo panejumeyapêtaemê? Daxitacuene raja pexaejava jivi xae ata, apo jamatabêcuenebijianaetsi. Diosojavabelia apo vênananeconitsi. ¹⁹ Tsipaji raja jivi pexaejava apo tsija-

matabëethëjonetsi. Saya pënëareca joneca. Bajaraxu-acujinae icatsia vecuapitsapatsi, jai Jesús.

Bajarapacuenia Jesús jumaiti Jesús pijajivi peyapë-taeyaexanaenexa pacuenia daxitacuene jivi pexaejava xae ata, apo pibisiacuene.

²⁰ Icatsia Jesús jumaiti:

—Baitsi rajane jivi pejamatabëethëtojavavetsina, pa-pibisiajamatabëcuene pitsapa, bajara baitsi jane xua jivi jamatabëcuenebijanatsi. ²¹ Tsipaji rabaja jivi pejamatabëethëtojavavetsina pitsapa pibisiacuene penajamatabëxainanexa. Pitsapa pebi pijava pevecuanamatayajitsi jamatabëcuenenexa. Pitsapa petirivijavabelia pebi penaperabëquenetsiatæ ja-matabëcuenenexa. Pitsapa jivitonë pebeyaxuabijamatabëcuenenexa. ²² Pitsapa penacobetoxotsijamatabëcuenenexa. Pitsapa itsamonæ pecobecovë penaxainæyabijamatabëcuenenexa. Pitsapa piacujirubejijamatabëcuenenexa. Pitsapa itsamonæjavabelia peyamaxëitorobjamatabëcuenenexa. Pitsapa itsamonæ pexainæcuene pecobecaëbijamatabëcuenenexa. Pitsapa itsajivi pibisiacuena pebaracuaicuaijai jamatabëcuenenexa. Pitsapa ayaijamatabëcuenejivi penataejamatabëcuenenexa. Pitsapa saya jema peponaponæjamatabëcuenenexa. ²³ Daxita bajarapajamatabëcuene jivi pejamatabëethëtojavavetsina pitsapa. Nexata bajarapacuenia jivi jamatabëcuenebijanatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemaexana yabara pelivaisi

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava. ²⁵ Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayataeya Jesús pitabarata pematabacabëta nucajunua. Bajarapova pexënatoyo dovathi yajavaponapona. ²⁶ Bajarapova sirofeniciaviriava, apo judíova. Nexata Jesúsjavabelia jumaiti:

—Pexaniacuene bitso netoexanare. Taxënatovayo netovecuapitsapare dovathi, jai bajarapova.

²⁷ Nexata Jesús jumaiti bajarapovajavabelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonæjitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipæ, jai Jesús bajarapovajavabelia.

²⁸ Itsiata baitsi jane bajarapova ajumesæ tsaponæ. Icatsia jumaiti Jesúsjavabelia:

—Xaniajamë rabaja picani. Itsiata neyavenonare. Tsi-paji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia

itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaiti bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja pebocaejava camata. Nexata yapëtane pexënatovayo baja petovecuapitsapæjavatsi dovathi.

Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia. ³² Bajarajota jivi tocapatatsi siyanë, bitso apo pejumetaenë, piajumecëcënë. Nexata bajarapamonæ jumaititsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonæ.

³³ Nexata Jesús jivivecua bajaraponë barëpona pe-saicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴ Nexata Jesús athëbëa be-næcotsia. Jesús athëbë venajumalixuabica. Nexata Jesús pijajumeta jumaiti bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitisijume: “¡Muxuvojorucaremelia!” pejaijume.

³⁵ Bajarapacuenia Jesús pejumaitisijavata, bajaraponë muxuvojorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia.

³⁶ Nexata Jesús jumaiti bajaraponë petocapatsivitsijavabelia:

—Pëtsa papaebame itsamonæjavabelia pacuene exanajë maponëjavabeliaje, jai picani Jesús asaëyata.

Itsiata bajarapamonæ jumeitavetsi atatsi, bitso tsi-pæbapona jivijavabelia. ³⁷ Nexata pamonæ jumetane bajarapalivaisi, pinijicuenia jamatabëcuenenabenajaca. Bajarapamonæ jumaiti:

—Bajaraponë, Jesús, daxitacuenevitane pexainævi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjëpaevitsi ata pecuaicuaijijava, cuaicuaijaiyaexanapona xaniavaetsia, jai bajarapamonæ Jesús yabara.

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi

8 Itsamatacabi Jesús jivibitsaëtoخانeto muxunanacaetuatsi. Nexata bajarapamonæ penabainexa, bajarajota pexaejava apo xainæ. Nexata Jesús junata pijajivi. Jesús jumaiti pijajivijavabelia mapacueniaje:

² —Netsitabejiobi baja rovia mapamonæje. Tsipaji baja ajena acueyabi pamatacabibeje xaina xanëjavata

pejivanapaecujinae. Pemarue baja tovereverecatsi.
³Itsa meta itorobijitsipajë pijabonëjavabelia pepon-
 aenexa pexaejava xaenejeva, apo asaë meta tsipae na-
 mutua peponaejava. Tsipaji raja itsamonae pata tajëv-
 erena, jai Jesús pijajivijavabelia.

⁴Nexata Jesús pijajivi jumaitsi:

—¿Detsa jane pacuenia pexaejava berajutatsi? Majo-
 taje ajibi pexaejava. Tsipaji itsajivi ata pijabo apo
 xainae, jai Jesús pijajivi.

⁵Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶Nexata Jesús itoroba daxitajivi penaenexa irata.
 Nexata Jesús pita siete papanbëbeje. Nexata Diosojav-
 abelia Jesús jumaitsi:

—Pexaniacuene panetoexaname. Panerajutame
 pataxaejava, jai.

Bajaraxuacujinae Jesús epatsicacapona pan. Nexata
 Jesús pepatsicacaepan rajutapona pijajivijavabelia.
 Nexata juya Jesús pijajivi bajarapapan tsicobetsana
 daxitajivi pexaenexa. ⁷Dujuainëxinua xaina. Icatsia
 Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame du-
 juainëxi, jai.

Nexata icatsia pijajivi itoroba petsicobetsanaenexa
 daxitajivi bajarapadujuainëxi. ⁸Daxitajivibitsaëtoxane-
 to nabane xaniavaetsia. Nexata peyajuvënëcopabija-
 vanë Jesús pijajivi caetuata. Vënëba siete xuabeje be-
 mapirecuenia pexanaejavanë. ⁹Pexaejava nabane be-
 jamatabëcuene cuatro mil pajivibeje. Nexata jane baja
 pexaejava pexaeujinae, Jesús jivi naviabiaexana pi-
 jabonëjavabelia. ¹⁰Bajaraxuacujinae Jesús, pijajivi yaja-
 va, runareca jera ënëabereca. Jesús pijajivi barëpona
 Dalmanuta nacuyabelia.

**Pacuenia fariseovi Jesús itorobatsi Dioso pesaëta pini-
 jicuene pexanaejava petsitaexanaenexa picani yabara
 pelivaisi**

¹¹Fariseovi Jesúsjavaberena pata. Bajarapamonae ja-
 matabëcueneëjëbiaya jumenotaponatsi. Nexata ba-
 jarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata
 pacacueneyapëtaenatsi Dioso pepacuene athëbëvetsi-
 ca pecaitorobinëcuenetsica, jai.

¹²Nexata bajarapamonae yabara Jesús bitso ja-
 matabëcuenebëjai. Nexata Jesús athëbë venajumalixu-
 abica. Jumaitsi:

—¿Detsa xuajitsia panevajëcame pinijicuene patacat-
 sitaexanaenexa pataneyapëtaenexamë pepacuene
 Dioso athëbëvetsica taneitorobinëcuenetsica. Xania-
 janë pacuenia pacatsipaebijitsiatsi. Itsiata apo pacatsi-
 taexanaetsi tsane pinijicuene taexanaejava, jai Jesús.

¹³Nexata baja Jesús bajarapamonae vecuapona. Icat-
 sia runareca jera ënëabereca. Pucaxaneto it-
 sapanabelia baja Jesús pona.

**Pacuenia Jesús pijajivi muxujioba fariseovi petsipaebili-
 vaisi pejumecovënëtsiyaniva yabara pelivaisi**

¹⁴Jesús pijajivi nacofënëta pemarue. Nexata saya
 caepanbëyo capona jerata. ¹⁵Nexata Jesús pijajivi mux-
 ujioba pejumecovënëtsiyaniva fariseovi itsa tsipaebatsi
 saicayacuenia Dioso pejumelivaisivecua. Jesús jumaitsi
 pijajivijavabelia mapacueniaje:

—Panejumetaema. Xania panayajivitaema fariseovi
 pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebili-
 vaisi, nacuaevetsinë ata, Herodes, petsipaebilivaisi,
 Jesús pijajivi pejumecovënëtsiyaniva.

¹⁶Itsiata Jesús pijajivi apo jumeyapëtaetsi. Bajaraxua-
 ta Jesús pijajivi nabarëcuaicuaijai bajarapacuenia Jesús
 pejumaitsiyume yabara. Jesús pijajivi najumaitsi:

—Jesús nacajumaitsi: “Xania panayajivitaema
 fariseovi pijalevadura,” nacajai. Baja raeta pacuenia
 Jesús nacajumaitsi pan apo vajacaponaeaxae, najai
 Jesús pijajivi.

¹⁷Jesús pijajivi jamatabëcueneyapëtane bajarapacue-
 nia jamatabëcuenenavëxaniabiaya penajumaitsiyava
 levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta
 pacuenia Jesús nacajumaitsi pan apo vajacaponaeaxae,”
 panajamë? Paxamë abaxë apo panejumeyapëtaemë
 xua yabara pacajumaitsi. Pajamatabëcuenetajamë
 bitso. ¹⁸Pan yabara raja apo pacajumaitsi. Pan itsa
 namatavenonaejitsipatsi, necaëjëpa taexanaenexa.
 ¿Apo panajamatabënepitsimë tsipaji pacuenia exanajë
 pamatacabi pan namatavenonatsi? ¹⁹Pacujinae epatsi-
 cacajë cinco papanbëmibeje panetsicobetsanaenexa
 cinco mil ponëbejejavabelia, bajarapacujinae peyajuv-
 nëncopabijavanë, ¿detsa xuabeje pavënëtame be-
 mapirecuenia pexanaejavanë? jai Jesús pijajivijav-
 abelia.

Nexata Jesús pijajivi jumaitsi:

—Doce xuabeje pavënëtajë, jai.

²⁰Jesús icatsia jumaitsi:

—Pacujinae epatsicacajë siete papanëmibeje panet-
 sicobetsanaenexa cuatro mil pajivibejejavabelia, ba-
 jarapacujinae peyajuvënëncopabijavanë, ¿detsa xuabeje
 pavënëtame bemapirecuenia pexanaejavanë? jai
 Jesús.

Nexata Jesús pijajivi jumaitsi:

—Siete xuabeje pavënëtajë, jai.

²¹Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo
 patacujumaitsiyava? Xanë pacajumaitsi: “Xania
 panayajivitaema fariseovi pijalevadura,” pacajaitsi. Ba-
 jarapacuenia pacajumaitsi panejumecovënëtsiyaniva
 fariseovi petsipaebilivaisi, panejumecovënëtsiyaniva
 nacuaevetsinë ata Herodes. Tsipaji bajarapamonae
 pacatsipaebiana saicayacuenia Dioso pejumelivaisive-
 cua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsēcē-naenē, apo petanē tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsēcē-naenē, apo petanē. Pinijicuenia vajēcatsi Jesús pitaxutojayatsinexa bajaraponē pitaxutoxanepanaenexa.

²³ Nexata Jesús cobepita. Barēpona pesaicaeyojavabelia, tomarapēnēyabelia. Nexata bajarajotalia Jesús peonitota itaxutoexaba. Itaxutojayata. Bajaraxuacujinae Jesús yanijoba.

—¿Cacaējēpa tsabaja netaejava? jai Jesús.

²⁴ Nexata bajaraponē naēcota. Jumaitsi:

—Taniji pebijivi pejinavanapaejava. Itsiata saya benetsita naejavanē, jai bajaraponē.

²⁵ Nexata icatsia Jesús itaxutojayata. Bajara jane xaniavaetsia naitaxutobabatsiaya naēcota. Itaxutoxanepana jane baja. Xaniavaetsia baja tane. ²⁶ Nexata Jesús jumaitsi bajaraponējavabelia:

—Naviare nijaboyabelia. Pētsa abaxē poname tomarabelia. Pētsa paebame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¡Xamē raja Cristomē! jai yabara pelivaisi

²⁷ Jesús, pijajivi yajava, najetaruca. Pona pepatsinexa Cesarea de Filipovēnē tomarajumaverena penae-tomaraxijavabelia. Namutua abaxē penajetarubenaevavata Jesús jumaitsi pijajivijavabelia:

—¿Detsa jivi jumai tsabiabi xanē yabara? ¿De tsaeta xanē ponēnē? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamē yabara jumai tsabiabi: “Juan-pijinēmi raeta jivibautisabinēmi icatsia asaē,” jai tsabiabi. Itsamonae pijinia jumai tsabiabi: “Diosojumepabinēmi raeta, profeta Elíaspijinē, ponēmi bajayata ponapona, icatsia asaē,” jai tsabiabi. Itsamonae pijinia jumai tsabiabi: “Bajayata raeta Diosojumepabivimi profetavimiyajuvēnēnē icatsia asaē,” jai tsabiabi xamē yabara, jai Jesús pijajivi.

²⁹ Nexata icatsia Jesús jumaitsi pijajivijavabelia.

—¿Detsa nexata paxamē pajamatabēitsimē xanē yabara? ¿Detsa xanē ponēnē? jai Jesús pijajivijavabelia.

Nexata Pedro jumaitsi Jesúsjavabelia:

—Xamē cajena Cristomē, athēbēvetsica Dioso pecaitorobinētsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaitsi:

—Pētsa bajarapacuenia itsajivijavabelia papaebame. “Cristo raja,” pajamē pētsa xanē yabara, jai Jesús.

Pacuenia Jesús tajēvelia navajunupaeba pebeyaxuabijavanexatsi yabara pelivaisi

³¹ Jesús pebeyaxuabijavanexatsi, tajēvelia navajunupaeba pijajivijavabelia. Jumaitsi mapacueniaje:

—Xanē, Daxitajivi Pematapijinēnē, pinijicuenia bejibinē tsane. Judíovi pijaancianovi, sacerdotevi pena-

matacaitorobivinia, judíovi pecujarubivinia, apo ne-jumecovēnētsi tsane Cristonēcuenenē. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatēpaecujinae, acueyabi matacabi, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsi-paeba mapajumeje. Nexata Pedro junata Jesús pe-barēponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pētsa bajarapacuenia cuaicuaijamē netēpaejavanaxa yabara, jai Pedro Jesúsjavabelia.

³³ Nexata Jesús Pedrovecua napēnēyorotaxuaba. Taenuca pijajivi penaejavabelia. Nexata Jesús napēnēy-orotsi jumai tsanucac Pedrojavabelia:

—¡Dovathi, nevecuanatixire! Tsipaji xamē apo jitsipaemē pacuenia Dioso jitsipa taexanaenexa. Saya ējivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaēto yajava. Jumaitsi bajarapamonaejavabelia:

—Pajivi jitsipa tanepēnaponaevava, bajarapajivi copatsi pejitsipaecuenia pexanaenexa penajamatabēxainabiabijavami. Exanaponaponaevava taitorobicuenia. Najamatabēcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pajamatabēcuenesaē tsaponaponaenexa. Nexata jane baja xuacujinae nepēnaponaena. ³⁵ Pajivi exanaponapona penatojitsipaecuenia, apo xainae tsane matacabi apo peverevereaejava. Pajivi xanē taja-matabēcueneta copata penatojitsipaecuenia pexanabiabijavami, jivi tacapanepaelivaisitanexa pejamatabēcuenetanua, bajarapajivi xainaena matacabi apo peverevereaejava. ³⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneneje, itsiata nacuerata. Tsipaji pexainaecuenē apo capanepae tsanetsi Diosojavabelia.

³⁷ Tsipaji acuenēbi tsane itsajivi ata pematamotsinexa penaxuabianiva Diosovecua. ³⁸ Pajivi tajajivitonē ata, Dioso apo pejumecovēnētsivi tuatuajēta, pibisiacuene pexanaevi tuatuajēta ata, navēnēlivalisicaura tsane xanē tajajivitonēcuenē, tanejumecovēnētsijava ata yabara, nexata juya xanē bajarapajivi, tajajivitonē ata, tajajivitonēcuenē vēnēlivalisicauranē tsane taxa Diosojavabelia. Bajarapajivi vēnēlivalisicauranē tsane pamatacabi icatsia patsianicajē. Baitsi pamatacabi xanē, Daxitajivi Pematapijinēnē, ángelevi yajava, patsianicajē, pamatacabi yajavapatsianicajēnua taxa Dioso pijapenivenivenaecotia, jai Jesús pijajivijavabelia.

9 Icatsia Jesús jumaitsi jivijavabelia:

—Xaniajanē pacuenia pacatsipaebijitsiatsi. Daxita paxamē patēpaenejevamē, Dioso taxuxuabiana pijajivi pevetsijava mapanacuataje. Nexata paxamēyajuvēnēvi pepuatae tsane Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijiamatabēcuenesaēta, jai Jesús jivijavabelia.

Pacuenia Jesús caeepatoyo perabēnivenivenataba yabara pelivaisi

² Jesús petēpaejavanexa tajēvelia penavajunupae-bicujinae, seis pamatacabibejecujinae, Jesús pijajivi, acueyabi ponēbeje, barēpona pinijitsutoxanetojumabetsia. Jesús barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya pinijitsutoxanetojumabetsia. Nexata petsutojumatasia Jesús perabēnivenivena bajarapamonae pitabarata.

³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caējēpaetsi bajarapacuenia peniojaiyaexanaenexa. ⁴ Jesús pijajivi bajarajota tane jemata penaitajēsijava bajayata petēpaenēmibeje, Elíaspijinēbeje Moiséspijinēbeje. Jesús barēcuaijaijaisi bajaraponēbeje. ⁵ Nexata Pedro jumaitisi Jesúsjavabelia mapacueniaje:

—iPatajatuxanenē, pijacuaxae panebarēponame! Pacatoexanaenatsi acueyabi pabobērētoebeje. Itsabobērēto xamēnexa tsane. Itsabobērēto Moisésnexe tsane. Itsabobērēto Elíasnexe tsane, jai Pedro Jesúsjavabelia.

⁶ Bajarapacuenia Pedro jumaitisi Jesúsjavabelia canaējētsinejeva. Tsipaji bitso bajarapamonae najunaviaca. Nexata apo yapētae pacuenia jumaitisijitsia. ⁷ Nexata daxita bajarapamonae pematatsēnēvetsica itarērēbo mataacataxuabatsi. Nexata bajarapamonae jumetane bajarapaitarērēbojavavetsica Dioso pejumaitisijava.

—Mara ponē taxēnato, tasivanēje. Panamuxunae-vere bajaraponē, jaitsica Dioso Jesús pijajivijavabelia.

⁸ Bajarajota bajarapamonae itsa naēcobarēcēpalia Jesúsjavabelia, ajibi baja bajaraponēbeje. Caenē baja Jesús nuca.

⁹ Nexata Jesús pijajivi itsa barērunanucaponaica petsutojumavetsica, jumeitaveta pijajivi. Jumaitisi pijajivijavabelia:

—Pētsa patsipaebame itsajivi ata pacuene pataneme. Matapania xanē, Daxitajivi Pematapijinēnē, icatsia asaēnē tsane tatēpaecujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponēbeje, jumecovēnēta pejumaitisicueniatsi. Itsiata epamonae nayanijobabiba.

—Jesús jumai tsabiabi: “Tatēpaecujinae icatsia asaēnē tsane,” jai tsabiabi. ¿De tsemēra pajamatabēcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaitisi:

—Patajatuxanenē, ¿detsa xuajitsia judíovi pecujarubivi jumai tsabiabi: “Bajayata ponēmi ponapona, Elíaspijinē, petēpaecujinae icatsia asaē tsane. Bajaraponē copiata patsiana. Bajaraxuacujinae patsiana Cristo, ponē Dioso athēbēvetsica itorobijitsiatsica pepo vajanacapanepaenēnexe jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaitisi pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaitisi. Nexata baja xaniajai pacuenia judíovi pecujarubivi jumaitisi. Tsipaji baja Juanpijinē tavajēnaeya jivi jamatabēcuenexanetanetaruca. Xanē, Daxitajivi Pematapijinēnē, athēbēvetsica Dioso nitoroba jivi tacapanepaenexa. Nexata xanē yabara tajēvelia Dioso pejumelivaisibaxutota jumaitisi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanē yabara tajēvelia Dioso pejumelivaisibaxutota, jai Jesús pijajivijavabelia.

¹³ Jesús icatsia jumaitisi pijajivijavabelia Juanpijinēmi yabara:

—Xaniajanē pacuenia pacatsipaebijitsiatsi. Elíaspijinē rabaja patajopa. Pepatsicujinae baja exanatsi daxita pacuenia jamatabēexanatsi. Nexata exanatsi pacuenia baja cajena Dioso pejumelivaisibaxutota tajēvelia jumaitisi bajaraponēmi yabara, jai Jesús pijajivijavabelia Juanpijinēmi yabara.

Pacuenia Jesús jamatejemayaexana pejevaxinē, dovathi peyajavaponaponaenē, yabara pelivaisi

¹⁴ Jesús pijajivi, acueyabi ponēbeje, petsutojumabetsia pebarēponaecujinae, icatsia barēnaviatsica. Itsamonae Jesús pijajivi pepuenetsivijavabetsica, barēnaviatsica. Nexata Jesús tane pijajivi jivibitsaētoxaneto pevajēnae pematatoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. ¹⁵ Nexata bajarapamonae itsa taerēcēpa Jesús, daxita jamatabēcuenebarēyaya cujinaeyeca Jesúsjavabelia pebajacobinexatsi Jesús. ¹⁶ Nexata Jesús jumaitisi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

¹⁷ Caenē bajarapajivi bitsaētoxanetojajuvēnēnē jumaitisi Jesúsjavabelia:

—Jesús, mara picani taxēnatonēyo, dovathi peyajavaponaponaenēyo, catocanajetarucatsije. Maponēyoje dovathi apo netonatsipaebiaexanaetsi. ¹⁸ Itsa raja dovathi vaetababiabatsi, irata xuababiabatsi. Nexata bajarajota pecuiobothamu tsabiabi. Vonoquirajainua tsabiabi. Daxitanēyo aperabēbaba tsatababiabireca. Picani raja nijajivijavabelia jumaitisnē: “Panetovecuacapitsapare dovathi,” janē. Itsiata bajarapamonae apo caējēpaetsi tanetovecuacapitsapaenexa, jai bajaraponē Jesúsjavabelia.

¹⁹ Jesús nexata jumaitisi pijajivijavabelia:

—iPaxamē baja rovia apo pajumecovēnētsimē Dioso papecayavenonaejavanexa! Bajaraxuata apo pacajamatabēcuenecaējēpae pejevaxinē panevecuacapitsapaenexa dovathi. ¿Detsa paepatojebi abaxē paxamējavata ponaponaenajē? ¿Detsa paepatojebi abaxē paxamējavabelia ajamatabēcuenesaēnē tsaponaponaenē tsane patanejumecovēnētsinexamē? Panetocarenamēre pejevaxinē, jai Jesús pijajivijavabelia.

²⁰ Nexata tocarenatsi Jesús pejevaxinē. Dovathi itsa tanetsi Jesús, nexata icatsia bajarajota dovathi peje-

vaxinē tēpajoneyaexanatsi. Irata xuabatsi pejevaxinē. Nexata pejevaxinē natorenaba irata. Pethamu pitsapa pecuibuatsina. ²¹ Nexata Jesús yanijoba pejevaxinē paxajavabelia.

—¿Detsa pamatacabibeje xaina petaxuxuabicujinaet-si mapacueneye? jai Jesús.

Nexata pejevaxinē paxa jumaitsi:

—Penacuetojavaveliacujinae cajena taxuxuabatsi.

²² Bajayajebi picani isotojavalia dovathi netoxuababialiatsi. Menialia ata netoxuababialiatsi. Beyaxuabi-jitsiatsi bajarapacuenia. Xamē ita cacaējēpa itsacuenia ata taneyavenonaenexamē, jnitaxutotsoniataema! jNeyavenonare! jai pejevaxinē paxa Jesúsjavabelia.

²³ Nexata Jesús jumaitsi pejevaxinē paxajavabelia:

—Pajivi jumecovēnēta Dioso peyavenonaejavanexatsi, bajarapajivi Dioso yavenonatsi daxita xua namatavenona, jai Jesús.

²⁴ Nexata pejevaxinē paxa aējai. Jumaitsi:

—jJumecovēnētajē baja cajena! jNeyavenonare bitso orijibia tajumecovēnētsinexa! jai bajaraponē Jesúsjavabelia.

²⁵ Nexata Jesús ita tane jivibitsaētoxaeto penacaetuataponaejava Jesúsjavaberena, nexata Jesús itaveta dovathi. Jumaitsi:

—Dovathi, xamē pejevaxinē apo nenatsipaebiaexanaenē. Apo nejumetaeayaexanaenēnu. Xanē caitave-tatsi. Pitsapare mapapejevaxinēvecuaje. Pētsa baja icatsia junuame matavējēa maponēyojavaberenaje, jai Jesús dovathijavabelia.

²⁶ Nexata dovathi pejevaxinē icatsia aējaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetēpaenēyo. Nexata itsamonae bajarajota jumaitsi:

—Pejevaxinē rabaja tēpa, jai bajarapamonae.

²⁷ Nexata Jesús cobepita pejevaxinē. Cobevaetabiaya yotsina. Nexata pejevaxinē nonotabapuna.

²⁸ Nexata xuacujinae Jesús boya ita joneya, Jesús pijajivi jumaitsi:

—¿Detsa xuajitsia meta paxanē apo panecaējēpae patavecuacapitsapaenexa dovathi? jai Jesús pijajivi.

²⁹ Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejava-je. Matapania panexaejava apo paxaemē tsipae panevajētsinexa asaēyata Diosojavabelia panecapit-sapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajēvelia navajunupaeba pe-beyaxuabijavanexatsi yabara pelivaisi

³⁰ Jesús pejevaxinē dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacuajava. Jesús jitsipa pijajivi pebarēnajetarucaenexa bajaraxuayo itsajivi ata yapētaenejevatsi. ³¹ Tsipaji Jesús pebeyaxuabijavanexatsi, tajēvelia navajunupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabelia. Bajarapamonae nebeyaxu-

abiana. Itsiata baitsi jane tanebeyaxuabicujinae, acueyabi matacabita, icatsia asaēnē tsane, jai tsaponae Jesús pijajivijavabelia.

³² Itsiata pijajivi apo jumeyapētaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

Pacuenia Jesús pijajivi: “¿Detsa ponē vaxaitsiyajuvēnēnē nacavecuayaijamatabēcuenenē bitso?” najai tsanajetarubenaē yabara pelivaisi

³³ Jesús pijajivi barēpata Capernaum tomarata. Jesús pijajivi pebarēpatsicujinae, boyalia ita barējoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubenaē? jai Jesús.

³⁴ Nexata Jesús pijajivi moya. Tsipaji Jesús pijajivi namutua najumaitsi tsanajetarubenaē:

—¿Detsa ponē vaxaitsiyajuvēnēnē nacavecuayaijamatabēcuenenē bitso? najai tsanajetarubenaē Jesús pijajivi.

³⁵ Nexata Jesús eca. Junata pijajivi, doce ponēbeje. Jumaitsi pijajivijavabelia:

—Pajivi jitsipa ayaijamatabēcuenējivi penaexanaenexa daxitajivi matatoxenetsia, bajarapajivi beveliajamatabēcuenējivi natae peyavenonaenexa daxitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinēyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷ —Pajivi copiapita tanejumecovēnētsijiviyo, mapit-sipejevaxinēyo ataje, xanē taniiji tanecopiapitsijava. Pajivi necopiapita, ēxanē apo necopiapitsi. Ponē nitoroba, neyjavacopiapita, jai Jesús pijajivijavabelia.

Pacuenia Jesús jumaitsi pijajivijavabelia ita vēnēlivaisi-tane itsanē dovathi jivivecua pecapitsapaejava Jesús pevēnēta yabara pelivaisi

³⁸ Jesús pijajivitonē, Juan, jumaitsi Jesúsjavabelia:

—Tajatuxanenē, pataniji itsanē nevēnēta dovathi jivivecua pecapitsapaejava. Itsiata bajaraponē apo paxanēyajuvēnēnē. Nexata paitavetajē bajaraponē dovathi jivivecua pecapitsapaponaejava, jai Juan.

³⁹ Nexata Jesús jumaitsi Juanjavabelia:

—Pētsa paitavetame bajaraponē. Tsipaji raja pajivi pinijicuene pexanaejava exana tavēnēta, bajaraxuacujinae acuenēbi bajarapajivi tanebaranatsipaebinexa pibisiacuenia. ⁴⁰ Tsipaji raja pajivi pibisiacuene apo najamatabēxainae vaxaitsijavaberena, bajarapajivi nacamatabēcueneyavenona. Bajarapajivi bevaxaitsijamatabēcuenējivi. ⁴¹ Xaniajanē pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemē, bajarapajivi pepacuene Dioso matamotsianatsi mera papecarajut-simatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi

⁴² Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapit-sipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bajarapajivi bevësicë-tatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi. ⁴³ Bajaraxuata panecobeta pibisiacuene itsa paexaname, panacobecacure. Itsiata xanepana panejonenexa cobemataxucaeya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. ⁴⁴ Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁵ Itsa panetaxuta ata pibisiacuene paexaname, panataxucaeyre. Itsiata xanepana panejonenexa taxumataxucaeya apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. ⁴⁶ Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁷ Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. ⁴⁸ Bajarajota apo tēpae oro, jivivixaevi. Isotocotia ata apo itaxupae caeto ata.

⁴⁹ Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabëcuenexanepanaenexa, daxita Dioso pijajivi ata jamatabëcuenëjëbianatsi mapanacuataje. ⁵⁰ Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamë ata pajamatabëcuenëitsimë tsipae Diosojavabelia, itsa apo pavecuapanepaemë tsipae papecajamatabëcuenë ëjëtaponaejava. Nexata pajamatabëcuenësaëmëre panejamatabëcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

Pacuenia Jesús jivi livaisi tsipaeba penacojobinë pijava pexuabiyaniya yabara pelivaisi

10 Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia

icatsia jivibitsaëtohaneto pata Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetarucaenë. ² Nexata fariseovi Jesús cujibarenatsi petsipaebilivaisi yabara jamatabëcuenëjëbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojobinë pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinë pacaitoroba panijavajivi panexuabiyaniya? jai Jesús.

⁴ Nexata fariseovi jumaitsi Jesúsjavabelia:

—Moiséspijinë tocopata, ponë pijava jamatabëxuba, pexuabinexa. Itsiata baitsi jane Moiséspijinë tocopata, ponë pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponë pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponë pijava jamatabëxuba, Moiséspijinë tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinë raja bajarapacuenia pacatocopata panejamatabëcuenelivaisitajaxae. ⁶ Pamatacabi Dioso taxuxuaba nacia pexanaejava, bajarapamatacabita Dioso exana pebi, pijava yajava. ⁷ Bajaraxuata pebi itsa nacojoba pijavajavabelia, banatsata paxavecua, pena atavecua. ⁸ Nexata Dioso tane anijajivimibeje becaejivi. Nexata Dioso apo tae beanijajivibeje. Becaejivi saya tane Dioso. ⁹ Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

¹⁰ Bajaraxuacujinae Jesús pijajivi pijaepato itsa barënacopata bota, nexata Jesús pijajivi yanijobatsi bajarapacuenë yabara. ¹¹ Nexata Jesús jumaitsi pijajivijavabelia:

—Ponë pijava pexuabicujinae, itsava icatsia itsa pita, bajaraponë pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxë bajaraponë pexuabiva pepo pijavacuenia totanetsi. ¹² Bajara pijinia itsi petiriva ata pamona pevecuanaviatsicujinae, itsanë icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanë jaita pepo pamonavecua, ponë abaxë Dioso totanetsi pamonacuenia, jai Jesús pijajivijavabelia.

Pacuenia Jesús jumaitsi pejevaxijivijavabelia yabara pelivaisi

¹³ Jesúsjavaberena itsamonae pejevaxijivixi tocapataponatsi Jesús pejayataponaeenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús itsa tane bajarapacuenia pijajivi pejumaitsiyava, Jesús jamatabëcuenëanaepanaxuareca. Jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva, xaniavaetsia bajumecovënëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁵ Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Bajara pijinia pacuenia jumeabinejeva, xaniavaetsia bejumecovënëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

¹⁶ Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

Pacuenia pevejëato, bitso pexainaenë, cuaicuaijai Jesúsjavabelia yabara pelivaisi

¹⁷ Pabota Jesús pejevaxijivixi isapitapona, bajara-pabovecua itsajavabelia baja icatsia Jesús ponaеjitsia. Nexata baja Jesús itsa naropotsijitsia, pevejëato cuji-naerucarena Jesúsjavaberena. Jesús pitabarata pe-matabacabëta nucajunua. Jumaitsi pevejëato Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene bexanajë taxainaenexa matacabi apo peverevereaejava? jai pevejëato.

¹⁸ Nexata Jesús jumaitsi pevejëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ¹⁹ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitorobiaya vecuapitame itsajivi pexinaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevejëatojavabelia.

²⁰ Nexata pevejëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevejëato.

²¹ Nexata Jesús asivaya tane pevejëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiovivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabëcueneverere, cabejiobiaexanae ata, cabeyaxuabijitsia atanua tajumelivaisi yabara, nijamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevejëatojavabelia.

²² Nexata pevejëato itsa jumentane bajarapacuenia Jesús pejumaitzijava, najamatabëxainaeya baja vecuapona Jesús. Tsipaji pevejëato daxitacuene bitso

pexainaenë. Nexata pevejëato apo jamatabëjumecovënëtsi palivaisi Jesús tsipaeba.

²³ Nexata pevejëato pecovëta Jesús pijajivi matatoyorotsia naëcota. Jumaitsi:

—iPamonaе bitso daxitacuene pexinaeви, tsi-ayapëbejetsi penajamatabëcuenecopatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

²⁴ Nexata Jesús pijajivi jamatabëcuenenabenajaca itsa jumentane bajarapacuenia Jesús pejumaitzijava. Nexata icatsia Jesús jumaitsi pijajivijavabelia:

—Tajamonae, pamonaе bitso ëpexinaejavanexa najamatabëxaina, bajarapamonaе bitso tsiayapëbejetsi tsane pejonenexa taxa Dioso pijanacuayabetsia.

²⁵ Pacuenia camello ayainëxae, acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

²⁶ Jesús pijajivi itsa jumentane bajarapacuenia Jesús pejumaitzijava, bitso jamatabëcuenenabenajaca. Nexata bajarapamonaе jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexinaeви ata itsa apo panepae tsane Diosojavabelia? jai.

²⁷ Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxinaejavami. Nexata baja pacapënajinavanapatsi, jai Pedro.

²⁹ Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetanua, pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi mata-toxenetsia. ³⁰ Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabiabianatsinua. Itsiata baitsi jane bexëajavabelia xainaena matacabi apo peverevereaejava. ³¹ Pamonaе aeconoxae mapamatacabitaje ayaijamatabëcuenevi tanetsi, bajarapamonaе Dioso beveliajamatabëcuenevi exanaenatsi. Pamonaе pijinia mapamatacabitaje beveliajamatabëcuenevi tanetsi, bajarapamonaе Dioso ayaijamatabëcuenevi exanaenatsi, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

³² Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepënaponaevitsi, jamatabëcuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsiatsi Jerusalén tomarata. ³³ Jumaitsi Jesús tajëvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judfovi pecujarubivinu, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia.

³⁴ Bajarapamonae necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi mat-acabita, icatsia asaënë tsane, jai tajëvelia pijajivijavabelia Jesús penavajunupaebijavata pebeyaxuabijavanexatsi.

Pacuenia Santiagobeje Juanbeje vajëtabeje Jesúsjavabelia pexaniacuene petoexanaenexatsibeje yabara pelivaisi

³⁵ Zebedeo pexënatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë, pacuenia pacavajëtsijitsiatsibeje, bajarapacuenia pajitsipajëbeje patanetoexanaenexamëbeje, jaibeje Santiagobeje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

³⁷ Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuaevetsinexa. Itsanë naecaena necujanenia. Itsanë naecaena netsavenononia, jaibeje.

³⁸ Nexata Jesús jumaitsi:

—Paxamëbeje apo payapëtaemëbeje xua panevajëtamebeje. ¿Pacacajëpabeje tsaja panenacaevetsinexabeje papecabebiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacajëpabeje tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejejavabelia.

³⁹ Nexata Santiagobeje Juanbeje jumaitsibeje:

—Jājā, panecajëpabeje cajena, jaibeje.

Nexata icatsia Jesús jumaitsi Santiagobeje Juanbejejavabelia:

—Paxamëbeje pacabejiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. ⁴⁰ Itsiata baitsi jane

xua panevajëtamebeje panenaecaenexabeje, itsanë tacujanenia, itsanë tatsavenononia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

⁴¹ Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaejavabeje, nexata bajarapamonae jamatabëcuenebaraanaepana Santiagobeje Juanbejejavabelia. ⁴² Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaenë jinavanapa pevetsinacuanëjava. Nexata bajarapanacuanë pevetsivi ayajamatabëcuenevi nataeyabiaba. Xua jamatabëtoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi.

⁴³ Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënë jitsipa ayajamatabëcuene penaxanaenexa daxita paxamëvecua, bajaraponë daxita paxamë bepanijajivitonëcuenia bepacyavenonabiaba. ⁴⁴ Ponë paxamëyajuvënë jitsipa penaxanaenexa papecanamatacaitorobinënexa, bajaraponë daxita paxamë bepanijajivitonëcuenia bepacyavenonabiaba. ⁴⁵ Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëttoxaneto pibisiacuene pexanaeconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana Bartimeo, bitso pitaxutotsëcënaenë, apo petaenë, yabara pelivaisi

⁴⁶ Jesús, pijajivi yajava, pata Jericó tomarabelia. Jesús icatsia, pijajivi yajava, itsamonaenua ayaibitsaëttoxaneto yajava, pitsapa Jericó tomaravecu. Nexata Bartimeovënë, Timeo pexënat, eca namuto muxuneneta. Bartimeo, bitso pitaxutotsëcënaenë, apo petaenë. Jivijavabelia amoneya palata pevajëcabiabinë. ⁴⁷ Nexata Bartimeo itsa jumetane Nazaret tomarapijinë Jesús imoxoyo penajetarucajava, vavajai tsecae.

—jJesús, Davidpijinë pemomomë, nitaxutotsoniataema! jai tsecae Bartimeo.

⁴⁸ Nexata picani itsamonae jumeitavetatsi Bartimeo pemoyanexa. Itsiata bitsoyo orijibia vavajai tsecae.

—jDavidpijinë pemomomë, nitaxutotsoniataema! jai tsecae Jesúsjavabelia.

⁴⁹ Nexata Jesús muxunanucojopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabësaëtaxuare. Nonotapunare. Jesús raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jesúsjavaberena. ⁵¹ Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsëcënaenë, jumaiti Jesúsjavabelia:

—Jesús, jitsipajë taitaxutoxanepanaejava, jai.

⁵² Nexata Jesús jumaiti:

—Ponare baja. Nesivajamatabëjumaitisimë: “Jesús nitaxutoxanepanaeyaexanaena,” nesivajamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitisjavata, Bartimeo baja xaniavaetsia tane. Nexata baja bajaraponë Jesús pepëta napona.

Pacuenia Jesús pata Jerusalén tomarata yabara pelivaisi

11 Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje. ² Jesús jumaiti pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. ³ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

⁴ Nexata Jesús pijajivitonëbeje liabeje. Caxitajabanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

⁵ Nexata bajarajota pejinavanapaevi yanijobatsibeje. —¿Detsa xuajitsia paisinamebeje burro? jaitsibeje.

⁶ Nexata bajaraponëbeje jumaitisibeje pacuenia baja Jesús itorobatsibeje. Nexata tocopatatsibeje pecaponaeenexabeje. ⁷ Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajarapajumata Jesús ecaya. ⁸ Jesús penajetarucaenamutojavarena jivi ayaibitsaëtoxaneto pijacamisajumavelia penaxatabijavanë namutua tsivajënaeyerequejebaponatsi. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayataeya Jesús pecopiapitsinexatsi. ⁹ Jesús penajetarucaejavata jivi ayaibitsaëtoxaneto Jesús pevajënaeya namataxainaeya najetarubena. Itsabitsaëtoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumaiti tsanajetarubena:

—¡Dioso yavenonaenatsi maponë najetarucaje! ¡Vajatuxanenë pejamatabëcueneta najetaruca! ¹⁰ ¡Dioso yavenonaenatsi maponë najetarucaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubena bajarapamonae.

¹¹ Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveeta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higeranae piacuaijibixae yabara pelivaisi

¹² Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucaejavata, piyani. ¹³ Jesús namutovecua tajiyotalia higeranae yabaxua taenuta. Nexata Jesús taeyojopalia bajaraponae pecuai perubenaejava. Itsa Jesús pata bajaraponaejavabelia, ëpebaxu saya tsanucuae. Tsipaji cajena abaxë apo penacuaitsimatatabi. ¹⁴ Nexata Jesús jumaiti higeranaejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitisjava higeranaejavabelia.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinu, yabara pelivaisi

¹⁵ Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxita bajarapamonae Jesús pitsapaeyaexana templobovecua. Palata pecambiabibiabivi ata pijamesanëmi Jesús topënyorobajaraba. Ucucu pecanajetabiabivi ata penabiabijavanëminua topënyorobajaraba.

¹⁶ Jesús apo tocopatsi itsajivi ata itsacuenajava pecaponaenexa templobojava. ¹⁷ Jesús livaisi tsipaeba. Jumaiti bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaiti mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitisjava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judíovi pecujarubivinu, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cjunavatsi Jesús. Tsipaji daxitajivi jamatabëcuenen-

abenajaca Jesús petsipaebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higuerae tēpanuca yabara pelivaisi

²⁰ Jesús pijajivi barēmajita Betania tomarata. Nexata bajayacunua Jesús icatsia, pijajivi yajava, najetaruca pecovēnamutua. Bajarapamonae taenuta higuerae baja petēpanucaejava daxita yatabutopaya. ²¹ Nexata Pedro najamatabēnapita higuerae Jesús pebi-jataenutsijava. Nexata Pedro jumaiti Jesúsjavabelia:

—Tajatuxanenē, jica, taema. Pona higuerae bi-jataenutame, tēpanuca baja. ¿Detsa meta pacuenia tēpa baja? jai Pedro.

²² Nexata Jesús jumaiti pijajivijavabelia:

—Paxamē bitso pajumecovēnēre Dioso papecatoexanaenexa pacuenia pavajētame. ²³ Xaniajanē pacuenia pacatsipaebijitsiatsi. Itsa pajamatabējumaitisimē tsipae Dioso yabara: “Dioso nejumecovēnētsiana xua vajēt-sianajē Diosojavabelia,” itsa pajamatabējamē tsipae, pacajumecovēnētsipa mapatsuto ataje. Nexata itsa pajumaitisimē tsipae mapatsutojavabeliaje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia, pacajumecovēnētsipa. Itsa pajumecovēnētsianame Dioso papecatoexanaejavanexa, itsa panajamatabēxainamenenua Dioso epapecujumecovēnētsijavanexa, xua pavajēt-sianame Diosojavabelia, Dioso pacajumecovēnētsiana. ²⁴ Bajaraxuata pacajumaitisitsi. Daxita xua pavajēt-sianame Diosojavabelia, pasivajamatabējumaitisimē tsane: “Xua vajētajē Diosojavabelia, pepacuene Dioso nejumecovēnētsiana,” pasivajamatabējamēre. Nexata xua pavajēt-sianame Diosojavabelia, Dioso pacajumecovēnētsiana.

²⁵ Itsajivi pibisiacuene papecaexanaejava, pajamatabēcuenecaevare panevajētsijavata Diosojavabelia. Nexata pabarajamatabēcuenexanepanare bajarapajivi. Nexata pijinia paneaxa, athēbētatsia peecaenē, jamatabēcuenecaeviana paxamē ata pitabarata pibisiacuene paneexanaejava. ²⁶ Paxamē it-sa apo pajamatabēcuenecaevimē tsane itsanē pibisiacuene papecaexanaejava, itsa apo pabarajamatabēcuenexanepanaemēnua tsane, nexata pijinia paneaxa, athēbētatsia peecaenē, apo jamatabēcuenecaevi tsane paxamē pitabarata pibisiacuene paneexanaejava. Apo pacabarajamatabēcuenexanepanaenenua tsane, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi

²⁷ Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotevi penamatacaitorobivi, judíovi pecujarubivina, judíovi pijaancianovina, parena Jesúsjavaberena. ²⁸ Nexata bajarapamonae jumaiti Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

²⁹ Nexata Jesús jumaiti bajarapamonaejavabelia:

—Xanē copiaya caejumeyo pacayanijobianatsi. Itsa paxamē panejumecaviatsianame, nexata xanē juya pacatsipaebianatsi ponē nitoroba taexanaenexa bajarapacuene. ³⁰ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? Panejumecanaviare baitsi jane, jai Jesús bajarapamonaejavabelia.

³¹ Nexata epamonae nabarēcuaijai. Najumaiti:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēnētsimē Juanpijinē pepaebilivaisi?” nacajai tsipae. ³² “Jivi raja saya pejamatabēcueneta Juanpijinē jivi bautisabaponapona,” acuenebi vajajijava. Tsipaji mapatomarapijivije ayaibitsaētoخانeto Juanpijinē yabara sivajamatabējumaiti: “Juanpijinē raja pepacuene Diosojumepaebinēmi,” sivajamatabējai. Nexata bajarapamonae nacabejebijitsipa, najai Jesús peyanijobivitsi.

³³ Nexata saya bajarapamonae jumaiti Jesúsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

Nexata Jesús jumaiti bajarapamonaejavabelia:

—Nexata xanē ata apo pacatsipaebi tsanetsi ponē nitoroba taexanaenexa bajarapacuene, jai Jesús.

Pacuenia exana pajamatabēcuenebejevi, itsanē pijauvacabo petoevetsivi, yabara pelivaisi

12 Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaiti mapacueniaje:

—Pijaira pexainaenē pijairata uba ayaibacabaxaneto uvavēnējava. Bajaraxuacujinae pijaira matatoyorotsia ibopanaxanetonē mataropotsia pefaratsijavata yacaranata. Bajarapayacaranatsijava athēbēabetsia apia jivitonē matatoxenetsia. Bajaraxuacujinae irata mēthē cueyeta. Nexata pecueyetsimēthējavata exana uvacuabarēmene pecayujucabiabijavanexa. Bajaraxuacujinae pijauvacabo tuatuajēta exananuta pi-pi-abotsia, penacuaitsimatacabi itsa tonaveretatsi, athēbēyo pevetabiabecaenexa pijauvacabo. Nexata bajaraponē itsamonae evetsiaexana pijauvacabo. Uvacabo pexainaenē jumaiti petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonē itorobiarenajē xua panetotsatsianame tanetopitsinexa,” jai uvacabo pexainaenē petoevetsivitsijavabelia. Nexata uvacabo pexainaenē tajē nacuyabelia pona. ² Itsa baja uvacabo pexainaenē yapētane pecopiapatsijava uvacuai penaveretsimatacabi penotsinexa, nexata uvacabo pexainaenē itoroba pi-

jajivitonë. Itoroba petoevetsivitsijavabelia petsicobetsatsinexatsi. ³ Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. ⁴ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobi-axuabatsi. Pibisiacuenia tobijatanetsi. ⁵ Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae tot-saquibabiatsi. Itsamonae tobeyejebatsi.

⁶ Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaiti: "Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena," jamatabëjaj uvabacabo pexainaenë. ⁷ Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonaenë najumaiti: "Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi. ⁸ Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xubatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

⁹ Icatsia Jesús jumaiti bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja pexainaenë patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

¹⁰ Icatsia Jesús jumaiti:

—Payapëtaneme rabaja pacuenia Dioso pejumelivaisibaxutota tajëvelia jumaiti xanë yabara. Iboti pelivaisicuenia Dioso pejumelivaisibaxutota jumaiti xanë yabara mapacueniaje:

Paiboto itsamonae boexanaevi naitaxutojematabuat-siana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia. ¹¹ Vajatuxanenë Dioso raja exanaena bajarapacuenia. Nexata nacatsita pexaniacuenia bitso tsane bajarapacuenia, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaiti, paxamë apo patanejumecovënëtsijavanexamë yabara jumaiti. Dioso taneitapetsijava daxitajivi tacapanepaenexa yabara ata jumaiti, jai Jesús bajarapamonaejavabelia.

¹² Bajarapamonaenë picani Jesús jamatabëvaetabatsi. Tsipaji bajarapamonaenë jumeyapëtanetsi Jesús pejumaitisijava bajarapamonaenë yabara. Itsiata abaxë apo

vaetabatsi. Tsipaji cujunava jivi. Nexata baja Jesús bajarapamonaenë vecuapona.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonaenë pevetsivitsi itorobatsi livaisi peyanijobinexatsi Jesús. Nexata Jesús bajarapamonaenë bijiaya itsa jumecanaviata, peneconitsinexatsi picani nacuaevevtsinëjavabelia.

¹⁴ Nexata bajarapamonaenë pata Jesúsjavaberena. Bajarapamonaenë jamatabëcueneëjëbiaya jumaiti Jesúsjavabelia:

—Jesús, payapëtaniji cajena nexaniajaicuenia, xua yabara tsipaebabiabame livaisianë. Petuxanevi ata xamë apo cujunavimë. Apo auramë livaisi netsipae-babiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepana tsaja vajamatamotsinexa? jai bajarapamonaenë jamatabëcueneëjëbiaya Jesúsjavabelia.

¹⁵ Itsiata baitsi jane Jesús jamatabëcueneëjëbiaya bajarapamonaenë jamatabëcueneëjëbiaya peyanijobijavatsi peneconitsinexatsi picani. Nexata Jesús jumaiti bajarapamonaenëjavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶ Nexata bajarapamonaenë Jesús tocaponarenatsi palatanëyo. Nexata Jesús jumaiti bajarapamonaenëjavabelia:

—¿Jipatsa mapitabaraje, pevënënu, ruca mapapalatanëyotaje? jai Jesús.

Nexata bajarapamonaenë jumaiti Jesúsjavabelia:

—Romanonacua raja pepo pevetsinë pitabara, pevënënu, jai.

¹⁷ Nexata Jesús jumaiti bajarapamonaenëjavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonaenë jamatabëcuenenabenajaca bajarapacuenia Jesús pejumaitisijavata. Nexata bajarapamonaenë jamatabëjumaiti:

—¿Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

¹⁸ Saduceovi saicaya itsalivaisi xaina. Bajarapamonaenë jamatabëcuenenavëxaniabiaya jumai tsabiabi: "Petëpaevi rabaja petëpaecujinae, icatsia apo asaë tsane," jai tsabiabi. Nexata saduceovi imoxoyorenatsi Jesús. Saduceovi jumaiti Jesúsjavabelia mapacueniaje:

¹⁹ —Jesús, Moiséspijinē bajayata vajanacatoy-aquinaelivaisi, jumaitsi mapacueniaje: “Ponē pematapijinē pepua penacojobinē baja, totēpatsi pexi xainaenejeva, nexata juyapijinē bepita pematapijinēmi pijavami. Bajarapacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. ²⁰ Nexata jinavanapa ēnacaemonae siete ponēbeje. Pepo matapijinē copiaya nacojoba. Nexata bajaraponē pijava vecuatēpa pexi xainaenejeva. ²¹ Nexata pematapijinēmi pepēnarucaenē pita pematapijinēmi pijavami. Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatujēmatapijinē pita bajarapova. Bajaraponē ata icatsia tēpa pexi xainaenejeva bajarapovajavabelia. ²² Bajarapacuenia tēpa daxita siete ponēmibeje nacaemonae, bajarapova pepitaponaevi. Itsiata itsanē ata pexi apo xinae bajarapovajavabelia. Bajaraxuacujinae belia bajarapova ata tēpa baja. ²³ “Jivi raja petēpaecujinae, Dioso icatsia asaēyaexanaenatsi,” jamē. ¿Detsa nexata ponē, bajarapamonaeyajuvēnēnē, pijava tsane bajarapova bajarapamatacabi? Daxita pamona siete ponēmibeje, nacaemonae, pitapona picani bajarapovami, jai saduceovi Jesúsjavabelia.

²⁴ Nexata Jesús jumaitsi saduceovijavabelia:

—Paxamē saya pajamatabēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēnua pacuenia Dioso caējēpatsi daxitacuene pexanaenexa. Bajaraxuata jamatabēcuenenavēxaniabiaya paneyanijobame: “¿Detsa ponē pitsiana bajarapova?” panejamē. ²⁵ Pamatacabi raja petēpaevimi Dioso icatsia asaēyaexanaenatsi, apo nacojobi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojobinexatsi. Bajarapamona nacojobinejeva, jinavanapaena athēbētatsia pacuenia āngelevi jinavanapa. ²⁶ Itsa pepacuene paxamē paneyanijobame Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Moiséspijinē peyaquinaebaxutota jumaitsi. Bajarapabaxutota jumaitsi pacuenia Moiséspijinē Dioso barēcuaicuajitsi tsiquirinaemēyo petajueyecaecotiajavaverena. Abraham baja pepuatēpae, Isaac ata baja pepuatēpae, Jacob ata baja pepuatēpae, bajarapamona yabara bajayata Dioso jumaitsi Moiséspijinējavabelia mapacueniaje: “Xanē rabaja abaxē Abraham pijaDiosonē, Isaac ata pijaDiosonē, Jacob ata pijaDiosonē,” jai Dioso Moiséspijinējavabelia bajayata petēpaevimi yabara. ²⁷ Bajarapacuenia Dioso pejumaitsixae, nayapētane bajarapamona bajayata tēpae ata, Diosovecua apo penaxuabijava. Aeconoxae ata bajarapamona Dioso yajavajinavanapa athēbētatsia. Nexata paxamē itsa pajumaitsimē: “Petēpaevi rabaja petēpaecujinae, icatsia apo asaē tsane,” itsa pajamē, pinijicuenia paja-

matabēcuenenavēxaniabame, jai Jesús saduceovijavabelia.

Palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia yabara pelivaisi

²⁸ Judfovi pecujarubinē pata Jesúsjavaberena. Nexata bajaraponē Jesús jumetanetsi xaniavaetsia pejumecanaviataponaejava saduceovijavabelia. Nexata judfovi pecujarubinē jumaitsi Jesúsjavabelia:

—¿Detsa palivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia? jai.

²⁹ Jesús nexata jumaitsi judfovi pecujarubinējavabelia:

—Palivaisi bitso jivi bejumecovēnēta, daxita Dioso pitorobilivaisianē pejumecovēnētsijava matatoxenetsia jumaitsi mapacueniaje: “Paxamē, Israelpijinē papepomoximē, pajumetaema. Vajatuxanenē rabaja caenē Dioso. ³⁰ Bajaraponē panijatuxanenē, panijaDioso, daxita panejamatabēthētojavavetsina pasivamēre. Pasivamēre daxita panejamatabēcueneta ata, daxita panesaēta ata,” pejailivaisi bitso jivi bejumecovēnēta daxita Dioso pitorobilivaisianē pejumecovēnētsijava matatoxenetsia. ³¹ Bajaraxuacujinae pecotocaevilivaisi, palivaisi bitso jivi bejumecovēnēta, jumaitsi icatsia mapacueniaje: “Pasivamēre itsajivi ata pacuenia paxamē panijacuata panaasivamē,” jai. Bajarapalivaisi ata jivi bitso bejumecovēnēta. Ajibi rabaja itsalivaisi pematatsēnēa, Dioso pitorobilivaisi, palivaisi bitso jivi bejumecovēnēta,” jai Jesús judfovi pecujarubinējavabelia.

³² Nexata icatsia judfovi pecujarubinē jumaitsi Jesúsjavabelia:

—Jesús, xaniajamē rabaja pacuenia jumaitsimē. Caenē tsaena Dioso ponapona. Ajibi tsaena pematatsēnēa itsanē Dioso. ³³ Bejumecovēnētatsi Dioso daxita vajajamatabēthētojavavetsina, daxita vajanajamatabēxainaesaēta ata, daxita vajasaēta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovēnētatsi, bitso nacatonamata-mota Diosojavabelia. Bajaraxua bitso nacatonamata-mota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judfovi pecujarubinē Jesúsjavabelia.

³⁴ Jesús itsa jumetane judfovi pecujarubinē xaniavaetsia pejumecanaviatsijavatsi, nexata Jesús jumaitsi judfovi pecujarubinējavabelia:

—Tsiquirijavayo catosaica Diosojavabelia nenajamatabēcuenecopatsinexa nijatuxanenē Dioso nexanaenexa, jai Jesús judfovi pecujarubinējavabelia.

Bajaraxuacujinae daxitajivi baja Jesús cjunavatsi. Nexata baja Jesús jivi jamatabēcuenējēbiaya livaisi apo yanijobitsi.

Pacuenia Jesucristo yabara Davidpijinë bajayata tajëvelia: "Tajatusanenë," jai, yabara pelivaisi

³⁵ Jesús livaisi tsipaeba templobota. Jesús pijacuata nayabarajumaisi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsiatsica jivi pecapanepaenexa? Bajapamonae saya jamatabëcuenenavëxaniabiaya jumai tsabiabi Cristo yabara: "Cristo raja itsa patsiana, Davidpijinë pemomo tsane," jai tsabiabi. ³⁶ Davidpijinë bajayata Espiritu Santo pejamatabëcueneta tajëvelia jumaisi Cristo yabara mapacueniaje:

Dioso jumaisi tajatusanenëjavabelia: "Ecare abaxë tacujanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa," jai Dioso tajatusanenëjavabelia, jai bajayata tajëvelia Davidpijinë mapacueniaje Cristo yabara.

³⁷ Nexata Davidpijinë bajayata Cristo yabara: "Tajatusanenë," itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivi pecanaëjëtsinexa Cristo Dioso pexënatocuene.

Nexata jivibitsaëtoxaneto Jesús pejumetaevitsi jumebarëyatanetsi.

Pacuenia Jesús jumaisi jivijavabelia: "Judíovi pecujarubivi bitso pinijicuenia Dioso naneconitsiaexanaenatsi," jai yabara pelivaisi

³⁸ Jesús jivi ayaibitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaisi mapacueniaje:

—Xania, panayajivitaema, palivaisi judíovi pecujarubivi tsipaeba, panejumecovënëtsianiva. Bajapamonae jitsipabiaba tomara tuatujëjava piapiajavanë penaxatabiabanapaenexa jivi peyaiyataenexatsi. Jitsipabiabanua bitso yayiyataeya pebacobinexatsi callejava. ³⁹ Bajapamonae itsa najoneyabiaba judíovi penacaetuatabiabinëjava, jitsipabiaba penaenexa pexaniavirijavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. ⁴⁰ Bajapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajapamonae itajara pinijicuenia vajëcabiaba Diosojavabelia. Itsiata pepo pexaniajijamatabëcueneta apo vajëcabiabi. Bajapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovënëtsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona. ⁴² Bajarajota napata pamona pevecuatëpaevatsi, bepejiobiva. Nexata bajarapova najia anijapalatanëyobeje piamatamobinëyobeje. ⁴³ Nexata Jesús junata pijajivi. Jumaisi pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenenarëya daxita xua itsamonae jia bajarapacajonita matatoxenetsia.

⁴⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi

13 Itsa baja Jesús, pijajivi yajava, pitsaparena templobovecua, Jesús pijajivitonë jumaisi Jesúsjavabelia:

—¡Tajatusanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

² Nexata Jesús tajëvelia jumaisi pijajivitonëjavabelia: —Daxita raja mapaboxanetonë tanemeje, bajarapoboxanetonëmi itsamatacabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo bocae tsane, jai Jesús tajëvelia pijajivitonëjavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

³ Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabëxëyo pijaepatojavata Jesúsjavabelia jumaisi:

⁴ —Patajatusanenë, pajiitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaisimë templobo yabara? jai bajarapamonae Jesúsjavabelia.

⁵ Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús jumaisi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁶ Tsipaji raja

peyamaxëitojorobivnexa ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaibitsaëto yamaxëitojorobiana.

⁷Vjabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepïjia bajarapamatacabi mapanacuaeje abaxë apo vereverecajuni tsane. ⁸Mapanacuaeje pevereverecaevajënae peneta copiaya itsaviriavi nabena itsaviriavijavabelia. Itsanacuanëpïjivi pijinia nabena itsanacuanëpïjivijavabelia. Ira najëabiana ayaicuenia nacuanëjava. Ayaicuenia bitso jivi bejiobi tsane nacuanëjava. Daxita bajara pacuene itsa pataename, saya abaxë taxuxuabaponæna piyayacuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacua.

⁹Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana. Bajarapamonae pacajumaconibabeyabiabiana judíovi penacaetuatabibonëta. Paxamë patajajivixaemë pacanubiana nacuaevetsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanë talivaisi. ¹⁰Nexata daxitanacuanëpïjivijava patsipaebanajetarubenaename pecapanepaelivaisinexatsi.

¹¹Itsa pacataicaena papecaneconitsinexa nacuaevetsivijavabelia, pëtsa pajamatabëcuenebëjamë panayajivicuacuajainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tsipaji raja bajarapaepatota Espíritu Santo pacacuaicuajiaexanaena. Paxamë baitsi panejamatabëcueneta apo pacuaicuajiamë tsane. ¹²Bajarapamatacabi patajajivixaemë, panacaemonæe atamë, itsajivi panijamonæejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. ¹³Daxitajivi pacaitoya tsane patajajivixaemë. Itsiata pajivi ajamatabëcuensaë tsane Dioso pejumecovënëtsijava nacua pecopiarucaejavabelianexa, bajarapajivi Dioso capanepænatsi, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

¹⁴Icatsia Jesús tajëvelia vajunupaeba papiyacuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepæbinëmi, profeta Danielpïjinë, tajëvelia Dioso pitorobicueniatsi piyayacuene pevajunupaebilivaisi bajayata yaquina. Xua panijatomaranëmi vereverecaeyæxanaejitsiatsi, bajaraxua

pelivaisi yaquina. (Pajivi lebiana mapalivaisije, yapëtaena papiyacuene vajunupaeba mapalivaisitaje.) Nexata paxamë pataename bajarapapiyacuene penucaejava templobota, itsajota picani apo benucae. Nexata Judea nacuaata pejinavanapævi itsa vënëlivaisitaena bajarapapiyacuene penucaejava templobota, pëtsa nubena. Naxanitsiayo bajarapamonæe rëcëpecaena ibotsutonëjavabelia. ¹⁵Pajivi pijabojumata athëbëyo ecaya, itsa vënëlivaisitaena bajarapapiyacuene penucaejava templobota, bajarapajivi perunaecujinaetsica bepïjia najetabajiraviana. Pëtsa joneya pijaboyalia pejutsinexa pecobecovë. ¹⁶Pajivi pijinia nacuenabaponapona pijapabita, itsa vënëlivaisitaena bajarapapiyacuene penucaejava templobota, bepïjia najetabajiraviana. Pëtsa naviata pijaboyabelia pejutsinexa penaxatabijava. ¹⁷¡Papetiriavi penacuetoyacotajinavapana, bitso bejiobi tsane bajarapamatacabi! ¡Bitso nabejiobitsiaya jinavanapæna! ¡Papetiriavi ata mitopaenacuetoxi isajinavapana, bitso bejiobi tsane bajarapamatacabi! ¹⁸Bajaraxuata tajëvelia Diosojavabelia pavajëcare piyapëbejematacabitapaecatocopiapatsiyaniva bajarapapiyacuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponæyaniva. ¹⁹Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonæe bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapæmatacabi-anëminexa, bitso jivi nabejiobitsiaya pejinavanapæyaniva. ²⁰Dioso epatua itsa apo yatuucutsi tsipae bitso jivi nabejiobitsiaya pejinavanapæmatabianëminexa, caejivi ata apo asaë tsipae. Itsiata baitsi jane Dioso piæivaxæe pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapæmatabianëminexa, jai Jesús pijajivijavabelia tajëvelia pevajunupaebijavata papiyacuene itsamatacabi copiapatsijitsia Jerusalén tomarata.

²¹Icatsia Jesús tajëvelia vajunupaeba pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. ²²Itsamonæe jumai tsane: “Xanë raja Cristonë,” jai tsane. Itsiata jemajai tsane. Itsamonæe jumai tsane: “Diosojumepæbinëne raja, profetanëne,” jai tsane. Itsiata jemajai tsane. Bajarapamonæe itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonæe yamaxëitojorobaponaenatsi. Itsiata pamonæe pepacuene Dioso pijajivi, Dioso pitapetsivitsi, bajarapamonæe apo yamaxëitojorobi tsanetsi. ²³¡Xania

baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

²⁴ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavacuene. Jivi nabejobitsiaya jinavanapaena. Nexata jivi nabejobitsiaya pejinavanapaematacabicujinae matacabi pijiuameto aitaquiri tsane. Meravipijiuameto ata aitaquiri tsane. ²⁵ Tulupu ata othopaenica irabetsica. Daxitacuene, xua rubena athëbëtatsia, najëbianana. Xaniavaetsia apo rubenae tsane. ²⁶ Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucajava. Patsianicajë daxitacuene taevetsinexa. Tanivenivenaecotia yajavapatsianicajë. ²⁷ Bajaraxuacujinae ángelevi itorbiana, pamona tajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. ²⁹ Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaneme imoxoyo baja tavajënae tsane tapatsijavanexatsica. ³⁰ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena. ³¹ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica. ³⁴ Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanexatsi pecovëta. Nexata pijajiviyajuvënënë itoroba baupa pevetsinënexa petoetabibinexatsi pijabobaupa. Bo pexainaenë jumaitsi bajaraponëjavabelia: “Xaniavaetsia netoetabibianame baupa matapania tapatsimatacabijavabelianexa,” jai bo pexainaenë. ³⁵ Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatujëta ata patsipajë. Matacabivëpata ata patsipajë. Bajayacunua ata patsipajë. ³⁶ Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë, pacacaxitajarabijitsipatsi panemajitsijavata. ³⁷ Palivaisi pacatsipaebatsi paxamëjavabelia, daxitajivinexa jumaitsinë. ¡Daxitamatacabi saya panecopiaevetavanapaename! jai Jesús pijajivijavabelia.

Pacuenia picani Jesús pijavajabitsaë jamatabëvaetabatsi yabara pelivaisi

14 Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva pexanaepan. Nexata bajarapafiestabejevajënaeya, sacerdotevi penamatacaitorobivi, judíovi pecujarubivinua, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabëvaetabatsi Jesús pebeyaxuabinexatsi. ² Itsiata bajarapamonae najumaitsi: —Fiestajava meta abaxë apo vaetabi tsanetsi jivi vanacaitsacueniabianiva, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

³ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaceitera. ⁴ Bajarajota itsamonae penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata epamonae najumai tse-nae:

—¿Detsa xuajitsia saya xuaba bajarapacuenia maporaje? ⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapala-

ta rajutsipa bepejiobivi bajarapacuenia peyavenon-aenexa, najai tsenae epamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ⁷ Daxitamatacabi raja bepejiobivi jivananapa itsaxuayo pajinavanapame. Pamatacabi pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatacabi apo ponaponanë tsane paxamëjavata. ⁸ Mara papetirivaje pexaniacuene netoexana pacuenia baja cuenecaëjèpatsi. Itsamonae petèpaejivi batsiperabèepana petuxujuviaceitera peperabèxaniavaetsinexa pemèthètsivajènae. Bajara pijinia pacuenia mapovaje netsimataepana petuxujuviaceitera, abaxè apo tèpae atanë. Nexata baja bajarapova neperabèxaniavaeta itsamonae tanemèthètsivajènae. ⁹ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

¹⁰ Jesús pijajivi doce ponèbejeyajuvènènë pevènë Judas. Itsavènë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. ¹¹ Nexata sacerdotevi penamatacaitorobivi itsa tane bajarapacuenie, barèya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxuto-caevetaponaponatsi. Nexata paepatota Judas toyapèxanepanatsi, perajutsinexa jane baja bajarapamonae pecobeyabelia.

Pacuenia Jesús barè nabane pijajivi pecopiarutsinabani baja pebeyaxuabivajènaetsi yabara pelivaisi

¹² Junua jane baja fiesta, pafiestajava judíovi baxane levadurata matajèrèabinejeva pexanaepan. Bajarapamatacabi ovejaxi babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponanajè patacamitsaexanaenexa pascua fiestamatacabi pexaejava nexaenexa? jai Jesús pijajivi.

¹³ Nexata Jesús itoroba anijanèbeje pijajivitonèbeje. Jumaitsi:

—Tomarabelia paponarebeje. Bajarajotalia pacaxitarabianamebeje mera canalito pecanajetaruaenë. Bajaraponë papènanajetaruaenamebeje. ¹⁴ Pabota bajaraponë joneyojopaena, bajarapabo pexainaenëjavabelia pajumaitsimèbeje tsane: “Vajanacacujarubinè raja jumaitsi: ‘¿Detsa jota pènèyatuucutsibo eca,

pabota tajajivi barèxaejitsianë xua jivi baxane pascua fiestamatacabi? jai raja vajanacacujarubinè,” pajamèbeje tsane bajarapabo pexainaenëjavabelia.

¹⁵ Nexata athèbèabetsia anijairabeje pènèyatuucutsibojavata, pacatsitajètsianabeje. Bajarapaboënèta athèbèyotsia paira ayaiènètuatuajè tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonèbejejavabelia.

¹⁶ Nexata jane baja ponabeje Jesús pijajivitonèbeje. Patabeje baja tomarabelia. Caxitajarababeje daxita pacuenia Jesús jumaitssibeje. Nexata xua jivi baxane pascua fiestamatacabi daxita Jesús pijajivi pebarèxanexa, bajaraponèbeje exanabeje jane baja.

¹⁷ Itsa baja meravitsia, Jesús patajopa bajarajota pijajivi, doce ponèbeje, yajava. ¹⁸ Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamèyajuvènènë, xanèjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹ Nexata Jesús pijajivi bejamatabèjibireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanè tsaja tsane? jai tsaponae Jesús pijajivi.

²⁰ Nexata Jesús jumaitsi pijajivijavabelia:

—Doce paponemèbejeyajuvènènë raja. Ponèbeje peneta caecuenia panajuacajabutsianajèbeje panbè platojavabelia, bajaraponè tsane. ²¹ Nexata xanë, Daxitajivi Pematapijinènë, tèpaenajè pacuenia baja cajena xanë yabara Dioso pejumelivaisibaxutota tajèvelia jumaitsi. Itsiata ponè tajavajabitsaë pecobeyabelia necanajetsiana, bajaraponè bitso bejiobi tsane pini-jicuenia. Itsa meta bajaraponè apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponè itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²² Nexata pexaeyenaejavata Jesús pita panbè. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsènèquejeba bajarapapanbè.

Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³ Bajaraxuacujinae icatsia Jesús copavènèjavata yapita pijajivi pebarèapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

²⁴ Jesús pijajivijavabelia jumaitsi:

—Tajana raja othopaena jivi ayaibitsaètoخانeto pecapanepaenexatsi. Nexata tatèpaejava pejamatabècueneta, jivi yapètaena pepacuene xaniajai Dioso jivi pecapanepaejavanexa, pacuenia baja cajena tajèvelia Dioso najumecapanepaeya jumaitsi. ²⁵ Xaniajanë pacuenia pacatsipaebijitsiatsi. Xanë rabaja

matavějēa apo apaenē tsane uvacuaira mapanacuataje, matapania icatsia apaenajē Dioso pijanacuatsia pejanauvacuaira, jai Jesús pijajivijavabelia.

Pacuenia Jesús tajēvelia jumaiti Pedrojavabelia: “Pedro, xamē raja nayavajunuaxainaename tajajivitonēcuenemē,” jai, yabara pelivaisi

²⁶ Jesús pijajivi barēnaxēana Diosojumevajianē. Bajaraxuacujinae Jesús pijajivi barēpona petsutojumabelia. Patsutojumata olivonaenē apaaxayo, bajarapatsutojumabelia barēpona. ²⁷ Nexata bajarapatsutojumata Jesús jumaiti pijajivijavabelia:

—Daxita raja paxamē ajena, pameravi, panexuabarēcēpecaename. Tsipaji rabaja patanexuabarēcēpecaejavanexamē yabara, Dioso pejumelivaisibaxutota tajēvelia jumaiti mapacueniaje: “Beyaxuabianatsi raja oveja pevetsinē. Nexata pijaovejabitsaēto nacayajatsia rēcēpecaena,” jai Dioso pejumelivaisibaxutota paxamē patanexuabarēcēpecaejavanexamē yabara. Nexata ajena, pameravi, tajavajabitsaē itsa nevaetabiana tanebeyaxuabinexa, daxita paxamē panexuabarēcēpecaename. ²⁸ Itsiata baitsi jane tatēpaecujinae icatsia asaenē tsane. Nexata paxamē panevajēnaeyabelia copiata ponaenajē Galilea nacuyabelia, jai Jesús pijajivijavabelia.

²⁹ Nexata Pedro jumaiti Jesúsjavabelia:

—Daxita mapamonaēje caxuabarēcēpecae ata tsane, xanē cajena apo caxuabatabajiravi tsanetsi, jai Pedro.

³⁰ Nexata Jesús jumaiti Pedrojavabelia:

—Xaniajanē pacuenia catsipaebijitsiatsi. Ajena rabaja, pameravi, naniaaevēpata, anijajumebeje vacara pefiabivajēnaeya, nayavajunuaxainaename tajajivitonēcuenemē. “Apo yapētaenē cajena bajaraponē,” jamē tsane xanē yabara acueyabi xuabeje, jai Jesús Pedrojavabelia.

³¹ Itsiata Pedro ajumesaēya jumaiti Jesúsjavabelia:

—Nebeyaxuabijitsia ata tsane xamē yajava, itsiata cajena apo nayavajunuaxainaenē tsane nijajivitonēcuenenē, jai Pedro Jesúsjavabelia.

Daxita Jesús pijajivi bajarapacuenia jumaiti.

Pacuenia Jesús vajēta Diosojavabelia Getsemanívēnējavata yabara pelivaisi

³² Jesús, pijajivi yajava, pata Getsemanívēnējavata. Bajarajota Jesús jumaiti pijajivijavabelia:

—Paneevetenare abaxē majotaje tavajētsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabēxēyo, Jesús barēpona pesaicaeyojavabelia. Bajaraxuacujinae Jesús bitso najamatabēxaina. Nexata bejamatabējiobireca. ³⁴ Nexata Jesús jumaiti pijajivi acueyabi ponēbejejavabelia:

—Xanē bitso pinijicuenia najamatabēxainajē. Nexata tanajamatabēxainaejava yatēpaejitsianē. Paxamē abaxē majotaje panacopabare. Paitavamē tsane. Pētsa pamajitame, jai Jesús pijajivi acueyabi ponēbejejavabelia.

³⁵ Nexata Jesús, caenē, pevajēnaeyabelia icatsia tsiquirijavayo ponataba. Tsipaji Jesús tajēvelia yapētane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaē beyaxuabijitsiatsi. Nexata Jesús irataeya bocajunua pevajētsinexa Diosojavabelia. Vajēta picani Diosojavabelia bitso bejiobitsiaya pebeyaxuabianivatsi. ³⁶ Nexata Jesús pevajētsijavata Diosojavabelia, jumaiti:

—Taxa Diosomē, netocopatame picani tanebeyaxuabinexa betajibicueneta. Daxitacuene raja cacajēpa nexanaenexa. Nexata necapanepare bajarapabejiobicueneneveca. Itsiata xanē apo tajitsipaecuene ata, pacuenia xamē jitsipame, netocopatsianame, jai Jesús pevajētsijavata Diosojavabelia.

³⁷ Bajaraxuacujinae Jesús naviarena acueyabi ponēbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaiti Pedrojavabelia:

—Simón, ¿pamajitanubename tsaja? ¿Apo pacacajēpae tsabaja rovia caeepatoyo ata paneaitavatse-naenexa? ³⁸ Pētsa pamajitame. Paitavamē. Pavajēre Diosojavabelia pibisiacuene paneexanaeyaniva. Tsipaji raja dovathi pacajamatabēcuenēējēbiana. Paxamē picani panejamatabēcueneta pexaniacuene jamatabēpaexanabiabame. Itsiata baitsi jane apo pajamatabēcuenesaēmē pexaniacuene paneexanaenexa, jai Jesús Pedrojavabelia.

³⁹ Nexata icatsia Jesús pona pecovēyabelia pevajētsinexa icatsia Diosojavabelia. Bajara icatsia pacuenia Jesús vajēta Diosojavabelia pacuenia vajēta copiata. ⁴⁰ Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapētae pacuenia jumecanaviatsijitsia Jesúsjavabelia. ⁴¹ Icatsia abaxē Jesús naviata pecovēyabelia pevajētsinexa icatsia Diosojavabelia. Bajaraxuacujinae, acueyabi baja xuabeje pevajētsicujinae, Jesús icatsia rena pijajivijavaberena. Jumaiti Jesús pijajivijavabelia:

—¿Abaxē tsarovia tsiteca pamajitanubename? Ajibi rabaja. Copiapata rabaja paepatota xanē, Daxitajivi Pematapijinēnē, necanajetsijitsia pibisiacuene pexanaevi pecobeyabelia. ⁴² Panonobapunare baja. Ponaenatsi baja. Imoxoyo rabaja najetaruca tajavajabitsaē pecobeyabelia tanecanajetsinēnexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaē yabara pelivaisi

⁴³ Jesús pijavajabitsaē pevaetabijavatanexatsi, cuaicuaijai tsanucacae pijajivijavabelia. Nexata bajarapaepatota patanajetaruca Judas, Jesús pijajivi doce ponēbejeyajuvēnēnēmi. Judas pēnanajetarubenatsi jivi ayaibitsaētoخانeto. Bajarapamonaeyajuvēnēvi itsamonae canajetarubena espadanē. Itsamonae canajetarubena naebonē yajava. Bajarapamonaē itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴ Judas pebarērenavajēnae bajarapamonaē, copiaya baja cajena Judas tsipae-

ba pacuenia bajarapamonae yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexu-abianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pe-barërenavajënae.

⁴⁵ Nexata jane baja Judas ita patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene. ⁴⁶ Nexata jane baja Jesús pijavajabitsaë vaetabatsi. Cobecëtsia xaniavaetsia.

⁴⁷ Bajarajota Jesús pijajiviyajuvënënë pijaespada navemarajonotaxuabina. Muxuyoropaebiaxuaba sacerdotevi pepo penamatacaitorobinë pijajivitonë.

⁴⁸ Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁴⁹ Xanë caematacabi canacujitsia Dioso pejumelivaisi paxamëjavabelia pacatsipaebababatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevëjëato najetabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonae yasábanavaetabatsi. ⁵² Nexata pevëjëato sábanana isonaxuaba. Najetabajirava jumasanë.

Pacuenia Jesús nutatsi judíovi penamatacaitorobini pitabarata yabara pelivaisi

⁵³ Jesús caponaliatsi sacerdotevi pepo penamatacaitorobinë pijaboyabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ënëtuatujëta sacerdotevi penamatacaitorobivi, judíovi pijaancianovi ata yajava,

judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi. ⁵⁶ Itsamonae saya penajumetsënëtsilivaisi paeba Jesús yabara. Itsiata caelivaisi najuapaebi ata, najumejëpaeya apo paebi bajarapamonae. ⁵⁷ Itsamonae nonobapuna. Penajumetsënëtsilivaisi paeba Jesús yabara. Penonobapunaeviyajuvënënë jumaitsi mapacueniaje:

⁵⁸ —Paxanë raja, pamatabëxëyo panubenajë majotaje, pajumetaniji Jesús pejumaitsiyava. Bajaraponë jumaitsi: “Xanë raja xuabianicajë mapatemploboje, jivi pexanaebo. Acueyabi matacabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënënë.

⁵⁹ Itsiata daxita bajarapamonae najumejëpaeya apo paebi.

⁶⁰ Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaitsiye? jai Jesúsjavabelia sacerdotevi pepo penamatacaitorobinë.

⁶¹ Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinë jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

⁶² Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxitajivi Pematapijinënë, taecaejava Dioso pecujuanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërëbota, jai Jesús.

⁶³ Bajarapacuenia Jesús pejumaitsiyava ita jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsiyava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Pijacuata rabaja pejumaitsiyumeta naneconita. Pematatsënëa apo namatavenonaetsi itsamonae vanacatsipaebinexa paneconi yabara maponëje naneconitsiaexanaejitsiatsi. ⁶⁴ Paxamë rabaja pajumetaneme maponëje Dioso apo pejitsipaecuenia pecuaicuaijaiyava. Tsipaji Dioso bepexënato nataeya cuaicuaijai. ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁵ Nexata bajarapamonae yajuvënëvi Jesús itabara-suabatsi. Bajaraxuacujinae papaëbërëpanata itaxu-

tocētatsi. Pitaxutocētsicujinaetsi itabarat-saquibabeponatsi pecobethaitonēta. Nexata bajarapamonae jumai tsaponae Jesúsjavabelia:

—Vēnējonare ponē caitabaratsaquibabepona! jai tsaponae bajarapamonae.

Bajaraxuacujinae templobopijipolicíavi itabara-pacabi axuabatsi Jesús.

Pacuenia jane baja Pedro nayavajunuaxaina Jesús pija-jivitonēcuene yabara pelivaisi

⁶⁶Itsa abaxē Jesús sacerdotevi pepo penamata-caitorobinē pijabo ēnētuaajēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamata-caitorobinē pijabota penacuenebiva. ⁶⁷Bajarapova Pedro taeyetatsi penanonopecaejavata. Nexata bajarapova naitaxutobabatsia asaēya taenucatsi Pedro. Jumait-sitsi:

—Xamē ata rabaja naponaponame Jesúsata, Nazaret tomarapijinēta, jaitsi.

⁶⁸Nexata Pedro itsiata nayavajunuaxaina Jesús pija-jivitonēcuene. Nexata Pedro jumait si bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuene yabara nejumait simē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹Icatsia bajarapova Pedro tanetsi. Nexata pamona bajarajota nubena, bajarapamonaejavabelia bajarapova jumait si:

—Mara ponēje Jesús pijajiviyajuvēnēnēje, jai bajarapova Pedro yabara.

⁷⁰Icatsia nexata Pedro jumait si:

—Jume raja. Apo yapētaenē cajena bajaraponē, jai. Bajaraxuacujinae, icatsia caepatoyocujinae, bajarajota penubenaevi Pedro jumait si:

—Xaniajai raeta baja cajena. Xamē Jesús pijajiviyajuvēnēnēmē. Tsi paji rabaja Galilea nacuapijinēmē. Galilea nacuapijivi pecuacuaijaicuenia cuacuajamē, jaitsi.

⁷¹Nexata Pedro pejumexaniataenexatsi, ajumesaēya jumait si:

—Itsa apo xaniajanē tsipae paxamējavabelia, nexata Diosojavabelia naneconitsipajē. Apo yapētaenē cajena ponē yabara panejumait simē, jai Pedro.

⁷²Itsa baja Pedro najumevereta bajarapacuenia pejumait sijava, vacara icatsia fiaba. Nexata bajarajota Pedro najamatabēnapitajaraba pacuenia Jesús jumait si: “Anijajumebeje vacara pefiabivajēnaeya, nayavajunuaxainaename tajajivitonēcuenemē. ‘Xanē cajena apo yapētaenē bajaraponē,’ jamē tsane xanē yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabēxaina Jesús pejumait sijumetsi yabara. Pedro nexata nua.

Pacuenia Jesús nutatsi Pilato pitabarata yabara pelivaisi

¹⁵Ajena baja matababi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsēnēa itsamonae bajarapitsijamatabēcuenevi yajavanacaetuata penabarēcuacuajainexa. Bajaraxuacujinae bajarapamonae Jesús cobecētsiaya caponaliatsi nacuaevetsinē Pilatojavabelia. ²Nexata Pilato yanijobatsi Jesús.

—¿Xamē tsaja judíovi pepo nevetsinē? jaitsi.

Nexata Jesús jumait si Pilatojavabelia:

—Jājā, xanē rabaja pacuenia nejumait simē, jai Jesús Pilatojavabelia.

³Sacerdotevi penama itsamonae bajarapitsijamatabēcuenevi yajtacaitorobivi jumait si Pilatojavabelia:

—Jesús raja bitso pibisiacuene exanabiaba, jai.

⁴Nexata icatsia Pilato yanijobatsi Jesús.

—¿Itsalivaisiyo ata tsaja apo yapētaemē nejume-canaviatsinexa? ¿Apo jumetaemē mapacuenia pecaneconitsijavaje? jaitsi.

⁵Itsiata Jesús matavējēa apo jumepitsi Pilatojavabelia. Bajaraxuata Pilato apo yapētae pacuenia exanaejitsia Jesúsjavabelia.

Pacuenia baja Pilato tocopata Jesús pebexuabinexatsi yabara pelivaisi

⁶Nacuaevetsinē Pilato xaina pijacujirucuene. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajēcabiaba, Pilato nexata copatabiaba bajarapajivi pascua fiestamatacabi. Bajarapacuenia Pilato caenē copatabiaba jivi pesivajamatabēcuene xanepanaenexatsi. ⁷Pamatacabi Jesús naneconitsiaexanatsi, bajarapamatacabi Barrabásvēnēnē jivi pebarēbevi barēnaneconitsiaponapona penaneconitsivi pejebabiabibota. Barrabás, itsamonae yajava, barēnabia picani gobierno pijajiviyavabelia. Nexata taicatsi. Naneconitsiaexanejebatsi penaneconitsivi pejebabiabibota. ⁸Nexata jivi pona Pilatojavabelia. Jumait si bajarapamonae Pilatojavabelia:

—Pacuenia pascua fiestamatacabi copatabiabame caenē pepitsapaenexa penaneconitsivi pejebabiabibovecua, bajarapacuenia panetocopare caenē pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹Nexata Pilato jumait si bajarapamonaejavabelia:

—¿Pajitsipame tsaja patacatocopsijava pepitsapaenexa Jesús, pajudíovimē pepo papecaevetsinē? jai Pilato.

¹⁰Bajarapacuenia Pilato jumait si tsipaji yapētane pajamatabēcuene yabara sacerdotevi penamatacaitorobivi tocaponarenatsi Jesús. Pilato jamatabēcuene yapētane sacerdotevi penamatacaitorobivi Jesús

pecueneitoyaxaetsi petocaponaejavatsirena. ¹¹ Nexata bajarapamonae asaëya vajëca Barrabás pecapit-sapaenexatsi. Tspaji baja cajena sacerdotevi penamat-acaitorobivi muxubijipenetsia jumaiti jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

¹² Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

¹³ Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

¹⁴ Nexata Pilato jumaiti bajarapamonaejavabelia:

—¿Detsa pitsineconi yabara nexata cobematabiabarutsiaexanaeijitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

¹⁵ Nexata baja Pilato tocopata Barrabás pepit-sapaenexa penaneconitsivi pejebabiabibovecua jivi barajamatabëcuenexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayacuenua pejumatiitibenexatsi penaneconitsivi pejumacanitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

¹⁶ Nexata baja vajabitsaëvi Jesús caponaliatsi nacuaevetsinë Pilato pijaboxanetojavabelia. Nexata bajarajota nacaetuata daxita vajabitsaëvi. ¹⁷ Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevetsinë banaxatata, bajaraxua xatatatsi benacuaevetsinëcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. ¹⁸ Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponae bajarapamonae Jesúsjavabelia.

¹⁹ Bajarapamonae caenë canacujitsia mataconibiaxabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata. ²⁰ Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

²¹ Alejandrobeje Rufobeje paxa, Simónvënë, Cirene tomarapijinë. Nexata Simón najetaruca vayafotusatoyavaverena. Nexata vajabitsaëvi Simón junatatsi,

pacruzajavabelia Jesús cobematabiabarutsijitsiatsi, peyavenonaeyacaponaenexa.

²² Caponaliatsi Jesús Gólgotavënë tsutojavabelia.

“Gólgota,” itsa jai hebreojumeta, mapajumetaje pejumaitisijume: “Jivimatasipatsuto,” pejaijume. ²³ Bajarajota picani Jesús rajutatsi vinora piapaenexa, pematajërëabira mirravënëjavata, bitso penavixaetaeyaniva pecobematabiabarutatsi cruzajavabelia. Itsiata Jesús apo apae. ²⁴ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia. ²⁶ Bajarajota Jesús pematabocoto matatsënëyo yaquinaruta tablapayota it-samonae ata peyapëtaenexa pajamatabëcuenie yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. ²⁷ Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi. ²⁸ Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaiti Jesús yabara. Dioso pejumelivaisibaxutota tajëvelia jumaiti Jesús yabara mapacueniaje: “Naneconitsiaexanaenatsi bepibisiacuene pexanaenëcuenia,” jai baja cajena tajëvelia Dioso pejumelivaisibaxutota Jesús yabara.

²⁹ Jesús pecobematabiabarutatsi cruzajavabelia, bajaraxuayo penajetarubenaevi Jesús itaropitsi-aya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumait-simë: “Xuabianicajë templobo. Acueyabi matabacabita icatsia veretetsianajë itsabo,” jamë. ³⁰ Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Ëpamonae najumaiti:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo cajëpaetsi. ³² Itsa xaniajai pepacuenie Cristo, athëbëvetsica Dioso pitorobinëtsica jivi pecapanepaenexa, Israel nacupijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuenie, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.

Pacuenia baja Jesús tēpa yabara pelivaisi

³³ Jesús baja itsa tēpaejitsia, ajena matonejijitsia, daxita nacujava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. ³⁴ Nexata icatsia paepatota nacua napebeta, bajarapaepatota pinijicuenia Jesús aējai. Jumaitsi:

—Eloi, Eloi, ¿lma sabactani? jai Jesús.

Bajarapacuenia Jesús itsa jumaitsi pijajumeta, mapajumeta pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejaijume.

³⁵ Nexata itsamonae bajarajota penubenaevi bijiya jumetane bajarapacuenia Jesús pejumaitsijava. Nexata saya jamatabēcuenenavēxaniabiaya jumaitsi bajarapamonae:

—Jica, pajumetaema. Mara ponē junata profeta Elíaspijinēmi, Diosojumepaebinēmi, jai bajarapamonae.

³⁶ Nexata bajarapamonaeajuvēnēnē piajatuvonorayalia bepimia jabutaxuaba esponjavēnējava. Bajaraxuacujinae esponjavēnējava naeboupita cētaruta. Toyotsiatsi picani Jesús petsutsuninexa bajaraxua. Ponē picani Jesús toyotsiatsi bajaraxua petsutsuninexa, bajaraponē jumaitsi penajuanubenaevijavabelia:

—Bajarapacuenia abaxē copatarutatsi Jesús. Taenatsi Elíaspijinē itsa najetaruca cruzavecu penutsinexatsisica Jesús, jai bajaraponē capocaponae.

³⁷ Jesús icatsia pinijicuenia aējai. Bajaraxuacujinae jane baja Jesús tēpanajereca. ³⁸ Paepatota Jesús tēpanajereca, bajarapaepatota templobo ēnētuaatua-jēalia peyatuucutarutsipana, ayaiapaēbērēpanaxaneto, titititica tuatua-jēareca, athēbēvetsicacujinae irabereca. ³⁹ Nexata paepatota Jesús tēpanajereca, vajabitsaēvi pijacapitán Jesús pitabara canacujitsialia nua. Nexata bajaraponē taenuca Jesús pinijicuenia peajijava. Taenucanua Jesús petēpanajetsijavareca. Nexata vajabitsaēvi pijacapitán jumaitsi:

—Matsaena ponē tēpaje, pepacuene baja rovia Dioso pexēnato, jai.

⁴⁰ Bajarajota petiriavibitsaētozaneto tajiyoverena taenubena Jesús petēpaejava. Bajarapapetiriavi tuatua-jēta nanubena mapamatabēxēyoje. Itsava Mariāvēnēva, Magdala tomarapijiva. Itsava Salomēvēnēva. Itsava icatsia Mariāvēnēva. Bajarapova Santiagobeje Josébeje pena. Bajaraponē Santiago, pevējēato abaxē itsanē Santiagovēnēnēvecua. ⁴¹ Pamatacabi abaxē Jesús ponapona Galilea nacua, bajarapapetiriavi Jesús pēnainavanapatsi peyavenon-aenexatsi. Papetiriavibitsaētojavata Mariábana nanubena, bajarapapetiriavi ata Mariábana Jesús najuapēnaponarena Galilea nacua-verena Jerusalén tomarabereca.

Pacuenia Jesús petēpaenē mēthētatsi yabara pelivaisi

⁴²⁻⁴³ José Arimatea tomarapijinē, judíovi pevetsinē, peyaiyataenētsi. Bajaraponē José copiaevetaponapona pecopiapatsijava pamatacabi caenē Dioso evetsijitsia

daxita pijajivi mapanacuataje. Judíovi baja penacuer-aevetsimatacabinexa pevājēnaeya pamatacabi, caniviyotsia baja. Bajarapamatacabi judíovi banacuen-evereta baja penacuenebijava. Nexata bajarapaepatota José acueneura ata, najamatabēsaēta. Nexata lia nacuaevetsinē Pilatojavabelia. Nexata José vajēta Pilatojavabelia petocopatsinexatsi Jesús petēpaenē pemēthētšinexa. ⁴⁴ Nexata Pilato jamatabējumaitsi:

—Xaniajai tsamē rabaja Jesús tēpa, jamatabējai tsipaji abaxē bajayajebi Jesús apo rucae cruzajavabelia pecobematabiabarutsicujinaetsi.

Nexata Pilato junata vajabitsaēvi pijacapitán. Nexata Pilato yanijoba vajabitsaēvi pijacapitánjavabelia, Jesús petēpaecuene Pilato peyapētaenexa. ⁴⁵ Nexata vajabitsaēvi pijacapitán tsipaeba Pilatojavabelia.

—Jesús rabaja capanepaeya tēpa, jai.

Nexata jane baja Pilato José tocopatatsi cruzajavetsica pepitsinexa Jesús petēpaenē. ⁴⁶ Nexata José comuata pexaniaviriasábana. Bajaraxuacujinae José jane baja cruzajavetsica pitsica Jesús petēpaenē. Daxitanēreca mataquionaeya matakacēba pexaniaviria piapiasábanapanata. Bajaraxuacujinae itsajota cajena José iboitapajanitotjavata pinijibovaju exanaeyaex-anabuata petēpaēvi pebuataponaenexa, bajarapaibovajualia José buata Jesús petēpaenē. Bajaraxuacujinae pinijibopanaxaneto José tixirena. Yavajuvēpaacatabuata. ⁴⁷ María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petēpaenē.

Pacuenia Jesús petēpaecujinae icatsia asaē yabara pelivaisi

16 Judíovi baja penacueraevetsimatacabi itsa verevereca, acueyabi povamaxēto comuata petuxujuvira. Itsava Mariāvēnēva, Magdala tomarapijiva. Itsava Salomēvēnēva. Itsava icatsia Mariāvēnēva. Bajarapova Santiago pena. Bajarapamonae petuxujuvira comuata peperabēexabinexa picani Jesús petēpaenē. ² Nexata baja judíovi penacueraevetsimatacabi itsa verevereca, meravia pitsijavata, ajena baja matabi tsarucaponae, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyavajuvēpa acatabuatsiibopanaxanetotsi? najai tsanajetarubena bajarapamonae.

⁴ Nexata bajarapamonae itsa imoxoyotabuatapona, naēcobarēcēpalia ibovajuvabelia. Nexata taeyabuata ibopanaxanetomi petixitabuatsijavalia ibovajuvēpavecu. Bajarapaibopana bitso pinijibopanaxaneto. ⁵ Nexata petiriavi itsa joneya Jesús pebuatsiibovajutsijavalia, taeyeta pecujanenia pevējēato. Bajaraponē naxatateca piapiajava penioponaevaja. Nexata petiriavi najunaviaca. ⁶ Nexata pevējēato jumaitsi petiriavijavabelia:

—Pētsa panajunaviacame. Paxamē picani pajaitame Jesús, Nazaret tomarapijinē, ponē cobematabiabarutatsi cruzajavabelia. Asaē rabaja icatsia bajaraponē petēpaecujinae. Ajibi rabaja tsarucae majotaje. Patae-

ma jane itsajota picani buatatsi. ⁷ Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: "Jesús pina panevajënaeyabelia pona Galilea nacuayabelia. Baja pina jotalia pacaxitarabianame Jesús pacuenia baja pacajumaitstisi," pajamë tsane pijajivijavabelia, jai pevëjëato petiriavijavabelia.

⁸ Nexata saya bajarapapetiriavi rëcëpeca Jesús pebutsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

Pacuenia Jesús petëpaecujinae, icatsia itsa asaë, tsitanaitajëta María Magdala tomarapijivijavabelia yabara pelivaisi

⁹ Judíovi baja penacueraevetsimatacabi itsa verevereca, meravia pitsijavata, ajena baja matacabi tsarucaponae, Jesús icatsia asaë petëpaecujinae. Bajarapamatacabi copiata Jesús tsitanaitajëta María, Magdala tomarapijivijavabelia. Bajarapova cajena copiaya Jesús vecuacapitsapa siete padovathibeje itsa abaxë Jesús apo beyaxuabitsi. ¹⁰ Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. ¹¹ María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai.

Itsiata Jesús pijajivi apo jumexaniataetsi María.

Pacuenia Jesús petëpaecujinae icatsia itsa asaë, tsitanaitajëta pijajivitonëbejejavabelia yabara pelivaisi

¹² Jesús pijajivitonëbeje najetarucabeje namutua. Nexata Jesús pijajivitonëbeje namutua penajetarucavejavatabeje, Jesús tsitanaitajëta beitsanëcuenia pijajivitonëbejejavabelia. ¹³ Nexata Jesús pijajivitonëbeje itsa tanebeje Jesús, naviatecabeje. Nexata pacuenia tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

Pacuenia Jesús petëpaecujinae, icatsia itsa asaë, pijajivi itoroba pexanialivaisi jivi petsipaebanajetarubenaenexa daxitanacuanëjava yabara pelivaisi

¹⁴ Bexëajavabelia icatsia Jesús tsitanaitajëta pijajivi once ponëbejejavabelia penabanenaevjavata mesata. Nexata Jesús pinijicuenia muxujioba pijajivi piajamatabëcuenetajaxae. Muxujiobanua apo pejumecovënëtsixae petsipaebijavatsi pamona tane Jesús icatsia piasejava petëpaecujinae. ¹⁵ Nexata Jesús jumaitsi pijajivijavabelia:

—Paponare daxitanacuanëjava daxitajivi panetsipaebanajetarubenaenexa pexanialivaisi pecapanepaelivaisinexatsi. ¹⁶ Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabijavabelianexa naneconitsiana Diosojavabelia. ¹⁷ Pamona peneta jumecovënëtsiana bajarapalivaisi, mapacuenia exanavanapaenaje. Tavënëta jivivecua capitsaponaena dovathi. Itsavirijumetanua, apo penatsipaebijumemi ata, jemata natsipaebiana. ¹⁸ Bajarapamonae jomo pecobeta pitsi ata tsane, apae atanua tsane jivi petëpaeyaexanaera, itsiata apo tēpae tsane. Bajarapamonae itsa nacobebuatiana piavitanejivi pematatsënëvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petëpaecujinae, icatsia itsa asaë, naviatata baja athëbëabetsia yabara pelivaisi

¹⁹ Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujuanenia penajuaevetsinexabeje daxitacuene. ²⁰ Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamona jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jaramatabëcueneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabjavata.

SAN LUCAS

Pacuenia Lucas taxuxuaba mapabaxutotaje Jesucristo pelivaisi, petoyaquinaejava Teófilovënënjavabelia, yabara pelivaisi

1 ¹⁻² Pamatacabi abaxë Jesús ponapona mapanacuataje, jivi ayaibitsaëtoxaneto tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranëjava Jesús pelivaisi, pexanialivaisi. Nexata tomaranëjava Jesús pelivaisi pejumetaevi, ayaibitsaëto, baja cajena yaquina juya mataropotsia petsipaebinxeta itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi. ³ Nexata xanë ata mapamatacabitaje yanijobaponajë bajarapalivaisi daxita peyapëtaevijavabelia. Yanijobaponajë xaniavaetsia tayapëtaenexa pacuenia Jesús exanaponapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamë ata xaniavaetsia neyapëtaenexa daxita bajarapalivaisi, Jesucristo pelivaisi. Netsitanepana tacatoyaquinaenexa daxita bajarapalivaisi neyapëtaenexa pacuenia jumai tsaponae caelivaisi canacujitsia Jesús pexanaponaejavanë yabara, caejava canacujitsia. ⁴ Copiaya baja picani itsamonae catsipaeba bajarapalivaisi. Itsiata icatsia xanë catoyaquinatsi neyapëtaenexa jane baja xaniavaetsia bajarapalivaisi pexaniajailivaisicuene.

Pacuenia ángel tajëvelia jumaitsi Zacaríasjavabelia: “Nexënatonëyo raja xainaename,” jai yabara pelivaisi

⁵ Pamatacabi abaxë Herodes eveta Judeanacua, bajarapamatacabi ponapona sacerdotenë Zacarías. Bajaraponë sacerdotevi Abíasvënëviyajuvënë. Zacarías pijava pevënë Elisabet. Bajarapova sacerdotenëmi Aarónpijinë pemomoxiyajuvënëva. ⁶ Bajarapajivibeje xaniavaetsia aneconijibia Dioso pitabarata toponaponabeje. Dioso jumecovënëtsiaya ponaponabeje pacuenia Dioso itorobatsi judíovi xaniavaetsia pejinavana-paenexa. ⁷ Itsiata bajarapajivibeje pexi apo xainaabeje. Tsiapaji Elisabet mavecova. Nexata bajarapajivibeje bitso baja perujjiviyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicuene Dioso pitabarata. Pasemanata daxita sacerdotevi, Abíasvënëvi, nacobenaevetsijitsia templo, bajarapasemana Zacarías daxitasemana nanacuenebijitsia templobota. ⁹ Nexata abaxë sacerdotevi petaxuxuabi-

vajënaeya penacuenebijava, pijacujirucuenia exana penayapëtaeponaenexa xua caenë canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapëtane xua caenë canacujitsia nacuenebijitsia templobota, nexata Zacarías tocopatatsi temploboënëalia petajuitsinexa inciensovënëjava, petuxujuvijava. Bajaraxuata Zacarías joneya temploboyalia petajuitsinexa jane baja inciensovënëjava temploboënëalia. ¹⁰ Paepatota Zacarías tajuitanuca inciensovënëjava temploboënëalia, jivi ayaibitsaëtoxaneto templobojumavelia vajëcanubena Diosojavabelia. ¹¹ Nexata Zacarías temploboënëalia, altarvënëjava muxuneneta, tsitanaitajëtatsi ángel. Paaltarvënëjavajumata incienso tajuitabiaba Diosonexa, bajarapaaltarvënëjava pecujanenia pamuxunenejavata, Zacarías taenuta ángel. ¹² Nexata Zacarías itsa taenuta ángel, apo yapëtae pacuenia exanaejitsia Zacarías. Bitso jamatabëcuene-najunaviaca. ¹³ Nexata ángel jumaitsi Zacaríasjavabelia:

—Zacarías, pëtsa junavame. Dioso baja cajena cajumetane nevajëtsijava. Nexata nijava Elisabet catonacoxitsiana. Nexënatonëyo baja xainaename. Vënërubianame bajaraponëyo Juan. ¹⁴ Pinijicuenia, jivi ayaibitsaëto yajava, barëyamë tsane bajaraponëyo itsa catonacoxanaena. ¹⁵ Tsiapaji bajaraponëyo ayaijamatabëcuenenë tsane Dioso pitabarata. Apo apae tsane piatneranë. Vinora ata apo apae tsane. Penaexanaejavaveliacujinae tsijamatabëvënëcaenatsi Espiritu Santo. Nexata Espiritu Santo pitorobicueniatsi, exanabiabiana. ¹⁶ Bajaraponë, Juan, Israel nacuapijivi najamatabëcuene copatsiaexanaena Diosojavabelia. ¹⁷ Bajayata Diosojumepaebinëmi, profeta Elíaspijinë, ayaijamatabëcuenenëmi, Dioso pesaë yajavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bajaraponë pejamatabëcueneta, penacoxiitoyavimi ata, icatsia nacoxiasiva tsane. Bajaraponë pejamatabëcueneta, itsamonae pijinia pibisijamatabëcuene pexinaevi ata, jamatabëcuene xanepanaeyaexanaena pexaniajamatabëcuene pexinaenexa. Bajarapacuenia bajaraponë jivi jamatabëcuene xanepanaeyaexanaena pepo petuxanenë penajetarucaevajënaeya. Nexata bajarapamonae xaniavaetsia copiapitsiana pepo petuxanenë pamatacabi najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi: —Itsa taxënato xainaejitsianë, ¿detsa peneta pitsicuene taenajë tayapëtaenexa? Tsiapaji rabaja xanë perujunë. Tajava ata baja perujva, jai Zacarías.

¹⁹ Nexata ángel jumaitsi Zacaríasjavabelia:

—Xanë raja Gabrielnë, Dioso pijajivitonënë. Dioso baja cajena nitoroba tacatsipaebineca mapapexanialivaisije. ²⁰ Xamë saya nejumaeabame, xaniavaetsia catsipaebi atatsi xua pepacuene catocopiajopaejitsia. Nexata baja aeconoxae apo cacaëjêpae tsane necuaicuaijajava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebianame icatsia, jai ángel Zacaríasjavabelia.

²¹ Bajarapaepatota jivi templobo jumavelia eventanubenatsi Zacarías pepitsapaejavarena. Najumaitsi bajarapamonae:

—¿De meta xuajitsia Zacarías bepíjia apo pitsaparena templobovecua? najai bajarapamonae.

²² Itsa jane baja Zacarías pitsaparena templobovecua, apo caëjêpaetsi pecuaicuaijajava. Nexata pamonaevetanubenatsi templobo jumavelia, najumaitsi:

—Zacarías raeta bemajitsinaebota temploboënëlia it-sacuene tane, najai.

Nexata Zacarías apo pecaëjêpaexaetsi pecuaicuaijajava, pecobeta tsipaeba besiyanëcuenia jivi peyapëtaeyaxanaenexa.

²³ Itsa baja Zacarías vereta penacuenebijava templobota pamatacabibeje itorobatsi penacuenebinexa, naviata baja pijaboyabelia. ²⁴ Bajaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava itsa yapëtane, cinco pajuametobejecuenia itsajavabelia pijabovecua apo ponaponae. ²⁵ Elisabet jamatabëjumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo aurranë tsane tacoxibijava yabara, jamatabëjai Elisabet.

Pacuenia ángel tajëvelia jumaitsi Maríjavabelia yabara pelivaisi

²⁶ Elisabet baja seis pajuametobeje pepuaxinae penacoxitsicujinae, Dioso icatsia itoroba pijaángel Gabriel. Pijaángel itoroba Nazaret tomarabelia, Galilea nacuata peecaetomarabelia. ²⁷ Dioso itoroba ángel petsipaebineca Maríjavabelia. María abaxë pebi apo pequenetsiataevatsi. Ángel pepatsivajënaeya Maríjavabelia, Maríabeje baja cajena Josébeje nabarëcuaicuaijai beje penapitsinexabeje. Nacuaevevetsinëmi Davidpijinë pemomoxiyajuvënënë José. ²⁸ Ángel nexata joneya María peponaponaebota. Ángel jumaitsi Maríjavabelia:

—María, cabajacobatsi. Pexaniajamatabëcuenia Dioso pecataeva. Dioso cayajavaponaponaena. Bitso cayavenonaena xamë daxita nevëna petiriavi matatoxentsia, jai ángel.

²⁹ Nexata María itsa jumetane bajarapacuenia ángel pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi ángel mapacueniaje? jamatabëjai María.

³⁰ Icatsia ángel tajëvelia jumaitsi Maríjavabelia:

—María, pëtsa junavame. Tsipaji raja Dioso pexaniajamatabëcuenia catane. ³¹ Xamë raja nacoxitsianame.

Cavecuanaexanaena raja pebinëyo. Bajaraponëyo vënërubianame Jesús. ³² Bajaraponëyo ayaijamatabëcuenenë tsane. “Pinijidioso, athëbëtatsia peecaenë, mapexënatoje,” jaitsi tsane jivi. Nexata vajatuxanenë Dioso nacuaevevetsinë exanaenatsi. Pacuenia pijasalinainëmi Davidpijinë bajayata nacuaevevetsinëmi, bajara icatsia itsane. ³³ Bajaraponë evetsiana Israel nacuapijivi daxita matababijavabelianexa, jai ángel tajëvelia Maríjavabelia.

³⁴ Nexata María jumaitsi ángeljavabelia:

—¿Detsa pacuenia nacoxitsipajë? Xanë raja tamona apo xainanë, jai María ángeljavabelia.

³⁵ Ángel nexata tajëvelia jumaitsi Maríjavabelia:

—Espíritu Santo raja patsianica xamëjavabetsica. Nexata Espiritu Santo Dioso pesaëta caevetsiana. Bajaraxuata panacuetonëyo cavecuanaexanaena, tsatsianatsi Dionexa. “Dioso ra mapexënatoje,” jaitsi tsane jivi. ³⁶ Nijamonaeva ata Elisabet, perujuva ata, exanaena penacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. ³⁷ Dioso raja caëjêpatsi daxitacuene pexanaenexa, jai ángel tajëvelia Maríjavabelia.

³⁸ Nexata María jumaitsi ángeljavabelia:

—Xanë raja Dioso pijajivitanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi ángel.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi ángel, caematacabibejecujinae, María pona petsutonënacuata peecaetomarabelia. Bajarapatomara eca Judea nacuata. ⁴⁰ Nexata María joneya Zacarías pijaboyalia. Bajacobanuta pijamonaeva Elisabet. ⁴¹ María itsa bajacobanuta Elisabet, nexata Elisabet peyacotajinaenacuetoyo tsicotonayucutarabatsi. Nexata jane baja Elisabet tsijamatabëvënëcatsi Espiritu Santo.

⁴² Nexata Elisabet Espiritu Santo itorobatsi pinijijumeta Maríjavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxentzia. Panacuetonëyo ata exanaename, bajarapanacuetonëyo Dioso bitso peyavenonabiabinëtsi tsane. ⁴³ Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë? ⁴⁴ Itsa nebajacobanutame, tayacotajinaenacuetoyo nayucutarabata pebarëyaxae. ⁴⁵ Barëyamë Dioso pecajumaitsicuenia nejumecovënëtsiva. Tsipaji pepacuene catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríjavabelia.

⁴⁶ Nexata María jumaitsi Elisabetjavabelia:

Tajamatabëëthëtojavavetsina jumaitsinë Diosojavabelia: “Ayaijamatabëcuenenëmë bitso,” janë. ⁴⁷ Sivajamatabëcuenebarëyanë Dioso tanecapanepaenënexa. ⁴⁸ Sivajamatabëcuenebarëyanë. Tsipaji pijajivitanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia

daxitajivi xanë yabara jumai tsabiabi tsane: “Dioso bitso peyavenonaevamitsi,” jai tsabiabi tsane. ⁴⁹ Bajarpacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabi-ana ayaicuene pexanaejavanë. Dioso raja apo pejitsipaenë jivi pibisiacuene pexanaejava. ⁵⁰ Daxita pamona-ae Dioso yayataena, bajarapamonae juya Dioso itaxutotsoniataeyabiabiana. ⁵¹ Dioso raja pecaëjëpaenëtsi pinijicuene ata pexanaenexa pecobeta. Pamona-ae jamatabëjumaiti tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamonae Dioso nacayajatsiaexana baja. ⁵² Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanë beveliajamatabëcuenevimi ata. ⁵³ Pamona-ae pijinia bitso pïajani, bajarapamonae Dioso rajuta pexanianabaniijava. Pamona-ae pijinia bitso pexinaevi mapanacuapijicuene, bajarapamonae Dioso apo pejumecovënëtsixae, bajarapamonae Dioso apo rajutsi. ⁵⁴ Dioso yavenona pïajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi. ⁵⁵ Bajarpacuenia Dioso pijajivi itaxutotsoniataeyabiaba daxitamatabëjivavabelianexa. Tsipaji baja cajena bajarapacuenia Dioso najumecapanepaeya jumaiti vajasalinainëmi Abrahampijinëjavabelia, daxita pemomoxijavabelianexa ata pitaxutotsoniataeyabiabijavanexa yabara, jai María Elisabetjavabelia.

⁵⁶ Nexata María acueyabi pajuametobeje napon-aponna Elisabet pijabota. Bajaraxuacujinae María baja naviata pijaboyabelia.

Pacuenia Juan naexana jivibautisabinënexa yabara pelivaisi

⁵⁷ Juameto baja ecaica, pajuametota Elisabet penacueto vecuanaexanaejitsiatsi. Penacuetonëyo jane baja vecuanaexanatsi. ⁵⁸ Itsa Elisabet yapëtane Dioso pitaxutotsoniataecuenetsi, bitso Elisabet jamatabëcuenenarëya. Daxita pamona-ae ata ena imoxoyo, pijabo muxuneneta, bajarapova pijamonaeyajuvënëvi ata, sivajamatabëcuenenarëyatsi. ⁵⁹ Itsa baja penacuetonëyo caesemana xaineca penaexanaecujinae, Elisabetbeje Zacaríasbeje pexënatonëyo perabëcaucutsiaexanabeje judíovicuenia. Baitsi boupiperabëcaucutsiaexanabeje. Nexata daxita bajarapamonae pata Elisabetbeje Zacaríasbejejavaberena. Bajarajota picani penacuetonëyo tovënërubiijitsiatsibeje paxa pevënëcuenia paxa picani pevënëxainanexa. ⁶⁰ Itsiata Elisabet jumaiti pamona-aejavabelia picani tovënërubijitsiatsibeje:

—Jume. Pevënë raja tsane Juan, jai Elisabet bajarapamonaejavabelia.

⁶¹ Nexata bajarapamonae jumaiti:

—¿Detsa xuajitsia jitsipame bajarapavënë? Itsanë ata cajena nijamonaeyajuvënënë apo xainae bajarapavënë, jai bajarapamonae Elisabetjavabelia.

⁶² Nexata bajarapamonae penacuetonëyo jane baja paxa junata. Pecobeta yanijoba pavënë Zacarías jitsipa

petovënërubinexatsi. ⁶³ Nexata Zacarías vajëta tablapayo peyaquinaenexa. Nexata yaquinaruta: “Juan rabaja pevënë,” pejaiitane. Nexata daxita bajarapamonae jamatabëcuenenabenajaca. ⁶⁴ Bajarajota jemata icatsia Zacarías cuaicuaijai baja. Nexata jivi pitabarata Zacarías jumai tsaponae Diosojavabelia:

—Diosomë, ayaijamatabëcuenenëmë bitso, jai tsaponae.

⁶⁵ Daxita pamona-ae bajarapatomarata imoxoyo penaevi, itsa jumetane pacuenia Zacarías Dioso yavenonaponatsi, pinijicuenia jamatabëcuenenabenajaca. Itsamona-ae bajarapanacuata petsutonëjava penaevi ata, daxita bajarapamonae ata, vënëlvaisitane bajarapacueneyabara. ⁶⁶ Daxita pamona-ae jumetane bajarapacueneyabara, apo nacofënëtsi. Jamatabënajinavanapabiaba bajarapacueneyabara. Nexata bajarapamonae nayanijobabiaba.

—¿De meta jamatabëcuenetsi tsane bajarapanacuetonëyo itsa vitsabiana? najai tsabiabi bajarapamonae.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

Pacuenia Zacarías tajëvelia jumaiti yabara pelivaisi

⁶⁷ Zacarías, Juan jivibautisabinënexa paxa, tsijamatabëvënëcatsi Espiritu Santo. Nexata Zacarías Espiritu Santo itorobatsi jivijavabelia pejumaitsinexa mapacueniaje:

⁶⁸ Pexaniajamatabëcueneyabara rajutatsi vaxaitsi pepo vajatuxanenëjavabelia, Israel nacuapijivitsi vajuDiosojavabelia. Tsipaji pijajivitsi nacatoitorobianica vajanacapanepaenënexa vajaneconivecua. ⁶⁹ Dioso cajena nacatoitorobianica pinijicuene pexanaejava pecaëjëpaenëtsi vajanacapanepaenexa. Bajaraponë Dioso pijajivitonëmi Davidpijinë pemomoxiyajuvënënë tsane.

⁷⁰ Bajayata Diosojumepaebivimi profetavi, Dioso pitorobicueniatsi pejinavanapaevi, tajëvelia najumecapanepaeya jumaiti bajaraponë vajanacapanepaejavanexa yabara. ⁷¹ Tajëvelia profetavimi najumecapanepaeya jumaiti bajaraponë vajanacapanepaejavanexa vajavajabitsaëvivecua, daxita vajanacaitoyavi atavecua. ⁷² Dioso nacaitaxutotsoniataena pacuenia tajëvelia najumecapanepaeya jumaiti vajasalinavimijavabelia. Dioso cajena apo nacofënëtsi pacuenia najumecapanepaeya jumaiti vajasalinavimijavabelia.

⁷³ Bajayata copiaya bajarapacueneyabara Dioso najumecapanepaeya jumaiti vajasalinainëmi Abrahampijinëjavabelia. ⁷⁴ Dioso baja najumecapanepaeya jumaiti vajanacapanepaenexa vajavajabitsaëvecua. Bajarapacuenia Dioso nacapanepaena ajunavijibia vajatonacuenebavanapaenexa. ⁷⁵ Nexata bajarapacuenia Dioso ita tonacuenebavanapaenatsi, jinavanapaenatsi pibisiacuene exanaenejevatsi Dioso pitabarata vajasatësvanapaepato abaxë mapanacuataje, jai Zacarías jivijavabelia tajëvelia pevajunupaebijavata Jesús Dioso pitorobijavanexatsitsica vajanacapanepaenexa.

⁷⁶ Icatsia Zacarías jumaiti pexënatonëyojavabelia mapacueniaje:

Taxënatonëyo, xamë yabara itsamonae jumai tsabiabi tsane: “Mara ponëje pinijiDioso, athëbëtatsia peecaenë, pijaprofetanëje,” jai tsabiabi tsane. Xamë raja itsaxuayo pepo petuxanenë najetarucaejitsia, pevajënaeya jivi tsipaebanajetarucaename pesivanajamatabëcuenecopatsinexa bajaraponëjavabelia pamatacabi bajaraponë najetarucaena. ⁷⁷ Tsipaebanajetarucaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeiconimi Dioso vecuaajibiaexanaenatsi.

⁷⁸ Dioso vajanacaitaxutotsoniataexae, nexata nacayapëtaeyaexanaena vajanacacapanepaenënexa athëbëvetsica pepatsijavanexatsica. ⁷⁹ Nexata bajaraponë jivijavabelia itsa tsipaebanajetarucaena pexaniajailivaisi, jamatabëcueneitayotsiana daxita pijamatabëcueneitaquirivimi. Baitsi pamonaepicani cujuna petëpaejava, bajaraponë petsipaebilivaisi pejamatabëcueneta, bajarapamonae yapëtaena jamatabëcuenexanepanaeya pejinavanapaenexa, jai Zacarías pexënatonëyojavabelia tajëvelia pevajunupaebijavata Jesús jivijavabelia Dioso pejumelivaisi petsipaebanajetarucaejavanexa.

⁸⁰ Nexata jane baja xuacujinae Juan jivibautisabinënexa vitsabanajetaruca. Yajavaajamatabëcuenesaë baja cajena tsanajetaruca Dioso pejumelivaisi yabara. Nexata baja Juan itsa penaveretsinë, ponapona petusato nacuata. Matapania itsa taxuxuabijitsia jivi petsipaebinexa Jesús pelivaisi, naitajëta jivijavabelia pevënëlivaisitaenexatsi daxita Israel nacuapijivi.

Pacuenia Jesús naexana yabara pelivaisi

2 Imoxoyo baja pevajënae Jesús penaexanaejavanexa. Nexata bajarapamatacabijava Romanonacua pepo pevetsinë, Augusto, taxuxuaba pijajivi pitorobijava jivi petonamataëjëtšinexatsi. Jumaitsi pijajivijavabelia:

—Daxitajivi, pamonaetaevetsinacuanëjava jinavanapa, panetonamataëjëtšinaname, jai.

² Bajarapamatacabi pijinia nacuaevevtsinë Cireniövënëne saicaya itsanacua eveta, Siriävënënacua.

³ Nexata nacuaevevtsinë Augusto pevetsinacuanëjava penaetomaranëta pejinavanapaevi, apo jinavanapaeëpijatomaranëjava. Itsamonae najinavanapa itsatomaranëjava. Bajaraxuata pamonaenajinavanapa itsatomaranëjava, caejivi canacujitsia, pijasalinavimi pijatomaranëjavabelia pona. Bajarapamonae pona penamataëjëtšinexatsi pijasalinavimi pijatomaranëjava.

⁴ Bajaraxuata José ata barëpona Belén tomarabelia. José barënaropota Nazaret tomarata, Galilea nacuata pecaetomarata. José barëpona Belén tomarabelia, Judea nacuata pecaetomarabelia. Tsipaji baja cajena José pijasalinainëmi, Davidpijinë, bajayata Belén tomarata ponapona. ⁵ José barëpona María, pova pita pijavanexa. Bajarapova yacotapona itsa baja imoxoyo pevajënae penacueto pevecuanaexanaenexatsi.

⁶⁻⁷ Nexata baja itsa patabeje Belén tomarata, ponaponaabeje dajubi pevetaibiabibota. Tsipaji baja pabota jivi patabiaba, pevajënaebeje baja jivi yavënëca. Nexata

apo nayacaëjëpaetsibeje bajarapabota penaecaenexabeje. Bajaraxuata patabeje dajubi pevetaibiabibota. Nexata dajubi pevetaibiabibota María jane baja vecuanaexanatsi penacuetonëyo, copiaya penacoxitsinacueto. Barëca dajubi pevetaibiabibota. Jumaquioneta papebërëpanaxita. Buateta dajubi pexaejavanexa pemitsaothocabiabimoënëta.

Pacuenia ángelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetaibiaba pijaovejabitsaëtonë. ⁹ Jemata oveja pevetsivi tsitanaitajëtatsi Dioso pijaáγγελ. Nexata Dioso pijapenivenivenaecotia oveja pevetsivi matatoyorotsia itayotatsi. Najunaviaca bajarapamonae pinijicuenia. ¹⁰ Nexata áγγελ jumaitsi oveja pevetsivijavabelia:

—Pëtsa panajunaviacame. Pexanialivaisi raja pacatocanajetarucatsi pesivabarëyanexa daxitajivi. ¹¹ Ajena rabaja, mapameravitaje, naexana baja daxitajivi peca-panepaenënexa. Naexana Belén tomarata, patomarata bajayata nacuaevevtsinëmi Davidpijinëmi ponapona. Ponë naexana, bajaraponë pepo petuxanenë Cristo, Dioso athëbëvetsica pitorobinëtsitsica jivi peca-panepaenexa. ¹² Paneyapëtaenexa pacuenia pacatsipaebatsi, penacuetonëyo pataeyabuatsitsiananame mapacueniaje. Penacuetonëyo pataeyabuatsitsiananame papebërëpanaxita pejumaquionaenacuetonëyotsi. Boquecaena dajubi pexaejava pemitsaothocabiabimoënëta, jai áγγελ oveja pevetsivijavabelia.

¹³ Bajara saya jota jemata oveja pevetsivi tsitanaitajëtatsi ayaibitsaëtoxoneto ángelevi, copiaya petsipaebiáγγελnëtsijavata. Bajarapamonae ángelevi pexaniajamatabëcuene rajuta Diosojavabelia. Penaxëanaejavata ángelevi jumaitsi mapacueniaje:

¹⁴ ¡Dioso, athëbëtatsia peecaenë, pinijicuene rabaja exana! Pamona Dioso jumecovënëta, Dioso sivajamatabëcuenebarëyatsi. Daxita bajarapamonae jamatabëcueneexanepanaeya jinavanapaeyaexanaena Dioso, jai ángelevi penaxëanaejavata.

¹⁵ Itsa baja ángelevi naviaba athëbëabetsia, oveja pevetsivi ángelevi pecovëta najumaitsi:

—Ponaliatsi Belén tomarabelia. Taenatsi pecopiapat-sijava pacuene yabara vajatuxanenë Dioso pitorobiáγγελnëtsica nacatsipaeba, najai oveja pevetsivi ángelevi pecovëta.

¹⁶ Nexata bajarapamonae bepijiayo ponalia Belén tomarabelia. Pata itsajota Mariabeje Josébeje barëcabeje penacuetonëyo. Penacuetonëyo boqueca dajubi pexaejava pemitsaothocabiabimoënëta. ¹⁷ Oveja pevetsivi itsa taeyabuata penacuetonëyo pacuenia baja cajena áγγελnë tsipaebatsi, nexata pona petsipaebaponaenexa daxitajivijava pacuenia bajarapanacuetonëyo taeyabuata. ¹⁸ Nexata daxita pamonaenajumetane oveja pevetsivi pepaebilivaisi, jamatabëcuenenabenajaca. ¹⁹ María baja cajena pejamatabëthëto-ta yapëtaeponapona daxita bajarapacueneyabara.

²⁰ Oveja baja pevetsivi naviabaponalia. Oveja pevetsivi namutualia jumai tsanajetarubena Diosojavabelia:

—Diosomë, bitso ayaijamatabëcuenenëmë. Pexania-jamatabëcuene pacarajutatsi patanetoexanaexaemë pexaniacuene, jai tsaponaelia oveja pevetsivi.

Bajarapacuenia jumaiti tsipaji baja tane daxita pacuenia ángelnë tsipaebatsi.

Pacuenia Jesúsnyëo caponaliatsi temploboyabelia yabara pelivaisi

²¹ Jesúsnexta penaexanaecujinae, ocho matababita, perabëcaucutatsi judfoviciuenia. Baiti boupiperabë-caucutatsi. Vënërubatsinua jane baja pevënë pexaenaenexa. Vënërubatsi “Jesús,” pejaivënëta. Tsipaji baja cajena abaxë María nacoxitsinejeva Jesúsnexta, tajëvelia ángel jumaiti Maríajavabelia: “Bajaraponëyo vënërubianame Jesús,” jai.

²² Nexata jane baja tocopiajopatsibeje Josébeje Maríabeje pexanaenexabeje pacuenia bajayata Dioso Moiséspijinëta penajumecopatsilivaisi itorobatsi daxita judfovi pexanaenexa penacuetonëyo itsa tonaexanatsi. Nexata Jerusalén tomarabelia barëponabeje penacuetonëyo. Nexata Jerusalén tomarata, templobota, María ofrenda rajuta Diosojavabelia penajamatabëcuene xaniavaetsinexa Diosojavabelia. Rajutabejenua penacuetonëyo Diosojavabelia pijajivitonënexa petonacuenebinexa itsa penaveretsinë. ²³ Bajarapacuenia Josébeje Maríabeje exanabeje tsipaji Dioso Moiséspijinëta penajumecopatsilivaisi jumaiti: “Penacasabijivibeje pexi itsa xainabeje, nexata copiaya panacuetonëyo xainabeje, totsatsibeje Dioso pijajivitonënexa,” jai. ²⁴ Josébeje Maríabeje rajutabeje ofrenda Diosojavabelia pacuenia Dioso Moiséspijinëta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutoyobeje.

²⁵ Bajarapamatacabi ponapona Jerusalén tomarata Simeónvënëhë. Bajaraponë jumecovënëtsiaponapona pacuenia Dioso pejumelivaisibaxutota jumaiti. Nexata bajarapamatacabi Israelnacu eveta Romano nacuaverena ëpëpatsivi. Nexata Romano nacuaverena pepatsivi pevetsixae Israelnacu, bejiobiaexanabiabatsi Israel nacuapijivi. Bajaraxuata Simeón copiaevetaponapona Dioso pejamatabëcueneta petovecuajutsinexatsi Israelnacu pevetsivi. Nexata baja Romano nacuaverena pepatsivi, pevecuapitsapaenexa Israelnacu pevetsicuene. Espíritu Santo yajavaponaponatsi Simeón. ²⁶ Nexata Espíritu Santo pejamatabëcueneta Simeón tajëvelia yapëtaeyaexanatsi pacuenia Simeón petëpaevajënae taejitsia Cristo, ponë Dioso athëbëvet-sica itorobiapaebica jivi pecapanepaenexa. ²⁷ Nexata Espíritu Santo pejamatabëcueneta Simeón joneyaexanatsi temploboyabelia. Bajaraxuata Simeón tane Maríabeje Josébeje pebarëjonejavatabeje Jesúsnyëo temploboyarena pexanaenexabeje pacuenia Dioso Moiséspijinëta penajumecopatsilivaisi itorobatsibeje. ²⁸ Nexata Simeón isapita Jesúsnyëo. Pexaniajamatabëcuene rajuta Diosojavabelia. Pexaniaja-

matabëcuene Simeón perajutsijavata Diosojavabelia, Simeón jumaiti mapacueniaje:

²⁹ Tajatuxanenë, baja rajane netocopatsianame nija-jivitonënë jamatabëcuenexanepanaeya tatëpaenexa. Tsipaji baja netaeyaexaname pacuenia baja cajena tajëvelia najumecapanepaeya nejumaitimë. ³⁰ Taitaxutota rabaja taniji maponëje, ponë itorobimica jivi pecapanepaenënexa xamëjavabelia. ³¹ Ponë itorobimica jivi pecapanepaenënexa, daxitajivi taenatsi.

³² Maponëje petsipaebilivaisita, pamona apo judfovi ata, jamatabëcueneitayotsiana. Yapëtaeyaexanaena pacuenia jamatabëcueneitsimë. Nexata maponëje pejamatabëcueneta apo judfovi yayataena nijajivi judfovi, jai Simeón templobota Diosojavabelia pexaniajamatabëcuene perajutsijavata Jesúsnyëo yabara.

³³ Nexata Josébeje Maríabeje itsa jumetanebeje bajarapacuenia Simeón pejumaitisijava Jesúsnyëo yabara, jamatabëcuenenabenajacabeje. ³⁴⁻³⁵ Bajaraxuacujinae Simeón tovajëta Diosojavabelia peyavenonaenexatsibeje Josébeje Maríabeje, Jesúsnyëo yajava. Bajaraxuacujinae Simeón jumaiti Maríajavabelia:

—Mapanacuetonëyoje, Dioso itapetatsi. Maponëje petsipaebilivaisi jivi ayaibitsaëtoخانeto apo jumecovënëtsi tsanetsi. Nexata jivi ayaibitsaëtoخانeto naxuabiana, Israel nacuapijivi. Ayaibitsaëtoخانeto pijinia jumecovënëtsianatsi. Nexata pijinia ayaibitsaëtoخانeto capanepaena. Maponëje Dioso pesaëta pinijicuene pexanaejava, tsitaexanaena jivi peyapëtaenexa Dioso pitorobinëtsitsica. Maponëje itajëtsiana pacuenia jivi ayaibitsaëtoخانeto, caejivi canacujitsia, bëpënëa pibisiamatabëcuene najamatabëxainabiaba. Jivi ayaibitsaëtoخانeto apo jumecovënëtsi tsanetsi. Pibisiacuenia saya baranatsipaebianatsi. María, xamë nexata pepo nejamatabëëthëtojavavetsina bitso sivajamatabëcuenebëjamë tsane itsa yapëtaenname pacuenia exanaejitsiatsi, jai Simeón Maríajavabelia Jesús yabara tajëvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepaebiva profetava, Anavënëva. Bajarapova Fanuelpijinë pexënatoye, Aserpijinë pemomoxiyajuvënëva. Bajarapova bitso baja perujuva. Ochenta y cuatro baja pavaibeje xaina. Nacasaba picani abaxë itsa pejanava. Penacasabicujinae siete pavaibeje pepuaxainae pamonajavabelia, vecuatëpatsi pamona. Itsajavabelia apo vecuaponabiabi templobo. Matababijebi, meravijebi yajava, Dioso tonacuenebabiaba templobota. Itsajavata pexaejava apo xaeyabiabi pamatacabibeje vajëcabiaba Diosojavabelia. ³⁸ Nexata bajarapova ata pata itsajota Josébeje Maríabeje nucabeje templobota. Simeón pisanucaejavata Jesúsnyëo, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnyëo yabara. Romano nacuaverena pepatsivi Israelnacu pevetsixae, Israel nacuapijivi copiaevetavanapa Dioso pejamatabëcueneta petovecuajutsinexatsi, nexata baja Romano nacuaverena pepatsivi pevecuapitsapaenexa Israelnacu pevetsicuene. Nexata daxita pamona cop-

aevetavanapa Dioso pejamatabëcueneta petovecua-jutsinexatsi Israelnacia pevetsivi, daxita bajarapamonaejavabelia, bajarapova tsipaebabiaba Jesúsnyö pelivaisi.

Pacuenia Jesús ponapona Nazaret tomarata pebarënaviatsicujinaetsi templobojavaverena yabara pelivaisi

³⁹ Josébeje Mariabeje Jerusalén tomarata templobota exanaeveretabeje baja daxita pacuenia Dioso Moiséspijinëta penajumecopatsilivaisi itorobatsibeje. Nexata baja pijatomarabelia Jesúsnyö barënaviatabeje, Nazaret tomarabelia, Galilea nacuata peccae-tomarabelia. ⁴⁰ Nexata jane baja Jesúsnyö vitsaba Nazaret tomarata. Ajamatabëcuenesaë tsaponae Dioso pijacuene yabara. Jamatabëcuenevitsabaponanua. Dioso yavenonaponatsi ayaicuenia.

Pacuenia Jesúsnyö templobota barëcuaicuaijai judfovi pecujarubivijavabelia yabara pelivaisi

⁴¹ Caevai canacujitsia Josébeje Mariabeje ponabiababeje Jerusalén tomarabelia. Ponabiababeje pascuavëñefiesta penataeyabiabinexabeje. ⁴² Nexata baja Jesúsnyö doce pavaibeje itsa xaina, barëponabeje icatsia Jerusalén tomarabelia pascuafiesta penataenexa. ⁴³ Itsa baja copiaruca pascuafiesta, daxita baja penataevi bajarapafiesta, naviaba baja pijabonëjavabelia. Nexata Jesúsnyö nacopatanucalia Jerusalén tomaratalia. Mariabeje Josébeje abaxë apo yapëtaebeje Jesúsnyö pevecuanacopatsijavatsiliabeje. ⁴⁴ Jamatabëjumaitisibeje saya:

—Jesúsnyö raeta nanajetaruca vajanajuaponaevita, jamatabëjaibeje.

Bajaraxuata caematacabi baja pepuaponaebeje namutua, itaxanabeje Jesúsnyö. Nexata yanijobabeje pijamonaejavabelia, peyapëtaevitsibejejavabelia ata. ⁴⁵ Itsiata apo caxitajarabibeje. Nexata naviatecabeje Jerusalén tomarabelia pejaitsinexabeje Jesúsnyö.

⁴⁶ Acueyabi matacabita caxitajarababeje templobota. Jesúsnyö naeca judfovi pecujarubivi tuatuajëta. Jumetaeyeca bajarapamonae penabarëcuaicuaijailivaisi. Nexata Jesúsnyö yanijobapona bajarapamonae penabarëcuaicuaijailivaisi yabara. ⁴⁷ Nexata daxita Jesúsnyö pejumetaeyenaevitsi, taeyena Jesúsnyö xaniavaetsia pejumeyapëtaejava judfovi pecujarubivi penabarëcuaicuaijailivaisi. Taeyenanua xaniavaetsia pejumecanaviataponaejava, abaxë tsiquirinëyovajëto ata. Bajaraxuata jamatabëcuenenabenajaquena bajarapamonae. ⁴⁸ Josébeje Mariabeje itsa tanebeje bajarajota Jesúsnyö penaecaejava, nexata jamatabëcuenenabenajacabeje. María nexata jumaitisi:

—Taxënato, ¿detsa xuajitsia panevëpënacoparemenabeje? Paxanëbeje patacajaitarutsijavatabeje, bitso pacaitaxanatsibeje, jai María.

⁴⁹ Nexata Jesúsnyö jumaitisi penajavabelia:

—¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsipaji raja

xanë taxa Dioso pijacuene taexanaenexa mapabotaje, nejamatabëcueneenabiaba, jai Jesúsnyö.

⁵⁰ Itsiata bajarapajivibeje apo jumeyapëtaebeje pajamatabëcuene yabara jumaitisi Jesúsnyö.

⁵¹ María baja cajena pejamatabëëthëtota yapëtaeponapona daxita bajarapacuenia yabara. Nexata baja bajarapajivibeje pepëta Jesúsnyö napona baja Nazaret tomarabelia. Nazaret tomarata Jesúsnyö xaniavaetsia jumecovëñëtsiaponapona pacuenia Josébeje Mariabeje itorobabiababeje. ⁵² Jesús abaxë vitsabanajetaruca. Jamatabëcuene vitsabanajetarucanua. Nexata Dioso pexaniajamatabëcuenia tanetsi. Daxita pamona Jesúsnyö yapëtanetsi, pexaniajamatabëcuenia tanetsi.

Pacuenia Juan jivibautisabinë jivi livaisi tsipaeba petusato nacuata yabara pelivaisi

3 Pamatacabi pepo nacuaevevtsinë Tiberiovënënë xaina quince pavaibeje pevetsicujinae Romanonacua, bajara pijinia pamatacabi itsanacuanë eveta itsamonae. Bajarapamatacabi nacuaevevtsinë Poncio Pilato eveta Judeanacua. Bajara pijinia pamatacabi nacuaevevtsinë Herodes eveta Galileanacua. Bajara pijinia pamatacabi Herodes pejuyapijinë, nacuaevevtsinë Felipe, eveta Itureanacua, Traconite-nacua yajava. Bajara pijinia pamatacabi nacuaevevtsinë Lisianias eveta Abilianacua. ² Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinëbeje tsaponapona. Bajara pijinia pamatacabi Juan, Zacarías pexënato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. ³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanëta pejinavanapaevivava. Juan jumai tsanajetarucacae jivijavabelia:

—Panajamatabëcuenepënëyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuajibiaexanaenexa pibisiacuene paneexanaeconimi, jai tsanajetarucacae Juan jivijavabelia.

⁴ Bajarapacuenia Juan jivi itsa tsipaebanajetaruca, copiajopa jane baja pacuenia Diosojumepaebinëmi profeta Isaíaspijinë bajayata tajëvelia yaquina Juan yabara. Juan jivibautisabinë Dioso pitorobilivaisi jivijavabelia petsipaebanajetarucaejavanexa yabara, yaquina. Profeta Isaíaspijinë peyaquinaelivaisita tajëvelia jumaitisi mapacueniaje:

Tanejumulivaisipaebinë vavajai tsane petusato nacuata. Jumai tsane jivijavabelia: “Jivi baxaneba panamutovërena najetarucacaejitsia petuxanenë. Batoroviaexananua namuto. ⁵ Daxita namutua pafotonë rubena, atsa baothoca penamatajëpaeyaexanaenexa namuto. Daxita petsutonëmi, pinijilbotsutoxanetonëmi ata, banamatajëpaeyaexana. Baroviayaexananua penatoxorotsinamutomi ata. Banamatajëpayaexananua namutua pebobenaemëthëanëmi ata. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeya paxamëjavaberena.

⁶ Nexata daxitanacuanëpïjivi yapëtaena Dioso peca-panepaejavanexatsi pijaneconivecua, "jai baja cajena profeta Isaíaspijinë bajayata peyaquinaelivaisita, Dioso pitorobilivaisi, Juan jivi petsipaebanajetarucæjavanexa yabara.

⁷ Jivi ayaibitsaëtöxaneto pata Juanjavaberena Juan picani pebautisabinexa bajarapamonae. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpeca itsa tane isoto petajuenajetarucæjava, bajara saya paitsimë. Dioso rabaja papecananeconitsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconitsia exanaematacabinexavecua. ⁸ Itsa pajitsipame Dioso papecacapanepæjava, pacopabare pibisiacuene paneexanabiabijava. Dioso pajumecovënëtsiajinavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. Jamatabëcuenenavëxaniabiaya pëtsa panajumaitsimë: "Vaxaitsi cajena Abrahampijinë pemomoxitsi. Nexata Dioso nacacapanepaena," panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae papecacapanepaenexa Diosojavabelia. Dioso baja cajena caëjöpatsi jivi pexanaenexa mapaibotonëmi ataje, Abrahampijinë bepe-momoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecacapanepaenexa Dioso. ⁹ Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae, itsa niona bajarapon-aenë, caetuata. Xuaba isotojavabelia. Nexata bajara-ponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecata-juenexa, Dioso apo panejumecovënëtsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xainae camisa. Pajivi pexæjava xaina, tsicobetsatsi pajiviyojavabelia apo xainae pexæjava, jai Juan.

¹² Gobierno pejamatabëcuene impuestomatamo pe-matamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajarapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomata-mo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa matatoxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërë-tame. Pëtsa najumetsënëtsiaya itsajivi ata pananeconitsiaexaname saya palata papecara-jutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

¹⁵ Jivi itatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatabëcuenenavëxaniabi-aya jamatabëjumaitsi Juan yabara:

—Baja raeta jane maCristoje, daxitajivi peca-panepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espiritu Santo, pitarunutsicotia yajava. Xanë raja saya bevelia-jamatabëcuenenëne bajaraponëvecua. Nexata bajara-ponë vecuaauranë pijazapato ata tataxujonotsinexa bepijajivitonëcuenianë. ¹⁷ Arrozxainaenë baja itsa vere-ta arroz penotsijava, jëaba arroz pejëabijavata ëpexu pepitsinexa. Nexata pijaarroz pejëabijavata, tsatapona saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafua-belia petajuitsinexa. Bajara pijinia pacuenia paxamë ata, Dioso pejumecovënëtsivivecua Dioso pacatsat-siana papecaxuabinexa infiernojavabelia panenaxu-abinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamata-cabijavabelianexa apo peverevereceaesotojavabelia, jai Juan daxita bajarapamonaejavabelia.

¹⁸ Bajarapacuenia ayailivaisianëta Juan muxu-jiobapona jivi. Tsipaebanajetaruca pexanialivaisi peca-panepaelivaisinexatsi Diosojavabelia. ¹⁹ Bajaraxuacujinae icatsia Juan itaveta nacuaevetsinë Herodes. Tsipaji

Herodes pejuyapijinë pijava yacajërëta, Herodíasvënëva. Daxita Herodes pibisiacuene pexanaejavanë ata, itaveta Juan. ²⁰ Itsiata baitsi jane Juan Herodes apo jumecovënëtsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinexatsi, penaneconitsivi pejebabiabibota peetsinexatsi.

Pacuenia Juan bautisaba Jesús yabara pelivaisi

²¹ Juan pevaetabivajënaetsi penaneconitsivi pejebabiabibota peetsinexatsi, jivi bautisabaponapona. Bajaramatacabi Juan bautisaba Jesús ata. Jesús pebautisabicujinaetsi itsa vajëta Diosojavabelia, athëbëtsatsia itaboxo napatsia. ²² Athëbëvetsica Espíritu Santo naitajëtsiaya Jesús tsimatarunaicatsi beucucuto. Nexata Jesús jumetane athëbëvetsica Dioso pejumaitisijavatsi: “Xamë raja taxënatomë, bitso tacaasivanë. Bitso casi-vajamatabëcuenebarëyatsi,” pejaijavatsi.

Jesucristo pijasalinaivimi pevënëanë yabara pelivaisi

²³ Itsa baja Jesús xaina bejamatabëcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús bejosë pexënato. José paxapijinë pevënë Elí. ²⁴ Elí paxapijinë pevënë Matat. Matat paxapijinë pevënë Leví. Leví paxapijinë pevënë Melqui. Melqui paxapijinë pevënë Jana. Jana paxapijinë pevënë José. ²⁵ José paxapijinë pevënë Matatías. Matatías paxapijinë pevënë Amós. Amós paxapijinë pevënë Nahum. Nahum paxapijinë pevënë Esli. Esli paxapijinë pevënë Nagai. ²⁶ Nagai paxapijinë pevënë Maat. Maat paxapijinë pevënë Matatías. Matatías paxapijinë pevënë Semei. Semei paxapijinë pevënë Josec. Josec paxapijinë pevënë Judá. ²⁷ Judá paxapijinë pevënë Joanán. Joanán paxapijinë pevënë Resa. Resa paxapijinë pevënë Zorobabel. Zorobabel paxapijinë pevënë Salatiel. Salatiel paxapijinë pevënë Neri. ²⁸ Neri paxapijinë pevënë Melqui. Melqui paxapijinë pevënë Adi. Adi paxapijinë pevënë Cosam. Cosam paxapijinë pevënë Elmadam. Elmadam paxapijinë pevënë Er. ²⁹ Er paxapijinë pevënë Josué. Josué paxapijinë pevënë Eliezer. Eliezer paxapijinë pevënë Jorim. Jorim paxapijinë pevënë Matat. ³⁰ Matat paxapijinë pevënë Leví. Leví paxapijinë pevënë Simeón. Simeón paxapijinë pevënë Judá. Judá paxapijinë pevënë José. José paxapijinë pevënë Jonam. Jonam paxapijinë pevënë Eliaquim. ³¹ Eliaquim paxapijinë pevënë Melea. Melea paxapijinë pevënë Mena. Mena paxapijinë pevënë Matata. Matata paxapijinë pevënë Natán. ³² Natán paxapijinë pevënë David. David paxapijinë pevënë Isaí. Isaí paxapijinë pevënë Obed. Obed paxapijinë pevënë Booz. Booz paxapijinë pevënë Sala. Sala paxapijinë pevënë Naasón. ³³ Naasón paxapijinë pevënë Aminadab. Aminadab paxapijinë pevënë Admin. Admin paxapijinë pevënë Arni. Arni paxapijinë pevënë Esrom. Esrom paxapijinë pevënë Fares. Fares paxapijinë pevënë Judá. ³⁴ Judá paxapijinë pevënë Jacob. Jacob paxapijinë pevënë Isaac. Isaac paxapijinë pevënë Abraham. Abra-

ham paxapijinë pevënë Taré. Taré paxapijinë pevënë Nacor. ³⁵ Nacor paxapijinë pevënë Serug. Serug paxapijinë pevënë Ragau. Ragau paxapijinë pevënë Peleg. Peleg paxapijinë pevënë Heber. Heber paxapijinë pevënë Sala. ³⁶ Sala paxapijinë pevënë Cainán. Cainán paxapijinë pevënë Arfaxad. Arfaxad paxapijinë pevënë Sem. Sem paxapijinë pevënë Noé. Noé paxapijinë pevënë Lamec. ³⁷ Lamec paxapijinë pevënë Matusalén. Matusalén paxapijinë pevënë Enoc. Enoc paxapijinë pevënë Jared. Jared paxapijinë pevënë Mahalaleel. Mahalaleel paxapijinë pevënë Cainán. ³⁸ Cainán paxapijinë pevënë Enós. Enós paxapijinë pevënë Set. Set paxapijinë pevënë Adán. Adánpijinë Dioso pexanaenëtsi.

Pacuenia picani Jesús jamatabëcuenejëbatsi dovathi yabara pelivaisi

4 Jesús baja naviarena Jordán meneverena Juan pebautisabicujinaetsi. Tsjamatabëvënëcatsi bitso Espíritu Santo. Nexata Espíritu Santo ponaeaxanatsi petusato nacuyabelia. ² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso piyani. Dovathi nexata jamatabëcuenejëbatsi pibisiacuene picani pexanaenexa. ³ Dovathi jumaiti Jesúsjavabelia:

—Itsa pepacuene Dioso pexënatomë, itorobare mapaibotoyoje penaexanaenexa panbë, jai dovathi Jesúsjavabelia.

⁴ Jesús nexata jumaiti dovathijavabelia:

—Jume raja. Dioso raja pejumelivaisibaxutota jumaiti mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matacabi apo peverevereaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi Jesús tsitajëtatsi bepíjia daxitanacuanë. ⁶ Nexata icatsia dovathi jumaiti Jesúsjavabelia:

—Xanë raja carajutsianatsi daxita mapanacuanëje nevetsinexa. Daxita bajarapanacuanëta paitabëcuene taneme, cayajavarajutsianatsi. Nexata bitso nexainaenë tsane nexinaejava. Daxita tanerajutsijavanëmi, necaëjëpa juya tarajutsinexa pajivijavabelia jamatabërajutajë. ⁷ Ayaijamatabëcuenenënë netaeya taitabarata nematabacabëta itsa netonucacunuame, nexata daxita mapanacuanëje nijanacuanë tsane, jai dovathi Jesúsjavabelia.

⁸ Nexata Jesús jumaiti dovathijavabelia:

—Dovathi, nevecuanatixire. Dioso raja pejumelivaisibaxutota jumaiti mapacueniaje: “Daxitajivi vajëcae pematabacabëta caenë, pepo petuxanenë Diosojavabelia. Tonacuenebinua bajaraëponënexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxë icatsia Jesús barëliatsi dovathi Jerusalén tomarabelia. Jerusalén tomarata barëjunayatsi temploboxaneto matatuyabetsia. Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremeca irabereca. ¹⁰ Bajarapacuenia jirevaremeca irabereca. Tsipaji xamë peitsacueneyaniva pecaevetsinexa, Dioso pejumelivaisibaxutota jumaitsi mapacueniaje:

Dioso itorobianica pijaängelevi pecaevetsinexa.

¹¹ Nexata Ángelevi pecobeta cayotsiana pecatuxutsaquisyaniva ibotonëjavabelia, jai Dioso pejumelivaisibaxutota xamë pecaevetsinexa Ángelevi, jai dovathi Jesúsjavabelia.

¹² Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuene navëxaniabiaya pijacuata apo bejamatabëjumaitsi: ‘Xanë Dioso jamatabëcueneëjësianajë. Nexata natoexanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaenajava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabëcueneëjëbiveretatsi pibisiacuene picani Jesús pexanaenexa, nexata abaxë yatucopatatsi it-samatacabijavabelia icatsia pejamatabëcueneëjësinoxatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

¹⁴ Jesús baja itsa naviata petusato nacuaverena, Galilea nacuyaberena, Espiritu Santo pesaë yajavaponapona. Nexata daxita Galilea nacuapijivi vënëlivaisitanetsi Jesús. ¹⁵ Judíovi penacaetuatabiabi-bonëjava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponëje bitso ayajiamatabëcuenenë,” jai tsabiabi.

Pacuenia Jesús naviata pijatomarabelia, Nazaret tomarabelia, yabara pelivaisi

¹⁶ Nexata Jesús naviata pevitsabitomarabelia, Nazaret tomarabelia. Nexata pepatsicujinae Nazaret tomarata, judíovi penacueraevetsimatacabita Jesús najoneya judíovi penacaetuatabiabi-boyalialia. Tsipaji baja cajena Jesús bajarapacuenia exanabiaba. Nexata judíovi penacaetuatabiabi-bota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa. ¹⁷ Nexata Jesús tsi-coberutatsi profeta Isafáspijinë bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajëvelia Jesús yabara jumaitsi mapacueniaje:

¹⁸ Dioso pijaEspiritu Santo netsijamatabëeca. Tsipaji Dioso nitapeta tatsipaebinexa pexanialivaisi pibisi-

acuene pexanabiabijava bepeyajamatabëcuenejivijavabelia. Nitorobanua tajamatabëcuene-xani-avaetsinexa bajarapamonae pibisiacuene pexanabi-abineconi yabara bepeyajamatabëcuenejivijavave-cua. Nitorobanua tajamatabëcuene-xaniavaetsinexa pamonae pijamatabëcueneitaquirivi, pamonae abaxë apo yapëtae pexaniajailivaisi. Nitorobanua taca-panepaenexa pamonae jamatabëcuenebejibitabiabatsi pijavajabitsaë. ¹⁹ Nitorobanua tatsipaebinexa pacuenia baja Dioso najamatabëcuenevereta peca-panepaenexa pijajivi, pejaiitanejavata tajëvelia Jesús yabara Isafáspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaraxuacujinae Jesús baja bajarapabaxuto baxu-acata. Tocanaviata baja judíovi penacaetuatabiabi-bota penacuenebinëjavabelia. Bajaraxuacujinae Jesús baja icatsia ecareca. Daxita pamonae judíovi penacaetuatabiabi-bota ena, Jesús asaëyata taeyenatsi. ²¹ Nexata icatsia Jesús jumaitsi bajarapamonaejavabelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajarapabaxutota jumaitsi, bajaraxua baja aeconoxae mapamatacabitaje copiapa-ta baja, jai Jesús bajarapamonaejavabelia.

²² Nexata daxitajivi pexaniajamatabëcuenea Jesús yabara cuaicuaijai. Jamatabëcuenenabenajaca pexanialivaisi Jesús petsipaebixae. Nexata bajarapamonae Jesús jamatabëcueneaebiatanetsi. Nexata bajarapamonae nayanijobena. Najumaitsi:

—¿Matsa baja ponë Josépijinë apo pexënatoje? najai tsenae bajarapamonae Jesús yabara.

Tsipaji saya bajarapamonae jamatabëjumai tsenae:

—Josépijinë raja pexënato, jamatabëjai tsenae.

²³ Nexata Jesús jamatabëcuene yapëtanë pacuenia sivanajamatabëxainatsi bajarapamonae. Nexata Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsiatsi. Pacuenia pajumaitsimë tsabiabi pajivijoyavabelia pajamatabëcueneaebiataneme, bajara pijinia pacuenia xanëjavaberena ata panejumaitsimë tsane patanejamatabëcueneaebiatæxaemë. Panejumaitsimë tsane mapacueniaje: “Pacuenia pacavënëlivaisitanetsi Dioso pesaëta pinijicuene nexanaenajava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaetuatabiabi-bota penaevijavabelia.

²⁴ Icatsia Jesús jumaitsi bajarapamonaejavabelia:

—Xaniajanë cajena pacuenia pacatsipaebijitsiatsi. It-sanë ata Diosojumepaebinëmi profetanë pijanacuapijivi apo jumecovënëtsitsi petsipaebilivaisi. Jamatabëcuene aebiataeyabiabatsi pijanacuapijivi. ²⁵ Bajayata profetanëmibeje pinijicuene exanae atabeje, pinijicuene apo exanaebeje pijanacuata. Bajara pijinia pacuenia xanë ata pinijicuene apo exanaenë tsane tavitsabitomarata. Bajayata, abaxë pamatacabiprofeta Elíaspijinë ponapona Israel nacuata, bajarapamatacabi, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajarapamatacabi janibovajënaeya pa-

monajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae. ²⁶ Itsiata Elíaspijinë Dioso apo itorobitsi peyavenonaenexa bajarapamonaeyajuvënëva. Elíaspijinë Dioso itorobatsi peponaenexa Sarepta tomarapijivijavabelia, Sarepta tomarata pamona pevecuatëpaevatsi Elíaspijinë peyavenonaenexa. Sareptatomara eca Sidón nacuata. ²⁷ Bajayata, Elíaspijinë pevenamuto, profeta Eliseopijinë ponapona Israel nacuata. Bajayajebi bitso peperabëtsabanaevi, ayaibitsaëto picani jinavanapa Israel nacuata. Itsiata bajarapamatacabi profeta Eliseopijinë caenë ata pijanacuapijinë, bajayajebi bitso peperabëtsabanaeviyajuvënë, apo jamatejemayaexanae. Caenë bajayajebi bitso peperabëtsabanaenë Naamán, Siria nacuaverena pepatsinë, jamatejemayaexana, jai Jesús judíovi penacaetuatabiabibota penaevijavabelia. ²⁸ Nexata bajarapamonaes ita jumatane bajarpacuenia Jesús pejumaitisjava, bitso Jesús baraanaepanatsi bajarapamonaes. ²⁹ Bajarapamonaes nonobapuna. Vaetabatsi Jesús. Caponaliatsi tomaramujabelia. Patsutoyenepanata eca Nazarettomara, bajarapatsutojumabetsia Jesús caponayatsi pexuabinexatsireca picani bajarapatsuto itapajanitojavareca. ³⁰ Itsiata baitsi jane Jesús bajarapamonaes tuatuajëta najetarucaes ata, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonaes.

Pacuenia pebi, dovathi peyjavaponaponaenë, Jesús jamatejemayaexana yabara pelivaisi

³¹ Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueravevetsimatacabita. ³² Itsa bajarapamonaes jumatane palivaisi Jesús tsipaeba, jamatabëcuenenabenajaca. Tsipaji xaniavaetsia tsipaeba Dioso pitorobinëtsicuenia.

³³ Bajarajota judíovi penacaetuatabiabibota pebi, dovathi peyjavaponaponaenë, naeca. Nexata bajaraponë Jesúsjavabelia vavajai tsaxuabi. Jumaitsi:

³⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyjavaponaponaenë Jesúsjavabelia.

³⁵ Jesús nexata jumeitaveta dovathi. Jumaitsi:

—¡Moyamëre! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonaes pitabarata. Dovathi baja pebi vecuapitsapatsi itsiata itsacuenes exanaenejevatsi. ³⁶ Nexata daxitajivi bajarapacuenes ita tane, bitso jamatabëcuenenabenajaca. Najumaitsi bajarapamonaes:

—¿De meta pacuenia maponë caëjëpatsi pijumeta pexanaenexa mapacueniaje? ¡Maponëje Jesús, be-Dioso pitorobinëtsicsica! ¡Itaveta dovathi pepit-

sapaenexa jivivecua! ¡Nexata baja dovathi pitsapa jivivecua! najai bajarapamonaes.

³⁷ Nexata Jesús vënëlivaisitanetsi daxita bajarapanacuapijivi.

Pacuenia Simón Pedro pijava pena Jesús tojamatejemayaexana yabara pelivaisi

³⁸ Judíovi penacaetuatabiabibo pevecuapitsapaecuinaes, Jesús joneya Simón Pedro pijaboyalía. Nexata bajarajota Jesús pevajënaes, Simón pijava pena bitso romaebanucatsi. Nexata bajarajota itsamonaes Jesús tsipaebarecëpatsi bajarapova peromaebanucaevatsi.

³⁹ Jesús nexata cujilia peromaebanucaevatsi. Vecuaitaveta peromaebijavatsi. Nexata bajarajota peromaebanucaevatsi domaes baja vecuajibi tsanajetsisireca. Bajarapova baja jamatejema. Nexata bajarapova Jesúsvana pexaejavanexa toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

⁴⁰ Itsa baja ajena meravitsia, jivi piavitanevi, daxitaviriavitane pexainaevi, tocapatatsi Jesúsjavaberena. Jesús nexata perabëjayatapona caejivi canacujitsia, piavitanevi. Bajarapacuenia Jesús jamatejemayaexana daxita piavitanevi. ⁴¹ Itsamonaes ayaibitsaëto, dovathi peyjavajinavanapaevi, Jesús vecuacapitsapapona. Nexata dovathi ita pitsapa, vavajai tsabiabi Jesúsjavabelia.

—Xamë raja Dioso pexënatomë, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuaijainexa petsipaebiyanima itsamonaejavabelia. Tsipaji dovathi xaniavaetsia yapëtanetsi Cristo athëbëvetsica Dioso pitorobijavatsi jivi pecaapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

⁴² Bajayacunua, ajena baja matacabi tsarucaponaes, Jesús pitsapa tomaravecua. Pona pesaicaeyojavabelia. Nexata jivi pëjaitatsi. Yapënapatatsi itsajota Jesús eca. Asivatsi bajarapamonaes Jesús pevecuaponaeyaniva itsajavabelia. ⁴³ Nexata Jesús jumaitsi bajarapamonaesjavabelia:

—Itsatomaranëjava ata raja tsipaebijitsianë pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinexa jivi, Dioso baja cajena nitoroba, jai Jesús bajarapamonaesjavabelia.

⁴⁴ Bajarapacuenia Jesús Judea nacuajava livaisi jivi tsipaebanajetaruca judíovi penacaetuatabiabibonëjava.

Pacuenia dujuai bitso ayajavaxaneto juta peyamatajucaejavata yabara pelivaisi

5 Itsamatacabi Jesús nuca Genesaret pucaxaneto itapata. Nexata jivi ayaibitsaëtoxaneto cënënaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. ² Nexata Jesús anijajerabeje taeruta bajarajota pucaitapata. Bajarapamobeje

dujuai peyamatajucaevi Simónbana vecuanonobajunarëcëpa. Nexata bajarajota imoxoyo Simónbana quiatanubena dujuai peyamatajucaejava. ³ Nexata Jesús runareca jera ënëabereca, Simón pijajera ënëabereca. Jesús itoroba Simón jera peyatorotsinexatsilia tsiquirijavayo puca tuatuajëyojavabelia. Jesús eca jeraënëta. Nexata Jesús jera ënëjavaverena livaisi tsipaebeca bajarapajivi bitsaëtoxanetojavabelia. ⁴ Itsa baja Jesús copata jivi livaisi petsipaebijava, nexata jumaitsi Simónjavabelia:

—Pavaeremelia jera piavajubuajavabelia. Pacoparemecca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaitsi Jesúsjavabelia:

—Jesús, payamatajucajë rabaja picani meravijebi. Itsiata apo payamatajutsinë caenëyo ata. Itsiata pacuenia paneitorobame, pacopatsiarecajë dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaëucuucuae. ⁷ Nexata itacovaebarena penajuayamatajucaevi peponaenexarena itsamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vënëta bajarapamobeje dujuai. Imoxo dujuai peyabubunae bajarapamobeje. ⁸ Nexata Simón Pedro itsa tane bajarapacuenie, pematatabacabëta tonuca Jesús pitabarata. Jumaitsi Jesúsjavabelia:

—Tajatuxanenë, nevecuanatixire. Tsipaji xanë pibisiacuenie taexanaenë, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tsipaji penajuayamatajucaevi yajava bitso jamatabëcuenenabenajaca, bitso ayaijavaxaneto dujuai peyamatajutsixae. ¹⁰ Ponëbeje Simón yanatatsi, Santiagobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pijajivinexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënapona baja Jesús.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

¹² Jesús itsa ponapona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematatabacabëta irataeya bocajunua Jesús pitabarata. Vajëta pinijicuenia Jesúsjavabelia. Jumaitsi:

—Tajatuxanenë, cacaëjëpa raja tanejamatejemayaexanaenexamë mapavitanevecuajë. Itsa jitsipame, neja-

matejemayaexanare mapavitanevecuajë, jai bitso peperabëtsabanaenë Jesúsjavabelia.

¹³ Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jãjã, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. ¹⁴ Nexata Jesús jumeitaveta bajayajebi bitso peperabëtsabanaenëmi petsipaebianiva itsajiviyojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia jane sacerdotenëjavabelia, templobota penacuenebinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibixae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuenie baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayaibitsaëto pevënëlivaisitaeyanivatsi.

¹⁵ Itsiata Jesús vënëlivaisitanetsi daxita bajarapanacuapijivi. Nexata Jesús jivi itsa vënëliveistanetsi, ayaibitsaëtoxaneto patapona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanua piavitanejavavecu. ¹⁶ Itsiata Jesús itsajavata jivivecu natixitabiaba pesaicaeyojavabelia. Bajarajota vajëtabiaba Diosojavabelia.

Pacuenia Jesús jamatejemayaexana petabusipacuenabinëtsi yabara pelivaisi

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranëjavaverena, Judea nacuata penaetomaranëjavaverena ata, Jerusalén tomaraverena ata. Nexata bajarapamat-acabi Jesús Dioso pesaëta caëjëpaeyaexanatsi jivi pejamatejemayaexanaenexa piavitanejavavecu. ¹⁸ Nexata bajarajota Jesúsjavaberena pebijivi camayota yavëttacaraparena petabusipacuenabinëtsi. Bajarapamonae picani bajaraponë boyalia yavëttacarajonejitsialia peyabuatsinexa Jesús pitabarata. ¹⁹ Itsiata acuenebi boyalia pecajonejava. Tsipaji bitso jivi bajarapabo yavënëca. Nexata bajarapamonae petabusipacuenabinëtsi bojumabetsia cajunaya. Bomatatu javavetsica vojoexana. Nexata bajarapavojotuatsica petabusipacuenabinëtsi camayota yacopatsicatsi jivi tuatua-jëatsica Jesús pitabarayatsica. ²⁰ Jesús jamatabëcueneyapëtane pacuenia bajarapamonae sivanajamatabëxainatsi. "Nacatojamatejemayaexanaenatsi cajena," pesivajamatabëjajjavatsi Jesús jamatabëcueneyapëtane. Bajaraxuata petabusipacuenabinëtsijavabelia Jesús jumaitsi mapacueniajë:

—Pibisiacuenie rabaja nexanaeneconimi cavecuajib-iaexanatsi, jai Jesús bajaraponëjavabelia.

²¹ Nexata judíovi pecujarubivi, fariseovinu, itsa jumetaeyena Jesús pejumaitisijava bajarapacuenia, namatabëxainena bëpënëa mapacueniaje:

—¿De meta maponëje? Maponëje Dioso apo pejitsipacuenia cuaicuaijai. Itsanë ata cajena apo caëjëpaetsi itsajivi pibisiacuene pexanaeconimi pevecuaajibiaexanaenexa. Caenë Dioso caëjëpatsi itsajivi pibisiacuene pexanaeconimi pevecuaajibiaexanaenexa, jamatabëjai tsenae bajarapamonae bëpënëa Jesús yabara.

²² Nexata Jesús jamatabëcueneyapëtane bajarapamonae bëpënëa pesivanajamatabëxainenaejava bajarapacuenia. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeconini tavecuaajibiaexanaenexa. ²³ Paxamë apo pacacaëjëpae ata itsajivi pibisiacuene pexanaeconini panevecuaajibiaexanaenexa, pacacaëjëpa picani saya jema panejumaitisijava pejamatejemavijavelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo yapëtae tsipae saya jema panejumaitisijava. Itsiata baitsi jane itsa pepacuene apo pacacaëjëpae panejamatejemayaexanaenexa petabusipacuenabinëtsi, nexata acuenebi panejumaitisijava bajaraponëjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpacuene panejamatejemayaexanaenexa bajaraponë, jai nexata Jesús bajarapamonaejavabelia.

²⁴ Icatsia Jesús jumaitsi bajarapamonaejavabelia:

—Xanë, Daxitajivi Pematapijinëne, mapanacuata necaëjëpa tavecuaajibiaexanaenexa itsajivi pibisiacuene pexanaeconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaejava tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëje, jai Jesús bajarapamonaejavabelia.

Nexata icatsia Jesús jumaitsi petabusipacuenebinëtsijavabelia:

—Xamë cajumaitisiti. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumaitisijavata, petabusipacuenebinëmitsi nonotabapuna baja daxitajivi pitabarata. Pebocaecamayo pita. Pona baja pijaboyabelia. Penajetarucavata namutua, Diosojavabelia jumai tsanajetarucavata: “Diosomë, pexaniacuene netoexaname,” jai tsanajetarucavata bajaraponë. ²⁶ Nexata daxita pamona tane petabusipacuenabinëmitsi baja pejamatejemajava, pinijicuenia jamatabëcuenenabenajaca. Nexata bajarapamonae jumaitsi Diosojavabelia:

—Diosomë, pexaniacuene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junava. Nexata bajarapamonae najumaitsi:

—Ajena, mapamatacabitaje, tanetsi Dioso pinijicuenepexanaejava, najai bajarapamonae.

Pacuenia Jesús pijajivitonënexa junata Levívënëne yabara pelivaisi

²⁷ Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucavata taeyeta Levívënëne. Bajaraponë pematamoyanijobinë impuestomatamo gobierno pejamatabëcuenepabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxitapacuenepabotajota nacuenebabiaba. Pënäpona Jesús.

²⁹ Bajaraxuacujinae Leví pijabota napata Jesús. Nexata Leví pinijifiesta toexana Jesús nexa. Tsipaji Leví jamatabëcuenenavëxaniabiaya baracuaicuaijaitisijavabelia. Bajarapamonae Jesús yabara jumaitsi:

—Jesús rabaja naneconita Diosojavabelia. Tsipaji gobierno pejamatabëcuenepamatamoyanijobabiabivijavata, pijamatabëcuenepamatamoyanijobabiabivijavata, piagamatabëcuenepamatamoyanijobabiabivijavata, naxaeyeca pexaejava, jai bajarapamonae jamatabëcuenenavëxaniabiaya Jesús pijajivijavabelia.

³¹ Jesús itsa jumetane fariseovi, judíovi pecujarubivinu, pebaracuaicuaijajavatsi, nexata Jesús jumaitsi bajarapamonaejavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. ³² Bajara pijinia xanë ata itsinë. Apo sivapatajopaenë tajunatsinexa pamona baja aneconijibi tsavanapae. Sivapatajopajë raja tajunatsinexa pijaneconipexainaevi. Bajarapamonae junataponajë pecopabinexa pibisiacuene pexanaejava, penajamatabëcuenepënëyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajëtapona Diosojavabelia pexaejava apo pexaeyabiabixae yabara pelivaisi

³³ Fariseovi, judíovi pecujarubivinu, jumaitsi Jesúsjavabelia:

—Juan pijajivi, fariseovi pijajivinu, pexaejava apo xaeabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeabiaba Diosojavabelia pevajëcaematacabianë ata? jai bajarapamonae.

³⁴ Jesús nexata comparacióncuenia jumaitsi bajara-pamonaejavabelia:

—Pamonaē junatatsi penacasabifiestajavabelia penanabaninexa, apo atsobi pexaejava itsa abaxē yajavaecatsi pejananacasabinē. ³⁵ Itsiata baitsi jane itsa pejananacasabinē tsimaxēpatsipatsi pijavajabitsaē pevecuacaponaeenexatsi itsajavabelia, nexata pecovēta bajarapamonaē apo xae tsipae pexaejava. Tsipaji bitso najamatabēxainaejitsipa. Bajara pijinia itsi tajajivi ata. Tayajavaponaponaēepato abaxē apo atsobabiabi pexaejava pamatacabibeje Diosojavabelia vajēta. Itsiata pamatacabi xanē necaponaena bajarapamonaēve-cua, nexata jane baja bajarapamatacabi pexaejava apo xae tsane bitso tanesivanajamatabēxainaexae, jai Jesús peyanijobivitsijavabelia.

³⁶ Nexata bajarapamonaē perujumatabēcuene baja penavecuacopatsinexa, Jesús livaisi tsipaeba comparacióncuenia, bajarapamonaē pejumecovēnētsinexa ēpejanalivaisi, Jesús petsipaebilivaisi. Bajarapamonaē anijajamatabēcuenebeje pexainaeyaniva, perujumatabēcuene baja penavecuacopabinexa, Jesús livaisi tsipaeba comparacióncuenia. Perujumatabēcuene yabara Jesús jumaitsi bajarapamonaējavabelia mapacueniaje:

—Itsajivi ata apo caucutsi pejananaxatatsijava pejanapana pecatsarutsinexa perujunaxatatsiesetojavabelia. Itsa caucutsipa pecatsarutsinexa pejanapana perujunaxatatsiesetojavabelia, nexata bijianaējitsipa pejananaxatatsijava. Apo itajitsipaenua tsipae pejanapana perucejava perujunaxatatsiesetojavabelia. ³⁷ Itsajivi ata pijinia apo epacae pejanavinoranē perujubocodoruanējavabelia bajayajebi peyajebinexa. Pejanavinoranē itsa epacaejitsipa perujubocodoruanējavabelia, nexata pejanavinoranē yatititibia tsipae. Tsipaji perujubocodoruanē apo yanayeretsi tsipae xaniavaetsia. Tsipaji pejanavinoranē pejumalitsēxē abaxē xaina. Nexata itsa yatititibia tsipae, naxuabijitsipa vinoranēmi. ³⁸ Bajaraxuata bepaca pejanavinoranē pejanabocodoruanējavabelia. ³⁹ Itsajivi perujuvinora piapae-cujinae, apo jitsipae piapaenexa pejanavinora. Tsipaji jamatabējumaitsi: “Perujuvinora bitso xanepana pejanavinora matatoxenetsia,” jamatabējai, jai Jesús bajarapamonaējavabelia comparacióncuenia. Bajarapacuenia Jesús jumaitsi comparacióncuenia tsipaji bajarapamonaē catsiteca perujumatabēcuene. Nexata Jesús jitsipa bajarapamonaē pejumecovēnētsinexa ēpejanalivaisi, palivaisi Jesús tsipaeba.

Pacuenia Jesús pijajivi namutua siricanajetarubena trigoxu judíovi penacueraevetsimatacabita yabara pelivaisi

6 Judíovi penacueraevetsimatacabita Jesús, pijajivi yajava, najetaruca namutua trigo pabianējava. Nexata Jesús pijajivi piajanixae, trigoruanē siricanajetarubena. Xunacobenacaquiatanajetarubena. Xuxaeyabuatapona. ² Nexata fariseoviyajuvēnēvi jumaitsi Jesús pijajivijavabelia:

—Paxamē raja paexaname Dioso Moiséspijinēta penajumecopatsilivaisi vajanacaitavetsicuene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemē mapacueniaje, jai fariseovi Jesús pijajivijavabelia.

³ Jesús nexata jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimē tsipaji Dioso pejumelivais-ibaxuto paneyapētaenexa pacuenia vajasalinainēmi Davidpijinē, pebarēponaponaēvi yajava, exana pamatacabi bitso piajani? ⁴ Bajaraponē Davidpijinē joneya Dioso pijatemploboyalia. Nexata Dioso pijatem-ploboēnēta, mesajumata bobena Diosonexa ofrendacuenia petojebipanbēanē. Bajarapapanbēanē itsajivi ata apo tocopatsitsi pexaenexa penaneconitsiyaniva Diosojavabelia. Ēsacerdotevi picani pexaenexa tocopatsi. Davidpijinē apo sacerdotenē ata, pijajivi barēxae ata bajarapapanbēanē, itsiata apo vēnananeconitsi Diosojavabelia, jai Jesús fariseovijavabelia.

⁵ Catsia pematatsēnēa Jesús jumaitsi fariseovijavabelia:

—Xanē, Daxitajivi Pematapijinēnē, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús.

Pacuenia Jesús jamatejemayaexana pebi pecobetsaquenaenē yabara pelivaisi

⁶ Itsamatacabi Jesús joneya judíovi penacaetuatabi-abiboyalia judíovi penacueraevetsimatacabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaenē, naeca. ⁷ Nexata Jesús naitaxutocaevetenatsi judíovi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenē judíovi penacueraevetsimatacabita. Nexata Jesús pecobetsaquenaenē itsa jamatejemayaexana penacueraevetsimatacabita, “Jesús raja pibisiacuene exana,” pejinexa bajarapamonaē. ⁸ Nexata Jesús yapētane pacuenia bajarapamonaē sivanajamatabēxainatsi. Nexata Jesús jumaitsi pecobetsaquenaenējavabelia:

—Nonotapunare. Nucare majotaje mapamonaē pitabarataje, jai Jesús.

Nexata pecobetsaquenaenē nonotapuna. Nuca bajarapamonaē pitabarata. ⁹ Nexata Jesús jumaitsi penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

¹⁰ Jesús matatoyorotsia naēcoba daxita pamonaē ena bajarajota. Jesús jumaitsi pecobetsaquenaenējavabelia bajarapamonaē pitabēnejeva:

—Namaxērovire, jai Jesús.

Nexata baja pecobetsaquenaenē namaxērovita. Bajarajota cobexanepananajereca baja. Pecobetsaque-naejavami ajibi. ¹¹ Nexata judíovi pecujarubivi,

fariseovinu, ita tane Jesús pecobexanepanaeyaex-
anaejava pecobetsaquenaenë, bitso anaepana. Nexata
jane baja najumejaita pacuenia Jesús beyaxuabijitsiat-
si.

**Pacuenia Jesús pijajivi ayaibitsaëtoxanetoyajuvënëvi
itapeta saya doce ponëbeje apóstolevinexa yabara pe-
livaisi**

¹² Jesús pijajivi ayaibitsaëtoxanetoyajuvënëvi, doce
saya ponëbeje, itapeta apóstolevinexa. Jesús pitapetsi-
vajënaeya apóstolevinexa, junaya petsutojumabetsia
pevajëtsinexa Diosojavabelia. Nexata Jesús meravijebi
bajarapatsutojumatsia vajëta pona Diosojavabelia.

¹³ Bajayacunua, ajena baja matabi tsarucapona, Jesús
junata daxita pijajivibitsaëtoxaneto bajaraponë-
javabelia. Nexata bajarajota itapeta pijajivibitsaëtox-
anetoyajuvënëvi, doce saya ponëbeje. Bajarapamonae
Jesús vënëruba apóstolevi. ¹⁴ Pamonae Jesús itapeta
apóstolevinexa mapevënëanëje. Copiaya ponë, pevënë
Simón. Bajaraponë Jesús vënëruba itsavënë, Pedro. It-
sanë Andrés, Simón Pedro jane baja pejuyapijinë. It-
sanë Santiago. Itsanë Juan. Itsanë Felipe. Itsanë Bar-
tolomé. ¹⁵ Itsanë Mateo. Itsanë Tomás. Itsanë Santia-
go, Alfeo pexënato. Itsanë Simón, celotenë. ¹⁶ Itsanë
Judas, Santiago pejuyapijinë. Itsanë Judas Iscariote.
Bajaraponë bexëajavabelia Jesús canajetsijitsiatsi pi-
javajabitsaë pecobeyabelia pebeyaxuabinexatsi.

**Pacuenia Jesús jivi ayaibitsaëtoxaneto livaisi tsipaeba
yabara pelivaisi**

¹⁷ Jesús baja, pijajivi ayaibitsaëtoxaneto yajava,
runaica petsutojumavetsica. Nexata epatua petsu-
toyenepanajavata, itsajota ira namatajëpa, Jesús yaja-
vanuca pijajivi ayaibitsaëtoxaneto. Bajarajota nexata
jivi nacaetuata ayaibitsaëtoxaneto. Bajarapamonae
Judea nacuapijivi, itsamonae Jerusalén tomarapijivi, it-
samonae Tiro tomarapijivi, itsamonae Sidón tomarapi-
jivi. Tiro tomarabeje Sidón tomarabeje, manu-
ameneitapata ecabeje. Daxita bajarapatomaranëpijivi
nacaetuata pejumetaenexa Jesús petsipaebilivaisi. Ba-
jarapamonae patanua Jesús pejamatejemayaex-
anaenexa piavitanejavavecu. ¹⁸ Bajarapamonaeyaju-
vënëvi itsajamatabëcuene tsabiabi dovathi peja-
matabëcueneta. Bajarapamonaenua Jesús jamateje-
mayaexana. ¹⁹ Daxita pamonae bajarajota nacaetuata,
Jesús picani jamatabëjayabatsi. Tsipaji Jesús daxitajivi
piavitanejavavecu jamatejemayaexanapona pecaëjë-
pajamatabëcuenetatsi.

**Pacuenia Jesús pijajivi tsipaeba Jesús pijajivi peja-
matabëcuenebarëyajanexa, apo peja-
matabëcuenebarëyajanexana, yabara pelivaisi**

²⁰ Jesús pijajivi naëcota asaëya. Jumaitsi bajarapa-
monaejavabelia:

—Panajamatabëcuenecopabame baja Diosojavabelia
paneponaenexa Dioso pijatomarabetsia. Bajaraxuata
paxamë bepanejamatabëcuenejobivimi panijaneconi

yabara, aeconoxae baja pajamatabëcuenebarëyamë
Diosojavabelia.

²¹ 'Pajitsipame Dioso pijacuene. Paja-
matabëcuenebarëyamë baja. Tsipaji Dioso athëbëtat-
sia pacarajutsiana daxitacuene xua panamatavenon-
ame.

'Panyanuevimi pibisiacuene paneexanaeneconi
yabara, pacavecuajibiaexana baja bajarapaneconi.
Bajaraxuata itsamatacabi pajamatabëcuenebarëyamë
tsane.

²² 'Xanë, Daxitajivi Pematapijinënë, patajajivixaemë,
itsa pacaitoya tsane jivi, itsiata pasivaja-
matabëcuenebarëyamë tsane. Bajarapamonae
pacanavecuaitavetsi ata tsane, itsiata pasivaja-
matabëcuenebarëyamë tsane. Pibisiacuena pacabi-
jatae ata tsane, pibisiacuena pacabaracuajia
ata tsane, itsiata pasivajamatabëcuenebarëyamë tsane.

²³ Bajarapacuenia pacaexanae ata tsane, itsiata pasiva-
jamatabëcuenebarëyamë tsane. Tsipaji raja Dioso
athëbëtatsia pacarajutsiana bitso pexaniacuene jivi pa-
pecaitojamatabëcuene. Pamonae pacaitoya tsane,
bajarapamonae pijasalinaivimi bajayata itoya Dioso-
jumepaebivimi profetavi. Nexata bajarapamonae pi-
jasalinaivimi bajayata bejiobiaexanapona Dioso-
jumepaebivimi profetavi. Bajarapamonae aeconoxae
ata pijasalinaivimi cuenejëpavanapa. Bajaraxuata pax-
amë ata icatsia bajarapamonae pacaitoya tsane pi-
jasalinaivimi pecuenejëpavanapaexae.

²⁴ 'Daxitacuene mapanacuata panexainaevi, Dioso
bitso ayaiacuena pacabejiobiaexanaena. Tsipaji
pacabarëyamë tsavanapae ëpanexainaejava ma-
panacuataje.

²⁵ 'Bitso bepajamatabëcuenejobimë tsane daxi-
tacuene mapanacuata panenatojitsipaecuene panex-
ainaevi. Pasivajamatabëcuenebarëyamë picani tsa-
vanapae panexainaejava. Itsiata baitsi jane itsamata-
cabi ita patëpaename, panetëpaecujinae panaja-
matabëxainae name ayaicuena.

'Bepajamatabëcuenejobimë tsane panejëajë-
jaitsabiabivi sivabarëyaya mapanacuapijicueneje.
Paneasaëtsavanapaeepato abaxë mapanacuataje
panesivajamatabëcuenebarëya tsabiabixae bajara-
pacuene, panetëpaecujinae bitso payanuenae name pibisi-
acuene paneexanaeneconi.

²⁶ 'Mapanacuapijivi pexaniacuena pacabaracuajia-
jai tsabiabi saicayacuena Dioso pejumelivaisivecu
panetsipaebabiabixae. Itsiata baitsi jane pamatacabi
Dioso pacananeconitsiaexanaena, bitso bepaja-
matabëcuenejobimë tsane. Tsipaji pacuenejëpame
bajayata pamonaemi jinavanapa. Bajarapamonaemi
bajayata jivi tsipaebabiaba saicayacuena Dioso pe-
jumelivaisivecu. Nexata bajarapamonaemi pexani-
acuena baracuajiaitsi tsabiabi mapanacuapijivije,
jai Jesús pijajivi ayaibitsaëtoxanetojavabelia.

**Pacuenia Jesús pijajivi muxujioba piasivanexa pitoyavi
atatsi yabara pelivaisi**

²⁷ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pacatsipaebijitsiatsi icatsia patanenamuxunaevetsivimë. Pasivamëre papecaitoyavi ata. Pexaniacuene patoexanare pamonaë pacaitoya. ²⁸ Payavenonare pamonaë pacabijatane pibisiacuena. Pamonaë pacabaracuaicuajai pibisiacuena, patovajëre Diosojavabelia peyavenonaenexatsi. ²⁹ Itsajivi itsa pacaitabarapacabi axuaba anaeya, nexata icatsia itsanenia ata patonaitabaracaevere papecaitarapacabi axuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisa ata papeyacajërëtsinexa. ³⁰ Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. ³¹ Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaëjavabelia, jai Jesús pijajivi ayaibitsaëtoxanetojavabelia.

³² Icatsia Jesús jumaitsi pijajivijavabelia:

—Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Tsipaji pijamatabëcuenebejevi ata, pamonaë asivatsi, banamataenetsianasiva. ³³ Pexaniacuene itsa patoexanaejitsipame pexaniacuene ëpapecatoexanaevijavabelia, nexata apo paxainaemë tsipae pexaniacuene Diosojavabelia. Tsipaji pijamatabëcuenebejevi ata, pexaniacuene batoexana penajamatabëcuenejëpaevijavabelia. ³⁴ Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainaemë tsipae pexaniacuene Diosojavabelia. Tsipaji pijamatabëcuenebejevi ata, batsicopata penajamatabëcuenejëpaevijavabelia, pamonaë jamatabëcuene yapëttane baja petocanaviatsinexatsi.

³⁵ Nexata pasivamëre panijavajabitsaë ata. Bajarapamonaëjavabelia pexaniacuene patoexanare. Bajarapamonaë patsicopare panajamatabëxainaenejevamë papecatocanaviatsinexa panetsicopatsicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtatsia. Bajarapacuenia itsa paexanavanapaename, Dioso, athëbëtatsia peecaenë, pexicuenia pacaexanaena. Tsipaji Dioso pitaxutotsoniataenë pijamatabëcuenebejevi ata. Itsamonae Dioso yavenonaë atatsi, itsiata apo canaëjëtsi Dioso peyavenonaëjavatsi. Bajarapamonaë apo canaëjëtsi ata Dioso peyavenonaëjavatsi, itsiata tsiteca Dioso itaxutotsoniataeyabiaba. ³⁶ Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonae ata paitaxutotsoniataename, jai Jesús pijajivi ayaibitsaëtoxanetojavabelia.

**Pacuenia Jesús pijajivi muxujioba pitaxutotsoni-
ataenexa itsamonae ata, pacuenia bajarapamonaë ata
Dioso itaxutotsoniatanetsi, yabara pelivaisi**

³⁷ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pëtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuajamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonae apo pacabaracuaicuajai tsane pibisiacuene paneexanaejava yabara. Itsamonae pibisiacuene pacaexanaë ata, pajamatabëcuene caevare. Pabarajamatabëcuene xanepanarena. Nexata pijinia Dioso pitabarata pibisiacuene paneexanaejava Dioso jamatabëcuene caeviana. Pacabarajamatabëcuene xanepanaenana. ³⁸ Parajutaponare itsamonaejavabelia penamatavenonaëjavaxi. Nexata juya paxamë Dioso pacarajutaponaëna pacuenia jitsipa papecarajutsinexa. Pacarajutsiana xuavajëto itsamonae parajutame matatoxenetsia, jai Jesús daxitajivijavabelia petsutoyenepanajavata.

³⁹ Jesús icatsia comparacióncuenia tsipaeba bajarapamonaëjavabelia mapalivaisije:

—Ponë bitso itaxutotsëcëna, apo caëjëpaetsi pemat-acaponaenexa itsanë, ponë pijinia bitso itaxutotsëcëna. Itsa matacaponaejitsipa, nexata najuajopaejitsiparecabeje bajaraponëbeje caemëthëxanetojavareca. ⁴⁰ Itsajivi pijinia itsa nacujaruba, yapëtaë ata baja penacujarubijava, apo jamatabëcuene matatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenejëpabeje pecujarubinëtsibeje, jai Jesús pijajivijavabelia.

⁴¹ Jesús pijajiviyajuvënëvi pepacuene bepeneaneconijibivi natane. Nexata itsa cujirutane itsamonae itsacuenejavayo pexanaejava, jumai tsabiabi: “Mapitsicuene pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajarapacuenia pejumaitsabixae, Jesús pijajivi piurabinexa jumaitsi mapacueniaje:

—Pëtsa paxamë pepacuene bepeneaneconijibivi nataeya pamuxujobame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴² Nexata paxamë ata ayaineconixaneto itsa paxainame, nexata itsanëjavabelia apo bepajumaitsimë: “Tajabanenë, papibisiacuene exaname, copare,” apo bepajamë. Yamaxëitorobiaya saya bepexaniajamatabëcuenevi nataeya pacuaicuajamë tsabiabi. Itsamonae pijaneconi yabara pabaracuaicuajamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinaë paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenë itsa nacuaita, nayapëtane pavirianaecuene yabara pelivaisi

⁴³ Icatsia Jesús jumaiti pijajivi ayaibitsaëtoxanetojavabelia petsutoyenepanajavata:

—Pexaniavirianaenë itsa ubatsi, nacuaita pijinia pexaniacuai. Apo nacuaiti pibisiacuai. Ponaë pijinia pibisianaë, apo nacuaiti pexaniacuai. ⁴⁴ Caevirianaë canacujitsia yapëtanetsi itsa nacuaita. Higovëneucuito apo paucutsimë cucunanaeta. Uvaru pijinia apo paucutsimë saya pejuviënëbotota. ⁴⁵ Bajara pijinia itsi jivi ata. Pexaniajamatabëcuenenë pexaniacuene yabara cuacuajai. Tsipaji pexaniajamatabëcuene xaina pejamatabëëthëtota. Pibisiajamatabëcuenenë pijinia pibisiacuene yabara cuacuajai. Tsipaji pibisiajamatabëcuene najamatabëxaina pejamatabëëthëtota. Nexata pacuene yabara pebi pecuaibovojetota cuacuajai, bajarapacuene pitsapa pejamatabëëthëtovavavetsina, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

⁴⁶ Icatsia Jesús jumaiti pijajivi ayaibitsaëtoxanetojavabelia petsutoyenepanajavata:

—¿Detsa xuajitsia: “Tajatuxanenë,” panejamë tsabiabi ata, itsiata apo panejumecovënëtsimë patacaitorobicuenia? ⁴⁷⁻⁴⁸ Pajivi xanëjavaberena pata tanenamuxunaevetsinexa, tanejumecovënëtsinexanua, bajarapajivi apo nacueratsi tsane. Bajarapajivi piatajairata bo bepexanaenë tsane. Bajarapajivi yabara pacatsipaebianatsi. Bo pexanaenënexa, peyapëtaexae itsajota pijabo exanaejitsia pebubutsijavanexa, nexata naesituru atajaya xaniavaetsia mëthëca piatajairata. Nexata pijabo toyabubutsi ata, petojopaeyanivatsi. Bajaraxuacujinaë bo baja vereteta. Itsa baja mene avajubuatsica, pijabo toyabubutatsi. Mera asaëtsica bojavabetsica. Itsiata pijabo apo tonanequetsitsi. Tsipaji naesituru xaniavaetsia mëthëca piatajairata. Nexata bajaraponë apo nacueratsi bo pexanaejava. ⁴⁹ Pajivi nejumetae ata tsane tatsipaebilivaisi, itsiata itsa apo nejumecovënëtsi tsane tatsipaebilivaisi, nacueratsiana. Bajarapajivi tajetabota bo bepexanaenë tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. Tsipaji bo peveretetsicujinaë, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi

⁷ Jesús baja itsa najumevereta pijajivi ayaibitsaëtoxaneto livaisi petsipaebijava petsutoyenepanajavata, pona baja Jesús Capernaum tomarabelia. ² Capernaum tomarata ponapona Romano nacuapijinë, vajabitsaë pijacapitán. Bajaraponë pijajivitonë, bitso piasivanë, toavitanetsi. Totëpaejitsiatsi baja. ³ Bajara-

ponë capitán vënëlivaisitanetsi Jesús pejamatejemayaexanaponaejava piavitanevi. Nexata capitán jumaiti judíovi pijaancianovijavabelia:

—Panetojunaremelia Jesús. Pabarëpatsiaremena tajaboyaberena tanetojamatejemayaexanaenexa tajajivitonë, jai capitán judíovi pijaancianovijavabelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pinijicuenia junata. Jumaiti Jesúsjavabelia:

—Bajaraponë capitán bitso pexaniajamatabëcuenenë. Nexata tojamatejemayaexanaename pijajivitonë. ⁵ Tsipaji raja bajaraponë nacaasiva vaxaitsi judíovitsi. Matamota cajena pijapalatata vajanacatoexanetsinexa vajanacaetuatabiabibonexa, jai judíovi pijaancianovi Jesúsjavabelia.

⁶ Nexata Jesús nalia bajarapamonae pepëta. Itsa baja imoxoyotanajetarubena capitán pijabo, nexata capitán icatsia peyapëtaevitsi itoroba Jesús pemataenenaenexatsi. Capitán peyapëtaevitsi itoroba Jesúsjavabelia pejumaitsinexa mapacueniaje:

—Petuxanenë, pëtsa paremena tajaboyaberena. Apo caquenetsiataejitsipaetsi. Beveliajamatabëcuenenë raja saya xanë xamëvecua. Nexata apo xanepanaë tsipaë nenajonejava tajaboyaberena. ⁷ Apo nejamatabëcuenecaëjëpaenua taponaejava xamëjavabelia ata. Saya bajaraverena itorobare ënijume. Nexata tajajivitonë netojamatejema tsane. ⁸ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaë, tajajivi, taitorobicuenia tanetoexanabiabinexa. Nexata ita itorobajë caenë vajabitsaënë peponaenexa, bajaraponë ponabiaba. Itsa junarenajë itsanë vajabitsaënë pepatsinexa maberenaë, bajaraponë patabiabarena. Itsa itorobajë tajajivitonë tanetoexanaenexa it-sacuenejavayo, nexata netoexanabiaba. Bajara pijinia pacuenia xamë ata nexanaenexa, cacaëjëpa. Nexata saya bajaraverena ënijume itorobare saya ënijumeta tajajivitonë tanetojamatejemayaexanaenexamë, jai capitán mapacueniaje petonajumeitorobijume Jesúsjavabelia.

⁹ Jesús itsa jumetane bajarapacuenia capitán petonajumeitorobijumetsi, jamatabëcuenenabenajaca capitán petonajumeitorobijumetsi yabara. Nexata napënëyorotaxuaba Jesús. Jumaiti pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel nacuapijinë apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumaitisije, jai Jesús capitán yabara. ¹⁰ Nexata baja pamonaë capitán itorobalia Jesús petsipaebinexatsi capitán penajumeitorobilivaisi, naviabarena baja capitán pijaboyaberena. Itsa baja pata boyaberena, caxitajaraba baja capitán pijajivitonë pejamatejemanë.

Pacuenia pamona pevecuatëpaevatsi pexënato Jesús toasaëyaexana, petëpaenëmi, yabara pelivaisi

¹¹ Jesús pona Naín tomarabelia. Nexata yanatatsi pijajivi, itsamonae yajava, ayaibitsaëtoxaeto. ¹² Itsa baja Jesús patanajetaruca Naín tomara imoxoyojavata, nexata camataenenatsi petëpaenë pecanajetarubenaevi. Bajarapamonaë petëpaenë tomaravelia capitsapa pemëthëtsinexa tomarapënyëabelia. Ponë tëpa, bajaraponëmi pamona pevecuatëpaevatsi pexënato, pepo cainë. Nexata pamona pevecuatëpaevatsi pexënato, petëpaenë, itsa caponaliatsi pemëthëtsinexatsi, tomaraverena jivi ayaibitsaëtoxaeto pënaponatsi.

¹³ Nexata Jesús itsa tane bajarapova, tsitabejiobitsi bitso. Nexata Jesús jumaitsi bajarapovajavabelia:

—Matanueyabijitsipame, jai Jesús.

¹⁴ Nexata Jesús cujitalabalia petëpaenë peyacajonia-canajetarubenaevi. Pecobeta jayata cajoni. Nexata petëpaenë peyacajoniacanajetarubenaevi, nube-naothopa. Nexata Jesús jumaitsi petëpaenëjavabelia:

—Pevëjëato, xanë raja cajumaitsitsi. Namatacore, jai Jesús.

¹⁵ Nexata baja petëpaenëmi namatacota. Cuaicuaijai. Jesús baja tocanaviata piasaënë penajavabelia. ¹⁶ Nexata daxita petaevitsi jamatabëcuenenabenajaca. Najumaitsi bajarapamonaë:

—Dioso bitso ayaijamatabëcuenenë. Pinijijamatabëcuene pexainaenë, profeta, nacatsitanajamatabëcueneitajëta. Dioso pinijicuene pexanaejava ata nacatsitajëta vajataenexa, najai bajarapamonaë Jesús yabara.

¹⁷ Daxita Judea nacuapijivi, imoxoyo nacuanëjjava ata pejinavanapaevi, Jesús vënëlivaisitanetsi xua exana.

Pacuenia Juan jivibautisabinë itoroba pijajivitonëbeje Jesúsjavabelia yabara pelivaisi

¹⁸ Juan jivibautisabinë naneconitsia ponapona penaneconitsivi pejebabiabibota. Nexata pijajivi tsi-paebatsi daxita Jesús pexanaponaejava yabara. Nexata Juan junata anijanëbeje pijajivitonëbeje pitorobinexa Jesúsjavabelia. ¹⁹ Juan pitorobivajënaë pijajivitonëbeje, jumaitsi bajaraponëbejejavabelia:

—Pajumaitsimëbeje tsane Jesúsjavabelia: “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë athëbëvetsica Dioso pitorobinexatsicatsi jivi pecapanepaenexa? jai raja Juan,” pajamëbeje tsane Jesúsjavabelia, jai Juan pijajivitonëbejejavabelia.

²⁰ Nexata Juan pijajivitonëbeje itsa patabeje Jesúsjavabelia, Juan pijajivitonëbeje jumaitsibeje Jesúsjavabelia:

—Juan raja jivibautisabinë paneitorobabeje patacayanijobinexabeje. “¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë,

¿abaxë tsaja pacopiaevetavanapaenajë itsanë pepatsijavanexatsica?” jai raja Juan, jai-beje jane baja Jesúsjavabelia.

²¹ Nexata bajaraponëbeje pitabëta Jesús jamatejemayaexanapona ayaibitsaëtoxaeto piavitanevi. Dovathi peyajavajinavanapaevi ata vecuacapitsapa dovathi. Itaxutoxanepanaëyaexananua pamonaë bitso itaxutotsëcëna. ²² Nexata Jesús jumaitsi Juan pijajivitonëbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaëyaexanaponaë. Bajayajebi bitso peperabëtsabanaevinua vecuaajibiaexanaponaë baja. Bitso pemuxusipanaevinua jumetaëyaexanaponaë baja xaniavaetsia pejumetaenexa. Petëpaevimi ata icatsia asaëyaexanaponaë. Pexanialivaisinua pecapanepaelivaisinexatsi pibisiacuene pexanaeconimivecua, tsi-paebaponaë bepejiobivijavabelia. Daxita bajaraxua taexanaponaejava patanetaejavamëbeje, patsipaebianamebeje Juanjavabelia. ²³ Pajumaitsimëbejenua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca nejumecovënëta xanë Dioso pexënatocuenenë,’ jai raja Jesús,” pajamëbeje tsane Juanjavabelia, jai Jesús Juan pijajivitonëbejejavabelia.

²⁴ Itsa baja Juan pijajivitonëbeje naviatabeje, nexata bajaraponëbeje pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëbijava jovibota? ²⁵ Itsa apo paponamëlia panetaenexa musuli penajëbijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneje. Pamonaë naitabëtsiaya pexaniajava naxatababiaba, pamonaë ata nabanebiaba pexanianabanijavanë, bajarapamonaë jinavanapa nacuanë pevetsivi pijabonëjjava. ²⁶ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuene jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ²⁷ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena, Dioso pejumelivaisibaxutota jumaitsi mapacueniaje:

Itorobianajë nevajënaeyabelia tanejumelivaisipaebinënexa jivi pecatsivajënaë najamatabëcuenexani-

avaetsinexa, jai bajayata Dioso pejumelivaisibaxutota athëbëvetsica tapatsivajënaeyatsica Juan tanelivaisi paebanajetaruaejavanexa yabara.

²⁸ Juan ayaijamatabëcuenenë mapanacuataje. Nexata bajayata Juan pevajënaeya paprofetavimi jinavanapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcuenejivi ata, itsa najamatabëcopata baja Diosojavabelia pijatuxanenë pexanaenexa, bajarapajivi juya Dioso ayaijamatabëcuenejivi exanaenatsi Juan matatoxenetsia, jai Jesús Juan jivibautisabinë yabara.

²⁹ Juan vënëlivaisitanetsi daxitajivi. Impuestomatamo pematamoyanijobivi ata gobierno pejamatabëcuene, vënëlivaisitanetsi. Bajarapamonae jumecovënëta palivaisi Dioso najumecopata Juanjavabelia. Nexata Juan bautisaba bajarapamonae. ³⁰ Itsiata fariseovi, judiovi pecujarubivinuua, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

³¹ Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papacayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: ³² “Bajarapamonae abaxë saya bepejevaxijivixi, pajivixi tomara tuatua-jëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacatonaxëanecatsi picani panemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonae aeconoxae jinavanapa mapanacuataje,” janë meta tsane paxamë yabara. ³³ Juan jivibautisabinë Dioso pitorobilivaisi jivi tsipaebanajetarua. Pexaejava itsajavata apo xaeyabiabi pamatacabibeje Diosojavabelia vajëta. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi javavaponapona!” pajamë tsabiabi jamatabëcuenenavëxaniabiaya. ³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënuua. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonae ata piamatabëcuenebejevi, barënajamatabëcuenejëpa,” pajamë tsabiabi xanë yabara. ³⁵ Itsiata baitsi jane itsamonae xaniavaetsia yapëtaena paxanëbeje Juanbeje Dioso pejamatabëcueneta bitso pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanabeje pepacuene pepo pexaniajaijamatabëcuene, jai Jesús mapacueniaje jivijavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënë, pijabota Jesús penanabainexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabainexa. ³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavaneja Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexania petuxujuviaceitera. Bajarapova capata bajarapaaceitera Jesús petsitaxuepacaenexa. ³⁸ Nexata bajarapova Jesús petaxusalibënenia, pematatabacabëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematana taxuiquica. Bajaraxuacujinae yayataeya taxutsutsune. Tsitaxuepaca jane baja petuxujuviaceitera.

³⁹ Nexata Simón, ponë Jesús junatatsi, itsa tane pacuenia petiriva exana Jesúsjavabelia, nexata Simón jamatabëjumaitsi mapacueniaje:

—Itsa peneta pepacuene maponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajë livaisiyo tacatsipaebinexa, jai Jesús. Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneyabatsi quinientos padenariobeje. Itsanë amoneyabatsi saya cincuenta padenariobeje. ⁴² Nexata bajaraponëbeje apo xinaebeje juya petocanaviatsinexabeje petsicopatsimatamotsibeje. Nexata palata petsicopatsinë jumaitsi bajaraponëbejejavabelia: “Iquinajë baja bajaraxuami pataniamoneyabijavamëbeje. Naxuabi baja jema,” jai. ¿Detsa nexata ponë bitso sivajamatabëcuenebarëya palata petsicopatsinëtsibejejavabelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenebarëya palata petsicopatsinëtsijavabelia, jai Simón.

Nexata Jesús jumaitsi:

—Xaniajamë rabaja, jai Jesús Simónjavabelia.

⁴⁴ Jesús napënëyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanëjavaberena mapovaje? Xanë junuajë nijaboyaberena. Itsiata yayataeya xaniavaetsia apo necopiapitsimë. Apo

nerajutsimë mera ata tanataxuiquatsinexa. Mapovaje netaxuquiata baja pitaxutobarëmeneta. Netaxuiquicanua pematana. ⁴⁵ Xamë nijabota patsi atanë, apo nitabaratsutsunimë tanecopiapitsinexamë xaniavaetsia. Mapovaje tapatsicujinae apo copatsi cajena yayataeya tanetaxutsutsuneponejava. ⁴⁶ Xamë xaniavaetsia tanecopiapitsinexamë, apo netsi-mataepanaemë aceitera. Mapovaje netsitaxuepaca pexaniapetuxujuviaceitera. ⁴⁷ Nexata catsipaebatsi neyapëtaenexa mapacueenje. Mapovaje pinijicuenia nesivajamatabëcuenebarëya. Tsi-paji ayaineconi ata pibisiacuene pexanaeneconimi, vecuaajibiaexanajë. Pajivi saya tsiquirineconiyo vecuaajibiaexanajë, pibisiacuene pexanaeneconi, nayapëtane. Tsi-paji saya bajarapajivi tsiquirijavayo nesivajamatabëcuenebarëya, jai Jesús Simónjavabelia.

⁴⁸ Nexata Jesús jumaitsi petirivajavabelia:

—Pibisiacuene rabaja nexanaeneconimi cavecuaajibiaexanatsi, jai Jesús.

⁴⁹ Itsamonae ata, pamona Simón junata penanabanninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponëje? Jamatabëcuenenavëxaniabiaya natane bepejamatabëcuenecajëpaenëtsi jivi pibisiacuene pexanaeneconi pevecuaajibiaexanaenexa, najai tsenae bajarapamonae.

⁵⁰ Nexata Jesús jumaitsi petirivajavabelia:

—Dioso pecacapanepaeva tsane pibisiacuene nexanaeneconimivecua. Tsi-paji nesivanajamatabëcuene copatame xanëjavaberena. Jamatejema baja ponare. Cavecuaajibiaexanatsi rabaja pibisiacuene nexanaeneconimi, jai Jesús petirivajavabelia.

Pacuenia Jesús, pijajivi, pebijivi, petiriavinua, yajavana-jetaruca yabara pelivaisi

8 Simón pijabota Jesús penanabanicujinae, najetaruca pinijitotomaranëjava, tsiquiritomaraxijava ata. Tsi-paebanajetaruca pacuenia Dioso pijajivi evetsijitsia. Jesús, pijajivi doce ponëbeje, apóstolevi, yajavanajetaruca. ² Jesús yajavanajetaruca petiriavinua, papetiriavi dovathi vecuacapitsapa yajuvënëvi. Pape-tiriavi ata piavitanejavavecua Jesús jamatejemaya exana yajuvënëvi, Jesús yajavanajetaruca. Bajarapapetiri-aviyajuvënëva, caeva pevënë María, Magdala tomara-pijiva. Bajarapova Jesús vecuacapitsapa siete ponëbeje dovathivi. Bajarapadovathivi Jesús pevecuacapitsapae-cujinae, María pënaponatsi. ³ Itsava pevënë Juana, Cuzavënënë pijava. Bajaraponë Cuzavënënë, nacuaevevtsinë Herodes pijajivitonë. Itsava pevënë Susana. Bajarapapetiriavi pematatsënë, itsapetiriavi, ayaibitsaëto, yajavanajetaruca Jesús. Bajarapapetiriavi pexainaepalatayajuvënëjava, rajuta Jesúsjavabelia. Nexata xuaxi Jesús pijajivi barënamatavenona pebarë-comuatsinexa bajarapapalatata.

Pacuenia Jesús jivi livaisi tsipaeba peubinë pelivaisicuenia yabara pelivaisi

⁴ Jivi naropoba tomananëjavaverena. Pata Jesúsjavaberena petaenexatsi. Itsa baja ayaibitsaëto xaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵ —Peubinë pona pabiabelia peubinexa. Nexata itsa pata pabita, peubixu pexucayajabajarabicuenia ubanajetaruca. Nexata itsaxu othopa pabi tuatujëjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva baratsui xane. ⁶ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu juvi ata, tsaquenapona. Tsi-paji ira tseva. ⁷ Itsaxu pijinia othopa xanëbacabomijavata. Nexata peubixu xanëbotonë caecuenia itsa yajavajuva, bitso xanëbotonë matacënënatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuaita. Itsabotonë capitsapa cien paxutoyobeje ata, jai Jesús jivi ayaibitsaëto xanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuenia yabara Jesús jivijavabelia livaisi tsipaeba ëcomparacióncuenia yabara pelivaisi

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuenia abaxë daxitajivi apo yapëtae. Bajaraxuata bajarapamonae itsa tsipaebajë livaisi, ëcomparacióncuenia tsipaebaponajë. Nexata bajarapamonae tae ata Dioso pesaëta pinijicuenia taexanaejava, itsiata apo yapëtae pajamatabëcuene yabara exanajë pinijicuenia taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

Pacuenia Jesús yapëtaeyaexana pijajivi pajamatabëcuene xaina palivaisi tsipaeba peubinë pelivaisicuenia yabara pelivaisi

¹¹ Icatsia Jesús jumaitsi pijajivijavabelia:

—Mara pajamatabëcuene livaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëëthëtota. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. ¹² Nexata pacuenia itsi pabita peubixu, paxu oth-

opa pabi tuatujëjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevajënaeyabelia Dioso pejumecovënëtsiyaniva, Dioso pecapanepaeyanivatsi pibisiacuene pexanaeconivecua. ¹³ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae Dioso pitorobilivaisi jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepiarioca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji saya caeepatoyo jumecovënëta bajarapalivaisi. Nexata paepatota dovathi jamatabëcueneëjëtatsi, copaba baja bajarapalivaisi pejumecovënëtsijavami. ¹⁴ Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae. ¹⁵ Pacuenia pijinia itsi paxu othopa pexaniairata, bajara tsijamatabëcueneitsitsi itsamonae Dioso pitorobilivaisi. Bajarapamonae ajamatabëcuenuirajibi. Èpexaniajamatabëcuene najamatabëxaina. Casaë tsavanaepae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcuenevitsabaponatsi pevajënaeyabelia. Tsipaji exanavanapa Dioso pitorobicueniatsi, jai Jesús pijajivijavabelia itsa tsipaeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi

¹⁶ Icatsia Jesús jumaitsi pijajivijavabelia:
—Itsajivi ata lámparabë pitanojotsicujinae, apo mataacatetsi itsacuenejavata. Cama bëxëpanalia ata apo etsi. Biji rajane athëbëyo etsia jivi boyaberena pejonevi petsivajënaeitayotecaenexa. ¹⁷ Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponanë. Itsamonae nejumetae ata, aeconoxae abaxë apo nejumeyapëtae pajamatabëcuene xaina

tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata panejumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. Pajivi xaniavaetsia nejumeyapëtaepatacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtae, nacofënëtsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

¹⁹ Jesús pejuyapijivi, pena yajava, pata Jesúsjavabere-na. Itsiata acuenebi bajarapamonae pimoxoyotsijava Jesús. Tsipaji bitso jivi ayailbitsaëto Jesús matatoyorotsia vënëcatsi. ²⁰ Nexata pamonaë Jesús petsipaebilivaisi matatoyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Bajarapamonae pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonaejavabelia:

—Pamonae jumetane Dioso pejumelivaisi, jumecovënëtanua pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

Pacuenia Jesús itaveta joviboxaneto, malataca yajava, piayaijavami yabara pelivaisi

²² Itsamatacabi Galilea nacuata Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

²³ Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata vënëcapona jera ënëaberena. Bubunaëjitsia baja bajarapamo. ²⁴ Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Piniijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba. ²⁵ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi ita tane Jesús pitavetsijava jovi-bo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponanë, Jesús vecuacapitsapa Gerasa nacuata yabara pelivaisi

²⁶ Jesús pijajivi barëyaëta pucaxaneto itsapanabelia, Gerasa nacuayabelia. Gerasanacua boca puca itsapanaverena, Galileanacua pecanacujitsialia. ²⁷ Itsa Jesús jeravecua nonotajunaya, mataenenarenatsi bajarapanacuapijinë, dovathivi peyajavaponaponanë. Bajaraponë bajayajebi baja jumasa ponaponabiaba. Pijabota apo ponaponae. Jivimëthëanëjavata saya ponaponabiaba. ²⁸ Nexata bajaraponë ita pata Jesúsjavaberena, pematatabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacuene bitso cavajëtatsi. Nejamatabëcuenebejiobitsipame, jai dovathivi peyajavaponaponanë Jesúsjavabelia.

²⁹ Bajarapacuenia jumaitsi dovathivi peyajavaponaponanë tsipaji Jesús jerajavavetsina penonotajunaejavata, dovathivi peyajavaponaponanë pemataene-naejavatatsi, Jesús itaveta dovathivi. Jesús jumaitsi dovathivijavabelia mapacueniaje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenexa. Itsiata baitsi dovathivi peyajavaponaponanë ucubabiaba cadenamaëtonëmi. Dovathivi pejamatabëcueneta najetabajiravabiaba petusatuabelia.

³⁰ Nexata Jesús jumaitsi bajaraponëjavabelia:

—¿Detsa pavënëmë? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaibitsaëtoxoneto tsijamatabëjinavanapatsi. ³¹ Bajarapadovathivi vajëta Jesúsjavabelia infiernojavabelia Jesús pitorobianiva. ³² Nexata bajarajota, imoxoyo petsutojavata, marranobitsaëtoxoneto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoxonetojavabelia, jai dovathivi.

Jesús nexata pevajëtsicueniatsi tocopata. ³³ Nexata dovathivi pebi vecuapitsapatsi. Nexata marranobitsaëtoxonetojavabelia baja junua dovathivi. Nexata daxita bajarapamarranobitsaëtoxonetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoxonetomi meneta bubuna.

³⁴ Marrano pevetsivi ita tane bajarapacuenia, rëcëpeca. Pona, pacuene tane, petsipaebinexa

tomarapijivijavabelia, petsipaebinexa vayafotusatojava penaevijavabelia ata. ³⁵ Nexata jivi ponarena petaenexa bajarapacuenia. Jivi ita parena Jesúsjavaberena, taeyeta dovathivi peyajavaponaponanëmi peecaevajava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. ³⁶ Pamonae cuenetanetsi Jesús pejamatejemayaexanaejava dovathivi peyajavaponaponanëmi, bajarapamonae paeba pepatsivijavabelia daxita pacuenia tane. ³⁷ Bajarapamonae bitso cujunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

Nexata baja Jesús runareca jera ënëabereca. Ponaejitsia baja. ³⁸ Nexata dovathivi peyajavaponaponanëmi bitso picani navajëca Jesúsjavabelia penaponanexa picani Jesús pepëta.

—Petuxanenë, netocopare tanaponanexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia: ³⁹ —Ponare nijamonaejavabelia. Tsipaebianame pacuenia ayaicuene nijatuxanenë Dioso catonexa, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

⁴⁰ Jesús icatsia pecovëyaberena naviarena jerata pucaxaneto itsapanaverena. Nexata jivi ayaibitsaëtoxoneto copiapitatsi barëyaya. Tsipaji baja cajena copiaevetavanapatsi pepatsijavarena. ⁴¹ Nexata bajarajota napatajopa Jairovënënë. Bajaraponë judïovi penacaetutatabiabibo pevetsinë. Jairo pematatabacabëta yaiyataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴² Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëtoxoneto Jesús pepënaponaevitsi matatoyorotsia cënënanajetarubenatsi.

⁴³ Bajarapajivibitsaëtoxoneto tuatujëta, itsava pijanacuene pecapunaevatsi nanajetaruca. Bajarapova pijanacuene pecapunaecujinaetsi, doce baja pavaibeje xaina. Beyajiobi tsabiabi bajarapajana. Daxita pexainaejavaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevecua. ⁴⁴ Nexata bajarapova ponataba Jesús pepënevëlia, jivibitsaëtoxoneto tuatujëalia. Nexata bajarapova tojayataba Jesús penaxatatsijavacopia. Nexata bajarapaepatota pijanacuenemi vecuaajibitsi baja.

⁴⁵ Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxaneto raja camatatoy-orotsia cënënanajetarubena. Apo becaajayatsijibi.

¿Detsa xuajitsia: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrobana.

⁴⁶ Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapajiviyo tajamatejemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapëthane tanejamatejemayaexanaejava, jamatabëjai.

Nexata bajarapova najetabarena Jesús pitabarayabarena. Neconecojai pecajunavi. Pematatabëta tonucajunua Jesús pitabarata. Bajarapova nexata navajunupaeba daxitajivi tuatujëta pacuene yabara tojayataba Jesús penaxatatsijava. Nava-junupaebanua pacuenia jamatejemayaexanatsi pejayatabijavata. ⁴⁸ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabianajë, tavitaneyavami nevecuaajibi tsane,” nesivajamatabëjamë. Bajaraxuata jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajaraponë Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberenana. Nexënatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayailbit-saëto penajonenexa Jesús pepëta petëpaevayo pebo-caejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, bajara saya pamatabëxëyo tocopata penajonenexa Jesús pepëta. Pamona Jesús pevajënae ena Jairo pijabota, bajarapamona Jesús pitsapaeyaexana.

⁵² Daxitajivi pinijicuenia matanueyaba petëpanucae-vayo. Nexata Jesús jumaitsi:

—Pëtsa pamatanueyabame. Pejanava raja apo tëpae. Saya raja majitanuca, jai Jesús bajarapamonaejavabelia tsipaji yapëthane Jesús piasaëyaexanaejavanexa bajarapovayo.

⁵³ Bajarapacuenia Jesús pejumaitssijava, bajarapamona saya Jesús jumecapocaponatsi. Tsipaji bajarapamona yapëthane bajarapovayo baja picani

pepacuene petëpaejava. ⁵⁴ Nexata Jesús petëpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumaitssijavata, petëpanucaeavayomi nonotabapuna. Asaë baja icatsia petëpaevayomi. Nexata Jesús jumaitsi pejanavayo pe-najavabelia:

—Nexënatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabëcuenenabenajacabeje. Nexata Jesús jumaitsi bajarapajivibejevabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

9 Jesús junata pijajivi, doce ponëbeje, penacaetu-atsinexa. Nexata Jesús jumaitsi bajarapamonaejavabelia mapacueniaje:

—Pacajamatabëcuene caëjëpaeyaexanatsi rabaja papecaëjëpaejamatabëcuene dovathi peyajavajinavanapaevi ata panevecuacapitsaponaenexa. Pacajamatabëcuene caëjëpaeyaexanatsinua piavitanevi ata panejamatejemayaexanaponaenexa. ² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

³ Jesús jane baja pijajivi penaropobivajënae, Jesús jumaitsi pijajivijavabelia mapacueniaje:

—Pëtsa itsacuenejava ata pacaponame panijanamu-tonexa. Pëtsa pacaponame naebo, doro ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame.

⁴ Itsa papatabiabianame tomarata, caebota pama-jitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename.

⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajënae bajarapatomara, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, yapëtaena bajarapatomarapijivi Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacuene pexanaeconomiecua. Jamatejemayaexanaponanua piavitanevi daxitajava.

Pacuenia Juanpijinë jivibautisabinëmi beyaxuabatsi yabara pelivaisi

⁷ Herodes, Galileanacua pevetsinë, vënëlivaisitanetsi daxita Jesús pinijicuenia pexanaponaejava. Nexata Herodes najamatabëcueneepatajërërëcaeya naja-

matabëxaina Jesús yabara. Tsipaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpae-cujinae icatsia asaë,” jai tsaponae Jesús yabara. Nexata bajarapacuenia itsamonae pejumaitssaponaejava Herodes pejumetaexae, najamatabëcueneepatajërë-caeya najamatabëxaina Jesús yabara.

⁸ Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspi-jinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiyajuvënë, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaitssaponaejava Jesús yabara, Herodes jumetane.

⁹ Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxuabinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicue pexanaponaeva, vënëlivaisi-taeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

Pacuenia Jesús pexaejava rajuta cinco mil ponëbeje yabara pelivaisi

¹⁰ Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia. ¹¹ Itsiata baitsi jane jivi ayabitsaëtoxoneto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjava-ta, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pijajivi mapanacuataje. Jesús jamatejemayaexananua piavitanevi.

¹² Itsa baja caniviyo tsaponae, Jesús pijajivi doce ponëbeje cujibarenatsi. Jumaitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae namajitsiana. Pexaejavana namitsavajëtsiana. Majotaje ajibi pexaejava. Tsipaji itsajivi ata pijabo apo xinae majotaje, jai Jesús pijajivi.

¹³ Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomua-caenexa pexaejava daxita mapamonae penaxaenexaje? jai Jesús pijajivi.

¹⁴ Bajarapajivibitsaëtoxoneto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponae caebitsaë-tota, jai Jesús pijajivijavabelia.

¹⁵ Nexata Jesús pijajivi bajarapacuenia exana.

Enaeyaexana jane baja daxita jivibitsaëtoxoneto.

¹⁶ Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacue panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona, dujuainëyobeje yajava. Pepatsicacaejava pijajivijavabelia rajutapona petsicobetsanaenexa daxitajivi. ¹⁷ Daxita xaniavaetsia nabane. Bajaraxuacujinae jivi peyajuvënë-copabejebijavanë, Jesús pijajivi vënëba doce xuabeje bemapirecuenia pexanaejavanë.

Pacuenia Pedro jumaitsi Jesúsjavabelia: “¿Xamë raja Cristomë!” jai yabara pelivaisi

¹⁸ Itsamatacabi Jesús caenë vajëta Diosojavabelia pijajivi pitabëta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁹ Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinë raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta. Profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënë icatsia asaë,” jai tsabiabi xamë yabara, jai Jesús pijajivi.

²⁰ Nexata icatsia Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë raja cajena Cristomë, athëbëvetsica Dioso pecaitorobinëtsica jivi necapanapaenexa. Xamë cajena Dioso pexënatomë, jai Pedro Jesúsjavabelia.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

²¹ Jesús jumeitaveta pijajivi. Jumaitsi mapacueniaje:

—Pëtsa pajumaitsimë jivijavabelia: “Jesús raja Dioso pexënato,” pajamë pëtsa, jai Jesús.

²² Nexata Jesús pebeyaxuabijavanexatsi, tajëvelia navajunupaeba. Jumaitsi pijajivijavabelia mapacueniaje:

—Xanë, Daxitajivi Pematapijinënë, pinijicuenia bejibinë tsane. Judíovi pijaancianovi, sacerdotevi penamatacaitorobivina, judíovi pecujarubivina, apo ne-jumecovënëtsi tsane xanë Cristonëcuenenë. Nexata bitso nebejibioaexanaena. Bajaraxuacujinae nebeyaxuabiana. Itsiata baitsi jane tatëpae-cujinae, acueyabi matakabita, icatsia asaënë tsane, jai Jesús pi-

jajivijavabelia tajëvelia penavajunupaebijavata pe-beyaxuabijavanexatsi.

²³ Bajaraxuacujinae Jesús jumaitsi daxitajivijavabelia: —Pajivi jitsipa tanepënaponaejava, bajarapajivi copatsi penatojitsipaecuenia pexanaenexa penajamatabëxainabiabijavami. Exanaponaponaetaitorobicuenia. Bajarapajivi caematacabi canacujitsia najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabëcuenesaë tsaponaponaenexa. Nexata jane baja xuacujinae nepënaponaena. ²⁴ Pajivi exanaponapona penatojitsipaecuenia, apo xainae tsane matacabi apo peverevereaejava. Pajivi xanë taja-matabëcueneta copata penatojitsipaecuenia pexanaejavami, bajarapajivi xainaena matacabi apo peverevereaejava. ²⁵ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicuenije, itsiata nacerata. Tsipaji pexainaecuenie apo capanepae tsanetsi Diosojavabelia. ²⁶ Pajivi tajajivitonë ata, navënëlivaisicaura tsane jivijavabelia xanë tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabi icatsia patsianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajënuva Dioso pijaängelevi. ²⁷ Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

Pacuenia Jesús caeepatoyo perabënenivenenataba yabara pelivaisi

²⁸ Jesús petëpaejavanexa tajëvelia penayajunupaebicujinae, bejamatabëcuene ocho pamatacabibejecujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya petsutojumabetsia pevajëtsinexa Diosojavabelia. ²⁹ Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. ³⁰ Bajarajota jemata naitajëta anijanëbeje, ponëmibeje bajayata tēpa. Bajaraponëbeje Jesús barëcuaicuaijatsi. Bajaraponëbeje tsaena Moiséspijinëbeje Elíaspijinëbeje. ³¹ Bajaraponëbeje matatoyorotsia nivenivenabeje. Jesús bana nabarëcuaicuaijai Jesús petëpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacuenie yabara nabarëcuaicuaijai. ³² Pedrobana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenuva Moisésbeje Elíasbeje pebarëcuaicuaijavatsi Jesús. ³³ Itsa baja Moisésbe-

je Elíasbeje Jesúsvecua ponaejitsiatsibeje, nexata bajarapaeapatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtoebeje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro.

Pedro xaniavaetsia najamatabëxainaenejeva, bajarapacuenia jumaitsi. ³⁴ Pedro abaxë itsa cuaicuaijai tsanuca, itarërëbo mataacataxuabatsi daxita bajarapamonae. Jesús pijajivi najunaviaca ita mataacataxuabatsi itarërëbo. ³⁵ Nexata bajarapaitarërëbojavavetsica Dioso jumaitssica:

—Mara ponë taxënato, tasivanëje. Bajaraponë panamuxunaevere, jaitsica Dioso itarërëbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumaitssijavatsica, Jesús pijajivi tane caenë baja Jesús penucaejava bajarajota. Jesús pijajivi tae ata bajarapacuenie, moya saya jinavanapa. Bajarapamonae abaxë apo tsipaebi itsamonaejavabelia, tae ata bajarapacuenie.

Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi

³⁷ Jesús pebarëcuaicuaijajicujinae Moisésbeje Elíasbeje, pijajivi acueyabi ponëbeje yajava, naviatsica petsutojumavetsica. Nexata mataenenatsi jivi ayaibitsaëttoxaneto. ³⁸ Nexata caenë bajarapajivi bitsaëttoxaneto yajuvënë pinijijumeta jumaitsi Jesúsjavabelia:

—Jesús, nitaxutotsoniataema. Netotaema taxënatonëyo. Caenëyo rabaja tsipaji xainajë. ³⁹ Dovathi vaetababiabatsi. Nexata jemata aëjai tsabiabi. Tēpajoneyaexanabiabatsi. Daxitanë neconecojaia aperabëbaba tsatababiabireca. Nexata bajarajota pecuibothamu tsabiabi. Bitso bejiobiaexanabiabatsi. Dovathi abaxë apo jamatabëcopatsitsi. ⁴⁰ Picani raja nijajivijavabelia jumaitsinë: “Panetovecuacapitsapare dovathi,” janë. Itsiata apo caëjēpaetsi tanetovecuacapitsapaenexa, jai bajaraponë Jesúsjavabelia.

⁴¹ Nexata Jesús jumaitsi daxita pijajivijavabelia: —¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjēpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! ¿Detsa paepatojebi abaxë paxamëjavabelia jamatabëcuenesaënë tsaponapona tsane patanejumecovënëtsinexamë? jai Jesús daxita pijajivijavabelia.

Nexata Jesús jumaitsi pejevaxinë paxajavabelia: —Barërenamëre nexënatonëyo, jai Jesús.

⁴² Ajena pejevaxinë imoxoyotabarena Jesúsjavabarena, dovathi icatsia irata xuabatsi pejevaxinë. Daxitanë aperabëbaba tsatabireca. Nexata Jesús itaveta dovathi pejevaxinë pevecuapitsapaenexatsi. Nexata baja Jesús jamatejemayaexana pejevaxinë. Tocanaviata baja pejamatejemanë paxajavabelia. ⁴³ Daxitajivi bitso jamatabëcuenenabenajaca Dioso pesaëta Jesús pevecuacapitsapaexae dovathi bajaraponëyo.

**Pacuenia icatsia Jesús tajëvelia navajunupaeba pe-
beyaxuabijavanexatsi yabara pelivaisi**

Jivibitsaëtoxaneto Jesús jamatabëcuenebarëyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

⁴⁴ —Xaniavaetsia panenamuxunaevere. Pëtsa panacofënëtame. Xanë, Daxitajivi Pematapijinënë, necanajetsiana itsamonae pecobeyabelia, jai Jesús pijajivijavabelia tajëvelia penavajunupaebijavata pebeyaxuabijavanexatsi.

⁴⁵ Itsiata baitsi jane Jesús pijajivi apo jumeypëtae xua yabara Jesús jumaitsi. Baitsi bajarapamonae Dioso apo tocopatsitsi pejumeyapëtaeyaniva xua yabara Jesús jumaitsi. Bajarapamonae ajumeura Jesúsjavabelia peyanijobijava xua yabara Jesús jumaitsi.

Pacuenia Jesús pijajivi: “¿Detsa ponë vaxaitsiyajuvënënë nacavecuayaijamatabëcuenenë bitso?” najai tsanajetarubenaenë namutua yabara pelivaisi

⁴⁶ Jesús pijajivi anaeya namutua najumenotsiaya nali vaisitanajetarubena. Najumaitsi tsanajetarubenaenë bajarapamonae:

—¿Detsa ponë vaxaitsiyajuvënënë nacavecuayaijamatabëcuenenë bitso? najai tsanajetarubenaenë Jesús pijajivi.

⁴⁷ Nexata Jesús pijajivi jamatabëcuenyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta. ⁴⁸ Jumaitsi pijajivijavabelia:

—Pajivi copiapita tanejumecovënëtsijiviyo, mapit-sipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyjavacopiapita. Nexata pëtsa bepaayaijamatabëcuenevimë panataneme. Tsipaji ponë paxamëyajuvënënë beveliajamatabëcuenenë natane paxamëvecua, bajaraponë bitso ayaijamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi

⁴⁹ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

⁵⁰ Nexata Jesús jumaitsi Juanjavabelia:

—Pajivi pibisiajamatabëcuene apo najamatabëxainae vaxaitsijavaberena, bajarapajivi nacajamatabëcuenyavenona. Bajarapajivi bevaxaitsijamatabëcuenejivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënae pamatacabi Jesús athëbëabetsia Dioso caponaejitsiatsi, ajamatabëcuenaenë baja peponaenexa Jerusalén tomarabelia.

⁵² Jesús nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata pecaetomarajavabelia petocovaetsinexabeje pabota picani Jesús patsijitsia.

⁵³ Itsiata baitsi jane Samaria nacuapijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaejavanexa Jerusalén tomarabelia.

⁵⁴ Nexata Jesús pijajivitonëbeje itsa yapëtanebeje Samaria nacuapijivi Jesús apo pecopiapitsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa pijamatabëcuenebejevi. ¿Baja tsaja pitsicuene jitsipame patavajëtsinexa Diosojavabelia peveriapaenexatsi pamonaenë apo jitsipae pecacopiapitsijava? jai beje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcuenyapëtaemëbeje Espíritu Santo, ponë pacayajavaponaponabeje.

⁵⁶ Xanë, Daxitajivi Pematapijinënë, apo patsinëtsica taverebiabinexa jivi. Biji rajane patsicajë tacapanepaenexa jivi pibisiacuene pexanaeconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabëpënaponatsi yabara pelivaisi

⁵⁷ Jesús pijajivi namutua peyajavanajetarucaejavata, judíovi pecujarubinë jumaitsi Jesúsjavabelia:

—Jesús, itsabelia poname, capënaponaeatsi cajena, jai judíovi pecujarubinë.

⁵⁸ Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijamëthëanë xaina pepatabiabinexa pemajitabiabinexanua. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë, itsajota nacueraevetabiabijitsianë, jai Jesús.

⁵⁹ Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

⁶⁰ Jesús nexata jumaitsi bajaraponëjavabelia:

—Copare matacabi apo pevereverecaejava apo pexainaevinexa pemëthëcaenexatsi nijamonaemi itsa tē-

pa. Xamë saicaya nepënaponare jivi netsipaebinexa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

⁶¹ Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaejava. Itsiata abaxë caeepatoyo necopare tanapëjibinexa tajabota pejinavanapaevijavabelia, jai bajaraponë.

⁶² Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënanjiniabiaba pijaperujamatabëcuene, xua exanabiaba, bajarapajivi apo caëjëpaetsi xaniavaetsia Dioso petonacuenebinexa pitorobicueniatsi. Tsipaji najamatabëcueneepatajërërëcaeya nacueneba, jai Jesús bajaraponëjavabelia.

Pacuenia Jesús pijajivi itoroba, setenta ponëbeje, Dioso pejumelivaisi jivi petsipaebanajetarubenaenexa yabara pelivaisi

10 Jesús icatsia itsamonae itapeta pijajivinexa, setenta ponëbeje. Bjarapamonae Jesús itoroba anijanëbeje tsaponae Jesús pevajënaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomanëjava, tsiquiritoraraxijava ata, itsaxuayo Jesús najetarucaejitsia. ² Jesús pijajivi penaropobivajënae, Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Ayaipabi pexainanë caecuenia uba ayajava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxë bitso ayajava tosajinatsi penotsinexa. Bajara pijinia itsi jivi ata Diosojavabelia penajamatabëcuene copabivinexa. Abaxë sajina ayaibitsaëtoxaneto. Itsiata baitsi jane paxamë Dioso panetonacuenebivi pacaevijiyomëbeje saya. Bjaraxuata Diosojavabelia pavajëre icatsia Dioso pijajivi pematatsënëa itsamonae pitorobinexa papecayavenonaenexa. ³ Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavana paename. Pacaitorobianatsi raja bitso pibisiacuene pexanabiabivijavabelia. Pacuenia ovejaxi tsiayaitsi itsa jinavanapa pianaepanaevi nevëthë tuatujëata, bajarapatsimë tsane. ⁴ Pëtsa pacaponame itsacuenejava ata, doroto ata, palata ata, zapato ata. Itsa pabajacobianame itsajivi namutoepatota, pëtsa bajayajebi pabarëcuaicuaijamë tsanunubenaenepanajemat-siyaniva. ⁵ Itsa pajonejitsiamë itsamonae pijaboyalia, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuene xanepanaeya pejinavanapaenexa,” pajamë tsane copiaya Diosojavabelia. ⁶ Bjarapabo pexainanë itsa jitsipaena pejamatabëcuene xanepanaeyaexanaenexatsi Dioso, nexata bajaraponë jamatabëcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitsijava, nexata Dioso apo jamatabëcuene xanepanaeyaexanae tsanetsi bajaraponë. ⁷ Itsajota patabiabianame, caebota pamajitabianame. Pëtsa

panatixitaponame itsaboxijavabelia. Aurajibia paxaeyabianamenua xua pacaabata bajarapabota. Pëtsa pauramë panexaejava papecarajutsijava yabara. Tsipaji panetsipaebixae patacaitorobilivaisi, pacarajutsiana panexaejava. Tsipaji itsajivi itsa tonacueneba itsanëjavabelia, barajutatsi pexaejava. ⁸ Itsa papatabiabianame tomarata, itsa pabota bajarapatomarapijivi xaniavaetsia pacacopiapita, nexata panaxaenema xua pacaabata. ⁹ Bjarapatomarata pajamatejemayaexanaenema piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaenema. Pajumaitsimë tsane bajarapatomarapijivijavabelia mapacueniaje: ¹¹ “Panijatomarapijisapërë patataxuta rubena. Nexata panavetaxuvarëbajë. Bjarapacuenia panavetaxuvarëbajë panenayapëtaenexa Diosojavabelia panenaneconitsijava. Pananeconitame Diosojavabelia. Tsipaji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹² Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainanë, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, bajarapaneconivajëto matatoxentsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponëbejejavabelia.

Pacuenia Jesús jumaitsi patomarabejepijivi Dioso xubijitsia infiernojavabelia apo pejumecovënëtsixaetsi yabara pelivaisi

¹³ Icatsia Jesús jumaitsi pijajivijavabelia, setenta ponëbejejavabelia:

—¡Bitso bejiobi tsane Corazín tomarapijivi! ¡Bitso bejiobi tsane Betsaida tomarapijivi ata! Pinijicuene Dioso pesaëta taexanaejavanë, xua itsajivi ata apo caëjëpaetsi pexanaenexa, bajarapatomarabejepijivi tae ata, itsiata apo nejumecovënëtsi. Apo copabi pibisiacuene pexanabiabijava. Apo najamatabëcuene pënëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatujëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuene pënëyorotsipa Diosojavabelia. Bjarapamonaemi nexata pibisiacuene pexanaebiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacuene pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacuene pexan-

abiabineconi. ¹⁴ Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaëta taexanaejavanë, apo nejumecovënëtsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto mata-toxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata.

¹⁵ Capernaum tomarapijivi picani najamatabëxaina Dioso pecaponaevajatsi athëbëabetsia. Itsiata baitsi jane bajarapamonae apo tanejumecovënëtsixae, Dioso xuabianatsi infiernojavabelia, jai Jesús Corazín tomarabeje Betsaida tomarabejepijivi yabara.

¹⁶ Icatsia Jesús jumaiti pijajivijavabelia, setenta ponëbejevabelia:

—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajivitaevetsiana, bajarapajivi taenajë xanë tanenayajivitaevetsijava. Bajarapajivi Dioso ata taenatsi Dioso penayajivitaevetsijava. Bajarapacuenia Dioso ata taenatsi penayajivitaevetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsipaebanajetarubena daxita tomaranëjava. Saicaya navecuanajetarubena anijanëbeje tsaponaev.

Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi

¹⁷ Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavaberena. Nexata pepatsicujinae bajarapamonae jumaiti Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejumecovënëtabiaba, jai bajarapamonae Jesúsjavabelia.

¹⁸ Jesús nexata jumaiti pijajivijavabelia:

—Xanë baja cajena tanihi dovathi athëbëvetsica pejopaejavatsica pacuenia yamaxë bajopaica. ¹⁹ Xanë baja cajena pacajamatabëcuene caëjëpaeyaexanatsi papecaëjëpaejamatabëcuene panejamatabëcuene matatoxenetsinexa vajavajabitsaënë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane. ²⁰ Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamëre tsavanapae Dioso papijajivixamë Dioso papecavënëyaquinarubijava athëbëtsia, jai Jesús pijajivijavabelia, setenta ponëbejevabelia.

Pacuenia Jesús jamatabëcuenebarëya yabara pelivaisi

²¹ Jesús bitso jamatabëcuenebarëyayaexanatsi Espiritu Santo. Nexata Jesús jumaiti paxa Diosojavabelia:

—Axa, nevetsinë athëbëtsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamonaev bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecumatayatame bitso peyapëtaevi mapanacuapijilivaisije. Bajarapalivaisi vecumatayatame bitso penacujarubivi ata mapanacuapijicuene yabaraje. Bajarapacuenia exaname tsipaji baja exaname nejjitsipaecuenia, jai Jesús paxa Diosojavabelia pevajëtsijavata.

²² Icatsia Jesús jumaiti pijajivijavabelia, jivijavabelia ata:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcuene yapëtaepacuenia xanë jamatabëcueneitsinë, Dioso pexënatonë. Caenë, taxa Dioso, nejamatabëcuene yapëtanë. Itsajivi ata apo jamatabëcuene yapëtaepacuenia taxa Dioso jamatabëcueneitsi. Caenënë, xanë pexënatonë, jamatabëcuene yapëtanijhi pacuenia taxa Dioso jamatabëcueneitsi. Pamonaev tojjitsipajë tayapëtaeyaexanaenexa pacuenia taxa Dioso jamatabëcueneitsi, bajarapamonae ata yapëtaeyaexanaenajë, jai Jesús pijajivijavabelia, jivijavabelia ata.

²³ Nexata Jesús napënëyorota. Èpijajivijavabelia jumaiti:

—Paxamë baja pajamatabëcuenebarëyamë pane-taexae pacuene baja pataeponame. ²⁴ Xaniajanë pacuenia pacatsipaebijitsiatsi. Bajayata ayaibitsaëto profetavimi necopiaevetavanapa picani tanetaenexa tapatsijavatsica. Nacuaevetsivimi ata necopiaevetavanapa picani tanetaenexa tapatsijavatsica. Itsiata ne-taenejeva tapatsijavatsica, bajarapamonaemi tēpa baja. Jamatabëjumetaeyabiabanua picani palivaisianë baja aeconoxae paxamë pacatsipaebaponatsi. Itsiata apo jumetaenejeva bajarapalivaisinë, bajarapamonaemi tēpa baja, jai Jesús pijajivijavabelia.

Pacuenia pexaniajamatabëcuenenë, Samaria nacuapijinë, yavenona itsanë yabara pelivaisi

²⁵ Itsamatacabi Jesús livaisi tsipaebanuca pijajivijavabelia. Nexata bajarajota judíovi pecujarubinë nonotapuna. Bajaraponë Jesúsjavabelia jamatabëcuenejëbi-aya jumaiti:

—Jesús, ¿detsa xua exanaenajë Dioso tanera-jutsinexa matacabi apo pevereverecaejava? jai judíovi pecujarubinë.

²⁶ Nexata Jesús jumaiti judíovi pecujarubinëjavabelia:

—¿Detsa jane jumaitsi bajarapacuenene yabara bajayata Dioso Moiséspijinëta penajumecopatsilivaisi jivi pejumecovënëtsinexa? jai Jesús.

²⁷ Nexata judíovi pecujarubinë jumaitsi Jesúsjavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Daxita panejamatatabëcuene ta ata, daxita panesaëta ata, daxita panenajamatabëxainesaëta ata, pasivamëre panijatuxanenë panija-Dioso. Pasivamëre itsajivi ata pacuenia paxamë panijacuata panasivamë,” jai bajayata Dioso Moiséspijinëta penajumecopatsilivaisi, jai judíovi pecujarubinë Jesúsjavabelia.

²⁸ Nexata icatsia Jesús jumaitsi judíovi pecujarubinëjavabelia:

—Xaniavaetsia nejumecanaviatame. Bajarapacuenia exanapononare. Nexata pepacuenene xainaename matacabi apo pevereverecajava, jai Jesús.

²⁹ Itsiata baitsi jane judíovi pecujarubinë bijiaya jumecovënëta bajarapalivaisi. Asivaya apo tae itsamonae ata. Bajaraxuata judíovi pecujarubinë matavëjëa jumaitsi Jesúsjavabelia:

—¿Detsa nexata pitsijivi asivanë tsane? jai judíovi pecujarubinë.

³⁰ Nexata icatsia Jesús jumaitsi judíovi pecujarubinëjavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajërëbabiabivi, bajaraponë epatua vaetabatsi. Daxita pecobecovë yacajërëtsatsi. Penaxatabijavanëmi ata yacajërëtsatsi. Nexata pinijicuenia conibabiatsi. Puenetabuatsatsi picani petëpanucaenexa bajarajota. ³¹ Nexata bajarapanamutua sacerdotenë najetaruca, templobota penacuenebabiabinë. Nexata sacerdotenë bajaraponë itsa taeyabuata, matavaquetanucapona. Pona baja rovia. ³² Bajaraxuacujinae icatsia bajarapanamutua itsanë, templobota penacuenebabiabinë, najetaruca. Bajaraponë taenucajopa. Bajaraxuacujinae matavaquetanucapona. Pona baja icatsia rovia bajaraponë ata. ³³ Bajaraxuacujinae icatsia bajarapanamutua Samaria nacuapijinë najetaruca. Nexata bajaraponë itsa taeyabuata, tsitabejio-bitsi bitso. ³⁴ Nexata bajaraponë cujilia. Vajënëvaëba aceiterata, vinorata yajava. Vajënëcëba papaëbërepanaxita. Bajaraxuacujinae Samaria nacuapijinë pijaburrojumata buatsia. Nexata bajaraponë capona jivi pepatabiabiobiyabelia. Bajarajota Samaria nacuapijinë eveta xaniavaetsia. ³⁵ Meravia pitsijavata Samaria nacuapijinë itsa baja ponaejitsia itsabelia najetaruca, juta anijapalatanëbeje, bitso penamatamotsinëbeje. Matamota bajarapabo pexainaenë. Jumaitsi bajaraponëjavabelia: “Netoevetsianame maponëje. Itsa matamovereverecaena, pematatsënëa nevetsimatamo, bajarapapalata icatsia caevëarena camatamotsianatsi,” jai Samaria nacuapijinë bo pexainaenëjavabelia, jai Jesús mapacueniaje judíovi pecujarubinëjavabelia.

³⁶ Bajaraxuacujinae judíovi pecujarubinëjavabelia Jesús yanijoba bajarapalivaisi yabara. Jumaitsi mapacueniaje:

—Pamonae, acueyabi ponëmaxëto, taeyabuata pecobecovë peyacajërëtsinëtsi. ¿Detsa ponë bajarapamonaejavuvënëne asivaya tane bajaraponë? jai Jesús.

³⁷ Nexata judíovi pecujarubinë jumaitsi Jesúsjavabelia:

—Ponë pitaxutotsoniataexae yavenona, bajaraponë asivaya tane, jai judíovi pecujarubinë Jesúsjavabelia.

Nexata Jesús jumaitsi judíovi pecujarubinëjavabelia:

—Ponare baja. Xamë ata bajarapacuenia asivaya itaxutotsoniataeyabiabianame itsamonae ata, jai Jesús judíovi pecujarubinëjavabelia.

Pacuenia Jesús jumaitsi Martabeje Maríabeje pijabota yabara pelivaisi

³⁸ Jesús, pijajivi yajava, najetaruca pevajënaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavënëva. Nexata Marta pijabota Jesús napata. ³⁹ Marta pejuyapijiva xaina, Maríavënëva. Nexata María eca Jesús pitabarata penamuxunaevetecaenexa Jesús petsipaebilivaisi.

⁴⁰ Nexata Marta bitso jamatabëcueneenatsi penacuenabijava, Jesús pexaejavanexa ata pemitssaexanaenexa. Nexata Marta cujilia Jesús. Jumaitsi:

—Tajatuxanenë, tajuyapijiva netocopata caevanë taexanaenexa daxita xua exanaejitsianë. Itorobare taneyavenonaenexa, jai Marta Jesúsjavabelia.

⁴¹ Nexata Jesús jumaitsi Martajavabelia:

—Marta, xamë bitso cajamatabëcueneena nexanaenexa daxita xuanë jamatabëexaname. ⁴² Caejava bitso xanepana nexanaenexa, tanenamuxunaevetsinexamë. María baja cajena tanenamuxunaevetecaexae tatsipaebilivaisi, catsuitapeta pexaniacuenene daxitacuenene matatoxenetsia. Nexata acuenebi itsajivi ata peyacajërëtsijavatsi tatsipaebilivaisi pejumetaejava, jai Jesús Martajavabelia.

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi

11 Jesús vajëtabiaba Diosojavabelia. Nexata itsamatacabi, itsa baja Jesús najumevereta pevajëtsijava Diosojavabelia, Jesús pijajiviyajuvënëne jumaitsi Jesúsjavabelia:

—Patajatuxanenë, panejumecujarubare pacuenia pavajëtabiabijsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijsia Diosojavabelia, bajara pijinia pacuenia xamë ata panejumecujarubare pavajëtabiabijsianë Diosojavabelia, jai Jesús pijajiviyajuvënëne.

² Jesús nexata jumaitsi pijajiviyavabelia mapacueniaje:

—Itsa pavajëtabiabianame Diosojavabelia, pajumaitsimë tsabiabi tsane:

Taxamë, athëbëtsatsia neecaenë, jitsipajë pecayiyataejava daxitajivi. Jitsipajë naxantsiayo pecopiapatsi-

java daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ³ Caematacabi canacuajitsia panerajure pataxaejavanexa pacuenia panamatavenonajë. ⁴ Panebarajamatabëcuene xanepanarena nitabarata pibisiacuene pataxanaejava. Nexata panevecuaajibiaexanare pibisiacuene pataexanaeneconi. Tsipaji paxanë ata itsamonae paxanëjavaberena pibisiacuene patanexanaejava pajamatabëcuene caevajë. Nexata pabarajamatabëcuene xanepanajë. Panevecuatsare dovathi patanejamatabëcueneëjëbiyaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënë meravi tuatuajëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje. ⁶ Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso pijajani. Itsiata xanë apo xainaenë itsacuenejavayo ata pexaejava tarajutsinexa,” jai tsipae paxamëyajuvënë meravi tuatuajëta peyapëtaenëtsijavabelia. ⁷ Nexata bo ënëverena bajaraponë jumepitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caecamata. Nexata acuenebi tanonotapunaejava tacarajutsinexa xua nevajëta. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa. ⁸ Xaniajanë pacuenia pacatsipaebijitsiatsi. Bajaraponë apo jamatabënonotapunaeta, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaexaetsi. ⁹ Xaniajanë pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi atajaitipame matapania panecaxitajarabijavabelianexa. Bajara pijinia pacuenia bajayajebi atapavajëtabiabianame Diosojavabelia papecajumecovënëtsinexa. Bo ata itsa baupa xatatanuta, nexata asaëyata pabau-padocodocotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa. ¹⁰ Bajarapacuenia asaëyata pavajëtabiabianame Diosojavabelia. Tsipaji pajivi vajëtabiaba, rajutabiabatsi. Pajivi atajaitabiaba, caxitajarababiaba. Pajivi atabaupa docodocotabiaba, tobaupatabiabatsi, jai Jesús pijajivijavabelia comparacióncuenia.

¹¹⁻¹² Icatsia Jesús jumaitsi pijajivijavabelia:

—Paxamë papebijivimë, panexi panexinaevi. Panexënatonëyo itsa pacavajëta panbë, apo panacoxi-

rajutsimë tsipae iboto. Itsa pacavajëta dujuainëyo, apo panacoxirajutsimë tsipae jomo. Itsa pacavajëta vacarotobëto, apo panacoxirajutsimë tsipae aqueto. ¹³ Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuene paxamë matatoxenetsia. Bajaraponë pacarajutsiana pexaniacuene itsa pavajëta. Bajaraponë rajutsiana Espiritu Santo daxita pamonaevajëta, jai Jesús pijajivijavabelia.

Pacuenia itsamonae Jesús yabara jamatabëcuene navëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi

¹⁴ Pebi ponapona, dovathi pejamatabëcuene apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús itsa vecuacapitsapa, natsipaeba baja. Jivibitsaëtoxaneto petaevi bajarapacuenia, bitso jamatabëcuene nabenajaca. ¹⁵ Itsiata baitsi jane itsamonae fariseovi Jesús baracuaicuaiajitsi pibisiacuene.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacaitorobinë, jai fariseovi jamatabëcuene navëxaniabiaya Jesús yabara.

¹⁶ Itsamonae icatsia fariseovi Jesús picani jamatabëcueneëjëbiaya itorobatsi pinijicuene Dioso pesaëta pexanaejava Jesús petsitaexanaenexa. Bajarapacuenia picani itorobatsi fariseovi peyapëtaenexa pepacuene Jesús Dioso pitorobinëcuenetsitsica. ¹⁷ Itsiata Jesús jamatabëcuene yapëtanepacuenia fariseovi sivanajamatabëxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata.

¹⁸ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaëtaejitsipa pijajivi. Itsajamatabëcuene vecuaxinaejitsipa pijajivi. Pesaëta apo xainaponae tsipae. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuene navëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara. ¹⁹ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi atapacayapëtanebajarapacuenia jamatabëcuene navëxaniabiaya panejumaitsijava xanë yabara. ²⁰ Espiritu Santo pesaëta xanë dovathi jivivecua capitsapabiabajë. Nexata baja picani jivi beyapëtanepacuenia Dioso baja petaxuxuabijava pijajivi pevetsijava paxamë tuatuajëta, jai Jesús fariseovijavabelia.

²¹ Fariseovi pecanaējētsinexa Jesús bitso pi-asaēñeucene dovathi matatoxenetsia, Jesús icatsia comparacióncuenia jumaitsi fariseovijavabelia mapacueniaje:

—Ponē bitso piasaēñē, aitatsacaya pijanae cobe-naevetabiabijitsipa pijabo, itsamona peyacarējēt-siyanivatsi pecobecovē. Nexata daxita pecobecovē xaniavaetsia tobobenaējitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumaitsi mapacueniaje:

—Itsiata baitsi jane itsa najetarucaeijitsipa itsanē bitso piasaēñē boxainaenē matatoxenetsia, nexata cue-neamoneyabijitsipatsi. Aitatsacaya pijanae cobe-naevetabiabi ata tsipae, itsiata vecuapitsipatsi pijanae, daxita pecobecovējavaja yajava, nayabarajai Jesús pijacuata comparacióncuenia dovathi pejamatabēcue-neamoneyabijava yabara.

²³ Icatsia Jesús jumaitsi fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabitsaējivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovēñētsiviminexa, jai Jesús fariseovijavabelia.

Pacuenia dovathi jivitonē pevejamatabēpitsapaecuji-naetsi, icatsia naviarena pecovēyaberena petsijamatabēcaenexatsi icatsia yabara pelivaisi

²⁴ Icatsia Jesús jumaitsi fariseovijavabelia:

—Dovathi itsa vejamatabēpitsapa jivitonē, nexata dovathi jinaruta petseviranējava. Jaitapona itsanējavabelia petsijamatabējonenexa dovathi penacuer-aevetsinexa bajaraponējavata. Itsa apo caxitajarabi, ponējavabelia tsijamatabējonejitsia, nexata dovathi jamatabējumaitsi: “Naviatsianajē meta icatsia tajabomijavabelia, paboverena pitsapajē,” jamatabējai dovathi, ponējavaverena pitsapa icatsia petsijamatabējonexatsi. ²⁵ Dovathi baja caevēa itsa naviarena, caxitajaraba peyajavaponaponaenēmitsi. Nexata peyajavaponaponaenēmitsi pejamatabēēthēto, dovathi tane bepēñesajinecaebo, bepēñexaniavaetetsibo, bepiracajuetetsibo. ²⁶ Nexata dovathi icatsia sivapona peyajavapatsinexarena itsadovathivi, siete ponēbeje. Bajarpadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabējunuatsi peyajavaponaponaenexa. Belia jane baja pebi dovathivi bitso bejiobiaexanatsi. Copiaya abaxē caenē itsa tsijamatabēecatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaeba xua yabara jivi jamatabēcuenebarēya yabara pelivaisi

²⁷ Itsa abaxē Jesús livaisi tsipaeba fariseovijavabelia, petiriva bajarapajivi bitsaētoxañetoyajuvēñēva pinijijumeta vavajai tsaxuabi. Jumaitsi Jesúsjavabelia:

—Jamatabēcuenebarēya baja cajena ena, pecanavitanabiava, pecavitsatsiva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

—Xaniajamē rabaja. Itsiata baitsi jane pamonaē jumetane Dioso pejumelivaisi, nexata itsa jumecovēñēta bajarapalivaisi, bajarapamonaē jane bitso jamatabēcuenebarēya tsavanapae taena matatoxenetsia, jai Jesús petirivajavabelia.

Pacuenia pibisiajamatabēcuenevi Jesús picani itorobatsi Dioso pesaēta pinijicuene pexanaejava petsitaexanaenexa yabara pelivaisi

²⁹ Jivi ayaibitsaētoxañeto Jesús itsa matatoyorotsia nacaetuatsi, nexata Jesús jumaitsi:

—Pamonaē aeconoxae jinavanapa, bitso pibisiajamatabēcuenevi. Bajarapamonaē picani nitoroba Dioso pesaēta pinijicuene taexanaejava tatsitaexanaenexa, taneypētaenexa Dioso pepacuene athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava, apo tsitaexanaenē tsane. Bajayata pacuenia Diosojumepaebinēmi profeta Jonáspijinē exanatsi, bajara ēpitsicuene taneexanaejava, tsitajētsianajē. ³⁰ Bajayata daxita Nínive tomarapijivi yapētane profeta Jonáspijinē Dioso pitorobinēcuenetsi. Tsipaji ayaicuene exanatsi Dioso. Bajara pijinia pacuenia xanē ata, Daxitajivi Pematapijinēñē, pinijicuene Dioso nexanaena. Nexata daxita pamonaē aeconoxae jinavanapa, neyapētaena pepacuene Dioso athēbēvetsica taneitorobinēcuenetsica. ³¹ Itsamatacabi copiapatsiana Dioso penaneconitsiaexanaematacabinexa daxita pijaneconi pexainaevi. Bajarapamonaē nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonaē aeconoxae jinavanapa, Dioso apo pejumecovēñētsivi. Bajarapova neconitsiana tsipaji bajayata bajarapovami tajē nacuatabuverena ata muxunanajetaruca pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē raja majotaje ponaponajē, bitso ayaijamatabēcuenenēñē Salomónpijinēmi matatoxenetsia. Itsiata baitsi jane pamonaē aeconoxae jinavanapa mapanacuataje, apo nenamuxu-naevetsi. Bajaraxuata ayaineconi xaina Diosojavabelia, jai Jesús.

³² Icatsia Jesús jumaitsi jivi ayaibitsaētoxañetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinē petsipaebilivaisi, copaba pibisiacuene pexanaejava. Najamatabēcuenepeñēy-oroa Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconi pexainaevi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonaē aeconoxae jinavanapa, Dioso apo pejumecovēñētsivi. Tsipaji xanē majota ponaponajē bitso ayaijamatabēcuenenēñē Jonáspijinēmi matatoxenetsia. Itsiata baitsi jane pamonaē aeconoxae jinavanapa ma-

panacuataje, tsipaebi atanë Dioso pejumelivaisi, apo najamatabëcuenepënëyorotsi pibisiacuene pexanaejavavecua. Bajaraxuata Dioso naneconitsiaexanaenatsi bajarapamonae, jai Jesús jivi ayaibitsaëtoxanetojavabelia tajëvelia pevajunupaebijavata itsamatacabi Dioso jivi penaneconitsiaexanaejavanexa.

Pacuenia vajaitaxuto belámparabë yabara pelivaisi

³³ Icatsia Jesús jumaitsi jivibitsaëtoxanetojavabelia: —Itsajivi ata lámparabë pitanojotsicujinae, apo mataacatetsi itsacuenejavata. Cajoniënëalia ata apo etsi lámparabë. Biji rajane athëbëyo etsia. Jivi boyaberenapejonevi tsivajënaeitayotecaejitsia. ³⁴ Lámparabë boënëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae. ³⁵ Panayajivitaema xua panajamatabëxainabiabame, papecajamatabëcuene aitaquiriyaexanaeyaniva. ³⁶ Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëtoxanetojavabelia.

Pacuenia Jesús tsipaeba fariseovijavabelia, judíovi pecujarubivijavabelia ata, pacuenia bajarapamonae naneconita Diosojavabelia yabara pelivaisi

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalía. Naeca mesa muxuneneta penanabaninexa. ³⁸ Fariseonë itsa tane Jesús penabanijava anijatonë nacobequiatsinejeva, fariseonë jamatabëcuenenabenajaca. Pacuenia daxita judíovi pijacuenia anijatonë nacobequiatabiaba penabanivajënae, apo itsi Jesús. ³⁹ Nexata Jesús jumaitsi fariseovijavabelia: —Paxamë pafariseovimë panecaxaevajënae plato, taza ata, naniavelia bapaquiatame xaniavaetsia panijacuenia. Tsipaji jamatabëcuenenavëxaniabiaya pajamatabëjumaitsimë tsabiabi: “Itsa caxaejitsipajë xaniavaetsia quiatsinejevanë, Diosojavabelia naneconitsipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panecaxaevanënexa papecajamatabëcuene bijianaeyaniva picani, itsiata pananeconitaponame Diosojavabelia. Tsipaji bajarapacuenia paquiatabiabi atamë, caranata panejamatabëëthëtota panajamatabëxainabiabame pibisi-

acuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. ⁴⁰ ¡Apo paneypëtaevi baja rovia! Dioso cajena pexanaenë daxitacuene. Dioso baja cajena pacaperabëexana. Pacajamatabëëthëexananua. ⁴¹ Pejanajamatabëcuene itsa paxainaejitsipame, nexata pexaniacuene patoexanabiabijitsipame itsamonaejavabelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavabelia.

⁴² Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! Panenacanabijava diez xuabejeyajuvënëjava, caejavayo, parajutabiabame ofrendacuena Diosojavabelia. Daxitaviria paneubijavaxi ata diez xuabejeyajuvënëjava, caejavayo, parajutabiabame ofrendacuena Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabinexa itsamonaejavabelia, apo pasivanajamatabëxainamë. Bajaraxua picani paxamë bepanajamatabëxainame panetoexanabinexa itsamonaejavabelia, jai Jesús fariseovijavabelia.

⁴³ Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsiipaji bepaayaijamatabëcuenevimë panataeyabiabame! Judíovi penacaetutabiabibonëjava itsa panajoneyabiabame, pajitsipabiabame paneenaenexa peyayataevitsi penanexa petsinubijavanëta. Pajitsipabiabamenua jivi papecabajacobinexa callejava bitso yayiyataeya, jai Jesús fariseovijavabelia.

⁴⁴ Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisiajamatabëcuene panexainaevi ata. Pacuenia itsamonaepona jivi pemëthëanë matatsënëa apo peyapëtaexae xua xaina bëpënëareca, bajara pijinia itsi pamonaepacayaiyatane apo peyapëtaexae pacuenia pajamatabëcuenebejemë bëpënëa. Bajarapamonae pacayaiyatane tsipaji apo yapëtae bajarapamonae bëpënëa panejamatabëcuenebejejava, jai Jesús judíovi pecujarubivijavabelia, fariseovijavabelia ata.

⁴⁵ Nexata bajarapacuenia Jesús pejumaitsijavata, judíovi pecujarubiviyajuvënëne jumaitsi Jesúsjavabelia:

—Jesús, itsa mapacuenia jumaitsimëje, paxanë yabara ata pibisiacuena jumaitsimë, jai Jesúsjavabelia judíovi pecujarubiviyajuvënëne.

⁴⁶ Jesús nexata jumaitsi judíovi pecujarubinëjavabelia:

—;Paxamë ata, judíovi panecujarubivi, ayaineconi panatsixainame Diosojavabelia! Palivaisianë ayapëbeje itsajivi ata pejumecovënëtsinexa, bajarapalivaisianë jivi patsipaebabiabame pejumecovënëtsinexa. Bajarapalivaisianë patsipaebabiabi atamë itsamonae pejumecovënëtsinexa, paxamë itsiata apo panajamatabëxainamë paneexanaenexa bajarapacuenia, jai Jesús judíovi pecujarubinëjavabelia.

⁴⁷ Icatsia Jesús jumaitsi judíovi pecujarubivijavabelia:

—;Paxamë judíovi panecujarubivi, ayaineconi panatsixainame Diosojavabelia! Bajayata pamatacabi jivanapa panijasalinaivimi, beyaxuababiaba Diosojumepaebivimi profetavi. Nexata juya paxamë bajarapaprotetavimi pemëthëanëjumavereca bonë paexana-jebame, jivi itsa tane bajarapabonë, penajamatabënapitabiabinexa bajarapaprotetavimi. ⁴⁸ Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamë bonë paexanajebame bajarapaprotetavimi pemëthëanëjumavereca, jai Jesús judíovi pecujarubivijavabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, bajayata tajëvelia jumaitsi paxamë yabara mapacueniaje: “Bajarapamonaejavabelia toitorobianajë profetavi. Toitorobianajënua apóstolevi ata. Bajarapamonae itsiata beyaxuababiabiana tatoitorobiviyajuvënëvi. Bejiobiaexanabiananua tatoitorobiviyajuvënëvi,” jai baja cajena bajayata tajëvelia Dioso bajarapacuenia paxamë paneexanaejavanexa yabara. ⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamë pananeconitame Diosojavabelia. Nexata bajarapaneconi yajava Dioso pacananeconitsiaexanaena paxamë aeconoxae mapamatacabitaje panejinavana-paevi. ⁵¹ Panijasalinaivimi profetavimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsaprotetavimi ata. Nexata bexëjavaberena ata icatsia panijasalinaivimi beyaxuaba Zacaríaspijinëmi. Zacaríaspijinëmi panijasalinaivimi beyaxuaba templobopanobota, baitsi templobobeje altarvënëjavabeje petuatuajëta. Xaniajanë pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamë, aeconoxae mapamatacabitaje panejinavana-paevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—;Paxamë judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapëtanetsi,” pajamatabëjamë tsabiabi picani. Itsiata baitsi jane apo payapëtaemë. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejoneyaniva, bajara saya pacuenia paxamë paexaname jivijavabelia. Nexata itsamonae jitsipae ata pejonejava picani Dioso pijanacuayabetsia, paxamë saicayalivaisi panetsipae-

babiabixae, apo pacopatsimë pejonenexa Dioso pijanacuayabetsia. Paxamë ata apo pajitsipaemë pejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabëitontabiabatsi. Jamatabëcuenejëbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picani nacuaeveltsinëjavabelia.

Pacuenia Jesús tsipaeba jivi pejumecovënëtsiyaniva fariseovi patsipaebilivaisitsi yabara pelivaisi

12 Penacaetuataponaejavata jivi pepo ayaibitsaëto-xaneto cajena tsaponae, baitsi miles pajivibeje. Nexata jivi nataxucuetsabataxuabapona. Nexata Jesús pijajivijavabelia copiaya tsipaeba livaisi, pejumecovënëtsiyaniva fariseovi itsa tsipaebatsi saicayalivaisi Dioso pejumelivaisivecua. Jesús pijajivijavabelia jumaitsi mapacueniaje:

—Xania panayajivitaema fariseovi pijalevadurayani-va. “Levadura,” itsa janë, peyamaxëitojorobilivaisi yabara pacajumaitsi. Fariseovi raja bepacatsita pexaniajamatabëcuenevi itajara tsane, pibisiajamatabëcuene pexainaevi ata. ² Daxita abaxë palivaisianë jivi aeconoxae apo yapëtae, bajarapalivaisianë itsamatacabi daxitajivi yapëtaeponaena xaniavaetsia. Pibisiacuene muetsia itsajivi pexanaejava ata, itsamat-acabi xaniavaetsia yapëtaena daxitajivi. ³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivijavata. Xua ata pënëyatuucutsiboënëta baupa xatatsiaya muetsia vëpaxapaxajaiya pavajunupaebame, bajaraxua ata itsamatacabi itsajivi pinijijumeta vajunupaebiana jivi penacaetuatsijavata, jai Jesús pijajivijavabelia.

Pacuenia Jesús tsipaeba pijajivi pecujunaviyaniva jivibeve yabara pelivaisi

⁴ Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pëtsa pacujunavame jivibeve ata. Bajarapamonae pacabeyaxuabi ata tsipae, acuenebi matavëjëa papecaitsacueniabinexa. ⁵ Biji rajane pacatsipaebijitsiatsi panecujunavixexa Dioso. Tsipaji Dioso cajëjëpatsi papecaxuabinexa infernojavabelia papecabeyaxuabicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponëbeje baratsui saya namatamota anijapalatanëyobeje. Tsipaji amatamobi. Bajarapacuenia amatamobi ata, itsiata caenëyo ata Dioso apo nacofënëtsi bajarapabaratsuiyajuvënë. ⁷ Paxamë rabiji bitso Dioso pacaasiva baratsui matatoxenetsia. Tsipaji panamatamotame baratsui matatoxenetsia. Dioso bitso papecaasivaxae, panematanatoxi ata, caematantoyto canacujitsia, Dioso baja cajena namatajëta. Ba-

jaraxuata pëtsa pacujunavame itsacuenejava ata, jai Jesús pijajivijavabelia.

Pacuenia Jesús pijajivi apo benayavajunuaxinae Jesús pijajivicuene yabara pelivaisi

⁸ Icatsia Jesús jumaiti pijajivijavabelia:

—Pacatsipaebijitsiatsi raja. Daxita pamona tajajivi, jivi pitabarata navajunupaebiana tajajivicuene. Bajara-pamona juya xanë, Daxitajivi Pematapijinënë, vajunupaebianajë tajajivicuene Dioso pijaángelevi pitabarata. ⁹ Pamona jumai tsane itsamonaevabelia: “Xanë cajena Jesús apo pijavitonënë,” jai tsane, bajarapamona yabara juya xanë, jumaitsinë tsane: “Mara pamona cajena apo tajajivije,” janë tsane Dioso pijaángelevi pitabarata, jai Jesús pijajivijavabelia.

¹⁰ Icatsia Jesús jumaiti pijajivijavabelia:

—Pajivi pibisiacuenia nebaracuaicuaijai ata, xanë, Daxitajivi Pematapijinënë, bajarapaneconi yabara itsa navajëta Diosojavabelia, itsiata vecuaajibiaexanaenatsi Dioso. Itsiata baitsi jane pajivi pibisiacuenia baracuaicuaijai Espiritu Santo, bajarapajivi bajarapaneconi Dioso apo vecuaajibiaexanaetsi tsane, jai Jesús pijajivijavabelia.

¹¹ Icatsia Jesús jumaiti pijajivijavabelia:

—Itsa pacacaponaelia tomaraevetsivijavabelia, judíovi penacaetuatabibojavabelia ata, papecayanijobinexa, pëtsa pajamatabëcuenebëjamë panenayajivicuaicuaijijavanexa yabara. ¹² Tsipaji raja bajarapaepatota, Espiritu Santo pacacuaicuaijiaexanaena pacuenia panayajivicuaicuaijamëjitsia, jai Jesús pijajivijavabelia.

Pacuenia Jesús jivi livaisi tsipaeba bitso pesivanajamatabëxainayaniva ayajjava pexainaejava pexainanenaxa yabara pelivaisi

¹³ Jivi ayaibitsaëtoxanetoyajuvënë jumaiti Jesúsjavabelia:

—Jesús, taxapijinë picani petëpaevajënae netocopata pevënamuto tapitsinexa pecobecovëyajuvënëjanë. Nexata tamatapijinë pita bajaraxuanë. Nexata itorobare tamatapijinë tanerajutsinexa taxapijinë tanerajutsipaebijavanë, jai bajaraponë Jesúsjavabelia.

¹⁴ Jesús nexata jumaiti bajaraponëjavabelia:

—Itsajivi ata cajena apo nitorobi jueznëxanë, tananeconitsiaexanaenexa ponë naneconita. Itsajivi ata cajena apo nitorobi axapijinë pecobecovë patacat-sicobetsatsinexabeje, jai Jesús.

¹⁵ Nexata icatsia Jesús jumaiti daxitajivijavabelia:

—Xania pataema. Pëtsa bitso panajamatabëxainame ëpaxamënexa ayajjava panexainanenaxa. Tsipaji jivi pexainaejava ayajjava xainae ata tsipae, bajarapamona pexainaejava yabara jamatabëcuenexanepanaeya apo jinavanapae tsipae, jai Jesús.

¹⁶ Nexata Jesús tsipaeba livaisi bajarapamonaevabelia mapacueniaje:

—Ponapona bitso riconë. Pijapabianë tocapitsapabiabatsi ayajjava pexainacuene. ¹⁷ Riconë nexata ja-

matabëjumaiti: “¿De meta pacuenia exanaenajë? Ne-toajibi baja rovia taetaponaevabelianexa taubijava,” jamatabëjai riconë. ¹⁸ Riconë nexata icatsia jamatabëjumaiti: “Yapëtaniji rajane baja pacuenia exanaeijtsianë. Paboxita jebabiabajë taubijava, penetsianicajë taexanaenexa icatsia ayaiboxanetonë bajarapacovëta. Bajarapoboxanetonëta jane baja jebianajë daxita taubijava, daxita tacobecovë yajava. ¹⁹ Nexata baja xainanajë bajayajebinexa daxitacuene xua namatavenonajë. Nexata jane baja xuacujinae nacuer-aevetsianajë. Pexaniacuene nabanebianajë. Pexani-aviriaranënu matavëjëa apaeyabianajë taitajibinexa. Nexata barëyanë tsabiabi tsane,” jamatabëjai riconë. ²⁰ Nexata bajarapaepatota Dioso jumaiti riconëjavabelia: “Apo neyapëtaenë baja rovia xamë. Ajena baja, mapameravitaje, tëpaename. ¿Jipatsa nexata nevënamuto pitsiana daxita nexaniavaetejebijavanëmi?” jai Dioso riconëjavabelia, jai Jesús mapalivaisije daxitajivijavabelia.

²¹ Icatsia Jesús jumaiti bajarapamonaevabelia:

—Bajara pijinia pacuenia paxamëyajuvënëvi ata tocopiapatsianatsi pamona ayajjava natocaetuatapona ëpamona pexainanenaxa. Bajarapamona itsiata pepacuene bepejibivi tsane Diosojavabelia, jai Jesús bajarapamonaevabelia.

Pacuenia Dioso pijajivi eveta mapanacuataje yabara pelivaisi

²² Jesús nexata jumaiti pijajivijavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava panevënanivanapanaenexa. Pëtsa pasivanajamatabëxainamenua ëpanenaxatabijavanexa ata. ²³ Apo jinavanapaetsi cajena ëvajaxaejavanexa. Apo jinavanapaetsinua ëvanapanerabëxatabinexa. ²⁴ Pacanaëjere pacuenia barsui apo ubi pexaejavanexa. Apo notsinua penavere-taponaevajava. Apo xainanua penavere-taponaevajava peetsibonexa. Itsiata Dioso rajutabiabatsi pexaejavanexa. ¡Paxamë rabiji bitsoyo Dioso pacaasiva barsuimonae matatoxënetsia papecarajutsinexa daxita xua panamatavenoname! Bajaraxuata pëtsa pasivanajamatabëxainame ëpanexaejavanexa, ëpanenaxatabijavanexa ata. ²⁵ ¿Detsa jane ponë paxamëyajuvënëne cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta. Nexata saya najamatabëcuene-cueratsipa pejamatabëcuenebëjaijava penavitsabiaexanaevajavanexa. Tsipaji apo tonamatamotsitsi bajaraxua. ²⁶ Bajara pijinia pacatoitsi paxamë ata daxita xua pasivajamatabëcuenebëjamë. Apo pacatonamatamotsi. Bajaraxuata apo bepajamatabëcuenebëjamë itsacuenejavayo ata yabara, jai Jesús pijajivijavabelia.

²⁷ Icatsia Jesús jumaiti pijajivijavabelia:

—Pacanaëjere pacuenia bitso pexaniamatono pitsapa, mapamatonoje. Bajarapamatono apo natsijumanacuenebi. Penaxatatsijavanexa ata apo natoexanae. Bajayata nacuaevetsinë Salomónpijinë bitso pex-

ainaenēmi. Naitabētsiaya naxatababiaba bitso pexani-aviriajavanē. Itsiata baitsi jane Salomónpijinē pe-naitabētsijava matatoxenetsia bitso aitabē mapam-atonotoxiye. ²⁸ Paxamē, bevelia Dioso panejumecov-ēnētsivi, asaēya bepajumecovēnētame Dioso pa-pecaevetsijava. Ajena pitsijavata vayafota tanetsi pexa-niaponamatanotoxi. Bajaraxuacujinae, caemata-cabibejecujinae, tajuatsi baja bajarapaponamatono-toximi. Pacuenia Dioso aitabēyaexana ponamatono-toxi, bajara pijinia pacuenia paxamē ata itsamatacabi Dioso pacaxatabiana piatabējava. ²⁹ Bajaraxuata pētsa pasivanajamatabēxainavanapame ēpanexaejavanexa, ēpanematavējēapaevajanexa ata. Biji rajane pajume-covēnētavanapare Dioso. ³⁰ Pamonae Dioso apo pe-jumecovēnētsivi, bitso sivanajamatabēxainabiaba ēpexaejavanexa, ēpenaxatabijavanexa ata. Itsiata bait-si jane paneaxa Dioso paxainame. Bajaraponē yapē-tane daxita xua panamatavenoname. ³¹ Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabēxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso pet-onacuenebavanapaenexa itsamatacabi ayaijava pex-ainaenexa athēbētatsia yabara pelivaisi

³² Icatsia Jesús jumaitsi pijajivijavabelia:

—Tajamonae, paxamē patajajivimē pacaevijiyomēbe-je ata, pētsa pajunavame. Tsi-paji paneaxa pacaitapeta panecobenaevetsinexa pamatacabi bajaraponē evet-siana daxitacuene. ³³ Pacanajere panexainaeyajuvēnē-ja, bitso paneasivajava ata. Nexata bajarapapalata parajutsianame bitso bepejibivijavabelia. Nexata juya Dioso athēbētatsia pacarajutsiana bitso penamata-motsijava, apo pevereverecaejava. Bajarajotatsia acuenebi pejonejava penacobetoxotsivi papecayaca-jērētsinexa. Itsanē ata ajibi papecatoucubaxaenēnexa. ³⁴ Panacuatatsia pacatoxaniavaeta panexainaeja-vanexa, bajarapanacua panejamatabēēthētovetsina pajamatabēnajinavanapaename, jai Jesús pijajivijav-abelia.

Pacuenia Jesús pijajivi tsipaeba pacujinae icatsia patsi-jitsiatsica najamatabēcuenexaniavaetsiaya pevājēnae pijajivi pecopiaevetavanapaenexatsi yabara pelivaisi

³⁵ Jesús icatsia pepatsijavanexatsica tajēvelia nava-junupaeba. Jesús jumaitsi pijajivijavabelia mapacuenia-je:

—Icatsia raja jemata patsianicajē. Nexata naja-matabēcuenexaniavaetsiaya panecopiaevetavanapae-name. ³⁶ Payapētaneme rabaja mapacuenije. Petuxa-nenē itsa pona penacasabifistajavabelia, pijajivi tonajumecopata meravijebi ata pecopiaevetavanapaenex-atsi pepatsijavarena. Nexata petuxanenē pijajivi mer-avi ata copiaevetavanapatsi. Nexata petuxanenē jema-ta meravi najetaruae ata, baupa itsa docodocota,

nexata bajarapamonae bepijia tobaupata pijatuxa-nenē. ³⁷ Bajarapamonae barēya pijatuxanenē naēcotsi-aya pecopiaevetavanapaejavata pepatsixae. Xaniajanē pacuenia pacatsipaebijitsiatsi. Nexata petuxanenē pi-jajivi caecuenia petobaupatsixaetsi, petuxanenē pijajivi sivajamatabēcuenēbarēya. Nexata petuxanenē pepat-sicujinae xaniavaeta mesa. Enaeyaexanaena pijajivi. Nexata caranata petuxanenē bajarapamonae bepija-jivitonē nataeya rajuta pexaejava pijajivi. ³⁸ Meravi tu-atuajēta petuxanenē patsi ata, itsa jume, maticabivē-pata patsi ata, nexata petuxanenē pijajivi naēcotsiaya pecopiaevetavanapaejavata pijatuxanenē pecaxita-jarabixaetsi, petuxanenē pijajivi barēya. ³⁹ Pacanaējēre mapacuenije. Bo pexainaenē itsa yapētaejitsipa paepatota meravi pijabojavaberena patsijitsia pecobe-covē petonacobetoxotsinēnexasi, nexata apo majitsi tsipae. Vājēnaeevetecaejitsipa meravijebi. Apo copatsi tsipae pijaboyaberena petojoneyanivatsi penacobetox-otsinēnexa. ⁴⁰ Bajara pijinia pacuenia paxamē ata naja-matabēcuenexaniavaetsiaya panecopiaevetavanapae-name tapatsijavatsica. Tsi-paji xanē, Daxitajivi Pemat-apijinēnē, paepatota apo panejamatabēnajinaemē tapatsijavanexatsica, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxa-nenē pijajivitonēbeje pelivaisicuenia, yabara pelivaisi

⁴¹ Pedro jumaitsi Jesúsjavabelia:

—Tajatuxanenē, ¿palivaisi aeconoxae panetsipae-bame, baja tsaja palivaisi ēpaxanē panijajivinxanē? Ita-sa jume, ¿itsamonaenexa ata tsaja yajava? jai Pedro.

⁴² Jesús nexata jumaitsi Pedrojavabelia:

—Mara pejamatabēcuenēitsivinexa yabara pacatsi-paebatsije. Petuxanenē pijajivitonē, ponē xaniavaetsia pijatuxanenē pecovēta tonacuenebaponapona pi-jacuene, maitsiye. Petuxanenē pijajivitonē itsaja-matabēcuenē xainaenejeva, copiaevetaponapona pi-jatuxanenē pepatsimatacabijavabelianexa. Bajaraponē pijatuxanenē pijajivi pecovēta tovetaponapona xani-avaetsia. Toabataponapona pexaejava caematacabi canacujitsia pacuenia itorobatsi pijatuxanenē. ⁴³ Ba-jaraponē bitso barēya pamatacabi pijatuxanenē pata xaniavaetsia pijajivi pecovēta petoetaponaponaex-ae. ⁴⁴ Xaniajanē pacuenia pacatsipaebijitsiatsi. Ponē bajarapacuenia xaniavaetsia tonacuenēba pijatuxa-nenē pecovēta, bajaraponē icatsia evetsiaexanatsi daxita xua xaina pijatuxanenē. ⁴⁵ Petuxanenē pijajivi-tonē itsa piagamatabēcuenēbejenē tsipae, nexata ba-jaraponē pijatuxanenē pecovēta jamatabējumai tsi-pae: “Tajatuxanenē ajibi tsaruae tsane bajayajebi,” ja-matabējai tsipae. Nexata pijatuxanenē pijajivi, pamon-ae evetsiaexanatsi xaniavaetsia picani petoetsinexa, toconibabeyabiabijitsipa. Conibabeyabiabijitsipa pebi-jivi, petiriavi ata. Bajaraponē ayaijava pexaejava xaeyabiabijitsipa. Aitajibinua tsabiabi tsipae. ⁴⁶ Nexata itsajota apo jamatabēnajinae tsipae pijatuxanenē pepatsijavanexa, bajarapaepatota jemata patsipa pi-

jatuxanenë. Nexata bajaraponë pijatuxanenë pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamona Dioso apo pejumecovënëtsivi, jai Jesús Pedrojavabelia.

⁴⁷ Icatsia Jesús jumaitsi pijajivijavabelia:

—Ponë itsanë pijajivitonë, yapëtae ata picani pacuenia itorobatsi pijatuxanenë petoexanaenexa, itsiata itsa apo toexanae pijatuxanenë pitorobicueniatsi, bajaraponë pinijicuenia jumaconibabejitsipatsi ayai cuerobocotota. ⁴⁸ Ponë ata pijinia itsanë pijajivitonë, itsa apo jumeyapëtae xaniavaetsia petoexanaenexa pacuenia pijatuxanenë itorobatsi, nexata pijatuxanenë pitorobicueniatsi saicayacuenia itsa toexana, bajaraponë ata jumaconibabejitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajarapajivi yabara vaxaitsi basivajamatabëjumaitstsiti: “Juya meta mapajivije ayaijava rajutabiabiana itsamonaejavabelia,” basivajamatabëjaitsti. Pajivi pijinia evetsiaexanatsi ayaijava, bajarapajivi pevetsiaexanaenëtsi sivajamatabëjumaitstsiti: “Itsa netocanacuenebiana taevetsiaexanaejava, ayaijava netopitsapaena,” sivajamatabëjaitsti pevetsiaexanaenëtsi, jai Jesús pijajivijavabelia.

Pacuenia Jesús apo penajuajumecovënëtsixae, nacaemonae ata apo najamatabëcuenejëpae tsane yabara pelivaisi

⁴⁹ Icatsia Jesús jumaitsi pijajivijavabelia:

—Xanë raja patajopajë daxitanacuapijivi pibisiacuene pexanaeneconi yabara tasivatëpaenexa. Nexata bajarapamonaeyajuvënëvi itsamona nejumecovënëtsiana. Nexata nacaemonae ata apo najamatabëcuenejëpae tsane. Itsa baja capanepaeya cruzata daxitajivi sivatëpaejitsipajë, jamatabëcuenebarëyanë baja tsipa. ⁵⁰ Itsiata baitsi jane abaxë netosajina bajaraxua yabara tanejamatabëcuenejëtsinexa tanebeyaxuabijavata. ¡Bitso baja rovia najamatabëxainajë! ¡Matapania nebeyaxuabiana, jamatabëcuenecaevianajë! ⁵¹ Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeya pejinavapaeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaejavabelia apo nejumecovënëtsi, nacaemonae ata. Itsamona napijavajabitsaë tsane. Nexata apo najamatabëcuenejëpae tsane. ⁵² Ajena mapamatacabi javaveliacujinaeje jivi apo najamatabëcuenejëpae tsane. Cinco pajivibeje, nacaemonae ata, caebota pejinavapaevi ata, apo najamatabëcuenejëpae tsane xanë apo tanenajuajumecovënëtsixaebeje. Pamona cinco pajivibeje nacaemonae, bajarapamonaeyajuvënëvi, acueyabi pajivibeje, nejumecovënëtsiana. Anijajivibeje apo nejumecovënëtsi tsane. Itsa jume, anijajivibeje nejumecovënëtsi tsane. ⁵³ Bajarapabopijivi, paxabeje

pexënatobeje, apo najamatabëcuenejëpaebeje tsane xanë apo tanenajuajumecovënëtsixaebeje. Petirivabeje pijinia, penabeje pexënatoyobeje ata, apo najamatabëcuenejëpaebeje tsane xanë apo tanenajuajumecovënëtsixaebeje. Pamebeje pecopenabeje ata apo najamatabëcuenejëpaebeje tsane xanë apo tanenajuajumecovënëtsixaebeje, jai Jesús pijajivijavabelia.

Pacuenia Jesús asaëya jivi muxujioba apo pecanaëjëtsixae Jesús Dioso pexënatocuene yabara pelivaisi

⁵⁴ Jesús icatsia jumaitsi jivi ayabitsaëtoخانetojavabelia:

—Itsa pataneme vaëvetsica itarërëbo pepitsapaejava, nexata pajumaitsimë tsabiabi: “Ajena raja emajitsia,” pajamë tsabiabi. Nexata bajarapamatacabi ema jopabiaba. ⁵⁵ Itsa pataneme jovibo pepitsapaejava epatajërëtsiarena la surverena, pajumaitsimë tsabiabi: “Ajena raja icotia ataju tsane,” pajamë tsabiabi. Nexata bajarapamatacabi icotia ataju tsabiabi. ⁵⁶ Nexata itsamona pacatane bepatsita pexaniajamatabëcuenevimë itajara, papibisiajamatabëcuenevi atamë. Payapëtaeyabiabame pacuenia matacabi itsijitsia itarërëbo pepitsapaejava panetaeyabiabixae. Bajarapacuenia picani payapëtaeyabiabame. Itsiata baitsi jane patae atamë daxita xua Juanpijinëmi jivibautisabinëmi exanapona, patae atamëna daxita xua xanë ata exanaponajë, caranata xanë apo paneyapëtaemë Dioso athëbëvetsica taneitorobinëcuenetsica, jai Jesús jivi ayabitsaëtoخانetojavabelia.

Pacuenia pananeconitsijivi xaniavaetsia bebarëcuacuajai pajivijavabelia naneconita penasivajamatabëxanepanaenexabeje, peneconitsiyaniavatsi jueznëjavabelia, yabara pelivaisi

⁵⁷ Jesús icatsia jumaitsi jivi ayabitsaëtoخانetojavabelia:

—Pacanaëjëre panijacuata paneexanaenexa pacuene xanepana. ⁵⁸ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecanconitsinexa, namutua xaniavaetsia panabarëcuacuajamërebeje panenasivajamatabëxanepanaenexabeje xua yabara pacaneconitsijitsia. Bajarapacuenia xaniavaetsia panabarëcuacuajamërebeje papecanutsiyaniava jueznë pitabarata. Tsipaji raja jueznë itorobijitsipa policíavi panijaneconi yabara papecacaponae exana penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota. ⁵⁹ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepija apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayabitsaëtoخانetojavabelia.

Pacuenia jivi benajamatabëcuenepënëyorota pibisiacuene pexanabiabijavavecua yabara pelivaisi

13 Itsamonae jumaiti Jesúsjavabelia: —Galilea nacuaverena pepatsivi, baca beyaxuaba Jerusalén tomarata templobota. Bajarapamonae baca beyaxuaba ofrendacuenia pevi perajutsinexa Diosojavabelia. Nexata bajarapaepatota nacuaevevtsinè Pilato pibisiacuene exana. Itoroba vajabitsaè Galilea nacuapijivimi pebeyejebinxatsi templobota. Itsajota Galilea nacuapijivimi baca beyaxuababuata, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonae Jesúsjavabelia.

²Jesús nexata jumaiti bajarapamonaejavabelia: —“Pamonaemi bajarapacuenia beyejebatsi, bitso meta pibisiacuene pexanaevimi daxita pijanacuapijivi matatoxenetsia. Bajaraxuata beyejebatsi penaxuabinexa Diosovecua,” ¿pajamatabëjamë tsaja? ³Jume baja cajena. Bajarapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinxatsi, penacopabivi pecanaëjësinaexa Diosojavabelia penaneconitsijava. Paxamë ata itsa apo pacopabimë tsane pibisiacuene peneexanabiabijava, itsa apo panajamatabëcuenepënëyorotsimë tsane Diosojavabelia, nexata bajarapacuenia paxamë ata panaxuabianame Diosovecua itsa patëpaename. ⁴Pamatacabiti ata jemata Jerusalén tomarata jopanucaya athëbëabetsia piapiabotsia, Torre de Siloëvënëbo, dieciocho pajivibeje matacënëbatsi. Nexata baja tëpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi matatoxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja? ⁵Jume baja cajena. Bajarapamonaemi ata picani bitso pibisiacuene apo exanae pijatamarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuenepënëyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patëpaename, jai Jesús bajarapamonaejavabelia.

Pacuenia Jesús jivi livaisi tsipaeba piacuajibihigueranae pelivaisicuenia yabara pelivaisi

⁶Jesús jivi livaisi tsipaeba piacuajibihigueranae pelivaisicuenia. Jesús jivi piacuajibihigueranae pelivaisicuenia petsipaebijavata, pijaperujujamatabëcuenia apo penavecuacopatsivi yabara Jesús jumaiti mapacueniaje:

—Pebi pijapabi tuatuajëta caenae peubinae xainanuta, higueravënënae. Nexata picani taeyojopalia bajaraponae penacuaitsijava. Itsiata baitsi jane apo nacuaitsi. ⁷Nexata jumaiti pijapabi petoevetsinëtsijavabelia: “Taema maponaeye. Acueyabi picani pavaibeje taeyopajë tacuainotabiabinexa maponaecuaije. Itsiata acuajibi tsabiabi. Nexata baja netonicataxuare. Apo

becopatanutsitsi bajaraponae. Ira caranatanuca saya,” jai pijapabi pexainaenë. ⁸Itsiata baitsi jane pijapabi petoevetsinëtsi jumaiti: “Copatanutsianatsibeje abaxë mapavaije. Nexata bacatuirabianajë bacatasitoxita. ⁹Baja raeta xuacujinae xanepanaena. Nexata aeconoxae pavai nacuaitsiana. Nexata aeconoxae pavai ata itsa apo nacuaitsi tsane, nexata jane baja catonicataxuabianatsi,” jai pijapabi petoevetsinëtsi, jai Jesús.

Bajarapacuenia Jesús jumaiti tsipaji Dioso xuabijitsia pamonae pijaperujujamatabëcuenia apo pecopat-sivi.

Pacuenia Jesús jamatejemayaexana judíovi penacuer-aevetsimatacabita penajumafurutsivami yabara pelivaisi

¹⁰Itsamatacabiti judíovi penacueraevetsimatacabita, Jesús jivi livaisi tsipaeba judíovi penacaetuatabiabibota. ¹¹Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurutsicujinae. Nexata apo caëjëpaetsi tsiquirijavayo ata penaepasirovitsijava. ¹²Itsa Jesús taeyeta bajarapova, nexata junarena. Jesús jumaiti bajarapovajavabelia:

—Niatanejavami rabaja cavecuaajibi, jai Jesús bajarapovajavabelia.

¹³Jesús tsimatanacobebeuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacuene netoexaname ayaijamatabëcuenenëxaemë! jai tsaponae bajarapova Diosojavabelia.

¹⁴Itsiata baitsi jane judíovi penacaetuatabiabibopevetsinë Jesús baraanaepanatsi judíovi penacuer-aevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibopevetsinë jamatabëjumaiti:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanitavetsicuenia, jamatabëjai.

Nexata judíovi penacaetuatabiabibopevetsinë najumejematsiaya jumaiti jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejemayaexanaenexa. Nexata abaxë penacueraevetsimatacabita apo bepatatsi vajanacajamatejemayaexanaenexa, jai judíovi penacaetuatabiabibopevetsinë najumejematsiaya jivijavabelia.

¹⁵Nexata Jesús jumaiti judíovi penacaetuatabiabibopevetsinëjavabelia:

—Paxamë saya jivi paneyamaxëitojorobivi. Bepatsita pexaniajamatabëcuenivimë itajara itsamonae, papibisiajamatabëcuenivi atamë. Paxamë ata panacuenebabiabame penacueraevetsimatacabita ata. Paxamë penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa. ¹⁶Mapovaje Abrahampi-

jinë pemomoxiyajuvënëva jamatejemayaexanajë. Tsi-paji bajarapova namatamota Dioso pitabarata dajubinë matatoxenetsia. Dovathi pejamatabëcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatatabita ata jamatejemayaexanajë piatanecueenevecua, jai Jesús judíovi penacaeuatabiabibo pevetsinëjavabelia.

¹⁷ Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabëcuenearëyatsi pinijicueene Dioso pesaëta pexanaponaejavanë yabara.

Pacuenia mostazaxutoyo pejuvicujinae, mostazanae bepiglia vitsaba yabara pelivaisi

¹⁸ Jesús jumaitsi jivijavabelia:

—¿De meta xua pelivaisi jëpa Dioso pijajivi bepiglia ayaibitsaëtoxoneto penaexanaejavanexa? Jivi meta peyapëtaenexa ayaibitsaëtoxoneto bepiglia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. ¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepiglia vitsaba. Bepiglia baja mostazanae pinijinae naexana. Baratsui ata exana pematapenanë bajaraponaemaxëranaxijava. Bajara pijinia pacuenia Dioso pijajivi ata itsane. Bepiglia ayaibitsaëtoxoneto naexanaena Dioso pijajivi, jai Jesús jivijavabelia.

Pacuenia pan pexanaematabënexa, levaduravënëjava fufunaeyaexana yabara pelivaisi

²⁰ Icatsia Jesús jumaitsi jivijavabelia:

—¿De meta palivaisi jëpa pecacaëjëpaejava Dioso pijajivi pevetsicueene daxitanacuanëjava? ¿De meta pacuenia jivi livaisi tsipaebianajë peyapëtaenexa Dioso pijajivi pevetsicueene peyacaëjëpaejava daxitanacuanëjava? ²¹ Levaduravënëjava meta pelivaisicuenia tsipaebianajë. Petiriva pan pexanaenexa, acueyabi patarrobeje trigobenonë matajërëaba levaduravënëjavata. Nexata pan pexanaematabënexa, ayaimatabë.

Tsiquiribaupayo epatajërëtsialia yabara pelivaisi

²² Jesús jivi livaisi tsipaebanajetaruca pinijitomaranëjava, tsiquiritomaraxijava ata, pepatsinexa Jerusalén tomarabelia. ²³ Nexata Jesús jivi livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

²⁴ —Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayovalia. Jivi picani itsamatacabi athëbëtatsia ayaibitsaëtoxoneto jamatabëjonena tsiquiribaupayovalia. Itsiata apo caëjëpaetsi tsane pejonenexa. ²⁵ Bo pexainaenë itsa nonotapunaena baupa pexatatsinexa,

paxamë bo jumapënëvelia panubenaename. Nexata picani panejonenexa pabaupadocodocotsianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane. ²⁶ Nexata paxamë pajumaitsimë tsane: “Xamë baja cajena panebarënanabane. Panebarëmatavëjëaapamenua. Patajatomaranëjava ata baja cajena jivi livaisi tsipaebiabame,” pajamë tsane. ²⁷ Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacueene paneexanabiabivi, panevecuaponare baja,” pacajai tsane. ²⁸ Dioso pijanacuatatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonae penajuajinavanapaejava Dioso pijanacuatatsia pataename. Nexata paxamë bajarajota pinijicuenia panatsinuename. Panavonosinianamenua bitso paneanaepanaexae. Tsi-paji paxamë Dioso pijanacuvecua panenaxuabinexa pacaxuabiana infiernojavabelia. ²⁹ Itsavirijumevi patsiana daxitanacuanëjavaverena. Nexata daxita bajarapamonae naenaena penabaninexa Dioso pijanacuatatsia. ³⁰ Pamonaeeconoxae mapamatacabitaje ayajamatabëcuenevi tanetsi, bajarapomonaeyajuvënëvi, ayaibitsaëtoxoneto, itsamatacabi Dioso beveliajamatabëcuenevi exanaenatsi. Pamonaepijinia mapamatacabitaje beveliajamatabëcuenevi tanetsi, bajarapomonaeyajuvënëvi, ayaibitsaëtoxoneto, itsamatacabi Dioso ayajamatabëcuenevi exanaenatsi, jai Jesús daxitajivijavabelia.

Pacuenia Jesús najamatabëxainaeya sivanua Jerusalén tomarapijivi yabara pelivaisi

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberena. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaeveitsinë raja Herodes cabeyaxuabiapaeba, jai fariseovi.

³² Jesús nexata jumaitsi fariseovijavabelia:

—Paponaremelia. Bajaraponë Herodes, jivi peyamaxëitojorobabiabinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsapaponaenajë dovathi peyajavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia. ³³ Diosojumepaebivimi profetavimi beyejebabiabatsi Jerusalén tomarata. Tsi-paji profetavi acuenebi saicyatomarata petëpaejava Jerusalén tomaravecua. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabëxainaeaya sivanua Jerusalén tomarapijivi. Jerusalén tomarapijivi Jesús najamatabëxainaeaya pesivanuejavata, jumaitsi mapacueniaje:

—¡PaJerusalén tomarapijivimë, pabeyajebabiabame Diosojumepaebivimi profetavi! ¡Ibotonëta ata patsec-onabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberena! ¡Pacuenia vacara banacoxicaetuata pecorofetobëxë-panaberena, bajara pijinia pacuenia xanë ata picani bitso jitsipabiabajë patacacaetuatsinexa, patacaca-panepaenexa picani panijaneconivecua! ¡Itsiata baitsi jane paxamë apo pajejamë cajena! ³⁵ Panejumetaema. Dioso rabaja pacacopata papecaevetabibijavami. Nexata baja panijatemplobota Dioso apo ponaponae. Xaniajanë pacuenia pacatsipaebijitsiatsi. Paxamë baja apo panetaemë tsane matavëjëa. Matapania itsa panejumecovënëtae Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënuva tsane: “Dioso, bitso yavenonare maponë najetarucaje. Bajaraponë nejamatatabëcueneta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë, jai Jesús mapacueniaje najamatabëxainaeaya pesivanuejavata Jerusalén tomarapijivi.

Pacuenia Jesús jamatejemayaexana pebi, bitso daxitanë peyajinaenë, yabara pelivaisi

14 Itsamatacabi, judíovi penacueraevetsimatatabita, Jesús pona fariseovi penamatacaitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. ² Nexata Jesús pitabarata eca pebi, daxitanë peyajinaenë. ³ Jesús nexata jumaitsi judíovi pecujarubivijavabelia, fariseovijavabelia ata:

—¿Penacueraevetsimatatabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopatsi tsaja? jai Jesús judíovi pecujarubivijavabelia, fariseovijavabelia ata.

⁴ Itsiata bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovecua. ⁵ Jesús nexata jumaitsi judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatatabita ata, bepíjia pajutarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanëta penaenexa penatsiitapetsiyaniva yabara pelivaisi

⁷ Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi pe-

naenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penataenexa. Jesús jumaitsi daxitajivijavabelia mapacueniaje:

⁸ —Itsa pacajunata panenanabaninexa penacasabifiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tsipaji itsanë ayaijamatabëcuenenë paxamë matatoxenetsia it-sa najunatatsi, napatsipa. ⁹ Nexata papecajunatsinë pacacujitsiparena. Nexata pacajumai tsipae: “Tocopare bajaraxua maponë peecaenexaje,” pacajai tsipae. Nexata paxamë pauramë tsipae itsa pacanatixitsiaexana paneecaenexa beveliajamatabëcuenevi penaenexa petsinubijavanëta. ¹⁰ Itsa pacajunata, paenaename beveliajamatabëcuenevi penaenexa petsinubijavanëta. Matapania papecajunatsinë itsa pacajumai tsane: “Natixiremena. Peyaiyataevitsi penaenexa tatsinubijavanëta ecare,” itsa pacajai tsane, paenaename bajaraxuanëta. Nexata bajarapacuenia daxita mesa muxuneneta panenajuaenaevi pacataena papecayaiyataejava papecajunatsinë. ¹¹ Pajivi ayaijamatabëcuenejivi natane, bajarapajivi beveliajamatabëcuenejivi taenatsi Dioso. Pajivi pijinia beveliajamatabëcuenejivi natane, bajarapajivi ayaijamatabëcuenejivi taenatsi Dioso, jai Jesús judíovi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsifariseonëtsijavabelia:

—Itsa junatame itsamonae nebarënanabaninexa nijabota matonejepijijava, itsa jume, caniviyopijijava ata, pëtsa junatame ëneyapëtaevi. Pëtsa junatame nebarënanabaninexa ënijamonae. Pëtsa junatame ënijamonae viriavi ata. Pëtsa junatame ëricovi, pamonaevi nijabo muxuneneta jinavanapa. Tsipaji bajarapamonae juya canamatamojunatsipa pijabota pecabarënanabaninexa. Nexata bajarapacuenia canamatamotsipa bajarapamonae. ¹³ Itsa junatame itsamonae fiesta nebarëxanaenexa, junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata. ¹⁴ Nexata bajarapacuenia pepacuene jamatabëcuenenëbarëyamë tsane. Tsipaji bajarapitsivi acuenebi juya pecanamamatamojunatsijava tsane. Nexata nijamatamo xainaename pamatacabi icatsia Dioso asaëyaexanaena pamonaevi tëpa, pexaniajamatabëcuenevimi, jai Jesús pejunatsifariseonëtsijavabelia.

Pacuenia Jesús jivi livaisi tsipaeba pinijifiesta penaenë pelivaisicuenia yabara pelivaisi

¹⁵ Daxita mesa muxuneneta penaevi jumetane Jesús petsipaebilivaisi. Nexata fariseoviyajuvënënë jumaitsi Jesúsjavabelia:

—Jamatabëcuenenëbarëya tsane pajivi nanabaniana Dioso pijanacuatatsia, jai fariseoviyajuvënënë.

¹⁶ Nexata fariseovi peyapëtaenexa itsamonae Dioso apo pejumecovënëtsijava, junatsi atatsi, Jesús jumaitsi comparacióncuenia mapacueniaje:

—Fiesta pexanaenë pijajivi itoroba ayajjava pexaejava pexanaenexa. Nexata tajëvelia junatsiaexana jivi ayaibitsaëtoxoneto petopatsinexatsi. ¹⁷ Bajaraxuacujinae pexaejava baja itsa vereta, fiesta pexanaenë itoroba pijajivitonë peponaenexa pejunatsivijavabelia: “Naxanitsia baja. Pexaejava rabaja vereta,” pejinexa. ¹⁸ Itsiata baitsi jane daxita pejunatsivi apo topatsitsirena. Itsanë saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë aeconoxaeta comuatabajë ira. Nexata ponaejitsianë bajarabelia tataenexa bajarapaira. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ¹⁹ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë comuatajë diez ponëbeje bueyu tanetoroborobocaevinexa. Nexata ponaejitsianë taëjëtinxexa bajarapabueyu. Pexaniacuene netoexanaename. Pëtsa jamatabëcueneanaepaname xanëjavaberena,” pejailivaisi tonajumeitorobarenatsi pijajivitonëta. ²⁰ Itsanë pijinia saya peponaeyaniva, pijajivitonëta tonajumeitorobarenatsi pejumaitsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejailivaisi tonajumeitorobarenatsi pijajivitonëta. Bajarapacuenia daxita pamonae picani fiesta pexanaenë junata, peponaeyaniva saya tonajumeitorobarenatsi pijajivitonëta. ²¹ Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi pinijicallexanetonëjava, tsiquiricallexijava ata. Junatsianame bepejiobivi, penabejenaevi ata, pejayujayunaevi ata, bitso pitaxutotsëcënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. ²² Jivi pebarëpatsicujinaerena, jumaitsi pijatuxanenëjavabelia: “Tajatuxanenë, exanajë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pijatuxanenëjavabelia. ²³ Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo. ²⁴ Pamonae picani copiata junatajë penanabaninexa, caenë ata bajarapamonaeyajuvënënenë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviayajuvënënenëjavabelia jivi peyapëtaenexa itsamona Dioso apo pejumecovënëtsijava, junatsi atatsi.

Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneveretsinexa Jesús pepënaponaejavajënaeyatsi yabara pelivaisi

²⁵ Jivibitsaëtoxoneto Jesús pënjainavanapatsi. Nexata Jesús napënëyorota bajarapamonaejavabelia. Jesús jumaitsi mapacueniaje:

²⁶ —Ponë xanëjavaberena patsi ata, itsiata itsa apo niasiva tsane daxita pijamonae matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piativajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penaativajava ata, matatoxenetsia, nexata bajaraponë apo tajajivitonë tsane.

²⁷ Ponë xanë yabara itsamona jamatabëpebeyaxuabixaetsi, jamatabëpebejioviaexanaexaetsinua, nexata pecajunavi itsa apo nepënaponae tsane, bajaraponë apo tajajivitonë tsane. ²⁸ Paxamëyajuvënënenë itsa jamatabëexana bo, athëbëabetsia piapiaboxanetotsia, nexata copiaya najamatabëcueneveretsipa pacuenia exanaejitsia. “¿Netocaëjëpa tsamëra baja tajapalata taveretsinexa tajabo?” jamatabëjai tsipae copiaya. ²⁹ Itsa apo najamatabëcueneveretsi tsipae copiaya, nexata bo pexanaejava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaejitsipatsi. ³⁰ Baracuaicuaijaitsi tsipae: “Bajaraponë picani taxuxuaba pijabo pexanaejava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeya petotaevitsi.

³¹ Nacuaevetsinë pijinia, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcuenecaëjëpaena tabarëbenexa tajavajabitsaënë pijajivi, veinte mil ponëbejejavabelia?” jamatabëjai tsipae copiaya. ³² Nexata bajarapacuenia penajamatabëxainaejitsipa, bajaraponë yapëtaejitsipa apo pebarëcuenecaëjëpaejavatsi pebarëbenexa pijavajabitsaënë pijajivijavabelia. Itsa abaxë tajë pevajënae pepatsijavarena pijavajabitsaënë, nexata najumexuabijitsipalia pijajivita penabarajamatabëcuene xanepanaenexabeje vajabitsaëcuene pexanaeyanivabeje. ³³ Bajara pijinia pacuenia paxamëyajuvënënenë itsa apo najamatabëcueneveretsi copiaya penajamatabëcuenepepënëyorotsinexa daxita pexainaejavavecua, nexata acuenebi tajajivi taexanaenexa, jai Jesús jivi ayaibitsaëtoxonetojavabelia.

Pacuenia Jesús jivi livaisi tsipaeba comparacióncuenia pacuenia jamatabëcueneitsi tsipae Jesús pijajivitonë itsa copatsipa Jesús pejumecovënëtsijavami yabara pelivaisi

³⁴ Jesús icatsia comparacióncuenia jumaitsi jivi ayaibitsaëtoxonetojavabelia mapacueniaje:

—Yajo abaxë itsa xaica, xanepana. Itsiata yajo pex-icaejavami itsa ajibi tsipae, ¿detsa pacuenia icatsia naxaicaeyaexanaejitsipa? Acuenebi. ³⁵ Itsacuenejavay-onexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava petsibacathocaebeno, itsa tsibacathoca, peubijava naxaniabiaexana, bajara apo itsi tsipae bajarapayajomi. Pacuenia bacatasi ata itsa tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaitsi comparacióncuenia jivi peyapëtaenexa pacuenia jamatabëcueneitsipae Jesús pijajivitonë itsa copatsipa Jesús pejumecovënëtsijavami. Nexata Diosovecua naxuabijitsipa.

Pacuenia Jesús jivi livaisi tsipaeba oveja penaxuabinë pelivaisicuenia yabara pelivaisi

15 Gobierno pejamatabëcuene impuestomatamo pematamoyanijobabiabivi, pata Jesúsjavaberena. Yajavaparenanua piamatabëcuenebejevi. Bajarapamona pata penamuxunaevetsinexa Jesús petsipae bilivaisi. ² Nexata fariseovibeje judíovi pecujarubivibeje itsa tane gobierno pejamatabëcuene impuestomatamo pematamoyanijobabiabivi pepatsijava Jesúsjavaberena, itsa tanenua piamatabëcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuajitsi. Bajarapamona najumaitsi mapacueniaje:

—Mara ponëje naneconita Diosojavabelia. Tsipaji copiapitabiaba piamatabëcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesús yabara jamatabëcuenenavëxaniabiaya.

³ Nexata Jesús pebaracuaicuajiaetsi, Jesús bajarapamonaejavabelia livaisi tsipaeba mapacueniaje:

⁴ —Paxamëyajuvënënë xinaejitsipa cien ponëbeje oveja. Nexata itsa toyajuvënë naxuabijitsipatsi caenë, oveja pexainaenë petusatota puenetsipa noventa y nueve ponëbeje. Nexata jaitsipa petonaxuabinëtsi matapania pecaxitajarabijavabelianexa. ⁵ Nexata oveja pexainaenë itsa baja caxitajarabijitsipa petonaxuabinëmitsi, barëyataejitsipa. Boyaberena vëtarapat-sipa petonaxuabinëmitsi. ⁶ Nexata oveja pexainaenë petonaxuabinëmitsi itsa capatsipa boyaberena, junatsipa peyapëtaevitsi. Junatsipa pijabo muxuneneta imoxoyo penaevi ata. Nexata oveja pexainaenë jumai tsipae bajarapamonaejavabelia: “Panecobenabarëyamëre. Tsipaji tajaovejajo, tanetonaxuabinëyomi picani, caxitajarabajë baja,” jai tsipae oveja pexainaenë bajarapamonaejavabelia. ⁷ Xaniajanë pacuenia pacatsipaebijitsiatsi. Mapanacuataje Dioso pitabarata pijaneconi pexinaejivi ata, itsa copatsiana pibisiacuene pexanabiabijava, itsa najamatabëcuenepënëyorota Diosojavabelia, bajara pijinia pacuenia sivabarëyatsi tsane athëbëtatsia pejinavana-

paevi. Bajarapajivi, athëbëtatsia pejinavanapaevi, sivabarëyatsi tsane noventa y nueve pajivibeje Dioso pitabarata pianeconijibitsavanapaevi pesivabarëyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanëyo pelivaisicuenia yabara pelivaisi

⁸ Icatsia Jesús jumaitsi fariseovijavabelia, judíovi pecujarubivijavabelia ata:

—Petiriva xinaejitsipa diez ponëbeje palatanëanë, bitso penamatamotsinëanë. Nexata itsa toyajuvënë naxuabijitsipatsi caenë, itanojotsipa lámpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanëtsi, copatsipa pejaitsijava. ⁹ Itsa baja caxitajarabijitsipa petonaxuabipalatanëmitsi, nexata junatsipa peyapëtaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavabelia: “Panecobenabarëyamëre. Tsipaji tajapalatanëyo, tane-tonaxuabinëyomi picani, caxitajarabajë baja,” jai tsipae petiriva bajarapamonaejavabelia. ¹⁰ Xaniajanë pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabëcuenepënëyorotsiananua Diosojavabelia, bajara pijinia pacuenia athëbëtatsia ángelevi sivabarëyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinë paxavecua naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaitsi mapacueniaje:

—Pebi xaina anijanëbeje pexënatobeje. ¹² Nexata juyapijinë jumaitsi paxajavabelia: “Axa, xuanë picani netocopatame tapitsinexa nevënamuto, bajaraxuanë abaxë apo tēpae atamë, nerajure baja tajajavanexa,” jai juyapijinë. Nexata pexënatobeje pexainaenë pexënatobejevabelia rajuta daxita pexinaejavanëmi.

¹³ Nexata paxa perajutsicujinaetsibeje, caematacabibejecujinae, juyapijinë canajeta daxita pexinaejavanëmi pecaetuatsinexa palata. Bajaraxuacujinae jane baja pona tajënacuyavabelia. Bajarajotalia pibisiacuene exanaponapona. Nexata vereta daxita paxa perajutsijavanëmitsi. ¹⁴ Nexata daxita bajarapanacuapijivi janibocuene tsipatsi. Bajaraponë peveretsicujinae daxita pijapalatami, bitso namatavenona pexaejava. ¹⁵ Nexata jaita penacuenebinexa bajarapanacuata peecaenëjavabelia. Bajaraponë itorobatsi pijairanëjava petoevetaponaponaenexa pijamarrano. ¹⁶ Nexata bajaraponë bitso pijaanaxae, pepenenexa picani ayajava jamatabëxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi pexaejavaneja. ¹⁷ Nexata belia bajaraponë xaniavaetsia najamatabëxaina. Jamatabëjumaitsi mapacueniaje: “Taxa pijabota pexaejava ayajava xaina pijajivi ayaibitsaëto piabatsinexa. Tonacopatabiabatsi ayajava pexaejava.

Itsiata xanë majotaje tēpaejitsianē baja tajani. ¹⁸ Nexata taxajavabelia naviatsianajē. Jumaitšinē meta tsane taxajavabelia: 'Axa, pibisiacuene exanajē Diosojavabelia, xamējavabelia ata. ¹⁹ Abejenē raja. Auranē baja rovia xamējavabelia: "Taxēnato," tanejamējjava. Nexata saya nijajivitonēnē nexanare, 'janē meta tsane taxajavabelia," jamatabējai juyapijinē. ²⁰ Nexata baja naviata paxajavabelia.

Itsa abaxē tajēverena najetaruca, pexēnato pexainanē copiatane. Nexata bajaraponē pexēnato itaxutobejiobiatane. Mataenetsia cujinaejinalia pexēnato. Nacoxivaetabaruca. Copiapitsiaya itabaratsut-sunexuaba pexēnato. ²¹ Nexata bajaraponē jumaitsi paxajavabelia: "Axa, pibisiacuene raja exanajē Diosojavabelia, xamējavabelia ata. Abejenē raja. Nexata baja rovia auranē xamējavabelia: 'Taxēnato,' tanejamējjava," jai paxajavabelia. ²² Itsiata baitsi jane pexēnato pexainanē bajarajota jumaitsi pijajivijavabelia: "Naxanitsia. Bepijiayo taxēnato patocaponaremena daxita matatoxensia pexaniapana, penajumaxuabipana. Pajumaacare bajarapanata. Anillonua pacobesixatara. Zapatonua pataxuxatara. ²³ Penasitsinē becerro papiremelia. Pabeyaxuabianame vajaxaenexa. ¡Fiesta exanaenatsi vajabarēyanexa! ²⁴ Tsipaji raja maponē taxēnatoje: 'Tēpa meta baja,' sivajamatabējanē picani. Itsiata tsaena ponapona. 'Naxuaba meta baja,' sivajamatabējanē picani. Itsiata baja icatsia patajopa," jai pexēnato pexainanē pijajivijavabelia. Nexata taxuxuaba fiesta pexanaejava.

²⁵ Bajarapamatacabi matapijinē pabiabelia nacuenabaponapona. Nexata penaviatsinē bo itsa imoxoyotanajetaruca, jumetane música. Jumetanenua peyavajibijava. ²⁶ Nexata bajaraponē junata paxa pijajivijavuvēnēnē. Jumaitsi: "¿Detsa pitsicuene yabara fiesta paexaname?" jai matapijinē. ²⁷ Nexata paxa pijajivitonē jumaitsi: "Nejuyapijinē baitsi patajopa. Axa nexata paneitoroba patabeyaxuabinexa becerro, penasitsinē. Jamatejema tsaena ponapona nejuyapijinē," jai bajaraponē matapijinējavabelia. ²⁸ Nexata matapijinē bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexēnatojavabelia: "Naxanitsia. Najonemeya," jai pexēnatojavabelia. ²⁹ Nexata matapijinē jumaitsi paxajavabelia: "Jume. Bajayajebi baja rovia catonacuenebaponaponatsi xanē. Caeto ata cajena apo cajumeapajejaitsi. Itsiata baitsi jane caeto ata apo nerajutsimē chivoyo ata fiesta tabarēexanaenexa tayapētaevi. ³⁰ Itsiata aeconoxae patajopa baja nexēnato, ponē vereta nijapalatami petirivijavabelia. Nexata tobeyaxuabame becerro, penasitsinē," jai matapijinē paxajavabelia. ³¹ Nexata bajaraponē jumaitsi pexēnatojavabelia: "Taxēnato, xamē cajena xanējavata ponaponame daxitamatacabi. Nexata daxita xua taxainaejava nijajava baja cajena. ³² Itsiata aeconoxae namatavenonatsi vajabarēyanexa. Tsipaji nejuyapijinē: 'Tēpa meta baja,' tasivajamatabējainēmi, itsiata tsaena asaē. Penaxuabaponaponaenēmi icatsia baja patajopa," jai bajara-

ponē pexēnatojavabelia, jai Jesús mapalivaisije fariseovijavabelia, judíovi pecujarubivijavabelia ata.

Pacuenia pijatuxanenē pecobecovē petoevetsinē toveretapona pevetsiaexanaejavanētsi yabara pelivaisi

16 Jesús pijajivijavabelia livaisi tsipaeba. Jumaitsi mapacueniaje:

—Petuxanenē, bitso pexainanē, ponapona. Bajaronē xaina pijajivitonē petoevetsinexatsi pecobecovē. Itsiata pepēya pijajivitonē pecobecovē toveretaponatsi. Nexata itsamonae tsipaebatsi pepēya pijajivitonē pecobecovē petoveretaponaejavatsi. ² Nexata petuxanenē pijajivitonē junata. Jumaitsi pijajivitonējavabelia: "Xamē pina tapēya netoveretaponame tacaevetsiaexanaejava. Pabaxutojavabelia matamoyaquinarubame xuanē canajetaponame tacobecovē, xuanēnua netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavējēa apo netoevetsimē tsane tacobecovē," jai petuxanenē pijajivitonējavabelia. ³ Nexata pijajivitonē sivapona bajarapabaxuto petocanaviatsinexa pijatuxanenē. Nexata bajarapabaxuto petocanaviatsivajēnae jamatabējumaitsi: "¿De tsaeta xua exanaenajē? Tajatuxanenē baja necapitsapaejitsia pecobecovē tatoevetaponaponaejavavecu. Apo necaējēpae tsane tanacuenebinexa pabi tajacuata tanaevetsinexa. Bitso auranēnua tsipae itsamonaejavabelia amoneya tavajētaponanexa palata tanamitsacomuatabiabinexa taxaejava. ⁴ Taneamoneyabivi meta abaxē, xua niamoneyaba, bevelia tovēnējonaponaenajē. Nexata tajatuxanenē tanecapitsapaecujinae, bajarapamonae pijaboyabelia itsa ponaenajē, xaniavaetsia necopiapitsiana. Nexata bajarapamonaejavata naponaponaenajē," jamatabējai bajaraponē. ⁵ Nexata bajaraponē junata daxita pamonaē abaxē amoneyabatsi. Nexata pamonaē amoneyabatsi, bajarapamonae, caenē canacujitsia, patapona bajaraponējavaberena. Nexata bajaraponē copiaya petopatsinētsijavabelia jumaitsi: "¿Detsa pacuenia niamoneyabame abaxē, xua tajatuxanenē pijajava catsicopatatsi? jai bajaraponē. ⁶ Nexata ponē amoneyabatsi, jumaitsi: "Camoneyabatsi abaxē tacarajutsinexa aceiteranē ochocientos pagalónbeje," jai. Nexata bajaraponē jumaitsi piamoneyabinētsijavabelia: "Bevelia saya catocopatsianatsi. Mara picani pacuenia niamoneyabameje, tanetoitanerubibaxutotamēje. Pire cajena. Icatsia itsabaxutojavabelia saya cuatrocientos pagalónbejenexa bepijia yaquinarure. Nexata saya bajarapacuenia tajatuxanenē rajutsianame," jai bajaraponē piamoneyabinētsijavabelia. ⁷ Bajaraxuacujinae icatsia itsanē topatatsi. Nexata icatsia jumaitsi bajaraponējavabelia: "¿Jica xamē? ¿Detsa pacuenia niamoneyabame?" jai. Nexata bajaraponē jumaitsi: "Camoneyabatsi abaxē tacarajutsinexa cien pabultobeje trigoxubultonē," jai. Nexata bajaraponē jumaitsi piamoneyabinētsijavabelia: "Mara picani pacuenia niamoneyabameje, tanetoitanerubibaxutotamēje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya

bajarapacuenia tajatuxanenë rajutsianame,” jai bajaraponë piamoneyabinëtsijavabelia. Bajarapacuenia exanapona daxita piamoneyabivitsijavabelia pesivajamatabëcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenë itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitanetuarutaponaex baxutonëtsi. ⁸ Bajaraxuacujinae pijatuxanenëjavabelia pona perajutsinexa jane baja bajarapabaxutonë. Nexata pijatuxanenë jumaittsi: “Xamë baja rovia pibisiacuene exaname. Itsiata baitsi jane niaitatsacaxae, exaname pacuenia catoxanepanaejitsia nevajënaeyabelia,” jaitsi pijatuxanenë. Nexata pacuenia pijatuxanenë pepëya pecobecovë petocanajetabiabinë ajamatabëcueneitatsaca, bajara pijinia pacuenia Dioso apo pejumecovënëtsivi ajamatabëcueneitatsaca Dioso pejumecovënëtsivi mata-toxetsia mapanacuapijicuene yabaraje, jai Jesús pijajivijavabelia.

⁹ Icatsia Jesús jumaittsi pijajivijavabelia:

—Pacamuxujjobatsi xaniavaetsia. Mapanacuapijipalatata payavenonare itsamonae. Nexata pacuenia pijatuxanenë pecobecovë petoetsinë, pesivajamatabëcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenë pecapitsapaecujinaetsi, bajara pijinia pacuenia paxamë ata athëbëtatsia paxainaename papecasivajamatabëcuene xanepanaevi. Nexata pamatacabi patëpame, itsajota apo panamatavenonaemë palata, Dioso pacacopiapitsiana apo pevereverecae-bonëjavatatsia, jai Jesús pijajivijavabelia.

¹⁰ Icatsia Jesús jumaittsi pijajivijavabelia:

—Pajivi xaniavaetsia toeveta tsiquirijavayo ata itsanë pecobecovë, bajarapajivi xaniavaetsia toevetsipa ayajava ata. Pajivi bijiaya toeveta tsiquirijavayo ata itsanë pecobecovë, bajarapajivi bijiaya toevetsipa ayajava ata. ¹¹ Itsanë pecobecovë, mapanacuapijicueneje, palata ata, xaniavaetsia itsa apo patoetsimë tsipae, nexata itsajivi ata apo pacaevetsiaexanae tsipae Dioso pijacuene, xua bitso namatamota mapanacuapijicuene matatoxetsiaje. ¹² Itsa xaniavaetsia apo patoetsimë tsipae itsanë pecobecovë, nexata pitsijava picani pacaevetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaittsi pijajivijavabelia:

—Itsajivi ata acuenebi caecuenia petonacuenebijava anijanëbeje pijatuxanenëbeje. Caenëjavabelia jitsipaejitsipa petonacuenebijava. Itsanëjavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús. ¹⁵ Jesús nexata jumaittsi fariseovijavabelia:

—Paxamë pajitsipabiabame jivi pejumaitsinexa paxamë yabara: “Fariseovi raja pexaniajamatabëcuenevi,” pejainexa. Itsiata baitsi jane Dioso pacajamatabëcueneyapëtane pexaniajamatabëcuene apo panexainaevicuene. Pacuene bitso jivi tsitapexaniacuenetsi, bajarapacuenia Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinëta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaittsi fariseovijavabelia:

—Juanpijinë jivibautisabinëmi pepatsivajënaeya, jivi xaina Dioso Moiséspijinëta penajumecopatsilivaisi pejumecovënëtsinexa. Bajayata Diosojumepaebivi profetavi ata petsipaebilivaisianë ata, xaina jivi pejumecovënëtsinexa. Itsiata Juanpijinë pepatsicujinae, pexanialivaisi tsipaebaponajë. Tsipaebaponajë Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaittsi fariseovijavabelia:

—Mapanacuaje, itaboxo yajava, jemata vereverecae-na. Itsiata baitsi jane palivaisi Dioso Moiséspijinëta najumecopata, bajarapacuenia apo vereverecae tsane. Nexata daxita pacuene yabara tajëvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinë pijava pexuabiyaniva yabara pelivaisi

¹⁸ Icatsia Jesús jumaittsi fariseovijavabelia:

—Ponë pijava xuaba, nexata icatsia itsava itsa pita, bajaraponë pibisiacuene exana pevitota. Nexata naneconita Diosojavabelia. Tsipaji pepo pijavavecuajaita itsava. Dioso cajena abaxë bajaraponë pexuabiva pepo pijavacuena totanetsi. Ponë ata itsanë pexuabiva pita, bajaraponë ata pibisiacuene exana pevitota. Nexata naneconita Diosojavabelia. Tsipaji itsanë pijava yacajërëta, pova abaxë Dioso tanetsi itsanë pepo pijavacuena, jai Jesús fariseovijavabelia.

Bitso riconë Lázarojeje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaittsi mapacueniaje:

—Bitso pexainaenë, riconë, ponapona. Daxitamatacabi naxatababiaba bitso pexaniavirijavanë. Pexaejava, pexaniavirijava, xaeyabiaba. ²⁰ Riconë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejobinë, Lázarovënënë, boquecabiaba. Lázaro daxitanë perabëtsabana. ²¹ Lázaro picani jamatabëxaeyabiaba riconë pexaeyabiabijavata piothopaepërë mesa bëxëpanareca. Avirixi ata patabiaba itsajota Lázaro bocabiaba. Petsabanaejava raebabiabatsi.

²² Nexata baja belia Lázaro tēpa. Petëpaecujinae

Lázaro ángelevi caponayatsi Dioso pijanacuayabetsia, itsabetsia Abrahampijinē petēpaecujinae ponapona. Bajaraxuacujinae riconē ata tēpa. Mēthētatsi. ²³ Riconēmi petēpaecujinae pata petēpaevi pepatabiabinacuayabelia. Nexata bajarapanacuata riconēmi bitso navixaetaeya bejiobi tsaponapona. Nexata riconēmi athēbēa benaēcotsia. Tajētatsia taenuta Abraham penucaejava. Lázaro nucaya Abraham pemuxunentatsia. ²⁴ Nexata riconēmi vavajai. Jumaitsi Abrahamjavabelia: “Amo Abraham, nitaxutotsoniataema. Neitoitorobimica Lázaro. Nacobeupijabutsi merata neebarētocainejebiaexanaejitsia. Bitso jamatabēfaenajē mapatajutaje,” jai riconēmi. ²⁵ Nexata Abraham jumaitsi riconēmijavabelia: “Tamomo, najamatabēnapire. Pamatacabi pinaena abaxē asaēmē tsaponapona ne-naxanaeirata, ēpexaniacuene picani xainame. Lázaro pijinia pamatacabi abaxē asaē tsaponapona, bitso picani bejiobi. Itsiata juya mapamatacabije pexaniacuena majotaje catsuponapona. Xamē biji navixaetaeya ponaponame. ²⁶ Itsajivi jamatabēponae ata bajarabereca, acuenebi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamē ata apo pacacaējēpae panepaenepaenexa mabetsinaje,” jai Abraham. ²⁷ Nexata icatsia riconēmi jumaitsi Abrahamjavabelia: “Amo Abraham, pexaniacuene cavajētatsi. Tonajumeitorobianame Lázarota taxa pijaboyabelia. ²⁸ Bajarajotalia xainajē cinco ponēbeje tajuyapijivi. Xaniavaetsia Lázaro tsipaebiana. Muxujibiana bajarapamonaē ata peponaeyaniva mapanavixaetaeyabiabinacuaya berenaje,” jai riconēmi Abrahamjavabelia. ²⁹ Nexata icatsia Abraham jumaitsi riconēmijavabelia: “Bajarapamonaē baja xaina Moiséspijinē peyaquinaelivaisianē. Diosojumepaebivimi profetavi ata peyaquinaelivaisianē ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovēnētsiana bajarapamonaemi peyaquinaelivaisianē,” jai Abraham riconēmijavabelia. ³⁰ Riconēmi icatsia jumaitsi Abrahamjavabelia: “Jume raja. Apo jumecovēnētsi tsane cajena bajarapalivaisianē. Itsiata itsajivi itsa asaē tsane petēpaecujinae penaviatsinexa pecovēyabelia, tsipaebiana tajuyapijivijavabelia. Nexata tajuyapijivi copabiana pibisiacuene pexanabiabijava. Najamatabēcuenepeñeyorotsiana Diosojavabelia,” jai riconēmi Abrahamjavabelia. ³¹ Nexata icatsia Abraham jumaitsi riconēmijavabelia: “Nejuyapijivi itsa apo jumecovēnētsi Moiséspijinē peyaquinaelivaisianē, Diosojumepaebivimi profetavi peyaquinaelivaisi ata, nexata pajivi asaē petēpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovēnētsi tsipae bajarapajivi ata,” jai Abraham riconēmijavabelia, jai Jesús fariseovijavabelia.

Pacuenia Dioso pijajivixae, itsamonae jamatabēcueneējēbijiatsi pibisiacuene pexanaenexa yabara pelivaisi

17 Jesús jumaitsi pijajivijavabelia:

—Xanē tajajivixae, itsamonae jamatabēcueneējēbabiabianatsi pibisiacuene pexanaenexa. Nexata itsamonae pejamatabēcueneta tajajivi pibisiacuene exanaena. Nexata pajivi pejamatabēcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. ² Itsamonae Dioso pejumecovēnētsivi, abaxē bepejevaxijamatabēcuene xaina Dioso pejumecovēnētsijava yabara. Nexata apo ajamatabēcuenesaē. Nexata pajivi tajajivijavabelia pibisiacuene jamatabēexanaeyaexana, abaxē tajajivijavabelia pibisiacuene exanaeyaexanaenejeva, bajarapajivi bevēsicētatsi ibotoxanetojavabelia. Nexata bajarapajivi yamaēya, ibotoxaneto yajava, bexuarecatsi pucaxaneto tuatuajēareca. Bajarapacuenia bexuarecatsi, tajajivijavabelia pibisiacuene it-sa exanaeyaexana bitso penaneconitsiyaniva Diosojavabelia. ³ Nexata xania. Panayajivitaema pibisiacuene, jai Jesús pijajivijavabelia.

—Icatsia Jesús jumaitsi pijajivijavabelia:

—Itsanē Dioso panenajuajumecovēnētsivi pibisiacuene it-sa pacaexanaena paxamējavaberena, bajaraponē xaniavaetsia paitavetsianame. Nexata baja it-sa aura tsane pibisiacuene papecaexanaejava yabara, nexata pexaniajajumeta it-sa pacanavajunupaebiana pecopatsijavanexa bajarapacuene, pajamatabēcuene caevianame pibisiacuene papecaexanaejava. Pabarajamatabēcuene xanepanaenename bajaraponē. ⁴ Caematacabita siete xuabeje pibisiacuene pacaexanae ata tsane, itsiata siete xuabeje it-sa aura tsane pibisiacuene papecaexanaejava yabara, nexata pexaniajajumeta it-sa pacanavajunupaebiana pecopat-sijavanexa bajarapacuene, itsiata pajamatabēcuene caevianame. Pabarajamatabēcuene xanepanaenename bajaraponē, jai Jesús pijajivijavabelia.

Pacuenia Jesús jumaitsi pijaapóstolevijavabelia yabara pelivaisi

⁵ Jesús pijaapóstolevi jumaitsi Jesúsjavabelia:

—Patajatuxanenē, paneyavenonare: “Xanē cajena necaējēpa daxitacuene taexanaenexa,” nejaitsabiabijava orijibia patacujumecovēnētsinexa, jai Jesús pijaapóstolevi.

⁶ Nexata Jesús jumaitsi pijaapóstolevijavabelia:

—Tsiquirijavayo ata xanē yabara it-sa pajamatabējumaitsimē tsipae: “Xaniajai cajena. Jesús caējēpatsi daxitacuene pexanaenexa,” it-sa pajamatabējamē tsipae, nexata paxamē ata pacacaējēpaejitsipa ayaiacuene paneexanaenexa. Nexata it-sa pajumaitsimē tsipae mapanaejavaxanetojavabeliaje: “Yatabutopaya natixire. Nucaename pucaxaneto tuatuajētalia,” it-sa pajamē tsipae, nexata naejava ata pacajumecovēnētsipa cajena, jai Jesús pijaapóstolevijavabelia.

Pacuenia itsajivi pijatuxanenē pitorobicueniatsi toexanabiaba yabara pelivaisi

⁷ Jesús icatsia jumaitsi pijaapóstolevijavabelia:

—Paxamëyajuvënënë xainaejitsipa pijajivitonë. Nexata itorobijitsipa petonacuenebaponaponaenexatsi. Nexata bajaraponë pijatuxanenë ira petocueponaponacujinae, patsipa pijatuxanenë pijaboyaberena. Itsa jume, baca petoebetaponaponaecujinae patsipa. Nexata paxamëyajuvënënë petuxanenëxae, pijajivitonëjavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonëjavabelia. ⁸Jume baja cajena. Biji rajane jumai tsipae pijajivitonëjavabelia: “Netoexanare taxaevanexa. Nexata abaxë nevetanucaename tanabanijavata. Bajaraxuacujinae xamë nabanianame,” jai tsipae pijajivitonëjavabelia. ⁹“Xanepana rabaja. Pexaniacuene bitso netoexaname,” apo jai tsabiabinua pijajivitonëjavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonë tsaponapona. Nexata pacuenia pijatuxanenë itorobatsi, bajaraponë exanabiabijitsipa. ¹⁰Bajarapacuenia paxamë ata patoexanare Dioso papecaitorobicuenia. Itsa paveretsiname Dioso papecaitorobicuenia panetoexanavanapaejava, nexata saya namataenetsia panajumaitsimë tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamë tsane. Pëtsa panajumaitsimë: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamë pëtsa, jai Jesús pijaapóstolevijavabelia.

Pacuenia Jesús jamatejemaya exana diez ponëbeje, bajayajebi bitso peperabëtsabanaevi, yabara pelivaisi

¹¹Jesús pona Jerusalén tomarabelia. Itsajota Samaria nacubeje Galilea nacubeje namuxunenecaxitarababeje, bajaraxuayo Jesús najetaruca. ¹²Itsa baja Jesús patsijitsia tsiquiritarayojavabelia, mataenetsi diez ponëbeje bajayajebi bitso peperabëtsabanaevi. Itsiata tajiyo bajarapamonae vecuanubenaohopatsi. ¹³Bajarapamonae ayaijumeta jumaitsi Jesúsjavabelia:

—¡Jesús, paneitaxutotsoniataema! jai.

¹⁴Nexata Jesús itsa tane bajarapamonae, Jesús jumaitsi bajarapamonaejavabelia:

—Panaitajëtsianame sacerdotevijavabelia papeca-perabëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaevavata pepatsinexa sacerdotevijavabelia, namutua baja perabëxanepananajetarubena. ¹⁵Daxita bajarapamonae peperabëxanepanaevajava itsa tane, nexata caenë saya bajarapomonaeyajuvënënë naviateca Jesúsjavabelia. Bajaraponë namutua ayaijumeta Diosojavabelia jumai tsanajetaruca: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” jai tsanajetaruca bajaraponë Diosojavabelia.

¹⁶Bajaraponë itsa pata Jesúsjavabelia, pematocabëta irataeya bocajunua Jesús pitabarata.

—Pexaniacuene netoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponë Samaria nacuapijinë. ¹⁷Nexata Jesús jumaitsi bajarajota penubenaevijavabelia:

—Diez ponëbeje bitso peperabëtsabanaevi jamatejemayaexanjë. ¿Detsa meta xuajitsia daxita apo najuapatsi? ¹⁸Maponëje caenë saicaya nacuapijinë, apo judionë ata, naviateca Diosojavabelia pejumaitsinexa: “¡Diosomë, bitso ayaijamatabëcuenenëmë! ¡Tavitanejavami baja vecua, nejamatejemayaexaname!” pe-jainexa Diosojavabelia, jai Jesús bajarajota penubenaevijavabelia Samaria nacuapijinë yabara.

¹⁹Nexata Samaria nacuapijinëjavabelia Jesús jumaitsi:

—Nonotapunare. Ponare baja. Jamatejemamë rabaja tanejumecovënëtsixaemë tacajamatejemayaexanaevanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi

²⁰Fariseovi jumaitsi Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitsi fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajaitaxutota. ²¹Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aconoxae evetapona pijajivi paxamë tuatujëta, jai Jesús fariseovijavabelia.

²²Nexata Jesús itsamatacabi mapanacuaje pevetsijavanexa, tajëvelia navajunupaeba pijajivijavabelia. Jesús jumaitsi mapacueniaje:

—Itsamatacabi xanë, Daxitajivi Pematapijinënë, mapanacuaje taevetsinë tsane. Nexata paxamë picani bitso pajitsipaenename patanetaenexamë mapanacuaje taevetsicuene. Itsiata baitsi jane apo pataemë tsane mapanacuaje taevetsicuene. ²³Nexata itsamonae pacajumai tsane: “Bajarajotalia eca mapanacua pepo pevetsinëje,” pacajai tsane xanë yabara. Itsa jume, pacajumai tsane: “Majota ecaje, mapanacua pepo pevetsinëje,” pacajai tsane xanë yabara. Itsiata pëtsa paponame. Pëtsa pamuxunaponamenua bajarapamonae pepëta. ²⁴Pacuenia yamaxë itsa nivejai tsajuni athëbëvetsica, caecuenia jivi cotiatane daxitajava, bajara pijinia pacuenia daxitanacuanëpijivi caecuenia ne-taena pamatacabi patsianicajë xanë, Daxitajivi Pematapijinënë. ²⁵Itsiata copiaya ayaicuenia navixaetaeya bejibinë tsane. Mapanacuataje pejinavanapaevi apo nejumecovënëtsinua tsane Dioso athëbëvetsica taneitorobinëcuenetsica. ²⁶Pacuenia bajayata jemata itsi pamatacabi Noëpijinë ponapona, bajara icatsia jemata itsane pamatacabi xanë, Daxitajivi Pematapijinënë, jemata icatsia patsianicajë. ²⁷Bajayata pamatacabi Noëpijinë ponapona, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamonae. Itsamonae pexënatoyonë pe-

bijavabelia canajetapona petonacojobinexatsi. Bajaramonae jamatejema saya jinavanapa. Nexata bajaramatacabi Noépijinē ēpijamonae pinijibarcojavabelia barējunua. Nexata daxitajivi merata bubuna jemata ira itsa bubuta. ²⁸ Bajara pijinia itsi bajayata pamatacabi Lotpijinē ponapona. Jivi saya jamatejema jinavanapa. Pexaejava xaevanapa. Apaevanapanua. Comuacaponā. Canajetapona. Ubapona pijapabianē. Pijabonē ata exanapona. ²⁹ Itsiata baitsi jane pamatacabi Lotpijinē Sodomatomara vecuapitsapa, jemata athēbēvetsica pinijicuenia isotonē othopaica. Othopaica pitarutsiibotonēnuā. Nexata daxita Sodoma tomarapijivimi tajuatsi. Nexata baja verebiabatsi. ³⁰ Bajara pijinia pacuenia icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

³¹ Icatsia Jesús jumaitsi pijajivijavabelia:

—Pamatacabi xanē jemata patsianicajē, itsajivi ata pētsa sivanajamatabēxaina mapanacuapijicuenēje. Nexata pajivi athēbēyo bojumatatsia ecaya, perunaecujinaetsica, pētsa sivanajamatabēxaina pijaboēnēalia pebobenaevanē pejutsinexa. Pajivi pijinia pijapabita nacuenebaponapona, pētsa najamatabēxaina penavitsinexa pijaboyabelia. ³² Panajamatabēnapire pacuenia bajayata Lotpijinē pijavami exanatsi. Lotpijinē pijavami pesivanajamatabēxainaexae mapanacuapijicuenē, napijivitaeyojopa. Nexata baja tēpa. ³³ Pajivi exanaponapona penatojitsipaecuenia, apo xainae tsane matacabi apo peverevereaejava. Itsiata baitsi jane pajivi xanē tajamatabēcueneta copatsiana penatojitsipaecuenia pexanabiabijavami, bajarapajivi xainaena matacabi apo peverevereaejava, jai Jesús pijajivijavabelia.

³⁴ Icatsia Jesús jumaitsi tajēvelia pijajivijavabelia:

—Xaniajanē pacuenia pacatsipaebijitsiatsi. Pamatacabi patsianicajē, bajarapameravi anijanēbeje majitanucaenabeje caecamata. Itsanē tanejumecovēnētsinē tsane. Itsanē apo tanejumecovēnētsinē pitsianatsi ángelnē. Apo tanejumecovēnētsinē copatabuatsianatsi.

³⁵ Anijavabeje pijinia najuacuabanucaenabeje caejavata. Nexata tanejumecovēnētsiva pitsianatsi. Apo tanejumecovēnētsiva copatanutsianatsi. ³⁶ Anijanēbeje pijinia najuanacuenebanucaenabeje pabita. Nexata tanejumecovēnētsinē pitsianatsi. Apo tanejumecovēnētsinē copatanutsianatsi, jai Jesús tajēvelia pijajivijavabelia.

³⁷ Jesús nexata pijajivi itsa jumetane bajarapacuenia Jesús pejumaitsijava, bajarapamonae jumaitsi Jesúsjavabelia:

—Patajatuxanenē, ¿detsa jota bajarapacuenia yajuvēnēpitsianatsi? jai Jesús pijajivi.

Nexata Jesús jumaitsi tajēvelia pijajivijavabelia:

—Pacuenia quequeremonae bepījia yapētane itsajota petuxutsaebinē boca bajarajota penacaetuatsinexa, bajara pijinia pacuenia daxita tajajivi bepījia yapētaena

tapatsijavatsica penacaetuatsinexa xanējavaberena, jai Jesús pijajivijavabelia.

Pacuenia Jesús pijajivijavabelia livaisi tsipaeba jueznē pelivaisicuenia yabara pelivaisi

18 Jesús pijajivi livaisi tsipaeba mapacueniaje Jesús pijajivi jamatabēcuenecueranaenejeva pevajētabiabinexa Diosojavabelia. ² Nexata Jesús jumaitsi pijajivijavabelia:

—Tomarata ponapona jueznē. Bajaraponē pevetsinē jivi penaneconitsiaexanaecuenē. Bajaraponē Dioso apo cujunavi. Jivi ata apo cujunavi. ³ Bajarapatomarata ponapona pamona pevecuatēpaevatsi. Bajarapova ponabiaba jueznējavabelia pejumaitsiabinexa:

“Naneconitsiaexanare ponē xanējavaberena naneconita. Naneconitsiaexanare pacuenia caitoroba nijatuxanenē bajarapitsivi nenaneconitsiaexanaenexa,” pejaitsiabinexa, bajarapova ponabiaba jueznējavabelia. ⁴ Itsiata abaxē bajayajebi jueznē apo jamatabēcueneyavenonae bajarapova. Belia baja bexēa jueznē jejai. Nexata jueznē jamatabējumaitsi: “Diosopicani apo cujunavinē. Jivi ata picani apo cujunavinē. ⁵ Itsiata mapovaje tanejamatabētonotabiabixae, yavenonaenajē pacuenia nitorobabiaba. Nexata baja bajarapova matavējēa apo patabiabirena tsane xanējavaberena tanecueranaeyaexanaenexa,” jamatabējai jueznē, jai Jesús pijajivijavabelia.

⁶ Jesús icatsia jumaitsi pijajivijavabelia:

—Bajara jamatabēcuenētsi jueznē, pibisiajamatabēcuenēnē ata. Yavenona bajarapova asaēya pevajēcabiabixaetsi. ⁷ Bajara pijinia pacuenia Dioso ata pijajivi yavenonaena itsamonae pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajētabiabiana Diosojavabelia matacabijebi, meravi yajava. Dioso cajena apo cuenenajematsi tsane itsa yavenonaena pijajivi. ⁸ Xaniajanē pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonae pibisiacuene pexanaeyanivatsi. Pamatacabi xanē, Daxitajivi Pematapijinēnē, icatsia patsianicajē, ¿caxitajarabianajē tsaja abaxē tanecopiaevetavanapaevi? jai Jesús pijajivijavabelia.

Pacuenia itsanē fariseonē, itsanē impuestomatamo gobierno pejamatabēcuene pematamoyanijobinē, vajētabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonae. Bajarapamonae jamatabējumai tsabiabi: “Vaxaitsi cajena pexaniajamatabēcuenevitsi itsamonaevecua. Itsamonae bitso nacavecuapibisiajamatabēcuenevi,” jamatabējai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

¹⁰ —Anijanēbeje tsiabeje templobojavabetsia pevajētšinexabeje Diosojavabelia. Caenē fariseonē. Itsanē gobierno pejamatabēcuene impuestomatamo pematamoyanijobabiabinē. ¹¹ Nexata fariseonē nuca.

Fariseonē pevajētsijavata Diosojavabelia, bitso bepexaniajamatabēcuenenē nataeya jumaiti mapacueniaje: “Diosomē, pexaniajamatabēcuene carajutatsi. Tsipaji pacuenia itsamonae jamatabēcueneitsi tsenae, bajara xanē apo jamatabēcueneitsinē. Yamaxēitojorobiaya jivi apo tavecuanacobetoxotsinē. Apo tacujirubejenē cajena. Apo tajaitsinē itsava tajavavecua. Pacuenia maponēje gobierno pejamatabēcuene impuestomatamo pematamoyanijobabiabinē jamatabēcueneitsije, bajara xanē apo tajamatabēcueneitsinē. ¹² Caesemana canacujitsia, anijamatacabibeje, najamatabēcuene xaniavaetsiaya ponaponabiabajē xaenejevanē taxaejava tacavajētsinexa xamējavabelia. Daxita pacuene nacanabajē, diez xuabejeyajuvēnjējava, caejava, xamējavabelia carajutabiabatsi ofrendacuenia,” jai mapacueniaje fariseonē templobota pevajētsijavata Diosojavabelia. ¹³ Nexata ponē gobierno pejamatabēcuene impuestomatamo pematamoyanijobabiabinē, pevajētsijavata Diosojavabelia tajiyo nucalia piauraxae. Athēbēabetsia ata penavēyotsijava cujunava. Namēpabēbenuca pecobeta pejamatabēbējaixae pibisiacuene pexanaeneconi yabara. Nexata bajaraponē Diosojavabelia pevajētsijavata jumaiti mapacueniaje: “iDiosomē, nitaxutotsoniataema! iPibisiacuene cajena bitso xanē exanabiabajē!” jai bajaraponē templobota pevajētsijavata Diosojavabelia, jai Jesús mapacueniaje bepexaniajamatabēcuenevi penataevijavabelia.

¹⁴ Icatsia Jesús jumaiti bajarapamonaejavabelia:

—Xaniajanē pacuenia pacatsipaebijitsiatsi. Ponē gobierno pejamatabēcuene impuestomatamo pematamoyanijobabiabinē, bajarapacuenia pevajētsixae Diosojavabelia, Dioso baja vecuaajibiaexanatsi pibisiacuene pexanaeneconimi. Nexata baja bajaraponē naviata pijaboyabelia planeconijibinē. Ponē fariseonē, navajētsi ata Diosojavabelia, itsiata pijaneconi yajava naviata pijaboyabelia. Tsipaji beayaijamatabēcuenenē natane pevajētsijavata Diosojavabelia. Bajaraxuata pajivi beayaijamatabēcuenejivi natane itsamonaevecua, bajarapajivi beveliajamatabēcuenejivi exanaenatsi Dioso. Pajivi saya beveliajamatabēcuenejivi natane itsamonaevecua, bajarapajivi ayaijamatabēcuenejivi exanaenatsi Dioso, jai Jesús bepexaniajamatabēcuenevi penataevijavabelia.

Pacuenia Jesús jumaiti pejevaxijivixijavabelia yabara pelivaisi

¹⁵ Itsamonae pejevaxijivixi tocapataponatsi Jesús pecobeta pejayataponaenexa. Nexata Jesús pijajivi itsa tane bajarapacuenia, Jesús pijajivi itaveta pexi pecapatsivi. Jesús pijajivi jumaiti pexi pecapatsivijavabelia:

—Pētsa patocapataponame panexi Jesúsjavabelia, jai.

¹⁶ Nexata Jesús jumaiti pijajivijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeabinejeva xaniavaetsia bajumecovēnēta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeabine-

jeva xaniavaetsia bejumecovēnēta Dioso pejumelivaisi. ¹⁷ Xaniajanē pacuenia pacatsipaebijitsiatsi. Mapitsipejevaxijivixije itsa jumecovēnēta palivaisi tsipaebatsi, bajumecovēnēta xaniavaetsia jumeabinejeva. Nexata pamonaē jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovēnēta Dioso pejumelivaisi. Nexata pamonaē jumeabinejeva xaniavaetsia jumecovēnētsiana Dioso pejumelivaisi, bajarapamonae jonena Dioso pijanacuayabetsia. Itsiata baitsi jane pamonaē Dioso pejumelivaisi jumeabinejeva xaniavaetsia apo jumecovēnētsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevējēato, bitso pexinaenē, cuaicuaijai Jesúsjavabelia yabara pelivaisi

¹⁸ Pevējēato, judíovi pevetsinē, yanijoba Jesúsjavabelia. Pevējēato jumaiti mapacueniaje:

—Petuxanenē, pexaniajamatabēcuenenēmē, ¿detsa pitsicuene exanaenajē taxainaenexa matacabi apo pevereverecaejava? jai pevējēato.

¹⁹ Nexata Jesús jumaiti pevējēatojavabelia:

—¿Detsa xuajitsia: “Pexaniajamatabēcuenenēmē,” nejamē? Ajibi raja itsapebi ata pexaniajamatabēcuenenē. Caenē rabaja Dioso pexaniajamatabēcuenenē.

²⁰ Xamē baja yapētaneme pacuenia Dioso pejumelivaisita itoroba jivi pejumecovēnētsinexa. Jumaiti mapacueniaje: “Pētsa jaitame itsapetiriva nijavavecua. Pētsa beyaxuabame jivitonē. Pētsa nacobetoxotame. Pētsa itsamonae pexanaejava yabara najumetsēnētsiaya paebame. Axa yayataema. Ena ata yayataema,” jai Dioso pejumelivaisita. Xamē baja yapētaneme bajarapalivaisi, jai Jesús pevējēatojavabelia.

²¹ Nexata pevējēato jumaiti Jesúsjavabelia:

—Daxita rabaja bajarapalivaisianē jumecovēnētajē pejevaxinēnjavaveliacujinae, jai pevējēato.

²² Itsa Jesús jumetane bajarapacuenia pejumecanavatsijavatsi, nexata icatsia jumaiti pevējēatojavabelia:

—Abaxē raja catosaica caejava nexanaenexa. Canajere daxita nexinaejavami. Bajarapamatamomi tsicobetsanaenename bepejiobivi. Bajaraxuacujinae nepēnaponaename. Nexata bajarapacuenia xainaenename bitso nexinaeacuene Dioso pijanacuatatsia, jai Jesús pevējēatojavabelia.

²³ Bajarapacuenia Jesús itsa jumaiti pevējēatojavabelia, nexata pevējēato bitso bejamatabējiobi tsanajetsireca. Tsipaji pevējēato daxitacuene bitso pexainaenē. Nexata pevējēato apo jamatabējumecovēnētsi palivaisi Jesús tsipaeba. ²⁴ Itsa Jesús tane pevējēato bepejamatabējiobi tsanajetsijavareca, nexata pevējēato pecovēta jumaiti pijajivijavabelia:

—iPamonaē bitso daxitacuene pexinaeavi, tsiayapēbejetsi bitso penajamatabēcuene copatsinexa Diosojavabelia pecapanepaenexatsi Dioso pijanacuayabetsia! ²⁵ Pacuenia camello acuenebi pejonejava palutaetoitaxutovojojualia, bajara pijinia pacuenia bitso pexainaenē acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:
—¿Detsa nexata pitsivi panepaena Diosojavabelia, bitso pexainaevi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:
—Pacuene jivi apo caējēpaetsi pexanaenexa, bajarapacuene Dioso caējēpatsi pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:
—Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnajinavanapatsi, jai Pedro.

²⁹⁻³⁰ Jesús nexata jumaitsi:
—Xaniajanē pacuena pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuyapijivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bexēajavabelia petēpaecujinae ata Dioso rajutsianatsi maticabi apo pev-
ereverecaejava, jai Jesús pijajivijavabelia.

Pacuenia icatsia Jesús tajēvelia navajunupaeba pebexuabijavanexatsi yabara pelivaisi

³¹ Jesús itsamonaevēcua epijajivi, doce ponēbeje, junata pimoxoyotsinexatsi. Nexata Jesús pebexuabijavanexatsi, tajēvelia navajunupaeba pijajivijavabelia. Jesús jumaitsi mapacueniaje:

—Panejumetaema. Mara Jerusalén tomarabelia ponatsije. Bajayata Diosojumepaebivimi profetavi, xanē, Daxitajivi Pematapijinēnē, talivaisi tajēvelia yaquina. Pacuena nexanaejitsia, daxita bajarapalivaisi bajayata profetavimi tajēvelia yaquina. Nexata daxita pacuena xanē talivaisi bajayata tajēvelia profetavimi yaquina, daxita jane baja bajarapacuene Jerusalén tomaratalia netocopiapatsiana. ³² Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonae necanecaponaena. Nebijataena pibisiacuenia. Nesuabiana. ³³ Nejumatitibabena penaneconitsivi pejumaconitabiabimacata. Bajaraxuacujinae nebexuabiana. Itsiata baitsi jane tanebeyaxuabicujinae, acueyabi maticabita, icatsia asaenē tsane, jai Jesús pijajivijavabelia tajēvelia penavajunupaebijavata pebexuabijavanexatsi.

³⁴ Itsiata Jesús pijajivi apo jumeyapētae pajamatabēcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsēcēnaenē, Jericó tomarapijinē, yabara pelivaisi

³⁵ Jesús imoxoyotanajetaruca Jericótomara. Nexata namuto muxuneneta eca bitso pitaxutotsēcēnaenē, apo petanenē. Bajaraponē amoneya palata vajēcabiabeca jivijavabelia. ³⁶ Nexata bitso pitaxutotsēcēnaenē itsa jumetane jivibitsaētoxoneto pecuaicuajai tsanajetarubenaejava namutua, bajaraponē epajunateca.

—¿Detsa xua pajaitame? jai tsecae bajaraponē.

³⁷ Nexata jivi jumaitsi bajaraponējavabelia:
—Jesús raja, Nazaret tomarapijinē, maxuayo najetarucaje, jai jivi.

³⁸ Nexata pitaxutotsēcēnaenē vavajai tsecae.
—¡Jesús, Davidpijinē pemomomē, nitaxutotsoniataema! jai tsecae bajaraponē.

³⁹ Nexata picani itsamonae, Jesús pevajēnaeya penajetarubenaevi, jumeitaveta bajaraponē pemoyanexa. Itsiata biji bitsoyo orijibia vavajai tsecae.

—¡Davidpijinē pemomomē, nitaxutotsoniataema! jai tsecae pitaxutotsēcēnaenē.

⁴⁰ Nexata Jesús muxunanucojopa. Jumaitsi pijajivijavabelia:
—Panetocomacaponaremena pitaxutotsēcēnaenē, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsēcēnaenējavabelia:

⁴¹ —¿Detsa xua jitsipame tacaexanaenexa? jai Jesús. Nexata bitso pitaxutotsēcēnaenē jumaitsi Jesúsjavabelia:

—Jesús, jitsipajē taitaxutoxanepanaejava, jai pitaxutotsēcēnaenē.

⁴² Jesús nexata jumaitsi pitaxutotsēcēnaenējavabelia:
—Itaxutoxanepaname rabaja. Tsipaji nesivajamatabējumaitsimē mapacueniaje: “Jesús nitaxutoxanepanaeyaexanaena,” nesivajamatabējamē, jai Jesús pitaxutotsēcēnaenējavabelia.

⁴³ Bajarapacuena Jesús pejumaitsijavata, bitso pitaxutotsēcēnaenēmi xaniavaetsia baja tane. Nexata bajaraponē napona baja Jesús pepēta. Bajaraponē namutua jumai tsanajetarucae Diosojavabelia:

—¡Diosomē, bitso pexaniacuene netoexaname! jai tsanajetarucae bajaraponē.

Pamonae ata tane bajaraponē pitaxutoxanepanaejava baja, daxita bajarapamonae ata Diosojavabelia jumai tsanajetarubena:

—¡Diosomē, bitso ayaijamatabēcuenenēmē! jai tsanajetarubena Diosojavabelia.

Pacuenia nabarēcuaijuajibeje Jesúsbeje Zaqueobeje yabara pelivaisi

19 Jesús najetaruca Jericó tomarajava. ² Jericó tomarata ponapona Zaqueovēnēnē. Bajaraponē gobierno pejamatabēcuene impuestomatamo pe-matamoyanijobabiabivi penamatacaitorobinē. Zaqueo bitso pexainanē pexainaejava. ³ Nexata Zaqueo jamatabētane Jesús. Itsiata apo caējēpaetsi petaejava. Tsipaji Zaqueo petoyaecaenēyo. Jivibitsaētoxoneto matatoyorotsia nubenatsi Jesús Zaqueo pevajēnae. ⁴ Nexata Zaqueo kujinaeponalia jivibitsaētoxoneto pevajēnaeyabelia Jesús peponaenamutuabelianexa. Junaya naejavatsia athēbēvetsica petaenucaenexa Jesús penajetarucaejava. ⁵ Nexata Jesús namutua itsa imoxoyotanajetaruca, itsa ponaeta Zaqueo athēbēyo nucaya, bajaraponaejavatsia Jesús naēcotsia. Nexata Jesús taenutsia Zaqueo. Jesús nexata jumaitsi Zaqueojavabelia:

—Zaqueo, naxanitsiayo runaimica. Nijaboyabelia raja patsijitsianë, jai Jesús.

⁶ Nexata Zaqueo naxanitsiayo runajopaica. Barëyaya copiapita pijaboyabelia pebarëponaenexa Jesús.

⁷ Daxita pamonaë Jesús matatoyorotsia najetarubenat-si, itsa tane bajarapacuenë, Jesús baracuaicuaijait-si tsanajetarubenaë. Èpamonaë najumait-si tsanajetarubenaë Jesús yabara:

—Jesús raja naponaponaëjitsia Zaqueo pijabota, caranata pibisiacuenë pexanaenë pijabota, najai tsanajetarubenaë bajarapamonaë Jesús yabara.

⁸ Nexata Zaqueo pijabota Jesús eca mesa muxunëna. Bajarajota Jesús pitabarata Zaqueo nonotapuna. Jumait-si Jesúsjavabelia:

—Tajatuxanenë nejumetaema. Tsatsianëjë namatajëpaeya taxainajava tarajutsinëna bepejiobivijavabelia. Pamonaë yamaxëitojorobiaya vecuanotajë tamatamoyanijobijavata impuestomatamo, bajarapamonaë tocanaviabianëjë. Nexata tayamaxëitojorobijamatabëcuene bajarapamonaë rajutsianajë juya cuatro xuabeje tsaponai caijavayomijamatabëcuene, jai Zaqueo Jesúsjavabelia.; ⁹ Nexata Jesús jumait-si Zaqueo-javabelia:

—Zaqueo, ajena rabaja pamatacabi, caxitajarabame, nijamonaë yajava, nijaneconivecua pecacapanepaejavanaë Diosojavabelia. Tsipaji baja nijamonaë barëjumecovënëtame Dioso. Zaqueo, xamë Abrahampijinë pemomo atamë, abaxë picani Dioso apocataë Abrahampijinë pemomomëcuenia. Itsiata baitsi jane ajena baja Diosojavabelia nenajamatabëcuenecopatsixae, Dioso jane baja catane pepacuene Abrahampijinë pemomomëcuenia. ¹⁰ Xanë, Daxitajivi Pematapijinë, sivapatajopajë tajaitsinëna Diosovecua penaxuabivi tacapanepaenëna pijaneconivecua, jai Jesús Zaqueojavabelia.

Oro palatanëanë, diez ponëbeje, yabara pelivaisi

¹¹ Zaqueo pijabota itsamonaë namuxunaëvetena Jesús petsipaëbilivaisi Zaqueojavabelia. Pamonaë namuxunaëvetena, jamatabëcuenënavëxaniabiaya jamatabëjumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomara-belia, copiajopaena jane baja daxita Dioso pijajivi pevetsijava,” jamatabëjai tsenae bajarapamonaë. Bajarapacuenia jamatabëjumai tsenae tsipaji baja Jerusaléntomara imoxoyo ecalia Jesús pepatsinëna.

¹² Bajaraxuata Jesús livaisi tsipaëba bajarapamonaëjavabelia. Jesús jumaimatabëcuenënavëxaniabiaya jamatabëjumai tsenae: “Imoxoyo rabaja ecaliatsi mapacueniajaje:

—Petuxanenë ponapona pijanacuata. Nexata pepo nacuaëvetsinë tonajumeitorobarenatsi tajënacua-verëna. Petonajumeitorobijumetsirena jumait-sirena mapacueniajaje: “Ponaëname maberëna-jaje nacua nevetsinënexa tacaëxanaenëna nijanacua nevetsinëna. Bajaraxuacujinaë naviatsiaremelia nijanacua jane baja nevetsinëna,” jait-sirena petonajumeitorobijumetsirena. ¹³ Nexata petuxanenë peponaëvajënaë, junata pija-

jivi, diez ponëbeje. Nexata petuxanenë pijajivi evetsiaëxana pijapalatanëanë, oronëanë, bitso penamata-motsinëanë. Caenë canacujitsia caepalatanë evetsiaëxana-pona. Nexata petuxanenë pijajivi jumait-si pijajivi-javabelia: “Bajarapapalatata pacomuataponaëname. Xua pacomuataponaëname, icatsia pacanajetaponaëname. Nexata bajarapacuenia netoayaijava tsaponae tsane tajapalata,” jai petuxanenë pijajivijavabelia. Bajaraxuacujinaë pona jane baja. ¹⁴ Itsiata baitsi jane pevetsinacuatanëna pejinavanapaëvi, bitso itoyatsi petuxanenë. Nexata bajarapamonaë petuxanenë pecovëvelia itsamonaë itorobalia, itsajotalia petuxanenë nacua pevetsinënexa exanaëjitsiatsi, bajarajotalia pejumait-sinëna: “Apo pajitsipaenë bajaraponë patanevetsinënexa patajanacuata,” pejinëna petuxanenë yabara. ¹⁵ Itsiata baitsi jane petuxanenë pijanacua baja pevetsinënexa exanatsi. Nexata baja naviarena pijanacuayaberëna pevetsinëna jane baja pijanacua. Nexata baja parena. Nexata petuxanenë pepatsicujinaëna, junata icatsia pijajivi peyapëtaenëna jane baja pacuenia caenë canacujitsia pijapalatanëanë pijajivi tocanacuenebatsi pecovëta.

¹⁶ Copiaya pepatsinë jumait-si pijatuxanenëjavabelia: “Tajatuxanenë, nijapalatanë, taneëvetsiaëxanaenëmë, catopitsapa baja diez ponëbeje. Nexata baja daxitata once ponëbeje,” jai. ¹⁷ Nacuaëvetsinë nexata jumait-si pijajivitonëjavabelia: “Xanëpana rabaja. Xaniavaetsia netoëvetaponaëname. Tsiquirijavayo ata xaniavaetsia netoëvetame. Nexata icatsia diez patomarabeje netoëvetaponaëname,” jai nacuaëvetsinë pijajivitonëjavabelia. ¹⁸ Icatsia itsanë pijatuxanenë pijapalatanë petoëvetsinë pata. Nexata bajaraponë jumait-si: “Tajatuxanenë, nijapalatanë, taneëvetsiaëxanaenëmë, catopitsapa baja cinco ponëbeje pematatsënëa,” jai. ¹⁹ Nacuaëvetsinë nexata jumait-si pijajivitonëjavabelia: “Xamë icatsia cinco patomarabeje netoëvetaponaëname,” jai nacuaëvetsinë pijajivitonëjavabelia.

²⁰ Nexata icatsia itsanë pijatuxanenë pijapalatanë petoëvetsinë pata. Jumait-si pijatuxanenëjavabelia: “Tajatuxanenë, mara nijapalatanëjaje, taneëvetsiaëxanaenëmë. Pañuelopanayota yamatacëtsiaya catoevetsi. ²¹ Bajarapacuenia catoevetsi tsipaji cacujunavatsi. Nijamatabëcuenësaenë. Xamë apo itaxutobejiobiataeyabiabimë nijajivi, pamonaë catoeveta nijajava. Itorobabiabame nijajivi pecatopitsinëna apo nijajava ata. Itorobabiabamëna pecatonotsinëna apo neubiaëxanaëjava ata,” jai pijatuxanenë pijapalatanë petoëvetsinë. ²² Nexata nacuaëvetsinë jumait-si pijajivitonëjavabelia: “¡Acujirubëjëmë xamë! Bijiaya netoëvetame. Naneconitame bajarapacuenia tanejumait-sijavamë yabara. Xamë baja cajena yapëtanëme tajamatabëcuenësaenëjava tajajava yabara. Pacuenia itorobabiabajë tajajivi tanetopitsinëna apo tajajava ata, yapëtanëme baja. Pacuenia ata itorobabiabajë tanetonotsinëna apo taubiaëxanaëjava ata, yapëtanëme baja. ²³ Xanëpanaëjitsipa xamë banco pevetsivi itsa netocanacuenebiaëxanaëjitsipame tajapalatanë. Nexata banco pevetsivi aëconoxae tajapalatanë netocanaviatsipa. Nexata

pecacovaetsijamatabëcuene itsajava palata netoyajavacanaviatsipa," jai nacuaevetsinë pijajivitonëjavabelia. ²⁴ Nexata nacuaevetsinë jumaiti pijajivijavabelia: "Tajapalatanë panetovecuapire maponëje. Nexata juya parajure ponë xaniavaetsia netoeveta tajapalatanë. Bajaraponë xaniavaetsia netocanacueneba. Nexata baja pematatsënëa diez papalatanëbeje netopitsapaeyaexana. Nexata taevetsiaexanaenëta once ponëbeje," jai nacuaevetsinë. ²⁵ Nexata nacuaevetsinë pijajivi jumaiti pijatuxanenëjavabelia: "Patajatuxanenë, bajaraponë xaina baja ayaijava. ¿Detsa xuajitsia rajutsijitsiamë pematatsënëa?" jai pijajivi. ²⁶ Nexata nacuaevetsinë jumaiti pijajivijavabelia: "Pacatsipaebatsi rabaja. Pajivi baja ayaijava xaina, pematatsënëa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ²⁷ Tajavajabitsaë, pamonaë picani apo jitsipae mapanacua taevetsijavaje, bajarapamonaë pacaponaremena maberenaje patanevecuaverebiabinexamë taitabëta," jai nacuaevetsinë pijajivijavabelia, jai Jesús livaisi petsipaebijavata Zaqueo pijabota.

Pacuenia Jesús pata Jerusalén tomarata yabara pelivaisi

²⁸ Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia.

²⁹ Jerusalén tomaravecua imoxoyo eca petsuto. Bajarapatsutojumata nubena olivonaenë. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanajetaruca bajarapatomarayobeje, nexata itoroba pijajivitonëbeje bajarapatomarayobejejavabelia.

³⁰ Jesús jumaiti pijajivitonëbejejavabelia:

—Paponarebeje mapatomarayo ecaliajejavabelia. Itsa rabaja papatsiaremeliabeje, pataenutsianamebeje burro pecëtanutsinëtsi. Bajarapaburro itsajivi ata abaxë apo jumaponaë. Paisinaenamebeje. Payamaëcarenamebeje tsane. ³¹ "¿Detsa xuajitsia paisinamebeje burro?" itsa pacajaiabeje tsane itsajivi, nexata pajumaitisimëbeje tsane: "Vajatuxanenë raja namatavenona," pajamëbeje tsane, jai Jesús pijajivitonëbejejavabelia.

³² Nexata Jesús pijajivitonëbeje liabeje. Pacuenia Jesús jumaiti, bajarapacuenia caxitajarabanucabeje burro. ³³ Nexata itsa isinabeje, burro pexainaevi jumaitisibeje:

—¿Detsa xuajitsia paisinamebeje burro? jaitsibeje.

³⁴ Nexata Jesús pijajivitonëbeje jumaitisibeje burro pexainaevijavabelia:

—Vajatuxanenë raja namatavenona. Bajaraxuata paisinajëbeje, jaiabeje.

³⁵ Nexata jane baja burro capatabeje Jesúsjavabere-na. Nexata Jesús pijajivi burro tsijumajeba pijacamisajumavelia penaxatabijavanë. Jesús baja bajarapaburrojumata ecaya. ³⁶ Jesús itsa yanajetaruca burrota, panamutoveliala Jesús patsijitsia Jerusalén tomabelia, bajarapanamutua jivi pijacamisajumavelia pe-

naxatabijavanë namutua tsivajënaeyerequejebaponatsi yayataeya pecopiapitsinexatsi. ³⁷ Patsutojumata olivonaenë nubena, bajarapatsutojavatsica namuto namatononocarucaica. Nexata bajarapanamutuatsica Jesús imoxoyotanajetaruca pepatsinexa Jerusalén tomarata. Nexata jivi ayaibitsaëtoxaneto, Jesús pijajivi yajava, vavajai tsanajetarubenaë. Sivabarëyaya vavajai Diosojavabelia:

—¡Diosomë, bitso ayaijamatabëcuenenëmë! jai tsanajetarubenaë bajarapamonaë.

Bajarapacuenia vavajai tsanajetarubenaë tsipaji bajarapamonaë cujirutaeyabiaba Jesús Dioso pesaëta ayaicuepe xanaponaëjavanë. ³⁸ Bajarapamonaë jumai tsanajetarubenaë Jesús yabara:

—¡Maponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! ¡Jamatabëcuenexanepanaëya jinavana-pa daxita pamonaë athëbëtatsia jinavana-pa! ¡Pini-jicuepe rabaja exana Dioso! jai tsanajetarubenaë namutua daxita Jesús pijajivi.

³⁹ Nexata fariseovi najetarubenaë bajarapajivibitsaëtoxaneto tuatujëta. Nexata fariseovi jumaiti Jesúsjavabelia:

—Jesús, jumeitavere baja nijajivi bajarapacuenia pejumaitisyaniva xamë yabara, jai fariseovi.

⁴⁰ Nexata Jesús jumaiti fariseovijavabelia:

—Xaniajanë pacuenia pacatsipaebijitsiatsi. Mapamonaëje moya itsa najetarubenaëjitsipa, nexata juya ibotonë vavajai tsenaë tsipae, jai Jesús fariseovijavabelia.

⁴¹ Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. ⁴² Jesús pesivanuejavata Jerusalén tomarapijivi, Jesús jumaiti Jerusalén tomarapijivi yabara mapacueniaje:

—¡Bitso picani jitsipajë Jerusalén tomarapijivi mapamatacabitaje peyapëtaenexa pacuenia Dioso pepacuene jamatabëcuene xanepanaëyaexanaëjitsipatsi, itsa nejumecovënëtsipa! Abaxë raja aeconoxaë Dioso apo tocopatsitsi peyapëtaeyaniva bajarapacuene. ⁴³ Nexata tocopiapatsianatsi pibisiamatacabi. Pijavajabitsaë tsimaxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxënubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsianatsi pijavajabitsaë. ⁴⁴ Nexata irabetsica topenetsianatsi pijabonëmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomi ata tosarababenatsi. Nexata itsaibopana ata apo bocaë tsane itsaibopana jumavereca. Bajarapacuenia itsane tsipaji xanë apo neyapëtaë Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinuua, yabara pelivaisi

⁴⁵ Jesús pepatsicujinae Jerusalén tomarata, joneya temploboyalía. Nexata templobota Jesús tane pecanajetabiabivi, pecomuacabiabivinuua. Nexata daxita bajarapamonaes Jesús pitsapaeyaexana templobovecua.

⁴⁶ Jesús jumaitsi bajarapamonaesjavabelia:

—Dioso baja cajena pejumelivaisibaxutota mapatemplobo yabara tajévelia jumaitsi mapacueniaje: “Tajabo raja jivi xanējavaberena penavajēcaebo tsane,” jai Dioso pejumelivaisibaxutota. Itsiata baitsi jane paxamē yamaxēitorobiaya panenacobetoxotsinexa, panacaetuatabiabame mapabotaje, jai Jesús templobota pecanajetabiabivijavabelia.

⁴⁷ Bajaraxuacujinae caematacabi canacujitsia Jesús jivi livaisi tsipaebabiaba bajarapatemplobota. Nexata sacerdotevi penamatacaitorobivi, judíovi pecujarubivinuua, tomaraevetsivinuua, najumejaita picani Jesús pebexuabinexatsi. ⁴⁸ Itsiata acuenebi Jesús pebexuabijavatsi. Tsipaji Jesús itsacueneneconi ata apo xainae. Daxitajivi yayatanetsi. Jesús jivi petsipaebilivaisianē xaniavaetsia namuxunaevetabiabatsi.

Pacuenia Jesús caējēpatsi daxitacuene pexanaenexa yabara pelivaisi

20 Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeneconivecua. Nexata bajarajota pata sacerdotevi penamatacaitorobivi, judíovi pecujarubivinuua, judíovi pijaancianovinua.

² Nexata bajarapamonaes jumaitsi Jesúsjavabelia:

—Panetsipaebare cajena. ¿Jipatsa pejamatabēcueneta pecanajetabiabivi, pecomuacabiabivinuua, capitsapame mapatemplobovecuaje? jai.

³ Jesús nexata jumaitsi bajarapamonaesjavabelia:

—Xanē copiaya caejumeyo pacayanijobianatsi patanejumecanaviatsinexamē. ⁴ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? jai Jesús bajarapamonaesjavabelia.

⁵ Nexata epamonaes nabarēcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēnētsimē Juanpijinē pepaebilivaisianē?” nacajai tsipae. ⁶ “Jivi raja saya pejamatabēcueneta Juanpijinē jivi bautisabaponapona,” itsa jai tsipaetsi, nexata daxitajivi anaeya ibotonēta nacatseconaejitsipa vajanacabeyejebinxexa. Bajarapacuenia nacabeyejebijitsipa tsipaji daxitajivi Juanpijinē yabara sivajamatabējumaitsi: “Juanpijinē raja pepacuene Diosojumepaebinēmi,” sivajamatabējai, najai sacerdotevi penamatacaitorobivi, judíovi pecujarubivinuua, judíovi pijaancianovinua.

⁷ Nexata saya bajarapamonaes jumaitsi Jesúsjavabelia:

—Apo payapētaenē ponē Juanpijinē itorobatsi jivi pebautisabaponaponaenexa, jai.

⁸ Nexata Jesús jumaitsi bajarapamonaesjavabelia:

—Nexata xanē ata apo pacatsipaebi tsanetsi ponē nitoroba tacapitsaponaenexa bajarapamonaes templobovecua, jai Jesús.

Pacuenia exana pijamatabēcuenebejevi, itsanē pijauvacabo petoevetsivi yabara pelivaisi

⁹ Jesús taxuxuaba livaisi petsipaebijava jivijavabelia. Jumaitsi mapacueniaje:

—Pijaira pexainaenē pijairata uba ayaibacaboxaneto uvavēnjava. Bajaraxuacujinae itsamonaes evetsiaexana pijauvacabo. Jumaitsi bajarapamonaesjavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonē itorobianajē xua panetotsatsianame tanetopitsinexa,” jai uvabacabo pexainaenē petoevetsivitsijavabelia. Nexata uvabacabo pexainaenē tajēnacuyabelia pona bajajajebi pijabitsarucaenexa. ¹⁰ Itsa baja uvabacabo pexainaenē yapētane pecopiapatsijava uvacuai penaveretsimatacabi penotsinexa, nexata uvabacabo pexainaenē itoroba pijajivitonē. Itoroba petoevetsivitsijavabelia petsicobetsatsinexatsi. Nexata uvabacabo pexainaenē pijajivitonē tovaetabatsi. Toconibabiatsi. Petoconibabecujinaetsi cobesa naviatsiaexanaliatsi.

¹¹ Itsiata uvabacabo pexainaenē icatsia itoroba itsanē pijajivitonē petsicobetsatsinexatsi. Bajaraponē ata icatsia pibisiacuena tobijatanetsi. Toconibabiatsi. Pecoconibabecujinaetsi cobesa naviatsiaexanaliatsi. ¹² Itsiata uvabacabo pexainaenē icatsia itoroba itsanē pijajivitonē. Icatsia bajaraponē ata tomatajorobabiatsi. Uvabacabopēnēyabelia xuabatsi.

¹³ Nexata uvabacabo pexainaenē jamatabējumaitsi:

“¿Detsa nexata xua exanaenajē? Itorobianajē cajena taxēnato, tasivanē. Itsa raeta itorobianajē taxēnato, bajarapamonaes netoyaiyataena,” jamatabējai uvabacabo pexainaenē. ¹⁴ Itsiata baitsi jane uvabacabo petoevetsivitsi, uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonaes najumaitsi: “Mara ponēje itsamatacabi paxa pevēnamuto paxa pijauvacabo pitsipaje. Naxanitsia. Beyaxuabatsi. Nexata raja vaxaitsi vajuavacabo tsane,” najai uvabacabo petoevetsivitsi.

¹⁵ Nexata uvabacabo pexainaenē pexēnato ata tovaetabatsi. Caponaliatsi bajarapauvacabopēnēyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaitsi:

—¿De meta nexata xua exanaena uvabacabo pexainaenē pijauvacabopēnēyabelia?

¹⁶ Uvabacabo raja pexainaenē, patsiarena. Verebiabiana daxita bajarapamonaemi. Nexata icatsia itsamonaes evetsiaexanaena bajarapauvacabopēnēyabelia, jai Jesús bajarapamonaesjavabelia.

Jesús penamuxunaevetsivitsi itsa jumetane bajara-pacuenia Jesús pejumaitisijava, bajarapamonae jumaitis:

—¿Dioso pëtsa copata bajarapacuenia pexanaenexa paxanëjavaberena! jai bajarapamonae.

¹⁷ Nexata Jesús asaëyata naëcota bajarapamonaejavabelia. Jumaitis bajarapamonaejavabelia:

—Payapëtaneme rabaja pacuenia Dioso pejumelivaisibaxutota tajëvelia jumaitis xanë yabara. Ibototo pelivaisicuenia Dioso pejumelivaisibaxutota jumaitis xanë yabara mapacueniaje:

Paiboto itsamonae boexanaevi naitaxutojematabuat-siana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota xanë yabara.

'Bajarapacuenia tajëvelia Dioso pejumelivaisibaxutota itsa jumaitis, judíovi penamatacaitorobivi apo tanejumecovënëtsijavanexa yabara jumaitis. Dioso taneitapetsijava daxitajivi tacapanepaenënexa yabara ata jumaitis, jai Jesús.

¹⁸ Icatsia Jesús jumaitis mapacueniaje:

—Pamonae apo nejumecovënëtsi Dioso pexënatocuenenë, bajarapamonae bitso bejamatabëjiobitsane apo tanëjumecovënëtsixae. Pacuenia ibotojumata pefirapecaejivi, itsa tsapatcatsi, pevixae bitso yanabejiobita, bajara itsane. Pamonae naneconitsiaexanaenajë, bajarapamonae pepacuenenaxuabiana daxitamatacabijavabelianexa. Pacuenia iboto pematcënëbinëtsi apo asaë, bajara itsane, jai Jesús bajarapamonaejavabelia.

Pacuenia Jesús jamatabëcueneëjëbiaya yanijobatsi impuestomatamo pematamotsijava yabara pelivaisi

¹⁹ Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapëtaneme. Nexata bajarapamonae najumaitis:

—Vaxaitsi raja Jesús nacajai, najai.

Nexata picani bajarajota bajarapamonae Jesús jamatabëvaetabatsi. Itsiata bajarapamonae abaxë apo vaetabitsi. Tspajivi cujunava jivi. ²⁰ Nexata itsamatacabi bajarapamonae itorobarena pijajivi yaenebiaya petonamuxunaevetsinexatsi Jesús. Nexata bajarapamonae pijajivi bepexaniajamatabëcuenevi itajara jinavanapa Jesúsjavata. Bajarapamonae namuxunaevetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecaponaeenexatsi nacuaevetsinëjavabelia peneconitsinexatsi.

²¹ Nexata bajarapamonae jamatabëcueneëjëbiaya jumaitis Jesúsjavabelia mapacueniaje:

—Jesús, pacayapëtanetsi jivi pepacuenenexaniajailivaisi netsipaebijava. Daxitajivi, ricovi ata, bepejiobivi ata, najëpaeya yayataeya pexaniajailivaisi tsipaebababame bajarapamonae pejinavanapaenexa pacuenia Dioso jitsipa. ²² Panetsipaebare. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja

vajamatamotsinexa? jai bajarapamonae jamatabëcueneëjëbiaya Jesúsjavabelia.

²³ Itsiata baitsi jane Jesús jamatabëcueneypëtaneme bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitis bajarapamonaejavabelia:

—¿Detsa xuajitsia panejamatabëcueneëjëbame?

²⁴ Panetsitajëre palatanëyo, jai Jesús.

Nexata bajarapamonae tsitajëtatsi palatanëyo. Nexata Jesús jumaitis bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

Nexata bajarapamonae jumaitis Jesúsjavabelia:

—Romanonacua raja pepo pevetsinë pitabara, pevënënu, jai.

²⁵ Nexata Jesús jumaitis bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tspajivi xaniavaetsia Jesús jumecanaviata bajarapamonae jamatabëcueneëjëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

²⁷ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: "Petëpaevi rabaja petëpaecujinae, apo asaë icatsia tsane," jai tsabiabi. Nexata saduceovi imoxoyobatsi Jesús. Saduceovi jumaitis Jesúsjavabelia mapacueniaje:

²⁸ —Jesús, Moiséspijinë bajayata vajanacatoyaquinaelivaisi, jumaitis mapacueniaje: "Ponë pematapijinë pepua penacojobinë baja, itsa tëpa pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexinaenexa bajarapovajavabelia. Nexata pexi itsa xainabeje, bematapijinëmi pexi petanenexa daxitajivi," jai Moiséspijinë bajayata vajanacatoyaquinaelivaisi. ²⁹ Nexata jinavanapa ënacaemonae, siete ponëbeje. Pepo matapijinë copiata nacojoba. Nexata bajaraponë pijava vecuatëpa pexi xainaenejeva. ³⁰ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. ³¹ Nexata icatsia itsanë tuatujëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xinae bajarapovajavabelia. Bajarapacuenia daxita siete ponëmibeje tëpa. Verevereca baja. ³² Belia baja bajarapova ata tëpa. ³³ "Jivi raja petëpaecujinae, Dioso icatsia asaëyaexanaenatsi," jamë. ¿Detsa nexata ponë, bajara-

pamonaeyajuvënë, pijava tsane bajarapova bajarapamatacabi? Daxita pamonae siete ponëmibeje, nacaemonaemi, pitapona picani bajarapovami, jai saduceovi Jesúsjavabelia.

³⁴ Nexata Jesús jumaiti saduceovijavabelia:

—Aeconoxae mapanacuataje pebijivi, petiriavi ata, nacojiobapona. Itsamonae pexënatoyonë pexainaevi pebijavabelia canajetapona petonacojiobinexatsi. ³⁵ Itsiata baitsi jane pamonae Dioso itapetatsi, apo pevererecaenacuataatsia jinavanapaena. Bajarapamonae petëpaecujinae, Dioso icatsia asaëyaexanaenatsi. Bajarapamonae bajarapanacuataatsia apo nacojiobi baja tsane. Bajarajotatsia itsajivi ata pexënatoyo apo canajetsi tsane pebijavabelia petonacojiobinexatsi. ³⁶ Bajarapamonae acuenebi tsane petëpaejava. Tsipaji bajarapamonae jinavanapaena athëbëtatsia pacuenia ángelevi jinavanapa. Bajarapamonae baja Dioso pexi tsane. Tsipaji baja petëpaecujinae Dioso icatsia asaëyaexanaenatsi. ³⁷ Moiséspijinë bajayata yaquina pacuenia Dioso tsipaebatsi tsiquirinaemëyo petajueye-caecotijavaverena. Nexata Moiséspijinë peyaquinaelivaisita, jumaiti pacuenia Dioso icatsia asaëyaexanaejitsia petëpaevimi. Nexata Moiséspijinë nacayapëtaeyaxana Dioso icatsia piasaëyaexanaejavanexa petëpaevimi. Tsipaji baja Abraham peputëpae, Isaac ata baja peputëpae, Jacob ata baja peputëpae, bajarapamonae yabara bajayata Moiséspijinë peyaquinaelivaisita jumaiti mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moiséspijinëjavabelia. ³⁸ Bajarapacuenia Dioso pejumaitisixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Daxita petëpaevi Dioso cajena apo tsitatëpaetsi, jai Jesús saduceovijavabelia.

³⁹ Nexata judíovi pecujarubivi jumaiti Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

⁴⁰ Bajaraxuacujinae saduceovi cujunava baja icatsia peyanijobijava Jesúsjavabelia.

Pacuenia Jesucristo yabara Davidpijinë bajayata tajëvelia: “Tajatuxanenë,” jai yabara pelivaisi

⁴¹ Jesús pijacuata nayabarajumaiti judíovi pecujarubivijavabelia mapacueniaje:

—¿Detsa xuajitsia jivi apo canaëjëtsi Cristo Dioso pexënatocuene? Jivi saya jamatabëcuenenavëxaniabi-aya jumai tsabiabi Cristo yabara: “Cristo raja itsa pat-siana, saya Davidpijinë pemomo tsane,” jai tsabiabi.

⁴² Davidpijinë bajayata tajëvelia pejumaitisijava Cristo yabara Salmosvënëbaxutota, jumaiti mapacueniaje:

Dioso jumaiti tajatuxanenëjavabelia: “Ecare abaxë tacujanenia. ⁴³ Vecatsivajënae jumecovënëtsiaexanat-si abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai Salmosvënëbaxutota Davidpijinë bajayata pejumaitisijava Cristo yabara.

⁴⁴ Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexë-nato, nayabarajai Jesús judíovi pecujarubivijavabelia, judíovi pecujarubivi pecanaëjëtsinexa Cristo Dioso pexënatocuene.

Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi

⁴⁵ Itsa abaxë daxitajivi namuxunaevetatsi Jesús petsipaebilivaisi, Jesús jumaiti pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebapona panejumecovënëtsiyaniva. Bajarapamonae jitsipabiaba tomara tuatujëjava piapijavanë penaxatababiabavanapaenexa jivi peyaiy-ataenexatsi. Jitsipabiabanua bitso yayataeya pebacobinexatsi callejava. Bajarapamonae itsa najoneyabi-aba judíovi penacaetuatabiabinëjava, jitsipabiaba penaenexa pexaniavirijavanëta. Nexata natsi-itapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fi-estajava ata, jitsipabiaba penaenexa peyaiyataevitsi penaenexa petsinubijavanëta. ⁴⁷ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsi-ata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús pijajivijavabelia judíovi pecujarubivi yabara.

Pacuenia ofrenda rajuta Diosojavabelia pamona pevecuatëpaevatsi yabara pelivaisi

21 Templobota Jesús cobetane bitso pexainaevi ayaijava palata pejeponaejava cajonijavabelia. Bajarajota jivi palata jeyabiaba ofrendacuenia perajutsijava Diosojavabelia. ² Bajarajota Jesús cobetanenua pamona pevecuatëpaevatsi, bepejiobiva, penajëjava anijapalatanëyobeje. Bajarapova najia anijapalatanëyobeje piamatamobinëyobeje. ³ Jesús nexata jumaiti pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenenarëya daxita xua itsamonae jia bajarapacajonita matatoxenetsia.

⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajëvelia tsipaeba pijajivi itsamatacabi itsanacuapijivi pexuabijavanexatsica templobo yabara pelivaisi

⁵Jerusalén tomarata templobo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota itabëtsiaya ruba templobo pitaitabëtsecaenexa. Nexata Jesús pijajiviya-juvënëvi nabarëcuaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi itsanacuapijivi xubijitsiatsica templobo, daxita bajarapaaibäcuenia yajava. Jesús jumaitsi pijajivijavabelia mapacueniaje:

⁶—Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuenia yajava, penetsianica. Nexata templobopi-jiibotonë caiboto ata pejumavereca apo boca tsane, jai Jesús pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

⁷Jesús pijajivi jumaitsi:

—Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuenia peneta pataenajë itsa copiapatsijitsia xua jumaitsimë templobo yabara? jai Jesús pijajivi.

⁸Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajivijavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papecayamaxëitorobinexa. Tsipaji raja peyamaxëitorobinexa, ayaibitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtame bajarapamonae. Pëtsa papënaponamenua. ⁹Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

¹⁰Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Mapanacuaje pevereverecaevajënae, peneta copiya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. ¹¹Ira najëbiana ayaicuenia nacuanëjava. Nacuanëjava ayaijaniboxaneto najetarucaena, piavitane cuene yajava. Itaboxotatsia pitsapaena piayaiju-

navicuene, pinijicuene pexanaejava yajava, jai Jesús pijajivijavabelia.

¹²Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuenia pecopiajopaevajënae patajajivix-aemë, pacataicaena. Pacabejiobiaexanaena. Pacacaponana judiövi penacaetutabiabibonëjavabelia papecaneconitsinexa. Penaneconitsivi pejebabiabibota pacajebiana. Patajajivix-aemë, pacanubiana presidentevi pitabarata, nacuaevetsivi pitabarata ata. ¹³Nexata bajarajota xanë talivaisi, pexanialivaisi, patsipaebianame xaniavaetsia. ¹⁴Nexata pëtsa tajëvelia panatsinajamatabëxainame pacuenia panayajivicaicuaijamëjitsia bajarapamonaejavabelia. ¹⁵Tsipaji paepatota panayajivicaicuaijamëjitsia, bitso peyapëtaevicuenia pacacuaicuaijaiyaexanaenatsi. Nexata caenë ata panijavajabitsaenë apo caëjëpaetsi tsane papecajumecanaviatsinexa. ¹⁶Bajarapamatacabi patajajivix-aemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecayapëtaejivi ata, bajarapamonae caranata pacacanajetsiana. Nexata pacayajuvënëbeyaxuabinexa. ¹⁷Daxitajivi pacaitoya tsabiabi tsane patajajivix-aemë. ¹⁸Itsiata baitsi jane pepo panajamatabëcuenelivaisi bajarapamonae apo itsacueniabi tsane. ¹⁹Itsa pajamatabëcuenesaemë tsavanapae tsane, nexata matacabi apo pevereverecaevajënae paxainaename, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

²⁰Icatsia Jesús tajëvelia vajunupaeba papiayaicuenia itsamatacabi copiapatsijitsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaë, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabëitsimë tsane: “Imoxoyo rabaja pevajënae Jerusaléntomara pevereverecaenexa,” pajamatabëjamë tsane. ²¹Nexata bajarapamatacabi Judea nacua pejinavanapae, itsa tane bajarapacuenia, berëcëpeca cajena ibotsutonëjavabelia. Jerusalén tomarapijivi ata berëcëpeca pijatomaravecu. Itsamonae pijinia, Jerusalén tomarapijivi, bajarapamatacabi Jerusalén tomarapënëyabelia itsa jinavanapa, apo benaviabirena pijaboyaberena. ²²Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaemat-acabitsi. Nexata jane baja tocopiajopaenatsi daxita pacuenia baja cajena pepo bajayatami tajëvelia vajunupaeba Diosojumelivaisibaxutota. ²³Bajarapavajabitsaëmatacabi bitso ayaicuenia bejiobi tsane mapanacuapijivije. ¡Papetiriavi penacueto yacotajinavana, bitso bejiobi tsane bajarapamatacabi bitso nabejio-bitsiaya peponaexae tsane! ¡Papetiriavi ata mitopae-nacuetoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi. ²⁴Bajara-

pavajabitsaëmatacabi itsanacuaverena Jerusalén tomarapijivi vajabitsaë tsmamaxëpatsianatsi. Nexata itsabitsaëtomi, Jerusalén tomarapijivimi, beyejebianatsi. Itsabitsaëtomi pijinia, Jerusalén tomarapijivimi, caponaenatsi itsanacuanëjavabelia. Nexata bajaraxuacujinae itsanacuanëpijivi patsiana Jerusalén tomara. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajëvelia pevajunupaebijavata papiyaicuene itsamatacabi copiapatsijitsia Jerusalén tomarata.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

²⁵ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavacuene. Matacabi pijiuametotatsia, xua naitajëtsiana, meravipijiuametotatsia ata, xua naitajëtsiana, tulupujavatatsia ata, xua naitajëtsiana, bajaraxuanë jivi bitso cujunaviana. Daxita nacuanëpijivi bitso najunaviacena itsa jumetaena manuameneta pinijimalataca bitso penajumetsijava. ²⁶ Daxitanacuanëjava bitso jivi najamatabëxainana itsa taena piyaicuene petocopiajopaejavatsi. Nexata daxita nacuanëjava jivi tëpajoneyabiabiana pecajunavi. Daxita xua athëbëtatsia rubena, najëbiana. Xaniavaetsia apo rubenae tsane. ²⁷ Nexata bajarapaepatota jivi netaena, Daxitajivi Pematapijinënë, athëbëvetsica itarërëbota tanajetarucæjava. Patsianicajë daxitacuene taevetsinexa. Tanivenivenaecotia yajavapatsianicajë. ²⁸ Itsa pataename pecopiajopaejava bajarapacuenae, nexata panajamatabëcuenesaëtsianame. Tsipaji rabaja imoxoyo pevajënae tsane papecacapanepaenexa jivi papecabejibia exanaebiabijavamivecua, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae, itsavirianaenë ata. ³⁰ Itsa baja imoxoyo pevajënae tsaponae vai pejonejavanexa, bajaraponaenë pejanabaxu juva. Nexata bajarapacuenia payapëtaneme vai baja imoxoyo pevajënae pejonejavanexa. ³¹ Bajara pijinia pacuenia peneta itsa pataename pecopiapatsijava xua yabara pacatsipaebatsi, nexata payapëtaneme imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jina-

vanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi itsa baja copiapatsiana, bajarapamonae jane baja vereverecaena. ³³ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuene navëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁴ Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivanajamatabëxainame maëpanacuapijijamatabëcueneje. Belia bajarapacuenia paneexanavanapaejavata, jemata copiapatsipa tapatsimatacabinexatsica. ³⁵ Pacuenia dujai peyamatajucaejava, meniareca jemata jivi xuareca dujai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana. ³⁶ Bajaraxuata nayajivitaeya pajinavanapaename. Daxitamatacabi canacujitsia panayajivijavajëcabiabianame Diosojavabelia paneajamatabëcuenesaë tsaponaenexa, panevecuapanepaponaenexa daxita papibisiacuene pacatocopiapataponaena. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papecacaëjëpaenexa panenubenaejava taitabarata, jai Jesús pijajivijavabelia.

³⁷ Caematacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecua pitsapabiaba pemajitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba. ³⁸ Daxita bajayacunua canacujitsia jivi patabiaba templobota penamuxunaevetabiabinexatsi Jesús petsipaebilivaisi.

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

22 Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan. ² Sacerdotevi penamatacaitorobivi, judiovi pecujarubivinua, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cujunava.

³ Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejeyajuvënë. ⁴ Judas yapëtanee itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuacuajainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. ⁵ Nexata

bजारपामोनाे बारैया. राजुत्सिपाेबत्सि पाला. ⁶ जेजै जुदास. नेखात जुदास जेसुस नातखुतोकाेवत्सि पाणा. पाेपातोत जुदास तोयपेखानेपात्सि, पेराजुत्सिनेखा जाने बाजा जेसुस बाजारपामोनाे पेकोबेयाबेली. बाजारपाकुनिया जुदास नाजमाताबेखाना पेखानेखा त्साजोता बिस्तो जिवा पो नावत्सि.

पाकुनिया जेसुस बारेंनाबाने पिजाजिवा पेकोपारुत्सिनाबानि बाजा पेबेयाखुाबिवाजेनात्सि याबारा पेलिवािसि

⁷ जुना जाने बाजा पासुावेंनेफिस्ता, पाफिस्तामाताकबि जिवा बाखाने लेवादुराता माताजेरेाबिनेजेवा पेखानेपाण. बाजारपामाताकबि ओवेजा बिबा पिखाेना पासुा फिस्तामाताकबि. ⁸ नेखात जेसुस तोरोबा पिजाजिवोनेबेजे, पेड्रोबेजे जुानबेजे. जेसुस जुमात्सि पिजाजिवोनेबेजेवाबेली:

—पापोनारेबेजे पाणेखानेखेबेजे वाजाखेजावनेखा. खुा जिवा बाखाने पासुा फिस्तामाताकबि, बाजारखुा वाजाखेना पाखानेनामेबेजे, जाे जेसुस पिजाजिवोनेबेजेवाबेली.

⁹ नेखात पेड्रोबेजे जुानबेजे जुमात्सिबेजे जेसुसजावबेली:

—जेडत्सा जोता जित्सिपाेमे बाजारखुा पाताखानेखेबेजे? जेडत्साजोता बाजारखुा खानेत्सि? जाेबेजे.

¹⁰ जेसुस नेखात जुमात्सि पिजाजिवोनेबेजेवाबेली:

—तोमारबेली त्सा पापात्सिनामेबेजे, पाकात्सिजाराबिनामेबेजे मेरा कानालितो पेकानाजेतारुकाेने. बाजारपोने पोनेयोजोपाेना, बाजारपाबोता पाणापात्सिनामेबेजे. ¹¹ नेखात पाजुमात्सिमेबेजे त्साेने बाजारपाबो पेखानेनेजावबेली: “वाजानाकाकुजारुबिने राजा जेसुस जुमात्सि: ‘जेडत्सा जोता पेनेयातुुकुत्सिबो एका, पाबोता ताजाजिवा बारेखाेजित्सिाने खुा जिवा बाखाने पासुा फिस्तामाताकबि? जाे राजा जेसुस,” पाजामेबेजे त्साेने बाजारपाबो पेखानेनेजावबेली. ¹² नेखात अथेबेयत्सि अनिजाेराबेजे पेखानेओजावता, पाकात्सिजाेत्सिनाबेजे. बाजारपाबोेनेता, अथेबेयोत्सि पाेरा, आयेनेतुतुाजे त्साेने. दाखिताकुने बाजारजोता खानेना. नेखात खुा जिवा बाखाने पासुा फिस्तामाताकबि, बाजारजोता पाखानेनामेबेजे वाजाखेना, जाे जेसुस पिजाजिवोनेबेजेवाबेली.

¹³ नेखात जाने बाजा बाजारपोनेबेजे पोनाबेजे. काखिताजारबाबेजे दाखिता पाकुनिया जेसुस जुमात्सि. नेखात खुा जिवाबाखाने पासुा फिस्तामाताकबि, दाखिता जेसुस पिजाजिवा पेबारेखानेखा, बाजारपोनेबेजे खानाबेजे जाने बाजा.

¹⁴ त्सा बाजा कोपाजोपा पेखाेपातोतानेखा, जेसुस, पिजाजिवा दोके पोनेबेजे, पोस्तोलेवि, याजावा, एका मेसा मुखनेनेता. ¹⁵ नेखात जेसुस जुमात्सि पिजाजिविवाबेली:

—तातेपाेवाजेनाे बिस्तो जित्सिपाजे पाताकायाजावाखेजावा मापापासुा फिस्तामाताकबि पेखाेजावाजे. ¹⁶ खानेजाने पाकुनिया पाकात्सिपाेबिजित्सि. मातावेजेरा बाजा मापापाकुनाताजे पो खाने त्साेने पासुा फिस्तामाताकबि पेखाेजावा. मातापाणी दाखिता पाताजाजिविमे डियो त्सा पाकापाेनापाेना पाणिजानेकोनिवेकुा, बाजारा जाने इकात्सि मातापाणी ताखा डियो पिजापाकुनात्सि खानेजे पासुा फिस्तामाताकबि पेखाेजावा, जाे जेसुस पिजाजिविवाबेली.

¹⁷ नेखात जेसुस कोपावेनेजावता यापा पिजाजिवा पेबारेपाेखानेखा. जेसुस जुमात्सि डियोजावबेली:

—पेखानेकुने पाणेतोखानेना. पाणेराजुतामे मापोराजे, जाे जेसुस.

बाजारखुाकुजिनाे पिजाजिविवाबेली जुमात्सि:

—मापोराजे पायापिरे. पापाेमा पादाखितामे मापाकोपाताजे. ¹⁸ खानेजाने पाकुनिया पाकात्सिपाेबिजित्सि. मातावेजेरा बाजा मापापाकुनाताजे पो पाेने त्साेने उवाकुाैरा. मातापाणी त्सा कोपाजोपाेना दाखिता डियो पिजाजिवा पेवत्सिमाताकबि, पाेनाेने इकात्सि, जाे जेसुस पिजाजिविवाबेली.

¹⁹ बाजारखुाकुजिनाे जेसुस पिता पाणबे. जेसुस जुमात्सि डियोजावबेली:

—पेखानेकुने पाणेतोखानेना. पाणेराजुतामे पाण, जाे जेसुस.

बाजारखुाकुजिनाे एपात्सेनेकेजेबा बाजारपापाणबे. राजुता पिजाजिवा. जेसुस जुमात्सि पिजाजिविवाबेली:

—पाखाेमा. मारा तावितोजे, पाताकासिवातेपाेजावा पाखामेनेखा. तातेपाेकुजिनाे मापाकुनिया पाखानेबिबिनामेजे पातानेनाजमाताबेनापिताबिबिनेखामे, जाे जेसुस पिजाजिविवाबेली.

²⁰ नेखात जाने बाजा दाखिता जेसुस पिजाजिवा बारेंनाबाने. पेनानेकुजिनाे जेसुस इकात्सि यापा पिजाजिवा पेबारेपाेखानेखा. जेसुस जुमात्सि पिजाजिविवाबेली:

—डियो बाजा काेना नाजुमेकापाेनापाेया जुमात्सि पेजानालिवािसि पापेकाकापाेनाेखा बाजारपोनेजावबेली. बाजारपाकुनिया पाकापाेनापाेना ताजाना पेजामाताबेकुनेता. ताजाना राजा रुनाेना पापेकाकोमुत्सिनेखा पिबिसिकुने पाेनेखानेनेकोनिमेवेकुा. मापाकापाेजावताजे पादाखितामे पापाेमा पाणेनाजामाताबेनापिताबिबिनेखा पाकुनिया डियो बाजारपाेजानालिवािसिता नाजुमेकापाेनापाेया जुमात्सि पापेकापाेनापाेनाेखा बाजारपोनेजावबेली, जाे जेसुस पिजाजिविवाबेली.

²¹ इकात्सि जेसुस जुमात्सि पिजाजिविवाबेली:

पाणेजुमाताेमा. पोने नेकानाजेत्सिजित्सि ताजावाजिबित्साे पेकोबेयाबेली, बाजारपोने नाेका मापामेसा मुखनेनेताजे. ²² खाने, दाखिताजिवा पेमातापिजिनेने, तेपाेनाजे पाकुनिया ताजेवेली डियो नेतोकोपाता. त्साेना बात्सि जाने पोने नेकानाजेत्सिना ताजावाजिबित्साे पेकोबेयाबेली, बिस्तो बेजिओ त्साेने, जाे जेसुस.

²³ नेखात जेसुस पिजाजिवा नाजुमाे त्साेने:

—जेडे मेता पोने वाखात्सियाजुवेनेनेने, कानाजेत्सिना जेसुस पिजावाजिबित्साे पेकोबेयाबेली? नाजाे त्साेने जेसुस पिजाजिवा.

पाकुनिया जेसुस पिजाजिवा: “जेडत्सा पोने वाखात्सियाजुवेनेने नाकेवेकुायाजिमाताबेकुनेने बिस्तो?” नाजाे याबारा पेलिवािसि

²⁴ जेसुस पिजाजिवा आेया नाजुमेनोत्सिया नालिवािसिता. नाजुमात्सि:

—जेडत्सा पोने वाखात्सियाजुवेनेने नाकेवेकुायाजिमाताबेकुनेने? नाजाे जेसुस पिजाजिवा.

²⁵ नेखात जेसुस जुमात्सि पिजाजिविवाबेली:

—नाकुाेवत्सिवा पाकुनिया जामाताबेपाकाेतोरोबा पाणेतोखानेना, अजुमेसाेया पाकाेतोरोबाबिबा पापिजाजिविमे, बाजारपामोनाे पेवत्सिनाकुनेजावा पाणेनानापाेवि. त्साेना बात्सि जाने बाजारपाकुनिया पाकाेबेजिओबाेखानेबिबिना ता, बाजारपामोनाे जित्सिपाेबा पाखामे बाजारपामोनाे याबारा पाणेजुमात्सिनेखा:

“Bajaraponë vajanacayanacuaevetsinë, bitso pexaniacue ne nacatoexanabiaba,” panejainexa. ²⁶ Pëtsa paxamë bajarapamonae cuenejëpaeya bepaayaijamatatabëcuenevimë panataneme. Ponë raja peneta paxamëyajuvënë daxita paxamë pacavecuayaijamatatabëcuene, bajaraponë peneta daxitajivi bepjjavitonëcuena yavenonaena. ²⁷ Mapanacuata petuxanenë ita xaeyeca mesata, petuxanenë jamatabëcuenevetatsi pijajivitonë. Tsipaji petuxanenë ayaijamatatabëcuene pijajivitonë matatoxenetsia. Itsiata xanë bajarapitsijamatatabëcuene apo xainaenë. Ponaponajë paxamëjavata daxita paxamë bepanijajivitonëcuena patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamë ata patajajivixamë, pacaexana. Bajarapacuenia pacaexanae ata tsane, itsiata apo panenavecuacopabimë tsane. Tsitecaeya paneyajavajinavanapame. ²⁹ Bajaraxuata nexata pacuenia taxa Diosonitoroba jivi taevetsinexa, baja pijinia pacuenia juyaxanë ata paxamë pacaitorobatsi jivi paneevetsivinexa. ³⁰ Nexata paxamë pacajamatatabëcuenejëpaena taevetsinacuata tsia tajamesata panenanabaninexa, panenamatajëpaenexanua. Paenaename jueznëcuena pananeconitsiaexanaenexa pijaneconipexinaevi. Nexata pananeconitsiaexanaename Israelpijinëmi pexi, doce ponëmibeje, pemomoxiyajuvënëvi, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi

³¹ Jesús jumaitsi Pedrojavabelia:

—Simón, dovathi baja cajena jamatabëcapita xanëvecua. Bitso cajamatatabëcuenejëbiana tanenavecuacopatsinexamë. Pacuenia arroxainaenë arroxujëbaba pesi pevecuaxuabinexa, baja pijinia pacuenia pecaxuabinexa xanëvecua cajamatatabëcuenejëbiana dovathi. ³² Itsiata baitsi jane catovajëtatsi Diosojavabelia necopatsiyani tanejumecovënëtsijavamë. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabëcuene babataponaponanename Dioso pejumecovënëtsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenë, najamatatabëcueneveretajë baja. Penaneconitsivi pejebabiabibota caetsi ata, tanaponaponanexa xamëta. Najamatatabëcueneveretajë baja tacayajavatëpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanë pacuenia catsipaebijitsiatsi. Ajena, mapameravitaje, vacara pefiavajënaeya nayavajunuaxainaename tajajivitonëcuenemë. “Xanë cajena apo yapëtaenë bajaraponë,” jamë tsane acueyabi xabeje xanë yabara, jai Jesús Pedrojavabelia.

Pacuenia baja ita imoxoyo pevajënae Jesús pebexuabinexatsi, tsipaeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto ita pacaitorobatsi Dioso pejumelivaisi jivi daxitanacuanëjava panetsipaebanajetarubenaenexa, pacaitavetatsi panecaponaeyaniva doro, palata ata, zapato ata. ¿Bajarapamatacabi panamatavenoname tsaja itsacuenejava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenejava ata bajarapamatacabi, jai.

³⁶ Jesús nexata jumaitsi:

—Baja rajane aeconoxae panamuto, pajivi doro xaina, bajarapajivi caponae pijadoro. Palata ata caponae. Pajivi espada apo xinae, bajarapajivi penajumaxuabipana canajetsi. Comuatsi espada. ³⁷ Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacueniaje: “Naneconitsiaexanaenatsi bepibisiacuene pexanaenëcuena,” jai tajëvelia xanë yabara Diosojumelivaisibaxutota. Nexata bajarapacuenia imoxoyo baja pevajënae tanetocopiapatsinexa, jai Jesús pijajivijavabelia.

³⁸ Nexata Jesús pijajivi jumaitsi:

—Tajatuxanenë, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

Pacuenia Jesús vajëta Diosojavabelia Getsemanivënëjavata yabara pelivaisi

³⁹ Jesús pitsapa bovecua. Pacuenia ponabiaba, bajarapacuenia icatsia pona petsutojumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi. ⁴⁰ Jesús pijajivi ita barëpata bajarapatsutojumabelia, Jesús jumaitsi pijajivijavabelia:

—Pacajamatatabëcuenejëbiana raja dovathi pejamatabëcueneta. Pavajëtaaponare aeconoxae Diosojavabelia paneajamatatabëcuensaenexa panecopabiyani va patanejumecovënëtsijavamë, jai Jesús.

⁴¹ Nexata Jesús pijajivi vecuanatixilia bejamatabëcuene treinta metro. Jesús nucajunua pe-matabacabëta pevajëtaaponanexa Diosojavabelia.

⁴² Jesús pevajëtsijavata jumai tsaponae Diosojavabelia:

—Taxa Diosomë, netocopatame picani tanebexuabinexa betajibicueneta. Itsa jitsipame, necapanepare bajarapabejibicuenecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

⁴³ Nexata Jesús athëbëpijángel tsitanaitajëtatsi pejamatabëcuene asaëyaexanaenexatsi. ⁴⁴ Jesús pebexu-

abijavanexatsi yabara, bitso natsinajamatabëxaina. Nexata Jesús bitso orijibia asaëyata vajëtapona Diosojavabelia. Jesús bitso janetatsi. Pacuenia itsi pijana, bajara itsi Jesús pejanetsibarëmenetsi. Topitopijai irabereca.

⁴⁵ Jesús pevajëtsicujinae itsa nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tsipaji Jesús pijajivi bitso penajamatabëxainaejava, cuerana. ⁴⁶ Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëtaponare Diosojavabelia, dovathi pejamatabëcueneta pacajamatabëcueneëjëbi ata paneajamatabëcuenesaënexa, jai Jesús pijajivijavabelia.

Pacuenia Jesús vaetabatsi pijavajabitsaë yabara pelivaisi

⁴⁷ Jesús pijavajabitsaë pevaetabijavatanexatsi, cuaicuaijai tsanucae pijajivijavabelia. Nexata bajara paepatota jivi ayaibitsaëtoxaneto, Jesús petsimaxëponaevitsi, najetarubena. Ponë vënërubatsi Judas, Jesús pijajivi doce ponëbejeyajuvënënëmi, matacanajetaruca bajarapamonae. Nexata Judas najetabalia Jesúsjavabelia. Itabaratsutsuniaya bajacobatsi.

⁴⁸ Nexata Jesús bajarajota jumaitsi Judasjavabelia.

—Judas, ¿matsa pacuenia nitabaratsutsuniaya neba-jacobame xanë, Daxitajivi Pematapijinënë, tanecana-jetsinexamë tajavajabitsaë pecobeyabeliaje? jai Jesús.

⁴⁹ Jesús pijajivi itsa tane pacuenia Jesús exanaejitsiat-si, nexata bajarapamonae jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

⁵⁰ Nexata caenë Jesús pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujuanenia pamuxuyoroto.

⁵¹ Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyoroyataba. Jesús baja muxuyororuta icatsia bajaraponë. ⁵² Pamona Jesús tsimaxëpatatsi, itsamonae sacerdotevi penamatacaitorobivi, itsamonae templobopijipolicíavi penamatacaitorobivi, itsamonae judíovi pijaancianovi. Bajarapamonae caponaejitsiatsilia Jesús. Nexata Jesús jumaitsi bajarapamonaejavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁵³ Xanë caematacabi canacujitsia Dioso pejumelivaisi paxamëjavabelia pacatsipaebiababatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piamatabëcuene itaquiriyaexanaenë, papecaitorobixae, jai Jesús petsimaxëpatsivitsijavabelia.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

⁵⁴ Jesús pevaetabicujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonae pecovëvelia tajiyo pënanajetaruca.

⁵⁵ Nexata pabota Jesús capatatsi, bajarajota, panabo tuatuajëta, vajabitsaë isoto itajuruteta. Bajarapamonae isoto matatoyorotsia ena. Pedro nexata naitaxuto-caevetsiaya naeca bajarapamonaejavata. ⁵⁶ Nexata bajarapabota penacuenebiva, Pedro itsa taeyetatsi penanonopecaejavata isoto muxuneneta, naitaxutobabatsia asaëya taenucatsi. Nexata itsamonaejavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi.

Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesúsna naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

⁶⁰ Nexata Pedro nayajumetane. Pedro nexata jumait-si bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaitsijavata, vacara baja fiaba. ⁶¹ Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota Pedro najamatabënapitajaraba Jesús pejumaitsijavatsi: “Pedro, ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë, jamë tsane xanë yabara acueyabi xuabeje,’ pejaijavatsi Jesús, najamatabënapitajaraba Pedro. ⁶² Nexata baja Pedro pitsapalia bopanabovecua. Piniacijuenia nua.

Pacuenia Jesús pijavajabitsaë capocaponatsi yabara pelivaisi

⁶³ Pamona Jesús vaetabatsi, capocaponatsi. Itabaratsaquibabeponatsi pecobethaitonëta. ⁶⁴ Pa-paëbërëpanata itaxutocëtatsi. Pitaxutocëtscujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquibaba! jai tsaponae.

⁶⁵ Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

⁶⁶ Ajena baja matababi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavabere-na. Bajarajota bajarapamonae jumaitsi Jesúsjavabelia:

⁶⁷ —Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaitsi bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tacapanepaenëxa,” pacajai atatsi tsipae, itsiata apo panejumecovënëtsimë tsipae. ⁶⁸ Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënu tsipae. ⁶⁹ Itsiata baitsi jane tavajënaeyabelia xanë, Daxitajivi Pematapijinë, ecaenajë taxa Dioso pecujanenia patanajuaevetsinexabeje daxitacuene. Bajaraponë pecaëjëpaenëtsi daxitajamatabëcuene, jai Jesús bajarapamonaejavabelia.

⁷⁰ Nexata daxita bajarapamonae jumaitsi Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaitsi bajarapamonaejavabelia:

—Jājā, xanë rabaja pacuenia panejumaitsimë. Bajaraponë, jai Jesús.

⁷¹ Nexata bajarapamonae najumaitsi:

—Ajibi rabaja abaxë vajeavetaponaejava jivi neconitsiaya vajanacatsipaebaponaenëxa pacuene yabara naneconitsiaexanaejitsiatsi maponëje. Vaxaitsi rabaja vajacuata jumetanetsi pacuenia maponëje cuaicuajai Dioso apo pejitsipaecuenia. Tsipaji beDioso pexënatonatanë, najai bajarapamonae.

Pacuenia Jesús nutatsi Pilato pitabarata yabara pelivaisi

23 Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamonae Jesús caponaliatsi itsaboyabelia, Judeanacua pevetsinë Pilato pijaboyabelia. ² Bajarajota Pilato pitabarata bajarapamonae neconitsiaya jumaitsi Jesús yabara:

—Mara ponëje naneconita. Tsipaji muxubijiapentapona jivi pianepanaenëxa nacuaevetsivijavabelia. Paneitavetaponanua patamatamotsiyaniava Romanonacua pepo pevetsinë pejamatabëcueneta impestomatamo pataneyanijobijava. Jumai tsaponanua: “Xanë raja Cristonë, nacua taevetsinë,” jai tsaponae maponëje, jai bajarapamonae Jesús yabara neconitsiaya Pilatojavabelia.

³ Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

⁴ Pilato nexata jumaitsi sacerdotevi penamatacaitorobivijavabelia, jivi ayaibitsaëtoxanetojavabelia ata:

—Apo caxitajarabinë cajena itsacujiruneconi ata pexainaejava maponëje, paneconi yabara naneconitsijitsia, jai Pilato.

⁵ Itsiata bajarapamonae ajumesaë. Orijiabia neconitsia jumaitsi Jesús yabara:

—Bajaraponë daxita Judea nacuapijivi muxubijia-penetapona bajarapamonae pianepanaenëxa Judeanacua pevetsivijavabelia. Taxuxuaba cajena bajaraponë bajarapacuene pexanaejava Galilea nacuata. Nexata maberena ataje bajarapacuenia icatsia exanapona, jai bajarapamonae Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponëje Jesús, Galilea nacuapijinëje? jai Pilato.

⁷ Nexata bajarapamonae tsipaeba Pilatojavabelia Jesús Galilea nacuapijinëcuene. Nexata Pilato itoroba pijajivi Jesús pecaponaenexatsilia Herodesjavabelia. Tsipaji Herodes Galileanacua pevetsinë. Bajarapamatabi Herodes ponapona Jerusalén tomarata. ⁸ Nexata Herodes itsa tane Jesús, barëya. Tsipaji Herodes vënëlivaisitaeyabiaba Dioso pesaëta Jesús pinijicuene pexanaponaejavanë. Nexata Jesús pinijicuene pexanaejava Dioso pesaëta jamatabëtane Herodes. ⁹ Nexata Herodes ayaicuenia yanijobapona Jesúsjavabelia. Itsiata Jesús apo jumepitsi caejumeyo ata. ¹⁰ Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayaijumeta neconitaponatsi Jesús Herodesjavabelia. ¹¹ Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinë banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevetsinëcuenia petanexatsi. Bajaraxuacujinae icatsia canaviabarenatsi Pilatojavaberena. ¹² Pilatobeje Herodesbeje naitoyabeje picani. Itsiata bajarapamatabi nabarajamatabëcuenexanepanabeje. Naxaniababeje baja.

Pacuenia baja Pilato tocopata Jesús pebexuabinexatsi yabara pelivaisi

¹³ Pilato junata penacaetuatsinëxa sacerdotevi penamatacaitorobivi. Junata penacaetuatsinëxa judíovi pevetsivi ata. Junata penacaetuatsinëxa bajarapatomarata pejinavanapaevi ata. ¹⁴ Nexata Pilato jumaitsi bajarapamonaejavabelia Jesús yabara:

—Paxamë panetocapatame maponëje. “Mara ponëje naneconita. Tsipaji muxubijiapentapona jivi pi-

anaepanaenexa nacuaevetsivijavabelia," panejamë. It-siata baitsi jane xanë picani tajacuata yanijobajë xani-avaetsia paneitabëta. Nexata xua yabara paneconita-me, ajibi picani. Maponëje itsacujiruneconi ata apo xainae, paneconi yabara naneconitsijitsia. ¹⁵ Herodes ata apo naneconitsiaexanaetsi. Saya icatsia nacato-canaviarena. Pataneme rabaja. Itsacujiruneconi ata apo xainae maponëje, paneconi yabara beyaxuabijitsi-atsi. ¹⁶ Nexata tajajivi itorobianajë bajaraponë saya ta-jajivi pejumaconibabenexa penaneconitsivi pejuma-conibabeyabiabimacata. Bajaraxuacujinae copatsiana-jë, jai Pilato bajarapamonaevjavabelia.

¹⁷ Caevai canacujitsia, pascuavënë fiestamatacabi, Pi-lato copatabiaba caenë penaneconitsinë pepit-sapaenexa penaneconitsivi pejebabiabibovecua. Pilato copatabiaba ponë jivi vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi. ¹⁸ Nexata bajarapamonaev itsa jumetane Pilato picani Jesús pecopatsiapaebijava, nex-ata daxita bajarapamonaev caecuenia vavajai Jesús yabara. Bajarapamonaev pevavajaijavata, Jesús yabara jumaitsi Pilatojavabelia mapacueniajaje:

—¡Majane ponë beyaxuareje! ¡Barrabás jane paneto-capitsapare! jai bajarapamonaev.

¹⁹ Bajaraponë Barrabás Jesús pevajënaevaja bajarap-atomarata barë nabia gobierno pijajivijavabelia. Nexata Barrabás jivitonë beyaxuaba. Bajaraxuata naneconitsi-aponapona penaneconitsivi pejebabiabibota. ²⁰ Pilato picani jamatabëcopata Jesús. Bajaraxuata picani icat-sia Pilato tsipaebijitsia jivijavabelia Jesús baja peco-patsinexa. ²¹ Itsiata baitsi jane bajarapamonaev orijibia vavajai.

—¡Cruzajavabelia cobematabiabarutsiaexanare!
¡Cruzajavabelia cobematabiabarutsiaexanare! jai tsaponae bajarapamonaev Pilatojavabelia.

²² Icatsia Pilato jumaitsi bajarapamonaevjavabelia:

—¿Detsa xuajitsia? ¿Detsa papibisiacuene exana maponëje? Apo caxitajarabinë cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibabeyabiabimacata. Bajaraxuacujinae copatsianajë peponaenexa baja, jai Pilato.

²³ Itsiata bajarapamonaev ajumesaë. Vavajai tsapon-ae.

—¡Cruzajavabelia cobematabiabarutsiaexanare! jai tsaponae bajarapamonaev Pilatojavabelia.

Nexata bajarapamonaev, sacerdotevi penamata-caitorobivi yajava, bitso pevavajaitsaponaexae, belia baja Pilato jejai. ²⁴ Nexata baja Pilato tocopata pacue-nia bajarapamonaev vajëtatsi. ²⁵ Nexata Pilato itoroba pijajivi Barrabás, ponë jivitonë beyaxuaba, pecapit-sapaenexatsi pepitsapaenexa baja penaneconitsivi pejebabiabibovecua. Caranata Jesús, planeconijibinë, pe-beyaxuabinexatsi Pilato itoroba pijajivi.

Pacuenia jane baja Jesús cruzajavabelia cobematabi-abarutatsi yabara pelivaisi

²⁶ Vajabitsaë itsa caponaliatsi Jesús cruzajavabelia pecobematabiabarutsinexatsi, Simón pijinia najetaruca vayafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabarutsi-jitsiatsi, petocaponaenexa. Nexata bajarapacruza Simón tovëtaranajetaruca Jesús pecovëya.

²⁷ Jesús pënanajetarubenatsi, jivi ayabitsaëtoxaneto. Bajarapamonaevajuvënëvi, petiriavi ayabitsaëto, Jesús bitso pënuayababuataponatsi ayajumeta. ²⁸ Nexata Jesús napënëyorota. Jumaitsi bajarapapetiriavijav-abelia:

—Paxamë petiriavi, pajerusalén tomarapijivimë, pët-sa panepënuayabame xanë. Paxamë jane panatsinue-ma. Panexi ata patsinuema. ²⁹ Itsa copijajopaena pi-ayaimatacabi, jivi bitso bejiobi tsane. Nexata jivi jumai tsane: "Mavecovi itsiata bevelia nacatsunabejibitane pexi apo pexainaexae," jai tsane jivi bajarapamatacabi mavecovi yabara. ³⁰ Nexata bajarapamatacabi jivi bitso itsa nabejibitana, belia jitsipaena petëpaejava. Nex-ata jivi najumai tsane: "Vajatëpaenexa, nacatox-anepanaevjitsipa pinijibotsutonë itsa nacamatacënëba-jarabijitsipa," najai tsane jivi. ³¹ Xanë itsacujiruneconi apo xainae atanë, nebejibiaexanaena itsa necobe-matabiabarutsiana cruzajavabelia. Nexata pamonaev pibisiacuene pexanaevi bitso xanë matatoxenetsia, be-jiobiaexanaenaenatsi itsa tocopiapatsianatsi pi-ayaimatacabi, jai Jesús bajarapapetiriavijavabelia.

³² Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje pijamatabëcuenebe-jebeje vajabitsaë caponatsibeje Jesús peyajav-abeyaxuabinexatsibeje. ³³ Itsa baja capaliatsi jivi-matasipavënë tsutojavabelia, nexata cruzajavabelia Jesús yajavacobematabiabarutatsi bajaraponëbeje. It-sanë rutatsi itsacruzata Jesús pecujuanenia. Itsanë ru-tatsi itsacruzata Jesús petsavenonenia. ³⁴ Jesús baja cruzajavabelia pepuacobematabiabarutsi, jumaitsi paxa Diosojavabelia:

—Axa, mapamonaev itaxutotsoniataema. Vecuaxu-are paneconi xaina pibisiacuene taneexanaexae ma-pacueniajaje. Tsipaji raja apo yapëtae. Bajaraxuata ma-pacuenia nexanaje, jai Jesús paxa Diosojavabelia.

Nexata vajabitsaë, pamonaev Jesús cobematabiabarutatsi cruzajavabelia, bajarajota namuxusita. Pena-muxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapë-taenexa ponë pitaponaevjitsia caejava canacujitsia Jesús penaxatatsijavami, xua jumaponapona. ³⁵ Bajara-jota daxitajivi taenubena. Judíovi pevetsivi Jesús capoc-aponatsi. Bajarapamonaev capocaponaevaja jumaitsi Jesús yabara:

—Ëitsamonaev yabara jumai tsabiabi: "Capanepaena-jë jivi," jai tsabiabi. Baja rajane pijacuata nacapanepae itsa xaniajai pepacuene Cristo, Dioso athëbëvetsica

pitorobinëtsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocaponaeya cujibarenatsi. Rajutsijitsiatsi piajatuvinora piapaenexa Jesús. ³⁷ Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata napanepare nijacuata, jai vajabitsaë Jesúsjavabelia.

³⁸ Bajarajota Jesús pematabocoto matatsënëyo tablapajumata, Pilato pijajivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latínjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara. ³⁹ Itsanë piamatabëcuenebejenë cruzajavabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucac Jesúsjavabelia.

⁴⁰ Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsarucac penajuananeconitsinëbejejavabelia:

—¿Dioso tsaja apo cujunavimë netëpaenexa, cacobematabiabi ata nijaneconi yabara mapacueniaje? ⁴¹ Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene va-jaexanaexaabeje. Mabiji ponëje caeto ata pibisiacuene apo exanae, jai tsarucac bajaraponë jumeitavetsiaya penajuananeconitsinëbejejavabelia.

⁴² Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

⁴³ Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabi, neyajavaponaponaename paraísojavatatsia, jai Jesús bajaraponëjavabelia.

Pacuenia baja Jesús tēpa yabara pelivaisi

⁴⁴ Jesús baja itsa tēpaejitsia, matonejeeapatota, daxita nacuanëjava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia. ⁴⁵ Paepatota Jesús tēpanajereca, bajarapaepatota templobo ënëtuatuajëalia pënëyatuucutarutsipana, ayaipapaëbërëpana, tuatuajëatsica titititicaica.

⁴⁶ Nexata Jesús ayajumeta jumaitsi Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuapijinë, vajabitsaë pijacapitán, itsa tane daxita bajarapacuenia, bajaraponë Diosojavabelia jumaitsi:

—Diosomë, bitso ayajamatabëcuenenëmë. Xaniajai tsaena baja. Maponë tēpaje, pianeconijibinë, jai vajabitsaë pijacapitán.

⁴⁸ Daxita pajivibitsaëtoxaeneto taenubena pacuenia Jesús jumaliverevereca, bajarapamonae bitso najamatabëxainae naviaba pijabonëjavabelia. ⁴⁹ Daxita pamona Jesús peyapëtaevitsi, pebijivi, petiriavi ata, pamona Galilea nacuaverena pënaponatsi, tajiyojavaverena taenubena, petaenexa Jesús pebeyaxuabijavatsi.

Pacuenia Jesús petëpaenë buata tsi ibovajualia yabara pelivaisi

⁵⁰ Jerusalén tomarata ponapona José, Arimatea tomarapijinë. Bajaraponë pexaniajatabëcuenenë, xaniavaetsia peponaponaenë Dioso pitabarata. Bajaraponë judíovi pevetsinë. ⁵¹ José copiaevetapona pecopiajopaejava pamatacabi caenë Dioso evetsijitsia daxita pijajivi mapanacuataje. Nexata José apo jarmatabëcuenejēpae pacuenia judíovi exana Jesúsjavabelia. ⁵² José nexata lia nacuaevevetsinë Pilatojavabelia. Vajëta petocopatsinexatsi pemëthëtsinexa petëpaenë Jesús. ⁵³ Bajaraxuacujinae José cruzajavavetsica pitsica Jesús petëpaenë. Daxitanëreca mataquionaeya matacacëba pexaniaviria piapiasábanapanata. Nexata cajena itsajota José iboitapajanitjavata pinijiibovaju toexanabuatatsi petëpaevi pebuataponaenexa, bajarapai-bovajualia buata Jesús petëpaenë. Bajarapavajualia abaxë itsajiviyo ata petëpaejiviyo José apo buatsi.

⁵⁴ Pamatacabi José bajarapacuenia vajëta Pilatojavabelia Jesús petëpaenë pemëthëtsinexa, bajarapamat-acabi judíovi penacuenebjava banacuenevereta baja pecopiajonevajënaeya penacueraevetsimatacabinexa. Nexata paepatota José ibovajualia buata Jesús petëpaenë, bajarapaepatota José baja tocopiapataponatsi penacueraevetsimatacabinexa.

⁵⁵ Papatiriavi Jesús pënaponatsi Galilea nacuaverena, bajarapapetiriavi tajiyó José pecovëya najetarubena. Nexata bajarapapetiriavi tane Jesús petëpaenë José pebuatsijava bajarapai-bovajualia. ⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujuvira, pexaniapetuxujuvitsapato yajava, Jesús petëpaenë peperabëexabinexa. Nexata abaxë bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinëta bajayata penajumecopatsilivaisi.

Pacuenia Jesús petëpaecujinae icatsia asaë yabara pelivaisi

24 Judíovi baja penacueraevetsimatacabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia ponalia Jesús petëpaenë pebuatsiibovajut-sijavabelia. Patuxujuvijava xaniavaeta Jesús petëpaenë peperabëexabinexa, caponalia Jesús petëpaenë peperabëexabinexa jane baja picani. Itsapetiriavi yajava

ponalia peyanabinexatsi. ²Itsa baja palia, nexata bajarapapetiriavi tane Jesús petëpaenë pebuatsiibovajutsi peyavëpaacatsiibopanaxanetomi petixitanutsi-jaivalia. ³Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuat si petëpaenë, pepo petuxanenë Jesús. ⁴Nexata bajarapapetiriavi bitso jamatabëcuenenajunaviaca. Apo yapëtae pacuenia exanaejitsia. Bajarajota nexata bajarapapetiriavi taenuta anijanëbeje ángelnëbeje. Bajaraponëbeje penaxatatsijavabeje nivenivena bitso. ⁵Bajarapapetiriavi bitso cujunava bajarapaángelnëbeje. Nexata pecajunavi pematabacabëta irataeya bobena. Nexata bajarapaángelnëbeje jumait si petiriavijavabelia:

—¿Detsa xuajitsia petëpaenë pebuatsijavatatsi, pajaitame? Bajaraponë asaë baja icatsia. ⁶Bajaraponë majotaje ajibi baja tsarucae. Dioso rabaja icatsia asaëyaexanatsi. Panajamatabënapire pacuenia pacatsipaeba Galilea nacuata pamatacabi abaxë asaë tsaponaponae. ⁷Bajaraponë baja cajena tajëvelia pacajumait si: “Xanë, Daxitajivi Pematapijinënë, necanjetsiana bibisijamatabëcueneni pecobeyabelia. Nexata bajarapamonae cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matacabita, icatsia asaënë tsane,” pacajai baja cajena tajëvelia Jesús itsa abaxë pamatacabi pacayajavaponapona, jai ángelnëbeje petiriavijavabelia.

⁸Nexata bajarapapetiriavi najamatabënapita pacuenia Jesús tajëvelia jumait si. ⁹Nexata baja bajarapapetiriavi naviabarena Jesús petëpaenë pebuatsiibovajutsijavaverena. Nexata bajarapapetiriavi tsipaeba daxita bajarapacuene yabara once ponëbeje, Jesús pijaapóstolevijavabelia. Tsipaebanua daxita itsamonae Jesús pijajivijavabelia ata. ¹⁰Bajarapapetiriavijavuvënëvi itsava Maríavënëva. Bajarapova Magdala tomarapijiva. Itsava pijinia Juanavënëva. Itsava pijinia icatsia Maríavënëva. Bajarapova Santiago pena. Itsapetiriavi yajava tsipaeba bajarapacuene yabara apóstolevijavabelia. ¹¹Bajarapapetiriavi apóstolevijavabelia tsipaebi ata bajarapacuene yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabëjumait si: “Saya meta bajarapapetiriavi pijacuata exana bajarapalivaisi,” jamatabëjai apóstolevi.

¹²Itsiata baitsi jane Pedro pitsapalia bovecua. Nexata cunjinaejinalia Jesús petëpaenë pebuatsiibovajutsijavabelia. Nexata Pedro bajarapapetiriavijavajualia itsa naëcolia, taeyejeba pebobenaejava bajarajota daxitanëreca Jesús mataquionaeya pematacacëbipanamitsireca. Nexata baja Pedro naviata boyaberena. Najamatabëxaina bajarapacuene yabara.

Pacuenia Jesús petëpaecujinae icatsia itsa asaë, pijajivitonëbeje pëcaxitajarabaxuaba, Emaús tomarabelia peponaenëbeje, yabara pelivaisi

¹³Pamatacabi bajarapapetiriavi tane ángelnëbeje, bajarapamatacabi Jesús pijajivitonëbeje Jerusalén tomaravelia naropatabeje. Ponabeje Emaús tomara-

belia. Bajarapatomara eca once pakilómetrobeje Jerusalén tomaravecua. ¹⁴Bajaraponëbeje baracuaicuaijaibeje tsanajetarucacae daxita pacuene copiapata. ¹⁵Itsa abaxë bajarapalivaisi cuaicuaijai tsanucaponaebeje, Jesús pëcaxitajarabalia. Nexata Jesús muxunenianajetaruca bajaraponëbeje. ¹⁶Bajaraponëbeje tae atabeje Jesús, itsiata apo yapëtaebeje Jesús cuene. ¹⁷Nexata Jesús yanijoba bajaraponëbejejavabelia. Jesús jumait si:

—¿Detsa pitsicuene pabaracuaicuaijamëbeje tsanucaponaenamutua? ¿Detsa xuajitsia bepajamatabëcuenenijobimëbeje? jai Jesús bajaraponëbejejavabelia.

¹⁸Bajaraponëbeje itsanë pevënë Cleofas. Nexata Cleofas jumait si Jesúsjavabelia:

—Daxitajivi baja cajena yapëtane pacuene copiapata Jerusalén tomarata mapamatacabitaje. ¿Xamë tsaja caenëmë apo nijanayapëtae bajarapacuene, naponaponae atamë bajarapatomarata? jai Cleofas caranata Jesúsjavabelia.

¹⁹Nexata Jesús jumait si bajaraponëbejejavabelia:

—¿Detsa pitsicuene copiapata? jai.

Nexata icatsia bajaraponëbeje jumait si Jesúsjavabelia:

—Jesúspijinë raja, Nazaret tomarapijinëmi, profetanëmi. Pinijicuene exanapona Dioso pesaëta. Bitso xaniavaetsia jivi pexanialivaisi tsipaebapona. Nexata daxitajivi sivajamatabëcuenenabarëya bajaraponëmi. Dioso ata sivajamatabëcuenenabarëyatsi. ²⁰Nexata sacerdotevi penamatacaitorobivi, vajanacaevetsivi yajava, canajetatsi Jesús pijinëmi. Canajetaxuabatsi Jesús pijinë cruzajavabelia pecobematabiabarutsinexatsi pebeyaxuabinexatsi. ²¹Paxanë picani bajaraponëmi yabara pajamatabëjumait sinë: “Bajaraponë nacavecuacapitsapaena itsanacuaverena pepatsivi, pamonaepo judíovi, vajanacayanacuaevetsijavavecua pepit-sapaenexa,” pajamatabëjanë tsavanapae picani Jesús pijinë yabara. Nexata Jesús pijinë pebeyaxuabicujinaetsi, ajena baja xaina acueyabi pamatacabibeje.

²²Paxanëyavuvënëvi, petiriavi, ajena, bajayacunua, panenabenajacaeyaexana. Bajarapamonae bajayacunua, ajena juameto pitsapaina, ponalia Jesús petëpaenë pebuatsiibovajutsijavabelia. ²³Itsiata apo caxitajarababuat si bajarajota Jesús petëpaenë. Nexata bajarapapetiriavi naviabarena. Bajarapamonae panetsipaeba pacuenia bemajitsinaebota tane ángelnëbeje. Ángelnëbeje pina nexata jumait sibeje petiriavijavabelia: “Jesús rabaja asaë tsaponaponae icatsia,” jai pina. ²⁴Nexata itsamonae paxanëyavuvënëvi pona Jesús petëpaenë pebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petëpaenë apo taeyabuatsi, jaibeje Jesúsjavabelia Emaús tomarabelia peponaenëbeje.

²⁵Nexata Jesús jumait si bajaraponëbejejavabelia:

—¡Paxamëbeje saya panejamatabëcuenetajanëbeje! Apo pajumecovënëtsimëbeje daxita profetavi peyaquinaelivaisianë. ²⁶Nexata apo payapëtaemëbeje pacuenia Cristo, Dioso athëbëvetsica pitorobinëtsitsica

jivi pecapanepaenexa, copiaya bitso bejiobiaexanaejitsiatsi peponaevajënaeya paxa Diosojavabetsia athëbë-tatsia paxa pemuxuneneta peecaenexa, nayabarajai Jesús bajaraponëbejejavabelia.

²⁷ Nexata Jesús xaniavaetsia navajunupaeba bajaraponëbejejavabelia daxita pacuenia Dioso pejumelivaisibaxutota tajëvelia jumaiti Jesús yabara. Taxuxuaba jane baja penavajunupaebijava pacuenia Moiséspijinë peyaquinaebaxutota tajëvelia jumaiti Jesús yabara. Bajaraxuacujinae icatsia navajunupaeba pacuenia daxita itsaprotetavi peyaquinaebaxutonëta ata jumaiti Jesús yabara.

²⁸ Itsa baja imoxoyotanajetarubena patomarata bajaraponëbeje patsijitsibeje, Jesús itajara rovia bepeponaejitsia bajaraponëbejevecua. ²⁹ Nexata bajaraponëbeje bitso asivabeje Jesús penajuamajitsinexa bajarapatomarata. Jumaitisibeje bajaraponëbeje Jesúsjavabelia:

—Namajire abaxë mapatomarataje. Caniviyo rabaja bitso. Meravijitsia rabaja, jaiibeje bajaraponëbeje Jesúsjavabelia.

Nexata baja Jesús najoneya pabota bajaraponëbeje patabeje. ³⁰ Itsa bajaraponëbeje yajavaecabeje mesa muxuneneta, Jesús pita panbë. Jumaiti paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba panbë. Rajutatsi bajaraponëbeje. ³¹ Bajarajota matapania bajaraponëbeje yapëtanebeje Jesús cuene. Itsiata baiti jane bajarajota vecuacaevasibeje Jesús. Apo taebeje baja matavëjëa.

³² Nexata bajaraponëbeje najumaitisibeje:

—Namtua vajanacanavajunu paebanucaponaejavatabeje pacuenia jumaiti Diosojumelivaisibaxutota, bitso muxunajamatabëcuenebarëyatsibeje, najaiibeje bajaraponëbeje.

³³ Nexata bajarajota bepimia naropotabeje Emaús tomaravecu. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitarababeje penacaetuatsijavata once ponëbeje apóstolevi, itsamonae yajava Jesús pijajivi. ³⁴ Nexata penacaetuatsivi jumaiti bajaraponëbejejavabelia:

—Xaniajai baja cajena. Vajatuxanenë icatsia asaë tsaponaponae. Simón baja tsitanaitajëtatsi, jai bajarapamonae.

³⁵ Nexata ponëbeje Emaús tomaraverena patabeje, tsipaebabeje bajarapamonaejavabelia pacuenia namutoepatualia pëcaxinatsibeje Jesús. Tsipaebabegenua pacuenia matapania yapëtanebeje Jesús cuene, pitabëta itsa epatsënëquejeba panbë.

Pacuenia Jesús petëpaecujinae tsitanaitajëta pijajivijavabelia yabara pelivaisi

³⁶ Ponëbeje Emaús tomaraverena patabeje, tsipaebabeje Jesús pijajivijavabelia pacuenia tanebeje Jesús Emaús tomaratalia. Nexata bajarapaepatota Jesús tsi-

tanaitajëta pijajivijavabelia. Jesús jemata nuca pijajivi tuatujëta. Jesús bajacoba pijajivi.

³⁷ Nexata Jesús pijajivi bitso nabenjaca.

—Petëpaenëmi raeta pejumape maje, jamatabëjai bajarapamonae Jesús yabara.

³⁸ Nexata Jesús jumaiti pijajivijavabelia:

—¿Detsa xuajitsia pajunavame? ¿Detsa xuajitsia panejamatabëthëtota pajumeaebame icatsia tasaëjáva? ³⁹ Panecobetaema. Tataxubeje ata pataema. Xanë rabaja maje. Panejayabare. Paneyorobarenua xaniavaetsia. Petëpaenëmi raja peneta pejumape avijibi. Asijibinua. Apo perabëitsi cajena pacuenia xanë perabëitsinë, jai Jesús pijajivijavabelia.

⁴⁰ Jesús itsa jumaiti mapacueniaje, nacobeitajëta pijajivijavabelia. Nataxuitajëta yajava. ⁴¹ Jesús pijajivi bitso tsitapexaniacuentsi. Itsiata baiti jane Jesús pijajivi abaxë apo jumexaniatae xaniavaetsia Jesús cuene. Jesús nexata jumaiti pijajivijavabelia:

—¿Paxainame tsabaja itsacuenejavayo patanerajutsinexamë taxaenexa? jai Jesús.

⁴² Nexata Jesús pijajivi rajutatsi pesebidujuaijavayo, jabëperiyo yajava. ⁴³ Pita baja Jesús. Nexata Jesús pijajivi pitabarata xane. ⁴⁴ Nexata Jesús jumaiti pijajivijavabelia:

—Mapacuene taneexanaejavanexa yabaraje, pacatsipaebabiabatsi baja cajena tajëvelia pamatacabi abaxë pacayajavaponaponatsi. “Pacuenia bajayata tajëvelia xanë yabara jumaiti Moiséspijinë peyaquinaebaxutota, Diosojumepaebivimi profetavi peyaquinaebaxutota ata, Salmosvënëbaxutota ata, bajarapacuenia netocopiapatsiana,” pacajaiti tsabiabi baja cajena pamatacabi abaxë pacayajavaponaponatsi. Daxita rabaja bajarapacuenie netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabëcuene caëjëpaeyaexana Jesús pijajivi xaniavaetsia pejumeyapëtaenexa pacuenia Dioso pejumelivaisibaxutota tajëvelia jumaiti Jesús yabara. ⁴⁶ Jesús jumaiti pijajivijavabelia mapacueniaje:

—Dioso pejumelivaisibaxutota tajëvelia jumaiti pacuenia xanë, Cristonë, athëbëvetsica Dioso taneitorobinëtsica jivi tacapanepaenexa, nebejiobitsi-aya nebeyaxuabijitsia. Jumaitinua pacuenia tatëpaecujinae, acueyabi matacabita, icatsia Dioso niasaëyaexanaejitsia tatëpaejavavecu. ⁴⁷ Jumaitinua pacuenia patajajivimë tajumelivaisi patsipaebaponaejitsiamë daxitajivijavabelia. Nexata tajumelivaisi patsipaebaponae name daxitajivi penajamatabëcuene pënëyorotsinexa Diosojavabelia, pibisacuene pexanae neconimi pevecuaajibiaexanaenexatsi Dioso. Copiaya Jerusalén tomarata pataxuxuabianame panetsipaebijava. Bajaraxuacujinae patsipaebanajetarubenaename daxitanacuanëjava. ⁴⁸ Paxamë rabaja pataneme daxita pacuene netocopiapata. Nexata jivi patsipaebaponae name daxita bajarapacuenie yabara.

⁴⁹ Espiritu Santo, ponë taxa Dioso najumecapanepaeya pacarajutsipaeba, pacatoitorobanicatsi papecatsijamatabëjonenexa. Abaxë pajinavanapaename majotaje

Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicuene paneexanaponaenexa, paponaname jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso. ⁵¹ Nexata saya

bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

⁵² Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia. ⁵³ Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

SAN JUAN

Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

1 Itsa abaxë ajibi itsacuenejavayo ata mapanacuataje, Cristo baja cajena ponapona athëbëtatsia. Cristo raja paxa Dioso pejamatabëcuenelivaisi itajëtsinë jivijavabelia. Cristobeje paxa Diosobeje najuaponabeje. Cristo ata rabaja Dioso baja cajena. ² Daxitacuene baja cajena pexanaejava petaxuxuabivajënaeya ata, Cristobeje paxa Diosobeje najuaponabeje. ³ Cristo baja cajena daxitacuene mapanacuapijicueneje exana. Exana athëbëpijicuene ata. Bajarapacuenia exanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata. ⁴ Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcuenelivaisi itayota pexaniajailivaisita. ⁵ Pacuenia pecotia itayota pitaquirijavata, bajarapacuenia Cristo petsipaebilivaisita jivi jamatabëcuenelivaisi itayota. Nexata dovathi, jivi pijamatabëcuenelivaisi itaquiriyaexanaenë, apo caëjëpaetsi pevereverecaeyaexanaenexa bajarapalivaisi.

⁶ Nexata Dioso itoroba caenë pebi. Bajaraponë pevënë Juan. ⁷ Nexata Juan pona petsipaebinexa jivijavabelia Cristo pelivaisi. Nexata Juan tsipaeba daxitajivi pejumetaenexa Cristo pelivaisi, pejumecovënëtsinexanua. ⁸ Juan raja jivi apo pejamatabëcuenelivaisi itayotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. ⁹ Bajaraponë Cristo jamatabëcuenelivaisi itayotsiana daxitajivi. Bajaraponë xaniajai jivi pejamatabëcuenelivaisi itayotsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisi itajëtsinë jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneneje. ¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsi Dioso pexënatocuene. ¹² Itsiata itsamonae jumecovënëtatsi. Nexata Cristo tocopata bajarapamonae paxa Dioso pexi pexanaenexatsi. ¹³ Bajarapamonae penaexanaematacabi, abaxë Dioso pexicuenia apo taetsi. Pebi petiriva pepitsicujinae, pexi itsa jamatäxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta

Cristo Dioso pexënatocuene, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinë jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuatuajëta. Bajaraponë vënërubatsi Jesús. Paxanë payapëtaniji Cristo ayaijamatabëcuenelivaisi. Tsipaji pataniji pinijicuene pexanaejavanë. Bajaraponë Cristo, pepo caenë Dioso pexënatocuene. Pinijicuenia asiva mapanacuapijivije. Cuaicuajai epexaniajailivaisi. ¹⁵ Bajaraxuata Juan, Jesús itsa vajunupaebanajetaruca jivijavabelia, jumai tsanajetarucacae mapacueniaje:

—Baja rajane maponë yabara pacajumaitstsije: “Ponë tacovëverena patsiana, bajaraponë bitso xanë nevecuaayaijamatabëcuenelivaisi. Tsipaji baja cajena tanaexanaevajënaeya ata bajaraponë ponapona,” jai tsanajetarucacae Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenelivaisi. Pexaniaacuene nacatoexanabiaba. Nacayavenonabiaba. ¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. ¹⁸ Itsajivi ata vaxaitsiya juvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisi itajëtsinë. Itsiata caenë Dioso pexënatocuene, ponëbeje najuaponabeje, bajaraponë nacayapëtaeyaexanaica pacuenia jamatabëcuenelivaisi itajëtsinë paxa Dioso.

Pacuenia Juan jivibautisabinë Jesucristo pelivaisi xaniavaetsia tsipaebanajetaruca jivijavabelia yabara pelivaisi

¹⁹ Judíovi, Jerusalén tomarapijivi, Juanjavabelia itoroba sacerdotevi, itsamonae templobo pevetsivi yajava, bajarapamonae peyanijobinexa Juanjavabelia. Nexata bajarapamonae itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso peccaitapetsinë? jai bajarapamonae Juanjavabelia.

²⁰ Juan nexata bajarapamonaejavabelia xaniavaetsia roviaalia navajunupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonae Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan. Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavanapatsi nepatsijavanexatsica? jai bajarapamonae Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonae jumaitsi:

—¿Detsa nexata ponëmë? Pajitsipajë patanenavajunupaebinxamë xaniavaetsia patayapëtaenexa ponëcuenëmë patatsipaebinxexa patanitorobivijavabelia. ¿Detsa nexata pacuenia navajunupaebianame? jai bajarapamonae Juanjavabelia.

²³ Juan nexata jumaitsi bajarapamonaejavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tajumaitsi javanexa, bajayatami tajëvelia yaquina profeta Isafáspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵ —Itsa xamë apo Cristomë, apo Elíaspijinëmënua, apo profetanëmënua, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamonae.

²⁶ Juan nexata jumaitsi:

—Xanë saya bautisabaponajë ëmerata. Itsiata paxamë tuatuajëta ponapona ponë apo payapëtaemë.

²⁷ Bajaraponë tacovëverena jane baja pata. Itsiata xanë bajaraponëvecua beveliajamatabëcuenenënë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaejavabelia Jesús yabara.

²⁸ Bajarapacuenia Juan yanijobatsi Jordánmene itsapanatalia, Betaniavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹ Fariseovi pijajivi Juan peyanijobicujinaetsi peyapëtaenexatsi ponëcuenë, meravia pitsijavata, Juan taetaba Jesús penajetarucæjaya Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsicsicaje. Bajaraponë Dioso bepijaovejayo tsane. Pacuenia jivi ovejajo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacaevetsiana pebeyaxuabinexatsi. Nexata bajarapacuenia matamotsiana daxita nacuanëpijivi pibisiacuene pexanaeconomics. ³⁰ Baja rajane maponë yabara itsa pacatsipaebatsi, pacajumaitsi tsabiabi mapacueniaje: “Tacovëverena patsiana itsanë. Bajaraponë nevecuaayajamatabëcuenenë bitso. Tsipaji baja cajena tanaexanaevajënaeya ata, bajaraponë ponapona,” pacajaitsi tsabiabi. ³¹ Apo yapëtaenë picani ba-

jaraponë. Itsiata apo yapëtae atanë, pacabautisabana-jetarucatsi merata paIsrael nacuapijivimë. Ponë yabara pacatsipaebatsi, bajara jane maponë najetarucæje, jai Juan jivijavabelia Jesús penajetarucæjavata.

³² Icatsia Juan jumaitsi jivijavabelia Jesús yabara:

—Xanë taniji Espiritu Santo perunaejavatsica athëbëvetsica beucucuto. Nexata tsimatanacopatsicat-si bajaraponë. ³³ Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematatsënëatsica taename Espiritu Santo perunaejavatsicsica petsijamatabëcaenexatsi, bajaraponë jane baja jivi tsijamatabëjoneyaexanaena Espiritu Santo,” nejai baja cajena copiata Dioso. ³⁴ Pacuenia baja cajena taniji, pacatsipaebatsi. Bajaraponë baja cajena Dioso pexë-nato, jai Juan jivijavabelia Jesús yabara.

Pamonae copiaya Jesús yajavaponapona yabara pelivaisi

³⁵ Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. ³⁶ Itsa Juan tane Jesús pexenetanajetarucæjavatsi, nexata Juan jumaitsi pijajivitonëbejejavabelia:

—Pataemabeje. Mara ponë najetarucæje, Dioso bepijaovejajo tsane, jai Juan pijajivitonëbejejavabelia Jesús pebeyaxuabijavanexatsi yabara, tsipaji Jesús tocopiatsijsiatsi pacuenia Dioso tocopatatsi.

³⁷ Nexata Juan pijajivitonëbeje itsa jumetanebeje bajarapacuenia Juan pejumaitsijava, Juan pijajivitonëmibeje pënaponabeje Jesús. ³⁸ Jesús napënyorotojopa. Taenucajopa. Yanijoba bajaraponëbejejavabelia.

—¿Detsa xua pajaitamebeje? jai Jesús.

Nexata bajaraponëbeje jumaitsi beje:

—Petuxanenë, ¿detsa jota ecame? jai beje Jesúsjavabelia.

³⁹ Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoepatota. Nexata baja tanebeje itsajota ponapona Jesús. Nexata bajarapamatacabi nayacaniviyobeje tsaponapona Jesúsjavata.

⁴⁰ Bajaraponëbejeyajuvënë itsanë pevënë Andrés. Andrés raja Simón Pedro pejuyapijinë. ⁴¹ Andrés nexata bepimia pona pematapijinë Simón pejaitsinexa. Itsa baja Andrés pematapijinë caxitajaraba, jumaitsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonae pijajumeta: “Mesías,” itsa jai, mapajumetaje pejumaitsi jume: “Cristo, ponë athëbëvetsica Dioso itorobijitsiatsica jivi pecapanepaenexa,” pejaijume.

⁴² Nexata Andrés barëlia pematapijinë Simón Jesús-javabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënëru-bianatsi Cefas, jai Jesús Simónjavabelia.

“Cefas,” itsa jai, bajarapamonae pijajumeta mapajumetaje pejumaitisijume: “Pedro,” pejajijume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaejitsia Galilea nacuyabelia. Jesús nexata peponaevajënae, caxitarabaxuaba Felipe. Nexata Jesús jumaitsi Felipejavabelia:

—Nepënaponaename, jai Jesús.

⁴⁴ Bajaraponë Felipe Betsaida tomarapijinë. Andrés-beje Pedrobeje ata Betsaida tomarapijinëbeje. ⁴⁵ Felipe nexata pona pejaitsinexa Natanael. Itsa baja Felipe caxitarabaja, jumaitsi Natanaeljavabelia:

—Pacaxitarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopat-silivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënato, jai Felipe Natanaeljavabelia.

⁴⁶ Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponapona, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucaejavatsi, nexata Jesús Natanael yabara jumaitsi pijajivijavabelia:

—Mara ponë najetarucaje, Israelpijinë pemomo, Dioso pitabarata xaniavaetsia peponaponaenë. Apo peyamaxëitorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higeranae bëxëpanata. Nexata cajamatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacia pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecaejava higeranae bëxëpanata,” tacajaixae, jamatabëjumaitsimë xanë yabara: “Maponëje Dioso cajena pexënato,” jamatabëjamë.

Xamë taename bajarapacuenë matatoxënetsia Dioso pesaëta pinijicuene taexanaejavanë, jivi apo pexanaecapanepaejavanë. Nexata bajaraxuanë taexanaejava itsa taename, pepacuenë jane baja neyapëtaename Dioso pexënatocuenenë, jai Jesús Natanaeljavabelia.

⁵¹ Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pataename itaboxo penapatsijava. Pataenamenua Dioso pi-jaängelevi pejunaejavatsia athëbëabetsia. Pataenamenua perunaejavatsica ata xanëjavabetsica, Daxitajivi Pematapijinëjavabetsica, jai Jesús pijajivijavabelia.

Pacuenia Jesús exana Caná tomarata pamatacabi Caná tomarapijinë nacasaba yabara pelivaisi

² Jesús pebarëcuaicuaijaujinae Natanael, acueyabi pamatacabibejucujinae, Caná tomarapijinë exana penacasabifiestanexa. Galilea nacuata eca Canátomara. Jesús pena naponapona fiesta pexanaejavata. ² Nexata Jesús pijajivi nabarëjunatatsi penacasabifiestajavabelia. Jesús nexata pijajivi nabarëpata penacasabifiestajavabelia. ³ Fiesta pexanaenë itsa baja tovereverecatsi vinora, Jesús pena jumaitsi: —Vinora rabaja tovereverecatsi, jai pexënatojavabelia.

⁴ Jesús nexata jumaitsi penajavabelia:

—Ena, ¿detsa xuajitsia netsipaebame bajara-pacuenë? Abaxë raja apo netocopiapatsi paepatota exanaejitsianë bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

—Daxita pacuenia taxënato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibo-canalitonë. Caecanalitota mera caëjëpaponabejamatabëcuene quince pagalónbeje. Nexata bajara-pacanalitonëta peyaenaemeranëta, judíovi pijacuenia anijatonë xaniavaetsia nacobequiatabiaba penabani-vajënae. ⁷ Jesús nexata jumaitsi mesa pevetsivijavabelia:

—Pavënëbare mera mapacanalitonë nubenaje, jai Jesús.

Nexata mesa pevetsivi xaniavaetsia mera vënëba bajarapacanalitonë. Piupiyorotoxijava copabapona.

⁸ Nexata Jesús jumaitsi bajarapamonaejavabelia:

—Papuare tsiquirirayo. Patocaponaremelia fiesta pevetsinë pepajaninexa, jai Jesús.

Nexata baja mesa pevetsivi tocaponalia. ⁹ Nexata jane baja fiesta pevetsinë pajane bajarapora, merami pexanaevinora. Bajaraponë abaxë apo yapëtae itsaverena capitsapa bajarapavinora. Itsiata mesa pevetsivi yapëtane mera pevënëbixae bajarapacanalitonëta. Pepajanicujinae vinora, fiesta pevetsinë junata fiesta pexanaenë, ponë pejananacasabinë. ¹⁰ Nexata fiesta pevetsinë jumaitsi pejananacasabinëjavabelia:

—Mapavinoraje bitso xanepana. Daxita pamonaefiesta pexanaevi, copiaya batsanaeyaexana pexaniavinora. Nexata baja fiesta pexanaenë pejunatsivi itsa apa ayaijava, cotocaevi batsanaeyaexana bevelia penamatamotsivinoranë. Tsipaji baja ayaijava piapaexae, cotocaevi apae ata beveliara, apo yapëtae beveliaracuene. Itsiata baitsi jane xamë bajarapacuenia apo exanaemë. Evetame abaxë cotocaevi patanerajutsinexamë pexaniavinora, jai fiesta pevetsinë pejananacasabinëjavabelia.

¹¹ Bajarapapiniijucene Dioso pesaëta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaëta piniijucene pexanaponaejava. Bajarajota jane baja Jesús najamatabëcueneitajëta Dioso pesaëta ayaicuene pexanaejava pecaëjëpaenëcuenetsi. Nexata pijajivi orijibia sivanajamatabëcuenecopabaponatsi. Jesús pijajivi jamatabëjumaitsi:

—Xaniajai rabaja. Pepacuene Cristo, ponë copiaevetavanapatsi pepatsijavatsica vajanacacapanepaenexa, jamatabëjai.

¹² Bajaraxuacujinae Jesús baja pona Capernaum tomarabelia. Yajavapona pena, pejuyapijivinu, pijajivinu. Capernaum tomarata caematacabibeje jinavanna.

Pacuenia Jesús Jerusalén tomarata templobovecua pit-sapaeyaexana pecanajetsivi, pecomuacaevinua, yabara pelivaisi

¹³ Judíovi baja pijafiesta pexanaenexa, toimoxoyotsi pascuavënëfiesta. Bajaraxuata Jesús pona Jerusalén tomarabelia. ¹⁴ Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua. ¹⁵ Jesús itsa tane bajarapacuenene, nexata quibatataba peyorotsimacanexa. Nexata Jesús daxitajivibitsaëto capitsaparena temploboënëverena. Bajarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabajaraba. Pijamesaxi ata topënëy-orobajaraba. ¹⁶ Nexata ucucu pecanajetanubenaevijavabelia Jesús jumaitsi:

—Mapaucucuje pacapitsaparemelia. ¡Pëtsa pacanajetame mapaboënëtajë, taxajavabelia jivi penavajëcaebota! jai Jesús.

¹⁷ Nexata Jesús pijajivi itsa jumetane bajarapacuenia Jesús pejumaitsiyava, jumenajamatabënapita pacuenia Dioso pejumelivaisibaxutota jumaitsi. Bajarapacuenia Jesús pexanaponaejavanexa yabara, tajëvelia Dioso pejumelivaisibaxutota jumaitsi mapacueniajê: “Neyabarabeyaxuabijitsia ata tsane, jitsipajë Dioso pijabo petoyaiyataejavatsi,” jai Dioso pejumelivaisibaxutota.

¹⁸ Nexata judíovi itsa tane Jesús jivi pecapitsapaejava temploboënëverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboënëvecua? Itsa caitoroba Dioso bajarapacuenia nexanaenexa, nexata piniijucene ata exanare Dioso pesaëta patacayapëtaenexa Dioso pecaitorobinëcuene, jai judíovi Jesúsjavabelia.

¹⁹ Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajë acueyabi matakabita, nayabarajai Jesús judíovijavabelia petëpaecujinae icatsia Jesús piasaëjavanaxa yabara.

²⁰ Nexata judíovi apo jumeyapëtae xua yabara Jesús jumaitsi. Bajaraxuata judíovi jumaitsi mapacueniajê:

—Xamë acueyabi matakabita apo matakotsimë tsi-pae. Itsamonae baja cajena mapatemploboxanetoje peveretsinexa, nacueneba cuarenta y seis pavaibeje, jai judíovi.

²¹ Itsiata baitsi jane Jesús peperabëto yabara: “Mapatemploboje,” jai saya. ²² Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia Jesús penavajunupaebijava mapacueniajê: “Itsiata baitsi jane tatëpaecujinae, acueyabi matakabita, icatsia asaënë tsane,” pejaijava, Jesús pijajivi jumenajamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaitsi. Jesús ata pacuenia jumaitsi, jumecovënëta.

Pacuenia Jesús jamatabëcueneyapëtae daxitajivi yabara pelivaisi

²³ Pamatacabi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtoxaneto jumecovënëta Cristocuene. Tsi-paji bajarapamonae Jesús cuenetanetsi Dioso pesaëta piniijucene pexanaejavanë, jivi apo pexanaecapanepaejavane. Itsiata baitsi jane bajarapamonae pepacuene xaniavaetsia apo jumecovënëtsi. ²⁴ Bajaraxuata Jesús apo yajavaponaepona bajarapamonae. Tsi-paji Jesús jamatabëcueneyapëtae bajarapamonae xaniavaetsia apo pejumecovënëtsiyavatsi. ²⁵ Jesús apo namatavenonae itsajivi petsipaebinxatsi peyapëtaenexa pacuenia jamatabëcueneitsi jivi. Tsi-paji Jesús pejamatabëcueneyapëtaenë pacuenia daxitajivi jamatabëcueneitsi.

Pacuenia Jesús barëcuaicuaijai Nicodemo yabara pelivaisi

3 Nicodemo fariseonë. Nexata catsitecaponapona fariseovi pijacuene. Nicodemo judíovi pevetsiviya-juvënë. ² Nexata Nicodemo meraví pona Jesúsjavabelia. Nexata itsa pata, Jesúsjavabelia Nicodemo jumaitsi:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponaepona tsipae, nexata apo exanaemë tsipae piniijucene nexanaejavanë, xuanë baja exanapona, jai Nicodemo Jesúsjavabelia.

³ Nexata Jesús jumaitsi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caëjëpaetsi rabaja icatsia pejonenexa pena pecototalia penaexanaenexa icatsia bepejananaexanaejiviyo! jai Nicodemo Jesúsjavabelia.

⁵⁻⁶ Jesús nexata jumaitsi Nicodemojavabelia:

—Xaniajanë pacuenia catsipaebijitsiatsi. Pajivi pena pecotoverena naexana, yaperabëanaexana baja cajena. Pajivi pijinia Espíritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espíritu Santo petsijamatabëcaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espíritu Santo rajutsianatsi pejanajamatabëcuene. Nexata bajarapajivi Dioso pijajivitonëcuenia evetsianatsi. ⁷“Xamë ata baja cajena icatsia benaexaname bepejananaexanaejiviyocuenia,” tacajaijava yabara, pëtsa jamatabëcuenenabenajacame. ⁸Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë itsaverena pona, itsabelia ata pona. Bajara pijinia pacuenia apo yapëtaemë pacuenia jivi Espíritu Santo pejamatabëcueneta naexanaeyaexanatsi bepejanaexanaejivicuenia, jai Jesús Nicodemojavabelia.

⁹Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

¹⁰Jesús nexata jumaitsi:

—Xamë picani Israel nacuapijivi necujarubinë. ¿Itsiata tsaja apo jumeypëtaemë palivaisi catsipaebatsi?

¹¹Xaniajanë pacuenia catsipaebijitsiatsi. Juan jivibautisabinë. Bajaraponëbeje patayapëtaelivaisibeje, jivi pat-sipaebaponajëbeje. Xua pepacuenie patanijibeje, bajaraxua ata jivijavabelia patsipaebaponajëbeje. Itsiata baitsi jane patatsipaebilivaisianëbeje, apo panejumecovënëtsimë. ¹²Catsipaebi atatsi xua Dioso exanapona mapanacuataje, itsiata apo nejumecovënëtsimë. ¿Detsa nexata pacuenia nejumecovënëtsianame itsa catsipaebianatsi xua Dioso exanapona athëbëtatsia? jai Jesús.

¹³Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexatsica mapanacuayabetsicaje petsipaebinexa jivijavabelia pacuenia itsi athëbëtatsia. Caenë, Daxitajivi Pematapijinë, caëjëpatsi jivi petsipaebinexa pacuenia itsi athëbëtatsia. Tsipaji baja bajaraponë athëbëvetsica pepatsinë. Tsipaji baja cajena athëbëtatsia peponaponaenë. ¹⁴Bajayata petusato nacuata jivi ayaibitsaëto yatëpaponajomo pesinijavatsi. Nexata bajarapaepatota Moiséspijinë jomo jumapecataeya pexanaenë, naejavata athëbëyo ruta. Nexata jomo pesinivitsi peyatëpaeviminexa, itsa taepona bajaraponë, asaë tsaponae. Bajara pijinia pacuenia, Daxitajivi Pematapijinë ata, athëbëyo rutsianatsi cruzajavabelia. Bajarapacuenia rutsianatsi cruzata petëpaenexa. ¹⁵Nexata pajivi bajaraponëjavabelia sivanajamatabëcopata, apo naxuabi tsane. Bajarapajivi xainaena matababi apo pevereverecajava, nayabarajai Jesús pijacuata Nicodemojavabelia.

Pacuenia Dioso exana piasivaxae mapanacuapijivije yabara pelivaisi

¹⁶Icatsia Jesús pijacuata nayabarajumaitsi Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenë pexënato mapanacuayabetsicaje mapanacuapijivije Diosovecua pexaxuabianiva. Pamonae sivanajamatabëcopata Dioso pexënatojavabelia, apo naxuabi tsane. Bajarapamonae matababi apo pevereverecajava, Dioso rajutsianatsi. ¹⁷Dioso apo itorobitsica pexënato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexënato, pejamatabëcueneta Dioso pecapanepaenexa mapanacuapijivije pibisiacuene pexanaeneconimivecua, nayabarajai Jesús pijacuata Nicodemojavabelia.

¹⁸Icatsia Jesús pijacuata nayabarajumaitsi Nicodemojavabelia:

—Pajivi sivanajamatabëcopata Daxitajivi Pematapijinëjavabelia, bajarapajivi Dioso apo naneconitsiaexanaetsi tsane pibisiacuene pexanaeneconimi yabara. Pajivi apo sivanajamatabëcopatsi Daxitajivi Pematapijinëjavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabëcopatsi pepo caenë Dioso pexënatojavabelia. ¹⁹Ponë Daxitajivi Pematapijinë, bepecotia picani. Tsipaji jivi tsipaebapona pexaniajailivaisi jivi pejamatabëcueneitayotsinexa. Itsiata mapanacuapijivi apo jitsipae pejamatabëcueneitayotsinexatsi. Jitsipa saya piaitaquirijamatabëcuene. Tsipaji bajarapamonae pibisiacuene exanavanapa. Bajaraxuata bajarapamonae naneconitsiaexanaenatsi Dioso. ²⁰Daxita pamonae pibisiacuene pexanavanapaevi, apo jitsipae Daxitajivi Pematapijinë pejamatabëcueneitayotsinexatsi. Bajaraxuata Daxitajivi Pematapijinëjavabelia apo patsi. Tsipaji cujunava peyapëtaeyaexanaeyanivatsi penaneconitsijava Diosojavabelia pibisiacuene pexanaeneconi yabara. ²¹Pamonae jumecovënëta Dioso pexaniajailivaisi, bajarapamonae apo cujunavi. Bajarapamonae pata Daxitajivi Pematapijinëjavabelia pejamatabëcueneitayotsinexatsi. Bajarapamonae jitsipa daxitajivi peyapëtaenexatsi Dioso peyavenonaponaevatsi xua exanavanapa, nayabarajai Jesús pijacuata Nicodemojavabelia.

Pacuenia Juan jivibautisabinë vajunupaeba Jesús yabara pelivaisi

²²Jesúsbeje Nicodemobeje pecuicuaijaicujinaebeje, Jesús baja, pijajivi yajava, pona Judea nacuayabelia.

Nexata Judea nacuata bajayajebi Jesús pijajivi barëponapona. Bajarapamonae bautisabapona jivi.

²³Juan pijinia itsamonae bautisabapona Enón tomarata. Enóntomara eca Salimtomara imoxoyojavata. Bajarajota Juan jivi bautisabapona tsipaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona. ²⁴Bajara-

pacuenia Juan jivi bautisabaponapona abaxë itsa apo etsitsi penaneconitsivi pejebabiabibota.

²⁵ Nexata Juan pijajiviyajuvënëvi anaeya najumenotsi-aya cuaicuajiai judíonëjavabelia. Juan pijajivi jumaitis: —¿De meta ponë itsa nacabautisaba, nacaja-matabëcuenexaniavaetsiana Dioso vajanacabaraja-matabëcuene xanepanaenexa? jai Juan pijajivi judíonëjavabelia.

²⁶ Nexata Juan pijajivi pona Juanjavabelia. Nexata bajarapamonae Juanjavabelia jumaitis Jesús yabara:

—Ponë caxitajarabame Jordánmene itsapanatalia, ponë vajunupaebame paxanëjavaberena, bajaraponë ata aeconoxae jivi bautisabapona. Nexata daxitajivi bajaraponëjavabelia pona, jai Juan pijajivi.

²⁷ Nexata Juan jumaitis pijajivijavabelia:

—Xuavajëto xaina caejivi canacujitsia, Dioso perajut-sixaetsi xaina. ²⁸ Pamatacabi jumaitisinë tsabiabi jivijavabelia: “Xanë raja apo Cristonë, ponë Dioso athëbëvetsica itorobijitsiatsica jivi pecapanepaenexa. Saya raja taneitorobinë Cristo pevajënaeya, talivaisipaebanajetarucaenënexa,” itsa janë, paxamë ata panejumetaeyabiabame. ²⁹ Ponë pita petiriva pijavanexa, nacasaba. Nexata pejananacasabinë peyapëtaenëtsi, namuxunaevetanuca imoxoyo. Bajaraponë ata nabarëya itsa jumetane pejananacasabinë pebarëyajava. Bajara pijinia pacuenia xanë ata aeconoxae bitso jamatabëcuenenëbarëyanë, itsa vënëlvaisitaniji jivi peponaejava Jesúsjavabelia. ³⁰ Pevajënaeyabelia jivi ayaibitsaëtoxoneto Jesús pënaponaeatsi. Xanë nexata tanepënaponaeve bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athëbëvetsica pepatsijava yabara pelivaisi

³¹ Icatsia Juan jumaitis pijajivijavabelia:

—Athëbëvetsica pepatsinë, bitso cajena ayaijamatabëcuenenë daxitajivi matatoxenetsia. Pamona naexana mapanacuataje, bajarapamonae saya mapanacuapijivije. Nexata saya cuaicuajiai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi matatoxenetsia bitso ayaijamatabëcuenenë. ³² Bajaraponë picani tsipaeba jivijavabelia pacuene tane athëbëtatsia. Tsiapaebanua picani palivaisi ata jumetane athëbëtatsia. Itsiata baitsi jane daxitajivi jumeaebatsi petsipaebilivaisianë. ³³ Pajivi jumecovënëta athëbëvetsica pepatsinë pepaebilivaisi, bajarapajivi Dioso ata yabara jamatabëjumaitis: “Dioso cajena pexaniajailivaisi pepaebinë,” jamatabëjai. ³⁴ Ponë Dioso itorobatsi, bajaraponë tsipaeba jivijavabelia Dioso pitorobilivaisi. Tsiapaji Dioso rajutatsi Espiritu Santo. Yajavapononae yaexanatsinua Espiritu Santo ayaicuenia. ³⁵ Dioso bitso asiva pexënato. Tocopata daxitacuene pevetsinexa, pitorobinexanua. ³⁶ Pajivi najamatabëcopata Dioso pexënatojavabelia, xainaena matacabi apo pevereverecaejava. Pajivi apo najamatabëcopatsi Dioso pexënatojavabelia, matacabi apo pevereverecaejava apo xinae tsane. Bajarapajivi Dioso

naneconitsiaexanaenatsi daxita matacabijavabelianexa, jai Juan pijajivijavabelia.

Pacuenia Jesús barëcuaicuajiai Samaria nacuapijiva yabara pelivaisi

4 Fariseovi jumetane jivi pejumaitisijava: “Jesús baja pijajivi ayaibitsaëtoxoneto xainaponapona. Bautisabaponanua jivi ayaibitsaëto Juan matatoxenetsia,” pejaijava. ² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. ³ Nexata Jesús itsa yapëtane fariseovi pevënëlvaisitaejavatsi pacuenia jivi baracuaicuajiaitsi, nexata naviatu Judea nacuaverena. Pona Galilea nacuayabelia.

⁴ Nexata Galilea nacuayabelia peponaenë, Jesús, pijajivi yajava, patanajetaruca Samaria nacujava. Tsiapaji bajaraxuayo namuto najetaruca. ⁵ Nexata Jesús ecojopa Samaria nacuata pecaetomarata, Sicarvënë tomarata. Sicar tomaravecua imoxoyo boca pairayo Jacobpijinë bajayata rajuta pexënato Josépijinë. ⁶ Bajarpairayota eca meramëthë, pamëthë Jacobpijinë bajayata cueyeta. Jesús sicuerana peponaejava namuto. Nexata Jesús ecojopa meramëthë muxuneneta. Matonejeepatota Jesús ecojopa. ⁷⁻⁸ Jesús caenë eca meramëthëjavata. Tsiapaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajarapamëthëta. Nexata Jesús jumaitis Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaitis:

—¿Detsa xuajitsia mera nevajëtame niapaenexa? Xamë judíonëmë. Xanë saicaya Samaria nacuapijivanë, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaitis Jesúsjavabelia tsiapaji judíovibeje Samaria nacuapijivibeje naitajitsibiaya nanaëcotabiaba. ¹⁰ Nexata Jesús jumaitis Samaria nacuapijivajavabelia:

—Pajamatabëcuene Dioso jitsipa pecarajutsinexa, apo yapëtaemë. Xanë ata mera tacavajëtsinë apo nejamatabëcueneyapëtaemë. Itsa nejamatabëcueneyapëtaejitsipame, nexata xanëjavaberena copiaya mera nevajëtsipame tacarajutsinexa. Nexata carajutsipatsi piitavamera, jivi pejamatabëcueneasaëyaexanae-mera daxitamatacabijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaitis Jesúsjavabelia:

—Xamë apo caponaemë nijavaxiyo mera nepuatsinexa. Meramëthë raja tajëreca bitso. ¿Detsa jota pitsipame nexata piitavamera tanerajutsinexamë?

¹² Vajasalinainëmi Jacobpijinë ayaijamatabëcuenenëmi. Bajayata nacatocopata mapameramëthëje. Bajaraponëmi, pexi ata, pijadajubi ata, mera apa mapamëthëtaje. ¿Xamë tsaja nexata Jacobpijinëmi matatoxenetsia bitso ayaijamatabëcuenenëmë? jai Samaria nacuapijiva Jesúsjavabelia.

¹³ Jesús nexata jumaitis:

—Jivi apaeyabiabi ata mapamëthëpijimeraje, itsiata mera pejisipaеjava apo tovereverecabiabitsi. ¹⁴ Pajivi apaena xanë tarajutsimera, bajarapajivi xainaena mat-acabi apo pevereverecaejava. Nexata pacuenia mer-amëthë eca daxitamatacabijavabelianexa, bajara itsi tsane bajarapajivi, jai Jesús.

¹⁵ Nexata Samaria nacuapijiva jumaiti Jesúsjavabelia:

—Bajarapamera nerajure icatsia mera tana-matavenonaponaeyaniva. Nexata baja mera apo puanabiabinë tsane mapamëthëaberanaje, jai Samaria nacuapijiva.

¹⁶ Jesús nexata jumaiti Samaria nacuapijivajavabelia: —Amona junaremelia. Yajavarenamë tsane, jai Jesús.

¹⁷ Nexata Samaria nacuapijiva jumaiti:

—Apo xainaenë raja tamona, jai.

Nexata Jesús jumaiti:

—“Apo xainaenë raja tamona,” itsa jamë, apo najumetsënëtsimë cajena. ¹⁸ Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipaebame, jai Jesús Samaria nacuapijivajavabelia.

¹⁹ Nexata Samaria nacuapijiva itsa jumetane bajarapacuenia Jesús pejumaitisjava, nexata Samaria nacuapijiva jumaiti Jesúsjavabelia:

—¿Xamë tsabaja Diosojumepaebinëmë profetanëmë? ²⁰ Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudfóvimë pajumaitisimë tsabiabi: “Jivi itsa navajëca Diosojavabelia, benavajëcabiaba Jerusalén tomarata Dioso pejumecovënëtsinexatsi,” pajamë tsabiabi, jai Samaria nacuapijiva.

²¹ Jesús nexata jumaiti:

—Nejumecovënëtsianame pacuenia catsipaebijitsiat-si. Imoxoyo rabaja pevajënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalén tomarabelia ata. ²² PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudfóvinë xaniavaetsia payapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judfóviyajuvënënë. ²³ Ajena mapamatacabijavaveliacujinaeje, pevajënaeyabelia ata tsaponae, daxita pamonaе jamatabëvajëta Diosojavabelia, bajarapamonaе xaniavaetsia vajëtsiana daxita pejamatabëëthëtojavavetsina. Pepo pexaniajaijamatabëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi. ²⁴ Dioso cajena apo vajataenë. Pamonaе vajëta Diosojavabelia, xaniavaetsia pexaniajaijamatabëcueneta bevajëta, pepo pejamatabëëthëtojavavetsina, jai Jesús Samaria nacuapijivajavabelia.

²⁵ Nexata Samaria nacuapijiva jumaiti:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajaraponë pat-sianica, nacatsipaebiana daxitacuenelivaisianë, jai Samaria nacuapijiva Jesúsjavabelia.

²⁶ Jesús nexata jumaiti Samaria nacuapijivajavabelia: —Xanë rabaja Cristonë, jai.

²⁷ Nexata bajarapaepatota tomaraverena parena Jesús pijajivi. Bajarapamonaе jamatabëcuenenabena-jaca Jesús pecuaicuaijait-sanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai Samaria nacuapijivajavabelia. Jesúsjavabelia ata apo yanijobi: “¿Detsa xuajitsia bajarapova barëcuaicuaijamë?” apo jai itsanë ata. ²⁸ Nexata bajarajota Samaria nacuapijiva pueneteta pijacanalito. Navialia pijatomarabelia. Tsipaebalia jivi. Nexata jumaiti Jesús yabara:

²⁹ —Panataemelia ponë netsipaeba daxita pacuenia exanjë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi pecapanepaenexa? jai Samaria nacuapijiva.

³⁰ Nexata bajarapamonaе pijatomaravelia ponalia. Taethopalia Jesús. ³¹ Itsa abaxë bajarapamonaе apo patsilia Jesúsjavabelia, Jesús pijajivi jumaiti:

—Patajatuxanenë, naxaema itsajavayo, jai.

³² Nexata Jesús jumaiti pijajivijavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, ëpamonaе, nayanijoba.

—¿Itsanë tsamëra tsipaji vajacovëta Jesús pexaejava tocpatatsi penabaninexa? najai Jesús pijajivi.

³⁴ Nexata Jesús jumaiti:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji. ³⁵ Paxamë pajumaitisimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonaе naje-tarubenaje. Pacuenia baja peubijava navereta penotsinexatsi, bajara itsi mapamonaеje. Mapamonaеje jumecovënëtsiana itsa tsipaebianatsi Dioso pejumelivaisi. ³⁶ Pajivi tsipaebiana tajumelivaisi jivi pejumecovënëtsiaexanaenexa, matacabi apo pevereverecaejava jivi pexainaenexa, bajarapajivi sivajamatabëcuenenabarëya tsane ayaibitsaëto itsa jumecovënëtsianatsi. Itsamonaе baja picani namataxainaeя tsipaeba bajarapamonaеjavabelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonaе ata itsa vënëlvaisitaena pejumecovënëtsijava tajumelivaisi, bajarapamonaе ata sivajamatabëcuenenabarëya tsane. ³⁷ Jivi bajumaiti peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai. ³⁸ Nexata baja itsaxuayo itsamonaе copiaya Dioso pejumelivaisi asaëyata tsipaebaпona, bajara icatsia xua paxamë ata talivaisi panetsipaebinexa, pacaitorobatsi. Nexata pamonaе copiaya Dioso pejumelivaisi tsijamatabëubatsi, ayaibitsaëto bajarapamonaе najamatabëcuenecopaba baja Diosojavabelia panetsipaebixae talivaisi, jai Jesús pijajivijavabelia.

³⁹ Samaria nacuapijiva, pova Jesús barëcuaicuaijai mera mëthëjavata, pijatomarapijivijavabelia tsipaeba

ayaibitsaëtoخانetojavabelia Jesús yabara. Nexata Samaria nacuata pejinavanapaevi, Sicar tomarapijivi, ayaibitsaëtoخانeto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: "Daxita pacuene exana-jë, Jesús netsipaeba," pejaixae. ⁴⁰ Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponaponaenexa bajarapamonaejavata. Nexata Jesús bajarapamonaejavata naponapona anijamatacabibeje. ⁴¹ Itsa bajarapamonae pijacuata jumetane Jesús petsipaebilivaisi, nexata icatsia ayaibitsaëtoخانeto jumecovënëta Cristocuene. ⁴² Nexata bajarapamonae jumaitsi penavajunupaebivajavabelia:

—Pajumecovënëtajë apo èpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetani Jesús vajanacatsipaebilivaisi. Payapëtani baja cajena bajaraponë pexaniajajava Cristocuene. Payapëtani bajaraponë mapanacuapijivije pecapanepaejavanexa, pibisiacuene pexanaeconimivecua, jai bajarapamonae penavajunupaebivajavabelia.

Pacuenia Jesús tojamatejemayaexana gobierno pijavitonë pexënatonëyo yabara pelivaisi

⁴³ Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuayabelia. ⁴⁴ Jesús jumai tsabiabi pijajivijavabelia:

—Pajivi Dioso jumepaebabiaba, bajarapajivi apo yaiyataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuayabelia, bajarapanacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae cujirutanetsi fiestamatacabi.

⁴⁶ Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijavitonë, ayaijamatabëcuenenë. Bajaraponë pexënatonëyo toavitane tsanucaetsi Capernaum tomaratalia. ⁴⁷ Nexata gobierno pijavitonë vënëlivaisitanetsi Jesús Judea nacuajavaverena pepatsijava, Galilea nacuayaberena. Nexata bajaraponë lia Jesúsjavabelia. Piniijicuenia junata pijaboyabelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijavitonë pexënatonëyo totëpaejitsiatsi. ⁴⁸ Nexata Jesús jumaitsi bajaraponëjavabelia:

—Paxamë cajena apo panejumecovënëtsimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

⁴⁹ Nexata gobierno pijavitonë jumaitsi:

—Jesús, naxanitsiayo tapëta ponare taxënatonëyo abaxë petëpaevajënaeya, jai.

⁵⁰ Jesús nexata jumaitsi bajaraponëjavabelia:

—Naviaremelia nexënatonëyojavabelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyabelia. ⁵¹ Itsa bajaraponë patanajetarucalia, nexata pijajivi mataenenarenatsi. Nexata pijajivi jumaitsi:

—Nexënatonëyo rabaja icatsia jamatejema tsecae, jaitsi.

⁵² Nexata bajaraponë yanijoba pijajivijavabelia.

—¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumaitsi:

—Canivi, matonejeepatota, vecuaajibitsi baja peromaebijavatsi, jai pijajivi.

⁵³ Nexata bajaraponë jamatabëjumaitsi:

—Bajarapaepatota canivi Jesús nejumaitsi: "Nexënatonëyo rabaja icatsia catojamatejema," nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

⁵⁴ Jesús penaviatsicujinae Judea nacuajavaverena, Galilea nacuajavaberena, cotocaevi bajarapapini-jicuene Dioso pesaëta exana Galilea nacuata.

Pacuenia Betzatavënë pucayojavata Jesús jamatejemayaexana petabusipacuenabinëtsi yabara pelivaisi

5 Judíovi fiesta exana Jerusalén tomarata. Nexata Jesús nalia. ² Jerusalén tomarata, ovejaci pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo matatoyorotsia cinco pabobërëtobeje eca. ³ Bajarapabobërëtonëjavata piavitanevi ayaibitsaëtoخانeto bobena. Itsamonae bitso pitaxutotsëcënaevi. Itsamonae pejayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava. ⁴ Athëbëvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitane cuene capunatsi, vecuaajibiaexanabiabatsi. ⁵ Bajarajota naboca treinta y ocho pavaibeje piavitane sanucaenë, petabusipacuenabinëtsi. ⁶ Itsa Jesús taeyabuata bajaraponë, nexata yapëtaeyabuata bajarajajebi piavitane cuene. Nexata Jesús jumaitsi bajaraponëjavabelia:

—¿Jitsipame tsaja nejamatejemajava? jai Jesús.

⁷ Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitane sanucaenë.

⁸ Jesús nexata jumaitsi piavitane sanucaenëjavabelia:

—Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumaitsijavata, jamatejema baja piavitane sanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemayaexana judíovi pe-

nacueraevetsimatacabita. ¹⁰ Nexata judíovi jamatabëcuenenavëxaniabiaya jumaitsi petabusi-pacuenabinëmitsijavabelia:

—Ajena raja vajanacueraevetsimatacabi. Nexata apo xanepanae necaponaponaenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenejavayo ata penacueraevetsimatacabita.

¹¹ Nexata petabusipacuenenbinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenabinëmitsi judíovijavabelia.

¹² Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

¹³ Itsiata baitsi jane bajaraponë apo vënëyapëtae pavënënë jamatejemayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto bajarajota jinavanapa. Jesús baja cajena pepuaponaes itsajavabelia, yanijobatsi. ¹⁴ Bajaraxuacujinae icatsia Jesús caxitarabaxuaba bajaraponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjëa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

¹⁵ Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tsipaji jamatejemayaexana piavitanevi judíovi penacueraevetsimatacabita.

¹⁷ Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tsipaji Jesús jamatejemayaexana piavitanevi judíovi penacueraevetsimatacabita. Orijiibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

Pacuenia Dioso pexënato jamatabëcuenecaëjëpatsi daxitacuene pexanaenexa yabara pelivaisi

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacuenejavayo ata apo exanaenë ëxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. ²⁰ Taxa nisiva. Nexata neyapëtaeyaexana daxita pacuene taxa yapëtane. Tavajënaeyabelia neyapëtaeyaexanaponaena bajarapacuenia matatoxenetsia ayaicuene taexanaponaenexa. Nexata exanaenajë ayaicuene taex-

anaejavanë. Paxamë itsa pataename ayaicuene taexanaejavanë, pajamatabëcuenenabenajacaename.

²¹ Taxa petëpaevimimi ata icatsia asaëyaexana. Xanë ata necaëjëpa tasaëyaexanaenexa petëpaejivi ata, pajivi jamatabëasaëyaexanajë. ²² Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisiacuene pexanaevi. ²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yaiyatane taxa. Pajivi apo neyaiyatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenumuxunaeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo pevereverecejava. Nexata bajarapajivi apo naneconitsiaexanaenë tsane pibisiacuene pexanaeneconi yabara. Bajarapajivi tēpae ata tsane, capanepaenatsi Diosojavabelia. ²⁵ Xaniajanë pacuenia pacatsipaebijitsiatsi. Pamonae apo xinae matacabi apo pevereverecejava, pijamatacabi baja tocopiapatatsi tanejumetaenexa, xanë Dioso pexënatonë, tatsipaebilivaisi. Nexata pajivi nesivanajamatabëcopata, xainaena matacabi apo pevereverecejava. ²⁶ Taxa raja caëjëpatsi jivijavabelia perajutsinexa matacabi apo pevereverecejava. Nexata xanë ata taxa necaëjëpaeyaexana jivi tarajutsinexa matacabi apo pevereverecejava. ²⁷ Nitorobanua tananeconitsiaexanaenexa pibisiacuene pexanaevi. Tsipaji xanë, Daxitajivi Pematapijinënë. ²⁸ Pëtsa pajamatabëcuenenabenajacame patacatsipaebilivaisi yabara. Itsamatacabi nejumetaena daxita petëpaevimimi ata tatsipaebilivaisi. ²⁹ Nexata bajarapamonae pemëthëanëmi vecuapitsapaena. Pamonae pexaniacuene pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo pevereverecejava. Pamonae pibisiacuene pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavanapaena daxitamatacabijavabelianexa, jai Jesús judíovijavabelia.

Pacuenia Jesús jivi tsitanajamatabëcuenetitajëta pecaëjëpaenëcuenetsi daxitacuene pexanaenexa yabara pelivaisi

³⁰ Icatsia Jesús jumaitsi judíovijavabelia:

—Xanë tajamatabëcueneta apo exanaenë tsane itsacuenejavayo ata. Taneitorobinëtsica taneitorobicuenia, pijaneconi pexainaevi naneconitsiaya jinavana-paeyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caejivi canacujitsia, bajarapaneconivajëtota caejivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë. ³¹ Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonae

saya nejumeaebijitsipa. ³² Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajajamatabëcueneta. ³³ Paxamë itsamonaë paitorobame tanevënëlivaisiyanijobinexa Juan jivibautisabinëmijavabelia. Nexata Juanpijinë xanë talivaisi, pexaniajailivaisi, tsipaeba paneitorobivijavabelia. ³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacapanepaejavanexa taxa Diosojavabelia. Juanpijinë abaxë itsa ponapona mapanacuataje, belámparabë picani. Pacajamatabëcuenetayota. Caepatoyo picani pasivajamatabëcuenearëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaexana baja cajena pexaniajailivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinënexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanesivajamatabëjumaitsinexa: “Xaniajai tsaena. Maponëje pepacuene Dioso athëbëvetsica pitorobinëtsicaje.” tanesivajamatabëjainexa. ³⁷ Taxa, ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënu. ³⁸ Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica. ³⁹ Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana matacabi apo peverevereaejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. ⁴⁰ Paxamë itsiata apo panejumecovënëtsimë panexainaenexa matacabi apo peverevereaejava, jai Jesús judíovijavabelia.

⁴¹ Icatsia Jesús jumaitsi judíovijavabelia:

—Apo exanaenë ayaicuene taexanaejava saya jivi tanesivajamatabëjumaitsinexa: “Jesús raja ayaijamatabëcuenenë,” tanesivajamatabëjainexa. ⁴² Pacajamatabëcueneyapëtanetsi. Yapëtaniji cajena apo panejitsipaejava Dioso. ⁴³ Xanë athëbëvetsica patsicajë mapanacuayabetsicaje taxa Dioso taneitorobixaetsica. Itsiata apo panejumecovënëtsimë. Itsanë itsa pacatopatsiana saya bajaraponë pejamatabëcuenepijilivaisi papecatsipaebinexa, nexata pajumecovënëtsianame. ⁴⁴ Paxamë pajitsipame mapanacuata ëjivi papecasivabarëyanexa, papecayaiyataenexanua. Apo panajamatabëxainaemë cajena Dioso papecasivabarëyanexa. Bajaraxuata apo pacacajëpae panejumecovënëtsinexa Dioso pejumelivaisi. ⁴⁵ “Mara ponëje nacaneconitsijitsia Diosojavabelia,” panesivajamatabëjamë pëtsa. Xanë raja apo pacaneconitsi tsanetsi. Paxamë jamatabëcuenenavëxaniabiaya paja-

matabëjumaitsimë tsabiabi: “Bajayata Dioso Moiséspijinëta najumecopata jivi pejumecovënëtsinexa. Bajarapalivaisi baja jumecovënëtsiajinavanapatsi. Bajaraxuata nacapanepaena Dioso,” pajamatabëjamë tsabiabi jamatabëcuenenavëxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia. ⁴⁶ Itsa pepacuene pajumecovënëtsipame Dioso Moiséspijinëta penajumecopatsilivaisi, nexata xanë ata panejumecovënëtsipame. Tsipaji cajena bajayatami tajëvelia nevajunupaeba Moiséspijinë peyaquinaebaxutota. ⁴⁷ Apo pajumecovënëtsimë Moiséspijinë peyaquinaelivaisi. Bajaraxuata nexata apo panejumecovënëtsimë xanë patacatsipaebilivaisi, jai Jesús judíovijavabelia.

Pacuenia Jesús pexaejava rajuta cinco mil ponëbeje yabara pelivaisi

⁶ ¹⁴ Bitso baja imoxoyo pevajënae pejonenexa judíovi pijafiesta, pascuavënëfiesta. Bajarapamatcabi Jesús pona Galilea pucaxaneto itsapanabelia. Bajarapapuca itsavënë Tiberiaspuca. Nexata jivi ayaibitsaëtoخانeto Jesús pënaponatsi. Tsipaji Dioso pesaëta Jesús ayaiacuene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatsia. ⁵ Itsa Jesús tane jivibitsaëtoخانeto pecujibijavatsirena, Jesús jumaitsi Felipejavabelia:

—¿Detsa belia comuatsianatsi pexaejava pexaenexa mapabitsaëtoخانetoje? jai Jesús.

⁶ Bajarapacuenia Jesús jumaitsi tsipaji jamatabëyapëtanepacuena Felipe jumecanaviatsijitsiatsi. Jesús baja cajena picani yapëtanepacuena pexaejava mitsaexanaejitsia bajarapajivibitsaëtoخانeto. ⁷ Nexata Felipe jumaitsi Jesúsjavabelia:

—Doscientos denariocuenia comuatsi atatsi tsipae pan, apo yacajëpaetsi tsipae pexaenexa daxita mapajivibitsaëtoخانetoje, jai Felipe.

⁸ Itsanë Jesús pijajivitonë Andrés, Simón Pedro pejuyapijinë, jumaitsi Jesúsjavabelia:

⁹ —Majotaje napatajopa pejevaxinëyo. Xaina bajaraponëyo cinco papanbëbeje, cebadavënëbenota pexanaepanbëanë. Xaina anijanëyobeje dujuainëyobeje yajava. Bajaraxuaxi apo caejëpae tsipae cajena vajarajutsinexa mapajivibitsaëtoخانetoje, jai Andrés.

¹⁰ Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaëtoخانeto bejamatabëcuene cinco mil meta ponëbeje. ¹¹ Nexata Jesús pita panbëxi. Bajaraxuacujinae pexaenexa vajëta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaevibibitsaëtoخانetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penaejivibitsaëtoxanetojavabelia. Daxita bajarapamonae xaniavaetsia nabane. ¹²Itsa baja bajarapamonae penia, Jesús jumaiti pijajivijavabelia:

—Pacaetuare baja peyajuvënënacopabenaevanë penaxuabenaeyaniva, jai Jesús pijajivijavabelia.

¹³Nexata Jesús pijajivi caetuata peyajuvënënacopabenaevanë. Vënëba doce xuabeje bemapirecuenia pexanaevanë. Cinco papanbëmibeje picani cebadavënëbenota pexanaepanbëanë. ¹⁴Nexata bajarapajivibitsaëtoxaneto itsa tane Jesús ayaicuene Dioso pesaëta pexanaejava, najumaiti Jesús yabara:

—Diosojumepaebinë profeta, ponë vaxaiti copi-aevetavanapatsi pepatsijavanexatsica, bajara jane maponëje. ¹⁵Vaetabianatsi maponëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcuenepätane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi

¹⁶Itsa baja meravi, Jesús pijajivi puca itapayabereca pona. ¹⁷Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. ¹⁸Jesús baja pijajivi pepuaponae jerata, taxuxuaba jovibo pebubujajava. Nexata malataca bitso ayai. ¹⁹Pavëpata Jesús pijajivi naropoba, bajarapavëpa baja bejamatabëcuene cinco pakilómetrobeje, seis pakilómetrobeje ata, pepuavecuanajetarubenaelia, Jesús pijajivi cujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cjunavatsi. ²⁰Nexata Jesús jumaiti pijajivijavabelia:

—¡Xanë raja najetarucajë! ¡Pëtsa panecujunavame! jai Jesús pijajivijavabelia.

²¹Nexata Jesús pijajivi jamatabëcuenebarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²²Pamonae Jesús pexaejava rajuta, abaxë nacopabalia puca itsapanatalia. Nexata meravia pitsijavata bajarapamonae najumaiti:

—Canivi caejera perucaejava, tanetsi majotaje. ËJesús pijajivi runareca penicabinexalia. Nexata Jesús nacopatanuca majotaje, najai bajarapamonae.

²³Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaejava rajuta jivi ayaibitsaëtoxaneto, bajarajota vecuaimoxoyo yaëba. ²⁴Nexata pamonae Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata ba-

jarapamonae runareca jera ënëabereca penicabinexalia Capernaum tomarabelia. Bajarapatomarabelia pona pepëjaitisinxatsi Jesús.

Pacuenia Jesús bepitavapan yabara pelivaisi

²⁵Jesús pepëjaitisivitsi itsa pata Capernaum tomarabelia, caxitajarabatsi Jesús. Nexata bajarapamonae jumaiti Jesúsjavabelia:

—Jesús, ¿detsa pacujinae patame baja maberenaje? jai.

²⁶Jesús nexata jumaiti bajarapamonaejavabelia: —Xaniajanë pacuenia pacatsipaebijitsiatsi. Paxamë panejaitame tsipaji xaniavaetsia panabaneme xanëjavata. Apo panejaitsimë panejumecovënëtsinexamë Cristocuenenë, Dioso taneitorobinëtsica. Patae atamë ayaicuene Dioso pesaëta taxanaejava, apo panejumecovënëtsimë. ²⁷Pëtsa pacajamatabëcueneena ëpeverevereaejava yabara. Pacuenia panexaejava baverevereca, bajarapitsijava. Biji rajane pacajamatabëcueneena apo peverevereaejava yabara. Nexata xanë, Daxitajivi Pematapijinë, pacarajutsianatsi matababi apo peverevereaejava. Taxa Dioso baja cajena nitoroba patacarajutsinexa matababi apo peverevereaejava, jai Jesús bajarapamonaejavabelia.

²⁸Nexata bajarapamonae jumaiti Jesúsjavabelia: —¿Detsa nexata xua bepaexanajë Dioso pejitsipae-cuene? jai bajarapamonae.

²⁹Nexata Jesús jumaiti bajarapamonaejavabelia: —Mara pacuene Dioso jitsipa paneexanaenexaje. Panejumecovënëre xanë Dioso taneitorobicuenetsica, jai Jesús.

³⁰Nexata icatsia bajarapamonae jumaiti Jesúsjavabelia:

—¿Detsa nexata xua pinijicuene Dioso pesaëta nexanaejava panetsitaexanaename patacujumecovënëtsinexa Dioso pecaitorobicuenetsica? ³¹Vajasalinaivimi pina bajayata baxaevanapa manävënëjava petusato nacuata pacuenia baja Dioso pejumelivaisibaxutota jumaiti. Dioso baja cajena pejumelivaisibaxutota jumaiti mapacueniaje: “Bajarapamonae rajutabiabatsi pexaejava athëbëpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

³²Jesús nexata bajarapamonaejavabelia jumaiti: —Xaniajanë pacuenia pacatsipaebijitsiatsi. Moiséspinë petusato nacuata vajasalinaivimi pexaejava apo rajutsi athëbëpijijava. Taxa Dioso raja rajutabiaba bajarapamonae pexaejavanexa. Nexata pijinia aeconoxae paxamë ata Dioso pacarajutsiana athëbëpijipan, pepacuene pexaniajaipan. ³³Ponë athëbëvetsica pepatsinë, Dioso rabaja pijapan. Bajaraponë mapanacuapijivijavabeliaje rajutsiana matababi apo peverevereaejava, nayabarajai Jesús pijacuata bajarapamonaejavabelia.

³⁴Nexata bajarapamonae jumaiti:

—Jesús, bajarapapan panerajutaponaename daxitamatababi canacujitsia, jai.

³⁵Nexata Jesús jumaiti bajarapamonaejavabelia:

—Papan jivi rajutsianatsi matababi apo peverevere-caejava, xanë rabaja bajarapapannë. Pajivi xanëjav-aberena pata, apo piajani cajena tsane peja-matabëëthëtota. Pajivi nesivanajamatabëcopata xanëjavaberena, apo jitsipae tsane icatsia mera. ³⁶ Paxamë apo panejumecovënësimë, patae atamë Dioso pesaëta pinijicue taexanaejava. ³⁷ Daxita pamonaë taxa tanerajutsivi, patsiana xanëjavaberena. Pajivi patsiana xanëjavaberena, apo navecuaitavetsinë tsane. ³⁸ Xanë apo patsinëtsica athëbëvetsica taexanaenexa ëtaja-matabëcujirupijijava. Biji rajane patsicajë taexanaenexa pacuenia nitoroba taneitorobinëtsica. ³⁹ Mara pacuene taxa Dioso jitsipa tatoexanaenexaje. Apo jitsipae cajena taxouabijava caejivi ata tanerajutsiviyajuvënëvi. Pamatababi icatsia patsianicajë, daxita bajarapamonaë toasaëyaexanaenajë icatsia petëpaejavamivecua. ⁴⁰ Mara pacuene taxa Dioso jitsipaje. Daxita pamonaë tanetaevi Dioso pexënatonë, nexata itsa nesivanajamatabëcopata, bajarapamonaë xainaena matababi apo peverevere-caejava. Bajarapamonaë icatsia asaëyaexanaenajë petëpaejavamivecua pamatababi icatsia patsianicajë, jai Jesús bajarapamonaëjavabelia.

⁴¹ “Xanë rabaja athëbëvetsica tapatsipan,” pe-nayabarajajava Jesús jivijavabelia, judíovi baracuaicuaijaiti pepënëvelia. ⁴² Nexata judíovi najumaiti:

—Mara ponë Jesús, Josépijinë pexënatote. Vaxaiti baja cajena yapëtanetsi paxapijinë, pena ata. Nexata bajaraponë acuenebi pejumaitisijava: “Athëbëvetsica tapatsinë,” pejajava, najai judíovi Jesús yabara.

⁴³ Nexata Jesús jumaiti bajarapamonaëjavabelia:

—Jamatabëcuenenavëxaniabiaya pëtsa panebaracuaicuaijamë tapënëverena. ⁴⁴ Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatababi icatsia patsianicajë. ⁴⁵ Bajayata Dioso-jumepaëbivimi peyaquinaelivaisi jumaiti mapacueniaje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

⁴⁶ Icatsia Jesús jumaiti judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tsipaji bajaravetsica tapatsinë. ⁴⁷ Xaniajanë pacuenia pacatsipaëbijiatsi. Pajivi nesivanajamatabëcopatsiana, xainaena matababi apo peverevere-caejava. ⁴⁸ Xanë rabaja pitavapannënë. Nexata jivi rajutsianajë matababi apo peverevere-caejava. ⁴⁹ Bajayata panijasalinaivimi xaevanapa picani manávënëjaja petusato nacuata. Itsiata baitsi jane bajarapamonaë bajayajebi bajaraxua xaevanapae ata, tëpa itsiata.

⁵⁰ Xanë raja pacanavajunupaëbatsi athëbëvetsica tapatsinë. Pajivi nesivanajamatabëcuenecopatsiana,

pepacuene apo tëpae tsane. ⁵¹ Xanë rabaja cajena pitavapannënë, athëbëvetsica tapatsinë. Pajivi jumecovënëtsiana tasivatëpaejava pijaneconi yabara, jamatabëcueneaitava tsaponaponaë tsane daxitamatabijavabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaenexa matababi apo peverevere-caejava, nayabarajai Jesús judíovijavabelia.

⁵² Nexata judíovi najumeanaenota ëpamonaë bajarapacuenia Jesús pejumaitisijava yabara. Najumaiti bajarapamonaë:

—¿Detsa pacuenia maponë nacanavirajutsipa vajavixaenexaje? Acuenebi raja vajanacnavirajutsijava vajavixaenexa, najai judíovi.

⁵³ Jesús nexata jumaiti judíovijavabelia:

—Xaniajanë pacuenia pacatsipaëbijiatsi. Xanë, Daxitajivi Pematapijinënë. Itsa paxamë apo panevix-aemë tsane, apo panejanaapaemëna tsane, nexata matababi apo peverevere-caejava, apo paxainaemë tsane. ⁵⁴ Pajivi nevixaena, nejanaapaenanua, xainaena matababi peverevere-caejava. Pamatababi icatsia patsianicajë, bajarapajivi icatsia asaëyaexanaenajë petëpaejavamivecua. ⁵⁵ Tavito rabaja cajena pepo pexaniajajava jivi pexaenexa. Tajana rabaja pijinia pepo pexaniajajava jivi piapaenexa. ⁵⁶ Pajivi nevixaena, nejanaapaenanua, bajarapajivi yajavaponaponaenajë. Bajarapajivi ata pijinia neyjavaponaponaena. ⁵⁷ Taxa, ponë nitorobica, bajaraponë daxitamatabacijavabelianexa piasaëtsaponaponaenë. Bajaraponë peja-matabëcueneta xanë ata daxitamatabacijavabelianexa asaënë tsaponaponaë. Nexata pajivi nevixaena, bajarapajivi pijinia tajamatabëcueneta asaë tsaponaponaë tsane daxitamatabacijavabelianexa. ⁵⁸ Athëbëvetsica pepatsipan, xua yabara baja pacatsipaëbatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonaëmi itsiata tëpa baja cajena. Biji rajane pajivi xanë nevixaena, ponaponaena daxitamatabacijavabelianexa, jai Jesús judíovijavabelia.

⁵⁹ Bajarapacuenia Jesús jumaiti judíovijavabelia livaisi petsipaëbijavata Capernaum tomarata, judíovi penacaetuatabibibota.

Matababi apo peverevere-caejava yabara pelivaisi

⁶⁰ Ayaibitsaëto, pamonaë Jesús pepëta najinavanapa, itsa jumetane Jesús petsipaëbilivaisi, apo jumexaniataë. Najumaiti ëpamonaë:

—Penajumetsënëtsilivaisi saya nacatsipaëba. ¿Jipatsa jumecovënëtsiana? Ajibi cajena, najai ëpamonaë.

⁶¹ Nexata Jesús jamatabëcueneyapëtanë pacuenia pepënëvelia baracuaicuaijaiti. Nexata Jesús yanijoba pepënaponaëvitsijavabelia. Jumaiti:

—¿Apo bepexaniajailivaisi tsaja pajumetaneme patacatsipaëbilivaisi? ⁶² Xanë Daxitajivi Pematapijinënë.

¿Detsa paitsimë tsipae itsa pataejitsipame tatsiajava athëbëabetsia taponaponaenacuamijavabetsia? ⁶³ Espiritu Santo baja cajena pejamatabëcueneta jivi xaina matababi apo peverevere-caejava. Ejëvi raja peja-

matabëcueneta apo caëjëpaetsi pexainaenexa matabi apo peverevereaejava. Patacatsipaebilivaisi baja cajena papecatsijamatabëjonenexa picani, panexainaenexa matabi apo peverevereaejava. ⁶⁴ Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënae ata, jamatabëcueneyapëtane pamonaë apo jumecovënëtsijitsiatsi. Jamatabëcueneyapëtanenua tajëvelia ponë canajetsijitsiatsi pijavajabitsaë pecobeyabelia. ⁶⁵ Nexata Jesús icatsia jumaiti pepënaponaeivitsijavabelia:

—Bajaraxuata cajena pacajumaiti: “Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana,” pacajaiti, jai Jesús pepënaponaeivitsijavabelia.

⁶⁶ Bajara nexata jota ayaibitsaëto Jesús pepënaponaeivitsi vepënaviabatsi baja. Nexata bajarapamonae pematatsënëa baja apo pënaponaeitsi Jesús. ⁶⁷ Nexata Jesús yanijoba doce ponëbeje pijajivijavabelia. Jumaiti:

—¿Paxamë ata tsabaja pajamatabënaviabame? jai Jesús.

⁶⁸ Nexata Simón Pedro jumaiti Jesúsjavabelia:

—Tajatuxanenë, itsa panaviabajë, çjipatsa nexata pënaponaeivitsipajë xamëvecua? Xamë rabaja caenëmë panetsipaebame matabi apo peverevereaejava pataxainaenexa. ⁶⁹ Paxanë rabaja pacajumecovënëtsi patanetsipaebilivaisimë. Pacayapëtanetsinua baja cajena Cristocuenemë, Dioso piasaëtsaponaponae daxitamatabijavabelianexa pexënatomë, jai Simón Pedro Jesúsjavabelia.

⁷⁰ Jesús nexata jumaiti pijajivijavabelia:

—Xanë rabaja pacaitapetatsi doce paponemëbeje. Itsiata baitsi jane paxamëyajuvënëni, itsanë, dovathi pijajivitonë tsaponaponae, jai Jesús.

⁷¹ Bajarapacuenia Jesús itsa jumaiti, Judas Iscariote, Simón pexënato, yabara jumaiti. Judas Jesús canajetsijitsiatsi pijavajabitsaë pecobeyabelia. Judas rabaja picani Jesús pijajivitonë, doce ponëbejeyajuvënëni.

Pacuenia Jesús pejuyapijivi apo jumecovënëtsitsi yabara pelivaisi

7 Jesús ponaponna Galilea nacujava. Apo jitsipae peponaponaejava Judea nacujava. Tsipaji bajara-jota judíovi jamatabëbeyaxuabatsi. ² Imoxoyo baja pevajënae pejonenexa fiesta, pafiestamatabi judíovi bobërëtonë exanabiaba. Nexata judíovi bajara-pabobërëtonëta jinavanapabiaba bajarapafiestamatabi. ³ Nexata Jesús pejuyapijivi junatatsi penaponaejava bajarapafiestajavabelia. Jesús pejuyapijivi jumaiti:

—Pëtsa nacopatame majotaje. Judea nacujavabelia liamëre. Bajarajotalia pijinia Dioso pesaëta pinijicue nexanaponaejava nijajivi tsitaexanaename. ⁴ Pajivi pexanaejava yabara jitsipa pevënëlivaisitaenexatsi daxitanacuapijivi, bajarapajivi pexanaejava muetsia

apo exanae. Nexata pepacuene Dioso pesaëta pinijicue itsa exanaponame, nexata icatsia pinijicue tsitaexanaename fiestajavata daxitanacuapijivi pitabarata. Nexata daxitajivi cayapëtaena, jaiti Jesús pejuyapijivi.

⁵ Jesús pejuyapijivi ata apo jamatabëjumecovënëtsi Cristocue. Bajaraxuata bajarapacuenia pejuyapijivi ata jumaiti. ⁶ Nexata Jesús jumaiti pejuyapijivijavabelia:

—Abaxë raja tajamatabi apo netocopiapatsi tanaitajëtsinexa daxitajivijavabelia. Itsiata paxamë apo paitsimë. Paepatota jamatabëpaponame, pacatoxanepana paneponaenexa. ⁷ Mapanacuapijivi cajena acuenebi paxamë papecaitojava. Itsiata baitsi jane xanë nitoya. Tsipaji itavetaponajë pibisiacue pexanavanapaejava. ⁸ Paxamë baja paponare fiestajavabelia. Xanë ra abaxë apo ponaenë. Tsipaji abaxë apo netocopiapatsi paepatota ponaëjitsianë, jai Jesús pejuyapijivijavabelia.

⁹ Bajarapacuenia Jesús pejumaitisicujinae, abaxë Jesús nacopatanuca Galilea nacujava pecotocaevinexa.

Pacuenia Jesús naponna fiestajavabelia yabara pelivaisi

¹⁰ Jesús pejuyapijivi fiestajavabelia pepuaponae, Jesús ata cotocaevi naponna fiestajavabelia. Jesús nexata jivibitsaëto tuatuajëta apo naponae muetsia pepatsinexa. ¹¹ Jesús picani jaitatsi judíovi pevetsivi fiestajava. Najumaiti judíovi pevetsivi:

—¿Detsa xania jota ponaponna bajaraponë? najai judíovi pevetsivi Jesús yabara.

¹² Ayaibitsaëto jivi vëpaxapaxajai baracuaicuaijaiti Jesús. Itsamonae jumaiti Jesús yabara:

—Pexaniajamatabëcuenenë raja, jai itsamonae.

Itsamonae pijinia jumaiti:

—Apo pexaniajamatabëcuenenë raja Jesús. Peyamaxëitojorobinë ra saya jivi, jai Jesús yabara.

¹³ Itsajivi ata apo cuaicuaijai ayaijumeta Jesús yabara. Tsipaji jumejunava judíovi pevetsivi pejumetaeyanivat-si.

¹⁴ Itsa baja fiesta epatua tsaponae peverevere-caenexa, nexata Jesús joneya temploboyalia. Taxuxuaba jane baja livaisi petsipaebijava. ¹⁵ Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaiti:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenaë judíovi pevetsivi Jesús yabara.

¹⁶ Jesús nexata jumaiti judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. ¹⁷ Pajivi jamatabëexana Dioso pejitsipaecuenia, bajarapajivi yapëtaena pepacuene Dioso pejumelivaisi tatsipaebijava. Nexata yapëtanua tajamatabëcuenepijilivaisi itsa tsipaebajë. ¹⁸ Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëito-

gorobi jivi. Tshipaji pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹ Jesús icatsia jumaitsi judíovijavabelia:

—Moiséspijinè baja cajena bajayata yaquina Dioso penajumecopatsilivaisi jivi pejumecovènètsinexa. Itsiata baitsi jane paxamèyajuvènèjivi, caejivi ata, apo jumecovènètsi bajarapalivaisi. Bajarapalivaisi pacaitavetsi ata jivi panebeyaxuabiyana, ¿detsa xujitsia itsiata xanè jamatabèpanebeyaxuabame? jai Jesús judíovijavabelia.

²⁰ Nexata judíovi jumaitsi Jesúsjavabelia:

—Dovathi baja cajena yajavaponaponame. Itsajivi ata raja apo jamatabècabeyaxuabi, jai judíovi.

²¹ Jesús nexata jumaitsi bajarapamonaevjavabelia:

—Caejavayo Dioso pesaèta piniijicuene taexanaejava exanjè penacuraevetsimatacabita. Nexata itsa pataneme bajarapacue, daxita paxamè pajamatabècuenenabenajacame penacueraevetsimatacabita taexanaexae bajarapacue. ²² Paxamè ata penacueraevetsimatacabita ata panacuenebabiabame. Tshipaji penacuetonèyo paperabècaucutabiabame penacueraevetsimatacabita ata ocho pamatacabibeje ita xaina penaexanaecujinae. Baitsi paboupiperabècaucutabiabame, Moiséspijinè baja cajena papecaitorobicuene. (Itsiata Moiséspijinè apo taxuxuabi bajarapacue. Bajaraponèmi cajena pevajènaeya ata, panijasalinaivimi taxuxuaba bajarapacue.) ²³ Bajarapacuenia penacuetonèyo paperabècaucutabiabame penacueraevetsimatacabita ata, panejumecovènètsinexa Moiséspijinè pitorobicuena. ¿Detsa nexata xujitsia xanè panebaraanaepaname penacueraevetsimatacabita pebi tajamatejemayaexanaejava yabara? ²⁴ Xaniavaetsia abaxè payapètaenejevamè itsajivi pibisiacuene pexanaejava, pètsa abaxè pananeconitsiaexaname. Matapania xaniavaetsia payapètaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalén tomarata pejinavanapaevi najumaitsi Jesús yabara:

—¿Matsa ponè apo jaitarutsitsi pebeyaxuabinexatsije? ²⁶ ¡Pataema! Bajaraponè cuaicuaijai tsanucæ dajitajivi pitabarata. Itsiata itsajivi ata apo jumeitavetsi. Vajanacaevetsivi ata meta jumecovènèta bajaraponè pepacue Dioso athèbèvetsica pitorobijavatsitsica jivi pecapanepaenexa. Bajaraxuata bajarapamona apo jumeitavetsi. ²⁷ Vaxaitsi cajena yapètanetsi itsaverena pata maponèje. Nexata acuenebi pijacuata: “Cristonè raja,” pejaijava. Tshipaji Cristo yabara tajèvelia jumaitsi mapacueniaje: “Itsajivi ata apo yapètae tsane itsaverena patsijitsia Cristo,” jai, najai Jerusalén tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapamona pebaracuacuajijavatsi.

Nexata Jesús ayaijumeta jumaitsi bajarapamonaevjavabelia:

—Xanè yabara pajumaitsimè: “Yapètanetsi bajaraponè. Yapètanetsinua itsaverena pata bajaraponè,” pajamè. Itsiata baitsi jane apo patsinè tajamatabècuene. Biji rajane taneitorobinètsica ponapona athèbètatsia. Paxamè cajena apo payapètaemè bajaraponè.

²⁹ Xanè yapètaniji bajaraponè. Tshipaji athèbèvetsica tapatsinè. Bajaraponè baja cajena nitorobica mapanacuayabetsicaje, jai Jesús bajarapamonaevjavabelia.

³⁰ Nexata picani Jesús bajarapamona jamatabèvaetabatsi penaneconitsiaexanaenexatsi. Itsiata abaxè itsajivi ata apo vaetabitsi. Tshipaji abaxè Jesús apo tocopiapatsitsi pijamatacabi pevaetabinexatsi. ³¹ Itsiata baitsi jane bajarapamonaeyajuvènèvi ayaibitsaèto jumecovènèta Cristocuene. Nexata bajarapamona najumaitsi:

—Itsa pina Cristo patsianica, Dioso pesaèta piniijicuene pexanaejava exanaena. Bajara maponè pepacue Cristoje, ponè Dioso athèbèvetsica itorobijitsiatsica jivi pecapanepaenexa. Tshipaji nacatsitajèta pesaè. Piniijicuene pexanaejava exana Dioso pesaèta. Tshipaji cajena itsanè ata mapanacuata apo caèjèpaetsi bajarapitsipiniijicuene pexanaenexa, najai bajarapamonaev Jesús yabara.

Pacuenia fariseovi itoroba policíavi Jesús pevaetabinexatsi yabara pelivaisi

³² Fariseovi jumetane jivi pejumaitsijava: “Pepacue rabaja maponè Cristoje,” pejaijava Jesús yabara. Nexata fariseovibeje judíovi penamatacaitorobivibeje najamatabècuenejèpabeje pitorobinexa policíavi. Nexata policíavi pona templobojavabelia pevaetabinexatsi picani Jesús. Itsiata abaxè Jesús apo vaetabitsi. ³³ Jesús nexata templobota jumaitsi judíovijavabelia:

—Abaxè raja bajayayo itsiata pacayajavaponaponanatsi. Bajaraxuacujinae jane baja naviatsonianjè taneitorobinètsicajavabetsia. ³⁴ Paxamè picani panejaittsianame. Itsiata apo panecaxitajarabimè tsane. Tshipaji apo pacacaèjèpae tsane paneponaenexa itsabetsia ponaejitsianè, jai Jesús judíovijavabelia.

³⁵ Nexata judíovi nayanijoba èpamona.

—¿De tsaeta belia maponè pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griegovi pijatomaranèjavabelia, itsabelia judíovi jinavanapa. Griegovi raeta livaisi tsipaebijitsia Jesús. ³⁶ Jesús nacajumaitsi: “Paxamè picani panejaittsianame. Itsiata apo panecaxitajarabimè tsane. Tshipaji apo pacacaèjèpae tsane paneponaenexa itsabetsia ponaejitsianè,” nacajai. ¿De tsaeta pitsijamatabècuene yabara bajarapacuenia Jesús nacajumaitsi? najai judíovi.

Apo pevereverecaemera yabara pelivaisi

³⁷ Pafiestamatacabi judíovi bobèrètonè exanabiaba, pecopiarucaematacabi, jivi bitso najamatabècueneriviabiaya bajinavanapa. Nexata bajarapamatacabi jivi

ayaibitsaëto pitabarata Jesús nonotabapuna. Ayai-jumeta Jesús jumai tsanucae:

—Pajivi mera jitsipa, xanëjavaberena ponae pia-paenexa. ³⁸ Dioso pejumelivaisibaxutota jumaiti mapacueniaje: “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera. Baitsi bajarapajivi asivaya taeyabiabiana itsamonae ata. Nexata jamatabëcueneyavenonabiabiana itsamonae atanesi-vanajamatabëcuene copatsinexa, bajarapamonae ata pexainaenexa matabaci apo pevereverecaejava,” jai Jesús judiovijavabelia.

³⁹ “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera,” itsa jai Jesús, jumaiti Espiritu Santo yabara. Baitsi pajivi jumecovënëta Jesús petsipaebilivaisi, tsijamatabëcaenatsi Espiritu Santo. Itsiata baitsi jane abaxë Espiritu Santo apo patsitsica. Tsi-paji abaxë Jesús apo ponae athëbëabetsia.

Pacuenia daxitajivi Jesús yabara apo najamatabëcuenejêpae yabara pelivaisi

⁴⁰ “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparucaemera,” pejaijava Jesús, jivi itsa jumetane, itsamonae jumaiti:

—Xaniajai rabaja. Maponë Diosojumepaebinë profetanëje, ponë copiaevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaiti:

—Jume raja. Bajara maponë Cristoje, ponë Dioso athëbëvetsica itorobijitsiatsica jivi pecapanepaenexa, jai itsamonae.

Itsiata itsamonae jumaiti:

—¡Apo Cristo raja! Tsi-paji Cristo Galilea nacuaverena apo patsi tsipae. ⁴² Dioso baja cajena pejumelivaisibaxutota jumaiti pacuenia Davidpijinë pemomoxiyajuvënëna naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

⁴³ Bajarapacuenia nexata jivi ayaibitsaëto apo najamatabëcuenejêpae Jesús yabara. ⁴⁴ Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi

⁴⁵ Papolíaví picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaiti policíavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

⁴⁶ Nexata policíaví jumaiti:

—Bajaraponë Dioso pitorobicueniatsi, xaniavaetsia jivi livaisi tsipaeaba, itsajivi ata apo pepaebicuenia. Bajaraxuata apo pavaetabinë patacaponaenexarena, jai policíaví.

⁴⁷ Nexata fariseoví jumaiti:

—¿Paxamë ata tsabaja pacayamaxëitojoroba bajaraponë? ⁴⁸ Caenë ata vajanacaevetsiviyajuvënëna, fariseoviyajuvënëna ata, apo jumecovënëtsi baja cajena bajaraponë Cristonëcuene. ⁴⁹ Pamona jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaiti jivi pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia. Nexata Dioso naneconitsiaexanaenatsi, jai fariseoví policíavijavabelia Jesús Cristonëcuene pejumecovënëtsivi yabara.

⁵⁰ Nicodemo, ponë copiaya Jesús taeyojopalia meravi, bajaraponë naeca bajarajota. Bajaraponë Nicodemo fariseoviyajuvënëna. Nicodemo nexata jumaiti pevëna fariseovijavabelia:

⁵¹ —Vajalivaisi cajena nacaítaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaiti Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaiti. Caenë ata cajena Diosojumepaebinë profeta apo patsi Galilea nacujavaverena, jai bajarapamonae.

Petiriva pibisiacuene pexanaeva pamona pepëya yabara pelivaisi

⁵³ Fariseovibeje judíovi penamatacaitorobivibeje pebijataecujinae policíaví, fariseoví baja caenë canacujitsia naviaba pijabonëjavabelia.

8 Jesús pona Olivovënë tsutojavabelia. ² Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeaba bajarapamonaejavabelia. ³ Nexata temploboyaberena judíovi pecujarubivi, fariseoví yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pivitota pibisiacuene pexanaponaponaevavata. Nexata petiriva nutatsi daxitajivi pitabarata. ⁴ Nexata judíovi pecujarubivi, fariseoví yajava, jumaiti Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaevavata. ⁵ Dioso Moiséspijinëta penajumecopatsilivaisi nacaítoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

⁶ Bajarapamonae jumaiti bajarapacuenia Jesús saya pejamatabëcuenejêtsinexatsi. Nexata Dioso Moiséspijinëta penajumecopatsilivaisivecua, saicay-

acuenia, Jesús itša jumecanaviata, bajarapamonae neconitsijitsiatsi picani. Itsiata Jesús jamatabëcueneyapëtane pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquineca. ⁷ Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaitsi bajarapamonaejavabelia:

—Ponë paxamëyajuvënënë pibisiacuene apo pexanaenë, bajaraponë copiata iboto bixanae bajarapovajavabelia, jai Jesús.

⁸ Nexata icatsia Jesús ecareca. Ira taeyeca icatsia. Ira yaquineca icatsia. ⁹ Nexata bajarapamonae itša jumetane bajarapacuenia Jesús pejumaitisijava, bajarapamonae najamatabënäpita, caenë canacujitsia, pibisiacuene pexanavanapaejava. Nexata bajarapamonae, caenë canacujitsia, templobovecua pitsapapona. Copi-aya perujuvi pitsapa. Bajaraxuacujinae pevëjëavi pitsapa. Itša baja daxita pitsapa, caenë Jesús templobota nacopateca petiriva yajava. Bajarapova abaxë nuca bajarajota. ¹⁰ Nexata Jesús itša nonotapuna, caeva taenuta. Nexata Jesús jumaitsi petirivajavabelia:

—¿Detsa belia pona pamonae caneconita picani? ¿Itšanë ata tsaja apo cabixanae ibotota nijaneconi yabara pecananeconitsiaexanaenexa? jai Jesús petirivajavabelia.

¹¹ Nexata bajarapova jumaitsi:

—Jume raja. Caenë ata apo nebixanae ibotota, jai bajarapova.

Nexata Jesús jumaitsi:

—Xanë ata apo cananeconitsiaexanaetsi. Ponare baja. Pëtsa baja icatsia pibisiacuene exaname, jai Jesús bajarapovajavabelia.

Jesús mapanacuapijivije pexaniajailivaisita pejamatabëcueneyatotsinë yabara pelivaisi

¹² Jesús icatsia templobota jumaitsi jivijavabelia:

—Xanë raja pexaniajailivaisita daxitanacuapijivi jamatabëcueneyatotsianajë. Pajivi nepënaponaena, bajarapajivi jamatabëcueneyatotsianajë. Nexata xinaena matacabi apo peverevereaejava. Bajarapajivi itsamatacabijavabelia ata apo ajamatabëcueneyatotsi tsane, jai Jesús jivijavabelia.

¹³ Nexata fariseovi jumaitsi Jesúsjavabelia:

—Xamë saya nijacuata najamatabëcuenelivaisipabame. Nexata apo payapëtaenë nexaniajaicuene. Bajaraxuata apo pacajumecovënëtsitsi, jai fariseovi.

¹⁴ Jesús nexata jumaitsi fariseovijavabelia:

—Najamatabëcuenelivaisipaebi atanë tajacuata, itsiata cajena xaniajanë. Tsipaji xanë yapëtaniji itsaverena patajë. Itsabelia ata ponaejitsianë, yapëtaniji. Itsiata paxamë apo payapëtaemë itsaverena patajë. Itsabelia ata ponaejitsianë, apo payapëtaemë. ¹⁵ Paxamë paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapëtaenejevamë pepacuene paneconivajëto xaina. Xanë abaxë apo naneconitsiaexanaenë itsajivi ata. ¹⁶ Itsiata itsamatacabi, itša naneconitsiaexanaenajë Diosojavabelia pijaneconi pexainaevi, naneconitsiaexanaenajë

paneconivajëto xaina. Tsipaji caenënë apo naneconitsiaexanaenë tsane. Taxa Dioso, ponë nitorobica, bajaraponë neyajava tsane jivi tananeconitsiaexanaematacabi. ¹⁷ Dioso Moiséspijinëta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejëpaeya paebabeje, bajarapalivaisi bepajumecovënëtame,” jai. ¹⁸ Xanë baja cajena najamatabëcuenelivaisipaebajë. Taxa ata, ponë nitorobica, nevajunupaeba. Nexata baja panijanënëbeje najumejëpaeya pacatsipaebatsibeje xanë talivaisi, jai Jesús fariseovijavabelia.

¹⁹ Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamë ra cajena apo paneyapëtaemë. Taxa ata apo payapëtaemë. Itša paneyapëtaejitsipame, nexata taxa ata payapëtaejitsipame, jai Jesús fariseovijavabelia.

²⁰ Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejebabiabicajonianë bobena, bajarajota Jesús livaisi tsi-
paebanuca. Itsiata abaxë itsajivi ata Jesús apo vaetabitsi penaneconitsiaexanaenexatsi. Tsipaji abaxë pijamatacabi apo tocopiapatsitsi pevaetabinexatsi.

Pacuenia Jesús tajëvelia jumaitsi: “Paxamë apo pacacaëjëpae tsane paneponaenexa itsabelia ponaejitsianë,” jai yabara pelivaisi

²¹ Jesús icatsia templobota tajëvelia jumaitsi fariseovijavabelia:

—Xanë pacavecuaponaenatsi. Nexata paxamë panejitsianame. Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacaëjëpae tsane paneponaenexa itsabelia ponaejitsianë, jai Jesús fariseovijavabelia.

²² Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacaëjëpae tsane paxamë paneponaenexa itsabelia ponaejitsianë,” nacajai, najai judíovi.

²³ Nexata Jesús jumaitsi judíovijavabelia:

—Paxamë baja cajena mapanacuapijivimëje. Xanë saicaya athëbëvetsica tapatsinë. Paxamë mapanacuata panejivanapaevije. Xanë raja maapo panacuapijinënëje. ²⁴ Bajaraxuata pacajumaitsitsi: “Paxamë pibisiacuene paneexanaeneconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexata paxamë panijaneconi payajavatëpaename itša apo panejumecovënëtsimë patacavecuajibiaexanaejavanexa pibisiacuene paneexanaeneconi, jai Jesús fariseovijavabelia.

²⁵ Nexata fariseovi jumaitsi Jesúsjavabelia:

—¿Detsa xamë ponëmë? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebapontatsi baja cajena. ²⁶ Paxamë bitso pibisiacuene

paexanabiabame. Nexata ayailivaisi xainajë itsamon-aejavabelia patacavajunupaebinexa pibisiacuene paneexanaejava. Nexata pibisiacuene paneexanaeconi yabara, necaëjëpa picani patacananeconitsiaex-anaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

²⁷ Itsiata baitsi jane fariseovi apo jumeyapëtae bajarapacuenia Jesús petsipaebijava paxa Dioso yabara.

²⁸ Bajaraxuata Jesús jumaiti bajarapamonaejavabelia:

—Itsa xanë, Daxitajivi Pematapijinënë, paneyotarut-siaexanaename cruzajavabelia patanebeyaxuabiaex-anaenamë, nexata matapania bajarapamatacabi paneyapëtaename ponëcuenenë. Nexata bajarapamatacabi payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. ²⁹ Taxa, ponë nitorobica, neyjavaponapona baja cajena. Tajaepato apo neponapon-aeaxanae. Tsipaji exanabiabajë pacuene yabara taxa nesivajamatabëcuenebarëyajitsia, jai Jesús bajarapamonaejavabelia.

³⁰ Itsa Jesús jumaiti bajarapacuenia, ayaibitsaët oxaneto judíovi jumecovënëtatsi Cristonëcuene: “Xaniajai cajena. Maponëje Dioso itorobicatsi,” jamatabëjai judíovi Jesús yabara.

Dioso pexi yabara pelivaisi, dovathi ata pexi yabara pelivaisi

³¹ Pajudíovi jumecovënëta Cristonëcuene, bajarapajudíovijavabelia Jesús jumaiti:

—Itsa paxamë tsiteca pajumecovënëtavanapaename patacatsipaebilivaisi, nexata baja pepacuene patajajivimë tsane. ³² Nexata palivaisi pacatsipaebatsi, payapëtaename baja pexaniajailivaisicuene. Nexata baja itsa payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudíovijavabelia.

³³ Nexata pajudíovi apo jumecovënëtsi

Cristonëcuene, jumaiti Jesúsjavabelia:

—Paxanë rabaja cajena Abrahampijinë papemomoxinë. Paxanë dajubicuenia apo panecanajetsi itsanëjavabelia amoneya patatonacuenebabiabinexa. “Pacopabianame baja itsanë papecaitorobicuenia panetoexanabiabijavami,” itsa panejamë, ¿detsa pitsilivaisi yabara panejumaitisimë? jai Jesúsjavabelia pajudíovi apo jumecovënëtsi Cristonëcuene.

³⁴ Jesús nexata jumaiti bajarapajudíovijavabelia:

—Xaniajanë pacuenia pacatsipaebijitsiatsi. Daxita pamonae pibisiacuene pexanaevi, jamatabëcueneitorobabiabatsi dovathi pejamatabëcueneta. ³⁵ Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexënato tsaponaponae. ³⁶ Nexata pijinia xanë, Dioso pexënatonë, itsa copiarucaeyaexanaenajë dovathi papecaitorobabiabijavami, copiarucaeyaexanaenajë daxi-

tamatacabijavabelianexa. Nexata baja dovathi apo pacaitorobabiabi tsane matavëjëa pibisiacuene paneexanaenexa. ³⁷ Yapëtaniji cajena Abrahampijinë pape-momoxicuenemë. Itsiata baitsi jane jamatabëpanebeyaxuabame. Tsipaji apo panejumecovënëtsimë patacatsipaebilivaisi. ³⁸ Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judíovijavabelia.

³⁹ Nexata judíovi jumaiti:

—Pataxajivi baja cajena pexaniajamatabëcuenevi. Abrahampijinë rabaja cajena patamopijinëmi, patajasalinainëmi, jai judíovi.

Jesús nexata jumaiti bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi. ⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanae bajarapitsicuene!

⁴¹ Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaiti:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpijinë. Pataxa rabaja Dioso, jai bajarapamonae.

⁴² Nexata Jesús jumaiti bajarapamonaejavabelia:

—Itsa pepacuene Dioso paneaxa tsipae, nexata paxamë asivaya panetaejitsipame. Tsipaji Diosojavavetsica tapatsinë. Majotaje ponaponajë. Xanë raja saya tamatabëcueneta apo patsinëtsica. Dioso raja nitorobica. ⁴³ ¿Detsa xuajitsia paxamë apo panejumeyapëtaemë patacatsipaebilivaisi? Apo pajitsipaemë patanemuxunaevetsinexamë bajarapalivaisi. ⁴⁴ Paxamë rabaja cajena paneaxa dovathi. Papijajivimë. Pejitsipaecuenia jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji penajumetsënëtsinë. Jivi ata najumetsënëtsiaexanabiaba. ⁴⁵ Xanë baja cajena pexaniajailivaisi pacatsipaebatsi. Itsiata apo panejumecovënëtsimë. ⁴⁶ ¿Jipatsa paxamëyajuvënënë netane pibisiacuene taexanaejava? Ajibi cajena. Itsacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë?

⁴⁷ Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi jane paxamë Dioso apo papijajivimë. Bajaraxuata apo pajitsipaemë patanemuxunaevetsinexamë Dioso pejumelivaisi, jai Jesús judíovijavabelia.

Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi

⁴⁸ Judíovi jumaiti Jesúsjavabelia:

—Paxanë itsa pacajumaitsi: “Xamë raja Samaria nacuapijinëmë, dovathi neyjavaponaponaenë,” itsa pacajaitsi, paxaniajanë cajena, jai judíovi Jesúsjavabelia.

⁴⁹ Jesús nexata jumaitsi judíovijavabelia:

—Xanë cajena dovathi apo yjavaponaponaenë. Xanë taxa Dioso yaiyataeya ponaponajë. Itsiata paxamë apo paneyaiyataemë. ⁵⁰ Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonaë apo neyaiyatae. ⁵¹ Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matababi apo pev-ereverecaejava, jai Jesús judíovijavabelia.

⁵² Nexata judíovi jumaitsi:

—Aeconoxae pepacuene dovathi pecayjavaponaponaëjava, payapëtaniji. Tsiipaji Abrahampijinëmi tēpa. Daxita Diosojumepaebivimi profetavi ata, tēpa. Itsiata xamë jumaitsimë tsaponae: “Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamë tsaponae. ⁵³ Vamopijinëmi Abrahampijinë, ayaijamatabëcuenenëmi ata, bajayata tēpa. Daxita Diosojumepaebivimi profetavi ata tēpa. ¿Xamë tsaja Abrahampijinëmi matatoxenetsia beayajamatabëcuenenëmë nataneme? ¿Detsa beponëmë nataneme? jai judíovi.

⁵⁴ Jesús nexata jumaitsi judíovijavabelia:

—Itsa xanë tajacuata najumaitsinë tsiipae: “Xanë bitso ayaijamatabëcuenenënë,” itsa janë tsiipae, nexata ajumematamobinë tsiipae. Itsiata baitsi jane taxa Dioso, ponë yabara paxamë ata: “PatajaDioso raja,” pajamë, bajaraponë neyaiyatane. ⁵⁵ Itsiata paxamë apo payapëtaemë bajaraponë. Xanë cajena yapëtaniji. Nexata xanë Dioso yapëtae atanë, itsa yavajunuaxainaejitsipajë, “Apo yapëtaenë cajena bajaraponë,” itsa janë tsiipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuene Dioso yapëtaniji. Jumecovënëtajënu pacuenia Dioso nitorobabiaba. ⁵⁶ Bajayata Abrahampijinë panijasalinainëmi jamatabëcuenebarëya. Tsiipaji tajëvelia yapëtanë mapanacuayabetsicaje tapatsijavanexatsica. Nexata Abrahampijinëmi nesivajamatabëcuenebarëya baja cajena, jai Jesús judíovijavabelia.

⁵⁷ Nexata judíovi jumaitsi Jesúsjavabelia:

—Abaxë raja xamë apo xainaemë cincuenta pavaibeje ata. ¿Detsa pacuenia nexata taejitsipame Abrahampijinë? Abrahampijinë baja cajena pepo bajayatami tēpa, jai judíovi Jesúsjavabelia jumeaebiaya.

⁵⁸ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinë pevajënaeya ata, jai Jesús judíovijavabelia.

⁵⁹ Nexata bajarapacuenia Jesús itsa jumaitsi judíovijavabelia, judíovi nota ibotonë. Tseconaejitsiatsi picani

Jesús ibotonëta. Itsiata baitsi jane Jesús namatayatsia pitsapa templobovecua bajarapamonae petuatua-jëalia. Jesús baja nexata judíovi itsajavabelia vecuapona.

Pacuenia Jesús itaxutoxanepanaeyaexana ecënaenë yabara pelivaisi

9 Jesús najetaruca namutua. Nexata tane penaexanaejavaveliacujinae bitso pitaxutotsëcënaenë.

² Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaenëje? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponëje paxa, pena ata, pibisiacuene pexanaejamatabëcuene, apo itaxutotsëcënaenëje. Naexana bitso pitaxutotsëcënaenë saya daxitajivi petaenexatsi Dioso icatsia pitaxutoxanepanaeyaexanaejavatsi. ⁴ Payapëtaneme rabaja mapacueneje. Matabacaba xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinë xanë ata. Taponaponaematacabi xanepana tatonacuenebinexa ponë nitorobica. Itsa pamatacabi nebeyaxuabiana, acuenebi tsane tatonacuenebinexa. ⁵ Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexaniajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë. ⁷ Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremilia pecueyetsipucayojavabelia, Siloëvënë pucayojavabelia, jai Jesús.

“Siloë,” itsa jai bajarapamonae pijajumeta, mapajumeta pejumaitsi jume: “Pitorobinëtsicsica,” pejaijume.

Nexata bitso pitaxutotsëcënaenë lia baja. Naitaxutoquiatojopalia. Naviarena baja pitaxutoxanepanaenë.

⁸ Nexata itsajota ponapona bitso pitaxutotsëcënaenëmi, imoxoyo penaevi, pamonaë ata taeyabiabatsi, daxita bajarapamonae nayanijoba.

—¿Matsa ponë palata amoneya pevajëcabiabeaenëmije? najai bajarapamonae.

⁹ Nexata itsamonae jumaitsi:

—Jājā, bajara covë ponë, jai.

Itsiata itsamonae jumaitsi:

—Apo ponë raja. Bajara saya itsiata beponë, jai.

Nexata pitaxutotsëcënaenëmi pijacuata jumaitsi:

—Jājā, xanë rabaja, jai bajaraponë.

¹⁰ Nexata bajarapamonae jumaitsi pitaxutotsëcënaenëmijavabelia:

—¿Detsa nexata pacuenia taneme baja? jai.

¹¹ Nexata pitaxutotsëcënaenëmi jumaitsi:

—Ponë raja Jesúsvenënë, exana tsorobojavayo. Nita-
taxutoexaba. Nexata nejumaitsi: “Liamëre pecueyet-

sipucayojavabelia, Siloévenē pucayojavabelia. Naitaxutoquiaremelia," nejai Jesús. Nexata baja lianē. Itsa naitaxutoquiatajē bajarapapucayota, taniji baja, jai pitaxutotsēcēnaenēmi.

¹² Nexata bajarapamonae jumaitsi:

—¿Detsa jota bajaraponē ponapona? jai.

Nexata icatsia pitaxutotsēcēnaenēmi jumaitsi:

—Apo yapētaenē itsajota ponapona, jai.

Pacuenia bitso pitaxutotsēcēnaenēmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsēcēnaenēmi pitaxutoxanepanaejava jivi itsa tane, yanijobatsi peyapētaenexa pacuenia itaxutoxanepana. Pamonaē yanijobaponatsi, bajarapamonae pitaxutotsēcēnaenēmi caponaliatsi fariseovijavabelia. ¹⁴ Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsēcēnaenēmi, bajarapamatacabi judíovi penacueraevetsimatacabi. ¹⁵ Nexata jane baja fariseovi yanijoba pitaxutotsēcēnaenēmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsēcēnaenēmi jumaitsi:

—Nitaxutoexaba raja tsorobojavayota. Bajaraxuacujinae naitaxutoquiatajē. Nexata aeconoxae taniji baja, jai pitaxutotsēcēnaenēmi fariseovijavabelia.

¹⁶ Nexata fariseovi najumaitsi:

—Ponē bajarapacuene exana, Dioso apo pitorobinēt-si cajena. Tsipaji apo yayatae penacueraevetsimatacabi, najai fariseovi.

Itsiata bajarapamonaeyajuvēnēvi itsamonae najumaitsi:

—Itsa pibisiacuene pexanaenē tsipae, apo caējēpae tsipaetsi bajarapitsipinijicuene pexanaenexa, najai itsamonae.

Nexata daxita fariseovi apo najamatabēcuenejēpae.

¹⁷ Nexata icatsia fariseovi yanijoba pitaxutotsēcēnaenēmijavabelia.

—¿Detsa jane xamē bejamatabēitsimē ponē caitaxutoxanepanaeyaexana yabara? jai fariseovi.

Nexata pitaxutotsēcēnaenēmi jumaitsi:

—Bajaraponē cajena Diosojumepaebinē profeta, jai.

¹⁸ Judíovi apo jumexaniatae pitaxutoxanepanaeyaexanaejavatsi yabara. Nexata bajarapamonae junata pitaxutotsēcēnaenēmi paxa, pena yajava. ¹⁹ Judíovi jane baja yanijoba pitaxutotsēcēnaenēmi paxabeje penabejevavabelia. Jumaitsi:

—¿Baja tsa maponē panexēnatobejeje, ponē penaexanaejavaveliacujinae pitaxutotsēcēnaenēmije? ¿Detsa pacuenia aeconoxae baja tane? jai judíovi.

²⁰ Nexata pitaxutotsēcēnaenēmi paxabeje penabeje jumaitsidebeje:

—Maponēje pataxēnatobeje payapētaniijibeje cajena. Payapētaniijibejena penaexanaejavaveliacujinae pitaxutotsēcēnaejava. ²¹ Itsiata baitsi jane aeconoxae apo payapētaenēbeje pacuenia baja itaxutoxanepana. Apo payapētaenēbejena ponē itaxutoxanepanaeyaexanatsi. Bajaraponē taxēnato payanijo-

bare. Penaveretsinē rabaja. Pijacuata pacatsipaebiana, jai pitaxutotsēcēnaenēmi paxabeje penabeje judíovijavabelia.

²² Judíovi baja cajena najamatabēcuenejēpa pevajēnaeitavetsinexa penajoneyaniva judíovi penacaetatabiabibojavaberena pajivi jumaitsi: "Jesús rabaja cajena Cristo, ponē Dioso athēbēvetsica itorobijitsiatsica jivi pecapanepaenexa," pejaijivi. Bajaraxuata pitaxutotsēcēnaenēmi paxabeje penabeje bajarapacuenia jumecanaviatabeje pecujunavixaebeje judíovi. ²³ Bajaraxuata bajarapajivibeje jumaitsidebeje: "Taxēnatojavabelia payanijobare. Penaveretsinē rabaja," jaibeje.

²⁴ Nexata judíovi icatsia junata pitaxutotsēcēnaenēmi. Jumaitsi bajaraponējavabelia:

—Panetsipaebare xaniavaetsia Dioso pitabarata. Paxanē baja cajena payapētaniiji bajaraponē pibisiacuene pexanaenēcuene, jai judíovi Jesús yabara.

²⁵ Nexata pitaxutotsēcēnaenēmi jumaitsi:

—Pibisiacuene meta pexanaenē. Xanē apo yapētaenē. Itsiata baitsi jane nitaxutoxanepanaeyaexana taitaxutotsēcēnaenēmi, jai pitaxutotsēcēnaenēmi.

²⁶ Nexata icatsia judíovi jumaitsi:

—¿Detsa pacuenia catoexana netaenexa? jai judíovi.

²⁷ Nexata pitaxutotsēcēnaenēmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejumecovēnēt-simē. ¿Detsa xuajitsia pajitsipame patacatsipaebaponaenexa icatsia? ¿Paxamē ata tsaja pajitsipame panejumecovēnēt-sinexa bajaraponē papijajivinexamē? jai pitaxutotsēcēnaenēmi judíovijavabelia.

²⁸ Nexata judíovi bijatanetsi pitaxutotsēcēnaenēmi. Jumaitsi:

—Xamē raeta baja cajena bajaraponē pijajivitonēmē. Paxanē raja saicaya Moiséspijinē petsipaebilivaisi panejumecovēnētavanapajē. ²⁹ Paxanē baja cajena payapētaniiji pepacuene Dioso pebarēcuaicuaijajivatsi Moiséspijinē. Itsiata baitsi jane ponē cabarēcuaicuaijai, apo payapētaenē itsaverena pata, jai judíovi.

³⁰ Nexata pitaxutotsēcēnaenēmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapētaemē itsaverena pata bajaraponē?

³¹ Yapētanetsi baja cajena mapacueneje. Diosojavabelia vajētsi ata pamonaē pibisiacuene pexanaevi, Dioso baja cajena apo namuxunaevetsi. Dioso baja cajena banamuxunaeveta itsa vajētatsi pejitsipaecuenia yayataeya petojinavanapaevitsi. ³² Caeto ata mapanacuapijivi apo vēnēlivaisitaetsi ponē caējēpatsi pitaxutoxanepanaeyaexanaenexa penaexanaejavaveliacujinae bitso pitaxutotsēcēnaenē. ³³ Peneta bajaraponē itsa apo patsi tsipae Diosojavavetsica, nexata apo caējēpaetsi tsipae pexanaenexa Dioso pesaēta pinijicuene pexanaejava, jai pitaxutotsēcēnaenēmi judíovijavabelia.

³⁴ Nexata judíovi jumaitsi:

—Xamē cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene

nexanaenë jamatabëpanemuxujiobame? jai judíovi pitaxutotsécënaenëmijavabelia.

Nexata torotajarabaxuabatsi judíovi penacaetuatabi-abibo pevecuapitsapaenexa.

Pacuenia Dioso apo pejumecovënëtsivi jamatabëcuenaitaquiri tsavanapae yabara pelivaisi

³⁵ Jesús vënëlivaisitane pitaxutoxanepanaeyaex-anaenë judíovi petorobajarabijavatsi judíovi penacaetuatabi-abibo pevecuapitsapaenexa. Nexata Jesús itsa caxitajaraba pitaxutoxanepanaeyaexanaenë, Jesús jumaiti pitaxutoxanepanaeya exanaenëjavabelia:

—¿Najamatabëcopatame tsabaja Dioso pexënatojavabelia? nayabarajai Jesús.

³⁶ Nexata ponë Jesús itaxutoxanepanaeyaexana, jumaiti:

—¿Detsa ponë Dioso pexënato tanajamatabëcopatsinexa bajaraponëjavabelia? jai.

³⁷ Jesús nexata pijacuata nayabarajumaiti:

—Ponë rabaja cabarëcuaijai, Dioso rabaja pexënato, nayabarajai Jesús.

³⁸ Nexata ponë Jesús itaxutoxanepanaeyaexana, pe-matabacabëta nuca Jesús pitabarata. Jumaiti Jesúsjavabelia:

—Tajatuxanenë, casivanajamatabëcopatatsi baja cajena, jai.

³⁹ Nexata Jesús jumaiti pitaxutoxanepanaeya exanaenëjavabelia:

—Xanë patajë mapanacuayabetsicaje jivi penayapëtaenexa pijaneconi pexainaejava. Nexata pamonaepexaniajailivaisi tatsipaebijavata najamatabëcueneyapëtaena piagamatabëcuenaitaquirijava, bajarapamonae jamatabëcuenitayotsianajë pexaniajailivaisita. Pamonaepemajai. Apo yapëtae ata pexaniajailivaisi, jamatabëjumaiti: “Vaxaitsi rabaja yapëtanetsi pexaniajailivaisi,” jamatabëjai, bajarapamonae apo jamatabëcuenitayotsinë tsane, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaitisijava. Nexata fariseovi jumaiti Jesúsjavabelia.

—¿Paxanë ata tsabaja pajamatabëcuenaitaquirinë tsavanapae? jai.

⁴¹ Jesús nexata jumaiti fariseovijavabelia:

—Jājā, bitso pajamatabëcuenaitaquirimë tsavanapae. Tsipaji jamatabëcuenenavëxaniabiaya pajamatabëjumaitisimë tsabiabi: “Vaxaitsi rabaja jumecovënëtsi Dioso,” pajamatabëjamë tsabiabi. Nexata Dioso pejumelivaisi payapëtae atamë, itsiata pibisacuene paexanabiabame. Nexata bitso pananeconitame Diosojavabelia. Paxamë Dioso pejumelivaisi apo paneyapëtaexae, itsa pajamatabëcuenaitaquirimë tsipae, nexata bitso apo pananeconitsimë tsipae Diosojavabelia, jai Jesús fariseovijavabelia.

Oveja pecajoneyabiabicorral yabara pelivaisi

10 Jesús jumaiti fariseovijavabelia:

—Xaniajanë pacuenia pacatsipaebijitsiatsi. Oveja pecajoneyabiabicorral ënëabelia saicayanë pejonenexa, apo jone corral baupajava. Junaya saya peyenenpanatsia pejonenexalia. Bajaraponë penacobetoxotsinënexa oveja. ² Ponë peneta joneya corral baupayalia, bajaraponë cajena oveja pevetsinë. ³ Nexata corral baupa pevetsinë tobaupatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapëtanetsi. Tsipaji junataponapijaoveja caenë canacujitsia pevënëta. ⁴ Pecapitsapaecujinae daxita pijaoveja, bajaraponë oveja pevajënaeya namataxainanajetaruca. Nexata pijaoveja pënaponatsi. Tsipaji jumeyapëtanetsi pijaoveja. ⁵ Oveja apo pënaponae tsipae saicayanë. Tsipaji apo jumeyapëtae. Vecuarëcëpecaejitsipa saya, nayabarajai Jesús fariseovijavabelia.

⁶ Bajarapacuenia Jesús oveja pevetsinëcuenia nataeya comparacióncuenia nalivaisipaeba fariseovijavabelia. Itsiata fariseovi apo jumeyapëtaetsi Jesús comparacióncuenia penalivaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaiti fariseovijavabelia:

—Xaniajanë pacuenia pacatsipaebijitsiatsi. Pacuenia oveja junua corral baupajava, pepanepaenexa corral ënëaberena, bajara xanë itsinë jivi pejonenexa xanëjava, pepanepaenexa Dioso pijatomarabetsia. ⁸ Itsamonae xanë tavajënaeya penajumetsënëtsilivaisi jivi tsi-paebapona. Bajarapamonae oveja bepenacobetoxotsivi. Jamatabëneyacajërëta tajajivi. Itsiata baitsi jane tajajivi apo jumecovënëtsi bajarapamonae. ⁹ Xanë rabaja cajena baupanë. Pajivi nesivanajamatabëcopatsiana, jonena xanëjava pepatsinexa Dioso pijatomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinë, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanë ata xaniavaetsia evetsianajë pajivi nesivanajamatabëcopatsiana, jai Jesús fariseovijavabelia.

¹⁰ Icatsia Jesús jumaiti fariseovijavabelia:

—Penacobetoxotsinë bapata oveja penacobetoxotsinexa, pebeyaxuababiabinexanua. Bajarapacuenia oveja peveretaponaenexa bapata. Bajara pijinia jamatabëcuenetsi pamonaepata penajumetsënëtsilivaisi jivi petsipaebaponaenexa. Itsiata baitsi jane xanë patajopaicajë mapanacuayabetsicaje xanë tjamatabëcueneta jivi pexainaenexa matababi apo pevereverecejave, bitso jamatabëcuenearëyaya pejinavanapaenexanua. ¹¹ Pacuenia itsi xaniavaetsia pevetsinë pijaoveja, bajara pijinia xanë itsinë taevetsinexa tajajivi. Xaniavaetsia pevetsinë pijaoveja jamatabëjumaiti: “Itsanë netobeyaxuabijitsia ata tsane tajaoveja, apo copatsinë tsane tanetoyajuvënëbeyaxuabiyana tajaoveja. Nexata xanë tajaoveja yapijivinacaevevtsianajë tanebeyaxuabinexa,” jamatabëjai. Bajara pijinia xanë ata jamatabëtsinë taja-

jivi yabara. ¹² Itsiata ponë saya toevetsipa itsanë pijaoveja, bajaraponë apo xainae tsipae bajarapaovejabitsaëto. Saya toevetaponaponaejitsipa pematamotsinexatsi. Nexata nevëthë oveja itsa tsimaxënjaretarucaejitsipa, bajaraponë xuabatabajiravijitsipa ovejabitsaëtomi. Nexata oveja nevëthë itsa yajuvënëvaetabijitsipatsi, nacayajatecaejitsipa ovejabitsaëtomi. ¹³ Oveja pevetsinë najetabajiravijitsipa. Tsipaji saya pematamotsinexatsi nacuenebaponaponaejitsipa. Nexata apo jamatabëbëjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinë pijaoveja, bajara pijinia itsinë xanë ata taevetsinexa tajajivi, pamonaetaniiji beovejacuenia. Pacuenia taxa neyapëtane, bajara pijinia pacuenia xanë ata yapëtaniiji taxa. Pacuenia pijinia xaniavaetsia yapëtaniiji tajajivi, bajara pijinia pacuenia tajajivi ata neyapëtane. Xanë sivatëpaenajë tajajivi. ¹⁶ Xainajë baja itsabitsaëto tajajivi. Itsiata abaxë bajarapamonae apo yajavajinavanapae mapabitsaëtovavataje. Itsiata itsamatacabi capatsianajë bajarapamonae mapabitsaëtovavaberena. Nexata daxita bajarapamonae nejumecovënëtsiana taitorobicuenia. Caebitsaëtowaneto jane baja tajajivi netonaexanaena. Bajarapamonae xanë caenënevetsianajë, jai Jesús.

¹⁷ Icatsia Jesús jumaitsi:

—Taxa niasiva. Tcipaji tajajivi yabara nacaevetsianajë tanebeyaxuabinexa. Itsiata icatsia tatëpaecujinae asaënë tsane. ¹⁸ Itsa apo nacaevetsinë tsipae tanebeyaxuabinexa, itsajivi ata apo caëjëpaetsi tsipae tanebeyaxuabinexa. Itsiata tajacuata nacaevetsianajë tanebeyaxuabinexa. Necaëjëpa tatëpaenexa. Necaëjëpanua icatsia tasaënexa tatëpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumajitsijava, judíovi apo najamatabëcuenejëpae.

²⁰ Judíovi ayaibitsaëto najumaitsi Jesús yabara:

—Dovathi raja bajaraponë yjavaponaponatsi. Matajemabatsi ra saya. ¿Detsa xuajitsia bajaraponë panamuxunaevetame? najai bajarapamonae.

²¹ Itsiata bajarapamonae yajuvënëvi itsamonae najumaitsi:

—Ponë dovathi yjavaponaponatsi, apo caëjëpaetsi tsipae cajena pecuaicuaijainexa mapacueniaje. Apo caëjëpaetsinua tsipae pitaxutoxanepanaeayaxanaenexa bitso pitaxutotsëcënaenëmi, najai bajarapamonae yajuvënëvi Jesús yabara.

Pacuenia Jesús judíovi navecuaitavetatsi yabara pelivaisi

²² Emarapaeta Jerusalén tomarata fiesta exana. Bajarapafiesta exana judíovi penajamatabënapitsinexa bajayata judíovi pijasalinaivi templobo pexanebetsijava. ²³ Nexata pamatacabi fiesta exana, Jesús ponapona bajarapatemplobojavata, Portal de Salomónvënëjavata. ²⁴ Nexata Jesús judíovi matatoyorotsia nacaetuatatsi. Judíovi jumaitsi Jesúsjavabelia:

—Apo payapëtaenë pacuenia panajamatabëxainaejitsianë xamë yabara. ¿Detsa pacujinae paneyapëtaeayaxanaenexa patacayapëtaenexa pepacueneponëmë? Itsa pepacuenia Cristomë, Dioso athëbëvetsica pecaitorobinëtsica jivi necapanepaenexa, panetsipaebare cajena roviaia, jai judíovi.

²⁵ Jesús nexata jumaitsi judíovijavabelia:

—Pacatsipaebatsi rabaja picani roviaia. Itsiata apo panejumecovënëtsimë. Taxa Dioso pesaëta pinijicuene exanajë. Bajara papinijicuene exanajë taxa taneitorobicuenia. Nexata itsa exanajë bajarapapinijicuene, pacatsitaexanatsi picani taxa taneitorobicuenia. ²⁶ Itsiata baitsi jane apo panejumecovënëtsimë Cristonëcuenenë. Tcipaji paxamë apo patajajivimë. ²⁷ Tajajivi, pamonaetaniiji beovejacuenia, bajarapamonae nejumeyapëtane. Bajarapamonae pijinia yapëtaniiji. Nexata nepënapona. ²⁸ Bajarapamonae rajutsianajë matacabi apo pevereverecejava. Bajarapamonae taxa Diosovecu apo naxuabi tsane. Itsajivi ata apo neyacajërëtsi tsane tajajivi. ²⁹ Taxa baja cajena ayaijamatabëcueneenë daxitajivi matatoxenetsia. Bajaraponë nerajuta bajarapamonae. Nexata itsajivi ata apo caëjëpaetsi tsane taxa pecobevecu pepitsinexa bajarapamonae. ³⁰ Taxa, xanë, caenë rabaja panaexanajëbeje, jai Jesús judíovijavabelia.

³¹ Nexata picani bajarajota judíovi jamatabëbeyaxuabatsi Jesús. Judíovi nota ibotonë Jesús picani petseconanexatsi ibotonëta. ³² Jesús nexata jumaitsi judíovijavabelia:

—Ayaijava pexaniacuene taxa Dioso pesaëta exanaponajë paxamë paneitabarata. ¿Detsa nexata pitsineconi yabara panetseconaejitsiamë ibotonëta? jai Jesús judíovijavabelia.

³³ Judíovi nexata jumaitsi:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja naneconitsixae Diosojavabelia. Tcipaji pibisiacuena, Dioso apo pejitsipaecuena, cuaicuaijamë. Xamë saya jivitonë atamë, beDiosonëmë nataneme, jai judíovi Jesúsjavabelia.

³⁴ Jesús nexata jumaitsi judíovijavabelia:

—Dioso pejumajitsijava, Dioso pejumelivaisibaxutota jumaitsi mapacueniaje: “Paxamë ata rabaja padiosovimë,” jai Dioso pejumelivaisibaxutota Dioso pejumecovënëtsivi yabara. ³⁵ Nexata Dioso pejumelivaisibaxutota bajarapacuenia itsa jumaitsi Dioso pejumecovënëtsivi yabara, acuenebi bajarapamonae yabara vajakumaitsinexa: “Bajarapamonae apo diosovi,” vajakujainexa. ³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panejumajitsimë: “Xamë raja naneconitame Diosojavabelia. Pibisiacuena cuaicuaijamë Dioso apo pejitsipaecuena. Tcipaji jumaitsimë: ‘Xanë raja Dioso pexënatonë,’ jamë,” panejamë. ³⁷ Itsa apo exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. ³⁸ Itsiata baitsi jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtamë

Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuene Dioso pesaëta taexanaponaejava, nexata payapëtaename taxa Dioso taneyajavaponaponaejava. Payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

³⁹ Bajarapacuenia Jesús jumaitsi ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navialia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona. ⁴¹ Jivi ayaibitsaëtoxfaneto ponalia petaenexatsi Jesús. Nexata bajarapamonae jumaitsi:

—Juanpijinë Dioso pesaëta pinijicuene apo exanaponae ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

⁴² Nexata jane baja bajarajota jivi ayaibitsaëtoxfaneto jumecovënëta Jesús Dioso athëbëvetsica pitorobinëcuenetsi.

Pacuenia baja Lázaro tēpa yabara pelivaisi

11 Lázaro, Betania tomarapijinë, avitane tsanucacae Betania tomarata. Bajarapatomarata ponaponabeje pematapijivabeje, Maríabeje Martabeje. ² Bajarpova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematantata taxuiquicaenanua. ³ Nexata pamatacabi Lázaro avitane tsanucacae, Maríabeje Martabeje tonajumeitorobaliabeje Jesús. Jumaitsiabeje: —Tajatuxanenë, niasivanë raja Lázaro catoavitane, jaiabeje.

⁴ Jesús itsa jumetane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabëcueneta jivi yapëtaena Dioso pinijicuene pexanaenexa pecaëjēpaenëcuenetsi. Yapëtaenanua xanë ata, Dioso pexënatonë, pinijicuene taexanaenexa tanecaëjēpaenëcuene, jai Jesús pijajivijavabelia.

⁵ Jesús bitso asivaya taeyabiaba Martabana, Maríabana, Lázarobana. ⁶ Jesús vënëlivaisitae ata Lázaro bitso piavitanejava, itsiata abaxë apo ponae Betania tomarabelia. Anijamatacabibeje abaxë ponapona Jordánmene itsapanatalia. ⁷ Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuyabelia, jai Jesús.

⁸ Jesús nexata pijajivi jumaitsi:

—Patajatuxanenë, canivita saya judíovi bajarajotalia jamatabëcatsecona picani ibotonëta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapecae. Tsiapaji icotiata napebeta xaniavaetsia. ¹⁰ Itsiata pajivi meraví ponapona, firapecae. Tsiapaji meraví apo napebetsi xani-

avaetsia. Bajara pijinia xanë ata itsinë. Ponae ata tsanetsi Betania tomarabelia, itsiata apo nitsacueniabi tsane. Tsiapaji abaxë tajamatacabi apo netocopiapatsi, jai Jesús pijajivijavabelia petëpaejavanexa yabara.

¹¹ Bajaraxuacujinae Jesús peponaevajënae jumaitsi pijajivijavabelia:

—Vajayapëtaenë rabaja Lázaro majitanuca. Nexata baja ponajë. Itavabijitsianë Lázaro, jai Jesús.

¹² Nexata pijajivi jumaitsi:

—Patajatuxanenë, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapëtaenë rabaja Lázaro majitanuca,” itsa jai Jesús, Jesús picani pejumaitsi jume, “Lázaro rabaja tēpa,” pejaijume. Itsiata Jesús pijajivi apo jumeyapëtaetsi. Bajarapamonae Jesús pijajivi jamatabëcuenenavëxaniabiaya jamatabëjumaitsi: “Lázaro meta saya majitanuca pacuenia majitanucabiaba meraví,” jamatabëjai. ¹⁴ Bajaraxuata nexata Jesús roviaalia jumaitsi pijajivijavabelia:

—Lázaro rabaja tēpa. ¹⁵ Paepatota Lázaro tēpa, bajarajotalia apo ponaponaenë. Bajaraxuata barëyanë paxamë yabara. Barëyanë tsiapaji Lázaro petëpaexae, xaniavaetsia panejumecovënëtsianame. Baja nexata ponatsi, jai Jesús pijajivijavabelia.

¹⁶ Jesús pijajiviyajuvënënë, Tomás, ponë icatsia itsavënë vënërubatsi Sapalanë. Bajaraponë jumaitsi penajuaponaevijavabelia:

—Naponatsi Jesús pepëta. Ibotonëta itsa tseconatsi, vajayajavatëpaenexa bajaraponë, jai Tomás.

Pacuenia Jesús caëjēpatsi petëpaevi ata icatsia pi-asaëyaexanaenexa yabara pelivaisi

¹⁷ Pepuaxainae baja cuatro pamatacabibeje Lázaropi-jinë pemëthëtsicujinaetsi, Jesús matapania patajopa Betania tomarata. ¹⁸ Betaniatomara eca imoxoyo Jerusalén tomaravecua. Bejamatabëcuene anijakilómetrobeje epatua navecuacabeje bajarapatomarabeje. ¹⁹ Jesús pepatsivajënaeya Betania tomarata, ayaibitsaëtoxfaneto judíovi pata Martabeje Maríabejejavaberena Lázaro petëpaexae. Bajarapamonae jumaitsi bajarapovabejejavabelia:

—Paxanë itsiata pacayanabatsi. Panajamatabëxainajë paxanë ata papecavecuatëpaexaebeje panejuyapijinëbeje, Lázaro, jai bajarapamonae.

²⁰ Itsa Marta vënëlivaisitane Jesús penajetarucacaejava, pitsapa pijabovetua pemataenenaenexa Jesús. María itsiata bota nacopateca. ²¹ Nexata Marta itsa mataenetsi Jesús, Marta jumaitsi Jesúsjavabelia:

—Tajatuxanenë, itsa majota ponaponaejitsipameje, apo tēpae tsipae tajuyapijinë. ²² Itsiata yapëtaniji aecoxae ata Dioso carajutsiana daxita pacuene vajëtame Diosojavabelia, jai Marta.

²³ Nexata Jesús jumaitsi Martajavabelia:

—Nejuyapijinë raja itsiata icatsia asaë tsaponaponaetsane, jai Jesús.

²⁴ Nexata Marta apo jumeyapëtae Jesús piasaëyaexanaejavanexa Lázaro. Bajaraxuata Marta jumaitsi Jesúsjavabelia mapacueniaje:

—Yapëtaniji rabaja pacuenia icatsia Lázaro Dioso asaëyaexanaejitsiatsi pamatacabita icatsia asaëyaexanaenatsi daxita petëpaevimi, jai Marta.

²⁵ Nexata Jesús jumaitsi Martajavabelia:

—Xanë rabaja petëpaevi ata icatsia tasaëyaexanaenë, tarajutsinë matababi apo pevereverecejava. Pajivi nejumecovënëtsiana Cristonëcuenenë, bajarapajivi tēpae ata, itsiata icatsia asaë tsane. ²⁶ Pajivi abaxë pamatacabita asaë tsaponaponae mapanacuataje, itsa nejumecovënëtsiana Cristonëcuenenë, bajarapajivi tēpae ata, xainaena matababi apo pevereverecejava. ¿Xamë tsabaja bajarapalivaisi jumecovënëtame? jai Jesús Martajavabelia.

²⁷ Marta nexata jumaitsi:

—Tajatuxanenë, jumecovënëtajë rabaja. Xamë rabaja cajena Cristomë, Dioso pexënatomë, ponë pacopi-avevetavanapajë athëbëvetsica pepatsijavanexatsica mapanacuayabetsicaje jivi pecapanepaenexa, jai Marta.

Pacuenia Jesús vënu Lázaro pemëthëjavata yabara pelivaisi

²⁸ Itsa baja Marta najumelivaisivereta bajarapalivaisi, naviata pijaboyabelia pejunatsinexa pejuyapijiva María. Nexata Marta muetsia jumaitsi Maríajavabelia: —Vajanacacujarubinë rabaja pata. Cajunalia raja bajaraponë, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. ³⁰ Jesús abaxë apo patsi Betania tomaraberena. Ecojopa abaxë itsajotalia Marta mataenenatsi. ³¹ Pajudíovi bajarapovebeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepíjia pepitsatabijavalia bovecua. Nexata bajarapamonae María pënaponatsi. Tsipaji bajarapamonae jamatabëjumaitsi:

—María raeta pejuyapijinëmi pemëthëjavabelia pona pematanyeyabinexa, jamatabëjai:

³² Itsa María palia, itsajotalia Jesús ecojopa, nexata María pematatabacabëta nucajunua Jesús pitabarata. Jumaitsi:

—Tajatuxanenë, itsa majota ponaponaejitsipameje, apo tēpae tsipae tajuyapijinë Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyajavapatsivi penuejava itsa tane, Jesús nexata bitso najamatabëxainaxuaba. ³⁴ Nexata Jesús jumaitsi bajarapamonaejavabelia:

—¿Detsa jota pamëthëtame Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota pamëthëtajë Lázaro, jai.

³⁵ Jesús nexata vënu Lázaro. ³⁶ Nexata judíovi najumaitsi:

—Pataema Jesús penuejava. Jesús picani bitso asiva petëpaenëmi, najai judíovi.

³⁷ Itsamonae judíovi najumaitsi Jesús yabara:

—Mara ponëje itaxutoxaniavaeta bitso pitaxutotsëcënaenëmi ataje xaniavaetsia petaenexa. ¿Apo cajëpae tsi tsa tsipae Lázaropíjinë pejamatejemayaexanaenexa petëpaeyaniva? najai bajarapamonae.

Pacuenia Lázaro petëpaecujinae Jesús icatsia asaëyaexana yabara pelivaisi

³⁸ Jesús bitso sivanajamatabëxaina Lázaropíjinë. Nexata Jesús cujilia Lázaropíjinë pemëthësiibovajutsijavabelia. Ibopanaxanetota Lázaro yamëthëvëpa acatabuatatsi. ³⁹ Jesús nexata jumaitsi bajarajota penapatsivijavabelia:

—Pavecuatixiremelia mapaibopanaxanetoje, jai Jesús.

Nexata Marta, petëpaenë pematapijiva, jumaitsi:

—Tajatuxanenë, tuxutsaeba raeta baja bitso Lázaro. Tsipaji rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayaicuepe pexanaejava itsa jumecovënëtame Dioso, jai Jesús.

⁴¹ Nexata bajarapamonae Lázaropíjinë pemëthëvëpavecua tixilia ibopanaxaneto. Jesús itaboxo naëcotsi-aya jumaitsi:

—Taxa, pexaniajamatabëcuene carajutatsi tanejumetaexaemë. ⁴² Yapëtaniji cajena tanenamuxunaevetabiabijavamë. Itsiata icatsia cavajëtatsi mapamonaeje ayaibitsaëttoxaneto pejumecovënëtsinexa taneitorobinëcuenemëtsica, jai Jesús Diosojavabelia.

⁴³ Bajarapacuenia Jesús pejumaitsicujinae, ayajumeta jumaitsi Lázaro pebuatsiibovajutsijavabelia: —¡Lázaro, bajara jane mëthëvecua pitsaparemena! jai Jesús.

⁴⁴ Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquion-aea pematacacëbicujinaetsireca abaxë, pitsaparena. Pitabaraacatsipapaëbërëpanatsi abaxë tsiteca itabaraacatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaë jamatabëvaetabatsi yabara pelivaisi

⁴⁵ Judíovi, pamonae María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaejavuvënëvi ayaibitsaëto jumecovënëta Jesús Dioso pexënatocuene. ⁴⁶ Itsiata itsamonae bajarapamonaejavuvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana. ⁴⁷ Nexata fariseovi, sacerdotevi penamatacaitorobivi yajava, nacaetuata. Nexata bajarapamonae junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonae najumaitsi:

—¿Detsa meta vaxaitsi itsanetsi? Bajaraponë Dioso pesaëta pinijicuene pexanaejava exanapona. ⁴⁸Itsa vaxaitsi cuenecopatsipatsi bajarapacuenë pexanaponaejava, daxitajivi jumecovënëta ponaejitsipa bajaraponë. Apo jumecovënëtsi tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaë. Nexata vajabitsaë itsa patsiparena, vajatemplobo nacatouxabijitsipaica. Nacaverebiabijitsipana, najai bajarapamonae.

⁴⁹Bajarapamonaeyajuvënëne pevënë Caifás. Bajarapamatacabi bajaraponë Caifás, sacerdotevi pepo penamatacaitorobinë tsaponapona. Nexata Caifás jumaitisi penajuanacaetuatsivijavabelia:

—Paxamë raja apo payapëtaemë. ⁵⁰Nexata Romanonacua pevetsivi vajabitsaë itsa itorobarena, vajanacaverebiabianiva, bepanajamatabëxainame mapacueniaje. Bajaraponë caenë itsa beyaxuabiaexanaetsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

⁵¹Itsiata baitsi jane Caifás apo jumaitisi bajarapacuenia pijacuata penajamatabëxainacuena. Biji rajane bajarapamatacabi Caifás daxita sacerdotevi pepo penamatacaitorobinëxae, Dioso bajarapacuenia jumaitisi ayaexanatsi. Bajarapacuenia Caifás tajëvelia jumaitisi tsipaji Jesús sivatëpaejitsia daxita judíovi. ⁵²Itsiata Jesús apo sivatëpae tsane ëjudíovi. Daxitanacuanëjava, pamonaë nacayajataruta Dioso pexi, bajarapamonae ata pecaetuatsinexa, sivatëpaena Jesús. ⁵³Bajarapacuenia bajara pamatacabijavaveliacujinae cajena judíovi pevetsivi najamatabëveretapona pacuenia bajarapamonae Jesús beyaxuabijitsiatsi.

⁵⁴Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonaacua imoxoyojavabelia, Efraïnvënë tomarajavabelia. Nexata bajarapatomarata Jesús ponapona pijajivi yajava.

⁵⁵Imoxoyo baja pevajënae judíovi pijafiesta pejonematacabinexa, pascuavënëfiesta. Nexata jivi ayaibitsaëtoxoneto pona Jerusalén tomarabelia. Pona pexanaenexa pacuenia exanabiaba fiestavajënaeya penajamatabëcuene xaniavaetsinexa Diosojavabelia. Bajarapamonae naropoba tsiquiritomaraxijavaverena.

⁵⁶Nexata bajarapamonae jaitarutatsi Jesús. Itsa bajarapamonae nacaetuata templobota, nayanijoba. Najumaitisi:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonae.

⁵⁷Nexata fariseovibeje sacerdotevi penamatacaitorobivibeje najumecopata jivijavabelia petonaitaxuto-caevetsinexatsi Jesús. Nexata pajivi yapëtane itsajota Jesús ponapona, petsipaebinexa bajarapamonaejavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

Pacuenia Jesús petiriva tsitaxuepanatsi petuxujuvia-ceitera yabara pelivaisi

12 Pejonenexa baja pascuavënëfiesta, saica seis pamatacabibeje. Nexata bajarapamatacabi Jesús baja pona Betania tomarabelia. Bajarapatomarata ponapona Lázaro, ponë Jesús asaëyaexana petëpaenëmi. ²Bajarajota Jesús pexaejava toexanatsi caniviyopijijava. Bajarajota Marta pexaejava tsanapona. Lázaro nanabaneca pamesata Jesús nabaneca. ³Nexata María carena epatuabotellabëyota petuxujuviaceitera, nardovënëra. Bajarapora bitso penamatamotsira. Nexata bajarapaaceitera María tsitaxuepana Jesús. Bajaraxuacujinae icatsia pematana taxuiquica. Daxita bo tuatuajë tuxudereecaruta. ⁴Nexata Jesús pijajiviya-juvënëne, Judas Iscariote, Simón pexënato, ponë itsamatacabi Jesús canajetsijitsiatsi pijavajabitsaë pecobeyabelia, jumaitisi:

⁵—¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

⁶Itsiata bajarapacuenia Judas apo jumaitisi pesivana-jamatabëxainaexae bepejiobivi. Judas raja penacobetoxotsinë. Jesús bana pijapalatadoro pevetsiaexanaenëxaetsi, Judas nacobetoxotabiaba bajarapapalatayajuvënëjava. ⁷Nexata Jesús jumaitisi Judasjavabelia petiriva yabara:

—Copare bajarapova xanëjavaberena pexanaenexa bajarapacuenia. Itsamonae petëpaejivi batsiper-abëëpana petuxujuviaceitera peperabëxani-avaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiper-abëëpanaenexa, apo tēpae atanë, taneperabëxani-avaetsinexa itsamonae tanemëthëtsivajënae. Tsipaji baja imoxoyo tavajënae tanemëthëtsinexa. ⁸Daxitamatacabi raja bepejiobivi jinavanapa itsaxuayo pajinavanapame paneyavenonaenexa. Itsiata baitsi jane xanë daxitamatacabi apo ponaponaenë tsane paxamëjavata, jai Jesús Judasjavabelia.

Pacuenia judíovi najamatabëxaina pebeyaxuabinexatsi Lázaro yabara pelivaisi

⁹Ayaibitsaëtoxoneto judíovi vënëlivaisitanetsi Jesús pepatsijava Betania tomarata. Judíovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ëJesús. Ponalia petaenexanua Lázaro, ponë Jesús asaëyaexana, petëpaenëmi. ¹⁰Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. ¹¹Bajarapamonae najamatabëjëpa pebeyaxuabinexatsi Lázaro. Tsipaji judíovi ayaibitsaëto natsanapona sacerdotevivecua petaexae Lázaro piasaëtsaponaponaejava petëpacujinae. Nexata bajarapajudíovi jumecovënëta pona Jesús Dioso pexëntocuene.

Pacuenia Jesús pata Jerusalén tomarata yabara pelivaisi

¹² Jivi ayaibitsaëto xaneto pata Jerusalén tomarata pascuafiesta petaenexa. Nexata bajarapamonae Jesús vënëlvaisitanetsi pepatsijavanexa Jerusalén tomarata. Jesús naropota Betania tomaraverena. ¹³ Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuataponae.

—¡Dioso yavenonaenatsi! ¡Maponë najetarucaje, vatatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubena bajarapamonae Jesús yabara.

¹⁴ Nexata Jesús caxitajarabaxuaba burro. Bajarpaburro Jesús jumaponatsi pepatsinexa Jerusalén tomarata. Jesús burrojumata pepatanajetarucaevanexa Jerusalén tomarata, Dioso pejumelivaisibaxutota tajëvelia jumaiti mapacueniaje:

¹⁵ Pajerusalén tomarapijivimë, pëtsa pajunavame. Pataename pepo papecaevetsinënexa penajetarucajava. Pejanaburroyota yapatanajetarucaena, jai tajëvelia Dioso pejumelivaisibaxuto Jesús burrojumata pepatanajetarucaevanexa Jerusalén tomarata.

¹⁶ Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaiti Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëtane pecopiapatsijava baja pacuenia Dioso pejumelivaisibaxutota tajëvelia jumaiti Jesús yabara.

¹⁷⁻¹⁸ Pamona tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaevavata petëpaenëmi. Bajaraxuata jivi ayaibitsaëto pitsapa tomaravelia pecopiapitsinexatsi Jesús. ¹⁹ Nexata fariseovi itsa tane bajarapacueni, najumaiti:

—Pataema. Daxitajivi pënaponatsi Jesús. Vaxaitsi baja nexata acuenebi vaxaxanaevajava Jesús jivi pepënaponaevavatsi yabara, najai fariseovi.

Pacuenia Grecia nacuapijivi Jesús jamatabëtanetsi yabara pelivaisi

²⁰ Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabit. Bajarapamonaejavuvënëvi itsamonae Grecia nacuapijivi. ²¹ Nexata Grecia nacuapijivi cujibaliatsi Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaiti Felipejavabelia:

—Felipe, pajamatabëtaniji raja Jesús, jai.

²² Felipe nexata pona Andrésjavabelia petsipaebinexa pacuenia Grecia nacuapijivi jumaiti. Nexata Felipebeje Andrésbeje ponabeje petsipaebinxabeje Jesúsjavabelia. ²³ Nexata Jesús jumaiti bajaraponëbejevavabelia:

—Xanë, Daxitajivi Pematapijinënë, tajamatacabi baja netocopiapata tanaviatsinexa baja athëbëabetsia ayaijamatabëcuenenënë Dioso taneexanaenexa. ²⁴ Xaniajanë pacuenia pacatsipaebijitsiatsi. Trigoxuto itsa apo ubitsi irabelia, saya tsitecanuca caexutoyo. Itsiata itsa ubatsi, pejuvicujinae xutsabana vaxubixutoyomi penacopatsinexa pejanaboto. Nexata itsa nacuaita bajarapaboto, ayaijava pexu capitsapa. ²⁵ Bajara pijinia itsi jivi ata. Pajivi jamatabëjumaiti ata tsane petëpaeyaniva: “Xanë nayajivitaeyaponaponaenajë tanebejibiaexanaeyaniva, tanebexuabianiva ata,” jamatabëjai ata tsane, itsiata tëpaena. Nexata Diosovecua naxuabiana. Biji rajane pajivi nesivanajamatabëcopatsiaya jamatabëjumaiti tsane: “Jema nebejibiaexanaena. Jema nebexuabiananua Jesús pijajivitonëxenë,” jamatabëjai tsane, bajarapajivi xainaena matacabi apo peverevereaejava. ²⁶ Pajivi jamatabënetonacueni, bajarapajivi nepënaponaena. Nexata pajivi netonacueniana, neyjavaponaponaena itsajota ponaponaenajë. Pajivi netonacueniana, bajarapajivi yabara taxa Dioso jumaiti tsane: “Bajarapajivi sivajamatabëcuenenarëyanë,” jai tsane, jai Jesús Felipebeje Andrésbejevavabelia.

Pacuenia Jesús tajëvelia navajunupaeba pacuenia beyaxuabijitsiatsi yabara pelivaisi

²⁷ Jesús bëpënëa jamatabëjumaiti:

—Aeconoxae bitso najamatabëxainajë. ¿Detsa meta jumaitinë tsane taxajavabelia? Jumaitinë meta tsane: “Taxa, betajibicuenia tanebexuabijavaminexa, vecuanecapanepaename,” janë meta tsane taxajavabelia. Jume raja. Bajarapacuenia meta apo vajëtsinë tsane. Tsipaji betajibicuenia tanebexuabinexa, patajë mapanacuayabetsicaje, jamatabëjai Jesús.

²⁸ Nexata Jesús Diosojavabelia jumaiti:

—Taxa, pacuenia jitsipame nexanaenexa jivi pecayiyataenexa, exanare, jai Jesús.

Nexata bajarajota Jesús jumetane athëbëvetsica ayajume. Jumaititsica mapacueniaje:

—Jivi rabaja cajena neyiyatane. Itsiata matavëjëa neyiyataena, jaititsica.

²⁹ Jivibitsaëto bajarajota penubenaevi jumetane bajarapajume. Nexata bajarapamonae jumaiti:

—Yamaxë raeta najumeta, jai.

Itsamonae pijinia jumaiti:

—Angel raeta barëcuaicuaijaiti Jesús, jai.

³⁰ Nexata Jesús jumaiti bajarapamonaejavabelia:

—Xanë raja tajumetaenexa bajarapajume apo jumaititsica. Paxamë raja panejumetaenexa jumaititsica. ³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponë mapanacuata jivi itorobabiaba pibisiacueni pexanaenexa.

³² Itsa neyotarutsiana cruzajavabelia tanebeyaxu-abinexa, nexata daxitajivi jitsipaeyaexanaenajë xanë tanesivanajamatabëcuene copatsinexa, jai Jesús.

³³ Bajarapacuenia Jesús tajëvelia jumaitsi jivijavabelia jivi peyapëtaenexa pacuenia Jesús tēpaejitsia. ³⁴ Nexata bajarapamonae jumaitsi Jesúsjavabelia:

—Dioso Moiséspijinëta penajumecopatsilivaisi tajëvelia jumaitsi mapacueniaje: “Cristo, ponë athëbëvetsica Dioso itorobijitsiatsica jivi peca-panepaenexa, asaë taponaponae tsane daxitamatabijavabelianexa pevetsinexa mapanacuaje,” jai. Itsiata xamë Cristo atamë, jumaitsimë: “Xanë, Daxitajivi Pematapijinë, neyotarutsiana cruzajavabelia tanebeyaxuabinexa,” jamë. ¿Detsa nexata ponë Cristo daxita matabijavabelianexa asaë taponaponae tsane? jai bajarapamonae Jesúsjavabelia.

³⁵ Nexata Jesús jumaitsi bajarapamonaejavabelia:

—Imoxoyo rabaja pevajënae taponaeatacabinexa. Abaxë raja itsiata taponaponaeatacabinexa, pacatsipaebianatsi pexaniajailivaisi patacabamaatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame paneajamatabëcueneitaquirivaniva. Pajivi ajamatabëcueneitaquiri, apo xainae tsane matabi apo peverevereaejava. ³⁶ Xanë rabaja pexaniajailivaisita pacajamatabëcueneitayotsianatsi. Taponaponaeatacabinexa abaxë mapanacuataje, panesivanajamatabëcopatsianame. Bajarapacuenia nexata jamatabëcueneitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

Pacuenia judíovi jamatabëjumaitsi Jesús yabara:

“Maponëje apo Cristo, ponë copiaevetavanapatsi vanacacapanepaenexa,” jamatabëjai yabara pelivaisi

³⁷ Jesús ayai cuene pexanaejava Dioso pesaëta judíovi pitabarata exanapona. Judíovi tae ata bajarapacueni, itsiata apo jumecovënëtsi Cristocuene. ³⁸ Nexata judíovi itsa apo jumecovënëtsi Cristocuene, copiapata jane baja pacuenia bajayata tajëvelia yaquina Dioso-jumepaebinëmi, profeta Isaíaspijinë. Judíovi Cristocuene apo pejumecovënëtsijavanexa yabara, bajayata Isaíaspijinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane, tae ata nesaëta pinijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaitsi mapacueniaje:

⁴⁰ Bajarapamonae Dioso itaxutotsëcënaeyaexanaena. Ajamatabëcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaëta

pexanaejava, itsiata bajarapamonae apo yapëtae tsane pajamatabëcuenelivaisi xaina petaejava. Nexata bajarapamonae Diosojavabelia apo najamatabëcuenepeñeyorotsi tsane perujumatabëcuenevecua. Nexata apo jamatabëcuenexaniavaetsinë tsane, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

⁴¹ Bajarapacuenia Isaíaspijinë yaquina tsipaji bajayata Isaíaspijinë bemajitsinaebota tane Jesús ayaijamatabëcuene pexainae cuene. Bajaraxuata bajayata Isaíaspijinë bajarapacuenia Jesús vajunupaeba baja cajena.

⁴² Itsiata judíoviyajuvënëvi ayabitsaëto jumecovënëta Cristocuene. Judíovi pevetsivi ata jumecovënëta Cristocuene. Bajarapamonae judíovi pevetsivixae, apo navajunupaebi pejumecovënëtsijava Cristocuene. Tsipaji cujunava fariseovi. Bajarapamonae bēpënëa jamatabëjumaitsi:

—Apo navajunupaebinë tsane tajumecovënëtsijava Cristocuene tanecapitsapaeyaniva fariseovi judíovi penacaetuatabibovecua, jamatabëjai bēpënëa bajarapamonae.

⁴³ Tsipaji bajarapamonae jitsipa penajuae vetsivi pe-sivabarëyajavatsi Dioso pesivabarëyajavatsi matatox-enetsia.

Pacuenia jivi naneconitsijitsia Diosojavabelia itsa apo jumecovënëtsi Jesús petsipaebilivaisi yabara pelivaisi

⁴⁴ Jesús jumaitsi ayaijumeta jivijavabelia:

—Pajivi jumecovënëtsiana Cristocuenenë, bajarapajivi ëxanë yabara apo jumecovënëtsi tsane. Taxa, ponë nitorobica, bajaraponë yabara ata jumecovënëtsiana.

⁴⁵ Pajivi necueneyapëtaena, bajarapajivi taneitorobinëtsica ata cueneyapëtaena. ⁴⁶ Xanë rabaja pexaniajailivaisita jamatabëcueneitayotsianajë mapanacuapijivije. Nexata pajivi jumecovënëtsiana Cristocuenenë, apo ajamatabëcueneitaquiri tsane.

⁴⁷ Pajivi jumeyapëtae ata tsane tatsipaebilivaisi, itsiata itsa apo jumecovënëtsi tsane bajarapalivaisi, bajarapajivi naneconitsiana Diosojavabelia. Itsiata xanë bajarapajivi apo naneconitsiaexanaenë tsane. Tsipaji xanë apo patsinëtsica tananeconitsiaexanaenexa mapanacuapijivije. Biji rajane xanë patsicajë tapanepaenexa mapanacuapijivije. ⁴⁸ Pajivi nenayajiv-itavetsiana, apo nejumecovënëtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita pijaneconi pexinaevi tatsipaebilivaisi apo pejumecovënëtsixae. ⁴⁹ Tsipaji xanë tajamatabëcueneta apo pabinë bajarapalivaisi. Taxa raja, ponë nitorobica, nitoroba bajarapalivaisi jivi tatsipaebinexa. ⁵⁰ Yapëtaniji baja cajena jivi pexinae javanexa matabi apo peverevereaejava itsa jumecovënëta taxa pitorobilivaisi. Nexata bajarapalivaisi itsa tsipaebaponajë jivijavabelia, tsipaebaponajë pacuenia taxa Dioso nitoroba tatsipaebinexa, jai Jesús jivijavabelia.

Pacuenia Jesús beveliamatabëcuenenë nataeya taxuquiatapona pijajivi, caenë canacujitsia, yabara pelivaisi

13 Caematacabi baja saica pejonenexa pascuavënëfiesta. Jesús nexata yapëtane pamatacabita pijavajabitsaë beyaxuabijitsiatsi. Yapëtanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi tsitanajamatabëcueneitajëta piasivacuene.

² Jesús pijajivi barë nabane caniviyopijijava. Nexata Judas Iscariote, Simón pexënato, dovathi pejamatabëcueneta najamatabëxainaeaxanatsi. Nexata Judas najamatabëxaina Jesús pecanajetsinexa pijavajabitsaë pecobeyabelia. ³ Jesús yapëtane paxa Dioso perajutsijavatsi daxitacuene pevetsinexa. Yapëtanenua paxa Diosojavavetsica pepatsijava. Icatsia pacuenia ata naviatsijitsia paxa Diosojavabetsia, yapëtane.

⁴ Nexata Jesús pijajivi pebarë nabanijavata, Jesús nonotapuna mesajavata. Najumajonota penaxatatsijava. Nexata toalla naepacëta. ⁵ Jesús mera epata penacobequiatsinëjavabelia petaxuquiatsinexa pijajivi. Jesús nexata beveliamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pijatoallata penaepacëtsipanata.

⁶ Itsa Jesús taxuquiatsijitsia Simón Pedro, nexata Simón Pedro jumaitsi:

—Tajatuxanenë, apo jitsipænë tanetaxuquiatsijavamë. Tsipaji ayajamatabëcuenenëmë, jai Simón Pedro Jesúsjavabelia.

⁷ Jesús nexata jumaitsi:

—Aeconoxae abaxë apo yapëtaemë pajamatabëcuene yabara cataxuquiatsijitsiatsi. Itsiata baitsi jane bexëjavabelia yapëtaename, jai Jesús.

⁸ Nexata Pedro jumaitsi:

—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

⁹ Simón Pedro nexata jumaitsi:

—Tajatuxanenë, ëtaxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

¹⁰ Jesús nexata jumaitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tsipaji baja daxitanë axuirajibi. Paxamë rabaja pajamatabëcuenexuirajibimë. Itsiata baitsi jane apo padaxitamë, jai Jesús Pedrojavabelia.

¹¹ “Pajamatabëcuenexuirajibimë. Itsiata baitsi jane apo padaxitamë,” jai Jesús. Tsipaji yapëtane tajëvelia ponë canajetsijitsiatsi pijavajabitsaë pecobeyabelia.

¹² Petaxuquiatsicujinae pijajivi, Jesús baja icatsia penaxatatsijava naxatata. Eca icatsia mesa muxuneneta. Jumaitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatatsi? ¹³ “Vajanacacujarubinë,” pajamë tsabiabi itsa panabarëcuaiicujamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tsipaji taitsinë. ¹⁴ Xanë, patacacujarubinë ata, panijatuxanenë atanëna, beveliamatabëcuenenënë nataeya pacataxuquiatatsi bepanijajivitonënëcuenia. Nexata bajarapacuenia paxamë ata beveliamatabëcuenevi nataeya panataxuquiatabiabianame namataenetsia. ¹⁵ Pacatsitaexanatsi bajarapacuenia paxamë ata bajarapacuenia namataenetsia panenatoexanaenexa. ¹⁶ Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tsipaji itsanë ata apo jamatabëcuenematatoxenetsi pitorobinëtsi. ¹⁷ Payapëtaneme rabaja pajamatabëcuene yabara panijatuxanenë atanë, beveliamatabëcuenenënë nataeya pacataxuquiatatsi. Nexata pijinia paxamë ata bajarapacuenia beveliamatabëcuenevi nataeya namataenetsia nasivaya itsa panayavenonabiabianame, pajamatabëcuenebarëyamë tsavanapae tsane, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tsipaji caenë paxamëyajuvënënenë, ponë naxaena xanëta, bajaraponë necanajetsiana tajavajabitsaë pecobeyabelia pacuenia tajëvelia jumaitsi Dioso pejumelivaisibaxutota. Yapëtaniji ponë necanajetsijitsia. Tsipaji xanë patacaitapetsivi patajajivinexamë, pacajamatabëcuenyapëtanetsi pacaenëmë canacujitsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana. ¹⁹ Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi. ²⁰ Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana. Pajivi necopiapitsiana, bajarapajivi neyjavacopiapitsiana taxa Dioso, ponë nitobica, jai Jesús pijajivijavabelia.

Pacuenia Jesús navajunupaeba Judas pecanajetsivanexatsi pijavajabitsaë pecobeyabelia yabara pelivaisi

²¹ Jesús pejamatabëëthëtota bëpënëa bitso natsinajamatabëxaina. Nexata roviaia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënenë necanajetsiana tajavajabitsaë pecobeyabelia, jai Jesús pijajivijavabelia.

²² Nexata Jesús pijajivi nataeyena. Tsipaji apo yapëtae ponë yabara Jesús jumaitsi. ²³ Jesús pijajiviyajuvënënenë, caenë bitso asivaya tane. Bajaraponëbeje Jesúsbeje namuxunenixaeyecabeje. ²⁴ Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

²⁵ Nexata bajaraponë natixireca. Eca bitso Jesús pe-muxuneneta peyanijobinexa Jesúsjavabelia.

—Tajatuxanenë, çjipatsa yabara jumaitsimë? jai bajaraponë Jesúsjavabelia.

²⁶ Nexata Jesús jumaitsi pijajivitonëjavabelia, bitso pi-asivanëjavabelia:

—Ponë ra peneta panjavayo tocjabutsianajë, bajaraponë tsane, jai Jesús pijajivitonëjavabelia, bitso pi-asivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatotjavabelia.

²⁷ Judas itsa pita pan, nexata bajarajota Judas dovathi tsijamatabëjunuatsi. Nexata Jesús jumaitsi Judasjavabelia:

—Xua baja exanaejitsiamë, naxanitsiayo baja exanare, jai Jesús.

²⁸ Itsiata baitsi jane pamonaë najuaxaeyena bajara-pamesata, apo jumeypëtae xua yabara Jesús jumaitsi Judasjavabelia. ²⁹ Judas tovetabiaba bajarapamonaë pijapalatadoro. Bajaraxuata Judas yabara Jesús pijajivi jamatabëjumaitsi:

—Jesús raeta itoroba Judas pecomuatsinexa vajaxae-javanexa fiestajavata. Itsa jume, itoroba meta perajutsinexa itsacuenëjavaxi bepejibivijavabelia, jamatabëjai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivatsavanapaenexa yabara pelivaisi

³¹ Pabota Jesús pijajivi barënacaetuata, bajara-pabovecua Judas pitsapalia. Nexata Judas pepitsapae-cujinaelia Jesús jumaitsi pijajivijavabelia:

—Aeconoxae rabaja xanë, Daxitajivi Pematapijinë, najamatabëcueneitajëtsianajë ayaijamatabëcuene taxainaejava. Taxa Dioso ata bajarajota yajavajamatabëcueneitajëtsianajë ayaijamatabëcuene pexainaejava. ³² Nexata taxa Dioso juya nejamatabëcueneitajëtsiana ayaijamatabëcuene taxainaejava. Bajarapacuenë baja naxanitsiayo taxa Dioso exanaena. ³³ Bepataximë patacataevi. Bajara maapo pacayjavapononaetsi tsane bajayajebije. Paxamë panejaitsianame. Pacuenia jumaitsinë itsamonae judíovijavabelia, bajarapacuenia paxamëjavabelia ata pacajumaitsiijitsiatsi. Apo pacacaëjëpae tsane paneponaenexa itsabelia ponaejitsianë. ³⁴ Pacatsipae-bijitsiatsi icatsia pejanalivaisi. Paexanavanapaename mapacueniaje. Pasivamë tsavanapae tsane itsamonae ata. Pacuenia xanë pacaasivatsi, bajarapacuenia namataenetsia panaasivamë tsavanapae tsane. ³⁵ Namataenetsia itsa panaasivamë tsavanapae tsane, nexata daxitanacuanëpijivi pacayapëtaena patajajivicuenemë, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë nayavajunuaxainaename tajajivitonëcuenemë,” jai yabara pelivaisi

³⁶ Simón Pedro yanijoba Jesúsjavabelia.

—Tajatuxanenë, çdetsa belia ponaejitsiamë? jai Pedro.

Nexata Jesús jumaitsi Pedrojavabelia:

—Itsa belia ponaejitsianë, aeconoxae apo cacaëjëpae tanepënazonaenexamë. Itsiata baitsi jane itsamatacabi nepënazonaename, jai Jesús Pedrojavabelia.

³⁷ Nexata Pedro jumaitsi Jesúsjavabelia:

—Tajatuxanenë, çdetsa xuajitsia apo necaëjëpae aeconoxae tacapënazonaenexa? Daxita pacuenia nitorobame, catoexanaejitsipatsi. Nebeyaxuabijitsia ata tsipae xamë yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

—¿Xaniajamë tsaja? ¿Nacaevetsipame pecabeyaxuabinexa taneasivaxaemë? Xaniajanë pacuenia catsipaebijitsiatsi. Vacara raja pefiavivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

Pacuenia Jesús benamuto paxa Diosojavabetsia yabara pelivaisi

14 Jesús jumaitsi pijajivijavabelia:

—Pëtsa bitso panajamatabëxainame patacavecuaponaëjavanexa yabara. Panajamatabëcuenecopare Diosojavabelia, xanëjavaberena ata. ² Taxajavatatsia pexaniabobitsaëtonë xaina panejivanapaenexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianë patacatsivajënaexaniavaetsinexa itsajota papatsijitsiamë. ³ Xanë taponae-cujinae mavetsiaje, itsa baja veretsianajë patacatsivajënaexaniavaetsijava itsajota papatsijitsiamë, icatsia patsianicajë patacacaponaenexatsia jane baja. Nexata bajarajotatsia pacayajavaecaenatsi, itsajota ecaenajë. ⁴ Paxamë baja payapëtaneme itsabelia ponaejitsianë. Payapëtanemenua baja panepatsinexa itsajotatsia ecaejitsianë, jai Jesús pijajivijavabelia.

⁵ Nexata Tomás, Jesús pijajivitonë, jumaitsi:

—Tajatuxanenë, apo payapëtaenë cajena itsabelia ponaejitsiamë. ¿Detsa nexata pacuenia payapëtaenajë namuto pataponaenexa itsabelia ponaejitsiamë? jai Tomás Jesúsjavabelia.

⁶ Jesús nexata jumaitsi:

—Xanë rabaja benamutonë. Tsipaji xanë tajamatabëcueneta jivi panepaena athëbëbetsia. Xanë rabaja pepo pexaniajailivaisi jivi tatsipaebaponaenë. Xanë rabaja xainajë matacabi apo pevereverecaejava tarajutsinexa pamonaë nesivanajamatabëcopata. Itsajivi ata apo patsicapanepe tsane taxajavabetsia xanë itsa apo nejumecovënëtsi. ⁷ Paxamë picani bajay-

ata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹Jesús nexata jumaitsi:

—Felipe, bajayajebi rabaja pacayjavaponaponatsi. ¿Itsiata tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa? ¹⁰Taxa baja cajena neyjavaponapona. Xanë ata taxa yajavaponaponajë. ¿Abaxë tsaja apo jumecovënëtsimë? Palivaisi pacatsipaebatsi, tajamatabëcueneta baja cajena bajarapalivaisi apo pacatsipaebitsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeyaexana. Nexata bajarapalivaisi pacatsipaebatsi. ¹¹Panejumecovënëre taxa taya-javaponaponaajava. Panejumecovënërenua taxa ata tanyjavaponaponaajava. Patacatsipaebilivaisianë apo panejumecovënëtsi atamë, itsiata ayaicuene Dioso pesaëta taexanaexae, panejumecovënëre taxa tayjavaponaponaajava. ¹²Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayaicuene taexanaajava matatoxenetsia bajarapajivi exanaena. Tsipaji xanë naviatsianajë taxajavabetsia. ¹³⁻¹⁴Daxita xua xanë tavënëta pavajëtsianame taxajavabelia, pata-toexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenenabarëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espíritu Santo jivijavabetsica yabara pelivaisi

¹⁵Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi. ¹⁶Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatacabijavabelianexa. Bajaraponë Espíritu Santo. ¹⁷Espíritu Santo cajena pepo pexaniaajailivaisi jivi peyapëtaeyaexanaenë. Bajaraponë mapanacuapijivi abaxë apo tsijamatabëecaetsi. Tsipaji bajarapamonae apo nejumecovënëtsi. Nexata apo yapëtae ponë Espíritu Santo. Apo yapëtaenua cajena Espíritu peponaponaajava ata. Itsiata baitsi jane paxamë Espíritu Santo payapëtaneme baja. Tsipaji baja bajaraponë pacayjavaponapona. Espíritu Santo cajena pacatsijamatabëecaena daxitamatacabijavabelianexa. ¹⁸Ponae atanë tsane taxajavabetsia, itsiata apo pacaxuabi tsanetsi. Icatsia raja patsianicajë patacayjavaponaponaenexa. ¹⁹Caematacabibejecujinae baja jivi apo netae tsane. Itsiata icatsia paxamë panetaeneme. Paxamë paxainaeneme matacabi apo peverevereaeajava. Tsipaji tatëpaecujinae icatsia asaënë tsaponapona tsane. ²⁰Pamatacabi Espíritu Santo patsianica paxamë javabetsica, bajarapamatacabi payapëtaeneme taxa

tayjavaponaponaajavanexa. Payapëtaenemenua pataneyajavajinavanapaejavalexamë. Payapëtaenemenua xanë ata patacayjavaponaponaajavanexa.

²¹Pajivi yapëtane, taitorobicuenia nejumecovënëtanua, bajarapajivi niasiva. Pajivi niasiva, bajarapajivi taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

²²Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

²³Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payjavaponanajëbeje. ²⁴Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

²⁵Icatsia Jesús jumaitsi pijajivijavabelia:

—Abaxë patacayjavaponaponaeepto pacatsipaebijitsiatsi mapacueniajaje. ²⁶Taxa tajamatabëcueneta, Espíritu Santo pacatoitorobianica papecayavenonabinexa. Nexata Espíritu Santo pacayapëtaeyaexanaena daxitacuene. Pacanajamatabënapsiaexanaenanua daxita palivaisi pacatsipaebaponatsi, jai Jesús.

²⁷Icatsia Jesús jumaitsi pijajivijavabelia:

—Pacanapëjibatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuata pebarëyajava. Nexata bepíjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuene ata. ²⁸Panejumetaneme rabaja patacayajumait-sijava mapacueniajaje: "Xanë baja ponaenajë taxajavabetsia. Itsiata baitsi jane icatsia pacasivapatsianicatsi," patacayajava. Itsa bitso panejitsipaiejitsipame, nexata pasivajamatabëcuenebarëyamë tsipae taponaejavavanexa taxajavabetsia. Tsipaji taxa nevecuaayajamatabëcuenenë. ²⁹Bajarapacuenia pacajumaitstsi taponaejavajënaeya. Nexata itsa copiapatsiana patacayumaitcovëya, panejumecovënëtsianame Dioso pexënatocuenenë, jai Jesús pijajivijavabelia.

³⁰Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipaebaponaenexa. Tsipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacuenabinexa. ³¹Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava.

Panonobapunare. Ponatsi baja mapacovëvecuaje, jai Jesús pijajivijavabelia.

Pacuenia Jesús bepeubinae yabara pelivaisi

15 ¹⁻² Jesús jumaitsi comparacióncuenia pijajivijavabelia:

—Xanë rabaja bepexaniaviriauvanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavaetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacaucuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae, pacavecuajibiaexanaponaena. Nexata pacuenia taxa Dioso pacatojitsipa, panevajënaeyabelia paexanavanapaename. ³ Paxamë rabaja panejumecovënëtame patacatsipaebilivaisi. Bajaraxuata taxa baja pacavecuaxuaba pibisijamatabëcuenemi. ⁴ Paxamë paneyajavajinavanapaename. Nexata xanë ata pacayajavaponaponaenatsi. Pamaxërana apo tabunucae tsipae pepo naejavabelia, apo nacuaitsi tsipae. Bajara pijinia pacuenia paxamë ata paitsimë tsipae itsa apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyjavaponaponaena, xanë ata pijinia bajarapajivi yajavaponaponaenajë. Bajarapajivi exanabiabiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacaëjëpae tsipae panijacuata pexaniacuene paneexanaenexa. ⁶ Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bajaraxuacujinae bajarapamaxëranaxi xuaba. Nexata baja itsa niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamonaenapo neyjavajinavanapae tsane, jai Jesús pijajivijavabelia.

⁷ Icatsia Jesús jumaitsi:

—Itsa paxamë tsitecaeya panejumecovënëtavanapaename, nexata apo panacofënëtsimë tsane patacatsipaebilivaisi. Nexata panevajëtabiabianame xua pajitsipame. Nexata pacarajutsianatsi xua panevajëtame.

⁸ Itsa paxamë jivi patsitaexanavanapaename taxa Dioso pejitsipaecuenia, jivi yayataenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonae pepacuene Jesús pijajivi,” jai tsane.

⁹ Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. ¹⁰ Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata itsa panejumecovënëtavanapaename pacuenia pacaitorobatsi, nexata payapëtaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacat-sipaebatsi paxamë ata paneja-

matabëcuenebarëyanexa pacuenia xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaenexa. ¹² Mapacuenia paexanavanapaenameje. Pacuenia xanë pacaasivatsi, bajara pijinia pacuenia paxamë ata namataenetsia panaasivamë tsavanapae tsane pacaenëmë canacujitsia. ¹³ Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso piasivajava peyapëtaejivitsi. Bajarapacuenia yapijivinabeyaxuabia exanaejitsipa bitso piasivaxae peyapëtaejivitsi. Nexata baja pematatsënëa itsajivi ata apo caëjëpaetsi bajarapacuenia pexanaejivi matatoxenetsia piasivanexa peyapëtaejivitsi. ¹⁴ Itsa paexanavanapaename patacaitorobicuenia, nexata baja patajamonaemë tsane. ¹⁵ Aeconoxae baja cajena saya bepatajivicueniamë apo pacataetsi. Bepatajamonaemë baja bitso pacatanetsi. Tsipaji baja pacayapëtaeyaexanatsi daxita pacuenia taxa nitoroba taexanaenexa. Tsipaji mapanacuata petuxanenë pijajivi apo yapëtaeyaexanae daxita pacuenia petuxanenë exanaejitsia. ¹⁶ Paxamë raja apo panejunatsimë. Biji rajane xanë pacajunatsi patanepënaponaenexamë. Nexata xanë pacaitorobatsi paneexanavanapaenexa Dioso pejitsipaecuenia. Nexata xua paexanavanapaename, apo pevereverecaejavanexa tsane. Daxita pacuene tavënëta pavajëtsianame taxa Diosojavabelia, pacarajutsiana cajena. ¹⁷ Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapsianame xanë copiaya taneitoyajava bajarapamonae. ¹⁹ Mapanacuapijivi, pamonaenapo Dioso apo pejumecovënëtsivi, namataenetsia nasiva tsavanapae. Paxamë ata bajarapamonae itsa pajamatabëcuenejëpa vanapaejitsipame, nexata paxamë ata bajarapamonae pacaasiva tsipae. Itsiata baitsi jane xanë baja pacajunatsi bajarapamonaevecuca. Nexata baja paxamë apo pajamatabëcuenejëpaemë bajarapamonae. Bajaraxuata pacaitoya tsane bajarapamonae. ²⁰ Panajamatabënapsiabianame najumecapanepaeya patacajumaitsijava: “Itsanë ata apo jamatabëcuenematatoxenetsi pijatuxanenë,” patacajaijava. Nebejiobiaexana itsamonae. Nexata paxamë ata itsamonae pacabejiobiaexanaena. Itsamonae nejumecovënëta tatsipaebilivaisi. Nexata pijinia paxamë ata itsamonae pacajumecovënëtsiana panetsipaebilivaisi. ²¹ Bajarapacuenia pacaexanaena mapanacuapijivije xanë patajajivix-aemë. Tsipaji bajarapamonae apo yapëtae Dioso, ponë nitorobica, jai Jesús tajëvelia pijajivijavabelia.

²² Icatsia Jesús jumaitsi pijajivijavabelia:

—Xanë itsa apo patsinëtsica tsipae mapanacuaya-betsicaje, mapanacuapijivi apo naneconitsi tsipae Diosojavabelia. Tsipaji bajarapamonae Dioso apo peyapëtaexae, pibisiacuene exanaejitsipa. Nexata xanë tapatsixaetsica mapanacuayabetsicaje, bajarapamonae yapëtane baja Dioso. Nexata bajarapamonae yapëtae ata Dioso, pibisiacuene pexanaexae, nexata naneconita Diosojavabelia. Nexata acuenebi bajarapamonae pejumaitisijava pibisiacuene pexanaejava yabara: “Apo tayapëtaexae Dioso, pibisiacuene exanaejë,” pejaijiva. ²³ Nexata pamonaenitoya, bajarapamonae taxa ata itoya. ²⁴ Bajarapamonaejavata Dioso pesaëta pinijicuene taexanaejava exanabiabajë. Bajaraxua itsajivi ata apo exanae mapanacuata. Bajarapamonaejavata pinijicuene taexanaejava itsa apo exanaenë tsipae, apo naneconitsi tsipae Diosojavabelia. Tsipaji bajarapamonae apo yapëtae tsipae Dioso. Bajarapamonae taetae ata Dioso pesaëta pinijicuene taexanaejava, itsiata apo nejumecovënëtsi. Bajarapamonae nitoya. Taxa ata itoya. Nexata naneconita Diosojavabelia. ²⁵ Bajarapacuenia nitoya tsipaji baja cajena bajayata tajëvelia bajarapamonae taneitoyajavanexa yabara, Dioso pejumelivaisibaxutota jumaitsi mapacueniaje: “Nitoya tsane bajarapamonae, ajibi taneyabaraitoyajava ata,” jai tajëvelia Dioso pejumelivaisibaxutota xanë yabara, jai Jesús pijajivijavabelia.

²⁶ Icatsia Jesús jumaitsi pijajivijavabelia:

—Vajëtsianajë taxajavabelia pitorobinexatsica Espiritu Santo, pexaniajailivaisi pepaebinënexa. Itsa patsianica Espiritu Santo taxajavavetsica, nexata pacayavenonaena. Pacajamatabëcuene asaëyaexanaenanua. Espiritu Santo xanë nevajunupaebiana xaniavaetsia. ²⁷ Paxamë baja cajena tataxuxuabijavaveliacujinae jivi livaisi tatsipaebijava, paneyajavajinavapame. Bajaraxuata paxamë ata xaniavaetsia panevajunupaebianame, jai Jesús pijajivijavabelia.

16 Icatsia Jesús jumaitsi pijajivijavabelia:

—Bajarapacuenia pacatsipaebatsi panecopabiyanima patanejumecovënëtsilivaisimë. ² Paxamë papecaitojavi, pacacapitsapabiabiana judíovi penacae-tuatabiabibovecua. Belia jane baja itsamatacabijavabelia pacabeyejebiana. Nexata pamonaenitoya pacabeyejebiana, jamatabëcuenenavëxaniabiaya jumaitsi tsane: “Dioso pejitsipaecuenia tobeyejebajë mapamonaeje,” jai tsane. ³ Bajarapamonae xanë apo neyapëtae. Apo yapëtae cajena taxa ata. Bajaraxuata bajarapacuenia pacaexanaena. ⁴ Bajarapacuenia tajëvelia pacatsipaebatsi baja cajena. Nexata jane baja pamatacabipacatsipsiana bajarapacuenia, panajamatabënapitsianame pacuenia baja cajena tajëvelia pacatsipaebatsi, jai Jesús pijajivijavabelia.

Pacuenia Espiritu Santo exanaejitsia jivijavabelia yabara pelivaisi

Icatsia Jesús jumaitsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxë apo pacatsipaebitsi mapacuenia yabaraje.

Bajarapacuenia apo pacatsipaebitsi tsipaji abaxë pacayajavaponaponatsi. ⁵ Itsiata baitsi jane aeconoxae baja payapëtae atamë tanaviatsijavanexa taneitorobinëjavabetsia, itsanë ata paxamëyajuvënë apo neyanijobi. “¿Detsa belia ponaejitsiamë?” apo nejai. ⁶ Pacanavajunupaebatsi baja cajena tanaviatsijavanexa. Bajaraxuata bitso panajamatabëxainame. ⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaenatsi, apo pacatopatsitsica tsipae Espiritu Santo papecaya-javaponaponaenexa. Espiritu Santo pacayavenonabiabiana. Pacajamatabëcuene asaëyaexanaenanua. Itsa ponaejitsia taxajavabetsia, nexata Espiritu Santo pacatitorobianicatsi. ⁸ Nexata Espiritu Santo patsianica. Nexata Espiritu Santo pejamatabëcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaenatsi, apo pa, pamonaenatsi apo pejumecovënëtsi, nacueneyapëtaena pibisiacuene pexanaejava. Yapëtaenanua pacuenia xanepana pexanavanapaenexa Dioso pitabarata. Yapëtaenanua pacuenia Dioso naneconitsiaexanaejitsiatsi bajarapamonae pibisiacuene pexanaeneconi yabara. ⁹ Espiritu Santo pejamatabëcueneta, bajarapamonae nacueneyapëtaena pibisiacuene pexanaevicuene. Tsipaji xanë bajarapamonae apo nejumecovënëtsi pibisiacuene pexanaeneconi tavecuajibiaexanaejavanexa. ¹⁰ Nexata Espiritu Santo pejamatabëcueneta, bajarapamonae yapëtaena pacuenia xanepana pexanavanapaenexa Dioso pitabarata. Tsipaji baja xanë naviansianajë taxajavabetsia. Nexata baja bajarapamonae pematatsënëa apo netae tsane. ¹¹ Bajarapamonae Espiritu Santo pejamatabëcueneta, yapëtaena pacuenia Dioso naneconitsiaexanaejitsiatsi daxita pamonaenitoya pibisiacuene pexanaevi dovathi pejamatabëcueneta. Tsipaji Dioso naneconitsiaexanaena dovathi, ponë mapanacuapijivi itorobabiaba pibisiacuene pexanaenexa, jai Jesús pijajivijavabelia.

¹² Icatsia Jesús jumaitsi pijajivijavabelia:

—Ayailivaisi picani abaxë xainajë patacatsipaebinxana. Itsiata baitsi jane abaxë apo pacajamatabëcuenecaëjëpae bajarapalivaisi panejumeyapëtaenexa. ¹³ Matapania pamatacabipatsianica Espiritu Santo, ponë pexaniajailivaisi pepaebinë, bajaraponaenatsi pacayapëtaeyaexanaena daxita pexaniajailivaisi. Espiritu Santo raja apo pacayapëtaeyaexanae tsane saicaya pejamatabëcuenepijilivaisi. Daxita raja pacuenia taxa Dioso jumaitsi, juya Espiritu Santo pacayapëtaeyaexanaena. Nexata tajëvelia Espiritu Santo pacayapëtaeyaexanaena pacuenia pevajënaeyabelia copiapataponaejitsia. ¹⁴ Espiritu Santo pejamatabëcueneta jivi neyaiyataena. Tsipaji xanë talivaisi, pexaniajailivaisi, Espiritu Santo pacayapëtaeyaexanaena. ¹⁵ Daxita taxa pexanaejava, xanë ata rabaja tajajava. Bajaraxuata pacajumaitsi: “Xanë talivaisi, pexaniajailivaisi, Espiritu Santo pacayapëtaeyaexanaena,” pacajatsi, jai Jesús pijajivijavabelia.

Pacuenia bepejamatabëcuenejobivimi jamatabëcuenebarëyajitsia yabara pelivaisi

¹⁶ Icatsia Jesús jumaitsi pijajivijavabelia:

—Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia, jai Jesús.

¹⁷ Nexata pijajiviyajuvënëvi nayanijoba ëpamonae.

—¿Detsa majumaitsi pajumeje? Jesús nacajumaitsi: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename. Bajara jane xuacujinae ponaenajë baja taxajavabetsia,” nacajai. ¹⁸ ¿De tsaeta pejumaitsi jume: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” nacajai? Apo jumeyapëtaetsi cajena xua yabara nacajumaitsi, najai Jesús pijajivi.

¹⁹ Jesús jamatabëcuenejapëtane pacuenia picani pijajivi jamatabëyanijobatsi. Nexata Jesús tajëvelia jumaitsi pijajivijavabelia:

—Pacajumaitsi mapacueniaje: “Caematacabibejecujinae rabaja apo panetaemë tsane. Itsiata icatsia itsamatacabibejecujinae panetaename,” pacajaitsi. ¿Baja tsa pajume yabara panayanijobame? ²⁰ Xaniajanë pacuenia pacatsipaebijitsiatsi. Xanë itsa tēpaenajë, paxamë panuename. Bitso xanëjitsia panajamatabëxainaname. Itsiata baitsi jane pamonaepo nejumecovënëtsi, barëya tsane tatēpaejava yabara. Itsiata baitsi jane xuacujinae paxamë icatsia bitso panesivajamatabëcuenebarëyamë tsane itsa panetaename icatsia. ²¹ Pamatacabi petiriva vixaenotatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcuenebarëya. ²² Bajara pijinia pacuenia paxamë ata bitso panajamatabëxainaname itsa tēpaenajë. Itsiata icatsia itsa panetaename, bitso panesivajamatabëcuenebarëyamë tsane. Nexata itsajivi ata apo caëjēpaetsi tsane papecavecuajibiaexanaenexa panejamatabëcuenebarëyajava, jai Jesús pijajivijavabelia.

²³ Icatsia Jesús jumaitsi pijajivijavabelia:

—Pamamatacabi icatsia panetaename, apo panayanijobimë baja tsane itsacuenejavayo ata. Tsipaji baja Espiritu Santo pacayapëtaeyaexanaena daxitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. ²⁴ Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcuenebarëyamë tsane taxajavabelia, jai Jesús pijajivijavabelia.

Pacuenia Jesús jamatabëcueneamoneyaba dovathi, ponë itorobabiaba mapanacuapijivije pibisiacuene pexanaenexa, yabara pelivaisi

²⁵ Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi. ²⁶ Bajarapamatacabi paxamë baja taxajavabelia pavajëtabiabianame tavënëta. Nexata baja xanë apo patacatovajëtabiabi tsanetsi taxajavabelia. ²⁷ Paxamë paneasivamë. Panejumecovënëtamenua taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabiabianame, taxa pacajumetaena. ²⁸ Xanë baja cajena ponaponajë taxajavatatsia. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatsonianajë baja taxajavabetsia, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. ³⁰ Nexata baja pacajamatabëcuenejapëtanetsi daxitacuene neyapëtaenëcuene. Xamë panejamatabëcuenejapëtaneme palivaisi picani jamatabëpacayanijobatsi. Bajaraxuata pacajumecovënëtsi baja Dioso athëbëvetsica pecaitorobinëcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtamē taxa Dioso athëbëvetsica taneitorobinëcuenetsica?

³² Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexubanuntsianame caenënë. Itsiata baitsi jane apo caenënë tsane. Tsipaji taxa yajavaponaponajë. ³³ Bajarapacuenie tajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcuene copatsixae, ajunavijibia pajinavapanapae. Mapanacuata panejinavanapaeepato mapanacuapijivije pacabejobiaexanabiabiana. Itsiata pajamatabëcuenesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacuene pexanaenexa, jai Jesús pijajivijavabelia.

Pacuenia Jesús pijajivi tovajëta paxa Diosojavabelia yabara pelivaisi

17 Jesús dovathi pejamatabëcueneamoneyabijava pijajivijavabelia petsipaebicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsitajëre jivi pacuenia xanë nexënatoxaenë, bitso ayaijamatabëcuenenënë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenëmë. ² Xamë rabaja netocopatame daxitajivi taevetsinexa. Nexata necaëjëpa tarajutsinexa matacabi apo pevereverecea-

java daxita pamonaerajutame. ³ Maticabi apo pevererecaejava pexinaevinexa, cayapëtane baja caenëmë pepo Diosonëcuenemë. Bajarapamonaerajapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaiti paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexinaejava. Veretajënuabaja daxita xua nitorobame tacatoexanaenexa. ⁵ Taxa, pamaticabi abaxë ajibi mapanacuaje, ita caya-javaponaponatsi, necotia yajavaponaponajë ayaijamatabëcueneënëxanë. Bajarapacuenia icatsia aeconoxae ata netocopatsianame vajanajuavetaponaponaxabeje daxitacuene, jai Jesús paxa Diosojavabelia.

⁶ Icatsia Jesús jumaiti paxa Diosojavabelia:

—Xamë itapetame itsamonaerajapacuataje taneivanajamatabëcopatsinexa. Xanë nexata yapëtaeyaexanajë bajarapamonaerajacuenia jamatabëcueneitsimë. Bajarapamonaerajajivi nerajutame. Xaniavaetsia cajumecovënëta nijumelivaisi. ⁷ Aeconoxae baja bajarapamonaerajajivi yapëtane xamë nejamatabëcuene taexanaponaejava daxita xuanë exanaponajë. ⁸ Daxita palivaisi netsipaebame, xanë juya bajarapalivaisi tsipaebajë bajarapamonaerajajivi. Nexata nejumecovënëta. Nexata yapëtane bajarapamonaerajapacuenia tapatsijava xamëjavavetsica. Nejumecovënëta xamë athëbëvetsica taneitorobinëcuenemëtsica, jai Jesús paxa Diosojavabelia.

⁹ Icatsia Jesús jumaiti paxa Diosojavabelia:

—Cavajëtatsi bajarapamonaenexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimënexa. ¹⁰ Daxita pamonaerajajivi, bajarapamonaerajajivi xanë ata tajajivi. Daxita pamonaerajajivi, bajarapamonaerajajivi xamë ata nijajivi. Daxitajivi neyapëtane ayaijamatabëcuene taxinaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

¹¹ Icatsia Jesús jumaiti paxa Diosojavabelia:

—Xanë baja apo ponaponanë tsane mapanacuataje. Tsipaji baja ponajëtsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevecua. Vaxaitsibeje caejamatabëcuene xainatsibeje. Nexata bajarapamonaerajajivi ata tojitsipajë caejamatabëcuene pexinaenexa. Pacuenia vaxaitsibeje jamatabëcueneitsibeje, bajara pejamatabëcueneitsinexa. ¹² Itsa abaxë yajavaponaponajë bajarapamonaerajapacuataje, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji tocopiapatsianatsi pacuenia baja cajena tajëvelia jumaiti nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaiti paxa Diosojavabelia mapacueniaje:

—Aeconoxae baja ponanajë xamëjavabetsia. Itsiata abaxë taponaponatabiepatoyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenebarëyanexa pacuenia xanë bitso jamatabëcuenebarëyanë. ¹⁴ Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcueneitsi, xanë apo jamatabëcueneitsinë. Bajaraxuata tajajivi ata itoyatsi mapanacuapijivije. Tsipaji apo jamatabëcuenejëpae. ¹⁵ Apo cavajëtsitsi raja nejuetsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecua. ¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije. ¹⁷ Nijumelivaisi cajena pexaniajailivaisi. Bajaraxuata tanejumecovënëtsivi baja yavenonaerajapacuenia penatsatsinexa dovathi pejamatabëcuenevecua. Nexata bajarapamonaerajapacuenia xamë netojitsipaerajacuenia nijumelivaisi baja petsijamatabëcaexaetsi. ¹⁸ Pacuenia xamë nitorobame pexaniajailivaisi tsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi tsipaebinexa mapanacuapijivijavabeliaje. ¹⁹ Pacuenia xamë netojitsipame, tajajivi yapijivinacaevetsianajë xanë tanebeyaxuabinexa. Nexata bajarapamonaerajacuenia xamë tojitsipame, catoexanavanapaena. Tsipaji baja bajarapamonaerajapacuenia neyapëtane nijumelivaisi pexaniajailivaisicuene, jai Jesús paxa Diosojavabelia.

²⁰ Icatsia Jesús jumaiti paxa Diosojavabelia mapacueniaje:

—Itsiata apo cavajëtsitsi etajajivinexa. Cavajëtatsi raja bexëjavabelia tanejumecovënëtsivinexa ata. Tajajivi itsamaticabi bajarapamonaerajavabelia ita tsipaebaponaena tajumelivaisi, nexata bexëjavabelia bajarapamonaerajajivi nejumecovënëtsiana. ²¹ Nexata cavajëtatsi daxita bajarapamonaerajapacuenia penajamatabëcuenejëpaenexa. Xamë neyjavapononame. Xanë ata pijinia cayajavaponaponatsi. Bajara pijinia pacuenia tojitsipajë daxita bajarapamonaerajajivi vajanacayajavajinavanapaxabeje. Tojitsipajë bajarapamonaerajapacuenia matabëcuenejëpaenexa. Nexata bajarapamonaerajapacuenia naja-matabëcuenejëpaeya pejinavanapaejava, ita tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica. ²² Pacuenia xamë yapëtaeyaexaname tajajivijavabelia xanë bitso ayaijamatabëcuene taxinaejava, bajara pijinia pacuenia xanë ata bajarapamonaerajavabelia yapëtaeyaexanajë baja bajarapamonaerajajivi ayaijamatabëcuenevi baja penaexanaejava tanejumecovënëtsixae. Nexata bajarapamonaerajajivi tanejumecovënëtsixae, naja-matabëcuenejëpa baja pacuenia vaxaitsibeje naja-matabëcuenejëpatsibeje. ²³ Tajajivi yajavaponaponajë. Xamë pijinia neyjavapononame. Nexata tajajivi caejamatabëcuene xainaena. Nexata daxita mapanacuapijivije ita taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtanenua bajarajajivi

pamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata penajinavanapaenexa itsabelia ponaejitsianë. Jitsipajë bajarapamonae taneyajavajinavanapaenexa, taneyapëtaenexa bitso ayaijamatabëcuene taxainaejava. Tsipaji nacua nexanaevajënaeya ata, xamë niasivamë. Bajaraxuata ayaijamatabëcuenenënë nexaname. ²⁵ Taxa, itsaneconi ata apo nexainaenë. Mapanacuapijivi, pamonae apo cajumecovënëtsi, apo cayapëtae. Itsiata xanë cayapëtanetsi. Mapamonaeje, tajajivi, yapëtane baja xamë athëbëvetsica taneitorobijavamëtsica. ²⁶ Xanë tajajivi yapëtaeyaexanjë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonae ata namataenetsia penaasivanexa, yapëtaeyaexanaponaenajë. Xanë bajarapamonae yajavaponaenajë, jai Jesús paxa Diosojavabelia.

Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi

18 Jesús pevajëtsicujinae paxa Diosojavabelia, pijajivi barëpona Cedrónvënënajato itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. ² Bajarajota cajena Jesús pijajivi barënaeetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënaeetuatabiaba. ³ Nexata Judas peyapëtaexae, bajarajota barëpata vajabitsaë. Barëpatanua templobopijipolicíavi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaeve capona espadanë, naebonë yajava. Lámparabëanënuca capona. Beisotabuqueranënuca capona penatsivajënaeitayotsinexa. ⁴ Nexata baja Jesús yapëtane daxita pacuenia exanaejitsiatsi bajarapamonae. Nexata Jesús najetabalia. Jumaitsi bajarapamonaejavabelia:

—¿Jipatsa pajaitame? jai Jesús.

⁵ Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata. ⁶ “Xanë rabaja maje,” pejaijavata Jesús, bajarapamonae pematabëxëpa toquequenaponalia. Othopa irata. ⁷ Nexata icatsia jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

⁸ Nexata Jesús jumaitsi bajarapamonaejavabelia:

—“Xanë rabaja maje,” pacajaitsi rabaja. Xanë itsa panejaitame, pacopatsianame mapamonaeje peponaenexa, jai Jesús pijajivi yabara.

⁹ Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacueniaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenie jane baja copiajopa. ¹⁰ Nexata Jesús pijajivitonë, Simón Pedro, namaracëtaPONAPONA espada. Nexata Simón Pedro espada navemarajonotaxuabina. Pecujuanenia pamuxuyorotomi, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco. ¹¹ Nexata Jesús jumaitsi Pedrojavabelia:

—Nijaespada baja pevënojojavareca xataremeca.

Taxa baja cajena netocopata tanebejiobiaexanaenexa. Bajaraxuata nacaevetsianajë tanebejiobiaexanaenexa, jai Jesús Pedrojavabelia.

Pacuenia Jesús nutatsi sacerdot. Pecujuanenia pamuxuyorotomi, muxuyoropaebiaxuaba sacerdotevi pepo penamataevi pepo penamatacaitorobinë pitabarata yabara pelivaisi

¹² Vajabitsaëvi pijacapitán, pijajivi yajava, judíovi pijapolicíavinua, nacobenavaetabatsi Jesús. Nexata cobecëtat. ¹³ Caponatsi baja Anásvënënë pijaboyabelia. Anás paxuyo Caifás. Bajarapamatacabi Caifás sacerdotevi pepo penamatacaitorobinë tsaponapona. ¹⁴ Bajaraponë Caifás jumaitsi baja cajena copiaya judíovijavabelia Jesús yabara: “Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

¹⁵ Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje, tajiyo pënanajetaru-cabeje. Ponë Simón Pedro yanatatsi, bajaraponë yapëtanetsi sacerdotevi pepo penamatacaitorobinë. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bajarapayacaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. ¹⁶ Nexata Pedro nucojopa sacerdotevi pepo penamatacaitorobinë pijabo matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bajaraponë cuaicuajai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. ¹⁷ Nexata baupa pevetsiva jumaitsi Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

¹⁸ Bajarapaepatota bitso bajarapameravi cainejeba. Nexata bajarapabota penacuenebivi, policíavi yajava, isoto itajuruteta bopanabota. Bajarapamonae nonopanubena. Nexata Pedro nanuca bajarapamonaejavata. Nanonopanuca.

Pacuenia sacerdotevi pepo penamatacaitorobinë Jesús yanijobatsi yabara pelivaisi

¹⁹ Anás jane baja sacerdotevi pepo penamatacaitorobinë jumaitsi Jesúsjavabelia:

—¿Detsa pamatabëxëyo nijajivi? ¿Detsa palivaisi tsi-paebabiabame nijajivi? jai.

²⁰ Jesús nexata jumaitsi Anásjavabelia:

—Xanë daxitajivi pexanialivaisi tsi-paebabiabajë it-sajota nacaetuatabiaba. Tsi-paebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë. ²¹ ¿Detsa xuajitsia nexata neyanijobame? Yanijobare pamonaejavabelia tsi-paebabiabajë. Nexata bajarapamonae catsipaebiana pacuenia nejumetaeyabiaba. Bajarapamonae yapë-tane xua yabara pexanialivaisi tsi-paebabiabajë, jai Jesús sacerdotevi pepo penamatacaitorobinëjavabelia.

²² Itsa bajarapacuenia Jesús jumaitsi, nexata bajara-jota penucaenë templobopijipolicíanë itabara-pacataxubatsi. Policíanë jumaitsi Jesúsjavabelia:

—Pëtsa bajarapacuenia cuaicuajamë sacerdotevi pepo penamatacaitorobinëjavabelia, jai.

²³ Jesús nexata jumaitsi policíanëjavabelia:

—Itsa pibisiacuena cuaicuajianë, netsipaebare papibisiacuene yabara cuaicuajianë. ¿Detsa xuajitsia saya xaniavaetsia tajumaitsijava yabara, nebiame? jai Jesús.

²⁴ Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

Pacuenia icatsia Pedro nayavajunuaxaina Jesús pijajivitonëcuene yabara pelivaisi

²⁵ Pedro abaxë nanonopanuca isotojavata. Nexata bajarajota penubenaevi jumaitsi:

—¿Xamë ata tsabaja Jesús apo pijajivitonëmë? jaitsi.

Pedro nexata nayavajunuaxainaeya jumaitsi:

—Jume raja. Xanë raja Jesús apo pijajivitonënë, jai Pedro.

²⁶ Nexata icatsia bajarajota sacerdotevi pepo penamatacaitorobinë pijajivitonë, ponë Pedro muxuy-oropaebiaxuba pijamonaenë, jumaitsi:

—Xamë cajena covë catanetsi Jesúsjavata, peubinaenë bacabojavata, jai.

²⁷ Pedro icatsia nayavajunuaxainaeya jumaitsi:

—Jume raja. Xanë cajena apo yapëtaenë Jesús, jai Pedro.

Itsa baja Pedro najumeveretaba bajarapacuenia pe-jumaitsijava, vacara baja fiaba.

Pacuenia Jesús nutatsi Pilato pitabarata yabara pelivaisi

²⁸ Itsa baja ajena matabi tsina, Jesús capitsapatsi Caifás pijabovecua. Nexata Jesús caponaliatsi nacuaevevtsinë Pilato pijaboyabelia. Judíovi, pamonaenajetarubena Jesús peneconitsinexatsi, apo najonelia nacuaevevtsinë Pilato pijaboyalia. Tsi-paji Pilato apo judíonë. Judíovi apo joneyabiabi apo judíonë pijaboyalia. Bajarapamonae itsa jonejitsipa Pilato pijaboyalia, bajarapamonae judíovixae, jamatabëjumai tsipae: “Najamatabëcuenebijianajë Dioso pitabarata apo judíonë pijaboyalia tanajonexae. Nexata tavëna judíovi apo netocopatsi tsane tanaxaenexa pascua fiestamatacabi pexaejava,” jamatabëjai tsipae bajarapamonae. ²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponëje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacuene apo pexanaenë tsipae, apo pacatocapatsi tsipaetsi maberena, jai judíovi.

³¹ Nexata icatsia Pilato jumaitsi:

—Paca ponaremelia caevëalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamë baitsi jane apo panetocopatsimë patabeyaxuabinexa itsanë ata pijaneconi yabara, jai judíovi.

³² Bajarapacuenia Jesús tocopiatatsi pacuenia baja cajena tajëvelia pijajivijavabelia navajunupaebaona pebeyaxuabijanexatsi. ³³ Nexata Pilato icatsia joneya pijaboyalia. Jumaitsi Jesúsjavabelia:

—¿Xamë tsaja judíovi pepo nevetsinë? jai.

³⁴ Jesús nexata jumaitsi Pilatojavabelia:

—¿Xamë tsaja nejamatabëcueneta neyanijobame? Jume. ¿Catsipaeba tsaja itsamonae xanë judíovi pepo taevetsinëcuene? jai Jesús.

³⁵ Pilato nexata jumaitsi:

—Xanë raja apo judíonënë. Bajarapacuenia apo taca-sivanajamatabëxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberena pecaneconitsinexa xanëjavaberenena. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanë apo taevetsinëje. Itsa ra peneta mapanacua taevetsinë tsipaeje, nexata paepatota judíovi nevaetaba, daxita tajajivi neyapijivinamaxëvanitsipa tapanepaenexa. Xanë raja mapanacua apo taevetsinëje, jai Jesús Pilatojavabelia.

³⁷ Nexata Pilato jumaitsi:

—¿Xamë tsaja nexata jivi nevetsinë? jai.

Jesús nexata jumaitsi:

—Jājā, xanë raja jivi taevetsinë pacuenia nejumaitsimë. Bajaraxuata patajë mapanacuayabetsicaje tatsipaebineja jivi pexaniajailivaisi. Daxita pamonaenajitsipa

pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapétane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitajarabiné cajena itsacujiruneconi ata pexanaejava, paneconi yabara bajaraponé naneconitsijitsia. ³⁹ Penaneconitsivi pejebabiabibota naneconitsia peponaponaené pepitsapaenexa itsa panevajétame, nexata pascua fiestamatacabi caené pacatocapit-sapabiabatsi. ¿Pajitsipame tsaja patacatocapit-sapaenexa penaneconitsivi pejebabiabibovecua pepit-sapaenexa pajudíovimé papecaevetsiné? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pétsa abaxé copatame bajaraponé! ¡Panetocapit-sapaename jane Barrabás! jai judíovi.

Bajaraponé Barrabás bitso penacobetoxotsiné. Bajaraxuata penaneconitsivi pejebabiabibota, naneconitsiaponapona.

19 Pilato pijajivi itoroba Jesús pejumatatitibabenexatsi penaneconitsivi pejumaconitabiabimacata.

² Nexata pejumatatitibecujinaetsi vajabitsaé Jesús becoronacuenia tsimataexanatsi peejuvitoyoroto. Mataxatatatsi bajarapaejuvitoyoroto. Bajaraxuacujinae quenetsiataeya benacuaevetsinécuenia xatatatsi peraënaeyatsautsaucaejava. ³ Nexata vajabitsaé imoxoyoliatsi Jesús. Vajabitsaé capocaponaeya jumaitsi tsabutaponae Jesúsjavabelia:

—¡Bajaco, judíovi pepo pevetsiné! jai tsabutaponae.

Vajabitsaé pecobeta Jesús itabarapacababeyabuataponatsi.

⁴ Pilato nexata icatsia pitsapalia. Jumaitsi judíovijavabelia:

—Pacatocanaviarenatsi icatsia maberenaje paneyapétaenexa. Apo caxitajarabiné itsacujiruneconi ata pexanaejava, paneconi yabara naneconitsijitsia maponéje, jai Pilato Jesús yabara.

⁵ Nexata peejuvitoyoroto Jesús namataxatatatsiaya pitsaparena. Naxatata peraënaeyatsautsaucaejava. Nexata Pilato jumaitsi judíovijavabelia:

—¡Baja rajane nuca maponéje! jai Pilato.

⁶ Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonae vavajai.

—¡Cruzajavabelia cobematabiabarutsiaexanare!

¡Cruzajavabelia cobematabiabarutsiaexanare! jai bajarapamonae Jesús yabara.

Pilato nexata jumaitsi bajarapamonaejavabelia:

—Paxamé pacaponaremelia. Cruzajavabelia pacobematabiabarutsianame. Tsipaji raja xané apo caxitajarabiné itsacujiruneconi ata pexanaejava, jai Pilato.

⁷ Nexata judíovi jumaitsi Pilatojavabelia:

—Mara poné Dioso apo pejitsipaecuenia jumaitsi: “Xané raja Dioso pexénatoné,” jai. Paxané pajudíoviné patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponé baja bebeyaxuabatsi, jai judíovi Jesús yabara.

⁸ Pilato itsa jumetane bajarapamonae pejumaitsiyava: “Mara poné Dioso apo pejitsipaecuenia jumaitsi: ‘Xané raja Dioso pexénatoné,’ jai,” pejajjava Jesús yabara, nexata bitso Pilato junava. ⁹ Nexata icatsia Pilato pijaboyalia barějoneya Jesús. Yanijoba icatsia Jesúsjavabelia.

—¿Detsa nexata verena neponaené? jai Pilato.

Itsiata Jesús apo jumepitsi.

¹⁰ Nexata Pilato jumaitsi:

—¿Detsa xuajitsia apo nejumepitsimé? ¿Apo yapétaemé tsipaji mapanacua taevetsinécuenéje? Nejamatabécuenecaéjépa raja taitorobinexa tajajivi cruzajavabelia pecacobematabiabarutsinexa. Nejamatabécájépanua taitorobinexa pecacopatsinexa ata, jai Pilato.

¹¹ Jesús nexata jumaitsi:

—Itsa Dioso apo catocopatsi tsipae mapanacua nevetsinexaje, nexata xanéjavaberena ata apo cacaéjépa tsipae taneitsacueniabinexamé. Itsiata bairi jane poné necanjeta xamé necobeyabelia, bitso naneconita Diosojavabelia xamé matatoxenetsia, jai Jesús Pilatojavabelia.

¹² Itsa bajarapacuenia Jesús jumaitsi, nexata picani Pilato jamatabécopatatsi Jesús.

Itsiata bairi jane judíovi vavajai Jesús pecopatsiyaniatsi. Jumaitsi:

—¡Itsamonaé raja paxanéyajuvénévi jitsipa maponéje pevetsinénexatsi! ¡Nexata itsa copatsianame maponéje, naneconitsianame nijatuxanenéjavabelia, Romanonacua pepo pevetsinéjavabelia, pepo vajanacayanacuaevetsinéjavabelia jane baja! ¡Nexata maponébejeje nijatuxanenébeje naitoyabeje tsane! jai judíovi Pilatojavabelia.

¹³ Nexata Pilato itsa jumetane bajarapacuenia judíovi pejumaitsiyava, Pilato eca tribunalvénéjavata, xuata Pilato ecabiaba jivi itsa naneconitsiaexanaejitsia. Xuata Pilato ecabiaba jivi itsa naneconitsiaexanaejitsia, hebreojumeta pevéné Gabata. Bajarajota pirafaratsiira. Nexata Pilato itorobeca pijajivi pecapitsapaenexatsi Jesús Pilato pijabovecua. ¹⁴ Pascuavénéfiesta pejone-matacabinexa pevajénaeya pamatacabi, matoneje, bajarapacuenia Jesús exanatsi. Nexata Pilato jumaitsi tsecae judíovijavabelia:

—¡Mara jota nucaje papecaevetsinéje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema tēpae! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinēmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenë raja Romanonacua pevetsinë paxainajë pe-
po patanevetsinë. Paxanë raja apo paxainaanë itsanë
pematatsënëa pepo patanevetsinë, jai sacerdotevi pe-
namatacaitorobivi.

¹⁶ Nexata baja Pilato rajuta judíovi pecobeyabelia
Jesús pecobematabiabarutsinexatsi cruzajavabelia. It-
siata Pilato pijajivi itoroba Jesús pecaponaenexatsilia
petsutojumabelia.

Pacuenia jane baja Jesús cruzajavabelia cobematabi- abarutatsi yabara pelivaisi

¹⁷ Jesús nexata vajabitsaë ita caponaliatsi, capon-
aeyaexanatsi cruza, pacruzajavabelia Jesús cobe-
matabiabarutsijitsiatsi. Caponaliatsi Jivimatasipavënë
tsutojavabelia. Hebreojumeta bajarapatsuto pevënë
Gólgota. ¹⁸ Bajarapatsutojumata Jesús cruzajavabelia
cobematabiabarutatsi. Anijanëbeje yajavacobematabi-
abarutatsi. Caenë canacujitsia pijacruzata rubatsi. It-
sanë Jesús pecujanenia ruca. Itsanë Jesús pet-
savenonenia ruca. ¹⁹ Pilato pijajivi itoroba petoy-
aquinaenexatsi tablapayojumata. Nexata Pilato pijajivi
itoroba bajarapatablapayo petomatabiabarutsinexatsi
Jesús perucaecruzaupita. Jumai tsarucacae bajarapaitane
mapacueniaje: “Mara ponëje Jesús, Nazaret tomarapi-
jinëje, judíovi pepo pevetsinë,” jai tsarucacae bajarapai-
tane. ²⁰ Pajumatsutota Jesús cobematabiabarutatsi
cruzajavabelia, bajarapajumatsuto eca tomaravecua
imoxoyo. Bajaraxuata judíovi ayaibitsaëtoxaneto
tomarapijivi leba bajarapaitane. Bajarapaitane
yaquinaruta acueyabi paviriavibeje pijajumeta.
Yaquinaruta hebreojumeta, griegojumetanua, latín-
jumetanua. ²¹ Nexata sacerdotevi penamatacaitorobivi
jumaiatsi Pilatojavabelia:

—Apo xanepanae raja neyaquinarutsiaexanaenexa
mapejumaiatsiitaneje, “Mara ponëje, judíovi pepo
pevetsinëje,” pejaitane. Biji rajane icatsia yaquinarutsi-
aexanare pejumaiatsiitane mapacueniaje: “Mara ponë
jumaiatsije: ‘Xanë raja judíovi pepo taevetsinë,’ jai,” pe-
jaiitane icatsia yaquinarutsiaexanare, jai sacerdotevi
penamatacaitorobivi Pilatojavabelia.

²² Nexata Pilato jumaiatsi sacerdotevi penamata-
caitorobivijavabelia:

—Pacuenia baja yaquinarutsiaexanajë, bajarapacue-
nia jema rucae, jai Pilato sacerdotevi penamatacaitoro-
bivijavabelia.

²³ Vajabitsaë Jesús pecobematabiabarutsicujinaetsi
cruzajavabelia, Jesús penaxatatsijavami, xua jumapon-
apona, vajabitsaë nota. Cuatro xuabeje tsanaeya jeba.
Caenë canacujitsia natsicobetsanaejitsia. Saicaya tsa-
tabuata itsajava, xua Jesús naxatatabiaba piapiajavare-
ca. Bajaraxua apo xainae pecaucutsiajoronaejava.
Pecuejava saya caepanacujinae. ²⁴ Nexata vajabitsaë
najumaiatsi:

—Apo titicae tsanetsi bajaraxua. Canamuxusitsianat-
si beibotoxi vajayapëtaenexa ponë pitsijitsia bajarax-
ua, najai vajabitsaë.

Bajarapacuenia vajabitsaë ita exana, Jesús jane baja
tocopiapatatsi pacuenia baja cajena Dioso pejumeliv-

aisibaxutota, tajëvelia jumaiatsi Jesús penaxatatsijava
yabara. Dioso baja cajena pejumelivaisibaxutota,
tajëvelia jumaiatsi Jesús penaxatatsijava yabara ma-
pacueniaje: “Natsicobetsanaena tanaxatatsijava. Cana-
muxusitsiana beibotoxi peyapëtaenexa ponë pitsijit-
sia,” jai baja cajena tajëvelia Dioso pejumelivaisibaxu-
tota Jesús penaxatatsijava yabara. Nexata vajabitsaë
canamuxusita beibotoxi peyapëtaenexa ponë pitsijit-
sia piapiajavareca, Jesús penaxatatsijavami.

²⁵ Pacujinae abaxë Jesús athëbëyo ruca cruzata,
cruza bëxëpanata nubena acueyabi povamaxëto
ëMariävënëvanë. Itsava Jesús pena. Itsava Jesús pena-
va, Cleofas pijava. Itsava María, Magdala tomarapijiva.
²⁶ Nexata Jesús ita taerucaica, taenutsica pena, pija-
jivitonë bitso piasivanë yajava. Jesús pena pemux-
uneneta nuca bajaraponë. Jesús nexata jumaiatsi pena-
javabelia:

—Ena, maponë nuca nemuxunenetaje, benexëna-
tocuenia taename, jai Jesús penajavabelia.

²⁷ Bajaraxuacujinae icatsia Jesús jumaiatsi pijajivitonë-
javabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia
barëpona Jesús pena, Jesús pena penaecaenexa ba-
jaraponë pijabota.

Pacuenia baja Jesús tēpa yabara pelivaisi

²⁸ Jesús baja yapëtane petocopiarucaejavatsi daxita
pacuenia tajëvelia vajunupaebatsi Dioso pejumelivaisi-
baxutota. Nexata jane baja Jesús pecopiarutsinexa
daxita abaxë xua tosaicatsi, Jesús jumaiatsi:

—Mera bitso jitsipajë, jai Jesús.

²⁹ Nexata bajarajota vaxi eca. Vënëqueca piajatuvino-
ra. Nexata vajabitsaënë esponjavënëjava jabuta ba-
jaraporayalia. Bajaraxuacujinae naeboupita ruta ba-
jarapaesponjavënëjava. Toyotsiatsi Jesús. Tsiuiboru-
tatsi Jesús petsutsuninexa. ³⁰ Jesús nexata tsutsune ba-
jaraxua. Bajaraxuacujinae Jesús jumaiatsi:

—Daxita rajane baja taexanaejava, veretajë, jai Jesús.
Nexata irataeya tēpanajereca.

Pacuenia Jesús becuerebota yenecacuatatsi yabara pelivaisi

³¹ Pascuavënë fiesta junua. Nexata abaxë caemata-
cabi sajina pejonenexa judíovi penacueraevetsimata-
cabinexa. Bajaraxuata judíovi apo jitsipae Jesús bana
baja matavëjëa perubenaejava cruzata. Tsipaji pas-
cuavënë fiestamatacabi ita junua judíovi penacuer-
aevetsimatacabinexa, judíovi bitso banaja-
matabëcuenereviaba daxita penacueraevetsimatacabi-
anë matatoxenetsia. Bajaraxuata judíovi vajëta Pilato-
javabelia Pilato vajabitsaë pitorobinexa pethaëepatsi-
cababenexatsi Jesús bana, cruzata perubenaevi, bepija
bajarapamonae petëpaenexa. Itsa baja bajarapamon-
ae tēparubena, penotsinexatsitsica cruzavecua
pecaponaenexatsi itsajavabelia. ³² Nexata vajabitsaë it-
sa ponalia, Jesús peyajava cobematabiabarutsinëtsi-

beje asaëbeje abaxë tsarucæ. Bajaraxuata copiaya itsanë thaëepatsicabiabatsi. Bajaraxuacujinae icatsia itsanë thaëepatsicabiabatsi. ³³ Nexata Jesús vajabitsaë itsa cujibaliatsi, taerutatsi baja Jesús petëpaenë. Bajaraxuata Jesús apo thaëepatsicabiabitsi.

³⁴ Itsiata baitsi jane vajabitsaëviyajuvënënë becuerebota Jesús yencacuatatsi. Bajarapavajënëyarena pitsapa pijana, mera yajava. ³⁵ Xanë raja, Juannë, pacatoyaquinatsi mapalivaisije. Tataenë bajarapacuenë. Nexata xanë yapëtaniji bajarapacuenë pexaniajaicuenë. Nexata bajarapalivaisi pacatoyaquinatsi panejumecovënësinexa paxamë ata. ³⁶ Bajarapacuenia Jesús apo thaëepatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaiti Jesús yabara. Dioso baja cajena pejumelivaisibaxutota Jesús yabara tajëvelia jumaiti mapacueniajaje: "Apo siepatsicabiabi tsanetsi itsiata caesitoyo ata," jai baja cajena tajëvelia Dioso pejumelivaisibaxutota Jesús yabara. ³⁷ Itsabaxutota pijinia tajëvelia jumaiti Jesús yabara mapacueniajaje: "Bajarapamonæ taena pecacuatsivajënëtsi," jai baja cajena itsabaxutota Jesús peyenecacuatsijavanexatsi yabara.

Pacuenia Jesús petëpaenë mëthëtatsi yabara pelivaisi

³⁸ José, Arimatea tomarapijinë. Bajaraponë judíovi pevetsiviyajuvënënë. Nexata José jumecovënëtaaponapona Jesús Cristocuene. Itsiata apo najamatabëcueneitajëtsi pejumecovënëtsijava Jesús Cristocuene. Tsipaji cujunava penajuaevetsivi judíovi. Nexata baja Jesús itsa tëpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë. ³⁹ Nicodemo, ponë meravi pona pebarëcuaicuaijainexa Jesús, bajaraponë ata judíovi pevetsiviyajuvënënë. Nexata Nicodemo Joséta nalia. Caponabeje treinta pakilobeje petuxujuvibenonë, pematajërëabibenonë petuxujuvijavata. ⁴⁰ Nexata Josébeje Nicodemobeje cruzajavavetsica pitsicabeje Jesús petëpaenë. Petsiothocaecujinaebeje petuxujuvibenonë, pexaniaviria piapiasábanapanata mataquionaeya daxitanëreca matakacëbabeje. Bajarapacuenia exanabeje tsipaji judíovi baxaniavaeta petëpaejiviyo pemëthëtsinexa bajarapacuenia. ⁴¹ Itsajota Jesús cruzajavabelia cobematabiabarutatsi, bajarajota imoxoyo peubinaenë ayaibacabaxaneto eca. Bajarapabacabojavata Jesús petëpaevajënaeya, José cajena exanaeyaexanabuata iboitapajanitojavata pinijilbovaju. José pijamonæjivi itsa totëpatsi, pebuatsinexa bajarapaibovajulia. José ata itsa tëpa, pebuatsinexatsi bajarapaibovajulia. Nexata bajarapaibovajulia abaxë itsajiviyo ata petëpaejiviyo apo buatsitsi. ⁴² Nexata bajarapaibovajulia Josébeje Nicodemobeje Jesús petëpaenë buatabeje. Tsipaji bajarapaibovaju boca imoxoyo. Judíovi ata baja penacueraevetsimatacabinxæ, bitso baja imoxoyo pejonenexa. Bajaraxuata bajarapaibovajulia Jesús petëpaenë buataatsi.

Pacuenia Jesús petëpaecujinae icatsia asaë yabara pelivaisi

20 Judíovi baja penacueraevetsimatacabi verevereca. Nexata meravìa pitsijavata, bajayacunua, ajena matacabi tsarucapona, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvëpavecua. ² Nexata María cujinaejinarena itsaberena Simón Pedro ponapona. Bajarajota Simón Pedro yjavaponapona itsanë Jesús pijajivitonë, ponë bitso asiva Jesús. Nexata María jumaiti bajaraponëbejevabelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buataatsi, jai María.

³ Nexata Pedrobeje Jesús pijajivitonëbeje ponabeje Jesús pebuatsiibovajutsijavabelia. ⁴ Najucujinaejinaliabeje. Itsiata itsanë Jesús pijajivitonë bitsojinaeya cujinaejina Pedro matatoxenetsia. Bajaraponë copiaya palia Jesús pebuatsiibovajutsijavabelia. ⁵ Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajulia. Bajaraponë itsiata abaxë apo jonelia. ⁶ Bajaraxuacujinae Simón Pedro cotocaevi pata. Nexata ibovajulia Pedro joneya. Pedro ata tane Jesús pematacacëbipanamitsireca pebocaejava bajarajota. ⁷ Papanata Jesús saicaya matakëtsatsi, apo yjavabocæ bajarajota. Saicayjavata xaniavaetsia quionabuata. ⁸ Nexata ponë copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponë jumecovënëta xaniavaetsia Jesús icatsia piasaëjava petëpaecujinae. ⁹ Abaxë picani bajaraponë apo jumeyapëtae pacuenia Dioso pejumelivaisibaxutota jumaiti Jesús petëpaecujinae icatsia piasaëjavanexa yabara. ¹⁰ Bajaraxuacujinae Jesús pijajivitonëbeje naviatabeje baja pijaboyabelia.

Pacuenia Jesús petëpaecujinae tsitanaitajëta María Magdala tomarapijivajavabelia yabara pelivaisi

¹¹ María nuenuca Jesús petëpaenë pebuatsiibovajutsijumavelia. Nexata María yaitaxutonueya nabëxëtsutsiaya naëcolia ibovaju bëxëpanalia. ¹² Nexata María taeyelia anijanëbeje ángelnëbeje, penioponaeyava penaxatatsinëbeje. Ecabeje itsajota picani Jesús petëpaenë buataatsi. Itsanë eca Jesús pematabocotomijavavereca. Itsanë eca Jesús petaxumijavatsina. ¹³ Nexata ángelnëbeje jumaitsiibeje Maríjavabelia:

—¿Detsa xuajitsia nuame? jaibeje.

María nexata jumaitsi:

—Tsipaji covë itsamonæ jutatsi tajatuxanenëmi. Nexata apo yapëtaenë itsabelia icatsia buataatsi, jai María ángelnëbejevabelia.

¹⁴ María ajena najumeveretanajelia bajarapacuenia pejumaitsijava, napënëyorotsiaya naëcolia. Taenuta

Jesús penucaejava bajarajota. Itsiata abaxë María apo yapëtae Jesúsucue. ¹⁵ Nexata Jesús jumaitsi Maríjavabelia:

—¿Detsa xuajitsia nuame? ¿Jipatsa jaitame? jai Jesús. María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavabelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsijitsianë tacaponaenexa, jai María.

¹⁶ Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsiyume: “Xamë tanecujarubinëmë,” pejaijume.

¹⁷ Jesús nexata icatsia jumaitsi Maríjavabelia:

—Pëtsa nejayaremena. Tsipaji raja abaxë apo pon-aenë taxa peecaejavabetsia. Ponare jane tajajivijavabelia. Tsipaebianame tajajivijavabelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríjavabelia.

¹⁸ Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

Pacuenia Jesús petëpaecujinae tsitanaitajëta pijajivijavabelia yabara pelivaisi

¹⁹ Pamatacabi María tane Jesús, icatsia itsa asaë petëpaecujinae, bajarapameravi nacaetuata daxita Jesús pijajivi. Daxita baupanë xaniavaetsia nayabau-paxataba. Tsipaji Jesús pijajivi judíovi cujunava. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁰ Bajarapacuenia Jesús pejumaitsicujinae, pijajivijavabelia tsitajëta pecobevajënëbeje. Nayenevajënëitajëtanua pijajivijavabelia. Bajarajota Jesús pijajivi bitso barëya icatsia petaexae pijatuxanenë. ²¹ Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

²² Nexata Jesús uxunelia asaëyata pijajivi pematat-sënëalia. Jumaitsi pijajivijavabelia:

—Espíritu Santo pacopiapire panejamatabëëthëtota papecatsijamatabëecaenexa. ²³ Nexata itsamonae pibisiacuene pexanaeneconi itsa pavecuajibiaexanaename, nexata baja pibisiacuene pexanaeneconimi pepacuene vecuajibitsi tsane. Itsa apo pavecuajibi-

aexanaemë tsane itsamonae pibisiacuene pexanaeneconi, nexata pibisiacuene pexanaeneconi apo vecuajibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpaecujinae yabara pelivaisi

²⁴ Jesús pijajiviyajuvënë, pevënë Tomás, ponë vënërubatsi itsavënë, Sapalanë. Bajaraponë pijabit-sarucaejavata, Jesús pijajivijavabelia tsitanaitajëta.

²⁵ Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacuene taenajë cruzajavabelia clavota pecobematabiabarutsivajënëtsibeje, nacobesibët-sianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpaecujinae, jai Tomás Jesús yabara.

²⁶ Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁷ Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpaecujinae, jai Jesús Tomásjavabelia.

²⁸ Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

²⁹ Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpaecujinae. Tsipaji baja nijacuata netaneme. Xamë matatoxenetsia bitso nesivajamatabëcuenebarëya tsane pamonaepo netae ata, itsiata jumecovënëta icatsia tasaëjava tatëpaecujinae, jai Jesús Tomásjavabelia.

Pajamatabëcuene yabara yaquina mapacuyalatoje yabara pelivaisi

³⁰ Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi apo yajavayaquinaenë mapacuyalato-taje. ³¹ Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacapanepaenexa, panejumecovënëtsinexanua Jesús Dioso pexënatocuene. Nexata itsa pajumecovënëtsianame mapalivaisije, paxainaname matacabi apo pevereverecaejava Jesús pejamatabëcueneta.

Pacuenia Jesús petëpaecujinae icatsia itsa asaë, tsitanaitajëta pijajivijavabelia, siete ponëbejejavabelia, yabara pelivaisi

21 Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitsije. ² Caejavata Jesús pijajivi najuajinavanapa mapamatabëxëyoje. Najuaponaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaponaponabeje pijinia anijanëbeje, Zebedeo ëpexënatobeje. Najuaponaponabeje pijinia itsanëbeje icatsia pematatsënhë. Natanael ata naponapona bajarajota. Canävënë tomarapijnë Natanael. Canátomara eca Galilea nacuata. ³ Nexata Simón Pedro jumaitsi penajuajinavanapaevijavabelia:

—Dujuai raja yamatajucaeitsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetojavabelia pona. Bajarajotalia jera-ta naropoba. Itsiata bajarapameravi caenë ata dujuainë bajarapamonae apo yamatajutsi. ⁴ Ajena baja matabacabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesúscuene.

⁵ Nexata Jesús jumaitsi pijajivijavabelia:

—¿Jica? ¿Djuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

⁶ Nexata icatsia Jesús jumaitsi pijajivijavabelia:

—Dujuai paneyamatajucaejava, panecujanenia pamuxunene, pacoparemeca jerayenepanareca. Bajarpacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia copareca. Bajaraxuacujinae pejuatsinexatsina menevecua apo caëjëpaetsi. Tsipaji bitso ayaijava dujuai tojunuatsi. ⁷ Nexata Jesús pijajivitonë, ponë Jesús bitso asiva, bajaraponë jumaitsi Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitsijava Jesús yabara, jumasa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia. ⁸ Jesús pijajivi meneitapavecua tajë apo yarubena. Cien metrocuenia saya yarubenalía. Nexata itsamonae Pedrobanapenajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai. ⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava. ¹⁰ Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponanemina panexaniavaetsinexa, jai Jesús pijajivijavabelia.

¹¹ Pedro nexata jeraënëa berunareca tajetabuabere-na peyarobobocaenexarena dujuai peyamatajucaejava. Nexata bajaraxua dujuai vënëca pinijidujuainëanë. Ciento cincuenta y tres ponëbeje. Itsiata dujuai peyamatajucaejava, dujuai ayaijava ata, apo yaucuucuae.

¹² Nexata Jesús jumaitsi pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanë ata Jesús pijajivitonë apo yanijobi Jesúsjavabelia. “¿Jipatsamë?” apo jai. Tsipaji baja bajarapamonae yapëtane pijatuxanenë Jesúscuene. ¹³ Jesús nexata cujilia bajarapaisoto. Pita baja panbëanë. Tsicobetsana pijajivi. Bajarapacuenia icatsia Jesús dujuaijavanë ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajëta, petëpaecujinae icatsia itsa asaë.

Pacuenia Jesús petëpaecujinae itsa naitajëta cuaicuajai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

—Simón, Jonás pexënatomë, ¿xamë tsaja bitso niasivamë mapamonae taneasivajava matatoxenetsiaje? jai Jesús.

Pedro nexata jumaitsi:

—Jãjã. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinë xaniavaetsia baeveta pijaoveja, bajara pijinia pacuenia xamë xaniavaetsia netoetabianame tajajivi, pamonaetanepejanajumecovënëtsivi. Bajarapamonae taniji betajaovejaxicuenia, jai Jesús.

¹⁶ Nexata icatsia Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai.

Pedro nexata icatsia jumaitsi:

—Jãjã. Xamë rabaja nejamatabëcueneyapëtaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamë netoetsianame tajajivi, pamonaenesivanajamatabëcopata xanëjavaberena. Bajarapamonae taniji betajaovejacuenia, jai Jesús.

¹⁷ Icatsia matavëjëa Jesús jumaitsi Pedrojavabelia:

—Simón, Jonás pexënatomë, ¿xamë tsaja niasivamë? jai icatsia.

Pedro nexata bejamatabëjiobireca matavëjëa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamë baja cajena yapëtaneme dexitacuene. Nexata baja nejamatabëcueneyapëtaneme bitso tacaasivajava, jai Pedro.

Jesús nexata tajëvelia jumaitsi Pedrojavabelia:

—Nexata xamë netoetsianame tajajivi, pamonaetaniji betajaovejacuenia. ¹⁸ Xaniajanë pacuenia catsipaebijitsiatsi. Itsa abaxë pamatabacabi pevëjëatomë, naxatatabiabame nenaxatatsijava nijacuata. Nexata nejitsipaejavabelia ponabiabame. Itsa pamatabacabi pe-

rujunëmë tsane, pacuenia bitso perujunëyo bana-maxëcaeveta itsajivi pijacamisa pexatatsinexatsi, bajarapacuenia namaxëcaevetsianame itsamonae pecacobecëtsinexa pecacaponaenexa itsabelia picani apo jitsipaemë tsane neponaejava, j Xaniajanë pacuenia catsipaebijitsiatsi. Itsa abaxë pamatacabi pevëjëatomë, naxatai Jesús tajëvelia Pedrojavabelia.

¹⁹ Bajarapacuenia Jesús jumaitsi Pedrojavabelia Pedro tajëvelia peyapëtaenexa pacuenia beyaxuabijitsiatsi Dioso pejumelivaisi pejumecovënëtsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepënaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonë, ponë bitso Jesús asiva, penavajunupaebijava yabara pelivaisi

²⁰ Xanë Juannë, Jesús pijajivitonënë, bitso taneasivanë. Pamatacabi caniviyopijijava panabaniji Jesús pebeyaxuabivajënaetsi, xanë Jesús pemuxuneneta ecajë. Nexata bajarajota yanijobecajë. “Tajatuxanenë, ¿jipatsa cacanajetsiana nijavajabitsaë pecobeyabelia?” janë Jesúsjavabelia. Nexata Jesús pebeyaxuabicujinaetsi, icatsia itsa asaë, panetsitanaitajëta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanë pecovëvelia cotocaevajë. Nexata Pedro Jesús pecovëya najetaruca. Pedro itsa napënëyorotaba caevëarena, netaetaba bajaraponëbeje pecovëya tanajetarucaejava. ²¹ Nexata Pedro itsa netane, xanë tatëpaejavanexa yabara, yanijoba Jesúsjavabelia.

—Tajatuxanenë, ¿detsa pacuenia tēpaena maponëje? jai Pedro Jesúsjavabelia.

²² Jesús nexata jumaitsi Pedrojavabelia xanë yabara:

—Itsa xanë tojitsipaejitsipajë bajaraponë piasaëtsaponaponaenexa, asaë tsaponapona tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponapona tsane nexanaejava, pacuene caitorobatsi, jai Jesús Pedrojavabelia.

²³ Bajaraxuata patanajuajinavanapaevi, Jesús pijajivi, xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanë tojitsipaejitsipajë bajaraponë piasaëtsaponaponaenexa, asaë tsaponapona tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

²⁴ Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

²⁵ Jesús pinijicuene pexanaejavanë Dioso pesaëta, ayaijava exana mapanacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayaijava tsipae. Nexata meta bajarapalivaisibaxutonë vënëcaejitsipa mapanacuataje.

HECHOS

Pacuenia Jesús tajëvelia vajunupaeba Espíritu Santo pepatsijavanexatsica mapanacuayabetsicaje yabara pelivaisi

1 Teófilo, xanë Lucasnë, catoyaquinatsi mapabaxutoje. Copiaya baja cajena catoyaquinatsi itsabaxutota daxita Jesús pexanaejavanë pelivaisi. Nexata copiyapijibaxutota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanalivaisi jivi tsipaebaponapona, abaxë itsa ponapona mapanacuataje, bajarapalivaisi ata catoyaquinatsi. ² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiyapijibaxutota tacatoyaquinaejava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviyajuvënëvi apóstolevinexa. Nexata Jesús itoroba pijajivi, apóstolevi, jivi pexanalivaisi petsipaebanajetarubenaenexa daxitanacuanëjava. Espíritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi. ³ Bajaraxuacujinae Jesús pijavajabitsaë beyaxuabatsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajëtsixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaiti pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapaename abaxë Espíritu Santo. Bajaraponë yabara taxa Dioso najumecapanepaeya jumaiti papecatoitorobinexatsica. Xanë ata bajaraponë yabara pacatsipaebatsi baja cajena panecopiaevetavanaenexa. ⁵ Juanpijinë raja jivi bautisabanajetaruca ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pijajivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaiti mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaje pecopatsinexa, xamë vecuapitsapaeyaexanaename mapamatacabitaje? ¿Nexata tsaja vajaviriavi judíovi juya evetsiaexanaename vajanacayanacuaevetsinexa? jai Jesús pijajivi.

⁷ Nexata Jesús jumaiti pijajivijavabelia:

—Xua yabara paneyanijobame, paneyapëtaenexa, taxa Dioso apo pacatocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copiapatsijitsia. Caenë taxa Dioso yapëthane pamatacabi bajaraxua copiapatsijitsia. ⁸ Itsiata baitsi jane paxamë ajumejunavijibia papaebianame xanë talivaisi Espíritu Santo itsa pacatsijamatabëpatsianica paxamëjavabetsica. Nexata panelivaisipaebanajetarubenaename Jerusalén tomarajava, Judea nacujava ata, Samaria nacujava ata, tajënacuatavujava ata, jai Jesús pijajivijavabelia.

⁹ Bajarapacuenia Jesús pejumaitisicujinae pijajivijavabelia, Jesús baja pijajivi pitabënejeva, athëbëabetsia Dioso caponatsi. Itarërëbo baja Jesús pëcaevaya. Nexata baja Jesús pijajivi acuenebi matavëjëa petaejava.

¹⁰ Nexata Jesús pijajivi pëtaenubena athëbëabetsia Jesús pepëcaevijavatsia. Nexata ángelnëbeje, penioponejava penaxatatsinëbeje, Jesús pijajivi jemata bajarajota tsitanaitajëtatsi. ¹¹ Nexata ángelnëbeje jumaitisibeje Jesús pijajivijavabelia:

—PaGalilea nacuapijivimë, ¿detsa xuajitsia athëbëabetsia pataenubename? Bajaraponë Jesús paxamëjavavetsia Dioso pacavecuacaponatsi athëbëabetsia. Bajaraponë icatsia itsamatacabi patsianica. Pacuenia pataneme petsiajava, bajara icatsia pacuenia patsianica, jai ángelnëbeje Jesús pijajivijavabelia.

Pacuenia Jesús pijajivi natsicueyaitapeta Matíasvënënë apóstolenënexa yabara pelivaisi

¹² Jesús baja peponaecujinae athëbëabetsia, Jesús pijajivi, apóstolevi, naviaba Jerusalén tomaraberena. Naviaba olivonaenë penubenaetsutojavaverena. Bajarapatsuto eca caekilómetrocuena Jerusalén tomaravecu. ¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa,

athëbëyo pexanaeirajavabetsia junaya. Tsipaji baja cajena tsicopatatsi bajarapairatatsia pejinavanapaenexa. Pamonae Jesús pijajivi apóstolevi, mapevënëanëje. Itsanë pevënë Pedro. Itsanë Santiago. Itsanë Juan. Itsanë Andrés. Itsanë Felipe. Itsanë Bartolomé. Itsanë Mateo. Itsanë Santiago, Alfeo pexënato. Itsanë Simón. Bajaraponë celotenë. Itsanë pevënë Judas, Santiago pejuyapijinë. ¹⁴⁻¹⁵ Pabota Jesús pijajivi apóstolevi najinavanapa, athëbëyo pexanaeirajavatatsia, nacaetuatabiaba caejavata pevajëtabiabinexa Diosojavabelia. Jesús pena María, Jesús pejuyapijivi ata, itsapetiriavi ata yajava, nacaetuatabiaba pevajëtabiabinexa Diosojavabelia. Bajarapajivibitsaëto ciento veinte pajivibeje. Nexata penacaetuatsijavata bajarapamonae tuatuajëta Pedro nonotapuna. Pedro nexata jumaiti penacaetuatsivijavabelia:

¹⁶ —Tajamonae, copiapata rajane baja pacuenia baja cajena tajëvelia jumaiti Dioso pejumelivaisibaxutota. Pacuenia bajayata Davidpijinë Espíritu Santo pejamatabëcueneta tajëvelia vajunupaebiaexanatsi Judaspijinë pexanaejavanexa, copiapata jane baja. Tsipaji Judaspijinë itsa matacapona pamonae Jesús vaetabijitsiatsi, Judaspijinë tocopiapatatsi baja pacuenia Davidpijinë tajëvelia jumaiti. ¹⁷ Judaspijinë picani paxanëyajuvënëniemi. Jesús picani bajaraponëmi itapeta penanacuenebinexa paxanëta. ¹⁸ Judaspijinë ira comuata pibisiacuenepexanaematamopalatata. Bajaraponëmi pijacuata nabeyaxuaba. Nexata penabeyaxuabicujinae, pematono ira bejopaica. Nexata cototititicajunua. Daxita pënëmi pitsatajarabarena. ¹⁹ Daxita Jerusalén tomarapijivi vënëlivaisitanetsi daxita xua tocopiapatatsi Judaspijinëmi. Nexata Judaspijinëmi pecomuatsiira, Jerusalén tomarapijivi vënërua Acéldama. “Acéldama,” itsa jai bajarapamonae pijajumeta, mapajumetaje pejumaitisijume: “Papalata pejamatabëcueneta jivitonë beyaxuabatsi, bajarapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaiti penacaetuatsivijavabelia:

—Salmosvënëbaxutota tajëvelia Judaspijinë yabara comparacióncuenia jumaiti mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajëvelia Salmosvënëbaxutota Judaspijinë apóstolenë penaexanaejavavecua pepit-sapaejavanexa yabara.

Itsajavata Salmosvënëbaxutota icatsia tajëvelia jumaiti Judaspijinë yabara mapacueniaje:

Bajaraponëmi penacuenebijavami, itsanë pitsiana, jai itsajavata Salmosvënëbaxutota itsanë icatsia apóstolenë penaexanaejavanexa yabara Judaspijinë pepit-sapaejamatabëcueneta, jai Pedro penacaetuatsivijavabelia.

²¹ Icatsia Pedro jumaiti:

—Caenë panetsicueyaajibi doce paponëbejenexanë Jesús petëpaecujinae Dioso icatsia piasaëyaexanaejavatsi patataejava patanajuapaebinexa. Bajaraxuata bitapetatsi itsanë patanayanabinexa. Paxamë tuatuajëta ena patanajuapënjavanapaevi vajatuxanenë Jesús pamatacabi abaxë ponapona mapanacuataje.

²² Juanpijinë raja bautisaba Jesús. Bajara pamatacabi-javaveliacujinae, panajuapënjavanapajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinexa, jai Pedro penacaetuatsivijavabelia.

²³ Nexata pamonae nacaetuata, Dioso pejumecovënëtsivi, anijanëbeje itapeta, Pedrobana jane baja Jesús penajuapënjavanapaevi. Bajaraponëbejeyajuvënëniemi caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías. ²⁴ Bajaraxuacujinae bajarapamonae najumaiti:

—Vajëtsianatsi Diosojavabelia vajanacayapëtaeyaexanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonae pevajëtsijavata Diosojavabelia, jumaiti mapacueniaje:

—Patajatuxanenë, daxitajivi nejamatatabëcueneyapëtaenë. Maponëbejeyajuvënëniemi, ponë itapetame apóstolenënexa, panetsitajëre. ²⁵ Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonae pevajëtsijavata Diosojavabelia.

²⁶ Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenënexa. Nexata bajarapamonae yapëtane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

Pacuenia jane baja athëbëvetsica Espíritu Santo patsica Jesús pijajivi petsijamatabëjonenexatsi yabara pelivaisi

2 Itsa baja panepa cincuenta pamatacabibeje pascuavënëfiesta pevereverecaecujinae, icatsia junua Pentecostësvënëfiesta. Nexata bajarapamatacabi daxita Jesús pijajivi nacaetuata caejavata. ² Nexata bajarapamatacabi athëbëvetsica jemata najumeta bepinijiviboxaneto. Nexata pabota Pedrobana nacaetuate-na, daxitabo najumeteca. ³ Bajarapamonae tane athëbëvetsica perunaejavatsica bepitarunutsicotia. Nexata bajarapamonae caejivi canacujitsia bajarapacotia tsimatanatsanaeyarunaicatsi. ⁴ Nexata daxita bajarapamonae tsijamatabëvënëcatsi Espíritu Santo. Nexata bajarapamonae jemata taxuxuaba penatsipae-bijava itsaviriajumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsaviriajumenëta natsipaebiaexanatsi.

⁵ Bajarapamatacabita Jerusalén tomarata jinavanapa ayaibitsaëtojaneto judíovi. Bajarapamonae saicaya daxitanacuanëjava penaexanaevi. Bajarapamonae saya napata Jerusalén tomarata penataenexa Pentecostësvënëfiesta. Bajarapamonae bitso pejumecovënëtsivi Dioso. ⁶ Nexata bajarapamonae itsa jumetane

bepinijjoviboxaneto athëbëvetsica penajumetsijava, nexata pabota Jesús pijajivi nacaetuatenä, bajarapabota muxunanacaetuana ayaibitsaëtoxaneto bajarapamonae. Paviriajumenëta Jesús pijajivi Espiritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabara Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilivaisianë. ⁷ Athëbëvetsica bepinijjoviboxaneto penajumetsijava pemuxunanacaetuanaevi, pinijicuenia najamatabëxainäeya jamatabëcuenenabenajaca. Nexata bajarapamonae najumaitsi:

—Daxita mapamonae nacatsipaebanubenaje, Galilea nacuapijivi. Apo penatsipaebivi picani vajajumenë.

⁸ Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vajanaexanaejavaveliacujinae vajanatsipaebijumenëta caëjöpatsi penatsipaebinexa mapamonaeje? ⁹ Vaxaitsiyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. ¹⁰ Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomarapijivi. Bajarapamonae apo judíovi ata, Dioso jumecovënëtanapata pacuenia vaxaitsi judíovitsi jumecovënëtanapatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilivaisianë vajajumenëta. Caejivi canacujitsia bajarapamonae Dioso pinijicuenie pexanaejava yabara nacatsipaebapona, najai athëbëvetsica bepinijjoviboxaneto penajumetsijava pemuxunanacaetuanaevi.

¹² Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

Pacuenia Pedro tsipaeba athëbëvetsica bepinijjoviboxaneto penajumetsijava pemuxunanacaetuanaevijavabelia yabara pelivaisi

¹⁴ Apóstolenë Pedro nonotapuna once ponëbeje apóstolevi yajava. Nexata Pedro pinijijumeta jumaitsi athëbëvetsica bepinijjoviboxaneto penajumetsijava pemuxunanacaetuanaevijavabelia:

—Tajamonae judíovi, Jerusalén tomarata panenapat-sivi, panenamuxunaevere. Paxamë ata Jerusalén tomarata paneenaevi, xaniavaetsia panenamuxunaevere paneyapëtaenexa xua yabara pacatsipaebijitsiatsi. ¹⁵ Paxamë mapamonae yabaraje pajumaitsimë: “Aitajibi ra saya mapamonaeje,” pajamë. Mara pamonaevi apo aitajibije. Bajayacunuaepato raja abaxë maje. Bajarapaepatota jivi apo aitajibi tsabiabi. ¹⁶ Mara pamonaevi paxamë panijajumenëta Espiritu Santo pejamatabëcueneta natsipaebiaexanatsije pecopiapatsixae baja xua bajayata tajëvelia Joelpijinë Diosojumepabinëmi vajunupaeba. Bajaraxua yabara Dioso pejumaitsiyava Joelpijinë bajayata tajëvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajënae tsane mapanacua peveverecaenexaje, itorobianicajë Espiritu Santo daxitanacuapijivi, pamonaevi tajajivi petsijamatabëjonexatsi. Daxita panexi, pebijivi, petiriavi, paebiana palivaisi Espiritu Santo paebiaexanaenatsi, xanë talivaisi. Pevëjëavi pebijivi taena xua tsitajëtsianajë bemajitsinaebocuenia. Perujuvi pebijivi piamajitsinaejavata tsipaebianajë. ¹⁸ Nexata daxita pamonaevi tanetonacuenebivi, pebijivi, petiriavi ata, bajarapamat-acabi Espiritu Santo toitorobianicajë petsijamatabëjonexatsi. Nexata bajarapamonae paebiana xanë talivaisi. ¹⁹ Tsitajëtsianajë itaboxotatsia pinijicuenie taexanaejava. Daxita mapanacuajava ata pinijicuenie taexanaejava tsitajëtsianajë. Ayai tsane pijana. Ayai tsane isotocotia. Ayai tsane petsëxë mapanacuataje. ²⁰ Nexata matabicapijijuumeto aitaquiri tsane. Meravipijijuumeto bepijana itatsobia tsane. Bajara itsane mapanacuataje itsa baja peneta imoxoyo pevajënae tsane icatsia pepatsimatacabinexatsica pepo petuxanenë. Bajarapamatacabi bajaraponë pinijicuenie pexanaejava pecaëjëpaenëcuenetsi, tsitajëtsiana daxitajivijavabelia. ²¹ Nexata pajivi navajëtsiana pepo petuxanenëjavabelia, bajarapajivi capanepaenatsi,” jai Dioso, jai bajayata tajëvelia Joelpijinë Diosojumepabinëmi Dioso pejumaitsiyava bajaraxua yabara, jai Pedro athëbëvetsica bepinijjoviboxaneto penajumetsijava pemuxunanacaetuanaevijavabelia.

²² Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapëtaenexa xua yabara pacatsipaebijitsiatsi. Jesús, Nazaret tomarapijinë, Dioso pesaëta pinijicuenie pexanaejava exanapona paxamë tuatuajëta. Nexata Jesús pacayapëtaeyaexana Dioso ayaicuenie pexanaejava pecaëjëpaenëcuenetsi. Bajarapacuenia paxamë baja payapëtaneme Jesús Dioso pitorobinëcuenetsi. Xaniavaetsia rabaja payapëtaneme paxamëjavata Jesús pexanaejava bajarapapinijicuenie. ²³ Bajaraponë Jesús paxamë panecobeyabelia canajetatsi. Nexata paxamë pabeyaxuabame. Tsipaji patocopatame piamatabëcuenebejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tsipaji baja cajena Dioso tajëvelia najamatabëxaina bajarapacuenia Jesús panebeyaxuabinexa. ²⁴ Itsiata baitsi jane Jesús petëpaecujinae

Dioso icatsia asaëyaexanatsi. Dioso capanepatsi petëpaejavavecua. Tsipaji Jesús Dioso pexënatoxae, acuenebi pematatoxenetsijavatsi petëpaejava. ²⁵ Bajayata Davidpijinë tajëvelia yaquina Dioso pejumelivaisibaxutota Jesús icatsia piasaëjavanexa petëpaejinae. Davidpijinë itsa yaquina Jesús pejumaisijava Diosojavabelia icatsia piasaëjavanexa petëpaejinae, yaquina mapejumaisiitaneje:

Yapëtaniji Dioso taneyajavaponaponaajava. Tamuxuneneta ponapona, tacujuanenia. Bajaraxuata apo junavinë tsane. ²⁶ Bajaraxuata jamatabëcuenebarëyanë tsane. Nexata jivijavabelia tsipaebianajë tajamatabëcuenebarëyajava. Bajaraxuata yapëtaniji tatëpaejinae icatsia tasaëjavanexa. ²⁷ Xamë, Diosomë, apo necopatsimë tsane petëpaevi peponaenacuayabelia. Apo necopatsimënu tsane taperabëtsabanaenexa nexënatonë. ²⁸ Netsitajëtame baja cajena taponaenamutonexa taxainaenexa matababi apo pevereverecaejava. Nejamatabëcuenebarëyaexaname itsa neyajavaponapona, pejaiitane bajayata Davidpijinë yaquina Dioso pejumelivaisibaxutota Jesús pejumaisijava Diosojavabelia, jai Pedro athëbëvetsica bepinijijoviboxaneto penajumetsijava pemuxunanacaetua-naevijavabelia.

²⁹ Icatsia Pedro jumaisi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainëmi Davidpijinë yabara. Bajayata baja tëpa Davidpijinëmi. Nexata mëthëtatsi. Yapëtanetsi itsajota mëthëtatsi. ³⁰ Davidpijinëmi raja Diosojumepaebinëmi profetanëmi. Davidpijinëmi baja cajena yapëtane pacuenia Dioso pexaniajajumeta najumecapanepaeya jumaisi. Davidpijinëmijavabelia Dioso najumecapanepaeya jumaisi mapacueniaje: “Pacuenia xamë evetame Israelnacua, bajara icatsia pacuenia bexëajavabelia caenë nemomoxiyajuvënë evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinëmijavabelia Jesús yabara.

³¹ Davidpijinë baja cajena tajëvelia yapëtane Jesús athëbëvetsica Dioso pitorobijavanexatsi jivi peca-panepaenexa. Tajëvelia yapëtanenua Jesús petëpaejinae Dioso icatsia piasaëyaexanaejavanexatsi. Bajaraxuata bajayata Davidpijinë tajëvelia cajena vajunupaeba Jesús petëpaejinae Dioso icatsia piasaëyaexanaejavanexatsi. Davidpijinëmi peyaquinaebaxutota tajëvelia Jesús yabara jumaisi mapacueniaje: “Nexata apo copatsi tsanetsi petëpaevi peponaenacuayabelia. Apo copatsi tsanetsinua peperabëtsabanaenexa,” jai baja cajena Davidpijinë peyaquinaebaxutota Jesús yabara. ³² Bajaraxuata Jesús baja icatsia Dioso asaëyaexanatsi petëpaejinae. Jesús Dioso piasaëyaexanaejavatsi, daxita baja paxanë pataniji. Bajaraxuata pacatsipaebatsi. ³³ Jesús caponatsi athëbëbetsia Dioso pecujuanenia pecaenexa. Nexata baja paxa Dioso rajutatsi Espiritu Santo pacuenia baja cajena najumecapanepaeya Dioso jumaisi. Nexata bajaraxuacujinae Jesús juya itorobica Espiritu Santo paxanëjavabetsica. Nexata xua pinijicuene pexanaejava, aeconoxae pataenubename, pajumetanemenua, pali-

vaisianë mapamonae panijajumenëta pacatsipaebaje, bajaraxua Espiritu Santo pejamatabëcueneta exana.

³⁴ Itsiata baitsi jane ponë athëbëbetsia Dioso caponatsi, apo Davidpijinë. Davidpijinë bajayata tajëvelia Jesús yabara jumaisi mapacueniaje:

Dioso jumaisi tajatuxanenëjavabelia: “Evetecare abaxë tacujuanenia. ³⁵ Vecatsivajënae jumecovënëtsiaexanaenatsi abaxë copiaya nijavajabitsaë nitorobicienianexa,” jai Dioso tajatuxanenëjavabelia, jai bajayata tajëvelia Davidpijinë Jesús yabara.

³⁶ Bajaraxuata daxita Israel nacuapijivi xaniavaetsia beyapëtane Jesús pelivaisi, ponë paxamë pacobematabiabarutame cruzajavabelia. Bajaraponë Jesús, Dioso exanatsi pepo petuxanenë. Bajaraponë Jesús, Cristo cajena, ponë Dioso itorobica vajanacapanepaenexa, jai Pedro athëbëvetsica bepinijijoviboxaneto penajumetsijava pemuxunanacaetua-naevijavabelia.

³⁷ Itsa bajarapamonae jumetane Pedro bajarapacuenia pejumaisijava, nexata bajarapamonae bejamatabëjibireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicuene paexanaenajë patajaneconi yabara? jai nexata bajarapamonae Pedrobanaejavabelia.

³⁸ Pedro nexata jumaisi bajarapamonaejavabelia:

—Daxita paxamë pibisiacuene paneexanaejava pacopabare. Panajamatabëcuenepënëyorore Diosojavabelia. Nexata pacabautisabiana Jesucristo pejamatabëcueneta papecavecuajibiaexanaenexa daxita pibisiacuene paneexanaeneconi. Bajara jane xuacujinae Dioso pacarajutsiana Espiritu Santo papecatsijamatabëjonenexa. ³⁹ Dioso raja cajena jitsipa papecarajutsinexa Espiritu Santo. Dioso raja jitsipa panexijavabelia ata perajutsinexa Espiritu Santo. Dioso raja jitsipa itsanacuanëpijivi, tajënacuanëjava pejinavanapaevi ata, perajutsinexa Espiritu Santo. Daxita pamona Dioso junatsiana pijajivinexa, tsijamatabëjonenatsi Espiritu Santo, jai Pedro bajarapamonaejavabelia.

⁴⁰ Bajarapacuenia Pedro itsa tsipaeba, itsalivaisi pematatsënëa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaisi mapacueniaje:

—Pamonae Jesús beyaxuaba, pibisiacuene pexanaevi, bajarapamonae naxuabiana. Nexata paxamë ata bajarapamonae paneyajavanaxuabiyaniva, pavecuana-jamatabëcuenepënëyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatababi jumecovënëtatsi tres mil pajivimaxëto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia. ⁴² Nexata bajarapamonae jumecovënëta palivaisi Jesús pijajivi apóstolevi tsipaeba. Daxita bajarapamonae Jesús pijajivi yajava, apóstolevinua yajava, najamatabëcuenejëpaeya jinavanapa. Daxita nacaetuatabiaba pevajëcabiabinexa Diosojavabelia. Nacaetuatabia-

banua caejavata pexaenexa, penajamatabēnapitabi-abinexa xua yabara Jesús sivatēpatsi.

Pacuenia jinavanapa pamonaē copiaya Jesús pelivaisi jumecovēnēta yabara pelivaisi

⁴³ Daxitajivi cujunava Dioso. Tsipaji Dioso yavenonabiaba apóstolevi. Nexata apóstolevi Dioso pesaēta pinijcuene pexanaejava, exanabiaba. ⁴⁴ Daxita pamonaē jumecovēnēta Jesús pelivaisi, nacaetuatabiaba najamatabecuenējēpaeya. Bajarapamonaē daxita pexainaejava nacobenaxainaevevetabiaba. ⁴⁵ Paepatota itsajivi bitso namatavenona, peyavenonaenexa bajarapamonaeyajuvēnēvi pexainaejava canajetapona. Pijairanē ata canajetapona. Pijabonē ata canajetapona. Pacuenejavaxi xaina, canajetapona. Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bajarapamonaē caematacabi canacujitsia nacaetuatabiaba templobota. Daxita bajarapamonaē pijabonējava jamatabēcuenēbarēyaya xaeyabiaba pexaejava najamatabēcuenējēpaeya. ⁴⁷ Nexata bajarapamonaē jumai tsabiabi Diosojavabelia: “Diosomē, bitso ayaijamatabēcuenenēmē. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonaē pexaniacuenia yayiataeyabiabatsi. Nexata itsamonaē ata, caematacabi canacujitsia Jesús pelivaisi jumecovēnēta pecaenepaenexatsi pibisiacuenē pexanaeneconivecua. Bajarapamonaē najonepona Jesús pelivaisi pejumecovēnētsivijavabelia.

Pacuenia apóstolenēbeje Jesús pejamatabēcueneta xanepanaeayaexanabeje apo pecaējēpaenētsi peponaponaejava yabara pelivaisi

3 Judíovi canivyoepatota, bejamatabēcuenē a las tres, templobota vajēcabiaba Diosojavabelia. Nexata itsamatacabi, bajarapaepatota, Pedrobeje Juanbeje naponabeje templobojavabelia. ² Ponē apo pecaējēpaenētsi peponaponaejava penaexanaejavabeliacujinae, capatabiabatsi pijamonaē peetabiabinexatsi templobobaupa muxuneneta. Bajarapabaupa pevēnē Pexaniabaupa. Caematacabi canacujitsia bajarapabaupa muxuneneta bajaraponē etabiabatsi pijamonaē. Nexata bajaraponē amoneya palata vajēcabiabeca bajarapabaupajava pejoneponaevita templobojavaberena. ³ Nexata itsa bajaraponē taeyeca Pedrobeje Juanbeje pejonenajetarucaejavabeje templobojavaberena, vajēqueca palata. ⁴ Nexata Pedrobeje Juanbeje naēcotabeje bajaraponējavabelia. Nexata Pedro jumaitsi bajaraponējavabelia:

—Panetaemabeje, jai Pedro.

⁵ Nexata bajaraponē naitaxutocavetsiaya jamatabējumai tsecae:

—Nerajutsianabeje tsamē raja itsacuenējavayo, jamatabējai tsecae bajaraponē.

⁶ Pedro nexata jumaitsi bajaraponējavabelia:

—Palata raja apo xainaenē. Itsiata baitsi jane xua xainajē, carajutsianatsi. Jesucristo, Nazaret tomarapijinē, pecaxanepanaeayaexanaeaxe baja, nonotapunare. Ponaponare baja, jai Pedro.

⁷ Nexata bajaraponē pecujuanenia pacobe, Pedro cobeveatabiyotsia. Bajarajota bajaraponē daxitaneniabeje asisaēreca baja. ⁸ Nexata bajaraponē jirevajunua. Petaxuta nuca. Ponapona baja. Nexata bajaraponē templobo ēnēabelia najoneya Pedrobeje Juanbeje pepēta. Bajaraponē jirevanajetaruca. Jumai tsanajetarucaē Diosojavabelia:

—Diosomē, ¡bitso ayaijamatabēcuenenēmē! ¡Tsipaji baja nexanepanaeayaexaname! jai tsanajetarucaē Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabēcuenē perajutsijava Diosojavabelia. ¹⁰ Bajarapamonaē itsa tanetsi, yapētanetsi palata pevajēcabiabecaenēmi templobobaupa muxuneneta, Pexaniabaupavēnē muxuneneta. Nexata daxita bajarapamonaē itsa tane bajaraponē baja pexanepanaejava, bitso jamatabēcuenenajunaviaca.

Pacuenia Jesús pelivaisi Pedro jivi tsipaeba templobo ēnētuatuajēta, Portal de Salomónvēnējavata, yabara pelivaisi

¹¹ Ponē penaexanaejavaveliacujinae apo peponaponaenēmi, Pedro pexanepanaeayaexanaecujinae, Pedrobeje Juanbeje apo copatsitsibeje. Nexata templobo ēnētuatuajēta, Portal de Salomónvēnējavata, ponē Pedro xanepanaeayaexana, Pedrobeje Juanbeje najuamaxēvaetabanucatsibeje. Nexata jivi ayaiBITSaēto itaxutuaothopatsi. Jamatabēcuenenabenajaca bajarapamonaē. ¹² Nexata Pedro itsa tane bajarapamonaē pejamatabēcuenenabenajacaejava, nexata Pedro jumaitsi bajarapamonaejavabelia:

—Tajamonaē judíovi, ¿detsa xuajitsia pajamatabēcuenenabenajacame maponē yabaraje? ¿Detsa xuajitsia bitso panenaēcobamebeje mapacueniaje? Paxanēbeje yabara meta pajamatabējumaitsimē mapacueniaje: “Maponēbeje xanepanaeayaexanabeje apo pecaējēpaenēmitsi peponaponaejava. Tsipaji baja caējēpatsibeje bajarapacuenē pexanaenexabeje. Bajarapacuenē caējēpatsibeje tsipaji meta Dioso pitabarata aneconijibia ponaponabeje,” pajamatabējamē meta paxanēbeje yabara. Paxanēbeje raja patajamatabēcuenetabeje apo paexanaenēbeje bajarapacuenē. Jesús raja exana bajarapacuenē. ¹³ Vajasali-naivi baja cajena Abrahampijinē, Isaacpijinē, Jacobpijinē. Bajarapamonaē pijaDioso pexēnato Jesús. Nexata Dioso jivi yapētaeayaexana Jesús bitso ayaijamatabēcuenē pexainaenēcuenē. Bajaraponē Jesús paxamē parajutame vajanacayanacuaevevetsivi pecobeyabelia. Vajanacayanacuaevevetsinē Pilato copatsijitsia ata Jesús, itsiata paxamē pajumesaēmē. Apo pajitsipaemē Pilato pecopatsijava Jesús. ¹⁴ Apo pavajēcaemē Pilatojavabelia pecopatsinexatsi Jesús, itsacueneneconiyo apo pexainaenē, pepo pianeconijibinē. Caranata biji pibisiacuenē pexanaenē, jivibenē,

pecopatsinexatsi, pajumesaëmë. Pavajëcame Pilatojavabelia jivibenë pepitsapaenexa penaneconitsivi pejebabiabibovecua. ¹⁵ Ponë Dioso itorobica vajanacara-jutsinexa matababi apo pevereverecaejava, bajaraponë caranata pabeyaxuabame. Itsiata baitsi jane Jesús petëpaecuinae, Dioso icatsia asaëyaexanatsi. Bajarpacuenepatataexae, pacatsipaebatsi. ¹⁶ Bajaraponë Jesús pejamatabëcueneta xanepanaeyaexanatsi baja maponëje, apo pecaëjëpaenëmitsi peponaponaejava. Maponëje najamatabëcuenecopata Jesúsjavabelia. Bajaxuata maponëje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaitsi bajarapamonaejavabelia:
—Tajamonae, yapëtaniji pacuene pacabarëexana it-samonae, papecaevetsivi yajava. Tshipaji apo payapëtaemë xaniavaetsia. Bajaxuata pabeyaxuabame Jesús. ¹⁸ Bajayata Diosojumepaebivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecanepaenexa. Profetavimi tajëvelia vajunupaebanua Jesús bitso pebejiobiaexanaejavanexatsi daxitajivi pijaneconi yabara. Bajarpacuenep Jesús baja tocopiapatatsi itsa pabeyaxuabame. Tshipaji baja Dioso bajarapacuenia tocopatatsi. ¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujamatabëcuenemi. Panajamatabëcuenepënyorore baja Diosojavabelia. Nexata pibisiacuene paneexanaeconimi, Dioso pacavecuajibiaexanaena. Nexata pacajamatabëcuene asaëyaexanaena Dioso. ²⁰ Tshipaji raja icatsia itsamatababi Dioso athëbëvetsica itorobianica Jesús, ponë bajayata Dioso itapeta papecayavenonaenexa. ²¹ Jesús raja abaxë ecaya athëbëtatsia. Matapania pamatababi Dioso xanebijitsia daxitacuene, icatsia patsianica Jesús. Bajarpacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba. ²² Vajasalinaivimijavabelia baja cajena bajayata tajëvelia profeta Moiséspijinë Jesús yabara jumaitsi mapacueniaje: “Pacuenia nitoroba xanë profetanëxanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënënë tsane. Nexata pacuene yabara bajaraponë profeta pacatsipaebiana, pajumecovënëtsianame xaniavaetsia. ²³ Tshipaji daxita pamonaepo jumecovënëtsi tsane bajaraponë profeta petsipaebilivaisi, pepacuene Dioso pijajivivecua tsatsiana. Nexata bajarapamonaepo verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

²⁴ Icatsia Pedro jumaitsi bajarapamonaejavabelia:
—Xua baja aeconoxae mapamatababitaje copiapat-pona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua. ²⁵ Paxamë rabaja profetavimi pape-

momoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús yabara. ²⁶ Nexata baja copiaya paxamëjavabetsica Dioso pexënato pacatoitorobica. Bajarpacuenia Dioso pexënato pacatoitorobica paxamë pacaevivimë canacujitsia papecayavenonaenexa panenajamatabëcuene pënëy-orotsinexa pibisiacuene paneexanaejavavecua, jai Pedro bajarapamonaejavabelia Portal de Salomónvënëjavata.

Pacuenia Pedrobeje Juanbeje Jesús pelivaisi tshipae-babeje tomaraevetsivijavabelia yabara pelivaisi

4 Pedrobeje Juanbeje abaxë Jesús pelivaisi tshipae-babeje bajarapamonaejavabelia Portal de Salomónvënëjavata. Nexata bajaraberena jemata patanajetarubena sacerdotevi. Patanajetarubena saduceovinua. Pematatsënëa patanajetaruca itsanë capitán. Bajaraponë capitán templobopijipolicíavi pevetsinë. ² Daxita bajarapamonaepo baraanaepanatsibeje Pedrobeje Juanbeje. Tshipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petëpaecuinae. Bajarpalivaisi cajena pexaniajailivaisi. Tshipaji baja icatsia Jesús asaëyaexanatsi petëpaecuinae, jaipeje tsaponae.

³ Nexata bajarapamonaepo vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tshipaji baja bitso caniviyo. ⁴ Itsiata baitsi jane baja jivibitsaëtoxanetonë capanepaeya jumecovënëtsibeje pevaetabivajënaeyatsibeje. Nexata daxita pamonaepo jumecovënëta Jesús pelivaisi, ëpebijivi namataëjëtatsi cinco mil ponëbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaancianovinua. Nacaetuata judíovi pecujarubivinua. Daxita bajarapamonaepo nacaetuata Jerusalén tomarata. ⁶ Nexata bajarajota napata sacerdotenë Anás. Bajaraponë Anás sacerdotevi pepo penamatacaitorobinëmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae. ⁷ Nexata Pedrobeje Juanbeje nutatsibeje daxita bajarapamonaepo pitabarata. Nexata bajarapamonaepo jumaitsi Pedrobeje Juanbejejavabelia:

—¿Jipatsa pejamatabëcueneta paxanepanaeyaexanamebeje apo pecaëjëpaenëmitsi peponaponaejava? jai bajarapamonaepo Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabëcueneyavenonatsi. Nexata Pedro jumaitsi bajarapamonaejavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapë-taenexa ponë pejamatabëcueneta paxanepanaeyaex-anajëbeje apo pecaëjëpaenëmitsi peponaponaejava. Paneyanijobamebejenua paneyapëtaenexa pacuenia paxanepanaeyaexanajëbeje bajaraponë. ¹⁰ Nexata pacatsipaebianatsi daxita paxamë paneyapëtaenexa daxita Israel nacuapijivi ata peyapëtaenexa. Jesús, Nazaret tomarapijinë, ponë paxamë pacobematabi-abarutame cruzajavabelia, bajaraponë icatsia Dioso asaëyaexanatsi petëpaecujinae. Bajaraponë Jesús pe-jamatabëcueneta maponë paneitabarata nucaje, xanepanaeyaexanatsi, jai Pedro.

¹¹ Icatsia Pedro jumaitsi bajarapamonaejavabelia:

—Bajaraponë Jesús yabara Dioso pejumelivaisibaxu-tota bajayata tajëvelia jumaitsi comparacióncuenia mapacueniaje:

Paiboto itsamona boexanaevi naitaxutojematabuat-siana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaët-siana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota com-paracióncuenia itsa jumaitsi Jesús yabara, judíovi pe-namatacaitorobivi Jesús apo pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi. ¹² Caenë Jesús caëjëpatsi vajanacacapanepaenexa pibisiacuene va-jaexanaeconivecua. Bjaraxuata Dioso itorobica Jesús. Tsipaji baja ajibi pematatsënëa mapanacuataje itsanë ata pejamatabëcueneta vajanacaca-panepaenexa Diosojavabelia, jai Pedro bajarapamonaejavabelia.

¹³ Bajarapamonae yapëtane Pedrobeje Juanbeje ajumejunavijibia Jesús pelivaisi petsipaebijavabeje ba-jarapamonaejavabelia. Bajarapamonae yapëtanenua bajaraponëbeje bajayajebi apo penacujarubinëbeje peyaquinaejava. Itsiata bitso yapëtanebeje pexaniali-vaisi. Saya bajaraponëbeje penacuenebinëbeje. Nexa-ta judíovi pevetsivi jamatabëcuenenabenajaca. Bajara-pamonae nexata jamatabëjumaitsi Pedrobeje Juanbeje yabara:

—Bajaraponëbeje cajena penaponaponaenëbeje Jesússta. Bjaraxuata bitso baja yapëtanebeje bajara-palivaisi, jamatabëjai.

¹⁴ Bajarapamonae tane apo pecaëjëpaenëmitsi pe-ponaponaejava penanucaejava Pedrobeje Juanbejeja-vata. Nexata bajarapamonae acuenebi pejumaitsijava: “Jume raja. Jesús raja pejamatabëcueneta apo xanepanae maponëje,” acuenebi pejaijava. Tsipaji apo pecaëjëpaenëmitsi peponaponaejava Jesús peja-matabëcueneta ponapona baja. ¹⁵ Nexata bajarapa-monae Pedrobeje Juanbeje caepatoyo navecuacapit-sapatsibeje pecovëta ëpamonae penabarëcuai-cuajainexa.

¹⁶ Nexata Pedrobeje Juanbeje pecovëta caepatoyo penavecuacapitsapaejavatatsibeje, bajarapamonae najumaitsi:

—¿Detsamë raja pacuene exanaenatsi bajara-ponëbejejavabelia? Daxita Jerusalén tomarapijivi xani-avaetsia yapëtane bajaraponëbeje pexanepanaeyaex-anaejavabeje apo pecaëjëpaenëmitsi peponaponaejava. Nexata acuenebi jivijavabelia vajajumaitsijava: “Apo xanepanaeyaexanaebeje raja bajaraponëbeje,” vajajai-java. ¹⁷ Pinijicuenia vaxaitsi bajaraponëbeje itavet-sianatsi petsipaebianivabeje matavëjëa Jesús pelivaisi itsajiviyojavabelia ata. Nexata bajarapacuenia apo tsi-paebibeje baja tsane itsamonaejavabelia Jesús peliv-aisi, najai bajarapamonae Pedrobeje Juanbeje pecovë-ta caepatoyo penavecuacapitsapaejavatatsibeje.

¹⁸ Nexata icatsia Pedrobeje Juanbeje caevëalia pe-jonenexaliabeje, junaliatsibeje. Nexata jane baja ba-jarapamonae jumaitsi Pedrobeje Juanbejejavabelia:

—Pëtsa baja icatsia matavëjëa jivi patsipaebapon-amebeje Jesús pelivaisi. Pacoparebeje baja jivi panetsi-paebaponaejavabeje Jesús pelivaisi, jai bajarapamonae.

¹⁹ Nexata Pedrobeje Juanbeje jumaitsibeje bajarapa-monaejavabelia:

—Paxamë panijacuata panajamatabëxainare pacuene xanepana pataexanaponaenexabeje Dioso pitabarata. Itsa pacajumecovënëtsipatsibeje paxamë patanitavetsijavamëbeje, nexata apo pajumecov-ënëtsinëbeje tsipae Dioso patanitorobijavabeje.

²⁰ Acuenebi cajena patacopatsijavabeje jivi patatsipae-baponaejavabeje xua patanijibeje, palivaisi ata pa-jumetanijibeje, jaibeje Pedrobeje Juanbeje bajarapa-monaejavabelia.

²¹ Icatsia judíovi pevetsivi orijibia itavetatsibeje jivi petsipaebaponaeyanivabeje Jesús pelivaisi. Bjaraxu-acujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

Bajarapacuenia daxitajivi pexaniajamatabëcuene ra-juta Diosojavabelia Pedrobeje Juanbeje pex-anepanaeyaexanaeabeje apo pecaëjëpaenëmitsi pe-ponaponaejava. ²² Ponë xanepanaeyaexanatsi Dioso pesaëta pinijicueene pexanaejavata, bajaraponë pe-naexanaecujinae xaina baja cuarenta pavaibeje pe-matatsënëa.

Pacuenia Dioso pejumecovënëtsivi vajëca Diosojavabelia pecaëjëpaeyaexanaenexatsi Jesús pelivaisi ajumejunavijibia jivi pepaebaponaenexa yabara peliv-aisi

²³ Itsa baja Pedrobeje Juanbeje judíovi pevetsivi co-patatsibeje peponaenexabeje, navialiabeje baja itsabelia jinavanapa Dioso pejumecovënëtsivi. Nexata Pedrobeje Juanbeje Jesús pelivaisi jivi petsipaebapon-aeyanivabeje sacerdotevi penamatacaitorobivi pitavet-sijavatsibeje, navajunupaebabeje Dioso pejumecov-ënëtsivijavabelia. Navajunupaebabejenua judíovi pi-jaancianovi ata pitavetsijavatsibeje. ²⁴ Nexata Dioso pejumecovënëtsivi itsa jumetane Pedrobeje Juanbeje

penavajunupaebijavabeje, nexata daxita Dioso pejumecovënëtsivi Pedrobana najamatabëcuenejëpaeya vajëca Diosojavabelia. Daxita bajarapamonae pevajëcaejavata Diosojavabelia, jumaitsi mapacueniaje:

—Xamë pinijiDiosomë, nexanaenë cajena itaboxo. Nexanaenë daxita itaboxopijicuene ata. Nexanaenë ira ata. Nexanaenë daxita irapijicuene ata. Nexanaenë manuamene ata. Nexanaenë daxita manuamenepijicuene ata. ²⁵ Xamë Diosomë, bajayata Espiritu Santo pejamatabëcueneta tajëvelia yapëtaeyaexaname patajasalinainëmi Davidpijinë. Nexata nijajivitonë Davidpijinë tajëvelia nexënato Jesús yabara jumaitsi mapacueniaje:

Itsanacuanëpijivi, pamona apo judíovi, bitso anaepanabiabiana. Saya jema najamatabëxainabiabiana pexanaenexa picani xua apo cajëpaetsi pexanaenexa. ²⁶ Pinijnacuanë pevetsivi nacaetuatsiana. Tomaranë pevetsivi ata nacaetuatsiana. Bajarapamonae najamatabëxainaena, xamë Diosomë, nijacuene pecatobijianaenexa. Najamatabëxainaenanua pebejio-biaexanaenexa Cristo, ponë itorobianimica jivi peca-panepaenexa, jai bajayata tajëvelia Davidpijinë Espiritu Santo pejamatabëcueneta, Jesús pebejio-biaexanaejavanexatsi yabara, jai Pedrobana pevajëcaejavata Diosojavabelia.

²⁷ Icatsia Pedrobana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaetuatabeje itsanacuanëpijivi. Barënacaetuatabeje apo judíovi. Barënacaetuatabeje judíovi ata yajava. Bajarapamonae nacaetuata penajumejaitsinexa pacuenia beyaxuabijitsiatsi nexënato Jesús, ponë athëbëvetsica itorobimica. Bajarapacuenia itsa barënacaetuatabeje, copiapata jane baja xua bajayata tajëvelia Davidpijinë vajunupaeba. ²⁸ Bajarapamonae nacaetuata pexanaenexatsi daxita pacuenia baja cajena bajayata nexënato tocopatame pexanaenexatsi.

²⁹ Patajatuxanenë, yapëtaneme judíovi pevetsivi patan-itavetsijava jivi patatsipaebaponaeyaniva nexënato pelivaisi. Paxanë panijajivinë. Nexata panerajutsianame patanecaëjëpaejamatabëcuene ajumejunavijibia jivi patatsipaebaponaenexa nexënato pelivaisi. ³⁰ Itsa patomarata patsipaebianajë nexënato pelivaisi, jamatejemayaexanaename piavitanevi. Pinijicuene nexanaejava exanaename jivi peyapëtaenexa bitso ayaijamatabëcuene nexainaenëcuene. Bajarapapinijicuene exanaename nexënato Jesús pejamatabëcueneta, jai Pedrobana pevajëcaejavata Diosojavabelia.

³¹ Itsa baja bajarapamonae vereta pevajëcaejava Diosojavabelia, bajarajota ira nanequetajaraba. Daxita bajarapamonae Espiritu Santo tsijamatabëvënëcatsi. Nexata bajarapamonae Espiritu Santo petsijamatabëvënëcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovënëtsivi, xua xaina, daxita nacobenaxainaeyaeveta yabara pelivaisi

³² Ayaibitsaëtoxaneto Dioso pejumecovënëtsivi najamatabëjëpaeya jinavanapa. Bajarapamonae xua xaina, apo najamatabëxainae caejivi pexainaenexa. Nexata daxita bajarapamonae xua xaina, nacobenaxaina daxita. ³³ Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecuinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovënëtsivi caenë ata apo yajuvënëbejiobi pexainaejava yabara. Tsipaji pamona bitso xaina iranë, bonë ata, canajetabiaba. Nexata bajarapamonae xua canajeta, bajarapamatamopalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajuajinavanapaevijavabelia pacuenia baja caejivi canacujitsia namatavenonapona. ³⁶ Bajarapamonae yajuvënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyajuvënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta pejumaitsi jume: “Jivi pejamatabëcuene barëyaexanaenë,” pejaijume. ³⁷ Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

Pacuenia tēpabeje Ananíasbeje pijava Safirabeje, penajumetsënëtsixaebeje apóstolenë Pedro pitabarata yabara pelivaisi

5 José pijaira pecanajetsicujinae, Ananías ata pijava Safirabeje yajuvënëcanajetabeje pijaira. ² Nexata Ananíasbeje pijavabeje pijairamatamoyajuvënëpalata muetsia copatabeje. Bajaraxuacujinae Ananías peyajuvënëcopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvënëcanajetajë. Nexata pacarajutatsi daxita bajarapairamatamopalata panetsicobetsanaenexa vajanajuajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovënëtame dovathi pecayamaxëitorobijava nenajumetsënëtsinexa Espiritu Santojavabelia? Xamë baja rovia nijairamatamopalata yajuvënëcopatame. ⁴ Nijairami necanajetsivajënaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxëitorobijava najamatabëxainameje? Epaxanëjavaberena baja cajena apo najumetsënëtsimë. Najumetsënëtame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitsi jiva, Ananías petëpaenë irata jopa. Nexata daxita pamona vënëlivaisitane bajarapacuenia Ananías petëpaejava, pinijicuenia jamatabëcuenenajunaviaca.

⁶ Nexata pabota Ananías petëpaenë boca, bajarapaboyarena pevëjëavi jonena. Mataquiona petëpaenë. Bajaraxuacujinae capitsapalia pemëthëtsinexa.

⁷ Bajaraxuacujinae bexëa, acueyabi pahorabejecujinae, Ananíaspijinë pijava jonena. Bajarapova abaxë apo yapëtae pamona pevëcuatëpaejavatsi. ⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatamotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajëbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabëcuenejëpamebeje panenajumetsënëtsinexabeje Espiritu Santojavabelia? Namuxunaevere. Jumia naviabanajetarubena rabaja amonami pemëthëcaevilia. Bajarapamonae icatsia xamë ata cacaponaelia pecamëthëtsinexa, jai Pedro.

¹⁰ Nexata bajarajota Pedro pitabarata bajarapova ata icatsia petëpaeva irata jopa. Itsa jonena pevëjëavi penaviabanajetarubenaevi, Ananíaspijinë pemëthëcaevilia, caxitajarababuata petëpanucaeava. Nexata icatsia bajarapamonae capitsapalia bajarapova pemëthëtsinexa pamonami pemëthë muxuneneta.

¹¹ Nexata daxita Dioso pejumecovënëtsivi, itsamonae ata, pamona bajarapajivibeje petëpaejava vënëlivaisitanetsi, bitso junava.

Pacuenia apóstolevi pinijicuene pexanaejavanë exanapona Dioso pesaëta yabara pelivaisi

¹² Apóstolevi Dioso pesaëta exanapona pinijicuene pexanaejavanë Jerusalén tomarapijivi pitabarata. Daxita Dioso pejumecovënëtsivi nacaetuatabiaba templobo ënëtuatuajëta, Portal de Salomónvënëjavata.

¹³ Itsamonae, pamona Dioso apo pejumecovënëtsivi, junava penanacaetuatsijava bajarapamonaeta. Itsiata daxita Jerusalén tomarapijivi pexaniacuenia yaiy-ataeyabiaba Dioso pejumecovënëtsivijavabelia. ¹⁴ Pevajënaeyabelia jivibitsaëtoxaneto jumecovënëta pona Jesús pelivaisi, pebijivi, petiriavi ata. Nexata daxita bajarapamonae nanacaetuatabiaba Dioso pejumecovënëtsivijavabelia. ¹⁵ Apóstolevi Dioso pesaëta pinijicuene pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanëta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaënae ata petsijopaejavatsi pejamatejemanexa bajarapamonae piavitanejavavecu. ¹⁶ Nexata jivibitsaëtoxanetonë patabiaba Jerusalén tomaraberena imoxoyo penaetomaraxijavaverena penaropobivi. Bajarapamonae Pedro tocapatabiabatsi piavitanevi. Tocapatabiabatsinua bitso dovathi peyajavajinavanapaevi. Nexata Pedro daxita bajarapamonae jamatejemayaexanabiaba.

Pacuenia apóstolevi taicatsi penaneconitsiaexanaenexatsi yabara pelivaisi

¹⁷ Sacerdotevi pepo penamatacaitorobinë yajavaponapona saduceovi. Nexata daxita bajarapamonae pinijicuena anaepana apóstolevijavabelia. Tsipaji cuenecaëbatsi. ¹⁸ Bajaraxuata taicatsi apóstolevi. Jebatsi penaneconitsivi pejebabiabibota. ¹⁹ Itsiata baitsi jane bajarapameravi Dioso pijaängel apóstolevi tobau-panatsi penaneconitsivi pejebabiabibo baupanë. Nexataängel apóstolevi matabapitsapaliatsi. Angel jumaitsi apóstolevijavabelia:

²⁰ —Paponare templobojavabelia. Patsipaebianame jivijavabelia mapapejanalivaisi, Dioso vajanacayajavaponaponaevajava, jaiängel apóstolevijavabelia.

²¹ Apóstolevi itsa jumetane bajarapacueniaängel pejumaitsijava, nexata ajena matababi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinë peyajavaponaponaevi barënacaeuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonae jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarëpatsiaremena maberena, jai.

²² Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, naviabarena cobesa petsipaebinexa penacaetuatsivijavabelia. ²³ Nexata templobopijipolicíavi jumaitsi bajarapamonaejavabelia:

—Itsa papaliajë penaneconitsivi pejebabiabibojavabelia, daxitabaupanë xaniavaetsia nabaupaxatabanubena. Bajarajota nubena picani pevëtanubenaevi baupanë. Itsiata baitsi jane itsa pabaupatajë, caenë ata apo ecae bajarapabo ënëtuatuajëalia, jai policíavi.

²⁴ Nexata templobopijipolicíavi pijacapitán, sacerdotevi penamatacaitorobivina, itsa jumetane bajarapacuenia policíavi pejumaitsijava, bajarapamonae jamatabëjumaiti:

—¿Detsamëra nexata itsi apóstolevi? jamatabëjai bajarapamonae.

²⁵ Nexata bajarapaepatota itsanë pebi parena, templobojavaverena peponaenë. Jumaitsi bajaraponë bajarapamonaejavabelia:

—¡Panejumetaema! Pamona pacajunuame penaneconitsivi pejebabiabibota, bajarapamonae caje- na nubena templobotalia. Jivijavabelia tsipaebanubena Jesús pelivaisi, jai bajaraponë.

²⁶ Nexata templobopijipolicíavi pijacapitán barëlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabëjumaiti:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacaetseconaejitsi- pa ibotonëta, jamatabëjai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pi-jaancianovinua pitabarata, judíovi pecujarubivinuua pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

²⁸ —Paxanē baja cajena pacajumaitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumecovēnētsimē? Pataema jane pacuenia Jerusalén tomarata yacaējēpaponā panetsipaebilivaisi. Paxamē jamatabēpaneneconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

²⁹ Nexata sacerdotevi pepo penamatacaitorobinē bajarapacuenia pejumaitsixae, Pedro, itsaapóstolevi yajava, jumaitsi bajarapamonaejavabelia:

—Namatavenonatsi vajajumecovēnētsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovēnētsi. ³⁰ Paxamē Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaēyaexanatsi petēpaecujinae. ³¹ Nexata Dioso jumaitsi Jesúsjavabelia: “Ecare tacujuanenia. Xamē rabaja ayaijamatabēcuenenēmē. Jivi nevetsinē tsane. Necapanepaenēnua tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaitsi. Vajanajamatabēcuenē pēnyorotsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabēcueneta daxitajivi aneconijibia petaenexa. ³² Nexata bajarapacuenē yabara jivijavabelia itsa patsipaebaponajē, Espiritu Santo paneyajava tsabiabi. Dioso cajena rajutapona Espiritu Santo pamonaē jumecovēnēta Dioso, jai Pedro, itsaapóstolevi yajava, daxita bajarapamonaejavabelia.

³³ Nexata daxita bajarapamonae itsa jumetane bajarapacuenia Pedrobana pejumaitsiyava, nexata bitso anaepana. Jamatabēbeyejebatsi picani apóstolevi. ³⁴ Itsiata apo beyejebitsi. Tsipaji bajarapamonaejavavēnēnē judíovi pecujarubinē, Gamalielvēnēnē, nonotapuna daxita penajuavi pitabarata. Bajaraponē fariseonē, Dioso Moiséspijinēta penajumecopatsilivaisi pecujarubinē. Daxitajivi peyaiyataenētsi. Nexata Gamaliel itoroba apóstolevi caepatoyo pepit-sapaenexalia. ³⁵ Nexata apóstolevi caepatoyo pepit-sapaejavatalia, pecovēta, Gamaliel jumaitsi penajuavijavabelia:

—Tajamonae judíovi, panajamatabēxainare xaniavaetsia. Pētsa paexaname pacuenia panajamatabēxainame mapamonaejavabeliaje. ³⁶ Panajamatabēnapire pacuenia Teudasvēnēnēmi bajayata exanatsi. Bajaraponēmi picani nacia pevetsinēnēxa, ayaijamatabēcuenenē bitso jamatabēnaexana. Nexata picani pijajivinexa pēnjinavanapatsi cuatrocientos ponēbeje. Itsiata Teudaspijinēmi beyaxuabatsi. Bajaraponēmi pepēnjinavanapaevitsi, pamonaē pijajivinexa

picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia pamatacabigobierno pejamatabēcueneta daxitajivi namataējētsi, Judasvēnēnēmi, Galilea nacupijinēmi, bajarapacuenia pijinia jivi ayaibitsaētoxoneto pēnjinavanapatsi. Bajaraponēmi ata beyaxuabatsi. Nexata daxita pepēnjinavanapaevitsi nacayajateca. Nexata baja copiaruca bajarapacuenemi. ³⁸ Bajaraxuata nexata mapamonaeje apóstolevi yabara pacatsipaebijitsiatsi. Pētsa pait-sacueniabame bajarapamonae. Itsa bajarapamonae saya mapanacupijivi pejamatabēcueneta tsipaebavanapaje, bepija peneta bajarapamonae petsipaebilivaisi vereverecaena. ³⁹ Itsa jume, Dioso pejamatabēcueneta bajarapamonae bajarapalivaisi jivi itsa tsipaebavanapa, nexata acuenēmi tsipae paxamē bajarapacuenē panevereverecaeyaxanaejava. Belia ayaineconipantsiexanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonae jumecovēnētatsi Gamaliel. Apóstolevi icatsia caevēlia pejonenexalia junaliatsi. Bajaraxuacujinae apóstolevi, caenē canacujitsia, ayaicuenia jumaititibabeponatsi penaneconitsivi pejumaconitabiabimacata. Itavetatsi icatsia matavējēa jivi petsipaebiyanaiva Jesús pelivaisi. Bajaraxuacujinae copabatsi jane baja peponaenexa. ⁴¹ Apóstolevi nexata pitsaparena bajarapabovecua. Barēyaya ponalia apóstolevi. Tsipaji Dioso tocopatatsi bajarapacuenia bepejibiaexanaponaenexatsi Jesús pijajivixae. ⁴² Nexata caematacabi canacujitsia templobota, bonējava ata, apóstolevi asaēya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponē Dioso itorobica jivi pēpanepaenexa, pelivaisi.

Pacuenia itapetatsi siete ponēbeje díaconovinexa yabara pelivaisi

6 Jesús pelivaisi pejumecovēnētaponaevi, pevājēnaeyabelia ayaibitsaētoxonetonē tsaponae. Bajarapamatacabi Jesús pelivaisi jumecovēnētapona griegovi, judíovi ata. Nexata pamonajivi pevecuatēpaevanētsi, pamonaē bitso bejiobi, bajarapamonaejavabelia apóstolevi rajutabiaba penamatavenonaevanē. Nexata Jesús pelivaisi penajuajumecovēnētsivi, pamonaē griegovi, jumaitsi judíovijavabelia:

—Caematacabi canacujitsia apóstolevi pamonajivi pevecuatēpaevanētsijavabelia, tsicobetsanabiaba pēxaejavanexa. Nexata xuavajētonē panijaviriavijavabelia rajutabiaba, bajaraxuavajētonē patajaviriavijavabelia apo rajutabiabi, jai griegovi judíovijavabelia.

² Doce ponēbeje, apóstolevi, najamatabēcuenējēpa pacuenia exanaejitsia judíovibeje griegovibeje penacobeceababiabixae. Nexata apóstolevi junata penacae-tuatsinexa daxita pamonaē Jesús pelivaisi pejumecovēnētsivi. Nexata baja itsa nacaetuata daxita bajarapamonae, apóstolevi jumaitsi bajarapamonaejavabelia:

—Tajamonae, paxanē itsa patsicobetsanabiabijitsipajē pēxaejava bitso penamatavenonaevijavabelia, nexata apo panecuenecaējēpabiabi tsipae jivi patatsipae-

binexa Dioso pitorobilivaisi. ³ Nexata paitapetsianame siete ponēbeje, paxamēyajuvēnēvi. Paitapetsianame papebijivi caejamatabēcuene pexainaevi, bitso petsijamatabēvēnēcaevitsi Espiritu Santo, bitso peypātaeyaexanaevitsi Espiritu Santo pejamatabēcuene. Bajarapamonae paitorobianame bepejibivijavabelia pet-sicobetsanabiabinexa penamatavenonaecuene. ⁴ Nexata paxanē saicaya patsitecavanapaenajē patavajēcabiabijava Diosojavabelia. Patsipaebabiabianajēnua Dioso pitorobilivaisi jivijavabelia, jai apóstolevi penacaeuatsijavata daxita Jesús pelivaisi pejumecovēnētsivijavabelia.

⁵ Nexata daxita pamona nacaetuata, ita jumetane bajarapacuenia apóstolevi pejumaitsijava, tsitaxanepanatsi. Nexata bajarapamonae itapeta mapamatabēxēyoje. Itapeta Estebanvēnēnē, ponē bitso Dioso pejumecovēnētsinē, Espiritu Santo petsijamatabēvēnēcaenētsi. Itapeta Felipevēnēnē. Itapeta Prócorovēnēnē. Itapeta Nicanorvēnēnē. Itapeta Timónvēnēnē. Itapeta Parmenasvēnēnē. Itapeta Nicolásvēnēnē. Nicolás itsanacuapijinē, Antioquía tomarapijinē. Bajaraponē apo judionē. Itsiata judíovicuenia Dioso najumecovēnētaponapona. ⁶ Daxita bajarapamatabēxēyo pitapetsicujinaetsi, nubatsi apóstolevi pitabarata. Nexata pamona itapetatsi, caenē canacujitsia pematocotojumavereca apóstolevi nacobebuatanubena Diosojavabelia petovajētsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibitsaētoxaneto tsaponae Jesús pelivaisi pejumecovēnētsivi. Sacerdotevi ata ayaibitsaēto jumecovēnētapona Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaēta pinijicuene pexanaejava, exanabiaba. Daxitajivi pitabarata Dioso pesaēta pinijicuene pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonae nacaetuatabiaba judíovi penacaeuatabiabibota. Bajarapabopevēnē Esclavos Libertados. Bajarapamonae caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavēnē nacuaverena pepatsivi. Bajarapamonaeyajuvēnēvi Esteban anaeya jumenotatsi. ¹⁰ Nexata bajarapamonaeyajuvēnēvi Esteban anaeya ita jumenotatsi, Espiritu Santo yavenonatsi pejumecanaviatsijavata bajarapamonaejavabelia. Bajaraxuata nexata daxita bajarapamonae Esteban apo jumecanaviatsicanepaetsi juya. ¹¹ Nexata pamona Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamona matamotatsi penajumetsēnētsinexa Esteban

yabara, najumetsēnētsia jane baja jumatsi jivijavabelia:

—Pajumetaniji pibisiacuenia Esteban pebaracuaicuajitsabiabijava Moiséspijinē. Pajumetanijina pibisiacuenia pebaracuaicuajitsabiabijava Dioso ata, jai bajarapamonae Esteban yabara.

¹² Bajarapacuenia bajarapamonae pejumatsixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonae Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonae junata pamona jane baja matamota najumetsēnētsiaya peneconitsinexatsi Esteban. Nexata bajarapamonae ita pata, jumatsi Esteban yabara:

—Mara ponēje Esteban apo cueranae Dioso apo pejitsipaecuenia pebaracuaicuajitsabiabijava templo. Apo cueranaenua Dioso Moiséspijinēta penajumecopatsilivaisi ata pebaracuaicuajitsabiabijava. ¹⁴ Pajumetaniji maponēje pejumatsijava: “Jesús, Nazaret tomarapijinē, xuabianica mapatemploboje. Dioso Moiséspijinēta penajumecopatsilivaisi ata vajajumecovēnētsijava, nacacopabiaexanaena Jesús,” jai maponēje, jai najumetsēnētsiaya Esteban yabara pamona matamotatsi.

¹⁵ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, naēcobarēcēpatsi Esteban. Nexata bajarapamonae Esteban pitabaranaēcobarēcēpaejavatatsi, betsita ángelnēitabara tsarucae Esteban.

Pacuenia Esteban jumecanaviata sacerdotevi pepo penamatacaitorobinē yabara pelivaisi

7 Sacerdotevi pepo penamatacaitorobinē jumatsi Estebanjavabelia:

—¿Xaniajai tsabaja? ¿Jumatsimē tsabiabi pacuenia mapamonae caneconitsiajumatsije? jai sacerdotevi pepo penamatacaitorobinē.

² Nexata sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata, Esteban jumatsi mapacueniaje:

—Tajamonae, patanevetsivimē, panenamuxunae vere. VajaDioso bitso ayajamatabēcuenenē. Tsitanaitajēta baja cajena bajayata vajasalinainē Abrahampijinējavabelia. VajaDioso tsitanaitajēta Abrahampijinējavabelia abaxē Abrahampijinē ita ponapona Mesopotamia nacuata. Bajarapanacuata Abrahampijinē ponapona pevarapaevajēnaeya Harán nacuyabelia. ³ Dioso jumatsi Abrahampijinējavabelia: “Nijairavecu ponare. Daxita nijamonae ata vecuaponare. Ponare pairajavabelia catsitajētsianatsi,” jai Dioso Abrahampijinējavabelia. ⁴ Bajaraxuata Abrahampijinē Caldea nacujavaverena pona. Nexata pata Harán nacuyaberena. Bajarapanacuata Abrahampijinē ita ponapona, nexata paxapijinēmi Harán nacuata vecuatēpatsi. Paxapijinēmi pevecuatēpaecujinaetsi,

Dioso icatsia Abrahampijinē varapaeyaexanatsi ma-pairajavaberenaje, itsajota vaxaitsi aeconoxae jina-vanapatsi. ⁵ Itsiata Abrahampijinē Dioso apo rajutsitsi itsairayo ata pepo pijairanexa. Jume cajena. Tsiquiri-irayo ata apo rajutsitsi. Itsiata tajēvelia Dioso najumecapanepaeya jumaiti Abrahampijinējavabelia: “Carajutsianatsi nijairanexa daxita mapaira tanemeje. Nevēnamuto nexi bajarapaira xainaena,” jai Dioso. Abaxē Abrahampijinē pexi itsa apo xinae, bajarapacuenia Dioso najumecapanepaeya jumaiti Abrahampijinējavabelia. ⁶ Icatsia Dioso tajēvelia jumaiti Abrahampijinējavabelia: “Itsamatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi itsanacuaverena pepatsivixae tsane, bajarapanacuapijivi pijajivi exanaenatsi. Bepejiobicuenia nacuenebiaexanabiabianatsi. Cuatrocientos pavaibeje nemomoxi bepejiobicuenia jinavanapaena bajarapanacuatalia. ⁷ Xanē nexata naneconitsiaexanaenajē panacuapijivi nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberenaje patsiana. Nexata mapanacuataje xanējavaberenaja najamatabēcuenecopatsiaya navajēcabiabiana,” jai baja cajena tajēvelia Dioso Abrahampijinējavabelia. ⁸ Nexata Abrahampijinē Dioso itorobatsi peperabēcaucutaponaenexa daxita papebinacuetoxi naexana Abrahampijinē pijabota, baitsi peboupiperabēcaucutaponaenexa. Bajarapacuenia Abrahampijinē pexanaenexa Dioso itorobatsi Abrahampijinē penajamatabēnapitabiabinexa Dioso peyavenonaeypaebijavatsi. Nexata Abrahampijinē pijava vecuanaexanatsi pebinēyo. Bajaraponēyo pevēnē Isaac. Nexata baja penacuetonēyo penaexanaecujinae, ocho pamatacabibeje itsa xaina, Abrahampijinē boupiperabēcaucuta pexēnatonēyo pacuenia Dioso itorobatsi. Bajaraxuacujinae icatsia juya Isaacpjinē pexēnato xaina. Isaacpjinē pexēnato pevēnē Jacob. Bajara icatsia pacuenia Isaacpjinē ata boupiperabēcaucuta pexēnatonēyo. Bajaraxuacujinae icatsia Jacobpjinē pexi xaina doce ponēbeje. Bajara icatsia pacuenia Jacobpjinē ata boupiperabēcaucuba pexi. Bajarapadoce ponēbejejavaverena penaexanaponaevi doce pabitsaētobeje naexana, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁹ Icatsia Esteban jumaiti bajarapamonaevjavabelia:

—Nexata Jacobpjinē pexi, ponēbeje nacaemonaemi, vaxaitsi vajasalinaivi. Bajarapamonaemi pejuyapijinē Josépjinē. Nexata Josépjinē cuencaēbatsi pematapijivi. Bajaraxuata Josépjinē pecaponaenexatsi Egipto nacuyabelia, canajetaxuabatsi pematapijivi. Itsiata Josépjinē Dioso yjavaponapatsi. ¹⁰ Nexata Josépjinē bepejiobiaexanaevjavaminexatsi Egipto nacuata, vecuapanepapona. Dioso daxitacuene Josépjinē Egipto nacuata yapētaeyaexanapatsi. Bajaraxuata Egiptonacua pevetsinēmi, Josépjinē pexaniajamatatabēcuenia tanetsi. Nexata Egiptonacua pevetsinēmi tocopatatsi Josépjinē pecobenaevetsinexa Egipto-

tonacua. Egiptonacua pevetsinēmi pijabo ata peto-evetsinexa, Josépjinē tocopatatsi, jai Esteban bajarapamonaevjavabelia.

¹¹ Icatsia Esteban jumaiti bajarapamonaevjavabelia:

—Nexata pinijianiboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexaejava. ¹² Itsiata Egipto nacuata janibovajēnaeya, Josépjinē pecomuaquejebijava ayajava xaniavaetejeba trigoxu. Nexata Jacobpjinē vēnētane Egipto nacuata pexaejava pexainaevjavata trigoxu. Nexata Jacobpjinē pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpjinē pexi, pamonaevi jane baja vajasalinaivi. Itsiata Jacobpjinē pexi pejuyapijinējavata comuacae ata, apo yapētae pejuyapijinēcuene. ¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépjinē jumaiti pematapijivjavabelia: “Xanē raja Josépjinē panejuyapijinēnē,” jai Josépjinē. Bajaraxuata nexata Egipto nacuaevetsinēmi yapētane bajarapamonaevi Josépjinē pijamonaecuenia. ¹⁴⁻¹⁵ Nexata Josépjinē tonajumexuaba paxa Jacobpjinē penavara-paenexa Egipto nacuyabelia. Nexata Jacobpjinē daxita pexi, pemomoxi yajava, varapa Egipto nacuyabelia. Nexata Jacobpjinē, daxita pexi, pemomoxi yajava, itsa pata Egipto nacuata pejinavanapaenexa, nana-mataējēta setenta y cinco pajivibeje. Bajaraxuacujinae Egipto nacuata Jacobpjinē tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexējavabelia vajasalinaivimi jane baja petēpaevimi pesijebinxatsi ibovajuta, Siquem tomarata, sicaponatsi Siquem tomarabelia. Bajarapaibovajuta cajena jivi petēpaevi, jebabiaba. Abrahampijinē abaxē itsa asaē vajasalinaivimi pevajēnaeya, comuata bajarapaibovaju. Hamorpijinē pexita comuata bajarapaibovaju, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

¹⁷ Icatsia Esteban jumaiti bajarapamonaevjavabelia:

—Nexata baja itsa panepapona bejamatabēcuenia trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinē pemomoxi, vajasalinaivimi jane baja, ayabitsaētoxaneto tsaponaevi Egipto nacuata. Nexata jane baja pininia imoxoyo pevajēnaevi tsaponaevi pecopiapatsinexa pacuenia Dioso pexaniajaijumeta najumecapanepaeya jumaiti Abrahampijinējavabelia, baitsi jane baja Dioso pejamatabēcueneta vajasalinaivimi pejutsinexatsi Egipto nacuverena pejinavanapaenexa Canaán nacuata. ¹⁸ Nexata bajarapamatacabi itsanē junua pevetsinexa Egiptonacua. Ponē Egiptonacua pejanaevetsinē, bajaraponē apo yapētae Josépjinē Egiptonacua pevetsinēmicuene. Tsipaji baja bajayata, bajaraponē pevajēnaeya, tēpa baja Josépjinē. ¹⁹ Nexata Egiptonacua pejanaevetsinē, vajasalinaivimi apo itaxutotsoniataetsi. Ayaicuenia nacuenebiaexanabiabatsi. Bejiobiaexanabiabatsinua. Vajasalinaivi pexi pebinēyo

itsa tonaexanatsi, nacuaevetsinē pejamatabēcueneta penetsiaexanabiabatsi bajarapacuenia petēpaenexa pebinacuetoxi. ²⁰ Bajarapamatacabi naexana Moiséspijinē. Moiséspijinē bitso pexanianacuetonēyo. Dioso barēya tanetsi. Nexata Moiséspijinē penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moiséspijinē paxabeje penabeje xuabatsi baja. Nexata nacuaevetsinē pexēnatoyo Moiséspijinē pitatsi nacoxiyabijitsiatsi. Nexata nacuaevetsinē pexēnatoyo Moiséspijinē vitsatatsi pexēnatonēyocuenia. ²² Nexata Moiséspijinē cujarubatsi daxitacuene, xua Egipto nacuapijivi yapētane. Nexata Moiséspijinē bitso yapētane livaisi petsipaebinexa jivijavabelia. Pexanaejava ata pecobeta bitso yapētane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaiti bajarapamonaejavabelia:

—Itsa baja Moiséspijinē cuarenta pavaibeje xaina penaexanaecujinae, sivanajamatabēxaina petāenexa pijamonae itsajota jinavanapa. ²⁴ Nexata baja Moiséspijinē pona petāenexa pijamonae. Nexata baja Moiséspijinē itsa ponāpanacuata pijamonae jinavanapa, Moiséspijinē pitabēta Egipto nacuapijinē tobejiobiaexanatsi pijamonaenē. Nexata Moiséspijinē bajarajota pijamonaenē yamatamobeyaxuaba Egipto nacuapijinē.

²⁵ Moiséspijinē nexata jamatabējumaiti: “Daxita tajarmonae, Israelpijinē pemomoxi, nesivajamatabējumaiti tsane: ‘Moisés cajena nacayavenonaena vajavecuapitsapaenexa Egiptonacua,’ nesivajamatabējai tsane,” jamatabējai picani Moiséspijinē. Itsiata baitsi jane Moiséspijinē pijamonae bajarapacuenia apo sivanajamatabējumaiti. ²⁶ Moiséspijinē pebeyaxuabicujinae Egipto nacuapijinē, icatsia meravia pitsijavata, Moiséspijinē caxitajaraba anijanēbeje penabejevatabeje. Bajaraponēbeje Moiséspijinē ēpijamonaenēbeje, Israelpijinē pemomobeje. Nexata Moiséspijinē xaniavaetsia itaveta penabeyanivabeje matavējēa. Jumaiti: “¡Panabejitsipamebeje! Panapijamonaenēmēbeje raja. ¿Detsa xuajitsia panabiamebeje?” jai Moiséspijinē. ²⁷ Nexata ponē matapita penabejevabeje, torotajarabatsi Moiséspijinē. Bajaraponē jumaiti Moiséspijinējavabelia: “¿Jipatsa catocopata patanevetsinēexamē? ¿Jipatsa catocopata, pibisiacuene itsa paexanajē, pataneconitsiaexanabinexamēnua?”

²⁸ ¿Nebeyaxuabijitsiamē tsaja icatsia xanē ata pacuenia canivi beyaxuabame Egipto nacuapijinē?” jaitsi Moiséspijinē pijamonaenē. ²⁹ Nexata Moiséspijinē itsa jumetane bajarapacuenia pejumaitisjavatsi pijamonaenē, nexata Moiséspijinē najetabajirava Madián nacuayabelia. Bajarapanacuatalia ponāpana. Nexata bajarapanacuatalia Moiséspijinē nacojioba. Xaina anijanēbeje pexēnatobeje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁰ Icatsia Esteban jumaiti bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moiséspijinē peponāpanacuajinae Madián

nacuata, Dioso tsitanaitajētatsi beángelnēcuenia. Bajarapacuenia tsitanaitajētatsi petusato nacuata, Sinaivēnētsuto canacujitsita. Tsiquirinaemēyo petajueyecaecotia tuatuajēta, tsitanaitajētsitsi Dioso Moiséspijinē. Itsiata tsiquirinaemēyo apo veriajavitsi. ³¹ Moiséspijinē itsa tane, jamatabēcuenenabenajaca. Nexata cujitalia xaniavaetsia imoxoyo petāenexa tsiquirinaemēyo petajueyecaecotia. Nexata bajarapacotiajavaverena Dioso jumaiti Moiséspijinējavabelia: ³² “Xanē raja nijasalinaivimi pijaDiosonē. Abrahampijinē, Isaacpijinē ata, Jacobpijinē ata, pijaDiosonē,” jai Dioso. Nexata bajarajota Moiséspijinē neconecojai pecajunavi. Apo naēcotsilia baja icatsia matavējēa.

³³ Nexata icatsia bajarapacotiajavaverena Dioso jumaiti Moiséspijinējavabelia: “Nataxujonore nijazapato. Tsipaji raja taitabarata nucame. ³⁴ Taniji rajajajivi nijamonae Egipto nacuata bitso bepejiobicuenia pejinavanapaejava. Jumetaniji bajarapamonae penatsinueyabiabijava. Nexata runaicajē bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuayabelia,” jai Dioso Moiséspijinējavabelia tsiquirinaemēyo petajueyecaecotiajavaverena, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁵ Icatsia Esteban jumaiti bajarapamonaejavabelia:

—Nexata Moiséspijinē Dioso itorobatsi peponāpanacuata Egipto nacuayabelia, vajasalinaivimi Egipto nacuata pebejiobiaexanabiabijavatsivecua pejutsinexa Egipto nacuaverena. Moiséspijinē peponāpanacuata Egipto nacuayabelia, pamatacabi abaxē Moiséspijinē ponāpana panacuata vajasalinaivimi jinavanapa, bajarapamatacabi vajasalinaivimi Moiséspijinē navecuaitavetatsi. Vajasalinaivimi jumaiti Moiséspijinējavabelia: “¿Jipatsa catocopata patanevetsinēexamē? ¿Jipatsa catocopata, pibisiacuene itsa paexanajē, pataneconitsiaexanabinexamēnua?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moiséspijinē peponāpanacuata vajasalinaivimijavabelia. ³⁶ Moiséspijinē nexata pona Egipto nacuayabelia. Nexata Egipto nacuata Moiséspijinē Dioso pesaēta pinijicuene pexanaejava, exanāpana. Bajaraxuacujinae Moiséspijinē Egipto nacuaverena vajasalinaivimi jane baja matacanajetaruca. Nexata Moiséspijinē epatuarena Rojovēnē manuamene maxēranajavata, Dioso pesaēta pinijicuene pexanaejava exana. Bajaraxuacujinae cuarenta pavaibeje itsa jinavanapa petusato nacuata, itsajavanē icatsia Dioso pesaēta pinijicuene pexanaejavaenē, Moiséspijinē exanāpana. ³⁷ Bajarapamatacabi cajena Moiséspijinē jumaiti vajasalinaivimijavabelia: “Pacuenia xanē Dioso nitoroba Diosojumelivaisi jivi tatsipaebinēnexa profetanēnexanē, bajarapacuenia Dioso pacatoitorobianica itsanē profetanē Diosojumelivaisi papecatsipaebinēnexa. Bajaraponē paxamēyajuvēnēnē tsane. Bajaraponē pajumecovēnētsianame,” jai cajena Moiséspijinē bajayata tajēvelia vajasalinaivimijavabelia Jesús yabara.

³⁸ Moiséspijinē barēnacaetuata vajasalinaivimi pe-

tusato nacuata, Sinaivënë tsutomuxuneneta. Nexata Sinaivënë tsutojumabetsia caenë Moiséspijinë junaya. Nexata Sinaivënë tsutojumatatsia Moiséspijinë ángeljavabelia tocaicuaujai vajasalinaivimi. Nexata Moiséspijinëta Dioso penajumecopatsilivaisi jivi pejumecovënëtsinexa, Sinaivënë tsutojumatatsia tonajumecopatatsi. Bajarapalivaisi Dioso najumecopata Moiséspijinëta vaxaitsi ata bajarapalivaisi vajaxainanexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia: —Vajasalinaivimi apo jamatabëjumecovënëtsi Moiséspijinë. Apo jitsipae cajena matavëjêa penamatacaitorobinëxatsi. Vajasalinaivimi picani najamatabëxaina epatua Moiséspijinë pevëpënaviabinxatsi Egipto nacuayabelia. ⁴⁰ Moiséspijinë bajayajebi ponaponaya Sinaivënë tsutojumatatsia. Nexata Moiséspijinë pecovëta vajasalinaivimi jumaitsi Aarónpijinëjavabelia: “Exanare diosovi vajanacamatacaponaenexa. Apo yapëtaetsi rabaja pacuenia exanatsi Moisés vajanacamatacaponaenë Egipto nacuaverena,” jai. ⁴¹ Nexata vajasalinaivimi becerro jumapecataeya exana oronë. Nexata bajarapajumapenëjavabelia pevi perajutsinexa, ofrendacuenia tobja dajubi. Bajaraxuacujinae vajasalinaivimi jamatabëcuenabarëyaya fiesta exana pecobeta pexanaexae oronë. Tsipaji bajarapajumapenë vajasalinaivimi bepjadiosonë tane. ⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabëcuenecopatsiaya penavajëcabiabinexa itabopijitutulupujavabelia. Diosojumepaebinë profeta peyaquinaebaxutota, Dioso pejumaitsijava vajasalinaivimi yabara jumaitsi mapacueniaje:

Israelpijinë papemomoximë, pamatacabi abaxë pajinapanapame cuarenta pavaibeje petusato nacuatalla, pabeyabiabi atamë baca, oveja yajava, bajarapavi xanë apo panerajutabiabimë ofrendacuenia. ⁴³ Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinapanapame carpabo bepanijadiosonë panetaenë Molocvënëdiosonë pijabonexa. Pacajinapanapamenua tuluputo, jumapecataeya panenatoexanaetutuluputo, Renfánvënëtuluputo. Nexata bajarapatuluputo pataneme bepanijadioso. Panecobeta saya paneexanaediosovi, pacajinapanapame najamatabëcuenecopatsiaya bajarapadiosovijavabelia panenavajëcabiabinexa. Bajaraxuata panijanacuavecua pacacaponaeaxanaenatsi Babilonianacua pënëyabelia pairajavabelia, jai Dioso pejumaitsijava mapacueniaje profetanë peyaquinaebaxutota vajasalinaivimi yabara, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁴⁴ Icatsia Esteban jumaitsi bajarapamonaejavabelia: —Bajayata vajasalinaivimi itsa jinapanapa petusato nacuata, cajinapanapa Dioso pijacarpoboxaneto, ba-

jarapabota Diosojavabelia pevajëtabiabinexa. Nexata Dioso Moiséspijinëta penajumecopatsilivaisi, Dioso peyaquinaebopanayobeje, vajasalinaivimi xaniavaetabuatabiaba bajarapacarpabo ênëtuatuajëta. Copiaya Moiséspijinë jumapecataeya Dioso tsitajëtatsi pacuenia bajarapacarpabo exanetsijitsia. Nexata juya Moiséspijinë itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajëtatsi Moiséspijinë. ⁴⁵ Bajaraxuacujinae bajarapacarpabo rajutatsi vajasalinaivimi pecajinapanapenexa. Nexata vajasalinaivimi itsabelia varapa, caponabiaba bajarapacarpabo. Moiséspijinë baja itsa têpa, Josuépijinë juya matabacapon vajasalinaivimi. Josuépijinë nexata pamatacabi vajasalinaivimi matabacanajetaruca, caparena bajarapacarpabo mapanacuayaberenaje. Nexata vajasalinaivimi vajabitsaë exana mapanacuataje pejinapanapavimijavabelia. Nexata vajasalinaivimi mapairaje yacajërëta. Pamatacabi Josuépijinë vajasalinaivimi matabacanajetaruca mapanacuayaberenaje, Dioso rëcëpecaeyaexanatsi mapanacuajivimije Josuébana pevajënaetarena. Nexata bexëjavaberena ata, pamatacabi Davidpijinë mapanacua evetaje, vajasalinaivimi abaxë cajinapanapa bajarapacarpabo. ⁴⁶ Nexata Dioso pexaniajamatatabëcuenia tanetsi Davidpijinë, mapanacuaje pevetsinëmi. Nexata picani Davidpijinë bitso jitsipadiosopiabonexa templobo pexanaeyaexanaenexa. Baitsi paDioso bajayata Jacobpijinë jumecovënëta, Davidpijinë jane baja pamopijinëmi. ⁴⁷ Itsiata baitsi jane Davidpijinë Dioso apo tocopatsi templobo pexanaeyaexanaenexa. Davidpijinë pexënato, Salomónpijinë, Dioso pijabonexa templobo exanaeyaexana, Davidpijinë baja pepuatêpae. ⁴⁸ Pepo Dioso athëbëtatsia peecaenë, bajaraponë apo ponaponae bota, jivi pexanaebota. Diosojumepaebinë profetanë bajayata jumaitsi mapacueniaje Dioso pejumaitsijava:

⁴⁹ Athëbëtatsia daxitacuene taevetsinë. Mapanacuajava ata taevetsinë. ¿Detsa nexata xuajitsia bo panetoexanetsipame? Apo namatavenonaenë cajena bo tanacueraevetsinexa. ⁵⁰ Xanë daxitacuene taexanaenë, jai profeta bajayata Dioso pejumaitsijava, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁵¹ Icatsia Esteban jumaitsi bajarapamonaejavabelia: —Paneajamatabëcuenetajavi. Paneamatabocotajavinua. Apo pajumecovënëtsimë Dioso pejumelivaisi. Apo pacopatsimë Espíritu Santo papecatsijamatatabëjonenexa. Pacuenia panijasalinaivimi bajayata itsi, bajara saya icatsia paxamë paitsimë. ⁵² Diosojumepaebivi profetavi tajëvelia vajunupaebaona Cristo, pepo planeconijibinë pepatsijavanexatsica. Nexata panijasalinaivimi daxita bajarapaprofetavimi bejiobiaexanabiaba. Beyejebabiabanua. Nexata jane baja Cristo itsa patsica, paxamë pijavajabitsaë pecobeyabelia pacanajetaxuabame. Bajarapacuenia Cristo pabeyaxuabame. ⁵³ Angelevi pacarajutsi ata Dioso Moiséspijinëta penajumecopatsilivaisi jivi pe-

jumecovënëtsinexa, itsiata paxamë apo pajumecov-
ënëtsimë bajarapalivaisi, jai Esteban sacerdotevi pena-
matacaitorobivijavabelia, judíovi pijaancianovijavabelia
ata, judíovi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judíovi pijaan-
cianovi ata, judíovi pecujarubivi ata, itsa jumetane Es-
teban petsipaebilivaisi, anaepana bitso Estebanjav-
abelia. Nexata bajarapamonae pecaanae, navono-
quiarabaxane. ⁵⁵ Itsiata Esteban bitso ja-
matabëcuenevënëca Espíritu Santo. Esteban athëbëa
benaëcotsia. Nexata tane Dioso pijapenivenivenaeco-
tia. Taenutsianua Jesús penucaejava paxa Dioso pe-
muxuneneta, pecujuanenia. ⁵⁶ Nexata Esteban jumait-
saxita bajarapamonaejavabelia:

—¡Panataema! Taniji itaboxo penapatsijavatsia. Daxi-
tajivi Pematapijinë, ponë naexana mapanacuataje,
pacuenia vaxaitsi banaexanatsi, nucaya paxa Dioso pe-
muxuneneta, pecujuanenia, jai Esteban.

⁵⁷ Nexata sacerdotevi penamatacaitorobivi, judíovi
pijaancianovi ata, judíovi pecujarubivi ata, pecobenëta
namuxuvojoacaba. Bajarapamonae vavajai pinijicue-
nia. Daxita caecuenia cujibarenatsi Esteban pe-
vaetabinexatsi. ⁵⁸ Bajarapamonae Esteban caponaliatsi
tomarapënëyabelia. Nexata tomarapënëtalía Esteban
tseconatsi ibotonëta. Nexata daxita pamona
jumetane Esteban petsipaebilivaisi, najumajonejeba
pijacamisajumavelia penaxatabijavanë. Nexata Este-
ban petseconaevajënaetsi ibotonëta, bajarapamonae
penajumajonejebijavanë pevëjëato Saulovënëne evet-
siaexanatsi. ⁵⁹ Petseconanubenaevajatatsi ibotonëta,
Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene
pire, jai Esteban.

⁶⁰ Bajaraxuacujinae Esteban pematatabacabëta nuca.
Aëjai pinijijumeta.

—Tajatuxanenë, itaxutobejiobiataema mapamonae-
je. Vecuaajibiaexanare paneconi natsiexana xamëjav-
abelia tanebejiobiaexanaexae mapacueniaje, jai Este-
ban.

Bajaraxuacujinae Esteban tēpanajereca baja.

Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi

8 ¹⁻³ Sacerdotevi penamatacaitorobivi, judíovi pi-
jaancianovi ata, judíovi pecujarubivi ata, Esteban-
pijinë baja itsa beyaxuabatsi, Saulo tsitaxanepanatsi.
Nexata pebijivi, pamona Dioso bitso jumecovënëta,
bajarapamonae Estebanpijinë mëthëtatsi. Matanueya-
batsi bitso.

Bajarapamatacabi jane baja sacerdotevi penamata-
caitorobivi, judíovi pijaancianovi ata, judíovi pecujaru-
bivi ata, taxuxuaba pebejiobiaexanaponaejava Jesús
pelivaisi pejumecovënëtsivi Jerusalén tomarata. Saulo
jane baja jaitaruta Jesús pelivaisi pejumecovënëtsivi
Jerusalén tomarata. Caebo canacujitsia jonepona. Nex-

ata taicapona pebejivi, petiriavi ata, pamona Jesús
pelivaisi pejumecovënëtsivi. Penaneconitsivi pejebabi-
abiboyabelia Saulo cajonepona bajarapamonae. Nexa-
ta ayaibitsaëtoxaneto Jesús pelivaisi pejumecovënët-
sivi, Jerusalén tomarapijivi, rëcëpeca itsatomaranëjav-
abelia. Itsamonae rëcëpeca Samaria nacuyabelia. Itsi-
ata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecov- ënëtsivi, tsipaebapona Samaria nacujava yabara peli- vaisi

⁴ Pamona Jesús pelivaisi pejumecovënëtsivi,
rëcëpeca Jerusalén tomaravecu. Nexata itsaxuayo ba-
jarapamonae najetarubena, jivi tsipaebanajetarubena
pexanialivaisi, Jesucristo pelivaisi. ⁵ Pamona rëcëpeca
yajuvënëne, pevëne Felipe. Bajaraponë lia Samaria
nacuaata peecaetomarajavabelia. Bajarapatomarapijivi-
javabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi peca-
panepaenexa, jai tsaponae Felipe Samaria nacuaata
peecaetomarapijivijavabelia.

⁶ Itsa patomarata Felipe Jesús pelivaisi tsipaebabi-
ba, jivi ayaibitsaëtoxaneto nacaetuatabiaba. Daxita ba-
jarapamonae xaniavaetsia namuxunaevetabiaba Fe-
lige itsa tsipaebabiaba Jesús pelivaisi. Bajarapamonae
tane Felipe Dioso pesaëta pinijicue pexanaevajanë.
⁷ Pamona dovathi peyajavajinavanapaevi, Felipe ve-
cuacapitsapabiaba. Dovathi pinijijumeta aëjai tsabiabi
itsa vecuacapitsapabiaba Felipe. Nexata dovathi peya-
javajinavanapaevimi, jamatejema baja tsabiabi. Pa-
monae ata petabusipacuenavitsi, pejayujayunaevi
ata, jamatejemayaexanapona Felipe. ⁸ Bajaraxuata
daxita bajarapatomarapijivi jamatabëcuenebarëya.

⁹ Bajarapatomarata Simónvënëne ponapona. Bajara-
ponë jivi pejorobabiabinë. Bajayajebi daxita Samaria
nacupijivi yamaxëitojorobaponapona. Simón jumai
tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

¹⁰ Daxitajivi, petuxanevi ata, Simón pejumaitsijava
namuxunaevetabiabatsi. Bajarapamonae nexata
Simón yabara jumai tsabiabi:

—Maponëje Simón pinijicue pexanaevajava caëjë-
patsi. Dioso raeta yavenonatsi, jai tsabiabi bajarapa-
monae Simón yabara.

¹¹ Bajarapacuenia Samaria nacupijivi xaniavaetsia
jumecovënëtabiaba tsipaji Simón pejorobicueneta ba-
jayajebi jivi yamaxëitojorobabiaba. ¹² Nexata Felipe
Samaria nacupijivijavabelia tsipaeba Dioso pijajivi
pevetsijavanexa. Jesucristo pelivaisi ata tsipaeba. Nex-
ata Samaria nacupijivi jumecovënëta Felipe petsipa-
ebilivaisi. Bajarapamonae pebijivi, petiriavi ata, Felipe
bautisaba.

¹³ Nexata jane baja Simón jivi pejorobabiabinë ata
jumecovënëta Felipe petsipaebilivaisi. Nexata baja
Simón ata Felipe bautisaba. Bajaraxuacujinae Felipe
pepëta naponapona Simón. Nexata Simón ja-
matabëcuenenabenajacabiaba itsa taeyabiaba Dioso
pesaëta Felipe pinijicue pexanaponaejavanë.

¹⁴ Nexata apóstolevi Jerusalén tomarata pejinavana-paevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaitisi peyajuvënënebejejavabelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. ¹⁵ Itsa bajaronëbeje patabeje Samaria nacuayabelia, tovajëtabeje Diosojavabelia Espiritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. ¹⁶ Bajarapacuenia tovajëtabeje tsipaji abaxë Samaria nacuapijivi Espiritu Santo apo tsijamatabëpatsitsitsica. Abaxë saya bautisabatsi bajarapamonae Jesús pevënëta. ¹⁷ Nexata Pedrobeje Juanbeje petovajëtsijavatabeje Diosojavabelia, tsimatanacobe-boatabeje Samaria nacuapijivi. Nexata jane baja Samaria nacuapijivi Espiritu Santo tsijamatabëpatsicat-si.

¹⁸ Nexata Simón itsa tane Samaria nacuapijivi Espiritu Santo petsimatarunaejavatsitsica apóstolenëbeje Samaria nacuapijivi tsimatanacobe-boatatsiaya petovajëtsijavatabeje Diosojavabelia, nexata Simón palata tsipaeba apóstolenëbejejavabelia. ¹⁹ Simón jumaitisi:

—Panerajurebeje mapacaëjëpaejamatabëcueneje. Pajivi tsimatanacobe-boatajë tatovajëtsijavata Diosojavabelia, bajarapajivi petsimatarunaenexatsitsica Espiritu Santo, jai Simón apóstolenëbejejavabelia.

²⁰ Nexata Pedro jumaitisi Simónjavabelia:

—Xamë cajena Dioso casuabiana infiernojavabelia. Nexata vereverecaename nijapalata yajava. Tsipaji najamatabëxainame necomuatsinexa ëpalatata Dioso amoneya jivi perajutsijavatsica. ²¹ Tsipaji pepacuene apo najamatabëcuene copatsimë xaniavaetsia Diosojavabelia. Nexata Dioso patajumecovënëtsivita, apo nanacuenebimë tsane. ²² Copare baja papibisiacuene najamatabëxainame. Najamatabëcuene pënëyorore Diosojavabelia. Vajëre Diosojavabelia pecavecuajibi-aexanaenexa papibisiacuene najamatabëxainame.

²³ Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijina pecajamatabëcuene cënënaejava pibisiacuene nexanaeconi, jai Pedro.

²⁴ Nexata Simón jumaitisi:

—Panetovajërebeje Diosojavabelia tanevecuajibi-aexanaenexa paneconi xainajë Dioso tanexuabiyaniava infiernojavabelia pacuenia panejumaitisimëbeje, jai Simón.

²⁵ Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialibeje Jerusalén tomarabelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapijinë yabara pelivaisi

²⁶ Dioso pijaáγγελ jumaitisi Felipejavabelia:

—Nonotapunare. Maxuayolia roviaia liamëreje.

Panamuto Jerusalén tomaraverena naropota pepatsinexa Gaza tomarabelia, bajarapanamutualia liamëre, jai áγγελ Felipejavabelia.

Bajarapanamuto petusato nacujava rucalia pepatsinexa Gaza tomarabelia. ²⁷ Nexata Felipe xaniavaeta pijajavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitajaraba Etiopía nacuapijinë. Bajaraponë palata pevetsinë. Etiopianacua pevetsiva pijapalata tovetabi-aba. Bajaraponë, Etiopía nacuapijinë, Jerusalén tomarajavabelia pona najamatabëcuene copatsiaya pevajëtsinexa Diosojavabelia templobota. ²⁸ Nexata baja Etiopía nacuapijinë Jerusalén tomaraverena naviatana-jetaruca. Navialia baja pijanacuayabelia. Pijamoyota, carrozavënë moyota, yanajetaruca. Nexata lebanajetaruca Diosojumelivaisipaebinë profeta Isaíaspijinë bajayata peyaquinaebaxuto. ²⁹ Nexata Espiritu Santo jumaitisi Felipejavabelia:

—Bitsojinaremelia. Pëcaxinaeremelia mapamoje. Imoxoyo pemuxunenia nucaponaename, jai Espiritu Santo.

³⁰ Felipe nexata cujinaejinalia. Nexata baja Felipe pëcaxinalia Etiopía nacuapijinë. Nexata Felipe jumetane Etiopía nacuapijinë pelebanajetarucaejava profeta Isaíaspijinë peyaquinaebaxuto. Nexata Felipe jumaitisi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

³¹ Nexata Etiopía nacuapijinë jumaitisi:

—¿Detsa pacuenia jumeyapëtaejitsipajë itsa apo netsipaebi xaniavaetsia itsanë ata? jai.

Nexata Etiopía nacuapijinë junatatsi Felipe carrozavënë moyo ënëabetsia Felipe penajunaenexatsia penamuxuneniaecaenexabeje.

³² Profeta Isaíaspijinë peyaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitisi mapacueniaje:

Pacuenia oveja moya, caponae atatsilia pebeyaxu-abinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejajo naxunae atatsi, moya, bajara pijinia pacuenia bajaraponë ata moya tsane, yapëtae ata pebejiobiaexanaejavanexatsi. ³³ Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponë yabara apo jumaitisi tsane: “Mara pamonaaje bajaraponëmi pemomoxije,” apo jai tsane. Tsipaji beyaxuabianatsi, jai tajëvelia mapacueniaje Isaíaspijinë peyaquinaebaxutota Jesús yabara, palivaisi Etiopía nacuapijinë lebanajetaruca.

³⁴ Nexata Etiopía nacuapijinë jumaitisi Felipejavabelia:

—Pexaniacuene netoexanare. Netsipaebare ponë yabara yaquina profeta Isaíaspijinë mapacueniaje. ¿Baja tsa ponë pijacuata nayabarajumaitisi? Itsa jume,

¿itsanë yabara tsaja jumaitsi? jai Etiopía nacuapijinë Felipejavabelia.

³⁵ Nexata palivaisi Etiopía nacuapijinë lebanajetaruca, bajarapalivaisi Jesús yabara pejumajitsijava copiaya Felipe yapëtaeyaexana. Bajaraxuacujinae icatsia tsi-paeba pexanialivaisi, Jesús pelivaisi. ³⁶ Penajetarucajavatabeje bajarapanamutua, patabeje itsajota merayo eca. Nexata Etiopía nacuapijinë jumaitsi Felipejavabelia:

—Mara jota meraje. Jitsipajë picani xanë tanebautisabinexamë. Itsiata baitsi jane yapëtaneme xua yabara apo xanepanae tanebautisabinexamë, jai Etiopía nacuapijinë Felipejavabelia.

³⁷ Nexata Felipe jumaitsi:

—Itsa jumecovënëtame xaniavaetsia daxita nejamatabëëthëtojavaverena, nexata necaëjëpa tacabautisabinexa, jai Felipe.

Nexata bajaraponë jumaitsi:

—Jumecovënëtajë rabaja. Jesucristo raja xaniajai Dioso pexënato, jai Etiopía nacuapijinë Felipejavabelia.

³⁸ Nexata bajaraponë pijamo nucojopaeyaexana. Bajaraponëbeje Felipebeje runarecabeje merajavabereca. Felipe bautisaba Etiopía nacuapijinë. ³⁹ Nexata penonotajunaecujinaetsinabeje, Espíritu Santo pitatsi Felipe Etiopía nacuapijinë pitabarata. Itsiata Etiopía nacuapijinë apo tae pacuenia Felipe pitatsi Espíritu Santo. Bajaraxuacujinae Etiopía nacuapijinë apo taetsi baja Felipe matavëjëa. Itsiata Etiopía nacuapijinë pona baja barëyaya pijanacuayabelia. ⁴⁰ Felipe Espíritu Santo caliatzi Azoto tomarabelia. Felipe nexata daxita tomaranëjava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

Pacuenia Saulo jumecovënëta Jesús yabara pelivaisi

9 Saulo cajena Jerusalén tomarata apo copatsi petaicaponaejava daxita pamonaes Jesús pelivaisi jumecovënëta pebeyejebiaexanaenexa. Bajaraxuata Saulo pona daxita sacerdotevi pepo penamatacaitorobinëjavabelia. ² Nexata Saulo sacerdotevi pepo penamatacaitorobinëjavabelia jumaitsi:

—Netsicobeyaquinare cuyalatobaxutonë tacapon-aenexa Damasco tomarabelia. Damasco tomaratalia judíovi penacaetuatabibonë pevetsivi tarajutsinexa. Nexata bajarapamonae itsa tane neyaquinaebaxutonë, tanetocopatsinexa daxita Jesús pelivaisi pejumecovënëtsivi tataicaenexa. Nexata itsa taicajë pebijivi, petiriavi ata, tacapatsinexa mapatomaraberenaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinë jejai. Nexata cuyalatobaxutonë tsicobeyaquinatsi Saulo pecaponaenexa Damasco tomarabelia. ³ Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanajetaruca Damascotomara, jemata Saulo penajetarucaejavata namutua matatoyorotsia naitayotatsi athëbëvetsica. ⁴ Nexata Saulo irataeya bocajunua irata. Jumetaenuca athëbëvetsica pejumajitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

⁵ Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsne. Tajajivi netobejiobiaexanaponame. ¿Detsa xuajitsia apo tajitsipaecuenia exanaponame? Xamë nijacuata najamatabëcuenebijanaponame, jai Jesús athëbëvetsica.

⁶ Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaenexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

⁷ Nexata papebijivi Saulo yajavanajetaruca, najunavicanubena. Nexata moya nubena. Tsipaji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë. ⁸ Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsipaji itaxutomeravibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. ⁹ Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxubaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënëne, Tarso tomarapijinë. Bajaraponë Saulo maparucaje xanëjavaberenava-jëqueca. ¹² Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsimatanacobeuatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías itsa jumetane bajarapacuenia Jesús pejumajitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlivaisitaniji pacuenia bajaraponë Saulo exanaponapona. Vënëlivaisitaniji bajaraponë pebejiobiaexanaponaejava Jerusalén tomarata daxita pecajumecovënëtsivi. ¹⁴ Maberena ataje icatsia itorobatsi sacerdotevi penamatacaitorobinë peto-

taicaenexa daxita pamona pecajumecovënëtsivi jinanapa mapatomarataje, jai Ananías Jesúsjavabelia.

¹⁵ Nexata Jesús jumaiti Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinexa itsanacuanëpivijavabelia, tanelivaisipaebinexanua bajarapanacuanë pevetsivijavabelia ata, tanelivaisipaebinexanua Israel nacuapivijavabelia. ¹⁶ Xanë Saulo tsitajëtsianajë pacuenia itsamatacabi Saulo itsamona bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

¹⁷ Bajaraxuacujinae Ananías jane baja lia. Joneya pabota Saulo ponapona. Ananías nexata nacobebuata Saulo pematabocotojumavereca. Ananías jumaiti Saulojavabelia:

—Tajabananë Saulo, pepo petuxanenë raja Jesús, ponë catsitanaitajëta namutua nenajetarucæjavata, bajaraponë nitoroba. Bajaraponë nitoroba tacatsimatanacobebuatsinexa pecavecuaajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanacobebuatsinexa pecatsijamatabëvënëcaenexa Espiritu Santo, jai Ananías Saulojavabelia.

¹⁸ Bajarapacuenia Ananías pejumaitisjavata Saulojavabelia, Saulo veitaxutoothopatsi xua itaxutocaranatatsi, bedujuaitseboco. Nexata jane baja icatsia Saulo xaniavaetsia tane. Saulo nexata nonotapuna. Bajaraxuacujinae bautisabatsi baja. ¹⁹ Bajaraxuacujinae pexajava baja xane. Nexata baja icatsia Saulo aperabësäreca. Saulo nexata Damasco tomarata caematcabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovënëtsicujinae Jesús Dioso pexënatocue, bepijiayo Saulo taxuxuaba jivi petsipaebijava Jesús pelivaisi judíovi penacaetuatabibonëjava. Saulo jivi itsa tsipaebaona Jesús pelivaisi, jumaitsonae.

—Pepacuene raja Dioso pexënato Jesús, jai tsaponae Saulo.

²¹ Nexata daxita pamona jümetane Saulo petsipaebilivaisi, jamatabëcuenenabenajaca. Najumaiti bajarapamonae Saulo yabara:

—Mara ponëje bejiobiaexanapona Jerusalén tomaratalia daxita pamona jumecovënëta Jesús pelivaisi. Icatsia picani pata mapatomaraberenaje petaicaenexa daxita pamona jumecovënëta Jesús pelivaisi. Nexata itsa taica, pecaponaenexa picani Jerusalén tomarabelia, sacerdotevi penamatacaitorobivijavabelia, najai bajarapamonae Saulo yabara.

²² Itsiata Saulo ajumejunavijibia bitso asaëyata tsipaebaona Jesús pelivaisi. Nexata Saulo xaniavaetsia jivi yapëtaeayaxana xaniajai Jesús Dioso pitorobinëtsisica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi petsipaebaonaajava, bexëajavabelia judíovi sivanajamatabëcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judíovi vajënaeevetabiabatsi pebeyaxuabinexatsi picani. Pabau-paxanetojavalia jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënaeevetabiabatsi pebeyaxuabinexatsi picani. Itsiata Saulo nayalivaisiajümetane judíovi pebeyaxuabiapaebijavatsi. Bajaraxuata Saulo bajarapabaupaxanetojavalia apo pitsapaelia. ²⁵ Damasco tomara matatoyorotsia yacaranata piaitayaëibopanaxanetota. Bajarapayacaranatsijavaxaneto athëbëabetsia apia, pacuenia pinijinaejavaxaneto apia. Bajarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënoponaevitsi, itsa baja meravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia pey-acaranatsiibopanaxaneto yenepanata athëbëyo perucaeventanavojotualia, Saulo yacoparecatsi irabereca Damasco tomarapënëyabelia. Bajarapacuenia Saulo Damasco tomarata judíovivecua panepa pebeyaxuabiyavatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penaponaponaajava Jesús pelivaisi pejumecovënëtsivijavata. Itsiata daxita bajarapamonae Saulo cujunavatsi. Tsipaji apo jumexaniataetsi Saulo pejumecovënëtsijava Jesús pelivaisi. ²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucæjavata tane Jesús bemajitsinaebota. Pacuenia ata Saulo Jesús barëcuaicuajititsi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebaona Damasco tomarata Jesús pelivaisi, Bernabé tsipaeba apóstolevijavabelia. ²⁸ Nexata baja Saulo ponapona Jerusalén tomarata. Naponapona apóstolevijavata. ²⁹ Saulo tsipaebaona ajumejunavijibia Jesús pelivaisi. Saulo barëcuaicuajititsi tsabiabi judíovi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. ³⁰ Jesús pelivaisi pejumecovënëtsivi, jümetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënxuabatsi Cesarea tomarabelia. Bajarajotacujinae Saulo itorobatsi pevajënaeyabelia penajetarucæenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejiobiaex-

anabiabijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecov-
 ènètsivi caebitsaèto canacujitsia xaniavaetsia jinavana-
 pa. Nexata daxita jamatabècuenevitsabapona Jesús
 pelivaisi pejumecovènètsijava. Bajarapamonae xani-
 avaetsia jumecovènètavanapa Jesús pelivaisi pibisi-
 acuene pexanaeyaniva. Espíritu Santo yavenonaponat-
 si. Nexata itsamonae ata Jesús pelivaisi apo pejume-
 covènètsivimi, ayaibitsaèto xaneto jumecovènètavana
 Jesús pelivaisi.

Pacuenia Jesucristo pejamatabècueneta Pedro jamate- jemayaexana Eneasvènènè yabara pelivaisi

³² Pedro najetaruca daxitatamaranèjava pesivax-
 ainaenexa Dioso pejumecovènètsivi. Nexata najetaru-
 ca Lida tomarajava ata pesivaxainaenexa Lida tomara-
 ta pejinavanapaevi, Dioso pejumecovènètsivi. ³³ Nexa-
 ta Pedro Lida tomarata taeyabuata Eneasvènènè. Ba-
 jaraponè ocho pavaibeje xaina camata peboacaecuj-
 nae. Tshipaji tabusipacuenabatsi. ³⁴ Pedro nexata ju-
 maitsi bajaraponèjavabelia:

—Eneas, cajamatejemayaexana rabaja Jesucristo.
 Nonotapunare. Xanebare nijacama, jai Pedro.

Nexata Eneas bajarajota nonotapuna. ³⁵ Nexata daxi-
 ta Lida tomarapijivi, Sarón nacuapijivi ata, tanetsi
 Eneas pejamatejemajava. Bajarapamonae nexata pi-
 japerujamatabècuene pecatsitecaejavami, copaba
 baja. Najamatabècuenecopaba baja Jesucristojav-
 abelia.

Pacuenia Pedro Dorcasvènèva petèpaecujinae icatsia asaèyaexana yabara pelivaisi

³⁶ Jope tomarata ponapona Dioso pejumecovènètsi-
 va, Tabitavènèva. Bajarapova pevènè griegojumeta
 Dorcas. Dorcas daxita matababi canacujitsia pexani-
 acuene toexanabiaba itsamonaejavabelia. Bepejibivi-
 javabelia rajutabiaba penamatavenonaevaxi bajara-
 pacuenia peyavenonaenexa. ³⁷ Pamatacabi Pedro pon-
 apona Lida tomarata, Dorcas avitane Jope tomarata.
 Nexata baja Dorcas tèpa Jope tomarata. Peper-
 abèquiatsicujinaetsi petèpaeva buatatsi anijairabeje
 pexainaebò ènètuatuajèta. Athèbèyo pairatsia, bajara-
 paènètuatuajètatsia buatatsi. ³⁸ Jopetomara eca imox-
 oyo Lida tomaravecua. Dioso pejumecovènètsivi
 vènèlivaisitanetsi Pedro peponaponaevaxi Lida
 tomarata. Nexata Dioso pejumecovènètsivi itoroba
 anijanèbeje pejumait-sinexabeje Pedrojavabelia: “Pe-
 dro, naxanitsia. Liamère Jope tomarabelia,” pejainex-
 abeje Pedrojavabelia. Nexata bajaraponèbeje Lida
 tomarabelia sivaliabeje Pedro.

³⁹ Nexata Pedro narena bajaraponèbeje pepèta. Pe-
 dro itsa napata pabota petèpaeva boca, tsitajètatsi it-
 sajota petèpaeva boca. Nexata pamonajivi pevecuatè-
 pavanètsi, Dorcaspijiva pevènuvitsi, Pedro matatoy-
 orotsia itaxutuanuenubenatsi. Bajarapamonae Pedro
 tsitajèbatsi Dorcaspijiva pejorocejavanè, penaxatabi-
 javanè, penajumaacabipananè ata, xuanè Dorcaspijiva

rajuta bajarapamonaejavabelia pamatacabi abaxè
 asaè tsaponapona. ⁴⁰ Nexata paènètuatuajèta petè-
 paeva boca, bajarapaènètuatuajèvecuata Pedro daxita
 bajarapamonae pitsapaeyaexana. Bajarapamonae itsa
 pitsapalia, Pedro pematabacabèta nuca pevajètsinexa
 Diosojavabelia. Nexata Pedro pevajètsicujinae Dioso-
 javabelia, napènèyorota petèpaevajavabelia. Pedro ju-
 maitsi petèpaevajavabelia:

—Tabita, nonotapunare, jai Pedro.

Nexata petèpaevami naècota. Itsa tanetsi Pedro, ba-
 jarapova namatacota. ⁴¹ Pedro nexata bajarapova
 cobevaetabiaya nonotapunaeyaexana. Nexata Pedro
 junarena daxita Dioso pejumecovènètsivi, pamonajivi
 pevecuatèpaevanètsi ata. Nexata tsitajèta bajarapa-
 monaejavabelia petèpaevami icatsia piasaèjava. ⁴²
 Nexata Dioso pesaèta bajarapapinjicueña Pedro
 pexanaejava, daxita Jope tomarapijivi yapètane. Nexa-
 ta jivibitsaèto xaneto jumecovènèta Jesús Dioso pexè-
 natocuene. ⁴³ Nexata Pedro bajayajebi ponapona Jope
 tomarata. Simón bacabocotonè peyacueyacucaeyaex-
 anaenè, pijabota Pedro naponapona.

Pacuenia Pedro barècuaijai Corneliovènènè yabara pelivaisi

10 Cesarea tomarata ponapona Corneliovènènè.
 Apo judíonè. Bjaraponè Italia nacuaverena
 pepatsivi vajabitsaèvi pijacapitán. ² Cornelio pijabopi-
 jivi barèjumecovènètaponapona Dioso. Dioso bitso
 yaityaeya Cornelio ponapona. Cornelio palata ayaija-
 va rajutabiaba judíovijavabelia peyavenonaenexa
 judíovi bepejibivi. Cornelio vajètabiaba Diosojav-
 abelia. ³ Itsamatacabi caniviyoepatota, beja-
 matabècuene a las tres, Cornelio bemajitsinaebota
 tane Dioso pijaánel pejonejavarena pijaboyarena.
 Nexata junataxubatsi.

—¡Cornelio! jaitsi.

⁴ Cornelio nexata naècota ángeljavabelia. Bitso cuju-
 nava. Nexata Cornelio jumait-si ángeljavabelia:

—¿Detsa xua jitsipame? jai.

Nexata ángel jumait-si:

—Nevajètabiabijava Diosojavabelia, nerajutabiabija-
 va ata penamatavenonaecuene bepejibivijavabelia,
 daxita bajaraxua Dioso tsitaxanepanatsi. Dioso nexata
 apo nacofènètsi bajaraxua. ⁵ Itorobare nijajivi Jope
 tomarabelia pecatojunatsinexa Simón, ponè itsavènè
 vènèrubatsi, Pedro. ⁶ Bjaraponè Simón naponapona
 Jope tomarata, itsanè Simón, bacabocotonè peyacuey-
 acucaeyaexanaenè, pijabota. Bjaraponè Simón pi-
 jabo eca manuamene itapata. Nexata Simón, ponè it-
 savènè vènèrubatsi, Pedro, itsa patsiarena, catsipae-
 biana pacuenia exanaejitsiamè, jai ángel Corneliojav-
 abelia bemajitsinaebota.

⁷ Bjarapacuenia ángel bemajitsinaebota pejumait-
 sicujinae Corneliojavabelia, ángel baja pona. Nexata
 Cornelio junata anijanèbeje pijabota pet-
 onacuenebaponaponaenètsibeje. Pematatsènèa juna-
 ta caenè vajabitsaènè. Bjaraponè vajabitsaènè Dioso
 peyayataenè. Bjaraponè Cornelio yavenonabiabatsi.

⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Joje tomarabelia, Simón pesivaponaenexa. Nexata baja bajarapamonae naropoba.

⁹ Meravia pitsijavata, matonejeepatota, bajarapamonae Joje tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumanamatajêpaebo. Pedro junaya bajarapabojumatatsia pevajêtsinexa Diosojavabelia. ¹⁰ Pedro bitso piajani. Jamatabênabane picani. Itsiata pexaejava pexanaevi abaxê apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athêbêvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaêtotabeje namataenetsia upicêta. Bajara pacuenia yamaêya copatsica. ¹² Bajarapapanaxaneto tuatujêta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobêxêta pejinavanapaevi. Nubena daxitaviria pepunaevi. ¹³ Nexata Pedro jumetane athêbêvetsica pejumaitisijava: “Pedro, nonotapunare. Beyaxuare daxita mapamonaeje nexaenexa,” pejaijava athêbêvetsica, Pedro jumetane.

¹⁴ Nexata Pedro jumaitis:

—Jume raja. Caeto ata raja xanê apo xaenê bajarapavirianêxi tanejamatabêcuenebijiianaeyaniva. Tsipaji Dioso Moiséspijinêta patanetonajumecopatsilivaisi, paneitaveta bajarapavirianêxi pataxaeyaniva, jai Pedro.

¹⁵ Icatsia athêbêvetsica jumaitis Pedrojavabelia:

—Pavirianêxi caitorobatsi nexaenexa, xaema. Pêtsa jumaitsimê: “Apo xaenê raja bajarapavirianêxi tanejamatabêcuenebijiianaeyaniva,” jamê pêtsa, jai athêbêvetsica.

¹⁶ Acueyabi xuabeje bajarapacuenia athêbêvetsica napêna jumaitis Pedrojavabelia. Bajaraxuacujinae bajarapapanaxaneto athêbêabetsia baja icatsia yapêcaevaya. ¹⁷ Pedro nexata najamatabêxainaeja jamatabêjumaitis tsecae:

—¿Detsa meta pitsijamatabêcuene yabara netsitajêta bajaraxua? jamatabêjai tsecae Pedro.

Pedro abaxê itsa najamatabêxaineca bajarapacuenia, Cornelio pijajivi pata. Pabota Pedro naponapona, bajarapabo matatoyorotsia yacaranata ibopanaxanetonê mataropotsia pefaratsijavaxanetota. Nexata bajarapayacaranatsijavaxaneto baupa muxuneneta nubena bajarapamonae. Bajarapamonae namutuarena yanijobanajetarubena jivijavabelia peyapêtaenexa itsajota eca Simón, bacabocotonê peyacueyacaeyaexanaenê, pijabo. ¹⁸ Nexata bajarapamonae pepatarêcêpacujinae, baupa pênêvelia ayaijumeta yanijoba. Jumaitis:

—¿Baja tsa mapabota Simón naponaponaje, ponê vênêrubatsi itsavênê, Pedro? jai bajarapamonae.

¹⁹ Pedro abaxê bojumatatsia athêbêyo najamatabêxainecaya bemajitsinaebota petaejava yabara. Nexata Espíritu Santo jumaitis Pedrojavabelia:

—Taema. Acueyabi ponêbeje casivaparena. ²⁰ Nexata nonotapunare. Runaremeca baja nenaponaenexa bajarapamonae pepêta. Jamatejema saya jamatabêcueneconvêbia naponaname. Tsipaji raja xanê itorobarenajê bajarapamonae, jai Espíritu Santo Pedrojavabelia.

²¹ Nexata baja Pedro runareca Cornelio pijajivijavabereca. Pedro jumaitis bajarapamonaejavabelia:

—Ponê pajaitame, xanê rabaja maje. ¿Detsa xuajitsia panesivaparemena? jai Pedro.

²² Nexata Cornelio pijajivi jumaitis Pedrojavabelia:

—Vajabitsaêvi raja pijacapitán Cornelio pejamatabêcuene panajetarubenajê. Bajaraponê pexaniajamatabêcuenenê. Dioso bitso pejumecovênêtsinê. Nexata bajaraponê Diosojavabelia vajêcabiaba. Daxita judíovi yayatanetsi. Nexata judíovi jumai tsabiabi bajaraponê yabara: “Pexaniajamatabêcuenenê raja Cornelio,” jai tsabiabi. Dioso raja pijaángel itorobatsi Cornelio pecajunatsinexa. Bajaraxuata paxanê pacasivaponarenatsi Cornelio pijaboyabelia nenaponaenexa. Cornelio cajumetaejitsia palivaisi tsipaebijitsiamê bajaraponêjavabelia, jai Cornelio pijajivi Pedrojavabelia.

²³ Nexata Pedro copiapita boyaberena pejonenexa bajarapamonae. Bajarapamonae abaxê namajita bajarapabota. Bajayacunua jane baja Pedro napona bajarapamonae pepêta. Pedro pëyanatatsi itsamonae Joje tomarapijivi, Dioso pejumecovênêtsivi. Itsiata abaxê bajarapamatacabi apo patsilia. Epatua abaxê majitaothopa.

²⁴ Nexata meravia pitsijavata Pedrovana jane baja palia Cesarea tomarabelia. Cornelio nexata pijabota yajavanuca pejunatsivi, pijamonaevirivi. Yajavanucanua itsamonae, pamona bitso Cornelio peyapêtaevitsi. Pedro jane baja barêvajênaeevetanucatsi. ²⁵ Pedro itsa patanajetaruca Cornelio pijabopanabota, Cornelio copiapitatsi. Nexata Cornelio pematabacabêta nuacunua Pedro pitabarata. Tsipaji bitso yayataeya copiapitsijitsia picani. ²⁶ Nexata Pedro apo jitsipae bajarapacuenia bitso yayataeya pecopiapitsijavatsi. Nexata Pedro maxêvaetaba. Nonotapunaeyaexana. Nexata Pedro jumaitis Corneliojavabelia:

—Nonotapunare. Tsipaji saya pacuenia xamê jamatabêcueneitsimê, bajara saya xanê ata jamatabêcueneitsinê, jai Pedro.

²⁷ Nexata Pedro Cornelio barêcuaijai tsanucaponae panabojavarena. Pedro itsa najoneya Cornelio pijaboyalia, tane jivibitsaêtoxaneto Cornelio pijabota penacaetuatsivi. ²⁸ Nexata Pedro jumaitis Cornelio pijabota penacaetuatsivijavabelia:

—Paxamê baja cajena xaniavaetsia payapêtaneme mapacueje. Paxanê pajudíovinê patajasalinaivimi apo panetocopatsi patayajavajinavanapaenexa apo judíovi. Bijiaya pataeyabiabajê apo judíovi. Apo panetocopatsinua patajonenexa apo judíovi pijaboyalia. Itsiata baitsi jane aeconoxaeta baja Dioso nitaveta taco-

patzinexa baja bajarapajamatabëcuene. Nexata Dioso netocopata tayajavaponaponaenexa apo judíovi ata. Netocopatanua tanajonenexa apo judíovi ata pijaboy-alia. ²⁹ Bajaraxuata itsa nejunata taponaponaenexa maberenaje, narenanë bepíjia ajamatabëcuene covëbia. Nexata jamatabëyapëtaníjia xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanë imata, caniviyoepatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacuene tataecujinae. Ángel penaxatatsijava nivenivena. ³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëtanane nerajutabiabijava bepejiobivijavabelia penamatavenonaecue.

³² Nexata nijajivi itorobare Jope tomarjavabelia pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacucaeyaxanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. ³³ Bajaraxuata bepíjiayo casivaponaeyaxanatsi. Xamë baja nexata pexaniajamatabëcuena netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaebinexamë, jai Cornelio Pedrojavabelia.

Pacuenia Pedro livaisi tsipaeba Cornelio pijabota yabara pelivaisi

³⁴ Pedro jane baja taxuxuaba livaisi petsipaebijava. Jumaitsi:

—Matapania rajane baja yapëtaníjia. Najëpaeya tsae-na Dioso nacajitsipa daxitaviriavitsi. ³⁵ Caenacuapijivi canacuajitsia, pamona Dioso yaiyataeyajinavanapa, jumecovënëtsijajinavanapanua pacuenia Dioso itorobatsi, bajarapamonae Dioso jitsipa. ³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaebatsi Israel nacuapijivi pibisiacuene pexanaeneconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë.

³⁷ Payapëtaneme rabaja mapacueneje. Juanpijinë jivibautisabinëmi jivi livaisi petsipaebanajetarucaecujinae, pebautisabaponaecujinaenua, Jesús cotocaevi tsi-paebanajetaruca Galilea nacujava, Judea nacujava ata. ³⁸ Payapëtaneme rabaja mapacueneje. Jesús, Nazaret tomarapijinë, Dioso rajuta Espíritu Santo. Nexata Espíritu Santo pejamatabëcueneta Jesús cajëpatsi daxitacuene pexanaenexa. Nexata Jesús jamatejemaeyaxanapona daxita pamona dovathi pejamatabëcueneta avitane. Bajarapacuenia Jesús exanapona tsipaji Dioso yajavaponapontsi. ³⁹ Paxanë baja cajena pataníjia daxita xua Jesús exanapona Judea nacuata, Jerusalén tomarata ata. Itsamonae beyaxua-

batsi Jesús. Cobematabiabarutatsi cruzajavabelia. ⁴⁰ Itsiata baitsi jane Jesús pemëthëtsicujinaetsi, acueyabi matacabita, Dioso icatsia asaëyaexanatsi. Dioso Jesús cajëpaeayaxanatsi patanetsitanaitajëtabinexa paxanëjavaberena. ⁴¹ Itsiata Jesús apo tsitanaitajëtsi daxitajivijavabelia. Épaxanëjavaberena saya panetsitanaitajëtabiaba. Tajëvelia baja cajena Dioso paneitapeta patataevinexa Jesús petëpaecujinae icatsia itsa asaë, bajaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarë-abane. Panebarëmatavëjëaapanua. ⁴² Nexata Jesús paneitoroba patatsipaebaponaenexa daxitajivijavabelia pexanialivaisi, Jesús pelivaisi. Paneitorobanua patatsipaebaponaenexa Dioso pejamatabëcueneta itsamatacabi Jesús penaneconitsiaexanaejavanexa daxita pijaneconi pexinaevi. Itsamatacabi Jesús naneconitsiaexanaena piasaëvi, petëpaevimi ata. ⁴³ Athëbëvetsica Jesús pepatsivajënaetsica, bajayata jivanapona Diosojumepaebivimi profetavi. Nexata profetavimi tajëvelia vajunupaebaona Jesús pejamatabëcueneta Dioso pevecuaajibiaexanaejavanexa pibisiacuene pexanaeneconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espíritu Santo tsijamatabëjunuatsi apo judíovi ata yabara pelivaisi

⁴⁴ Pedro abaxë livaisi petsipaebanucaejavata Cornelio banajavabelia, Espíritu Santo tsijamatabëjunuatsi daxita pamona jumetaeyena Pedro petsipaebilivaisi.

⁴⁵ Nexata judíovi Dioso pejumecovënëtsivi, Pedro peyajavapatsivi, itsa tane bajarapacuene, jamatabëcuenenabenajacanubena. Jamatabëcuenenabenajaca tsipaji apo judíovi ata Espíritu Santo tsijamatabëjunuatsi.

⁴⁶ Nexata Pedro peyajavapatsivi yapëtanane Espíritu Santo petsijamatabëjonejavatsi Cornelio bana. Tsipaji Cornelio bana cuaicuajiai itsaviriajumenëta, apo penatsipaebijumenëmi. Cornelio bana jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espíritu Santo, bajara pijinia pacuenia mapamonae ataje Dioso rajutatsi Espíritu Santo. Bajaraxuata itsajivi ata acuenebi pejumaitsijava bajarapamonae yabara: “Pëtsa mapamonaeje pabautisabame merata,” pejaijava, jai Pedro.

⁴⁸ Nexata Jesucristo pevënëta Pedro bautisaba Cornelio bana. Pedro pebautisabicujinae Cornelio bana, asivatsi abaxë Pedro penaponaponaenexa bajarajota caematacabibeje.

Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi

11 Apóstolevi vënëlivaisitane apo judíovi ata Cornelio bana pejumecovënëtsijava Jesús pelivaisi.

Judea nacuata pejinavanapaevi ata, pamonaе jume-covënëta Jesús pelivaisi, vënëlivaisitane apo judíovi ata Corneliobana pejumecovënëtsijava Jesús pelivaisi.

² Nexata pamatacabi Pedro pata Jerusalén tomarata, judíovi, pamonaе jume-covënëta Jesús pelivaisi, jumait-si Pedrojavabelia:

³ —¿Detsa xuajitsia Cesarea tomarata naponapon-ame apo judíovi pijabota? ¿Detsa xuajitsia nana-baneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajarapacueña yabara. Pedro jumait-si judíovijavabelia:

⁵ —Pamatacabi naponaponajë Jope tomarata Simón, bacabocotonë peyacueyacuеcaеyaexanaenë, pijabota, vajëtajë Diosojavabelia. Nexata Diosojavabelia tavajët-sijavata bemajitsinaebota taniji athëbëvetsica pe-runaеjavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje na-mataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Itsa naitaxutoba-batsia naëcotajë xaniavaetsia tataenexa xua yajavana-jetaruca bajarapapanaxaneto tuatuajëta, nexata taniji cuatro pataxutabeje pejinavanapaevi. Taniji unupijivin-ua, pianaepanaevi. Taniji pecotobëxëta pejinavana-paevinua. Taniji pepunaevinua. ⁷ Nexata jumetaniji athëbëvetsica tanejumait-sijava: “Pedro, nonotapunare. Beyaxuare daxita mapamonaeje nexaenexa,” nejai.

⁸ Nexata jumait-sinë: “Jume raja. Caeto ata raja xanë apo xaenë bajarapavirianëxi tanejamatabëcuenebi-jianaeyaniva. Tsi-paji Dioso Moisés-pijinëta patanetona-jumecopatsilivaisi, paneitaveta bajarapavirianëxi pataxaeyaniva,” janë. ⁹ Nexata athëbëvetsica icatsia nejumait-si: “Pavirianëxi caitorobatsi nexaenexa, xae-ma. Pëtsa jumait-simë: ‘Apo xaenë raja bajarapaviri-anëxi tanejamatabëcuenebijaeyaniva,’ jamë pëtsa,” nejai athëbëvetsica. ¹⁰ Acueyabi xuabeje bajarapacue-nia athëbëvetsica napëna nejumait-si. Bajaraxuacujinae bajarapapanaxaneto daxita bajarapamonae athëbëabetsia baja icatsia yapëcaevaya. ¹¹ Bajara-paepatota jane baja acueyabi ponëbeje nesivapata pabota naponaponajë. Bajarapamonae itorobatsi Ce-sarea tomaraverena. ¹² Nexata Espíritu Santo nitoroba bajarapamonae pepëta ajamatabëcuene-covëbia tanaponaenexa Cesarea tomarabelia. Mapamonaeje vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneya-jë Cornelio, vajabitsaëvi pijacapitán, pijaboyalía. ¹³ Nex-ata Cornelio panetsipaeba pijabota petsitanaitajëtsija-vatsi ángel. Angel pina jumait-si Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajara-ponë itsa patsiarena, catsipaebiana pacuenia exanae-jitsiamë Dioso pecavecuajibiaexanaenexa daxita pibisiacuene nexanae-necanemi, daxita nijabopijivi ya-java,” jai pina ángel Corneliojavabelia. ¹⁵ Nexata jane baja itsa taxuxuabajë livaisi tatsipaebijava Corne-liobanajavabelia, Espíritu Santo tsijamatabëpatsicatsi Corneliobana. Pacuenia vaxaitsi copiaya nacatsija-

matabëpatsica Espíritu Santo, bajara pijinia pacuenia bajarapamonae ata tsijamatabëpatsicatsi Espíritu San-to. ¹⁶ Nexata najamatabënapitajë Jesús patanejumait-si-java mapacueniaje: “Juanpijinë raja jivi bautisabanaje-taruca ëmerata. Itsiata baitsi jane caematacabibejucu-jinae paxamë Dioso pacatsijamatabëjoneyaexanaena Espíritu Santo,” patanejaijiva Jesús, najamatabënapitajë. ¹⁷ Xaniajai baja cajena. Dioso rajutapona Espíritu Santo apo judíovi ata pacuenia vaxaitsi nacarajuta Es-píritu Santo vajajumecovënëtsixae vajatuxanenë Jesu-cristo. Nexata acuenebi tacaranatsijava Dioso perajut-sijava Espíritu Santo apo judíovi ata, jai Pedro judíovi-javabelia, Jesús pelivaisi pejumecovënëtsivijavabelia.

¹⁸ Nexata judíovi itsa jumetane bajarapacuenia Pedro pejumait-sijava, moya baja. Nexata judíovi ja-matabëcuenebarëya Diosojavabelia. Nexata Dioso yabara jumait-si:

—Xaniajai rabaja. Dioso bajarapacuenia exana apo judíovi ata matabacabi apo pevere-vere-caejava pex-ainaenexa, itsa copaba pibisiacuene pexanabiabijava penajamatabëcuene-pënëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

¹⁹ Pamatacabi Estebanpijinë beyaxuabatsi, Dioso pe-jumecovënëtanapaevi Jerusalén tomarata rëcëpeca daxitanacuanëjava. Bajarapacuenia rëcëpeca tsi-paji bitso bejiobiaexanaponatsi. Jesús pelivaisi pejumecov-ënëtsixae, itoyatsi. Itsamonae tajëbelia rëcëpeca Feni-cia tomarabelia. Itsamonae rëcëpeca Chipre tunaetota peecaetomarabelia. Itsamonae rëcëpeca Antioquía tomarajavabelia. Nexata bajarapamonae Jesús peliv-aisi tsipaebapona bajarapatamaranëjava ëjudíovijav-abelia. Itsaviriavijavabelia apo tsipaebaponaе. ²⁰ Itsa-monae Jesús pelivaisi pejumecovënëtsivi, Chipre tu-naetota peecaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. ²¹ Pamonaе apo judíovi-javabelia tsipaeba Jesús pelivaisi, Dioso yavenonatsi. Nexata apo judíovi ayaibitsaëto-xaneto jumecovënëta Jesús pelivaisi. Najamatabëcuene-pënëyorota Diosojav-abelia pibisiacuene pexanabiabijavavecuа.

²² Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitane apo judíovi ata An-tioquía tomarapijivi Jesús pelivaisi pejumecovënëtsija-va. Nexata bajarapamonae Bernabé itorobaliatsi An-tioquía tomarabelia petaenexa apo judíovi ata Jesús pelivaisi pejumecovënëtsijava. ²³ Nexata Bernabé ita pata Antioquía tomarabelia, tane apo judíovi ata Dioso peyavenonaеjavatsi. Nexata Bernabé sivaja-matabëcuenebarëya apo judíovi ata. Nexata Bernabé muxujioba apo judíovi ata daxita bajarapamonae peja-matabëëthëtovetsina ajamatabëcuene-saëya peyajava-jinavanapaenexa Dioso. ²⁴ Bernabé bitso pexaniaja-matabëcuene-në. Jamatabëcuenevënëca Espíritu San-to. Nexata exanabiaba Espíritu Santo pitorobicueniat-

si. Dioso bitso pejumecovënëtsinë Bernabé. Bajaraxuata nexata jivibitsaëtoخانeto jumecovënëta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé itsa caxitajaraba Saulo, barërena Saulo Antioquía tomaraberena. ²⁶ Nexata Antioquía tomarata caevai naponaponabeje Dioso pejumecovënëtsivijavata. Jivi ayaibitsaëtoخانeto livaisi tsipaebabiababeje. Antioquía tomarata daxita pamonaes Jesús pelivaisi jumecovënëtavanapa, bajarapamonae pijatomarapijivi pepo copiaya jane baja vënërubatsi Cristianovi.

²⁷ Pamatacabi abaxë Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata. ²⁸ Bajarapapofetaviyajuvënënë pevënë Agabo. Nexata Agabo nonotapuna Dioso pejumecovënëtsivi penacetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espiritu Santo peyapëtaeyaexanaexaetsi. Agabo jumaisi mapacueniaje:

—Ayaijaniboxaneto raja copiapatsiana daxitanacuanëjava, jai tajëvelia Agabo.

Bajarapajaniboxaneto bexëa copiapata Agabo pejumaitsicuenia pamatacabi nacuaeetsinë Claudio evertaponapona Romanonacua. ²⁹ Bajaraxuata cajena jani-bovajënaeya, Antioquía tomarapijivi daxita Dioso pejumecovënëtsivi najamatabëcueneyëpa peyavenon-aenexa Judea nacuapijivi Dioso pejumecovënëtsivi. Nexata Antioquía tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi. ³⁰ Nexata baja Antioquía tomarapijivi itsa tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejio-bivijavabelia.

Pacuenia Pedro etatsi penaneconitsivi pejebabiabibota yabara pelivaisi

12 Nacuaeetsinë Herodes bejiobiaexanapona Jesús pelivaisi pejumecovënëtsivi. ² Herodes pijajivi itoroba espadata pebeyaxuabinexatsi Santiago, Juan pematapijinëmi. ³ Herodes itsa tane judíovi petsitanexanepañejavatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judíovi baxane levadurata matajërëabinejeva pexanaepan. ⁴ Pedro pevaetabicujinaetsi, penaneconitsivi pejebabiabibota etatsi. Bajarapabota cuatro pabitsaëtobeje vajabitsaëvi Pedro nacobenaevetabiabatsi. Itsabitsaëto itsa pitsapa, juya itsabitsaëto evetabiabatsi. Caebitsaëtota jinavanapa vajabitsaëvi cuatro ponëbeje tsaponae. Nexata picani Herodes najamatabëxaina Pedro penutsinexatsi daxita judíovi pitabarata pascuavënëfiesta pevereverecaecujinae. ⁵ Nexata Pedro eca penaneconitsivi pejebabiabibota. Vajabitsaë xaniavaetsia Pedro yabaupaevetabia-

batsi bajarapabovecua Pedro pepitsapaeyaniva. Itsiata baitsi jane daxita Dioso pejumecovënëtsivi, asaëyata Diosojavabelia tovajëtaponatsi Pedro.

Pacuenia Dioso pejamatabëcueneta Pedro capanepatsi penaneconitsivi pejebabiabibovecua yabara pelivaisi

⁶ Pamatacabi picani Herodes Pedro nutsijitsiatsi daxita judíovi pitabarata, bajarapamatacabivajënaeya pameravi, penaneconitsivi pejebabiabibo ënëtuatujëta Pedro majitanuca anijanëbeje vajabitsaënëbeje, pevetsinëtsibeje, petuatujëta. Vajabitsaënëbeje Pedro yamaëcabocatsibeje anijacadenamaëtobeje. Itsanëbeje pijinia yabaupaevetatsi. ⁷ Jemata Dioso pijaängel naitajëta Pedrojavata. Nexata penaneconitsivi pejebabiabibo ënëtuatujëta naitayota. Pedro pemajitanucaenë ángel yenejayatabatsi Pedro penaëcotsinexa. Ángel jumaisi Pedrojavabelia:

—Naxanitsiayo nonotapunare, jai ángel.

Nexata Pedro pecobecëtsicadenamaëtotsibeje vecobejoparecatsi baja. ⁸ Nexata icatsia ángel jumaisi Pedrojavabelia:

—Nijacorrea xaniavaetsia naepacatarërëre. Nataxuxatare baja nijazapato, jai ángel.

Pedro nexata xaniavaetsia naepacatarërëtaxuaba pijacorrea. Nataxuxatataxuaba pijazapato. Nexata icatsia ángel jumaisi:

—Naxatare nijacamisajumavelia nenaxatatabiabiava. Nepënaponare, jai ángel Pedrojavabelia.

⁹ Pedro nexata naponá ángel pepëta. Itsiata Pedro xaniavaetsia apo najamatabëcueneyapëtae. Nexata Pedro xaniavaetsia apo yapëtae pepacuene ángel pebarëponaejavatsi. Nexata saya Pedro jamatabëjumait-si:

—Amajitsinaenë meta, jamatabëjai.

¹⁰ Itsiata baitsi jane xenetsiabeje penamataxainae ënëtuatujëtareca peyabaupaevetecaevajabitsaënëtsi. Icatsia xenetabeje pecotocaevi ënëtuatujëtatsina peyabaupaevetecaevajabitsaënëtsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatsibeje pijacuata. Pitsatabaliabeje jane baja callejavabelia. Nexata callejavareca penajetarucaejavatabeje, ángel jemata ajibi tsojopae. ¹¹ Pedro jane baja xaniavaetsia najamatabëcueneyapëtane. Nexata Pedro jamatabëjumait-si:

—Baja rajane matapania aeconoxae xaniavaetsia najamatabëcueneyapëtaniji. Dioso tsaena itorobica pijaängel tanecapanepañexa Herodes pecobevecua. Nexata baja judíovi apo netae tsane Herodes pijajivi tanebeyaxuabijava, jamatabëjai Pedro.

¹² Pedro najamatabëxaina pacuenia exanaejitsia. Nexata lia María pijaboyabelia. Bajarapova María, Juan pena, ponë vënërubatsi itsavënë, Marcos. María pijabota ayaibitsaëtoخانeto Dioso pejumecovënëtsivi nacaetuata Diosojavabelia petovajëcaenexatsi Pedro. ¹³ María pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata

bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponë baupa docodocotanunuca. ¹⁴ Nexata Rode itsa jumeyapëtane Pedrocuene, nexata abaxë apo tobau-patsi. Rode kujinaelia boyabelia peja-matabëcuenebarëyatsajonexae. Nexata Rode tsipaeba María pijabota penacatuatsivijavabelia. Jumaitsi:
—¡Pedro rajane baja nucalia baupa pënëverena! jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanë raja pepacuene! Pedro raja nucalia baupa pënëverena, jai Rode.

Bajarapamonae nexata jumaitsi:

—Apo Pedro raeta. Pevetsiángeltsi raeta, jai bajarapamonae.

¹⁶ Nexata bajarapamonae pecuaicuaijijavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jatababëcuenenajunaviaca. ¹⁷ Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabëcueneta capanepatsi penaneconitsivi pejebabiabibovecua. Pedro jumaitsi:
—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovënëtsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

¹⁸ Itsa baja matacabi tsina, vajabitsaëvi, pamonae Pedro evetabiabatsi pananeconitsivi pejebabiabibota, bitso jamatabëcuenebëjai. Tsipaji bajarapamonae apo yapëtae itsabelia Pedro pona. ¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamonae Pedro evetabiabatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaëvi itoroba bajarapamonae pebeyejebinxatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaevetsinë Herodes Judea nacuavecua pona. Pona Cesarea tomarabelia peponaponaenexa Cesarea tomarata.

Pacuenia tëpa nacuaevetsinë Herodes yabara pelivaisi

²⁰ Nacuaevetsinë Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejijivijavabelia copatsiaexana pexaejava petocaponabiabijava bajara patomarabejijivijavabelia. Nexata bajarapatomarabejijivi sivanajamatabëcueneyanaba xaniavaetsia pebarëcuaijuaijainexa nacuaevetsinë Herodesjavabelia. Tsipaji bajarapatomarabejijivi jitsipa icatsia pexaejava petocap-

atabiabinexatsi pijatomarabejijavaberena Herodes pevetsinacuajavaverena. Nacuaevetsinë Herodes pijabo petoevetsinëtsi pevënë Blasto. Nexata Tiro tomarapijivibeje Sidón tomarapijivibeje copiaya cuaicuaijai Blastojavabelia Blasto pexaniajamatatabëcuene petoxainaenexa petocuaicuaijainexa Herodesjavabelia. Nexata Blasto jejai. Tocuaijuaijai Herodesjavabelia Herodes icatsia pebarajamatabëxanepanaenexa bajara patomarabejijivijavabelia. ²¹ Nexata Herodes tocajëta pamatacabi patsijitsia bajarapatomarabejijivi Herodes pijaboyabelia. Nexata pamatacabi Herodes tocajëta bajarapamonae pepatsinexa, Herodes naitabëtsia naxatata nacuaevetsinë penaxatatsicuenia. Nexata jane baja bajarapatomarabejijivi pata pebarëcuaijuaijainexa Herodes. Nexata daxita bajarapamonae pitabarata nacuaevetsinë peecaejavata, Herodes eca. Nexata Herodes xaniavaetsia barëcuaijuaijai bajara patomarabejijivijavabelia. ²² Nexata bajarapatomarabejijivi Herodes yabara pinijijumeta yamaxëitojorobiaya jumai tsaponae pebarajamatabëxanepanaenexatsi:

—¡Maponëje nacabarëcuaijuaijai, apo jivitonë! ¡Diosonë tsaena! jai tsaponae bajarapatomarabejijivi Herodes yabara.

²³ Bajarapacuenia pejumaitsijava bajarapatomarabejijivi Herodes apo pejumaitavetsixae, Dioso pijaáγγελ naneconitsiaexanatsi Herodes. Avitaniayaexanatsi. Herodes nexata oro ënëverenetsi. Herodes nexata oro pënëverenijavatsi yatëpa.

²⁴ Nexata Dioso pejumecovënëtsivi, daxitanacuanëjava tsipaebapona Dioso pitorobilivaisi. Nexata Dioso pitorobilivaisi pejumecovënëtsivi ayaibitsaëtozaneto tsaponae.

²⁵ Itsa baja Bernabébeje Saulobeje palata petocaponaejavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquía tomarabelia. Barëliabeje Juan, ponë vënërubatsi itsavënë, Marcos.

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanëjava yabara pelivaisi

13 Antioquía tomarata Dioso pejumecovënëtsivijavata, jinavanapa mapamatabëxëyoje. Itsanë Bernabé. Itsanë Simón, ponë vënërubatsi itsavënë, Negro. Itsanë Lucio. Bajaraponë Cirene tomarapijinë. Itsanë Saulo. Itsanë Manaén. Bajarapamonae cajena profetavi, Dioso pejumecovënëtsivijavabelia livaisi petsipaebabiabivina. Herodes Galileanacua pevetsinë. Herodesbeje Manaénbeje penajuavitsabinëbeje. ² Itsamatacabi daxita bajarapapofetavi, Dioso pejumecovënëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espiritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajébeje, bajaraxua jane baja tanet-onacuenebinexabeje, jai Espíritu Santo.

³ Nexata jane baja daxita bajarapamonae japasa vajéca Diosojavabelia. Bajaraxuacujinae Bernabébeje Saulobeje bajarapamonae tsimatnacobebeuatatsibeje. Tovajétatsibeje Diosojavabelia. Nexata jane baja copatatsibeje peponaenexabeje jivi daxitanacuanéjava petsipaebaponaenexabeje Dioso pitorobilivaisi.

Pacuenia apóstolenébeje Dioso pitorobilivaisi jivi tsi-paebabeje Chipre tunaetoxanetota penaetomaranéjava yabara pelivaisi

⁴ Bernabébeje Saulobeje Espíritu Santo pejamatabécueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia.

⁵ Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi penacaetuatabibonéjava. Juan napona Bernabébeje Saulobeje pepéta peyavenonabiabinexa.

⁶ Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitajaraba judíoné, Barjesúsvënéné. Bajaraponé jivi pejorobiné. Bajaraponé jivi yamaxéitojorobiaya jumai tsabiabi: “Xané raja tsi-paebabiabajé Dioso taneitorobicuenia,” jai tsabiabi.

⁷ Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsiné. Sergio Paulo cajena bitso bepíjia peyapétaené palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabéjumatane Dioso pitorobilivaisi. ⁸ Itsiata baitsi jane Barjesús, jivi pejorobiné, poné vënérubatsi itsavënë, Elimas, najamatabécuenepatajërërëcaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabécuenepatajërërëcaeyaexana Sergio Paulo pejumecovénétsiyaniva Dioso pitorobilivaisi. ⁹ Nexata Saulo, poné vënérubatsi itsavënë, Pablo, tsijamatabévënécatsi Espíritu Santo. Nexata Pablo naécota asaéyata Barjesúsjavabelia. ¹⁰ Pablo jumaitsi Barjesúsjavabelia:

—¡Xamé jivi neyamaxéitojorobiné, pibisiacuene nexanaené, dovathi pijajivitonémé, pexaniajamatabécuenepexanaejava nitoyané! Apo jamatabécopatsimé nenajumetsénétsijava pejumecovénétsiyanivapamonae picani jamatabéjumatane Dioso pijapexaniajailivaisi. ¹¹ Dioso raja aeconoxae cananeconitsiaexanaena. Nexata apo natsivajénaetaemé tsane. Matapania anijajuametoné panepaena, icatsia natsivajénaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayabaruta itsané pecobeveatabinexatsi pecomacaponaeenexatsi pijaboyabelia. ¹² Sergio Paulo itsa

tane bajarapacuené, nexata jumecovénéta Jesús pelivaisi. Sergio Paulo bitso jamatabécuenenajunaviaca itsa jumatane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquía tomarata, Pisidia nacuata peecaetomarata, yabara pelivaisi

¹³ Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcotaxanetota. Nicaba Panfilia nacuayabelia. Nexata Panfilia nacuatatalia pata Perge tomarata. Juan baja Perge tomarata itsajamatabécuené najamatabéxaina. Nexata baja naviateca Jerusalén tomarabelia. ¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata peecaetomarabelia. Judíovi penacueraevetsimatabita Pablobeje Bernabébeje najunuabeje judíovi penacaetuatabibibota. Bajarajota naecabeje. ¹⁵ Nexata daxita bajarapabota pejonevi, namuxunaeveta Dioso Moiséspijinéta penajumecopatsilivaisi. Namuxunaevetanua Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacaetuatabibibo pevetsivi, pijajivitoné itoroba. Nexata bajaraponé jumaitsi Pablobeje Bernabébejejavabelia:

—Tajabananébeje, itsa payapétanemebeje itsalivaisiyo panetsipaebbinexabeje, aeconoxae patsipaebianamebeje jivi pijamatabécuenesaénexa Diosojavabelia, jai bajaraponé Pablobeje Bernabébejejavabelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamé ata apo pajudíovimé, Dioso panejitsipaevi, abaxé panenamuxunaevere pacuenia jumaitsinéjitsia.

¹⁷ PaDioso aeconoxae judíovitsi vajaDioso, bajarapadioso bajayata baja cajena itapetatsi vajasalinaivimi pijajivinxexa. Nexata Dioso pejamatabécueneta vajasalinaivimi pexi ayabitsaétoxoneto xainapona. Nexata vajasalinaivimi ayabitsaétoxoneto tsaponae pamatacabi jinavanapa Egipto nacuata. Nexata Dioso pesaéta vajasalinaivimi mataponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaánvënë nacuata pejinavanaevimi. Nexata baja Dioso vajasalinaivimi totsatsi bajarapanacuanéjava juya pejinavanapaenexa. ²⁰ Bajaraxuacujinae Dioso itoroba vajasalinaiviyajuvënënevijuezmanae penaexanaponaenexa, vajasalinaivimi pevetsivinexatsi. Juezmanae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijiné evetatsi vajasalinaivimi, copata baja juezmanae pevetsijavatsi. Tsipaji baja profeta Samuelpijiné pecotocaevijuezné. ²¹ Nexata vajasalinaivimi jumaitsi profeta Samuelpijinéjavabelia: “Pajitsipajé nitorobijava vajaya-

juvënëne penaexanaenexa vajacayanacuaeavetsinënexa,” jai. Nexata profeta Samuelpijinë Dioso pejamatabëcueneta itoroba Saúlpijinë vajasalinaivimi cuarenta pavaibeje peyanacuaevetaponaponaenexatsi. Bajaraponëmi Saúlpijinë, Cispijinë pexënato, vajasalinainëmi Benjamínpijinë pemomoxiyajunënenë. ²² Bjaraxuacujinae Saúlpijinë Dioso copatsiaexanatsi pecopatsinexa baja vajasalinaivimi peyanacuaeavetsijavatsi. Nexata juya Dioso itoroba Davidpijinë vajasalinaivimi peyanacuaeavetsinexatsi. Dioso jumaiti Davidpijinë yabara mapacueniaje: “Isaí pexënato, David, jarmatabëcueneyapëtaniji. Bjarapitsinë jitsipajë. Bjaraponë David daxita pacuenia jitsipajë, netoexanaena,” jai Dioso Davidpijinë yabara. ²³ Davidpijinë raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajëvelia najumecapanepaeya jumaiti vajasalinaivimijavabelia. ²⁴ Jesús petaxuxuabivjënäeya jivi livaisi petsipaebaponaejava, copiaya Juanpijinë jivibautisabinëmi tsipaebanajetaruca daxita Israel nacuapijivijava. Jumai tsanajetaruca Juanpijinë: “Pacopabare baja daxita pibisiacuene paneexanabiabijava. Panajarmatabëcuenepënëyorore Diosojavabelia. Bjaraxuacujinae pacabautisabianatsi,” jai tsanajetaruca Juanpijinë. ²⁵ Juanpijinë abaxë ita apo beyaxuabitsi, jumai tsaponae jivijavabelia: “Ponë pacopiaevetavanapame, xanë raja apo bajaraponëne. Xanë cujinae rajane bajaraponë najetarucaena. Xanë raja saya beveliajarmatabëcuenenënë bajaraponëvecua. Nexata bajaraponë beprijavitonënëcuenia ata tataxujonotsinexa pijazapato, vecuaauranë,” jai tsaponae Juanpijinë Jesús yabara, jai Pablo judíovijavabelia judíovi penacaetuatabiabiabota.

²⁶ Icatsia Pablo jumaiti judíovijavabelia judíovi penacaetuatabiabiabota:

—Tajamonae Abrahampijinë papemomoximë, Dioso paneyaiyataevi. Dioso raja nacatoitoroba mapalivaisije vajanacacapanepaenexa Diosojavabelia. ²⁷ Itsiata Jerusalén tomarapijivi apo yapëtae Jesús pecapanepaejavanexatsi. Jerusaléntomara pevetsivi ata apo yapëtae Jesús pecapanepaejavanexatsi. Bjarapamonae apo jumeyapëtaenua pacuenia jumaiti Jesús yabara bajayata profetavi peyaquinaebaxutota. Penacueraevetsimatocabianë canacujitsia lebabibi ata bajarapabaxuto judíovi penacaetuatabiabiabota, itsiata bajarapamonae apo jumeyapëtae. Bjarapamonae ita neconita Jesús pebeyaxuabinexatsi, nexata judíovi exana pacuenia baja cajena Diosojumepaebivi profetavi tajëvelia vajunupaeba Jesús pexanaejavanexatsi. ²⁸ Judíovi apo caxitarabi ata Jesús itsacueneneconi pexinaejava, itsiata bajarapamonae vajëta nacuaeavetsinë Pilatojavabelia Jesús pebeyaxuabinexatsi. ²⁹ Nexata jane baja Jesús ita beyaxuabatsi, copiapata jane baja daxita pacuenia Jesús yabara tajëvelia jumaiti Dioso pejumelivaisibaxutota. Bjaraxuacujinae Jesús petëpaenë pitsicatsi cruzajavavetsica. Bjaraxuacujinae mëthëtatsi. ³⁰ Itsiata baitsi jane Dioso icatsia

asaëyaexanatsi Jesús petëpaecujinae. ³¹ Jesús petëpaecujinae Dioso icatsia ita asaëyaexanatsi, bajayajebi anijatonë tsitanaitajëtabiaba pijajivijavabelia, pamonaeanatatsi pamatacabi Jesús pona Galilea nacujavaverena Jerusalén tomaraberena. Bjarapamonae nexata maparucäeje tsipaebapona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabiabota.

³² Icatsia Pablo jumaiti bajarapamonaejavabelia judíovi penacaetuatabiabiabota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajëvelia najumecapanepaeya jumaiti pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonae pemomoxitsi. Nexata pacuenia Dioso tajëvelia najumecapanepaeya jumaiti vajasalinaivimijavabelia, nacatocopiapata jane baja. Tsipaji baja Jesús Dioso icatsia asaëyaexanatsi petëpaecujinae pacuenia baja cajena jumaiti Salmosbaxutota. Dioso pejumaitisijava Jesúsjavabelia, Salmosbaxutota jumaiti mapacueniaje: “Ajena raja, pamatacabi, canutatsi daxitajivi pitabarata pecayapëtaenexa xanë taxënatocuenemë,” jai cajena Salmosbaxutota Dioso pejumaitisijava Jesúsjavabelia. ³⁴ Dioso baja asaëyaexanatsi Jesús petëpaejavavecu. Jesús baja nexata icatsia apo tēpae tsane itsamatacabijavabelia ata. Bjarapacueneyabara baja cajena vaxaitsi yapëtanetsi. Tsipaji Dioso pejumelivaisibaxutota tajëvelia jumaiti mapacueniaje: “Caexanaenatsi pacuenia baja cajena najumecapanepaeya jumaitinë Davidpijinëjavabelia,” jai Dioso pejumelivaisibaxutota bajayata Dioso pejumaitisijava Jesúsjavabelia. ³⁵ Bjaraxua yabara Jesús pejumaitisijava Diosojavabelia Salmosbaxutota icatsia jumaiti mapacueniaje: “Nexënatonë apo necopatsimë tsane taperabëtsabanaejavabelia,” jai Salmosbaxutota.

³⁶ Davidpijinë abaxë ita asaë tsaponapona, jumecovënëtsiaponapona pacuenia Dioso itorobatsi. Bjaraxuacujinae Davidpijinë tēpa baja. Nexata Davidpijinë mëthëtatsi pamojivimi pemëthëanë muxuneneta. Nexata Davidpijinë mëthëabelia perabëtsabana baja. ³⁷ Itsiata baitsi jane Jesús, ponë Dioso icatsia asaëyaexanatsi, petëpaecujinae bajaraponë apo perabëtsabanae cajena mëthëabelia. ³⁸ Tajamonae, bepajapëtaneme ponë yabara pacatsipaebatsi. Jesús raja pejarmatabëcueneta Dioso baja pacavecuajibiaexana pibisiacuene paneexanaeneconimi. ³⁹ Pajivi Jesús jumecovënëtsiana, bajarapajivi daxita pibisiacuene pexanaeneconi Dioso vecuajibiaexanaenatsi Jesús pejamatabëcueneta. Pajivi apo jumecovënëtsicapanepae ata Dioso Moiséspijinëta penajumecopatsilivaisi, jarmatabëjumaiti: “Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuene taexanaeneconi Dioso nevecuajibiaexanaena,” jarmatabëjai, itsiata bajarapajivi pibisiacuene pexanaeneconi Dioso apo vecuajibiaexanaetsi tsane. Tsipaji Dioso Moiséspijinëta penajumecopatsilivaisi itsajivi ata apo jumecovënëtsicapanepae. ⁴⁰ Xania baja tsane. Xaniavaetsia pajinavanapaname papecatocopi-

apatsiyaniva pacuenia Diosojumepaebivi profetavi peyaquinaebaxutota tajëvelia jumaitsi. Tsipaji raja profetavi peyaquinaebaxutota, tajëvelia jumaitsi mapacueniaje:

⁴¹ Panecapocaponaevi, ¡xania baja pataename! Panajunaviacaename raja. Tsipaji raja panevecuanaxuabianame. Panejinavanapaeepatota xanë, Diosonë, exanaenajë ayaicuene taexanaejavanë. Nexata taexanaejavanë pelivaisi, itsamonae xaniavaetsia pacatsipaebi ata tsane, itsiata apo pajumecovënëtsimë tsane, jai Diosojumepaebivi profetavi peyaquinaebaxutota Dioso penaneconitsiaexanaejavanexa yabara pamona apo pejumecovënëtsivi, jai Pablo bajarapamonaevjavabelia judíovi penacaetuatabibibota.

⁴² Pablobeje baja Bernabébeje pitsapaejitsiabeje judíovi penacaetuatabibibovecua. Nexata bajarajota pamona apo judíovi, junatatsibeje icatsia itsamatacabi judíovi penacueraevetsimatacabita petsipaebinxabeje bajarapalivaisi. ⁴³ Penacaetuatsivi baja naviaba judíovi penacaetuatabibibovecua. Nexata Pablobeje Bernabébeje judíovi penacaetuatabibibovecua itsa pitsapabeje, jivi ayaibitsaëto pënaponatsibeje. Bajarapamonaeyajuvënëvi itsamonae judíovi, itsamonae apo judíovi. Pamona apo judíovi, bajarapamona catsiteca judíovicuenia Dioso pejumecovënëtsijava. Nexata Pablobeje Bernabébeje muxujobabeje bajarapamonaevjavabelia ajamatabëcuenesaëya pejumecovënëtanapaenexa Dioso pitaxutotsoniataejavatsi.

⁴⁴ Bajara jane xuacujinae icatsia judíovi penacueraevetsimatacabita, bajarapatomarapijivi muxunanacaetuatsibeje ayaibitsaëto xanetonë Dioso pitorobilivaisi penamuxunaevetsinexatsibeje. ⁴⁵ Nexata judíovi itsa tane bajarapajivibitsaëto xanetonë Pablobeje Bernabébeje pemuxunanacaetuatsijavatsibeje, judíovi bitso cuenecaëbatsi. Nexata judíovi jumaitsi jivijavabelia pejumecovënëtsiyaniva bajarapalivaisi:

—Pacuenia Pablo pacatsipaeba, apo xaniajai cajena, jai judíovi Pablo petsipaebilivaisi yabara.

Judíovi bitso pibisiacuenia baracuaicuaijaitsi Pablo.

⁴⁶ Itsiata Pablobeje Bernabébeje ajumejunavijibia tsi-paebaponabeje Dioso pitorobilivaisi. Jumaitsibeje tsapona mapacueniaje:

—Copiaya baja picani pacatsipaebatsibeje Dioso pitorobilivaisi paxamë pajudíovimëjavabelia. Itsiata apo pajitsipaemë bajarapalivaisi panejumecovënëtsinexa. Tsipaji apo pajitsipaemë panexainanexa matacabi apo pevereverecejava. Paxanëbeje baja nexata pacavecuaponatsibeje patatsipaebinxabeje bajarapalivaisi apo judíovijavabelia. ⁴⁷ Bajarapacuenia pacavecuaponatsibeje tsipaji baja pepo petuxanenë bajarapacuenia paneitorobabeje. Dioso cajena pejumelivaisibaxutota tajëvelia jumaitsi mapacueniaje:

Caitorobianatsi nejamatabëcueneitayotsinexa pamona apo judíovi. Baitsi jane tsipaebanajetarucaname tajumelivaisi daxitanacuanëjava, nacuatabujava ata pejinavanapaevi, pecapanepaenexatsi pibisiacuenia pexanae neconivecua, jai Dioso pejumelivaisibaxutota, jai Pablo judíovijavabelia.

⁴⁸ Apo judíovi itsa jumetane bajarapacuenia Pablo pejumaitsijava, nexata apo judíovi jamatabëcuenebarëya. Nexata apo judíovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovënëta Dioso, pamona baja cajena tajëvelia Dioso itapeta matacabi apo pevereverecejava pexainanexa.

⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi. ⁵⁰ Itsiata baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barëcuacuajai tomaraevetsivijavabelia, petuxanevi pijavajivijavabelia ata. Nexata bajarapamona anaepana Pablobeje Bernabébejevjavabelia. Nexata baja Pablobeje Bernabébeje capitsapatsibeje bajarapanacuavecua. ⁵¹ Nexata Pablobeje Bernabébeje bajarapatomarata nataxuat-sapërëvarëbabeje. Bajarapacuenia nataxuat-sapërëvarëbabeje bajarapatomarapijivi peyapëtaenexa penaneconitsijava Diosojavabelia, apo pejumecovënëtsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. ⁵² Itsiata daxita pamona Dioso pejumecovënëtsivi, Antioquia tomarata pejinavanapaevi, jamatabëcuenebarëya. Espiritu Santonua jamatabëcuenevënëcavanapa. Nexata exanabiaba pacuenia Espiritu Santo itorobatsi.

Pacuenia Pablobeje Bernabébeje ponaponabeje Iconio tomarata yabara pelivaisi

14 Iconio tomarata Pablobeje Bernabébeje judíovi penacaetuatabibibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaëto xanetonë judíovi, apo judíovi ata, jumecovënëta Jesús pelivaisi. ² Itsiata baitsi jane itsamonae judíovi, Dioso apo pejumecovënëtsivi, itoroba apo judíovi pianaepanaenexa Jesús pelivaisi pejumecovënëtsivijavabelia. ³ Bajarapacuenia peyapëtaexabeje, Pablobeje Bernabébeje bajayajebi ponaponabeje bajarajota. Tsi-paebabiababeje ajumejunavijibia Jesús pelivaisi. Tsipaji yapëtanabeje Dioso peyjavaponaponaejavatsibeje. Nexata daxitajivi yapëtaeyaexanaponabeje Dioso pitaxutotsoniataejavatsi bajarapamona. Nexata daxita bajarapamona yapëtanë Jesús pelivaisi pexanialivaisicuene. Tsipaji bajaraponëbeje ayaicuene pexanaejava Dioso pesaëta exanaponabeje. ⁴ Itsiata bajarapatomarapijivi apo najamatabëcuenejëpae. Itsamonae jitsipa pejumecovënëtsinexa judíovi petsipaebilivaisi. Itsamonae jitsipa pejumecovënëtsinexa apóstolenëbeje petsipaebilivaisi. ⁵ Nexata judíovi, apo judíovinua, tomara pevetsivinua, jamatabëbijatanetsibeje Pablobeje Bernabébeje. Jamatabëtsiconatsibejenua ibotonëta. ⁶ Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Listra tomarabelia, Derbe tomarabelia ata. Bajarapatomarabeje ecabeje Licaonia nacuata. Bajarapatomarabeje pepënëya penaetomaraxijava ata najetarucabeje. ⁷ Daxita bajaraxuayo tsipaebanajetarucabeje pexanialivaisi, Jesús pelivaisi.

Pacuenia Pablo ibotonëta tseconatsi Listra tomarata yabara pelivaisi

⁸ Listra tomarata naeca petaxucuenabinëtsi. Penaexanaejavaveliacujinae apo ponaponae caeto ata. ⁹ Bajaraponë najumetaeyeca Pablo petsipaebilivaisi. Nexata Pablo naitaxutobabatsiaya naëcota bajaraponëjavabelia. Nexata Pablo jamatabëcueneyapëtane petaxucuenabinëtsi pejamatabëjumaitisijava: “Dioso pepacuenene caëjëpatsi tanetaxuxanepanaeyaexanaenexa,” pejamatabëjaijava. ¹⁰ Nexata Pablo pinijumeta jumaitis petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja.

¹¹ Jivibitsaëtoxonetonë itsa tane Pablo petaxuxanepanaeyaexanaejava petaxucuenabinëmitsi, nexata bajarapamonae pijajumeta, Licaoniajumeta, pinijumeta jumaitis mapacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabetsica! jai bajarapamonae.

¹² Bajarapanacuapijivi xaina pijadiosovi. Itsiata apo pepo diosovi. Nexata Bernabé tanetsi beZeusvënëdiosonë. Pablo pijinia tanetsi beHermesvënëdiosonë. Tsipaji Pablo penamatacanajetarucaenë. Nexata jivi barëcuaicuaijai tsabiabi. ¹³ Zeusvënëdiosonë pijatemplobo eca Listratomara jumaverena, Listra tomara-belia pejonebaupa imoxoyovecua. Nexata sacerdotenë, Zeusvënëdiosonë pijatemplobota penacuenebabiabinë, capata torobitsaëto Listra tomara-belia pejonebaupajavaberena. Bajarapatorobitsaëto matabocoitabëtsiaya tsimataruba pematono. Nexata sacerdotenë, Listra tomarapijivi yajava, tobejitsiatsibeje picani bajarapatorobitsaëto Pablobeje Bernabébeje ofrendacuenia bajarapavi petotajuitsinexatsibeje. Bajarapacuenia picani totajuitsijitsiatsibeje tsipaji bediosonëbeje tanetsibeje. ¹⁴ Nexata Bernabébeje Pablobeje itsa jumetanebeje bajarapacuenene petoexanaejavanexatsibeje, apo jitsipaebeje. Nexata penaxatatsijavabeje mëpabëtitinaxuabarecabeje. Tsipaji Dioso apo pejitsipaecuenia bajarapamonae toexanaejitsiatsibeje. Nexata kujinaejinaliabeje jivibitsaëtoxonetonë penacaetuanajavabelia. Nexata bajarapajivibitsaëtoxonetonë tuatuajëta nucabeje. Pinijijumeta Pablo jumaitis:

¹⁵ —¿Detsa xuajitsia bajarapacuenene panetoexanaejitsiamë? Paxanëbeje ata raja saya pajivitonënebeje. Pacuenia paxamë pajamatabëcueneitsimë, bajara saya paxanëbeje ata patajamatabëcueneitsinëbeje. Papatajopajëbeje patacatsipaebinxabeje pexanialivaisi. Panajamatabëcuenepënëyorore bajarapacuenia panexanabiabijavavecua panejumecovënëtsinexa pepo Dioso apo peyamatacabavereverecaenë. Dioso raja daxitacuene pexanaenë. Exana mapanacuaje, mapanacuapijicuenene yajava. Exana itaboxo ata, itaboxopijicuenene yajava. Exana manuamene ata, manuamenepijicuenene yajava. ¹⁶ Dioso copata vajavajënaeya daxitanacuapijivi pejinavanapaenexa pijacuata penatojitsipaecuenia. ¹⁷ Nexata Dioso daxitacuene pexanaejava,

nacobecovëtaeyaexanabiaba daxitajivijavabelia. Nexata picani bajarapamonae becanaëjëta Dioso peponaponaejava. Tsipaji Dioso pexaniacuene toexanabiaba bajarapamonaemijavabelia. Bajara icatsia pacuenia vaxaitsijavaberena ata pexaniacuene Dioso nacatoexana. Ema nacatorunaeyaexanabiabica. Nexata vajuabijava nacatonaxaniabiaexanabiaba. Nexata bajarapacuenia vajaxaejava nacarajutabiaba. Nacajamatabëcuenenabarëyaexananua, jai Pablo pamonaejavabelia picani torobitsaëto tobejitsiatsibeje.

¹⁸ Bajarapacuenia Pablo jumaitis ata, itsiata picani bajarapamonae jamatabëtobiatsibeje torobitsaëto petotajuitsinexatsibeje bajarapavi ofrendacuenia Pablobeje Bernabébejenexa. Itsiata baja belia copatsiaexabeje.

¹⁹ Nexata judíovi, Dioso apo pejumecovënëtsivi, parena Antioquia tomaraverena, Iconio tomaraverena ata. Bajarapajudíovi Listra tomarapijivijavabelia najumetsënëtsiaya neconitatsibeje Pablobeje Bernabébeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bajaraxuacujinae tomara-pënëyabelia robobocaliatsi. Tsipaji baja bepetëpaenë taeyabuatatsi. ²⁰ Itsiata bailsi jane Dioso pejumecovënëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabébeje ponabeje baja Derbe tomarabelia.

²¹ Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovënëtsibeje jivibitsaëtoxoneto. Bajaraxuacujinae icatsia navitanajetarucabeje Listra tomarajava, Iconio tomarajava ata, Antioquia tomarajava ata. ²² Bajarapatomaranëjava Jesús pelivaisi tsipaebanajetarucabeje pejamatabëcuene asaëyaexanaponanexabeje Dioso pejumecovënëtsivi. Muxujiobaponabeje bajarapamonae pevajënaeyabelia ajamatabëcuenesaëya pecatsitecaenexa Dioso pejumecovënëtsijava. Pablobeje Bernabébeje jumai tsaponabeje Dioso pejumecovënëtsivijavabelia:

—Dovathi pejamatabëcueneta, pinijicuenia nacajamatabëcueneëjëtaponana daxita vajajonevinexa Dioso pijanacuayabetsia, jaiabeje tsaponae Dioso pejumecovënëtsivijavabelia.

²³ Caebitsaëto canacujitsia, Dioso pejumecovënëtsivijava, toitapetaponabejenua ancianovinexa, Dioso pejumecovënëtsivi pevetsivinexa. Nexata itsa pabitsaëtojavata toitapetsijitsiabeje, penacaetuatsivajënaeya apo xaeyabiabibeje pexaejava. Nexata penacaetuatsijavata itsa toitapetabeje, japasa tovajëtabiababeje Diosojavabelia bajarapamonae peyavenonaenexatsi Dioso. Jumai tsabiabibeje Diosojavabelia:

—Diosomë, xaniavaetsia yavenonaename mapancianovije xaniavaetsia pecatoevetsinexa nijajivi, jaiabeje tsabiabi Diosojavabelia.

Pacuenia Pablobeje Bernabébeje naviatabeje Antioquía tomarabelia, Siria nacuata pecaetomarabelia, yabara pelivaisi

²⁴ Pablobeje Bernabébeje Pisidianacua pexenetsicujinaebeje, patabeje Panfilia nacuayabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquía tomarabelia. Tspaji baja cajena pamatacabi taxuxuabijitsiabeje Dioso pitorobilivaisi jivi petsipaebanajetarucaenexabeje, naropotabeje Antioquía tomarata. Nexata pamatacabi naropotabeje Antioquía tomarata, penaropotsivajënaeyabeje, Dioso pejumecovënëtsivi tsimatanacobebuatatsibeje Dioso peyavenonaponaenexatsibeje jivi petsipaebanajetarucaejavatabeje Dioso pitorobilivaisi. Pablobeje Bernabébeje Antioquía tomarata patabeje. Tspaji baja toveretabeje daxita pacuenia Dioso itorobatsibeje. ²⁷ Itsa baja Antioquía tomarata patabeje, junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tspaebejenua apo judíovi ata pejumecovënëtsijava Dioso pitorobilivaisi. Tspaji baja cajena Dioso tocopata apo judíovi ata pejumecovënëtsinexa bajarapalivaisi. ²⁸ Pablobeje Bernabébeje Antioquía tomarata bajayajebi naponabeje Dioso pejumecovënëtsivijavata.

Pacuenia apóstolevi, ancianovi yajava, nacaetuata Jerusalén tomarata yabara pelivaisi

15 Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamona Dioso pejumecovënëtsivijavabelia livaisi tsipaeba. Petsipaebijavata bajarapamona jamatabëcuenenavëxaniabiaya jumaitsi mapacueni-aje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecapanepaejava Dioso javabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaonaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvënëvi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejivanapaevijavabelia.

³ Itorobatsibeje Dioso pejumecovënëtsivi. Nexata Pablobana itsa pona, najetarubena Fenicia nacujava,

Samaria nacujava ata. Bajaraxuayo Dioso pejumecovënëtsivijavabelia tsipaebapona apo judíovi ata pijaperujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya itsa jumetane bajarapalivaisi.

⁴ Pablobana itsa pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. ⁵ Nexata fariseovi, Dioso pejumecovënëtsivi, nonobapuna. Fariseovi jumaitsi mapacueni-aje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamona pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaicuaijainexa. ⁷ Bajayajebi baja namataenetsia penabarëcuaicuaijajucujinae, nexata Pedro nonotapuna. Jumaitsi:

—Tajamona, payapëtaneme rabaja mapacueni-aje. Xanë baja cajena bajaya Dioso nitapeta, paxamëyajuvënë, apo judíovijavabelia tatsipaebinexa pexanialivaisi, Jesús pelivaisi. Nexata apo judíovi ata Dioso pecapanepaenexatsi Jesús pelivaisi itsa jumecovënëta. ⁸ Dioso cajena daxitajivi pejamatabëcueneyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacueni tsipaji apo judíovi ata Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. ⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovënëtsixae. ¹⁰ Pëtsa pajumeaebame Dioso aneconijibia petaejava apo judíovi ata. Pëtsa bajarapamona paitorobame pejumecovënëtsinexa piayapëbejelivaisi, Dioso Moiséspijinëta penajumecopatsilivaisi. Tspaji bajarapalivaisi vaxaitsi ata apo nacacajëpae vajajumecovënëtsinexa. Vajasalinaivimi ata apo caëjëpaetsi pejumecovënëtsinexa bajarapalivaisi. ¹¹ Vaxaitsi baja jumecovënëtsi Jesús pelivaisi. Nexata vajatuxanenë Jesucristo pejamatabëcueneta Dioso vajanacaitaxutotsoniataexae, nacacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava itsa tsipaebanajetarucabeje, Dioso pesaëta pinijicueni pexanaejavanë exanaponabeje. Nexata bajaraxua Bernabébeje Pablobeje itsa navajunupaebeje, daxita apóstolevi, ancianovi ata, moya ena. Xa-

niavaetsia namuxunaevetena. ¹³Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. ¹⁴Simón Pedro raja nacatsipaeba Dioso aneonijibia petaejava apo judíovi ata pecapanepaenexa pibisiacuene pexanaeneconivecua Jesús pelivaisi itsa jumecovënëta. ¹⁵Bजारapacuenia apo judíovi ata aneonijibia Dioso petaejavanexa yabara, bajayata tajëvelia Dioso jumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

¹⁶“Bajayata abaxë pamatacabi Davidpijinë evetaponapona Israelnacua, xaniavaetsia jivi nejumecovënëta-vanapa. Bajara icatsia pacuenia jivi xaniavaetsia tanejumecovënëtavapanexa, yavenonaenajë. ¹⁷Nexata apo judíovi ata, daxita pamonaie junatsianajë taja-jivinexa, bajarapamonaie ata jitsipaena tanejumecovënëtsinexa,” jai bajayata Dioso mapacueniaje. ¹⁸Dioso baja cajena tajëvelia yapëtaeyaexana daxita mapacuenia yabaraje, jai profetavi peyaquinaelivaisita, jai Santiago apóstolevijavabelia, ancianovijavabelia ata.

¹⁹Icatsia Santiago jumaitsi apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjëa apo judíovi, pamonaie baja najamatabëcuenepeñëyorota Diosojavabelia. ²⁰Itsiata baitsi jane caelivaisiyobeje toyaquinaenatsi cuyalatobaxutota vajayapëtaeyaexanaenexa bajarapamonaie. Itsamonae xaina pecobeta saya jumapecataeya pexanaenëanë bepigidiosovi petaejava. Nexata bajaraxuanëjavabelia ofrendacuenia pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa, daxita petiriavi ata peyapëtaenexa. Papebijivi baja nacojioba, pematayajibianivatsi itsavajavabelia pijavavecua. Papebijivi pijinia abaxë apo nacojiobi, pematayajibianivatsi petirivajavabelia. Bajara pijinia pacuenia petiriavi ata. Papetiriavi baja nacojioba, pematayajibianivatsi itsanëjavabelia pamonavecua. Papetiriavi pijinia abaxë apo nacojiobi pematayajibianivatsi pebijavabelia. Toyaquinaenatsinua bajarapamonaie pexaeyaniva cuibocuet-sacaeya pebeyaxuabinë pevi, pexaeyaniva peja ata. Bazarapacuenia toyaquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cujunavatsi. Nexata itsamatacabijavabelia ata apo judíovi pejamatabëcuenebijianaeyaniva judíovijavabelia. ²¹Tsipaji bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacuenia. Itavetabiabatsi bajarapacuenia penacueraevetsimatacabianë canacujitsia penacaetatabiabiabonëjava, jai Santiago apóstolevijavabelia, ancianovijavabelia ata.

²²Nexata daxita apóstolevi, ancianovinua, daxita Dioso pejumecovënëtsivinua, najamatabëjëpa penaitapetsinexa bajarapamonaeyajuvënëvi pitorobinexa Antioquía tomarabelia Pablobeje Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bazaraponëbeje Dioso pejumecovënëtsivi penamatacaitorobivi yajuvënënebeje. ²³Pacuyalatobaxuto bajaraponëbeje tocaponaiejitsiabeje Antioquía tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanë paapóstolevinë, pacajamatabënjinaliatsi. Vajamonae ancianovi ata pacajamatabënjinalia. Pacajamatabënjinaliatsi daxita apo pajudíovimë, Antioquía tomarata panejinavanapaevi. Paxamë ata Siria nacuata panejinavanapaevi, pacajamatabënjinaliatsi. Paxamë ata Cilicia nacuata panejinavanapaevi, pacajamatabënjinaliatsi. ²⁴Pavënëlivaisitaniji pacuenia pacajumaitsi paxanëyajuvënëvi papecasivaxainavevilia. Bazarapamonaie pina nexata pacanajamatabëcuene epatajërëcaeyaexanapona. Tsipaji pina bajarapamonaie pacajumaitsi: “Panamatavenoname paxamë ata papecaperabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopatsilivaisi,” pacajai pina. Pamonaie pacajumaitsi bajarapacuenia, paxanë cajena apo paitorobinë paxamëjavabelia. ²⁵Nexata paxanë patanacaetuatsijavata, panajamatabëcuenejëpajë pataitapetsinexa ponëbeje paitorobijitsianë paxamëjavabelia pecaponaenexabeje patacatoyaquinaelivaisi. Bazaraponëbeje naliabeje Bernabébeje Pablobeje pepëta. ²⁶Vajabananëbeje, Bernabébeje Pablobeje, bitso vaxaitsi asivatsi. Bazaraponëbeje vajatuxanenë Jesucristo pejumelivaisi yabara itsamonae jamatabëbeyaxuababiabi atatsibeje, itsiata ajamatabëcuenesaëbeje tsaponaponaie. ²⁷Nexata bajaraponëbeje pepëta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. ²⁸Itsa panacaetuatajë Espiritu Santo paneyavenona patayapëtaenexa peyapëxanepanelivaisi patacatoitorobinexa panejumecovënëtsinexa. Nexata baja apo panamatavenonaemë panejumecovënëtsinexa piayapëbejelivaisi, palivaisi daxita pajudíovinë pajumecovënëtajë. Pacaitorobatsi palivaisi bitso panamatavenoname panejumecovënëtsinexa. ²⁹Pecobeta saya jumapecataeya pexanaenëanëjavabelia ofrendacuenia pevi perajutsinexa itsamonae itsa tobiba baca, oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuet-sacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecua. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pajumecovënëtamë bajarapalivaisi, nexata xaniavaetsia

pajinavanapaename. Bajara saya palivaisiyo pacatoy-aquinatsi, jai apóstolevi, ancianovi yajava, apo judíovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponaenexabeje apo judíovijavabelia, Judasbeje Silasbeje itorobatsibeje penaponaenexabeje Pablobeje Bernabébeje pepêta. Nexata baja naponabeje. Bajaramonae pata Antioquía tomarabelia. Nexata Antioquía tomarapijivi junata daxita Dioso pejumecovênêtsivi penacaetuatsinexa. Nexata penacaetuatsijavata rajutabeje bajarapacuyalatobaxuto. ³¹ Antioquía tomarapijivi itsa leba bajarapacuyalatobaxuto, bajarapamonae bitso jamatabêcuenebarêya. ³² Judasbeje Silasbeje Diosojumepaebinêbeje profetanêbeje. Nexata ayailivaisi tsipaebabeje Antioquía tomarapijivijavabelia. Nexata baja bajarapamonae ajamatabêcuenesaê Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. ³³ Bajayajebi baja Antioquía tomarata Judasbeje Silasbeje naponaponabeje. Bajaraxuacujinae Dioso pejumecovênêtsivijavabelia xaniavaetsia napêjiobabeje penavitsinexabeje baja pitorobivitsijavabelia. ³⁴ Pepuanapêjiobibeje baja, Silasbeje abaxê itsiata icatsia naco-napabeje bajarajota. ³⁵ Pablobeje Bernabébeje ata abaxê ponaponabeje Antioquía tomarata. Dioso pitorobilivaisi tsipaebaponaponabeje. Itsamonae Dioso pejumecovênêtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipaebinexa Dioso pitorobilivaisi yabara pelivaisi

³⁶ Antioquía tomarata Pablobeje Bernabébeje bajayajebi ponaponabeje. Pablo jumaiti Bernabéjavabelia: —Ponatsibeje icatsia vajataenexabeje vajamonae Dioso pejumecovênêtsivi. Daxita tomaranêjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Tena-jetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarêponaenexabeje icatsia Juan, ponê vênêrubatsi itsavênê, Marcos. ³⁸ Itsiata baitsi jane Pablo apo jitsipae baja icatsia Marcos pebarêponaenexabeje. Tsipaji imata copiaya panamuto barêponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipae-baponaejava. ³⁹ Nexata Pablobeje Bernabébeje apo najamatabêcuenejêpaebeje Marcos pebarêponaejavabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barêpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuayabelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovênêtsivi tovajêtsibeje Diosojavabelia peyavenonaponaeenexatsibeje penajetarucaejavabeje. ⁴¹ Nexata Pablobeje Silas-

beje Siria nacuajava, Cilicia nacuajava ata, Dioso pitorobilivaisi jivi tsipaebanajetarucabeje. Nexata bajarapanacuanêpijivi Dioso pejumecovênêtsivi, caebitsaêto canacujitsia, Diosojavabelia ajamatabêcuenesaê tsaponae.

Pacuenia Timoteo Listra tomarata nanaropota Pablobeje Silasbeje pepêta yabara pelivaisi

16 Pablobeje Silasbeje patabeje Derbe tomarata. Patabeje Listra tomarata ata. Listra tomarata caxitajarababeje Dioso pejumecovênêtsinê, Timoteo. Timoteo pena judíova, Dioso pejumecovênêtsiva. Itsiata baitsi jane Timoteo paxapijinê griegonê. ² Daxita Dioso pejumecovênêtsivi, Listra tomarapijivi, Iconio tomarapijivi ata, Timoteo yabara jumai tsabiabi: —Timoteo raja xaniavaetsia Dioso jumecovênêtaponapona, jai tsabiabi.

³ Pablo jitsipa Timoteo pebarêponaejava. Nexata Pablo Timoteo pebarêponaejavênê, judíovi pijacuenia perabêcaucutsiaexana. Baitsi boupiperabêcaucutsiaexana. Bajarapacuenia Pablo perabêcaucutsiaexana pebaraanaepanaeyanivatsi pevêna judíovi. Tsipaji itsaxuayo barênajetarucaejitsia, judíovi penaperabêcaucubivi jinavanapa. Nexata judíovi apo jitsipae peyajava-jinavanapaejava apo peperabêcaucutsinêtsi. Nexata Pablo Timoteo perabêcaucutsiaexanaenejeva itsa barênajetarucaejitsipa bajarapamonaejava, yapêtaejitsipatsi Timoteo, apo peperabêcaucutsijavatsi. Tsipaji Timoteo paxapijinê griegonê, apo peperabêcaucutsinêtsi. ⁴ Pablobana tomaranêjava itsa najetarubena, caetomarapijivi canacujitsia, tsipaebapona Dioso pejumecovênêtsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovênêtsinexa pacuenia apóstolevi, ancianovi ata, itorobatsi Jerusalén tomaraverena. ⁵ Bajaraxuata Dioso pejumecovênêtsivi, caebitsaêto canacujitsia, bitso ajamatabêcuenesaê tsaponae Diosojavabelia. Caematacabi canacujitsia Dioso pitorobilivaisi ayabitsaêto jumecovênêtaponae.

Pacuenia Pablo bemajitsinaebota tane Macedonia nacuapijinê yabara pelivaisi

⁶ Espíritu Santo apo tocopatsitsi Pablobana petsipae-binexa Dioso pitorobilivaisi Asiavênê nacuata. Bajaraxuata Pablobana najetarubena Frigia nacuajava, Galacia nacuajava ata. ⁷ Pablobana itsa najetarubena Misianacua muxubêrêa, jamatabêpata picani Bitinia nacuajava. Itsiata baitsi jane Espíritu Santo apo tocopatsitsi pepatsinexa Bitinia nacuajava. ⁸ Nexata Misianacua canacujitsialia rovalia ponalia. Pata Troas tomarabelia. ⁹ Nexata Troas tomarata meravivi Pablo bemajitsinaebota taenuta Macedonia nacuapijinê. Macedonia nacuapijinê asaêyata jumaiti Pablojavabelia:

—Naxanitsia. Macedonia nacuayabelia ponare. Paneyavenonaename, jai Macedonia nacuapijinê.

¹⁰ Pablo bemajitsinaebota petauenutsicujinae Macedonia nacuapijinê, bepíjia paxaniavaetajê patajavaxi

patanicabinexalia Macedonia nacuayabelia. Nexata panajumaitsinë:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

¹¹ Troas tomarata panaropobajë. Panaponajë barco-ta. Rivialia panayanicabaliajë patapatsinexa Samotraciatunaeto nacuayabelia. Troas tomarata patanaropobicujinae, meravia pitsijavata, panapatajë Neápolis tomarabelia. ¹² Bajaraxuacujinae matatsënëa paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayaibitsaëtoxaneto Roma tomaraverena pepatsivi. Bajarapatomara-ta panajinavanapajë caematacabimaxëto. ¹³ Nexata abaxë itsa panajinavanapajë Filipos tomarata, judíovi penacueraevetsimatatabita papitsapajë tomara-pënëyabelia. Paponajë mene itapayavelia patajaitsinexa itsajota nacaetuatabiaba judíovi pevajëcabiabinexa Diosojavabelia. Nexata mene itapaya itsa pajaitanajetarubenajë, petiriavi penacaetuatenavei mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi patsipaebajë petiriavijavabelia.

¹⁴ Bajarapapetiriavijavuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipapaëbërë, pecanajetabiabiva. Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi.

¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetaneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

¹⁶ Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecana-jetsivatsi pijatuxanevi amoneya petonacuenebabibabinexa. Nexata bajarapova pijumata pijatuxanevi ayaijava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuenia bajarapova tajëvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabëcuene, pijatuxanevi pitabia-

ba. ¹⁷ Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtatsia peecaenë Dioso pijajivi. Pacatsipaebapona papecacapanepaelivaisinexa pibisiacuene paneexanaeneconivecua, jai tsanajetarucabiabi petiriva paxanë yabara.

¹⁸ Bajarapacuenia najumatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënëy-orotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapit-sapare baja mapovaje, jai Pablo.

Bajarapacuenia Pablo pejumaitsijavata dovathi baja petiriva vecuapitsapatsi.

¹⁹ Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi vaetabatsibeje Pablobeje Silasbeje. Robocaponaliatsibeje tomara tuatuajëabelia. Caponatsibeje tomara pevetsivijavabelia. ²⁰ Jivi penaneconitsiaexanabiabivi, juezmanae, pitabarata nutatsibeje. Pamonae Pablobeje Silasbeje vaetabatsibeje, najumetsënëtsiaya jumaitsi juezmanaejavabelia Pablobeje Silasbeje yabara:

—Mara papebibeje judíonëbeje. Anaepanaeayexanaponabeje vajatomarapijivi. ²¹ Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamonae Pablobeje Silasbeje yabara.

²² Nexata jivi ayaibitsaëtoxaneto baraanaepanatsibeje Pablobeje Silasbeje. Nexata juezmanae itoroba vajabitsaë Pablobeje Silasbeje penaxatatsijavabeje pevejumajonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota.

²³ Ayaicuenia pejumaconibabecujinaetsibeje, juezmanae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmanae itoroba penaneconitsivi pejebabiabibo pevetsinë Pablobeje Silasbeje xaniavaetsia pevetsinexatsibeje penaneconitsivi pejebabiabibo ënëtuatuajëta. ²⁴ Penaneconitsivi pejebabiabibo pevetsinë juezmanae pitorobixaetsi xaniavaetsia pevetsinexa, nexata penaneconitsivi pejebabiabibo pënëyatuucubijavanë, pecopiarucaejavatareca, Pablobeje Silasbeje etatsibeje. Peponaponaeayanivabeje penaitabarataeayaexanaetablapabeje tusatualia sixataliatsibeje. Bajaraxuacujinae xaniavaetsia yasicatarërëtsibeje cepovënëjavata.

²⁵ Nexata meravituatuajëta Pablobeje Silasbeje vajëtabeje Diosojavabelia. Diosojumevajianë naxëanecabeje Diosojavabelia. Itsamonae pijinia penaneconitenaevi bajarapabota, jumetanetsibeje penaxëanecaejavabeje. ²⁶ Nexata jemata bajarapaepato-ta ira najëabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanë nabaupana pijacuata. Daxita penaneconitsivi pacadenamaëtonëta cobecëbejebatsi, vecobeothopat-

si. ²⁷ Penaneconitsivi pejebabiabibo pevetsinē naēcota-puna pemajitecaenēmi. Nexata itsa tane daxita bau-panē penabaupanaejava, navemarajonotaxuabina pi-jaespada penabeyaxuabinexa picani. Tspaji ja-matabējumaitsi:

—Daxita meta baja penaneconitsivi rēcēpeca. Nexata bajarapajamatabēcuene yabara nenaneconitsiaex-anaena tomara pevetsivi, jamatabējai.

²⁸ Nexata bajarajota itacarajeta Pablo pinijjumeta jumai tsaxuabi:

—Pētsa nabeyaxuabame. Daxita raja patananeconit-sivi panubenajē, jai Pablo.

²⁹ Nexata penaneconitsivi pejebabiabibo pevetsinē itoroba pijajivitonē petocarenanexatsi pitayotabiabija-va. Nexata bepija tocarenatsi. Penaneconitsivi peje-babiabibo pevetsinē bitso neconecojai pecajunavi. Nexata bajaraponē pematabacabēta nucajunua Pablobeje Silasbeje pitabarata. ³⁰ Bajaraxuacujinae penaneconitsivi pejebabiabibo pevetsinē barēpit-sapaliatsibeje Pablobeje Silasbeje. Penaneconitsivi pe-jebabiabibo pevetsinē jumaitsi:

—¿Detsa xua exanaenajē tanecapanepaenexa Dioso-javabelia? jai Pablobeje Silasbejevavelia.

³¹ Nexata Pablobeje Silasbeje jumaitsiibeje:

—Najamatabēcuene copare pepo petuxanenē Jesu-cristojavabelia pecacapanepaenexa Diosojavabelia. Xamē nijabota pejinavanapaevi ata Jesucristojavabelia najamatabēcuene copatsi pecapanepaenexatsi Dioso-javabelia, jaiibeje.

³² Nexata Pablobeje Silasbeje tsipaebabeje Dioso pitorobilivaisi bajaraponējavabelia, daxita pijabota pe-jinavanapaevijavabelia ata. ³³ Penaneconitsivi peje-babiabibo pevetsinē bajarapaepatota, meravi, Pablobeje Silasbeje jumavajēnēquiatatsibeje. Nexata bajaraponē, pijabopijivi yajava, bautisababeje Pablobeje Silasbeje. ³⁴ Bajaraxuacujinae penaneconit-sivi pejebabiabibo pevetsinē pijaboyabelia Pablobeje Silasbeje barēliatsibeje. Nexata pexaejava rajutatsi-beje. Bajaraponē, pijabopijivi yajava, pinijicuenia ja-matabēcuenebarēya Dioso pejumecovēnēsixae.

³⁵ Nexata pepo bajayacunua juezmonae itorobalia vajabitsaē penaneconitsivi pejebabiabibo pevetsinē-javabelia pejumaitsinexa: “Capitsapaename pina baja Pablobeje Silasbeje,” pejainexa. ³⁶ Nexata penaneconit-sivi pejebabiabibo pevetsinē jumaitsi Pablojavabelia:

—Juezmonae rabaja netonajumeitorobarena pataca-capitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinē.

³⁷ Itsiata baitsi jane Pablo jumaitsi juezmonae pitoro-bivajabitsaēvijavabelia:

—Juezmonae naneconita pijatuxanevijavabelia, pax-anēbejevaberena ata. Tspaji abaxē copiata xani-avaetsia yapētaenejeva paneconi paxainajēbeje, pax-anēbeje paRomano nacuapijinē atanēbeje, juezmonae itoroba paxamēyajuvēnēvi patanejumaconibabenex-abeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmon-ae saya paxamē pacaitorobarena pepēya patanecapit-

sanaenexamēbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaēvijavabelia.

³⁸ Nexata vajabitsaē tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinēbe-jecuene, bitso jamatabēcuenenajunaviaca. ³⁹ Nexata juezmonae parena. Jumaitsi Pablobeje Silasbejevavelia:

—Pauranē paxamēbejevavelia vajabitsaē pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabēcuene xanepanaeya Pablobe-je Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje, ponabeje baja Lidia pijaboyabelia. Nexata Lidia pijabota itsa tanebeje Dioso pejumecovēnēsivi, muxujioabeje bajarapamonae pajamatabēcuene-saēnexa Diosojavabelia. Bajaraxuacujinae ponabeje baja bajarapatomaravecua.

Pacuenia Pablobeje Silasbeje Tesalónica tomarata jai-tatsibeje pevaetabinexatsibeje yabara pelivaisi

17 Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata naponaponabeje acueyabi pasemanabeje. Tesalónica tomarata eca judíovi penacaetuatabiabibo. ² Nexata Pablo pijacujirucuenia judíovi penacueraevetsimatacabianē canacujitsia najoneyabiaba bajarapabota. Dioso pitorobilivaisi Pablo tsipaebabiaba bajarapabota penacaetuatabiavijavabelia. Tsipaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabibibota:

—Dioso baja cajena pejumelivaisibaxutota tajēvelia vajunupaebatsi Cristo, ponē baja Dioso itorobica jivi pecapanepaenexa. Tajēvelia baja cajena Dioso pe-jumelivaisibaxutota Cristo vajunupaebatsi pijavajabitsaē ayaicuenia pebejiobiaexanaejavanexatsi. Vajunupaebatsinua baja cajena Cristo petēpaecujinae icatsia piasaējavanexa. Bajaraponē raja Jesús, ponē pelivaisi pacatsipaebatsi. Bajaraponē raja Cristo, ponē Dioso itorobica jivi pecapanepaenexa, jai tsabiabi Pablo itsa tsipaebabiaba Dioso pitorobilivaisi judíovi penacaetuatabibibota.

⁴ Nexata judíoviyajuvēnēvi jumecovēnēta Pablo petsipaebabiabilivaisi. Ayaibitsaēto griegovi ata, Dioso pe-jitsipaevi, jumecovēnēta Pablo petsipaebabiabilivaisi. Ayaibitsaēto petiriavi ata, petuxanevi pijavajivi, jumecovēnēta Pablo petsipaebibilivaisi. Nexata daxita bajarapamonae nacaetuatabiaba Pablobeje Silasbejevavata. ⁵ Nexata judíovi, pamonaē apo jumecovēnēsivi Pablo petsipaebabiabilivaisi, Pablo cuenecaēbatsi. Tspaji Pablojavabelia jivi ayaibitsaēto jonepona. Nexata bajarapajudíovi junata jivi ayaibitsaēto xaneto pibisiája-

matabëcuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barënacaetuata. Nexata daxita bajarapajudíovi, pejunatsivi jane baja yajava, barënajamatabëcueneyanaba. Nexata itoroba bajarapatomarpijivi pianaepanaenexa Dioso pejumecovënëtsivijavabelia. Pablobeje Silasbeje naponaponabeje Jasónvënënë pijabota. Nexata daxita pamona anaepana bajarapatomarata, Pablobeje Silasbeje jemata tsi-maxëpatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitjarabixaetsibeje, nexata pamona anaepana, vaetabatsi Jasón, itsamona yajava, pamona Dioso pejumecovënëtsivi. Robocaponaliatsi Jasónbana tomara pevetsivijavabelia. Nexata pamona anaepana, tomara pevetsivi pitabarata najumetsënëtsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanëjava pejinavanapaevi itorobaponabeje pianaepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponë nucaje, tocopata pijabota penaponaponaenexabeje Pablobeje Silasbeje. Daxita pamona Jasón mayajavanucaje, Pablobana ata, daxita bajarapamona, apo jumecovënëtsi cajena Romanonacua pepo pevetsinë pitorobilivaisi. Daxita bajarapamona jumai tsabiabi: “Romanonacua pepo pevetsinë rabaja apo nacayanacuaevetsi. Itsanë rabaja nacayanacuaeveta. Bajaraponë pevënë Jesús,” jai tsabiabi daxita bajarapamona, jai najumetsënëtsiaya tomara pevetsivijavabelia pamona anaepana.

⁸ Nexata bajarapacuenia pejumaitsiyava itsa jumetane, daxita tomarapijivi tomara pevetsivinua bitso anaepana. ⁹ Nexata Jasón, Dioso pejumecovënëtsivi yajava, palata matamotsiaexanatsi tomara pevetsivijavabelia, Pablobeje Silasbeje pevecuapitsapaenexabeje bajarapatomara. Tomara pevetsivi jumaitsi:

—Itsa rabaja ponaenabeje bajaraponëbeje mapatomaravecuaje, pacatocanaviabianatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonëjavabelia.

Pacuenia Pablobeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovënëtsivi bepijia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabi-abibojavabelia. ¹¹ Ajamatabëcuenetaja pajudíovi jinavanapa Tesalónica tomarata. Nexata apo jumecovënëtsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabëcuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiabibota Dioso pitorobilivaisi tsi-paebabiaba bajarapajudíovijavabelia. Nexata Pablo it-

sa copata petsipaebabiabijava, bajarapajudíovi pijacuatata Dioso pejumelivaisibaxutota xaniavaetsia nacujarubabiaba peyapëtaenexa xaniajai bajarapacuenia it-sa jumaitsi Pablo petsipaebabiabilivaisi. ¹² Berea tomarapijivi judíovi ayaibitsaëto jumecovënëta Pablo petsipaebabiabilivaisi. Ayaibitsaëto pijinia griegovia jumecovënëta. Jumecovënëta pebijivi. Jumecovënëta petiriavi ata. Bajarapapetiriavi petuxanenëanë pijavajivi. ¹³ Pajudíovi jinavanapa Tesalónica tomarata, Pablo vënëlvaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapijivi ayaibitsaëto pianaepanaenexa Pablojavabelia. ¹⁴ Nexata Berea tomarapijivi, pamona jumecovënëta Pablo petsipaebabiabilivaisi, bajarapamona Pablo bepijia itorobatsi peponaenexa manumene itapata peecaetomarabelia. Silasbeje abaxë Timoteobeje nacopatabeje Berea tomarata. ¹⁵ Pamona Pablo yanataponaliatsi, pënxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuencaëjëpaenatsibeje, bepijia renabeje tsane tanecaxitjarabinexabeje Atenas tomarata, jai Pablo bajarapamonaejavabelia.

Bajaraxuacujinae pamona Pablo pënxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxë Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapecataeya pexanaenëanë piapaxayojava daxita Atenas tomara tuatua-jëjava. Nexata Atenas tomarapijivi pematatabacabëta nubenabiaba pevajëcabiabinexa bajarapajumapecataevijavabelia. Nexata Pablo itsa tane bajarapacuenia, bejamatabëjiobi bitso. ¹⁷ Nexata judíovi penacaetuatabiabibota Pablo Dioso pitorobilivaisi yabara barënajumenotabiaba pevëna judíovi. Barënajumenotabiabanua apo judíovi ata, pamona Dioso pejitsipaevi. Caematacabi canacujitsia barënajumenotabiabanua pamona Pablo caxitjarabatsi tomara tuatua-jëta.

¹⁸ Nexata Pablo caxitjaraba pebijivi, epicúreomona pecujarubilivaisi pejumecovënëtanapaevi. Caxitjarabanua itsapebijivi, estoicosmonae pecujarubilivaisi pejumecovënëtanapaevi. Bajarapamona ata Pablo barënajumenota. Nexata Pablo pebarënajumenotsijavata, bajarapamonaeyajuvënëvi Pablo yabara muetsia najumaitsi:

—¿Detsa meta pitsilivaisi maponëje namatatsapatsia nacabarëcuaijai? najai bajarapamona Pablo yabara.

Itsamona pijinia Pablo yabara najumaitsi:

—Itsanacuapijivi racovë pijadiosovi pelivaisipaebinë, najai bajarapamona.

Bajarapacuenia najumaitsi tsipaji Pablo tsipae-bapona pexanialivaisi, Jesús pelivaisi. Tsipaebaponanua petëpaevimi icatsia itsamatacabi piasaëjavanexa petëpaecujinae. ¹⁹ Nexata bajarapamonae Pablo barëponaliatsi Areópagovënë tsutojavabelia, patsutojavabelia tomara pevetsivi nacaetuatabiaba penabarëcuaiacuaijainexa. Itsa baja palia bajarabelia, bajarapamonae jumaitsi Pablojavabelia:

—Panetsipaebare patayapëtaenexa papejanalivaisi tsipaebaponame. ²⁰ Panetsimuxuaitothia abaxë palivaisi tsipaebaponame. Nexata pajitsipajë patayapëtaenexa pajamatabëcuenelivaisi xaina palivaisi tsipaebaponame, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivinua, pamonae bajarapatomarata najinavanapa, daxita bajarapamonae jamatabëcuenenabiabatsi pejanalivaisi pejumetaeyabiabinexa. Jamatabëcuenenabiabatsinua petsipaebabiabinexa itsamonaejavabelia ata.

²² Nexata Pablo nonotapuna bajarapamonae tuatua-jëta Areópagovënë tsutojavata. Jumaitsi:

—PaAtenas tomarapijivimë, pacatanetsi rabaja panijadioso vi bitso papecajamatabëcuenenabiabijava.

²³ Tanajetarucabiabijavata panijatomaracallejava, taeyabiabajë itsaxuayo pavajëcabiabame panijadiosovijavabelia. Nexata caxitajarabajë altarvënëjava, itsajota jivi vajëcabiaba abaxë apo yapëtae ata padiosojavabelia vajëcabiaba. Bajarapaaltarvënëjavata peyaquinarutsiitane jumai tsarucae mapacueniaje: “Padioso abaxë apo yapëtaetsi, bajarapadiosojavabelia vajëcabiabianatsi mapaaltarjavataje,” jai tsarucae peyaquinarutsiitane. PaDioso yabara yaquinaruta bajarapaaltarvënëjavata, nexata bajarapaDiosojavabelia paxamë baja najamatabëcuenecopatsiaya panavajëcabiabame, abaxë apo payapëtae atamë bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicuene yajava. BajarapaDioso pepo pevetsinë jane baja daxita mapanacuaje. Pevetsinë itaboxo ata. BajarapaDioso cajena apo ponaponae jivi pexanaetemplota. ²⁵ BajarapaDioso apo namatavenonae jivi peyavenonaenexatsi. Tsipaji apo namatavenonae itsacuenjavayo ata. Biji rajane bajaraponë nacarajuta caeepatoyo vajaasaëtsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athëbëtatsia peecaenë, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxë copiaya caenë pebi exana. Bajaraxuacujinae bajarapapebijavaverena naexanapona daxitavirijamevi pijasalinaivimi. Nexata bajarapapebijavaverena penaexanaponaevi yacaëjëpa pejinavanapaejava daxitanacuanëjava. Nexata Dioso caevirijamevi canacujitsia tocopataponamatacabibeje asaë tsavanapaejitsia. Tocopataponanua panacuanëjava jinavanapaejitsia. ²⁷ Bajarapacuenia

Dioso tocopata mapanacuataje daxita bajarapamonae Dioso pejitsipaenexa penajamatabëcuenecopatsinexa Diosojavabelia. Dioso cajena tajë apo nacavecuaponaponae. ²⁸ Dioso raja pejamatabëcueneta asaë tsavanapaetsi. Bajarapacuenia Dioso pejamatabëcueneta asaë tsavanapaetsi tsipaji baja cajena paxamëyajuvënëvi bajayata peyaquinaelivaisita jumaitsi: “Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitsi mapacueniaje: “Dioso raja oronanitota, platananitota ata, ibotota ata pexanaenëtsi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitsi jamatabëcuenenavëxaniabiaya Dioso yabara. ³⁰ Jivi abaxë bajayata apo yapëtae Dioso peponaponaejava. Nexata bajayata jivi pibisiacuenexanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuenepexanabiabijava yabara. Itsiata baitsi jane maparucaeje Dioso itoroba daxitajivi daxitanacuanëjava pejinavanapae vi pibisiacuenepexanabiabijava pecopabinexa baja, penajamatabëcuenepënëyorotsinexa Diosojavabelia. ³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocajëtaruta. Pamatacabi Dioso tocajëtaruta, itsa copiapatsiana, naneconitsiaexanaena daxitanacuanëpijivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajena itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivijavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitsijava Jesús petëpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona.

³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonae jumecovënëta Pablo petsipaebilivaisi yajuvënënenë, pevënë Dionisio. Bajaraponë Dionisio, Areópagovënë tsutojavata penacaetuatabiabi pevetsiviyajuvënënenë. Petiriva ata, Dámarisvënëva, jumecovënëta Pablo petsipaebilivaisi. Itsamonae yajava jumecovënëta.

Pacuenia Pablo ponapona Corinto tomarata yabara pelivaisi

18 Atenas tomarata Pablo jivi petsipaebaponaponaeacujinae Dioso pitorobilivaisi, pona baja. Nexata pata Corinto tomarabelia. ² Nexata Corinto tomarata Pablo caxitajaraba judfonë, Aquilavënënenë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia

nacuaverena. Yajavapata pijava Priscilavënëva. Bajara-pajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënënë, capitsapapona daxita judíovi pepit-sapaenexa Roma tomaravecua. Romatomara eca Italia nacuata. Nexata Pablo pona Aquila pijaboyabelia.

³ Nexata Aquila pijabota Pablo naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocaejava carpabonë. ⁴ Judíovi penacaetuatabibibota, penacueraevetsimatacabianë canacujitsia, Pablo judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palivaisi Pablo tsipaebabiaba.

⁵ Silasbeje Timatedebeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonë. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacuene Cristo, ponë copiaevetavana-patsi pepatsijavatsica vajanacacapanepaenexa, jai tsaponae Pablo Jesús yabara.

⁶ Nexata bajarapacuenia Pablo pejumaitsaponaeyava Jesús yabara, judíovi baraanaepanatsi. Pablo pibisi-acuenia bijatanetsi. Nexata Pablo penaxatatsijava najumajonotaxuaba. Nënëbabi bajarapamonae peyapë-taenexa penaneconitsijava Diosojavabelia. Tsipaji apo jumecovënëtsitsi, Pablo tsipaebi ata Jesús yabara. Pablo nexata jumaitsi judíovijavabelia:

—Paxamë saya panejamatabëcueneta panaxuabianame Diosovecua. Xanë tajamatabëcueneta apo panaxuabimë tsane. Panijacuata panaxuabianame. Tsipaji cajena pacatsipaebi atatsi Jesús yabara, apo panejumecovënëtsimë. Aeconoxae rabaja copatajê patacatsipaebabiabijava paxamëjavabelia bajarapalivaisi. Tavajënaeyabelia baja ponaenajê tatsipaebapon-aenexa bajarapalivaisi apo judíovijava, jai Pablo judíovijavabelia.

⁷ Nexata Pablo judíovi penacaetuatabibibovecua pitsapa. Nexata pona Justovënënë pijaboyabelia. Nexata Justo pijabota Pablo naponapona. Bajaraponë Justo penavajëcabiabinë Diosojavabelia. Pijabo eca judíovi penacaetuatabibibo muxuneneta. ⁸ Nexata Crispovënënë, judíovi penacaetuatabibibo pevetsinë, daxita pijabopijivi barëjumecovënëta Jesús pelivaisi. Ayaibitsaëto Corinto tomarapijivi, pamonaeyumetane Pablo petsipaebabiabilivaisi, jumecovënëta. Nexata bajarapamonae nabautisaba. ⁹ Nexata meravi bema-jitsinaebota Dioso jumaitsi Pablojavabelia:

—Pëtsa junavame. Pëtsa copatame netsipaebaponaejava tajumelivaisi. ¹⁰ Xanë raja cayajavatsi. Nexata itsajivi ata apo caitsacueniabi tsane. Tsipaebaponae-name tajumelivaisi. Tsipaji rabaja tajajivi ayaibitsaëto tsaponae mapatamarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tsipaebaponapona Dioso pitorobilivaisi Corinto tomarapijivijavabelia.

¹² Pamatacabi Galióvënënë Acayanacua evetaponapona, judíovi najamatabëcuenëjépaeya tsimaxë-nacaetuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevevtsinë Galión pitabarata. ¹³ Nexata judíovi jumaitsi nacuaevevtsinë Galiónjavabelia:

—Mara ponëje jivi livaisi tsipaebaponaje pejumecovënëtsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanë cajena bajarapacuenia apo panetonajumecopatsi Dioso Moiséspijinëta penajumecopatsilivaisi, jai judíovi nacuaevevtsinë Galiónjavabelia Pablo yabara.

¹⁴ Ajena picani Pablo jumepitsijitsia judíovi, itacarajeta nacuaevevtsinë Galión jumaitsi judíovijavabelia:

—Paxamë pajudíovimë, bepapyëtaneme mapacueneje. Itsa maponëje nacobetoxotsipa, jivitonë ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipajê. ¹⁵ Paxamë saya pabarënajumenotame maponëje papecatsipaebaponaelivaisi yabara. Pabarënajumenotamenua panijasalinaiivi pijalivaisi yabara ata. Nexata saya paxamë panijacuata bajaraxua yabara pabarëcuaicuaijamëre pacuenia pajitsipame. Xanë raja apo evetsinë bajarapalivaisi, jai nacuaevevtsinë Galión judíovijavabelia.

¹⁶ Nexata baja nacuaevevtsinë Galión navecuapit-sapaeyaexana judíovi. ¹⁷ Nacuaevevtsinë Galión judíovi navecuapitsapaeyaexanae ata, caecuenia abaxë judíovi apo ponaeyajabonëjavabelia. Nexata griegovi, bajarajota penubenaevi, nacobenavaetaba judíoviyajuvënënë, Sóstenesvënënë. Bajaraponë Sóstenes judíovi penacaetuatabibibo pevetsinë. Nexata griegovi Sóstenes conibabia nacuaevevtsinë Galión pitabarata, ajibi ata peyabaraconibabejava. Nexata nacuaevevtsinë Galión tae ata bajarapacuene, apo itavetsi.

Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxë bajayajebi ponapona Corinto tomarata. Bajaraxuacujinae Dioso pejumecovënëtsivita napëjioba. Napona barcota Siria nacuyabelia. Pablo yajavapona Priscilabeje Aquilabeje. Nexata epatua Cencrea tomarata, Pablo mataxunatsi. Daxitamatanami matacasibatsi jivi peyapëtaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi.

¹⁹ Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetuatabibiboyalia. Nexata bajarajota barënalivaisita judíovi. ²⁰ Nexata picani Efeso tomarata Pablo judíovi asivatsi abaxë penaponaponaenexa anijamatacabianë. Itsiata Pablo apo jejai. ²¹ Nexata Pablo itsa napëjioba, bajarapamonaejavabelia jumaitsi:

—Naxanetajê tapatsinexa Jerusalén tomarabelia tataenexa pafiesta baja imoxoyo pevajënae pejonenexa. Itsiata icatsia najetarucaenajê paxamëjavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. ²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovënëtsivi. Bajaraxuacujinae icatsia naviata Antioquía tomarabelia. ²³ Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomanëjava. Najetaruca Galacia nacua-ta penaetomaranëjava, Frigia nacua-ta penaetomaranëjava ata. Bajarapatomaranëjava pejinavana-paevi Dioso pijalivaisita Pablo jamatabëcuene asaëyaexananajetaruca daxita Dioso pejumecovënëtsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judíonë Apolosvënënë pata Efeso tomarata, Alejandría tomarapijnë. Bajaraponë xaniavaetsia Dioso pitorobilivaisi jivi tsipaebabiaba. Jumeyapëtane bitso pacuenia Dioso pejumelivaisibaxutota jumaiti. ²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinë jivijavabelia tsipaeba-pona, bajarapalivaisi Apolos xaniavaetsia tsipaebatsi. Juanpijinë jivi pebautisabapona-ajava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabëcuenesaëya xaniavaetsia tsipaebanajetaruca Jesús pelivaisi. ²⁶ Apolos ajumejunavijibia Dioso pitorobilivaisi jivi tsipaeba judíovi penacaet-uatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje Apolosjavabelia xaniavaetsia Apolos peyapëtaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsi-cobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacua-ta. Bajarapacuenia tsi-cobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuyabelia, Apolos bitso yavenona Acaya nacuapijivi Dioso pejumecovënëtsivi. ²⁸ Daxitajivijavabelia Apolos tsipaeba-pona Jesús pelivaisi. Nexata pacuenia Dioso pejumelivaisibaxutota jumaiti Jesús yabara, Apolos tsipaeba-pona daxitajivijavabelia. Nexata Apolos daxitajivi yapëtaeyaexanapona Jesús pepacuene Dioso athëbëvetsica pitorobijavatsitsica jivi peca-panepaenexa. Nexata baja judíovi moya ena. Tsi-paji acuenebi judíovi: "Jume raja," pejaijava Apolos petsipaebilivaisi yabara.

Pacuenia Pablo ponapona Efeso tomarata yabara pelivaisi

¹⁹ Pamatacabi abaxë Apolos ponapona Corinto tomarata, bajarapamatacabi pijinia Pablo ibot-sutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitaraba caejivibeje Jesús pelivaisi pejumecovënëtsivi.

² Nexata Pablo yanijoba bajarapamonaejavabelia.

—¿Espíritu Santo tsabaja pacatsijamatabëjunua pamatacabi ajena pajumecovënëtae Jesús pelivaisi? jai Pablo.

Nexata bajarapamonae jumaiti:

—Jume. Apo payapëtaenë patanetsijamatabëjoneja-va Espiritu Santo. Apo pavënëtaenë cajena Espiritu Santo ata, jai bajarapamonae Pablojavabelia.

³ Nexata Pablo jumaiti:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaiti:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

⁴ Pablo nexata jumaiti bajarapamonaejavabelia:

—Juanpijinë raja bautisabapona pamona- baja copa-pa pibisiacuene pexanaejava, pamona- baja naja-matabëcuene-pënëyorota Diosojavabelia. Itsiata baitsi jane Juanpijinë jumai tsaponae jivijavabelia: "Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica," jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta. ⁶ Nexata Pablo pevajëtsijavata Diosojavabelia, tsi-matanacobebeuata bajarapamonae. Nexata bajarapamonae Espiritu Santo tsijamatabëjunuatsi. Nexata bajarapamonae itsa cuaicuaijai, ajumeithia pecuaicuaijaijava. Tsi-paji itsavirajumenëta, apo penatsipaebijumenëmi, cuaicuaijai. Bajaraxuacujinae jane baja bajarapamonae Dioso pitorobilivaisi tsipaeba-pona jivijavabelia. ⁷ Daxita meta bajarapamonae bejamatabëcuene doce ponëbeje.

⁸ Efeso tomarata Pablo acueyabi pajuametobeje ponapona. Nexata Pablo Efeso tomarata, judíovi penacaet-uatabiabibota, judíovijavabelia ajumejunavijibia tsipaebabiaba Dioso pitorobilivaisi. Pablo judíovi barënajumenotabiaba Dioso pijajivi pevetsijavanexa yabara. Bajarapacuenia Pablo barënajumenotabiaba judíovi pejumecovënëtsinexa Dioso pijajivi pevetsijavanexa.

⁹ Itsamonae itsiata amatabocotaja. Apo jitsipae pejumecovënëtsijava bajarapalivaisi. Bajarapamonae daxitajivi pitabarata pibisiacuena baracuaicuaijai pex-anialivaisi, Jesús pelivaisi. Nexata baja Pablo vecuanat-sata bajarapamonae apo pejumecovënëtsixae Jesús pelivaisi. Pablo nexata, Jesús pelivaisi pejumecovënëtsivi yajava, pona Tirannovënënë pijaescuelabojavabelia, bajarapabota penacaet-uatabiabineja. Bajara-

pabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. ¹⁰ Bajarapacuenia Pablo tsipaebaponapona anijavaibeje. Nexata daxita Asiavënë nacuapijivi, judíovi, apo judíovi ata, jumetane petuxanenë Jesús pelivaisi. ¹¹ Dioso yavenonatsi Pablo Dioso pesaëta pinijicuene pexanaejavanë pexanaponaenexa. ¹² Nexata pamona toavitanetsi, pijamonae Pablo penaxatabijavanë, pijapañueloxi ata, daxita xuaxi Pablo naperabëcajayaba, tocaponabiaba piavitanevi peperabëcajayabinexa. Nexata piavitanevi bajaraxua itsa tsiperabëbuatatsi, jamatejema baja tsabiabi. Dovathivi peyajavajinavana-paevi ata vecuapitsapabiabatsi.

¹³⁻¹⁴ Itsamonae judíovi tomaranëjava najetarubena. Bajarapamonae Jesús pelivaisi apo jumecovënëtsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, sieteponëbeje tsavanapae. Bajarapamonae Esceavënë, sacerdotevi penamatacaitorobinë, ëpexi tsavanapae. Nexata bajarapamonae vënëthane Jesús. Nexata bajarapamonae najumaitsi:

—Dovathi jivivecua capitsapaenatsi petuxanenë Jesús pevënëta, najai.

Nexata jane baja itsa tane dovathi peyajavaponaponenë, bajarapamonae jumaitsi:

—Dovathi, pacaitavetatsi, ponë Pablo vajunupae bapona, petuxanenë Jesús pevënëta. Vecuapitsapare baja maponëje, jai Esceavënë pexi dovathi peyajavaponaponaenëjavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje:

—Yapëtaniji raja Jesús. Yapëtaniji Pablo ata. Itsiata paxamë apo pacayapëtaetsi. ¿Detsa jane paxamë pamonae? jai dovathi.

¹⁶ Nexata bajarajota dovathi peyajavaponaponaenë, tsimaxëjirevarenatsi bajarapamonae. Pinijisaëta dovathi peyajavaponaponaenë biatsi. Nexata amoneyabatsi. Pinijicuena tsaquibabiatsi. Vejumatitcatsi penaxatabijavanëmi. Nexata bajaraponë pijabovecua bajarapamonae yarëcëpeca pebejavatsi. Jumasa nexata rëcëpeca. ¹⁷ Nexata daxita Efeso tomarapijivi, judíovi, apo judíovi ata, vënëlivaisitane pacuenia dovathi peyajavaponaponaenë exanatsi Esceva pexi. Nexata Efeso tomarapijivi bitso jamatabëcuenenajunaviaca. Nexata daxita bajarapamonae yaiyatane Jesús pevënë.

¹⁸ Nexata ayaibitsaëttoxaneto Dioso pejumecovënëtsivi, patapona Pablobanajavaberena. Nexata bajarapamonae daxitajivi pitabarata navecuapaebapona pibisiacuene pexanabiabijava. ¹⁹ Nexata ayaibitsaëto penajorobicuene peyapëtaevi, capata pijacuyalatobaxutonë, penajorobicuene yabara pecajinavanapaebaxutonë. Pamatacabi bajarapamonae comuaca bajarapabaxutonë, ayaimatamota comuaca. Nexata daxita bajarapamonae bajarapacuyalatobaxutonëmi tajuita isotota daxitajivi pitabarata. Petajuitsicujinae itsa namataëjëta petajuitsibaxutonëmi pematamo, xuaba pina cincuenta mil ponëbeje palatanëanë. Bajarapa-

palatanëanë bitso penamatamotsinëanë. ²⁰ Nexata bajarapacuenia Dioso pitorobilivaisi yacaëjëpaponae baja daxitanacuanëjava. Nexata ayaibitsaëto tsaponae Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacuajava, Acaya nacuajava ata, petaenajetarucaenexa Dioso pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaenajë icatsia Roma tomarabelia ata, jai Pablo.

²² Nexata Pablo itoroba Macedonia nacuayabelia anijanëbeje pijajivitonëbeje, Timoteobeje Erastobeje. Pablo abaxë bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyaxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. ²⁴ Efeso tomarapijivi anaepana Pablobanajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapaboxi. Demetrio templobo jumapecataeya itsa exanabiaba, bajarapaboxi pebarënacuenebivi bitso ayaicuenia palata barëpitabiaba bajarapaboximatamo. ²⁵ Nexata Demetrio junata pebarënacaetuatsinexa daxita pebarënacuenebabiabivi bajarapaboxi. Junatanua itsamonae ata, pamona pijinia jumapecataeya pexanaejavanë nacuenebabiaba. Nexata Demetrio jumaitsi bajarapamonaejavabelia:

—Paxamë rabaja payapëtaneme mapacuenieje. Jumapecataeya vajaanabiabijavanë vajaanajetabibixae, ayaijava palata xainaponatsi. ²⁶ Pataneme rabaja. Pajumetanemenua baja Pablo pejumaitsaponaejava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitsaponaejava. Nexata jivi ayaibitsaëttoxaneto mapatarapijivije jumecovënëtapona Pablo bajarapacuenia petsipaebaponaejava. Itsiata apo ëmapatarapijivije. Daxita Asiavënë nacuapijivi ata jumecovënëtapona. ²⁷ Bajarapacuenia jivi ayaibitsaëto pejumecovënëtaponaejava apo nacatoxanepanae. Tsipaji jivi apo nacacomuatsi tsipae Artemisavënë diosova pijacuene vajanacuenebijava. Pinijijamatabëcuene pexanaediosova Artemisa pijatemplobo ata, apo yayatae tsipae. Baitsi padiosova daxita Asiavënë nacuapijivi, daxitanacuanëpijivi ata, pematatabacabëta tonubenabiaba pevajëcabiabinexa bajarapovajavabelia, vereverecajitsipa. Nexata baja bajarapovajavabelia jivi apo vajëcabiabi tsipae, jai Demetrio templobo jumapecataeya tsiquiriboxi pexanabiabivijavabelia.

²⁸ Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijijumeta vavajai tsaponae. Jumaitsi:

—¡Pinijjamatabëcuene raja pexainaediosova Artemisa, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi ita jumentane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia nacuapijinëbeje. Daxitajivi vaetabiaya nacobenacaponatsibeje pinijiboxanetojavabelia, itsabelia baja cajena daxita tomarapijivi nacaetuatabiaba. ³⁰ Pablo picani jumaisi Dioso pejumecovënëtsivijavabelia:

—Xanë najonejitsianë mapaboyalaje taneyanatsinëbeje tayajivicuacuajainexa penacaetuatsivijavabelia, jai.

Itsiata Dioso pejumecovënëtsivi apo tocopatsitsi Pablo penajonexalia. ³¹ Asiavënë nacuapijivi pevetsivi, Pablo yapëtanetsi. Nexata bajarapamonae asaëya Pablo tonajumeitorobarenatsi penajoneyaniva bajarapaboyabelia pebeyaxuabianivatsi. ³² Efeso tomarapijivi penacaetuatsijavata, nalivaisijëpaeya apo cuacuajai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tshipaji jivi ayaibitsaëtoxaneto apo yapëtae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judíovi nanacaetuata. Bajarapajudíovi yapëtane palivaisi yabara jivi ayaibitsaëto nacaetuata. Nexata bajarapajudíovi tsipaeba Alejandrovënënjavabelia Alejandro peyapëtaenexa xua yabara jivi ayaibitsaëto nacaetuata. Tshipaji Alejandro ata judíonë. Nexata Alejandro pevëna judíovi pënatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinexa Efeso tomarapijivi pianaepanyaniva daxita judíovijavabelia. ³⁴ Itsiata baitsi jane Efeso tomarajivi apo tocopatsi Alejandro pecuacuajainexa. Itsa daxitajivi yapëtane Alejandro judíonëcuene, nexata daxita vavajaiya jumai tsaponae anijahorabejecuenia mapacueniaje:

—¡Pinijjamatabëcuene raja pexainaediosova Artemisa, Efeso nacuapijivitsi vajadiosova! jai tsaponae bajarapamonae.

³⁵ Bajaraxuacujinae nexata tomara jane baja pevetsinë daxitajivi moyaexana. Nexata jumeitavetsiaya jumaisi:

—PaEfeso tomarapijivimë, daxitanacuanëpijivi baja cajena yapëtane vajanacatocopatsijava vajaevetsinexa mapatomarataje peecaebo, pinijjamatabëcuene pexainaediosova Artemisa pijatemplobo. Daxitanacuanëpijivi baja cajena yapëtane diosojumapeibotova, Artemisa, athëbëvetsica pejopaejava mapatomarataje. ³⁶ Nexata bajarapadiosojumapeibotova athëbëvetsica pejopaejava yabara, acuenebi itsajivi ata: “Jume,” pejaijava. Nexata pajamatejemamëre. Pëtsa abaxë itsacuenie paexaname copiaya panajamatabëxainenejevamë xaniavaetsia. ³⁷ Mapapebibeje paxamë pacapatameje, apo penacobetoxotsinëbeje templotopijijava. Pibisiacuenia apo baracuaicuai-

jaibejenua vajadiosova Artemisa, jai Efeso tomara pevetsinë Efeso tomarata penacaetuatsivijavabelia.

³⁸ Icatsia tomara pevetsinë jumaisi bajarapamonaejavabelia:

—Demetriobana ita jamatabëneconita itsajivi, nexata neconitsi juezmanae pitabarata, jivi peneconitabibibota. Bajara saya xua juezmanae evetavanapa. ³⁹ Itsa apo paneconitsijitsiamë jivi, saya ita panacaetuata me itsacuenelivaisiyo yabara, nexata saya rovalia papaebare xaniavaetsia daxitajivi penacaetuatsijavata, pacuenia gobierno nacaitoroba. ⁴⁰ Xaniajanë pacuenia pacatsipaebijitsiatsi. Ajena, mapamatacabitaje, mapacuenia ita exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia anaeya nacaetuatsije, jai Efeso tomara pevetsinë penacaetuatsivijavabelia.

⁴¹ Itsa baja Efeso tomara pevetsinë najumevereta bajarapacuenia petsipaebijava, itoroba baja daxitajivi penaviabinexa pijabonëjavabelia.

Pacuenia Pablo najetaruca Macedonia nacujava, Grecia nacujava ata, yabara pelivaisi

20 Itsa baja Efeso tomarapijivi jamatabëcaeva pianaepanyaniva, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia pijamatabëcuenesaë tsavanapaenexa Dioso pejumecovënëtsijava. Pablo nexata pexaniacuenia napëjioba bajarapamonae. Bajaraxuacujinae Pablo baja pona Macedonia nacujavabelia. ² Nexata Pablo ita pata Macedonia nacujavabelia, pexanalivaisi tsipaebanajetaruca Macedonia nacuapijivi Dioso pejumecovënëtsivi pevajënaeyabelia pijamatabëcuenesaë tsavanapaenexa Dioso pejumecovënëtsijava. Bajaraxuacujinae icatsia Pablo pata Grecia nacujavabelia. ³ Nexata Grecia nacujava Pablo ponapona acueyabi pajumetobeje. Bajaraxuacujinae picani Pablo barcota naponaejitsia Siria nacujavabelia. Nexata Pablo naya jumentane Siria nacujava judíovi pevajënaeevetsijavatsi pebeyaxuabinexatsi. Bajaraxuata Pablo najamatabëxaina icatsia pecovëya penaviatsinexa matatsënëa Macedonia nacujava. ⁴ Pamona Pablo yanatatsi, mapevënëanëje. Sópater, Berea tomarapijinë. Aristarcobeje pijinia Segundobeje, Tesalónica tomarapijinëbeje. Gayo pijinia Derbe tomarapijinë. Timoteo pijinia Listra tomarapijinë. Tíquicobeje pijinia Trófimobeje, Asiavënë nacuapijinëbeje. Bajarapamonae Pablo yanatatsi. Nexata Pablo ita barëpata Filipos tomarata, xanë Lucasnë, necaxitajaraba. ⁵ Nexata daxita pamona Pablo yanatatsi, namataxaineya baja ponalia Troas tomarabelia. Nexata paxanëbeje Pablobeje abaxë panacopatajëbeje Filipos tomarata, Macedonia nacujava peecaetomarata. Nexata pamona namataxaineya baja ponalia, panevetavanapabeje Troas tomaratalia. ⁶ Nexata paxanëbeje Filipos tomarata barcota panaropotajëbeje pepuavereverecae baja pafiestamata-

cabi judíovi baxane levadurata matajërëabinejeva pexanaepan. Panaponajëbeje jane baja Troas tomara-belía. Cinco matabacabita panapaliajëbeje Troas tomara-belía. Nexata pamona paneevetavanapabeje Troas tomara-talia, papëcaxinajëbeje baja. Nexata abaxë Troas tomarata pajinavanapajë siete pamatabacibije.

Pacuenia Pablo ponapona Troas tomarata yabara pelivaisi

⁷ Troas tomarata domingomatabacabi panacaetuatajë daxita Dioso pejumecovënëtsivi yajava, patanajamatabënapitsinexa xua yabara Cristo sivatëpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaeba meravijebi. ⁸ Panacaetuatajë athëbëabetsia pënëyatuucubibota. Nexata athëbëyo paira pae-nayajë, itsajotatsia pitayotsijavanë ayaijava rubena xaniavaetsia pitayotsinexa. ⁹ Nexata pevëjëato ventanajavata eca, Euticovënënë. Pablo nexata bajayajebi livaisi tsipaeba. Nexata belia pevëjëato bitso itamajitsipaneca. Nexata baja majiteca. Pemajitecaenë nexata pevëjëato jopareca acueyabi pairabejejavavereca. Nexata pevëjëato itsa sivarunarecatsi, petëpaenë baja pitatsi. ¹⁰ Nexata Pablo sivarunareca. Pematabacabëta ecaeya isapita petëpaenë. Nexata Pablo jumaisi Dioso pejumecovënëtsivijavabelia:

—Pëtsa panajamatabëxainame. Asaë rabaja icatsia pevëjëato, jai Pablo.

Nexata pevëjëato icatsia asaë. ¹¹ Nexata Pablo icatsia caevëa junaya. Pejunaecujinaetsia epatsënëca jane baja pan. Tsicobetsana jane baja daxita Dioso pejumecovënëtsivi pexaenexa. Pexaecujinae abaxë icatsia Pablo bajayajebi cuaicuajiai. Pecuaicuajainë belia yamatabacibecatsi. Bajaraxuacujinae Pablo jane baja pona Mileto tomarabelia. ¹² Nexata baja pevëjëato piasaënë barënaviabatsi pijaboyabelia. Barëya bitso bajarapamonae piasaëxae pevëjëato petëpaecujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanë Pablo paneitoroba barcota menia namataxainaeya patanaponaenexa Asón tomarabelia. Bajarapacuenia Pablo paneitoroba tsipaji Pablo matatsënëa najetarucaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. ¹⁴ Nexata jane baja Pablo itsa pata Asón tomarata, Pablo baja nanonorena barco ënëaberena. Nexata baja panaponajë Mitilene tomarabelia. ¹⁵ Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quíotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota peecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacueraevetajë. Nexata icatsia Trogilio tomarata patananaropobicu-

jinae, caematacabicujinae, icatsia panapatajë jane baja Mileto tomarabelia. ¹⁶ Pablo rovia jamatabëxeneta Efe-sotomara, Asiavënë nacuata peecaetomara. Tsipaji apo jamatabëponapona bajayajebi Asiavënë nacuata. Pablo bepijia jamatabëpata Jerusalén tomarabelia Pentecostësvënë fiestavajënaeya.

Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi

¹⁷ Mileto tomaravelia Pablo tonajumeitoroba Efeso tomarapijivi ancianovi pepatsinexarena Mileto tomaraberena. ¹⁸ Nexata baja ancianovi itsa parena Pablojavaberena, Pablo jumaisi bajarapaancianovijavabelia:

—Paxamë baja cajena payapëtaneme mapacueneje. Asiavënë nacuata tapatsimatabacijavaveliacujinae, Dioso pitorobilivaisi tsipaebaponaponajë Asiavënë nacuata. Daxitamatabacabi tonacuenebajë Dioso pijacuene. ¹⁹ Dioso pijacuene itsa tonacuenebaponaponajë, apo jamatabëjumaisinë: “Xanë bitso ayaijamatabëcuenenënë,” apo jamatabëjanë. Itsa taeyabiabajë itsamonae pecopabijava Dioso pejumecovënëtsijavami, bitso sivanueyabiabajë. Bitso bejiobinëna tsabiabi tsipaji judíovi jamatabënebexuababiaba.

²⁰ Daxita Dioso pitorobilivaisi pacatsipaebabiabatsi papecajamatabëcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonëjava ata. ²¹ Asaëya tsipaebabiabajë judíovi, apo judíovi ata, daxita bajarapamonae pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Bajaraxuacujinae jane baja pejumecovënëtsinexa vajatuxanenë Jesucristo pelivaisi. ²² Mara jotacujinaeje ponanajë Jerusalén tomarabelia Espiritu Santo taneitorobixae bajarabelia taponanexa. Itsiata xaniavaetsia apo yapëtaenë pacuenia nexanaejitsia Jerusalén tomarapijivi. ²³ Itsiata caejavayo yapëtaniji. Caetomara canacujitsia Dioso pitorobilivaisi tatsipaebanajetarucajavata Espiritu Santo nejumai tsabiabi: “Caetsiana raja penaneconitsivi pejebabiabibota. Xamë bitso benejio-bicuene taename,” nejai tsabiabi Espiritu Santo. ²⁴ Itsiata baitsi jane cajena apo junavinë bajarapacuene yabara. “Belia nebexuabijitsipa,” apo jamatabëjanë cajena. Jamatabëveretajë pacuene vajatuxanenë Jesús nitoroba tatonacuenebinexa daxitajivi tatsipaebanajetarucaenexa pexanialivaisi, Dioso vajanacaitaxutotsoniataejava, jai Pablo ancianovijavabelia.

²⁵ Icatsia Pablo jumaisi ancianovijavabelia:

—Paxamëjava naponaponajë patacatsipaebinxaxa Dioso pevetsijavanexa daxita pijajivi. Tajëvelia baja cajena yapëtaniji. Apo panetaemë rabaja tsane matabëjëa. ²⁶ Bajaraxuata ajena baja pacatsipaebatsi. Itsajivi paxamëyajuvënëjivi itsa naxuabiana Diosovecua, apo naxuabi tsane xanë tajamatabëcueneta. ²⁷ Apo naxuabi tsane xanë tajamatabëcueneta tsipaji baja daxita Dioso pitorobilivaisi xaniavaetsia baja caje-

na pacatsipaebatsi. Caelivaisiyo ata apo pacavecuaco-patsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisi-acuene paneexanaeyaniva. Pacuena oveja pexainaevi xaniavaetsia evetavanapa pijaoveja, bajara pijinia pacuena xaniavaetsia paevetavanapaename daxita pamonaes Dioso pejumecovënëtsivi. Espiritu Santo raja pacaitoroba panetoevetsinexa vajatuxanenë Jesús pijajivi, pamonaes comuata pijanata. ²⁹ Tajëvelia baja cajena yapëtaniji tacovëya penajetarubenaejavanexa saicayacuena Dioso pejumelivaisivecua petsipaebivi. Bajarapamonaes najetarubenaena jivi Dioso pejumecovënëtsijava pevereverecaeyaexanaenexa. Pacuena nevëthë pianaepanaevi verene oveja, bajara jamatabëcueneitsane bajarapamonaes pevereverecaeyaexanaenexa jivi Dioso pejumecovënëtsijavami.

³⁰ Paxamëyajuvënëvi ata saicayacuena Dioso pejumelivaisivecua tsipaebaponaena peyamaxëtojobinexa Dioso pejumecovënëtsivi. Nexata Dioso pejumecovënëtsivi navecuanatsanaena pepënazonaenexa bajarapamonaes. ³¹ Bajaraxuata xaniavaetsia paevetavanapare Dioso pejumecovënëtsivi. Panajamatabënapire mapacueneje. Xanë baja cajena acueyabi pavaibeje, caematacabi canacujitsia, meravi yajava, caeto ata apo copatsinë patacamuxujobijava bitso patacaasivaxae. Itsajavata tanuejavata ata pacamuxujobabiabatsi, jai Pablo Efeso tomarapijancianovijavabelia.

³² Icatsia Pablo jumaitsi bajarapamonaesjavabelia:

—Tajamonaes, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaasivajava. Nexata bajarapalivaisi pacajamatabëcuenejavenonaena. Bajarapalivaisi cajëpatsi papecajamatabëcuene asaëyaexanaenexa Diosojavabelia. Dioso pacapanepaena pacuena Dioso capanepaena daxita pamonaes Dioso aneconijibia tane. ³³ Xanë itsa naponajë paxamëjavata, apo najamatabëxainaenë tanaxainaeyabinexa itsanë pijapalata, penaxatabijava ata. ³⁴ Payapëtaneme baja cajena mapacueneje. Tacobeta nacuenebajë tanamatavenonaesjavaxi tacomuataponaenexa, tayajavaponaponaevi ata tatocomuatsinexa. ³⁵ Pacatsitanacueneitajëtatsi baja cajena pacuena paxamë ata bepanacuenebame. Be-payavenonamenua itsamonaes bitso bepejibivi. Tsipaji baja cajena vajatuxanenë Jesús jumaitsi mapacuenaie: “Xanepana bitso itsamonaesjavabelia vajarajutabiabijava vaxaitsi itsamonaes vajanacarajutabiabijava mata-toxenetsia. Tsipaji bitso jamatabëcuenebarëyatsi itsa rajutatsi itsamonaesjavabelia vajanacarajutsijava mata-toxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo daxita ancianovi pematatabacabëta barënuca pebarënavajëtsinexa Diosojavabelia. ³⁷ Bajaraxuacujinaes Pablo baja pona. Nexata ancianovi pënuayabatsi. Nexata Pablo itsa napëjioba ancianovi, yaitaxutonueya vaetabiaya itabaratsutsuneponatsi.

³⁸ Bitso ancianovi najamatabëxaina. Tsipaji Pablo jumaitsi:

—Apo panetaemë rabaja tsane matavëjëa, jai.

Bajaraxuacujinaes Pablo barcojavabelia peponaesjavata, bajarapamonaes pënxuabaliatsi barcojavabelia.

Pacuena Pablo pona Jerusalén tomarabelia yabara pelivaisi

21 Itsa baja panapëjioveretajë ancianovi, panarunarecajë baja barco ënëabereca. Pananica-baliajë rovalia patapatsinexalia Cos tomarabelia. Bajaraxuacujinaes, meravia pitsijavata, panapatajë abaxë epatua Rodas tomarata. Bajaraxuacujinaes abaxë icatsia panapatajë Pátara tomarabelia. ² Nexata Pátara tomarata icatsia pacaxitajarabajë itsabarco. Bajara-pabarco ponaesjitsia Fenicia nacuyabelia. Nexata icatsia bajarapabarcota patanaponaenexa, panarunarecajë bajarapamo ënëabereca. Panaponajë jane baja.

³ Nexata barcota patanajetarubenaesjavata, pataeyetajë patatsavenonena Chipretunaeto. Paxenetanajetarubenajë rovia. Paponajë Siria nacuyabelia. Nexata baja papatajë Siria nacuyabelia Tiro tomarata. Nexata Tiro tomarata juteta barcoënëta pecaponaesjava. ⁴ Nexata Tiro tomarata pacaxitajarabajë Dioso pejumecovënëtsivi. Bajarapamonaesjavata pajinavanapajë siete pamatacabibeje. Bajarapamonaes tajëvelia Espiritu Santo pejamatabëcueneta yapëtaeyaexanatsi Pablo pebejiobiaexanaesjavaneatsi Jerusalén tomarata. Nexata bajarapamonaes jumaitsi Pablojavabelia:

—Pëtsa poname Jerusalén tomarabelia, jai picani bajarapamonaes.

⁵ Itsiata baja icatsia siete pamatacabibejecujinaes panaropobajë. Nexata Tiro tomarapijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa pataponaesjava. Nexata mene itapatalia, tajetabota, daxita bajarapamonaes yajava, panubenajë patamatabacabëta patavajëtsinexa Diosojavabelia. ⁶ Bajaraxuacujinaes panapëjiobajë baja daxita Dioso pejumecovënëtsivi. Icatsia baja panarunarecajë barco ënëaberena. Bajarapamonaes baja naviabalia pijabonëjavabelia.

⁷ Tiro tomarata patananaropobicujinaes, panapatajë Tolemaida tomarabelia. Bajarapatamarata pabajacobajë Dioso pejumecovënëtsivi. Bajarapamonaesjavata panajinavanapajë caematacabi. ⁸ Meravia icatsia pitsijavata panaropobajë. Panapatajë icatsia Cesarea tomarabelia. Cesarea tomarata patapatsicujinaes, panaponajë Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diáconoviyajuvënë. Bajaraponë pijabota panajinavanapajë. ⁹ Felipe xaina cuatro povabeje pexi. Bajarapapetiriavi abaxë apo nacojiobi. Bajarapamonaes tsipaebabiaba jivijavabelia Dioso pitorobilivaisi, palivaisi Espiritu Santo pejamatabëcueneta yapëtaeyaexanatsi. ¹⁰ Itsa baja paxainajë anijamatacabianë Felipe pijabota patanapat-sicujinaes, Judea nacuverena pata Diosojumepaebinë profeta, Agabovënë. ¹¹ Bajaraponë pata paxanëjavaberena Felipe pijabota. Nexata Agabo Pablo pijacor-

reabocoto veepajonotatsi. Bajarapabocotota Agabo nacobecêtabeje. Nataxucêtabeje yajava. Nexata Agabo jumaitisi:

—Espiritu Santo raja nejumaitisi tajêvelia mapacueni-aje: “Jerusalén tomarata pejinavanapaevi, judíovi, mapacuenia cêtsianatsi mapacorreabocoto pexainaenêje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajêvelia Espiritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanê, Cesarea tomarapijivi yajava, panacobenaasivanê picani Pablo peponaeyaniva Jerusalén tomarabelia. ¹³ Nexata Pablo panejumaitisi:

—¿Detsa xuajitsia panuame? ¿Panenajamatabêx-ainaeya exanaejitsiamê tsaja? Xanê raja evetajê tanecêtsinexa. Evetajê tanebeyaxuabijava ata Jerusalén tomarata vajatuxanenê Jesús pelivaisi yabara, panejai Pablo.

¹⁴ Pasiva atanê tsabiabi, Pablo itsiata apo naja-matabêcopatsi peponaejava Jerusalén tomarabelia. Nexata baja belia pacopatajê pataasivatsabiabijava. Pajumaitisinê nexata:

—Pacuenia Dioso tojtsipatsi pexanaenexatsi, beex-anaenatsi baja, pajanê.

¹⁵ Caematacabibejecujinae paxaniavaetajê patacobe-covêjavaxi. Nexata jane baja panaropobajê Jerusalén tomarabelia. ¹⁶ Itsamonaе Dioso pejumecovênêtsivi, Cesarea tomarapijivi, paneyanalia. Bajarapamonaе panebarêpona Mnasónvênênê, Chipretunaeto nacuapijinê, pijaboyabelia. Nexata bajaraponê pijabota panajinavanapajê. Bajaraponê copiaya Dioso pejumecovênêtsiviyajuvênênê.

Pacuenia Pablo Jerusalén tomarata Santiago barêcuaijai yabara pelivaisi

¹⁷ Itsa papatajê Jerusalén tomarabelia, Dioso pejumecovênêtsivi panecopiapita jamatabêcuenebarêyaya. ¹⁸ Nexata meravia pitsijavata Pablo panebarêsvixaina Santiagojavabelia. Nexata Santiago pijabota naena ancianovi. ¹⁹ Nexata Pablo bajarapamonaе bajacoba. Pebajacobicujinae Pablo bajarapamonaеjavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. ²⁰ Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabêcuenebarêya. Nexata daxita bajarapamonaе pejumetaexae bajarapacuenia, pexaniamatabêcuene rajuta Diosojavabelia. Nexata Santiagobana jumaitisi Pablojavabelia:

—Patajabanânê, yapêtaneme baja cajena mapacuenieje. Judíovi bitso ayabitsaêtofaneto, miles pajivibeje Dioso pejumecovênêtsivi. Yapêtanemenua baja mapacuenieje. Daxita bajarapajudíovi jumecovênêtsi ata Jesús pelivaisi, itsiata abaxê tsiteca jumecovênêtavanapa Dioso Moiséspijinêta penajumecopatsilivaisi. ²¹ Pajudíovi apo jumecovênêtsi Jesús pelivaisi, xamê nêtsipaebaponaelivaisi cayabaranajumetsênêtabiaba.

Nexata bajarapajudíovi najumetsênêtsiaya jumai tsabiabi Jesús pelivaisi pejumecovênêtsijudíovijavabelia: “Itsa raja Pablo livaisi tsipaebapona judíovijava, itsanacuanêjava pejinavanapaevi, Pablo itavetabiaba judíovi pecopatsinexa Dioso Moiséspijinêta penajumecopatsilivaisi pejumecovênêtsijavami. Itavetabiabanua bajarapamonaе pecopabinexa peperabêcaucubijava pexi. Pablo itavetabiabanua bajarapamonaе pecatsitecaeyaniva vajasalinaivi pijacuene,” jai tsabiabi bajarapamonaе najumetsênêtsiaya xamê yabara Jesús pelivaisi pejumecovênêtsijudíovijavabelia, jai Santiagobana Pablojavabelia.

²² Icatsia Santiagobana jumaitisi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovênêtsivi, cavênêlivaisitane nepatsijava, nacaetuatsiana penabarêcuaijaijinexa xamê yabara. ²³ Nexata daxitajivi pecaypêtaenexa nejumecovênêtsijava Dioso Moiséspijinêta penajumecopatsilivaisi, exanaename pacuenia pacaitorobijitsiatsi. Majotaje cuatro ponêbeje paxanêyajuvênêvi vereta baja pexanaejava pacuenia baja najumecapanepaeya jumaitisi Diosojavabelia. Nexata bajarapamonaе ponaejitsia temploboyabelia ofrenda perajutsinexa Diosojavabelia. ²⁴ Nexata naponaname bajarapamonaeta temploboyabelia. Nexata templobota nanajamatabêcuenexaniavaetsianame nijamatabêcuene-saênexa Diosojavabelia. Pacuenia bajarapamonaе najamatabêcuenexaniavaetsijitsia pijamatabêcuene-saênexa Diosojavabelia, bajarapacuenia nanajamatabêcuenexaniavaetsianame. Nexata daxita xua bajarapamonaе notsiana templobota ofrenda perajutsinexa Diosojavabelia, ponêjavabelia notsiana, bajaraxua xamê daxita cobecovêmatamotsianame. Bajaraxuacujinae bajarapamonaе daxitamatanami matacasibianatsi. Bajarapacuenia itsa exanaename, daxita judíovi cayapêtaena nejumecovênêtsijava Dioso Moiséspijinêta penajumecopatsilivaisi. Nexata daxita judíovi yapêtaena najumetsênêtsiaya pecabaracuaicuaijai tsabiabijava pajudíovi apo jumecovênêtsi Jesús pelivaisi. ²⁵ Pamonaе apo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamonaе apo judíovi ata, Dioso pejumecovênêtsivi, pataitavetsinexa, caelivaisiyobeje patoyaquinajê cuyalatota. Itsa patoyaquinajê, pajumaitisinê mapacueni-aje: “Pecobeta saya pexanaenêjavabelia pevi perajutsinexa ofrendacuenia itsa tobias baca oveja ata, pêtsa paxaneme bajarapayajuvênêvi. Pêtsa paxaneme peja. Pêtsa paxaneme cuibocuetsacaeya pebeyaxuabinê pevi. Papebijivi baja nacojioba, pêtsa matayajibatsi itsavajavabelia pijavavecu. Papebijivi pijinia abaxê apo nacojiobi, pêtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pêtsa matayajibatsi itsanêjavabelia pamonavecu. Papetiriavi pijinia abaxê apo nacojiobi, pêtsa matayajibatsi pebijavabelia,” pajanê itsa patoyaquinajê apo judíovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponëbeje pepëta pacuenia Santiagobana itorobatsi. Pablo nexata najamatabëcuenexaniavaetapona piajamatabëcuensaënexa Diosojavabelia cuatro ponëbeje yajava. Bajaraxuacujinae Pablo temploboyalia joneya sacerdotevijavabelia, petsipaebinxeta pamatacabi copiarucaejijsia Pablobana penajamatabëcuene xaniavaetsijava Diosojavabelia. Bajarapamatacabi cuatro ponëbeje Diosojavabelia ofrenda perajutsijavanënexa templobota notsijitsia. Nexata picani daxita bajaraxua Pablo cobecovëmatamotsijitsia bajaraxua pecanajetsivijavabelia.

²⁷ Nexata siete pamatacabibejecujinae, pamatacabi jane baja Pablo, cuatro ponëbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavënë nacuaverena pepatsivi. Nexata bajarapajudíovi itoroba daxita Jerusalén tomarapijivi pianaepanaenexa Pablojavabelia. Nexata Jerusalén tomarapijivi, Asiavënë nacuaverena pepatsivi yajava, nacobenavaetabatsi Pablo. ²⁸ Nexata bajarapamonae vavajai pinijijumeta. Najumetsënëtsiaya jumaitsi:

—¡Tajamonae judíovi, naxanitsia! ¡Paneyavenonare! Maponëje daxitanacuanëjjava livaisi tsipaebanajetaruca daxitanacuanëpijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinëta penajumecopatsilivaisi jivi pejumecovënëtsiyaniava. Itavetaponanua mapatemplobo ataje jivi peyaiy-ataeyaniva. Apo judíovi ata Pablo barëjoneyabiaba matemploboyarenaje. Nexata baja Dioso tsitaabejetsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsënëtsiaya judíovi Pablo yabara Asiavënë nacuaverena pepatsivi.

²⁹ Bajarapacuenia vavajaiya jumaitsi tsipaji baja copiyaya bajarapajudíovi Pablo tanetsi pebarëponaponaejaya Jerusalén tomarata apo judíonë, Trófimovënë, Efeso tomarapijinë. Nexata jamatabëcuenenavëxaniabiaya bajarapamonae jamatabëjumaitsi:

—Pablo raeta apo judíonë barëjunua mapatemploboyarenaje, jamatabëjai Trófimo yabara.

Pablo cajena Trófimo apo barëjone temploboyalia.

³⁰ Nexata Asiavënë nacuaverena pepatsivi, Pablo yabara penajumetsënëtsilivaisi, daxita Jerusalén tomarapijivi jumetane. Nexata bitso anaepana. Nexata daxita bajarapamonae cujinaejinarena templobojavaberena. Bajarapamonae vaetabatsi Pablo. Robocatsi vayafuabelia temploboënëvecua. Nexata templobobaupaxanetonë bepíjia vecuabaupaxatabatsi.

³¹ Bajarapamonae picani Pablo jamatabëbeyaxuabatsi. Nexata bajarapaepatota itsamonae tsipaeba vajabitsaë pepo pevetsinë, comandantejavabelia. Tsipaeba pacuenia daxita Jerusalén tomarapijivi bitso anaepanavanapa. ³² Nexata comandante bepíjia barëlia pijajivi vajabitsaëvi, vajabitsaëvi pijacapitánvi yajava. Cujinae-

jina jivi penacaetuatsijavabelia. Nexata judíovi ita tane comandante vajabitsaëvi pebarëpatsijava, nexata judíovi copaba pebejavatsi Pablo. ³³ Nexata comandante Pablo cujirenatsi. Vaetabiaexanatsi pijajivi. Comandante itoroba pijajivi Pablo pecëtsinexatsi anijacadenamaëtotabeje. Bajaraxuacujinae yanijoba judíovijavabelia.

—¿Detsa maponëje? ¿Detsa xua exana maponëje? jai comandante.

³⁴ Nexata bajarapajivi bitsaëtoxonetonëyajuvënëvi comandantejavabelia najuatsipaebanubena pinijijumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaë Pablo pecaponaenexatsi vajabitsaë pijaboyabelia. ³⁵ Pablo capatatsi vajabitsaë pijaboitapata. Vajabitsaë pijabo pepënëvelia xaina beescaleracuenia pexanaejava. Nexata bajarajota Pablo vajabitsaë nacobenayotsiaya cajunayatsi vajabitsaë pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. ³⁶ Jivibitsaëtoxonetonë Pablo barabocuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaëtoxonetonëjavabelia yabara pelivaisi

³⁷ Itsa baja Pablo vajabitsaëvi pijaboyalia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinxeta caejumeyo, jai Pablo. Nexata comandante jumaitsi:

—¿Xamë tsaja natsipaebame griegojume? ³⁸ ¿Xamë tsaja apo Egipto nacuapijinëmë? ¿Xamë tsaja imata jivi apo itorobimë pianaepanaenexa gobiernojavabelia? ¿Xamë tsaja imata penamaxëvanitsivi cuatro mil ponëmaxëto apo barënajetabajiravimë petusato nacuyabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanë raja saicaya judíonënë, Tarso tomarapijinënë. Tarsotomara cajena pinijitomara daxita Cilicia nacuata penaetomaranëvecua. Pexaniacuene netoexanare. Netocopare livaisi tatsipaebinxeta mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinxeta. Pablo nuca vajabitsaë pijabo pepënëvelia beescaleracuenia pexanaejavajumata. Pablo nacobeyota jivi pemoyanexa. Nexata baja jivi ita moya, Pablo navajunupaeba bajarapamonaejavabelia hebreojumeta.

Pablo jumaitsi:

22 —Tajamonae, panenamuxunaevere. Paxamë ata vajanacua paneevetsivi, panenamuxunaevere. Vepacanavajunupaebatsi daxita xua exanajë, jai Pablo hebreojumeta judíovijavabelia.

² Bajarapajudíovi ita jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³—Xanë raja judíonënë. Naexanjë Tarso tomarata, Cilicia nacuata peecaetomarata. Itsiata vitsabajë mapatomarataje, Jerusalén tomarata. Pecujarubinë Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabëjumaitsinë tsabiabi: “Daxita tajamatabëcuene-ta Dioso pejitsipaecuenia tonacuenebianajë,” jamatabëjanë tsabiabi. Bajarapacuenia aeconoxae daxita paxamë ata pajamatabëitsimë tsavanapae, jai Pablo.

⁴ Pablo icatsia jumaiitsi:

—Xanë abaxë picani bajayata barajinabiabajë pamonaë jumecovënëta pexanialivaisi, Jesucristo pelivaisi. Pamonaë jumecovënëta Jesús pelivaisi, taicapona-jë pebijivi. Taicapona-jë petiriavi ata. Jebapona-jë bajarapamonaë penaneconitsivi pejebabiabibota. Jitsipajë picani pebejebinexatsi daxita bajarapamonaë. ⁵ Sacerdotevi pepo penamatacaitorobinë, daxita judíovitsi va-jaancianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tsipaji bajarapamonaëjavabelia vajëtajë tanetsi-cobeyaquinaenexa cuyalata tatocaponaenexa pamonaë judíovi jinavanapa Damasco tomaratalia. Nexata bajarapajudíovi itsa yoroba bajarapabaxuto, tanetocopsinexa picani Jesús pelivaisi pejumecovënëtsivi tataicaenexa. Nexata jane baja picani lianë tataicaenexa daxita pexanialivaisi, Jesús pelivaisi, pejumecovënëtsivi, tacapatsinexa picani maberenaje Jerusalén tomaraberena penaneconitsiaexanaenexatsi, jai tsanucaë Pablo judíovijavabelia.

Pacuenia Pablo navajunupaeba pacuenia taxuxuaba Jesús pelivaisi pejumecovënëtsijava yabara pelivaisi

⁶ Pablo icatsia jumaiitsi hebreojumeta judíovijavabelia:

—Nexata jane baja ponajë Damasco tomarabelia. Itsa baja imoxoyotanajetarucajë Damasco tomara, jemata matonejeepatota pinijicotia nematatorotsia naitayota athëbëvetsica. ⁷ Nexata bajarajota irataeya bocajunuajë irata. Jumetaenucajë athëbëvetsica tanejumaiitsijava: “Saulo, Saulo, ¿detsa xuajitsia xanë taja-jivi netobejiobiaexanaponame?” tanejaijava. ⁸ Nexata xanë jumaiitsinë: “Tajatuxanenë, ¿detsa ponëmë?” janë. Nexata icatsia nejumaiitsi: “Xanë raja Jesúsne, Nazaret tomarapijinë. Xanë raja tajajivi netobejiobiaexanaponame,” nejai. ⁹ Papebijivi yajavanajetarucajë, tane baja cajena athëbëvetsica penaitayotsicotia. Itsiata baitsi jane apo jumetae xua yabara nebarëcuaicuajai athëbëvetsica. ¹⁰ Nexata xanë jumaiitsinë: “Tajatuxanenë, ¿detsa xua nexata exanaenajë?” janë. Nexata pepo petuxanenë nejumaiitsi: “Nonotapunare baja. Ponaenane baja Damasco tomarabelia. Bajarajotalia catsipaebiana pacuenia exanaejitsiamë,” nejai. ¹¹ Nexata bajarapacotia tataecujinae bitso nitaxutomeraviba. Apo necaëjëpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaiitsi judíovijavabelia:

—Bajarajota Damasco tomarata ponapona Ananíasvënë, bitso pejumecovënëtsinë Dioso Moiséspijinëta penajumecopatsilivaisi. Bajaraponaë Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovënëtsinë Ananías,” jai tsabiabi. ¹³ Nexata bajaraponaë Ananías xanëjavaberena patajopa tanetaenexa. Nexata nejumai tsanucaë: “Tajabananë Saulo, icatsia rabaja itaxutoxanepaname,” nejai. Bajarapacuenia tanejumaiitsijavata icatsia baja itaxutoxanepanajë. Nexata baja taniji Ananías. ¹⁴ Nexata icatsia Ananías nejumaiitsi: “Vamojivimi rabaja pijaDioso caitapeta. Caitapeta baja neyapëtaenexa pacuenia catojitsipa netoexanaenexa. Caitapetanua netaenexa Dioso pitabarata Jesús pepo planeconijibinë. Caitapetanua nejumetaenexa Jesús pecatsipaebilivaisi. ¹⁵ Nexata ponaenane daxitanacuanëpijivijavabelia netsipaebanajetarucanexa pacuenia taneme, pacuenia ata jumetaneme Jesús pelivaisi. ¹⁶ ¿Detsa nexata xuajitsia abaxë najamatabëjematsia ponaponame? Nonotapunare. Cabautisabiana. Jesúsjavabelia nenajamatabëcueneconopsixae, daxita pibisiacuene nexanaeneconimi cavecuajibiaexanaena,” nejai Ananías, jai Pablo judíovijavabelia.

Pacuenia Pablo itorobatsi Dioso pitorobilivaisi petsipaebaponaenexa apo judíovijava yabara pelivaisi

¹⁷ Pablo icatsia jumaiitsi hebreojumeta judíovijavabelia:

—Bajaraxuacujinae Damasco tomaraverena naviarenajë baja Jerusalén tomaraberena. Nexata itsa patajë Jerusalén tomarata, ponajë templobojavabelia tava-jëtsinexa Diosojavabelia templobota. Nexata tavajëtsijavata Diosojavabelia, taniji bemajitsinaebota pepo petuxanenë Jesús. ¹⁸ Nexata Jesús nejumaiitsi: “Naxanitsiayo bepimia vecuaponare Jerusaléntomara. Tsipaji raja mapatomarapijivije apo cajumecovënëtsi tsane netsipaebijava xanë talivaisi,” nejai Jesús bemajitsinaebota. ¹⁹ Nexata xanë jumaiitsinë: “Tajatuxanenë, bajarapamonaë judíovi xaniavaetsia baja cajena neyapëtane. Bajarapamonaë neyapëtane judíovi penacaetuatabi-abibonëjava tataicaponaëjava daxita pamonaë cajumecovënëta taconibabeyabiabinexa naebota. ²⁰ Bajarapamonaë neyapëtane xanë ata bajarapamonaë jamatabëcuenejëpaeya tataenucaëjava pamatacabi Estebanpijinë, pecalivaisipaebinëmi, beyaxuabatsi. Bajarapamatacabi, pamonaë Estebanpijinë beyaxuabatsi, penajumajonejebijavanë tovetanucajë,” janë pepo petuxanenë Jesúsjavabelia. ²¹ Nexata pepo petuxanenë nejumaiitsi: “Ponare baja Jerusalén tomaravecua. Caitorobijitsiatsi raja itsanacuanëpijivijavabelia, apo judíovijavabelia,” nejai pepo petuxanenë, jai Pablo judíovijavabelia.

Pacuenia Pablo exanatsi vajabitsaë pepo pevetsinë comandante yabara pelivaisi

²² Judíovi namuxunaevetsi Pablo penavajunupaebijava. Nexata itsa jumetane judíovi pacuenia Pablo

navajunupaeba, nexata icatsia judíovi vavajai tsaponae pinijijumeta. Jumai tsaponae:

—¡Maponėje pabeyaxuare! ¡Mara pitsinē apo beco-patsitsi peponaponaenexa matavējēaje! jai tsaponae judíovi Pablo yabara.

²³ Bajarapamonae pinijijumeta vavajai tsaponae. Pijacamisajumavelia penaxatabijavanē, vebabia bitso pianaepanaexae. Atsabenonē cayabajarabarena Pablojavaberena pebaraanaepanaexaetsi. ²⁴ Nexata vajabitsaē pepo pevetsinē, comandante, pijajivi itoroba Pablo pecajonenexatsi vajabitsaē pijaboyalia. Comandante itoroba pijajivi Pablo picani pejumatitibabenexatsi penaconitsivi pejumaconitabiabimacata. Bajarapacuenia picani Pablo exanaejitsiatsi Pablo petsipaebinexa vajabitsaējavabelia xua yabara judíovi neconitsiaya pinijicuenia vavajai tsaponae Pablo yabara. ²⁵ Nexata jane baja Pablo itsa cētetatsi vajabitsaē picani pejumatitibabenexatsi, nexata Pablo jumaiti bajarajota penucaenē vajabitsaē pijacapitánjavabelia:

—Xanē raja Romano nacuapijinēnē. Nexata itsa panejumaconibabejitsipame abaxē copiaya neneconitsinejeva juezmonae pitabarata, nexata pan-evemaxēnaneconitsipame. Tsipaji nijatuxanenē, Romanonacua pepo pevetsinē, pacaitaveta bajarapacuenia paneexanaeyaniva, jai Pablo vajabitsaē pijacapitánjavabelia.

²⁶ Capitán itsa jumetane bajarapacuenia Pablo pejumaitisijava, nexata capitán lia vajabitsaē pepo pevetsinē comandantejavabelia. Capitán jumaiti comandantejavabelia:

—Xania baja tsane pacuene exanaejitsiamē Pablojavabelia. ¡Maponėje Pablo Romano nacuapijinē baja cajena! jai capitán comandantejavabelia.

²⁷ Nexata comandante rena Pablojavaberena. Jumaiti Pablojavabelia:

—¿Xaniajai tsabaja? ¿Xamē Romano nacuapijinēmē? jai comandante.

—Jājā, jai Pablo.

²⁸ Nexata comandante jumaiti Pablojavabelia:

—Xanē ata baja maparucaeje Romano nacuapijinēnē naexanajē. Tsipaji baja matamotajē ayaimatamota bepepo Romano nacuapijinēnē tanaexanaenexa, jai comandante.

Bajarapacuenia jumaiti tsipaji comandante saicayanacuata penaexanaenē.

Pablo nexata jumaiti comandantejavabelia:

—Xanē apo matamotsinē. Tsipaji baja cajena pepo Romano nacuapijinēnē. Naexanajē cajena Romano nacuata, jai Pablo comandantejavabelia.

²⁹ Nexata picani pavajabitsaē Pablo jumaconibabejitsiatsi, vecuaponatsi baja. Vajabitsaēvi pepo pevetsinē ata, comandante, Pablo cjunavatsi itsa yapētanetsi Pablo Romano nacuapijinēcuene. Cjunavatsi pecētsiaexanaexaetsi cadenamaētonēta.

Pacuenia Pablo navajunupaeba daxita judíovi pevetsivi pitabarata yabara pelivaisi

³⁰ Pablo penavajunupaebicujinae Romano nacuapijinēcuene, meravia pitsijavata, vajabitsaē pepo pevetsinē, comandante, jamatabēyapētane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaēto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23 Pablo naēcota daxita penacaetuatsivi. Nexata Pablo jumaiti bajarapamonaejavabelia:

—Tajamonae, xaniavaetsia cajena ponaponabiabajā najamatabēcuenebijianaenejevanē Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinē, jumaiti Pablo pimoxoyotanubenaevitsi javabelia:

—Pacuibotsaquibiaxuabare Pablo, jai Ananías, sacerdotevi pepo penamatacaitorobinē.

³ Nexata Pablo jumaiti Ananíasjavabelia:

—¡Dioso rajane juya pepacuene xamē catsaquibiaxubiana! Xamē majotaje ecame taneneconitsinexamē. Tsipaji xamē xanē yabara jamatabēcuenenavēxaniabiaya jamatabējumaitsimē: “Maponėje Pablo naneconita Diosojavabelia,” jamatabējamē. Nexata xamē nijacuata naneconitame nijagobiernojavabelia. Tsipaji itorobame mapamonaeje tanetsaquibiaxubinexa taaneconijibinē, jai Pablo Ananíasjavabelia.

⁴ Bajarajota penubenaevi jumaiti Pablojavabelia:

—Xamē raja jumeitavetame Dioso pijajivitonē, sacerdotevi pepo penamatacaitorobinē, jai bajarapamonae Pablojavabelia Ananías yabara.

⁵ Nexata Pablo jumaiti:

—Tajamonae, xanē apo yapētaenē Ananías sacerdotevi pepo penamatacaitorobinēcuene. Itsa yapētaejitsipajē, apo jumaitsinē tsipae bajarapacuenia. Tsipaji Dioso pejumelivaisibaxutota jumaiti mapacueniaje: “Pētsa jumeitavetame pecaevecsiniē,” jai Dioso pejumelivaisibaxutota, jai Pablo Ananías yabara.

⁶ Nexata Pablo jamatabēcuenyapētane penacaetuatsivi. Tsipaji penacaetuatsivi caelivaisi apo xinae. Jamatabēcuenyapētaneme itsamonae pecatsitecaejava saduceovi pecujarubicuene. Jamatabēcuenyapētane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaiti:

—Tajamonae, xanē raja fariseonēnē. Fariseovi pecujarubicuene jumecovēnētajē. Taxapijinē baja cajena fariseonē. Tamojivimi ata cajena fariseovi. Majotaje neneconitsijitsia. Tsipaji jivi petēpaecujinae Dioso icatsia piasaēyaexanaejavanexa, jumecovēnētajē, jai Pablo.

⁷ Bajarapamonae itsa jumetane bajarapacuenia Pablo pejumaitisijava, nexata najumeanaenota

fariseovibeje saduceovibeje. Bajarapamonae nexata apo najamatabëcuenejêpae baja. Nexata anaeya bajarajota navecuanatsana baja. ⁸ Saduceovi jumeababiaba fariseovi pejumecovênëtsilivaisi. Nexata saduceovi jumai tsabiabi:

—Jivi petêpaecujinae, acuenebi icatsia Dioso pi-asaëyaexanaejava. Ajibi raja cajena ángelevi. Ajibi raja cajena petêpaevi ata pejumape, jai tsabiabi saduceovi.

Fariseovi jumecovênëta jivi petêpaecujinae Dioso icatsia piasaëyaexanaejevanexa. Jumecovênëtanua ángelevi ata pejinavanapaejava. Jumecovênëtanua petêpaevi ata pejumape pejinavanapaejava. ⁹ Apo penajamatabëcuenejêpaexae, daxita bajarapamonae bajarajota pinijijumeta vavajai tsaponae. Nexata pamonaecuarubivi, fariseoviyajuvênëvi, nonobapuna. Anaeya jumaitsi saduceovijavabelia:

—Itsacuene ata cajena pibisiacuene apo exanae maponê Pabloje. Xaniajai meta cajena. Petêpaevivi pejumape tsipaebatsi. Itsa jume, ángel meta tsipaebatsi. Paxanê nexata itsacuene ata apo paexanaenê tsane Pablojavabelia Diosojavabelia patananecotsiyani, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona. Nexata vajabitsaë pepo pevetsinë, comandante, belia jamatabêjumaitsi: “Pablo meta baja bajarapamonae beyaxuabianatsi,” jamatabêjai. Nexata comandante junata pijajivi peponaenexa. Pablo baja jutatsi bajarapamonaevetua. Comandante itoroba pijajivi Pablo pecaponaenexatsi vajabitsaë pijaboyabelia.

¹¹ Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsipaebame xanê talivaisi majotaje Jerusalén tomarata, bajara icatsia pacuenia tsipaebianame xanê talivaisi Roma tomarata ata, jai Jesús Pablojavabelia.

Pacuenia picani Pablo judíovi jamatabêbeyaxuabatsi yabara pelivaisi

¹² Pablo petsitanaitajëtsicujinaetsi Jesús, meravia pitsijavata, judíovi nacaetuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi, najai bajarapamonae.

¹³ Pamonaecuarubivi Pablo jamatabêbeyaxuabatsi, cuarenta ponêbeje pematatsënëa. ¹⁴ Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsipaji bajarapamonae caejavata nacaetuatenä. Nexata pamonaecuarubivi, ponêbeje, pamonaecuarubivi Pablo jamatabêbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanê rajane baja najumecapanepaeya panajumaitsinê: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanê. ¹⁵ Nexata paxamê sacerdotevi penamatacaitorobivi, paxamê ata judíovi pijaancianovimê, panacaetuatsianame judíovi pecujarubivi yajava panenabarêcuaicuaijainexa. Nexata daxita paxamê patonajumeitorobianame cuyalatota vajabitsaë pepo pevetsinë, comandantejavabelia. Pavajëtsianame comandantejavabelia papecatocarenanexa Pablo. Pajumaitsimê tsane yamaxêitorobiaya comandantejavabelia: “Pajitsipajê icatsia matavêjêa patayanijobijava Pablo, pijaneconi patayapêtaenexa xaniavaetsia, paneconi xaina,” pajamê tsane. Nexata paxanê epotalia pavajënaeevetsianajê Pablo. Itsa rena, patabeyaxuabinexa patsinejeva maberanaje, jai pamonaecuarubivi ponêbeje, pamonaecuarubivi Pablo jamatabêbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶ Itsiata baitsi jane Pablo pematapijiva pexênato jumetane Pablo pevajënaeevetsiapaebijavatsi pebeyaxuabinexatsi picani. Nexata bajaraponê pona vajabitsaë pijaboyabelia. Itsa baja bajaraponê joneya vajabitsaë pijaboyalia, bajarapalivaisi tsipaeba Pablojavabelia. ¹⁷ Nexata bajaraxuacujinae Pablo junata caenê vajabitsaë pijacapitán. Pablo jumaitsi:

—Barêponare mapapevêjêatoje papecanamatacaitorobinê, comandantejavabelia. Itsalivaisiyo xaina petsipaebinexa, jai Pablo.

¹⁸ Nexata Pablo piopaxa capitán barêponatsi vajabitsaë pepo pevetsinë, comandantejavabelia. Nexata capitán jumaitsi comandantejavabelia:

—Naneconitsia raja peponaenexa Pablo nejunata. Nexata nitoroba tabarêponaenexa mapapevêjêatoje xamêjavaberena. Tsipaji pina catsipaebijitsia itsalivaisiyo, jai capitán comandantejavabelia.

¹⁹ Nexata comandante cobepitatsi pevêjêato. Barêlitsi pesaicaeyojavabelia. Comandante nexata jumaitsi pevêjêatojavabelia:

—¿Detsa pitsilivaisi xainame tanetsipaebinexamê? jai.

²⁰ Nexata pevêjêato jumaitsi:

—Sacerdotevi penamatacaitorobivibeje, judíovi pijaancianovibeje, najamatabëcueneyanaba pecavajëtsinexa meravia netocalianexa Pablo bajarapamonaejavabelia. Bajarapamonae cayamaxêitorobiaya cajumaitsiapaebi: “Pajitsipajê icatsia matavêjêa patayanijobijava Pablo, pijaneconi patayapêtaenexa xaniavaetsia, paneconi xaina,” cajaiyapaebi bajarapamonae.

²¹ Itsiata pëtsa jumecovênëtame bajarapamonae. Tsipaji cuarenta ponêbeje pematatsënëa namatayabiaya epatota Pablo vajënaeevetsiapaebatsi pebeyaxuabinexatsi. Bajarapamonae daxita najumecapanepaeya najumaitsi baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera

ata apaenatsi," najai baja capanepaeya bajarapamonae. Aeconoxae saya bajarapamonae eveta Pablo necaliajava, jai pevëjëato comandantejavabelia.

²² Nexata comandante jumaitsi pevëjëatojavabelia:

—Pëtsa tsipaebame itsajivi ata tanetsipaebilivaisimë, jai comandante.

Bajaraxuacujinae pevëjëato baja itorobatsi caevëalia.

Pacuenia Pablo itorobatsi nacuaevevtsinë Félixjavabelia yabara pelivaisi

²³ Vajabitsaë pepo pevetsinë, comandante, junata anijanëbeje, vajabitsaë pijacapitánbeje. Jumaitsi:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuereboxanetonë, lanza-vënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las nuevejava. ²⁴ Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevevtsinë Félixjavabelia, jai comandante capitánbejejavabelia.

²⁵ Bajaraxuacujinae comandante tsicobeyaquina cuyalatobaxuto pitorobinexa nacuaevevtsinë Félixjavabelia. Comandante peyaquinaecuyalatobaxutota jumaitsi mapacueniaje:

²⁶ "Félix, pecayaiyataenë, nacua nevetsinë. Xanë raja Claudio Lisiasvënënenë catoyaquinatsi. Cabajacobatsi. ²⁷ Judíovi raja vaetabatsi ponë catoitorobaliatsi, Pablovënënenë. Beyaxuabijitsiatsi picani. Nexata itsa vënëlivaisitaniji Pablo Romano nacupijinëcuene, sivalianë. Tajajivi vajabitsaë taneyavenonaecueneta yacajërëtajë judíovi pecobevecua, ajena baja picani beyaxuabijitsiatsi. Nexata caponaeyaexanajë tajajivi vajabitsaë pijaboyabelia. ²⁸ Bajaraxuacujinae sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanajë. Bajarapacuenia nutsiaexanajë bajarapamonae pitabarata tayapëtaenexa jane baja picani paneconi yabara Pablo judíovi neconitsijitsiatsi. ²⁹ Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconitsijitsiatsi judíovi pijasalinaivi pijacuene yabara. ³⁰ Nexata itsajivi netsipaeba judíovi namutoepatota Pablo pevajënaeevetsiapabijavatsi pebeyaxuabinexatsi. Bajaraxuata nexata najamatabëxainajë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya daxitajumeyoje," jai mapacueniaje comandante petoyaquinaebaxutota nacuaevevtsinë Félixjavabelia.

³¹ Nexata vajabitsaë exana baja pacuenia itorobatsi comandante. Bajarapameravi vajabitsaë baja Pablo caponaliatsi Antípatris tomarabelia. ³² Nexata meravía pitsijavata bajarapavajabitsaëyajuvënëvi, petaxuta pe-

ponaevi, Antípatris tomarata naviabarena baja pijaboyaberena. Pamonaecaballojumata peponaevi, pevajënaeyabelia abaxë caponaliatsi Pablo. ³³ Caponaliatsi Cesarea tomarabelia. Nexata Cesarea tomaratalia vajabitsaë rajuta petocaponaecuyalatobaxuto nacuaevevtsinë Félixjavabelia. Yajavarajutanua Pablo bajaraponë pecobeyabelia. ³⁴ Nexata nacuaevevtsinë Félix leba baja petocapatsicuyalatobaxutotsi. Bajaraxuacujinae nacuaevevtsinë Félix jumaitsi Pablojavabelia: —¿Detsa panacuapijinëmë? jai.

Nexata Pablo jumaitsi:

—Xanë raja Cilicia nacupijinënë, jai.

Nexata yapëtanetsi Pablo Cilicia nacupijinëcuene.

³⁵ Nexata icatsia nacuaevevtsinë Félix jumaitsi Pablojavabelia:

—Cajumetaenatsi abaxë itsa parena judíovi pecaneconitsivinexa, jai nacuaevevtsinë Félix.

Bajaraxuacujinae nacuaevevtsinë Félix itoroba pijajivi xaniavaetsia pevetsinexatsi Pablo. Nexata Pablo evetsiatsi Herodespijinë pexanaeyaexanaebota.

Pacuenia Pablo navajunupaeba nacuaevevtsinë Félix pitabarata yabara pelivaisi

24 Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinë, parena Cesarea tomaraberena. Parena judíovi pijaancianovi yajava, Tértulovënënenë yajava. Tértulo abogadonë, jivi peneconitsicuepeyapëtaenë. Bajaraxuata judíovi junata bajaraponë petocuaicuaijainexatsi nacuaevevtsinë Félixjavabelia. Nexata judíovi, Tértulo yajava, nubena nacuaevevtsinë Félix pitabarata peneconitsinexatsi jane baja Pablo. ² Itsa caparenatsi Pablo, nexata Tértulo taxuxuaba peneconitsijavatsi Pablo. Tértulo jumaitsi nacuaevevtsinë Félixjavabelia mapacueniaje:

—Pecayaiyataenë nacua nevetsinë. Xaniavaetsia nevetsixae mapanacuaje, bajayajebi xaniavaetsia paji-navanapajë. Xamë nejamatabëcueneta daxita mapanacuapijicuepe, xua abeje picani, xanebiaexanaponame pevajënaeyabelia. ³ Nexata pabarëyanë patanetoexanaejavamë yabara daxita mapanacuajavaje. Bajaraxuata pexaniajamatabëcuene pacarajutatsi.

⁴ Caepatoyo saya pacajamatabëitonotatsi. Pexaniacuene panetoexanare. Panenamuxunaevere caejumeyobeje. ⁵ Payapëtaniji baja cajena maponëje Pablo bitso piacujirubejenëcuene. Daxitanacuanëjava, itsaxuayo judíovi jinavanapa, itorobapona pi-anaepanaenexa judíovi penavecyanatsanaenexa. Mara ponëje Nazaret tomarapijinëmi petsipaebilivaisi pejumecovënëtsivi, penamatacaitorobinëje. ⁶ Mara ponëje Dioso pijatemplobo Jerusalén tomaratalia jamatabëbijiana picani. Tsipaji apo judíovi barëjoneya temploboënëalia. Bajaraxuata pavaetabajë. Nexata pacuenia paneitoroba pajudíovinë patajalivaisi, jamatabëpabeyaxuabajë picani penaneconitsixae. ⁷ Itsiata baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijsaëta paney-

acajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaevetsinë Félixjavabelia bajaraponë pitabarata peneconitsinexa,” panejai. ⁸ Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinë Félixjavabelia.

⁹ Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaiti nacuaevetsinë Félixjavabelia:

—Xaniajai rabaja Tértulo. Daxita pacuenia Tértulo cajumaiti, bajarapacuenia exana Pablo, jai judíovi nacuaevetsinëjavabelia.

¹⁰ Nacuaevetsinë Félix nacobeyota juya Pablo pitorobinexatsi Pablo jane baja penavajunupaebine nacuaevetsinë Félix pitabarata. Nexata Pablo jumaiti nacuaevetsinë Félixjavabelia:

—Yapëtaniji baja cajena xamë bajayajebi mapanacuapijivi nenaneconitsiaexanabiabijava. Bajaraxuata barëyanë tacatsipaebine xua exanjë. ¹¹ Nexata taxaniajaijumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcuenecopatsiaya tanavajëtsinexa Diosojavabelia templobota.

¹² Bajarapatemplobota judíovi apo netae tabarëcuaicuajijava itsajivi ata. Apo netaenua judíovi penacaetuatabibonëjava jivi taitorobijava pianaepanaenexa. Apo netaenua tomanëjava ata taitorobijava jivi pianaepanaenexa. ¹³ Nexata acuenebi itsajivi ata pejumaitijava xanë yabara: “Xanë raja pepacuenetani xua Pablo exana,” pejajava. Tsipaji itsajivi ata apo netae pibisiacuene taexanaejava. ¹⁴ Nexata pacuene yabara catsipaebijitsiatsi, xaniajanë cajena. Patajasalinaivi pijaDioso jumecovënëtsiapononajë. Tonacuenebapononajë. Pejanajamatabëcueneta Dioso jumecovënëtsiapononajë. Baitsi pexanialivaisi, Jesucristo pelivaisi, jumecovënëtsiapononajë. Bajara palivaisi yabara judíovi jumaiti tsabiabi: “Apo pexaniajailivaisi cajena bajarapalivaisi. Dioso baja cajena apo nacaetocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuenia jumecovënëtsi atanë, Dioso Moiséspijinëta penajumecopatsilivaisi yajava jumecovënëtaapononajë. Bajayata Diosojumepaebivi profetavi peyaquinaelivaisianë ata jumecovënëtajë. ¹⁵ Mapajudíovi nubenaje, jumecovënëta mapacuenia pejumaitilivaisije: “Dioso icatsia asaëyaexanaena petëpaevimimi,” pejailivaisi. Xanë ata bajarapalivaisi jumecovënëtajë. Baitsi daxita pamonaetëpa, pexaniajamatabëcuenevimi, pibisijamatabëcuenevimi ata, itsamatacabi icatsia Dioso asaëyaexanaena. ¹⁶ Bajaraxuata bitso jitsipajë xaniavaetsia taponaponaejava tanajamatabëcuenebijianaeyaniva Dioso pitabarata, tanajamatabëcuenebijianaeyaniva daxitajivi ata pitabarata, jai Pablo nacuaevetsinë Félixjavabelia.

¹⁷ Icatsia Pablo jumaiti nacuaevetsinë Félixjavabelia:

—Caevaimaxëto baja cajena ajibinë tsarucae Jerusalén tomaravecua Dioso pitorobilivaisi jivi tatsipaebine daxitanacuanëjava. Bajaraxuacujinae icatsia naviatajë Jerusalén tomarabelia. Tocaliajë ofrenda tarajutsinexa bepejibivi. Patajë picani templobota ofrenda tarajutsinexa Diosojavabelia. ¹⁸ Itsa baja veretajë templobota tanajamatabëcuenexaniavaetsijava Diosojavabelia tajamatabëcuenesaenexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitaraba templobota. Nexata nevaetaba taneconitsiaexanaenexa. Itsa necaxitaraba templobota, apo yajavanucaenë ayabitsaëto. Daxita templobopijivi yãjiai. Templobopijivi ajumebibia jinavanapa. ¹⁹ Bajara baitsi jane pamonaet judíovi, Asiavënë nacuapijivi, tanetaevi templobota, bepatsirena maberenaetaneconitsinexa jane baja itsa necuene pibisiacuene taexanaejava. ²⁰ Itsa jume, nexata mapamonaetje, nitabarata penubenaevi, vecae taitabëta catsipaebi, itsa netane pibisiacuene taexanaejava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ²¹ Saya meta caelivaisiyo bajarapamonaet catsipaebiana xanë talivaisi. Tsipaji pamatacabi nucajë judíovi pijaancianovi pitabarata, ayajumeta jumaitinë: “Mapamatacabitaje neneconitsiana. Tsipaji jivi petëpacujinae Dioso icatsia piasaëyaexanaejavanexa, jumecovënëtajë,” janë. Nexata meta bajarapacuenia tajumaitijava yabara bajarapamonaet jamatabëneconita xamëjavabelia, jai Pablo nacuaevetsinë Félixjavabelia.

²² Nacuaevetsinë Félix xaniavaetsia yapëtanetaxitanacuanëjava jivi pejumecovënëtaaponaejava Jesucristo pelivaisi. Nexata nacuaevetsinë Félix pejumetaecujinae Pablo petsipaebilivaisi, nacuaevetsinë Félix naviabiaexana baja pamonaet picani Pablo neconitsijitsiatsi. Nexata nacuaevetsinë Félix jumaiti Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaë pepo pevetsinë, comandante Lisias, yapëtanajë pacuenia exanaejitsianë Pablojavabelia, jai.

²³ Nexata nacuaevetsinë Félix jumaiti vajabitsaë pijacapitánjavabelia:

—Pablo barëevetsianame xaniavaetsia penajetabajaravivaniva. Itsiata tocopatsianame peponaponaenexa bajarajota pacëtsinejevamë. Tocopatsianamenua peyapëtaevitsi pesivaxainanexatsi perajutsinexatsinua penamatavenonaejavaxi, jai nacuaevetsinë Félix vajabitsaë pijacapitánjavabelia.

²⁴ Bajaraxuacujinae, caematacabibejecujinae, nacuaevetsinë Félix icatsia pata pijava yajava, Drusilavënëva. Drusila judíova. Nexata nacuaevetsinë Félix itoroba pijajivitonë petojunatsinexatsi Pablo. Nexata Pablo itsa pata, Pablo livaisi tsipaeba nacuaevetsinë Félixjavabelia. Pablo tsipaeba jivi penajamatabëcuenecopabaponaejava Jesucristojavabelia.

²⁵ Pablo tsipaebanua Dioso pitorobijava jivi pejinavana-paenexa pibisiacuene exanaenejeva Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamatacabi Dioso penaneconitsiaexanaejavanexa pibisiacuene pexanaevi. Nexata nacuaevevtsinē Félix itsa jumetane bajarapacuenia Pablo petsipaebilivaisi, najunaviaca. Nexata bajarajota nacuaevevtsinē Félix jumaitsi Pablojavabelia:

—Pitsapare baja abaxē. Icatsia cajunatsianatsi itsajota cuenesajinajē, jai nacuaevevtsinē Félix.

²⁶ Nacuaevevtsinē Félix jamatabējumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabējai.

Bajaraxuata Félix anijatonē pijajivi itorobabiaba Pablo petojunatsinexatsi pebarēcuaiquaijainexatsi.

²⁷ Anijavaibeje bajarapacuenia Félix pijajivi itorobabiaba Pablo petojunatabinexatsi. Belia baja Félix vecuapitsapa nacua pevetsicuene. Nexata juya itsanē, Porcio Festovēnēnē, tocopatatsi bajarapanacua pevetsinexa. Félix baja pitsapae ata, itsiata Félix pejamatabēcueneta Pablo apo tocopatsitsi pepit-sapaenexa penaneconitsijavavecua. Bajarapacuenia Félix exana judíovi pesivajamatabēcuenē barēyanexatsi.

Pacuenia Pablo navajunupaeba pejananacuaevevtsinē Festo pitabarata yabara pelivaisi

25 Festo patajopa Cesarea tomarata pexanaenexatsi nacuaevevtsinēnexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia.

² Nexata Jerusalén tomaratalia sacerdotevi penamatacaitorobivi Pablo neconitatsi pepēya nacuaevevtsinē Festojavabelia. Neconitatsinua judíovi ata, pamonaevetuxanevi. ³ Bajarapamonae pinijicuenia vajēta nacuaevevtsinē Festojavabelia petocapatsinexatsirena Pablo Jerusalén tomaraberena. Bajarapacuenia vajēta tsipaji baja cajena bajarapamonae najamatabēcuenēvereta picani Pablo pebexuabiaexanaenexatsi namutoepatota. ⁴ Nexata nacuaevevtsinē Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanē raja caematacabibejecujinae ponaejitsianē Cesarea tomarabelia. ⁵ Pablo pibisiacuene itsa exana, nexata papecanamatacaitorobivi tapēta naponena Cesarea tomarabelia peneconitsinexa Pablo, jai nacuaevevtsinē Festo bajarapamonaejavabelia.

⁶ Bajarapacuenia nacuaevevtsinē Festo pejumaitsicujinae, nacuaevevtsinē Festo abaxē ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevevtsinē Festo eca itsajota nacuaevevtsinē ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judíovi, Jerusalén tomaraverena pepatsivi,

matatoyorotsia imoxoyotatsi Pablo. Najumetsēnētsi-aya neconitatsi beayaineconi pexainaenēcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsianivatsi:

—Itsacuene ata pibisiacuene apo exanaenē. Nexata xanē judíovi pitorobilivaisijavabelia, templojavabelia ata, Romanonacua pepo pevetsinējavabelia ata, apo naneconitsinē, jai Pablo nacuaevevtsinē Festojavabelia.

⁹ Nexata nacuaevevtsinē Festo yanijoba Pablojavabelia judíovi pejamatabēcuenēbarēyanexa nacuaevevtsinē Festojavabelia. Nacuaevevtsinē Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomabelia bajarajotalia pecaneconitsinexa taitabarata mapacuene yabaraje? jai nacuaevevtsinē Festo Pablojavabelia.

¹⁰ Pablo nexata jumaitsi:

—Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneneconitsinexamē. Itsacuene ata pibisiacuene apo exanaenē judíovijavabelia. Bajarapacuenē xamē xaniavaetsia yapētaneme baja cajena. ¹¹ Itsa pepacuene naneconitsipajē, nexata itsa nebeyaxuabijitsia taneconiconi yabara, nexata apo najamatabēxainanē tsipae tavecuapanepaenexa tatēpaejava. Itsiata baitsi jane pacuenia mapamonae neneconitsiajumaitsi, apo xaniajai cajena. Nexata acuenēbi itsajivi ata tanecanajetsijava mapamonae pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneneconitsinexa, jai Pablo nacuaevevtsinē Festojavabelia.

¹² Nexata nacuaevevtsinē Festo barēcuaiquaijai pijajivi, pejamatabēcueneyavenonaevitsi. Bajaraxuacujinae nacuaevevtsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene itsa exaname. Nexata bajaraponējavabelia ponaeneme, jai nacuaevevtsinē Festo Pablojavabelia.

Pacuenia Pablo navajunupaeba nacuaevevtsinē Agripajavabelia yabara pelivaisi

¹³ Pablo pevajētsicujinae nacuaevevtsinē Festojavabelia pitorobinexatsi Romanonacua pepo pevetsinējavabelia, caematacabibejecujinae, nacuaevevtsinē Agripa, pijava Berenicevēnēva yajava, parenā Cesarea tomaraberena. Parenabeje pebajacobinexabeje nacuaevevtsinē Festo pejanapatsinēxae nacua pevetsinēnexa. ¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevevtsinē Festo tsipaeba nacuaevevtsinē Agripajavabelia Pablo yabara. Nacuaevevtsinē Festo jumaitsi:

—Majotaje xainajë pebi naneconitsia peponapon-aenë. Félix abaxë mapanacua itsa evetaje, bajaraponë naneconitsiaexanatsi. ¹⁵ Nexata itsa ponajë Jerusalén tomarabelia, sacerdotevi penamatacaitorobivi, judíovi pijaancianovinua, neconitatsi Pablo xanëjavaberena. Bajarapamonae nevajëta tananeconitsiaexanaenexa Pablo pebeyaxuabinexatsi. ¹⁶ Nexata xanë jumaitsinë bajarapamonaejavabelia: “Romanonacua raja pepo pevetsinë pejamatabëcueneta apo pacopatsinë itsajivi ata pebeyaxuabinexatsi abaxë xaniavaetsia payapë-taenejevanë paneconi xaina. Itsajivi pibisiacuene itsa exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicuaicuai-jainexa paneconi yabara neconitatsi,” janë bajarapamonaejavabelia, jai nacuaevetsinë Festo nacuaevetsinë Agripajavabelia.

¹⁷ Icatsia nacuaevetsinë Festo jumaitsi nacuaevetsinë Agripajavabelia:

—Nexata bajarapajudíovi maberena pepatsicujinae-je, meravia pitsijavata, copiaya joneyajë taecaenexa itsajota ecabiabajë jivi itsa naneconitsiaexanaejitsianë. Nexata itorobajë tajajivi tanetocapatsinexa Pablo xanëjavaberena. Tsipaji jamatabëjumaitsinë: “Pablo meta pibisiacuene pexanaexae, neconitatsi,” jamatabëjanë. ¹⁸ Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabëxainajë.

¹⁹ Saya judíovi jumeanaenotatsi Pablo Dioso pejumecovënëtsijava yabara. Jumeanaenotatsinua Pablo petsipaebijava Jesús petëpaejava yabara ata. Jesús yabara Pablo jumaitsi: “Jesús raja apo tēpae. Petëpaeucujinae baja icatsia Dioso asaëyaexanatsi,” jai Pablo bajarapajudíovijavabelia. ²⁰ Nexata xaniavaetsia apo yapëtaenë pacuenia exanaejitsianë bajarapacuene yabara. Nexata jumaitsinë Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonaecaneconita,” janë picani.

²¹ Itsiata baitsi jane Pablo nevajëta taitorobinexa picani vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, pibisiacuene itsa exana Pablo. Itsiata abaxë xanë mapatomarataje Pablo naneconitsiaya ponaponaeyaexanajë. Nexata pamatacabi necuenecaëjēpaena, itorobianajë vajatuxanenëbejejavabelia, jai nacuaevetsinë Festo nacuaevetsinë Agripajavabelia.

²² Nexata nacuaevetsinë Agripa jumaitsi nacuaevetsinë Festojavabelia:

—Xanë ata jitsipajë tajumetaejava Pablo penavajunupaebijava, jai nacuaevetsinë Agripa.

Nexata nacuaevetsinë Festo jumaitsi nacuaevetsinë Agripajavabelia:

—Meravia rabaja jumetaename Pablo penavajunupaebijava, jai nacuaevetsinë Festo.

²³ Nexata meravia pitsijavata nacuaevetsinë Agripa pijava Berenicebeje bitso naitabëtabeje. Nexata naponabeje jivi penacaetuatabiboxanetojavabelia.

Pëyanatatsibeje vajabitsaë pepo pevetsivi. Pëyanatatsibeje Cesarea tomarapijipetuxanevi ata. Penacaetuatsiboxanetojavalia barëjoneyabeje. Nexata nacuaevetsinë Festo pijajivi itoroba petocaponaenexatsirena Pablo. ²⁴ Nexata nacuaevetsinë Festo jumaitsi nacuaevetsinë Agripajavabelia, itsamonaejavabelia ata:

—Agripa, nacua nevetsinë, daxita paxamë ata majotaje vajanajuanaacaetuatsivi. Pataneme rabaja mapapebi nuca paneitabarataje. Ayaibitsaëto judíovi, Jerusalén tomarapijivi, bajaraponë neconitatsi xanëjavaberena Jerusalén tomaratalia. Bajara icatsia pamonaetapëta naponarena Cesarea tomaraberena. Bajara icatsia pacuenia neconitatsi xanëjavaberena. Bajarapamonae vavajaiya nejumai tsabiabi: “Pajitsipajë Pablo pebeyaxuabinexatsi,” nejai tsabiabi. ²⁵ Itsiata baitsi jane xanë apo yapëtaenë paneconi yabara beyaxuabijitsiat-si. Maponë nevajëta picani taitorobinexa tajatuxanenëjavabelia, Romanonacua pepo pevetsinëjavabelia, bajaraponë pitabarata peneconitsinexatsi itsa pibisiacuene exana. Bajaraxuata itorobijitsianë Romanonacua pepo pevetsinëjavabelia. ²⁶ Itsiata baitsi jane apo yapëtaenë pacuene yabara toyaquinaejitsianë cuyalatobaxutota tajatuxanenëjavabelia. Bajaraxuata xamë Agripa, nacua nevetsinë, mapamonaeataje, daxita paxamë paneitabarata Pablo penucaenexa pacatocapatatsi maberena. Pacatocapatatsi paneyanijobinexa paneconi yabara naneconita. Nexata meta paneyanijobicujinae xanë yapëtaenajë paneconi yabara naneconita. Nexata bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia. ²⁷ Tsipaji acuenebi taitorobijava maponëje Pablo tajatuxanenëjavabelia toyaquinaenejevanë cuyalato xaniavaetsia peyapëtaenexa paneconi yabara judíovi neconitsijitsiatsi, jai nacuaevetsinë Festo nacuaevetsinë Agripajavabelia.

Pacuenia Pablo navajunupaeba nacuaevetsinë Agripa pitabarata yabara pelivaisi

26 Nacuaevetsinë Agripa jumaitsi Pablojavabelia: —Catocopatatsi rabaja nenavajunupaebinexa paneconi yabara judíovi caneconita, jai nacuaevetsinë Agripa Pablojavabelia.

Nexata Pablo yaiyataeya bajacoba nacuaevetsinë Agripa. Nexata Pablo jumaitsi nacuaevetsinë Agripajavabelia mapacueniaje:

² —Barëyanë. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia. ³ Aeconoxaeta bitso barëyanë. Tsipaji yapëtaneme xaniavaetsia daxita palivaisi paxainajë pajudíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevetsinë Agripajavabelia.

Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesucristo yabara pelivaisi

⁴ Pablo icatsia jumaitsi nacuaevetsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata. Bajarapamonae neyapëtane pacuenia ponaponajë patajanacuatata tsiquirinëyojavaveliacujinaenë. Neyapëtanenua pacuenia ponaponajë Jerusalén tomarata ata.

⁵ Judíoviyajuvënëvi itsamonae naexana fariseovi. Nexata bajarapamonae Dioso Moiséspijinëta penajumecopatsilivaisi, bitso jumecovënëtsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinëjavaveliacujinaenë catsitecaponaponajë fariseovi pecujarubicuene. ⁶ Bajarapamonae neneconitsijitsia tsipaji baja xanë jumecovënëtajë petëpaevimi itsamatacabi Dioso icatsia piasaëyaexanaejavanexa. Tsipaji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovënëtajë. ⁷ Daxita raja paxanë, Israelpijinëmi pexi doce ponëmibeje papemomoxinë. Pacopiaevetavanapajë Dioso icatsia piasaëyaexanaejavanexa petëpaevimi pacuenia baja cajena tajëvelia Dioso najumecapanepaeya jumaitsi patajasalinaivimijavabelia. Bajaraxuata najamatabëcuene copatsiaya pavajëtabiabajë Diosojavabelia. Patonacuenebavanapajënu caematacabi canacujitsia, meravi yajava. Agripa, nacua nevetsinë, abaxë nenamuxunaevere. Dioso icatsia petëpaevimi piasaëyaexanaejavanexa, copiaevetaponaponajë. Bajaraxuata judíovi neneconitsijitsia. ⁸ Pëtsa pajamatabëjumaitsimë Dioso yabara: “Dioso raja apo caëjëpaetsi petëpaevi icatsia piasaëyaexanaenexa,” pajamatabëjamë pëtsa, jai Pablo bajarapamonaejavabelia.

Pacuenia Pablo navajunupaeba petaicaponaejava Jesús pejumecovënëtsivi pejebinxaxa penaneconitsivi pejebabiabibota yabara pelivaisi

⁹ Pablo icatsia jumaitsi nacuaevetsinë Agripajavabelia:

—Xanë abaxë Jesús itsa apo jumecovënëtsinë, jamatabëjumaitsinë tsabiabi: “Xanë bejiobiaexanaenajë daxita pamona jumecovënëta Jesús, Nazaret tomarpijinë, pelivaisi,” jamatabëjanë tsabiabi. ¹⁰ Nexata bajarapacuenia exanajë Jerusalén tomarata. Sacerdotevi penamatacaitorobivi taneitorobixae, ayaibitsaëto Jesús pelivaisi pejumecovënëtsivi jebaponajë penaneconitsivi pejebabiabibota. Itsa bajarapamonae naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. ¹¹ Pamona Jesús pelivaisi jumecovënëta, anijatonë jumaconibabeyaexanabiabajë judíovi penacaetuatabiabibonëjava. Bajara pacuenia picani exanaponajë bajarapamonae pecopabinexa Jesús pelivaisi pejumecovënëtsijava. Xanë pi-

cani cueneitoyanë bajarapamonae. Nexata itsanacuajava penaetomaranëjava ata, jaitarutajë Jesús pelivaisi pejumecovënëtsivi tataicaenexa tajebinxaxa penaneconitsivi pejebabiabibota, jai Pablo nacuaevetsinë Agripajavabelia.

Pacuenia icatsia Pablo navajunupaeba pacuenia Jesús pelivaisi jumecovënëta yabara pelivaisi

¹² Pablo icatsia jumaitsi nacuaevetsinë Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovënëtsivi, ponajë picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabëcueneta nitoroba tataicaenexa picani Jesús pelivaisi pejumecovënëtsivi tajebinxaxa penaneconitsivi pejebabiabibota. ¹³ Agripa, nacua nevetsinë, abaxë nenamuxunaevere. Nexata jane baja ponajë Damasco tomarabelia. Nexata tanajetarucaejavata namutua, taniji matonejeepatota athëbëvetsica pinijicotia tanematatoyorotsianaitayotsijava. Naitayota matacabipijijumetocotia matatoxenetsia. Daxita tayajavaponaevi tayajavanajetarucaejavata, panematatoyorotsia naitayota. ¹⁴ Nexata daxita paxanë irata pabobenajunuajë. Bajarajota irata jumetaenucajë hebreojumeta athëbëvetsica tanejumaitsijava: “Saulo, Saulo, çdetsa xuajitsia tajajivi netobejiobiaexanaponame? Xamë nijacuata najamatabëcuenebijianaponame,” tanejajjava, jumetaenucajë irata. ¹⁵ Nexata xanë jumaitsinë: “Tajatuxanenë, çdetsa ponëmë?” janë. Nexata icatsia nejumaitsi: “Xanë raja Jesúsne. Xanë raja tajajivi netobejiobiaexanaponame. ¹⁶ Nonotabapunare. Catsitanaitajëtatsi raja tacaitapetsinexa tajajivitonëexamë. Xamë nexata tsipaebianame itsajivijavabelia pacuenia aeconoxaetaneme. Tsipaebianamenua pacuenia icatsia catsitanaitajëtsianatsi bexëa itsamatacabijavabelia. ¹⁷ Capanepaenatsi raja judíovi pecobevecua pecaitsacueniabianiva. Caitorobianatsi apo judíovi pijanacuanëjavabelia. Apo judíovi ata pecobevecua cacapanepaenatsi pecaitsacueniabianiva. ¹⁸ Caitorobatsi rabaja netsipaebinxaxa apo judíovijavabelia pexanialivaisi, xanë talivaisi. Nexata apo judíovi ata najamatabëcuene pënëyorotsiaexanaename Diosojavabelia. Nexata Dioso pexaniajailivaisita apo judíovi ata jamatabëcueneitayotsianatsi piaitaquirijamatabëcuenevecua, dovathi pejamatabëcuene itorobabiabijavatsivecua. Nexata apo judíovi ata talivaisi jumecovënëtsiana. Nexata bajarapamonae pibisiacuene pexanaeneconimi, Dioso vecuaajibiaexanaenatsi itsa jumecovënëtsiana talivaisi. Nexata apo judíovi ata pibisiacuene pexanaeneconimi, Dioso vecuaajibiaexanaenatsi, pacuenia baja daxita tanejumecovënëtsivi Dioso vecuaajibiaexanatsi pibisiacuene pexanaeneconimi,” nejai Jesús mapacueniaje athëbëvetsica, jai Pablo nacuaevetsinë Agripajavabelia.

Pacuenia Pablo navajunupaeba pacuenia jumecovënëta Jesús pitorobicueniatsi yabara pelivaisi

¹⁹ Icatsia Pablo jumaiti nacuaevetsinë Agripajavabelia:

—Agripa, nacua nevetsinë, abaxë nenamuxunae vere. Nexata pacuenia Jesús athëbëvetsica nejumaiti, jumecovënëtajë baja cajena. ²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judíovijavabelia ata. Nexata itorobajë daxita bajarapamonae pecopabinexa pibisiacuene pexanabiabiava penajamatabëcuenepënëyorotsinexa Diosojavabelia. Nexata itorobajë xaniavaetsia pejinavana-paenexa pibisiacuene pexanaeyaniva. Nexata baja bajarapacuenia itsa jinavanapa, daxitajivi yapëtanetsi pepacuene penajamatabëcuenepënëyorotsijava Diosojavabelia. ²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxuabinexa picani. ²² Itsiata baitsi jane neyjavaponapona Dioso taneyavenon-aenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiovijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaiti, tsipaebabiabajë. Bajayata baja cajena profetavimi Cristo yabara jumaiti mapacueniaje: ²³ “Pamatacabi Cristo Dioso itorobianicatsi jivi pecapanepaenexa, beyaxuabianatsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanatsi petëpaecujinae, namataxainaeya jane baja asaëyaexanatsi daxita petëpaevivecua. Nexata pamona-e Dioso pepuajumecovënëtsi tēpa, Dioso icatsia coto-caevi asaëyaexanaenatsi petëpaecujinae. Nexata bajarapalivaisi tsipaebaponajë judíovijava, apo judíovijava ata. Daxita bajarapamonae itsa jumecovënëta bajarapalivaisi, pecapanepaenexatsi Diosojavabelia, jai Pablo nacuaevetsinë Agripajavabelia.

Pacuenia Pablo petsipaebilivaisi pejumetaevitsi, sivanajamatabëxainatsi yabara pelivaisi

²⁴ Pablo penavajunupaebijavata, nacuaevetsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujarubixae, jai nacuaevetsinë Festo.

²⁵ Pablo nexata jumaiti:

—Festo, pecayaiyataenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniaajailivaisi. ²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. ²⁷ Agripa, nacua nevetsinë, xamë baja cajena jumecovënëtame profetavi bajayata peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamonae peyaquinaelivaisi, jai Pablo nacuaevetsinë Agripajavabelia.

²⁸ Nexata nacuaevetsinë Agripa jumaiti Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai nacuaevetsinë Agripa.

²⁹ Nexata Pablo jumaiti:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa. Daxita paxamë patanejumetaeyenaevimë, jitsipajë panejumecovënëtsijava Jesús pelivaisi. Pacuenia baja xanë jamatabëcuenëtsinë, Jesús pelivaisi tajumecovënëtsinë, bajara paxamë ata panejamatabëcuenëtsinexa. Itsiata apo pacatojitsipaetsi papecacëbinexa mapitsicadena-maëtonëtaje pacuenia xanë necëtanuta, jai Pablo.

³⁰ Itsa baja Pablo najumevereta bajarapacuenia petsipaebijava, nacuaevetsinë Festo nonotapuna. Nacuaevetsinë Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa. ³¹ Pepitsapaecujinaelia bajarapamonae najumaiti:

—Maponëje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

³² Nacuaevetsinë Agripa jumaiti nacuaevetsinë Festojavabelia:

—Itsa apo cavajëtsi tsipae nitorobinexa vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaevetsinë Agripa Pablo yabara.

Pacuenia Pablo caponaliatsi Roma tomarabelia yabara pelivaisi

27 Nacuaevetsinë Festobana najamatabëcuenevereta baja pitorobinexatsi Pablo Italia nacua-yabelia, Romanonacua pepo pevetsinëjavabelia. Nexata Pablo caponaejitsiatsi vajabitsaë pijacapitán, Juliovënënë. Itsamonae naneconitsia pejinavanapaevi, Pablo yajava, caponaejitsiatsi. Ponë Romanonacua pepo pevetsinë, bajaraponë pevënë Augusto. Nexata Augusto pijajivi vajabitsaë pijacapitánmonaeyajuvënënë Julio. ² Xanë Lucasnë, naponajë Pablota. Adramitio tomaraverena pepatsibarco ënëabereca parunarecajë.

Bajarapamo yaëtanajetaruaejitsia manuamene muxubërëa penaetomaranëjava, pepatsinexa Asiavënë nacuayabelia. Payajavaponajëbeje Aristarco, Tesalónica tomarapijinë. Tesalónicatomara eca Macedonia nacuata. ³ Meravia pitsijavata epatua panapatajë Sidón tomarata. Capitán Julio yayatanetsi Pablo. Bajaraxuata Sidón tomarata Pablo tocopatatsi penonotajunaenexa barcoënëvecua, penasivaxainaenexa peyapëtaevitsijavabelia, perajutsinexatsinua xua namatavenona Pablo. ⁴ Bajaraxuacujinae icatsia panaropobajë Sidón tomaravecua. Nexata patavajënaeverena jovibo najetaruca. Nexata Chipretunaeto pacujibaliajë bajarapatunaeto muxubërëa patanajetarubenaenexa. Nexata Chipretunaeto patatsavenononia paxenetanajetarubena-jë. Tsipaji bajarapamuxubërëvelia jovibo beyajetayo. ⁵ Cilicia nacuabeje Panfilia nacuabeje canacujitsialia papaliajë. Nexata payaëtajë Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomaraverena pepatsimo. Bajarapamo ponaejitsia Italia nacuayabelia. Nexata baja pabarcota pananajetarubena-jë, pavecuanonobajuna-jë. Nexata icatsia capitán Julio panerunaeyaexana Alejandría tomaraverena pepatsibarco ënëabelia. ⁷ Anijamatacabianë bajarapabarcota pananajetarubena-jë. Tsipaji beaxayo najetaruca. Pinijicuenecujinae itsiata panajetarubena-jë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubena-jë itsapaitapavelia eca Salmóntomara. Tsipaji bajara-paitapavelia jovibo beyajetayo. ⁸ Piayapëbejecuenia panajetarubena-jë manuamene muxubërëa. Nexata papatajë Buenos Puertosvënëjavata, Laseatomara imoxoyojavata.

⁹ Pamatacabianë xanepana menia patanajetarubenaenexa, panevecuapanepapona baja. Nexata baja bitso panetsiyai menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitsi mapacueniaje:

—Xanë raja yapëtaniji nacatsiyai baja bitso menia vajaponaenexa vajavajënaeyabelia. Naxuabijitsipa raeta mapamoje. Naxuabijitsipa raeta mapamoënëtaje pecaponaejava yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitsi-beje barco pexainaenë, barco pecaponaenë ata, capitán Julio jumecovënëta. ¹² Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuenecaëjëpatsi, pepatsinexa picani Fenice tomarata. Bajarapatomarata picani jamatabëyaëta pataeveta-

vanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tsipaji bajarapatotsotojava apo joneyabiabi jovibo.

Pacuenia pinijijoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainaenë bitso jitsipa peponaenexa pevajënaeyabelia. Nexata bajarapaepatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubena-jë. ¹⁴ Nexata jemata caepatoyocujinae pinijijoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco torotaponatsi Cretatunaetovecua. Apo panecaëjëpae barco patamuxufetsinexa jovibo pevajënaevelia. Nexata baja pacopatajë pataneyacaponaenexa jovibo. ¹⁶ Paponajë tsiquritunaeto, Claudavënë tunaeto, pepënënia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobobocainajë jera patajutabuatsinexa barco ënëabetsina. ¹⁷ Bajaraxuacujinae bajarapamonae barco epacëbaponaya pinijibumacaxanetonëta barco pesarasaraëcaeyaniva malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaenexa jovibota. ¹⁸ Meravia abaxë pitsijavata tsiteca pinijijovibo piayaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. ¹⁹ Bajaraxuacujinae icatsia meravia pitsijavata bajarapamonae menia penereca barcoënëta pecanacuenebivanë. ²⁰ Bajayajebi baja cajena apo pataenë matacabipijijuameto, tulupu ata. Tsipaji bajayajebi pinijijovibo, ema yajava, tsitecanuca. Belia pajamatabëjumaitsinë: “Apo yapanepaetsi meta baja tsane,” pajamatabëjanë.

²¹ Pamatacabibeje bajarapacuenia pataniji, bajara pininia pamatacabibeje apo paxaenë pataxajava. Nexata Pablo nonotapuna bajarapamonae petuatujëta. Pablo jumaitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberena-jë apo yaponae tsipaetsi Cretatunaetovecua. Apo bejio-bitsinua tsipae. ²² Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ébarco rajane baja naxuabiana. ²³ Ajena baja cajena, pameravi, netsitanaitajëta ángel, Dioso pitorobinëtsica. Bajarapa-Dioso xanë pijajivitonënë. BajarapaDioso tonacuenebaponaponajë. ²⁴ Nexata ángel nejumaitsi: “Pablo, pëtsa junavame. Itsiata raja apo tēpaemë

tsane. Tshipaji raja naitajëtsijitsiamë Romanonacua pe-po pevetsinë pitabarata. Xamë raja nejamatabëcuene-ta Dioso capanepaenatsi petëpaeyaniva daxita pamonae yajavanajetarucame mapabarcotaje,“ nejai ángel. ²⁵ Nexata daxita paxamë panajamatabëcuensaëre panejamatabëcuenebëjajjavavecua. Naja-matabërutajë Diosojavabelia vajanacacapanepaenexa Dioso. Yapëtaniji Dioso vajanacacapanepaejavanexa pacuenia baja ángel netsipaeba. ²⁶ Itsiata baitsi jane cajena jovibo nacayacaponae na itsatunaetojavabelia, jai Pablo.

²⁷ Catorce baja pamatacabibeje itsa paxainajë pata-naropobicujinae, meravi jovibo toquebiaya paneyacapona Adriavënë manuamenejava. Nexata meravi tu-atuajëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

²⁸ Nexata bajarapamonae pemaëtota caëjëtaponaxuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubujava irabereca. Bajaraxuacujinae, caeepatoyocujinae, icatsia caëjëta. Veintisiete icatsia pametrobeje xaina mene piavajubujava irabereca. ²⁹ Nexata barcota penacuenebivi jamatabëjumaitsi:

—Barco meta payanayaëtojopaenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepija peyamatacabibijavatsi, penatsivajënae taenajetarubenaenexa. ³⁰ Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia.

³¹ Nexata Pablo itsa tane bajarapamonae jera pexuabijavareca, jumaitsi vajabitsaë pijacapitánjavabelia, capítan pijajivijavabelia ata:

—Mapamonaeje barcota penacuenebivi itsa ponaena mapajerataje, paxamë pavajabitsaëmë panapenet-sianame meneta, jai Pablo.

³² Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³ Ajena baja matababi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatacabibeje xaniavaetsia apo pamajitsimë. Panexaejava ata apo paxaemë. ³⁴ Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

³⁵ Bajarapacuenia Pablo pejumaitisjavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava. ³⁶ Daxita nexata bajarajota jamatabëcuenesaëreca baja. Nexata bajarapamonae ata xane pexaejava. ³⁷ Doscientos setenta y seis papajivinëbeje daxitata paponajë bajarapabarcota. ³⁸ Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matababi tsarucaponae, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetotsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapata-jetabojavabelia. ⁴⁰ Xuanë anclavënëjavanë, yamaëya copabareca, bajaraxuanë irabelia itsa vaetaba, barco patayarucojopaenexa. Bajaraxuanëmi yamaëcaucubapenereca. Sarasaranaeyaexananua barco petabufecajëbanajetarubenaepabeje. Nexata barcoupitatsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo. ⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtajarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanucacae. Barco petabufejavavetsina malataca pesaëta tabufesarabajarabatsi. ⁴² Nexata picani vajabitsaë bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. ⁴³ Itsiata vajabitsaë pijacapitán apo tocopatsi. Tshipaji apo jitsipae Pablo yajava pebeyaxuabijavatsi. Nexata capitán itoroba daxita pamonae yapëthane pejuejava, copiaya pejuenexa pitapayabelia copiaya pepatsinexa matatsënëabelia. ⁴⁴ Bajaraxuacujinae pamonae apo yapëtae pejuejava, coto-caevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

Pacuenia Pablo ponapona Maltavënë tunaetojavata yabara pelivaisi

28 Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tshipaji bitso ema tsanucacae. Nexata bitso cainejeba. Panejunata daxita patanonopaenexa. ³ Nexata Pablo nota petseviiso. Itamataeta bajarapaisoto. Nexata jomo bitso piatanenë, bebula, pitsatabijirava isotojavaverena piatajujavavecua. Nexata Pablo cobesinetsi. Pecobesinijavatatsi siteca yajumaruca. ⁴ Maltatunaetopijivi itsa tane Pablo

jomo pecobesinerucaejavatsi, nexata najumaitsi bajarapamonae:

—Maraeta ponë jivibenëje. Bajaraxuata manuamene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabëcuene, jomo pesinijavatsi peyatëpaenexa, najai Maltatunaetopijivi Pablo yabara.

⁵ Nexata Pablo nacobenënëbiaxuaba jomo pejopaenexa isotojavabelia. Pablo itsiata apo itsacuene.

⁶ Nexata daxita Maltatunaetopijivi jamatabëjumaitsi Pablo yabara:

—Aeconoxae meta Pablo cobeyajinaena. Itsa jume, irata meta petëpaenë jopaena, jamatabëjai.

Nexata bajarapamonae bajayaepato evetanubenaenata Pablo petaenexatsi jomo pecobesinijavatsi peyaisacuenejava, itsiata Pablo apo itsacuene. Nexata icatsia bajarapamonae itsacuenia najamatabëxaina Pablo yabara. Nexata najumaitsi bajarapamonae:

—¡Maraeta papebi dionëje! najai.

⁷ Maltatunaeto pevetsinë pevënë Publio. Nexata itsajota panubenajë, imoxoyo bobena Publio pijairanë. Nexata bajaraponë panecopiapita pexaniacuenia. Bajaraponë pijabota panajinavanapajë acueyabi pamatacabibeje. ⁸ Publio paxa avitane tsanucuae camata. Romaebanucatsi. Bitso suliabatsi. Nexata Pablo taeyojopalia. Vajëta Diosojavabelia. Bajaraxuacujinae piavitanenë pematabocotojumavereca Pablo nacobebeuata. Nexata baja Pablo jamatejemayaexana piavitanenëmi. ⁹ Bajarapacuenia Pablo itsa exana, nexata daxita piavitanevi Maltatunaetopijivi pata Pablojavaberena. Daxita bajarapamonae ata jamatejemayaexana Pablo. ¹⁰ Maltatunaetopijivi pinijicuenia paneyaiyataeya paneyavenona. Itsa baja icatsia bexëjavabelia itsabaracota panaponajë, nexata Maltatunaetopijivi panerajuta daxita patanamatavenonaejavaxi pataponaejavata.

Pacuenia Pablo pata Roma tomarata yabara pelivaisi

¹¹ Malta vënëtunaetota panajinavanapajë acueyabi pajuametobeje. Bajaraxuacujinae baja icatsia panaponajë barcota. Bajarapabarco patavajënae pata Alejandría tomaraverena. Bajarapamo Maltatunaetototsotota daxita emarapae ruca. Evetaruca emarapaejuametone pepanepaejava. Bajarapabarcoupita rucabeje jivi saya pecobeta jumapecataeya pexanaenëbeje. Cástorbeje Póluxbeje jumapecataeya jivi pecobeta pexanaenëbeje bediosonëbeje petaenexa.

¹² Bajarapabarcota panaponajë. Nexata jane baja panapatajë Italia nacuayabelia. Panapatajë Siracusa tomarata. Siracusa tomarata abaxë panajinavanapajë acueyabi pamatacabibeje. ¹³ Bajaraxuacujinae icatsia panaropobajë. Paponajë manuamene muxubërëa. Nexata icatsia papatajë Regio tomarata. Nexata meravia pitsijavata patacovëverena pexaniajovibo najetaruca. Nexata bajarapajovibo paneyacapona patavajënaeyabelia. Nexata icatsia anijamatacabibejecujinae papatajë Puteoli tomarata. ¹⁴ Puteoli tomarata pacaxitajarabajë Dioso pejumecovënëtsivi. Bajarapamonae paneasiva caesemana patanajinavanapaenexa bajara-

pamonaejavata. Bajaraxuacujinae jane baja matatsënëa paponajë Roma tomarabelia. ¹⁵ Roma tomarapijivi, Dioso pejumecovënëtsivi, patavajënaelia panevënëlivaisitane patanajetarubenaejava. Nexata bajarapamonae panecopiajairena. Nexata penamataxainaebitsaëto panemataenena Foro de Apiovënëjavata. Bajaraxuacujinae icatsia itsabitsaëto panemataenena Tres Tabernasvënëjavatalia. Nexata Pablo itsa tane bajarapamonae, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonae petaejavata. ¹⁶ Nexata jane baja papatajë Roma tomarabelia. Nexata Roma tomarata capitán Julio rajuta baja pamonaenaneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinë pecobeyabelia. Itsiata Pablo tocopatatsi saicayabota peponaponaeenexa. Caenë vajabitsaënë evetaponaponatsi Pablo penajetabajiraviyaniva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonae, itsacuene apo exanae atanë vajavëna judíovijavabelia, vajasalinaivi pecujarubicuene jumecovënëtsiaponaponae atanë, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia.

¹⁸ Nexata Romano nacuapijivi, jivi penaneconitsicuene pevetsivi, neyanijoba xua yabara vajavëna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxinaejava, paneconi yabara nebeyaxuabiaeexanaejitsia. ¹⁹ Itsiata baitsi jane vajavëna judíovi, pamonaeneneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanë vajëtajë taneitorobinexa maber-enaje Romanonacua pepo pevetsinë pitabarata taneneconitsinexa pibisiacuene itsa exanjë. Itsiata xanë apo jitsipaenë juya bajarapamonae taneconitsijava tajanacuapijivijavabelia. ²⁰ Bajaraxuata nexata pacajunatatsi patacataenexa patacabarëcuaicuaijainexanua. Ponë daxita Israel nacuapijivi copiaevetavanapa athëbëvetsica pepatsijavanexatsica, xanë baja yapëtaniji bajaraponë athëbëvetsica pepatsijavatsica. Nexata xanë vajunupaebaponajë bajaraponë athëbëvetsica pepatsijavatsica. Bajaraxuata necobecëtsiaya yamaëya ponaponajë mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamë yabara apo panetonajumeitorobi Judea nacuaverena. Vajavëna judíovi patsi ata bajaraverena, itsiata apo panetsipaebi pibisiacuene xamë nexanaejava. ²² Itsiata baitsi jane pajitsi-

pajë patanetsipaebinexamë pacuenia Jesús pelivaisi jumecovënëta. Daxitanacuanëpijivi baja cajena baracuaicuaijai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanëpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi caëjëta matabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaibitsaëtoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaisi Dioso Moiséspijinëta penajumecopatsilivaisi Jesús yabara. Pablo tsipaebanua pacuenia jumaisi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovënëtsinexa Jesús pelivaisi. ²⁴ Itsamonae bajarapomonaeyajuvënëvi jumecovënëta baja bajarapacuenia Pablo petsipaebilivaisi. Itsiata itsamonae apo jumecovënëtsi. ²⁵⁻²⁶ Nexata daxita bajarapamonae apo najamatabëcuenejëpae. Nexata bajarapamonae penaviabivajënae Pablo icatsia jumaisi bajarapamonaejavabelia mapacueniaje:

—Bajayata baja cajena profeta Isaiáspijinë Espíritu Santo pejamatabëcueneta tajëvelia yapëtaeyaexanatsi paxamë apo panejumecovënëtsijavanexa Jesús pelivaisi. Nexata profeta Isaiáspijinë Espíritu Santo itorobatsi petsipaebinexa vajasalinaivimijavabelia mapacueniaje:

Paxamë raja picani pajumetaeyabianame palivaisi pacatsipaebabiabiana. Itsiata apo pajumeyapëtaemë tsane xua yabara bajarapalivaisi pacatsipaebabiabiana. Paxamë raja picani pataeyabianame xua pacatsitaexanabiabiana. Itsiata apo payapëtaemë tsane pajamatabëcuene yabara bajaraxua pacatsitaex-

anabiabiana,jai profeta Isaiáspijinë vajasalinaivimijavabelia.

²⁷ Bajarapacuenia jumaisi profeta Isaiáspijinë tsipaji baja cajena Dioso tajëvelia jumaisi paxamë apo panejumecovënëtsijavanexa yabara mapacueniaje:

Bajarapamonae ajamatabëcuenetaja tsane. Nexata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene yabara tsitaexanatsi xua tane. Jumeyapëtaejitsipanua palivaisi tsipaebatsi. Pejamatabëëthëtojavavetsina jumeyapëtaejitsipa. Nexata najamatabëcuenepënëyorotsipa perujumatabëcuenecueca. Nexata xanë jamatabëcuene xanepanaeyaexanaejitsipajë pibisiacuenevecua,jai baja cajena Dioso bajayata tajëvelia paxamë apo panejumecovënëtsijavanexa yabara, jai Pablo judíovijavabelia Roma tomarata.

²⁸ Pablo icatsia jumaisi judíovijavabelia:

—Pajudíovimë, pajumeyapëtaema mapalivaisije. Ajena baja mapamatacabijavaveliacujinaeje, pevajënaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarëcuaicuaijai tsanajetarubena.

³⁰ Pablo penacovaetsibota anijavaibeje ponapona Roma tomarata. Pablo matamotapona bo pecovaetsijamatabëcuene. Pablo xaniavaetsia copiapitabiaba daxita pamona sivaixinabiabatsi. ³¹ Pamona Pablo sivaixinabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenë Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

ROMANOS

**Pacuenia Pablo toyaquina mapabaxutoje Dioso pe-
jumecovënëtsivi, Roma tomarapijivijavabelia, yabara
pelivaisi**

1 Xanë Pablonë, Jesucristo pijajivitonënë. Dioso ne-
junata. Nexata nitoroba apóstolenëxanë tatsi-
paebaponaenexa jivi pexanialivaisi, Jesucristo pelivaisi,
Diosojavabelia pecapanepaelivaisinexatsi.

² Bajayata vajavajënaeya, Dioso bajarapalivaisi
tajëvelia yapëtaeyaexana profetavijavabelia. Nexata
bajayata Diosojumepaebivi profetavi itsa yaquina
Dioso pejumelivaisibaxutonexa, bajarapamonae
yaquina pacuenia Dioso tajëvelia yapëtaeyaexanatsi
bajarapapexanialivaisi. ³ Bajarapalivaisi vajatuxanenë
Jesucristo, Dioso pexënato pelivaisi. Jesucristo itsa
naexana mapanacuataje, Davidpijinë pemomoxiyaju-
vënëvata naexana. Bajaraponë, Davidpijinë, bajayata
Israelnacia pepo pevetsinëmi. ⁴ Vajatuxanenë Jesu-
cristo petëpaecujinae, Espíritu Santo icatsia asaëyaex-
anatsi. Bajarapacuenia piasaëyaexanaexaetsi petëpae-
cujinae, jivi yapëtanetsi Dioso pexënatocuene. Yapë-
tanetsinua piasaënëcuene ata. ⁵ Jesucristo peja-
matabëcueneta Dioso paneitoroba saicaya paapós-
tolevinexanë, Dioso patatonacuenebinexa. Bajara-
pacuenia Dioso paneitoroba Dioso pejumelivaisi patat-
sipaebaponaenexa pamonaе apo judíovijava, apo
judíovi ata pejumecovënëtsinexa Dioso. ⁶ Nexata pax-
amë ata Roma tomarata panejinavanapaevi pajume-
covënëtame baja Dioso. Tsipaji paxamë ata Dioso
pacajunata Jesucristo papijajivinexamë.

⁷ Daxita paxamë, Roma tomarata panejinavanapaevi,
pacatoyaquinatsi mapabaxutoje. Dioso pacajitsipa.
Nexata pacajunata papijajivinexamë. Pacatovajëtatsi
vaxa Diosojavabelia, vajatuxanenë Jesucristojavabelia
ata, papecaitaxutotsoniataenexa jamatabëcuenex-
anepanaeya panejinavanapaenexanua.

**Pacuenia picani Pablo bitso jamatabëtane Roma
tomarapijivi yabara pelivaisi**

⁸ Namataxainaea pacatoyaquinarutatsi pacuenia ju-
maitsinë tsabiabi paxamë yabara Diosojavabelia.
Diosojavabelia jumaitinë tsabiabi mapacueniaje:
“Sivajamatabëcuenekarëyanë bitso bajarapamonae Je-
sucristo pejumecovënëtsixae,” janë tsabiabi Diosojav-
abelia paxamë yabara. Bajarapacuenia Diosojavabelia
jumaitinë tsabiabi tsipaji daxitanacuanëpijivi pacava-
junupaeba xaniavaetsia panejumecovënëtavanapaeva-
va Dioso. ⁹ Xanë daxita tajamatabëcuenesaëta Dioso

pijacuene tonacuenebaponaponajë jivi itsa tsipaebabi-
abajë pexanialivaisi, Dioso pexënato pelivaisi. Dioso
yapëtane patacatovajëtabiabijava itsa pacanaja-
matabënapitabiabatsi tavajëtsijavata Diosojavabelia.

¹⁰ Vajëtabiabajë Diosojavabelia taponanexa paxamë-
javabelia. Nexata Dioso itsa netocopatsiana tapon-
aenexa, ponaenajë paxamëjavabelia. Bajayajebi picani
bitso jamatabëponabiabajë patacataenexa. ¹¹ Nexata
jitsipajë patacataenexa, patacatsipaebinxanua pali-
vaisi Espíritu Santo neyapëtaeyaexana. Bajarapacuenia
itsa pacayapëtaeyaexanaenatsi, pajamatabëcuene-
saëmë tsaponae tsane orijibia Diosojavabelia. ¹² Na-
mataenetsia najamatabëcueneyavenonaenatsi Dioso
pejumelivaisi vajajumecovënëtsijava. Pacayavenona-
natsi panejamatabëcuenesaënexa Diosojavabelia.
Paxamë ata juya paneyavenonaenama bajarapacue-
nia.

¹³ Tajamonae, pacatojitsipatsi paneyapëtaenexa ma-
pacueneje. Bajayajebi picani bajayajebi jamatabëpon-
abiabajë patacataenexa. Itsiata apo necuenecaëj-
pabiabi taponanexa. Jitsipajë patacatsipaebinxaxa Je-
sucristo pelivaisi paxamëyajuvënëvi, pamonaе abaxë
apo jumecovënëtsi, pejumecovënëtsinexa Jesucristo.
Pamonaе ata baja jumecovënëta, Jesucristo pija-
matabëcuenesaënexa pevajënaeyabelia. Pacuenia apo
judíovi ata jumecovënëta taponanexa pevajënaeyabelia
itsaxuayo tsipaebanajetarucajë, bajara paneitsinexa pax-
amë ata. ¹⁴ Dioso nitoroba tatsipaebaponaenexa Dioso
pejumelivaisi daxitajivijava. Nexata Dioso pejumelivaisi
jivi tsipaebaponaajë pinijitomaranëjjava, sasavia pena-
vijava ata. Tsipaebaponaajë mapanacuapijilivaisi bitso
peyaëtaevijava ata, apo peyapëtaevijava ata. ¹⁵ Ba-
jaraxuata bitso jitsipajë paxamë, Roma tomarata pane-
jinavanapaevi ata, patacatsipaebinxaxa pexanialivaisi.

**Pacuenia pexanialivaisi, Jesucristo pelivaisi, pinijisaë
xaina ayaicuene pexanaenexa yabara pelivaisi**

¹⁶ Apo ajumeuranë tsabiabi jivi tatsipaebabiabijava
pexanialivaisi, Jesucristo pelivaisi, jivi pecapanepaeliv-
aisinexatsi Diosojavabelia. Tsipaji bajarapalivaisi peja-
matabëcueneta pijaneconi vecuaajibiaexanaenatsi pa-
jivi jumecovënëta bajarapalivaisi. Copiaya patsipae-
baponaajë bajarapalivaisi judíovi. Bajaraxuacujinae icat-
sia cotocaevi patsipaebaponaajë apo judíovi. ¹⁷ Bajara-
palivaisi nacayapëtaeyaexana pacuenia Dioso naca-
toexana aneconijibia Dioso vajanacataenexa. Aneconij-
ibia baja Dioso nacatane Jesucristojavabelia vajavajë-
naeyabelia vajanajamatabëcuene copataponaxaе.

Dioso ra pejumelivaisibaxutota jumaiti mapacueniaje: "Pajivi jamatabėjumaiti: 'Xanë pepacuenē Dioso neyavenonaena pacuenia najumecapanepaeya jumaiti,' jamatabėjai, bajarapajivi Dioso aneconijibia tanetsi. Bajarapajivi xainaena matababi pevereverecaejava," jai Dioso pejumelivaisibaxutota.

Pacuenia daxitatsi mapanacuapijivitsi naneconitatsi Diosojavabelia yabara pelivaisi

¹⁸ Dioso, athëbëtatsia peecaenë, vaxaitsi jamatabëcueneyapëtanetsi. Yapëtanetsi mapacueniaje. Dioso baraanaepanapona daxita pibisiacuene pexanaevijavabelia. Bajarapamonae pevajënaeyabelia pibisiacuene pejamatabëexanaexae, apo jitsipae pejumecovënëtsinexa pexaniajailivaisi, Dioso pejumelivaisi. ¹⁹ Bajarapamonae xaniavaetsia beyapëtane picani pacuenia Dioso jamatabëcuenetsi. Tsipaji baja picani Dioso tsitanajamatabëcuenetajëta bajarapamonaejavabelia. ²⁰ Jivi apo caējëpaetsi pitaxutota petaenexa Dioso. Nexata jivi apo yapëtae pacuenia itsi Dioso. Itsiata baitsi jane picani caējëpatsi peyapëtaenexa pacuenia Dioso jamatabëcuenetsi. Caējëpatsi picani peyapëtaenexana daxitamatabacijavabelianexa Dioso bitso piasaëtsaponaponaexa. Bajaraxua picani jivi caējëpatsi pijacuata peyapëtaenexa, itsa canaējëtsipa Dioso pexanaejavanë mapanacuataje. Nexata bajarapamonae acuenebi pejumaitsinexa: "Apo payapëtaenë cajena pacuenia Dioso jamatabëcuenetsi," pejainexa. ²¹ Bajarapamonae yapëtae ata Dioso peponaponaexa, itsiata apo yayatae. Caeto ata cajena Diosojavabelia pexaniajamatabëcuenē apo rajutsi. "Pexaniacuene rabaja panetoexaname," apo jai. Biji saya caranata ënatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, jamatabëcuenetaquiri tsaponae. ²² Jamatabëcuenenavëxaniabiaya bajarapamonae jamatabëjumai tsabiabi: "Vaxaitsi cajena bitso vajayapëtaevi daxitacuene," jamatabėjai tsabiabi bajarapamonae. Itsiata baitsi jane cajena apo yapëtae. ²³ Bajarapamonae apo najamatabëcuenecopabi ayaijamatabëcuenenë Diosojavabelia, ponë apo petëpaenënexa daxitamatabacijavabelianexa. Caranata saya jivi pecobeta jumapecataeya pexanaenëanëjavabelia najamatabëcuenecopaba. Bajarapamonae navajëcabiaba itsamonae pecobeta jivi jumapecataeya pexanaenëanëjavabelia. Navajëcabiabanua itsamonae pecobeta pepunaevi jumapecataeya pexanaenëanëjavabelia ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavabelia ata.

²⁴ Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pëvitota pibisiacuene namataenetsia natoexanabiaba. ²⁵ Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapa-

monae Dioso pejumelivaisi, pexaniajailivaisi, apo jamatabëjumecovënëtsi. Jumecovënëta saya caranata penajumetsënëtsilivaisi, jivi pecobeta jumapecataeya pexanaenëanë pelivaisi. Bajarapamonae apo yayatae pepo Dioso, ponë daxitacuene exana mapanacuataje. Caranata yayataeya navajëcabiaba Dioso pecobecovëjavaneljavabelia. Najamatabëcuenecopabanua ëbajaraxuanëjavabelia. Bajarapamonae nexata saya namuxujemata caranata pepo Dioso, ponëjavabelia jivi daxitamatabacijavabelianexa jumaitisijitsia: "Diosomë, bitso ayaijamatabëcuenenëmë," jaijitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabëexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷ Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ëpebijivi najitsipa. Nexata ëpebijivi namataenetsia naperabëquenetsiataeyabiaba. Bajarapacuenia pibisiacuene penatsixanaexae, Dioso ayaicuenia naneconitsiaexanaponaitsi bajarapamonae.

²⁸ Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainanexa ëpibisiacuene pexanaexa. ²⁹ Bajarapamonae exanavanapa bitso daxita pibisiacuene. Èpibisiacuene yabara najamatabëxainabiaba penaperabëquenetsiataenexa. Daxita pibisiacuene sivanajamatabëxainabiabanua. Jamatabëxainanexaeyababiabanua itsamonae pecobecovë. Pibisiacuene jamatabëexanabiabanua itsamonae pexanaexa. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Èpamonae ata bitso naitoya tsabiabinua. ³⁰ Bajarapamonae itsamonae pepëya pibisiacuenia najumetsënëtsia baracuaicuajai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yayataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaiti tsabiabi: "Xanë bitso ayaijamatabëcuenenënë itsamonae matatoxenetsia," jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuene pexanaeyaexanaenexa. Bajarapamonae apo jumecovënëtabiabinua paxajivi, penajivi ata. ³¹ Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. ³² Bajarapamonae bitso xaniavaetsia yapëtane picani pacuenia Dioso itorobatsi pex-

anaenexa. Yapëtanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonaes tsiteca pibisiacuene exanapona. Orijiabia sivabarëya tsabiabi itsamonae ata pibisiacuene itsa exana.

Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi

2 Paxamë pajudfovime, pacatsipaebianatsi mapacueniaje. Pajudfovime pajumaitsimë tsabiabi itsajivi yabara: "Mara pajivi pibisiacuene exanaje. Nexata Dioso naneconitsiaexanaenatsi," pajamë tsabiabi. Bajarapacuenia paxamë itsa pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tspaji paxamë ata pibisiacuene paexaname bajarapacuenia itsa pajumaitsimë tsabiabi itsajivi yabara. ² Yapëtanetsi baja cajena mapacueneje. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajëto xaina, bajarapaneconivajëto Dioso naneconitsiaexanaponaena. ³ Bajara pijinia pacuenia paxamë ata pibisiacuene paexanabiabi atamë, pajumaitsimë tsabiabi itsajivi yabara: "Mara pajivi pibisiacuene exanaje. Nexata Dioso naneconitsiaexanaenatsi," pajamë tsabiabi. Bajara pijinia pacuenia paxamë ata bajarapitsipibisiacuene paneexanabiabixae, pëtsa pajamatabëjumaitsimë tsabiabi: "Vaxaitsi judfovitsi Dioso pijajivixaetsi, apo nacananeconitsiaexanae tsane Dioso," pajamatabëjamë pëtsa. Tspaji Dioso naneconitsiaexanaena daxita pibisiacuene pexanaevi. ⁴ Bepacanaëjëtame xaniavaetsia pacuenia Dioso jamatabëcueneitsi. Dioso cajena abaxë bepijia apo naneconitsiaexanae pibisiacuene pexanaevi ata. Dioso raja abaxë jamatabëcuenevetaponapona pibisiacuene pexanaevi ata pevajëtsinexatsi pevecuaajibiaexanaenexa pijaneconi. Paxamë ata Dioso pacatojitsipa panecopabinexa pibisiacuene paneexanabiabijava, panenajamatabëcuene pënyorotsinexa Diosojavabelia. Bajaraxuata abaxë Dioso pacaitaxutotsoniatane. ⁵ Itsiata paxamë pajamatabëcuenetajamë bitso. Apo pajamatabëcopatsimë pibisiacuene paneexanaejava. Nexata ayaineconi panatoexanaponame panevajënaeyabelia. Nexata ayaicuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi. ⁶ Bajarapamatacabi Dioso naneconitsiaexanaponaena caejivi canacujitsia. Paneconivajëto natoexanaponapona itsa abaxë asaë tsaponaponaemapanacuataje, bajarapaneconivajëto Dioso caejivi canacujitsia naneconitsiaexanaponaena. ⁷ Itsamonae jamatabëcueneenabiabatsi epexaniacuene pexanabiabinexa. Bajarapamonaes jitsipabibanua pejinavanapaenexa Dioso pijapenivenivenaenacuatsia. Jitsipabiabanua Dioso pesivajamatabëcuenebarëyanexatsi. Jitsipabiabanua pexainaenexa matacabi apo peveverecaejava. Bajarapamonaes Dioso rajutsianatsi matacabi apo peveverecaejava. ⁸ Itsamonae natojitsipa daxitacuene pexinae-

java ebajarapamonaenexa. Apo jumecovënëtsinua pexaniajailivaisi. Saya exanavanapa epibisiacuene. Bajarapamonaes Dioso anaeya ayaicuenia naneconitsiaexanaenatsi. ⁹ Daxitajivi pibisiacuene exana, judfovi, apo judfovi ata. Daxita bajarapamonaes pibisiacuene pexanaexae, Dioso bejiobiaexanaenatsi. Bitso yanajamatabëxainaenana pijaneconi. ¹⁰ Itsiata baitsi jane daxita pamonaes pexaniacuene pexanaevi, judfovi, apo judfovi ata, Dioso pijapenivenivenaenacuatsia jinavanapaena. Dioso sivajamatabëcuenebarëya tsanetsi. Jinavanapaenanua jamatabëcueneexanepanaeya.

¹¹ Dioso itsa naneconitsiaexanaena daxita pijaneconi pexainaevi, najëpaeya naneconitsiaexanaena. Paneconivajëto xaina caejivi canacujitsia, bajarapaneconivajëto Dioso naneconitsiaexanaponaena caejivi canacujitsia. ¹² Pamonaes apo judfovi, yapëtae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judfovi. Pamonaes judfovi, yapëtae ata pacuenia Dioso Moiséspijinëta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judfovi. ¹³ Dioso raja judfovi aneconijibia apo tae saya jema judfovi peyapëtaejava yabara, palivaisi Dioso tonajumecopata Moiséspijinëta. Dioso raja judfovi aneconijibia tane matapania judfovi itsa exanavanapa pacuenia Dioso itoroba Moiséspijinëta petonajumecopatsilivaisita. ¹⁴ Pamonaes apo judfovi, apo tsipaebitsi Dioso Moiséspijinëta penajumecopatsilivaisi. Itsiata apo judfovi ata itsajavata exana pacuenia itoroba Dioso Moiséspijinëta penajumecopatsilivaisita. Apo judfovi apo muxujiobi atatsi, yapëtane pejamatabëëthëtota xua pexaniacuene pexanaenexa. Yapëtanenua xua ata pibisiacuene pexanaeyaniva. ¹⁵ Pamonaes pexaniacuene exanavanapa tsipaebinejevatsi Dioso Moiséspijinëta penajumecopatsilivaisi, bajarapamonaes exanavanapa pejamatabëëthëtota peyapëtaecuenia, pacuenia itorobatsi Dioso Moiséspijinëta penajumecopatsilivaisita. Daxita apo judfovi yapëtane pejamatabëëthëtota pexaniacuene pexanaenexa. Yapëtanenua xua pibisiacuene pexanaeyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenanua papibisiacuene ata muetsia daxitajivi najamatabëxainavanapa yabara. Nexata bajarapamatacabi daxitajivi nayapëtaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajë Dioso pitorobilivaisi itsa tsipaebaponajë.

Judfovi yabara, Dioso Moiséspijinëta penajumecopatsilivaisi ata, yabara pelivaisi

¹⁷ Pajudfovime, pajumaitsimë tsabiabi: "Vaxaitsi raja judfovitsi. Vaxaitsi yapëtanetsi Dioso Moiséspijinëta

penajumecopatsilivaisi. Bajaraxuata Dioso nacaca-panepaena. Dioso raja ëjudíovitsi vajaDioso," pajamë tsabiabi. ¹⁸ Payapëtaneme baja cajena xua Dioso pacatojitsipa paneexanaenexa. Payapëtanemenua Dioso Moiséspijinëta penajumecopatsilivaisi. Bajaraxuata payapëtaneme xua pexaniacuene paneitapetsinexa paneexanavanapaenexa. ¹⁹ Pajamatabëjumaitsimënu tsabiabi: "Vaxaitsi cajena bitso yapëtanetsi Dioso pejumelivaisi, vajatsipaebinexa pamonaë jumetaë ata Dioso pejumelivaisi, abaxë apo pejumeyapëtaevi pexaniajailivaisicuene. Vaxaitsi jamatabëcueneitayotsianatsi pamonaë pijamatabëcueneitaquirivi, Dioso pejumelivaisivecua saya pejinavanapaevi," pajamatabëjamënu tsabiabi. ²⁰ Pajamatabëjumaitsimënu tsabiabi: "Vaxaitsi cajena nacacajëpa vajayapëtaeyaexanaenexa pamonaë abaxë apo yapëtaë pacuenia Dioso jamatabëcueneabi. Nacacajëpanua vajayapëtaeyaexanaenexa pamonaë ata pejanajumecovënëtsivi Dioso. Nacacajëpa bajarapacuenia vajayapëtaeyaexanaenexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaeyaexana pacuenia jivi exanaejitsia," pajamatabëjamë tsabiabi. ²¹ Bajarapacuenia paxamë patsipaebabiabi atamë itsamonaejavabelia, itsiata paxamë ata apo paexanaemë bajarapacuenia. "iPëtsa panacobetoxotame," pajamë tsabiabi itsamonaejavabelia. Itsiata paxamë panacobetoxotabiabame. ²² "Pëtsa panaperabëquenetsi-ataneme itsavajavabelia panijavajivivecua," pajamë tsabiabi ata itsamonaejavabelia, itsiata paxamë panaperabëquenetsiataeyabiabame itsavajavabelia panijavajivivecua. Paxamë pajumaitsimë tsabiabi: "Jumapecataya pexanaenëanëjavabelia penavajëcaecuene bitso abeje. Itsa pajonejitsipame jumapecataeya pexanaenëanë penubenaebota, pacajamatabëcuene bijianaejitsipa," pajamë tsabiabi. Itsiata paxamë pajoneyabiabame jumapecataeya pexanaenëanë penubenaebota penamatamotsijavanë, ofrendacuenia pebijavanë, panenacobetoxotabiabinexa. ²³ Paxamë pajudíovimë jivi picani patsipaebabiabame Dioso Moiséspijinëta penajumecopatsilivaisi, bitso pexanepanelivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yayataë Dioso. ²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaeba. Dioso pejumelivaisibaxutota tajëvelia itsa pacavajunupaeba, jumaitsi paxamë yabara mapacueniaje: "Pamonaë apo judíovi, pibisiacuenia Dioso baracuaicuajai tsane judíovi xaniavaetsia apo petsitajinavanapaexae," jai tajëvelia Dioso pejumelivaisibaxutota paxamë Dioso apo panejumecovënëtsijavanexa yabara.

²⁵ Paxamë pajudíovimë papebijivimë, pacaperabëcaucuba itsa abaxë patsiquirinacuetoximë. Baitsi pacabouperabëcaucuba. Bajarapacuenia pacaperabëcaucuba panenayapëtaenexa Dioso papijajivicuene. Bajarapacuenia pacatonamatamota matapania itsa pajumecovënëtanapame Dioso Moiséspijinëta

penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papecaperabëcaucubivi ata, itsiata Dioso apo papijajivimë tsipae. ²⁶ Pamonaë apo judíovi ata, apo peperabëcaucubivi atatsi, pejumecovënëtanapaexae pacuenia Dioso Moiséspijinëta penajumecopatsilivaisi itorobatsi, nexata bajarapamonaë ata Dioso pijajivicuena tanetsi. ²⁷ Pamonaë apo judíovi, apo peperabëcaucubivi atatsi, itsiata pejumecovënëtanapaexae Dioso Moiséspijinëta penajumecopatsilivaisi, bajarapamonaë itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtaë atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuena apo taetsi. ²⁹ Pajivi pepacuene Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuene Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene rajutatsi Espiritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponaponaë saya mapanacuapijivi pesivabarëyanexatsi.

3 ¿Detsa xua judíovi xaina Diosojavabelia, pamonaë apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua? ² Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaëjavabelia. ³ Itsamonae judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacuenia yabara pajamatabëjumaitsimë mapacueniaje: "Dioso meta itsiata apo exanaë tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi," pajamatabëjamë pëtsa Dioso yabara. ⁴ Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje: Xamë Diosomë, pexaniajailivaisi jivijavabelia tsipae-babiabame. Jivi cajumeaebi ata, itsiata daxitajivi peyapëtaenexa, xamë apo nenajumetsënëtsinë,jai Dioso pejumelivaisibaxutota.

⁵ Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejava, najamatabëcueneitajëtsiana daxitajivi peyapëtaenexa Dioso apo pejitsipañëcuene pibisiacuene pexanaejava. Bajaraxuata pamonaë naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: "Dioso pibisiacuene exana itsa naneconitsiaexana pijaneconi pex-

ainaevi," itsa janë tsipae, nexata jamatabëcuenenavëxaniabiaya jumaitsinë tsipae. Tsipaji Dioso itsa apo naneconitsiaexanae tsipae pijaneconi pexainaevi, Dioso apo najamatabëcuenetitajëtsi tsipae pibisiacuene pexanaejava apo pejitsipaenëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. ⁶ Tsipaji Dioso saya jema jivi apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanae tsipae ëpijaneconi pexainaevi. Nexata caejivi canacujitsia pibisiacuene pexanaeneconi yabara, paneconivajëto xainapona, bajarapaneconivajëto Dioso apo naneconitsiaexanapona tsipae.

⁷ Itsamona meta jamatabëcuenenavëxaniabiaya jumaitsi tsane mapacueniaje: "Daxitajivi pecanaëjëtsinexa Dioso apo penajumetsënëtsinëcuene, vaxaitsi yamaxëitojorobiaya jivi livaisi tsipaebabiabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaitsi yamaxëitojorobiaya jivi livaisi vajatsipaebabiabijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanae tsane vajanajumetsënëtabiabiabijava yabara," jai meta tsane itsamona meta jamatabëcuenenavëxaniabiaya. ⁸ Bajarapacuenia itsa najamatabëxainaena bajarapamona, nexata meta jamatabëcuenenavëxaniabiaya mataropotsia jumaitsi tsane: "Pibisiacuene meta vaxanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vaxanaxanabiabijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene," jai meta tsane bajarapamona meta jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamona meta najumetsënëtsiaya xanë yabara jumai tsabiabi: "Pablo raja itorobapona jivi bajarapacuenia pibisiacuene pexanaenexa," jai tsabiabi xanë yabara. Bajarapacuenia pejumaitsi xanë yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja ëjudíovi saicaya aneconijibia Dioso tane daxita mapanacuapijivi vecuaje? Jume raja. Jumaitsinë baja cajena mapacueniaje. Daxitatsi mapanacuapijivitsije pibisiacuene ëvaxanaevi. Judíovi, apo judíovi ata, bajara itsi. ¹⁰ Daxitatsi pibisiacuene vaxanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponapona Dioso pitabarata. ¹¹ Ajibi peyapëtaejivi pacuenia Dioso jamatabëcuenetsi. Ajibi pepacuene pejamatabëthëtovertsina pejumecovënëtsijivi Dioso. ¹² Daxita Diosovecua naxuabiaya jinavanapa. Daxita aja-matabëcuenebeje. Ajibi pexaniacuene pexanabiabijivi.

¹³ Pacuenia petëpaenë pemëthë tuxutsaeba, bajara itsi bajarapamona pecuibovojotota pecuaicuaijijava pibisialivaisi. Pijumeta jivi yamaxëitojorobiabiaba. Pacuenia jomo pecuibovojotota xaina piatanejava, bajara pijinia itsi bajarapamona pecuaicuaijijava penajumetsënëtsilivaisi. ¹⁴ Pecuibovojotota cuaiicuaijai ëpibisialivaisi pianaepanaenexa. ¹⁵ Itsacuene apo exanae atatsi, bepíjia jitsipa jivi pebeyaxuabinexa. ¹⁶ Itsabelia jinavanapa, bejiobiaexanabiaba itsamona. ¹⁷ Bajarapamona apo yapëtae xaniavaetsia peyavajinavanapaenexa jivi. ¹⁸ Bajarapamona apo canaëjëtsi pejunavinexa Diosojavabelia, jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaitsi baja cajena yapëtanetsi mapacuenieje. Bajayata Dioso pejumelivaisi tonajumecopata ëjudíovi picani pejumecovënëtsitanapanaenexa. Itsiata judíovi apo jumecovënëtsicapanepae bajarapalivaisi. Bajaraxuata judíoviyajuvënë, caenë ata, acuenebi pejumaitsinexa: "Xanë cajena apo tonaneconitsinë Dioso," pejinexa. Daxita mapanacuapijivi, judíovi, apo judíovi ata, beyapëtae penaneconitsijava Diosojavabelia. Tsipaji itsajivi ata apo caëjëpaetsi pejumecovënëtsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vaxanaxanapaejava vaxanaxanajamatabëjumaitsinexa mapacueniaje: "Xaniajai rabaja. Xanë ata pibisiacuene taexanaenë," vaxanaxanajamatabëjainexa bajarapalivaisi pejamatabëcueneta.

Pacuenia Dioso aneconijibia tane pajivi najamatabëcuenecopata Jesucristojavabelia yabara pelivaisi

²¹ Aeconoxae baja mapamatacabitaje Dioso nacayapëtaeyaxana pacuenia nacatoexana aneconijibia vaxanaxanaenexa. Dioso apo jamatabëjumaitsi: "Pamona meta jumecovënëtsicapanepa Moiséspijinëta tanajumecopatsilivaisi, bajara ëpamona aneconijibia taenajë," apo jamatabëjai. Pacuenia Dioso capanepaejitsia Dioso pejumecovënëtsivi, bajayata Dioso-jumepaebivi profetavi tajëvelia yaquina Dioso pejumelivaisibaxutota. ²² Mara pacuenia Dioso jivi aneconijibia taneje. Pajivi jamatabëjumaitsi: "Xaniajai. Jesucristo itsa tãpa cruzata, pibisiacuene taexanaeneconi yabara tãpa," jamatabëjai, bajarapajivi Dioso aneconijibia tanetsi. Dioso aneconijibia taenatsi daxita pamona meta jumecovënëta Jesucristo cruzata pesivatëpaejavatsi pijaneconi yabara. Tsipaji Dioso daxitajivi najëpaejatane. ²³ Daxitajivi baja cajena pibisiacuene exana. Bajaraxuata caejivi ata aneconijibia Dioso pejitsipaacuena apo toponapona. Daxitajivi Diosovecua naxuabiaya jinavanapa. ²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pamona meta jumecovënëta Jesucristo cruzata pesivatëpaejavatsi pijaneconi yabara. Jivi apo namatavenona meta pijacuata penaneconimatamotsinexa Diosojavabelia. Tsipaji baja aneconijibia tanetsi Jesucristo pecomuatsixaetsi pibisiacuene pexanaeneconivecua. ²⁵ Dioso copata Jesu-

cristo petēpaenexa cruzata vajanacaneconimata-motsinexa, pibisiacuene vajaexanaeconimi. Nexata itsa jumecovēnētatsi Jesucristo cruzata vajanacasivatē-paejava, nacavecuajibiaexana pibisiacuene vajaexanaeconimi. Bajarapacuenia Dioso copata Jesucristo cruzata vajanacasivatēpaenexa mapanacuapijivitsi. Tsi-paji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacaneconimatamota, pibisiacuene vajaexanaeconimi. Pepo bajayata pejinavanapaevimiyajuvēvēi ata, najamatabēcuenecopaba Diosojavabelia. Nexata bajarapamonaemi pibisiacuene exanae ata, itsiata Dioso apo naneconitsiaexanaetsi. Tsi-paji Dioso tajēvelia yapētane Jesucristo pesivatēpaejavanexa bajarapamonaemi ata pibisiacuene pexanaeconiyabara. ²⁶ Ajena, mapamatacabitaje, Dioso jivi tsitanajamatabēcueneitajēta jivi pibisiacuene pexanaejava Dioso apo pejitsipaenēcuene. Tsitanajamatabēcueneitajētana aneconijibia petaejavanexa pamonaē jumecovēnēta Jesucristo pesivatēpaejavatsi cruzata pijaneconi pevecuajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumecovēnētsixae Jesucristo vajanacasivatēpaejava cruzata vajaneconi yabara. Nexata ayajamatabēcuenejivitsi vajanacataenexa, acuenebi vajajumaitsinexa itsajivijavabelia: “Xanē taexanaejava pejamatabēcueneta, Dioso aneconijibia neta,” vajainexa acuenebi. ²⁸ Vaxaitsi baja cajena yapētantsi mapacueneye. Dioso aneconijibia tane pajivi jumecovēnēta Jesucristo pesivatēpaejavatsi cruzata pijaneconi yabara. Bajarapajivi apo jumecovēnētsi ata Dioso Moiséspijinēta penajumecopatsilivaisi, Dioso itsiata aneconijibia tanetsi pejumecovēnētsixae Jesucristo pesivatēpaejavatsi cruzata pijaneconi yabara.

²⁹ Dioso raja ējudfovi apo pijaDioso. Dioso raja apo judfovi ata pijaDioso. ³⁰ Caenē rabaja Dioso. Pematat-sēnēa baja itsanē Dioso ajibi. Bjaraponē Dioso judfovi aneconijibia tane, pamonaē jumecovēnēta Jesucristo pesivatēpaejavatsi cruzata pijaneconi yabara. Bajara pijinia pacuenia Dioso aneconijibia tane pamonaē apo judfovi ata. ³¹ Vaxaitsi baja xaniavaetsia Jesucristo jumecovēnētatsi vajanacasivatēpaejava cruzata vajaneconi yabara. Nexata Dioso Moiséspijinēta penajumecopatsilivaisi yabara, apo bejamatabējumaitstsitsi: “Dioso Moiséspijinēta penajumecopatsilivaisi tajumecovēnētsijavami, copatajē baja. Tsi-paji baja jumecovēnētajē Jesucristo tanesivatēpaejava cruzata tajaneconi yabara,” apo bejamatabējajitsi. Biji rajane Jesucristo vajanacasivatēpaejava cruzata, itsa jumecovēnētatsi, Dioso Moiséspijinēta penajumecopatsilivaisi ata bajarajota yajavajumecovēnētatsi.

Pacuenia Abrahampijinē bajayata Dioso aneconijibia tanetsi pejumecovēnētsixae pacuenia Dioso najumecapanepaeya jumaitstsitsi yabara pelivaisi

4 Pacatsipaebijitsiatsi pajamatabēcuenelivaisi yabara Abrahampijinē Dioso aneconijibia tanetsi. ² Abrahampijinē pijacuata ēpexaniacuene itsa exanabi-abijitsipa, nexata jumaitsi tsipae Diosojavabelia: “Ēpexaniacuene taexanabiabixae, nexata aneconijibia neta,” jai tsipae. Itsiata baitsi jane Abrahampijinē Diosojavabelia apo jumaitsi bajarapacuenia. Tsi-paji Abrahampijinē ēpexaniacuene pijacuata exanabiabi ata tsipae, bajaraxua yabara Dioso aneconijibia apo taetsi tsipae. ³ Biji rajane Dioso pejumelivaisibaxutota Abrahampijinē yabara jumaitsi mapacueniaje: “Abrahampijinē najamatabēcopatsiaya Diosojavabelia pejamatabējumaitssabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaitsi,’ pejamatabējajitsabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinē yabara. ⁴ Pajivi itsanē pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵ Pajivi apo exanae ata pexaniacuene, itsiata jamatabējumaitsi: “Dioso, ponē penaneconitsivi pijaneconivecua ajibiaexanabiaba, bajaraponē pepacuene necapanepaena pacuenia najumecapanepaeya jumaitsi tanecapanepaenexa,” jamatabējaj, bajarapajivi Dioso aneconijibia taenatsi pecapanepaenexatsi pijaneconivecua. ⁶ Pepo bajayata Davidpijinē vajunupaeba pejamatabēcuenēbarēyajava pamonaē baja Dioso aneconijibia tanetsi. Bajarapacuenia Dioso aneconijibia tanetsi bajarapamonaē pejumecovēnētsixae Dioso najumecapanepaeya pejumaitsicueniatsi. Bajarapamonaē Dioso aneconijibia apo taetsi, pijacuata ēpexaniacuene exanabiabi ata. ⁷ Davidpijinē pepo bajayata tajēvelia bajarapamonaē yabara jumaitsi mapacueniaje:

Jamatabēcuenēbarēya baja tsavanapae pamonaē picani naneconita Diosojavabelia. Barajamatabēcuenēxanepanatsi baja Dioso. Tsi-paji baja pibisiacuene pexanaeconimi, vecuajibiaexanatsi. ⁸ Jamatabēcuenēbarēya baja tsaponaponaē pajivi pibisiacuene pexanaejivi ata, itsiata Dioso aneconijibia itsa tanetsi, jai mapacueniaje Davidpijinē bajayata.

⁹ Bajarapacuenia Davidpijinē itsa jumaitsi, pejamatabēcuenēbarēyatsavanapaevi baja, ējudfovi, peperabēcucubivitsi yabara, apo jumaitsi. Pamonaē apo judfovi, apo peperabēcucubivi atatsi, yabara jumaitsi. Xaniajanē pacuenia pacatsipaebijitsiatsi. Abrahampijinē bajayata Dioso jumecovēnēta najumecapanepaeya pejumaitsicueniatsi. Nexata baja Abrahampijinē Dioso aneconijibia tanetsi pibisiacuene pexanaeconimivecua. ¹⁰ ¿Abrahampijinē tsajane baja pepuaperabēcucutsitsi, Dioso aneconijibia tanetsi? Jume raja. Abaxē apo perabēcucutsinejeva atatsi, aneconijibia tanetsi pejumecovēnētsixae Dioso najumecapanepaeya pejumaitsicueniatsi. ¹¹ Dioso baja

aneconijibia pepuataetsi, Abrahampijinē perabēcaucutatsi. Bajarapacuenia Abrahampijinē perabēcaucutatsi daxitajivi peyapētaenexatsi Dioso aneconijibia petaejavatsi. Bajaraxuata daxita pamonaē apo peperabēcaucubivi atatsi, itsa jamatabējumaitsi: “Xaniajai. Pepacuenē Dioso netoexanaena pacuenia najumecapanepaeya jumaitsi,” itsa jamatabējai, bajarapamonae Abrahampijinē bepexi Dioso tanetsi, apo peperabēcaucubivi atatsi. Abrahampijinē abaxē apo perabēcaucutatsi atatsi, Dioso pejumecovēnētsixae, aneconijibia tanetsi. ¹² Xaniajai rabaja. Abrahampijinē bepexi Dioso tanetsi daxita pamonaē peperabēcaucubivitsi. Bajarapamonae Abrahampijinē bepexi Dioso tanetsi apo ēpeperabēcaucubijavatsi yabara. Biji rajane Abrahampijinē bepexi Dioso tanetsi tsipaji bajarapamonae ata abaxē apo perabēcaucubi atatsi, jumecovēnēta pacuenia Dioso najumecapanepaeya jumaitsi.

Pacuenia tocopiapatatsi pajivi jumecovēnēta pacuenia Dioso najumecapanepaeya jumaitsi petoexanaenexatsi yabara pelivaisi

¹³ Bajayata Dioso najumecapanepaeya jumaitsi Abrahampijinējavabelia: “Carajutsianatsi daxita mapairaje nijairanexa. Nevēnamuto ata, nexi, nemomoxi ata, pijairanexa,” jai Dioso Abrahampijinējavabelia. Bajarapacuenia Dioso jumaitsi Abrahampijinējavabelia tsipaji Dioso aneconijibia tanetsi Abrahampijinē pejumecovēnētsixae pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinē Dioso aneconijibia tanetsi tsipaji jumecovēnēta Dioso Moiséspijinēta penajumecovēnētsilivaisi,” vajajainexa. Tsipaji baja Abrahampijinē pepuatēpae, bexēa Moiséspijinē ponapona. ¹⁴ Dioso najumecapanepaeya itsa jumai tsipae perajutsinexa bajarapaira ēpamonae jumecovēnēta ponapona Dioso Moiséspijinēta penajumecopatsilivaisi, nexata bajarapamonae, Abrahampijinē pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeyajuvēnjivi, apo jumecovēnētsicapanepae Dioso Moiséspijinēta penajumecopatsilivaisi. Bajarapamonae Dioso pejumecovēnētsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumemata-mobi tsipaetsi. ¹⁵ Tsipaji daxita pamonaē apo jumecovēnētsi pacuenia Dioso itoroba Moiséspijinēta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

¹⁶ Dioso cajena najumecapanepaeya jumaitsi Abrahampijinējavabelia amoneya perajutsinexa bajarapaira. Perajutsinexa Abrahampijinē pexijavabelianexa ata, pemomoxijavabelianexa ata. Bajarapaira Abrahampijinē Dioso rajutsiapaebatsi Dioso najumecapanepaeya pejumaitsijavatsi Abrahampijinē pejumecovēnētsixae. Bajarapaira Dioso najumecapanepaeya itsa rajutsiapaeba pamonaē jumecovēnēta Dioso Moiséspijinēta penajumecopatsilivaisi, bajara ēpamonae itsiata apo rajutsiapaebi. Biji rajane rajutsiapaeba

pamonae ata jumecovēnēta pacuenia Dioso najumecapanepaeya jumaitsi, pacuenia bajayata Abrahampijinē jumecovēnēta Dioso najumecapanepaeya pejumaitsicueniatsi. Bajaraxuata daxitatsi, Dioso vajajumecovēnētsivi, Dioso nacatane Abrahampijinē bepexitsi. ¹⁷ Bajarapacuenia Abrahampijinē bepexitsi Dioso vajanacataejavanexa yabara, Dioso pejumaitsijava Abrahampijinējavabelia Dioso pejumelivaisibaxutota tajēvelia jumaitsi mapacueniaje: “Ayaibitsaētoخانeto jivi bepijasalinainēmē cataeyaexanaenatsi,” jai Dioso pejumelivaisibaxutota tajēvelia Dioso pejumaitsijava Abrahampijinējavabelia vaxaitsi yabara. Dioso baja cajena icatsia piasaēyaexanaenē petēpaevimi ata. Xua picani abaxē ajibi mapanacuataje, Dioso baja exana pijumeta.

¹⁸ “Abraham raeta baja pexi apo xinae tsane,” sivajamatabējai atatsi daxitajivi bajayata, itsiata Abrahampijinē Dioso apo jumeaebi. Jumecovēnēta Dioso pejumaitsicueniatsi. Evetaponapona jivi ayaibitsaētoخانeto pamo pexanaenexatsi pacuenia Dioso najumecapanepaeya jumaitsi. ¹⁹ Bajarapamatacabi Abrahampijinē imoxo pexinae cien pavaibeje. Bajaraponē pijava Sara, mavecova. Perujuvayo baja pijinia. Pexi picani pexinaenexabeje, apo caējēpaetsibeje. Tsipaji baja bitso perujujivibeje. Bajaraxua Abrahampijinē nacueneyapētae ata, itsiata jumecovēnēta Dioso pacuenia najumecapanepaeya jumaitsi petoexanaenexatsi. ²⁰ Apo jumeaebi pacuenia Dioso najumecapanepaeya jumaitsi. Bitso biji pevājēnaeyabelia jamatabēcuenevetaponapona pacuenia Dioso najumecapanepaeya jumaitsi petocopiapatsinexatsi. Nexata Dioso yabara Abrahampijinē jumai tsabiabi: “Dioso cajena bitso ayaijamatabēcuenenē,” jai tsabiabi. ²¹ Abrahampijinē xaniavaetsia yapētane Dioso pecaējēpaenēcuenetsi petoexanaenexatsi daxita pacuenia najumecapanepaeya jumaitsi. ²² Abrahampijinē Dioso jumecovēnēta petoexanaenexatsi pacuenia najumecapanepaeya jumaitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumaitsi pacuenia Dioso aneconijibia tanetsi Abrahampijinē pejumecovēnētsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajayapētaenexa Abrahampijinē pelivaisi.

²⁴ Biji rajane nacatoyaquina vaxaitsi ata vajanacamuxujiobinexa. Nexata vaxaitsi ata itsa jumecovēnētatsi pacuenia Dioso najumecapanepaeya jumaitsi, aneconijibia Dioso nacatane. Bajaraponē Dioso vajatuxanenē Jesucristo icatsia asaēyaexanatsi petēpacujinae. ²⁵ Dioso athēbēvetsica itorobica Jesús vajanacasivatēpaenexa mapanacuataje. Nexata Jesús itsa nacasivatēpa, nacaneconimatamota pibisiacuenē vajaexanaeneconimi. Bajaraxuacujinae Dioso icatsia asaēyaexanatsi petēpaejavavecua vajanacavecuaajibi-aexanaenexa vaneconimi. Nexata baja Dioso aneconijibia nacatane Jesús pejamatabēcueneta.

Pacuenia jamatabëcuenebarëya pajivi Dioso aneconijibiatanetsi yabara pelivaisi

5 Dioso aneconijibia nacatane vajajumecovënëtsix-ae pacuenia Dioso najumecapanepaeya jumaitsi. Nexata sivajamatabëcuenebarëyatsi tsavanapae Dioso. Vajatuxanenë Jesucristo vajanacasivatëpaexae vajaneconi yabara, bajaraponë pejamatabëcueneta nacajamatabëcuenebarëyayaexana. ² Vajajumecovënëtsixae Jesucristo vajanacasivatëpaejava, Dioso nacaitaxutotsoniataeyabiaba. Nexata Dioso sivajamatabëcuenebarëyatsi. Tsipaji yapëtanetsi itsamatacabi Dioso vajayajavajinavanapaejavanexa penivenivenacuatsia. ³ Mapanacuapijivi nacabejiobiaexanabiabi ata, itsiata sivajamatabëcuenebarëyatsi tsabiabi. Tsipaji yapëtanetsi vajanacabejiobiaexanabiabicueneta, nacajamatabëcueneasaëyaexanapona Diosojavabelia. Nexata nacajamatabëcuenecaëjëpa vajajamatabëcuenesaëtsinexa, daxita pibisiacuene nacatocopiapatsi ata. ⁴ Itsa najamatabëcuenesaëtatsi, nacatocopiapatsi ata pibisiacuene, Dioso pijinia nacasivarëya. Nexata itsa yapëtanetsi Dioso vajanacasivabarëyajava, nexata jamatabëcueneevetatsi Dioso vajanacatoexanaenexa pacuenia najumecapanepaeya jumaitsi. ⁵ Nexata itsa jamatabëcueneevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajuta Espiritu Santo vajanacatsijamatabëcaenexa. Nexata Espiritu Santo xaniavaetsia nacayapëtaeyaexana Dioso vajanacaasivajava.

⁶ Vaxaitsi bitso ajamatabëcuenesaëjibitsi pibisijamatabëcuenevixaetsi. Acuenebi vajacuata vajanacapanepaenexa Diosojavabelia vajaneconi yajava. Itsiata baitsi jane Dioso pecaëjëtsimatacabita, Cristo nacasivatëpa pibisiacuene vajaexanaeneconi yabara. ⁷ Mapanacuataje itsajivi itsa jamatabëcuenyavenona itsanë, nexata itsa beyaxuabiapaebatsi pejamatabëcuenyavenonaexae, pecajunavi baja apo jamatabëcuenyavenonaet sipae. Itsajivi meta itsiata jamatabëcuenyavenonaejitsipa, beyaxuabijitsia atatsi. Bajarapacuenia jamatabëcuenyavenonaejitsipa itsa bitso pexaniajamatabëcuenenë, ponëjavabelia jamatabëcuenyavenonaejitsia. ⁸ Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcueneitajëta bitso vajanacaasivajava. Dioso pexënato athëbëvetsica itorobica vajanacasivatëpaenexa mapanacuataje. ⁹ Jesucristo vajanacasivatëpaexae, nexata baja maparucaeje Dioso aneconijibia nacatane. Bajaraxuata yapëtanetsi Jesucristo pejamatabëcueneta Dioso vajanacapanepaejavanexa vajanacananeconitsia exanaejavanexamivecua. ¹⁰ Vaxaitsi picani Dioso pijavajabitsaëvitsi. Nexata pexënato vajanacasivatëpaexae, Dioso baja nacabarajamatabëcuenexanepana. Bajaraxuata maparucaeje yapëtanetsi Dioso pepacuene vajanacapanepaejavanexa vajanacananeconitsia exanaejavaminexavecua. Tsipaji pexënato asaë tsaponaponae

vajanacatocuaicuajainënexa paxajavabelia. ¹¹ Orijiibia vaxaitsi bitso sivajamatabëcuenebarëyatsi Dioso vajanacaasivajava. Tsipaji vajatuxanenë Jesucristo pejamatabëcueneta Dioso baja nacabarajamatabëcuenexanepana.

Adánpijinë Cristo ata yabara pelivaisi

¹² Copiaya caenë, Adánpijinë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaëjëpa daxitanacuapijivijava. Tsipaji daxitanacuapijivi pibisiacuene exana. ¹³ Dioso Moiséspijinëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acuenebi pejumaitsijavatsi: "Pananeconitame raja Diosojavabelia," pejaijavatsi pibisiacuene pexanaejava yabara. ¹⁴ Adánpijinë peponaponaejavaveliacujinae, jivi jinavanapa. Bajarapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpaponae. Bajarapamonaemi pibisiacuene itsa exana, itsiata Adánpijinë papibisiacuene exana, cuenejēpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijinëbeje, apo najamatabëcuenejēpaebaje. Adánpijinë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabëcueneta, jivi ayaibitsaëtoxaneto Dioso aneconijibia tanetsi.

¹⁵ Nexata Adánpijinë papibisiacuene exana, apo najëpaebeje papexaniacuene Dioso nacatoexana Jesucristo pejamatabëcueneta. Caenë, Adánpijinë, pibisiacuene pexanaejava pejamatabëcueneta, daxitajivi tēpaponae. Biji rajane Dioso vajanacaitaxutotsoniataejava, bitso pexaniacuene. Tsipaji Dioso athëbëvetsica itorobica vajatuxanenë Jesucristo vajanacasivatëpaenexa mapanacuataje, vajanacavecuajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pecaapanepaenexa jivi ayaibitsaëtoxaneto. ¹⁶ Caenë saya picani Adánpijinë. Itsiata pibisiacuene itsa exana, yacaëjëpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata baitsi jane Jesucristo xaniavaeta daxita xua Adánpijinë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamonaejumecovënëta Jesucristo pesivatëpaejavatsi pibisiacuene pexanaeneconi yabara. ¹⁷ Caenë Adánpijinë pibisiacuene pexanaexae, daxitajivi tēpaponae bajarapamonaemi ata pibisiacuene pexanaexae. Itsiata caenë Jesucristo vajanacasivatëpaexae, maparucaeje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamonaemi jumecovënëta Jesucristo pejamatabëcueneta Dioso aneconijibia petaejavatsi, bajarapamonaemi ajamatabëcuenesaë tsavanapae

tsane Dioso pejumecovënëtsijava Jesucristo peyavenonabiabixaetsi.

¹⁸ Daxitajivi naneconita Diosojavabelia caenë, Adán-pijinië, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamonaë jumecovënëta Jesucristo pesivatëpaejavatsi pibisiacuene pexanaeneconi yabara, Dioso aneconijibia tanetsi. Nexata bajarapamonaë Dioso rajutsianatsi matacabi apo pevereverecejava. ¹⁹ Caenë, Adánpijinë, copiaya apo jumecovënëtsi Dioso pitorobicueniatsi. Nexata bajaraponë pejamatabëcueneta, jivi ayaibitsaëtoxaneto pibisiacuene exana. Nexata icatsia bexëa caenë, Jesucristo, xaniavaetsia jumecovënëta Dioso pitorobicueniatsi. Nexata Jesucristo pejamatabëcueneta, jivi ayaibitsaëtoxaneto Dioso aneconijibia tanetsi.

²⁰ Bajayata Dioso Moiséspijinëta najumecopata jivi pejumecovënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caëjëpaetsi penajamatabëcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapë-tane pibisiacuene pexanaejava. Nexata jivi pevajënaeyabelia pibisiacuene itsa exana, Dioso pijinia pevajënaeyabelia bitso itaxutotsoniataeponatsi. ²¹ Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matacabi apo pevereverecejava vajatuxanenë Jesucristo vajanacasivatëpaexae.

Pacuenia Dioso pejumecovënëtsivi pejanajamatabëcuenë yajavajinavanapa yabara pelivaisi

6 Itsajivi meta jamatabëcuenenavëxaniabiaya jamatabëjumaisi tsane: “Dioso vajanacaitaxutotsoniataexae, aneconijibia nacatane. Nexata icatsia ayaicuenia Dioso vajanacaitaxutotsoniataenexa, vajavajënaeyabelia pibisiacuene exanavanapaenatsi,” jamatabëjai meta tsane jamatabëcuenenavëxaniabiaya. ² Jume raja! Pëtsa baja vaxaitsi pibisiacuene exanatsi pematatsënëa. Petëpaenë baja apo najamatabëxainae pibisiacuene pexanaenexa. Bajara pijinia pacuenia vaxaitsi ata bejamatabëcuenetsitsi pibisiacuene vajaxanaeyaniva. ³ Paxamë bepayapëtaneme pajamatabëcuenë yabara nabautisabatsi. Itsa nabautisabatsi, becaeperabëto nacaexana Jesucristojavabelia. Nexata vaxaitsi bejamatabëjumaisitsi mapacueniaje: “Jesucristo cruzata itsa tēpa, xanë ata betaneyajavatëpae cruzata,” bejamatabëjaisi. Bajarapajamatabëcuenë yabara nabautisabatsi. ⁴ Itsa Jesucristo bevajanacayajavatëpae, nexata bevajanacayajavamëthëtsitsi. Nexata Jesucristo petëpaecujinae, Dioso pesaëta icatsia itsa asaëyaexanatsi, bevajanacayajavaasaëyaexanaetsi icatsia. Vaxaitsi pejanajamatabëcuenë vajayajavajinavanapaenexa, copatatsi baja vajaperujumatabëcuenemi. Bajarapajamatabëcuenë yabara nabautisabatsi.

⁵ Becaeperabëto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatëpae. Nexata Jesucristo petëpaecujinae, Dioso icatsia itsa asaëyaexanatsi, bevajanacayajavaasaëyaexanaetsi. ⁶ Jesucristo itsa rutatsi cruzata pebeyaxuabinexatsi, vajaperujumatabëcuenemi yajavarutatsi vajanacavecuajibiaexanaenexa pibisiacuene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsënëa baja apo bexanaetsi pibisiacuene. ⁷ Pacuenia baja petëpaenë pibisiacuene apo exanae, bajara pijinia vaxaitsi ata bejamatabëcuenetsitsi pibisiacuene vaxanaeyaniva. ⁸ Jesucristo cruzata bevajanacayajavatëpaexae, nexata bejamatabëjumaisitsi mapacueniaje: “Yajavajinavanapaenatsi Jesucristo daxitamatacabijavabelianexa,” bejamatabëjaisi. ⁹ Yapëtanetsi vajatuxanenë Jesucristo Dioso icatsia piasaëyaexanaejavatsi petëpaecujinae. Nexata baja icatsia Cristo pematatsënëa apo tēpae tsane. ¹⁰ Itsa baja Cristo tēpa daxitajivi pibisiacuene pexanaeneconi yabara, caecuenia copiarutsiaya sivatëpa daxitamatacabijavabelianexa. Nexata baja Cristo icatsia pematatsënëa apo tēpae tsane. Biji rajane Dioso yajava daxitamatacabijavabelianexa asaë tsaponaponae tsane athëbëtatsia, itsajotatsia ajibi petëpaecuenë. ¹¹ Nexata paxamë panajamatabëëthëtota pajamatabëjumaisimëre tsavanapae: “Tajaperujumatabëcuenemi baja navecuatëpaeyabajë. Nexata baja pibisiacuene apo exanaenë tsane. Biji rajane asaënë baja tsaponaponae Dioso taneitorobicuenia tatoexanabiabinexa. Tsipaji baja tajatuxanenë Jesucristo neyjavaponapona,” pajamatabëjamëre tsavanapae.

¹² Bajaraxuata pëtsa baja panajamatabëxainabiabame pibisiacuene paneexanaenexa panijacuata panenatojitsipacuenia. ¹³ Pëtsa panacopatame daxita xua pibisiacuene paneexanaenexa. Tsipaji paxamë bepanetëpaecujinae, Dioso icatsia bepapecaasaëyaexanaevi. Nexata pajumaisimëre tsabiabi Diosojavabelia: “Tajatuxanenë, catonucatsi majotaje. Cajamatabëcuenëvetaponaponaenatsi daxitamatacabijavabelianexa pacuenia xamë jitsipame tacatoexanabiabinexa,” pajamëre tsabiabi Diosojavabelia. ¹⁴ Nexata pacacajëjpaena panenajamatabëcuenesaëtsinexa icatsia caevëalia paneexanaeyaniva papibisiacuene panijacuata panatojitsipame. Tsipaji Dioso papecaitaxutotsoniataexae, Dioso pacayavenonabiabiana. Nexata baja apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi.

Pacuenia itsane pajivi nacopata ëpibisiacuene pexanaejavabelia yabara pelivaisi

¹⁵ Itsajivi meta jamatabëcuenenavëxaniabiaya jamatabëjumai tsane: “Dioso vajanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijinëta penajumecopatsilivaisi. Nexata baja itaxutojema pibisiacuene exanavanapaenatsi,” ja-

matabējai meta tsane itsajivi jamatabēcuenenavēxani-abiaya. ¡Jume raja! Pibisiacuene apo bexanavanapaetsi. ¹⁶ Paxamē rabaja xaniavaetsia payapētaneme mapacueneje. Itsa panacopatsipame itsanē papijajivinxamē, nexata pacuenia bajaraponē pacaitorobabiaba, pajumecovēntabiabijitsipame. Bajara pijinia paitsimē tsipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimēcuenia, pacuenia pacajamatabēcuenitorobabiaba, paexanavanapaejitsipame. Nexata bajarapaneconi pejamatabēcueneta papitsipame panetēpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovēntavanapaename Dioso, nexata pacuenia Dioso pacatojitsipa, patoexanavanapaename. ¹⁷ Bajayajebi picani panacopatame pibisiacuene paneexanavanapaenexa. Nexata pibisiacuene bepapijajivimēcuenia, pacuenia pacajamatabecueitorobabiaba, ėpibisiacuene paexanavanapame. Nexata itsiata maparucaeje daxita panejamatabēcueneta pajumecovēntavanapame baja paxexaniajailivaisi itsamonaē pacatsipaeba. Bajaraxuata paxamē yabara Diosojavabelia jumaitsinē tsabiabi: “Xanepana rabaja. Ayaicuenia yavenoname bajarapamonaē,” janē tsabiabi. ¹⁸ Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabēxainame ėpexaniacuene paneexanavanapaenexa. ¹⁹ Peyapēxanepanaecuenia pacatoyaquinatsi mapalivaisije xaniavaetsia panejumeyapētaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimēcuenia pacuenia pacajamatabēcuenitorobabiaba, ėpibisiacuene picani paexanavanapame panevajēnaeyabelia. Itsiata baja aeconoxae panajamatabēcuenierajure Diosojavabelia ėpexaniacuene paneexanavanapaenexa panevajēnaeyabelia. Bajara-pacuenia Dioso pacatojitsipa paneexanavanapaenexa.

²⁰ Pamatacabi picani abaxē ėpibisiacuene paexanavanapame, Dioso papecatojitsipaecuenia apo paexanavanapaemē. Saya jamatejema pajinavanapame. ²¹ Itsiata apo pacatoxanepanaē itsacuenejavayonexa ata daxita papibisiacuene picani paexanavanapame. Payaauramē tsabiabi pibisiacuene paneexanaejava. Pamonaē tsiteca pibisiacuene exanavanapa, bajarapamonaē Diosovecua naxuabiana daxitamatacabijavabelianexa. ²² Paxamē rabaja Dioso pacacapanepa pibisiacuene paneexanaeconimivecua. Bajaraxuata Diosojavabelia panajamatabēcuenierajutame baja Dioso papijajivinxamē. Nexata apo panacueratsimē tsane. Dioso papecatojitsipaecuenia pajinavanapaename. Panetēpaejavanexa paxainaename matacabi apo peverevereaejava. ²³ Pamonaē pibisiacuene pexanaevi, Dioso rajutsianatsi petēpaejavanexa, Diosovecua penaxuabinexa daxitamatacabijavabelianexa. Pamonaē jumecovēnta vajatuxanenē Jesucristo pesivatēpaejavatsi pijaneconi yabara, bajarapamonaē itsamatacabi Dioso amoneya rajutsianatsi matacabi apo peverevereaejava.

Pacuenia Dioso pejumecovēntētsivi Dioso Moiséspijinēta penajumecopatsilivaisi apo bejumecovēntētsi peca-panepaenexatsi yabara pelivaisi

7 Tajamonaē, payapētaneme rabaja Dioso Moiséspijinēta penajumecopatsilivaisi. Nexata baja pijinia payapētaneme pacuenia jivi bajarapalivaisi bejumecovēntavanapa itsa abaxē asaē tsavanapae mapanacuataje. Itsiata baitsi jane itsa baja tēpa, acuenebi baja pematatsēnēa bajarapalivaisi pejumecovēntavanapaenexa. ² Pova baja pamona pexinaeva, acuenebi pevecuanaviatsinexa pamona, penacojibinexa icatsia itsanējavabelia. Tsipaji Dioso Moiséspijinēta penajumecopatsilivaisi itaveta bajarapacuene. Itsiata baitsi jane pova baja pamona vecuatēpatsi, nexata matapania tocopatatsi penacojibinexa icatsia itsanējavabelia ita jitsipa penacojibijava. ³ Pova pamona pexinaeva, itsa nacojibijitsipa itsanējavabelia, pamona abaxē ita asaē tsaponaponae, nexata bajarapova ayaineconi natsiexanaejitsipa Diosojavabelia. Tsipaji pamonavecua itsanējavabelia naperabēquenetsiataē ponaponaejitsipa. Itsiata baitsi jane baja pova baja pamona vecuatēpatsi, Dioso Moiséspijinēta penajumecopatsilivaisi apo itavetsitsi penacojibijava itsanējavabelia. Nexata pova baja pamona vecuatēpatsi, nacojioji ata icatsia itsanējavabelia, ayaineconi apo natsiexanaē tsipae Diosojavabelia.

⁴ Tajamonaē, bajara pijinia paitsimē paxamē ata. Pacuenia petiriva pamona pitorobabiabicueniatsi, jumecovēntabiaba, bajara pijinia pacuenia pajumecovēntabiabame picani Dioso Moiséspijinēta penajumecopatsilivaisi papecaitorobicuenia. Jesucristo bepaneyajavatēpaexae, nexata Dioso Moiséspijinēta penajumecopatsilivaisi bepanevecuatēpae. Nexata baja icatsia apo pajumecovēntavanapaemē bajarapalivaisi papecaitorobicuenia. Maparucaeje Cristo baja papijajivimē, ponē icatsia Dioso asaēyaexanatsi petēpae-cujinae. Cristo icatsia Dioso bepapecayajavaasaēyaexanae pacuenia Dioso pacatojitsipa paneexanavanapaenexa. ⁵ Pamatacabi abaxē Cristo pelivaisi apo jumecovēntētsi, pibisiacuene exanavanapatsi vajacuta vajanatojitsipaecuenia. Nexata bajarapamatacabi ita nacaitaveta Dioso Moiséspijinēta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabijinavanapatsi. ⁶ Itsiata baja maparucaeje palivaisi Dioso Moiséspijinēta najumecopata, bajarapalivaisi vajajumecovēntētsijavami, Dioso baja nacacopabiaexana Cristo bevajanacayajavatēpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinēta penajumecopatsilivaisi. Jume baja cajena. Espiritu Santo raja pejanajamatabēcueneta vajanacaitorobixae, exanavanapatsi bajarapapexaniacuene.

Dioso Moiséspijinëta penajumecopatsilivaisi, pacuenia ata Pablo pibisiacuene pexanaenexa najamatabëxaina, penavajunupaebijava, yabara pelivaisi

⁷ Itsajivi meta jamatabëcuenenavëxaniabiaya jamatabëjumaitsi tsane: “Dioso Moiséspijinëta penajumecopatsilivaisi, itsacuenejavayonexa ata apo xanepanae,” jamatabëjai meta tsane. ¡Jume raja! Itsa ajibi tsipae bajarapalivaisi, nexata apo nacueneyapëtaenë tsipae pibisiacuene taexanaejava. Tsipaji Dioso Moiséspijinëta penajumecopatsilivaisita, itsalivaisianë yajava, jumaitsi mapacueniaje: “Pëtsa cobecaëbame itsajivi pexinaejava,” jai. Nexata itsa apo yapëtaenë tsipae bajarapalivaisi, xanë apo nacueneyapëtaenë tsipae pibisiacuene taexanaejava, itsajivi pexinaejava cobecaëbi atanë. ⁸ Dioso Moiséspijinëta penajumecopatsilivaisi, itsa nitaveta itsamonae pexinaejava tacobecaëbivaniva, nexata caranata bitso betanitorobi tacobecaëbinexa itsamonae pexinaejava. Pamatacabi abaxë apo yapëtaenë Dioso Moiséspijinëta penajumecopatsilivaisi, apo jitsipañë picani taexanaenexa bajarapacuene. ⁹ Bajayata abaxë itsa apo yapëtaenë bajarapalivaisi, jamatejemanë saya. Itsiata pamatacabi xaniavaetsia yapëtaniji xua yabara Dioso nitaveta, nexata jitsipajë bitso pibisiacuene taexanaenexa. Bitso najamatabëxainajë. Bajarapalivaisi pejamatabëcueneta yapëtaniji pibisiacuene taexanaeaxe, Diosovecua naxuabiaya tatëpaejavanexa picani. ¹⁰ Bajarapalivaisi Dioso najumecopata Moiséspijinëta jivi picani jamatabëcuenebarëyaya xaniavaetsia pejinavana-paenexa. Itsiata xanë bajarapalivaisi pejamatabëcueneta apo jamatabëcuenebarëyanë. Tsipaji pibisiacuene taexanaeaxe, bajarapalivaisi pejamatabëcueneta yapëtaniji Diosovecua tanaxuabijavanexa picani. Nexata bitso najamatabëxainajë. ¹¹ Papibisiajamatabëcuene xainajë tajamatabëëthëtota, pibisiacuene neexanaeyaexanabiaba. Nexata pacuenia jumaitsi bajarapalivaisi, naneconitajë picani Diosovecua tanaxuabinexa.

¹² Palivaisi Dioso Moiséspijinëta najumecopata, pexanialivaisi cajena. ¹³ Nexata bajarapapexanialivaisi pejamatabëcueneta yapëtaniji Diosovecua tanaxuabijavanexa picani. Tsipaji xanë tajamatabëëthëtota papibisiajamatabëcuene xainajë pejamatabëcueneta, exanabiabajë pibisiacuene. Bajaraxuata Diosovecua naxuabijitsianë picani. Bajarapacuenia daxitajivi bajarapalivaisi pejamatabëcueneta, nacueneyapëtaena pibisiacuene pexanaejava. Taexanaeaxe xua bajarapalivaisita itaveta, naneconitajë Diosojavabelia. Bajarapalivaisi itsa yapëtaniji, nexata tajamatabëëthëtota papibisiajamatabëcuene xainajë, nitorobapona bitsoyo pibisiacuene taexanaponaenexa.

¹⁴ Palivaisi Dioso Moiséspijinëta najumecopata jivi pejumecovënëtsinexa, yapëtanetsi bajarapalivaisi Dioso penajumecopatsijava. Bajarapalivaisi jivi pejumecovënëtsinexa, bexaina pejanajamatabëcuene. Itsiata baitsi jane xanë bajara apo jamatabëcueneitsinë. Tajacuata saya étanatojitsipaecuenia exanapona-

jë. Caranata saya najamatabëxainabiabajë ëpibisiacuene taexanabiabinexa, papibisiajamatabëcuene tajamatabëëthëtota xainajë taneitorobabiabicuenia.

¹⁵ Xua pexaniacuene, jamatabëexanabiabajë picani. Itsiata bajaraxua apo exanabiabinë. Biji papibisiacuene apo jitsipañë picani taexanabiabinexa, bajaraxua caranata exanabiabajë. “¿De tsaeta xuajitsia bajarapacuenia exanabiabajë?” jamatabëjanë belia. ¹⁶ Itsa exanabiabajë papibisiacuene picani apo jitsipañë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopatsilivaisi pexanialivaisicuene. Tsipaji Dioso penajumecopatsilivaisi itaveta pibisiacuene pexanaejava. ¹⁷ Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene. ¹⁸ Tajamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecajëpabiabi pexaniacuene taexanabiabinexa. ¹⁹ Papexaniacuene jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipañë taexanaenexa. ²⁰ Nexata itsa exanabiabajë xua picani apo jitsipañë taexanabiabinexa, nexata bajaraxua apo betanatsitaexanae itajara. Tsipaji papibisiajamatabëcuene abaxë xainajë tajamatabëëthëtota, nexanaeyaexanapona bajarapapibisiacuene.

²¹ Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tsipaji papibisiajamatabëcuene xainajë, abaxë yajavaponaonajë. ²² Tajamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. ²³ Itsiata baitsi jane belia najamatabëcuene yapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipañë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujamatabëcuene saya bepijajivitonëncuenia toponaponaajë.

²⁴ ¡Xanë bitso bejiobinë! Bajarapapibisiajamatabëcuene yabara Dioso picani nenaneconitsiaexanaejitsia tanaxuabinexa Diosovecua daxitamatacabi-javabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia.

²⁵ Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuenecajëpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcuenevetsina tajumecovënëtsinexa pacuenia Dioso itoroba.

Pacuenia Espíritu Santo nacajamatabëcueneyavenona yabara pelivaisi

8 Pamonae baja Jesucristo yajavajinavanapa, bajarapamonae Dioso baja apo naneconitsiaexanaetsi tsane. Bajarapamonae penatojitsipaecuenia, pibisiacuene apo exanavanapae. Biji rajane exanavanapa pacuenia Espíritu Santo tojitsipatsi. ² Nexata bajarapacuenia xanè ata Jesucristo itsa yajavaponaponajë, nexata Espíritu Santo pesaëta neyavenonabiaba xaniavaetsia taponaponanexa. Nexata baja apo exanaponanè pibisiacuene. Papibisiajamatabëcuene picani nenaneconitsiaexanabiaba daxitamatacabijavabelianexa picani tananeconitsiaponaponanexa, bajarapajamatabëcuenemi Espíritu Santo baja nevecuaajibiaexana. ³ Vaxaitsi vajacuata apo nacajamatabëcuenecaëjèpae vajajumecovënëtsinexa Dioso Moiséspijinëta penajumecopatsilivaisi. Bajaraxuata apo nacacaëjèpae vajacuata vajanacapanepaenexa Diosojavabelia. Itsiata Dioso caëjèpatsi vajanacapanepaenexa. Athëbëvetsica Dioso itorobica pepo caenè pexënato. Nexata mapanacuata Dioso pexënato itsa naexana, nacaperabëjèpa picani pibisiacuene vajaxanaevi. Bajaraponë vaxaitsi pibisiacuene vajaxanaeconiconi yabara, nacasivatèpa. Nexata baja nacavecuaajibiaexana papibisiajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. ⁴ Bajarapacuenia Dioso nacatoexana vajanacajamatabëcuenecaëjèpaenexa pexaniacuene vajaxanaejava pacuenia Dioso Moiséspijinëta penajumecopatsilivaisi jumaitsi. Nexata nacacaëjèpa vajaxanaenexa pexaniacuene. Tshipaji apo exanavanapaetsi pacuenia vajacuata natojitsipatsi. Biji rajane exanavanapatsi pacuenia Espíritu Santo nacatojitsipa.

⁵ Pamonae exanavanapa pijacuata penatojitsipaecuenia, bajarapamonae jamatabëcueneenabiabatsi ëpibisiacuene pexanaenexa. Pamonae pijinia exanavanapa Espíritu Santo pejitsipaecuenia, bajarapamonae jamatabëcueneenabiabatsi Espíritu Santo pejitsipaecuenia pexanavanapaenexa. ⁶ Pamonae saya exanavanapa pijacuata penatojitsipaecuenia, bajarapamonae bepejamatabëcuenetèpaevi Dioso pitabarata. Nexata Diosovecua naxuabiaya jinavanapa. Pamonae pijinia exanavanapa Espíritu Santo pejitsipaecuenia, bajarapamonae jamatabëcuenebarëyaya jinavanapa Dioso pitabarata. Bajarapamonae itsamatacabi xainanua matacabi apo peverevereaejava. ⁷ Pamonae saya exanavanapa pijacuata penatojitsipaecuenia, bajarapamonae itoya Dioso. Tshipaji apo exanae pacuenia Dioso penajumecopatsilivaisi itorobatsi. Apo jamatabëcuenecaëjèpaetsi pejumecovënëtsinexa bajarapalivaisi. ⁸ Pamonae saya exanavanapa pijacuata penatojitsipaecuenia, bajarapamonae apo jamatabëcuenecaëjèpaetsi pexanaenexa Dioso pejitsipaecuenia.

⁹ Maparucaeje paxamë apo paexanavanapaemë pacuenia panijacuata panatojitsipame. Espíritu Santo, ponë Cristo itorobica, pepacuene pacatsijamatabëca.

Nexata Espíritu Santo pejitsipaecuenia, paexanavanapame. Pajivi Espíritu Santo apo tsijamatabëcaetsi, bajarapajivi Cristo apo pijajivitonë. ¹⁰ Paneperabëto tēpaena pibisiacuene paneexanaejamatabëcuene. Itsiata Cristo papijajivixaemë, nexata pepo panejamatabëcuene athëbëtatsia jinavanapaena daxitamatacabijavabelianexa. Tshipaji Dioso aneconijibia pacatane. ¹¹ Dioso asaëyaexanatsi Jesús petèpaecujinae. Nexata paxamë Espíritu Santo itsa pacatsijamatabëca, pacuenia Jesús Dioso asaëyaexanatsi petèpaecujinae, bajara pijinia pacuenia paxamë ata Dioso pacaasaëyaexanaena panetèpaecujinae. Nexata panetèpaecujinae Dioso pacaperabëasaëyaexanaena Espíritu Santo papecatsijamatabëcaexae.

¹² Tajamonae, bajarapacuenia Dioso nacaexanaena. Bajaraxuata xanepana vajaxanavanapaenexa pacuenia Dioso nacatojitsipa. Copatatsi baja vajacuata vajanatojitsipaecuenia vaxaxanabiabijavami. ¹³ Tshipaji pibisiacuene itsa paexanavanapaëjitsipame panijacuata panenatojitsipaecuenia, nexata itsa patèpame, Diosovecua panaxuabijitsipame daxitamatacabijavabelianexa. Itsiata bailsi jane Espíritu Santo papayavenonaejamatabëcueneta itsa pacopatame panijacuata panenatojitsipaecuenia pibisiacuene paneexanabiabijavami, nexata itsamatacabi paxainaname matacabi apo peverevereaejava.

¹⁴ Pamonae exanavanapa Espíritu Santo pitorobicueniatsi, bajarapamonae Dioso pexi. ¹⁵ Itsa nacatsijamatabëjunua Espíritu Santo, Dioso pexitsi nacaexana. Saya beprijajivicueniatsi apo nacaexanae cjunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espíritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. ¹⁶ Vajajamatabëëthëtota Dioso pijaEspíritu Santo nacayapëtaeyaexana Dioso pexicuenetsi. ¹⁷ Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuataatsia.

¹⁸ Xaniajai. Maparucaeje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tshipaji baja yapëtanetsi itsamatacabi bitso vajajamatabëcuenebarëyajavanexa Dioso pijanacuataatsia. ¹⁹ Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia bajarapamonaejavabelia. Vaxaitsi baja Dioso vajajumecovënëtsivi, Dioso baja nacajamatabëcuenexaniavaeta. ²⁰ Daxitacuene Dioso pexanaejava mapanacuataje peverevereaponaena. Tshipaji bajarapacuenia Dioso copata peverevereaponaenexa. Bajaraxua apo naneconitsi ata Diosojavabelia, itsiata

vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinē pibisiacuene pexanaejava pejamatabēcueneta. Itsiata baitsi jane itsamatacabi Dioso copiarucaeyaexanaena daxitacuene pevereverecaponaejava. ²¹ Dioso pexitsi nacaasaëyaexanaena vajatēpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena. ²² Yapētanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvivananē ata, bejiobi abaxē. Tsipaji xaina piavitaneuene, petēpaecuene ata. Nexata abaxē tsitecapona bajarapabejiobicuene mapamatacabijavaberena ataje. ²³ Daxita xua tanetsi mapanacuataje, bajaaxua bajarapacuenia apo bejiobi piavitaneuene yabara. Vaxaitsi ata cajena bejiobitsi tsavanapae. Espíritu Santo vajanacatsijamatabēcaexae, yapētanetsi mapacueneje. Dioso pexixaetsi itsamatacabi nacaperabēithianaena pacuenia Cristo perabēithianatsi. Nexata bitso jitsipatsi vajajamatabēēthētovetsina Dioso vajanacaperabēithianaenexa vajaperabēevereverecaejavavecu. ²⁴ Jumecovēnētatsi Jesucristo vajanacasiyatēpaejava pibisiacuene vajaexanaeconi yabara. Nexata yapētanetsi Dioso vajanacaperabēithianaevanexa. Bajarapacueni nexata abaxē copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapatsi tsipae vajanacarajutsinexa. Tsipaji baja ajibi tsipae vajabaracopiaevetavanapaejava itsa baja nacarajutsipa. ²⁵ Nexata abaxē evetavanapatsi xua Dioso nacarajutsipaeba vajanacarajutsinexa. Nexata abaxē copiaevetavanapatsi bajayajebi ata itsajamatabēcueni vecuaxainaenejevatsi.

²⁶ Vajaajamatabēcuenesaëjibixae, Espíritu Santo nacayavenonabiaba mapamatacabi ataje abaxē bajaraxua vajacopiaevetavanapaenexa. Vaxaitsi apo yapētaetsi xaniavaetsia vajavajētsinexa Diosojavabelia. Nexata Espíritu Santo bēpēnēa bitso nacasivanajamatabēxainaeya nacatovajētabiaba asaëyata Diosojavabelia. Xua apo vēnējonecapanepaetsi, Espíritu Santo nacatovajētabiaba. ²⁷ Dioso cajena vajanacajamatabēcueneyapētaenē pacuenia najamatabēxainatsi. Nexata Dioso yapētane xua Espíritu Santo nacatovajētsijitsia. Tsipaji Dioso vajanacatojitsipaecuena, Espíritu Santo nacatovajētabiaba Diosojavabelia Dioso pijajivixaeatsi.

Pacuenia Dioso pejumecovēnētsijivi daxita pibisiacuene tocopiapatsi atatsi, bejamatabēcuenematatoxeneta daxita bajarapapibisiacuene Jesucristo peyavenonabiabixaeatsi yabara pelivaisi

²⁸ Yapētanetsi mapacueneje. Daxita xua apo vajajitsipaecuene, Dioso nacatocopata vajanacatocopiapatabinexa. Nexata bajaraxua nacatocopiapatabiaba saya vajanacajamatabēcuenējētsinexa. Nexata bajaraxua itsa nacajamatabēcuenējēta, apo nacatsitapexaniacuene itajara. Itsiata Dioso vajajumecovēnētsivi yapē-

tanetsi bajaraxua vajanacajamatabēcuenējētsijiva pejamatabēcueneta vajanacajamatabēcueni asaëyaexanaevanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabēxaina. ²⁹ Vajanaexanaevajēnaeya ata, Dioso yapētane pexitsi vajanacaexanaevanexa. Nexata vajanaxanaevajēnaeya ata, Dioso nacasivanajamatabēcuenevereta vajanacaexanaenexa pacuenia pexēnato jamatabēcueni. Nexata vajanaxanaevajēnaeya ata, Dioso nacasivanajamatabēcuenevereta Dioso pexēnato pejuyapijivitsi ayaibitsaētotsi vajanacaexanaenexa. ³⁰ Bajarapacuenia vajanaxanaevajēnaeya ata, Dioso vajanacasivanajamatabēcueni veretsixae, najamatabēxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuajibixaeana pibisiacuene vajaexanaeconi. Nexata baja aneconijibia Dioso nacaeneta. Nexata itsamatacabi Dioso yajavajinavapanatsi Dioso pijapenivenivenaenacuataetsia.

³¹ Nexata Dioso yabara bejumaititsi mapacueneja: “Diosu cajena vajanacayavenonaenē. Nexata itsajivi ata apo caëjēpaetsi vajanacajamatabēcueni matatoxenetsinexa,” bejaitsi. ³² Diosu baja cajena apo nacavecuasiva pexēnato. Biji rajane copata pexēnato vajanacasivatēpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapētanetsi Diosu vajanacarajutsijavanexa daxita vajanamatavenonaecuene ata. ³³ Diosu baja cajena nacaitapeta. Nexata vaxaitsi yabara Diosu jumaitis: “Bajarapamonae baja aneconijibia taniji,” jai Diosu najumecapanepaeya. Nexata cajena itsajivi ata apo caëjēpaetsi vajanacaneconitsinexa Diosojavabelia pibisiacuene vajaexanaejava yabara. ³⁴ Itsajivi ata cajena apo caëjēpaetsi vajanacaneconitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatēpa vajanacaneconimatamotsinexa. Nexata Cristo petēpaecujinae Diosu icatsia asaëyaexanatsi. Maparucaje Jesucristo eca athēbētatsia, Diosu pemuxuneneta, pecujanenia. Cristo pijajivitsi Diosojavabelia nacayajivicuaicuaijai. ³⁵ Cristo baja cajena vajanacaasivanē. Nexata itsajivi ata apo caëjēpaetsi Cristo vajanacaasivacuene vajanavecuacopiarucaeyaexanaenexa. Nacabejiobiaexanae ata tsipae, piayapēbejecuene nacatocopiapatsi ata tsipae, itsiata vajanacaasivanē Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanē Cristo tsiteca nacaasiva tsipae. Bitso bejiobi atatsi tsipae, bitso nacatsiayai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanē Cristo tsiteca nacaasiva tsipae. ³⁶ Vaxaitsi yabara mapajamatabēcuenelivaisi jēpaje. Bajayata Diosu pijajivi navajunupaeba Diosojavabelia pacuenia itsamonae bejiobiaexanaponatsi. Diosu pejumelivaisibaxutota bajarapamonae penavajunupaebijume itanerubena. Jumaitis mapacueneja:

Xamë Diosomë, panijajivixae, daxitamatacabi itsa-monaë jamatabëpanebejejababiaba picani. Pacuenia oveja pebeyaxuabinexa capona, bajarapacuenia jamatabëpaneexanabiaba, jai Dioso pejumelivaisibaxuta.

Bajara pijinia pacuenia vaxaitsi ata aeconoxae nacaexanapona. ³⁷ Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabëcuene mata-toxenetabianatsi. Tsipaji Cristo vajanacaasivanë, nacayavenonabiabiana. ³⁸ Nexata yapëtaniji mapacuenije. Itsacuenejavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajatëpaecuene ata, vajaasaëtsavanapae-cuene ata, ángelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Piayapëbeje-cuene, xua baja nacatocopiapata, xua ata abaxë nacatocopiapatsiijtsia, daxita bajaraxua ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. ³⁹ Athëbëabetsia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacuenejavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tsipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

Pacuenia Dioso pijajivinexa itapeta judíovi yabara pelivaisi

9 Najamatabëcuenecopatajë Cristojavabelia. Nexata apo najumetsënëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espíritu Santo taja-matabëthëtota neyapëtaeyaexana. ² Bitso sivanajamatabëxainajë tavëna judíovi, Israel nacuapijivi. Belia betaajamatabëtane tasivanajamatabëxainaejava bajarapamonae. ³ Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaittsinë: "Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanaejitsipajë bajarapamonae Dioso pecapanepaenexatsi," jamatabëjanë belia tavëna judíovi yabara. ⁴ Bajarapamonae judíovi, Israelpijinë pemomoxi. Bajarapamonae pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonae Dioso apo jumecovënëtsi. Dioso picani itapeta bajarapamonae Dioso pexi pexanaenexa. Bajarapamonae tanenua baja picani Dioso pijapenivenivenaecotia. Dioso baja picani najumecapanepaeya jumaittsinua bajarapamonaeijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonae pejumecovënëttavanapaenexa. Dioso picani itorobanua bajarapamonae pexanaenexa templobo, bajara-

pabota pevajëcabiabinexa Diosojavabelia. Dioso picani najumecapanepaeya jumaittsinua petoitorobinexatsica Cristo bajarapamonae picani pecapanepaenënexatsi pibisiacuene pexanaeconimivecua. ⁵ Bajarapamonae pijasalinaivimi, pevënëjonevimi Dioso pejumecovënëtsijava. Cristo itsa naexana mapanacuataje, judíonëcuenia naexana. Cristo nexata pijamonae judíovi. Bajaraponë Cristo, Diosonë baja cajena, daxitacuene pevetsinë. Nexata bajaraponëjavabelia jivi jumai tsabiabi tsane: "Xamë Cristomë, bitso baja cajena ayajamatabëcuenenëmë," jai tsabiabi tsane daxitamatacabiavabelianexa. Bajara itsi tsane.

⁶ Itsiata daxita judíovi apo jumecovënëtsi pacuenia Dioso najumecapanepaeya jumaittsi. Nexata Dioso apo toexanae daxita judíovijavabelia pacuenia Dioso najumecapanepaeya jumaittsi. Nexata Dioso yabara vaxaitsi jamatabëcuenenavëxaniabiaya apo bejumaittsi mapacueniaje: "Pacuenia Dioso najumecapanepaeya jumaittsi judíovijavabelia petoexanaenexa, bajarapacuenia itsiata Dioso apo toexanae daxita judíovijavabelia," apo bejaittsi vaxaitsi jamatabëcuenenavëxaniabiaya Dioso yabara. Bajarapacuenia Dioso yabara vaxaitsi jamatabëcuenenavëxaniabiaya apo bejumaittsi. Tsipaji Dioso tajëvelia apo itapetsi daxita judíovi pijajivinexa. Bajaraxuata pacuenia Dioso tajëvelia najumecapanepaeya jumaittsi, apo toexanae daxita judíovijavabelia. ⁷ Tsipaji bajayata Abrahampijinë pemomoxi ayaibitsaëto xainae ata, daxita itsiata Dioso apo totaetsi Abrahampijinë pepo pemomoxicuenia. Dioso tajëvelia jumaittsi Abrahampijinëjavabelia mapacueniaje: "Anijanëbeje nexënatobeje xainae atamë tsane, taitapetsinëxae, caenë nexënato, Isaac, pexi catotaenatsi pepo nemomoxicuenia," jai Dioso. ⁸ Bajaraxuata yapëtanetsi mapacuenije. Pajivi naexanae ata Abrahampijinë pemomoxiyajuvënëjivi, itsiata bajarapajivi Dioso apo taetsi Abrahampijinë pepo pemomojivicuenia. Matapania pajivi jumecovënëta pacuenia Dioso najumecapanepaeya jumaittsi, bajarapajivi jane baja Abrahampijinë pepo pemomojivicuenia tanetsi Dioso. ⁹ Dioso tajëvelia najumecapanepaeya jumaittsi Abrahampijinëjavabelia mapacueniaje: "Icatsia caevaicujinae patsianajë. Nexata nijava, Sara, xainaena pexënatonacueto," jai Dioso Abrahampijinëjavabelia Isaacpijinëxexa yabara.

¹⁰ Nexata jane baja xuacujinae Isaacpijinë naexana. Bajaraxuacujinae icatsia bexëa Isaacpijinë baja pepuana-cojiobi, Dioso icatsia tajëvelia jumaittsi vajasalinainë Isaacpijinë pijava Rebecapijivajavabelia, Rebecapijiva baja pepuayacotaponaponaë sapalanëbejenexa. ¹¹⁻¹³ Itsa abaxë bajaraponëbeje apo naexanaebeje, pexaniacuene ata abaxë itsa apo exanaebeje, pibisiacuene ata abaxë itsa apo exanaebeje, bajarapamatacabi Dioso tajëvelia jumaittsi Rebecapijivajavabelia mapacueniaje: "Panacuetonëyo copiaya cavecuanaexanaena, bajaraponëyo jamatabëcueneevetsiana pejuyapijinë pitorobabiabinexatsi pijajivitonëcuenia," jai Dioso tajëvelia Rebecapijivajavabelia. Bajarapacuenia Dioso pejumaittsijava Rebecapijivajavabelia najumejë-

pabeje pacuenia jumaiti Dioso pejumelivaisibaxutota. Rebecapijiva pexēnatobeje yabara Dioso pejumelivaisibaxutota jumaiti mapacueniaje: “Asivanē juyapijinē Jacob, matapijinē Esaú matatoxenetsia,” jai Dioso pejumelivaisibaxutota Dioso pejumaitisijava. Nexata bajaraponēbeje tocopiapatatsibeje pacuenia Dioso tajēvelia jumaiti pacuenia Dioso itapetsijitsiatsi juyapijinē. Baitsi Jacob Dioso pijajivitonēnexa itapetatsi matapijinēvecua. Nexata bajarapacuenia yapētanetsi mapacueenje. Dioso cajena baitapeta pajivi jamatabēitapeta pijajivitonēnexa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajēvelia itapeta juyapijinē matapijinēvecua penaexanaevajēnaeyabeje ata cajena.

¹⁴ Pajivi Dioso jitsipa pitapetsinexa, nexata ita itapeta, bajaraxua yabara vaxaitsi apo bejumaitisitsi mapacueniaje: “Dioso baja pacuenia exana, apo xanepanae,” apo bejaitis vaxaitsi. ¹⁵ Tshipaji cajena Dioso bajayata jumaiti Moisésipijinjējavabelia: “Pajivi jamatabēitaxutotsoniataniji, itaxutotsoniatanaejē,” jai Dioso. ¹⁶ Nexata pajivi Dioso jamatabēitaxutotsoniatane, itaxutotsoniatane. Nexata itsajivi apo jamatabējumaiti ata: “Jitsipajē xanē Dioso taneitaxutotsoniatanaejava,” apo jamatabējai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejitsipacuenua apo exanabiabi ata, itsiata Dioso itaxutotsoniatanetsi. ¹⁷ Palivaisi bajayata Dioso jumaiti Egiptonacua pevetsinējavabelia, bajarapalivaisi Dioso pejumelivaisibaxutota ruca. Jumai tsarucae mapacueniaje: “Xanē catocopatatsi nevetsinexa nijaira. Pini-jicuene taexanaejava exanaenajē paxamē tuatuajēta. Itsiata baitsi jane apo nejumecovēnētšimē tsane. Nexata daxita nacuapijivi neyapētaena tasaēnēcuene,” jai tsarucae Dioso pejumelivaisibaxutota Egiptonacua pevetsinējavabelia Dioso pejumaitisijava. ¹⁸ Nexata pajivi Dioso jamatabēitaxutotsoniatane, itaxutotsoniatane. Pajivi pijinia Dioso jamatabēajamatabēcuenetajayaexana pejumecovēnētšianivatsi, jamatabēcuenetajayaexana.

¹⁹ Nexata meta Dioso yabara pajumaitšimē tsane: “Bajarapacuenia Dioso jivi ita jamatabēcuenetajayaexana pejumecovēnētšianivatsi, nexata bajarapajivi Dioso apo benaneconitsia exanae. Tshipaji bajarapajivi apo jumecovēnētšia Dioso piagamatabēcuenetajaya exanaexaetsi” pajamē meta tsane Dioso yabara. ²⁰ Tajamonae, pētsa bajarapacuenia pajumaitšimē. Dioso yabara cajena bajarapacuenia apo bepajumaitšimē. Tshipaji Dioso pacaexana. Canalito ita caējēpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaiti tšipae: “¿Detsa xuajitsia itsacanalitovecua saicayacuenia nefaratame?” apo jai tšipae pefaratsivatsijavabelia.

²¹ Tshipaji atsananitota canalito pefaratsiva caējēpatsi canalito pefaratsinexa pacuenia jamatabēfarata. Nexata caējēpatsi pefaratsinexa copiaya pexaniacanalito bo tuatuajēta itabētšia peetsinexa. Bajaraxuacujinae bajara paatsananitoyajuvēnējavata caējēpatsi pe-

faratsinexa itsacanalito, beveliacanalito, pecajayababiabinexa saya.

²² Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabēnaneconitsiaexana daxita pamona naneconita bajaraponējavabelia. Jamatabētšitajētana pesaē bajarapamonaejavabelia. Itsiata baitsi jane abaxē bajarajajebi Dioso najamatabēcuenecataita peverebiabivijavabelianexa. ²³ Biji rajane pamona Dioso jamatabēcapanepa, bajarapamona capanepaena. Bajarapacuenia Dioso jamatabēexana vaxaitsi vajanacaitaxutotsoniatavejivaberena, vajanacatsitanajamatabēcuenē itajētšinexa ayaijamatabēcuenē pexanaejava. Tshipaji baja cajena vajanaexanaevajēnaeya ata, Dioso nacaitapeta vajayavajinavanapaenexa athēbētatsia. ²⁴ Vaxaitsi judíovi ajuvēnēvitsi. Itsamonae vaxaitsiyajuvēnēvi apo judíovi. Itsiata Dioso nacajunata daxitatsi pijajivonexatsi. ²⁵ Dioso pejumelivaisibaxutota, bajayata Oseaspijinē peyaquinaebaxutota, Dioso pejumaitisijava apo judíovi yabara, tajēvelia jumaiti mapacueniaje:

Pamona picani apo tajajivi, bajarapamona yabara jumaitšimē tsane: “Tajajivi raja mapamonaaje,” janē tsane. Bajarapamona picani apo jitsipañē. Itsiata bajarapamona yabara jumaitšimē tsane: “Tajajivi raja mapamonaaje, tasivavi,” janē tsane. ²⁶ Panacuapijivijavabelia picani jumaitšimē tsane: “Paxamē raja apo patajajivimē,” janē tsane picani, itsiata bajarapanacuapijivi bexēa nejumecovēnētšiana. Nexata bajarapanacuapijivi yabara itsamonae jumai tsane: “Mara pamonaaje Dioso piasaētšaponaponaenē pexije,” jai tsane, jai Oseaspijinē bajayata peyaquinaebaxutota, pamona apo judíovi ata, Dioso pijajivi pexanaejavanexatsi yabara.

²⁷ Isafaspijinē pijinia bajayata tajēvelia judíovi yabara jumaiti mapacueniaje: “Israelpijinē pemomoxi bitso ayaibitsaētōxaneto tsane. Pacuenia manuamenepijitajetaboatsapērē itsi, bajara itsane. Itsiata baitsi jane bajarapamonaeyajuvēnēvi, caejiviyobeje saya, Dioso capanepaenatsi. ²⁸ Daxita pamona naneconita Diosojavabelia, bajarapamona naxanitsiayo Dioso naneconitsiaexanaena,” jai Isafaspijinē peyaquinaebaxutota. ²⁹ Itsabaxutota pijinia Isafaspijinē peyaquinaebaxutota, icatsia jumaiti mapacueniaje:

Dioso raja ángelevi ayaibitsaētōxaneto penamatacaitorobinē. Bajaraponē Dioso ita apo nacaitaxutotsoniatē tšipae, nexata daxitatsi vaxaitsi, Israelpijinē pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata, jai Isafaspijinē peyaquinaebaxutota.

Pacuenia judíovi apo jumecovēnētšia pexanialivaisi jivi pecapanepaelivaisinexatsi yabara pelivaisi

³⁰ Vaxaitsi yapētanetsi mapacueenje. Apo judíovi picani apo jumecovēnētšia ata Dioso aneconijibia petanexatsi, itsiata Dioso aneconijibia tanetsi, pejumecovēnētšixae Jesucristo pesivatēpaejavatsi pibisi-

acuene pexanaeneconi yabara. ³¹ Itsiata baitsi jane judíovi jamatabëcuenenavëxaniabiaya jumai tsabiabi: "Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconihibia nacataena," jai tsabiabi. Itsiata bajaraxua yabara Dioso aneconihibia apo taetsi. Tspaji apo caëjëpaetsi pejumecovënëtsicapanepaenexa bajarapalivaisi. ³² Apo caëjëpaetsi Dioso aneconihibia petaenexatsi. Tspaji judíovi apo jumecovënëtsi Jesucristo pesivatëpaejavatsi pibisiacuene pexanaeneconi yabara. Biji rajane jamatabëcuenenavëxaniabiaya jumai tsabiabi. "Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconihibia nacataena," jai tsabiabi. Bajaraxuata judíovi Diosovecua naxuabijavanapa, Cristo Dioso athëbëvetsica pitorbijavatsitsica, apo pejumecovënëtsixae. Caranata saya anaepanabiaba bajarapalivaisi yabara. ³³ Dioso tajëvelia Cristo yabara pejumaitisijava, Dioso pejumelivaisibaxutota jumaiti mapacueniaje:

Puenetanutsianajë Jerusalén tomarata ponë itorobijitsianë jivi pecapanepaenexa. Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovënëtsiana bajaraponë, bajarapajivi apo nacueratsi tsane, jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

10 Tajamonae, jitsipajë bitso tajamatabëëthëtovetsina judíovi Dioso pecapanepaenexatsi. Bajaraxuata tovajëtabiabajë Diosojavabelia. ² Judíovi picani Dioso ayaiacuenia bitso jamatabëtonacuenebabia-ba Dioso pesivabarëyanexatsi. Itsiata baitsi jane apo yapëtae pacuenia Dioso tojitsipatsi petoexanavana-paenexa. Judíovi saya jamatabëcuenenavëxaniababia-ba. ³ Bajarapamonae apo yapëtae pacuenia exanaejitsia Dioso aneconihibia petaenexatsi. Jamatabëcuenenavëxaniabiaya jumai tsabiabi: "Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconihibia nacataena," jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconihibia petaenexatsi. ⁴ Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconihibia tanetsi. Bajaraxuata pematatsënëa baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconihibia petaenexatsi.

⁵ Pamonaë jitsipa Dioso aneconihibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaiti mapacueniaje: "Pajivi jumecovënëtsicapanepaena daxita pacuenia bajarapalivaisita itorobatsi, bajarapajivi matapania Dioso aneconihibia taenatsi," jai Moiséspijinë bajayata peyaquinaelivaisita. ⁶ Nexata baja pamonaë jumecovënëta Cristo pesivatëpaejavatsi pibisiacuene pexanaeneconi yabara, bajarapamonae pejumelitavetsinexatsi, Dioso jumaiti mapacueniaje:

"Pëtsa pajamatabëjumaitisimë: '¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?' pajamatabëjamë pëtsa. ⁷ Pëtsa pajamatabëjumaitisimëna: '¿Jipatsa meta ponaena, itsabereca petëpaevi jinavana-pa, piasaëyaexanaenexa petëpaevivecua vajanacayavenonaenënexa?' pajamatabëjamë pëtsa, jai Dioso jivi pejumelitavetsijava. Nexata itsajivi ata apo bejamatabëjumaiti bajarapacuenia. Tspaji baja Cristo athëbëvetsica patsica vajanacasivatëpaenexa mapanacuataje. Petëpaecujinae ata baja icatsia Cristo asaë petëpaejavavecua vajanacacapanepaenexa. ⁸ Dioso aneconihibia vajanacataejavanexa yabara, Dioso pejumelivaisibaxutota jumaiti mapacueniaje: "Dioso rabaja pejumelivaisi panatoxainame. Bajara palivaisi yabara panabarëcuaicuaijamë tsabiabi. Panajamatabëëthëtota ata baja bajarapalivaisi yabara panajamatabëxainabiabame," jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara. ⁹ Itsamatacabi Diosojavabelia papecacapanepaevi tsane itsa peaxanavanapaename mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene. Pajumecovënërenua panejamatabëëthëtovavetsina Jesús petëpaecujinae icatsia Dioso piasaëyaexanaejavatsi. ¹⁰ Tspaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneconihibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanexatsi.

¹¹ Dioso pejumelivaisibaxutota jumaiti mapacueniaje: "Pajivi jumecovënëtsiana, bajaraponë apo nacueratsi tsane," jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara. ¹² Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaiacuenia Dioso itaxutotsoniatane daxita pamonaë vajëta bajaraponëjavabelia. ¹³ Cristojavabelia jivi penavajëtsijavanexa, Dioso pejumelivaisibaxutota jumaiti mapacueniaje: "Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi," jai Dioso pejumelivaisibaxutota. ¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. ¹⁵ Dioso pija-jivi itsa apo itorobi tsipae daitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota

jumaitsi mapacueniaje: “;Pexaniacuene bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi peca-panepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipae-bilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷ Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

¹⁸ Judíovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanëjava. Nexata baja Dioso pejumelivaisi yacaëjépa daxitanacuanëjava, jai Dioso pejumelivaisibaxutota.

¹⁹ Judíovi baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumaitisijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae tajajivi exanaenajë. Nexata bajarapamonae pacuenecaëbianame. Bajarapamonae tajumelivaisi apo jamatabëjumeyapëtae picani. Itsiata tajajivi exanaenajë. Nexata bajarapamonae pacuenecaëbi-aanaepanaename, jai Moiséspijinë bajayata peyaquinaebaxutota Dioso tajëvelia pejumaitisijava judíovijavabelia.

²⁰ Isaíaspijinë ata bajayata ajumejunavijibia jumaitsi Dioso tajëvelia pejumaitisijava. Apo judíovi yabara Dioso pejumaitisijava, Isaíaspijinë jumaitsi mapacueniaje:

“Pamonae picani apo nejitsipae, apo nejumecovënëtsinua, bajarapamonae itsiata itsamatacabi nejumecovënëtsiana. Nexata baja neyapëtaena. Bajaramonae apo nevënëlivaisiyanijobi ata, najamatabëcueneitajëtsianajë bajarapamonaejavabelia,” jai Dioso tajëvelia, jai bajayata Isaíaspijinë.

Bajaraxuata nayapëtane tajëvelia Dioso penajamatabëcueneveretsijava pecapanepaenexa apo judíovi ata. ²¹ Biji rajane judíovi yabara Dioso pejumaitisijava, Isaíaspijinë bajayata jumaitsi mapacueniaje: “Daxitamatacabi junatabiabajë pamonae apo nejumecovënëtsi. Bajarapamonae apo exanae taitorobicuenia,” jai bajayata Isaíaspijinë Dioso pejumaitisijava judíovi yabara. Nexata nayapëtane mapacueneje. Judíovi junatsi atatsi Dioso, itsiata apo jumecovënëtsi Dioso peca-panepaenexatsi.

Pacuenia judíovi, Israel nacuapijiviyajuvënëvi, Dioso capanepaejitsiatsi yabara pelivaisi

11 ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanë ata raja judíonënë, Israel nacuapijinënë. Tajasalinainë cajena Abrahampijinë. Benjamínpijinë ata pemomoxiyajuvënënë. ² Bajayata baja cajena vajavajënaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapëtaneme rabaja pacuenia Dioso pejumelivaisibaxutota jumaitsi profeta Elíaspijinë yabara. Profeta Elíaspijinë pina pevajëtsijavata Diosojavabelia, neconitsiaya jumaitsi Israel nacuapijivi yabara mapacueniaje: ³ “Tajatuxanenë, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvënëjavanë, itsajota tajuitabiaba dajubivi pecarajutsinexa ofrendacuenia. Nexata baja xanë caenënë, nijajivitonënë, nacopatajë. Xanë ata baja jamatabënebeyaxuaba,” jai pina profeta Elíaspijinë Diosojavabelia Israel nacuapijivi yabara. ⁴ Itsiata baitsi jane Dioso pina jumaitsi profeta Elíaspijinëjavabelia mapacueniaje: “Apo caenëmë raja. Xainajë baja tajajivi, siete mil ponëbeje, Israel nacuapijiviyajuvënëvi. Bajarapamonae xaniavaetia nejumecovënëtavanapa. Pematabacabëta apo tonubenaenavajëcaenexa Baalvënënë, jumapecaetaeya pexanaenëtsi, pitabarata,” jai pina Dioso bajayata profeta Elíaspijinëjavabelia. ⁵ Bajara pijinia itsi maparucae ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. ⁶ Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi epexaniacuene Dioso petoexanavanapaejava yabara, nexata saya bajarapamonae Dioso itapetsipatsi epexaniacuene petoexanavanapaejava yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovënëtsivi. Bajarapamonae apo jumecovënëtsi Dioso pecapanepaejavanexatsi. Itsiata baitsi jane bajarapamonaejajuvënëvi, caejiviyobeje, Dioso itapetatsi pijajivinexa. Bajarapamonae jumecovënëta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovënëtsi bajarapalivaisi. Tsipaji ajamatabëcuenetaja. Apo jumecovënëtsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. ⁸ Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso ajamatabëcuenetajayaexanatsi. Bajaraxuata bajarapamonae lebabibi ata Dioso pejumelivaisibaxuto, apo jumecovënëtsi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovënëtsivi, yabara. ⁹ Israel nacuapijivi, Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta itsa exanabiaba, jamatabëcuenenavëxaniabiaya jamatabëjumai tsabiabi: "Dioso cajena nacasivabarëya. Bajaraxuata ayaijava vajaxinaejava xainatsi," jamatabëjai tsabiabi. Itsiata baitsi jane pebarëyjavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi. ¹⁰ Bajarapamonae apo yapëtae pijaneconi peyajavajinavanapaejava daxitamatacabi. Pacuenia bitso piarevejava pecaponaevi, nabëxëtsutsiaya bacapona, bajara itsi bajarapamonae pejamatabëëthëtota pijaneconi yabara. Bitso yanajamatabëxaina pijaneconi, jai bajayata Davidpijinë Israel nacuapijivi, Dioso apo pejumecovënëtsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹ Judíovi apo jumecovënëtsi ata Cristo pesivatëpaejavatsi pecapanepaenexatsi Diosojavabelia, itsiata abaxë Dioso apo navecuaxuabi judíovi daxitamatacabi javabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi itsa taena, nexata judíovi ata jumecovënëtsiana Cristo pelivaisi pecapanepaenexatsi Diosojavabelia. ¹² Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovënëtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaibitsaëto jane baja jumecovënëtsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinexa Dioso pejumelivaisi. Nexata jamatabëjumaitsinë: "Dioso cajena netocopata ayaijamatabëcuene pexinaelivaisi jivi tatsipaebapon-aenexa," jamatabëjanë. ¹⁴ Bajarapacuenia Dioso pejumelivaisi pacatsipaebaponatsi tsipaji jitsipajë tajaviravi ata, judíovi, Dioso petoexanaenexatsi pacuenia paxamë ata Dioso pacatoexana papecapanepaenexa. Nexata meta bajarapacuenia judíovi yajuvënëvi ata jumecovënëtsiana Cristo pelivaisi pecapanepaenexatsi Diosojavabelia. ¹⁵ Judíovi yajuvënëvi Cristo navecuaitaveta. Nexata juya pamonaevi apo judíovi, Dioso barajamatabëcuenexanepanaeyatane. Pamatacabi judíovi jumecovënëtsiana Cristo pelivaisi, Dioso pitsianatsi pijajivinexa. Bajaraxua bitso pini-ji cuene tsane. Judíovi aeconoxae bepetëpaevi Dioso

tanetsi apo pejumecovënëtsixae Cristo pelivaisi. Nexata pamatacabi judíovi jumecovënëtsiana Cristo pelivaisi, Dioso taenatsi petëpae cujinae bepiasaëyaexanaevitsi. ¹⁶ Panbë jivi ofrendacuena itsa rajuta Diosojavabelia, copiaya pexanaepanbë barajuta. Nexata bajarapapanmatabëta cotocaevi pexanaepan ata, apo rajutsi ata Diosojavabelia, Dioso pijapanacuena tane. Naejava ata petabunepe jivi ofrendacuena itsa rajuta Diosojavabelia, nexata daxita pemaxërananë ata Dioso pijamaxërananëcuena tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinexa, nexata judíovi pemomoxi ata Dioso pijajivicuena tane.

¹⁷ Dioso tane judíovi, beolivonaemaxërananë. Olivonaenë pexainaenë, pepo olivonaemaxërananë caucuba juya saicayaviria olivonaemaxëranaxi perubinexa bajarapacovëta. Nexata pepo olivonaenëtuatuajëpimera junua bajarapamaxëranaxi enëtuatuajëjava pejuvarubenaenexa pepo olivonaemaxëranajavaberena. Bajara pijinia pacuenia Dioso pacatoexana paxamë apo pajudíovimë. Judíovi apo pejumecovënëtsixae Cristo pelivaisi, paxamë juya, apo pajudíovimë, Dioso papijajivimë pacaexana. ¹⁸ "Judíovivecua Dioso papijajivimë paneexana. Nexata paayaijamatabëcuenevinë judíovivecua," pajamë pëtsa. Tsipaji payapëtaneme mapacueneje. Naejava, petabunepe pejamatabëcueneta, xaniavaetsia nuca. Pemaxërana pejamatabëcueneta, xaniavaetsia apo nucae. Bajara pijinia paxamë ata paitsimë. Apo pacacajëpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovënëtsi Cristo pelivaisi. Nexata judíovi apo pejumecovënëtsixae, Cristo pelivaisi juya paxamë Dioso pacaitaxutotsoniatane. Nexata pacatocopata Cristo pelivaisi panejumecovënëtsinexa Dioso papecapanepaenexa panijaneconivecua.

¹⁹ Nexata meta pajumaitsimë: "Pacuenia olivonaenë pexainaenë, olivonaemaxërananë caucuba, bajarapacovëta juya perubinexa itsaviriaolivonaemaxëranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinexatsi," pajamë meta. ²⁰ Pacuenia olivonaenë pexainaenë, pibisiamaxërana caucuta, bajara pijinia itsi Dioso. Dioso navecuatsata judíovi apo pejumecovënëtsixae Cristo pelivaisi. Pacuenia olivonaenë pexainaenë, pecaucutsimaxërana pecovëta juya itsaviriaolivonaemaxërana ruta, bajara pijinia pacuenia paxamë ata judíovi pejamatabëcuenemi, pacapita Dioso papijajivinxamë panejumecovënëtsixae Cristo pelivaisi. Bajaraxuata pëtsa panataneme paayaijamatabëcuenevimë. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovënëtsijava. ²¹ Pacuenia olivonaenë pexainaenë, pibisiamaxërana bacaucuta, bajara pijinia pacuenia Dioso judíovi navecuatsata apo pejumecovënëtsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovënëtsixae, Dioso navecuatsata pitapetsivimi ata.

Nexata bajarapacuenia paxamë ata Dioso pacanavecu-atsatsipa panevajënaeyabelia itsa apo pajumecovënë-tavanapaemë tsipae Cristo pelivaisi. ²² Bajaraxuata pacanaëjère mapacueneye. Dioso bitso papecaitaxutotsoniataexae, pacatocopata Cristo pelivaisi panejumecovënëtsinexa. Pacanaëjèrenua mapacueneye. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaë apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëtavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainaenë, pibisiamaxèrana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa. ²³ Judíovi Dioso pejumaebijava itsa copatsiana, nexata jumecovënëtsiana Cristo pesivatëpaejavatsi pecapanepaenexatsi Diosojavabelia. Nexata bajarapamonaë ata Dioso pijajivi tsane. Nexata pacuenia olivonaenë pexainaenë, pecaucutsimaxèranami icatsia caevèarena pecovëta ruta, bajara pijinia pacuenia Dioso icatsia pitsianatsi judíovi Dioso pijajivinexa. ²⁴ Pacuenia saicayaviria olivonaemaxèrana ruta pepo olivonaemaxèranacovëta, bajarapacovëta pejuvarucaenexa, bajara pijinia pacuenia Dioso pacapita paxamë apo pajudíovi atamë Dioso papijajivinexamë. Paxamë apo pajudíovirivi atamë, itsiata Dioso pacapita papijajivinexamë. Judíovi biji toyapëxanepanatsi icatsia pepitsinexatsi Dioso pijajivinexa. Tsipaji bajarapamonaë pijasalinaivimi ata Dioso itapeta pijajivinexa.

Pacuenia Dioso capanepaejitsia judíovi, Israel nacuapijivi, yabara pelivaisi

²⁵ Tajamonaë, panejamatabëjumaitsiyaniva mapacueniaje: "Vaxaitsi bitso vajayapëtaevi," panejamatabëjaiyaniva, jitsipajë paneyapëtaenexa mapalivaisije, Dioso muetsia pexainabuatsilivaisimi. Judíoviyajuvënëvi baja cajena ajamatabëcuenetaja. Nexata bajarapamonaë apo jumecovënëtsi Cristo pelivaisi. Nexata ayaibitsaëttoxaneto apo judíovi, itsa jumecovënëtsiana Cristo pelivaisi, matapania jane baja judíovi ata jumecovënëtsiana Cristo pelivaisi. ²⁶ Nexata daxita pamonaë judíovi, itsamatacabi Dioso capanepaenatsi pacuenia baja Dioso pejumelivaisibaxutota tajëvelia jumaitsi. Dioso pejumelivaisibaxutota tajëvelia jumaitsi mapacueniaje:

Jerusalén tomaraverena najetarucaena daxisajivi pecapanepaenënexa. Bajaraponë daxita judíovi, pamonaë Israelpijinë pemomoxi, vecuaajibiaexanaena pibisiacuene pexanaeneconimi. ²⁷ Itsa bajaraponë vecuaajibiaexanaena pibisiacuene pexanaeneconimi, nexata jane baja toexanaenajë pacuenia bajayata tajëvelia najumecapanepaeya jumaitsinë bajarapamonaë pijasalinaivimijavabelia, jai tajëvelia Dioso pejumelivaisibaxutota Dioso pejumaitsiyava judíovi pecapanepaejavanexa Cristo pejamatabëcueneta.

²⁸ Judíoviyajuvënëvi Dioso pijavajabitsaë naexana. Tsipaji apo jumecovënëtsi Cristo pelivaisi pecapanepaenexatsi Diosojavabelia. Itsiata abaxë tsiteca Dioso asiva judíovi. Tsipaji bajayata copiata Dioso itapeta bajarapamonaë pijasalinaivimi pijajivinexa. ²⁹ Xua Dioso rajuta judíovijavabelia, apo vecuacanaviatsi. Pamonaë pijinia Dioso junata pijajivinexa, apo navecuaxuabi tsane. Nexata itsamatacabi bajarapamonaë Dioso athëbëtatsia yajavaecaena daxisamatacabijavabelianexa. ³⁰ Paxamë apo pajudíovimë, pamatacabi abaxë Cristo pelivaisi apo pajumecovënëtsimë, Dioso picani apo papijajivimë. Judíovi apo pejumecovënëtsixae Cristo pelivaisi, nexata apo pajudíovi atamë, Dioso pacaitaxutotsoniatane. Papijajivimë baja pacaexana. ³¹ Bajara pijinia pacuenia itsane judíovi ata. Maparucaeje abaxë judíovi apo jumecovënëtsi Cristo pelivaisi. Itsiata itsamatacabijavabelia judíovi ata Dioso itaxutotsoniatanatsi pacuenia paxamë ata Dioso pacaitaxutotsoniatane. ³² Dioso tocopata daxisajivi pijacuata penatojitsipaecuenia pexanavanapaenexa Dioso pitorobicueniatsi apo pejumecovënëtsixae. Nexata daxisajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniatanexa bajarapamonaë.

³³ ¡Diosu baja cajena pitaxutotsoniatanë daxisajivi pecapanepaenexa! ¡Diosu cajena bitso peyapëtaenë! ¡Daxitalivaisi bitso pejumeyapëtaenënuu! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcueneyapëtaetsi. ³⁴ Diosu pejumelivaisibaxutota jumaitsi mapacueniaje. "Vaxaitsi apo jamatabëcueneyapëtaetsi xua najamatabëxaina Diosu. Apo nacacäjëpaenua vajamuxujobinexa ata. ³⁵ Diosu cajena itsajivijavabelia ata apo amoneyabi. Nexata xua Diosu rajuta itsajivijavabelia, apo rajutsi piamoneyabimatamo," jai Diosu pejumelivaisibaxutota Diosu yabara. ³⁶ Tsipaji cajena Diosu pijacuata exana daxisacuene. Evetanua daxisacuene. Daxisacuene baja cajena Diosu pijajava. Nexata Diosojavabelia vaxaitsi bejumaitsi tsabiabi mapacueniaje: "¡Diosomë, bitso ayajamatabëcuenenëmë!" bejaitsi tsabiabi daxisamatocabijavabelianexa. Bajara itsi tsane.

Pacuenia Diosu pejumecovënëtsinë benajamatabëcuenerajuta Diosojavabelia pijajivitonënexa daxisamatacabijavabelianexa yabara pelivaisi

12 Tajamonaë, payapëtaneme rabaja Diosu ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Diosu pijajavanexa, bajara pijinia pacuenia panajamatabëcuenerajure Diosojavabelia, pacuenia Diosu pacaitorobapona paneexanabiabinexa daxisamatacabijavabelianexa. Nexata ëDiosu pijacuene panetonacuenebijava, pacaasaëmëre tsavanapae papecasivabarëyanexa Diosu. Bajarapacuenia Diosojavabelia panajamatabëcuenerajure panejamatabëëthëtöjavavetsina panetsitanajamatabëcueneitajëtsinexa pepacuene

panejitsipaejava Dioso. ² Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcuene copare Dioso javabelia papecarajutsinexa pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

³ Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaitsitsije. Pacuenia baja aeconoxae pajamatabëcueneitsimë tsavanapae, bajarapajamatabëcuene matatoxenetsia pëtsa panataneme paayajamatabëcuenevimë bitso. Biji rajane pacaajivimë canacujitsia, xuavajëto Dioso pacajamatabëcuene caējëpaeyaexanapona paneexanabiabinexa panenajamatabëcuene copatsixae Dioso javabelia, bajarapacuenia saya baja panataema. ⁴ Jivi itsa naexana, yajavanaexana peperabëto, caeperabëtoreca. Itsiata bajarapaperabëtopyivi saicaya xainapona pevënëanë. Caevito canacujitsia saicaya xaina pexanabiabijavanexa. ⁵ Bajara pijinia pacuenia voxaitsi ata itsitsi, Jesucristojavabelia vajanajamatabëcuene copatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶ Caejivitsi canacujitsia, pacuenia Dioso nacatojitsipa, saicaya nacajamatabëcuene caējëpaeyaexanapona vajaxanabiabinexa. Nexata Dioso betonacuenebavanapatsi pacuenia nacajamatabëcuene caējëpaeyaexanapona. Dioso itsa nacajamatabëcuene caējëpaeyaexana jivi vajatsipaebabiabinexa Dioso pejumelivaisi, nexata betsipaebabiabatsi xaniavaetsia pacuenia nacajamatabëcuene caējëpaeyaexana. ⁷ Itsa pijinia Dioso nacajamatabëcuene caējëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso jamatabëcuene caējëpaeyaexanatsi Dioso pejumelivaisi jivi petsipaebabiabinexa, xaniavaetsia betsipaebabiaba daxita pejamatabëcuenesaëta. ⁸ Pajivi pijinia Dioso jamatabëcuene caējëpaeyaexanatsi itsamonae pemuxujobabiabinexa pejamatabëcueneasaëyaexanaexana Dioso pejumecovënëtsijava, bajarapajivi bemuxujobabiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjava bepejibovijavabelia, berajutabiaba itsajamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonaeta bitso najamatabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

⁹ Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneex-

anaejava. ¹⁰ Pacuenia nacaenenapijivi bitso nasiva, bajarapacuenia panaasivamëre tsavanapae Cristo papijajivixaemë. Itsamonae Dioso pejumecovënëtsivi, patojitsipare itsamonae petaenexatsi ayajamatabëcuenevi paxamë matatoxenetsia. Namataenetsia panayaiyataeyabiabare.

¹¹ Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

¹² Pasivabarëyamëre tsavanapae. Tsipaji rabaja payapëtaneme itsamatacabi panexainaejavanexa matacabi apo peverevereaejava. Itsamonae itsa pacabejiobiaexana Cristo papijajivixaemë, bajayajebi ata, pëtsa pacopatame. Daxitamatacabi pavajëtabi-abare Dioso javabelia pacopatsinejevamë.

¹³ Itsajota Dioso pejumecovënëtsivi namatavenona, payavenonabiabare. Pamonaeta pacasivaxaina panijaboyaberena, xaniavaetsia pacopiapitabiabare.

¹⁴ Pamonaeta pibisiacuene pacaexana, patovajëtabi-abare Dioso javabelia Dioso peyavenonaenexatsi. Patovajëtabi-abare pexaniacuene. Pëtsa patovajëtabi-abame pibisiacuene juya pibisiacuene pexanaenexatsi.

¹⁵ Pamonaeta barëya petocopiapatsixaetsi pexaniacuene, bajarapamonae paxamë ata pajamatabëcuene yavenonaeya barëyamëre. Pamonaeta pijinia nua petocopiapatsixaetsi apo pejitsipaecuene, bajarapamonae paxamë ata pajamatabëcuene yavenonaeayanuema.

¹⁶ Najamatabëcuenejëpaeya pajinavanapare. Pëtsa panataneme paayajamatabëcuenevimë. Pamonaeta beveliajamatabëcuenevi ata, xaniavaetsia pataema. Xaniavaetsia payajavajinavanaparenuema. "Xanë bitso tayapëtaenë itsamonae matatoxenetsia," pajamatabëjamë pëtsa.

¹⁷ Itsajivi pibisiacuene itsa pacaexana, pëtsa juya pibisiacuene panamatamoexaname. Paexanabiabare ëpexaniacuene, xua jivi tsitaxanepanatsi. ¹⁸ Xua Dioso pacajamatabëcuene caējëpaeyaexana paneexanaexana, bajaraxua paexanabiabare xaniavaetsia panejivanapapenaexa, daxitajivijavabelia itsacuene paexanaenejevamë. ¹⁹ Tajamonae bitso patacaasivavi, itsamonae pibisiacuene itsa pacaexana, pëtsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumait-sijava, Dioso pejumelivaisibaxutota jumaitsi mapacueniaje: "Pamonaeta pibisiacuene exana itsamonaejavabelia, xanë naneconitsiaexanaenajë," jai Dioso pejumelivaisibaxutota. ²⁰ Dioso pejumelivaisibaxutota itsabaxutota pijinia jumaitsi mapacueniaje: "Nijavajabitsaënë itsa piapani, rajure pexaejava. Mera itsa jitsipa, rajure mera piapanexa. Bajarapacuenia itsa exaname, nexata caurataena nijavajabitsaënë ata," jai Dioso pejumelivaisibaxutota. ²¹ Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaejitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacue-

nia pibisiacuene papecaexanaejivi ata, paja-matabëcuenecaeviaexanaename.

13 Daxita pamonaе gobierno pijajivi, papecyanacuaevetsivi, pacuenia bajarapamonae pacaitoroba, xaniavaetsia pajumecovënëtabiabare. Tsi-paji bajarapamonae, caenë canacujitsia, Dioso pejamatabëcueneta pacayanacuaeveta. Daxita pamonaе nacua pevetsivi, pacaeveta Dioso petocopatsixaetsi. ² Nexata pajivi apo jumecovënëtsi pacuenia nacuaevetsinë itorobatsi, bajarapajivi Dioso ata apo jumecovënëtsi. Pamonaе apo jumecovënëtsi, nexata bajarapamonae Dioso naneconitsiaexanaenatsi. ³ Pamonaе pexaniacuene exanavanapa, nacuaevetsivi apo cujunavi. Pamonaе pijinia pibisiacuene exanavanapa, nacuaevetsivi cujuna. Paxamë nexata pexaniacuene paexanavanapare ajunavijibia panejinavanapaenexa. Nexata pacasivabarëya tsane papecyanacuaevetsivi. ⁴ Bajarapamonae Dioso pejamatabëcueneta nacuenebavanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecyanacuaevetsivi bepacujunavame. Tsi-paji bajarapamonae Dioso tocopatatsi papecananeconitsiaexanaenexa. Dioso tocopatatsi bajarapamonae penaneconitsiaexanaenexa daxita pamonaе pibisiacuene pexanaevi. ⁵ Bajaraxuata bejumecovënëtatsi pamonaе vajanacayanacuaevetsivi. Apo jumecovënëtatsi saya vajanacananeconitsiaexanaeyaniva. Jume baja cajena. Biji rajane jumecovënëtatsi tsi-paji Dioso pijajivixatsi, vajajamatabëcueneta yapëtanetsi pacuenia bexanavanapatsi. ⁶ Bajaraxuata nacuaevetsivijavabelia impuestomatamo pamatamotabiabame panematomotsipalatata penaevetsinexa. Nacuaevetsivi, Dioso pejamatabëcueneta, tocopatatsi nacua pevetsinexa. Nexata nacua ëpevetsicuene nacueneba.

⁷ Pacuenia pacaevivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabare. Bajarapamonaeajuvënëvi itsa caetuata impuestomatamo, xuavajëto pamoneyabame, pamatamotabiabare. Pamonaе pijinia peyaiyataevitsi, payaiyataeyabiabare. Pamonaе peyaiyataevitsi, bajarapamonae pexaniacuena pabaracuaicuaijamëre tsabiabi. ⁸ Pëtsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamë ata panaasivamëre tsavanapae. Pajivi asiva itsajivi ata pacuenia nasiva pijacuata, bajarapajivi jumecovënëtsicapanepa Dioso Moiséspijinëta penajumecopatsilivaisi. ⁹ Dioso Moiséspijinëta penajumecopatsilivaisi, itaveta mapacueniaje: "Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa najumetsënëtsiaya baracuaicuaijamë itsajivi. Pëtsa cobecaëbame itsajivi pexinaejava," jai Dioso Moiséspijinëta penajumecopatsilivaisi. Nexata paxamë itsa pajumecovënëtsicapanepaejitsipame daxita mapalivaisije, itsalivaisiyo ata yajava, pajumecovënëtsicapanepaejitsipame mapejumaitsilivaisiyoje: "Asivamëre itsajivi ata pacuenia xamë nijacuata nasivamë," pejaiivaisiyo. ¹⁰ Tsi-paji pajivi asiva itsajivi ata, pibisiacuene

apo exanae bajarapajivijavabelia. Bajaraxuata itsa asivatsi itsamonae ata, nexata jumecovënëtsicapanepatsi daxita pacuenia Dioso nacaitoroba.

¹¹ Bajarapacuenia itsamonae ata biasivatsi. Tsi-paji baja yapëtanetsi bitso baja imoxoyo pevajënae icatsia Jesucristo pepatsijavanexatsica. Vajanacapanepaenënexa, najetarucaena vajanacapanepaenexa mapanacuavecuaje. Pamatacabi taxuxuabatsi Jesucristo vajajumecovënëtsijava, nacatsita tajëvajënae abaxë itajara Jesucristo icatsia pepatsijavanexatsica. Aeconoxae baja bitso imoxoyo pevajënae icatsia Jesucristo pepatsijavanexatsica. ¹² Meravi abaxë aitaquiri. Itsa baja icatsia matacabijitsia, pitaquirijavami baja ajibi tsaponae. Bajara pijinia pacuenia imoxoyo baja pevajënae pecopiarucaenexa mapanacuapijivi pibisiacuene pexanaejava yabara pi-pajamatabëcuenetaquirijavami. Tsi-paji baja imoxoyo pevajënae icatsia Jesucristo pepatsijavanexatsica. Bajaraxuata bexanavanapatsi ëpexaniacuene Dioso pejitsipacuenia. ¹³ Aeconoxae baja vajavajënaeyabelia, jivanavanapaenatsi xaniavaetsia vajayapëtaexae pexaniajailivaisi. Apo ponae tsanetsi piatajibivijava. Apo ponae tsanetsi fiestajava ata, itsajota pibisiacuene exanavanapa. Apo exanae tsanetsi pibisiacuene vajavitota. Apo exanae tsanetsi itsacuenejava ata, xua pibisiacuene. Nabijataeya apo najumeanaenotsi tsanetsi. Itsamonae ata apo cuenecaëbi tsanetsinua. ¹⁴ Biji rajane vajëtabiabianatsi vajatuxanenë Jesucristojavabelia vajanacayavenonabiabinexa. Vajatuxanenë Jesucristo nacajamatabëcueneasaëyaexanaena vajatojinavapanexa vajanacatojitsipacuenia. Apo sivanajamatabëxainae tsanetsi pacuenia vajacuata natojitsipatsi pibisiacuene vajaexanaenexa.

Pacuenia Pablo itaveta Roma tomarapijivi Dioso pena-juajumecovënëtsivi itsa janitane pexaejava jumapecataeya pexanaenënejavabelia peyajuvënërajutsivi, "Pibisiacuene exana mapajivije," pejaiyaniva, yabara pelivaisi

14 Pajivi jumecovënëtsi ata Jesucristo pesivatëpaejavatsi pijaneconi yabara, itsiata abaxë itsa apo ajamatabëcuenesaë pejumecovënëtsijava, bajarapajivi ata xaniavaetsia pacopiapire panenacaetuatsibojavaberena itsa najunua. Bajarapajivi pijaneconi yabara Jesucristo pesivatëpaejavatsi pejumecovënëtsicujinae, copata baja pexaeyabiabijavami jumapecataeya pexanaenënejavabelia perajutsiyajuvënëvi. Nexata baja cujuna pexaejava, bepibisiacuene pexanaejava petaexae. Pëtsa pajumeanaenotame bajarapitsijivijavabelia panexaeyaexanaenexa icatsia bajarapayajuvënëvi. ² Itsamonae Cristojavabelia penajamatabëcuenecopatsivi, jamatabëjumaitsi: "Daxitacuene xanepana vajaxaenexa," jamatabëjai. Itsamonae pijinia abaxë jamatabëjumaitsi: "Dioso nacananeconitsiaexanaejitsipa jumapecataeya pexanaenënejavabelia perajutsiyajuvënëvi itsa xanetsi," jamatabëjai. Nexata ëpeubijava xane jumapecataeya pexanaenënejavabelia perajutsiyajuvënëvi pex-

aejaniva. ³ Nexata pajivi xane jumapecataeya pexanaenëänëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëänëjavabelia perajutsiyajuvënëvi. Pajivi pijinia apo xae jumapecataeya pexanaenëänëjavabelia perajutsiyajuvënëvi, pëtsa neconitsiya jumaiti jivijavabelia: "Pibisiacuene exana pajivi xane jumapecataeya pexanaenëänëjavabelia perajutsiyajuvënëvi," jai pëtsa. Tsipaji Cristojavabelia penajamatabëcuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi. ⁴ Dioso apo pacatocopatsi Dioso pijajivitonë neconitsiya jivijavabelia panejumaitisnexa mapacueniaje: "Xua exana bajaraponë, pibisiacuene. Nexata Dioso naneconitsiaexanaenatsi," panejainexa. Dioso pijajivitonë xaniavaetsia Dioso itsa tonacueneba, xaniavaetsia apo tonacuenebi atanua, caenë, Dioso, toxanepanatsi, pacuenia jamatabëjumaiti, pejumaitisnexa pijajivitonëjavabelia. Dioso cajena caëjëpatati peyavenonaenexa pijajivi pejitsipaecuenia xaniavaetsia petojinavanapaenexatsi pesivabarëyanexa.

⁵ Itsamonae Dioso pejumecovënëtsivi yaiyataeyabiaba matacabi. Nexata itsamatacabianëvecua caematacabi yaiyataeyabiaba. Itsamonae pijinia najëpaeya tane daxitamatacabianë. Pamonaeyaiyataeyabiaba caematacabi itsamatacabianëvecua, bajarapamonae xaniavaetsia beyapëtane pajamatabëcuenelivaisi yabara yaiyataeyabiaba caematacabi. Pamonaeyaiyataeyabiaba tane daxitamatacabianë, xaniavaetsia beyapëtane pajamatabëcuenelivaisi yabara najëpaeya tane daxitamatacabianë. ⁶ Pajivi nacueraeveta itsamatacabi, bajarapajivi nacueraeveta peyiyataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabëexana pacuenia Dioso itorobatsi. Pajivi pijinia xane jumapecataeya pexanaenëänëjavabelia perajutsiyajuvënëvi, bajarapajivi xane peyiyataenexa Dioso. Tsipaji jamatabëjumaiti: "Dioso cajena netocopata daxitacuene tax-aenexa," jamatabëjai. Nexata pexaniajamatabëcuene rajutabiaba Diosojavabelia. Pajivi pijinia apo xae jumapecataeya pexanaenëänëjavabelia perajutsiyajuvënëvi, bajarapajivi apo xae peyiyataenexa Dioso. Tsipaji jamatabëjumaiti: "Mapavije apo xanenë tananeconitsiyajuvënëvi Diosojavabelia," jamatabëjai. Nexata pexaniajamatabëcuene rajutabiaba Diosojavabelia ëpeubijava pexaeyabiabixae.

⁷ Itsajivi ata vaxaitsiyajuvënëjivi, Dioso pejumecovënëtsijivi, apo ponaponae ëpijacuata penatojitsipacuenia pexanaponaponenexa. Biji rajane exanaponaponacuenia Cristo tojitsipatsi. Petëpaematacabinexa ata yabara, apo jamatabëjumaiti: "Tëpaenajë pamatacabi natojitsipajë tatëpaejava," apo jamatabëjai. ⁸ Vaxaitsi abaxë vajaasaëtsavanapaepato, tojinavanapatsi pacuenia vajatuxanenë nacatojitsipa. Itsiata baitsi jane itsamatacabi, tëpaenatsi. Tsipaji Dioso nacatojitsipaena vajatëpaenexa. Aeconoxae abaxë vajasaëtsavanapaevi, vajatuxanenë pijajivitsi tsavanapae. Vajatëpaecujinae ata tsane, tsiteca vajatuxanenë

pijajivitsi tsavanapae tsane. ⁹ Cristo baja cajena nacasi-vatëpa vajatuxanenë vajaexanaenexa. Nexata icatsia Cristo asaë tsaponaponae petëpaecujinae. Bajaraxuata Cristo daxitajivi pijatuxanenë. Piasaëtsavanapaevi, petëpaevi ata, daxita pamonaenajamatabëcuenecopata bajaraponëjavabelia, Cristo cajena pijatuxanenë.

¹⁰ Bajaraxuata nexata jumapecataeya pexanaenëänëjavabelia perajutsiyajuvënëvi paxamë panijabananë pexaejava yabara, baracuaicuaijia apo bepajumaitisimë mapacueniaje: "Maponëje pibisiacuene exana. Nexata Dioso naneconitsiaexanaenatsi," apo bepajamë. Bijiaya ata apo bepataemë bajaraponë. Tsipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponenexa daxita pacuenia exanavanapatsi mapanacuataje. ¹¹ Bajaraxua yabara Dioso pejumelivaisibaxutota tajëvelia jumaiti mapacueniaje:

Dioso tajëvelia jumaiti: "Xanë daxitamatacabijavabelianexa tasaëtsaponaponenë. Nexata tajumaitisjume xaniajanë. Itsamatacabi daxitajivi taitabarata pe-matabacabëta netonubenaena taneyaiyataexae. Daxitajivi nevajunupaebiana Diosonëcuenenë," jai Dioso pejumelivaisibaxutota mapacueniaje Dioso tajëvelia pejumaitisijava daxitajivi yabara.

¹² Nexata vaxaitsi itsamatacabi, caejivitsi canacujitsia, navajunupaebaponenatsi Diosojavabelia daxita pacuenia exanavanapatsi mapanacuataje.

Pacuenia Pablo itaveta Roma tomarapijivi Dioso penajuajumecovënëtsivi Diosovecua pejopaeyaexanaeyani-va petsitaexanaejava pejamatabëcueneta yabara pelivaisi

¹³ Itsamatacabi caejivitsi canacujitsia nubenaenatsi Cristo pitabarata vajanavajunupaebaponenexa pacuenia exanavanapatsi mapanacuataje. Bajaraxuata itsanë vajabananë pexanaejava yabara, apo bebaracuaicuaijitsi pibisiacuena. Biji rajane bejamatabëjumaitisitsi mapacueniaje: "Apo tsitaexanaenë tsane itsacuenejavayo ata, xua yabara itsajivi, Dioso pejumecovënëtsijivi, jamatabëcuenebijianaejitsipatsi," bejamatabëjaiti. ¹⁴ Najamatabëcuenecopatajë xaniavaetsia vajatuxanenë Jesucristojavabelia. Nexata yapëtaniji Dioso tanetocopatsijava taxaenexa xua picani cujunavajë taxaejava Jesucristojavabelia tanajamatabëcuenecopatsivajënaeya. Itsiata meta itsanë Dioso pejumecovënëtsinë bajaraxua itsa xane, jamatabëjumaiti tsipae: "Dioso apo netocopatsi tax-aenexa bajaraxua. Itsa xaejitsipajë, naneconitsipajë Diosojavabelia," jamatabëjai tsipae. Nexata apo xae tsipae bajaraxua. ¹⁵ Panijabananë itsa apo pexanë jumapecataeya pexanaenëänëjavabelia perajutsiyajuvënëvi, pëtsa patsitaxaneme. Tsipaji paxamë itsa patsitaxaejitsipame jumapecataeya pexanaenëänëjavabelia perajutsiyajuvënëvi, panijabananë bepaciasvajamatabëjiobi tsipae. Tsipaji panijabananë bepibisiacuene patsitaexanaejitsipame itsa patsitaxaejitsipame jumapecataeya pexanaenëänëjavabelia perajutsiyajuvënëvi. Nexata jumapecataeya pexanaenëänë-

javabelia perajutsiyajuvënëvi, panijabananë itsa patsitaxaejitsipame, nexata panijabananë asivaya apo pataemë tsipae. Tsipaji itsa pacajanitaejitsipa panexaejava jumapecataeya pexanaenëanëjavabelia perajutsiyajuvënëvi, nexata bajaraponë ata naxaejitsipa. Nexata Diosojavabelia bepenaneconitsinë nataejitsipa penaxaexae jumapecataeya pexanaenëanëjavabelia perajutsiyajuvënëvi. Panetsitaxaejava pejamatabëcueneta Diosovecua panenaxuabiaexanaeyaniva panijabananë, pëtsa patsitaxaneme jumapecataeya pexanaenëanëjavabelia perajutsiyajuvënëvi. Tsipaji rabaja vajatuxanenë Cristo sivatëpa bajaraponë ata penaxuabiyaniva.

¹⁶ Payapëtae atamë, xua picani xanepana paneexanaenexa, itsiata panijabananë itsa cujunava bajaraxua pexanaenexa, pëtsa patsitaexaname. Tsipaji panijabananë pacataejitsipa pibisiacuene bepaneexanaevi.

¹⁷ Vaxaitsi baja najamatabëcuenecopabatsi Cristojavabelia. Nexata jumecovënëtavapanatsi Dioso. Apo nacaitorobi vajanayanijobabiabinexa évajaxaejava yabara, vajaapaejava ata yabara. Biji rajane nacaitoroba xaniavaetsia aneconijibia najamatabëcuenëjëpaeya vajajinavanapaenexa. Nacaitorobanua jamatabëcuenëbarëyaya vajajinavanapaenexa Espiritu Santo vajanacatsijamatabëcaexae.

¹⁸ Pajivi Dioso pijacuene tonacuenëbaponapona, sivajamatabëcuenëbarëyatsi Dioso. Jivi ata xaniavaetsia yaiyatanetsi.

¹⁹ Xua Dioso nacayavenona vajajinavanapaenexa najamatabëcuenëjëpaeya, bajaraxua exanavanapaenatsi. Xua ata nacayavenona namataenetsia vajanajamatabëcuenë asaëyaexanaenexa Diosojavabelia, bajaraxua ata exanavanapaenatsi.

²⁰ Pëtsa patsitaxaneme xua panijabananë tane bepitaevetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinë Diosojavabelia nataejitsipa. Panexaejava pejamatabëcueneta, bajarapajivi Diosovecua pajopaeyaexanaejitsipame. Bajaraxuyaniva pëtsa patsitaxaneme xua cujunava panijabananë. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananë taejitsipa bepibisiacuene paneexanaejava itsa paxaejitsipame.

²¹ Bajaraxuata pëtsa paxaneme jumapecataeya pexanaenëanëjavabelia perajutsiyajuvënëvi. Pëtsa pamanua piamanera paneaitajibiyaniva. Pëtsa paexanemenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaexaname xua panijabananë jamatabëcuenë faefaenaeyaexanaejitsipatsi.

²² Itsa baja xaniavaetsia payapëtaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabëcuenë copatsivajënaeya, saya pamoyamë tsane. Tsipaji Dioso yapëtanepacuenia panajamatabëxainame bajaraxua yabara. jBitso jamatabëcuenëbarëya pajivi pexanabiabijava yabara jamatabëjumaitssi: “Dioso pitabarata aneconijibia toponaponajë,” jamatabëjai! ²³ Pajivi pijinia ja-

matabëjumaitssi ata: “Apo xanepanae tsipae taxaenexa bajaraxua,” jamatabëjai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabëcuenëbijianaejitsipa. Daxita pijinia xua yabara vaxaitsi jamatabëjumaitssi: “Dioso apo jitsipae vajaexanaenexa bajaraxua,” jamatabëjai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

Pacuenia becanaëjëtatsi vajabananë vajajamatabëcueneyavenonaenexa yabara pelivaisi

15 Vaxaitsi ajamatabëcuenesaëtsi Dioso vajajumecovënëtsijava. Nexata beyavenonatsi pamona abaxë jamatabëcuenëfaefaena Dioso pejumecovënëtsijava. Pëtsa exanatsi vaxaitsi vajacuata vajanatojitsipaecuenia. ² Biji rajane caejivitsi canacujitsia becanaëjëtatsi vajabananë vajajamatabëcueneyavenonaenexa. Xua yabara vajabananë ajamatabëcuenësaëjitsia, bajaraxua betoexanavanapatsi vajabananë pejamatabëcuenëvitsabinexa Diosojavabelia. ³ Tsipaji Cristo ata, ponë Dioso athëbëvetsica itorobica jivi pecapanepaenexa, abaxë itsa ponapona mapanacuataje, apo exanae pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumait-sijava, Dioso pejumelivaisibaxutota tajëvelia jumaitssi mapacueniaje: “Pacuenia picani jivi xamë pibisiacuena jamatabëcuaracuauicuaijai, xanë nebaracuauicuaijai tsane,” jai tajëvelia Dioso pejumelivaisibaxutota paxa Diosojavabelia Cristo pejumaitssijava. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovënëtsinexa, vajanacajamatabëcuenë yavenonaenexanua. Bajaraxuata bajayajebi nacabejiobiaexanabiabi ata Dioso pijajivixatsi, itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaitssi bajarapalivaisita vajanacapanepaenexa. ⁵ Itsacuenejavaxi yabara bajayajebi itsa nacajamatabëcuenëjëtaponä, nexata Dioso nacajamatabëcueneyavenonapona. Nacajamatabëcuenësaëyaexanapona bajayajebinexa ata. Pacatovajëtatsi Diosojavabelia Dioso papecayavenonaenexa, najamatabëcuenëjëpaeya daxita panejinavanapaenexa Jesucristo papecatojitsipaecuenia. ⁶ Nexata daxita paxamë najamatabëcuenëjëpaeya vajatuxanenë Jesucristo paxa Diosojavabelia pajumaitsimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

Pacuenia apo judíovi ata pexanialivaisi tsipaebatsi pecapanepaelivaisinexatsi yabara pelivaisi

⁷ Pajudíovinë, apo pajudíovi atamë, najëpaeya Cristo nacapita pijajivinexatsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yaiyataena. Nex-

ata daxitajivi jumai tsabiabi tsane Dioso yabara: "Dioso cajena bitso ayaijamatabëcuenenë. Tsipaji pijajivi yavenona xaniavaetsia petojinavanapaenexatsi," jai tsabiabi tsane. ⁸ Mara pacajumaitstsije. Jesucristo athëbëvetsica patsica mapanacuayabetsicaje peyavenonaenexa judíovi. Bajarapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaitsi judíovi pijasalinaivijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia. ⁹ Jesucristo athëbëvetsica patsica peca-panepaenexa apo judíovi ata. Nexata apo judíovi ata Jesucristo pejamatabëcueneta: "Diosomë, bitso ayaijamatabëcuenenëmë," jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumait-sijava, Dioso pejumelivaisibaxutota jumaitsi mapacueniaje:

Xanë tajamatabëcueneta, daxitanacuanëpijivi: "Diosomë, bitso ayaijamatabëcuenenëmë," cajai tsabiabi tsane. Catonaxëanabiabiananua vajianë ata, jai Dioso pejumelivaisibaxutota paxa Diosojavabelia Cristo pejumait-sijava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaitsi mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumaitsi icatsia mapacueniaje:

Paxamë apo pajudíovimë, Diosojavabelia pajumaitsimëre: "Diosomë, bitso ayaijamatabëcuenenëmë," pajamëre. Paxamë, padaxitamë, itsamonaejavabelia pajumaitsimëre: "Caenë Dioso bitso ayaijamatabëcuenenëmë," pajamëre, jai Dioso pejumelivaisibaxutota.

¹² Isaíaspijinë pijinia itsabaxutota tajëvelia yaquina Jesucristo pelivaisi. Jumaitsi mapacueniajè:

Penacuetonëyo naexanaena. Nexata Isaípijinë bepe-momonëyocuenia naexanaena. Itsa vitsabiana, Dioso evetsiaexanaenatsi jivi, daxitanacuanëpijivi. Pamonae apo judíovi, jumecovënëtsiana bajaraponë pesivatë-paejavatsi pecapanepaenexatsi pijaneconivecua, jai tajëvelia Isaíaspijinë peyaquinaebaxutota Jesucristo yabara.

¹³ Yapëtanetsi Dioso vajanacacapanepaejavanexa Jesucristo pejamatabëcueneta. Nexata pacatovajëtatsi Dioso papecajamatabëcuene barëyayaexanaenexa. Pacatovajëtatsinua jamatabëcuene xanepanaeya panejinavanapaenexa. Bajarapacuenia Dioso pacajamatabëcuene yavenonaena tsipaji Dioso pajumecovënëtamë. Espíritu Santo ata, ponë pacatsijamatabëcca, pesaëta panevajënaeyabelia pacajamatabëcuene asaëyaexanaponaena Dioso papecacapanepaejavabelianexa.

¹⁴ Tajamonae, pacayapëtanetsi paxamë papexaniajamatabëcuenevijavamë. Pacayapëtanetsinua paxamë bitso paneyapëtaejava Cristo papecasivatëpaejava pibisiacuene paneexanaeneconi yabara. Pacayapëtanetsinua paneyapëtaejava xaniavaetsia namataenetsia panenamuxujobinexa. ¹⁵ Tajamonae, palivaisi baja payapëtaneme, bajarapayajuvënëlivaisi panenajamatabënapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. ¹⁶ Dioso taneitaxutotsoniataexae, bajarapacuenia nitoroba Jesucristo pijajivitonënexanë Jesucristo pelivaisi tatsipae-babiabinexa apo judíovijava. Nexata apo judíovi tsipae-babiabajë pexanialivaisi, Jesucristo pelivaisi, peca-panepaelivaisinexatsi Diosojavabelia. Espíritu Santo pejamatabëcueneta apo judíovi ata Cristo pijajivi exanatsi. Bajaraxuata Dioso sivabarëyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonëxaenë, Jesucristo neyavenonabiaba itsa tonacuenebabiabajë. Bajaraxuata barëyanë tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso. ¹⁸ Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabibilivaisi, itsa tanenua Dioso pesaëta pinijicuene taexanaponaejavanë, bajarapamonae jumecovënëta baja Jesucristo pesivatëpaejavatsi pibisiacuene pexanaeneconi yabara. ¹⁹ Vajatuxanenë Dioso pesaëta nejamatabëcuene caëjëpaeyaexana pinijicuene taexanaenexa. Espíritu Santo ata pesaëta nejamatabëcuene yavenona. Bajaraxuata apo judíovi tsipaebaponajë pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajë baja bajarapalivaisi Jerusalén tomarajava. Bajaraxuacujinae tsipaebaponajë daxitanacuanëjava. Tajënacua javabelia ata, Ilírico nacua javabelia, tsipaebaponajë. ²⁰ Itsa tsipaebaponajë pexanialivaisi, Jesucristo pelivaisi, jitsipajë tatsipaebaponaenexa itsaxuayo abaxë jivi apo vënëlivaisitae Cristo. Apo jitsipae-në tatsipaebaponaejava itsaxuayo baja tavajënaeya itsamonae tsipaebapona. ²¹ Bajarapacuenia apo judíovi it-sa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitsi mapacueniaje:

Pamonae abaxë apo vënëlivaisitae, ponë athëbëvetsica Dioso itorobijitsiatsica jivi pecapanepaenexa, bajarapamonae bajaraponë pelivaisi tsipaebianatsi. Nexata bajarapamonae jumecovënëtsiana ponë pelivaisi tsipaebianatsi, jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

**Pacuenia picani Pablo jamatabëponabiaba Roma
tomarabelia yabara pelivaisi**

²² Bajayajebi picani bitso jamatabëpacataeyabiabatsi. Itsiata apo necuenecajëpae taponanexa paxamëjavabelia daxitanacuanëjava Dioso pejumelivaisi tatsipae-banajetarucaexae. ²³ Aeconoxae baja veretajë tanacuenebjava mapanacuajavaje. Nexata jane baja ponaenajë paxamëjavabelia. Tsipaji picani bajayajebi jamatabëpacataeyabiabatsi. ²⁴ Pamatacabi ponaenajë España nacuyabelia, patsianajë copiaya paxamëjavata patacataenexa. Itsa baja nataenatsi, bitso jamatabëcuenebarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponanexa jane baja España nacuyabelia. ²⁵ Bajara masaya pamatacabitaje ponaenajë Jerusalén tomarabelia ofrenda tatocaponanexa Dioso pejumecovënëtsivi. ²⁶ Dioso pejumecovënëtsivi, Macedonia nacupijivi, Acaya nacupijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamona bepejibovi, Jerusalén tomarata pejinavanapae. ²⁷ Macedonia nacupijivi, Acaya nacupijivi ata, apo judíovi. Itsiata tsitanepanatsi bajarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tsipaji judíovi copiaya yapëtane pexanialivaisi pecapanepaelivaisinexatsi Diosojavabelia. Nexata judíovi pejamatabëcueneta, pamona apo judíovi ata, yapëtane baja pecapanepaelivaisinexatsi Diosojavabelia. Bajaraxuata pamona apo judíovi beyavenona juya judíovijavabelia. Judíoviyajuvënëvi aeconoxae bitso namatavenona peyavenonaenexatsi mapanacuata penamatavenonaejavaxi yabara. ²⁸ Copiaya tocalianë tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajë España nacuyabelia, copiaya patsianajë paxamëjavata. ²⁹ Itsa patsianajë paxamëjavabelia, orijibia pacatsipaebianatsi pexanialivaisi, Cristo pelivaisi, bitso panejamatabëcuenebarëyanexa. ³⁰ Tajamonae, pajumecovënëtame vajatuxanenë Jesucristo. Paneasivamënu Espíritu Santo pejamatabëcueneta papecajamatabëcueneitorobixae pataniasivanexamë. Bajaraxuata pexaniacuene pacavajëtatsi. Itsa pavajëtame Diosojavabelia, xanë ata asaëyata panetovajëtsianame, pacuenia tajacuata natovajëtabijabjë. ³¹ Panetovajëtsianame Diosojavabelia tanyavenonaenexa taneitsacueniabianiva Judea nacupijivi, Dioso apo pejumecovënëtsivi. Panetovajëtsianamenua Dioso pejumecovënëtsivi, Jerusalén tomarapijivi, tanevecuapitsinexa xaniavaetsia paofrenda tocaponaejitsianë. Pamona apo judíovi pejebipalataxae, belia bajarapaofrenda apo nevecuapitsi tsipae bajarapamonae judíovi. ³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. ³³ Xanë pacatovajëtabiabatsi Diosojavabelia papecajavaponaponanexa

Dioso. Dioso cajena nacayavenonabiaba jamatabëcuenebarëyaya vajajinavanapaenexa. Bajara it-si tsane.

Pacuenia Pablo jamatabënajinalia peyapëtaevitsi, Roma tomarapijivi, yabara pelivaisi

¹⁶ Payavenonaename vajabanava Febe, pova poneajitsia paxamëjavabelia. Bajarapova yavenonabiaba Dioso pejumecovënëtsivi, Cencrea tomarapijivi. ² Pacopiapitsianame xaniavaetsia bajarapova vajatuxanenë Jesucristo pejamatabëcueneta, pacuenia vaxaitsi copiapitabiabatsi Dioso vajanajuajumecovënëtsivi. Xuanamatavenona bajarapova, payavenonaename. Tsipaji bajarapova yavenonabiaba ayaibitsaëto Dioso pejumecovënëtsivi. Xanë ata neyavenonabiaba.

³ Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebivibeje vajatuxanenë Jesucristo pijacuene. ⁴ Bajarapajivibeje toyai atatsibeje petëpaejavaminexavecu. Nexata jumaitsinë: "Pexaniacuene baja cajena bitso panetoexanamebeje," janë bajarapajivibejevabelia. Itsiata ëxanë bajarapacuenia apo jumaitsinë. Daxita pamona apo judíovi, Dioso pejumecovënëtsivi, bajarapamonae ata, bajarapacuenia jumaitסיםibeje tanecapanepaexaabeje. ⁵ Pamona Dioso pejumecovënëtsivi, pamona nacaetuatabiaba Priscabeje Aquilabeje pijabota, bajarapamonae ata nebajacobiana. Nebajacobiananua tasivanë Epeneto. Bajaraponë daxita Asiavënë nacupijivivecu copiaya najamatabëcuenecopata Jesucristojavabelia. ⁶ Nebajacobiananua María, pova bitso tonacuenebabiaba Dioso pijacuene paxamë tuatua-jëta. ⁷ Nebajacobiananua tajanacuapijinëbeje, Andrónicobeje Juniasvënënebeje. Bajayata bajaraponëbeje panenajuajeba penaneconitsivi pejebabiabibota. Bajaraponëbeje yayataeya baracuaicuaijitsibeje pevëna apóstolevi ata. Xanë ata tanajamatabëcuenecopatsivajënaeya, bajaraponëbeje najamatabëcuenecopatabeje Cristojavabelia.

⁸ Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata. ⁹ Nebajacobiananua Urbano. Bajaraponë ata tonacuenebaponapona vajatuxanenë Jesucristo pijacuene pacuenia vaxaitsi tonacuenebavanapatsi. Nebajacobiananua Estaquis, bitso tasivanë. ¹⁰ Nebajacobiananua Apeles, ponë picani dovathi pejamatabëcueneta jamatabëcuenejëtatsi Cristo pelivaisi pejumecovënëtsijava yabara. Itsiata apo copatsi pejumecovënëtsijava Cristo pelivaisi. Nebajacobiananua Aristóbulo pijamonae. ¹¹ Nebajacobiananua tajanacuapijinë Herodión. Nebajacobiananua Narciso pijamonae, pamona penajamatabëcopatsivi Cristojavabelia. ¹² Nebajacobiananua Trifenabeje Trifosabeje, povabeje tonacuenebabiaba Dioso pijacuene. Nebajacobiananua vajaasivava Pérsida, pova bitso tonacuenebabiaba Dioso pijacuene. ¹³ Nebajacobiananua Rufo, ponë bitso xaniavaetsia jumecovënëta vajatuxanenë. Bajaraponë pena ata nebajacobiana.

Bajarapova bepexënatonë netaeyabiaba. ¹⁴ Nebajacobiananua Asíncrito, Flegonte ata, Hermas ata, Patrobas ata, Hermes ata, itsamonae ata, pamonaë najinavanapa bajarapamonaejavata. ¹⁵ Nebajacobiananua Filólogo, Julia ata, Nereo ata, Nereo pejuyapijiva ata, Olimpás ata, daxita itsamonae ata, Dioso pejumecovënëtsivi, pamonaë najinavanapa bajarapamonaejavata.

¹⁶ Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobiabare. Daxita pina Dioso pejumecovënëtsivi majotaje pejinavanapaevi pacabajacobalia.

¹⁷ Tajamonae, pacatsipaebatsi itsalivaisi. Penajumetsënëtsilivaisi petsipaebaponaevi, panayajivitaename papecayamaxëitojorobianiva. Bajarapamonae namataenetsia pacanajumeanaenotsiaexanaena najamatabëcuenejëpaeya panejinavanapaeyaniva panavecuantsanaenexa. Palivaisi baja paxamë pajumecovënëtamë, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae. ¹⁸ Bajarapamonae apo jamatabëexanae pacuenia jitsipa vajatuxanenë Jesucristo. Biji rajane saya jamatabëexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabëyamaxëitojoroba pamonaë abaxë xaniavaetsia apo jumeyapëtae pexaniajailivaisi.

¹⁹ Daxitajivi paxamë pacavënëlvaisitane xaniavaetsia panejumecovënëtsijava Dioso. Bajaraxuata pacasivabarëyatsi. Pacatojitsipatsi paneyapëtaenexa bitso ëpexaniacuene paneexanaenexa. Pëtsa panacopatame itsajivi ata papecayamaxëitojorobinexa pibisiacuene paneexanaenexa. ²⁰ Dioso baja cajena vajanacayavenonaenë najamatabëcuenejëpaeya vajajinavanapaenexa, itsajivi ata vajanacayamaxëitojorobianiva penajumetsënëtsilivaisita. Nexata Dioso bepíjia pacayavenonaena panejamatabëcuenea-moneyabinexa dovathi. Pacatovajëtabiabatsi Diosojavabelia vajatuxanenë Jesucristo papecayavenonabinexa.

²¹ Pabajacobianame pina Timoteo, Dioso patatona-juanacuenebinëbeje. Pabajacobianamenua pina tajanacuapijivi Lucio, Jasón ata, Sosípater ata.

²² Xanë, Tercionë, mapabaxutotaje Pablo pijume tajumeyaquinaponaenë. Xanë ata pacajamatabënjainatsi. Tsipaji Jesucristojavabelia vajanajamatabëcuene copatsivi.

²³ Pabajacobianame pina Gayo. Naponaponajë Gayo pijabota. Gayo tocopatabiaba daxita Dioso pejumecovënëtsivi penacaetuatabiabinexa Gayo pijabota. Pabajacobianamenua pina Erasto, ponë evetabiaba palata, Corinto tomarapijipalata. Pabajacobianamenua pina vajabanenë Cuarto.

²⁴ Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsitsi tsabiabi: "Diosojavabelia bitso ayaijamatabëcuenenë," jaitsi tsabiabi. Dioso, daxitamatacabijavabelianexa peponaponaenë, cajëpatsi papecayamatabëcuene asaëyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi pecapanepelivaisinexatsi Diosojavabelia. Bajarapalivaisi jivi tsipaebaponajë. Bajarapalivaisi bajayajebi picani Dioso muetsia xainabuata. Dioso nacua pexanaejavaveliacujinae, muetsia Dioso xainabuata Jesucristo pelivaisi. ²⁶ Bajarapalivaisi bajayata Diosojumelivaisipaebivi profetavi tajëvelia yapëtanë baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapëtaeyaexana. Nexata Dioso pijajivi itorobapona daxitanacuanëpijivijava petsipaebinexa Jesucristo pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

²⁷ ¡Caenë rabaja Dioso daxitacuene peyapëtaenë! Bajaraxuata daxitamatacabijavabelianexa vaxaitsi vajatuxanenë Jesucristo pejamatabëcueneta Diosojavabelia jumaitsitsi tsabiabi: "¡Diosomë, bitso ayaijamatabëcuenenëmë!" jaitsi tsabiabi. Bajara itsi tsane.

1 CORINTIOS

**Pacuenia Pablo toyaquina mapabaxutoje Dioso pe-
jumečovënëtsivi, Corinto tomarapijivjavabelia, yabara
pelivaisi**

1 Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. ² Mapabaxutoje pacatoyaquinatsibeje Dioso panejumečovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneonijibia Dioso papecataexae. Dioso pacajunata papijajivinexamë xaniavaetsia panetoinavanapaenexa. Pacayajavajunata baja cajena daxita Dioso pejumečovënëtsivi, itsanacuanëjava pejinavanapaevi, pamonaev navajëcabiaba Jesucristojavabelia. Vajatuxanenë Jesucristo rabaja bajarapamonaev ata pijatuxanenë. ³ Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

**Pacuenia Corinto tomarapijivi Cristo pijajivixae, Dioso
yavenonabiabatsi yabara pelivaisi**

⁴ "Xanëpana rabaja pacuenia yavenonabiabame bajarapamonaev Jesucristo pijajivixae," janë tsabiabi Diosojavabelia tavajëtabiabijavata paxamë yabara. ⁵ Jesucristo papijajivixae, daxitacuene yabara Dioso pacajamatabëcueneyavenonabiaba. Pacayavenonabibanua xaniavaetsia jivi panetsipaebinexa Dioso pejumelivaisi. Pacajumeyapëtaeyaexananua pepo pexaniajailivaisi. ⁶ Xua yabara pacatsipaebabiabatsi Cristo papecajamatabëcuene yavenonabiabinexa, baja rajane pacatocopiapata. Bajarapacuenia papecatocopiapatsixae, nexata baja pajamatabëcuenesaëmë tsavanapae panejumečovënëtsijava bajarapalivaisi. ⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacacajëpaeyaexanabiaba panetoexanavanapaenexa daxita pacuene Dioso pacatojitsipa. ⁸ Dioso cajena pacayavenonaponaena panejamatabëcuene-saënexa Dioso panejumečovënëtsijava daxitamatabijavabelianexa. Nexata pamatacabi vajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa. ⁹ Dioso cajena bajarapacuenia pacatoexanaena. Tspijajivi pacuenia Dioso najumecapanepaeya jumai tsabiabi pexanaenexa, exanabiaba.

Dioso pacajunata pexënato, vajatuxanenë Jesucristo, papijajivinexamë.

**Pacuenia Dioso pejumečovënëtsivi navecuanat-
sanapona apo penajamatabëcuenejëpaexae yabara
pelivaisi**

¹⁰ Tajamonaev, pacaitorobatsi vajatuxanenë papijajivixae, najamatabëcuenejëpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejëpaeya paji-navanapare. Najamatabëcuenejëpaeya xaniavaetsia panajamatabëxainare caelivaisi. ¹¹ Mapacuenia pacatoyaquinatsije tspijajivi Cloëvënëva pijajivi netsipaeba. Apo panajamatabëcuenejëpaemë pina. Daxitatsi baja cajena caenë vajatuxanenë Jesucristo pijajivitsi. Paxamë tuatuajëta pina itsamonaev nabijataeya namataenetsia najumeanaenotabiaba. ¹² Itsamonaev pina xanë yabara jumai tsabiabi: "Xanë raja saicaya Pablo pijajivitonënë," jai pina tsabiabi. Itsamonaev pina jumai tsabiabi: "Xanë raja saicaya Apolos pijajivitonënë," jai pina tsabiabi. Itsamonaev pina jumai tsabiabi: "Xanë raja saicaya Pedro pijajivitonënë," jai pina tsabiabi. Itsamonaev pina jumai tsabiabi: "Xanë raja saicaya Cristo pijajivitonënë," jai pina tsabiabi. ¹³ Bajarapacuenia paxamëyajuvënëvi apo bejumaitsi tsabiabi. Tspijajivi bajarapalivaisi yabara nabijataeya namataenetsia pena-jumeanaenotabiabixae, navecuanatsanapona. Bajarapacuenia apo benavecuanatsanaponaev tspijajivi baja cajena Cristo caenë tsaponaponaev. Apo navitsanaev baja cajena. Nexata pamonaev ata Cristo pijajivi, caebitsaëto rabaja tsavanapae. Nexata apo benavecuanatsanaponaev. Nexata itsajivi ata xanë yabara apo bejumaitsi: "Xanë raja saicaya Pablo pijajivitonënë," apo bejai. Tspijajivi xanë itsajivi ata apo sivanabeyaxuabiaexanaenë cruzata. Itsajivi ata baja cajena apo bautisabit-si tavënëta tajajivitonë penaexanaenexa. ¹⁴ Xanë baja cajena apo bautisabinë jivi ayaibitsaëto. Saya bautisabajë anijanëbeje, Cristobeje Gayobeje. Bajaraponëbeje itsa bautisabajë, bautisabajë Cristo pevënëta. Nexata jivi ayaibitsaëto apo tabautisabixae, sivabarëyanë Diosojavabelia. ¹⁵ Nexata acuenebi itsajivi ata bejumaitsijava: "Xanë raja nebautisaba Pablo pevënëta. Nexata Pablo pijajivitonënë," pejaijava. ¹⁶ Jemajanë tsaena. Bautisabajëna tsaena Estëfanas pijamonaev. Pematatsënëa baja apo najamatabënapitsinë pajivivo bautisabajë. ¹⁷ Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinex-

atsi Diosojavabelia. Nexata pacuenia Dioso nejamatabëcuenecaëjèpaeya exanapona, bajarapacuenia pacatsipaebaponatsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamonaë yapètane saya maëpanacuapijilivaisije, bajarapacuenia tatsipaebinxëa, Cristo apo nitorobi. Nexata itsa tsipaebaponaëjitsipajë pacuenia tsipaebabiaba pamonaë yapètane saya maëpanacuapijilivaisije, nexata Jesucristo vajanacasivatëpaejava cruzata tsipaebi atanë tsipae jivijavabelia, ajumematamobinë tsipae.

Pacuenia Cristo jivijavabelia tsitajëta Dioso piasaënëcuene, Dioso bitso dexitacuene peyapëtaenëcuene ata, yabara pelivaisi

¹⁸ Itsamonae pijaneconi yajavatëpaena. Bajarapamonae jumetae ata Jesucristo cruzata vajanacasivatëpaejava, bajarapalivaisi apo jumecovënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacapanepaevinexa, bajarapalivaisi nacayapëtaeyaexana Dioso piasaënëcuene. ¹⁹ Dioso baja cajena pejumelivaisibaxutota tajëvelia jumaiti mapacueniaje:

Itsamonae bitso yapètane mapanacuapijilivaisije. Bajarapamonae peyapëtaelivaisimi, itsamatacabi vecuaajibiaexanaenajë. Pamonaë ata bitso peyapëtaevi itajara tanetsi mapanacuapijivije, xanë itsamatacabi jamatabëcueneitajëtsianajë pacuenia jamatabëcueneitsi. Nexata bajarajota dexitajivi jamatabëcuenyapëtaenatsi bajarapamonae saya bevelia peyapëtaevicuene, jai baja cajena tajëvelia Dioso pejumelivaisibaxutota.

²⁰ Ponë yapètane saya maëpanacuapijilivaisije, ajumematamobi cajena. Ponë ata bajayajebi nacujaruba maëpanacuapijilivaisije, nexata yapëtae ata, ajumematamobi cajena. Ponë ata bitso ajumelivaisisaëya cuaicuaijai, bajaraponë ata ajumematamobi cajena. Daxita bajarapitsivi ajumematamobi, itsa apo natovajëtsi Diosojavabelia peyavenonaenexatsi peyapëtaenexa jane baja xaniavaetsia. Dioso baja cajena nacayapëtaeyaexana mapanacuapijilivaisije natsiquejemalivaisicuenë. Tsipaji Dioso apo penajamatabëxainaelivaisi. ²¹ Dioso baja cajena dexitacuene bitso peyapëtaenë mapanacuapijilivaisi peyapëtaevi matatoxenetsia. Nexata Dioso apo tocopatsi pejamatabëcuenyapëtaenexatsi pamonaë bitso yapètane saya mapanacuapijilivaisije. Biji rajane Dioso jamatabëcapanepa pijaneconivecua pamonaë jumecovënëta pexanialivaisi, palivaisi patsipaebaponajë, Jesucristo cruzata vajanacasivatëpaelivaisi. Bajarapalivaisi itsamonae betsitanatsiquejemalivaisi atatsi, itsiata bajarapalivaisi pejamatabëcueneta capanepaenatsi pamonaë jumecovënëtavanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi epamonae: "Itsa taejitsipatsi Dioso pesaëta pinijicuene pexanaejava pamonaë nacatsipaeba mapalivaisije, nexata matapania jumecovënëtsipatsi

bajarapalivaisi pexaniajailivaisicuenë," najai tsabiabi judíovi. Griegovi ata itsa patsipaebabiabajë bajarapalivaisi, najumai tsabiabi epamonae: "Mapalivaisije itsa jumëjèpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumecovënëtsipatsi pexaniajailivaisicuenë mapalivaisije," najai tsabiabi griegovi. ²³ Itsiata baitsi jane paxanë itsa patsipaebaponajë bajarapalivaisi, "Cristo raja nacasivatëpa cruzata vajanacapanepaenexa vaneconivecua," pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumecovënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaejava cruzata, benatsiquejemalivaisi saya jumetaeyabiabi.

²⁴ Itsiata pamonaë Dioso junatatsi pecapanepaenexatsi, judíovi, apo judíovi ata, bajarapamonae jumeyapëtaepona bajarapalivaisi. Nexata bajarapamonae yapëtaepona Dioso piasaënëcuene. Tsipaji bajarapamonae Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamonae yapëtaeponaua Dioso bitso dexitacuene peyapëtaenëcuene. Tsipaji Dioso tajëvelia najamatabëxaina bajarapamonae pibisiacuene pexanaeneconivecua pecapanepaenexa Cristo pejamatabëcueneta. ²⁵ Pacuene Dioso exana jivi pecapanepaenexa pijaneconivecua, bajarapacuenë mapanacuapijivije, Dioso apo pejumecovënëtsivi, betsitanatsiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo caëjèpaetsi bajarapacuenia penajamatabëxainaenexa. Dioso itsa copata Cristo pebexuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita mapanacuapijivije matatoxenetsia. Tsipaji bajarapaepatota Dioso pinijicuene exana vajanacapanepaenexa vaneconivecua. ²⁶ Tajamonae, pacanaëjère mapacueneje. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pininia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëtoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë. ²⁷ Pamonaë bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: "Mara pamonaë bitso apo peyapëtaevije," jai tsabiabi. Itsiata Dioso pacaitapeta papijajivinexamë, apo paneyapëtaevi ata. Bajarapacuenia Dioso pacaitapeta, pamonaë bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinexamë, mapanacuapijivije bepaveliajamatabëcuenevimë pacatae ata. Bajarapacuenia Dioso pacaitapeta, pamonaë bitso ayaijamatabëcuenevi natane, piauranexa Dioso pitabarata, pamatacabi daxita Dioso papijajivimë paayajia-

matabëcuenevimë pacaexanaena. Bajarapamonae auratsane itsa nayapëtaena jamatabëcuenenavëxaniabiaya beveliajamatabëcuenevi papecataejava Dioso papijajivimë. ²⁸ Dioso baja cajena pacaitapeta papijajivinemë, daxitajivi papecaitoxaxae, bijiaya papecanaëcotsivi ata. Bajarapacuenia Dioso pacaitapeta, pamona bitso ayaijamatabëcuenevi itajara daxitajivi tanetsi mapanacuataje, Dioso piaurabinexa. Bajarapamonae Dioso urabiana, pamatacabi daxita Dioso papijajivimë paayaijamatabëcuenevimë pacaexanaena. Bajarapamatacabi daxitajivi Dioso yapëtaeyaexanaena pijajumematamobijava, pamona ayaijamatabëcuenevi itajara tanetsi mapanacuataje. ²⁹ Bajaraxuata Dioso pitabarata jamatabëcuenenavëxaniabiaya itsajivi ata apo bejumaitsi itsajivijavabelia: "Xanë bitso ayaijamatabëcuene taxainaenë," apo bejai. ³⁰ Dioso papecaitaxutotsoniataexae, pacaitapeta papijajivinemë. Nexata Jesucristo payajavajinavanapame. Vaxait-si Dioso jamatabëcuenyapëtanetsi. Tsipaji Jesucristo nacajamatabëcuenyavenona Dioso vajajamatabëcuenyapëtaenexa. Jesucristo pejamatabëcueneta Dioso aneconijibia nacatane. Pijajivitsinua Dioso nacaexana. Nacavecuajibiaexananua pibisiacuene vajaexanaeconimi. ³¹ Bajaraxuata jivijavabelia benavajunupaebatsi Dioso vajanacayavenonaejava. Tsipaji Dioso pejumelivaisibaxutota jumaitsi mapacueniaje: "Pëtsa navajunupaebame saya nijacuata nexanaejava yabara jivi pecayaiyataenexa. Biji rajane navajunupaebare Dioso pecayavenonaponaejava. Nexata jivi Dioso yaiyataena," jai Dioso pejumelivaisibaxutota.

Pacuenia Jesucristo sivatëpa mapanacuapijivije yabara pelivaisi

2 Tajamonae, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatacabi apo pacatsipaebitsi pacuenia tsipaebabiaba pamona bitso peyapëtaevi mapanacuapijilivaisije. Biji rajane pacatsipaebatsi xaniavaetsia jumenapebetsiaya panejumeyapëtaenexa patacatsipaebilivaisi. ² Itsa ponaponajë paxamëjavata, najamatabëxainajë patacatsipaebinxaxa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. ³ Paxamëjavata itsa ponaponajë patacatsipaebinxaxa pexaniajailivaisi, Jesucristo pelivaisi, najamatabëcuenyapëtaniji apo tanecaëjëpaejava tajacuata patacatsipaebinxaxa. Nexata natsijamatabëcuenebëjanë. Jamatabëcueneconeconajë Dioso pitabarata bajarapalivaisi patacatsipaebijavanexa yabara. ⁴ Bajarapamatacabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatabëcuene saëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatabëcuaiacuajiai. Dioso pesaëta pinijicuene taexanaejava ata, pataneme. Bajaraxuata patacatsipaebilivaisi pexaniajailivaisicuene, payapëtaneme. Nexata bajarapalivaisi pajumecovënëta. ⁵ Bajarapacuenia

pacatsipaebatsi panenajamatabëcuene copatsinexa Dioso javabelia, Dioso pesaëta papecayavenonaponaeenexa. Tsipaji apo pacatojitsipaetsi paneyajavajumecovënëtsinexa pamona mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcuene itajëta pona pejumecovënëtsivitsijavabelia Espiritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatuajëta itsa pajinavanapajë, patsipaebavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. ⁷ Dioso pejumelivaisi, pexaniajailivaisi, itsa patsipaebavanapajë, patsipaebavanapajë Cristo vajanacasivatëpaejava vajanacapanepaenexa vajaneconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanae jitsia vajanacarajutsinexa matacabi apo peverevere caejava. ⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënë apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexëna-to. ⁹ Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaitsi mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamona Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpae javanexa cruzata.

¹⁰ Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena dactacuene nacayapëtaeyaexana. Pacuenia Dioso najamatabëxaina vajanacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

¹¹ Vaxaitsi apo nacacajëpae vajajamatabëcuenyapëtaenexa pacuenia bëpënëa najamatabëxaina itsajivi. Itsiata bajarapajivi pijacuata najamatabëcuenyapëtanë. Bajara pijinia pacuenia vaxaitsi ata Dioso apo jamatabëcuenyapëtae tsipaetsi pacuenia Dioso najamatabëxaina Espiritu Santo itsa apo nacayapëtaeyaexanae tsipae. ¹² Tsipaji Dioso apo nacatocopatsi vajacuata vajajamatabëcuenyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsijamatabëcaenexa. Nexata Espiritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. ¹³ Nexata livaisi itsa tsipaebaponatsi Dioso pejumecovënëtsivijavabelia,

ba panevajënaeyabelia paneajamatabëcuenesaë tsaponaenexa Cristo pelivaisi panejumecovënëtsijava. Bajarapamonae boyenepananexa ibotonë bepecat-sanaponaevi bo ënëtuatuajënexa matatoyorotsia tamëthëcaebotoxanetonëjumavereca. Boyenepananexa pecatsanaponaevi baitapetapona ëpexaniavirijava, pavirijava tsixanepana boyenepananexa. Bajara pijinia itsi pamonaë pacaevetavanapa. Ëpexanialivaisi pacatsipaebabiaba paneajamatabëcuenesaënexa Diosojavabelia. ¹¹ Payapëtaneme rabaja mapacueneye. Itsajivi baja capanepaeya boyenepananexa, itsa tsivajënaemëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcae. Bajara pijinia paitsimë paxamë ata. Capanepaeya baja pajumecovënëtame Jesucristo papecasivatëpaejaya Dioso papecavecuajibiaexanaenexa pibisiacuene paneexanaeconimi. Nexata baja apo bepajumecovënëtsimë saicayalivaisi. Tsipaji baja ajibi pematatsënëa itsalivaisi papecacapanepaelivaisinexa panijaneconivecua. ¹² Pamonaë bo exana, maitsije. Itsamonae exana bitso penamatamotsijavanëta. Itsamonae exana bevelia penamatamotsijavanëta. Pamonaë pacatsipaebapona pexaniajailivaisi pacuenia Dioso yapëtaeyaexanaponatsi, bajarapamonae bo bepexanaevi bitso penamatamotsijavanëta bajayajebi bo pijamatabësaëtsecaenexa. Bajarapamonae bo bepexanaevi oronanitonëta, plantananitonëta ata, penamatamotsiibotonëta ata. Pamonaë pijinia saya pejamatabëcueneta peyapëtaelivaisi pacatsipaebapona, bajarapamonae bo bepexanaevi bevelia penamatamotsijavanëta, bajayajebi apo pijamatabësaëjavanëta. Bajarapamonae bo bepexanaevi saya naejavanëta, patebaxutoxita ata, bearrozbotoxita ata. ¹³ Nexata pamatacabi Cristo patsianica, bajarapamatacabi nayapëtaena caejivi canacujitsia Cristo pijajivi, pamonaë xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponaena xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. ¹⁴ Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetaruae ata, itsiata bo apo tajue tsipae isoto apo petajuejavanëta bo pexanetsixae. Nexata bo penacuenebinë matamotsipatsi. ¹⁵ Itsiata baitsi jane peveretetsibo itsa totajuejitsipatsi isoto petajuejavanëta, bo pexanetsixae, nexata naxuabijitsipa penacuenebijaeva. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipae. Panepaejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baitsi pamonaë xaniavaetsia pacatsipaeba, capanepaenatsi Dioso. Matamotsianatsinua Dioso. Tsipaji pacuenia Dioso yapëtaeyaexanatsi, pexanialivaisi pacatsipaebapona. Pamonaë pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabëcueneta peyapëtaelivaisi, pacatsipaebapona.

Itsiata bajarapamonae ata tsiquirijavayota capanepaenatsi Dioso.

¹⁶ Payapëtaneme rabaja mapacueneye. Paxamë rabaja Dioso bepapijatemplobomë. Tsipaji Espiritu Santo pacayajavaponapona. ¹⁷ Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepapijatemplobomë.

¹⁸ Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaitsi: "Xanë cajena daxitajivi matatoxenetsia bitso tayapëtaenë mapanacuapijilivaisije," itsa jamatabëjai, nexata bajarapajivi becopata bajarapajamatabëcuene. Beveliajamatabëcuenejivi saya benatane. Nexata Dioso jamatabëcuenecaëjëpaeya exanaenatsi peyapëtaenexa jane baja Dioso pejumelivaisi. ¹⁹ Daxita palivaisi bitso bepexaniajailivaisitane mapanacuapijivije, itsiata daxिता bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaitsi mapacueniaje: "Dioso cajena naneconitsiaexanaena bitso peyapëtaevi mapanacuapijilivaisije peyamaxëtojorobavanapaejavata itsamonae," jai Dioso pejumelivaisibaxutota. ²⁰ Icatsia itsalivaisita Dioso pejumelivaisibaxutota jumaitsi mapacueniaje: "Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaevi penajamatabëxainacuene," jai Dioso pejumelivaisibaxutota. ²¹ Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayajamatabëcuenevinënu, apo bepanetae. "Xanë raja saicaya bajaraponë pijajivitonënë," apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaexae. Tsipaji baja cajena Dioso pacatocopata daxita xua panamatavenoname. ²² Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacajamatabëcuene yavenonaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamënexa. ²³ Pematatsënëa rabaja Dioso pacatocopatana paxamë Cristo papijajivinexamë. Cristo rabaja pijinia Dioso bepajajivitonë, Dioso pejitsipaecuenia petoexanaexae.

Pacuenia Cristo pijajivi, apóstolevi, nacuenebavanapa yabara pelivaisi

4 Paxamë saya panetaema Cristo papijajivinëcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. ² Pajivi itsanë pijajivitonë naexana, bajarapajivi pijatuxanenë pitorobicueniatsi, xaniavaetsia betonacuenebaponapona. ³ Bajaraxuata xanë ata exanaponajë pacuenia vajatuxanenë nitoro-

ba. Nexata paxamē panebaracuaicuajamē tsabiabi ata, itsamonae ata nebaracuaicuajai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabēcuenebējanē patanebaracuaicuajaitsabiabijava yabara. Apo nacuenecanaējētsinēnua pacuenia tonacuenebajē vajatuxanenē. Nexata tajamatabēcueneta apo jamatabējumaitsinē: “Xaniavaetsia meta tajatuxanenē tonacuenebaponaponajē. Itsa jume, bijiata meta tonacuenebaponaponajē,” apo jamatabējanē. ⁴“Jumecovēnētajē daxita pacuenia Dioso nitoroba. Nexata taneitorobicuenia xaniavaetsia tonacuenebajē. Bajaraxuata ajibi Dioso taneyabara naneconitsiaexanaejavanexa,” jamatabējanē ata tsipae, itsiata ajumematomobinē tsipae. Bajaraxuata evetajē vajatuxanenē pijacuata tanejumaitsinexa itsa apo jumecovēnētsinē taneitorobicuenia. ⁵Bajaraxuata pētsa pabaracuaicuajamē itsamonae ata Dioso petonacuenebavanapaevi. Pacopiaevetavanapare abaxē vajatuxanenē pepatsijavatsica. Bajaraponē itajētsiana bajarapamonae muetsia pexanaejavanēmi ata. Pacuenia caejivi canacujitsia vajatuxanenē pijajivi bēpēnēa najamatabēxaina petonacuenebavanapaevajavata, vajatuxanenē itajētsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barēyataenatsi petonacuenebavanapaevajava yabara.

⁶Tajamonae, bajarapacuenia pacatoyaquinatsi Apolos yabara, xanē ata yabara, patacayapētaeyaexanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayaijamatabēcuenenēnēbeje patanetaeyanivamē. Bajarapacuenia pacatoyaquinatsi itsamonae ata, pamonaē Dioso petonacuenebavanapaevi, najēpaeya paneyaiyataenexa. Pētsa itsamonaevecua beayaijamatabēcuenenē pataneme caenē ata. Bajara pijinia pacuenia beveliajamatabēcuenenē pētsa pataneme caenē ata. ⁷Paxamē ata pētsa itsamonaevecua bepaayaijamatabēcuenevimē panataneme. Itsa panavajunupaebabiabame, apo panavajunupaebabiabimē Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonaē ata pata paxamējavata papecatsipaebinexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixae, bepaayaijamatabēcuenevimē pētsa panataneme itsamonaevecua.

⁸Paxamē jamatabēcuenenavēxaniabiaya panajamatabēxainame mapacueniaje: “Pacuenia ricovi ayaijiva pecobecovē xaina, bajara vaxaitsi itsitsi Dioso pejumelivaisi vajajumecovēnētsijava. Tshipaji ayailivaisi xainatsi. Tshipaji baja itsamonae bitso nacatsipaebabiaba Dioso pejumelivaisi. Nexata baja pematatsēnēa apo namatavenonaetsi itsajivi ata vajanacatsipaebaponaeenexa,” pajamatabējamē tsabiabi jamatabēcuenenavēxaniabiaya. Jamatabēcuenenavēxaniabiaya Dioso pijacuene bepaneevetsivi panataneme. Nexata meta paxanē matatoxenetsia bitso bepaayaijamatabēcuenevimē panataneme. Dioso pijacuene itsa

paneevetsivi tsipae, nexata pacasivajamatabēcuenebarēyatsi tsipae. Nexata vajanajuaeveetsivi tsipae Dioso pijacuene. ⁹Paxanē, paapóstolevinē, Dioso covē panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinexa. Bajarapacuenia Dioso panetocopata bijiaya patanetaenexa ángelevi ata, daxitajivi ata. ¹⁰Paxanē, Cristo xaniavaetsia patajumecovēnētsivi, itsamonae panetane bepatanematajemabivi. Paxamē, Cristo xaniavaetsia apo panejumecovēnētsivi ata, Cristo pijacuene bitso bepaneyapētaevi itajara panataneme. Caranata paxanē itsamonae bepataajamatabēcuenesaējibivi panetane. Caranata juya paxamē bepaneajamatabēcuenesaēvi panataneme. Paxanē itsamonae apo paneyaiyatae. Paxamē panayaiyataneme. ¹¹Cristo pelivaisi jivi itsa patsipaebaponajē mapamatacabijavaberena ataje, bitso baja cajena panabejiobitabiabajē. Patajani tsabiabi. Mera pajitsipabiabajē. Bitso pajumaesebejenē tsabiabi. Jivi panebeyabiaba pecobeta. Apo paxainabiabinē pabota panapatsijitsianē. ¹²Pacueranabiabajē bitso patanacuenebabiabijava patacobeta. Jivi panebiyataeyabiaba pibisiacuenia. Itsiata apo pajumeanaecanaviatabiabinē. Biji caranata paxanē bajarapamonae patovajētabiabajē Diosojavabelia Dioso peyavenonaeenexatsi. Jivi panebejiobiaexanabiaba. Itsiata pajamatabēcuenemoyanē tsabiabi. ¹³Pibisiacuenia panebaracuaicuajai tsabiabi itsamonaejavabelia. Itsiata bajarapamonae pexaniajamatabēcuenia xaniavaetsia pamuxujiohabiabajē bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabēcuenevinē. Bepaavirinēnua paneataeyabiaba.

¹⁴Apo pacatoyaquinaetsi raja mapacueniaje patacuarabinexa. Biji rajane pacatoyaquinatsi saya patacamuxujioabinexa xaniavaetsia. Pacuenia muxujiobijitsipajē taxi, bajarapacuenia pacamuxujioabatsi. ¹⁵Xanē copiyapaacatsipaebatsi pexanialivaisi, Cristo pelivaisi. Nexata baja panajamatabēcueneocopatame Jesucristojavabelia. Bajaraxuata xanē bepatacavitsatsivixae, panetaneme bepaneaxanē. Paxinae atamē tsipae diez mil ponēbeje papecatsipaebivinexa Cristo pelivaisi, itsiata xanē caenēnē panetaejitsipame bepaneaxanē. ¹⁶Bajaraxuata asaēyata pacamuxujioabatsi. Pacuenia baja pacatsitaexanapononatsi, bajarapacuenia necuenejēpaeya pajinavanapare.

¹⁷Bajaraxuata Timoteo baja pacatoitorobatsi paxamējavabelia. Bajaraponē bitso tasivanē. Betaxēnatocuenia tataenē. Xaniavaetsia pejumecovēnētaponaponaeenē Dioso. Bajaraponē Timoteo pacatoitorobatsi baja papecatsipaebinexa pacuenia ponaponajē. Nexata Timoteo pacatsipaebiananua pacuenia xanē Jesucristo pijajivitonēxanē, tsitaexanabiabajē daxita Dioso pejumecovēnētsijava, itsaxuayo tsipaebaponajē Cristo pelivaisi. ¹⁸Itsamonae paxamēyajuvēnēvi, taitorobicuenia apo exanae. Bajarapamonae beayaijamatabēcuenevi natane. Nexata itsa pacatoitorobatsi Timoteo, bajarapamonae xanē yabara jamatabēcuene-

navëxaniabiaya jamatabëjumaiti: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. ¹⁹Itsiata baitsi jane Dioso itsa netocopatsiana patacataenexa, ponae-najë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamona beayaijamatabëcuenevi natane. Tsiapaji raeta bajarapamonae pepacuenie ajamatabëcuenesaë Diosojavabelia. Itsa jume, nexata meta saya pecuibovojojotota jumaiti. ²⁰Pamonae Dioso pijajivi, bajarapamonae nayapëtane. Tsiapaji peneta Dioso pesaëta ajamatabëcuenesaë tsavanapae. Èpecuibovojojotota apo jumaiti. Biji rajane bajarapamonae pejamatabëëthëtojavavetsina Dioso jumecovënëta. ²¹¿Desa xua pajitsipame paxamë itsa ponae-najë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuena asivaya patacataejava?

Pacuenia Dioso pejumecovënëtsivi tuatujëta ponapona bitso pibisiacuene pexanaponaponaenë yabara pelivaisi

5 Paxamë tuatujëta bitso pibisiacuene pexanaponaponaenë pevitota, daxitajivi pina baracuaicuaijai tsabiabi. Dioso apo pejumecovënëtsivi ata, papibisiacuene apo exanae, bajaraponë pina exanaponapona. Bajaraponë paxamëyajuvënënë pita pina pijavanexa paxa pijavami. ²¿Bajaraponë pibisiacuene pexanaejava, apo pacueneitavetsi atamë, itsiata bepaayaijamatabëcuenevimë panataneme! ¿Biji rajane bajaraponë pibisiacuene pexanaejava, bitso bepavanajamatabëxainame! ¿Bepayapijivauramënuu bajaraponë! Bajaraponë pibisiacuene pexanaponaponaenë, bepanavecuacapitsapame. ³Paxamëjavata apo naponaponaenë, itsiata paxamëjavata betanaponaponaenë, nataniji. Nexata tajëvelia bitso sivanajamatabëxainabiabajë bajaraponë Dioso penaneconitsiaexanaejavaexatsi yabara pibisiacuene pexanaponaponaexae. ⁴Paxamë panacaetuare vajatuxanenë Jesucristo papijajivixaemë. Apo pacayajava atatsi tsane, itsiata panenacaetuatsijavata, pacajamatabënajinaenatsi. Diosojavabelia pacatovajëtsianatsinua bajarapaepatota. Vajatuxanenë Jesucristo ata pesaë, pacayajava tsane bajarajota. ⁵Pibisiacuene pexanaponaponaenë paxamë tuatujëta, panavecuacapitsapare baja dovathijavabelia. Nexata daxita pibisiacuene penatojitsipaecuenia pexanaejava yabara, dovathi pebejiobiaexanaenexatsi. Nexata belia icatsia Dioso jumecovënëtsiana. Bajarapajamatabëcuene jane baja capanepaenatsi pamatacabi vajatuxanenë Jesús patsianica.

⁶Papibisiacuene bajaraponë exanaponapona, panaitaxutojematsi atamë, itsiata bepaayaijamatabëcuenevimë panataneme. Abeje raja pibisiacuene pexanaponaponaenë panecuenenaitaxutojematsijava. Payapëtaneme rabaja mapacuenieje. Pan pexanaematabënexa, ayaimatabë ata, levadurajava pijinia tsiquirijavayo ata, itsiata pematajërëabijavata, ba-

caëjëpa daxitamatabëjava. Nexata levadura, tsiquirijavayo ata, bafufunaeyaexana daxitamatabë. Bajara pijinia itsi tsiapae caenë itsa pacueneocopatsipame pibisiacuene pexanaponaponaejava paxamë tuatujëta. Daxitajivi belia pibisiacuene exanaponaejitsipa bajaraponë pejamatabëcuene. ⁷Bajaraxuata panavecuacapitsapare baja, ponë pibisiacuene exanaponapona paxamë tuatujëta, daxitajivi pejamatabëcuenebijiianaeyaniva bajaraponë pejamatabëcuene. Pacuenia itsi perujupanmatabë, levadurata pematajërëabimatabë, bajara jamatabëcueneitsi bajaraponë, pibisiacuene pexanaponaponaexae. Bajaraxuata bajaraponë panavecuacapitsapare baja. Paxamë rabaja Jesucristo pejamatabëcuene pejanajamatabëcuene paxainame. Nexata pacuenia itsi levadurata apo pematajërëabipanmatabë, bajarapajamatabëcueneitsimë. Tsiapaji baja Dioso aneconijibia pacatane. Paxamë baja aneconijibia Dioso pacatane. Tsiapaji Cristo pacasivatëpa. Cristo baja cajena beovejayo tanetsi Dioso. Tsiapaji nacasivatëpa cruzata pibisiacuene vajaexanaeconimi vajanacavecuajibiaexanaenexa. ⁸Nexata baja aeconoxae pibisiacuene apo beexanavanapaetsi. Jesucristo pijajivixaetsi, itsajamatabëcuene xainaenejevatsi, pexaniajailivaisi jumecovënëtavanapaenatsi. Bajarapacuenia itsa jumecovënëtavanapaenatsi, nexata pacuenia itsi levadurata apo pematajërëabipanmatabë, bajarajamatabëcuene itsanetsi aneconijibia vajajinavana-paexae.

⁹Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavana-paeyaniva. ¹⁰Dioso apo pejumecovënëtsivi, itsamonae, pibisiacuene exana pevitota. Itsamonae najamatabëxaina epamonaenexa ayajava pexainaecuenie pexainaenexa. Itsamonae nacobetoxota. Itsamonae, jumapecataeya pexanaenëanëjavabelia, navajëca. Bajarapitsicuene pexanaevi, Dioso apo pejumecovënëtsivi, panenavecuatsatsinexa, patacatoyaquinaebaxutota apo pacaitorobitsi. Bajarapitsicuene pexanaevi, Dioso apo pejumecovënëtsivi, itsa panavecuatsatsipame, nexata pepacuenie mapanacuavecuaje athëbëabetsia eponeponaenexa tsiapae. Tsiapaji daxita mapanacuajavaje bajarapitsicuene pexanaevi yacajëpa.

¹¹Patacatoyaquinaebaxutota raja pacaitorobatsi mapacueniaje. Pajivi jumaiti ata: “Xanë cajena Jesucristo pelivaisi jumecovënëtajë,” jai ata, itsiata pibisiacuene itsa exana pevitota, epamonaenexa ata pexainaecuenie itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuenia itsa baracuaicuaijai, itsa aitajibi tsabiabinua, itsa nacobetoxotanua, bajarapajivi pëtsa payajavajinavana-pame. Pëtsa payajavaxanemenua caejavata, pacajunatsi ata. ¹²⁻¹³Pamonae abaxë Dioso apo pejumecovënëtsivi, bajarapamonae yabara tajumaitsinexa Dioso apo netocopatsi: “Bajarapamonae cajena pijaneconi xaina Diosojavabelia,” tajainexa. Dioso cajena abaxë saicaya pepacuenie naneconitsiaexanaena bajarapamonae. Itsiata baitsi jane pamonaenë Dioso panenajua-

jumecovënëtsivi, panenacaetuatabiabibota panenajuajoneyabiabivi, pibisiacuene itsa exana, paxamë bepacueneitavetame. Bajaraxuata nexata panavecuacapitsapare baja ponë paxamë tuatuajëta pevitota pibisiacuene exanaponapona.

Pacuenia Dioso pejumecovënëtsivi itavetatsi Dioso penajuajumecovënëtavanapaevi peneconitsiyaniva juezmonaejavabelia yabara pelivaisi

6 Itsanë paxamëyajuvënënë, Dioso pejumecovënëtsinë, itsa pacaitsacueniaba paxamëjavabere-na, nexata jueznëjavabelia paneconitabiabame. Pëtsa bajarapacuenia paexaname. Tspaji raja juezmonae Dioso apo pejumecovënëtsivi. Bajaraxuata Dioso panenajuajumecovënëtsivi apo bepaneconitsimë juezmonaejavabelia. Biji rajane bepayanijobame Dioso pejumecovënëtsivijavabelia papecatoxanetsinexa bajarapalivaisi. ² Payapëtaneme rabaja mapacueneje. Pamatacabi Cristo evetsiana mapanacuaje, daxita Dioso vajajumecovënëtsivi Dioso nacatocopatsiana vajaneconitsiaexanaenexa pamonaë pijaneconi pexainaevi. Daxita mapanacuapijivije, pamonaë Dioso apo pejumecovënëtsivi, vaxaitsi naneconitsiaexanaenatsi. Nexata aeconoxae ata pacacaëjëpa panelivaisixanetsinexa paneconi exana panetuatuajëta. Tspaji mapanacuata jivi pevetsijamatabëcuene beveliajamatatabëcuene saya. Apo ayapëbeje bitso. ³ Payapëtaneme rabaja mapacueneje. Pamatacabi Cristo patianica, vaxaitsi naneconitsiaexanaenatsi daxitajivi. Naneconitsiaexanaenatsi ángelevi ata. Nexata abaxë aeconoxae panejinavanapaeepato mapanacuataje, pacacaëjëpa panelivaisixanetsinexa paneconi exana panetuatuajëta, mapanacuapijillivaisije. ⁴ Itsiata baitsi jane paxamëyajuvënëjivi itsa pacaitsacueniaba mapanacuataje, itsiata panijacuata apo palivaisixanetabimë pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia penaneconitsiaexanaenexatsi. ⁵ Mapacuenia pacajumaitstsije patacaurabinexa. Paxamëyajuvënëjivi itsa pacaitsacueniaba, zäjibi tsabaja caenë ata paxamëyajuvënënë pexanialivaisi peyapëtaenë pelivaisixanetsinexa bajarapalivaisi? ⁶ Dioso panejumecovënëtsivixae, juezmonaejavabelia apo bepaneconitsimë Dioso panenajuajumecovënëtsivi.

⁷ Bajarapacuenia panacaevënavi atamë paneneconitabiabixae juezmonaejavabelia, daxitajivi pacacueneyapëtanë xaniavaetsia apo panejinavanapaejava Dioso pitabarata. Nexata panacaevënanimë itsa pacaitsacueniaba, itsa pacatonacobetoxotana, Dioso panejumecovënëtsivixae, xanepanaejitsipa itsa pajamatabëcuenemoyamë tsipae. ⁸ Itsiata baitsi jane paxamë Dioso panenajuajumecovënëtsivijavabelia ata, paitsacueniababiabame. Yamaxëitojorobiaya pavecuacobetoxotabiabamenua.

⁹⁻¹⁰ Payapëtaneme rabaja mapacueneje. Pibisiacuene pexanaevi apo yajavajinavanapaetsi tsane Dioso pijanacuataatsia. Bajaraxuata pëtsa paexaname panijacuata panenatojitsipaacuenia. Dioso pijanacuataatsia apo

yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenëanëjavabelia penavajëcaevi. Apo yajavajinavanapaetsi tsane pejaitsivi itsava pijavavecu. Apo yajavajinavanapaetsi tsane pejaitsivi itsanë pamonavecu. Apo yajavajinavanapaetsi tsane penaquenetsiataevi nacaevënapebibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane ëpamonaenexa pexainaecuene penatojitsipaevi. Apo yajavajinavanapaetsi tsane piatajibitsabiabivi. Apo yajavajinavanapaetsi tsane itsamonae pibisiacuenia pebaracuaicuajiaivi. Daxita bajarapitsivi apo yajavajinavanapaetsi tsane Dioso pijanacuataatsia. ¹¹ Bajara picani bajayata paxamëyajuvënëvi pacuenia exanavanapa. Itsiata baitsi jane aeconoxae baja pibisiacuene paneexanaeneconimi, Dioso baja pacavecuajibiaexana. Pacatsata baja Dioso papijajivinxamë. Dioso baja aneconijibia pacatane vajatuxanenë Jesucristo pejamatabëcueneta. Espiritu Santo ata pesaëta pacayavenona panejumecovënëtsinexa vajatuxanenë papecaitorobicuenia.

Pacuenia Dioso pejumecovënëtsivi xaniavaetsia bejinavanapa Dioso pitabarata yabara pelivaisi

¹² Itsamonae jumaitsi: "Mapanacuata navita vajaexanaejavanexa. Itsajivi ata apo nacaitavetsi bajarapacuenë vajaexanaenexa," jai itsamonae. Xaniajai rabaja picani. Itsiata baitsi jane daxita bajarapacuenë vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabëjumaitstsitsi mapacueniaje: "Papibisiacuene taexanaenexa tajamatabëcuene nitorobabiaba, apo exanaenë tsane Cristo pijajivitonëxaenë. Tspaji itsa exanaejitsipajë bajarapapibisiacuene, nexata tajamatabëcuene beprijajivitonëncuenia jumecovënëtabijitsipajë," bejamatabëjaitsi pibisiacuene vajaexanaeyaniva. ¹³ "Vajaxaejava raja vajacotsorotopijjavanexa. Vajacotsoroto raja pijinia vajaxaejava peecaenexa," pejailivaisi, xaniajai baja cajena. Itsiata baitsi jane itsamatacabi Dioso bajarapacuenëbeje vereverecaeyaexanaena. Daxita raja vajaperabëtuareca pibisiacuene apo vajaexanavanapaenexa. Vajaperabëto raja Dioso nacatocopata vajatuxanenë vajatonacuenebavanapaenexa. Vajatuxanenë rabaja pijinia vajaperabëtota vajanacayajavaponaponaenexa. ¹⁴ Dioso baja cajena icatsia asaëyaexanatsi vajatuxanenë petëpaecujinae. Bajara pijinia pacuenia vaxaitsi ata itsamatacabi Dioso pesaëta nacaasaëyaexanaena vajatëpaecujinae.

¹⁵ Payapëtaneme rabaja mapacueneje. Pacaenëmë canacujitsia, caenë Cristo peperabëtojavabelia becaeperabëto panaexaname papijajivixaemë. Xanë ata rabaja Cristo bepeperabëtoyajuvënënë. Bajaraxuata pibisiacuene apo bexanaenë tavitota pibisiacuene pexanabiabivajavabelia, bajarapova bepeperabëtoyajuvënëjavanë tanaexanaeyaniva. ¹⁶ Payapëtaneme rabaja mapacueneje. Pebi pibisiacuene itsa exana pevitota pibisiacuene pexanabiabivajavabelia, bajarapajivibeje

becaeperabëto naexanabeje. Dioso pejumelivaisibaxu-tota jumaiti penapitsijivibeje yabara mapacueniaje: "Anijajivimibeje becaejivi naexanabeje," jai. ¹⁷ Nexata pijinia pajivi najamatabëcuenecopata vajatuxanenë Jesucristojavabelia, bajarapajivi becaejivi naexana vajatuxanenë Jesucristojavabelia.

¹⁸ Pevitota pibisiacuene pexanaeyaexanaeja-matabëcuene, pavecuanajetabajiravabiabare. Itsajava raja pibisiacuene pexanaejava, bitso jivi apo jamatabëcuenebijianaetsi. Pacuenia pevitota pibisiacuene pexanaejava, jamatabëcuenebijianatsi, apo itsi. Ponë jaita itsava pijavavecua pibisiacuene pexanaenexa pevitota, bitso pibisiacuene exana. Petiriva ata, pova jaita itsanë pamonavecua pibisiacuene pexanaenexa pevitota, bitso pibisiacuene exana. Pajivi bajarapibisiacuene exana, bitso najamatabëcuenebijiana. ¹⁹ Payapëtaneme rabaja mapacuenieje. Paneperabëto baja cajena Espiritu Santo pijabo papecatsijamatabëcaexae. Dioso cajena pacarajuta pijaEspiritu Santo papecatsijamatabëcaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainae panijacuata panenatojitsipacuenia paneexanavanapaenexa. ²⁰ Tsipaji Dioso ayaimatamota pacacomuata. Nexata Dioso papijajivix-aemë, xaniavaetsia panejamatabëthëtovetsina Dioso jumecovënëtsiaya pajinavanapare. Nexata daxisajivi Dioso yaiyataeponaena paxamë xaniavaetsia itsa pat-sitajinavanapame.

Pemuxujiobilivaisi penapitsijivibeje yabara pelivaisi

⁷ Xua yabara panetoyaquinaremena pataneyanijobinexamë, nexata aeconoxae pacajumecanavitsijitsiatsi. Xaniajai rabaja picani. Xanepana itsa apo nacojiobi pebi. ² Itsiata baitsi jane jivi navita pevitota pibisiacuene pexanaevi. Bajaxuayaniva caepebi canacujitsia pijava bexaina. Bajara pijinia itsi petirivi ata. ³ Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae. ⁴ Petiriva, penacojiobiva, pijacuata apo naperabëxinae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxinae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenetsia naperabëxinaabeje. ⁵ Papetirivimë panenacojiobivi baja, pëtsa panaperabëasivamë paneamonajivivecua. Bajara pijinia pacuenia paxamë ata papebijivimë. Pëtsa panaperabëasivamë panijavajivivecua. Matapania pamatacabimaxëto Diosojavabelia panavajëcaejitsiamëbeje, pacatocopatabeje panenavecuanaperabëasivanexabeje. Bajarapacuenia paexanaenamebeje itsa panajamatabëcuenepamebeje panenavajëcaenexabeje Diosojavabelia. Pamatacabimaxëto panavajëcaejitsiamëbeje Diosojavabelia, bajarapamatacabimaxëto pëtsa panaimoxoyotamebeje. Itsa baja paveretsianamebeje Diosojavabelia panenavajëcaejavabeje, pëtsa baja panavecuanaperabëasivamëbeje. Tsipaji panevajënaeyabeliabeje itsa panave-

cuanaperabëasivamëbeje tsaponae tsipae, nexata dovathi pacajamatabëcuene yamaxëtojobijitsipabeje. Nexata pibisiacuene paexanaejitsipamebeje, pacuene picani apo bepaexanaemëbeje.

⁶ Itsa pacamuxujiobatsi panenacojiobinexa pibisiacuene paneexanaeyaniva panevitota, apo pacaitorobitsi daxita panenacojiobinexa. Pamona jitsipa penacojiobijava, nacojiobi. ⁷ Pacuenia xanë imasia ponaponajë, bajarapacuenia picani paxamë ata imasia panejinavanapaejava, pacatojitsipatsi. Itsiata baitsi jane Dioso pacaenëmë canacujitsia papecayavenonaponaxae, pacacajëpa baja pacuenia paexanavanapaejitsiamë. Itsamonae paxamëyajuvënëvi itsacuenia Dioso jamatabëcuene caëjëpaeyaexanaponatsi Dioso pejitsipacuenia petoexanavanapaenexa. Itsamonae pijinia saicaya itsacuenia Dioso jamatabëcuene caëjëpaeyaexanaponatsi.

⁸ Mapacuenia saicaya jumaitsinëje pimasiarubenaevijavabelia, pamonajivi pevecuatëpaevitsijavabelia ata. Bajarapamonae picani toxanepanatsi imasia pejinavanapaejava pacuenia xanë imasia ponaponajë. ⁹ Itsiata baitsi jane itsa apo caëjëpaetsi penajamatabëcuene saëtsijava, nexata pibisiacuene pevitota pexanaeyaniva, roviaalia benacojioba. Bajarapamonae toxanepanatsi roviaalia penacojiobijava. Tsipaji itsa apo nacojiobi tsipae, ëpibisiacuene pexanaenexa najamatabëxinaejitsipa. Nexata najamatabëcuene bijianaponaejitsipa.

¹⁰ Paxamë baja panenacojiobivi mapacuenia pacajumaititsije. Itsiata xanë apo tajamatabëcuene. Pacuenia vajatuxanenë jumaiti, pacaitorobatsi. Papetirivimë, pëtsa pavecuanaviabame paneamonajivi. ¹¹ Pacamuxujiobi atatsi, itsiata pova vecuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovënëbeje. Bajara pijinia itsi pebi ata. Pebi apo bexuabi pijava.

¹² Paxamë tuatujëta Dioso apo pejumecovënëtanavanapaevi yabara, jumaitsinë mapacueniaje. Itsiata vajatuxanenë apo pejumaitsinë. Dioso pejumecovënëtsinë pijava, itsa apo pejumecovënëtsiva Dioso, itsiata bajarapova itsa jitsipa peponaponaenexa bajaraponëjavabelia, nexata bajaraponë pijava apo benavecuaitavetsi pevecuanaviatsinexatsi. ¹³ Dioso pijinia pejumecovënëtsiva pamona, itsa apo pejumecovënëtsinë Dioso, itsiata bajaraponë itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi. ¹⁴ Dioso pejumecovënëtsiva pamona, apo jumecovënëtsi ata Dioso, itsiata bajaraponë Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajaraponë pijava Dioso pejumecovënëtsiva. Bajara pijinia itsane Dioso pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitane

pamonaē Dioso apo pejumecovēnētsivi, bajarapacuenia coxitaējitsipatsibeje Dioso. Nexata bajarapajivibeje caejivi pejumecovēnētsixae, Dioso coxitaenatsibeje bepenajuajumecovēnētsijivibeje Dioso. ¹⁵ Itsiata Dioso pejumecovēnētsiva pamona, itsa apo pejumecovēnētsinē Dioso, itsa jamatabēvecuanaviatatsi, nexata becopata roviaalia pevecuanaviatsinexatsi. Dioso pijinia pejumecovēnētsinē pijava, itsa apo pejumecovēnētsiva Dioso, itsa jamatabēvecuanaviatatsi, nexata becopata roviaalia pevecuanaviatsinexatsi. Nexata Dioso pejumecovēnētsinē, pijava pevecuanaviatsinētsi, bepimasiarucaenē penaexanaenexa. Pova pijinia Dioso pejumecovēnētsiva, pamona pevecuanaviatsivatsi, bepimasiarucaeva penaexanaenexa. Bajarapacuenia bexana imasia peponaponaenexa. Tsipaji Dioso nacajunata jamatabēcuenexanepanaeaya vajajinavanapaenexa. ¹⁶ Papetirivimē, paneamonajivi Dioso itsa apo pejumecovēnētsivi, paxamē xaniavaetsia panetsitajinavanapaexae tsane paneamonajivi, paneamonajivi ata meta najamatabēcuenecopatsiana Cristojavabelia. Papebijivimē pijinia, panijavajivi Dioso itsa apo pejumecovēnētsivi, paxamē xaniavaetsia panetsitajinavanapaexae tsane panijavajivi, panijavajivi ata meta najamatabēcuenecopatsiana Cristojavabelia. Bajaraxuata jamatabēcuenexanepanaeaya panacajinavanapare. Pētsa panavevecuanaviabame.

¹⁷ Caenē canacujitsia tsiteca bexanaponapona pacuenia Dioso tocopatatsi pexanaponaponaenexa. Xua nacuenebaponapona Dioso pejunatsivajēnaeyatsi Jesucristojavabelia penajamatabēcuenecopatsinexa, bajaraxua mapamatacabi ataje tsiteca benacuenebaponapona. Bajarapacuenia itorobaponajē daxita Dioso pejumecovēnētsivijava pexanialivaisi itsa tsipaebanajetarucujē. ¹⁸ Ponē Dioso junatatsi pepua peperabēcaucutsinētsi baja judíovi pijacuenia, bajaraponē baja bajarapacuenia Dioso bejumecovēnētaponapona. Ponē pijinia Dioso junatatsi abaxē apo peperabēcaucutsinē atatsi judíovi pijacuenia, bajaraponē baja bajarapacuenia Dioso bejumecovēnētaponapona. Apo benaperabēcaucutsiaexanae. ¹⁹ Vajanacaperabēcaucutsijava, amatamobi Diosojavabelia. Apo vajanacaperabēcaucutsijava ata, amatamobi Diosojavabelia. Dioso rajane vajanacaitorobicuenia vajajumecovēnētavanapaejava, bajara jane xua, namatamota Diosojavabelia. ²⁰ Caejivi canacujitsia benacuenebaponapona xua nacuenebaponapona Dioso pejunatsivajēnaeyatsi. ²¹ Itsamonae baja paxamēyajuvēnēvi Jesucristojavabelia penajamatabēcuenecopatsivajēnaeaya, dajubicuenia canajetatsi itsamonaejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabēcuenecopatsinexa, pētsa natsinajamatabēxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi itsa tocopiapatsianatsi pevecuapit-sapaenexa baja bajarapamonae, nexata vecuapit-

sapaena amoneya petonacuenebabiabivi. ²² Ponē itsamonaejavabelia canajetatsi, nexata amoneya itsa tonacuenebaponapona, bajaraponē bitso pibisiacuene pexanabiabineconimi Cristo baja vecuaajibiaexanatsi. Bajarapacuenia vecuaajibiaexanatsi pamatacabi najamatabēcuenecopata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanaponapona. Bajara pijinia itsi ponē ata apo canajetsitsi itsamonaejavabelia. Itsa najamatabēcuenecopata Cristojavabelia, bajaraponē Cristo pijajivitonē baja naexana. Nexata bajaraponē ata exanaponapona Dioso pitorobicueniatsi. ²³ Dioso baja cajena pacacomuata ayaimatamota. Bajaraxuata pētsa baja panacopatame itsajivi ata papecajamatabēcuenebijianaenexa Dioso panejumecovēnētavanapaejavaveca. Itsa bajarapacuenia panacopatsipame papecajamatabēcuenebijianaenexa, nexata bajarapajivi bepapijajivimē tsipae paneexanavana-paenexa papecaitorobicuenia. ²⁴ Bajaraxuata, xua baja panacuenebavanapame, tsiteca panevajēnaeyabelia xaniavaetsia panacuenebavanapare Dioso pitabarata. Pacaenēmē canacujitsia panacuenebavanapare xua panacuenebavanapame pamatacabi abaxē Dioso apo pacajunatsi panejumecovēnētsinexa. Itsa apo pacaperabēcaucutsi judíovi pijacuenia, nexata bajarapacuenia pajinavanapare. Itsamonaejavabelia papecacana-jetsixae, nexata amoneya itsa patonacuenebavanapame, bajarapacuenia tsiteca patonacuenebavanapare.

²⁵ Itsa panetoyaquinaremena, paneyanijobame abaxē apo penacojiobavanapaevi yabara. Apo yapētaenē pacuenia vajatuxanenē jumaitsi bajarapitsivi yabara. Itsiata baitsi jane pacatsipaebianatsi pacuenia sivanajamatabēxainajē bajarapitsivi. Dioso taja-matabēcueneta neyapētaeayaexana taneitaxutotsoni-ataexae. Bajaraxuata pacatoxanepana pacuenia pacatsipaebijitsiatsi patanejumecovēnētsinexamē. ²⁶ Dioso vajajumecovēnētavanapaevi, nacatsiyai bitso aeconoxae vajajinavanapaeepato abaxē mapanacuataje. Tsipaji itsamonae vajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapae. ²⁷ Itsa baja capanepaeya penacojiobivi, pētsa xuaba pijava. Itsiata baitsi jane itsa abaxē apo nacojiobi, pētsa jaita pijavanexa. ²⁸ Ponē baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovēnētsivi bitso vajanacatsiyaixae, pamonaē baja nacojioba, bajarapamonae toayapēbeje tsanetsi pevecuapanepaenexa bajarapapiayaicuene. Bajarapacuenia petoayapēbejeyanivatsi, bajarapamonae picani tojitsipajē imasia pejinavanapaenexa.

²⁹ Tajamonae, mara pacuenia jamatabēpacajumaitsisije. Imoxoyo rabaja pevajēnae vajatuxanenē icatsia pepatsijavanexatsica. Ajena, mapamatacabicujinaelia tsaneje, penacojiobivi ata bepimasiarubenaevicuenia asaēyata betonacuenebavanapa vajatuxanenē. ³⁰ Daxitajivi bejamatabēcuenenatsi ēDioso pijacuenē pet-

onacuenebavanapaenexa. Pamonae bitso najamatabëxaina peyajuvënëtëpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonae ata jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyavicuenia betonacuenebavanapa. Pamonae ata comuaca pexinaejavanexa, asaëyata betonacuenebavanapa vajatuxanenë. Asivaya apo betae xua natocomuaca. ³¹ Pamonae ata, mapanacuata pexinaejava, canacuenebavanapa, bajarapamonae becanacuenebavanapa jamatabëcueneecënënaenejevatsi bajarapajamatabëcuene. Tsipaji mapanacuapijicue ne vajataejavami vereverecapona.

³² Apo pacatojitsipaetsi papecajamatabëcueneenaenexa mapanacuapijicueeneje. Ponë abaxë imasia ponapona, jamatabëcueneenatsi ëvajatuxanenë pijacue. Tsipaji jitsipa pesivajamatabëcuenebarëyanexatsi vajatuxanenë. ³³ Itsiata baitsi jane penacojobinë yajavajamatabëcueneenatsi pevetsinexa pijava pesivajamatabëcuenebarëyanexatsi. ³⁴ Apo najamatabëcuenejëpaebeje pijinia penacojobivabeje pimasiarucaevabeje. Pova apo nacojobi, jamatabëcueneenatsi ëvajatuxanenë pijacue. Jitsipa pexaniacuene pexanaponaponaenexa. Jitsipanua pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

³⁵ Bajarapacuenia itsa pacajumaitsitsi, apo penacojobivi apo itavetsinë penacojobijava. Patacajamatabëcuene yavenonaenexa raja, pacajumaitsitsi bajarapacuenia. Tsipaji pacatojitsipatsi xaniavaetsia panejinavanapaenexa. Vajatuxanenë bepantonacuenebavanapame daxita panejamatabëcueneta, panajamatabëcuene epatajërërëcaenejevamë.

³⁶ Ponë pexënatoyo xaina, itsa tsitaxanepanatsi pexënatoyo petonacojobinexatsi, nexata betocopata penacojobinexa. Tsipaji baja penaveretsiva tsaponapona. Bajarapova ata baja itsa jitsipa penacojobinexa, betocopata penacojobinexa. Itsa tocopata pexënatoyo penacojobinexa, apo pibisiacuene. ³⁷ Ponë pijinia pexënatoyo itsa apo jitsipae abaxë penacojobinexa, bajaraponë ata itsa najamatabëcuenevereta apo petocopatsinexa pexënatoyo penacojobijava, nexata bajaraponë ata pexaniacuene exana. ³⁸ Nexata ponë apo tocopatsi pexënatoyo penacojobinexa, bajaraponë itsanëvecua bitso pexaniacuene exana.

³⁹ Penacojobiva baja acuenebi pevecuanaviatsinexa pamona. Tsipaji pamona piasaëtsaponaponaeeppato, bajaraponë abaxë tsiteca pijava tsaponapona. Tsipaji bajarapacuenia Dioso najumecopata. Itsiata baitsi jane pamona itsa vecuatëpatsi, bajarapova tocopatatsi icatsia penacojobinexa. Tocopatatsi penacojobinexa ponëjavabelia jamatabënacobi, itsa bajaraponë ata Dioso pejumecovënëtsinë. ⁴⁰ Itsiata bajarapova pamona pevecuatëpacujinaetsi, imasia abaxë itsa pon-

apona, jamatabëcuenebarëya tsaponapona tsane ëDioso pijacue pejamatabëcueneenaponaponaexaetsi. Nexata baja itsa nacojobiana, bevelia baja jamatabëcuenebarëya tsane. Pacuenia copiaya jamatabëcuenebarëya tsaponapona, apo itsi tsane baja. Bajarapacuenia najamatabëxainajë bajarapacue yabara. Bajarapacuenia itsa pacajumaitsitsi, Espiritu Santo neyajavacuaicuaijai.

Jumapecataeya pexanaenëanëjavabelia perajutsiviyajuvënëjava yabara pelivaisi

8 Jumapecataeya pexanaenëanë itsamonae tane beprijadiosovi. Nexata bajarapamonae dajubi beyabiaba perajutsinexa bajarapavi jumapecataeya pexanaenëanëjavabelia. Bajarapaviyajuvënëjava panexaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsije. Xaniajai rabaja cajena. Daxitatsi baja cajena bajarapacue yapëtanetsi. Pavi rajuta jumapecataeya pexanaenëanëjavabelia, bajarapaviyajuvënëjava xae atatsi tsipae, apo nacaitsacueniabi tsipae. Itsiata vajaxaecujinae bajarapaviyajuvënëjava, itsa jamatabëjumaitsitsi: "Xanë bitso yapëtaniji pamona mapavije atsobabiaba matatoxenetsia," itsa jamatabëjaiti, abeje rajane bajarapajamatabëcuene. Tsipaji beayajamatabëcuenejivitsi nataejitsipatsi bajarapamonaeevecua. Biji rajane xanepana vajajamatabëjumaitsinexa mapacueniaje: "Asivaya taniji Dioso patanajuajumecovënëtsivi, pamona atsobabiaba jumapecataeya pexanaenëanëjavabelia perajutsiviyajuvënëjava. Nexata xanë ata apo xanë tsane bajarapaviyajuvënëjava. Nexata xaniavaetsia tsitaponaponaenajë bajarapamonae taneitaxutua jamatabëcuenesaënexa Diosojavabelia," vajajamatabëjajava xanepana. Bajarapacuenia itsa tsitaponapontsi Dioso pejumecovënëtsivi, nexata nacaitaxutua jamatabëcuenesaë tsaponae Diosojavabelia. ² Pajivi jamatabëjumaiti: "Xanë cajena bitso yapëtaniji daxitacuene," jamatabëjai, bajarapajivi pejamatabëcuene navëxaniabijivi. Abaxë ayajava tosaicatsi xaniavaetsia peyapëtaenexa. ³ Itsiata baitsi jane pajivi Dioso jitsipa, bajarapajivi Dioso ata jamatabëcuene yapëtanetsi Dioso pejitsipaejava.

⁴ Nexata jitsipajë patacayapëtaeyaexanaenexa itsamonae jumapecataeya pexanaenëanëjavabelia perajutsiviyajuvënëjava pexaejava yabara. Vaxaitsi baja cajena yapëtanetsi jumapecataeya pexanaenëanë apo pexaniajaicue. Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi. ⁵ Jivi raja apo yapëtae. Bajaraxuata saya jamatabëcuene navëxaniabiaya jumai tsabiabi: "Diosovi raja navitsi-ajinavanapa athëbëtatsia. Jinavanapa mapanacuajava ataje," jai tsabiabi jivi jamatabëcuene navëxaniabiaya. ⁶ Itsiata vaxaitsi yapëtanetsi caenë vaxa Dioso peponaponaejava. Bajaraponë daxitacuene pexanaenë. Bajaraponënexa tojinavanapatsi. Caenë rabaja pijinia pepon vajatuxanenë Jesucristo. Bajaraponë peja-

matabēcueneta exana daxitacuene. Bajaraponē peja-matabēcuenetanua nacacapanepaena vajaneconive-cua.

⁷ Itsiata baitsi jane itsamonae Dioso pejumecovēnēt-sivi ata, abaxē apo yapētae pacuenia picani apo caējē-paetsi jumapecataeya pexanaenēanē peja-matabēcuenebijianaenexatsi. Bajarapamonae pejevax-ijavaveliacujinae jumapecataeya pexanaenēanē taeyabiaba bepiasaētsavanapaevi. "Papexaejava itsa-monae rajutabiaba jumapecataeya pexanaenēanējav-abelia, diosovijavabelia rajutabiaba bajaraxua," sivaja-matabējai tsabiabi bajarapamonae jamatabēcuenē-navēxaniabiaya. Bajaraxuata bajarapamonae aeconox-ae Dioso jumecovēnētsi ata, itsa xane jumapecataeya pexanaenēanējavabelia perajutsiviyajuvēnējava, ba-jarapamonae jamatabēcuenēnavēxaniabiaya ja-matabējumai tsabiabi: "Pibisiacuene meta exanajē Dioso pitabarata mapavi taxaexaeje," jamatabējai tsabiabi. Tsi-paji Dioso jumecovēnētsi ata, abaxē apo yapētae pacuenia picani apo caējēpaetsi jumapecataeya pexanaenēanē pejamatabēcuenēbi-jianaenexatsi. ⁸ Yapētanetsi rabaja vaxaitsi. Vajaxaeja-va yabara Dioso pexitsi apo nacaexanae. Xae atatsi, apo xae atatsinua, najēpabeje. Vajaxaejava apo nacavēnananeconitsiaexanae Dioso. ⁹ Paxae atamēnua, apo paxae atamēnua, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajuajumecovēnētsivi asivaya pane-taexae, pētsa patsitaexaname itsacuenejavayo ata, xua bepibisiacuene taejitsipa bajarapamonae. Tsi-paji itsa pacacuenetaejitsipa, exanaejitsipa bajarapajivi ata. Nexata Dioso pejumecovēnētsijavavecua pajopaeyaex-anaejitsipame bajarapajivi. Tsi-paji abaxē ja-matabēcuenēfaefaena Dioso pejumecovēnētsijava.

¹⁰ Paxamē pētsa panabaneme pabojavata jumapecataeya pexanaenēanējavabelia perajutsiviyaj-uvēnējava abatabiaba. Paxamē baja payapētaneme pacuenia apo pacaitsacueniabi picani tsipae, baja-rapaviyajuvēnējava paxae atamē. Nexata itsa paxaejitsi-pame bajarajota, panexaejavata pacataejitsipa itsanē Dioso pejumecovēnētsinē, ponē abaxē bepibisiacuene pexanaejava tane bajarapavi itsa naxaejitsipa. Nexata itsa pacajanitane, bajaraponē ata naxaejitsipa. Nexata penaxaexae, bepenaneconitsinē Diosojavabelia natae-jitsipa. ¹¹ Paxamē picani bajarapitsinē matatoxenetsia paneyapētaexae, paxaejitsipame bajarapaviyajuvēnē-java. Itsiata nexata bajarapacuenia paja-matabēcuenebijianaejitsipame, ponē Dioso pejume-covēnētsinē ata, abaxē jamatabēcuenēfaefaena Dioso pejumecovēnētsijava. Bajaraponēnēxata ata cajena Cristo sivatēpatsi. ¹² Bajarapacuenia itsa paja-matabēcuenebijianaejitsipame Dioso pejumecovēnēt-sijivi, nexata pananeconitsipame Cristojavabelia. ¹³ Ba-jaraxuata xanē itsa yapētani-pacuenia itsajivi, Dioso pejumecovēnētsijivi, belia jopaejitsipa Dioso pejume-covēnētsijavavecua xanē tatsitaxaejava peja-matabēcueneta, nexata caeto ata apo tsitaxaenē tsi-

pae bajarapaviyajuvēnējava asivaya tataexae bajarapa-jivi.

Pacuenia apóstolevi tocopatatsi, xua namatavenona, pevajētsinēxata Dioso pejumecovēnētsiviyavabelia yabara pelivaisi

⁹ Payapētaneme rabaja mapacueneje. Xanē apo xae atanē jumapecataeya pexanaenēanējavabelia perajutsiviyajuvēnējava, itsiata Dioso netocopata daxi-tacuene taexanaenēxata Jesucristojavabelia tanaja-matabēcuenecopatsixae. Payapētanemenua vajatuxa-nenē Jesucristo taneitapetsijava apóstolenēnēxanē. Taitaxutota baja cajena taniji vajatuxanenē Jesús. Pax-amē ata patacatsipaebixae Jesucristo pelivaisi, nexata baja panajamatabēcuenecopatame Jesucristojav-abelia. Tsi-paji asaēyata tonacuenebaponaponajē va-jatuxanenē. ² Itsamonae apo beapóstolenēnē netae ata, itsiata paxamē apóstolenēcuenenē paneyapē-taneme. Patacatsipaebixae pexanialivaisi, paxamē ba-ja vajatuxanenē pajumecovēnētame. Bajaraxuata pi-cani daxitajivi xaniavaetsia beneyapētane após-tolenēcuenenē.

³ Itsajota pexanialivaisi jivi tsipaebaponaponajē, Dioso picani netocopata tanerajutsinēxata tana-matavenonaejavaxi. Itsamonae paxamēyajuvēnēvi ne-jumeababiaba livaisi tatsipaebabiabijava mapacueni-aje. ⁴ Paapóstolevinē itsa panacuenebajē Dioso pi-jacuene, panetocopata itsajota pexanialivaisi patsipae-bavanapajē patanerajutsinēxata pataxaejava, pataapae-ava ata. ⁵ Itsa tanacojobinē tsipae, xanē ata pijinia Dioso netocopatsipa tabarēponaenēxata tajava, Dioso pejumecovēnētsiva. Bajarapacuenia netocopatsipa tsi-paji bajarapacuenia exanavanapa itsamonae apóstole-vi. Vajatuxanenē pejuyapijivi ata, apóstolenē Pedro ata, pijava barēponabiaba. ⁶ Itsamonae itsa pacatsi-paeba Cristo pelivaisi, pajamatabēcueneyavenonabi-abame penamatavenonaejava yabara. Itsiata baitsi jane paxanēbeje Bernabēbeje panacuenebabiabajēbe-je patajacuatabeje patanaevetsinēxabeje. Bajara-pacuenia picani apo benacuenebinēbeje patajacu-atabeje patanaevetsinēxabeje. Nexata picani paxamē, paxanēbeje ata, bepanerajutame patanamatavenon-aejavaxibeje. Tsi-paji paxanēbeje Cristo pelivaisi pata-catsipaebabiabixaebeje, Dioso picani panetoco-patabeje patanerajutsinēxamē patanamatavenonae-javaxibeje. ⁷ Payapētaneme baja cajena mapacueneje. Itsanē itsa tonacueneba pijatuxanenē, barajutatsi pex-aejava. Pamonae ata pijinia vajabitsaē naexanavana-pa, itsa rajutaponatsi pexaejava, apo matamotaponae pexaejavamatamo pijapalatata. Jume cajena. Tocomu-atabiabatsi ponē itorobatsi. Pamonae pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvēnējava. Pamonae pijinia itsanē pi-jaoveja toeveta, itsajivi ata apo janiitavetsitsi pemiyuju-caebarēmeneyajuvēnējava piapaeyaniva. Jume cajena. ⁸ "Maraeta pacuenia Pablo nacajumaitsi-si saya jivi pet-sitaxanepanaecueniatsi vaxaxanavanapaenēxata," paja-matabējamē pētsa. Tsi-paji rabaja Dioso pejumelivaisi-

baxutota ata bajarapacuenia jumaitsi. ⁹ Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata ata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabiabiavata. Pëtsa pumuxatatame trigoxu pexaenexa pecatotanabataxuabiavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumaitsi, ëbueyu yabara apo jumaitsi. ¹⁰ Biji rajane bajarapacuenia Dioso pejumelivaisibaxutota jumaitsi vajanacayapëtaeyaexanaenexa vajamatomotsijavanexa vajanacatonacuenebinë. Ponë canacueneba iracuemo itsanë pijatrigoxu petoubinexa, penacuenebijavata jamatabëjumaitsi: “Pamatacabi naveretsiana trigoxu, bajarapaxuyajuvënëjava nerajutsiana tatonacuenebimatamo,” jamatabëjai. Nexata penaveretsimatacabi trigoxu rajutatsi. Ponë ata icatsia juya trigoxu penaveretsimatacabi totanabataxuaba, bajaraponë ata jamatabëjumaitsi: “Mapatrigoxuyajuvënëjavaje nerajutsiana tatonacuenebimatamo,” jamatabëjai. Nexata rajutatsi. Bajara pijinia pacuenia Dioso pijacuene pata-tonacuenebivi patanamatavenonaejavaxi, paxamë bepanerajutame Cristo pelivaisi patacatsipaebijamatabëcuene. ¹¹ Paubajë baja cajena panejamatabëëthëtota Dioso pejumelivaisi. Jica, nexata juya itsa pacajamatabëcueneevetsipatsi patanerajutsinexamë patanamatavenonaejavaxi, ¿pacatsitaayaijava tsaja tsipae bajarapacuenia? ¹² Paxamë rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi papecatsipaebijamatabëcuene Cristo pelivaisi. Paxanë biji picani panetoxanepana copiaya patanerajutsinexamë itsamonaevecua.

Dioso picani panetocopata patanerajutsinexamë patanamatavenonaejavaxi Cristo pelivaisi patacatsipaebaponaejamatabëcuene. Itsiata apo pacavajëtsitsi patanerajutsinexamë. Biji rajane piayapëbejecuenia panatonacuenebaponajë patajacuata patanaevetsinexa bajarapacuenia. Apo pacavajëtsitsi caeto ata patanerajutsinexamë patanamatavenonaejavaxi. Itsa pacavajëtsipatsi, itsajamatabëcuene meta paxinaejitsipame paxanëjavaberena. Nexata meta apo pajumecovënëtsimë tsipae patacatsipaebilivaisi, pexanialivaisi, Cristo pelivaisi. ¹³ Payapëtaneme rabaja mapacuenieje. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonaenexa penacuenebivi altarvënëjavata, itsajota dajubi tobeyabiaba ofrendacuena perajutsinexa bajarapavi Diosojavabelia, bajarapamonae ata Dioso tocopatatsi pexaenexa bajarapaviyajuvënëjava. ¹⁴ Bajara pijinia pacuenia vajatuxanenë Jesucristo itoroba Dioso pejumelivaisi petsipaebaponaeivi penamatavenonaejavaxi perajutsinexatsi. Pamonaenexa jumecovënëta pona petsipaebilivaisitsi, bajarapamonae juya berajutapona xua namatavenona petsipaebivitsi. ¹⁵ Itsiata baitsi jane xanë bajarapacuenia netocopatsi ata, apo pacavajëtsitsi itsacuenejavayo ata. Mapabaxutoje pacatoy-

aquinae atatsi, apo pacatoyaquinaetsi patanerajutaponaenexamë itsacuenejavaxi. Bitso cajena jamatabëcuenebarëyanë. Tsipaji Cristo pelivaisi pacatsipaebabiabatsi, apo panerajutsi atamë itsacuenejavayo ata. Bajaraxuata baja cajena apo jitsipaenë patanematamotsijavamë. Itsa panematamotsijitsiamë tsipae, nexata jitsipaiejitsipajë tatëpaejava patanematamotsiyanivamë. Tsipaji itsa panematamotsipame, copiarucaeijitsipa baja patacasivajamatabëcuenebarëya tsabiabijavami. Tsipaji amoneya patacatsipaebabiabixae Cristo pelivaisi, pacasivajamatabëcuenebarëyatsi tsabiabi.

¹⁶ Apo jamatabëjumaitsinë: “Ayaijamatabëcuenenënë tatsipaebinëxae jivi pexanialivaisi pecapanepaelivaisinexatsi Diosojavabelia,” apo jamatabëjanë. Jume baja cajena. Pexanialivaisi jivi tsipaebabiabajë. Tsipaji baja vajatuxanenë nitoroba. ¡Bitso meta naneconitsipajë Diosojavabelia jivi itsa apo tsipaebinë tsipae bajarapalivaisi! ¹⁷ Dioso nitorobinejeva, saya xanë taja-matabëcueneta jivi itsa tsipaebaponaejitsipajë pexanialivaisi, Jesucristo pelivaisi, nexata jamatabëcuene evetabiabijitsipajë jivi tanematamotabiabinexa pexanialivaisi tatsipaebabiabijamatabëcuene. Itsiata baitsi jane pexanialivaisi jivi tsipaebaponajë vajatuxanenë taneitorobixae. Jumecovënëta pona pona pacuenia Dioso nitorobapona. ¹⁸ Bajaraxuata apo nematamotsi ata, tsipaebaponajë pexanialivaisi jivi pecapanepaelivaisinexatsi Diosojavabelia. Dioso netocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanerajutsinexa itsacuenejavayo ata. Jivi itsa tsipaebaponajë bajarapalivaisi, bitso jamatabëcuenebarëyanë tsaponae. Bajaraxuata apo jitsipaenë tanematamotsijava.

¹⁹ Apo tanecanajetsinë raja dajubinëcuena itsamonaejavabelia amoneya tatonacuenebinexa. Itsiata baitsi jane dajitajivi beprijavitonënëcuena ponaponajë. Bajarapacuenia exanaponaponajë itsamonae ayaibitsaëto-xaneto ata tayavenonaenexa, penajamatabëcuene copatsinexa Diosojavabelia, papanepaenexatsi Diosojavabelia. ²⁰ Judíovi jumecovënëtsiajinavanapa bajayata Dioso Moiséspijinëta penajumecopatsilivaisi. Xanë picani apo jitsipaenë taexanaponaponaenexa pacuenia itoroba Dioso Moiséspijinëta penajumecopatsilivaisi. Tsipaji baja najamatabëcuene copatajë Diosojavabelia tajaneconi taneevecuaajibiaexanaenexa. Itsiata judíovijava itsa naponaponabiabajë, pacuenia Dioso Moiséspijinëta penajumecopatsilivaisi itorobatsi, judíovi itsa exana, xanë ata bajarapacuenia naexanabiabajë. Bajarapacuenia naexanabiabajë bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajë. Nexata judíovi itsa najamatabëcuene copata Diosojavabelia, pecapanepaenexatsi Diosojavabelia. ²¹ Bajara pijinia pacuenia apo judíovijava ata itsa naponaponabiabajë, judionë atanë, pacuenia apo judíovi jinavanapa, cuenejëpaeya naponaponabiabajë. Bajara pacuenia apo judíovi cuenejëpaeya naponaponabiabajë bajarapamonae xaniavaetsia tanenamuxu-

naevetsinexa Cristo pelivaisi ita tsipaebajë. Nexata apo judiovi ata ita najamatabëcuenecopata Cristojavabelia, pecapanepaenexatsi Diosojavabelia. Bajarapamonae apo judiovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipaecuenia taponaponaenexa. Jume baja cajena. Tsipaji jumecovënëtajë Cristo taneitorobicuenia. ²² Itsamonae abaxë ajena najamatabëcuenecopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneyavenonaenexa bajarapamonae pevajënaeyabelia piamatabëcuenesaë tsavanapaenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneyavenonaenexa. Jamatabëcueneyavenonaejitsianë bajarapamonaejajuvënëvi ayaibitsaëtoخانeto ata penajamatabëcuenecopatsinexa Cristojavabelia pecapanepaenexatsi Diosojavabelia. ²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata tanyajavacapanepaenexatsi Diosojavabelia.

²⁴ Payapëtaneme rabaja mapacuenije. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso. ²⁵ Daxita pamonae penayacobivinexa pecujinaejinaejava, tajëvelia banajamatabëveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaëjëbavanapa caenë canacujitsia. Bajarapamonae najamatabëcuenesaëtavanapa, daxita xua abeje, pexanaeyaniva piamajumalisaënexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepijia saya piabejecoronanexa. Biji rajane vaxaitsi Dioso vajajumecovënëtsivi, Dioso tonacuenebavanapatsi athëbëtatsia vajanacarajutsinexa xua nacatsipaeba, apo peverevereaejavanexa. ²⁶ Pacuenia pebitsojinaenë asaëyata cujinaejina rovia pepatsinexalia petocaëjëtsijavabeliatsi, bajara pijinia pacuenia xanë ata asaëyata tavajënaeyabelia exanaponaponajë vajatuxanenë taneitorobicuenia. Tonacuenebaponaponajë asaëyata. Apo tonacuenebinë saya jema penaxuabinexa tatonacuenebijava. ²⁷ Bajaraxuata naperabëevetsia naevetaponaponajë pibisiacuene taexanaeyaniva. Ba-

jarapacuenia naperabëevetsia naevetaponaponajë tsipaji jitsipajë vajatuxanenë tanesivajamatabëcuenenëbarëya tsaponaejava itsamonae ita tsipaebaponajë pexanialivaisi. Apo jitsipaenë tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata ita ponaponaejitsipajë, Dioso necopatsiaexanaejitsipa tatonacuenebijava.

Pemuxujobilivaisi penavajëcaeyaniva jumapecataeya pexanaenëanëjavabelia yabara pelivaisi

10 Tajamonae, pacatojitsipatsi icatsia panenajamatabënapsinexa pacuenia bajayatami vajasalinaivimi Moiséspijinë barëpitsaparena Egipto nacuaverena. Moiséspijinë Dioso tsitajëtaponatsi itsaxuayo vajasalinaivimi barënajetaruaejitsia. Vajasalinaivimi pematatsënëatsia itarërëbo namataxainaeja najetaruca. Nexata bajarapaitarërëbo vajasalinaivimi pënanajetarubena. Daxitabitsaëto vajasalinaivimi Moiséspijinë barënicabarena Rojovënë manuamene-maxërana epatuarena. ² Pacuenia pebi ita bautisabat-si merata, naexana Dioso pijajivitonë, bajara pijinia pacuenia vajasalinaivimi Moiséspijinë pijajivi naexana ita pënaponarena Egipto nacuaverena. Moiséspijinë pijajivi naexana vajasalinaivimi itarërëbo pebëxëpana ita pënanajetarubena Moiséspijinë. Rojovënë manuamenemaxërana epatuarena ata ita barënicabarenatsi, Moiséspijinë pijajivi naexana vajasalinaivimi. ³ Daxita vajasalinaivimi caeviriajava pexaejava najuanabanepona ita najetarubena bajarapatusato nacua-yarena. Papexaejava Dioso rajutaponatsi, bajarapamonae xaepona. ⁴ Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapitsapatsi ibotoخانetojavaverena. Bajarapamatacabi vajasalinaivimi Cristo yajavaponatsi. Cristo rabaja cajena bajarapaibotoخانeto. ⁵ Itsiata baitsi jane vajasalinaivimiyajuvënëvi, caejiviyobeje, saya jumecovënëta pacuenia Dioso najumecapanepaeya jumaitsitsi. Nexata bajarapajiviyobeje Dioso sivajamatabëcuenenëbarëyatsi. Daxita itsamonae apo jumecovënëtsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaëjëtatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabëëthëtovetsina becanaëjëtatsi pibisiacuene vajaexanaeyaniva. ⁷ Bajaraxuata apo benavajëcaetsi jumapecataeya pexanaenëanëjavabelia pacuenia bajayata vajasalinaivimiyajuvënëvi navajëca jumapecataeya pexanaenëanëjavabelia. Dioso pejumelivaisibaxutota jumaitsi pacuenia vajasalinaivimi pibisiacuene exavanapa, fiesta ita toexana jumapecataeya pexanaenëanënexa. Dioso pejumelivaisibaxutota vajasalinaivimi yabara jumaitsi mapacueniaje: "Bajarapamonae enabiaba penabaninexa, piapaenexanua. Bajaraxucujinae nonobapunabiaba peyavajibinexa," jai Dioso pejumelivaisibaxutota vajasalinaivimi yabara. ⁸ Apo bexanaetsinua vajavitota pibisiacuene pacuenia bajay-

ata vajasalinaivimiyajuvënëvi exana. Bajarapitsivi tēpa caematacabita veintitrés mil pajivibeje. ⁹ Apo beja-matabēcueneējētsitsinua vajatuxanenē pacuenia bajayata vajasalinaivimiyajuvënëvi Dioso jamatabēcueneējēta. Papibisiacuene vajasalinaivimi pejamatabēēthētota natojitsipa pexanaenexa, Dioso jamatabēcueneējētsiaya exanavanapa, peyapētaenexa pacuenia Dioso exanaejitsia bajarapamonaejavabere-na. Bajaraxuata vajasalinaivimi jomo pesinicujiruatsi vereverecapona. ¹⁰ Pētsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvënëvi anaepanabiaba Moiséspijinēbeje Aarónpijinēbejevabelia. Bajaraxuata Dioso itoroba pijaängel peverebiabinexatsi vajasalinaivimiyajuvënëvimi.

¹¹ Bajarapacuenia exanatsi bajayata vajasalinaivimi. Dioso baja cajena nacayapētaeayaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bajarapalivaisi itanerubena Dioso pejumelivaisibaxutota vajanacamuxujobinexa, vaxaitsi ata bajarapacuenia pibisiacuene vajaexanaeyaniva. Vaxaitsi rabaja nacua pevereverecaeitarayota jinavanapatsi. ¹² Itsa pajamatabējumaitsimē: “Xanē cajena ajamatabēcuenesaēnē Dioso tajumecovënētsijava. Nexata apo exanaenē tsane pibisiacuene pacuenia bajayata tajasalinaivimi exana,” itsa pajamatabējamē, ꝑxania baja tsane! Tsipaji paxamē ata bajarapacuenia pibisiacuene paexanaejitsipame. ¹³ Xua baja aeconoxae pataeponame, dovathi pejamatabēcueneta papecajamatabēcueneējētsijava, bajaraxua daxita Dioso pejumecovënētsivi tocopiapataponatsi mapanacuataje. Itsiata baitsi jane Dioso pacayavenonaponaena pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabēcueneējētaponaenexa paneajamatabēcuenesaējāva matatoxenetsia. Nexata dovathi itsa pacajamatabēcueneējēta, itsiata Dioso pacayavenonaponaena paneajamatabēcuenesaē tsaponaenexa. Nexata papecajamatabēcueneējētsijava, pavecuapanepaponaename pibisiacuene paexanaenejevamē.

¹⁴ Tajamonae bitso patacaasivavi, jumapecataeya pexanaenēanējavabelia itsamonae penavajēcaecuene, nayajivitaeya pajinavanapare. ¹⁵ Pacajamatabēcueneecaējēpa baja cajena panejumeyapētaenexa patacatsipaebilivaisi. Nexata panejumecanaējēre patacatsipaebilivaisi paneyapētaenexa itsa pexaniaajailivaisi. ¹⁶ Itsa nacaetuanatsi vajanajamatabēnapitsinexa xua yabara Cristo nacasivatēpa, najuaxanetsi pan. Najuatavavējēapatsinua vajatavavējēapaera. Nexata pan yabara, vajatavavējēapaera ata yabara, Diosojavabelia jumaitsi: “Pexaniacuene bitso panetoexaname. Panerajutame pan. Panerajutame patamatavavējēapaera ata,” jaitsi. Itsa nacaetuatatsi vajanajamatabēnapitsinexa xua yabara Cristo nacasivatēpa, caebitsaēto naexanatsi Cristo yajava, ponē nacasivatēpa cruzata. ¹⁷ Ayaibitsaētoxoneto atatsi, caepan itsiata najuaxanetsi. Nexata vaxaitsi Cristo va-

jayajavajinavanapaexae, caebitsaētoCristo pijajivitsi naexanatsi.

¹⁸ Pacanaējēre pacuenia judíovi baexana. Itsamonae dajubi beyabiaba bajarapavi ofrendacuena perajutsinexa Diosojavabelia. Nexata pamonaenaxane bajarapavi, caebitsaēto Dioso pijajivi naexana. ¹⁹ Mara pajamatabēcuene yabara jumaitsinēje. Jumapecataya pexanaenēanē, itsacuenejavayo ata pexanaenexa, apo caējēpaetsi. Bajara pijinia itsi pavi ata jumapecataeya pexanaenēanējavabelia rajuta. Apo caējēpaetsi jivi xae ata pejamatabēcuenebijianaenexatsi. Tsipaji jumapecataeya pexanaenēanē, bajarapavi apo itothianae bajarapavivecua. ²⁰ Nexata abaxē pamonaenaxa apo yapētae, dajubinē itsa tobeyaxuaba ofrendacuena pevi perajutsinexa jumapecataeya pexanaenēanējavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaejavata. Itsa panaxaejitsipame bajarapamonaejavata, nexata caebitsaēto panaexanaejitsipame dovathi yajava. ²¹ Paxamē baja panenabanivi, paneapaevinua, vajatuxanenē pijamesata. Nexata baja acuenebi panenabaninexa, paneapaenexanua, itsajota Dioso apo pejumecovënētsivi dovathi pijacuene exanavanapa. ²² Vaxaitsi Dioso vajajumecovënētsivi, apo jitsipaetsi vajatuxanenē vajanacabaraanaepanaejava. Dioso pijacuene, dovathi pijacuene ata, anijacuenebeje itsa exanaponaejitsipatsi, nexata vajatuxanenē nacabaraanaepanaejitsipa. Vaxaitsi cajena apo vecuaasaētsi vajatuxanenē. Nexata apo vecuapanepaetsi tsipae vajatuxanenē itsa nacananeconitsiaexana.

Pacuenia Dioso pejumecovënētsivi bejinavanapa itsamonae pejamatabēcuenebijianaeyaniva yabara pelivaisi

²³ Xaniajai rabaja pacuenia itsamonae jumaitsi. Mapanacuata navita vajaexanaejevanexa. Itsajivi ata apo nacaitavetsi bajarapacueni vajaexanaenexa. Itsiata baitsi jane apo nacatoxanepanae daxita bajarapacueni vajaexanaenexa. Daxitacuene, xua itsajivi ata apo nacaitavetsi vajaexanaenexa, exanae atatsi tsipae, itsiata apo nacajamatabēcueneasaēyaexanae tsipae Dioso vajajumecovënētsijava. ²⁴ Pētsa pajamatabējumaitsimē: “¿De tsaeta xua natoexanaenajē, xua exanēnēnē netoxanepanaejitsia?” pajamatabējamē pētsa. Biji rajane pajamatabējumaitsimēre. “¿De tsaeta xua toexanaenajē, xua itsamonaenexa toxanepanaejitsiatsi?” pajamatabējamēre.

²⁵ Dioso baja cajena pacatocopata panexaenexa itaxutojema. Nexata pacatocopata panexaenexa pavi canajeta pecanajetsibota. Nexata pētsa payanijobame. “¿Matsa pavi jumapecataeya pexanaenēanējavabelia peyajuvënērajutsivije?” pajamē pētsa. Itsa payanijobajitsipame bajarapacuenia: “Jājā, bajarapayajuvënëvi,” pacajai tsipae. Nexata paxamē pajamatabējumaitsimē tsipae bajarapavi yabara: “Mapavije itsa xaejitsipajē, nexata pibisiacuene exanaejitsipajē Dioso pitabarata,” pajamatabējamē tsipae. Saya pacomuare payani-

jobinejevamë. ²⁶ Dioso baja cajena pacatocopata itaxu-tojema panexaenexa. Tshipaji mapanacuaje, daxita mapanacuapijicuene ataje, Dioso baja cajena pijajava.

²⁷ Dioso apo pejumecovënëtsijivi ata itsa pacajunata panenanabaninexa pijaboyabelia, panaponare panenanabaninexa itsa pajitsipame. Xua pacaabata, paxaema payanijobinejevamë. "¿Matsa pavi jumapecataeya pexanaenëanëjavabelia peyajuvënërajutsivije?" pajamë pëtsa. ²⁸ Itsamonae Dioso pejumecovënëtsivi bepibisiacuene pexanaejava taejitsipa itsa xaejitsipa bajarapayajuvënëvi. Nexata panexaevajënaeya, bajarapamonaeyajuvënëni itsa pacajumaitsi: "Mara pavije jumapecataeya pexanaenëanëjavabelia ofrendacuena peyajuvënërajutsivije," itsa pacajai, pëtsa patsitaxaneme. Itsa apo patsitaxaemë tsane, nexata apo pajamatabëcuenebijiianaemë tsane bajaraponë. ²⁹ Itsa patsitaxaejitsipame, bajaraponë ata naxaejitsipa. Nexata bajaraponë jamatabëjumai tsipae: "Pibisiacuene baja cajena exanajë Dioso pitabarata mapavije tanaxaexae," jamatabëjai tsipae.

Bajarapacuenia patacatsipaebijava, itsanë Dioso pejumecovënëtsinë itsa jumetaena, jamatabëcuene navëxaniabiaya meta jumaitsi tsane mapacueniaje: "Jumapecataeya pexanaenëanëjavabelia perajutsiviya-juvënëjava taxaeyabiabinexa, Dioso netocopata. Nexata baja xaeyabiabajë. Itsiata icatsia aeconoxae nitaveta itsanë Dioso pejumecovënëtsinë itsa tsitaxaniji bajarapayajuvënëvi, bepibisiacuene petaeyaniva. ¿De meta xuajitsia xanë epatua copatsipajë bajarapayajuvënëvi taxaeyabiabijavami? ³⁰ Taxaevajënae bajarapavi, 'Xanepana rabaja,' janë tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicuajijai tsipae bepibisiacuene taexanaenë taxaejamatabëcuene bajarapayajuvënëvi?" jai meta tsane jamatabëcuenenavëxaniabiaya itsanë Dioso pejumecovënëtsinë. ³¹ Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabëcuenebijiianaeyaniva panetsitaexanaejava pejamatabëcuene. Itsa paxaneme, itsa papamenua, daxitacuene itsa paexanamenua, xaniavaetsia itsamonae patsitaexanavanapaename paxamë panetsitaexanaejava yabara jivi papecasivajamatabëjumaitsinexa: "Dioso cajena ayajamatabëcuenenë. Tshipaji pijajivi yavenona xaniavaetsia petojinavanapaenexatsi," papecasivajamatabëjainexa. ³² Bajaraxuata pëtsa patsitaexaname itsacuenejavayo ata itsajivi ata Diosovecua itsajamatabëcuene pexainaeyaniva. ³³ Pacuenia xanë tsitaexanaponaponajë itsamonae tanesivajamatabëcuenebarëyanexa, bajarapacuenia paxamë ata patsitaexanavanapare itsamonae. Apo najamatabëxainabiabinë taexanaenexa xua ëxanënexa netoxanepana. Biji rajane najamatabëxainabiabajë tatoexanaenexa xua toxanepanatsi itsamonae ata. Bajarapacuenia toexanaponajë bajarapamonae ata Dioso pejumecovënëtsinexa pecapanepaenexatsi pijaneconivecua.

11 Itsamonae patsitaexanavanapare pacuenia xanë pacatsitaexanaponatsi. Xanë raja pijinia cuenejëpaeya ponaponajë Cristo.

Pacuenia petiriavi namataacatsiaya bejunua Dioso pejumecovënëtsivi penacaetuatabiabibota yabara pelivaisi

² Tajamonae, panejamatabënjabinabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabëcuenebarëyatsi. ³ Pacatojitsipatsi paneyapëtaenexa mapacueneje. Athëbëvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaëbërëpanayota jivi penacaetuatsibota. ⁴ Bajaraxuata pebi Diosojavabelia penavajëtsijavata, itsamonaejavabelia ata Dioso pejumelivaisi petsipaebijavata, itsa namataacatsipa papaëbërëpanayota, nexata Cristo athëbëvetsica yapijiviaura tsipaetsi. ⁵ Petiriva rajane pamona pejumecovënëtabiabivacuene itsamonae peyapëtaenexatsi, benamataacata papaëbërëpanayota jivi penacaetuatsibota. Bajarapacuenia benamataacata penavajëtsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajarapacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaetuatsibota. ⁶ Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaetuatsibota, benamataacata papaëbërëpanayota pamona peyapijiviaurayanivatsi. ⁷ Dioso itsa exana pebi, nacujirujëpaeyaexana. Nexata pacuenia itsi Dioso, bajarapacuenia pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayajamatabëcuene pexainaenëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecua beveliajamatabëcuene pexainaevacuene. ⁸ Copiata Dioso pebi itsa exana, petiriva peyenyajuvënësitomita apo exanae. Biji rajane pebi peyenyajuvënësitomita cotocaevi Dioso exana petiriva. ⁹ Petiriva baja cajena Dioso exana pebinexa. ¹⁰ Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiabivacuene. ¹¹ Vaxaitsi Dioso vajajumecovënë-tavanapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. ¹² Xaniajai rabaja. Pebi peyenyajuvënësitota Dioso exana petiriva. Itsiata baitsi jane bajaraxuacujinae petiriavita naex-

anapona pebijivi. Tsipaji Dioso pejamatabëcueneta bajarapacuenia copata.

¹³ Panijacuata pacanaëjère. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. ¹⁴ Vaxaitsi baja cajena vajajamatabëëthëtota yapëtanetsi mapacueneje. Pebi itsa amatanapiareca, amataura tsipae. ¹⁵ Vajajamatabëëthëtota yapëtanetsinua mapacueneje. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapiareca. Nexata bepemataacatsitsi pematana. ¹⁶ Itsajivi itsa jamatabëpanejumeanaenota petiriavi papaëbërëpanayota penamataacatsijava yabara, nexata bajara-pajivijavabelia pajumaitsinë tsane mapacueniaje: "Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajara-pacuenia itsamonae ata, pamona Dioso pejumecovënëtsivi, najamatabëxaina. Tsipaji baja cajena patajacuene," pajanë tsane pajivijavabelia jamatabëpanejumeanaenota petiriavi papaëbërëpanayota penamataacatsijava yabara.

Pacuenia itsamonae ayaijava xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi

¹⁷ Pacatoyaquinatsi mapalivaisije patacamuxujjobinexa. Aeconoxae xua paexanabiabame, apo paxatoxanepanae. Panacaetuatabiabi atamë, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranaponame. ¹⁸ Najamatabëxainajë copiaya patacajumaitsinexa mapacueniaje. Pacavënëlivaisitanetsi. Apo panajamatabëcuenëjëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamë, navecuanatsanaeya pina panavecuaenabiabame pacaebitsaëtöximë canacujitsia. "Xaniajai raeta baja. Baja raeta pacuenia exanabiaba," jamatabëjanë belia paxamë yabara. ¹⁹ Baja raeta pacuenia navecuanatsanaeya panavecuaenabiabame. Tsipaji meta pajamatabëjumaitsimë tsabiabi: "Vaxaitsi cajena Dioso pepacuene jumecovënëtatsi. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa," pajamatabëjamë meta tsabiabi. ²⁰ Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenëjëpaeya apo panacaetuatabiabimë. Nexata Dioso pacatane saya jema bepanenacaetuatsivi. ²¹ Tsipaji copiaya panepatsivi panenabaniepatota, ayaijavanë paxaeyabiabame. Apo paevetabiabimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamona cotocaevi pepatsivi, yavereverecabiaba. Nexata pijani tsabiabi.

²² Èpanexaejavanexa itsa pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamona nacaetuatabiaba penavajëcaenexa Diosojavabelia. Paurababiabamenua pamona bepejiobivi, pexajava apo penacapatsivi. Pexaniacuene cajena apo paexanabiabimë bajarapacuenia itsa paexanabiabame. Bajarapacuenia saya paneexanabiabixae, pananeconitame Diosojavabelia.

Pajamatabëcuene yabara nacaetuatabiaba Dioso pejumecovënëtsivi caejuameto canacujitsia yabara pelivaisi

²³ Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanuca panbë. ²⁴ "Pexaniacuene panetoexaname. Pan panerajutame," pejaicujinae Diosojavabelia, panbë epatsënëca. Jumaitsi pijajivijavabelia: "Mara tavije patacasivatëpaejava paxamënexa. Mapacueniaje tacovëta paexanabiabianame patanenajamatabënapitsinexamë," jai vajatuxanenë Jesús pijajivijavabelia. ²⁵ Penabanicujinae bajara icatsia pacuenia Jesús cobenanuca pecaapaejava. Nexata icatsia jumaitsi pijajivijavabelia: "Dioso baja cajena najumecapanepaeya jumaitsi papecacapanepaenexa. Nexata pacuenia Dioso najumecapanepaeya jumaitsi, pacacapanepaena tajana pejamatabëcueneta. Tajana raja nevecuarunaena tatëpaejavata papecacomuatsinexa panijaneconivecua. Mapacaapaejavataje, itsa papaeyabiabianame, panenajamatabënapitabiabianame," jai vajatuxanenë Jesús pijajivijavabelia. ²⁶ Nexata paxamë bajarapacuenia itsa paexanabiabame, patitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatacabitsicajavabelianexa.

Pacuenia Dioso pejumecovënëtsivi benaxaniavaeta, itsa nacaetuata penajamatabënapitsinexa xua yabara Cristo sivatëpatsi, yabara pelivaisi

²⁷ Jivi itsa nacaetuata penajamatabënapitsinexa xua yabara Cristo sivatëpatsi, becanaëjëtëna. Tsipaji canaëjëtsinejeva itsa naxane pan, itsa apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pevito, pijana ata, apo peyaiyataexae. ²⁸ Bajaraxuata caejivi canacujitsia xaniavaetsia benajamatabëcuenëjaita pecaxitajabinexa paneconi xainaponapona Dioso pitabarata. Bajarapacuenia benajamatabëcuenëjaita pan penaxaevajënaeya, pematavëjëaapaera ata penaapaevajënaeya. ²⁹ Itsa naxane pan, itsa naapanua pematavëjëaapaera, becanaëjëta pajamatabëcuene yabara vajatuxanenë sivatëpatsi cruzata. Pajivi canaëjëtsinejeva naxane pan, naapanua pematavëjëaapaera, bajarapajivi pijacuata naneconitapona Diosojavabelia. ³⁰ Bajaraxuata paxamë ayaibitsaëto payajuvënëavitanemë. Nexata it-

samonaē payajuvēncueraname. Itsamonaē payajuvēnētēpame baja. ³¹ Bajaraxuata vaxaitsi vajanaxaevajēnaē pan, vajanaapaevajēnaē ata pematavējēaapaera, benajamatabēnapitatsi Jesucristo vajanacasi-vatēpaejava vajaneconi yabara. Benajamatabēcuene-jaitatsinua paneconi xainatsi Dioso pitabarata vajanavajunupaebinexa Diosojavabelia. Bajarapacuenia itsa exanaenatsi, vajatuxanenē apo nacananeconitsiaexanaē tsane. ³² Itsa naneconitsianatsi, nexata vajatuxanenē nacabejiobiaexanaponaena Dioso apo pejitsipaecuene vajaexanaejava vajacopatsinexa. Bajarapacuenia vajatuxanenē nacaexanaena Dioso apo pejumecovēnētsivi yajava Diosovecua vajanaxuabianiva.

³³ Bajaraxuata itsa panacaetuata me panenajamatabēnapitsinexa xua yabara Cristo pacasivatēpa, paevetabiabianame abaxē daxita pepatsijava caecuenia panenajaxaenexa. ³⁴ Pajivi pajani, bajarapajivi copiya benabane pijabota pejonevajēnaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavabelia. Itsajamatabēcuenejavaxi pematatsēnēa, xua yabara paneyanijobame, abaxē apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

Pacuenia Dioso pejumecovēnētsivi Espiritu Santo pejamatabēcueneta jamatabēcuenecaējēpaeyaexanatsi pexanaenexa pacuenia Dioso itorobaponatsi yabara pelivaisi

12 Tajamonaē, jitsipajē patacatoyaquinaejava paneyapētaenexa mapacueneje. Caejivi canacujitsia Dioso pejumecovēnētsivi Espiritu Santo pejamatabēcueneta jamatabēcuene caējēpaeyaexanaponatsi pexanaenexa pacuenia Dioso itorobaponatsi.

² Paxamē rabaja payapētaneme mapacueneje. Pamatacabi abaxē Dioso apo pajumecovēnētsimē, dovathi pacayamaxēitorobabiaba. Nexata panevajētsinexa jumapecataeya pexanaenēanējavabelia, panematabacabēta patonubenabiabame. Jumapecataeya raja pexanaenēanē, apo caējēpaetsi itsacuenejavayo ata pexanaenexa. ³ Bajaraxuata pacatoyaquinatsi paneyapētaenexa mapacueneje. Pajivi jumaitsi: "Jesús raja Dioso apo pexēnato," jai, bajarapajivi Espiritu Santo apo yajavaponaponaetsi. Pajivi rajane jumaitsi: "Jesucristo raja pepo petuxanenē," jai, bajara jane pajivi Espiritu Santo yajavaponaponatsi.

⁴ Daxita xua Dioso pejumecovēnētsivi Espiritu Santo pejamatabēcueneta jamatabēcuene caējēpaeyaexanaponatsi, apo najēpae. Caenē canacujitsia saicayacuena jamatabēcuene caējēpaeyaexanaponatsi. Itsiata baitsi jane caenē Espiritu Santo pejamatabēcueneta jamatabēcuene caējēpaeyaexanaponatsi daxita bajarapamonaē. ⁵ Xua jivi Dioso tonacuenebavanapa, apo caevirianacuenebijava. Navita cajena xua jivi Dioso tonacuenebavanapa. Itsiata caenē Dioso pijacuene tonacuenebavanapa. ⁶ Dioso pijacuene petonacuenebivi, apo nacuenējēpae. Itsiata rabaja caenē

Dioso daxita yavenonatsi petonacuenebavana-paenexa. ⁷ Caejivi canacujitsia, Dioso pejumecovēnētsivi, Espiritu Santo pejamatabēcueneta jamatabēcuenecaējēpaeyaexanatsi xua Dioso tonacuenebavanapaejitsia. Nexata bajarapamonaē, caejivi canacujitsia, caējēpatsi peyavenonaenexa bajarapajamatabēcueneta daxita Dioso pejumecovēnētsivijavabelia. ⁸ Itsamonaē Dioso pejumecovēnētsivi, Espiritu Santo pejamatabēcueneta jamatabēcuene caējēpaeyaexanaponatsi pemuxujiobinexa xaniavaetsia itsamonaējavabelia, xaniavaetsia pejinavanapaenexa Dioso pitabarata. Itsamonaē pijinia jamatabēcuene caējēpaeyaexanaponatsi jivi xaniavaetsia peyapētaeyaexanaenexa pexaniajailivaisi, Jesús pelivaisi. Itsiata baitsi jane caeEspiritu Santo pejamatabēcueneta bajarapacuenia jamatabēcuene caējēpaeyaexanaponatsi penajamatabēcuenerutsinexa Diosojavabelia Dioso peyavenonabiabinexatsi daxitacuene yabara. Itsamonaē pijinia jamatabēcuene caējēpaeyaexanaponatsi pejamatejemayaexanaenexa piavitanevi. CaeEspiritu Santo rabaja pejamatabēcueneta bajarapacuenia jamatabēcuene caējēpaeyaexanaponatsi. ¹⁰ Itsamonaē pijinia jamatabēcuene caējēpaeyaexanaponatsi Dioso pesaēta pinijicuene pexanaejavanē pexanaenexa. Itsamonaē pijinia jamatabēcuene caējēpaeyaexanaponatsi petsipaebinexa itsamonaējavabelia pacuenia Dioso yapētaeyaexanatsi. Itsamonaē pijinia jamatabēcuene caējēpaeyaexanaponatsi pejumeyapētaenexa itsajivi itsa tsipaebatsi penajumetsēnētsilivaisi dovathi pejamatabēcueneta. Jamatabēcuene caējēpaeyaexanatsinua pejumeyapētaenexa itsajivi itsa tsipaebatsi pexaniajailivaisi Espiritu Santo pejamatabēcueneta. Itsamonaē pijinia jamatabēcuene caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonaē pijinia jamatabēcuene caējēpaeyaexanaponatsi pejumetaenexa bajarapajume juya pejumevajunupaebaponaenexa itsamonaējavabelia. Nexata bajarapamonaē tsipaebapona pajamatabēcuenelivaisi xainapona caelivaisi canacujitsia, palivaisianē tsipaebapona pamonaē cuaicuaijai itsajivi ata mapanacuata apo pejumetaejumeta. ¹¹ Itsiata baitsi jane caeEspiritu Santo pejamatabēcueneta jamatabēcuene caējēpaeyaexanaponatsi daxita bajarapamonaē. Pacuenia Espiritu Santo jitsipa pejamatabēcuenecaējēpaeya exanaponaenexa Dioso pejumecovēnētsivijavabelia, bajarapacuenia Espiritu Santo caejivi canacujitsia jamatabēcuene caējēpaeyaexanaponatsi Dioso pejumecovēnētsivi.

Pacuenia daxita Dioso pejumecovēnētsivi caenē Cristo bepeperabēto yabara pelivaisi

¹² Pavi xainatsi vajaperabētota, caevito canacujitsia pevēnē xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabētotsireca. Bajara pijinia itsitsi daxita Dioso vajajumecovēnētsivi. Caejivitsi canacujit-

sia saicaya vajanacuenebijavanexa, Espíritu Santo pejamatabëcueneta nacajamatabëcuene caējëpaeyaexanaponaeta, itsiata caenë Cristo bepeperabëtotsi.

¹³ Daxitatsi rabaja Dioso vajajumecovënëtsivi, itsa nacabautisaba, caeEspíritu Santo nacatsijamatabëeca caebitsaëtonexatsi, caenë Cristo bepeperabëtonexatsi. Judíovi atatsi, apo judíovi atatsi, dajubicuena vajanacacanajetsivi ata itsamonaejavabelia amoneya vajanacacanajetsivi ata itsamonaejavabelia, daxitatsi, caeEspíritu Santo nacatsijamatabëeca.

¹⁴ Pavi jivi peperabëtuareca xaina, caevito canacujitsia pevënë xainapona. Nexata caevënëvito jivi apo xinae peperabëtuareca. ¹⁵ Nexata jivi petaxu itsa caējëpaejitsipatsi pecuaicuaijainexa, petaxu meta jumaitsi tsipae: "Apo pecobenë raja. Bajaraxuata maapo paperabëtøyajuvënëjavanëje," jai meta tsipae. Itsiata baitsi jane cajena jemajai tsipae. Tsitecaeya bajaraperabëtøyajuvënëjavanëje tsipae. Pijumeta saya apo naexanae tsipae saicayajava. ¹⁶ Jivi pemuxuyoroto ata itsa caējëpaejitsipatsi pecuaicuaijainexa, pemuxuyoroto meta jumai tsipae: "Apo pitaxutonë raja. Bajaraxuata maapo paperabëtøyajuvënëjavanëje," jai meta tsipae. Itsiata baitsi jane cajena jemajai tsipae. Tsitecaeya bajaraperabëtøyajuvënëjavanëje tsipae. Pijumeta saya apo naexanae tsipae saicayajava. ¹⁷ Jivi daxitanë peperabëtuareca itsa xinaejitsipa ëpitaxutonë, ¿detsa nexata pacuenia jumetaejitsipa? Acuenebi tsipae. Daxitanë peperabëtuareca itsa xinaejitsipa ëpemuxuyorotonë, ¿detsa nexata pacuenia tuxunijitsipa? Acuenebi tsipae. ¹⁸ Bajaraxuata jivi peperabëtuareca caevënëvito Dioso apo torutsi. Saicaya pevënë pexainaevitonë, caevito canacujitsia, jivi peperabëtuareca Dioso torutapona itsajota jitsipa petorutsinexa. ¹⁹ Itsa meta jivi peperabëtuareca xinaejitsipa caevitoreca, aithothia meta tsipae. Nexata apo bejivitonë perabëto tsipae. ²⁰ Itsiata baitsi jane maitsije. Jivi peperabëtuareca navitsiaxinae ata saicaya caevito canacujitsia pevënë pexainaevi, itsiata rabaja caeperabëtoreca.

²¹ Nexata jivi pitaxutobeje caējëpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejavanabelia: "Apo pacanamataavenonaetsibeje cajena," pejinexabeje. Jivi pematabocotota ata caējëpae atatsi tsipae pecuaicuaijainexa, itsiata acuenebi tsipae pejumaitsinexa petaxubejavanabelia: "Apo pacanamataavenonaetsibeje cajena," pejinexa. Tsipaji daxita pavi xainatsi vajaperabëtota, namataavenonatsi. ²² Bajaraxuata vajaperabëtota pavi xainatsi, pavi itajara apo bevajanacatsitanamataavenonae, bajarapavi bitso pepacuenenamatavenonatsi. ²³ Pavi xainatsi vajaperabëtota, pavi vaxaitsi natanetsi beveliavi, bajarapavi banaperabëxatatatsi naitabëtsiaya. Pavi naperabëcauratsi, naperabëcaranatsiaya banaperabëxatatatsi xaniavaetsia. ²⁴ Pavi apo naperabëcauratsi, apo naperabëxatatsitsi xaniavaetsia. Bajarapacuenia vajaperabëtota Dioso nacavimataropobiaruba. Nexata picani pavi bevelia vajanamatavenonaevi, bajarapavi itsiata naitabëtsia ba-

naperabëxatatatsi. Nexata bajarapacuenia bajarapavi ata bevajanamatavenonaevi tanetsi. ²⁵ Nexata pavi vajaperabëtota xainatsi, apo navecuanatsanae. Nexata daxita pavi xainatsi vajaperabëtota, namataenetsia naeveta. ²⁶ Vajaperabëtota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabëtsianaxatatatsi, nexata daxitaperabëtotsireca bayajavabarëyatsi.

²⁷ Daxita rabaja paxamë Dioso papijajivimë. Nexata caenë Cristo beperabëto panaexaname. Pavi Cristo peperabëtota xaina, bajara bepayajuvënëvi Dioso pacatane pacaenëmë canacujitsia. ²⁸ Vajaperabëtota pavi xainatsi, caevito canacujitsia saicaya xainapona pexanaponaevajanexa. Bajara pijinia itsi Dioso pejumecovënëtsivi. Caejivi canacujitsia Dioso itapetaponatsi saicaya caejivi canacujitsia pexanaponaevanaxua Dioso tocopatatsi. Copiata Dioso itapeta apóstolevinexa. Xuacujinae icatsia cotocaevi itapeta petsipaebivinexa itsamonaejavabelia pacuenia Dioso yapëtaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapëtaeyaexanaevonexa itsamonaejavabelia. Xuacujinae icatsia Dioso itapeta Dioso pesaëta pinijicuene pexanaevonexa pexanaponaevonexa. Xuacujinae Dioso itapeta piavitanevi pejamatejemayaexanaevonexa. Xuacujinae icatsia Dioso itapeta bepejibivi peyavenonaevinexa. Xuacujinae icatsia Dioso itapeta Dioso pejumecovënëtsivi penamatacaitorobivinexa. Xuacujinae icatsia Dioso itapeta pecuaicuaijainexa itsajivi ata mapanacuata apo pejumetaejumeta. ²⁹ Nexata daxita apo ëapóstolevi. Nexata pijinia daxita apo ëpetsipaebivinexa itsamonaejavabelia pacuenia Dioso yapëtaeyaexanatsi. Nexata pijinia daxita apo ëpeyapëtaeyaexanaponaevonexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaëta pinijicuene pexanaevonexa, apo ëpexanaponaevonexa. ³⁰ Nexata pijinia daxita apo ëpejamatejemayaexanaevonexa piavitanevi. Nexata pijinia daxita apo ëpecuaicuaijainexa itsajivi ata mapanacuata apo pejumetaejumeta. Nexata pijinia daxita apo ëpejumetaevonexa bajarapajume, juya itsamonaejavabelia pejumevajunupaebaponaevonexa pajamatabëcuenelivaisi xainapona caelivaisi canacujitsia, palivaisianë tsipaebapona pamonaevonexa cuacuicuaijainexa itsajivi ata mapanacuata apo pejumetaejumeta. ³¹ Bajara pacuenia itsamonae pejamatabëcuenecaējëpaeya exanaevonexa, paneyavenonaevonexa daxita Dioso pejumecovënëtsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajënaeyabelia bitso pajitsipare Dioso papecajamatabëcuenecaējëpaeya exanaevonexa, paneyavenonaevonexa daxita Dioso pejumecovënëtsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajënaeyabelia bitso pajitsipare Dioso papecajamatabëcuenecaējëpaeya exanaevonexa itsamonae ata paneasivanexa.

Pacuenia jivi namataenetsia benaasiva yabara pelivaisi

13 Dioso nejamatabëcuenecaējëpaeya exanaejitsipa tacuaicuaijainexa itsajivi ata mapanacuata

apo pejumetaejumeta. Angelevi ata pijajumeta cuaicuajianē tsipae. Nexata jivi netaejitsipa ayaijamatabēcuenenēnē. Bajarapacuenia Dioso nejamatabēcuenecaējēpaeyaexanae ata tsipae, itsiata itsamonae ata itsa apo asivanē tsipae, nexata saya bajaraxua netoamatamobi tsipae Dioso pitabarata. Nexata palivaisi ata tsipaebaponaejitsipajē jivi pejumetaejumeta, apo nejumecovēnētsi tsipae. Nexata pacuenia tambor, itsa jume, plato itsajivi penajumetsiaexanaeaja namuxujematatsi, bajarapacuenia nenamuxujematatsipa tatsipaebilivaisi. ² Dioso nejamatabēcuenecaējēpaeya exanaejitsipa xaniavaetsia tayapētaenexa Dioso pejumelivaisi, asaēyata tatsipaebinexa itsamonaejavabelia. Yapētaejitsipajēnua daxita Dioso muetsia penajamatabēxainaelivaisianē ata. Yapētaejitsipajēnua daxita Dioso pijacuene ata. Bajarapacuenia xaniavaetsia yapētae atanē tsipae, itsiata itsamonae ata itsa apo asivanē tsipae, nexata saya bajaraxua netoamatamobi tsipae Dioso pitabarata. Dioso bitso tajumecovēnētsinē tsipae. Nexata itsa jumaitsinē tsipae: “Dioso baja cajena mapatsutoxanetoje nevecuatixitsiana,” itsa janē tsipae, nexata Dioso nevecuatixitsipa. Bajarpacuenia exanae atanē tsipae, itsiata itsa apo asivanē tsipae itsamonae ata, nexata saya bajaraxua netoamatamobi tsipae Dioso pitabarata. ³ Rajutaponaejitsipajē bepejibivijavabelia daxita taxinaejavaximi. Nacaevetsipajēnua tanetajuitsinexa, tanebeyaxuabinexa ata, Dioso pejumelivaisi yabara. Bajarapacuenia nacaevetsi atanē tsipae, itsiata itsa apo asivanē tsipae itsamonae ata, nexata saya bajaraxua netoamatamobi tsipae Dioso pitabarata.

⁴ Majamatabēcuenetsije pajivi asiva itsamonae ata. Bajarapajivi bajayajebi itsacueniabi atatsi, ajamatabēcuenesaē bajarapamonaejavabelia. Pajivi asiva itsamonae ata, itaxutotsoniatane bajarapamonae. Pajivi asiva itsamonae ata, apo cuenecaēbi bajarapamonae. Pajivi asiva itsamonae ata, “Xanē ayaijamatabēcuenenēnē bajarapamonae matatoxenetsia,” apo jai itsajivijavabelia. ⁵ Pajivi asiva itsamonae ata, bajarapajivi apo ataejitsibi itsajivi ata. Apo exanae itsacuene ata piurabinexa bajarapamonaejavabelia. Pajivi asiva itsamonae ata, daxita xua xanepana, ēponēnexa apo natonajamatabēxainae. Pajivi asiva itsamonae ata, bepijia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabēsitecae juya pecuenecanaviatsinexa bajarapamonaejavabelia. ⁶ Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabēcuenenēnē bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabēcuenenēnē bajarapamonae Dioso pejitsipaecuenia pexanavanapaejava yabara. ⁷ Pajivi asiva itsamonae ata, bajarapajivi piasivaviyajuvēnēvi itsacueniabi atatsi, najamatabēcuenesaēta pevajēnaeyabelia piasivajava bajarapamonae. Pajivi asiva itsamonae ata, bajarapajivi apo peyapētaevi ata, sivajamatabējumaitsi

mapacueniaje: “Maraeta pamonaē ata pexaniajamatabēcuenenēnē,” sivajamatabējai. Pajivi asiva itsamonae ata, bajarapajivi pibisiacuene pexanaevi ata, sivajamatabējumaitsi mapacueniaje: “Maraeta pamonaē itsamatacabi pexaniaacuene pexanaevi tsaneje,” sivajamatabējai. Pajivi asiva itsamonae ata, bajarapajivi tsiayapēbeje atatsi daxitacuene yabara, apo copatsi piasivajava itsamonae ata.

⁸ Itsamonae Espiritu Santo pejamatabēcueneta jamatabēcuenecaējēpaeyaexanaponatsi petsipaebinexa itsamonaejavabelia pacuenia Dioso yapētaeyaexanatsi. Itsamonae pijinia jamatabēcuenecaējēpaeyaexanaponatsi pecuaicuajinexa itsajivi ata mapanacuata apo pejumetaejumeta. Itsamonae pijinia jamatabēcuenecaējēpaeyaexanaponatsi pacuenia Dioso pejumelivaisibaxutota jumaitsi peyapētaeyaexanaenexa itsamonaejavabelia. Daxita bajarapacuenia, xua Dioso Espiritu Santo pejamatabēcueneta Dioso pejumecovēnētsivi jamatabēcuenecaējēpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucaē tsane.

⁹ Dioso nacajamatabēcuenecaējēpaeyaexanae ata vajayapētaenexa, abaxē tsiquirijavayo yapētaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. ¹⁰ Pamatacabi icatsia Cristo patsianica, Espiritu Santo pejamatabēcueneta vajajamatabēcuenecaējēpaeyaexanaejamatabēcuenemi, nacatocopiarucaena. Nexata jane baja bajarapamatacabi vajatuxanenē xaniavaetsia nacayapētaeyaexanaena daxitacuene Dioso pijacuene.

¹¹ Pamatacabi abaxē pejevaxinēyonē, cuaicuajianē pejevaxinēyonēcuenia. Najamatabēxainajēnua pejevaxinēyonēcuenia. Jumentanijina abaxē pejevaxinēyonēcuenia. Itsa baja tanaveretsinē, pejevaxijamatabēcuenemi baja copatajē. ¹² Bajara pijinia itsinē Dioso tajamatabēcueneyapētaejava. Tsiquirijavayo abaxē Dioso jamatabēcueneyapētaniji. Pacuenia pitatsēcēnaetsaxuta itsa naitatanetsi, apo nacatonapebetsi, bajarajamatabēcuenetsinē Dioso tajamatabēcueneyapētaejava. Abaxē saya tsiquirijavayo Dioso jamatabēcueneyapētaniji. Itsiata baitsi jane itsamatacabi Dioso xaniavaetsia jamatabēcueneyapētaenajē. Pacuenia aeconoxae Dioso xaniavaetsia nejamatabēcueneyapētane, bajara pijinia pacuenia xanē ata itsamatacabi xaniavaetsia Dioso jamatabēcueneyapētaenajē. ¹³ Apo vereverecae daxitamatacabi vaxaitsi vajanajamatabēcuenecopatsijava Diosojavabelia. Vaxaitsi evetavanapatsinua Dioso vajanacacapanepaenexa. Nexata vajanajamatabēcuenecopatsijava Diosojavabelia, vajaevetavanapaejava ata Dioso vajanacacapanepaenexa, bajaraxuabeje matatoxenetsia bitso xanepana vajaasivajava itsamonae ata.

Pacuenia Espiritu Santo pejamatabëcueneta itsamonae cuaicuaujiaexanatsi itsajivi ata mapanacuata apo pejumetaejumeta yabara pelivaisi

14 Panajamatabëcueneverere panevajënaeyabelia panecasaëtsavanapaenexa itsamonae ata paneasivajava pacuenia panijacuata panaasivamë. Panatojitsiparenu xua Dioso pacatojitsipa papecajamatabëcuene caëjëpaeyaexanaenexa Espiritu Santo pejamatabëcueneta. Bitso jane panatojitsipare palivaisi Dioso payapëtaeyaexana panetsipaebinexa itsamonaejavabelia. Nexata patsipaebianame palivaisi Dioso pacayapëtaeyaexana. ² Itsamonae Espiritu Santo pejamatabëcueneta jamatabëcuene caëjëpaeyaexanaponatsi pecuicuaujainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tsipajivi itsajivi ata mapanacuata apo pejumetaejumeta paeba. Bajarapajivi Espiritu Santo pejamatabëcueneta livaisi paebiaexanatsi. Palivaisi Espiritu Santo bëpënëa xainaponapona, paebiaexanatsi. ³ Itsamonae pijinia Espiritu Santo pejamatabëcueneta jamatabëcuene caëjëpaeyaexanatsi jivi pejumetaejumeta petsipaebinexa palivaisi Dioso yapëtaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevajënaeuabelia sivaajamatabëcuenesaë tsaponae Dioso pejumecovënëtanapaejava. Bajarapajivi jamatabëcuenebabatanua bitso penajamatabëxainaevi. ⁴ Pajivi Espiritu Santo pejamatabëcueneta jamatabëcuene caëjëpaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuata jamatabëcuenevitsabapona Diosojavabelia bajarapalivaisita. Itsiata baitsi jane pajivi jamatabëcuene caëjëpaeyaexanatsi jivi pejumetaejumeta petsipaebinexa palivaisi Dioso yapëtaeyaexanatsi, bajarapajivi petsipaebilivaisita Diosojavabelia jamatabëcuenevitsabiexanapona daxita Dioso pejumecovënëtsivi.

⁵ Pacatojitsipatsi picani daxita paxamë Espiritu Santo pejamatabëcueneta papecajamatabëcuene caëjëpaeyaexanaenexa panecuicuaujainexa itsajivi ata mapanacuata apo pejumetaejumeta. Itsiata rajane bajaraxua matatoxensia bitso pacatojitsipatsi papecajamatabëcuene caëjëpaeyaexanaenexa jivi pejumetaejumeta panetsipaebinexa palivaisi Dioso pacayapëtaeyaexana. Pajivi tsipaebapona jivi pejumetaejumeta palivaisi Dioso yapëtaeyaexanatsi, bajarapajivi bitso jamatabëcueneyavenona itsamonae Dioso pejumecovënëtsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejume-

covënëtsivi apo jamatabëcuenevitsabiaexanae Diosojavabelia. Itsiata bajarapajivi itsa caëjëpatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovënëtsivi jamatabëcuenevitsabiaexana Diosojavabelia. ⁶ Bajaraxuata xanë ata pijinia paxamëjavata itsa patsipajë livaisi patacatsipaebinexa apo panejumetaejumeta, nexata apo panejumetaemë tsipaepalivaisi pacatsipaebijitsipatsi. Nexata apo pacajamatabëcuene vitsabiaexanae tsipaetsi Diosojavabelia. Itsiata baitsi jane itsa patsipajë panejumetaejumeta patacatsipaebinexa pacuenia Dioso bemajitsinaebota netsitajëta, nexata pacajamatabëcuene vitsabiaexanaejitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabëcuene vitsabiaexanaejitsipatsi Diosojavabelia. Palivaisi Dioso neyapëtaeyaexana, palivaisi ata Dioso jumaitsi, pexaniajailivaisi, itsa pacatsipaebijitsipatsi, nexata pacajamatabëcuene vitsabiaexanaejitsipatsi Diosojavabelia.

⁷ Pamonae Espiritu Santo pejamatabëcueneta jamatabëcuene caëjëpaeyaexanatsi pecuicuaujainexa itsajivi ata mapanacuata apo pejumetaejumeta, bajarapamonae livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxëanaejavanë peracatsivi ata xaniavaetsia itsa apo racatsi tsipae. Flauta piobinë, bijiata itsa obijitsipa, arpa pijinia peracatsinë ata, bijiata itsa racatsipa, nexata itsajivi ata apo vajiyapëtaetsibeje tsipae, pavaji picani naxëanaeyaexanabeje. Flauta piobijava, arpa ata peracatsijava, amatamobi tsipae. ⁸ Bajara pijinia itsi tsipae vajabitsaë trompeta piobijava ata. Vajabitsaë itsa ponaejitsia penavajabitsaëtsinexa, trompeta baoba penajunatsinexa. Nexata trompeta piobijava vajabitsaë itsa jumetane, bamuxunaothopa penacaetuatsinexa. Nexata trompeta piobinë xaniavaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. ⁹ Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapëtaeyaexana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava! ¹⁰ Daxitavirijumevi bitso navita mapanacuajava. Caevirijumevi canacujitsia yapëtaepona xaniavaetsia pijajume. ¹¹ Itsiata baitsi jane tajanacuapijinë ata itsa nebarëcuaicuaujai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaicuaujanë tsipae, besaicaya nacuapijinënë netaejitsipa. ¹² Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata baitsi jane bitso panatojitsipare Dioso papecajamatabëcuene caëjëpaeyaexanaenexa itsamonaejavabelia panetsipaebinexa palivaisi Dioso pacayapëtaeyaexana. Nexata Dioso pejumecovënëtsivi itsa

pacajumetane palivaisi patsipaebame, ajamatabëcuenesaë tsane Dioso pejumecovënëtsijava.

¹³ Nexata pajivi Espíritu Santo pejamatabëcueneta jamatabëcuenecaëjèpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevajèta Diosojavabelia pejamatabëcuenecaëjèpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjèpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapètaeyaexanaena palivaisi tsipaeba. ¹⁴ Xanè ata apo tajumetaejumeta vajètsi atanè tajamatabëèthètojavavetsina, itsiata apo yapètaenè xua vajètajè Diosojavabelia. ¹⁵ Mara pacuenia tavajènaeyabelia xanè exanaenajèje. Vajètsianajè Diosojavabelia anijavirijajumetabeje. Vajètsianajè apo tajumetaejumeta. Vajètsianajèna tajajumeta ata daxitajivi tanejumetaenexa. Tanaxèanaejavata ata pijinia bajarapacuenia exanaenajè. Naxèanaenajè apo tajumetaejumeta. Naxèanaenajèna tajajumeta ata daxitajivi tanejumetaenexa. ¹⁶ Pexaniacuene Dioso papecatoexanaejava yabara itsa pavajètsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajètsipame Diosojavabelia. Nexata bajarapajivi toacuenebitsi tsipae papecayavenon-ayavajètsinexa Diosojavabelia. ¹⁷ Paxamè picani Dioso pexaniacuene papecatoexanaexae, Diosojavabelia pavajètsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajètsixae Diosojavabelia, pajivi pacajumetaeyeca, ajamatabëcuenecovèbi tsipae. Tsipaji apo pacajumetae tsipae xua yabara pavajètsipame. Nexata apo pacamuxunajamatabëcuenevitsabi tsipae Diosojavabelia. ¹⁸ Dioso baja cajena xanè nejamatabëcuenecaëjèpaeyaexana tacuaicuaijainexa itsajivi ata mapanacuata apo pejumetaejumeta. Bajarapacuenia cuaicuaijanè itsajivi ata mapanacuata apo pejumetaejumeta daxita paxamè matatoxenetsia. Bajarapacuenia Dioso tanejamatabëcuenecaëjèpaeyaexanaexae, jumaitsinè tsabiabi Diosojavabelia: "Xanepana rabaja. Pexaniacuene bitso netoexaname," janè tsabiabi Diosojavabelia. ¹⁹ Itsiata baitsi jane Dioso pejumecovënëtsivi penacaetuatsijavata, ayailivaisi tsipaebi atanè tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajè. Bajaraxuata Dioso pejumecovënëtsivi penacaetuatsijavata, apo jitsipañè tatsipaebinexa itsajivi ata mapanacuata apo pejumetaejumeta. Biji rajane jitsipajè bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajè.

²⁰ Tajamonae, pacuenia pejevaxi bajamatabëcuenetsi, pètsa bajara pajamatabëcuenetsimè. Xaniavaetsia panajamatabëxainaname. Pacuenia penaveretsivi bajamatabëcuenetsi, bajara pajamatabëcuenetsimè tsane. Itsiata baitsi jane pibisiacuene paneexanaeyani-

va, bepapejevaxijiviximè panataename. Tsipaji pejevaxijivixi abaxè bitso apo najamatabëxainae pibisiacuene pexanaenexa. ²¹ Dioso pejumelivaisibaxutota tajèvelia jumaitsi mapacueniaje: "Itsamonae cuaicuaijaiyaexanaenajè itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi," jai tajèvelia Dioso pejumelivaisibaxutota judfovi Dioso apo pejumecovënëtsijavanexa yabara. ²² Nexata Dioso pejumecovënëtsivi Espíritu Santo pejamatabëcueneta jamatabëcuenecaëjèpaeyaexanaponaeatsi pecuaicuaijainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuenia, canaèjètsiana Diosojavabelia. Canaèjètsiananua bajarapamonae penaneconitavanapaejava Diosojavabelia. Dioso pejumecovënëtsivi jamatabëcuenecaëjèpaeyaexanaenatsi petsipaebinexa itsamonaejavabelia palivaisi Dioso yapètaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaèjètsiana pepacuenia Dioso pitaxutotsoniatavejavatsi pecapanepaenexatsi pijaneconivecua. ²³ Nexata pijinia itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamè livaisi patsipaebijitsipame itsajivi ata mapanacuata apo pejumetaejumeta. Nexata pamonaenapatsivi apo papecajumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: "Mara pamonaenje saya pematajemabivitsije," pacabarajamatabëjai tsipae. Tsipaji apo pacajumetae tsipae palivaisi patsipaebame. ²⁴ Jivi pejumetaejumeta panetsipaebijavata palivaisi Dioso pacayapètaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapètaejitsipanua bajarapajivi penaneconitsijava Diosojavabelia. Nexata pijaneconibitso yanajamatabëxainaejitsipa Diosojavabelia. ²⁵ Papecanamuxunaevetsijavata, bajarapajivi muetsia penajamatabëxainabiabijava najamatabëcueneyapètaejitsipa. Nexata nayapètaejitsipa penaneconitsijava Diosojavabelia. Nexata pematabacabèta nucaejeitsipa. Vajètsipa Diosojavabelia. Pevajètsijavata jumai tsipae Diosojavabelia: "Diosomè, bitso baja cajena ayaijamatabëcuenenëmè," jai tsipae Diosojavabelia. Nexata paxamèjavaberena ata bajarapajivi pacajumaitsi tsipae: "Pepacuenia majotaje paxamè Dioso pacayajavaponapona," pacajai tsipae.

Pacuenia Dioso pejumecovënëtsivi muxujibatsi peyapètaenexa pacuenia exanaejitsia culto pexanaejavata yabara pelivaisi

²⁶ Tajamonae, itsa panacaetuata Dioso pejumelivaisi yabara, mapacuenia paexanaenameje. Itsamonae naxèanaena vaji. Itsamonae najamatabëcuenev-eretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcuenev-

eretsiana palivaisi Dioso yapëtaeyaexanatsi juya petsipaebinexa itsamonaejavabelia. Itsamonae najamatabëcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuaijivi. Bajarapacuenia paexanaename panenacaetuatsijavata daxita Dioso pejumecovënëtsivi pevajënaeyabelia pejamatabëcuenevitsabaponaenexa Dioso pejumecovënëtsijava. ²⁷ Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipaeba. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta. ²⁸ Nexata itsa ajibi jivi pejumetaejumeta pejumevajunupaebijivinxatsi daxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaebi itsajivi ata mapanacuata apo pejumetaejumeta. Bajarapamonae moya beena. Bëpënëa saya pejamatabëthëtota becuaijai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënëa pejamatabëthëtota bevajëtëna. ²⁹ Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapëtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae tsipaebatsi bajarapalivaisi. ³⁰ Nexata bajarapamonae livaisi petsipaebaponaejavata, bajarajota penamuxunaevetecaenë Dioso pejamatabëcueneta livaisi itsa yapëtaeyaexanatsi, nexata ponë jivijavabelia livaisi tsipaebapona, benajumecopata baja. Nexata ponë penamuxunaevetecaejavata, Dioso livaisi yapëtaeyaexanatsi, bajaraponë juya daxitajivijavabelia betsipaeba palivaisi Dioso yapëtaeyaexanatsi penamuxunaevetecaejavata. ³¹ Bajarapacuenia daxita paxamë Dioso pejumelivaisi papecayapëtaeyaexanaevi Dioso pacatocopata jivijavabelia livaisi panetsipaebinexa pacaevimë tsaponae. Bajarapacuenia Dioso pacatocopata daxitajivi peyapëtaenexa Dioso papecayapëtaeyaexanaeliv-

aisi, pesivaajamatabëcuenesaë tsaponanexanua Dioso pejumecovënëtsijava panetsipaebilivaisita. ³² Pamonae tsipaeba daxitajivijavabelia palivaisi Dioso yapëtaeyaexanatsi, bajarapamonae yapëtane paepatota najumecopatsijitsia. Tsipaji Espiritu Santo pejamatabëthëtota itorobatsi paepatota najumecopatsijitsia. Nexata itsa najumecopata bajaraponë, juya itsanë petsipaebinexa daxitajivijavabelia. ³³ Dioso apo tocopatsi caecuenia anijajivibeje jivijavabelia livaisi penajuatsipaebinexa. Tsipaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinexa caejivi tsaponae.

Pacatsipaebijitsiatsi pacuenia exanabiaba daxita Dioso pejumecovënëtsivi penacaetuatsijavata. ³⁴ Petiriavi moya beena Dioso pejumecovënëtsivi penacaetuatsijavata. Tsipaji petiriavi Dioso apo tocopatsi Dioso pejumecovënëtsivi penacaetuatsijavata pecuaicuaijait-senaenexa. Petiriavi pamonajivi bejumecovënëtsijinanapa pacuenia Dioso pejumelivaisibaxutota itorobatsi. ³⁵ Petiriva itsa jamatabëyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovënëtsivi penacaetuatsijavata petiriva itsa cuaicuaijai tsecae tsipae.

³⁶ Pëtsa pacopatame Dioso pejumecovënëtsivi penacaetuatsijavata petiriva pecuaicuaijaitsecaenexa. Tsipaji itsatomanëjava Dioso pejumecovënëtsivi bajarapacuenia apo exanae. Pëtsa bepaayaijamatabëcuenevimë panataneme bajarapacuenia panexanavanapaenexa. ³⁷ Itsamonae paxamëyajuvënëvi natane bepetsipaebarsivinxaxitajivijavabelia palivaisi Dioso yapëtaeyaexanatsi. Itsamonae natane Espiritu Santo pejamatabëcueneta bepejamatabëcuene caëjëpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapëtane picani patacatoyaquinaelivaisi, mapalivaisije vajatuxanenë pitorobilivaisi jivi pejumecovënëtsinexa. ³⁸ Itsiata baitsi jane pajivi apo namuxunaevetsi pejumecovënëtsinexa mapalivaisije, pëtsa pajumecovënëtame bajarapajivi penavajunupaebijava Dioso pejamatabëcuenecaëjëpaeyaexanaejavatsi.

³⁹ Bajaraxuata asaëyata panatojitsipare Dioso papecayamatabëcuene caëjëpaeyaexanaenexa panetsipaebinexa daxitajivijavabelia palivaisi Dioso pacayapëtaeyaexana. Itsiata baitsi jane pëtsa pajumeitavetame itsamonae itsa cuaicuaijai itsajivi ata mapanacuata apo pejumetaejumeta. ⁴⁰ Nexata panenacaetuatsijavata, itsa patsipaebame daxitajivijavabelia palivaisi Dioso pacayapëtaeyaexana, xaniavaetsia pacaenëmë tsaponae patsipaebabianame.

Jesucristo petëpaecujinae Dioso icatsia piasaëyaexanaejavatsi yabara pelivaisi

15 Tajamonae, pacatojitsipatsi panenajamatabënapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepaeliv-

aisinexa panijaneconivecua. Pajumecovënētame baja bajarapalivaisi. Nexata panevajënaeyabelia asaëya pajumecovënētavanapaename bajarapalivaisi. ² Panevajënaeyabelia ita pajumecovënētavanapaename bajarapalivaisi, nexata pibisiacuene paneexanaeneconivecua Dioso pacacapanepaena. Matacabi apo peverevereaejava paxainaename. Itsiata baitsi jane copiaya panejamatabëéthëtojavavetsina ita apo pajumecovënëtsimë tsane bajarapalivaisi, nexata Dioso apo pacacapanepae tsane.

³ Copiaya baja cajena pacatsipaebatsi palivaisi vajatuxanenë copiaya netsipaeba. Pacatsipaebatsi baja cajena Cristo vajanacasivatëpaejava pibisiacuene vaxaxanaeneconi yabara. Cristo baja cajena nacasivatëpa pacuenia Dioso pejumelivaisibaxutota tajëvelia jumaiti. ⁴ Nexata Cristo petëpaenë pemëthëtsicujinaetsi, acueyabi matacabi, icatsia Dioso asaëyaexanatsi. Bajarapacuenia Cristo Dioso icatsia asaëyaexanatsi pacuenia baja cajena tajëvelia Dioso pejumelivaisibaxutota jumaiti Cristo yabara. ⁵ Nexata Cristo Dioso piasaëyaexanaecujinaetsi, copiaya Pedrojavabelia tsitanaitajëta. Bajaraxuacujinae Jesús pijajivi, doce ponëbeje apóstolevijavabelia, tsitanaitajëta. ⁶ Bajaraxuacujinae Jesús pijajivi quinientos pematatsënëa pajivibejevavabelia penacaetuatsijavata, tsitanaitajëta. Bajarapamonaeyajuvënëvimi Jesús petaevisi itsamonae baja tēpae ata, itsiata ayaibitsaëtoخانeto abaxë asaë tsavanapae. ⁷ Bajaraxuacujinae icatsia Santiagojavabelia Jesús tsitanaitajëta. Bajaraxuacujinae icatsia daxita apóstolevijavabelia Jesús tsitanaitajëta.

⁸ Xanë daxita apóstolevivecua bexëjavaberena apóstolenë nexana. Nexata pacuenia pexi pexinaejivi cotocaevi pexinaenacueto itsi, bajarapacuenia nataniji bajarapamonaevēcua. Itsiata baitsi jane daxita Jesús pijajivijavabelia petsitanaitajëtsicujinae, xanëjavaberena ata Jesús netsitanaitajëta tataenexa. ⁹ Daxita apóstolevivecua xanë beveliajamatabëcuenenë nataniji. Tsipaji abaxë xanë Jesús ita apo jumecovënëtsinë, Jesús pijajivi bejiobiaexanabiabajë. Bajaraxuata: "Apóstolenë," tanejainexa ata, auranë tsabiabi.

¹⁰ Itsiata baitsi jane Dioso taneitaxutotsoniataexae, nitapeta baja apóstolenëxanë. Xanëjavaberena Dioso taneitaxutotsoniataejava, apo nacueratsi. Biji rajane xanë daxita itsaapóstolevi matatoxenetsia bitso Dioso tonacuenebaponaponajë. Itsiata xanë tajamatabëcuenesaëta apo tonacuenebaponaponanë. Dioso raja pesaëta tonacuenebaponaponajë. Nexata Dioso pesaëta nejamatabëcueneyavenonapona asaëya tatonacuenebaponaponanë. ¹¹ Xanë meta bitso Dioso tonacuenebaponaponajë itsamonae apóstolevi matatoxenetsia. Itsa jume, nexata meta bajarapamona bitso Dioso tonacuenebavanapa xanë matatoxenetsia. Itsiata baitsi jane bajarapacuenie yabara apo canaëjëtsinë. Bitso rajane pacatojitsipatsi paneyapëtaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovënētavanapame.

Pacuenia itsamatacabi Dioso icatsia asaëyaexanaejitsia petëpaevimi yabara pelivaisi

¹² Pacatsipaebatsi baja cajena Cristo petëpaecujinae Dioso icatsia piasaëyaexanaejavatsi. Itsiata baitsi jane itsamonae paxamëyajuvënëvi jamatabëcuenenavëxaniabiaya jumai tsabiabi: "Jivi rabaja petëpaecujinae ajibi icatsia piasaëjavanexa," jai tsabiabi. Nexata bajarapacuenia apo bejumaiti bajarapamona. ¹³ Tsipaji peneta ita pepacuene ajibi tsipae petëpaevi icatsia piasaëjavanexa, nexata baja Cristo ata icatsia Dioso apo asaëyaexanaetsi tsipae petëpaecujinae. ¹⁴ Itsa baja Cristo petëpaecujinae icatsia Dioso apo asaëyaexanaetsi tsipae, nexata palivaisianë pacatsipaebavanapatsi, amatamobi tsipae. Paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, amatamobi tsipae. ¹⁵ Pematatsënëa xua Dioso exana patavajunupaebijava, panajumetsënëtsipajë. Tsipaji pajumaitinë tsabiabi mapacueniaje: "Cristo raja petëpaecujinae Dioso baja icatsia asaëyaexanatsi," pajanë tsabiabi. Itsa pepacuene ajibi tsipae petëpaevi icatsia piasaëjavanexa, nexata baja Cristo Dioso icatsia apo asaëyaexanaetsi tsipae. ¹⁶ Itsa peneta pepacuene ajibi tsipae petëpaevi icatsia piasaëjavanexa, nexata Cristo ata petëpaecujinae icatsia Dioso baja apo asaëyaexanaetsi tsipae. ¹⁷ Nexata Cristo petëpaecujinae Dioso baja icatsia ita apo asaëyaexanaetsi tsipae, nexata paxamë ata panenajamatabëcuenecopatsijava Cristojavabelia Dioso papecacapanepaenexa panijaneconivecua, panacueratsipame baja. Tsiteca abaxë panijaneconi paxinaejitsipame. ¹⁸ Bajarapacuenia ita tsipae, nexata baja pamonaemi tēpa Cristo pepua pejumecovënëtsivi, bajarapamonaemi ata naxuabijitsipa baja. ¹⁹ Vaxaitsi ata pijinia Cristojavabelia vajanajamatabëcuenecopatsicujinae, xua Dioso nacayavenonabiaba, saya nacayavenonaejitsipa vajajinavanapaeepatojebi mapanacuataje. Vajatëpaecujinae, Cristo pejamatabëcueneta Dioso ita apo nacacapanepaejitsia tsipae vaneconivecua, vajajamatabëcuenenavëxaniabivi baja tsipae. Tsipaji vaxaitsi jamatabëjumaititsi tsabiabi mapacueniaje: "Cristo pejamatabëcueneta Dioso nacacapanepaena," jamatabëjaiti tsabiabi. Nexata ayaicuenia Dioso vajatonacuenebabijava ata, nacueratsipatsi. Matacabi apo peverevereaejava Dioso vajanacarajutsinexa vaxaevetavanapaejava ata, nacueratsipatsi. Caranata meta jitsipaejitsipatsi Dioso apo pejumecovënëtsivi vajanacaitaxutobejiobiatanexa.

²⁰ Itsiata baitsi jane mapalivaisije xaniajai cajena. Tsipaji baja Cristo petëpaecujinae, capanepaeya baja icatsia Dioso asaëyaexanatsi. Nexata pacuenia Cristo petëpaecujinae mëthëvecua pitsapa, bajara pijinia pacuenia itsamatacabi mëthëvecua pitsapaena daxita pamonaemi tēpa Dioso pepua pejumecovënëtsivi. Nexata baja Cristo petëpaecujinae, mëthëvecua ita pitsapa, daxita petëpaevivecua Cristo baja namataxainaya pitsapa mëthëvecua. ²¹ Caenë Adánpijinë peja-

matabëcueneta taxuxuaba jivi petëpaejava mapanacuataje pibisiacuene pexanaexae. Bajara pijinia pacuenia caenë Cristo pejamatabëcueneta vajanacasivatëpaexae cruzata, taxuxuaba petëpaevimi itsamatacabi mëthëvecua pepitsapaejavanexa. ²² Daxitajivi tēpa-pona Adánpijinë petaxuxuabicuenia. Bajara pijinia pacuenia daxita pamonaë Cristo pijajivi, petëpaejuinae icatsia Dioso asaëyaexanaenatsi pacuenia Dioso asaëyaexanatsi. ²³ Paepatota Dioso jitsipa petëpaevi piasaëyaexanaenexa, caejivi canacujitsia asaëyaexanaponaena. Cristo baja petëpaejuinae, Dioso itsa asaëyaexanatsi, daxita petëpaevivēcua namataxainaeya baja asaëyaexanatsi. Bajaraxuacujinae icatsia pamatacabi Cristo patsianica, daxita pamonaë Cristo pijajivi, Dioso icatsia asaëyaexanaenatsi. ²⁴ Bajaraxuacujinae jane baja daxitacuene pecopiarucaeyaxanaejavanexa, copiapatsiana. Bajarapamatacabi Cristo copiarucaeyaxanaena daxita xua Cristo pijavajabitsaë evetavanapa. Nexata bajaraxua Cristo pecopiarucaeyaxanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia. ²⁵ Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaë, Cristo copatsiana daxitacuene pevetsijava. ²⁶ Daxita Cristo pijavajabitsaë verebiabiana. Bajaraxuacujinae cotocaevi copiarucaeyaxanaena jivi petëpaequenemi. ²⁷ Dioso pejumelivaisibaxutota tajëvelia jumaitsi mapacueniaje: "Dioso itsamatacabi pexënato Cristo tocopatsiana daxitacueneviria petoevetsinexatsi," jai Dioso pejumelivaisibaxutota. Itsiata baitsi jane Dioso pexënatojavabelia apo jumaitsi: "Xanë ata nitorobianame," apo jai Dioso. Dioso raja itorobiana pexënato petoevetsinexatsi daxitacueneviria. ²⁸ Nexata itsamatacabi Cristo daxitacueneviria itsa evetsiana, daxitacueneviria Cristo pitorobicuenia jumecovënëtabiabianatsi. Nexata jane baja bajarapamatacabi Cristo jumecovënëtsiana paxa Dioso pitorobicueniatsi. Bajarapacuenia Cristo paxa Dioso pejumecovënëtsixae tsane, nexata bajarapamat-acabi Dioso daxitanacuanëjava daxitacueneviria pitorobinë tsane.

²⁹ Itsamonae pepua penabautisabivi baja, pijamonaemi totëpatsi. Pijamonaemi ata baja pepuanajamatabëcuenecopabi Cristojavabelia, totëpatsi. Itsiata baitsi jane bajarapamonaemi tēpa nabautisabinejeva. Nexata pajivi pijamonaemi totëpatsi, bajarapajivi penabautisabijivi ata baja, pijamonaë pevënamuto icatsia nabautisaba. Bajarapacuenia anijatobeje nabautisaba pevëcuatëpaejivitsi bepenabautisabijivi petotaenexatsi Dioso. Petëpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonaë pevënamuto icatsia apo nabautisabi tsipae, nabautisabinejeva pevëcuatëpaejivitsi bepenabautisabijivi petotaenexatsi Dioso.

³⁰ Petëpaevimi peneta icatsia Dioso itsa apo asaëyaexanaejitsiatsi tsipae, nexata Dioso pejumelivaisi apo patsipaebavanapaenë tsipae, daxitamatacabi panetsiyai tsabiabi ata. ³¹ Tajamonaë, daxitamatacabi

baja cajena netsiyai tsabiabi. Itsamonae picani jamatabënebeyaxuababiaba. Bajaraxua paneyapëtaenexa, pacatsipaebatsi. Tsipaji pacasivajamatabëcuenenarëyatsi vajatuxanenë Jesucristo xaniavaetsia panejumecovënëtanapaexae. ³² Majotaje Efeso tomarapijivi ata jamatabënebeyaxuaba picani. Bajarapamonaë benevëthëjamatabëcuenēvi. Tsiquirijavayota vecuapanepajë. Jivi petëpaejuinae icatsia Dioso itsa apo asaëyaexanaejitsiatsi tsipae, nexata xanë ata nacueratsipajë. Nacueratsipajë, netsiyai ata, jivi tatsipaebaponaejava Dioso pejumelivaisi. Vajatëpaejuinae icatsia Dioso itsa apo nacaasaëyaexanaejitsiatsi tsipae, nexata xaniavaetsia jumecovënëtsipatsi pamonaë jamatabëcuenenavëxaniabiaya nacatsipaeba mapacuenia pejumaitsilivaisije: "Ayaijavanë vajaxaejava xaeiyabianatsi. Aitajibitsinua tsabiabi tsane vajarëyatsabianexa. Tsipaji raja bepījia tēpaenatsi," pejailivaisi vajanacatsipaebivi jumecovënëtsipatsi.

³³ Itsiata baitsi jane pëtsa panacopatame papecayamaxëitojorobinexa bajarapacuenia pejumaitsvi. Tsipaji raja itsamonae bajumaitsi: "Itsa yajavaponaponaejitsipame pibisijamatabëcuenēvi, cajamatabëcuenēbijiānejitsipa. Nexata pexaniajamatabëcuenenë atamë, bajarapamonaë cuenejëpaeya ponaponaejitsipame," bajai itsamonae. ³⁴ Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtae. Mapacuenia pacajumaitsvi paneauranexa.

Pacuenia petëpaevimi Dioso icatsia itsa asaëyaexanatsi, perabëitohianaejitsiatsi yabara pelivaisi

³⁵ Itsamonae raeta yanijobiana petëpaevimi icatsia Dioso piasaëyaexanaejavanexatsi yabara. Jumaitsi meta tsane bajarapamonaë: "¿Detsa meta pacuenia petëpaevimi icatsia asaëyaexanaenatsi? ¿Detsa meta nexata pitsiperabëto icatsia xainaena bajarapamonaë?" jai meta tsane bajarapamonaë. ³⁶ Bajarapacuenia itsa yanijobiana, apo canaëjëtsinejeva jamatabëcuenenavëxaniabiaya bajarapacuenia yanijobiana. Vajaubijava, pexuto itsa ubatsi, pejuvicujinae bajarapaxutomi batsabana pepitsapaenexa pejananaë. ³⁷ Arrozxuto, itsaviriaxutoxi ata, pexu saya ubatsi. Apo mëthëcaetsi pepabotonë. ³⁸ Peubixu, caevirixu canacujitsia, peubicujinae capitsapapona pijaviriabotonë, pijaviriabaxu yajava. Dioso baja cajena pecopatsicuenia caeviriaboto canacujitsia naexanapona. ³⁹ Mapanacuata Dioso copatsi ata daxitacueneviria pejinavanapaenexa, itsiata apo naperabëjëpae. Jivi saicaya itsaviriaperabëto xaina. Unupijidujuai pijinia saicaya itsaviriaperabëto xaina. Pepunaevi pijinia saicaya itsaviriaperabëto xaina. Menepijidujuai pijinia saicaya itsaviriaperabëto xaina. ⁴⁰ Bajara pijinia itsi athëbëtatsia pejinavanapaevi ata. Bajarapamonaë saicaya itsaviriaperabëto xaina mapanacuapijivivecuaje. Athëbëtatsia pejinavanapaevi nacavecuapexaniaperabëtovi. Mapanacuata pejinavanapaevi ata, itsamonae nacatsitapexaniaperabëtovi picani. Itsiata pijinia saicayacuenia. ⁴¹ Matacabipijijuameto itayota. Meravipijijuameto ata itayota. Itsiata

saicayacuena navecuaitayotabeje. Tulupu ata pijinia itayota. Itsiata caetuluputo canacujitsia saicayacuena navecuaitayotapona. ⁴² Bajara pijinia nacavecuaitane petèpaeivimi. Saicayaperabèto nacavecuaxainaena Dioso icatsia itsa asaëyaexanaenatsi. Petèpaejivi irabelia mëthètatsi. Nexata baja tsabana. Bajaraxuacujinae Dioso icatsia itsa asaëyaexanaenatsi, apo petsabanaeperabètonexa jane baja xainaena. ⁴³ Petèpaejivi mëthètatsi vajaataejitsibiperabèto yajava. Bajaraxuacujinae Dioso icatsia itsa asaëyaexanaenatsi, pexaniapenivenivenaeperabèto jane baja xainaena. Petèpaejivi mëthètatsi pecueranaeperabètomu yajava. Bajaraxuacujinae Dioso icatsia itsa asaëyaexanaenatsi, daxitamatabijavabelianexa jane baja pesaë pexainaeperabèto xainaena. ⁴⁴ Petèpaejivi mëthètatsi mapanacuapijiperabèto yajava. Bajaraxuacujinae Dioso icatsia itsa asaëyaexanaenatsi, athèbènacuapijiperabèto xainaena. Itsaviriaperabèto abaxè aeconoxae xainatsi mapanacuata vajajinavanapaenexa. Bajara icatsia pacuenia itsamatabi itsaviriaperabèto xainatsi athèbènacuataatsia vajajinavanapaenexa.

⁴⁵ Dioso pejumelivaisibaxutota jumaiti mapacueniaje: "Adánpijinè copiaya Dioso exanatsi mapanacuataje. Bajaraponè Dioso exanatsi pecueranaeperabèto yajava peponaponaenexa mapanacuataje," jai Dioso pejumelivaisibaxutota. Itsiata baitsi jane Adánpijinè matatoxensia Cristo bitso ayaijamatabècuenenè. Nexata Cristo petèpaeucujinae icatsia Dioso itsa asaëyaexanatsi, caèjèpatsi vajanacajamatabècuenasaëyaexanaenexa Diosojavabelia. Caèjèpatsinua vajanacarajutsinexa matabi apo pevereverecejava. ⁴⁶ Pacuenia athèbènacuapijivi perabèitsi, abaxè copiyapo perabèitsi. Biji rajane pacuenia mapanacuapijivi perabèitsije, bajaraperabèitsi. Itsiata baitsi jane vajatèpaeucujinae Dioso icatsia itsa nacaasaëyaexanaena, pacuenia athèbènacuapijivi perabèitsi, bajara vaxaitsi ata perabèitsi tsanetsi. ⁴⁷ Adánpijinè copiaya Dioso exanatsi mapanacuataje. Atsabenota exanatsi. Bajaraxuacujinae bexèjavabelia athèbèvetsica Cristo patsica, ponè vajatuxanenè. Bajaraponè saicaya athèbèvetsica pepatsinè. ⁴⁸ Daxitatsi vaxaitsi, mapanacuapijivitsije, perabèjèpatsi Adánpijinè, atsabenota pexanaenètsi. Itsiata baitsi jane itsamatabi daxitatsi, Cristo vajajumecovènètsivi, perabèjèpaenatsi Cristo. Nexata pacuenia athèbènacuapijivi perabèitsi, bajaraperabèitsi tsanetsi Cristo vajajumecovènètsivi. ⁴⁹ Aeconoxae abaxè perabèjèpatsi Adánpijinè, ponè atsabenota pexanaenètsi. Bajara icatsia pacuenia itsamatabi Cristo perabèjèpaenatsi, ponè athèbèvetsica pepatsinè.

⁵⁰ Tajamonae, jitsipajè patacatsipaebinexa mapacuenije. Acuenebi caejivi ata mapanacuapijivije mapanacuapijiperabèto yajava pejonenexa Dioso pijanacuayabetsia. Tsipaji vajaperabèto saya pevereverecejavanexa. Bajaraxuata acuenebi vajayajavajinavanapaenexa bajaraperabèto daxita matabijavabelianexa. ⁵¹ Nexata panamuxunaevere mapalivaisije, Dioso bajayata muetsia pexainabuatsilivaisimi, pali-

vaisi aeconoxae Dioso nacayapètaeyaexanapona. Daxitatsi raja vaxaitsi Cristo icatsia pepatsimatabinexatsica pevajènaeya, apo tèpaetsi tsane. Itsiata baitsi jane apo tèpae atatsi tsane, pamatabi Cristo patsianica, daxitatsi nacaperabèitothianaena Dioso. ⁵² Itsa najumetsiana cotocaevi piobijava trompeta, bepjiyayo tsatabi tsane, paepatoyovajèto banaitsaquetajarabatsi, bajarapaepatoyovajèto Dioso nacaperabèitothianajonena. ⁵³ Vajaperabèto raja pevereverecejavanexa. Bajaraxuata xanepana vajanacaperabèitothianaenexa, apo pevereverecejaperabèto vajaxainanexa. ⁵⁴ Nexata paepatota bajarapacuenia nacaperabèitothianajonena, copijopaena jane baja pacuenia Dioso pejumelivaisibaxutota tajèvelia jumaiti. Dioso baja cajena pejumelivaisibaxutota tajèvelia jumaiti mapacueniaje: "Jivi petèpaeucuenemi itsamatabi copiarucaena. Piniucuenia Dioso copiarucaeyaexanaena jivi petèpaeucuenemi. ⁵⁵ Jivi petèpaeuyaexanaecuenemi ajibi tsane pesaë vajanacaavitaniaexanaeyaniva. Ajibi tsane vajanacatèpaeuyaexanaecuenemi," jai tajèvelia Dioso pejumelivaisibaxutota jivi petèpaeuyaexanaecuenemi Dioso pecopiarucaeyaexanaejavanexa yabara. ⁵⁶ Pibisiacuenè vajaexanaeneconi yabara tèpaenatsi. Palivaisi bajayata Dioso Moiséspijinèta najumecopata, bajarapalivaisi pejamatabècueneta yapètanetsi vajatèpaeucujinae Diosovecua picani vajanaxuabijavanexa pibisiacuenè itsa exanatsi. ⁵⁷ Itsiata baitsi jane baja vajatèpaeucujinae Diosovecua apo naxuabitsi tsane. Tsipaji baja vajatuxanenè Jesucristo nacasivatèpa cruzata vajanacapanepaenexa vaneconivecua. Bajaraxuata vaxaitsi Diosojavabelia jumaititsi tsabiabi mapacueniaje: "Pexaniacuenè rabaja panetoexaname," jaiti tsabiabi.

⁵⁸ Tajamonae, bitso patacaasivavi. Payapètaneme rabaja mapacuenije. Dioso panetonacuenèbijava, apo panacueratsimè tsane. Bajaraxuata panevajènaeyabelia asaëya patonacuenèbavanapare Dioso. Pètsa pacopabame Dioso panejumecovènètsijava. Panevajènaeyabelia asaëya Dioso patonacuenèbaponare.

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovènètavanapaevi petoitorobinexa yabara pelivaisi

16 Pacatsipaebijitsiatsi pacuenia pacaetuatsijitsiamè ofrenda panetoitorobinexa Jerusalén tomarata Dioso pejumecovènètavanapaevijavabelia bajarapacuenia paneyavenonaenexa. Pacuenia Galacia nacuata Dioso pejumecovènètsivi, caebitsaèto canacujitsia, itorobajè ofrenda pecaetuataponaenexa, bajara pijinia pacuenia paxamè ata pacaetuataponaenename ofrenda. ² Pacaejivimè canacujitsia, caesemana canacujitsia panenacanabipalatayajuvènèjjava, ofrendanexa saicaya patsataponanename caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia paxaniavaetaponanename palata. Nexata pamatabi paxamèjavabelia patsianajè, palata ofrendanexa apo

pacaetuataponaemë tsane. ³ Nexata pamatacabi paxamëjavabelia patsianajë, paitapetsianame bajarapalata pecaponaevinexa Jerusalén tomarapijivijavabelia. Pamonae palata pecaponaevinexa, tsi-cobeyaquinaenajë cuyalato. Bajarapacuyalato bajarapamonae peyajavacaponaeenexa, panecaetuatsiofrenda itsa tocaponaena Jerusalén tomarata Dioso pejumecovënëtsivijavabelia. Nexata bajarapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyajavacaponaeaxae tsane tatsicobeyaquinaebaxuto. ⁴ Xanë ata itsa jitsipaenajë taponaeenexa, ponaenajë Jerusalén tomarabelia. Nexata meta bajarapamonae naponaeenaxa tapëta.

Pacuenia Pablo tajëvelia navajunupaeba pacuenia exanaejitsia yabara pelivaisi

⁵ Itsa ponaenajë paxamëjavabelia, tapatsivajënaeya paxamëjavabelia, copiaya pataponaenajë Macedonia nacujava. Bajaraxuacujinae jane baja patsianajë paxamëjavabelia, Corinto tomarata. ⁶ Ponaponaenajë meta paxamëjavata bajayajebi. Daxita emarapaejebi ata meta naponaponaenajë paxamëjavata. Nexata bajaraxuacujinae paneyavenonaename tajanamutonexa, itsabelia jitsipajë taponaeenexa icatsia. ⁷ Caepatoyo saya tanaponaponatabinexa paxamëjavata, apo jitsipaenë. Biji rajane jitsipajë bajayajebi taponaponaenexa paxamëjavata pacuenia vajatuxanenë netojitsipa. ⁸ Itsiata baitsi jane abaxë aeconoxae ponaponaenajë majotaje Efeso tomarata. Pentecostésvënë fies-tacujinae meta, matapania vecuaponaenajë Efesotomara. ⁹ Majotaje aeconoxae baja bitso xanepana tatsipaebinexa Dioso pejumelivaisi. Tsipaji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae ayaibitsaëto apo jitsipae. Nexata tatsipaebilivaisi pejumecovënëtsivi, jamatabëcopabiaexanaponatsi.

¹⁰ Timoteo itsa patsiana paxamëjavabelia, pacopiapitsianame xaniavaetsia jamatabëcuenebarëyaya peponaponaenexa paxamëjavata. Bajarapacuenia xaniavaetsia pacopiapitsianame. Tsipaji pacuenia xanë vajatuxanenë pejamatabëcueneta tonacuenebaponaponajë, bajara pijinia pacuenia bajaraponë ata vajatuxanenë pejamatabëcueneta tonacuenebaponapona. ¹¹ Bajaraxuata pëtsa itsajivi ata pacopatame pequenetsiataenexatsi. Biji rajane payavenonaename pijanamutonexa jamatabëcuenebanepanaeya pepatsinexa xanëjavaberena. Xanë, itsamonae yajava, vajënaeevetaponaponajë Timoteo pepatsinexarena xanëjavaberena.

¹² Vajabanenë Apolos pelivaisi pacatsipaebijitsiatsi. Bajaraponë picani itorobajë itsamonae Dioso pejumecovënëtsivi pepëta penaponaenexa paxamëjavabelia papecataenexa. Itsiata baitsi jane aeconoxae abaxë

apo jamatabëponae. Ponaena meta itsiata itsajota cuenecaëjèpatsi.

Pacuenia Pablo jamatabënajina Corinto tomarapijivi yabara pelivaisi

¹³ Dovathi pejamatabëcueneyaniva, jamatabëcuene-naëcotsiaya pajinavanapare. Pajamatabëcuene-saëmëre tsavanapae Jesucristojavabelia panenajamatabëcueneocopatsijava. Pëtsa jamatabëcueneaitajepaebiaya pajinavanapame. Pajamatabëcueneaitasacamëre tsavanapae pebicuenia. Itsamonae patsitaa-jamatabëcuenesaëmëre tsavanapae. ¹⁴ Daxita xua paexanavanapame, itsamonae ata asivaya paexanavanapare.

¹⁵ Tajamonae, payapëtaneme rabaja mapacueneje. Estéfnas pijabopijivi barëjumecovënëta Jesús pelivaisi. Bajarapamonae daxita pijanacuapijivivecua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDiosopijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi.

¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pajumecovënëtsianame. ¹⁷ Paxamëyajuvënëvi parena xanëjavaberena mapamatabëxëyoje. Estéfnas, Fortunato, Acaico, bajarapamatabëxëyo parena. Bajaraxuata siva-jamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame. ¹⁸ Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcueneasaëyaexanaena icatsia itsa naviabiana paxamëjavabelia. Bajarapitsivi bepayaiyaneme.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonae nacaetutabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. ²⁰ Daxita Dioso pejumecovënëtsivi, majotaje pejinavanapae, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevilivaisiyoje. Apo itorobinë taneyavenonabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianical!

²³ Pacatovajëtabiabatsi Diosojavabelia vajatuxanenë Jesucristo papecayavenonabinexa. ²⁴ Daxita paxamë asivaya pacajamatabënajinatsi caenë Jesucristo pijavixatsi.

2 CORINTIOS

**Pacuenia Pablo toyaquina mapabaxutoje Dioso pe-
jumečovēnsivi, Corinto tomarapijivjavabelia, yabara
pelivaisi**

1 Xanē Pablonē, Dioso tanetojitsipaexae, nitapeta Jesucristo pijaapóstolenēnēxanē. Nexata Jesucristo nitoroba jivi tatsipaebinexa pexanialivaisi. Vajabanānē Timoteo xanējavata ponapona. Nexata pacatoyaquinatsibeje mapalivaisije Dioso panejumecovēnsivi, paCorinto tomarapijivimē. Patoyaquinajēbejenua mapalivaisije Acaya nacuajava pejinavanapaevi ata. ² Pacatovajētatsi vaxa Diosojavabelia, vajatuxanenē Jesucristojavabelia ata, papecaitaxutotsoni-ataenēxa jamatabēcuenexanepanaeya panejinavana-paenēxa.

**Pacuenia Pablo navajunupaeba itsamonae pebejiobi-
aexanaejavatsi yabara pelivaisi**

³“Ayaicuenia panejamatabēcueneyavenoname,” paxanē vaxa Diosojavabelia. Bajaraponē Dioso, vajatuxanenē Jesucristo paxa. Dioso, vajanacaitaxutotsoni-ataenē, vajanacajamatabēcuenēbabatsinē bitso vajanajamatabēxaināyaniva. ⁴Pamatacabi panetocopia-patabiaba daxita xua bitso panenajamatabēxaināya exanaejitsia, itsiata Dioso panejamatabēcuenēbabatabiaba bajaraxuavecuā. Bajara pijinia pacuenia paxanē ata panejamatabēcuenēcaējēpa itsamonae juya patajamatabēcuenēbabatsinēxa pamatacabi bajarapamonae ata tocopia-patatsi xua bitso najamatabēxaināya exanaejitsiatsi. ⁵Itsamonae bitso panebejiobiaexanabiaba Jesucristo patajumecovēnsixae. Nexata pijinia Jesucristo pejamatabēcuenēta Espiritu Santo panejamatabēcuenēbabatabiaba bitso patanajamatabēxaināyaniva. ⁶Nexata paxanē itsamonae itsa panebejiobiaexanabiaba, Dioso panejamatabēcueneyavenonabiaba patanejamatabēcuenēbabatsinēxa. Nexata paxanē ata panejamatabēcuenēcaējēpaena juya itsamatacabi paxamē patacjamatabēcuenēbabatsinēxa itsa pacatocopiapata xua bitso pacanajamatabēxaināya exanaejitsia. Nexata itsa pacajamatabēcuenēbabatsianatsi, bajayajebi pajamatabēcuenēsaēmē tsane Dioso panejumecovēnsijava matapania Dioso papecacapanepaejavabelianēxa. Paxamē ata raja itsamonae pacabejiobiaexanabiabiana. ⁷Payapētaniji baja cajena paxamē ata Dioso papecacapanepaejavanēxa. Pacuenia paxanē itsamonae panebejiobiaexanabiaba, bajarapacuenia paxamē ata itsamonae pacabejiobiaexanabiabiana.

Nexata paxamē ata itsamonae itsa pacabejiobiaexanabiabiana, Dioso pacajamatabēcuenēbabatabiabiana panevajēnaeyabelia paneajamatabēcuenēsaenēxa Dioso panejumecovēnsijava. Bajarapacuenia Dioso pacajamatabēcuenēbabatabiabiana matapania Dioso papecacapanepaejavabelianēxa.

⁸Tajamonae, pajitsipajē paxamē ata paneypētaenēxa itsamonae Asiavēnē nacuaata patanebejiobiaexanabiabiana. Ayaicuenia bitso panebejiobiaexanabiaba. Nexata baja picani pasaējibinē tsaponae. Apo panecaējēpae baja picani patavajēnaeyabelia patapon-aenēxa. Nexata pajamatabējumaitsinē tsabiabi: “Patēpaenajē meta baja rovia,” pajamatabējanē tsabiabi. ⁹“Pepacuene raeta baja panebeyejebiana,” pajamatabējanē tsabiabi. Dioso baja cajena panetocopata bajarapacuenia itsamonae patanebejiobiaexanabiabinēxa. Nexata paepatota panebejiobiaexana patajamatabējumaitsinēxa mapacueniaje: “Xanē tajacuata apo nēcaējēpae tavecuapanepaenēxa mapacuenēje. Matapania Dioso neyavenonaena, nēcaējēpaena tavecuapanepaenēxa mapacuenēje,” patajamatabējainēxa. Dioso caējēpatsi pataneyavenonaenēxa. Tsipaji baja cajena Dioso pematacotsinē petēpaevi ata. ¹⁰Dioso baja panecapanepa itsamonae patanebejiobiaexanaejavata patanebeyaxuabiyāniva. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponējavabelia panajamatabēcuenēcopatajē bajarapacuenia pataneyavenonabiabinēxa. ¹¹Paneyavenonaeyavajētaponāenāname Diosojavabelia bajarapacuenia Dioso pataneyavenonabiabinēxa. Paayaibitsaētoxaenētōmē itsa panetovajētaponāenāname Diosojavabelia, nexata Dioso paneyavenonabiabiana. Nexata pijinia jivi ayaibitsaētoxaeneto paxanē yabara jumai tsabiabi tsane Diosojavabelia: “Pexaniacuene bitso toexanāname Pablobana. Ayaicuenia yavenoname pebeyejebiyānivat-si,” jai tsabiabi tsane.

**Pajamatabēcuenē yabara Pablo apo ponae Corinto
tomarabelia yabara pelivaisi**

¹²Itsa pajinavanapajē daxitajivijava, paxamējava ata, xaniavaetsia pajinavanapajē Dioso pitabarata. Itsa pajinavanapajē paxamējava, pibisiacuene apo pacasivanajamatabēxaināetsi. Bajaraxuata panasivajamatabēcuenēbarēyanē. Paxanē raja saya mapanacuapijilivaisita apo panejamatabēcueneyavenonae xaniavaetsia patajinavanapaenēxa. Dioso raja patanejamatabēcueneyavenonaexae, bajarapacuenia

xaniavaetsia pajinavanapajë. ¹³ Palivaisianë baja pacatoyaquinabiabatsi, caelivaisita anijajamatabëcuenelivaisibeje apo xainaponae. Palivaisianë pajumetaneme itsa palebame patacatoyaquinaelivaisianë, bajarapalivaisianë saya caejamatabëcuenelivaisi xainapona. Pematatsënëa itsajamatabëcuenelivaisi apo xainaponae. Pacatojitsipatsi xaniavaetsia panejumeyapëtaenexa palivaisianë pacatoyaquinatsi. ¹⁴ Pacatojitsipatsi xaniavaetsia patanejamatabëcueneyapëtaenexamë. Tsipaji abaxë xaniavaetsia apo panejamatabëcueneyapëtaemë pacuenia pajamatabëcuenëitsinë tsavanapae. Nexata pamatacabi vajatuxanenë Jesús icatsia patsianica, paxamë panesivajamatabëcuenëbarëyamë tsane. Bajara pijinia pacuenia paxanë ata pacasivajamatabëcuenëbarëyatsi tsane.

¹⁵ Nexata xanë pacasivajamatabëcuenëjumaititsi mapacueniaje: "Corinto tomarapijivi baja cajena xaniavaetsia nejamatabëcueneyapëtane. Yapëtane pacuenia apo sivanajamatabëxainanë itsajamatabëcuenë bajarapamonaejavabelia," pacasivajamatabëjaiti. Bajaraxuata picani jamatabëpatajë paxamëjavata patanesivajamatabëcuenë barëyanexamë itsa patajë paxamëjavata. ¹⁶ Pamatacabi ponajë Macedonia nacuyabelia, talianë picani jamatabëpacataeponatsi bajaraxuayo. Bajaraxuacujinae icatsia tanaviatsinërena jamatabëpacataeponatsi picani icatsia bajaraxuayo. "Bajarajota bajarapamonae neyavenonaena tajanamutonexa, Judea nacuyabelia taponanexa," pacasivajamatabëjaiti picani. ¹⁷ Pacuenia najamatabëxainabiabajë taponanexa itsajavabelia, ponabiabajë baja cajena. Itsiata aeconoxae bajarapacuenia apo exananë taponanexa paxamëjavabelia. Mapanacuata itsamonae najamatabëxainae ata itsacueneyavayo pexananexa, itsiata apo exanabiabi. Bajarapacuenia itsiata xanë apo jamatabëcuenëitsinë. Paxamë baja cajena panecueneyapëtaneme. ¹⁸ Dioso ata panecueneyapëtane apo patacayamaxëitorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabitsi.

¹⁹ Xanë Pablonë, Silvano, Timoteo, bajarapamatabëxëyo, pacatsipaebabiabatsi Jesucristo, Dioso pexënato, pelivaisi. Bajaraponë Jesucristo caejamatabëcuenë xainabiaba. Nexata pacuenia jumaiti, xaniajai tsabiabi. ²⁰ Jesús pejamatabëcueneta Dioso baja daxita nacatoexana pacuenia tajëvelia najumecapanepaeya jumaiti vajanacatoexananexa. Bajaraxuata Diosojavabelia vajavajëtsijavata itsa jumaititsi: "Diosomë, bitso ayaijamatabëcuenenëmë," itsa jaiti, nexata Jesucristo pejamatabëcueneta jumaititsi.

²¹ Dioso pacajamatabëcueneyavenonapona panevajënaeyabelia panejamatabëcuenesaënexa Cristojavabelia panenajamatabëcuenecopatsijava. Bajarpacuenia paxanë ata Dioso panejamatabëcueneyavenonapona. Dioso nacaitapeta Jesucristo pijajivinexatsi, Dioso pijacuene vajatonacuenëbavanapaenexa. ²² Dioso raja Espíritu Santo nacatsijamatabëcaeyaexana. Nexata nayapëtanetsi

Dioso pexicuenetsi. Bajaraxuata yapëtanetsi pepacuenë xaniajai Dioso vajanacacapanepaejavanaxa.

²³ Mapacuenia pacajumaititsije Dioso pitabarata. Dioso baja cajena nejamatabëcueneyapëtane. Pamat-acabi picani jamatabëponabiabajë paxamëjavabelia, caecuenia itsa ponaejitsipajë, nexata pacabijataejitsipatsi. Tsipaji abaxë apo paexanavanapaemë patacaitorobicuenia. Bajaraxuata abaxë apo navecuaponanë paxamëjavabelia, itsa pacabijatanetsi, bitso panenajamatabëxainaeayaniva. ²⁴ Nexata apo jitsipaanë icatsia patacatsipaebaponanexa paneyapëtaenexa pacuenia bepaexanavanapame. Tsipaji baja xaniavaetsia Dioso pajumecovënëtavanapame. Jamatabëpacayavenonatsi. Pacuenia baja pajamatabëcuenëbarëyamë tsavanapae, matatoxenetsia icatsia panejamatabëcuenëbarëyanexa Dioso pitabarata.

2 Najamatabëcopatajë baja taponaejava paxamëjavabelia. Tsipaji jamatabëjumaitinë paxamë yabara mapacueniaje: "Apo ponaenë abaxë tsane Corinto tomarapijivijavabelia tanajamatabëxainaeayaxanayaniva bajarapamonae," jamatabëjanë. ² Paxamë itsa pajamatabëcuenëbarëyamë, nexata xanë ata pacasivajamatabëcuenëbarëyatsi tsabiabi. Itsiata itsa pacanajamatabëxainaeaya exanaejitsipatsi, nexata apo pajamatabëcuenëbarëyamë tsipae. Nexata xanë ata apo pacasivajamatabëcuenëbarëyatsi tsipae. Tsipaji ajibi tsipae patacasivajamatabëcuenëbarëyavanaxa. ³ Bajaraxuata taponaejavajënaeya paxamëjavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tsipaji abaxë apo jamatabëponanë paxamëjavabelia patacasivanajamatabëxainaeayaniva, itsa pacatanetsi panejinavanapaejava apo patacaitorobicuenia. Jitsipajë picani paxamë patacasivajamatabëcuenëbarëyanexa. Paxamë yabara jamatabëjumaitinë mapacueniaje: "Corinto tomarapijivi baja cajena nejamatabëcueneyapëtane. Bajarapamonae itsa jamatabëcuenëbarëya, xanë ata bajarapamonae sivanajamatabëcuenëbarëyanë tsabiabi," jamatabëjanë. ⁴ Apo jitsipaanë picani patacatoyaquinaenexa bajarapaxuto. Itsiata itsa pacatoyaquinatsi, nuajë paxamëjitsia. Najamatabëxainajë cajena bitso tjamatabëëthëtovetsina. Apo pacatoyaquinaetsi raja saya patacanajamatabëxainaeaya exananexa. Ayaicuenia raja patacaasivajava patanejamatabëcueneyapëtaenexamë, pacatoyaquinatsi.

Pacuenia Pablo itoroba Corinto tomarapijivi barajamatabëcuenëxanepanaeya baja petaenexa pibisiacuene pexanaponaponaenëmi yabara pelivaisi

⁵ Ponë pibisiacuene exana, caenënë xanë apo nenajamatabëxainaeayaexanae. Daxita paxamë ata bajarapacuenia pacanajamatabëxainaeayaexana. ⁶ Ponë yabara itsabaxutota pacatoyaquinatsi, paxamë baja cajena najamatabëcuenëjëpaeya panavecuaitavetame bajaraponë, pibisiacuene pexananë, penapatsiyanova

panenacaetuatsijavata. Nexata baja bajaraponë belia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. ⁷ Aeconoxae baja paja-matabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneyavenonaename piarayaniva. Bajarapacuenia pajamatabëcueneyavenonaename pejamatabëcuene matatoxenetsiyanivatsi bitso pejamatabëcuenebëjajava pijaneconi yabara. ⁸ Bitso pacatojitsipatsi panetsitanajamatabëcueneitajëtsinexa paneasivajava bajaraponë. ⁹ Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcueneëjëtsinexa. Jitsipajë xaniavaetsia tayapëtaenexa ita panejumecovënëtsijitsiamë daxita pacuenia pacaitorobatsi. ¹⁰ Nexata baja aeconoxae ita pajamatabëcuenecaevame pabibisiacuene bajaraponë exana paxamë tuatuajëta, xanë ata baja jamatabëcuenecaevajë bajaraponë pibisiacuene pexanaejava. Xanë baja jamatabëcuenecaevajë paneconi bajaraponë exana xanëjavaberena. Jamatabëcuenecaevajë baja bajaraponë pibisiacuene pexanaejava, daxita paxamë aneconijibia jamatabëcuenecabarëyaya panejinavana-paenexa Cristo pitabarata. ¹¹ Jamatabëcuenecaevatsi baja papibisiacuene bajaraponë exana vaxaitsijavaberena. Tsipaji vaxaitsi ita apo jamatabëcuenecaevitsi tsipae bajarapapibisiacuene pexanaejava, vaxaitsi ata dovathi nacayamaxëitojorobijitsipa. Vaxaitsi baja dovathi cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

Pacuenia bitso Pablo Tito sivanajamatabëxaina yabara pelivaisi

¹² Patajopajë Troas tomarata tatsipaebinexa Cristo pelivaisi. Troas tomarata tapatsivajënaeya, taniiji Dioso tanetoxanepanaeyaexanaejava tatsipaebinexa pejumelivaisi bajarapatomarata. Nexata Troas tomarata ita tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. ¹³ Itsiata baitsi jane bajarajota abaxë apo jamatabëcuenecabarëyanë. Najamatabëxainajë vajanabanë Tito yabara. Tsipaji abaxë Tito apo caxitarabaxuabinë Troas tomarata. Nexata baja napëjiobajë Troas tomarapijivi taponanexa baja Macedonia nacuayabelia.

Pacuenia Cristo nacajamatabëcueneyavenona yabara pelivaisi

¹⁴ "Pexaniacuene rabaja panetoexaname," pajanë Diosojavabelia, Cristo pejamatabëcueneta Dioso patanejamatatabëcuene yavenonabiabixae. Itsajavabelia ita paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsi-

paebinexa Dioso pejumelivaisi. Pamonaë jumecovënëta bajarapalivaisi, tsitapexanialivaisitsi bitso. ¹⁵ Dioso sivajamatabëcuenecabarëyatsi pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenecabarëya. Tsipaji patsipaebabiabajë Cristo pelivaisi daxitajivijavabelia. Itsamonae baja jumecovënëta pona Cristo pelivaisi Dioso pecapanepaevinexatsi. Itsamonae pijinia apo jumecovënëtsi Cristo pelivaisi Dioso vecua penaxuabivonexa. ¹⁶ Pamonaë Diosovecua naxuabiana apo pejumecovënëtsixae Cristo pelivaisi, naxuabiana. Pamonaë pijinia Dioso capanepaenatsi pejumecovënëtsixae Cristo pelivaisi, capanepaenatsi. Paxanë, paapóstolevinë, Dioso paneyavenonabiaba. Nexata panejamatabëcuenecaëjëpa patatsipaebabiabinexa pexanialivaisi, Cristo pelivaisi, jivi peca-paneaelivaisinexatsi. ¹⁷ Pacuenia itsamonae tsipaebabiaba Cristo pelivaisi ëpematomotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainaenë jivijavabelia ita patsipaebabiabajë Cristo pelivaisi. Dioso baja cajena panejamatabëcueneyapëtanë. Dioso paneitoroba Cristo pata-tonacuenebinexa.

Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi

3 Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinexa, paayaijamatabëcuenevinë apo panataenë. Itsamonae pata paxamëjavata penajumetsënëtsilivaisi papecatsipaebinexa beDioso pejumelivaisicuenia. Bajarapamonaë pacatocapata cuyalato itsamonae petsicobeyaquinaebaxutotsi. Bajarapabaxutota pacatoyaquina: "Dioso raja pejumelivaisi pepaebivi," pejailivaisi. Bajaraxuata xaniavaetsia pacopiapitame bajarapamonaë. Itsiata baitsi jane paxanë ita papatajë paxamëjavata, apo pacarajutsitsi itsamonae patanetsicobeyaquinaecuyalato. "Pablo raja apóstolenë," pejailivaisi itsamonae patanetsicobeyaquinaebaxuto, apo pacarajutsitsi xaniavaetsia patanecopiapitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexa itsamonaejavabelia bajarapamonaë pataneyapëtaenexa xaniavaetsia patanecopiapitsinexa. ² Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiapitsinexa. Tsipaji baja jivi yapëtanë xaniavaetsia Jesucristo pelivaisi patacatsipaebixae panenajamatabëcuene pënëyorotsijava Diosojavabelia pibisiacuene paneexanabiabijavamivecua. Nexata jivi bajarapamonaë yapëtanenua Dioso patanitorobijava. ³ Paxamë xaniavaetsia panejumecovënëtamë patacatsipaebilivaisi, Jesucristo pelivaisi. Nexata itsamonae, apo pataneyapëtaevi ata, ita pacavënëlvaisitane patanejumecovënëtsijavamë, panesivajamatabëjumaitsi: "Pablobana Corinto tomarapijivi cuyalato apo tsicobeyaquinae atatsi, ita jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexaniajailivaisi, Jesu-

cristo pelivaisi, jivi petsipaebavanapaenexa," panesivajamatabējai. Piasaētsaponaponaenē baja cajena Espiritu Santo pacatsijamatabēeca. Nexata baja pacajamatabēcuenepēnēyorota pejanajamatabēcuenepanaxinaenexa. Nexata itsamonae xaniavaetsia itsa patsitajinavanapame, bajarapamonae ata baja pacayapētane Cristo pelivaisi papecatsijamatabēeca-
java.

⁴ Paxanē payapētaniji Dioso patanitorobijava pepacuenē Cristo pelivaisi jivi patatsipaebavana-paenexa. Tsipaji baja Dioso paneyavenonabiaba Jesucristo pejamatabēcueneta. ⁵ Paxanē patasaēta Dioso patatonacuenebinexa, apo panejamatabēcuenecaējē-pae. Nexata xua Dioso patoexanavanapajē, Dioso baja cajena paneyavenonabiaba. ⁶ Dioso panejamatabēcueneyavenonabiaba patatsipaebabiabinexa itsamonaejavabelia Dioso najumecapanepaeya pejanalivaisi pejumaisijava jivi pecapanepaenexa. Bajarapamonaejavabelia apo pajumaisinē tsabiabi: "Pajumecovēntavanapare Dioso Moiséspijinēta penajumecopatsilivaisi. Itsa apo pajumecovēntsimē tsane, nexata panaxuabianame," apo pajanē tsabiabi. Biji rajane jivi patsipaebabiabajā pacuenia Espiritu Santo jamatabēcuenesaēyaexanaejitsiatsi. Palivaisi bajayata Dioso Moiséspijinēta najumecopata, itoroba pebexuabinoxatsi pajivi apo jumecovēntsi bajarapalivaisi. Itsiata baitsi jane pajivi jumecovēnta papejanalivaisi jivi patsipaebabiabajā, Espiritu Santo pesaēta jamatabēcuenesaēyaexanaponatsi.

⁷ Bajayatami Dioso Moiséspijinēta najumecopata. Bajarapalivaisi Dioso yaquina ibopanabejumata. Bajarapalivaisita Dioso itoroba pajivi apo jumecovēntsi bajarapalivaisi pebexuabaponaenexatsi. Bajarapacuenia Dioso Moiséspijinēta itsa najumecopata bajarapalivaisi, Moiséspijinē itabaranivenivena bitso. Nexata Israelpijinē pemomoxi apo itabaranaēcotsicapanepaetsi. Itsiata baitsi jane bajaraxuacujinae itsamatacabianējavabelia, itabaracotiacavapona baja. ⁸ Palivaisi bajayata Dioso Moiséspijinēta najumecopata, xanepana baja picani caepatoyonexa saya. Bajarapalivaisimi matatoxenetsia bitso xanepana papejanalivaisi mapamatacabitaje jumecovēntavanapatsi Dioso vajanacapanepaenexa. Bajarapacuenia Dioso nacacapanepaena Espiritu Santo vajanacatsijamatabēecaexae daxitamatacabijavabelianexa. ⁹ Bajayata Dioso Moiséspijinēta najumecopata. Nexata bajarapalivaisi xanepana. Tsipaji bajarapalivaisi pejamatabēcueneta, jivi yapētane Dioso penaneconitsiaexanaejavanexatsi pibisiacuene pexanaeconi yabara. Itsiata baitsi jane bajarapalivaisimi matatoxenetsia bitso xanepana papejanalivaisi pejamatabēcueneta Dioso nacacapanepaetsiatsi. Bajarapapejanalivaisi pejamatabēcueneta, Dioso baja aneconijibia nacatane. ¹⁰ Palivaisi bajayata Dioso Moiséspijinēta najumecopata, xanepana baja picani. Itsiata baitsi jane palivaisi Dioso cotocaevi najumecopata, bajarapalivaisi bitso xanepana. Bajaraxuata palivaisimi copiaya Dioso najumecopata Moiséspijinēta, aeconoxae baja nacatsitaajumematamobi. ¹¹ Palivaisi

copiaya Dioso Moiséspijinēta najumecopata, xanepana picani caepatoyonexa saya. Biji rajane palivaisi cotocaevi Dioso najumecopata, bitso xanepana. Tsipaji daxitamatacabijavabelianexa bajarapalivaisi tsitecaena.

¹² Payapētaniji papejanalivaisi Dioso cotocaevi najumecopata bitso pexanepanaejava. Tsipaji daxitamatacabijavabelianexa apo vereverecae tsane bajarapalivaisi. Bajaraxuata apo pajumejunavabiabinē bajarpalivaisi patatsipaebinxajivijavabelia. Palivaisivajēto payapētaniji, patsipaebabiabajā jivijavabelia. ¹³ Bajayata Moiséspijinē yapētae ata livaisi. itsiata xaniavaetsia apo tsipaebi pijajivijavabelia. Itsiata paxanē bajarapacuenia apo paitsinē. Bajayata Moiséspijinē itsa itabaranivenivena, naitabaraacata papaēbērēpanata. Bajarapacuenia naitabaraacata pijajivi, Israelpijinē pemomoxi, pitabarataeyanivatsi bajarapacotia pecaevaponaejava. ¹⁴ Itsiata baitsi jane bajarapamonaejavabelia Moiséspijinē tsipaebi ata, apo jumeyapētaetsi pajamatabēcuenelivaisi yabara tsipaeba. Bitso ajamatabēcuenetaja bajarapamonaemi. Nexata apo jumeyapētae palivaisi tsipaebatsi. Bajara pijinia pacuenia ajena mapamatacabijavaberena ataje, tsiteca abaxē ajamatabēcuenetaja bajarapamonae pemomoxi ata. Bajarapamonae penacaetuatabiabibota, itsa lebababiaba Dioso Moiséspijinēta penajumecopatsilivaisimi, apo jumeyapētaeyabiabi pajamatabēcuenelivaisi xaina. Bajarapamonae itsa jumecovēntsiapa Cristo pesivatēpaejavatsi, nexata matapania jumeyapētaejitsipa pajamatabēcuenelivaisi xaina palivaisi bajayata Moiséspijinē tsipaebabiaba. ¹⁵ Ajena mapamatacabijavaberena ataje, judiovi penacaetuatabiabibota itsa lebababiaba Dioso Moiséspijinēta penajumecopatsilivaisimi, apo jumeyapētaeyabiabi pajamatabēcuenelivaisi xaina. Bitso ajamatabēcuenetaja bajarapamonae. ¹⁶ Itsiata baitsi jane pajivi najamatabēcuenecopata vajatuxanenē Jesucristojavabelia, bajarapajivi Dioso vecuaajibiaexanatsi pibisiacuene pexanaeconi. Nexata bajarapajivi xaniavaetsia jumeyapētane pajamatabēcuenelivaisi xaina palivaisi bajayata Moiséspijinē tsipaebabiaba. ¹⁷ Vajatuxanenē Jesucristobeje, Espiritu Santobeje, najamatabēcuenējēpabeje. Jesucristo pejamatabēcueneta Espiritu Santo ponapona vajajamatabēēthētota. Nexata Espiritu Santo nacajamatabēcueneyavenonapona pibisiacuene vajaexanaeyaniva. ¹⁸ Nexata Jesucristo pejamatabēcueneta, Espiritu Santo nacayavenona. Nexata pacuenia Moiséspijinē jivi vecuanaitabaraacata pitabaracotiaeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajētsiaya jinavanapatsi xaniavaetsia jivi peyapētaenexa Dioso ayajamatabēcuenepexinaejava. Espiritu Santo nacajamatabēcueneyavenonapona vajavajēnaeyabelia pejanajamatabēcuenepaxainaponaenexa. Nexata pacuenia Jesucristo jamatabēcuenetsi, bajara vaxaitsi ata vajajamatabēcuenetsinexa.

4 Dioso baja cajena patanitaxutotsoniataexae, panetocopata patatsipaebabiabinexa jivijavabelia

pexanialivaisi, Jesucristo pelivaisi. Bajaraxuata itsajavata panetsiyai tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tsi-paji baja Dioso panetocopata bajarapacuenia. ² Muetsia apo paexanaenë itsacuenejava ata. Apo paexanaenë daxita xua piauracuene ata. Jivi patayamaxëitojorobinexa, itsacuenejava ata apo paexanaenë. Apo patsipaebabiabinëua saicayalivaisi Dioso pejumelivaisivecua. Dioso baja cajena yapëtane jivijavabelia ëpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. ³ Itsa patsipaebabiabajë jivi pecapanepaelivaisinexatsi, jumenapebetsiaya patsipaebabiabajë xaniavaetsia patanejumeyapëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. ⁴ Bajarapacuenia apo jumecovënëtsi tsipaji dovathi pejamatabëcueneta ajamatabëcuenëitaquiriayaexanatsi pejumecovënëtsiyaniva bajarapalivaisi. Bajarapapexanialivaisi, Cristo pelivaisi, bepiniicotia jivi pejamatabëcuenëitayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcuenëitayotsiyanivatsi. Cristo paxa Dioso jamatabëcuenëjëpa. Nexata pacuenia Dioso jamatabëcuenëitsi, bajara Cristo ata jamatabëcuenëitsi. ⁵ Livaisi itsa pacatsipaebabiabatsi, paxanë apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxanë saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi. ⁶ Bajayata Dioso mapanacuaje itsa exana, pitaquirijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabëcuenëaitaquirijavami, Jesucristo pelivaisi itsa pajumecovënëtajë, Dioso panejamatabëcuenëitayota. Bajarapacuenia itsa panejamatabëcuenëitayota, payapëtaniji Dioso bitso ayaijamatabëcuene pexainaejava. Jesucristo itsa itabaranivenivena Dioso pexëntaxae, paxa Dioso jamatabëcuenëitajëta Dioso bitso ayaijamatabëcuene pexainaejava.

Pacuenia Dioso jamatabëcueneyavenona pijajivi, itsa tonacuenebavanapatsi, yabara pelivaisi

⁷ Paxanë Dioso patanejamatabëcuenëitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaeaxae, pajamatabëcuenesaënë tsavanapae. Nexata bajarapacuenia pataajamatabëcuenesaë tsavanapaejava patanetaevi, jamatabëjumai tsane paxanë yabara: "Mapamonaeje ajamatabëcuenesaë tsavanapae Dioso pesaëta," jamatabëjai tsane. ⁸ Nexata panetocopiapatabiabi ata itsacuene patanetoyapëbejecuene, itsiata Dioso paneyavenonabiaba patavecuapanepaenexa bajarapacuenia. Apo payapëtaeyabiabi atanë paja-

matabëcuene yabara panetocopiapata patanetoyapëbejecuene, itsiata paxanë apo pacopatsinë Dioso patajumecovënëtsijava. ⁹ Itsamonae panebejio-biaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenetaabiabi ata patanebejejebinexa picani, itsiata pepacuene apo panebeyaxuababiabi Dioso pataneyavenonabiabixae. ¹⁰ Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixanë, itsamonae jamatabëpanebejejebabiaba picani. Itsiata apo panebejejebicanepae. Bajaraxuata daxita jivi yapëtane Jesús pataneyavenonabiabijava. ¹¹ Daxitamatacabi patajinavanapaematacabianë, panetsiyai tsabiabi itsamonae patanebejejebinexa Jesús papijajivixanë. Bajarapacuenia panetocopiapatabiabi jivi pataneyapëtaenexa Jesús pataneyajavaponapaejava. ¹² Panetsiyai tsabiabi itsamonae patanebejejebinexa patacatsipaebabiabixae papeccapanepaelivaisinexa Diosojavabelia. Nexata paxanë patacatsipaebilivaisi panejumecovënëtsixae, itsamatacabi athëbëtatsia Dioso pacarajutsiana matacabi apo peverevereaejava.

¹³ Dioso pejumelivaisibaxutota jumaitsi mapacueniaje: "Jumecovënëtajë Dioso taneyavenonaejavanexa. Bajaraxuata tsipaebajë jivijavabelia Dioso taneyavenonaejavanexa," jai. Bajara pijinia pacuenia paxanë ata pajamatabëcuenëitsinë. Pajumecovënëtajë Dioso pataneyavenonaejavanexa. Bajaraxuata patsipaebabiabajë jivijavabelia Dioso pataneyavenonaejavanexa. ¹⁴ Vajatuxanenë Jesús petëpaecujinae Dioso icatsia asaëyaexanatsi. Bajaraxuata payapëtaniji baja pexaniajaicuene Dioso icatsia paxanë ata pataniasaëyaexanaejavanexa patatëpaecujinae, Dioso patayajavajinavanapaenexa pijanacuatatsia. ¹⁵ Paxanë itsamonae panebejio-biaexanabiabi ata, itsiata apo pacopatsinë patacatsipaebabiabijava pexaniajailivaisi. Nexata panevajënaeyabelia pajumecovënëtaaponame patacatsipaebilivaisi. Nexata baja itsa paayaibitsaëtomë tsaponae Dioso panejumecovënëtsivi, paayaibitsaëtomë baja pijinia tsaponae Diosojavabelia panejumaitshivinexa: "Xanepana rabaja. Tsi-paji bitso pexaniacuene panetoexaname," panejaivinexa Diosojavabelia. Nexata papecajumetaevi ayaibitsaëto yapëtaena Dioso bitso ayaijamatabëcuene pexainaejava.

¹⁶ Bajaraxuata itsamonae panebejio-biaexanabiabi ata, itsiata apo pajamatabëcopatsinë jivi patatsipaebabiabijava pexaniajailivaisi. Pataperabëto cueranaponae ata, itsiata patavajënaeyabelia, caematacabicanacujitsia, pajamatabëcuenesaënë tsaponae Dioso patajumecovënëtsijava. ¹⁷ Xua nacatocopiapatabiabi itsamonae vajanacabejio-biaexanabiabinexa, saya caeepatoyo bajarapacuenia nacabejio-biaexanabiaba mapanacuataje vajajinavanapaepatoyo. Bajaraxuacujinae athëbëtatsia xainanatsi daxitacuenevecua pexaniajava, baitsi matacabi apo peverevereaejava. ¹⁸ Nexata apo vajënaeevetavanapaetsi vajanacatocopiapatsinexa, xua nacacajëpa vajataenexa. Biji rajane ja-

matabënjavanapatsi vajanacatocopiapatsinexa xua apo nacacaëjêpae vajataenexa. Tsi-paji xua nacacaëjêpa vajataenexa, daxita bajaraxua, vereverecaena. Itsiata baitsi jane xua apo nacacaëjêpae vajataenexa, daxitamatacabijavabelianexa apo vereverecae tsane.

5 Mapanacuata jivi pexanaebobërëto bepïjia baabeje. Bajara pijinia itsi vajaperabëto ata. Bepïjia vereverecaena. Itsiata baitsi jane yapëtanetsi mapacueneye. Vajatëpaecujinae itsamatacabi Dioso athëbëtatsia nacarajutsiana apo pevereverecaeperabëtonexa. ² Xaniajai cajena. Itsa abaxë jinavanapatsi mapanacuataje, bitso picani jitsipabiabatsi vajanacaperabëithianaenexa athëbëpijiperabëtonexa. Jitsipabiabatsi picani vajaponaenexa athëbëabetsia pejanaperabëto vajayajavajinavanapaenexa athëbëtatsia. ³ Athëbëtatsia raja aperabëjibia apo jinavanapae tsanetsi. Biji rajane pejanaperabëto yajavajinavana-paenatsi. ⁴ Itsa abaxë jinavanapatsi mapanacuataje, bitso picani jitsipabiabatsi vajanacaperabëithianaenexa. Apo jitsipaetsi picani vajatëpaejava. Itsiata baitsi jane yapëtanetsi mapacueneye. Vajatëpaecujinae itsamatacabi athëbëtatsia yajavajinavanapaenatsi pejanaperabëto, apo pevereverecaeperabëtonexa jane baja. Nexata mapanacuata vajayajavajinavanapaeperabëtomi ajibi baja tsane. Xainaenatsi juya apo pevereverecaeperabëtonexa. ⁵ Bajarapacuenia vajanacaperabëithianaenexa Dioso nacatoxaina. Nexata Dioso nacatocopata Espiritu Santo vajanacayajavaponaponaenexa. Nexata Dioso yabara bejamatabëjumait-sitsi mapacueniaje: “Mapacueniaje Espiritu Santo Dioso pataneyajavaponaponaeyaexanaexae, nexata payapëtaniji xaniajai pepacueneye itsamatacabi Dioso pataneperabëithianaenexa. Xaniajai baja cajena. Pepacueneye itsamatacabi Dioso paneperabëithianaenapacuenia baja najumecapanepaeya jumaitsi,” bejamatabëjaitsi Dioso yabara.

⁶ Bajaraxuata apo jamatabëcopatsitsi vajajumecovënëtsijava Dioso. Vajavajënaeyabelia jamatabëcuenebarëyatsi. Yapëtanetsi mapacueneye. Itsa abaxë vajaperabëto yajavajinavanapatsi mapanacuataje, panacuata itsamatacabi vajatuxanenë daxitamatacabijavabelianexa yajavajinavanapaiejitsiatsi, bajarapanacua abaxë tajë vecuajinavanapatsi. ⁷ Apo taetsi abaxë athëbëtatsia vajatuxanenë vajayajavajinavana-paejavanexa. Itsiata yapëtanetsi itsamatacabi xaniajai vajatuxanenë athëbëtatsia vajayajavajinavanapaevanexa. ⁸ Bajaraxuata jitsipatsi vajatëpaejava. Tsi-paji mapanacuata vajajinavanapaevajava, matatoxenetsia bitso jitsipatsi vajatuxanenë pijanacuatatsia vajayajavajinavanapaenexa. ⁹ Bajaraxuata mapanacuata vajajinavanapaematacabibeje, asaëyata vajatuxanenë tonacuenebavanapatsi. Tsi-paji jitsipatsi vajanacasivajamatabëcuene barëyajava. Vajatëpaecujinae ata, pijanacuatatsia jamatabëtojinavanapatsi pejitsipaecuenia. ¹⁰ Vajatuxanenë pejitsipaecuenia jamatabëtojinavanapatsi mapanacuata ata vajajinavanapaepato. Tsi-paji caejivitsi canacujitsia Cristo pitabarata tonaitajëtaponaenatsi. Nexata bajarapamatacabi nacarajut-

siana daxita pijajivitsi xua nacatoxaina vajanacara-jutsinexa. Xaniavaetsia vajatuxanenë itsa tonacuenebavanapatsi, nacarajutsiana xua nacatoxaina vajanacarajutsinexa. Pamona xaniavaetsia apo tonacuenebavanapae, nacueratsiana.

Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi

¹¹ Payapëtaniji baja cajena itsamatacabi vajatuxanenë pitabarata cjunaviaya patananubenaevanexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejumecovënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtanepacuenia pajamatabëcueneitsinë. Pajitsipajë paxamë ata patanejamatabëcueneyapëtaenexamë. ¹² Bajarapacuenia paxanë apo pacanavajunupaebitsi saya pataneyaiy-ataenexamë. Pacanavajunupaebatsi rajane pataneyapëtaenexamë vajatuxanenë papijajivicuenenë. Nexata bajarapacuenia paxamë papecajamatabëcuenecaëjêpaenexa panejumecanaviatsijava pamona pibisiacuenia panebaracuaicuaijai. Bajarapamonae paneyalivaisiaexanabiaba. Beayaijamatabëcuenevi nataeyabiaba. Pexaniacuene exanabiabi ata, bajaraxua exanabiaba saya jivi petaenexatsi. Itsiata baitsi jane bitso naneconita Diosojavabelia pibisiacuene pexanaeneconi yabara. Apo canaëjëtsi pexaniajamatabëcuene pexainaenexa. ¹³ Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemabivitsi raja saya,” panejai tsabiabi. Itsiata itsa pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë bepatanematajemabivi. ¹⁴ Cristo raja paneasiva tsabiabi. Bajaraxuata patonacuenebavanapajë. Pajamatabëjumait-sinë tsabiabi: “Caenë Cristo nacasivatëpa daxitanexatsi. Bajaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepaevi Dioso nacatane,” pajamatabëjanë tsabiabi. ¹⁵ Cristo jivi sivatëpa. Petëpaecujinae Dioso icatsia asaëyaexanatsi. Nexata daxita pamona jumecovënëta Cristo pesivatëpaejavatsi, matacabi apo pevereverecaejava xainaena. Nexata bajarapamonae apo bexanavanapae pijacuata penatojitsipaecuenia. Biji rajane bexanavanapa pacuenia Cristo tojitsipatsi pesivajamatabëcuenebarëyanexatsi. ¹⁶ Bajaraxuata ajena mapamatacabijavaveliacujinaeye, patavajënaeyabelia tsaponae, Dioso pejumecovënëtsivi yabara apo bepanajamatabëxainanenë pibisiacuenia, pacuenia Dioso apo pejumecovënëtsivi banajamatabëxaina. Tsi-paji pamona Dioso pejumecovënëtsivi pacuenia bëpënëaverena jamatabëcueneitsi, apo pajamatabëcueneyapëtanë. Xanë ata rabaja picani Jesucristojavabelia tanajamatabëcuene copatsivajënaeya, Jesucristo yabara najamatabëxainajë pibisi-

acuenia, pacuenia banajamatabëxaina Dioso apo pe-jumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuenia apo najamatabëxainaenë Cristo yabara. Tsipaji baja yapë-taniji Cristo pexaniajainëcuene. ¹⁷ Pajivi najamatabëcuenecopata Jesucristojavabelia, bajarapajivi xaina pejanajamatabëcuene. Pijaperujamatabëcuenemi baja vecuaajibiaexanatsi. Nexata bajarapajivi daxitacuene sivanajamatabëxaina pexaniajamatabëcuene-ta.

¹⁸ Daxitatsi Dioso pejanajamatabëcuene nacarajuta. Dioso nacabarajamatabëcuenexanepana Cristo vajanacasivatëpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonae ata itsa jumecovënëta, Dioso pebarajamatabëcuenexanepanaenexatsi. ¹⁹ Nexata Cristo cruzata itsa sivatëpa manacuapijivije, Cristo pesivatëpaexaetsi, Dioso barajamatabëcuenexanepanaeaya tanetsi daxita pamonaee jumecovënëta Cristo pesivatëpaejavatsi. Paneconi picani bajarapamonae xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajaralivaisi Dioso panetocopata patatsipaebanajetarubenaenexa jivijavabelia. ²⁰ Nexata paxanë Cristo papijajivinë tsanajetarubenaee. Cristo baja cajena pejamatabëcueneta, papatajë paxamëjavata patacatsipaebinexa pexanialivaisi. Pacuenia Dioso itsa patsipa, pacamuxujobijsipa, bajarapacuenia xanë ata pacamuxujobatsi Cristo papecasivatëpaexae panijaneconi yabara Dioso papecabarajamatabëcuenexanepanaenexa. ²¹ Cristo pibisiacuene apo exanae, tsiquirijavayo ata. Itsiata baitsi jane Cristo Dioso tsijumaxuabatsi daxita vaxaitsi vajaneconimi. Nexata vajaneconi yabara Cristo bepibisiacuene pexanaenëcuenia cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneonijibia nacatane itsa jumecovënëtatsi Cristo vajanacasivatëpaejava vajaneconi yabara.

6 Dioso pataneyajavanacuenebixae, asaëyata pacamuxujobatsi. Dioso pinijicuenia papecaitaxutotsoniataejava, pacatsipaebatsi panejumeeabiyaniiva. Itsa pajumeeabijitsipame, nexata Dioso nacueratsipa papecaitaxutotsoniataejava. ² Tsipaji Dioso jivi pitaxutotsoniataejavanexa, tajëvelia Dioso pejumelivaisibaxutota jumaitsi mapacueniaje:

Pamatacabi jivi itaxutotsoniataenajë, cajumetaenatsi. Nexata pamatacabi jivi capanepaenajë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacapanepaenexa jane baja.

³ Itsa patonacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeeabiyaniiva Dioso pejumelivaisi itsa patsipaebajë. ⁴ Biji rajane daxita xua paexanavanapajë, xa-

niavaetsia patsitaexanavanapajë jivi pataneyapëtaenexa Dioso papijajivicueneenë. Itsamonae panebejiobiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiayai tsabiabi itsamonae patanebeyejebinexa. Bajarapacuenia panetsiayai tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. ⁵ Itsajavata panejumetibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexanaenexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patsipaebavanapaejava. Nexata jivi paneyapëtane Dioso papijajivicueneenë. ⁶ Dioso papijajivicueneenë jivi pataneyapëtaenexa, jivi patsitajinavanapajënua mapacueniaje. Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuenia. Bajayajebi itsamonae pibisiacuene paneexanabiabi ata, apo pacueneacanaviatabiabinënua. Pexaniacuene patoexanabiabajënua itsamonaejavabelia. Patsitajinavanapajënua pacuenia Espiritu Santo paneyapëtaeayaexanapona Espiritu Santo patanetsijamatabëecaexae. Patsitanajamatabëcuene itajëtavanapajënua itsamonae ata pataasivajava patajamatabëëthëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicueneenë. ⁷ Dioso papijajivicueneenë jivi pataneyapëtaenexa, patsitajinavanapajënua mapacueniaje. Ëpexaniajailivaisi jivi patsipaebabiabajë. Patsitanacueneitajëtavanapajënua daxita xua paexanavanapajë, Dioso pataneyavenonabiabijava. Dioso baja aneonijibia patanetaexae, Espiritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espiritu Santo patacueneamoneyabinexa dovathi. Bajarapacuenia patatsitajinavanapaexae, jivi paneyapëtane Dioso papijajivicueneenë. ⁸ Itsamonae paneyaiyataeyabiabi. Itsamonae pijinia apo paneyaiyataeyabiabi. Itsamonae pexaniacuene panebaracuaicuaijai tsabiabi. Itsamonae pijinia pibisiacuene panebaracuaicuaijai tsabiabi. Itsamonae panetaeyabiaba pexaniajailivaisi patatsipaebivicuene. Itsamonae pijinia panetaeyabiaba bepatanajumetsënëtsivi. ⁹ Itsamonae pataneyapëtaevi ata, itsiata apo bepataneyapëtaevi panetaeyabiaba. Itsajavata itsamonae jamatabëpanebeyejebabiaba picani. Itsiata tsiteca asaëya bajarapalivaisi patsipaebavanapajë. Dioso baja cajena panetocopata itsamonae ayaicuenia patanebejiobiaexanabiabinexa, itsiata apo patanebeyejebinexa. ¹⁰ Panajamatabëxainabiabi atanë bitso itsamonae pibisiacuene pexanaejava yabara, itsiata bëpënëa pepacuene pajamatabëcuenebarëyanë

tsavanapae daxitamatacabijavabelianexa. Patabejiobivi picani. Itsiata jivi ayaibitsaëtoxonetonë ricovi paexanaponajë Dioso pejumelivaisi patatsipaebijamatabëcueneta pejumecovënëtsixae. Apo paxainaenë picani mapanacuapijicuene. Itsiata baitsi jane Dioso-javabelia daxitacuene paxainajë, apo peverevereceaevanexa jane baja.

¹¹ Tajamonae, paxamë paCorinto tomarapijivimë, pacanajamatabëcuene vajunupaebatsi baja cajena roviaia. Apo pacavecuanaajamatabëcuene matayatsitsi.

¹² Asivaya pacatae atatsi, paxamë itsiata bajarapacuenia asivaya apo panetaemë. ¹³ Pacuenia pexi pexainaenë asaëya banacoximuxujioba, bajara pijinia pacuenia paxanë ata pacamuxujiobatsi. Paxamë ata panejamatabëcuenevetsina asivaya panetaema pacuenia baja paxanë asivaya pacatanetsi.

Pacuenia piasaëtsaponaponaenë Dioso nacatane bepijatemplobotsi tsavanapae yabara pelivaisi

¹⁴ Dioso apo pacatojitsipae mapacuenije. Paxamëyajuvenëva, Dioso pejumecovënëtsiva, pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso apo pejumecovënëtsiva. Bajayajebinexa ata pëtme Dioso apo pejumecovënëtsivi. Tshipaji apo pacajamatabëcuenejëpae tsipae. Dioso pejumecovënëtsivi apo jamatabëcuenejëpae Dioso apo pejumecovënëtsivi. Tshipaji Dioso jivi pejamatabëcuene itayotsijamatabëcuenetsi, mapanacuata pitaquirijamatabëcuenebeje, apo najamatabëcuenejëpaebeje. ¹⁵ Cristobeje dovathibeje apo najamatabëcuenejëpaebeje. Nexata pijinia pajivi Dioso pejumecovënëtsijivi, Dioso apo pejumecovënëtsijivibeje, acuenebi bajayajebi penajuanacuenebaponaponaenexabeje. Tshipaji apo najamatabëcuenejëpaebeje.

¹⁶ Bajara pijinia navecuaitsebeje Dioso pijatemplobobeje, jumapecataeaya pexanaenëanë penubenaetemplobobeje. Apo najamatabëcuenejëpaebeje. Vaxaitsi baja cajena piasaëtsaponaponaenë Dioso, nacatane bepijatemplobotsi tsavanapae. Bajarapacuenia nacatane tshipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bajarapajamatabëcuene yabara bajayata Dioso vaxaitsi yabara tajëvelia jumaitssi mapacueniaje:

Tsijamatabëcaenajë bajarapamonae tayajavaponaponaenexa. Bajarapamonae pijaDiosonë tsane. Bajara pijinia pamonaenë tajajivi tsane,jai Dioso bajayata tajëvelia vaxaitsi yabara.

¹⁷ Bajaraxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaitssi mapacueniaje:

Pamonae tuatuajëta pajinavanapaename, pavecuapitsapaename. Bajarapamonae navecuatsatsia pajinavanapaename. Paxamë pëtsa pibisiacuene panaexanaename bajarapamonaeta papecajamatabëcuene bijianaeyaniva. Nexata xanë pacasivabarëya tsanetsi.

¹⁸ Paneaxanë tsane. Nexata daxita paxamë pataximë

tsane,jai bajayata vajatuxanenë Dioso tajëvelia vaxaitsi yabara, daxitacuene pevetsinë.

⁷ Tajamonae bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitssi pexicueniatsi vajanacataenexa, yapëtanetsi baja. Bajaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthëtota pibisiajamatabëcuene vajanajamatabëxainabiabijavami ata, copatsianatsi baja. Dioso yaiyataeya jinavanapaenatsi Dioso vajanacatojitsipacuenia.

Pacuenia Pablo sivajamatabëcuenebarëya Corinto tomarapijivi yabara pelivaisi

² Panetsitanajamatabëcueneitajëre pataniasivajavamë. Caejivi ata paxamëyajuvenëjivi apo pacayajuvenëtsacueniabitsi. Apo pacayajuvenë jamatabëcuenebijianaetsinua. Apo pacayajuvenë yamaxëitojorobitsinua bajarapacuenia panijapalata patacavecuapitsinexa. ³ Itsa pacajumaitssitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitssitsi, daxita matacabijavabelianexa asivaya pacajamatabënjabinabiabatsi. ⁴ Payapëtanijinua caejamatabëcuene panenajamatabëxainaejava. Bajaraxuata bitso pacasivajamatabëcuenebarëyatsi. Paepatota ata itsamonae panebejiobiaexanabiaba, apo panasivabëjanë tsabiabi. Tshipaji bajarapaepatota itsa pacavënëlvaisitaeyabiabatsi xaniavaetsia panejinavanapaejava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

⁵ Macedonia nacuata patapatsicujinae, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajë, paneyalivaisiaexanabiaba. Nexata itsa panayajumetaeyabiabajë itsacuenelivaisi, patajamatabëëthëtota bëpënëa payajunavijavanapabiabajë. ⁶ Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bajarapacuenia Dioso panejamatabëcueneasaëyaexana paxamëjavaverena peponaenë, Tito, itsa patajopa paxanëjavata. ⁷ Tito pepatsixae paxamëjavaverena, panejamatabëcueneasaëyaexana. Itsiata Tito ëpepatsijava, apo panejamatabëcueneasaëyaexanae. Biji rajane Tito paxamëjavabelia itsa patajopa, paxamë pina Tito pajamatabëcueneasaëyaexaname. Bajarapacuenia paneexanaejava, Tito itsa pacavajunupaeba paxanëjavaberena, pamuxunanajamatabëcueneasaëtajä. Bitso pina picani jamatabëpanetaneme. Bajarapalivaisinua Tito panetsipaeba. Panetsipaebanua bitso paneyanajamatabëxainaejava pibisiacuene paneexanaeneconi. Panetsipaebanua bitso patanesivanajamatabëxainaejavamë itsa panevënëlvaisitaneme bitso patacasivanajamatabëxainaejava. Bajarapacuenia paneexanaejava, Tito itsa pacavajunupaeba paxanëjavaberena, bitso pamuxunanajamatabëcuenebarëyanë.

⁸ Pabaxutomi copiaya pacatoyaquinatsi, itsa palebame, bitso pacanamatabëxainaeaexana. Itsiata saya caeepatoyonexa. Bajarapacuenia papecanajamatabëxainaeaexanaexae, bajarapabaxutomi yabara jamatabëjumaitsinë mapacueniaje: “Apo betoyaquinaenë picani bajarapabaxutomi,” jamatabëjanë. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabëxainaeenë. ⁹ Aeconoxae baja sivabarëyanë patacatoitobixae bajarapabaxutomi. Itsiata apo sivabarëyanë xua pacanamatabëxainaeaexanatsi panijaneconi yabara. Biji rajane sivabarëyanë tsipaji patacanajamatabëxainaeaexanaejavata bajarapabaxutomita, pacopabame baja pibisiacuene paneexanabiabijava. Panajamatabëcuenepënëyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabëcueneta, pacajamatabëcueneyavenonatsi. ¹⁰ Nexata pacuenia Dioso pacatojitsipa, bitso payanajamatabëxainame panijaneconi. Nexata baja pacopabame pibisiacuene paneexanaejavami. Panajamatabëcuenepënëyorotame baja Diosojavabelia. Nexata paxamë Dioso pacapanepaena. Pamonae Dioso capanepaenatsi, apo jumaitsi tsane: “Apo jitsipaenë picani Dioso tanecapanepaejava,” apo jai tsane. Itsiata baitsi jane pamonae yanajamatabëxainavanapae ata pibisiacuene pexanaeconi, itsiata itsa apo copabi tsane pibisiacuene pexanabiabijava, itsa apo najamatabëcuenepënëyorotasi Diosojavabelia, bajarapamonae Diosovecua naxubiana daxitamatacabijavabelianexa. ¹¹ Panajamatabëcuenecanaëjère mapacuenieje. Pacuenia Dioso pacatojitsipa, bitso paxamë payanajamatabëxainame panijaneconi. Nexata baja aeconoxae paneconijibimë Dioso pitabarata. Najamatabëcuenereviabiaya baja pacanaëjëtame panijaneconi. Pepacuene panavajunupaebamenua Diosojavabelia pacuenia paexanavanapame. Paxamë picani bitso pabaraanaepanabiabame paxamëyajuvënënë, ponë pibisiacuene exanaponapona paxamë tuatuajëta. Panecujunavabiabamenua picani bajaraponë pijaneconi yabara. Itsiata bitso pajitsipame paneexanaenexa Dioso papecatojitsipaecuenia. Pasivanajamatabëcuenerevetamenua pananeconitsiaexanaenexa paxamëyajuvënënë, ponë pibisiacuene exanaponapona paxamë tuatuajëta. Bajarapacuenia itsa pasivanajamatabëxainame pibisiacuene pexanaponaponaenë, Dioso patsitanajamatabëcueneitajëtame Diosojavabelia apo pananeconitsijava. ¹² Itsa pacatoyaquinatsi copiaya pabaxutomi, pacatoyaquinatsi padaxitamë patacamuxujobinexa. Apo toyaquinaenë caenë paxamëyajuvënënë tamuxujobinexa, ponë pibisiacuene exanaponapona paxamë tuatuajëta. Apo toyaquinaenë nua tamuxujobinexa ëponë ata pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneyapëtaenexa juya pata-

niasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivajamatabëcuenenabarëyanexa. ¹³ Nexata baja panejumecovënëtame. Bajarapacuenia patanejumecovënëtsixae aemë, bitso pacasivajamatabëcuenenabarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanapaxae, apo pacasivanajamatabëxinae baja. Bajaraxuata pacasivajamatabëcuenenabarëya Tito. Nexata Tito papecasivajamatabëcuenenabarëyajava yabara, paxanë ata bitso pacasivajamatabëcuenenabarëyatsi. ¹⁴ Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebianaxa Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenenabarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenenabarëyatsi. ¹⁵ Tito najamatabënapitabiaba panejumecovënëtabiabiabijava pacuenia pacaitoroba. Najamatabënapitabiabanua yayataeya panecopiapitsijava ata. Bajaraxuata Tito bitso pacaitaxanapona pevajënaeyabelia. ¹⁶ Pacasivajamatabëcuenenabarëyatsi. Tsipaji xaniavaetsia yapëtanijivi paneexanavanapaejava pacuenia Dioso pacatojitsipa.

Pacuenia Dioso pejumecovënëtsivi penajamatabëcuenenarajutsixae Diosojavabelia, ofrenda tojeba Diosonexa yabara pelivaisi

8 Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneyavenonatsi Dioso pejumecovënëtsivi, Macedonia nacuapijivi. ² Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcuenenarajutsixae, itsiata jamatabëcuenenabarëya tsavanapae. Bajarapamonae bitso bepejiobivi picani. Itsiata ofrenda itsa exana petoitobinexa bepejiobivi Jerusalén tomarapijivijavabelia, ayaijava jebabiaba. ³ Xanë yapëtanijivi bajarapamonae bepejiobivicuene. Itsiata bepejiobivi ata, ayaijava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaijava pejebinexa. ⁴ Bajarapamonae pinijicuenia paneitoroba patatocaponaenexa pejebiofrenda. Panajumaitsi mapacueniaje: “Pexaniacuene panetoexanaename. Panetocaponaename mapaoofrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. ⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaijava jeba. Bajarapamonae ëofrenda apo rajutsi Diosojavabelia. Biji

rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponæenexa bepejiobivijavabelia. Bajarapacuenia itsa exana, exana Dioso petojitsipaecueniatsi. ⁶ Paxamë, pa-Corinto tomarapijivimë, paofrenda paxamë ata pacætuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcuenyavenona panæcaetuatsijava. Itsiata abaxë apo paveretsimë panæcaetuatsijava. Bajaraxuata æconoxæ baja icatsia Tito paitorobajë paxamëjavabelia paneveretsinexa jane baja bajarapaofrenda panæcaetuatsijava. ⁷ Paxamë itsamonaævecua xaniavaetsia Dioso patojinavanapame. Xaniavaetsia panajamatabëcueneocopatame Diosojavabelia. Payapëtanemua xaniavaetsia Dioso pejumelivaisi. Pacacæjëpanua xaniavaetsia Dioso pejumelivaisi panæcispæbinexa itsamonaæ. Bitso pacajamatabëcueneenabianua Dioso pijacuene panetonacuenebavana-pænexa. Bitso paneasivamënua. Nexata paneyavenonaenexa bepejiobivi, Jerusalén tomarapijivi, ayaijava bepajebame ofrenda itsa pæxaname.

⁸ "Macedonia nacuapijivi, bepejiobivi ata, ayaijava ofrenda jeba," itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya toexana ofrenda bepejiobivi peyavenonaenexa. Bajarapacuenia paxamë ata itsa pæxanaenexa, itsamonaæ patsitanajamatabëcuene itajëtsianame panexaniajaicuene Dioso paneasivajava. ⁹ Bajarapacuenia paxamë ata ofrenda parajutsianame. Tsipaji payapëtaneme pacuenia vajatuxanenë Jesucristo nacayavenona vajanacæasivaxæ. Bajaraponë picani ayaijamatabëcuenenë. Daxitacuene pevetsinë. Itsiata pæcaasivaxæ, nabejiobiaexana pæpecayavenonaenexa. Bajarapacuenia pæpecasivanabejiobiaexanaæxæ, nexata paxamë ata itsamatacabi paayaijamatabëcuenevimë tsane Dioso pijanacuatsia.

¹⁰ Pacatsipaebatsi paneyapëtaenexa pacuenia panetsitanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. ¹¹ Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia æconoxæ ata tsiteca pæxanare paneveretsinexa jane baja palata panæcaetuatsijava bajarapaofrendanexa. Parajutsianame pacuenia pacacæjëpa. ¹² Nexata itsa pepacuene parajutsianame pacuenia pacacæjëpa, Dioso pacasivajamatabëcuenebarëya tsane. Tsipaji apo pacaitorobi xua apo paxainaemë panerajutsinexa.

¹³ Apo pacaitorobitsi raja mapacueniaje: "Itsamonaæ paneyavenonaenexa, ofrenda itsa pæxaname, pabuaræ daxita panexainaepalatayomi," apo pacajaitsi. Tsipaji juya paxamë panamatavenonaæjitsipame. ¹⁴ Jit-

sipatsi namataenetsia vajanayavenonaenexa vajanamataavenonaæjavaxi yabara. Aæconoxæ baja pacacæjëpa paneyavenonaenexa bepejiobivi, Jerusalén tomarapijivi. Itsamatacabijavabelia, pamatacabi paxamë panamatavenonaenexa, cæjëpaenatsi juya bajarapamonæ pæpecayavenonaenexa. Bajarapacuenia nexata daxita paxamë panenamataavenonaæjavaxi, apo panamatavenonaemë tsane. ¹⁵ Bajarapajamatabëcuenelivaisi yabara Dioso pejumelivaisibaxutota jumaitsi mapacueniaje: "Itsajivi bitso ayaijava xinaæ ata, itsiata apo toyajuvënënacopsatsi. Itsajivi pijinia tsiquirijavayo xinaæ ata, itsiata apo namatavenonaæ," jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame penamatavenonaævijavabelia.

Pacuenia Tito, anijanëbeje yajava, pona Corinto tomarabelia yabara pelivaisi

¹⁶ Xanë bitso jitsipajë paxamë patacayavenonaenexa. Tito ata bajarapacuenia jitsipa pæpecayavenonaenexa. Bajaraxuata pexaniajamatabëcuene rajutajë Diosojavabelia. Tsipaji Espiritu Santo pejamatabëcueneta Titobeje panajamatabëcuenejëpajëbeje paxamë yabara.

¹⁷ Nexata Tito itorobajë pæpecataenexalia, pæpecayavenonaenexanua bajarapaofrenda panæcaetuatsijava paneveretsinexa baja tavajënaelia. Barëyaya Tito jejai peponaenexa paxamëjavabelia. Bajaraponë ata pijacuata pejitsipaæxæ peponaæjava paxamëjavabelia, ponaena pæpecayavenonaenexa.

¹⁸ Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi. Peyaiyætaenëtsinua. Tsipaji xaniavaetsia tsipaebabiaba Dioso pejumelivaisi jivi pecapanepaelivaisinexatsi. ¹⁹ Ponë, Tito yajava, ponaæjitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponænajë Jerusalén tomarajavabelia, bajaraponë payajavaponaenajë. Nexata paofrenda pacaponæjitsianë, bajaraponë paneyavenonaeyacaponæna. Bajarapaofrenda pacaponænajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajënua patajitsipæjava patayavenonaenexa pamonaæ bepejiobivi. Nexata bajarapamonæ jamatabëjumai tsane: "Matsaena pamonaæ jitsipa peyavenonaenexa bepejiobivije," jamatabëjai tsane. ²⁰ Bajarapacuenia Macedonia nacuapijinë payajavaponaenajë itsajivi ata patanæbaracuaicuaijayaniva bajarapapalataxaneto yabara. "Pablobana raeta bajarapapalata yajuvënëcopata," patanæjayaniva. ²¹ Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata patanæyapëtaenexa apo patanacobetoxotsivicuene.

²² Titobeje icatsia itsanë patsicueyaitorobajë Dioso pejumecovënëtsinë peyajavaponaenexabeje paxamëjavabelia. Bajaraponë anijatonë pajamatabëcuenejëtabiabajë. Xaniavaetsia bitso

paneyavenonabiaba. Nexata aeconoxae paxamë bitso jamatabëpacayavenona. Tsipaji pacavënëlivaisitane paneyavenonaejavanexa Jerusalén tomarapijivi. ²³ Nexata Tito yabara itsajivi itsa pacayanijobiana: “¿Detsa pacuenia maponë peponaponaenëje?” itsa pacajai tsane, pajumaitsimë tsane: “Pablobeje raja penajuaponaponaenëbeje. Bajaraponë Tito Pablo yavenonabiaba vaxaitsi juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaponaenëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaponaejavabeje jivi petaexae, nexata jivi yaiyatane Cristo pelivaisi,” pajamë tsane. ²⁴ Nexata bajaronëbeje itsa patsianabeje paxamëjavata, patsitanajamatabëcuene itajëtsianame paneasivajava bajaronëbeje. Nexata Dioso pejumecovënëtsivi, pamonaetorobatsibeje bajaraponëbeje, pacavënëlivaisitaena paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai tsane paxamë yabara: “Pacuenia baja Pablobana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

Ofrenda pecaetuatsijava Dioso pejumecovënëtsivijavabelia peyavenonaenexa yabara pelivaisi

⁹ Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipaenë picani icatsia patacatoyaquinaenexa bajaraxua yabara. ² Tsipaji baja yapëtanijipacuenia bitso jamatabëpayavenoname bajarapamonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi itsa pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaiBITSaëtoXaneto tocaetuatapona ofrenda peyavenonaenexa Jerusalén tomarapijivi. ³ Nexata pacatoitorobatsi Titobana papecayavenonaenexa paneveretsinexa baja bajarpaofrenda panecaetuatsijava panerajutsinexa Jerusalén tomarapijivi. Tavajënaelia itsa apo paveretsimë tsipae ofrenda panecaetuatsijava, paxamë yabara pexaniacuenia tajumaitisijava, najumecovëauranë tsipae Macedonia nacuapijivijavabelia. ⁴ Tsipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tsipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. ⁵ Bajaraxuata jamatabëjumaitsinë: “Titobana Corinto tomarabelia tavajënaeyabelia itorobianajë,” ja-

matabëjanë. Nexata Titobana pacajamatabëcuenyavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajararpaofrenda itsa paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo ëpatacaitorobixae.

⁶ Pacanaëjère mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava itsa parajutsianame itsamonaejavabelia, Dioso juya pacarajutsiana ayaijava. ⁷ Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tsipaji pajivi rajuta itsajivijavabelia jamatabëcuenebarëyaya, Dioso asivat-si. ⁸ Dioso baja cajena caëjëpatsi papecarajutaponaeenexa pacuenia panamatavenoname matatoxenetsia. Nexata xua panamatavenoname, paxainaponaename. Pacatonacopatsiananua panerajutsinexa bepejiobivijavabelia. ⁹ Dioso pejumelivaisibaxutota jumaitsi mapacueniaje:

Ponë rajutabiaba bepejiobivi penamatavenonae-cuene, bajaraponë pexaniacuenia exanabiaba Dioso pitabarata. Nexata bajarapacuenia Dioso apo nacofënëtsi daxitamatacabijavabelianexa, jai Dioso pejumelivaisibaxutota.

¹⁰ Dioso rajuta jivi peubixunexa. Bajaraxuacujinae icatsia Dioso pejamatabëcueneta penaveretsixu capit-sapa penotsinexa jivi pexaejavanexa. Bajara pijinia pacuenia Dioso pacarajutsiana panexinaejavanexa, panerajutsinexanua bajaraxuayajuvënëjjava bepejiobivijavabelia. Pacacaëjëpaeyaexanaenanua ëpexaniacuenia ayaijava paneexanaenexa. ¹¹ Bajarapacuenia Dioso pacarajutsiana panexinaenexa ayaijava. Nexata pacacaëjëpaena bajaraxuayajuvënëjjava juya panerajutsinexa bepejiobivijavabelia. Nexata paofrenda panerajutame patatocaponaeenexa Dioso pejumecovënëtsivi, Jerusalén tomarapijivi, itsa parajutsianajë bajarapamonae, pexaniajamatabëcuene rajutsiana Diosojavabelia bajarapacuenia paneyavenonaexae. ¹² Bajarapacuenia Dioso pejumecovënëtsivi, bepejiobivi, itsa parajutame, payavenoname bitso penamatavenonaejavata. Bajarapamonae paneyavenonaejava itsa taena, pexaniajamatabëcuene Diosojavabelia perajutabiabijava pematatsënëa bitso pexaniajamatabëcuene rajutsiana Diosojavabelia. ¹³ Bajarapacuenia Jerusalén tomarapijivi ofrenda itsa parajutsianame paneyavenonaenexa, bajarapamonae patsitanajamatabëcuene itajëtsianame pepacuenia xaniajai panelumecovënëtsijava pexanialivaisi, Cristo pelivaisi. Nexata bajarapamonae pexaniajamatabëcuene rajutsiana Diosojavabelia Cristo pelivaisi panejumecovënëtavana-paejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi

pexaniajamatabëcuene rajutsiana Diosojavabelia.

¹⁴ Nexata bajarapamonae bitso asivaya pacajamatabë-najinaeya pacatovajëtabiabiana Diosojavabelia. Tsipaji paxamë bajarapamonae payavenoname Dioso pejamatabëcueneta papecaitorobixae. ¹⁵ Vaxaitsi pexaniajamatabëcuene rajutabiabatsi Diosojavabelia. Tsipaji Dioso pexënato athëbëvetsica nacatoitorobica vajanacasivatëpaenexa mapanacuataje. ¡Cristo vajanacasivatëpaejava pexaniacuene bitso!

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanëjava jivi petsipae-banajetarucaenexa yabara pelivaisi

10 Pacuenia Cristo pexaniacuena pacaitorobijitsipa, bajarapacuenia xanë ata pexaniacuena ajumesaëya pacaitorobatsi. Itsiata baitsi jane itsamonae paxamëyajuvënëvi xanë yabara jamatabëcuene navëxaniabiaya jumai tsabiabi: "Itsa abaxë Pablo tajë nacavecuaponapona, ajumelivaisisaëya nacatoyaquinabiabarena. Itsiata baitsi jane majotaje, vaxaitsijavata, itsa patajopaena, piaitejepaebinëcuena patajopaena. Ajumeljibia ponaponaena piamumeuraxae," jai tsabiabi paxamëyajuvënëvi xanë yabara jamatabëcuenenavëxaniabiaya. Itsiata bajarapacuenia apo itsinë tsane.

² Nexata pexaniacuene pacavajëtatsi. Pëtsa itsajamatabëcuene panetoexaname, itsa patsialiajë paxamëjavabelia, ayaijumeta pacabijataeya patacamuxujobiyaniva. Itsamonae paxamëyajuvënëvi xanë yabara jamatabëcuenenavëxaniabiaya jumai tsabiabinua:

"Pablo apo ponapona Dioso pejumecovënëtsinëcuena. Saya ponapona Dioso apo pejumecovënëtsinëcuena. Yajavaponapona pijaperujamatabëcuene," jai tsabiabi paxamëyajuvënëvi xanë yabara. Bajarapacuenia xanë yabara pecuaicuaijaittsabiabivijavabelia ayaijumeta bijataeya cuaicuaijanë tsane. ³⁴ Mapanacuapijivi, Dioso apo pejumecovënëtsivi, saicayacuena nayajiviyapëtane pijavajabitsaëvecua penaevetsinexa pitsacueniabiyantatsi. Vaxaitsi ata mapanacuata vajajinapanapaevi, Dioso vajajumecovënëtsivi, saicayacuena pijinia nayajiviyapëtanetsi vajanaevetsinexa dovathivecua. Dovathivecua apo naevetsitsi mapanacuapijicueneta. Pajamatabëcuenesaë Dioso nacarajuta, bajarapajamatabëcuenesaëta jamatabëcueneamoneyabaponatsi dovathi. ⁵ Nexata Dioso pejamatabëcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabëcueneta itorobatsi penajumetsënëtsilivaisi petsipaebabiabinexa itsamonaejavabelia. Nexata pamona Dioso yabara penajumetsënëtsivi, pajumecovënëtsiaexanaponajë Cristo pelivaisi Dioso pejamatabëcuenesaëta. Itsamonae pijinia dovathi pejamatabëcueneta beayaijamatabëcuenevi natane. Pamona bajarapacuenia najamatabëxaina, apo yapëtae Dioso. Bajaraxuata bajarapajamatabëcuenemi paajibiaexanaponajë baja. Nexata pamona ata bajarapacuenia beayaijamatabëcuenevi natane, pajumecovënëtsiaexanaponajë Cristo pelivaisi Dioso pejamatabëcuenesaëta. ⁶ Bajarapacuenia pax-

amëjava ata paexanaponaenajë. Paxanë panajamatabëcueneveretajë pataexanaenexa mapacueniaje. Paxamë baja xaniavaetsia Dioso itsa pajumecovënëtanaponaenexa, paxanë pacavecuacapitsapaenatsi pamona apo jitsipae patanejumecovënëtsinexa Cristo pelivaisi.

⁷ Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabëcueneitsinë. Pajivi nayapëtane Cristo pijajivitonëcuene, bajarapajivi beponeyapëtane paxanë ata Cristo papijajivicuene. ⁸ Paxamë meta xanë yabara pajamatabëjumaitsimë tsabiabi: "Pablo saya bitso navajunupaebabiaba Dioso pitapetsijavatsi apóstolenëxexa," pajamatabëjamë meta tsabiabi xanë yabara. Dioso baja cajena paneitoroba patacjamatabëcuene asaëyaexanaenexa. Apo paneitorobi patacjamatabëcuene faenaeyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë.

⁹ "Pablo saya nacajamatabëcuenenabenajacaeya exanabiaba vajanacatoyaquinaelivaisianëta," panejaijava xanë yabara apo jitsipaenë. Tsipaji bajaraxua yabara apo pacatoyaquinaetsi. ¹⁰ Itsamonae xanë yabara jumai tsabiabi: "Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi," jai tsabiabi itsamonae xanë yabara.

¹¹ Itsiata baitsi jane pamona bajarapacuenia jumai tsabiabi xanë yabara, beyapëtane pacuenia bajarapamonaejavabelia exanaejitsianë itsa papatsialiajë paxamëjavabelia. Pacuenia baja pacatoyaquinialitsi taexanaenexa paxamëjavabelia, bajarapacuenia exanaenajë paxamëjavabelia.

¹² Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaëjëtsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniajamatabëcuenevi. Nexata pamona apo bajarapamonaeyajuvënëvi, bepibisiajamatabëcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: "Maxuaje pexaniacuene," jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: "Maxuaje pibisiacuene," jai tsabiabi. Bajarapamonae cajena bitso apo yapëtae. Paxanë raja bajarapacuenia apo pajamatabëcueneitsinë. ¹³ Paxanë Dioso paneitoroba Dioso pijacuene patatonacuenebinexa. Nexata panacuanëjava Dioso paneitoroba, bajarapanacuanëjava Dioso pejumelivaisi patsipaebanajetarubenajë. Dioso paneitoroba tajë ata paxamë paCorinto tomarapijivimëjavabelia ata pataponaenexa patacatsipaebinexa pejumelivaisi. Nexata itsa panavajunupaebabiabajë Dioso patanitorobijava, xuayovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabiabinë saya itsamonae pataneyaiyataenexa patanavajunupaebijava yabara. ¹⁴ Bajaraxuata itsa papatajë

paxamëjavata, pacatsipaebatsi pexanialivaisi, Cristo pelivaisi. Tsipaji bajarapanacuanëjava Dioso paneitoroba pejumelivaisi patacatsipaebinexa. Bajarapalivaisi copiaya baja paxanë pacatsipaebatsi. ¹⁵ Itsamonae baja Cristo pelivaisi jumecovënëta itsamonae petsipae-bixaetsi. Nexata Cristo pelivaisi pejumecovënëtsivi yabara najumetsënëtsiaya apo pajumaitsinë tsipae mapacueniaje: “Paxanë raja patatsipaebixae, bajarapamonae jumecovënëta Cristo pelivaisi,” apo pajanë tsipae. Pacatojitsipatsi panevajënaeyabelia panejumecovënëtavanapaenexa Dioso. Nexata pajitsipajë orijibia patacatsipaebavanapaenexa pexanialivaisi, Cristo pelivaisi. Itsiata baitsi jane ëpanacuanëjava Dioso paneitoroba patatsipaebavanapaenexa pejumelivaisi, bajaraëpanacuanëjava patsipaebavanapaenajë. ¹⁶ Nexata paxamë majotaje patacatsipaebicujinae, panepënëyabelia penaetomaranëjava ata jamatabë-patsipaebajë pexanialivaisi, Cristo pelivaisi. Apo pajitsipae-në patatsipaebinexa bajarapalivaisi itsaxuayo baja patavajënaeya itsamonae tsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyaiyataenexa Dioso. Bajarapajivi apo benavajunupaebi pijacuata pexanaejava jivi saya peyaiyataenexatsi. ¹⁸ Pajivi pijacuata navajunupaebabiaba: “Xanë ra bitso pexaniacuene exanabiabajë,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenë jumaitsi: “Mara pajivije xaniavaetsia netoponapona,” jai, nexata tojumenamatamotatsi.

Pablo pelivaisi, penajumetsënëtsilivaisi petsipae-baponaevi ata, yabara pelivaisi

11 Natsiquejemalivaisi pecuaicuaijainë, xua exana, pijacuata banavajunupaeba itsamonaejavabelia. Bajara pijinia pacuenia xanë ata, xua exanajë, tajacua-ta pacanavajunupaebijitsiatsi. Bajarapacuenia tajacua-ta pacanavajunupaebi ata tsanetsi, itsiata jitsipajë xaniavaetsia jamatabëcuenesaëya patanenamuxunaevetsinexamë. ² Bajarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi ëCristo panejitsipaenexa. Pacuenia petiriva caenë jitsipa ëpamonanexa, bajarapacuenia caenë Cristo pajitsipare. ³ Bajayata Evapijiva yamaxëitojorobatsi dovathi penajumetsënëtsicueneta. Pacacacujunavatsi paxamë ata bajarapacuenia dovathi papecayamaxëitojorobianiva. Nexata paxamë yabara jamatabëjumaitsinë mapacueniaje: “Dovathi meta jamatabëcuenebijianaenatsi Corinto tomarapijivi. Cristo meta pejitsipaejavami copabiana,” jamatabëjanë paxamë yabara. ⁴ Pacacacujunavatsi penajumetsënëtsilivaisi petsipaebaponaevi papecatsipaebianiva. Tsipaji bajarapamonae pata baja paxamëjavata. Xanë Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxu-

naevetabiabame xaniavaetsia. Espíritu Santo, ponë pacatsijamatabëeca, pelivaisi, xanë pacatsipaebabiabatsi. Nexata Espíritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanë pacatsipaebabiabatsi pexanialivaisi papecapanepaelivaisinexa Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia. ⁵ Pamonae penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenë apo nataenë. ⁶ Jivijavabelia xaniavaetsia livaisi tatsipaebinexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava paneyapëtaenexa, pacatsitanajamatabëcuene itajëtabiabatsi paxamëjavata itsa pacatsipaebavanapatsi Jesús pelivaisi.

⁷ Paxamëjavata itsa pacatsipaebaponaaponatsi pexanialivaisi papecapanepaelivaisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë tacobeta asaëyata nacuenebabiabajë tanaevetsinexa. Bajarapacuenia betajiocuena nacuenebabiabajë tanaevetsinexa pamatacabi pacatsipaebaponaaponatsi Jesús pelivaisi. Nexata baja pajumecovënëtame Jesús pelivaisi itsamatacabi panexainaenexa matacabi apo peverevereaejava. ⁸ Itsamonae Dioso pejumecovënëtsivi itsa netoitoroba palata, itsiata pitajë paxamëjavata tanaevetaponaenexa bajarapapalatata. Nexata pacayavenonaaponatsi. Bajarapacuenia paxamëjavata naevetaponaenajë. Paxamë apo panerajutsimë palata. ⁹ Nexata pamatacabi paxamëjavata ponaponajë, namatavenonaenë, apo pacavajëtsitsi panexainaeyajuvënëjava patanerajutsinexamë. Itsiata Dioso pejumecovënëtsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamëjavata ponaponajë itsacuenejavayo ata pacavajëtsinejevatsi patacagamatabëitonotsiyaniva. Apo najamatabëxainanë bexëjavabelia ata patacavajëtsinexa. ¹⁰ Yapëtaniji Cristo pelivaisi pepacuene pexaniajailivaisicuenë. Bajaraxuata daxita Acaya nacujava Cristo pelivaisi amoneya asaëya tatsipaebaponaejava, sivajamatabëcuenëbarëyanë. ¹¹ Itsamonae xanë yabara jamatabëcuenënavëxaniabiaya pacajumaitsi: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtane bitso patacaasivajava.

¹² Itsiata tavajënaeyabelia Dioso pejumelivaisi pacatsipaebaponaenatsi pacavajëtsinejevatsi itsacuenejavayo ata. Pamonae penajumetsënëtsilivaisi pacatsipaebabiaba, bajarapamonae pacamatamoyanijobabiaba papecatsipaebimatamo. Bajarapacuenia papecamatamoyanijobabiabixae, nexata toacuenebitsi pevajënaeyabelia papecajumaitsaponaenexa: “Paxanë ata patonacuenebavanapajë Dioso pacuenia Pablo

tonacuenebaponapona Dioso," papecajainexa. ¹³ Bajarapamonae apo pepo apóstolevi. "Paxanë raja paapóstolevinë," itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecuenecataeya apóstolevi naexana. ¹⁴ Paxamë apo bepasivajamatabëcuenenabenajacaemë bajarapamonae. Bajarapacuenia saya bajarapamonae exanavanapa papecaymaxëitojorobinexa. Dovathi raja caëjèpatsi Dioso bepijaàngelnë penaexanaenexa, bepexaniajailivaisi itajara petsipaebinë jivi petaenexatsi. ¹⁵ Nexata dovathi pijajivi ata pexaniacuene itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

Pacuenia Pablo apóstolenëxae nabejibitsiaponapona yabara pelivaisi

¹⁶ Icatsia pacajumaitsitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peymaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. ¹⁷ Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. ¹⁸ Pamona peymaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi. ¹⁹ Paxamë bitso ayailivaisi bepaneyapëtaevi panataneme. Itsiata apo payapëtaemë. Tsipaji saya jamatabëcuenebarëyaya panamuxunaevetabiabame palivaisi pacatsipaebabiaba peymaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peymaxëitojorobiapóstolevi. ²⁰ Bajarapamonae bepapijajivitonëmëcuenia pacaitorobabiabi ata, itsiata xaniavaetsia panamuxunaevetabiabame. Panexinaejavaxi pacavecuaveretaponae ata, itsiata xaniavaetsia panamuxunaevetabiabame. Bijijaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. ²¹ Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necaëjèpa bajarapitsicuene yabara ajumeurajibia patacanavajunupaebinexa pataneyaiyataenexamë. ²² Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: "Paxanë raja

pajudíovinë," pacajai tsabiabi. Xanë ata raja judíonënë. Itsiata bajarapacuenia apo pacajumaitsitsi pataneyaiyataenexamë. Bajarapamonae pacajumai tsabiabinua: "Paxanë raja Israelpijinë papemomoxinë," pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: "Paxanë raja Abrahampijinë papemomoxinë," pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. ²³ Bajarapamonae Cristo bepijajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponapojë. Xanë picani apo jitsipaenë patacanavajunupaebinexa. Itsiata Cristo tatonacuenebaponapojë, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsi. Xanë bitso tonacuenebaponapojë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatonë imoxo tanebeyaxuababiabi. ²⁴ Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuanë saicaya naebota nejumaconibabibia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobejenia barcota tanaponaejavata, acueyabi xuabeje nayabubunajë manuameneta. Caepayajopetanë, caemeravi, caematacabi yajava, manuameneta juenajetarucajë. ²⁶ Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiayai tsabiabi menia taponabiabijava. Itsajavata namutua itsa ponajë, netsiayai tsabiabi tanevecuanacobetoxotsinexa tacobecovëjavaxi. Itsajavata netsiayai tsabiabi tajanaacuapijivi taneitsacueniabinexa. Itsajavata netsiayai tsabiabi saicayanacuapijivi taneitsacueniabinexa. Itsajavata netsiayai tsabiabi tomananëjava, petusato nacuanëjava ata, manuamenejava ata. Itsajavata netsiayai tsabiabi pamonaejava Dioso bepejume-covënëtsivi penataevijava. ²⁷ Itsajavata bitso nacuenebabiabajë. Cueranabiabajënuua. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacuenije. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejume-covënëtsivi. ²⁹ Pajivi jamatabëcuene cuerana Dioso pe-

jumecovënëtsijava, xanë ata sivajamatabëcuenecuer-anabiabajë. Pajivi itsajivi pejamatabëcueneta pibisi-acuene exanaeyaexanatsi pejopaenexa Dioso pejumelivaisivecua, bajarapajivi yapijiviauranë tsabiabi Dioso-javabelia. Baraanaepanabiabajënuu pajivi pejamatabëcueneta jopaeayaexanatsi. ³⁰ Itsajivi itsa nitoroba tanajamatabëcuenevajunupaebinxexa, nexata najamatabëcuenevajunupaebianajë tanajamatabëcuenetitajëtsinexa tajamatabëcuenefaefaenajava. ³¹ Vajatuxanenë Jesucristo paxa Diosojavabelia pexaniajamatabëcueneta berajutabiabatsi daxitamatabijavabelianexa. Dioso baja cajena yapëtane jivi tatsipaebilivaisi pexaniajaicuene. ³² Imata ponaponajë Damasco tomarata. Nexata pepo iravetsinë, Are-tasvënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranota piaitayaëibopanaxanetota. Bajara payacaranatsijavaxaneto ibopananë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaeevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. ³³ Itsiata baitsi jane itsamonae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojotualia. Bajarapacuenia Damasco tomarata vecuapanepajë Damascotomara pevetsinë pijajivi.

Pacuenia Pablo navajunupaeba bemajitsinaebota vajatuxanenë petsitanaitajëtabijavatsi yabara pelivaisi

12 Apo netsitaxanepanae picani ajumeurajibia patacanavajunupaebinxexa. Itsiata baitsi jane pamona peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa. Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabijava. Neyapëtaeyaexananua pajamatabëcuenelivaisi xaina xuanë ata netsitajëtabiaba. ²³ Catorce pavaibeje xainajë tanecapanepaecujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcueneta meta saya capona. Caenë Dioso yapëtane pacuenia necapona athëbëabetsia. ⁴ Itsiata necapona paraísojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinxexa itsajivi ata. ⁵ Bajarapacuenia athëbëabetsia tanecaponaejava tanavajunupaebinxexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Étasaëjibijava saya navajunupaebabiabianajë. ⁶ Ayailivaisi picani xainajë ajumeurajibia tanavajunupaebaponaenexa pacuenia taniji athëbëatatsia. Ajumeurajibia itsa navajunupaebaponaejitsipajë,

apo navajunupaebaponaenë tsipae betanematajemabinëcuenia. Tsipaji ëpexaniajailivaisi navajunupaebaponaejitsipajë. Itsiata baitsi jane apo navajunupaebaponaenë tsane daxita xua yapëtaniji. Tsipaji apo jitsipaenë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaebaponaejava ata yabara.

⁷ Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueniaje: "Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenë daxitajivi matatoxenetsia," tanabarajamatabëjaiyaniva, Dioso netocopata tanavixaetaeyabiabinexa. Dioso netocopata dovathi pejamatabëcueneta tanevixaeitonotabiabinexa daxitamatacabi. ⁸ Diosojavabelia picani vajëtajë acueyabi xubaje tanevecuaajibiaexanaenexa bajarapavixae. ⁹ Itsiata baitsi jane vajatuxanenë nejumaitsi mapacueniaje: "Jume. Apo cavecuaajibiaexanaetsi tsane. Bitso casivat-si. Nexata cayavenonaenatsi daxita xua namatavenoname. Pajivi apo jamatabëcuenecaëjëpae atatsi pesaëta tanetonacuenebinexa tajacuene, itsiata baja itsa caëjëpatsi tanetonacuenebinexa, nayapëtane tayavenonaecueneta," nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcuenecaëjëpaejava, nasivajamatabëcuenetarëyanë. Tsipaji Cristo pesaëta neyavenonabiaba daxitacuene yabara. ¹⁰ Apo tanejamatabëcuenecaëjëpaejave tasaëta tatonacuenebinexa vajatuxanenë pijacuene, nasivajamatabëcuenetarëyanë tsabiabi. Itsamonae pibisiacuenia itsa nebijataeyabiaba Cristo pijajivitonëxanë, nasivajamatabëcuenetarëyanë tsabiabi. Itsacuenejavaxi itsa namatavenonabiabajë, itsiata nasivajamatabëcuenetarëyanë tsabiabi. Itsamonae itsa nebijobiaexanabiaba Cristo pijajivitonëxanë, itsiata nasivajamatabëcuenetarëyanë tsabiabi. Itsa netsiayapëbeje tsabiabi tatonacuenebinexa Cristo pijacuene, itsiata nasivajamatabëcuenetarëyanë tsabiabi. Tsipaji paepatota apo nejamatabëcuenecaëjëpae, bajarapaepatota vajatuxanenë bitso nejamatabëcueneyavenonabiaba.

Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi

¹¹ Pamona peyamaxëitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata navajunupaebajë. Apo jitsipaenë picani tanavajunupaebinxexa. Paxamë xaniavaetsia itsa panevajunupaebijitsipame pacuenia exanaponaenajë paxamëjavata, nexata xanë tajacuata apo navajunupaebinxexa tsipae. Beveliajamatabëcuenenë atanë, itsiata pamona peyamaxëitojorobiapóstolevivecua, xanë apo beveliajamatabëcuenenë. ¹² Paxamëjavata itsa ponaponajë, netsiayapëbeje ata, bajayajebi pacatsitaexanaponaenatsi

pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pini-jiucene taexanaejava Dioso pesaëta. Nexata paneyapëtaneme Dioso taneyavenonabiabijava.

¹³ Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepavelijamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata pataneyavenonaenamë, apo pacavajëtsitsi. Pamatacabi ponaponajë paxamëjavata, apo pacavajëtsitsi itsacuenejavayo ata. Pëtsa itsiata bajaraxua pasivanajamatabëxainame. Biji rajane pasivajamatabëcuenebarëyamëre itsacuenejavayo ata apo patacavajëtsijava.

¹⁴ Mabaja panamutotaje, acueyabi namuto taponae-nexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipañë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa pe-naevetsinexa, bajara pijinia pacuenia paxamë ata apo panerajutsimë palata tanaevetsinexa. ¹⁵ Xanë patacayavenonaenexa, mapacuenia exanaejitsipajë. Daxita taxainaejavami, veretsipajë jamatabëcuenebarëyaya. Tasaëtsaponaponaepatojebi abaxë mapanacuataje, pacayavenonabiabijitsipatsi. Bajarapacuenia pacayavenonabiabijitsipa patacjamatabëcuenejavavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

¹⁶ Itsamonae paxamëjavüvëni xanë yabara jamatabëcuenenavëxaniabiaya jumai tsabiabi: "Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuena nacayamaxëitojorobiaya nacavecuapitabiaba palata," jai tsabiabi itsamonae xanë yabara. ¹⁷ Itsanë ata cajena, paxamëjavabelia xanë taitorobiviyajüvënenë, yamaxëitojorobiaya palata apo pacavecuapitsi. ¹⁸ Itorobajë baja Tito peponaenexa paxamëjavabelia papecataenexa. Itorobajënuu itsanë Dioso pejumecovënëtsinë Tito peyjavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexata panacuenejëpajëbeje.

¹⁹ Panesivajamatabëjumaitsimë raeta: "Bajarapacuenia Pablobana nacanajamatabëcuenevivaisipaeba saya penayajivicaicuaijainexa vaxaitsi vajananeconitsiaexanaeyaniva," panesivajamatabëjamë raeta. Bajara-pacuenia itsa pacanavajunupaebatsi, apo pacanavajunupaebitsi patacujunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi,

pacatsipaebabiabatsi patacjamatabëcuene yavenonaponaenexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixaemë. ²⁰ Pamatacabi ponaenajë paxamëjavabelia, bitso meta najamatabëxainae patsianajë paxamëjavata. Aeconoxae pajitsipame tapatsinexa paxamëjavata. Itsiata meta itsa patsianajë paxamëjavata, apo pajitsipaemë tsane patacananeconitsiaexanaenexa. Tsi-paji meta apo pacacaxitajarabi tsanetsi pexaniacuenia panejinavanapaejavata pacuenia pacatojitsipatsi. Itsa patsianajë paxamëjavata, pacataenatsi meta panenajumeanaenotabiabijava. Pacataenatsi meta panenacaeabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyi ata. Pacataenatsi meta itsamonae pepëya pibisiacuenia najumëtsënëtsia paneracuaicuaijaittsabiabijava ata. Pacataenatsi meta itsamonaevecua paayajamatabëcuenevimë panenataeyabiabijava ata. Pacataenatsi meta apo panenajamatabëcuenejëpaexae navecuanatsanaeya panejinavanapaejava ata. ²¹ Paxamëjavata icatsia itsa patsianajë, Dioso meta pitabarata pacayapijivijaura tsanetsi pibisiacuenia paneexanavanapaejava yabara. Bajaraxuata bitso pacasivanajamatabëxainatsi icatsia patacataenexalia. Tsi-paji itsa apo pajinavanapaemë tsane pacuenia pacaitorobatsi, patacasivajamatabëcuenebarëyjavami, nevecuaajibi meta tsane. Paxamëjavüvëni bajayatajavaverenacujinae pibisiacuenia pexanavanapaexae, sivajamatabënuenajë. Bajarapamonae pibisiacuenia pexanavanapaejava pevitota, apo sivajamatabëcuenebëjai. Apo jamatabëcopatsinua pibisiacuenia pexanavanapaejava pevitota.

Pacuenia icatsia Pablo itaveta Corinto tomarapijivi Diosojavabelia penaneconitsiyaniva yabara pelivaisi

13 Aeconoxae baja icatsia ponaejitsianë paxamëjavabelia acueyabi namutonexa. Pibisiacuenia pexanaejivi yabara, Dioso pejumelivaisibaxutota jumaitsi mapacueniaje: "Pajivi pibisiacuenia exana, xanepana pevajunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi," jai Dioso pejumelivaisibaxutota. Nexata paxamëjavabelia itsa patsianajë, bajarapacuenia xanë pacananeconitsiaexanaenatsi. ² Imata panamutomi pacaitavetatsi daxita paxamë pibisiacuenia paneexanavanapaejava panecopatsinexa, Diosojavabelia panenaneconitsiyaniva. Bajarapacuenia itavetajë itsamonae ata pibisiacuenia pexanavanapaeyaniva. Aeconoxae tajë pacavecuaponaponaenatsi, pacatoyaquinatsi icatsia patacaitavetsinexa pibisiacuenia paneexanaeyaniva. Icatsia paxamëjavabelia itsa patsianajë, pacananeconitsiaexanaenatsi padaxitamë. Caejivi ata apo bejiobiataenë tsane pibisiacuenia pexanaeneconi yabara. ³ Itsa pacananeconitsiaexanaenatsi, ajumesaenë tsane patacananeconitsiaexanaenexa. Nexata bajarajota xaniavaetsia paneyapëtaename tayajavacuaicuaijaittsabiabijava Cristo. Cristo baja cajena pijamatabëcuene-

saējava, pacatsitanajamatabēcueneitajēta itsa pacayavenonaponapona paxamējavata. ⁴Xaniajai rabaja. Pacuenia vaxaitsi mapanacuapijivitsi ajamatabēcuenesaējibitsi, bajara pijinia itsi Cristo ata mapanacuata itsa naexana pacuenia vaxaitsi banaexanatsi. Nexata Cristo cruzata itsa beyaxuabatsi, Dioso pesaēta icatsia asaēyaexanatsi petēpaecujinae. Paxanē pajamatabēcuenesaējibi atanē, itsiata aeconoxae Dioso pesaēta Cristo payajavajinavanapajē patacajamatabēcuene yavenonaenexa.

⁵Jica jane. Panajamatabēcuene livaisi jēre itsa xaniajai pepacueene Cristo papijajivimē. Itsa pepacueene Cristo papijajivimē, nexata payapētaename Cristo papecayajavaponapona ejava. Itsa Cristo apo papijajivimē, nexata Cristo apo pacayajavaponapona e. ⁶Paxanē pajamatabējumaitsinē paxamē yabara mapacueniaje: “Corinto tomarijivi vaxaitsi itsa nacacuenecanaējētsiana, xaniavaetsia yapētaena pepacueene Cristo pijajivicuenetsi,” pajamatabējanē.

⁷Pacatovajētaponatsi Diosojavabelia pibisiacuene paneexanapona eyaniva. Bajarapacuenia itsa pacatovajētaponatsi Diosojavabelia, itsajamatabēcuene apo pacasivanajamatabēxainaetsi. Nexata apo pajamatabējumaitsinē paxamē yabara: “Itsa bajarapamonae xaniavaetsia jinavanapaena, nexata pijinia daxisajivi nacayapētaena pepacueene apóstolevicuenetsi,” apo pajamatabējanē paxamē yabara. Bajarapacuenia Diosojavabelia pacatovajētatsi tsipaji pacatojitsipatsi ēpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajē paxamējavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. ⁸Tsipaji acuenebi patananeconitsiaexanaejava pajivi baja jumecovēnēta pexaniajailivaisi, Jesucristo pelivaisi.

Pananeconitsiaexanaenajē epijaneconi pexainaevi. ⁹Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabēcuenebarēyatsi. Tsipaji apo paxainaemē paneconi yabara pacananeconitsiaexanaejitsiatsi. Pacatovajētaponatsinua Diosojavabelia panevajēnaeyabelia panejamatabēcuenevitsabaponaenexa Dioso panejumecovēnētsijava. ¹⁰Pacatoyaquinaliatsi mapabaxutoje taponaevajēnaeya paxamējavabelia tavajēnaelia panenajamatabēcuene xanebinexa pibisiacuene paneexanae javavecua. Nexata itsa patajopaeli ajē paxamējavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinēnexa. Nexata itsa patsialiajē paxamējavabelia, apo jitsipaenē tsane patacananeconitsiaexanaenexa. Biji rajane jitsipajē patacajamatabēcuene saēyaexanaejava panevajēnaeyabelia panejamatabēcuene saēnēnexa Dioso panejumecovēnētsijava.

¹¹Tajamonae, pajamatabēcuenebarēyamēre tsavanapae. Panevajēnaeyabelia panajamatabēcuene vitsabiaexanaponare Dioso panejumecovēnētsijava. Panamuxunaevere palivaisi pacatoyaquinaliatsi. Najamatabēcuenejēpaeya pajinavanapare jamatabēcuene xanepanaeya. Dioso vajanacaasivanē. Bajaraponē jamatabēcuene xanepanaeya nacajinavanapaeyaexana. Nexata Diosojavabelia pacatovajētabiabatsi Dioso papecayajavaponaponaenexa. ¹²Paxamē ata Dioso panejumecovēnētsixae, xaniavaetsia nasivaya namataenetsia panabajacobabiabare. ¹³Daxita pamona e Dioso pejumecovēnētsivi, majota pejinavanapae vije, pacabajacobalia.

¹⁴Pacatovajētabiabatsi Diosojavabelia vajatuxanenē Jesucristo papecayavenonabiabinexa. Pacatovajētabiabatsinua itsamonae ata asivaya panetaenexa pacuenia paxamē ata Dioso pacaasiva. Pacatovajētabiabatsinua Espíritu Santo ata papecayajavaponaponaenexa.

GÁLATAS

**Pacuenia Pablo toyaquina mapabaxutoje Dioso pe-
jumecovënëtsivi, Galacia nacuapijivijavabelia, yabara
pelivaisi**

1 Xanë Pablonë, apóstolenënë. Jivi peja-
matabëcueneta apo nitorobi tatsipaebapon-
aenexa Jesucristo pelivaisi. Nitorobabeje raja Jesu-
cristobeje, paxa Diosobeje, ponë icatsia Jesucristo
asaëyaexanatsi petëpaecujinae. ² Pacatoyaquinatsi
mapabaxutoje paGalacia nacuapijivimë, Dioso pane-
jumecovënëtsivi. Daxita majota Dioso pejumecovënët-
sivi pacajamatabënajinalia. ³ Pacatovajëtabiabatsi vaxa
Diosojavabelia, vajatuxanenë Jesucristojavabelia ata,
papecaitaxutotsoniataenexa jamatabëcuenex-
anepanaeya panejinavanapaenexa. ⁴ Pacuenia vaxa
Dioso itorobatsi, vajatuxanenë Jesucristo pijacuata
tonacaeveta pebeyaxuabinexatsi pibisiacuene vajaex-
anaeconi yabara. Nexata Jesucristo peja-
matabëcueneta vaxa Dioso aneconi jibia nacatane.
⁵ Bajaraxuata vaxaitsi Diosojavabelia jumaitsitsi tsabi-
abi: “¡Xamë Diosomë, bitso ayaijamatabëcuenenëmë!”
jaitsi tsabiabi daxitamatacabijavabelianexa. Bajara itsi
tsane.

**Pacuenia baja Jesús pelivaisivecua pematatsënëa ajibi
itsalivaisi jivi pecapanepaelivaisinexatsi yabara peliv-
aisi**

⁶ Paxamë saya caematacabibejecujinae, paco-
pabame Dioso panejumecovënëtsijava. Bajaraxuata
xanë bitso pacasivajamatabëcuene nabenjajatsi. Je-
sucristo picani pejamatabëcueneta, Dioso pacaitaxu-
totsoniatane itsa pacajunata papecacapanepaenexa.
Itsiata baja aeconoxae jamatabëcuenenavëxaniabiaya
pavecuanajamatabëcuene pënëyorotame saicayali-
vaisijavabelia, bepapecacapanepaelivaisinexa itajara
panejumetaexae. ⁷ Itsiata baitsi jane baja pematat-
sënëa ajibi itsalivaisi papecacapanepaelivaisinexa. It-
samonaepata paxamëjavata livaisi papecatsipae-
binexa. Bajarapamonaepata papecajamatabëcuene
naepatajërëcaeyaexanaenexa. Bajarapamonaepata
saicayalivaisi jamatabëpacatsipaebapona panecopabinexa
panejumecovënëtsijava pexanialivaisi, Jesucristo peliv-
aisi. ⁸ Copiaya baja cajena paxanë pacatsipaebatsi pex-
anialivaisi, Jesucristo pelivaisi, papecacapanepaeliv-
aisinexa Diosojavabelia. Nexata acuenebi paxanë
pataithianaenexa bajarapalivaisi. Athëbëvetsica
pepatsinë ata tsipae, ángelnë, acuenebi piathithi-
anaenexa bajarapalivaisi. Jesucristo pelivaisivecua,

saicayalivaisi, itsa pacatsipaebijitsipatsi, nexata Dioso-
javabelia pananeconitsipajë. Nexata Dioso pane-
naneconitsiaexanaejitsipa daxitamatacabijav-
abelianexa. ⁹ Copiaya baja cajena pacuenia pacatsipae-
batsi, bajara icatsia pacuenia aeconoxae ata pacatsi-
paebatsi. Pajivi Jesucristo pelivaisivecua, saicayalivaisi
pacatsipaeba bepapecacapanepaelivaisinexa itajara,
nexata bajarapajivi Dioso naneconitsiaexanaenatsi
daxitamatacabijavabelianexa. Tsipaji pacacopatsiaex-
ana panejumecovënëtsijava pexanialivaisi, Jesucristo
pelivaisi.

¹⁰ Payapëtaneme rabaja xua yabara bajarapacuenia
pacajumaitsitsi. Bajarapacuenia itsa pacajumaitsitsi,
apo pacajumaitsitsi saya jivi tanesivabarëyanexa. Jume
cajena. Jivi apo nesivabarëya ata Jesucristo pelivaisi jivi
tatsipaebaponaejava yabara, itsiata jitsipajë jivi tatsi-
paebinexa Jesucristo pelivaisi, Dioso tanesivaja-
matabëcuenebarëyanexa. Saya jema jivi livaisi itsa tsi-
paebijitsipajë saya tanesivabarëyanexa, nexata pacue-
nia Jesucristo nitoroba, apo tsipaebaponaenë tsipae.
Nexata Jesucristo apo pijajivitonënë tsipae.

**Pacuenia Pablo Dioso junatatsi apóstolenënexa yabara
pelivaisi**

¹¹ Tajamonaepata jitsipajë patacatsipaebinexa mapali-
vaisije. Palivaisi tsipaebaponaenë jivi pecapanepaeliv-
aisinexatsi Diosojavabelia, bajarapalivaisi itsajivi ata
pejamatabëcueneta apo pexanaelivaisi. ¹² Itsajivi ata
cajena bajarapalivaisi apo netsipaebi. Jesucristo raja
neyapëtaeyaexana bajarapalivaisi. Nexata Jesucristo
nitoroba jivi tatsipaebaponaenexa bajarapalivaisi.

¹³ Panevënëlvaisitaneme rabaja pacuenia exanapon-
aponaenë pamatacabi abaxë jumecovënëtajë Dioso
Moiséspijinëta penajumecopatsilivaisi. Bajarapalivaisi
Dioso Moiséspijinëta najumecopata pajudíovinë pata-
jumecovënëtsinexa. Panevënëlvaisitanemenua pacue-
nia barajinabiabajë Jesucristo pijajivi. Apo itaxutobejio-
biataeyabiabinë cajena tsiquirijavayo ata. Ja-
matabëverebiaxuababiabajë Jesucristo pijajivi. ¹⁴ Xanë
abaxë itsa pevëjëatonë, jumecovënëtajë bitso Dioso
Moiséspijinëta penajumecopatsilivaisi. Xanë bitso
asaëyata jumecovënëtsiaponaponaenë bajarapalivaisi
pitorobicuenia. Daxita pamonaepavëjëavi judíovi, Is-
rael nacuapijivi, matatoxenetsia xanë bitso casaenë
tajumecovënëtsijava bajarapalivaisi. ¹⁵ Itsiata baitsi
jane tanaexanaevajënaeya ata, Dioso nitapeta Jesu-
cristo tajumecovënëtsinexa. Dioso taneitaxutotsoni-
ataexae, nejunata apóstolenënexanë. ¹⁶ Nexata pamat-

acabi ponajë Damasco tomarabelia, namutoepatota Dioso netsitajëta pexënato. Nexata Dioso neypätaeyaexana pexënato pelivaisi. Bajarapacuenia Dioso pexënato pelivaisi neypätaeyaexana tatsipaebapon-aenexa apo judíovijava. Nexata Dioso taneyapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujobinexanua Dioso pexënato pelivaisita.¹⁷⁻¹⁸ Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaiejavabelia xanëvecua copiaya exanatsi apóstolevi. Biji rajane rovia palijë Damasco tomarabelia. Nexata Damasco tomarata tapatsicujinae, caenënë ponajë Arabia nacuyabelia, petusato nacuyabelia. Nexata petusato nacuata Dioso xaniavaetsia neypätaeyaexanapona pexënato pelivaisi. Bjaraxuacujinae icatsia bexëa Arabia nacuverena navierenajë Damasco tomaraberenana. Bjaraxuacujinae tapuaxainae baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, naponaponajë quince pamatacabibeje.¹⁹ Itsiata Jerusalén tomarata pematatsënëa itsaapóstolenë apo taenë. ËSantiago saya, vajatuxanenë pejuyapijinë, taniji.²⁰ Xaniavaetsia pacajumaitstsi Dioso pitabarata. Palivaisi pacatoyaquinatsi, pexaniajailivaisi cajena.

²¹ Jerusalén tomarata taponaponaecujinae, ponajë icatsia Siria nacuyabelia Jesucristo pelivaisi jivi tatsipaebaponaenexa. Ponajë Cilicia nacuyabelia ata.²² Jesucristo pelivaisi jivi itsa tsipaebanajetarucajë, Jesucristo pelivaisi pejumecovënëtsivi, Judea nacuapijivi, abaxë apo neypätae. Tsipaji abaxë Judea nacuata apo tsipaebaponaenë Jesucristo pelivaisi.²³ Bajarapamonae saya nevënëlivaisitane itsamonae xanë yabara pejumaitstijava: "Ponë pina nacabarajinabiaba Jesucristo pelivaisi vajajumecovënëtsivi, aeconoxae pina baja bajaraponë ata jumecovënëta. Nexata pina itsamonae ata pejumecovënëtsinexa Jesucristo pelivaisi, bajaraponë tsipaebapona. Bjarapalivaisi yabara bajaraponë jamatabënacaverebiaxuaba picani," pejaijava, itsamonae xanë yabara nevënëlivaisitane Judea nacuapijivi, Jesucristo pelivaisi pejumecovënëtsivi.²⁴ Bjaraxuata Judea nacuapijivi, Jesucristo pelivaisi pejumecovënëtsivi, jumai tsabiabi Diosojavabelia: "Diosomë, bitso ayaijamatabëcuenenëmë. Tsipaji Pablo ata najamatabëcuenecopatsiaexaname nexënato Jesucristojavabelia," jai tsabiabi xanë yabara.

Pacuenia Pablo pevëna apóstolevi Jerusalén tomarata xaniavaetsia copiapitstsi yabara pelivaisi

2 Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacujava, Cilicia nacujava ata. Nexata Jesucristo pelivaisi jivi tatsipaebanajetarucaecujinae bajarapanacuabejejava, catorce pavaibejecujinae matapania icatsia patajë tacovëyaberena, Jerusalén tomarata. Bernabébeje Titobeje barëpatajë.² Patajë Jerusalén tomarata tsipaji

Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovënëtsivi ëpenamatacaitorobivi penacaetuatsijavata, navajunupaebajë bajarapamonaejavabelia. Bjarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judíovijava pëpanepaelivaisinexatsi Diosojavabelia. Bjarapacuenia navajunupaebajë Dioso pejumecovënëtsivi penamatacaitorobivijavabelia tsipaji jamatabëjumaitstsinë:

"Maraeta pamonaie apo pejitsipaecuenia, tsipaebaponajë apo judíovijavaje," jamatabëjanë. Itsiata baitsi jane Dioso pejumecovënëtsivi penamatacaitorobivi, tsitaxanepanatsi pacuenia tsipaebaponajë apo judíovijava.³ Bjarapacuenia tanavajunupaebixae, taneyanabinë Tito, apo judíonë ata, Dioso pejumecovënëtsivi penamatacaitorobivi pajudíovinë patajacuenia apo perabëcaucutsiaexanaetsi. Baitsi apo boupiperabëcaucutsiaexanaetsi.⁴ Itsamonae, judíovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijaberena. Bjarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bjarapamonae saya jema najunua pata-nenaitaxutocaeetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bjarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaie panenaitaxutocaeveta, jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi.⁵ Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebapona-jë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitstimë tsipae: "Naperabëcaucutsiaexanaenajë pacuenia judíovi naperabëcaucuba. Jumecovënëtsianajëna Dioso Moiséspijinëta penajumecopatsilivaisi. Nexata Dioso pepacuene necapanepaena," pajamatabëjamë tsipae jamatabëcuenenavëxaniabiaya.

⁶ Jerusalén tomarata Dioso pejumecovënëtsivi penamatacaitorobivijavabelia, navajunupaebajë Jesucristo pelivaisi tatsipaebaponaejava apo judíovijava pëpanepaelivaisinexatsi Diosojavabelia. Itsiata bajarapamatacabi Dioso pejumecovënëtsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bjarapamonae yabara itsamonae jamatabëjumai tsabiabi: "Mapamonaeje Dioso pejumecovënëtsivi bitso pepo penamatacaitorobivi. Nexata bitso ayaijamatabëcueneni," jamatabëjai tsabiabi. Itsiata xanë apo sivanajamatabëxainanë bajarapamonae ayaijamatabëcueneni tataenexa. Tsipaji cajena daxita vaxait-si, Jesucristojavabelia vajanajamatabëcuenecopatsivi,

Dioso najëpaeya nacatane. ⁷ Dioso pejumecovënëtsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsi-paebajë Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovënëtsivi penamatacaitorobivi, neyapëtane Dioso taneitorobinëcuene. Nexata Dioso pejumecovënëtsivi penamatacaitorobivi, jumaitsi xanë yabara: "Xaniajai. Pablo Dioso itorobatsi Jesucristo pelivaisi petsipae-baponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipae-baponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipae-baponaenexa apo judíovijava," jai Dioso pejumecovënëtsivi penamatacaitorobivi xanë yabara. ⁸ Apóstolenë Pedro Dioso pesaëta Jesucristo pelivaisi petsipae-baponaexae judíovijava, judíovi baja najamatabëcuene copabapona Jesucristojavabelia. Bajara pijinia pacuenia xanë ata Dioso pesaëta Jesucristo pelivaisi tatsipae-baponaexae apo judíovijava, apo judíovi ata baja najamatabëcuene copabapona Jesucristojavabelia.

⁹ Mara pamatabëxëyo Jerusalén tomarata Dioso pejumecovënëtsivi penamatacaitorobivije. Santiago, Pedro, Juan, bajarapamatabëxëyo. Dioso pejumecovënëtsivi penamatacaitorobivi, itsa neyapëtane Dioso taneitorobinëcuene tatsipae-baponaenexa Jesucristo pelivaisi apo judíovijava, nexata Dioso pejumecovënëtsivi penamatacaitorobivi, panebajacobabeje pexaniacuenia Bernabébeje. Bajarapacuenia Dioso pejumecovënëtsivi penamatacaitorobivi, pexaniacuenia panebajacobabeje tsipaji paneyapëtanebeje patatona-juanacuenebivicuene Dioso pijacuene. Bajaraxuata paxanëbeje Bernabébeje, Jesucristo pelivaisi patavajë-naeyabeliabeje patsipae-baponaenexa apo judíovijava. Santiagobana pijinia, Pedrobana, Juanbana, tsipae-bapona judíovijava. ¹⁰ Bajarapamonae caelivaisiyo panejumaitsidebeje Jerusalén tomarata. Paneitorobabeje patayavenonaenexabeje Dioso pejumecovënëtsivi, bitso bepejiobivi, Jerusalén tomarata pejinavanapaevi. Bajaraxuata xanë jamatabëcuenebarëyaya bajarapamonae ofrenda toexanaeyaexanaponajë itsaxu-ayo tatsipae-bilivaisi, Jesucristo pelivaisi, jumecovënë-tapona.

Pacuenia Pablo muxujioba Pedro Antioquía tomarata yabara pelivaisi

¹¹ Perujulivaisimi, judíovi pijalivaisi, itavetatsi judíovi caejavata peyajanabanianiva apo judíovi. Pedro itsa ponapona Antioquía tomarata, muxujiobajë daxitajivi pitabarata. Tsipaji Pedro apo pexanepanaecue ex-ana. Pedro apo judíovijavata itsa naponapona, jemata apo judíovi vecuanasaicayaba. ¹² Pedro, judíonë ata, pecopatsixae baja pejumecovënëtsijava perujulivaisimi, judíovi pijalivaisi, abaxë picani Pedro jamatejema nanabanebiaba apo judíovijavata. Nexata itsa pata Santiago pijajivi Antioquía tomarata, Pedro baja vecuanasaicayaba apo judíovi. Tsipaji Pedro cujunava Santiago pijajivi peteayanivatsi apo judíovijavata penanaban-

ijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënëtavanapa. Nexata Santiago pijajivi jumai tsabiabi: "Pamonae apo judíovi ata, Jesús pelivaisi itsa jumecovënëta, bajarapamonae ata benaper-abëcaucubiaexana," jai tsabiabi. Nexata Pedro cujuna-va bajarapamonae. Nexata Pedro jamatabëjumaitsi: "Itsa netaejitsipa Santiago pijajivi tananabanijava apo judíovijavata, neneconitsipa judíovijavabelia Jerusalén tomarata. Nexata judíovi ayaicuenia nebijataejitsipa," jamatabëjai Pedro. Bajaraxuata Pedro vecuanasaicayaba baja apo judíovi. ¹³ Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonae najamatabëcuene copaba Jesucristojavabelia, itsa tane Pedro pevecuanasaicayabijava apo judíovi, bajarapamonae ata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi.

¹⁴ Nexata pacuenia jumaitsi pexanialivaisi jivi pecapanepaelivaisinexatsi Diosojavabelia, bajarapamonae apo exanae. Nexata saya bajarapamonae vecuanasaicayaba apo judíovi. Bajaraxuata itsa taniji bajarapamonae pevecuanasaicayabijava apo judíovi, nexata muxujiobajë. Daxita Dioso pejumecovënëtsivi pitabarata, jumaitsinë Pedrojavabelia: "Xamë judíonë atamë, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo ponaponabiabimë judíonëcuena. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo ponaponaemë judíonëcuena, ¿detsa nexata xua-jitsia caranata apo judíovi aeconoxae jamatabëjinavanapaeyaexaname judíovicuenia?" janë Pedrojavabelia pevecuanasaicayabixae apo judíovi.

Pacuenia judíovi ata xanepana penajamatabëcuene copatsinexa Cristojavabelia pecapanepaenexatsi Diosojavabelia yabara pelivaisi

¹⁵ Paxanë baja cajena pajudíovinë. Patanaexanaejavaveliacujinae itsa pavitsabaponaenexa, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. ¹⁶ Pexaniajailivaisi patajumecovënëtsinexa, patajamonaebaja cajena paneyajavavitsata. Nexata payapëtaniji mapacueje. Itsajivi jumecovënëtsi ata tsipae Dioso Moiséspijinëta penajumecopatsilivaisi, itsiata Dioso aneconijibia apo taetsi tsipae. Bajarapacue paxanë pajudíovinë payapëtaniji. Bajaraxuata paxanë pajudíovi atanë, panajamatabëcuene copatajë Jesucristojavabelia. Nexata Dioso aneconijibia panetane patana-jamatabëcuene copatsixae Jesucristojavabelia. Dioso aneconijibia apo panetae patajumecovënëtsixae Dioso Moiséspijinëta penajumecopatsilivaisi. Tsipaji itsajivi ata apo jumecovënëtsicanepae bajarapalivaisi. Nex-

ata itsamonae jumecovënëtsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabëcuenenavëxaniabiaya nejumlahtsi tsipae: "Xamë jumaitsimë tsabiabi: 'Dioso aneconijibia netane tajumecovënëtsixae Cristo tanesivatëpaejava tajaneconi yabara. Nexata baja apo jumecovënëtsinë Dioso Moiséspijinëta penajumecopatsilivaisi,' jamë tsabiabi. Dioso Moiséspijinëta penajumecopatsilivaisi apo nejumecovënëtsixae, nexata Dioso catane pibisiacuene nexanaenë," nejai tsipae itsajivi jamatabëcuenenavëxaniabiaya. Itsiata baitsi jane bajarapacuenia itsajivi nejumlahtsi ata tsipae, itsiata Dioso apo netae tsipae pibisiacuene taexanaenë. ¹⁸ Diosojavabelia rajane naneconitsipajë mapacuenia itsa exanaejitsipajë. Dioso Moiséspijinëta penajumecopatsilivaisi, tajumecovënëtsijavami tacopatsicujinae, icatsia caevëalia itsa jumecovënëtsipajë, nexata Diosojavabelia naneconitsipajë. ¹⁹ Pamatacabi abaxë ajamatabëcuenesaenë tsabiabi tajumecovënëtsijava Dioso Moiséspijinëta penajumecopatsilivaisi, naneconitajë picani Diosojavabelia. Tsipaji ajamatabëcuenesaenë tsabiabi ata tajumecovënëtsijava bajarapalivaisi, itsiata apo necaëjëpae tajumecovënëtsicapanepeaenexa daxita pacuenia jumaitsi bajarapalivaisi. Itsa meta abaxë tsiteca bajarapalivaisi jumecovënëtaaponaponejitsipajë, yajavatëpaejitsipajë meta tajaneconi. Bajaraxuata aeconoxae baja icatsia bajarapalivaisi tajumecovënëtsinexa, apo sivanajamatabëxainae. Pacuenia baja petëpaejivi itsacuenejavayo apo sivanajamatabëxainae, bajara itsinë taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabëcuene taexanaponaponaenexa pacuene Dioso jitsipa. ²⁰ Cristo cruzajavabelia itsa cobematabiabarutatsi, xanë ata tajaneconi yabara nesivatëpa. Nexata xanë ata Cristo betaneyajavatëpae. Bajaraxuata perujumatabëcuenemi, pibisiacuene taexanaenexa taneitorobabiabijamatabëcuenemi, nevecuatëpa baja cruzata. Nexata baja piasaëjamatabëcuene, pejanajamatabëcuene, xainajë. Cristo baja neyjavaponapona. Pajamatabëcuene yaasaenë tsaponapona, Dioso pexënatojavabelia najamatabëcuenecopatsiaya ponaponajë. Dioso pexënato nejitsipa. Nesivatëpanua baja cajena. ²¹ Apo namuxujematsinë Dioso vajanacaitaxutotsoniataejava. Dioso Moiséspijinëta penajumecopatsilivaisi, jivi pejumecovënëtsixae, Dioso aneconijibia jivi itsa taejitsipa, nexata Cristo jivi apo sivatëpae tsipae pijaneconi yabara. Nexata Cristo saya jema tēpaejitsipa.

Pacuenia Cristo pejumecovënëtsivi, Dioso aneconijibia tanetsi pecapanepaenexatsi pijaneconivecua, itsa jumecovënëta pacuenia Abrahampijinë jumecovënëta, yabara pelivaisi

3 ¡Paxamë paGalacianacuapijivimë, bitso cajena paneajamatabëcuenetajavi! Itsamonae raeta saicayalivaisi yamaxëitojorobiaya pacatsipaeba, pexaniajailivaisi, palivaisi baja picani pajumecovënëta,

panecopabinexa. Xanë Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuata bepanetae Jesucristo papecasivatëpaejava cruzata. ² Caejumeyo pacayanijobatsi. ¿Detsa xua yabara pacatsijamatabëjunua Espiritu Santo? Apo pacatsijamatabëjone raja panejumecovënëtsixae Dioso Moiséspijinëta penajumecopatsilivaisi. Espiritu Santo raja pacatsijamatabëjunua panejumecovënëtsixae Jesucristo papecacapanepaejavanexa panijaneconivecua. ³ Paxamë bitso pajamatabëcuenetajamë. Pamatacabi pataxuxuabame panejumecovënëtsijava Jesucristo papecacapanepaejavanexa panijaneconivecua, panajamatabëxainabiabame Espiritu Santo papecayavenonabinexa. Aeconoxae baja icatsia caevëalia panajamatabëxainame panejumecovënëtsinexa Dioso Moiséspijinëta penajumecopatsilivaisi. Itsiata apo caëjëpaetsi bajarapalivaisi papecacapanepaenexa. ⁴ Itsamonae bitso pacabejiobiaexanabiaba pexanialivaisi, Jesucristo pelivaisi, panejumecovënëtsixae. Bajaraxuata apo bepacopatsimë panejumecovënëtsijava Jesucristo pelivaisi, palivaisi yabara itsamonae pacabejiobiaexanabiaba. Tsipaji itsa pacopabijitsipame panejumecovënëtsijava Jesucristo pelivaisi, saya panacueratsipame. ⁵ Payapëtaneme rabaja Dioso papecarajutsijava Espiritu Santo. Pinijicuene pexanaejavanë ata Dioso pacatsitaexana paxamë tuatujëta. Baitsi piavitanevi jamatejemaya exanapona. Petëpaevimi ata asaëyaexanapona. ¿Detsa xua yabara bajarapacuenia Dioso pacatsitaexana? Dioso raja apo pacatsitaexanae bajarapacuenia panejumecovënëtsixae Dioso Moiséspijinëta penajumecopatsilivaisi. Dioso raja pacatsitaexana bajarapacuenia panejumecovënëtsixae patacatsipaebilivaisi, Jesucristo pelivaisi.

⁶ Bajayata Abrahampijinë Diosojavabelia najamatabëcuenecopatsiaya jamatabëjumlahtsi: "Xaniajai. Dioso netoexanaena pacuenia najumecapanepaeya nejumlahtsi," jamatabëjai. Bajaraxuata Dioso Abrahampijinë aneconijibia tanetsi Dioso pijanacuayabetsia pecapanepaenexatsi. ⁷ Bajaraxuata paxamë bepapëtaneme mapacueneje. Pamona jumecovënëta pacuenia Dioso najumecapanepaeya jumaitsitsi, bajarapamonae Abrahampijinë apo pemomoxi ata, itsiata Dioso tanetsi Abrahampijinë bepepo pemomoxi. Bajarapamonae Dioso capanepaenatsi. ⁸ Dioso pejumelivaisibaxutota tajëvelia jumaitsi pacuenia apo judíovi ata Dioso capanepaejitsiatsi pijaneconivecua. Nexata apo judíovi ata Dioso itsa jumecovënëtsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajëvelia Abrahampijinëjavabelia Dioso jumaitsi mapacueniaje: "Tacatsipaebilivaisi tanejumecovënëtsixamë, daxitanacuapijivi ata aneconijibia taenajë, bajarapamonae ata itsa nejumecovënëtsiana pacuenia xamë nejumecovënëta," jai Dioso Abrahampijinëjavabelia. Bajarapacuenia Dioso pejumelivaisibaxutota tajëvelia jumaitsi. ⁹ Nexata baja vaxaitsi xaniavaetsia

yapëtanetsi mapacueneje. Pamonae jumecovënëta Jesucristo pelivaisi, bajarapamonae Dioso aneconijibia tanetsi pecapanepaenexatsi pijaneconivecua. Tsipaji bajarapamonae ata jumecovënëta pacuenia bajayata Abrahampijinë jumecovënëta pacuenia Dioso najumecapanepaeya jumaitisi.

¹⁰ Pajivi Dioso Moiséspijinëta penajumecopatsilivaisi apo jumecovënëtsicapanepae ata, jamatabëjumaitisi: “Bajayata Dioso Moiséspijinëta najumecopata jivi pejumecovënëtsinexa. Nexata baja xanë bajarapalivaisi jumecovënëtaapononajë Dioso tanecapanepaenexa,” jamatabëjai, itsiata bajarapajivi Dioso naneconitsiaexanaenatsi. Tsipaji Dioso pejumelivaisibaxutota jumaitisi mapacueniaje: “Pamonae apo jumecovënëtsicapanepae tsane daxita pacuenia itorobatsi Dioso Moiséspijinëta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota. ¹¹ Nexata baja vaxaitsi xaniavaetsia yapëtanetsi bajarapacuene. Dioso Moiséspijinëta penajumecopatsilivaisi, jivi jumecovënëtsi ata, itsiata itsajivi ata Dioso aneconijibia apo taetsi pecapanepaenexatsi Diosojavabelia. Tsipaji itsajivi ata apo jumecovënëtsicapanepae daxita pacuenia itorobatsi Dioso Moiséspijinëta penajumecopatsilivaisi. Bajarapacuene vaxaitsi yapëtanetsi. Tsipaji Dioso pejumelivaisibaxutota icatsia jumaitisi mapacueniaje: “Pajivi pepacuene Dioso pejumecovënëtsixae, jamatabëjumaitisi: ‘Xanë pepacuene Dioso neyavenonaena pacuenia najumecapanepaeya jumaitisi,’ jamatabëjai, Dioso aneconijibia tanetsi. Bajarapajivi xainaena matabi apo pevereverecejave,” jai Dioso pejumelivaisibaxutota. ¹² Dioso Moiséspijinëta penajumecopatsilivaisi jivi jumecovënëtsi ata, itsiata apo jumecovënëtsicapanepae daxita pacuenia itorobatsi bajarapalivaisita. Bajaraxuata Dioso Moiséspijinëta penajumecopatsilivaisi yabara, Dioso pejumelivaisibaxutota jumaitisi mapacueniaje: “Pajivi apo jumecovënëtsicapanepae ata Dioso Moiséspijinëta penajumecopatsilivaisi, itsiata itsa jamatabëjumaitisi tsane: ‘Xanë pepacuene Dioso neyavenonaena pacuenia najumecapanepaeya jumaitisi,’ itsa jamatabëjai tsane, apo jumecovënëtsicapanepae ata, bajarapajivi Diosojavabelia capanepaenatsi,” apo jai. Biji rajane Dioso Moiséspijinëta penajumecopatsilivaisi yabara, Dioso pejumelivaisibaxutota jumaitisi mapacueniaje: “Pajivi matapania jumecovënëtsicapanepaena daxita pacuenia itorobatsi Dioso Moiséspijinëta penajumecopatsilivaisi, bajarapajivi capanepaenatsi Diosojavabelia. Itsa apo jumecovënëtsicapanepae tsane daxita pacuenia itorobatsi Dioso Moiséspijinëta penajumecopatsilivaisi, nexata tēpae-na. Naxuabiana Diosovecua,” jai Dioso pejumelivaisibaxutota Dioso Moiséspijinëta penajumecopatsilivaisi yabara.

¹³ Vaxaitsi baja cajena naneconitatsi Diosojavabelia. Tsipaji apo jumecovënëtsicapanepaetsi Dioso Moiséspijinëta penajumecopatsilivaisi. Itsiata baitsi jane Cristo itsa tēpa cruzata, nacaneconimatamota pijanata. Dioso Moiséspijinëta penajumecopatsilivaisi

apo vajajumecovënëtsicapanepaexae, naneconitatsi picani Diosojavabelia. Itsiata Cristo cruzata itsa tēpa, nacavecuaajibiaexana baja bajarapaneconimi. Nexata baja Dioso apo nacaneconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinë vajaneconi pejamatabëcueneta. Nexata vajaneconi yabara Cristo nacopata pebeyaxuabinexatsi pacuenia Dioso pejumelivaisibaxutota jumaitisi. Dioso pejumelivaisibaxutota jumaitisi mapacueniaje: “Pajivi bitso naneconita Diosojavabelia pibisiacuene pexanaeconi yabara, bajarapajivi naejavajavabelia rutatsi,” jai. ¹⁴ Nexata Cristo pibisiacuene bepexanaenë vajaneconi yabara, nacopata cruzajavabelia pecobematabiabarutsinexatsi. Bajarapacuenia Cristo itsa nacopata cruzajavabelia pecobematabiabarutsinexatsi vajaneconi yabara, copi-ajopa jane baja pacuenia tajëvelia Dioso najumecapanepaeya jumaitisi Abrahampijinëjavabelia. Nexata apo judíovi ata Dioso capanepaenatsi Jesucristo pejamatabëcueneta. Vaxaitsi vajanajamatabëcuenecopatsixae Jesucristojavabelia vajanacapanepaenexa Diosojavabelia, nexata pacuenia Dioso tajëvelia najumecapanepaeya jumaitisi, bajarapacuenia Dioso nacatsijamatabëcaeyaexana Espiritu Santo.

Pacuenia Abrahampijinëjavabelia Dioso najumecapanepaeya jumaitisi, pacuenia ata icatsia cotocaevi Moiséspijinëjavabelia najumecapanepaeya jumaitisi, yabara pelivaisi

¹⁵ Tajamonae, livaisi pacatsipaebijitsiatsi paneyapëtaenexa mapacueneje. Pepacuene raja Dioso exanaena pacuenia bajayata tajëvelia Abrahampijinëjavabelia Dioso najumecapanepaeya jumaitisi. Mapanacuapijinë ata, pecobecovë pexainaenë, petēpaevajēnae bayaquina pecobecovë yabara. Nexata pecobecovë pexainaenë itsa tēpa, pevënamuto pexi penatsicobetsanaenexa. Nexata jumenamatamota pecobecovë pexainaenë peyaquinaelivaisi. Nexata acuenebi itsajivi ata pejumaitsinexa: “Ajumematamobi mapalivaisije,” pe-jainexa. Mataropotsia ata itsanë peyaquinaponaenexa, acuenebi. Tsipaji pecobecovë pexainaenë peyaquinaelivaisi, jumenamatamota. ¹⁶ Bajara pijinia pacuenia Dioso jumenamatamota bajayata tajëvelia Dioso najumecapanepaeya pejumaitisijava Abrahampijinëjavabelia. Baitsi Abrahampijinë pemomo pejamatabëcueneta, jivi ayaibitsaëto Dioso aneconijibia petaejavanexa, Dioso jumenamatamota. Bajayata tajëvelia Dioso najumecapanepaeya jumaitisi Abrahampijinëjavabelia ayaibitsaëto mapanacuapijivi Abrahampijinë pemomo pejamatabëcueneta Dioso aneconijibia petaenexa. Ayaibitsaëto Abrahampijinë pemomoxi pejamatabëcueneta Dioso jivi aneconijibia petaenexa, bajarapacuenia tajëvelia Dioso najumecapanepaeya apo jumaitisi. Biji rajane caenë, Jesús, pejamatabëcueneta Dioso jivi aneconijibia petaenexa, tajëvelia najumecapanepaeya jumaitisi. “Abrahampijinë pemomo,” itsa jai, tajëvelia jumaitisi Cristo yabara.

¹⁷ Palivaisi pacatsipaebatsi, maitsije. Bajayatami copi-

aya Dioso tajëvelia najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia. Bajaraxuacujinae icatsia coto-caevi, cuatrocientos treinta pavaibejecujinae, Dioso icatsia Moiséspijinëta najumecopata jivi pejumecov-ënëtsinexa. Itsiata palivaisi copiaya Dioso tajëvelia najumecapanepaeya jumaitsi Abrahampijinëjavabelia, bajarapalivaisi acuenebi Dioso penajumeamatamobi-aexanaenexa. ¹⁸ Nexata palivaisi coto-caevi Dioso Moiséspijinëta najumecopata, bajarapalivaisi jivi pejumecovënëtsixae, Dioso aneconijibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajëvelia najumecapanepaeya jumaitsi Abrahampijinëjavabelia, ajumematamobi tsipae. Itsiata baitsi jane palivaisi coto-caevi Dioso Moiséspijinëta najumecopata, jivi jumecovënëtsi ata tsipae, itsiata Dioso apo capanepae tsipaetsi. Nexata yapëtanetsi pejumematamotsijava palivaisi copiaya Dioso tajëvelia najumecapanepaeya jumaitsi Abrahampijinëjavabelia. Tsipaji pajivi jumecovënëta pecapanepaejavanexatsi pacuenia Dioso tajëvelia najumecapanepaeya jumaitsi Abrahampijinëjavabelia, bajarapajivi Dioso aneconijibia tanetsi.

¹⁹ Itsa baja jumematamota palivaisi copiaya Dioso tajëvelia najumecapanepaeya jumaitsi Abrahampijinëjavabelia, ¿detsa nexata xuajitsia icatsia Dioso Moiséspijinëta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneypätaenexa pibisiacuene vajaexanavana-paejava Dioso pitabarata. Bajrapalivaisi Dioso nacatonajumecopata vajajumecovënëtavanapaenexa matapania Abrahampijinë pemomo, Cristo, pepatsimatacabitsicajavabelianexa. Tajëvelia Dioso najumecapanepaeya jumaitsi Cristo pejamatabëcueneta ayaibit-saëto-xaneto mapanacuapijivije Dioso aneconijibia petaenexa. Palivaisi Dioso Moiséspijinëta najumecopata, pijacuata Dioso apo jumaitsi Moiséspijinëjavabelia. Dioso saya itoroba ángelevi Moiséspijinë petsipae-binexatsi. Nexata juya Moiséspijinë tsipaeba jivijavabelia. Moiséspijinë jivi petocuaicuajainë Diosojavabelia. Dioso juya Moiséspijinë itorobatsi petocuaicuajainexa jivijavaberena. ²⁰ Pamatacabi Dioso najumecapanepaeya jumaitsi Abrahampijinëjavabelia pacuenia Dioso toexanaejitsia Abrahampijinëjavabelia, Dioso pijacuata jumaitsi Abrahampijinëjavabelia. Dioso apo itorobi ángelevi petotsipaebinexatsi Abrahampijinëjavabelia. Dioso pijacuata najumecapanepaeya jumaitsi Abrahampijinëjavabelia pacuenia pepacuene toexanaejitsia.

Pajamatabëcuenelivaisi yabara bajayata Dioso Moiséspijinëta najumecopata yabara pelivaisi

²¹ Dioso icatsia coto-caevi Moiséspijinëta itsalivaisi najumecopatsi ata, palivaisi copiaya Dioso najumecapanepaeya jumaitsi Abrahampijinëjavabelia, itsiata apo ajumematamobiaexanae. Tsipaji Dioso Moiséspijinëta penajumecopatsilivaisi pejamatabëcueneta, jivi Dioso apo capanepaejitsiatsi. Jivi itsa caëjpaejitsipatsi

pejumecovënëtsicapanepaenexa daxita palivaisi Dioso Moiséspijinëta najumecopata, nexata Dioso jivi capanepaejitsipa pijaneconivecua Dioso Moiséspijinëta penajumecopatsilivaisi pejumecovënëtsicapanepaexae. ²² Itsiata baitsi jane itsajivi ata apo caëjpaetsi pejumecovënëtsicapanepaenexa Dioso Moiséspijinëta penajumecopatsilivaisi. Dioso pejumelivaisibaxutota jumaitsi pacuenia daxitajivi pibisiacuene pexanaexae, Dioso naneconitsiaexanaejitsiatsi Diosovecua penaxu-abinexa. Bajarapacuenia Dioso pejumelivaisibaxutota jumaitsi vajayapëtaenexa. Nexata yapëtanetsi vajanajamatabëcuenecopatsinexa Jesucristojavabelia, vajanacacapanepaenexa pacuenia Dioso copiaya tajëvelia najumecapanepaeya jumaitsi Abrahampijinëjavabelia.

²³ Cristo abaxë athëbëvetsica pepatsivajënaeyatsica, Dioso Moiséspijinëta penajumecopatsilivaisi nacayapëtaeyaexana pamatacabi Cristo patsica vajanajamatabëcuenecopatsinexa Cristojavabelia. Nacayapëtaeyaexananua pacuenia vajacuata vajaexanaejava pejamatabëcueneta, acuenebi Dioso vajanacacapanepaenexa. Nexata Dioso Moiséspijinëta penajumecopatsilivaisi, nacajamatabëcueneevetapona matapania Cristo athëbëvetsica pepatsimatacabitsicajavabelianexa. Nexata bajarapalivaisi vajanacajamatabëcueneevetsijavata, Cristo baja nacacaxitajaraba. ²⁴ Pacuenia pejevaxi pevetsijivi, pejevaxi baeveta, bajarapacuenia Dioso Moiséspijinëta penajumecopatsilivaisi, nacajamatabëcueneeveta daxita vajajumecovënëtsivi bajarapalivaisi. Bajarapacuenia nacajamatabëcueneeveta matapania Cristo athëbëvetsica pepatsimatacabitsicajavabelianexa. Nexata jane baja athëbëvetsica Cristo pepatsicujinaetsica, vajanajamatabëcuenecopatsixae bajaraponëjavabelia, Dioso aneconijibia nacatane. ²⁵ Aeconoxae baja najamatabëcuenecopatatsi Cristojavabelia. Nexata pacuenia pejevaxi pevetsijivi, pejevaxi baeveta, bajarapacuenia baja Dioso Moiséspijinëta penajumecopatsilivaisi, apo nacajamatabëcueneevetsi.

²⁶ Paxamë rabaja Dioso papeximë panenajamatabëcuenecopatsixae Jesucristojavabelia. ²⁷ Nexata baja daxita paxamë panabautisabame panetsitanaitajëtsinexa jivijavabelia Cristo papijajivicuenemë. Nexata Cristo, Dioso pexënatojavabelia, panenajamatabëcuenecopatsixae, paxamë ata baja Dioso papeximë. ²⁸ Daxitatsi vaxaitsi vajanajamatabëcuenecopatsivi Jesucristojavabelia, pajudíovinë, apo pajudíovi atamë, aeconoxae baja Dioso najëpaeya nacatane. Paxamë ata pijinia dajubicuenia papecanajetsivi itsamonaejavabelia amoneya panetonacuenebavana-paenexa, apo patanecacanajetsivi ata itsamonaejavabelia amoneya panetonacuenebavanapaenexa, daxitatsi Dioso najëpaeya nacatane. Paxanë papebijivinë, paxamë pijinia papetiriavi atamë, bajarapacuenia daxitatsi Dioso najëpaeya nacatane. ²⁹ Cristo pijajivixaetsi, nexata Abrahampijinë bepepo pemomoxitsi Dioso nacatane. Nexata pacuenia Dioso bajayata tajëvelia

¹⁷ Pamonae saicayalivaisi Jesucristo pelivaisivecua petsipaebaponaevi, pata paxamējavata bajarapalivaisi papecatsipaebinexa. Bajarapamonae najamatabēxainabiaba pexanaenexa xua yabara pasivabarēyamējitsia bajarapamonae. Itsiata baitsi jane bajarapamonae apo najamatabēxainae papecatsipaebinexa pexaniajaillivaisi papecacapanepaelivaisinexa Diosojavabelia. Bajarapamonae jitsipa paxanē patanevecuana-saicayabinexamē. Jitsipa panejamatabēcuenejē-paenexa bajarapamonae. ¹⁸ Xanepana picani itsamonaē ata panesivabarēyanexa itsa pacayavenona, itsa baitsi jane pepacuene xaniavaetsia pacasivanajamatabēxaina papecayavenonaenexa. Bepacayavenona bajarapamonae daxitamatacabijavabelianexa. Nexata paxanē ētapatsimatacabi paxamējavata, apo bepacayavenonaē. ¹⁹ Paxamē bepataximē pacatanetsi. Petiriva itsa vixanotatsi penacuetō pevecuanaexanaenexatsi, bitso banajamatabēxaina ēpexanaejavabelianexa. Bajara pijinia pacuenia xanē ata bitso pacasivanajamatabēxainatsi. Tsipaji bitso patojitsipatsi, pacuenia Cristo jamatabēcueneitsi, bajara paxamē ata panejamatabēcueneitsinexa. ²⁰ Bitso picani jitsipajē aeconoxae taponaponaējava paxamējavata bitso patacasivanajamatabēxainaexae. Nexata itsa ponaponaējitsipajē paxamējavata, apo patacatoyaquinae tsipaetsi. Pacabarēcuaicuajiaitsi tsipae pexaniacuena. Apo patacataexae, nexata abaxē xaniavaetsia apo yapētaenē pacuenia exanaejitsianē paxamējavabelia.

Agarpijivabeje Sarapijivabeje yabara pelivaisi

²¹ Paxamē pajumaitsimē tsabiabi: “Jumecovēnēt-sianatsi Dioso Moiséspijinēta penajumecopatsilivaisi Diosojavabelia vajanacacapanepaenexa,” pajamē tsabiabi. ¡Nexata panamuxunaevere xaniavaetsia panepātaenexa pacuenia Dioso jumaitsi bajarapalivaisi yabara! ²² Dioso pejumelivaisibaxutota jumaitsi pacuenia bajayata Abrahampijinē xaina pexēnatobeje. Abrahampijinē pexēnato itsanē xaina Agarpijivata. Agarpijiva, Abrahampijinē bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovēnētabiaba pijatuxanejivibeje pitorobicueniatsi. Bajaraxuacujinae icatsia Abrahampijinē itsanē xaina Sarapijivata, pepo pijavata jane baja. Bajarapova apo pecomuatsiva. ²³ Panacuetonēyo Abrahampijinē xaina Agarpijivata, pecomuatsivata jane baja, xaina pacuenia baxaina pexi pexinaevi. Panacuetonēyo pijinia xaina Sarapijivata, pepo pijavata jane baja, mavecova ata bitso pepua perujavata, xaina. Bajarapanacuetonēyo xaina petocopiapatsixaetsi pacuenia Dioso tajēvelia najumecapanepaeya jumaitsi Abrahampijinē pexēnato pexainaenexa. ²⁴ Bajarapovabeje pelivaisita Dioso nacayapētaeyaexana pacuenia Dioso jivi tane anijacueniabeje. Dioso Moiséspijinēta najumecopata Moiséspijinē pijajivi pebarējumecovēnēt-sinexa bajarapalivaisi. Bajarapalivaisi Dioso najumecopata Moiséspijinēta Sinaivēnē tsutojumata, Arabia nacuata. ²⁵ Itsamonaē abaxē mapamatacabi ataje tsiteca jumecovēnētavanapa Dioso

Moiséspijinēta penajumecopatsilivaisi. Bajarapamonae abaxē tsiteca pejumecovēnētavanapaexae Dioso Moiséspijinēta penajumecopatsilivaisi, Abrahampijinē pecomuatsivami, Agarpijivami, cuenejēpavanapa. Tsipaji pacuenia Agarpijiva daxitamatacabi jumecovēnētabiaba pijatuxaneva pitorobabiabicueniatsi, bajara pijinia pacuenia bajarapamonae jumecovēnētabiaba Dioso Moiséspijinēta penajumecopatsilivaisi pitorobicueniatsi. ²⁶ Vaxaitsi pijinia Jesucristojavabelia vajanajamatabēcuenepecopatsivi, Abrahampijinē pepo pijavami, Sarapijivami, cuenejēpavanapatsi. Nexata itsamatacabi Dioso pijatomarata, pejanajerusalēn tomarata, jinavanapaenatsi. Tsipaji pacuenia Abrahampijinē pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tsipaji Dioso Moiséspijinēta penajumecopatsilivaisi pitorobicuenia apo jumecovēnētavanapaetsi. ²⁷ Nexata ayaibitsaētotsi tsaponae Jesucristojavabelia vajanajamatabēcuenepecopatsivi. Abrahampijinē pepo pijavami, Sarapijivami, yabara, Dioso pejumelivaisibaxutota tajēvelia jumaitsi mapacueniaje:

Mavecovamē, nexi apo nexainaeva. Jamatabēcuenebarēyamē tsane. Caeto ata apo nenavix-aetaeva ata, itsiata jamatabēcuenebarēyaya vavajamē tsaxuabi tsane, navixaetae atamē. Tsipaji nemomoxi ayaibitsaēto xainaename. Xainaename ayaibitsaēto nemomoxi, nijajivitova pemomoxi matatoxenetsia, jai tajēvelia Dioso pejumelivaisibaxutota ayaibitsaētotsi Jesucristojavabelia vajanajamatabēcuene copatsijavanexa yabara.

²⁸ Tajamonae, pacuenia Abrahampijinē pepo pijavata, Sarapijivata, naexana Isaacpijinē pacuenia Dioso tajēvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia vajanajamatabēcuenepecopatsixae, Dioso nacatane Sarapijiva bepepo pemomoxitsi. Nexata pacuenia Dioso tajēvelia najumecapanepaeya jumaitsi vajanacacapanepaenexa, bajarapacuenia Dioso nacacapanepaena. ²⁹ Bajayata Abrahampijinē pexēnato, matapijinē, ponē naexana Agarpijivata, bajaraponē jamatabēitonotabiaba pejuyapijinē, ponē naexana Sarapijivata Dioso pejamatabēcueneta Espiritu Santo peyavenonaexaetsi. Bajara pijinia pacuenia aeconoxae ata, pamonae casaē tsavanapae pejumecovēnēt-sijava Dioso Moiséspijinēta penajumecopatsilivaisi, nacajamatabēitonotabiaba Dioso pejamatabēcueneta Espiritu Santo vajanacatsijamatabēecaevi. ³⁰ Pijuyapijinē, pejamatabēitonotabiabinē yabara, Dioso pejumaitsijavava Abrahampijinējavabelia Dioso pejumelivaisibaxutota jumaitsi mapacueniaje: “Ponē nexēnato xainame necomuatsivata, apo rajutsimē tsane nexainaeyajuvēnējava nevēnamuto pepitsinexa. Daxita rajutsianame ponē xainame pepo nijavata. Bajaraxuata nijabovecua pitsapaeyaexanaename necomuatsiva, nexēnato yajava,” jai Dioso pejumelivaisibaxutota Abrahampijinējavabelia Dioso pejumaitsijava. ³¹ Tajamonae, Dioso apo nacatae Abrahampijinē pecomuats-

siva bepemomoxitsi. Biji rajane Dioso nacatane Abrahampijiné pepo pijava bepemomoxitsi. Bajaraxuata vaxaitsi baja apo jumecovênétsitsi Dioso Moiséspijinéta penajumecopatsilivaisi.

Pacuenia icatsia apo bejumecovênétsi Dioso Moiséspijinéta penajumecopatsilivaisi, pamonaē baja najamatabēcuenecopaba Cristojavabelia, yabara pelivaisi

5 Cristo pejamatabēcueneta nacacopatsiaexana Dioso Moiséspijinéta penajumecopatsilivaisi vajajumecovênétsijavami. Nexata Dioso Moiséspijinéta penajumecopatsilivaisi panejumecovênétsijavami panecopatsijava, tsiteca baja pacopatavanapare. Pētsa icatsia caevēalia pajumecovênētame Dioso Moiséspijinéta penajumecopatsilivaisi, bajarapalivaisi bepapijajivimē papecaitorobabiabicuenia paneexanavana-paeyaniva.

²Xanē Pablonē, panenamuxunaevere palivaisi pacatsipaebijitsiatsi. Jamatabēcuenenavēxaniabiaya pētsa pajamatabējumaitsimē: “Xanē rabaja taneperabēcaucutsinē. Bajaraxuata tajaneconivecua Dioso necapanepaena,” pajamatabējamē pētsa. Bajarapacuenia ita panajamatabēxainaejitsipame, nexata Cristo papecasivatēpaejava papecacapanepaenexa panijaneconivecua, saya pacasivanacueratsipa. Nexata pajumecovênēre Cristo papecasivatēpaejava papecacapanepaenexa panijaneconivecua. ³Icatsia pacamuxujibatsi asaēyata. Pajivi jamatabēcuenenavēxaniabiaya jamatabējumaitsi: “Xanē naperabēcaucutsiaexanaenajē tajaneconivecua Dioso tanecapanepaenexa,” jamatabējai, bajarapajivi bejumecovênétsicapane daxita pacuenia Dioso Moiséspijinéta penajumecopatsilivaisi itorobatsi. ⁴Jamatabēcuenenavēxaniabiaya ita pajamatabējumaitsimē tsipae: “Xanē jumecovênēt-sianajē Dioso Moiséspijinéta penajumecopatsilivaisi. Nexata Dioso aneconijibia netaena tanecapanepaenexa,” ita pajamatabējamē tsipae, nexata pacopabijitsipame panejumecovênétsijavami Cristo papecasivatēpaejava panijaneconi yabara. Dioso papecaitaxutotsoniataexae aneconijibia papecataejavami ata, pacopabijitsipame. ⁵Vaxaitsi baja cajena yapētanetsi Dioso vajanacapanepaejavanexa. Tsipaji jumecovênētatsi Jesucristo vajanacasivatēpaejava vajaneconi yabara. Bajaraxuata Espiritu Santo pejamatabēcueneta vajanacayavenonaexae, evetavanapatsi Dioso vajanacajumaitsinexa: “Paxamē rabaja paneconijibimē,” vajanacajainexa, pamatacabi Dioso pitabarata nubenaenatsi. ⁶Vaxaitsi baja Jesucristo pijajivitsi. Nexata nacaperabēcaucutsi ata, apo nacaperabēcaucutsi ata, itsiata bajarapacuenē amatamobi Dioso pitabarata. Namatamota rajane asivaya vajayavenonaponaējava itsamonae ata vajanajamatabēcuenecopatsixae Jesucristojavabelia.

⁷Pajumecovênētavanapame baja picani pexaniajailivaisi. ¿Jipatsa nexata pacacopatsiaexana bajarapalivaisi panejumecovênétsijavami? ⁸Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabēcuenecopatsinexa.

⁹Pētsa panacofênētame mapalivaisije. Pan pexanaematabēnexa ayaimatabē ata, levadurajava pijinia tsiquirijavayo ata, itsiata pematajerēabijavata, bacaējēpa daxitamatabējava. Nexata bafufunaeyaexana daxitamatabē. Bajara pijinia itsi penajumetsēnētsilivaisi jivi petsipaebaponaevi. Penajumetsēnētsilivaisi jivi petsipaebaponaevi, caenēbeje ata, itsiata ayaibit-saēto Jesucristojavabelia penajamatabēcuenecopatsivi, jamatabēcuenebijianapona. ¹⁰Yapētaniji baja cajena mapacuenēje. Paxamē baja Jesucristo papijajivimē. Nexata Dioso pacayavenonaena. Xanē yapētaniji pacuenia paexanaejitsiamē. Tsiteca pajumecovênētavanapaename patacatsipaebilivaisi. Dioso cajena itsamatacabi naneconitsiaexanaenatsi ponē Jesucristo pelivaisivecua pacajamatabēcuenebijiana penajumetsēnētsilivaisita.

¹¹Tajamonae, Jesucristo pelivaisi apo judíovi tatsipaebabiabijavata, ita jumaitsinē tsabiabi tsipae: “Paxamē apo pajudíovimē, Jesucristojavabelia panenajamatabēcuenecopatsivi, bepanaperabēcaucubiaexaname Diosojavabelia papecacapanepaenexa,” ita janē tsabiabi tsipae, nexata judíovi apo nebejiobiaexanabiabi tsipae. Apo judíovi ata, Jesucristojavabelia penajamatacuenecopatsivi, ita itorobaponaējitsipajē peperabēcaucubinexatsi, nexata Jesucristo cruzata petēpaelivaisi tsipaebi atanē, itsiata judíovi apo nitoya tsipae. ¹²Pamonae pacajamatabēitonotabiaba panenaperabēcaucutsiaexanaenexa, bajarapamonae tojitsipajē mapacueniaje. Tojitsipajē bajarapamonae papecavecuapitsapaenexa, papecacopatsinexa baja papecajamatabēitonotabiabijava.

¹³Tajamonae, Dioso pacajunata panecopabinexa Dioso Moiséspijinéta penajumecopatsilivaisi panejumecovênétsijavami. Itsiata baitsi jane pētsa pajamatabējumaitsimē: “Dioso Moiséspijinéta penajumecopabilivaisi tajumecovênétsijavami, tacopatsixae baja, nexata exanaenajē daxita pibisiacuenē pacuenia jitsipajē,” pajamatabējamē pētsa. Biji rajane Dioso Moiséspijinéta penajumecopatsilivaisi panejumecovênétsijavami, panecopabixae baja, Jesucristojavabelia penajamatabēcuenecopatsivi bepapijajivimē panataema namataenetsia panenayavenonabiabinexa. Bajara pacuenia namataenetsia panayavenonabiabianame panenasivaxae. ¹⁴“Asivamēre itsamonae ata pacuenia nijacuata nasivamē,” pejailivaisi ita pajumecovênēt-sianame, nexata daxita palivaisi Dioso Moiséspijinéta najumecopata, pajumecovênétsicapaneaname. ¹⁵Itsa panaitoyamē, ita panabaracuaicuaijamēnua pibisiacuenia, nexata xaniavaetsia panaitavere. Tsipaji ita panaitoyamē tsipae, ita panabaracuaicuaijamēnua tsipae pibisiacuenia, nexata Jesucristojavabelia panenajamatabēcuenecopatsijava, namataenetsia panajamatabēcuenē faefaenaeyaexanaejitsipame. Pacopatsipamenua baja Dioso pejumelivaisi yabara panenacaet-uatabiabijava ata.

**Pacuenia Espíritu Santo nacajamatabëcueneyavenona
yabara pelivaisi**

¹⁶ Mapacuenia pacajumaitssitsije. Pacuenia Espíritu Santo pacaitorobabiaba, paexanabiabare daxitamatacabi canacujitsia. Pëtsa pibisiacuene paexanabiabame panijacuata panenajamatabëxainaejava. ¹⁷ Xua vajacuata vajajamatabëëthëtota najamatabëxainabiabatsi pibisiacuene vajaexanabiabinexa, bajaraxua vajaexanaenexa, Espíritu Santo apo jitsipae. Xua pijinia Espíritu Santo nacaitorobabiaba pexaniacuene vajaexanabiabinexa, bajaraxua juya vajajamatabëcuene vajaexanabiabinexa apo jitsipae. Nexata vajajamatabëcuenebeje, Espíritu Santobeje apo najamatabëcuenejëpaebeje. Bajaraxuata pexaniacuene pajamatabëexanabiabi atamë, itsiata apo paexanabiabimë pexaniacuene. ¹⁸ Itsa baja paexanavanapaename pacuenia Espíritu Santo pacaitorobabiaba, nexata baja tsiteca apo paexanavanapaemë tsane pacuenia pacaitoroba Dioso Moiséspijinëta penajumecopatsilivaisi. Tsi-paji baja pacuenia Espíritu Santo pacaitoroba, paexanavanapaename.

¹⁹ Xua jivi pijacuata najamatabëxaina, itsa exana, yapëxanepana vajayapëtaenexa. Tsi-paji xua jivi pijacuata najamatabëxaina itsa exana, pebi itsava jaita pijavavecua. Petiriva pijinia jaita itsanë pamonavecua. Pamonae pevitota pibisiacuene exana pacuenia pijacuata najamatabëxaina, bajarapamonae jitsipanua daxita xua pibisiacuene pexanaenexa. ²⁰ Pamonae pibisiacuene exana pacuenia pijacuata najamatabëxaina, pematabacabëta nubenabiaba pevajëtabiabinexa jumapecataeya pexanaenëanëjavabelia. Junatabiabanua penajorobivi. Bajarapamonaeyajuvënëvi naexananua penajorobivi. Itoyanua tsabiabi itsamonae. Jumeanaenotabiabanua itsamonae. Cuenecaëbbiababanua itsamonae. Anaepanabiabanua apo vajabaraanaepanaejavayo ata. Natoexanabiabanua daxitacuene ëpamonanexa. Vecuanasaicayababibanua itsamonae Dioso pejumecovënëtsivi. Caebitsaëto caejavata apo najuanacaetuanabiabi. ²¹ Pamonae pibisiacuene exana pacuenia pijacuata najamatabëxaina, jamatabëyacajërëtabiabanua itsamonae pexainaejava. Jamatabëbeyaxuababiabanua jivi. Aitajibinua tsabiabi pijabonëjava. Aitajibinua tsabiabi fiestajava ata. Itsacuenenua pematatsënëa, bajara bepitsipibisiacuene, exanabiaba. Pacuenia copiata pacamuxujibatsi, bajara icatsia pacuenia pacamuxujibatsi. Pamonae bajarapacuenia pibisiacuene exana, bajarapamonae apo jinavanapae tsane Dioso pijanacuatsia.

²² Pacuenia peubinae, pexaniana, pexaniacuai capitsapa, bajara pijinia pacuenia Espíritu Santo vajajamatabëëthëtovetsina capitsapa mapacuenije. Capitsapa itsamonae ata vajaasivajamatabëcuene. Capitsapa vajabarëyajamatabëcuene. Capitsapa Diosojavabelia, itsamonaejavabelia ata, barajamatabëcuene xanepanaeya vajataenexa. Capitsapa, itsamonae nacaitacueniabi ata, vajavajënaeyabelia vajaajamatabësaëjamatabëcuene. Capitsapa itsamonae vajaitaxutotso-

niatae jamatabëcuene. Capitsapa itsamonae pexaniacuene vajatoexanaejamatabëcuene. Capitsapa Dioso vajajumecovënëtsijava vajaajamatabësaëjamatabëcuene. ²³ Espíritu Santo vajajamatabëëthëtovetsina capitsapa vajaanitejepaebijamatabëcuene. Capitsapa vajajamatabëcataitsi jamatabëcuene pibisiacuene vajaexanaeyaniva. Daxita bajarapajamatabëcuene, Espíritu Santo vajajamatabëëthëtovetsina pecapitsapaejamatabëcuene, xanepana. Itsalivaisi ata cajena apo itavetsi daxita bajarapacueni. ²⁴ Pamonae Jesucristo pijajivi, bajarapamonae jamatabëjumaitssi: “Jesucristo cruzajavabelia itsa cobematabiabarutatsi, tajaperujumatabëcuenemi yajavatëpa,” jamatabëjai. Nexata vecuaajibiaexanatsi pajamatabëcuene itorobabiabatsi pibisiacuene pexanaenexa. ²⁵ Vaxaitsi Espíritu Santo nacayajavaponapona. Nexata betonacopatabiabatsi vajacaitorobinexa pacuenia Espíritu Santo nacatojitsipa vajaexanabiabinexa.

²⁶ Ayaijamatabëcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajacuenecaëbivaniva ata.

**Pacuenia Dioso pejumecovënëtsivi itorobatsi namataenetsia penajamatabëcueneyavenonaenexa
yabara pelivaisi**

6 Tajamonae, itsa pacaxitajarabame Dioso pejumecovënëtsijavavecua pejopaejivi, paxamë pacuenia Espíritu Santo pacaitoroba panejinavanapaevi, payavenonare bajarapajivi. Payavenonare bajarapajivi pijamatabëcuenesaënexa icatsia Dioso pejumecovënëtsijava. Itsiata baitsi jane pexaniajamatabëcuenia xaniavaetsia payavenonare. Paxamë ata pibisiacuene nayajivitaeya pajinavanapare. Belia paxamë ata Dioso panejumecovënëtsijavavecua, pajopaejitsipame dovathi itsa pacajamatabëcueneëjëta pibisiacuene paneexanaenexa. ² Namataenetsia panayavenonabiabare dovathi itsa pacajamatabëcueneëjëta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënëtsianame pacuenia Cristo pacaitoroba.

³ Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaejava: “Xanë cajena ayaijamatabëcuenenënë bajarapajivi matatoxenetsia. Nexata Dioso tajumecovënëtsijavavecua apo jopænë tsane,” jai, bajarapajivi najamatabëcuene capaebe. Tsi-paji bajarapajivi ata dovathi itsa jamatabëcueneëjëtatsi pibisiacuene pexanaenexa, apo ajamatabëcuenesaëtsipae Dioso pejumecovënëtsijava. ⁴ Caejivi canacujitsia benacuenecanaëjëta peyapëtaenexa xua exanaponapona Dioso pitabarata. Nexata pajivi pexaniacuene exanaponapona, bajarapajivi jamatabëcuenebarëya Dioso pitabarata. Itsiata baitsi jane bajarapajivi pexaniacuene exanaponapona ata, apo bejamatabëjumaitsi mapacueniaje: “Xanë itsamonaevecua pexaniacuene Dioso toexanaponapona,” apo bejamatabëjai. ⁵ Caejivi canacujitsia baja caje-

na saicaya xaina pexanaponaejavanexa Dioso pitoro-bicueniatsi.

⁶ Pamonae tsipaebatsi Dioso pejumelivaisi, bajarapamonae pexainaeyajuvënëjava juya berajuta Dioso pejumelivaisi petsipaebinëtsijavabelia.

⁷ Pëtsa pajamatabëcuenenavëxaniabame saicayacuena paneexanaeyaniva Dioso papecaitorobicuenevecua. Tsipaji itsajivi ata apo caëjëpaetsi peyamaxëitojorobinexa Dioso. Xua jivi bauba pabita, pamatacabi baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. ⁸ Pajivi pibisiacuene exanaponapona pijacuata penatojitsipaecuena, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espiritu Santo pesivabarëyanexatsi, nexata bajarapajivi tēpae ata, xainaena matacabi apo pevereceaejava. ⁹ Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaëjëtsimatacabi nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. ¹⁰ Nexata itsajota nacacuenecaëjëpa, pexaniacuene betoexanabiabatsi itsamonaejavabelia. Pamonae Jesucristo vajanajujumecovënëtsivi, bajarapamonae bitsoyo beyavenonaponatsi.

Pacuenia Pablo pemuxujiobilivaisi Galacia tomarapijivi toyaquina peveretsinexa baja petoyaquinaelivaisi mapabaxutotaje yabara pelivaisi

¹¹ Pataema mapaayaiitanetonëje. Xanë raja Pablonë tajacuata pacatoyaquinatsi mapalivaisije. ¹² Itsamonae judíovi ajumesaëya pacajumai tsabiabi: "Paxamë apo pajudíovi atamë, Jesucristo pelivaisi itsa pajumecovënëtame, bepanaperabëcaucubiaexaname papecapanepaenexa Diosojavabelia," pacajai tsabiabi. Pajudíovi bajarapacuenia pacajumai tsabiabi, jamatabëcuenenavëxaniabiaya jamatabëjumai tsabiabi: "Jesucristo pelivaisi apo judíovi itsa tsipaebianatsi, yajavaitorobianatsi penaperabëcaucubiaexanaenexa. Nexata bajarapacuenia itsa exanaenatsi, vajamonae judíovi nacasivajamatabëcuenenavëxaniabiaya tsane. Nexata

vajamonae judíovi apo nacaitsacueniabi tsane, apo judíovi tsipaebi atatsi Cristo vajanacasivatëpaejava cruzata," jamatabëjai tsabiabi bajarapajudíovi jamatabëcuenenavëxaniabiaya. ¹³ Pajudíovi bajarapacuenia pacajumai tsabiabi, pijacuata naperabëcaucubiaexanae ata, itsiata apo exanavanapae daxita pacuenia itorobatsi Dioso Moiséspijinëta penajumecopatsilivaisi. Bajarapamonae jitsipa panenaperabëcaucubiaexanaenexa, saya papecevajunupaebinexa pevëna judíovijavabelia: "Paxanë patajamatabëcueneta Galacia nacuapijivi naperabëcaucubiaexana," pejainexa paxamë yabara. Tsipaji bajarapajudíovi jitsipa pesivajamatabëcuenenavëxaniabiaya tsane. ¹⁴ Xanë cajena bajarapacuenia apo exanaenë. Apo najanamatabëxainaenë, xua exanajë, tanavajunupaebinexa jivi saya tanesivabarëyanexa. Itsiata jitsipajë caelivaisiyo jamatabëcuenenavëxaniabiaya jivi tatsipaebinexa. Jitsipajë jivi tatsipaebinexa Jesucristo vajanacasivatëpaejava cruzata. Jesucristo cruzata tanesivatëpaexae, nevejamatabëcaeva baja tajitsipaejavami mapanacuapijicueneneje. Mapanacuapijivi pijinia tanejitsipaejamatabëcuenemi ata ajibi baja. ¹⁵ Espiritu Santo vajanacaitorobicuenia itsa exanavanapatsi, nacaperabëcaucutsi ata, apo nacaperabëcaucutsi ata, najëpabeje. Tsipaji cajena amatamobi bajarapacuenia Dioso pitabarata. Vajanajamatabëcuenenavëxaniabiaya tsane. ¹⁶ Nexata pamonae exanavanapa pacuenia pejanajamatabëcuenenavëxaniabiaya tsane. ¹⁷ Tavajënaeyabelia baja apo jitsipaenë tanejamatabëitonotaponaenexa pamonae nejumeaeba Jesucristo taneitorobinëcuenenavëxaniabiaya tsane. ¹⁸ Tajamonae, pacatovajëtabiabatsi Diosojavabelia vajatuxanenë Jesucristo papecayavenonabiabinexa. Bajara itsi tsane.

EFESIOS

**Pacuenia Pablo toyaquina mapabaxutoje Dioso pe-
jumecovënëtsivi, Efeso tomarapijivjavabelia, yabara
pelivaisi**

1 Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ "Pexaniacuene rabaja panetoexaname," jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia.

⁴ Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacasivatëpaexae. Bajarapacuenia Dioso tajëvelia nacaitapeta pijajivinexatsi vajajinavanapaenexa aneonijibia Dioso pitabarata.

⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bajaraxuata nexata Dioso nacatane pexicueniatsi. ⁶ Nexata Dioso pexaniacuena vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. "Xanepana rabaja. Tsipaji pexaniacuene panetoexaname," jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. ⁷ Pinijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacasivatëpaenexa. Bajarapacuenia Dioso nacavecuaajibiaexana pibisiacuene vajaexanaeconomicsi.

⁸ Dioso pinijicuenia vajanacaitaxutotsoniataexae, nacayapëtaeyaexana pexaniajailivaisi. Nacayapëtaeyaexananua pacuene nacatoxanepana Dioso pejisipaecuenia vajaexanavanapaenexa. ⁹ Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bajaraxua picani abaxë itsajivi ata apo yapëtae. Xua

Dioso tajëvelia najamatabëcuenevereta pexanaenexa, maitsije. Dioso itorobijitsiatsica pexënato mapanacuayabetsicaje petoexanaeveretsinexatsi daxita pacuenia itoroba. ¹⁰ Pacuenia Dioso tajëvelia najamatabëcuenevereta, bajarapacuenia daxita Cristo pijaivititsi nacacaetuatsiana Dioso pecaëjëtsimatacabi itsa copiapatsiana. Dioso pecaëjëtsimatacabi itsa copiapatsiana daxitacuene mapanacuapijicuenije, athëbëpijicuenie ata, Dioso baja tocopatsiana pexënato juya pevetsinexa.

¹¹ Jesucristo pijajivinexatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. ¹² Bajarapacuenia Dioso tajëvelia nacaitapeta vajanajamatabëcuenecopatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: "Diosomë, ayaijamatabëcuenenëmë bitso," vaja-jaitsabiabinexa Diosojavabelia. ¹³ Pexaniajailivaisi papecacapanepaelivaisinexa, paxamë ata itsa pajumetaneme, nexata baja panajamatabëcuenecopatame Jesucristojavabelia papijajivinexamë. Nexata pacuenia Dioso tajëvelia najumecapanepaeya jumaitsi, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuenemë. ¹⁴ Espiritu Santo vajanacatsijamatabëcaexae, yapëtanetsi pexaniajaicuene Dioso vajanacarajutsinexa matacabi apo pevereverecaejava. Yapëtanetsinua Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitsitsi Diosojavabelia: "Diosomë, ayaijamatabëcuenenëmë bitso," bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcuenecopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamona Dioso pejumecovënëtsivi. ¹⁶ Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. ¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecaypëtaeyaexanaponaenexa pacuenia Dioso jamatabëcueneitsi. Nexata Espiritu Santo peja-

matabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenanua pacuenia Dioso nacatsitanajamatabëcueneitajëta. ¹⁸ Pacatovajëtabiabatsinua Diosojavabelia Dioso papecajamatatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivinexamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matabi apo peverevereaejava. Tajëvelia Dioso najumecapanepaeya jumaisi Dioso pijajivitsi vajanacarusjitsinexa matabi apo peverevereaejava. ^{19,20} Pacatovajëtabiabatsinua paneyapëtaenexa Dioso bitso pi-asaënëcuene. Vajanacayavenonaenë vajanajamatabëcuene copatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatabi Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona. ²¹ Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatacabitaje. Pejanamatcabijavabelianexa ata evetsiana. ²² Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonaenajamatabëcuene copata bajaraponëjavabelia. ²³ Daxita baja pamonaenajamatabëcuene copata Jesucristojavabelia, Dioso tanetsi Cristo pijajivi. Cristo nexata itoroba bajarapamonaenajamatabëcuene copata yjavaponapona daxita mapanacuajavaje.

Pacuenia Dioso pijajivi, piasivaxae, capanepaejitsia yabara pelivaisi

2 Dioso baja cajena pacajamatabëcueneaitavayaexana Jesucristo pejamatabëcueneita. Paxamë abaxë bajayata Dioso itsa apo pajumecovënëtsimë, naxuabiaya picani Diosovecua pajinavanapame pibisiacuene paneexanavanapaneconi yabara. Nexata pacuenia itsi petëpaevi, bajara picani pajamatabëcueneitsimë Diosojavabelia itsa abaxë Dioso apo pajumecovënëtsimë. ² Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavanapame. Pajumecovënëtavanapame picani ëdovathi, ponë eveta pitaquirijamatabëcuene mapanacuataje. Aeconoxae dovathi jamatabëcueneasaëyaexanapona pamonaenajamatabëcuene copatsivi pibisiacuene pexanaenexa. ³ Daxita picani bajayata vaxaitsi pibisiacuene exanavanapatsi. Pacuenia vajajamatabëthëtota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonae naneconita Diosojavabelia, bajara picani pacuenia vaxaitsi ata naneconitatsi Dioso-

javabelia vajanacananeconitsiaexanaenexa. ⁴ Itsiata baitsi jane Dioso, bitso jivi pitaxutotsoniataenë, vaxaitsi bitso nacajitsipa. ⁵ Diosovecua naxuabiaya picani vajinavanapaevimi ata pibisiacuene vajaexanaeconi yabara, itsiata Dioso nacajamatabëcueneaitavayaexana, Jesucristo Dioso itsa asaëyaexanatsi petëpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacapanepaena pibisiacuene vajaexanaeconimivecua. ⁶ Jesucristo petëpaecujinae, Dioso icatsia asaëyaexanatsi petëpaecujinae. Nexata vaxaitsi Jesucristojavabelia vajanajamatabëcuene copatsixae, Dioso nacatane bevajanacayajavaasaëyaexanaevi. Dioso nacatanenua Jesús athëbëtatsia bevajanacayajavaeaevi daxitacuene vajanacabarëevetsinexa. ⁷ Bajarapacuenia Dioso nacatoexana vajanacatsitanajamatabëcuene itajëtsinexa daxitamatabijavabelianexa vajanacajitsipaecue. Nacatsitanajamatabëcueneitajëtanua vajanacaitaxutotsoniataecue Jesucristo vajanacasivatëpaexae.

⁸ Dioso cajena bitso pacajitsipa. Bajaraxuata Jesucristojavabelia itsa panajamatabëcuene copatame, Dioso pacapanepaena panijaneconivecua. Bajarapacuenia Dioso papecacapanepaejavanexa, panijacuata apo panatoexanaemë. Biji rajane Dioso pejamatabëcueneita pacapanepaena. ⁹ Itsajivi ata Dioso petonacuene baponaponaejamatabëcuene, Dioso apo capanepaetsi tsane. Biji rajane Jesucristojavabelia penajamatabëcuene copatsixae, Dioso capanepaenatsi. Bajaraxuata itsajivi ata beayaijamatabëcuene jivi apo benatae Dioso pecapanepaejavanexatsi yapëtae ata. Apo bejumaitsinua: "Xanë Dioso tatonacuene bixae, nexata necapanepaena," apo bejai. ¹⁰ Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapanaenexa pexaniacuene. Bajarapacuenia Dioso tajëvelia najamatabëxaina vajatoexanavanapanaenexa.

Pacuenia Dioso pejumecovënëtsivi jamatabëcuene xanepanaeya jinavanapa Jesucristo pejamatabëcueneita yabara pelivaisi

¹¹ Panajamatabënapire pacuenia picani paxamë bajayata pajamatabëcueneitsimë tsavanapae itsa abaxë Dioso apo pajumecovënëtsimë. Paxamë apo pajudivimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: "Vaxaitsi vajanacaperabëcaucubivi, Dioso pijajivitsi nayapëtanetsi," jai tsabiabi. Paxamë pijinia apo pajudivixaemë, judíovi paxamë yabara jumai tsabiabi: "Bajarapamonaenajamatabëcuene copatsivi. Nexata Dioso apo pijajivi," jai tsabiabi judíovi paxamë yabara. ¹² Bajarapamatabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. "Pamatabi tēpaenajë, pepacuene naxuabianajë," pajamatabëjamë tsabiabi. ¹³ Paxamë

picani Diosovecua bitso naxuabiaya pajinavanapame. Itsiata baitsi jane aeconoxae baja Cristo papijajivimë. Cristo papecasivatëpaexae, aeconoxae baja payajavajinavanapame Dioso. ¹⁴ Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatëpaexae, ajibi vajanayabaraitoyacuene vajanavecuanatsanaenexa. ¹⁵ Jesucristo cruzata itsa tëpa, copiarucaeyaexana baja namataenetsia vajanaitoyacuenemi. Tsipaji baja Jesucristo itsa tëpa, copiarucaeyaexana palivaisimi bajayata Dioso Moiséspijinëta najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta penajumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuenexanepanaetsi. Aeconoxae baja Jesucristo vajajumecovënëtsixae, Jesucristo pijajivitsi nacaexana. Nexata baja Jesucristo pejamatabëcueneta nacanabarajamatabëcuene xanepanaeyaexana. ¹⁶ Jesucristo cruzata vajanacasivatëpaexae, copiarucaeyaexana baja namataenetsia vajanaitoyacuenemi. Nexata paxanë pajudíovinë, paxamë pijinia apo pajudíovi atamë, Cristo baja caebitsaëtotsi nacaexana pijajivinxatsi. Nexata baja Dioso jamatabëcuenexanepanaeya nacatane.

¹⁷ Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuenexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso patacocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. ¹⁸ Nexata Jesucristo daxitatsi vajanacasivatëpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espíritu Santo vajanacayavenonaexae. ¹⁹ Bajaraxuata apo pajudíovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonae, Dioso pejumecovënëtsivi yajava, paxamë baja Dioso papeximë pacaexana Dioso pijanacuatatsia panenajuajinavanapaenexa. ²⁰ Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtame baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuenecopabame baja Jesucristojavabelia papecacapanepaenexa. Bajaraxuata Dioso baja papeximë pacaexana. ²¹ Nexata baja itsamonae ata

ayaibitsaëttoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonae yajava, pamonaes Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espíritu Santo papecatsijamatabëcaexae.

Pacuenia Pablo itorobatsi pexanialivaisi, Jesucristo pelivaisi, petsipaebaponaenexa apo judíovijava yabara pelivaisi

3 Paxamë apo pajudíovi atamë, Dioso papijajivixamë, pacatovajëtabiabatsi Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: "Pamonae apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi," janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. ² Bepayapëtaneme xanë Dioso taneitorobicuene patacatsipaebinexa apo pajudíovi atamë Dioso papecaitaxutotsoniataejava. ³ Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyaexana. Dioso papecaitaxutotsoniataexae papecacapanepaevanexa ata tayapëtaenexa, Dioso baja cajena neyapëtaeyaexana. Nexata Dioso papecaitaxutotsoniataejava paneyapëtaenexa, pacatoyaquinarutetatsi caelivaisiyobeje saya. ⁴ Itsa palebianame, payapëtaename pacuenia Dioso neyapëtaeyaexana epajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papecaitaxutotsoniataejava. ⁵ Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papecaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papecaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papecaitaxutotsoniataejava. Aeconoxae baja bajarapacuenia Dioso paneyapëtaeyaexana Espíritu Santo pejamatabëcueneta. ⁶ Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panepanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonaetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsipaeba.

⁷ Piasaënë Dioso taneitaxutotsoniataexae, netocopata Jesucristo pelivaisi tatsipaebaponaenexa daxitajivijava. Dioso necaējēpaeyaexananua xaniavaetsia jivi tatsipaebaponaenexa bajarapalivaisi. ⁸ Xanē itsiata beveliamatabēcuenenēnē nataniji daxita Dioso pejumecovēnētsivivecua. Itsiata baitsi jane mapapexaniacueenje Dioso netocopata. Dioso netocopata apo pajudíovimējava patacatsipaebaponaenexa pexanialivaisi, Jesucristo pelivaisi. Nexata pacatsipaebaponaatsi ayaicuenia Jesucristo vajanacayavenonaponaevanexa. ⁹ Dioso nitoroba patacatsipaebaponaenexa, apo pajudíovi atamē, Dioso papecacapanepaejavanexa. Dioso daxitacueene pexanaenē mapanacuataje. Dioso cajena tajēvelia najamatabēxaina paxamē ata, apo pajudíovi atamē, papecacapanepaenexa. Itsiata itsajivijavabelia ata Dioso apo yapētaeyaexanae, apo pajudíovi atamē, Dioso papecacapanepaejavanexa. ¹⁰ Bajarapacuenia Dioso pacacapanepaena, apo pajudíovi atamē, petsitanajamatabēcuenē itajētsinexa athēbētatsia pevetsivijavabelia. Nexata athēbētatsia pevetsivi itsa nacataena daxitatsi Dioso vajajumecovēnētsivi, pajudíovinē, apo pajudíovi atamē, benacaemonaetsi vajanajuajinavanapaejava, athēbētatsia pevetsivi yapētaena bitso Dioso peyapētaenēcuenē daxitacueene pexanaenexa. ¹¹ Pacuenia Dioso tajēvelia copiaya najamatabēxaina, mapanacua pexanaevajēnaeya ataje, bajarapacuenia baja Dioso exanaevereta. Tsipaji baja Dioso itorobica vajatuxanenē Jesucristo vajanacasivatēpaenexa cruzata. ¹² Vaxaitsi baja najamatabēcuenecopatatsi Jesucristojavabelia vajanacacapanepaenexa. Bajaraxuata Diosojavabelia vajētabiabatsi ajumejunavijibia. ¹³ Bajaraxuata Diosojavabelia asaēyata pacatovajētabiabatsi patanesivajamatabēcuenē cueranaeyanivamē abaxē naneconitsia taponaponaevajava penaneconitsivi pejebabiabibota. Jesucristo pelivaisi jivi tatsipaebijavata, jumaitsinē tsabiabi: "Pamonae apo judíovi ata itsa jumecovēnēta Jesucristo pelivaisi, bajarapamonae ata Dioso pijajivi," janē tsabiabi paxamē yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavēna judíovi naneconitsiaexaneta. Bajaraxuata panesivajamatabēcuenēbarēyamēre naneconitsia taponaponaevajava penaneconitsivi pejebabiabibota.

Pacuenia Pablo Diosojavabelia tovajēta Dioso pejumecovēnētsivi yabara pelivaisi

¹⁴ Itsa najamatabēnapitabiabajē, apo pajudíovi atamē, Dioso papecacapanepaejavanexa, nexata tamatabacabēta nucabiabajē asaēyata patacatovajētsinexa vajatuxanenē Jesucristo paxa Diosojavabelia. ¹⁵ Daxita Dioso pijajivi, pamonae athēbētatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenē paxa exana Dioso. ¹⁶ Dioso baja cajena bitso piasaënë. Ayaijamatabēcuenē pexainaenē. Bajaraxuata pacatovajētabiabatsi Diosojavabelia Dioso pesaēta papecajamatabēcuenē asaēyaexanaenexa Espiritu Santo

pejamatabēcueneta. ¹⁷ Pacatovajētabiabatsinua Jesucristo papecatsijamatabēecaenexa panesivanajamatabēcopatsixae bajaraponējavabelia. Pacatovajētabiabatsinua bitso paneasivanexa itsamonae ata, pamonae Dioso pejumecovēnētsivi. ¹⁸ Pacatovajētabiabatsinua daxita Dioso panejumecovēnētsivi panejamatabēcueneyapētaenexa Jesucristo bitso papecaasivajava. ¹⁹ Pacatovajētabiabatsinua panijacuata xaniavaetsia paneyapētaenexa Jesucristo vajanacaasivajava. Jesucristo vajanacaasivajava, bitso pexaniacueene, apo vajayapētaecapanepaejava xaniavaetsia vajayapētaenexa. Nexata itsa payapētaename Jesucristo vajanacaasivajava, paxainaename pajamatabēcuenē Dioso pacatojitsipa.

²⁰ "Diosomē, bitso ayaijamatabēcuenenēmē," jaitsi vaxaitsi Diosojavabelia. Bajarapacuenia jumaittsi tsi-paji bitso Dioso pecaējēpaenētsi vajanacayavenon-aenexa. Dioso caējēpatsi vajanacatoexanaenexa vajavajētsicuenia. Vajanajamatabēxainaejava ata mata-toxenetsia, Dioso caējēpatsi vajanacatoexanaenexa. Dioso pesaēta nacayavenonabiaba. ²¹ Dioso pejumecovēnētsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabēcuenē pexainaenēcuenē. Jesucristo ata itsa ponapona mapanacuataje, nexata Dioso tsitanajamatabēcuenēitajēta jivijavabelia Dioso bitso ayaijamatabēcuenē pexainaenēcuenē. Bajaraxuata daxitajivi bejumai tsabiabi Diosojavabelia: "iDiosomē, bitso ayaijamatabēcuenenēmē!" bejai tsabiabi Diosojavabelia daxitamatacabijavabelianexa. Bajara itsi tsane.

Pacuenia Espiritu Santo pejamatabēcueneta daxita Dioso pejumecovēnētsivi najamatabēcuenējēpaeya jinavanapaena yabara pelivaisi

4 Naneconitsiaponaponajē majotaje, penaneconitsivi pejebabiabibota, tajumecovēnētsixae vajatuxanenē Jesucristo taneitorobicuenia. Asaēyata pacamuxujibatsi panejinavanapaenexa pacuenia Dioso pacatojitsipa Dioso papecajunatsivi papijajivinexamē. ² Itsamonaevecua beveliamatabēcuenēvi nataeya pajinavanapare. Panajamatabēxainarenua pexaniajamatabēcuenē daxitajivijavabelia. Pajamatabēcuenēsaēmērenua tsavanapae bajayajebi, itsamonae pacait-sacueniababiabi ata. Namataenetsianua panayavenonabiabare namataenetsia panenasivaxae. ³ Pajamatabēcuenēsaēmēre tsavanapae najamatabēcuenējēpaeya panejinavanapaenexa. Bajaraxuata yabara Diosojavabelia panatovajētabiabare papecayavenonaenexa Espiritu Santo. Nexata nabarajamatabēcuenēxanepanaeya pajinavanapaename. ⁴ Jesucristojavabelia vajanajamatabēcuenecopatsixae, vaxaitsi baja nexata caenē Jesucristo pijajivitsi. Xainatsi baja caeEspiritu Santo Dioso vajanacajunatsivi. Bajaraxuata caejamatabēcuenē xainavanapatsi. Evetavanapatsi pacuenia Dioso najumecapanepaeya jumaittsi vajanacacapanepaenexa. ⁵ Caenē rabaja vajatuxanenē Jesucristo. Daxitatsi najamatabēcuenecopatatsi caenējavabelia. Nacabautisabanua caenē Jesucristo

pevënëta. ⁶ Xainatsi caenë vaxa Dioso. Caenë Dioso daxitatsi vajanacanamatacaitorobinë. Dioso pijajivitsi, daxitatsi, nacayavenona. Nacayavaponaponanua.

⁷ Caejivitsi canacujitsia, Cristo pejitsipaecuenia nacajamatabëcuene caējëpaeyaexanapona pecovëta vajatonacuenebavanapaenexa vajanacaitorobicuenia. ⁸ Tsi-paji baja cajena Dioso pejumelivaisibaxutota tajëvelia jumaiti Jesucristo yabara mapacueniaje:

Ayaibitsaëtoخانeto pitoyavitsi pepuajamatabëcueneamoneyabi, athëbëabetsia naviatsiania. Pijajivi pijinia pepuajamatabëcuene caējëpaeyaexanae pecaējëpaejamatabëcueneitsi pecovëta petonacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaiti. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatsijitsia athëbëabetsia. Mapanacuaje bevelianacua saya Dioso pijanacuavecu. ¹⁰ Ponë yabara Dioso pejumelivaisibaxutota bajarapacuenia tajëvelia jumaiti, patsica baja mapanacuayabetsicaje. Bajaraxuacujinae icatsia bajaraponë naviatsia baja tajënacuyabetsia. Bajaraxuacujinae Jesucristo itorobica Espiritu Santo. Nexata daxitanacuanëjava Espiritu Santo yajavaponapona daxita Dioso pejumecovënëtsivi. ¹¹ Nexata Dioso pejumecovënëtsivi, caejivi canacujitsia, Espiritu Santo jamatabëcuene caējëpaeyaexanapontsi saicayacuenia. Itsamonae Espiritu Santo jamatabëcuene caējëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonae pijinia Espiritu Santo jamatabëcuene caējëpaeyaexanatsi peyapëtaenexa pajamatabëcuene livaisi xaina Dioso pejumelivaisi. Nexata tsipaeba itsamonae javabelia. Itsamonae pijinia Espiritu Santo jamatabëcuene caējëpaeyaexanatsi petsipaebaponaenexa apo peyapëtaevi abaxë pexanialivaisi, Jesucristo pelivaisi. Itsamonae pijinia Espiritu Santo jamatabëcuene caējëpaeyaexanatsi pevetsinexa Dioso pejumecovënëtsivi. Jamatabëcuene caējëpaeyaexanatsinua xaniavaetsia peyapëtaeyaexanaenexa Dioso pijacuene. ¹² Bajarapacuenia Espiritu Santo, daxita Dioso pejumecovënëtsivi, jamatabëcuene caējëpaeyaexanatsi petonacuenebavanapaenexa Dioso pijacuene. Nexata daxita Dioso pejumecovënëtsivi, caejivi canacujitsia, ajamatabëcuenesaë tsaponae pevajënaeyabelia. ¹³ Nexata belia daxitatsi bajarapacuenia najamatabëcuenejëpaeya jumecovënëtsianatsi Dioso. Jamatabëcuene yapëtaenatsinua xaniavaetsia vajatuxanenë Jesucristo, Dioso pexënato. Nexata daxitatsi Espiritu Santo nacajamatabëcuene caējëpaeyaexanaena Dioso vajajumecovënëtsinexa. Nacajamatabëcuene caējëpaeyaexanaenanua xaniavaetsia Dioso vajatojinavanapaenexa. Nexata pacuenia Jesucristo jamatabëcueneitsi, bajara vaxaitsi ata jamatabëcueneitsi tsane. Nexata jinavanapaenatsi pacuenia Dioso nacatojitsipa. ¹⁴ Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcueneitsi tsane. Itsajamatabëcuene

apo vecuanajamatabëxainatsi tsane, palivaisi baja jumecovënëtanapatsi. Nexata itsamonae pena-jumetsënëtsilivaisi bepexaniajailivaisicuenia nacatsipaebi ata tsane vajanacayamaxëitojorobinexa picani, itsiata apo nacayamaxëitojorobi tsane. ¹⁵ Nexata itsamonaejavabelia itsa tsipaebapontsi pexaniajailivaisi, bajarapamonae asivaya betanetsi. Pacuenia Cristo vajanacaitorobinë jamatabëcueneitsi, bajara vaxaitsi ata vajajamatabëcueneitsinexa, benatojitsipatsi Cristo vajajamatabëcuenejëpaenexa. ¹⁶ Daxitatsi Cristo pelivaisi vajajumecovënëtsivi, caenë Cristo pijajivitsi. Vajaperabëtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuenevitsabaponaenatsi Dioso vajajumecovënëtsijava.

Pacuenia Cristo pijajivi pejanajamatabëcuene xaina yabara pelivaisi

¹⁷ Jesucristo taneitorobixae, mapacuenia pacajumait-sijitsiatsije. Pëtsa baja pajinavanapame pacuenia jinavanapa Dioso apo peyapëtaevi. Dioso apo pejumecovënëtsivi najamatabëxainavanapa pexanaenexa piamatamobicuene Diosojavabelia. ¹⁸ Dioso apo pejumecovënëtsivi ajamatabëcueneitaquiri tsavanapae. Tsipaji apo yapëtae Dioso. Bitso saya ajamatabëcuenetaja. Bajaraxuata Dioso pejitsipaecuenia apo tojinavanapae. Diosovecu naxuabiaya jinavanapa. ¹⁹ Nexata apo yapëtae piauracuene. Casaë bitso pexanaenexa daxita xua pibisiacuene. ²⁰ Itsiata baitsi jane paxamë itsa pajumecovënëtamë Jesucristo pelivaisi, apo pacaitorobi pibisiacuene paneexanaenexa. ²¹ Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. ²² Nexata pacopabare panijaperujujamatabëcuene. Bajarapajamatabëcuene bajayata abaxë Dioso itsa apo pajumecovënëtsimë, pacaitorobabiaba pibisiacuene paneexanaenexa. Panijaperujujamatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. ²³ Paxamë Diosojavabelia panajamatabëcuene pënëyorore. Papejanajamatabëcuenevimë panaexanare. ²⁴ Pacuenia Dioso jamatabëcueneitsi, bajara paxamë ata pajamatabëcueneitsimëre. Nexata jivi xaniavaetsia patsitajinavanapaenexa pacuenia Dioso pacatojitsipa.

²⁵ Bajaraxuata pëtsa baja panajumetsënëtamë. Pacaenë caejitsia namataenetsia panatsipabare pexaniajailivaisi. Tsipaji daxitatsi caenë Jesucristo pijajivitsi.

²⁶ Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcuene sitecame itsamatacabijav-

abelia ata. ²⁷ Tsipaji itsa panasivajamatabëcuene tsitecaejitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pëtsa pacuaicuaijamë pibisialivaisi. Biji rajane pacuaicuaijamëre pexanialivaisi. Pexanialivaisi itsa pacuaicuaijamë tsane, nexata papecajumetaevi pajamatabëcuene yavenonaename. Tsipaji paepatota jamatabëcuene faefaena, itsa pacajumetaena, pacamuxunaajamatabëcuenesaë tsane. ³⁰ Pëtsa itsacuene paexaname Espiritu Santo papecatojitsipaecuenevecuane panejamatabëcuene bejiobitsianiva Espiritu Santo. Dioso pija Espiritu Santo papecatsijamatabëcaexae, panayapëtaneme pepacuene Dioso papijajivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

³¹ Daxita pibisijamatabëcuene pacopabare. Pacopabarena baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja paneajamatabëcuene bejjava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuenia panebijataeyabiabijava ata. Pacopabarena baja itsamonae pibisiacuenia panebaracuaicuaijatsabiabijava ata. ³² Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

Pacuenia Dioso pexi bejinavanapa yabara pelivaisi

5 Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. ² Pacuenia bitso Cristo nacaasiva, bajara pijinia pacuenia paxamë ata bitso pasivamëre tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuena ovejavi rajutabiaba Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vaneconi vajanacavecuajibiaexanaenexa. Bajarapacuenia Cristo bitso vajanacaasivaxae, itsa nacopata vajanacasivatëpaenexa, nexata paxa Dioso bitso sivajamatabëcuenebarëyatsi.

³ Paxamë rabaja Dioso papijajivimë. Bajaraxuata pëtsa baja paexaname daxita xua pibisiacuene. Pëtsa panajamatabëxainamenua pibisiacuene paneexanaenexa panevitota. Pëtsa panajamatabëxainamenua bitso panenaxainaeyabinexa daxitacuene mapanacuapijicueneje. ⁴ Pëtsa panabarëcuaicuaijamënuapiauracuene yabara ata. Pëtsa panabarëcuaicuai-

jamënuu saya jema natsiquejemalivaisixi ata. Tsipaji apo pexanepanaecuene. Biji rajane Diosojavabelia pexaniajamatabëcuene parajutabiabianame. ⁵ Payapëtaneme rabaja pexaniajaicuene mapalivaisije. Pajivi daxita pibisiacuene exana, apo jone tsane Dioso pijanacuayabetsia. Ponë jaita itsava pijavavecuu, pova pijinia jaita itsanë pamonavecuu, apo jone tsane Dioso pijanacuayabetsia. Pamonae ata bitso jitsipa pexainaenexa daxitacuene mapanacuapijicueneje, apo jone tsane Dioso pijanacuayabetsia. Pamonae bitso jitsipa pexainaenexa daxitacuene mapanacuapijicueneje, jamatabëcuenejëpa pamonae vajëcabiaba jumapecataeya pexanaenëanëjavabelia. Bajarapamonae jamatabëcuenejëpa tsipaji bitso jitsipa saicayacuene Diosovecuu. ⁶ Pëtsa pacayamaxëitojoroba itsajivi ata paxamë ata paneexanaenexa bajarapitsipibisiacuene. Tsipaji Dioso ayaicuene naneconitsiaexanaena pamonae Dioso apo pejumecovënëtsivi, bajarapitsipibisiacuene pexanaevi. ⁷ Bajaraxuata pëtsa payajavajinavanapame pibisiacuene pexanaevi.

⁸ Paxamë picani bajayata pajamatabëcueneaitaquirimë tsavanapae itsa abaxë apo payapëtaemë pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabëcopatsixae, Dioso baja pacajamatabëcueneitayota. Bajaraxuata pajinavanapare Dioso pejitsipaecuena, pacuenia Dioso pijajivi jinavanapa. ⁹ Dioso baja papecajamatabëcueneitayotsixae pexanialivaisita, paexanavanapare ëpexaniacuene. Pacanaëjëtaponarenuu ëpexaniajaicuene paneypëtaenexa, xaniavaetsia panejinavanapaenexa Dioso pejitsipaecuena.

¹⁰ Panevajënaeyabelia pacanaëjëtaponare paneypëtaenexa xua yabara Dioso pacasivajamatabëcuene barëyajitsia. Nexata itsa payapëtaename xua yabara Dioso pacasivajamatabëcuene barëyajitsia, bajaraxua tsiteca asaëyata panevajënaeyabelia paexanavanapae-name. ¹¹ Dioso apo pejumecovënëtsivi pibisiacuene itsa exanavanapa, pëtsa panaexaname bajarapapibisiacuene. Biji rajane paitavetsianame bajarapamonae pibisiacuene pexanaeyaniva Dioso pitabarata. ¹² Xua bajarapamonae exana muetsia, bajaraxua bitso pibisiacuene. Nexata itsajivi itsa cuenetaejitsipatsi bajaraxua pexanaejava, bajarapajivi bitso ajumeura tsipae juya petsipaebinexa itsamonaejavabelia. Tsipaji bitso pibisiacuene xua muetsia exana bajarapamonae. ¹³ Itsiata baitsi jane bajarapamonae itsa paitavetsianame Dioso pejumelivaisita, nacueneyapëtaena bajarapamonae bitso pibisiacuene pexanaejava. ¹⁴ Bajaraxuata pina bajarapamonae yabara, itsamonae Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamë. Bajaraxuata Diosovecuu naxuabiaya pajinavanapame. Pacopabare baja pitaquirijamatabëcuene. Nexata Cristo pejamatabëcueneta panijaneconivecuu Dioso pacapanepaena. Pacajamatabëcueneitayotsiana, jai pina itsamonae Dioso pijajivi.

¹⁵ Nexata baja xania tsane. Panayajivitaema pibisi-acuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene. ¹⁶ Dioso papecaitorobicuenia xaniavaetsia patojinavanapare daxitamatacabijavabelianexa. Pamuxujiobiabare itsamonaeta Cristo pelivaisi pejumecovënëtsinexa. Tsipaji mapanacuapijivije, Dioso apo pejumecovënëtsivi, ëpibisiacuene exanavanapa. ¹⁷ Pëtsa pajinavanapame pacuenia Dioso apo peyapëtaevi jinavanapa. Pacaasaëmëre tsavanapae Dioso panejumecovënëtsijava, pacuenia Dioso pacatojitsipa paneexanavanapaenexa. ¹⁸ Pëtsa paitajibimë tsabiabi. Tsipaji bajarapacuenie Diosovecua pacanaxuabiaexanaejitsipa infiernojavabelia. Biji rajane panacopatabiabare Espiritu Santo papecatsijamatabëvënëcaenexa, Espiritu Santo papecaitorobicuenia paneexanabiabinexa. ¹⁹ Namataenetsia panatsipaebabiabare vajatuxanenë ayaijamatabëcuene pexainacuene. Bajarapacuenia namataenetsia itsa panatsipaebabiabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espiritu Santo jemata pacanaxëanaeyaexanaena. ²⁰ Pajumaitsimë tsabiabi tsane Diosojavabelia: "Xanepana rabaja. Tsipaji bitso pexaniacuene panetoexaname," pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

Pacuenia muxujiobatsi penapitsijivibeje yabara pelivaisi

²¹ Padaxitamë namataenetsia panajamatabëcueneevere, xua jamatabëpanaitorobame, namataenetsia panaitorobabiabinexa Cristo panejumecovënëtsivixae.

²² Paxamë papetiriavimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata. ²³ Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacapanepaenexa daxita vaxaitsi vajanajamatabëcueneecopatsivi Cristojavabelia. Daxitatsi caenë Cristo pijajivitsi. ²⁴ Nexata bejumecovënëtavapanatsi pacuenia nacaitorobapona Cristo. Bajara pijinia pacuenia paxamë ata, papetiriavimë, bepajumecovënëtavapanapame daxita pacuenia pacaitoroba paneamonajivi.

²⁵ Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinexatsi vajanacapanepaenexa vajaneconivecua. ²⁶ Bajarapacuenia Cristo exana caenë Cristo pijajivitsi va-

janacaexanaenexa. Nexata baja Cristo vajanacaajamatabëcuene xuirajibiaexanaejava, najamatabëcueneitajëtatsi vajanacabautisabijavata. Vajajumecovënëtavapanapaxae Dioso pejumelivaisi, nacaajamatabëcuene xuirajibiaexanaepona. ²⁷ Bajarapacuenia Cristo exana daxita Dioso vajajumecovënëtsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaneconijibivi, Dioso vajanacajamatabëcueneexaniavaetsivi. ²⁸ Nexata pebijivi bitso biasiva pijavajivi. Pacuenia pijacuata naperabëasiva, bajarapacuenia biasiva pijavajivi. Nexata ponë asiva pijava, bajaraponë asiva pijava pacuenia pijacuata naperabëasiva. ²⁹ Itsajivi ata apo naperabëitoya. Biji rajane xaniavaetsia naperabëeveta. Bajara pijinia pacuenia Cristo ata nacaeveta daxita Dioso vajajumecovënëtsivi. ³⁰ Tsipaji vaxaitsi Cristo pijajivitsi, ayabitsaëto atatsi, becaejivitsi Dioso nacatane. ³¹ Nexata nayapëtane pexaniajacuene mapacueneje. Pebi petiriva itsa pita pijavanexa, naexanabeje becaejivi peperabëtocuenia. Tsipaji Dioso pejumelivaisibaxutota jumaitsi mapacueniaje: "Pebi itsa nacojioba, paxavecua, pena atavecua, bavecuanatsata pijavajavabelia. Nexata anijajivimibeje becaejivicuenia naexanabeje," jai Dioso pejumelivaisibaxutota. ³² Mapalivaisije bitso ayapëbeje vajajumeyapëtaenexa. Itsiata baitsi jane comparacióncuenia nacayapëtaeyaexana. Cristo vajanacaasivaxae, vaxaitsi Cristo pijajivitsi Dioso nacatane becaenë Cristo peperabëtotsi. ³³ Bajarapalivaisi comparacióncuenia pacayapëtaeyaexana nexata paxamë, pacanenëmë canacujitsia, paneasivanexa panijavajivi. Nexata panijavajivi pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

6 Paxamë papeximë, Dioso panejumecovënëtsivixae, pajumecovënëtabiabare paneaxajivi, paneenajivi ata. Bajarapacuenia panijamonae pajumecovënëtabiabare. Tsipaji bajarapacuenia Dioso pacatocopata panejumecovënëtabiabinexa panijamonae.

²⁻³ Dioso pejumelivaisibaxutota jumaitsi mapacueniaje: "Yaiyataema axa. Yaiyataema ena ata nejamatabëcuenebarëyanexa, neponaponaenexanua bajajajebi mapanacuataje," jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. Itsalivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovënëta bajarapalivaisi.

⁴ Paxamë panexi panexinaevi, anaeyacuena pëtsa panexi paitorobabiabame papecabaraanaepanaeyaniava. Biji rajane xaniavaetsia panacoxivitsare papecajumecovënëtabiabinexa paneitorobijava. Pacujarubarenuva Dioso pejumelivaisi pejumecovënëtsinexa.

⁵ Paxamë pijinia itsamonaë papijajivimë, dajubicuenia papecacanajetsivi, itsamonaë amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaëyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

⁶ Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebi-jitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëëthëtovetsina. ⁷ Jamatabëcuenebarëyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: "Maxuaje nacuenebajë apo ëtajatuxanenënexa. Taniji pepo tajatuxanenë, Cristo, betatonacuenebijava," pasivajamatabëjamëre panijatuxanevi panetonacuenebijava yabara. ⁸ Payapëtaneme rabaja mapacueneje. Pajivi pexaniacuene toexana itsamonaë ata, bajarapajivi matamotsianatsi Dioso. Pamonaë ata dajubicuenia canajetatsi itsamonaë amoneya petonacuenebabiabinexa, bajarapamonaë ata Dioso matamotsianatsi pexaniacuene itsa toexana itsamonaë ata. Pamonaë ata apo pecanajetsivitsi, bajara pijinia pacuenia bajarapamonaë ata Dioso matamotsianatsi pexaniacuene itsa toexana itsamonaë ata.

⁹ Paxamë pijinia papijatuxanevimë, pacamuxujjobatsi mapacueniaje. Xaniavaetsia pataema panijajivi, papecatonacuenebivi. Pëtsa anaëya patiobabiabame panijajivi asaëya papecatonacuenebabiabinexa. Pacanaëjere pacuenia paxamë ata panijatuxanenë Dioso eca athëbëtatsta. Pamonaë ata apo pecanaia. Bajaraponëjavabelia pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaëya nacatane daxitatsi. Nexata paneconivajëto xainatsi caejivitsi canacujitsia, bajarapaneconivajëtota nacananeconitsiaexanaponaena. Bajaraxuata panijajivi ata itorobajë xaniavaetsia papecatonacuenebabiabinexa.

Pacuenia Dioso pejumecovënëtsivi itorobatsi penayajivitaenexa dovathi yabara pelivaisi

¹⁰ Tajamonaë, icatsia cotocaevi patacatoyaquinaelivaisita, pacajumaititsi mapacueniaje. Pajamatabëcuene-saëmëre tsavanapae vajatuxanenë pesaë paneyajavajinavanapaexae. ¹¹ Vajabitsaënë banayajivinaxatata piatajajava pijavajabitsaënë pejorojoronaëyanivatsi. Bajara pijinia pacuenia paxamë ata panayajivinajamatabëcuene-xatare Dioso pejumelivaisita. Nexata bajarapacuenia pajamatabëcuene-saëmë tsane dovathi papecajamatabëcuene yamaxëitojorobianiva.

¹² Tsipaji Dioso vajanacatojitsipaecuenia itsa exanavanapatsi, nexata dovathi jamatabënacaitacueniaba. Nexata bëpënëa vajajamatabëcuene-saëta asaëyata vajabitsaë bexanatsi, dovathi pijajivijavabelia, apo vajataevijavabelia. Dovathi cajena pijajivi ayabitsaëtoxaneto. Dovathi pijajivi xaina penamatacaitorobivitsi, bitso pijamatabëcuene-saëvi. Nexata dovathi pijajivi jinnanapata athëbëtatsta. Jinavanapata mapanacuata ataje. Nexata dovathi pijajivi itoroba daxitajivi pibisiacuene pexanaëyaexanaenexatsi mapanacuataje. Bajaraxuata bëpënëa vajajamatabëcuene-saëta, asaëyata vajabitsaë bexanatsi dovathi pijajivijavabelia. ¹³ Nexata paxamë dovathi papecajamatabëcuene yamaxëitojorobianiva, panayajivinajamatabëcuene-xatare Dioso pejumelivaisita. Nexata pamatacabi pibisiacuene paca-tocopiapatsiana dovathi pejamatabëcuene-papecajamatabëcueneëjëtisnexa, itsiata pajamatabëcuene-saëmë tsane bajarapalivaisita. Nexata pibisiacuene apo paexanaemë tsane. ¹⁴ Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo tixitsitsi pecovëvecua. Bajara pijinia pacuenia paxamë ata pajamatabëcuene-saëmëre Dioso pejumelivaisita dovathi papecajopaëyaëxanayaniva Dioso pejumelivaisi panejumecovënëtsi-javavecua. Vajabitsaënë piatajajava itsa nayajivinaxatata, bayanaëpacëta penaëpacëtsijavata pesarabianivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuene-xatare. Vajabitsaënë piatajajava banamëpabëxatata pijavajabitsaënë pejorojoronaëyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuene-xatare. Pajamatabënanajinavanapare Dioso baja aneconijibia papecataëjava. Nexata dovathi nayajivitaëya paji-navanapare papecajamatabëcuene yamaxëitojorobianiva. ¹⁵ Vajabitsaënë najamatabëcuene-veretsi-ya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcuene-verere, jamatejema pexanialivaisi jivi panetsipaebavanapaenexa. Daxita baja pamonaë jumecovënëta bajarapalivaisi, Dioso baja barajamatabëcuene-xanepanaëya tanetsi. ¹⁶ Panajamatabëcuene-copare Diosojavabelia papeca-yavenonabiabinexa. Vajabitsaënë banayajivicapona escudovënëjava, pijavajabitsaënë itsa bixabajarabatsi piupitarunutsipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuene-caranatsiana, itsa panajamatabëcuene-copatsianame Diosojavabelia papeca-yavenonabiabinexa. ¹⁷ Vajabitsaënë banamataxatata piatajajava, cascovënëjava, pematathinaxuabianivatsi pijavajabitsaënë. Bajara pijinia pacuenia paxamë ata panayajivinajamatabëcuene-xatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicapona espada. Bajara pijinia pacuenia paxamë ata panayajivicaponare Dioso

pejumelivaisi, palivaisi baja pacayapëtaeyaexana Espíritu Santo. ¹⁸ Dioso pejumelivaisita najamatabëcuenexatatsiaya itsa pajinavanapaename, nexata pacuenia Espíritu Santo pacaitoroba, daxitamatacabi canacujitsia Diosojavabelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobiyani. Nexata pacopatsinejevamë Diosojavabelia panevajëtabiabijava, ajamatabëcueneitatsacaya Diosojavabelia panayajivivajëtabiabare. Asaëyata patovajëtabiabarenu daxita Dioso pejumecovënëtsivi. ¹⁹ Xanë ata panetovajëtabiabarenu Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarenu ajumeurajibia tatsipaebabiabinexa apo judíovi ata Dioso pecapanepaejavanexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tane-tocopatsilivaisi. Bajaraxuata Diosojavabelia panetovajëtabiabare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoyaquinaelivaisi mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. ²² Bajaraxuata Tíquico pacatoitorobatsi baja paxamëjavabelia papecatsipaebinxaxa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuene-saëmë tsane. ²³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, jamatabëcuenexanepanaeya panejinavanapaenexa. Pacatovajëtabiabatsinua namataenetsia panenasivanexa Diosojavabelia panenajamatabëcuenecopatsivixae. ²⁴ Pacatovajëtabiabatsinua Diosojavabelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

FILIPENSES

Pacuenia Pablo toyaquina mapabaxutoje Dioso pe-jumecovënëtsivi, Filipos tomarapijivjavabelia, pamatacabi naneconitsia ponapona penaneconitsivi pejebabi-abibota yabara pelivaisi

1 Xanë Pablonë, Timoteobeje, Jesucristo papijajiv-tonënëbeje. Pacatoyaquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavanapaevi. Paancianovimë, paxamë ata padiaconovimë, pacatoyaquinatsibeje. ² Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoni-ataenexa jamatabëcuenexanepanaeya panejinavana-paenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanamatabënapitatsi Diosojavabelia tava-jëtsijavata, jumaitsinë tsabiabi Diosojavabelia: "Xani-avaetsia yavenonabiabame nijajivi, Filipos tomarapijivi," janë tsabiabi Diosojavabelia paxamë yabara. ⁴ Itsa vajëtajë Diosojavabelia, nexata pacatovajëtabiabatsi jamatabëcuenenabarëyaya. ⁵ Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabi-abame tanamatavenonaevaxi yabara. Patsipaebabi-abamenua Jesucristo pelivaisi itsamonaevjavabelia. ⁶ Yapëtaniji baja cajena pacuenia Dioso pacayavenon-aejitsia bitso pexaniajamatabëcuenen panexinavana-paenexa. Tsipaji baja Dioso taxuxuaba papecajamaatabëcuenen xanepanaeyaexanaenexa. Bajaraxuata panevajënaeyabelia Dioso pacajamatabëcuenen xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa. ⁷ Bajarapacuenia paxamë patacasivanajamatabëx-ainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaevetsivi pitabarata nenuta Jesucristo pelivaisi jivi tatsipaebaponaevaxi yabara. Nexata bajarapamatacabi jumaitsinë bajarapamonaevjavabelia: "Mara palivaisije, Jesucristo pelivaisi, pexaniajailivaisi cajena jivi pecapanepaelivaisinexatsi Diosojavabelia," janë nacuaevetsivijavabelia. ⁸ Dioso cajena nejamaatabëcueneyapëtane pacuenia bitso paxamë pacaasivatsi. Jesucristo neyavenona bitso patacaasivanexa. ⁹ Pacatovajëtatsi Diosojavabelia itsamonaev ata bitso

paneasivatsavanapaenexa panevajënaeyabelia. Pacatovajëtatsinua paneyapëtaenexa Dioso. Pacatovajëtatsinua paneyapëtaenexa xua Dioso pacatojitsipa paneexanavanapaenexa. ¹⁰ Nexata payapëtaenename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacaëjëpaena xaniavaetsia panejinavanapaenexa aneconijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaenename. ¹¹ Nexata ëpexaniajamatabëcuenen paxainaenename panejamatabëëthëtojavavetsina Jesucristo papijajivixamë. Nexata itsamonaev paxamë yabara jamatabëjumaitsi tsane Diosojavabelia: "Diosomë, ayajamatabëcuenenëmë bitso. Pexaniacuenen bitso toexanename Filipos tomarapijivi ëpexaniajamatabëcuenen pexainaenexa pejamatabëëthëtota," jamatabëjai tsane itsamonaev Diosojavabelia paxamë xaniavaetsia panetsitajinavanapaexae.

Pacuenia Pablo jumecovënëtaponapona Cristo yabara pelivaisi

¹² Tajamonaev, payapëtaneneme rabaja pajamatabëcuenen yabara naneconitsia ponaponajë penaneconitsivi pejebabiabibota. Jitsipajë paneyapëtaenexa mapacuenen. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanë neetsi ata penaneconitsivi pejebabiabibota, itsiata apo yacaranatsicapanepepe pexanialivaisi, Jesucristo pelivaisi, peyacaëjëpapon-aenexa daxitanacuanëjava. Nexata baja aeconoxae bajarapalivaisi pevajënaeyabelia yacaëjëpaponadaxitanacuanëjava daxitajivi Diosojavabelia peca-panepaenexatsi. ¹³ Nacuaevetsinë pijabopijivi, vajabitsaë, daxita itsamonaev ata, neyapëtane majota naneconitsia taponaponaevaxi Jesucristo pijajivitonëxenë. ¹⁴ Mapatomarataje ayaibitsaëttoxaneto Dioso pejumecovënëtsivi, itsa nevënëtane tananeconitsiaponaponaejava, najamatabëcuenensaëtavanapa. Diosojavabelia asaëyata najamatabëcuenenecopaba peyavenon-aenexatsi. Nexata ajumejunavijibia Dioso pejumelivaisi tatsipaebapona itsamonaevjavabelia.

¹⁵ Pamonaev ajumejunavijibia Dioso pejumelivaisi tatsipaebapona itsamonaevjavabelia, bajarapamonaevajuvënëvi, panecuenecaëba. Nexata itsamonaevjavabelia asaëya tatsipaebapona Cristo pelivaisi. Bajarapamonaev xanë yabara jamatabëjumaitsi: "Pablo bitso ayaicuenia Dioso pejumelivaisi jivi nacatsutsipaebapona. Pacue-

nia bajaraponë tsipaebapona, matatoxenetsia vaxaitsi tsipaebaponaenatsi jivi vajanacayaiyataenexa," jamatabējai bajarapamonae. Itsiata itsamonae, bajarapamonaeajuvēnēvi, taneyavenonaenexa, itsamonaejavabelia tsipaebapona Cristo pelivaisi bajarapamonae ata xaniavaetsia pejumecovēnētsinexa. ¹⁶⁻¹⁷ Itsamonae tsipaebapona Cristo pelivaisi pejumetaevitsi saya peyaiyataenexatsi, pepēnaponaenexatsinua. Bajarapamonae pejamatabēēthētovetsina apo jumecovēnētsi ata Cristo, saya jema Cristo pelivaisi tsipaebapona. Jamatabējumaitsi: "Vecae Pablo naneconitsiaponaponae penaneconitsivi pejebabiabibota, pecovēta itsajamatabēcuene xainaeyaexanaenatsi Cristo pelivaisi pejumecovēnētsivi. Bajarapacuenia Pablo jamatabēcuenebējaiyaexanaenatsi," jamatabējai bajarapamonae xanē yabara. Itsiata itsamonae xaniavaetsia tsipaebapona Cristo pelivaisi pejumecovēnētsixae Cristo. Bajarapamonae yapētane Dioso tanetocopatsijava penaneconitsivi pejebabiabibota naneconitsiataponaponaejavata, tajumaitsi javanexa nacuaeavetsivijavabelia mapacueniaje: "Jesucristo pelivaisi jivi pecapanepaelivaisinexatsi, pexaniajailivaisi cajena," tajaijavanexa nacuaeavetsivijavabelia, bajarapamonae yapētane. ¹⁸ Majotaje nenaneconitsiaexanae ata, apo natsinajamatabēxainaenē. Itsamonae pejamatabēēthētovetsina Cristo pelivaisi pejumecovēnētsixae, tsipaebapona jivi pejumecovēnētsinexa bajarapalivaisi. Itsamonae pijinia pejamatabēēthētovetsina apo jumecovēnētsi ata, itsiata Cristo pelivaisi tsipaebapona jivi pejumecovēnētsinexa bajarapalivaisi. Bajaraxuata bajarapamonae ata jivi petsipaebaponaejava yabara, itsiata sivajamatabēcuenebarēyanē.

Bitso orijibia tavajēnaeyabelia jamatabēcuenebarēyanē tsaponae tsane. ¹⁹ Tsipaji yapētaniji pacuenia panetovajētaponame Diosojavabelia. Espiritu Santo, ponē Jesucristo itorobica, bajaraponē neyavenonapona. Bajaraxuata yapētaniji daxita pacuenia netoxanepanaejitsia. Nexata baja pitsapaenajētaneconitsia ponaponaejavavecu. ²⁰ Bitso jitsipajē ēpexaniacuene taexanaenexa. Apo jitsipaenē taexanaenexa itsacuenejavayo ata, xua yabara auranē tsipae. Cristo tajumecovēnētsijavaveliacujinae, aeconoxae ata, ajunavijibia jitsipajē taexanaenexa Cristo pejisipaecuenia dexitamatacabijavabelianexa. Bajarapacuenia jitsipajē taexanaponaenexa ēbajaraponeenexa. Bajaraponē tanetojitsipaecuenia abaxē taasaētsaponaponaeeepato mapanacuataje, tatēpaeepatotanaxa ata, jitsipajē taexanaenexa xua pejamatabēcueneta daxitajivi yaiyataejitsia Cristo.

²¹ Tasaētsaponaponaeeepato abaxē mapanacuataje, Cristo pejisipaecuenia toexanaponaenajē. Itsa pamatacabi tēpaenajē, netoxanepanaejitsia mapanacuata tasaētsaponaponaejava matatoxenetsia. Tsipaji Cristo yajavaponaenajē athēbētatsia. ²² Tasaētsaponaponaeeepato abaxē mapanacuataje, necaējēpa tatoexanaponaenexa Cristo tanetojitsipaecuenia. Itsiata apo yapētaenē xua pepacuene jitsipajē. ²³ Itsajavata bitso jitsipabiabajē tatēpaejava taponaponaenexa

Cristo pijanacuayabetsia. Bajaraxua bitso netoxanepanaejitsia. ²⁴ Itsiata paxamē panenamatavenoname abaxē taponaponaenexa mapanacuata, patacayavenonaponaenexa. ²⁵ Yapētaniji baja cajena abaxē taponaponaejava paxamēnexa. Ponaponaenajē abaxē patacayavenonaenexa, paneajamatabēcuensaēnexa panevajēnaeyabelia, panejamatabēcuenebarēyanexanua panejumecovēnētsixae Cristo pelivaisi papecacapanepaenexa panijaneconivecu. ²⁶ Nexata pamatacabi Jesucristo neyavenonaena penaneconitsivi pejebabiabibovecuatapitsapaenexa, ponaponaenajē icatsia paxamējavata. Nexata jamatabēcuenebarēyaya panevajunupaebianame itsamonaejavabelia pacuenia Jesucristo neyavenona tapitsapaenexa penaneconitsivi pejebabiabibovecuata.

²⁷ Pajinavanapare xaniavaetsia, pacuenia pexanilivaisi, Cristo pelivaisi, pacaitoroba. Nexata itsa pacataenatsi, apo pacatae atatsinua tsane, itsiata jitsipajē patcavēnēlivaisitaeponaejava najamatabēcuenejēpaeyapanecasaētsavanapaejava Cristo pelivaisi panejumecovēnētavanapaejava. Jitsipajē patcavēnēlivaisitaevava asaēyata najamatabējēpaeya jivi panetsipaebavana-paejava Jesucristo pelivaisi jivi pecapanepaelivaisinexatsi. ²⁸ Pētsa pacujunavame pamonaepacaitoya. Dioso papecayavenonaexae, itsa apo pacujunavimē tsane itsamonae pacabejiobiaexanae ata, nexata bajarapamonae jamatabējumaitsi tsane: "Pexaniajailivaisi cajena bajarapamonae tsipaebapona. Tsipaji Dioso yavenonatsi. Nexata vaxaitsi bajarapamonae vajabejiobiaexanaexae, Dioso nacaverebiabiana," jamatabējai tsane. Yapētaenanua paxamē papecacapanepaejavanaxa Dioso. ²⁹ Cristo pejamatabēcueneta pacatocopata bajaraponē panejumecovēnētsinexa. Itsiata baitsi jane apo pacatocopatsi ēbajaraponē panejumecovēnētsinexa. Pacatoyajavacopatanua baja cajena itsamonae papecabebiobiaexanaenexa bajaraponē papijajivixaemē. ³⁰ Pacuenia Cristo pijajivitonēxaenē itsamonae nebejiobiaexanapona, bajara pijinia pacuenia paxamē ata itsamonae pacabejiobiaexanaena. Pacuenia baja imata panetaneme itsamonae tanebejiobiaexanaejava, bajarapacuenia abaxē tsiteca nebejiobiaexanapona pacuenia baja panevēnēlivaisitaneme.

Pacuenia Dioso pejumecovēnētsivi itavetatsi beayaijamatabēcuenevi penataeyaniva yabara pelivaisi

2 Payapētaneme rabaja mapacueneje. Jesucristo paneyajavajinavanapaexae, panajamatabēcuensaētame panejumecovēnētsijava. Payapētaneme rabaja. Jesucristo papecaasivaxae, pacajamatabēcuenebataba. Payapētaneme rabaja Espiritu Santo papecatsijamatabēcaejava papecayajavaponaenexa. Payapētaneme rabaja Jesucristo papecaitaxutotsonia taeyabiabijava. ² Bajaraxuata nexata pacaitorobatsi mapacuenia panejinavanapaenexaje patacasivabarēyanexa. Najamatabēcuenejēpaeya pajinavanapare. Najamatabēcuenejēpaeya namataenetsia panasivamēre tsavanapae. Xua paexanaejitsiamē Dioso pe-

jamatabëcueneta, najamatabëcuenejëpaeya paexanavanapare. ³ Pëtsa panatoexaname itsacuenejavayo ata, xua ëpaxamënexa pacatoxanepana. Biji rajane paexanare xua itsamonaenexa ata toxanepanatsi. Pëtsa paexanamenua itsacuenejavayo ata saya bepaayaijamatabëcuenemimë papecataenexa itsamonae. Biji rajane beveliajamatabëcuenevi panataeyabiabianame. Itsamonae paxamëvecua ayaijamatabëcuenevi pataeyabiabianame. ⁴ Pëtsa panajamatabëxainabiabame ëpaxamë panenatojitsipaecuene. Biji rajane payajavanajamatabëxainabiabianame itsamonae ata penatojitsipaecuene.

⁵ Pacuenia Jesucristo jamatabëcuenetsi, bajara pijinia paxamë ata pajamatabëcuenetsimëre. ⁶ Pacuenia Dioso jamatabëcuenetsi, bajara pijinia Jesucristo ata jamatabëcuenetsi. Itsiata baitsi jane Jesucristo apo jamatabëjumaisi: "Jitsipajë daxitajivi taneyaiyataenexa pacuenia taxa Dioso yayatanetsi," apo jamatabëjai.

⁷ Bajaraponë picani ayaijamatabëcuenenë. Paxa Dioso yajavaponapona athëbëtatsia. Itsiata itsa patsica mapanacuayabetsicaje, naexana pacuenia vaxaitsi banaexanatsi mapanacuataje. Nexata paxa Dioso bepjjajivitonë naexana, pacuenia Dioso itorobatsi pexanaenexa. ⁸ Bejjivitonëcuenia itsa naexana, beveliajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaevi pijaneconi yabara cruzajavabelia bacobematabiabarutatsi pebeyaxuabinexatsi, bajara pijinia pacuenia Jesucristo ata nacopata cruzajavabelia pecobematabiabarutatsinexatsi. ⁹ Bajaraxuata Dioso mëthëvetsina matacotatsi. Caponatsi athëbëabetsia peecaenexa paxa Diosojavatatsia, pebarëevetsinexatsi daxitacuene. ¹⁰ Nexata bajaraponë itsa vënëlvivisitaenatsi, pematabacabëta yayataeya tonubenaenatsi daxitajivi. Athëbëtatsia pejjinavanapaevi, mapanacuapijivi ata, petëpaevimi ata, pematabacabëta yayataeya tonubenaenatsi. ¹¹ Nexata daxitajivi jumai tsane Jesucristo yabara: "Jesucristo rabaja cajena pepo petuxanenë," jai tsane. Nexata daxitajivi yapëtaena pacuenia paxa Dioso bitso ayaijamatabëcuenenë.

Pacuenia Dioso pejumecovënëtsivi pexaniajailivaisi pejumecovënëtavanapaexae, bepecotia mapanacuataje yabara pelivaisi

¹² Tajamonae bitso patacaasivavi, pacuenia panejumecovënëtame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponapona atatsi. Pacaejjivimë canacujitsia cujunaviaya Dioso pajumecovënëre. Nexata ëpexaniacuene paexanavanapaename. Tsiapaji Dioso papecacapanepaevinexa. ¹³ Dioso rabaja pacajamatabëcueneyavenona panejamatabëëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuenecaejjëpaeyaexananua paneexanaenexa bajarapacuenia.

¹⁴ Daxitacuene paexanavanapare pajamatabëcuenenatsipaebinejevamë. Pëtsa anaeya namataenetsia na-

jumenotsia panabijatanemenua. ¹⁵ Bajarapacuenia itsa pajinavanapaename, nexata daxita paxamë aneconijibia jivi patsitajinavanapaename Dioso papexixaemë. Nexata mapanacuapijivi pibisiacuene pexanaevi tuatajëta pajinavanapae atamë tsane, itsajivi ata acuenebi tsane pibisiacuena papecabaracuauicuaijainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtavanapaexae bajarapamonaejavata. ¹⁶ Bepapecotiamë tsane xaniavaetsia itsa patsitajumecovënëtavanapaename bajarapamonaejavata pexaniajailivaisi, Jesucristo pelivaisi. Bajarapacuenia itsa patsitajumecovënëtavanapaename, pacasivabarëyatsi tsane pamatacabi icatsia Cristo patsianica. Bajarapacuenia pacasivabarëyatsi tsane tsiapaji baja yapëtaenajë apo tanacueratsijava asaëya tanacuenebjava paxamëjavata. ¹⁷ Dioso pacasivabarëya panenajamatabëcuenegerajutsixae Diosojavabelia panetoinavanapaenexa bajaraponë papecatojitsipaecuena. Itsamonae nebeyaxuabijitsia ata tsiapae Cristo pelivaisi patacatsipaebixae, xanë itsiata nasivajamatabëcuenenëbarëyanë tsiapae. Tsiapaji Cristo pelivaisi bajarapacuenia patacatsipaebinxae, Dioso netocopata. Nexata daxita paxamë pacayajavajamatabëcuenenëbarëyatsi tsane. ¹⁸ Bajarapacuenia paxamë ata pajamatabëcuenenëbarëyamëre tsavanapae. Paneyajavabarëyamërenua tsavanapae.

Timoteobeje Epafroditobeje yabara pelivaisi

¹⁹ Itsa vajatuxanenë Jesús jitsipa, naxanitsiayo jamatabëitorobajë Timoteo papecataenexalia. Pepatsicujinaerena, itsa pacavënëlvivisitaenatsi pacuenia pajinavanapame, nejamatabëcuenenëbarëyaya exanaejitsia. ²⁰ Bajaraponë caenë nejamatabëcuenenëjëpa. Bajaraponë bitso pacasivanajamatabëxaina xaniavaetsia panejjinavanapaenexa. ²¹ Daxita itsamonae bitso najamatabëxaina ëpenatojitsipaecuena pexanaenexa. Apo sivanajamatabëxainae Jesucristo petonacuenebinexa. ²² Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebjava bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³ Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaejava yabara, nexata bajaraxuacujinae pacatoitorobialitsi Timoteo papecataenexalia. ²⁴ Xanë jamatabëjumaisinë paxamë yabara: "Itsa Dioso netojitsipaena xanë ata taponanexa bajarabelia, nexata neyavenonaena bepjjia taponanexa tataenexalia Filipos tomarapijivi," jamatabëjanë paxamë yabara.

²⁵ Panetoitorobaremna rabaja vajabanenë Epafrodito pataneyavenonaenexamë bajarapacuenia tanamatavenonaeeapatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumaisinë paxamë yabara: "Itsa Diosoebajëbeje, Dioso apo pejumecovënëtsivi paneitsacueniababi-

abi atabeje. Nexata icatsia netsitaxanepana bajara-ponë patacatoitobinexalia. ²⁶ Majotaje Epafrodito pi-avitanecujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtane panevënëlvaisi-taejava pebitsojava piavitanecuene. ²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsoniatanetsi. Xanë ata Dioso nitaxutotsoniatane. Tsipaji ita nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibota taneetsixae tanajamatabëxainaejavata, nevecuatëpaejitsipa. ²⁸ Bajaraxuata bitso jitsipajë bajaraponë patacatoitobinexalia panetaenexa, nexata paxamë panejamatabëcuenebarëyanexa ita pataneme icatsia bajaraponë. Nexata xanë ata paxamë yabara bevelia najamatabëxainaejanë. ²⁹ Pacopi-apitsianame bajaraponë bitso jamatabëcuenebarëyaya Dioso pejamatabëcuene ta vajabanëxae. Pamonaе jamatabëcueneitsi pacuenia bajaraponë jamatabëcueneitsi, payaiyataeneme. ³⁰ Paxamë apo papatsi atamërena maberanaje pataneyavenonaenexamë, itsiata panejamatabëcuene ta bajaraponë panetobitobaremena tanyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae ita avitane, imoxo picani petëpae.

Pacuenia jivi Dioso pejitsipaecuenia betojinavanapa yabara pelivaisi

3 Tajamonaе, palivaisi capanepaeya pacatoy-aquinatsi baja, bajarapalivaisi pasivajamatabëcuenebarëyamëre Cristo papijajivixaemë. Xanë apo pacasivacueranaetsi patacatoyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. ² Panayajivitaema piajamatabëcuenebejevi, pamonaе beaviri pianepanaevi. Tsipaji raja bajarapamonaе apo aura pexanaejava yabara. Bajarapamonaе jamatabëcuenenavëxaniabi-aya jumaiti tsabiabi Jesucristo pijajivijavabelia: “Xanepana paxamë ata papecaperabëcaucubinexa judíovicuenia Dioso pepacuene papecacapanepaenexa panijaneconivecua,” jai tsabiabi. ³ Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacapanepaevinexa Diosojavabelia. Tsipaji vajamatabëëthëtojavavetsina najamatabëcueneocopatatsi Diosojavabelia vajanacapanepaenexa. Jamatabëcuenebarëyatsi Jesucristo pijajivixaetsi. Yapëtanetsinua pacuenia Dioso apo nacapanepae tsipae vajacuata vaxanaejava pejamatabëcuene ta. ⁴ Itsajivi ita caëjëpaejitsipatsi pijacuata penacapanepaenexa Diosojavabelia judíonëxae, Dioso petonacuenebijava yabara ata, nexata xanë ata necaëjëpaejitsipa tajacuata tanacapanepaenexa. ⁵ Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinaivicuenia neperabëcaucuta. Baitsi neboupipebabëcaucuta. Xanë raja tajasalinainëmi Israelpijinë. Benjamínpijinë pemomoxiyajuvënënë.

Taxa judíonë. Taena ata judíova. Xanë picani fariseonëne. Pacuenia fariseovi bitso jumecovënëta Dioso Moiséspijinëta penajumecopatsilivaisi, bajara pi-jinia pacuenia xanë ata itsinë. ⁶ Daxita tajamatabëcuene saëta caasaënë tajumecovënëtsijava Dioso Moiséspijinëta penajumecopatsilivaisi. Jamatabëcuenenavëxaniabajë tsaena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonaе bebyejebatsi,” janë tsabiabi. Nexata Jesús pijajivi bejioabiaexanabiabajë. Dioso Moiséspijinëta penajumecopatsilivaisi, bitso xaniavaetsia jumecovënëtaaponaponajë. Nexata itsajivi ata acuenebi pejumaitisijava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejaijava. ⁷ Daxita bajarapalivaisi yabara xanë picani sivabarayanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi piamatamobilivaisicuene. Tsipaji baja najamatabëcueneocopatajë Cristojavabelia tanevecuaajibi-aexanaenexa tajaneconi. ⁸ Aeconoxae baja yapëtaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapëtaenexa xaniavaetsia tajatuxanenë Jesucristo. Jesucristo tanyejavaponaponaexae, nexata piamatamobilivaisi tajumecovënëtsijavami, copatajë baja. ⁹ Dioso aneonijibia apo netae tajumecovënëtsixae Dioso Moiséspijinëta penajumecopatsilivaisi. Aeconoxae baja Dioso aneonijibia netane tsipaji najamatabëcueneocopatajë Jesucristojavabelia tanevecuaajibi-aexanaenexa tajaneconi. ¹⁰ Tavajënaeyabelia bitso jitsipajë daxitacuenivecua tayapëtaenexa pacuenia Cristo jamatabëcueneitsi. Pasaëta Dioso matacotatsi Cristo petëpaejavavecua, bajarapaasaë jitsipajë tayajavaponaponaenexa. Cristo pijajivitonëxaenë, jitsipajë xanë ata tanebejioabiaexanaenexa, tatëpaenexa ata. ¹¹ Tsipaji xanë ata copiaevetaponaponajë Dioso tanematacotsinexa tatëpaejavavecua.

Pacuenia Pablo najamatabëcuene saëta xaniavaetsia Cristo peyajavaponaponaenexa, pepatsinexa Dioso pijanacuayabetsia, yabara pelivaisi

¹² Xanë apo jamatabëjumaitsinë: “Daxita baja Dioso pejitsipaecuenia toexanajë. Nejamatabëcuene caëjëpa baja tajumecovënëtsinexa pacuenia Dioso netojitsipa taexanaenexa,” apo jamatabëjanë. Itsiata tavajënaeyabelia tanejamatabëcuene caëjëpaponaponaenexa, caasaënë taponaponaе taexanaejava pacuenia Dioso netojitsipa. Jitsipajë bitso tajamatabëcuene xanepanajava tavajënaeyabelia pacuenia Dioso netojitsipa. Tsipaji bajarapacuene yabara Jesucristo nesivatëpa. ¹³ Tajamonaе, apo jamatabëjumaitsinë: “Xanë rabaja nejamatabëcuene caëjëpa Dioso tajumecovënëtsinexa pacuenia Dioso netojitsipa taexanaenexa,” apo jamatabëjanë. Jume baja cajena. Mapacuenia najamatabëxainajëje. “Daxita xua exanajë Jesús pelivaisi

tajumecovënëtsivajënaeya, nacofënëtajë baja," jamatabëjanë. Najamatabëcuenesaëtajë xaniavaetsia tatoponaponaenexa Dioso. Pacuenia pebitsojinaenë pecujinaejinaejava penayacobijavata, nasaëta pepatsinexa petocaëjëtsijavabeliatsi, bajara pijinia pacuenia xanë ata najamatabëcuenesaëtajë xaniavaetsia tatoponaponaenexa Dioso. Tavajënaeyabelia najamatabëcuenesaëtajë taexanaenexa pacuenia Dioso netojitsipa. Bajarapacuenia najamatabëcainapononajë. ¹⁴ Pacuenia pecujinaejinaenë nasisaëta penacanabinexa perajutsinexatsi premiovënëjjava, bajara pijinia pacuenia najamatabëcuenesaëtajë. Najamatabëcuenesaëtajë xaniavaetsia tatoponaponaenexa Dioso tanerajutsinexa athëbëtatsia taxainaejavanexa tayajavaponaponaexae Jesucristo.

¹⁵ Daxita pamona xaniavaetsia jumecovënëtavanapa Dioso, bajarapamonaë ata benajamatabëcuenesaëtavanapa xaniavaetsia petojinavanapaenexa Dioso. Itsa abaxë paxamë saicaya itsajamatabëcuene paxainame, nexata Dioso pacayapëtaeyaexanaena saicaya abaxë itsajamatabëcuene panexainaejava. ¹⁶ Nexata palivaisivajëto jumeyapëtanetsi pexaniajailivaisi, bajarapalivaisi bejumecovënëtavanapatsi. Beacaasë tsavanapaetsinua vajavajënaeyabelia orijibia vajajumeyapëtaeponaenexa.

¹⁷ Tajamonaë, pacuenia baja pacatsitapononatsi, bajara pijinia pacuenia paxamë ata pajinavanapare. Itsamonaë paxamëyajuvënëvi xaniavaetsia jinavanapa pacuenia pacatsitapononatsi. Bajarapamonaë ata panaitaxutocaevetsianame paxamë ata xaniavaetsia panejinavanapaenexa pacuenia bajarapamonaë jinavanapa. ¹⁸ Ayaibitsaëttoxaneto paxamëyajuvënëvi apo jumecovënëtsi Jesucristo cruzata pesivatëpaejavatsi pecapanepaenexatsi. Bajarapamonaë yabara pacatsipaebatsi baja anijatonë. Itsiata icatsia aeconoxae yaitaxutonueya pacatsipaebiansi. ¹⁹ Mapanacuaaje pecopiarucaematacabita, bajarapamonaë Dioso verebiabiansi. Tsipaji bitso jitsipa pijacuata penatojitsipaecuenia pexanavanapaenexa. Piauracuene exanabiabi ata, jamatabëcuenenavëxaniabiaya jamatabëjumaitsi tsabiabi: "Pexaniacuene bitso vaxaitsi exanavanapatsi," jamatabëjai tsabiabi bajarapamonaë. Ëmapanacuapijicuene saya sivanajamatabëxainabiaba. ²⁰ Vaxaitsi baja cajena jinavanapaenatsi Dioso pijanacuatatsia. Bajaraxuata copiaevetavanapatsi vajatuxanenë Jesucristo pepatsijavatsica vajanacapanepaenexa Dioso pijanacuayabetsia. ²¹ Vajaperabëto vereverecaena. Itsiata vajatuxanenë Jesús nacaperabëithianaena. Nexata pacuenia bajaraponë perabëitsi athëbëtatsia, bajara vaxaitsi ata perabëitsitsi tsane. Nexata pasaëta Jesús caëjëpatsi pitorobinexa daxitacuene, bajarapasaëta nacaperabëithianaena.

Pacuenia vaxaitsi besivabarëyatsi tsabiabi vajatuxanenë Jesucristo yabara pelivaisi

4 Tajamonaë bitso patacaasivavi, pacaitaxanatsi. Bitso jamatabëpacatanetsi. Bitso pacasivajamatabëcuenebarëyatsi. Tsipaji xaniavaetsia pajume-

covënëtavanapame Jesús pelivaisi pacuenia baja pacatsipaebatsi. Pajamatabëcuenesaëmëre tsavana-pae pacopatsinejevamë panejumecovënëtsijava Jesús pelivaisi.

² Papetirivamëbeje, Evodia Síntique, paxamëbeje pacatoyaquinatsibeje patacaitavetsinexabeje mapacueniaje. Pëtsa baja icatsia pematatsënëa namataenetsia panajumeanaenotamebeje. Panajamatabëcuenejëparebeje Jesús pelivaisi panejumecovënëtsivaxaëbeje. ³ Xamë ata xaniavaetsia taneyavenonaenëmë Dioso pijacuene tanacuenebija-va, catoyaquinatsi. Jitsipajë neyavenonaenexa bajarapapetirivabeje, penabarajamatabëcuenexanepanaenexabeje namataenetsia icatsia penajumeanaenotsiyannivabeje. Bajarapovabeje bitso neyavenonaëbeje tatsipaebijava itsamonaëjavabelia pexaniajailivaisi pecapanepaelivaisinexatsi Diosojavabelia. Bajarapacuenia Clemente ata neyavenona. Itsamonaë ata patanajuanacuenebivi, bajarapacuenia neyavenona. Daxita baja bajarapamonaë vënërubena Dioso pijabaxutota, itsa pabaxutota vënëyaquinarbatsi pamonaë pexainaevinexa matababi apo pevereverecaëjjava.

⁴ Jesús pelivaisi panejumecovënëtsivixae, pajamatabëcuenebarëyamëre daxitamatacabijavabelianexa. Icatsia pematatsënëa pacajumaitsi. ¡Pajamatabëcuenebarëyamëre tsavanapae! ⁵ Jamatabëcuenebanepanaeya xaniavaetsia pajinavanapaename daxitajivi papecajamatabëcueneypëtaenexa. Tsipaji rabaja vajatuxanenë imoxoyo pevajënaë pepatsinexatsica.

⁶ Pëtsa pajamatabëcuenebëjamë itsacuenejavayo ata yabara. Biji rajane pavajëre Diosojavabelia daxitacuenejavanë yabara. Pexaniajamatabëcuenenua parajutabiabare Dioso papecayavenonaëjavanë yabara. ⁷ Nexata Dioso pacajamatabëjemayaexanaena panejamatabëcuenebëjaiyaniva. Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtavanapame, daxitacuene yabara panenajamatabëxainaejjava atavecua Dioso pacaevetsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonaë, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataecuene ata yabara. Panajamatabëxainabiabarenua xua xanepana paneexanavanapaenexa. Panajamatabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuaicuaijijitsia pexaniacuena. Panajamatabëxainabiabarenua daxita xua

pexaniacuene. Panajamatabëxainabiabarena xua yabara Dioso pacabarëyataejitsia.

⁹ Daxita pacuenia pacatsipaebatsi, pacuenia pacatsitaponaponatsinua, bajarapacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponapon-aena.

Pacuenia Filipos tomarapijivi ofrenda tojebabiabatsi Pablonexa yabara pelivaisi

¹⁰ Vajatuxanenë bitso nejamatabëcuenebarëyayaexana. Tshipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë yabara apo jamatabëjumaitsinë: "Apo jitsipae raeta icatsia taneyavenonaenexa bajarapamonaë," apo jamatabëjanë. Jume cajena. Yapëtaniji pacuenia picani jamatabëpanetoitorobi atamë ofrenda pataneyavenonaenexamë, itsiata apo pacacuenecaëjèpae panetoitorobinexamë. ¹¹ Apo pacatoyaquinaetsi mapacueniaje ofrenda patanetoitorobivajënaeyamë bitso tanamavenonaexae itsacuenejavayo. Dioso tanejamatejemayaexanaexae tajamatabëcuenebëjaiyaniva daxitacuene yabara, sivajamatabëcuenebarëyanë saya xuyovajëto xainajë. ¹² Yapëtaniji pacuenia ponaponajë, pamatacabi tsiquirijavayo xainae atanë. Yapëtanijinua pacuenia ponaponajë pamatacabi ayaijava xainajë. Yapëtanijinua pacuenia jamatabëcuenebarëyanëjitsia daxitamatacabijavabelianexa. Nexata itsa xainajë daxita tanamatavenonaejavaxi, barëyanë. Apo xainae atanë itsacuenejavayo ata, itsiata barëyanë tsabiabi. ¹³ Nejamatabëcueneecaëjèpa tanajamatabëcuene-saëtsinexa daxitacuene yabara. Tshipaji Cristo pesaëta nejamatabëcueneecaëjèpaeyaexana. ¹⁴ Itsiata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

¹⁵ Payapëtaneme rabaja mapacueneje. Pamatacabi copiaya tsipaebanajetarucajë jivi pecapanepaelivaisinexatsi Macedonia nacujava, paxamë paFilipos tomarapijivimë panijanacuavecua itsa ponajë, paxamë panerajutame ofrenda pataneyavenonaenexamë. It-satomarapijivi, Dioso pejumecovënëtsivi ata, apo nera-jutsi ofrenda bajarapacuenia taneyavenonaenexa. Èpaxamë itsiata paneyavenoname. ¹⁶ Nexata bajaraxu-acujinae, itsa abaxë ponaponajë Tesalónica tomarata, panetoitorobabiabame icatsia ofrenda anijatonë tanamatavenonabiabijavata. ¹⁷ Sivabarëyanë tsabiabi itsa panetoitorobabiabame bajarapacuenia. Itsiata apo sivabarëyanë tsabiabi tanetoxanepanaexae bajarapacuenia pataneyavenonaejavamë. Jume baja cajena. Biji rajane sivabarëyanë tsabiabi bajarapacuenia pataneyavenonaejavamë. Tshipaji juya paxainaejitsiamë Diosojavabelia papecarajutsijavanexa athëbëtatsia. ¹⁸ Nexata pitajë daxita patanetoitorobijavamë Epafroditota. Xainajë baja nexata bitso ayaijava, tanamatavenonaejava matatoxenetsia. Xua panetoitorobame ofrendacuena, tsitapexaniacuene Dioso. Bajaraxua Dioso sivajamatabëcuenebarëya. ¹⁹ TajaDioso bitso pexainanë. Nexata pacarajutsiana daxita pacuenia panamatavenoname. Bajara pijinia pacuenia ayaijava Dioso pacarajutsiana Jesucristojavabelia xaniavaetsia panenajamatabëcueneocopatsixae. ²⁰ ¡Vaxa Dioso ayaijamatabëcuenenë daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovënëtsivi pebajacobinexatsi yabara pelivaisi

²¹ Nebajacobiana paxamëjavata daxita Jesús pelivaisi pejumecovënëtsivi, pamonaë Dioso pijajivi. Dioso pijajivi, pamonaë xanëjavata jinavanapa, pacabajacobalia. ²² Daxita Dioso pijajivi, mapatomarataje pejinavana-paevi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia. ²³ Pacatovajëtabiabatsi Diosojavabelia, vajatuxanenë Jesucristo papecayavenonabiabinexa. Bajara itsi tsane.

COLOSENSES

**Pacuenia Pablo toyaquina mapabaxutoje Dioso pe-
jumecovënëtsivi, Colosas tomarapijivijavabelia, yabara
pelivaisi**

1 ¹⁻² Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovënëtsivi, Colosas tomarata panejinavanapaevi. Vajabananë Timoteo ata pacajamatabënajina. Aeconoxae baja nacaemonaetsi, paxamë ata Jesús pelivaisi panejumecovënëtsixae. Pacatovajëtatsi vaxa Diosojavabelia papecaitaxutotsoni-ataenexa jamatabëcuenexanepanaeya panejinavana-paenexa.

**Pacuenia Pablo Diosojavabelia tovajëtabiaba Colosas
tomarapijivi, Jesús pelivaisi pejumecovënëtsivi, yabara
pelivaisi**

³ Paxanëbeje Timoteobeje pacatovajëtabiabatsibeje vajatuxanenë Jesucristo paxa Diosojavabelia. Nexata Diosojavabelia patacatovajëtsijavatabeje, paxamë yabara Diosojavabelia pajumaitsinëbeje tsabiabi mapacueniaje: "Pexaniajamatabëcuene pacarajutsibeje. Tshipaji pexaniacuenia yavenonabiabame Colosas tomarapijivi," pajanëbeje tsabiabi Diosojavabelia paxamë yabara. ⁴ Bajarapacuenia pajumaitsinëbeje tsabiabi tshipaji pacavënëlvaisitanetsibeje xaniavaetsia panejumecovënëtanapaejava Jesús pelivaisi. Pacavënëlvaisitanetsibejenua paneasivatsavanapaejava daxita Jesús pelivaisi pejumecovënëtsivi. ⁵ Bajara pajamatabëcueneitsimë tshipaji baja xaniavaetsia payapëtaneme xua Dioso pacatoxaniavaeta athëbëtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajarapamatacabi payapëtaneme baja xua Dioso pacatoxaniavaeta athëbëtatsia papecarajutsinexa. ⁶ Bajarapapexanialivaisi pajumetaneme baja pamatacabi copiaya Epafras pacatsipaeba Dioso papecaasivajava. Bajarapalivaisi baja aeconoxae daxitanacuanëjava yacajëpaponä. Nexata daxitanacuanëjava, pamonaë jumecovënëtapona bajarapalivaisi, copataponä baja perujujamatabëcuenemi. Nexata baja pejanajamatabëcuene xainaponä. Bajarapamonäe pejanajamatabëcuene paxainame pamatacabi ajena pajumecovënëtame bajarapalivaisi. Bajara pamatacabijavaverenacujinae paxamë baja payapëtaepon-

ame pepacuene Dioso papecaitaxutotsoniataejava.

⁷ Dioso papecaitaxutotsoniataejava, copiaya baja cajena vajaasivanë Epafras pacatsipaeba. Bajaraponë Jesucristo xaniavaetsia petonacuenebinë. Nexata bajaraponë panetoitorobaremena pataneyavenonaenexabeje Dioso patatonajuanacuenebinexa majotaje.

⁸ Nexata pamatacabi Epafras pata paxanëbejejavaberenä, panetsipaebabeje xaniavaetsia panejinavanapaejava. Panetsipaebabejenua Espiritu Santo papecayavenonaejava paneasivanexa itsamonäe ata.

⁹ Nexata patacavënëlvaisitaecujinaebeje, pacatovajëtabiabatsi Diosojavabelia. Pacatovajëtabiabatsi xua Dioso pacatojitsipa papecayapëtaeyaexanaenexa. Nexata Dioso itsa pacayapëtaeyaexana xua Dioso pacatojitsipa, bajaraxua paneexanavanapaenexa. Bajarapacuenia pacatovajëtabiabatsi daxitacuene, Dioso pijacuene ata, Dioso papecayapëtaeyaexanaenexa.

¹⁰ Pacatovajëtabiabatsinua xaniavaetsia jivi panetsitajinavanapaenexa, Dioso papecasivabarëyanexa pexaniacuenä paneexanabiabixae. Pacatovajëtabiabatsinua Diosojavabelia panevajënaeyabelia Dioso panejamatabëcueneyapëtaeponäenexa. ¹¹ Pacatovajëtabiabatsinua Dioso papecajamatabëcuene asaëyaexanaenexa pesaëta. Nexata bajayajebi itsamonäe pacaitsacueniababiabi ata, pacajamatabëcuenecaëjëpaena panejamatabëcuenesaë tsavanapaejava.

¹² Pacatovajëtabiabatsinua paxamë panejumaitsabibinexa Diosojavabelia: "Xanepana rabaja. Tshipaji bitso pexaniacuenä panetoexaname," panejaitsabibinexa Diosojavabelia. Bajarapacuenia pajumaitsimë tsabiabi tsane tshipaji bajaraponë pacavecuajibiaexana baja panijaneconimi. Nexata baja Dioso aneconijibia pacatane. Nexata paxamë ata Dioso pacarajutsiana xua xaina pijajivi perajutsinexa pijapenivenivenäenacuataatsia. ¹³ Vaxaitsi bajayata apo yapëtaetsi pexanijavajivaisi. Nexata picani bepitaquirinacuata vajajinavanapaevi. Tshipaji picani dovathi pijajivitsi tsavanapae. Pibisiacuenä exanabiabatsi pacuenia dovathi nacaitoroba. Itsiata baja aeconoxae Dioso nacapita dovathivecua. Nexata baja Dioso pexënato, piasivanë, pijajivitsi nacaexana. ¹⁴ Nacasivatëpa Cristo. Nexata baja Cristo pejamatabëcueneta Dioso nacavecuajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuajaibiaexana pibisiacuene va-
jaexanaeneconimi Cristo vajanacasivatēpaexae yabara
pelivaisi

¹⁵ Dioso cajena caeto ata apo vajataenē. Itsiata Dioso pexēnato, Cristo, naexana mapanacuataje. Cristo paxa jēpa. Dioso daxitacuene mapanacuata pexanaevajēnaeya ata, Cristo baja cajena ponapona athēbētatsia.

¹⁶ Cristo baja cajena exana daxitacuene Dioso pejamatabēcueneta. Athēbētatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Angelevi penamatacaitorobivinea ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavanapaenexatsi.

¹⁷ Daxitacuene Cristo pexanaevajēnaeya ata, Cristo baja cajena athēbētatsia ponapona. Daxitacuene xua Cristo exana, bajaraxua pexanaecujinae abaxē Cristo pesaēta mapamatacabita ataje tsitecanajetaruca.

¹⁸ Cristo baja cajena pevetsinē daxita Dioso pejumecovēnētsivi. Nexata daxita Dioso pejumecovēnētsivi Cristo penamatacaitorobinē. Cristo pejamatabēcueneta daxita Dioso pejumecovēnētsivi Dioso pijajivi exanatsi. Cristo taxuxuaba jivi petēpaecujinae icatsia jivi piasaējavanexa. Bajaraxuata itsamonae ata icatsia asaē tsane petēpaecujinae. Nexata Cristo daxitajivi matatoxensia bitso ayaijamatabēcuenenē. ¹⁹ Bajarapacuenia Cristo bitso ayaijamatabēcuenenē tsipaji Dioso pexēnato tojitsipa pejamatabēcuenējēpaenexatsi. ²⁰ Daxitajivi, pamonaē jinavanapa mapanacuataje, naneconita Diosojavabelia. Pamonaē ata jinavanapa athēbētatsia, naneconita Diosojavabelia. Nexata Dioso jitsipa daxita bajarapamonaē pebarajamatabēcuenexanepanaenexa. Nexata Dioso itorobica Cristo mapanacuayabetsicaje cruzata pesivatēpaenexa daxita bajarapamonaē. Nexata daxita bajarapamonaē Dioso aneconijibia tane Cristo pesivatēpaejamatabēcueneta. Bajaraxuata Dioso baja barajamatabēcuenexanepana bajarapamonaē.

²¹ Paxamē picani abaxē bajayata Diosovecu naxuabiaya pajinavanapame. Dioso bepapijavajabitsaēmē tsavanapae pibisiacuene paneexanavanapaexae. Itsiata baitsi jane aeconoxae baja Dioso pacabarajamatabēcuenexanepana. ²² Dioso baja aeconoxae pacabarajamatabēcuenexanepana. Tsipaji Jesucristo bepejibicuenia cruzata pacasivatēpa. Nexata baja Dioso nacavecuajaibiaexana pibisiacuene paneexanaeneconimi. Bajaraxuata aeconoxae baja Dioso papijajivimē. Dioso baja pitabarata aneconijibia pajinavanapame. ²³ Nexata panevajēnaeyabelia aneconijibia Dioso pitabarata panejinavanapaenexa, asaēyata pajumecovēnētavanapare Cristo papecasivatēpaējava panijaneconi yabara. Palivaisi baja pajumecovēnētame papecacapanepaelivaisinexa, pētsa pacopatame panejumecovēnētsijava. Bajarapalivaisi baja yacaējēpa daxitanacuanējava petsipaebaponaējava. Xanē ata, Pablonē, tsipaebaponaē bajarapalivaisi.

Pacuenia Pablo itorobatsi peyavenonaenexa Dioso pe-
jumecovēnētsivi yabara pelivaisi

²⁴ Xanē Pablonē, majotaje penaneconitsivi pejebabiabibota, naneconitsiaponaponajē paxamē apo pajudíovimējava Cristo pelivaisi patacatsipaebaponaexae. Itsiata jamatabēcuenekarēyanē tsaponaponae, nebejibiaexanabiabi ata. Pacuenia Cristo bejibiaexanatsi pijajivi pecapanepaenexa, bajara pijinia pacuenia xanē ata itsamonae nebejibiaexanabiaba. Bajarapacuenia Dioso netocopata tanebejibiaexanabiabinexa tavajēnaeyabelia tajamatabēcuenesaētsaponaeenexa Dioso tajumecovēnētsijava. Nexata tanesivajamatabēcuenesaēnexa daxita pamonaē jumecovēnēta Cristo pelivaisi. ²⁵ Dioso netocopata tayavenonaenexa Dioso pijajivi, pamonaē Cristo pelivaisi jumecovēnēta. Bajaraxuata paxamē ata pacayavenonatsi. Tsipaji Dioso nitoroba daxitajivi xaniavaetsia tatsipaeabaponaenexa pexanialivaisi, Dioso pejumelivaisi.

²⁶ Dioso nitoroba jivi tatsipaebaponaenexa pacuenia Dioso tajēvelia najamatabēxaina pijajivi pecapanepaenexa. Dioso baja cajena nacua pexanaevajēnaeya ata, najamatabēxaina pacuenia exanaejitsia pijajivi pecapanepaenexa. Abaxē picani itsajivi ata Dioso apo yapētaeyaexanae bajarapacuenē. Itsiata baitsi jane aeconoxae baja Dioso tocopata daxita Dioso pejumecovēnētsivi peyapētaenexa pacuenia Dioso exana pijajivi pecapanepaenexa. ²⁷ Dioso tojitsipa apo judíovi ata peyapētaenexa pexanialivaisi, palivaisi picani itsajivijavabelia ata Dioso apo yapētaeyaexanae. Bajarapalivaisi mapacuenia itsije. Cristo cajena pacatsijamatabēeca papecayavaponaponaenexa. Bajaraxuata nexata payapētaneme itsamatacabi Cristo paneyajavajinavanapaejavanexa Dioso pijapenivenivenaenacuataatsia.

²⁸ Paxanē patanecaējēpaecuenia, daxitajivi xaniavaetsia patsipaebaponaē Cristo pelivaisi. Pamuxujibaponaēnua xaniavaetsia daxita bajarapamonaē pejumecovēnētsinexa Cristo pelivaisi. Bajarapacuenia pamuxujibaponaē pevajēnaeyabelia pijamatabēcuenesaētsaponaenexa Cristo pelivaisi pejumecovēnētsijava. ²⁹ Bajaraxuata asaēyata Dioso tonacuenebaponaē daxita pasaēta Cristo nerajutapona.

2 Jitsipajē paneyapētaenexa pacuenia bitso pacasivanajamatabēxainatsi. Nexata asaēyata Diosojavabelia pacatovajētabiabatsi. Laodicea tomarapijivi ata tovajētabiabajē. Itsamonae ata, pamonaē abaxē apo netae, bajarapamonaē ata tovajētabiabajē. ² Asaēyata Diosojavabelia pacatovajētabiabatsi papecjamatabēcuenē asaēyaexanaenexa Cristo pelivaisi panejumecovēnētsijava. Pacatovajētabiabatsinua najamatabēcuenējēpaeya panejinavanapaenexa namataenetsia panenasivaxae. Pacatovajētabiabatsinua panejamatabēthētota ayailivaisi paneyapētaeponaenexa xaniavaetsia itsa payapētaneme Cristo. Bajarapacuenia pacatovajētabiabatsi xaniavaetsia paneyapētaenexa pexaniajailivaisi, palivaisi picani Dioso apo

yapëtaeyaexanae itsajivijavabelia ata, baitsi jane baja Cristo pelivaisi. ³ Cristo pelivaisi xaniavaetsia itsa yapëtanetsi, nexata yapëtanetsi pacuenia Cristo nacatojitsipa vajatonacuenebavanapaenexa. ⁴ Bajarapacuenia pacatsipaebatsi itsajivi ata papecayamaxëitojorobiyaniya, penajumetsënëtsilivaisi itsa pacatsipaeba, bepexaniajailivaisi itajara panejumetaeyaniva. ⁵ Apo pacayajavaponapona atatsi, itsiata pacajamatabënjiniabiabatsi. Jamatabëcuenebarëyanë itsa pacavënëlivaisitanetsi najamatabëcuenejëpaeya panejinavapaejava. Jamatabëcuenebarëyanënuua itsa pacavënëlivaisitanetsi panevajënaeyabelia paneajamatabëcuene saë tsavanapaejava panejumecovënëtsijava Cristo pelivaisi.

⁶ Bajaraxuata pacuenia baja copiaya panajamatabëcuene copatame vajatuxanenë Jesucristojavabelia papecacapanepaenexa Diosojavabelia, bajarapacuenia tsiteca panajamatabëcuene copatavanapare. Panajamatabëcuene coparenua panevajënaeyabelia Cristo papecayavenonaponaenexa daxitacuene yabara. Nexata pajinavanapanae Cristo papecatojitsipaacuenia. ⁷ Paxamë xaniavaetsia panajamatabëcuene copare Jesucristojavabelia papecayavenonaenexa. Nexata Jesucristo pacajamatabëcuene asaëyaexanaena. Nexata papexaniajailivaisi itsamonae pacatsipaeba, tsiteca pajumecovënëtavanapanae. Pajumaitsimënuua tsabiabi tsane Diosojavabelia: “Xanepana rabaja. Tsipaji bitso pexaniacuene panetoxanama,” pajamë tsabiabi tsane Diosojavabelia.

Pacuenia Cristo pijajivi pejanajamatabëcuene xainavanapa yabara pelivaisi

⁸ Xania. Nayajivitaeya pajinavanapare. Pëtsa panacopatame papecayamaxëitojorobinexa pamona tsipae bavanapa saicayalivaisi Dioso pejumelivaisivecua. Bajarapamona apo tsipaebapona Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

⁹ Pacuenia Dioso jamatabëcueneitsi, Cristo itajëta mapanacuata itsa ponapona. ¹⁰ Pacuenia Dioso jamatabëcueneitsi, bajara paxamë ata itsamatacabi pajamatabëcueneitsimë tsane. Tsipaji Cristo payajavajinavanapame. Bajaraponë bitso ayaijamatabëcuene në. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata. ¹¹ Itsa panajamatabëcuene copatame Cristojavabelia, nexata baja Dioso pacavecuaajibiaexana pibisiacuene paneexanaeconimi papecacapanepaenexa. Pibisiajamatabëcuene ata baja pacavecuaajibiaexana. Nexata pacuenia judíovi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeconimi Dioso papecavecuaajibiaexanaenexa. Jume baja cajena. Biji rajane Cristo papecasivatëpaejava panejumecovënëtsixae, Dioso pacavecuaajibiaexana pibisiacuene paneexanaeconimi. ¹² Itsa pacabautisaba, merata pacabubutaxuareca.

Nexata papecabautisabijavata itsa pacabubutaxuareca, Dioso pacatane Cristo bepapecayajavamëthëtsivi itsa mëthëtatsi petëpaecujinae. Nexata papecabautisabijavata, papecabubutaxuabicujinaereca icatsia itsa pacamatacotsina menevetsina, Dioso pacatane Cristo icatsia bepapecayajavaasaëvi petëpaecujinae icatsia itsa asaë. Bajarapacuenia Dioso pacatane tsipaji Cristo yabara pajamatabëjumaitsimë mapacueniaje: “Xaniajai rabaja. Dioso pesaëta Cristo asaëyaexanatsi petëpaecujinae,” pajamatabëjamë. ¹³ Paxamë picani abaxë bajayata bepanetëpaevi. Diosovecua naxuabiaya pajinavanapame pibisiacuene paneexanaeconimi yabara. Bajarapacuenia picani Diosovecua naxuabiaya pajinavanapame apo pajudíovixaemë. Itsiata baitsi jane aeconoxae baja Cristo payajavajinavanapame papecacapanepaenexa. Tsipaji baja Cristo pejamatabëcuene eta Dioso pacavecuaajibiaexana pibisiacuene paneexanaeconimi. ¹⁴ Bitso picani pibisiacuene exanavanapatsi. Tsipaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuaajibiaexana daxita bajarapaneconimi Cristo cruzata vajanacasivatëpaexae. ¹⁵ Bajarapacuenia Cristo cruzata vajanacasivatëpaexae, Cristo baja cueneamoneyaba dovathi. Tsipaji bajarapacuenia Cristo itsa nacasivatëpa cruzata, asaëjibiaexana dovathi, pijajivi yajava. Pacuene dovathi pijajivi barëvetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacuene itajëta pecueneamoneyabijava dovathi, pijajivi yajava.

Pacuenia Pablo muxujioba Jesús pelivaisi pejumecovënëtsivi pejamatabënjinavanapanaenexa Cristo pecaejava athëbëtatsia yabara pelivaisi

¹⁶ Cristo baja pecueneamoneyabixae dovathi, pëtsa panacopatame itsajivi ata papecapaniitavetsinexa panexaejava, panematavëjëapaepaenexa ata. Itsamonae abaxë tsiteca jumecovënëtavanapa perujulivaisi, Dioso Moiséspijinëta penajumecopatsilivaisi. Nexata pacuenia itorobatsi bajarapalivaisita, fiestanë exanabiaba caevai canacujitsia. Itsafiestanë exanabiaba caeuame to canacujitsia, pejanajuameto itsa ecaica. Itsafiestanë exanabiaba penacueraevetsimatacabanë canacujitsia. Pëtsa pajumecovënëtame, itsajivi pacajunatsi ata panenaponaenexa bajarapafiestanëjavabelia. ¹⁷ Bajayata picani jivi ponabiaba bajarapafiestanëjavabelia. Tsipaji palivaisi bajayata Dioso Moiséspijinëta najumecopata, itorobatsi penaponabiabinexa bajarapafiestanëjavabelia. Itsiata baja Cristo itsa patsica mapanacuayabetsicaje, Cristo baja copiarucaeyaexana bajarapacuenemi. Nexata pacuenia Cristo nacaitoroba, bajarapacuenia exanavanapanaenatsi. ¹⁸ Pëtsa pajumecovënëtame itsamonae pacajumaitsi ata mapacueniaje: “Beveliajamatabëcuenevi panataema. Pavajëtabi abarenua ángelevijavabelia Diosovecua panenaxuabiyaniva. Bemajitsinaebota baja cajena pataniji bajarapacuenia vajaexanabiabinexa,” pacajai ata, pëtsa pajumecovënëtame. Bajarapamona beayaijamatabëcuenevi nataeyabiaba pejamatabëcuene pijili-

tane. Tsiipaji bajarapamonae Cristo tsijamatabëecatsi peyajavajinavanapaenexa caejivi canacujitsia. Nexata bajarapamonae xaina baja pajamatabëcuene Dioso tane bitso penamatamotsicuene mapanacuataje.

¹² Dioso bitso pacaasiva. Pacaitapetanea papijajivinexamë. Bajaraxuata paitaxutotsoniataeyabiabi-aname itsamonae ata. Nexata ëpexaniajamatatabëcueneta pajinavanapaename. Beveliajamatatabëcuenevi nataeya pajinavanapaename. Pajamatatabëcuenesaëmë tsavanapae tsane itsamonae, bajayajebi pacaitsacueniababiabi ata. ¹³ Namataenetsia panajamatabëcueneyavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatabëcuenexanepanare. Pacuenia paxamë ata Cristo pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata pabarajamatabëcuenexanepanare itsamonaejavabelia. ¹⁴ Matavëjëa mapacuenia paexanavanapareje. Namataenetsia bitso panaasivamëre tsavanapae. Bajarapacuenia nexata najamatabëcuenejëpaeya pajinavanapaename. ¹⁵ Pavajëtabiabare Diosojavabelia papecayavenonaenexa jamatabëcuenexanepanaeya panejinavanapaenexa. Bajarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejinavanapaenexa, pajumaitsimë tsabiabi tsane Diosojavabelia. "Xanepana rabaja. Tsiipaji bitso pexaniacuene panetoexaname," pajamë tsabiabi tsane Diosojavabelia.

¹⁶ Pavajëtabiabare Diosojavabelia Cristo pelivaisi itsamonae papecatsipaebijava papecajamatabëcueneenabiabinexa. Pavajëtabiabarenua Diosojavabelia xaniavaetsia Dioso panejamatabëcueneyapëtaenexa. Namataenetsia panatsipaebiababare Cristo pelivaisi. Namataenetsia panajamatabëcuene yavenonabiabarenua paneajamatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabare vaji. Palivaisianë ata rubena Salmosbaxutota, panaxëanabiabare. Pavajianë ata rubena vajibaxutonëta, panaxëanabiabare. Pavajianë ata Espiritu Santo pejamatabëcueneta pacanaxëanaeyaexana, panaxëanabiabare. ¹⁷ Daxita xua paexanavanapame, paexanavanapare vajatuxanenë Jesucristo pejitsipaecuenia. Palivaisianë ata pacuaicuaijamë tsabiabi, pacuaicuaijamë tsane vajatuxanenë Jesucristo pejitsipaecuenia. Pexaniajamatatabëcuene itsa parajutabiabianame vajatuxanenë Jesucristo paxa Diosojavabelia, Dioso papecayavenonabiabixae, Jesucristo pevënëta pexaniajamatabëcuene parajutabiabianame.

Pacuenia Pablo Dioso pejumecovënëtsivi muxujioba yabara pelivaisi

¹⁸ Paxamë papetirivimë, pajumecovënëtabiabare pacuenia pacaitoroba paneamonajivi. Tsiipaji bajarapacuenia vajatuxanenë pacatojitsipa paneexanavana-

paenexa. ¹⁹ Paxamë pijinia papebijivimë, pasivamëre panijavajivi. Pëtsa anaeyacuena paitorobabiabame panijavajivi. ²⁰ Paxamë pijinia papeximë, daxita xua paneaxajivi, paneenajivi ata, pacaitoroba paneexanaenexa, pajumecovënëtabiabare. Tsiipaji bajarapacuenia vajatuxanenë sivabarëya. ²¹ Paxamë pijinia panexi panexinaevi, pëtsa panexi anaeya paitorobabiabame papecajumecovënëtabiabinexa xua paitorobame. Tsiipaji saya belia panexi jamatabëcuenefaefaenaetsipa Dioso pejumecovënëtsijava. ²² Paxamë pijinia itsamonae papijajivimë, dajubicuenia papeccanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panijatuxanevi panetonacuenebajava yabara. Biji rajane daxitamatacabi asaëyata xaniavaetsia patonacuenebabiabare. Panejamatabëcuenevetsina cuenejitsipaeya panijatuxanevi patonacuenebabiabare papecasivabarëyanexa vajatuxanenë. ²³ Daxita xua panijatuxanevi patonacuenebabiabame, jamatabëcuenebarëyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabëjumaitsimëre tsabiabi mapacueniaje: "Xua tajatuxanenë tonacuenebajë, bajaraxua taniji Cristonexa betatonacuenebijava. Apo ëtajatuxanenënexa," pajamatabëjamëre tsabiabi. ²⁴ Payapëtaneme rabaja mapacuenieje. Vajatuxanenë pacarajutsiana pacuene pijajivi toxaina perajutsinexa, baitsi matacabi apo peverevercaejava. Patonacuenebavanapame baja cajena Cristonexa. Bajara jane ponë pepacuene panijatuxanenë. ²⁵ Panejumecovënëre pacuenia pacaitorobatsi. Tsiipaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajëto caejivi canacujitsia xainapona, bajarapaneconivajëtota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecueni.

4 Paxamë papetuxanevimë, xaniavaetsia paevere panijajivi, papeccatonacuenebabiabivi. Panajamatabënapitabiabare paxamë ata panijatuxanenë athëbëtatsia peccaejava.

² Daxita Dioso panejumecovënëtsivi icatsia pacatoyaquinatsi mapacueniaje. Diosojavabelia pavajëtabiabare ajamatabëcueneitatsacaya pajamatabëcuene-majitsinejevamë. Itsa pavajëtabiabianame Diosojavabelia, Dioso papecayavenonabiabijava yabara, pajumaitsimë tsabiabi tsane mapacueniaje: "Xanepana rabaja. Tsiipaji bitso pexaniacuene panetoexaname," pajamë tsabiabi tsane Diosojavabelia. ³ Itsa pavajëtabiabianame Diosojavabelia, paxanë ata panetovajëtabiabianame. Panetovajëtabiabianame Diosojavabelia Dioso pataneyavenonaenexa nacuanë pevetsivi patanitavetsiyaniva jivi patatsipaebaponaejava Cristo

pelivaisi. Pajitsipajë jivi patatsipaebinexa pacuenia Jesucristo patsica mapanacuayabetsicaje vajanacasivatë-paenexa pibisiacuene vajaexanaeneconi yabara. Bajarapalivaisi jivi tatsipaebaponaexae, nenaneconitsiaexana. Nexata abaxë naneconitsiaya ponaponajë penaneconitsivi pejebabiabibota. ⁴ Cristo pelivaisi jivi itsa tsipaebabiabajë, jitsipajë jumenapebetsiaya tatsipaebabiabinexa. Nexata panetovajëtabianamenua Cristo pelivaisi jivi jumenapebetsiaya tatsipaebabiabinexa tanejumeyapëtaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinexa itsamonaejavabelia, patsipaebabiabare. Xaniavaetsianua patsitajinavanapare pamona Dioso apo pejumecovënëtsivi. Tsipaji rabaja imoxoyo pevajënae Cristo icatsia pepatsijavanexatsica. ⁶ Daxita palivaisianë pacuaicuanetsipaebilivaisi. Panajamatabëcueneverenua xaniavaetsia panejumecanaviatsinexa caejivi canacujitsia bajarapamona itsa pacayanijobapona Dioso pejumelivaisi yabara.

Pacuenia Pablo toyaquina pecopatsinexa baja petoyaquinaelivaisi mapabaxutotaje yabara pelivaisi

⁷ Vajabananë Tíquico, bitso vajaasivanë. Bajaraponë xaniavaetsia tonacuenebabiaba vajatuxanenë. Vajatuxanenë pijacuene patonajuanacuenebajëbeje. Bajaraponë pacatsipaebiana daxita pacuenia xanë ponaponajë. ⁸ Bajaraxuata bajaraponë pacatoitorobaliatsi papecatsipaebinexa pacuenia pajinavanapajë. Bajaraponë nexata itsa pacatsipaebiana, nexata panesivaajamatabëcuenesaëmë tsane. ⁹ Bajaraponë paxamëjavabelia yajavaponaejitsia vajabananë Onésimo. Bajaraponë Onésimo panijatamarapijinë. Tonacuenebabiaba xaniavaetsia vajatuxanenë. Bajaraponëbeje pacatsipaebiana daxita pacuenia Dioso pejumecovënëtsivi jinavanapa majotaje Roma tomarata.

¹⁰ Aristarcobeje naneconitsia paponaponajëbeje penaneconitsivi pejebabiabibota. Aristarco ata pacabajacobalia. Marcos ata, Bernabé pejuyapijinë, pacabajacobalia. Paxamë rabaja payapëtaneme pacuenia paexanaejitsiamë. Nexata Marcos itsa patsialia paxamëjav-

abelia, pacopiapitsianame xaniavaetsia. ¹¹ Pacabajacobalia Jesús ata, ponë itsavënë, Justo. Judíovi picani ayaibitsaëto Jesucristo pelivaisi jumecovënëta. Itsiata bajarapamonaeyajuvënëvi, caenëbeje saya, neyavenona vajatuxanenë pijacuene tatonacuenebija-va. Neyavenona saya mapamatabëxëyoje. Aristarco, Marcos, Jesús. Bajara saya pamatabëxëyo neyavenona. Bajarapamona bitso neyavenona. ¹² Epafra ata, Cristo pijajivitonë, panijatamarapijinë. Bajaraponë ata pacabajacobalia. Bajaraponë bitso pacatovajëtabiaba Diosojavabelia. Pacatovajëtabiaba ajamatabëcuensaëya panejumecovënëtanapaenexa Dioso pejumelivaisi. Pacatovajëtabiabanua xaniavaetsia paneexanabiabinexa pacuene Dioso pacatojitsipa. ¹³ Pacatsipaebatsi baja cajena pacuenia Epafra pacatovajëtabiaba Diosojavabelia bitso papecajamatabënajinaexae. Bajara pijinia pacuenia bitso tovajëtabiaba Dioso pejumecovënëtsivi, pejinavanapaevi Laodicea tomarata. Bitso tovajëtabiabanua Hierápolis tomarata pejinavanapaevi ata. ¹⁴ Vajaasivanë Lucas, ponë jivi vaëbabiaba, bajaraponë ata pacabajacobalia. Demasvënëta pacabajacobalia.

¹⁵ Nebajacobi vajamona, daxita Dioso pejumecovënëtsivi, Laodicea tomarata pejinavanapaevi. Nebajacobi Ninfas ata. Pamona ata nacaetuatabiaba bajaraponë pijabota, nebajacobi. ¹⁶ Itsa baja paveretame panelebijava mapabaxutoje, patoitorobianame Laodicea tomarapijivijavabelia penalebinexa bajarapamona ata. Bajarapamona ata tatoyaquinaebaxuto juya pacatoitorobiana panenalebinexa paxamë ata. ¹⁷ Arquipojavabelia pajumaitsimë tsane mapacueniaje: "Dioso pecatocopatsijava netonacuenebinexa, verere xaniavaetsia," pajamë tsane.

¹⁸ Xanë Pablonë, pacatoyaquinatsi baja cajena tacobeta mapalivaisiyoje patanebajacobinexamë. Pajamatabënajinavanapare penaneconitsivi pejebabiabibota taponaponaejava. Pacatovajëtabiabatsi Diosojavabelia papecayavenonabiabinexa Dioso. Bajara itsi tsane.

1 TESALONICENSES

**Pacuenia Pablobana, Silvanobana, Timoteobana toy-
aquina mapabaxutoje Dioso pejumecovënëtsivijav-
abelia yabara pelivaisi**

1 Xanë, Pablonë, Silvano, Timoteo, mapa-
matabëxëyoje pacatoyaquinatsi mapabaxutoje.
Pacatoyaquinatsi Dioso panejumecovënëtsivi, paTe-
salónica tomarapijivimë. Panenajamatabëcuenecopat-
sivi baja vaxa Diosojavabelia, vajatuxanenë Jesucristo-
javabelia ata. Pacatovajëtatsi vaxa Diosojavabelia pa-
pecaitaxutotsoniataenexa jamatabëcuenex-
anepanaeya panejinavanapaenexa.

**Pacuenia Tesalónica tomarapijivi Dioso pejumecov-
ënëtsivi xaniavaetsia Dioso jumecovënëtsia jinavanapa
yabara pelivaisi**

²Itsa pavajëtabiabajë Diosojavabelia, pexaniaja-
matabëcuene parajutabiabajë Diosojavabelia paxamë
yabara. Pacatovajëtabiabatsi Diosojavabelia daxita-
matabacabi canacujitsia Dioso papecayavenonabi-
abinexa. ³Itsa pacatovajëtabiabatsi vaxa Diosojav-
abelia, panajamatabënapitabiabajë Dioso pinijicuenia
panetonacuenebavanapaejava panenaja-
matabëcuenecopatsixae Diosojavabelia. Panaja-
matabënapitabiabajëna bitso pinijicuenia panejitsi-
paejava Dioso. Paxamë rabaja pajamatabëcuene-
saëmë tsavanapae panecopiaejetavanapaejava va-
jatuxanenë Jesucristo icatsia pepatsijavanexatsica.

⁴Tajamonae, Dioso baja cajena pacaasiva. Payapëtaniji
baja cajena Dioso papecaitapetsijava papijajivinexamë.

⁵Bajayata itsa pacatsipaebatsi mapapexanialivaisije
Diosojavabelia papecacapanepaelivaisinexa, saya pat-
acuibovojotota apo pacatsipaebitsi. Jume baja cajena.
Biji ra Espiritu Santo pesaë yajava pacatsipaebabiabat-
si. Nexata baja payapëtaneme palivaisi pacatsipaebatsi,
pexaniajailivaisicuene. Payapëtanemenua pacuenia
paxanë xaniavaetsia panajinavanapajë paxamëjavata
patanitaxutua ajamatabëcuenesaënexamë.

⁶Pacuenia paxanë pajinavanapajë, pacuenia Jesús
ata ponapona, bajarapacuenia paxamë ata pajina-
vanapame. Barëyaya baja pajumecovënëtavanapame
patacatsipaebilivaisi Espiritu Santo papecatsija-
matabëcaexae. Bajarapacuenia barëyaya pajumecov-
ënëtavanapame patacatsipaebilivaisi, itsamonae bitso
pacabejiobiaexanabiabi ata. ⁷Bajarapacuenia paneji-
navanapaejava daxita Dioso pejumecovënëtsivi, Mace-
donia nacuapijivi, Acaya nacuapijivi ata, itsa
pacavënëlivaisitane, bajarapamonae ata yapëtane ba-

jarapacuenia xaniavaetsia Dioso petojinavanapaenexa.
Nexata bajarapamonae ata xaniavaetsia jinavanapa
pacuenia paxamë pajinavanapame. ⁸Itsiata ëMacedo-
nia nacuapijivi, ëAcaya nacuapijivi ata, bajarapacuenia
xaniavaetsia panejinavanapaejava, apo pacavënëli-
vaisitae. Tajë nacuapijivi ata pacavënëlivaisitane pane-
najamatabëcuenecopatsijava Diosojavabelia. Bajara-
pacuenia itsa pacavënëlivaisitane, bajarapamonae ata
yapëtane baja Jesús pelivaisi pexaniajailivaisicuene.
Bajaraxuata paxanë apo pacavajunupaebitsi daxita ba-
jarapamonaejavabelia. Tsipaji baja yapëtane. ⁹Biji ra-
jane bajarapamonae pijacuata panetsipaeba paxamë
xaniavaetsia patanecopiapitsijavamë pamatabacabi
pacanasivaxainatsi. Paxamë picani jumapecataeya
pexanaenëanëjavabelia panavajëcabiabame. Itsiata
baja aeconoxae pacopatame jumapecataeya pex-
anaenëanëjavabelia panenavajëcabiabijavami. Nexata
baja pepo Diosojavabelia panajamatabëcueneco-
patame. Patonacuenebavanapame pepo Dioso, ponë
piasaëtsaponaponaenë daxitamatabacijavabelianexa.
Bajarapacuenia paxamë yabara panetsipaeba baja ca-
jena daxita bajarapamonae. ¹⁰Bajarapamonae panet-
sipaebanua panecopiaejetavanapaejava Jesús, Dioso
pexënato, athëbëvetsica icatsia pepatsijavanexatsica.
Bajaraponë, Jesús, Dioso baja cajena asaëyaexanatsi
petëpaecujinae. Jesús nacacapanepaena pibisiacuene
vajaexanaeconi yabara Dioso vajanacananeconitsia
exanaejavaminexavecua.

**Pacuenia Pablo nacueneba Tesalónica tomarata
yabara pelivaisi**

2 Tajamonae, apo panacueratsinë itsa pacasivax-
ainatsi. Bajarapacuenia paxamë panijacuata
payapëtaneme. ²Paxamë baja cajena payapëtaneme
mapacuenije. Paxanëbeje Silasbeje patapatsivajënae-
beje paxamëjavabelia, Filipos tomarata pane-
naneconitsiaexanabeje itsaneconi apo paxainae
atanëbeje. Panebejiobiaexanabejenua bajarapamon-
ae. Itsiata baitsi jane Dioso pataneyavenonaexaebeye,
ajumeurajibia pacatsipaebatsi pexanialivaisi Diosojav-
abelia papecacapanepaelivaisinexa. Pacatsipaebatsi
bajarapalivaisi, patanitoyavi picani apo panetocopatsi
ata patacatsipaebinexa. ³Palivaisi pacatsipaebatsi,
pexaniajailivaisi cajena. Apo penajumetsënëtsilivaisi.
Apo pacatsipaebitsi bajarapalivaisita patacayamaxëito-
jorobinexa. ⁴Biji ra Dioso paneitoroba. Panetocopat-
anua jivi patatsipaebinexa pexanialivaisi pecapanepaeliv-
aisinexatsi Diosojavabelia. Bajaraxuata bajarapalivaisi

jivi itsa patsipaebaponajë, apo patsipaebaponaenë saya jivi patanebarëyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajë Dioso patanebarëyataenexa. Tspaji Dioso vajanacajamatabëcueneyapëtaenë. ⁵ Paxamë baja cajena payapëtaneme mapacueneje. Caeto ata paxanë itsalivaisi apo pacabarëcuacuajaisi saya jema bajarapalivaisi yabara patanebarëyataenexamë. Yamaxëitorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuenepanejamatabëcueneyapëtane. ⁶ Cristo patanitorobixae, panejamatabëcuenecaëjëpa picani patacaitorobinexa pataneyaiyataenexamë. Itsiata baitsi jane caeto ata apo pacaitorobitsi pataneyaiyataenexamë. Apo paitorobinë itsamonae ata pataneyaiyataenexa. ⁷ Biji rajane pacuenia petiriva asivaya xaniavaetsia baevetaponapona pexi, bajara pijinia pacuenia paxanë ata asivaya xaniavaetsia pacaevetavanapatsi. ⁸ Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabëpanebejebabiabi ata, itsiata apo pacopatsinë patacayavenonaponaejava. ⁹ Tajamonae, panecuenecanaëjëre mapacueneje. Pamatacabi paxamëjavata pajinavanapajë, pinijicuenia panacuenebabiabajë. Pinijicuenia panacuenebabiabajë patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapëtaeyaxana. Paepatota pacuenesajinajë, panatonacuenebabiabajë matacabita, meravi ata. Bajarapacuenia panatonacuenebabiabajë itsanë ata paxamëyajuvënëne petoayapëbejeyanivatsi patanevetaponaejava.

¹⁰ Paxamë baja cajena paneyapëtaneme pacuenia pajinavanapajë. Dioso ata paneyapëtane. Paxamë baja cajena paneyapëtaneme paxanë pibisiacuene apo pataexanaevi. Paxamë baja cajena paneyapëtaneme paxanë bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyo ata apo paxainaenë, paneconi yabara pananeconitsijitsianë paxamëjavata itsa pacatsipaebavanapatsi Dioso pejumelivaisi. ¹¹ Paxamë baja cajena paneyapëtaneme paxamë pacaenëmë canacujitsia patacamuxujibaponaejava paneajamatabëcuenesaënexa Diosojavabelia. Pacuenia pexi pexainaenë nacoximuxujioba, bajara pijinia pacuenia paxanë ata pacamuxujibatsi. ¹² Pacaitorobatsi baja cajena xaniavaetsia panetojinavanapaenexa Dioso papecabarëyataenexa. Dioso baja cajena pacajunata daxitacuene papecabarëevetsinexa pijapenivenivenaenacuatatsia.

¹³ Itsa pacatsipaebatsi Dioso pitorobilivaisi, panenamuxunaevetame. Nexata panejumecovënëtame patacatsipaebilivaisi. "Xaniajai baja cajena. Dioso pejumelivaisi nacatsipaeba," panejamatabëjaixae, panejumecovënëtame. Apo pajumetaemë saya bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipaebaponatsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata

paxamë yabara pexaniajamatabëcuene parajutabiabajë Diosojavabelia. ¹⁴ Tajamonae, pacuenia Judea nacuata Dioso pejumecovënëtsivi bejiobiaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi. ¹⁵ Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixanë, paxanë ata bajarapamonaepanecapitsapa judíovi penacaetatabiabicovecu. Dioso apo pejitsipaecuene bajarapajudíovi exanapona. Bajarapajudíovi daxitajivi bitso itoya. ¹⁶ Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabiabixae, pibisiacuene pexanaeconi pematatsënë ayaineconi natsixaina Diosojavabelia. Nexata baja aeconoxae bajarapamonaetocopiapatatsi ayaicuenia Dioso penaneconitsiaexanaematacabinexatsi.

Pacuenia picani icatsia Pablo jamatabëtane Tesalónica tomarapijivi yabara pelivaisi

¹⁷ Tajamonae, patacavecuaponaecujinae, caematacabibeje apo pacatae atatsi, itsiata pacajamatabënavanapatsi. Bitso picani icatsia jamatabëpaponajë paxamëjavabelia patacataenexa. ¹⁸ Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. ¹⁹ Vajatuxanenë Jesucristo icatsia itsa patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi. ²⁰ Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

3 Bajayajebi baja cajena apo pacataetsi. Nexata baja belia apo panajamatabëcuene saëtaponaejitsipañë matavëjëa pataevetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. ² Nexata baja paca-toitorobatsibeje vajabananë Timoteo. Timoteobeje baja cajena Dioso patatonajuanacuenebinëbeje, jivi patatsipaebaponaenexabeje pexanialivaisi, Cristo pelivaisi. Pacaitorobatsibeje Timoteo papecayavenonaeenexa, papecajamatabëcuene asaëyaexanaenexa Dioso panejumecovënëtsijava yabara. ³ Pacaitorobatsibeje Timoteo papecayavenonaeya tsipaebabiabinexa pexanialivaisi, caenë ata paxamëyajuvënëne Dioso pejumelivaisi pejumecovënëtsijava pecopabianiva, itsamonae itsa bejiobiaexanaponatsi. Paxamë baja cajena payapëtaneme Dioso vajanacatocopatsijava itsamonae vajanacabejiobiaexanaponaeenexa. ⁴ Pamatacabi abaxë pacayajavajinavanapatsi, tajëvelia baja cajena pacatsipaebabiabatsi itsamonae

papecabejiobiaexanaponaejavanexa Dioso papijajivix-aemë. Nexata jane baja bajarapacuene aeconoxae pacatocopiapata. ⁵ Bajaraxuata baja apo najamatabëcuene saëtaponaejitsipaenë matavëjëa taeve-taponaejava patacataenexa. Nexata baja itorobajë Timoteo peponaenexa paxamëjavabelia papecataenexa pacuenia pajumecovënëtavanapame Dioso pitorobilivaisi. Xanë picani paxamë yabara jamatabëjumaisinë: "Dovathi meta bajarapamonae jamatabëcueneëjëtatsi. Othopaica meta baja. Nacuer-atajë meta baja bajarapamonaejavata pexanialivaisi tatsipaebabiabijava," jamatabëjanë picani paxamë yabara.

⁶ Timoteo nexata itsa parena paxamëjavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovënëtavanapame. Paxamë pina pasivamë tsavanapae itsamonae ata. Panejamatabënajinavanapame pina pexaniajamatabëcuenia. Bitso pina jamatabëpanetaneme picani pacuenia paxanë ata jamatabëpacatanetsi picani. ⁷ Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabëcuenesaëtavanapajë paxamë yabara. Panajamatabëcuenesaëtajë itsa pacavënëlivaisitanetsi asaëya Dioso panejumecovënëtsijava. ⁸ Itsa pacavënëlivaisitanetsi asaëya Dioso panejumecovënëtsijava, nexata pacasivanajamatabëcuenesaëtatsi. ⁹ Nexata pexaniajamatabëcuene parajutajë Diosojavabelia paxamë yabara. Pexaniajamatabëcuene parajutajë Diosojavabelia bitso patacasivajamatabëcuenebarëyaxae Dioso pitabarata. ¹⁰ Matacabiata, meravi ata, daxita patajamatabëëthëtovetsina pavajëtabiabajë Diosojavabelia patanetocopatsinexa icatsia pataponaenexa paxamëjavabelia patacataenexa. Pacatovajëtabiabatsinua Dioso papecayapëtaeyaexanaenexa palivaisi abaxë pacatosaicaxaniavaetsia panejumecovënëtsinexa Dioso pejumelivaisi.

¹¹ Pavajëtajë vaxa Diosojavabelia, vajatuxanenë Jesucristojavabelia ata, pataneyavenonaenexa pataponaenexa paxamëjavabelia. ¹² Pacuenia paxanë pacaasivatsi tsavanapae, bajarapacuenia paxamë ata caejivi canacujitsia panevajënaeyabelia namataenetsia panenasivanexa, pacatovajëtatsi Diosojavabelia papecayavenonaenexa. Pacatovajëtatsi Dioso papecayavenonaenexa itsamonae ata paneasivanexa. ¹³ Pacatovajëtatsi Dioso papecajamatabëcuene asaëyaexanaenexa, jamatabëcuenexanepanaeya panejinavanapaenexa. Nexata paneconijibimë tsane. Paneconijibimë tsane Dioso pitabarata panenubenaevavata, pamatacabi vajatuxanenë Jesús, daxita pijajivi yajava, patsianica.

Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi

4 Tajamonae, nexata pinijicuenia pacamuxujibat-si. Vajatuxanenë Jesús pejamatabëcueneta

pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatacabijavabelianexa.

² Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. ³ Dioso raja jitsipa xaniavaetsia panetojinavanapaenexa èponënexa. Dioso raja pacatojitsipa panecopabinexa pibisiacuenia panevitota paneexanaevavata. ⁴ Dioso raja pacatojitsipa pacaenëmë canacujitsia paneyapëtaenexa mapacueneje. Petiriva itsa papitame panijavanexa, xaniavaetsia paevere. Payaiyataemanua. ⁵ Pëtsa petiriva papitame pibisiacuenia saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. ⁶ Dioso cajena apo jitsipae itsanë ata pevitota pibisiacuenia pexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamonaevavata bajarapacuene. Bajarapacuene yabara imata baja cajena pacatsipaebatsi pamatacabi abaxë pajinavanapajë paxamëjavata. ⁷ Dioso baja cajena nacajunata èpexaniacuenia vaxaxanavanapaenexa. Dioso apo nacajunatsi pibisiacuenia vaxaxanavanapaenexa. ⁸ Itsamonae apo panejumecovënëtsi patatsipaebillivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espiritu Santo.

⁹ Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaexana bajarapacuenia panenasivanexa. Bajaraxuata apo namatavenonaenë baja patacatoyaquinaenexa patacayapëtaeyaexanaenexa bajarapacuene. Tsipaji baja payapëtaneme. ¹⁰ Xaniajai rabaja. Pasivamë tsavanapae daxita vaxamonae, Macedonia nacujava pejinavanapaevi. Itsiata icatsia pacaitorobatsi namataenetsia bitsoyo orijibia panenasivanexa. ¹¹ Pacuenia baja cajena copiaya pacaitorobatsi, bajarapacuenia jamatabëcuenexanepanaeya pajinavanapare. Èpanijacuene saya paexanare panejamatabëitonotsiyaniava itsamonaejavabelia. Panijacuata panatonacuenebare bajarapacuenia panenaevetavanapaenexa. ¹² Bajarapacuenia nexata Dioso apo pejumecovënëtsivi pacayaiyataena. Nexata apo pacatosaicae tsane itsacuenejavayo ata panenamatenonaevavata.

Pacuenia pepo petuxanenë Jesús icatsia patsijitsiatsica yabara pelivaisi

¹³ Tajamonae, pacatojitsipatsi xaniavaetsia paneyapëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeayaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeayaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae ja-

matabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumecovënëtsivi. ¹⁴ Vaxaitsi baja cajena jumecovënëtsi Jesús vajanacasivatëpaejava. Jesús vajanacasivatëpaejinae, Dioso icatsia asaëyaexanatsi petëpaejavavecu. Dioso icatsia itsamatacabi asaëyaexanaena daxita pamona Dioso pepua pejumecovënëtsivi petëpaevimì. Bajarapalivaisi vaxaitsi baja jumecovënëtsi.

¹⁵ Palivaisi pepo petuxanenë Jesús netsipaeba, bajarapalivaisi pacatsipaebijitsiatsi. Vaxaitsi abaxë mapanacuata vajaasaëtsavanapaevi pamatacabi pepo petuxanenë Jesús icatsia patsianica. Vaxaitsi athëbëabetsia apo namataxainatsiatsi tsane. Petëpaevimì rajane copiaya namataxainana. ¹⁶ Angelevi penamatacaitorobinë vavajai tsaxuabi tsane. Dioso pijatrompeta najumetsiana. Pepo petuxanenë jane baja pijacuata patsianica athëbëvetsia. Nexata pamona Cristo pepua pejumecovënëtsivi tëpa, bajarapamona asaëyaexanaenatsi petëpaejavamivecu. ¹⁷ Bajaraxuacujinae vaxaitsi, abaxë mapanacuata vajaasaëtsavanapaevi bajarapamatacabi, itarëëbotatsia nacaetuatiansia petëpaevimì yajava. Caxitajarabianatsi jane baja athëbëtsiatsi pepo petuxanenë Jesús. Nexata jane baja daxitamatacabijavabelianexa yajavajinavanaenatsi bajaraponë. ¹⁸ Bajaraxuata panajamatabëcuenesaëtsavanapare mapalivaisitaje.

5 Tajamona, itsiata apo panamatavenonaenë patacatoyaquinaenexa patacayapëtaeayaexanaenexa pamatacabi, paepatota ata, copiapatsijitsiatsi daxita bajarapacuene. ² Payapëtaneme baja cajena pepo petuxanenë Jesús icatsia pepatsijavanexatsica. Paepatota apo vajënaeevetsi, jemata patsianica. Pacuenia penacobetoxotsinënexa meravì bapata itsajota apo jamatabënajinaetsi, bajarapacuenia jemata patsianica pepo petuxanenë Jesús. ³ Pamatacabi jivi jumai tsaponae tsane: “Daxitanacuanëjava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumecovënëtsivi peverebiabinexatsi. Nexata acuenebi tsane Dioso apo pejumecovënëtsivi pevecuarëcëpecaenexa bajarapacuene. Pacuenia petiriva, penacoxitsiva, itsa vixanotatsi penacueto pevecua-naexanaenexatsi, acuenebi pevecuanajetabajiravijava bajarapavixae, bajara pijinia itsane pamona Dioso apo pejumecovënëtsivi. ⁴ Tajamona, paxamë baja apo pajamatabëcueneaitaquirimë. Pacuenia Dioso apo pejumecovënëtsivi ajamatabëcueneitaquiri, bajarapacuenia apo pajamatabëcueneitaquirimë. Pepo petuxanenë Jesús pepatsimatacabinexatsica pacopiaevetavanapame. Nexata pamatacabi pepo petuxanenë patsianica, apo pajamatabëcuenenabenajacaemë tsane. Pacuenia penacobetoxotsinë itsa pata, basivajamatabëcuenenabenajacatsi, apo paitsimë tsane. ⁵ Tsi-paji baja daxita paxamë pexanialivaisita pacajamatabëcueneitayota. Nexata baja daxita vaxaitsi pitaquirijamatabëcuene apo xainatsi. ⁶ Bajaraxuata nexata vaxaitsi apo bejamatabëcuenemajitsi. Pacuenia Dioso apo pejumecovënëtsivi jamatabëcueneitsi,

bajara apo bejamatabëcueneitsi. Biji rajane jamatabëcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. ⁷ Pamona jamatabëcueneaitaquiri, jamatabëcuene-majitabiaba. Aitajibi tsabiabinua meravì. ⁸ Itsiata baitsi jane vaxaitsi baja pexanialivaisita nacajamatabëcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabëcuenecopatatsi baja ëDiosojavabelia. Asivatsi tsavanapae Dioso. Itsamona ata asivatsi tsavanapae. Copiaevetavanapatsi Cristo vajanacacapanepaenexa Diosojavabelia. Bajarapacuenia itsa copiaevetavanapatsi Cristo vajanacacapanepaenexa Diosojavabelia, nexata dovathi pejamatabëcuenevecua nayajivinajamatabëcuenexatatsi Dioso pejumelivaisita. Nexata pacuenia vajabitsaënë nayajivinaxatata piatajajava, namataxatatanua piatajajava pejororonaeyanivatsi pijavajabitsaënë, bajara vaxaitsi ata itsiata dovathi vajanacayajavaponaponaenexa vajaasaëtsavanapaevi mapanacuataje. Vajatëpaejinae ata, Dioso pijanacuataatsi Cristo nacayajavaponaponaena. ¹¹ Bajaraxuata pacuenia baja namataenetsia panajamatabëcueneasaëya exanapona, bajarapacuenia panevajënaeyabelia tsiteca paexanavanapare.

Pacuenia Pablo Dioso pejumecovënëtsivi muxujioba yabara pelivaisi

¹² Tajamona, pinijicuenia pacamuxujiobatsi paneyaiyataenexa pamona paxamë tuatuajëta Dioso tonacuenebavanapa. Bajarapamona Dioso pitorobicueniatsi pacaevetavanapa. Pacamuxujiobabiabanua. ¹³ Payaiyataema bajarapamona. Asivaya pataema. Tsi-paji bajarapamona xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

¹⁴ Pacaitorobatsinua panemuxujiobinexa pamonae piafaetabivi. Pamona pijinia jamatabëcuenecuerana itsamona bepejiobiaexanaponaexaetsi Dioso pejumecovënëtsijava yabara, pajamatabëcueneasaëyaexanare. Payavenonare pamona jamatabëcuenefaefaena Dioso pejumelivaisivecu. Itsa pamuxujiobianame bajarapamona, itsa pamuxujiobianamenua itsamonaejavabelia ata, ajamatabëcueneasaëya pamuxujiobianame bajayajebi pacopatsinejavamë.

¹⁵ Pëtsa bajarapamonaejavabelia pibisiacuene panamamoexaname, copiaya pibisiacuene pacaexanae ata. Biji pajamatabënajinavanapare pexaniacuene namataenetsia panenatoexanaponaenexa. Pajamatabënajinavanapare daxitajivijavabelia ata pexaniacuene panetoexanaenexa.

¹⁶ Daxitamatacabi pajamatabëcuenebarëyamëre tsa-
vanapae. ¹⁷ Daxitamatacabi Diosojavabelia pavajëtabi-
abare pacopatsinejevamë. ¹⁸ Daxita pacuene apo
panejitsipaecuene ata, Dioso itsa pacatocopata pa-
pecatocopiapatsinexa, nexata itsa pacatocopiapata ba-
jarapacuene, itsiata pexaniajamatabëcuene para-
jutabiabianame Diosojavabelia bajarapacuene yabara.
Bajarapacuenia paneexanavanapaenexa, Dioso paca-
tojitsipa Jesucristo papijajivixaemë.

¹⁹ Espiritu Santo itsa pacajamatabëcueneitoroba it-
sacueneyavayo paneexanaenexa, pëtsa pajamatabëju-
maitsimë: "Apo exanaenë tsane bajarapacuenia," paja-
matabëjamë pëtsa. ²⁰ Pëtsa panamuxujematame Es-
píritu Santo peyajavacuauicuaijaivi, Dioso pejumeliv-
aisianë pepaebivi. ²¹ Nexata pacuenia bajarapamonae
pacaitoroba panejumecovënëtsinexa, copiaya pajaire
Dioso pejumelivaisibaxutota paneyapëtaenexa. Nexa-
ta xaniajai bajarapacuenia Dioso pejumelivaisibaxuto-
ta itsa jumaitsi, bajarapacuenia paexanare. ²² Daxita
xua pibisiacuene, panayajivitaema.

²³ Dioso baja cajena vajanacajamatabëcuenexani-
avaetsinë. Bajaraponë pibisiacuene paneex-

anaeneconimi pacavecuajjibiaexanaena. Dioso evet-
siana panejamatabëcuene, paneperabëto ata, pibisi-
acuene paneexanaeyaniva. Bajarapacuenia Dioso
pacaevetsiana matapania vajatuxanenë Jesucristo icat-
sia pepatsimatacabitsicajavabelianexa. ²⁴ Bajarapacue-
nia Dioso pacaevetsiana, ponë pacajunata papexinex-
amë. Dioso cajena pacatoexanaena daxita pacuenia
najumecapanepaeya pacajumaitsi.

**Pacuenia Pablo jamatabënajina Tesalónica tomarapi-
jivi, pacuenia ata tovajëta Dioso peyavenonaenexatsi,
yabara pelivaisi**

²⁵ Tajamonae, Diosojavabelia panetovajëtabiabare.

²⁶ Asivaya nebajacobiana daxita bajarajotalia Dioso
pejumecovënëtsivi.

²⁷ Pacaitorobatsi Dioso pejamatabëcueneta. Pat-
simuxulebianame mapabaxutoje daxita Dioso pejume-
covënëtsivi pejumetaenexa.

²⁸ Pacatovajëtabiabatsi Diosojavabelia vajatuxanenë
Jesucristo papecayavenonabiabinexa.

2 TESALONICENSES

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecov-
 ěnětsivijavabelia yabara pelivaisi

1 Xaně Pabloně, Silvano, Timoteo, mapa-
 mataběxěyoje pacatoyaquinatsi mapabaxutoje.
 Pacatoyaquinatsi Dioso panejumecověnětsivi, paTe-
 salónica tomarapijivimě. Panenajamataběcuenecopat-
 sivi baja vaxa Diosojavabelia, vajatuxaneně Jesucristo-
 javabelia ata. ² Pacatovajětatsi vaxa Diosojavabelia, va-
 jatuxaneně Jesucristojavabelia ata, papecaitaxutotso-
 niataenexa jamataběcuenexanepanaeya panejina-
 vanapaenexa.

Pacuenia Dioso naneconitsiaexanaena pibisiacuene
 pexanaevi pamatacabi Cristo icatsia patsianica yabara
 pelivaisi

³ Tajamonae, panevajěnaeyabelia bitso orijibia pana-
 jamataběcuenecopataponame Diosojavabelia.
 Pacaeněmě canacujitsia namataenetsia panaasi-
 vaměnua tsavanapae. Bajaraxuata daxitamatacabi
 paxamě yabara pajumaitsině tsane Diosojavabelia:
 "Xanepana rabaja. Pexaniacuena yavenonaponame
 Tesalónica tomarapijivi," pajaně tsane. ⁴ Diosojavabelia
 pajamataběcuenesaěmě tsaponae itsamonae pini-
 jicuenia pacabijataeyabiabi ata, pacabejiobiaexanabi-
 abi atanua. Bajaraxuata paxaně barěyaya pacavěněli-
 vaisipaebaponatsi itsatomaranějava, Dioso pejume-
 cověnětsivijava. ⁵ Bajarapacuenia pacabejiobiaexanabi-
 abi ata, Diosojavabelia paneajamataběcuenesaě
 tsaponaexae, nayapětane Dioso papecaja-
 mataběcueneyavenonaevajanexa pamatacabi
 naneconitsiaexanaena pijaneconi pexinaevi. Bajara-
 pamatacabi Dioso papecasivajamataběcuenenbarěyax-
 ae, pacatocopatsiana panejonenexa Dioso pi-
 janacuayabetsia Dioso papecaevetsinexa.

⁶ Dioso baja cajena najamataběcuenevereta pacue-
 nia exanaejitsia. Nexata juya Dioso bejiobiaexanaena
 pamonaevacabejiobiaexanapona maparucaeje. ⁷ Pax-
 amě abaxě pacabejiobiaexanaponaena pacuenia pax-
 aně ata panebejiobiaexanapona. Itsiata Dioso
 nacayavenonaena bajarapacuenivecua. Bajarapacue-
 nia Dioso nacayavenonaena pamatacabi pepo petuxa-
 neně Jesús icatsia patsianica piasaěángelevi yajava,
 pitarunutsicotia ata yajava. ⁸ Jesús jane baja patsianica
 penaneconitsiaexanaenexa pamonaevacabejiobiaexanapona
 apo yapětae Dioso. Pamonaevacabejiobiaexanapona
 apo jumecověnětsi pepo petuxa-
 neně Jesucristo pelivaisi, Jesús naneconitsiaexanaena.

⁹ Bajarapamonae pijaneconi yabara Jesús naneconitsi-
 aexanaenatsi daxitamatacabi javabelianexa. Dioso
 pitabaravecua tajě xuabianatsi. Bajarapamonae Dioso
 pijapenivenivenaecotia apo tae tsane caeto ata. ¹⁰ Pa-
 matacabi vajatuxaneně icatsia patsianica, pinijicuenia
 pijajivi yaiyataenatsi. Pinijicuenia sivajamataběcuene
 nabenaajacaenatsi daxita Jesús pejumecověnětsivitsi.
 Bajarapacuenia tocopiapatsianatsi pamatacabi pat-
 sianica vajatuxaneně. Paxamě ata Jesús pijajivi paya-
 javamě tsane patanejumecověnětsixaemě patacatsi-
 paebilivaisi.

¹¹ Bajaraxuata pacatovajětabiabatsi Diosojavabelia.
 Pacatovajětabiabatsi vaja Diosojavabelia papecaja-
 mataběcuene xaniavaetsinexa. Pacuenia beja-
 mataběcueneitsi Dioso pijajivi, bajara paneja-
 mataběcueneitsinexa. Pacatovajětabiabatsinua Dioso-
 javabelia pecaějěpaejamataběcuenetatsi papecaja-
 mataběcueneyavenonaenexa, paneexanaenexa daxita
 pacuenia pajamataběexanaponame. Pacatovajětabia-
 batsinua Diosojavabelia papecayavenonaponae
 daxita pacuene paexaname Jesucristo papijajivixaemě.
¹² Nexata paxamě xaniavaetsia panejinavanapaeja-
 mataběcueneta, vajatuxaneně Jesucristo daxitajivi
 yaiyataenatsi. Paxamě ata juya Dioso pacayaiy-
 ataeyaexanaena daxitajivi. Bajarapacuenia pacayaiy-
 ataeyaexanaena papecaitaxutotsoniataexae vaja-
 Dioso, vajatuxaneně Jesucristo ata.

Pibisiacuene bitso pexanabiabině yabara pelivaisi

2 Tajamonae, pacatsipaebatsi baja cajena
 paneyapětaenexa pacuenia vajatuxaneně Jesu-
 cristo patsijitsiatsica. Pacatsipaebatsinua baja cajena
 pacuenia ata nacacaetuatsijitsia bajaraponějavabelia
 pamatacabi patsianica. ² Nexata pajivi najumetsěnětsi-
 aya pacajumai tsane: "Espíritu Santo raja neyapě-
 taeyaexana. Jesucristo rabaja patsica," pacajai tsane,
 pětsa pajumecověnětame. Pajivi pijinia najumetsěnět-
 siaya pacajumai tsane: "Pepacuene rabaja Jesucristo
 patsica," pacajai tsane, pětsa pajumecověnětame. Pa-
 jivi pijinia najumetsěnětsiaya pacajumai tsane:
 "Pablobana raja nacatoyaquina: 'Jesucristo rabaja pat-
 sica,' jai raja vajanacatoyaquinaebaxutota," pacajai
 tsane, pětsa pajumecověnětame. Itsamonae najumet-
 sěnětsia itsa pacatsipaeba Jesús pepatsijavatsica
 yabara, pětsa panajamataběcueneepatajěrěrěcame
 panejumecověnětavanapae livaisivecua. Pětsa paja-
 mataběcuenenabenajacamenua. ³ Pětsa pajumecov-
 ěnětame pematatsěněa itsalivaisicuenia itsa pacatsi-

paeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja itsa baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaronë itsamatacabi Dioso xuabiana isotuabelia, bitso bejiobiaya peponaponaenexa daxitamatacabijavabelianexa. ⁴ Bajaronë cueneitoya tsane Dioso pijacuene. Pamonaë ata vajëcabiaba bedioso petaevijavabelia, itavetsiana pevajëcabiabianiva. Dioso pijatemplobota ata belia ecaena bediosonë jivi petaenexatsi. Bajaronë jumai tsane: “Xanë rajane baja diosonë,” jaï tsane. Bajarapacuenia jivi ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënëtame tsabaja bajarapalivaisi?

⁶ Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsianiva. Dioso petocaëjëtsimatacabita bajaraponë patsiana. ⁷ Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsianiva, patsiana jane baja pibisiacuene bitso pexanabiabinexa. ⁸ Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaexanaena pijapenivenivenaecotiata. ⁹ Bajaronë patsiana dovathi pejamatabëcueneta pibisiacuene bitso pexanabiabinexa. Nexata bajaraponë dovathi pesaëta pinijicuene pexanaejava exanaponaena jivi peyamaxëitojorobinexa, beayaijamatabëcuenenë petaenexatsi. ¹⁰ Bajaronë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia. ¹¹ Bajaraxuata Dioso tocopatsiana bajaraponë penajumetsënëtsilivaisi petsipaebinexatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi. ¹² Bajaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³ Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espiritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bajaraxuata pax-

amë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. ¹⁴ Dioso paneitoroba patacatsipaebinexa pexanialivaisi papecacapanepaelivaisinexa Diosojavabelia. Nexata baja pajumecovënëtame bajarapalivaisi. Bajarapacuenia Dioso pacajunata panepatsinexa vajatuxanenë Jesucristojavabetsia, papecayajavaponaponexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavanapare patacatsipaebillivaisi. Palivaisi ata patacatoyaquinatsi panejumecovënëtsinexa, pëtsa panacofënëtame. ¹⁶ Vajatuxanenë Jesucristo, vaxa Dioso ata, nacaasiva. Bajaronëbeje nacaitaxutotsonianane. Bajaraxuata nacajamatabëcuenesaëyaexanapona daxitamatacabijavabelianexa. Nacatocopatana vajacopiaevetavanapaenexa pepo petuxanenë Jesucristo icatsia pepatsijavanexatsica.

¹⁷ Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecjamatabëcuenesaëyaexanaenexa. Pacatovajëtatsinua jivi panetsipaebinexa pexanialivaisi. Pacatovajëtatsinua paneexanaenexa daxita xua pexaniacuene.

Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pejailivaisi yabara pelivaisi

3 Tajamonae, pecopiaruacelivaisi rabaja maje paca-toyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacuajava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë pajumecovënëtame bajarapalivaisi. Patovajërenua daxitajivi peyayataenexa Dioso pejumelivaisi. ² Panetovajërenua Dioso patanevetsinexa pibisijamatabëcuenevivecua. Bajarapacuenia panetovajëre tsipaji raja daxitajivi Dioso apo jumecovënëtsi. ³ Itsiata baitsi jane vajatuxanenë nacayavenonabiaba. Bajaronë pacajamatabëcuenesaëyaexanaena. Pacaevetsiananua dovathivecua. ⁴ Paxamë yabara baja cajena pajamatabëjumaitsinë: “Bajarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia exanavanapaena pacuenia itorobatsi,” pajamatabëjanë baja cajena paxamë yabara. ⁵ Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavanapaenexa Cristo papecjamatabëcuenesa yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶ Tajamonae, vajatuxanenë Jesucristo pejamatabëcueneta pacaitorobatsi. Dioso pejumecovënëtsivi ata itsa piafaetabivi, bajarapamonae panavecuat-

sare. Bajarapamonae apo nacuenebabiabi penaevetsinexa pacuenia picani paitorobajë. ⁷ Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bepajinavanapame. Pamatacabi abaxë panajinavanapajë paxamëjavata, apo pafaetabinë tsavanapae.

⁸ Amoneya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabibabajë pinijicuenia. Matacabita, meravi ata, panatonacuenebabibabajë patanaevetsinexa. Bajarapacuenia panatonacuenebabibabajë itsajivi ata paxamëyajuvenëvi petoyapëbejeyanivatsi patanevetsijava patanajinavanapaejavata. ⁹ Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabibabatsi baja cajena. Bajarapacuenia paxamë ata panatonacuenebabibabare panenaevetsinexa. ¹⁰ Pamatacabi abaxë panajinavanapajë paxamëjavata, pacajumaitsitsi baja cajena: "Pajivi afaetabi, pëtsa naxane," pacajaitsi baja cajena.

¹¹ Pavënëlivaisitaniji pacuenia itsamonae paxamëyajuvenëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae.

¹² Bajarapamonaejavabelia pajumaitsimë tsane: "Pablo raja vajatuxanenë Jesucristo pejamatabëcueneta jumaitsi: 'Panacuenebianame pina panenaevetsinexa,' jai raja Pablo," pajamë tsane.

¹³ Tajamonae, pëtsa pajamatabëcuenecueraname pexaniacuene paneexanavanapaejava. ¹⁴ Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. ¹⁵ Itsiata baitsi jane bajarapajivi bepanijavajabitsaëjivi pëtsa pataneme. Dioso panenajuajumecovënëtsivixae, pexaniajamatabëcuenia pamuxujio-bianame.

Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacuenebabibabiabi ata. Pacatovajëtatsi vajatuxanenë papecayajavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanecuenia yaquinabiababajë daxita tayaquinaebaxutonëta, bajarapaitanecuenia pacatoyaquinatsi mapalivaisiyoje paneyapëtaenexa xanë patacatoitorobicuene mapabaxutoje. ¹⁸ Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa.

xaniavaetsia tatonacuenebinexa. Bajaraxuata pexania-jamatabëcuene rajutajë. ¹³ Copiata abaxë ita apo jumecovënëtsinë Jesucristo, pibisiacuenia picani baracuaicuaijanë tsabiabi Jesucristo. Pijajivi ata tobarajinabiabajë tabejiobiaexanaenexa. Pibisiacuenia bi-jataeyabiabajë Jesucristo pijajivi. Bjarapacuenia taexanabiabinë ata, Dioso itsiata nebejjobiatane. Tsi-paji jamatabëcuenenavëxaniabiaya bajarapacuenie exanabi-abajë. Apo yapëtaenë picani xua exanaponajë Jesucristojavabelia. Tsi-paji abaxë apo jumecovënëtsinë Jesucristo Dioso pexënatocuene. ¹⁴ Nexata baja itsiata belia vajatuxanenë Jesucristo pinijicuenia neyavenona tanajamatabëcuene copatsinexa bajaraponëjavabelia. Bajaraxuacujinae pijajivitonëxaenë, neyavenona tasi-vanexa itsamonae ata.

¹⁵ Mapalivaisije pacatsipaebijitsiatsi. Bjarapalivaisi pexaniajailivaisi cajena. Nexata daxitajivi xaniavaetsia bejumecovënëta mapalivaisije. Jesucristo baja cajena patsica mapanacuayabetsicaje pibisiacuenie pexanaevimi pecapanepaenexa Diosojavabelia. Xanë ata picani bitso pibisiacuenie taexanaenëmi daxitajivi matatox-enetsia. ¹⁶ Xanë itsiata bajara taitsinëmi ata, Dioso itsi-ata nebejjobiatane. Bjarapacuenia Dioso nebejjobi-atane daxitajivi peyapëtaenexa Jesucristo bajayajebi tanesivaajamatabëcuenesaëjava tajumecov-ënëtsinexa, pibisiacuenie taexanaenëmi ata. Nexata pamonaexa bexëjavabelia ata Jesucristojavabelia najamatabëcuene copataponae, xainaena matacabi apo pevereverecaejava. Bjarapamonae nesivaajamatabëcuenesaë tsane ita nevënëlivaisitaena Jesús taneitapetsijava pijajivitonëxanë, pibisiacuenie bitso taexanabiabinëmi ata. ¹⁷ Bjaraxuata vaxaitsi pepo Dioso, daxitacuene peyapëtaenëjavabelia, jumatsitsi tsabiabi: "Xamë Diosomë bitso ayaijamatabëcu-nenëmë. Bitso ayaicuenie nexanaenë," jaitsi tsabiabi. Bjaraponë Dioso daxitacuene peyapëtaenë. Pepo pevetsinënuaxa daxitacuene. Apo petëpaenëxanua daxitamatacabijavabelianexa. Apo petäenëtsinua it-sajivi ata.

¹⁸ Timoteo, betaxënatomë tacataenë. Pacuenia caitorobatsi, exanaename. Bajayata baja cajena itsa-monae Dioso pejumecovënëtsivi Dioso peja-matabëcueneta tajëvelia cavajunupaeba pacuenia ex-anaejitsiamë. Bjarapacuenia Dioso asaëyata to-canacuenebaponare mapalivaisije. Nexata bajarapacuenia Dioso pitorobilivaisi daxitajivi yapëtaena. Catoayapëbeje ata dovathi pecajamatabëcueneëjësixa, ajamatabëcuenesaëmëre Diosojavabelia nenajamatabëcuene copatsijava. Exanabiabare xua yapë-taneme pexaniajaicuenie nenajamatabëcuenebi-jianaeyaniva Diosovecua. ¹⁹ Itsamonae baja yapëtae ata pacuenia Dioso itorobatsi, itsiata pibisiacuenie ex-ana. Nexata bajarapamonae Diosovecua naxuabiana pecopabixae Cristo pejumecovënëtsijavami. ²⁰ Bjarapamonaeyajuvënënebeje Himeneobeje Alejandrobeje. Pibisiacuenia Dioso baracuaicuaijaibeje tsabiabi. Nexata pecopatsinexabeje Dioso pebaracuaicuaijajavabeje, bajaraponëbeje copatajë dovathijavabelia. Nexata

bexëa ita najamatabëxainabeje pexanialivaisi, xani-avaetsia jane baja Dioso pejumecovënëtsinexabeje.

Pacuenia Dioso pejumecovënëtsivi daxitajivi betovajë-ta Diosojavabelia yabara pelivaisi

2 Timoteo, copiaya caitorobatsi mapacueniaje. Caitorobatsi panetovajëtabiabinexa daxitajivi Diosojavabelia. Daxitajivi Diosojavabelia patovajëtabi-abianame pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. ² Patovajëtsianamenua Diosojavabelia presidentevi ata. Patovajëtsianamenua daxi-ta gobierno pijalivaisi pevetsivi ata. Bjarapacuenia pa-tovajëtsianame bajarapamonae Dioso peyavenon-aenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëta-vanapaenatsi. Nexata exanavanapaenatsi ëpexani-acuene. ³ Bjarapacuenia Diosojavabelia daxita bajarapamonae vajatovajëtsijava, xanepana Dioso, ponë nacacapanepaejitsia, vajanacasivabarëyanexa. ⁴ Bjarapacuenia daxitajivi vajatovajëtsijava Dioso jitsipa. Tsi-paji Dioso jitsipa daxitajivi pecapanepaenexa bajaraponëjavabelia. Dioso tojitsipanua daxitajivi peyapëtaenexa pexaniajailivaisi, Jesucristo pelivaisi. ⁵ Nexata daxitajivi ita yapëtaena pexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuaijinëxaxa Diosojavabelia. ⁶ Jesucristo rabaja nacopata pebeyaxu-abinexatsi. Nexata Jesucristo petëpaejavata, daxitajivi pijaneconimi matamota. Bjarapacuenie daxitajivi peyapëtaenexa, Dioso pecaëjëtsimatocabita pijajivi itoroba daxitanacuanëjava pexaniajailivaisi jivi petsi-paebinexa. Tsi-paji baja cajena Dioso jitsipa daxitajivi pecapanepaenexa. ⁷ Bjarapalivaisi jivi tatsipaebinexa Dioso nitoroba. Dioso nitoroba bajarapalivaisi tatsi-paebinexa pamonaexa apo judíovi ata penajamatabëcuene copatsinexa Diosojavabelia. Nexata pexaniajailivaisi jivi tatsipaebijava, ita canavajunupaebatsi, xaniajanë cajena. Cristo tajumecovënëtsinëxaxa, pexaniajailivaisi jivi tsipaebaponajë. Apo najumet-sënëtsinë cajena.

⁸ Bjaraxuata daxitanacuanëjava pebijivi, pamonaexa baja Dioso pitabarata aneconijibi, ita vajëta Diosojavabelia, jitsipajë nacobeyotsiaya pevajëtsijava Diosojavabelia. Bjarapamonae bevajëta Diosojavabelia anaepanaenejeva itsajiviyojavabelia, jumeanaenotsinejevanua itsajiviyojavabelia. ⁹ Jitsipajë pijinia petiriavi penaxatabinexa xanepanaeya. Pëtsa bitso naitabëtsiaya naxataba. Itsa naxaniavaeta, bitso pëtsa namataitabëta pexaniacuenia. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso penamatamotsinavanë ata. ¹⁰ Petiriavi, pamonaexa baja xaniavaetsia najamatabëcuene copata Diosojavabelia, pëtsa naitabëta bitso. Bjarapamonae Dioso pitabarata pexaniacuenie

betoexanabiaba itsamonaevavabelia penajamatabëcueneitabëtsinexa bëpënëajavaverena.

¹¹ Dioso pejumecovënëtsivi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumejibia benamuxunaevetena pejumecovënëtsinexa palivaisi tsipaebatsi. ¹² Petiriavi apo tocopatsinë pemuxujobinexa pebijivi. Apo tocopatsinëua petiriavi beayaijamatabëcuenevi nataeya pitorobabiabinexa pebijivi. Biji rajane petiriavi beveliajamatabëcuenevi nataeya ajumejibia benamuxunaevetena. ¹³ Bajarapacuenia itorobajë tsipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva. ¹⁴ Adán cajena picani dovathi apo yamaxëitojorobitsi. Biji rajane copiaya petiriva dovathi yamaxëitojorobatsi. Nexata petiriva copiaya pibisiacuenexana. ¹⁵ Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi jane bajarapamonae capanepaenatsi Diosojavabelia itsa casaë tsane penajamatabëcueneocopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

Pacuenia ancianovinexa bejamatabëcueneitsi yabara pelivaisi

3 Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniaacuene, Dioso pijacuene, jamatabëtonacueneba. ² Ancianonënexa, xanepana ponë apo xainae itsacueneneconi ata, paneconi yabara itsamonaeneconitsijitsiatsi. Caevayo pepitsinë. Penajamatabëcuenereviabinë. Xaniavaetsia penajamatabëxainanë. Peyaiyataenëtsi. Xaniavaetsia pecopiapitabibinë pijaboyaberena pesivaxainavetsi. Pecaëjëpaenëtsi xaniavaetsia jivi Dioso pejumelivaisi petsipabonexa. ³ Ancianonënexa, xanepana ponë apo piapaenë piatajibinexa. Pevëna pebi apo pebenë. Apo pejitsipañë itsajivi ata yamaxëitojorobiaya palata pevecuanacobetoxotsinexa. Biji rajane ancianonënexa xanepana ponë pexaniajamatabëcuenenë. Anaeya itsajivi ata apo pejumepitsinë pebarënajumeanaenotsinexa. Bitso pexainanexa ata pexainajava, apo penajamatabëxainanë. ⁴ Ancianonënexa, xanepana ponë xaniavaetsia eveta pexi, pijava yajava. Pexi pejumecovënëtsinëtsi. Pejumeiyaiyataenëtsinua. ⁵ Ponë apo caëjëpaetsi xaniavaetsia pexi pevetsinexa, pijava yajava, nexata bajaraponë apo caëjëpaetsi pevetsinexa Dioso pejumecovënëtsivi. ⁶ Apo xanepanae tsipae ancianonënexa ponë abaxë ajena jumecovënëta Dioso. Beayaijamatabëcuenenë itajara nataejitsipa bajaraponë. Nexata epatua Diosovecua jopaejitsipa. Bajarapacuenia bajayata dovathi penajamatabëxainanë, Dioso vecuajopaica. Nexata dovathi daxitamatacabijavabelianexa naneconita Diosojav-

abelia. ⁷ Ancianonënexa, xanepana ponë peyaiyataenëtsi pamona Dioso apo pejumecovënëtsivi ata. Bajarapitsinë xanepana ancianonënexa ancianonë pexanaecujinaetsi jivi pequenetsiataeyanivatsi, dovathi ata peyamaxëitojorobiyanivatsi.

Pacuenia diáconovinexa bejamatabëcueneitsi yabara pelivaisi

⁸ Diáconovinexa pijinia, xanepana pamona penajamatabëcuenereviabivi. Itaxutojema apo pecuaicuajivai. Apo piapaevi piatajibinexa. Apo pejitsipañë itsajivi ata yamaxëitojorobiaya palata pevecuanacobetoxotsinexa. ⁹ Diáconovinexa, xanepana pamona xaniavaetsia najamatabëcueneocopata Cristojavabelia. Pejamatabëthëtota peyapëtaevi pexaniajicuene palivaisi jumecovënëta. ¹⁰ Pamona diáconovinexa, copiaya bitorobatsi itsacuenejavayo pevetsinexa bajarapacuenia pejamatabëcuenejëtsinexatsi. Nexata xaniavaetsia itsa eveta xua evetsiaexanatsi, diáconovi jane baja bexanatsi. Nexata jane baja bitorobatsi penacuenebinexa xua diáconovi banacueneba. ¹¹ Diáconovi pijinia pijavajivi xanepana penajamatabëcuenereviabinexa, apo bebaracuicuajivai itsamona. Xaniavaetsia benajamatabëxaina. Nexata xaniavaetsia bexanabiaba pacuenia itorobatsi. ¹² Diácononënexa, xanepana ponë caeva pepitsinë. Pecaëjëpaenëtsinua xaniavaetsia pevetsinexa pexi, pijava yajava. ¹³ Diáconovi xaniavaetsia itsa eveta penacuenebija, nexata diáconovi xaniavaetsia yayiataenatsi daxitajivi. Ajumeurajibianua jivijavabelia navajunupabiana Jesucristojavabelia penajamatabëcueneocopatsijava.

Pacuenia Timoteo toyaquinatsi peyapëtaenexa pacuenia exanaponaponaejitsia Dioso pejumecovënëtsivi tuatujëta yabara pelivaisi

¹⁴ Timoteo, bepijia picani jamatabëponajë xamëjavabelia tacataenexa. Itsiata tavajënaeyabelia catoyaquinatsi mapacuene yabaraje. ¹⁵ Nexata abaxë itsa cuenenajematsianajë tapatsijava xamëjavabelia, neyapëtaenexa pacuenia exanaponaponaejitsiamë Dioso pejumecovënëtsivi tuatujëta. Pamona baja Dioso pejumecovënëtsivi, Dioso rabaja piasaënë pijajivi. Bajarapamonae Dioso pejumelivaisi, pexaniajailivaisi, xaniavaetsia baja jumecovënëtavanapa. Daxita nacuanëpijivi ata pejumecovënëtsinexa bajarapalivaisi. Bajarapamonae pexaniajailivaisi itsamonaevavabelia tsipaebaona. Bajarapamonae apo tocopatsinua itsajivi ata pexaniajailivaisivecua saicayalivaisi pejumecovënëtsiyaniva. ¹⁶ Pepo pexaniajailivaisi cajena Cristo pelivaisi. Bajaraponë baja vaxaitsi jumecovënëtavanapatsi. Itsiata baitsi jane itsamona apo jamatabëcueneypëtae bajaraponë. Bajaraponë Cristo ayaijamatabëcuenenë bitso:

Bajaraponë Cristo mapanacuata naexana bevaxaitsi jivitonëcuena. Espíritu Santo pejamatabëcueneta daxitajivi yapëtaeyaexanatsi Cristo pianeconijibinëcuene.

Angelevi ata Cristo tanetsi. Cristo pijajivi vënëlivaisi-paebaponatsi daxitanacuanëpijivijava. Nexata daxitanacuanëpijivi najamatabëcuenecopabapona Cristojavabelia. Dioso pijanacuatatsia ata Cristo copiapitatsi.

Dioso pejumelivaisi pejumecovënëtsijava pecopabivi yabara pelivaisi

4 Espiritu Santo baja cajena tajëvelia nacayapë-taeyaexana pacuenia bexëajavabelia itsamonae copabijitsia Dioso pejumelivaisi pejumecovënëtsijavami. Bajarapamonae nexata jumecovënëtsiana penajumetsënëtsilivaisi petsipaebaponaevitsi. Nexata bajarapamonae asaëya jumecovënëtaponae itsamonae dovathi pejamatabëcueneta petsipaebilivaisitsi. ² Bajarapamonae namuxunaevetsiana penajumetsënëtsilivaisi petsipaebaponaevitsi, betsitapexaniajamatabëcuenevitsi itajara tsane, pibisiajamatabëcuenevi ata. Bajarapamonae tsipaebaponaena penajumetsënëtsilivaisi. Apo acueneura cajena tsane. ³ Bajarapamonae itavetsiana penacasabicuene. Bajarapamonae itavetsiananua itsacuenejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae. ⁴ Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacuenejavayo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabit-si Diosojavabelia vajanacarajutsixae vajaxaejavanexa. ⁵ Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabëcuenere rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

Pacuenia Timoteo itorobatsi xaniavaetsia peponaponae xaniavaetsia petsipaebinexanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Niajamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavanapatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare. ⁷ Itsiata baitsi jane pëtsa jumecovënëtame mapanacuapijilivaisianëje, saya natsiquejmalivaisianë. Daxita nesaëta nacujaubare xaniavaetsia neponaponae xaniavaetsia Dioso pejitsipaecuenia. ⁸ Vajajumalixanepanaenexa, xanepana picani vajaperabësaëta vajacujinaejinaejava. Itsiata baitsi jane daxitacuenevecua xanepana bitso vajajinavanapaenexa pacuenia Dioso nacatojitsipa. Bajarapacuenere nacatoxanepana tsipajivajatëpacujinae ata Dioso nacaja-

matabëcueneyavenonaena xaniavaetsia vajajinavanapaenexa. ⁹ Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. ¹⁰ Bajaraxuata Dioso tonacuenebaponaponatsibeje. Casaëtsibeje tsaponaponae Dioso vaja-tonacuenebaponaponaejavabeje, itsamonae pibisiacuena nacabijataeyabiabi atabeje. Bajarapacuenia exanatsibeje tsipaji najamatabëcuenecopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonaenajamatabëcuenecopata bajaraponëjavabelia.

¹¹ Bajarapalivaisi tsipaebaponaere. Itorobaponarenua bajarapacuenia pexanaenexa. ¹² Pëtsa nacopatame pevejëatoxaemë itsajivi ata pecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopenae xaniavaetsia Diosojavabelia pecayavenonaenexa daxitacuene yabara. Èpexaniacuene yabara najamatabëxainare. Bajarapacuenia itsa tsitaexanaponaponae name, nexata Dioso pejumecovënëtsivi cacuenejèpaeyajinavanapaena. ¹³ Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimuxulebabiabare. Tsipaebaponaerenua pacuenia jumaitsi Dioso pejumelivaisibaxutota bajarapamonae pijamatabëcuenesaënexa Diosojavabelia. ¹⁴ Dioso baja cajena carajuta pecacaëjèpaejamatabëcuenere xaniavaetsia jivi livaisi netsipaebinexa, pecacaëjèpaenexanua xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcuenerevetaponaponare. Pamatacabi ancianovi nacaetuata, catsimatanacobebuatsiaya catovajëta Diosojavabelia. Nexata bajarajota Dioso carajuta pecacaëjèpaejamatabëcuenere.

¹⁵ Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejumecovënëtaponaponaejavamë pacuenia caitorobatsi. ¹⁶ Pibisiacuene nayajivitaeya ponaponare. Palivaisi ata tsipaebaponaere, xaniavaetsia tsipaebaponaere. Saicayacuena pëtsa bajarapalivaisivecua tsipaebaponaere. Bajarapacuenia nexanaejava casaëmëre tsaponaponae. Nexata Dioso capanepaena. Pamonaenata cajumecovënëta netsipaebilivaisi, Dioso capanepaenatsi.

Pacuenia Timoteo itorobatsi penaponaponae xaniavaetsia Dioso pejumecovënëtsivijava yabara pelivaisi

5 Pëtsa asaëya muxujobame pamonaenajavajënaeyapijivi. Biji xaniavaetsia yayataeya beaxacuenia muxujobare. Necovëpijivi pijinia benejuyapijivicuenia muxujobare. ² Petiriavi ata nevajënaeyapijivi beenacuena muxujobare. Necovëpijivaxi pijinia benejuyapijivaxicuenia muxujobare. Èpexaniajamatabëcuenia taema bajarapovaxi itsajamatabëcuenere bëpënënejamatabëthëtota sivanajamatabëxainanejevamë.

³ Pamona pevecuatëpaevatsi, Dioso pejumecovënët-siva, yaiyataeya yavenonare itsa bitso bejiobi. ⁴ Itsiata baitsi jane pamona pevecuatëpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata, pamo ata, pacue ata, pamona vitsatatsi. Bajarapacuenia itsa exana, exana pexaniacuene. Nexata Dioso barëyataenatsi. ⁵ Pamona pevecuatëpaevatsi, Dioso pejumecovënët-siva, itsa apo xainae itsajivi ata pevetsinexatsi, bajarapova najamatabëcuenecopat-aponaponae Diosojavabelia peyavenonaenexatsi. Navajëtabiabi Diosojavabelia matacabita, meravi ata. ⁶ Itsiata baitsi jane pamona pevecuatëpaevatsi pejisipaenencia pibisiacuene itsa exanaponapona, Dioso tanetsi bepetëpaeva, abaxë asaë tsaponaponae ata. ⁷ Bajarapacuenia itorobare Dioso pejumecovënët-sivi pijamonae peyavenonaenexa itsa bitso bejiobi. Nexata pamona Dioso apo pejumecovënët-sivi, toacuenebi tsanetsi pebaracuaicuajijavatsi bajaraxua yabara. ⁸ Dioso pejumecovënët-sivi, pijamonae beveta. Pajivi apo itaxutotsoniatæ pevetsinexa pepo pijamonae ata, bajarapajivi apo exanae pacuenia Dioso itorobatsi. Nexata pijamonae itsa apo evetsi, bajarapajivi bitso pibisiacuene exana Dioso apo pejumecovënët-sijivi matatoxenetsia.

⁹ Petiriva sesenta pavaibeje pexinaeava, caeto penacojiobicujinae pamona pevecuatëpaevatsi, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota. Nexata daxita Dioso pejumecovënët-sivi peyavenonabinexatsi. ¹⁰ Pova pamona pevecuatëpaevatsi itsa cuenyapëtanetsi pexaniacuene pexanaejava, bajarapova xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota. Mabaitsi pacuene pexanaeava xanepana pevënëyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabëcuenecovëbia Dioso pejumecovënët-sivi peyavenonaeva. Peyavenonaevanua itsamonae itsa bejiobiaexanatsi Dioso pejumecovënët-sijava yabara. Daxita xua pexaniacuene, pexanaeava, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota.

¹¹ Itsiata baitsi jane pova abaxë sesenta pavaibeje apo pexinaeava, pëtsa vënëyaquinarutame nevënëyaquinarubibaxutota peyavenonaenexatsi daxita Dioso pejumecovënët-sivi. Tsipaji bajarapova itsa jitsipa pexanaenexa pacuenia natojitsipa, copatsipa Cristo pejumecovënët-sijavami. Nexata icatsia nacojiobijitsipa. ¹² Nexata pijaneconi xainaejitsipa Diosojavabelia. Tsipaji copatsipa Cristojavabelia penajamatabëcuenecopatsijavami: "Capanepaeya baja jumecovënëtajë Cristo," jai ata. ¹³ Pematatsënëa bajarapova sivaxainarutsipa itsa bonëjava. Afaetabinua tsipae. Pematatsënëa baracuaicuajijai tsabiabi tsipae itsamonae. Jamatabëitonotabiabijitsipa itsamonae. Xuaxi yabara ata apo becuacuajijaisi, cuacuajijai tsabiabi tsipae.

¹⁴ Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacojiobijava pexi pexinaenexa, pijabo ata xaniavaetsia pevetsinexa. Nexata bajarapacuenia va-janacacueneitoyavi ata toacuenebi tsanetsi pebaracuaicuajijavatsi bajarapitsiva. ¹⁵ Bajarapacuenia jumaitsinë tsipaji baja itsamonae pamonajivi pevecuatëpaevitsi copaba baja Cristo pejumecovënët-sijavami. Nexata pacuenia dovathi itorobatsi, exanavanapa.

¹⁶ Dioso pejumecovënët-sivi, pebijivi, petiriavi ata, itsa pijamonaeayajuvënëva pamona vecuatëpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenona tsane peyavenonaenexatsi daxita Dioso pejumecovënët-sivi. Tsipaji baja pijamonae evetatsi. Nexata Dioso pejumecovënët-sivi caëjëpaejitsiatsi peyavenonaenexa pamona bitso bepejiobivi, pamona pevecuatëpaevitsi pijamonae petoajibivitsi.

¹⁷ Ancianovi, pamona xaniavaetsia evetabiaba Dioso pejumecovënët-sivi, bajarapamonae xaniavaetsia bematamotatsi. Beyaiyatanetsinua. Ancianovi, pamona Dioso pitorobilivaisi bitso tsipaeba, bitso cujarubanua, bajarapamonae xaniavaetsia bematamotatsi. ¹⁸ Dioso pejumelivaisibaxutota jumaitsi pacuenia bueyu copatsi pexaejava pexaenexa penacuenebijavata. Jumaitsi mapacueniaje: "Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabijavata. Pëtsa pumuxatatame trigoxu pexaenexa pecatotanabataxuabijavata," jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamot-sijavanexa yabara jumaitsi mapacueniaje: "Penacuenebinë bematamotatsi," jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

¹⁹ Pëtsa jumexaniataneme caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënët-sianame. ²⁰ Nexata xaniajai ancianovi pibisiacuene itsa exanapona, itavere daxita Dioso pejumecovënët-sivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cjunaviana pibisiacuene pexanaejava. ²¹ Dioso pitabarata, vajatuxanenë Jesucristo ata pitabarata, Dioso pijaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene itsa exana, pëtsa sivaajumeuramë nitavetsinexa pibisiacuene pexanaejava. ²² Pëtsa itsanë ata bepijia exaname ancianonënexa. Tsipaji ponë bepijia ancianonënexa exanaejitsipame, bepijia pibisiacuene itsa exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuenevecua, xaniavaetsia naevetsiaya ponaponare.

²³ Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vino-rayo, pitaranae yajava, apaeyabianame.

²⁴ Itsamonae pibisiacuene itsa exana, bananeconitsi-aexanatsi daxitajivi pepuacueneyapëtaetsi. Itsamonae pijinia pibisiacuene exanae ata, bepijia apo cueneyapëtaetsi. Bexëa matapania xaniavaetsia vënëlivaisinaitajëta pibisiacuene pexanaejava. ²⁵ Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlivaisitanetsi pexaniacuene pexanaejava.

6 Pamonae dajubicuena canajetatsi itsamonaejavabelia amoneya petonacuenebabinexa, bajarapamonae Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuena apo baracuaicuaijai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuena apo baracuaicuaijai tsane.

² Dajubicuena pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaitsi pijatuxanenë yabara mapacueniaje: "Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane," jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsi-paji raja Dioso pejumecovënëtsinë yavenonaeya tonacueneba Dioso penajuaasivitsiyajuvënë. Bajarapalivaisi tsipaebaponare. Itorobarena bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamonae saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje.

⁴ Cueneyapëtanetsi pamonae penajumetsënësilivaisi tsipaebapona. Bajarapamonae beayaijamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemabivitsi jinavanapa. Nexata bajarapamonae jitsipabiaba itsamonaejavabelia pejumeeanaeyanotabinexa saya jema itsacuenelivaisixi peyanijobijavata. Apo barënjamatabëcuenejëpae itsajivi ata. Bajarapamonae yajuvënëvi itsa xaina itsacueneyavayo, bajarapamonae nacobecaëbabiaba. Anaepanabiaba. Nabijataeyabiaba. "Itsamonae covë nitsacueniabijitsia," jamatabëjai tsabiabi, itsamonae apo itsacueniabijitsia atatsi. ⁵ Bajarapamonae anaeya namataenetsia najumenotabiaba. Tsi-paji piagamatabëcuenebejevi. Bajarapamonae pexaniajailivaisi, Cristo pelivaisi, apo yapëtae xaniavaetsia jivi pëtsipaebinxexa. Saya bajarapamonae ja-

matabëjumai tsabiabi: "Xanë raja Dioso pejumelivaisi tatsipaebaponaexae, palata nacanabianajë," jamatabëjai tsabiabi bajarapamonae. Bjarapitsivi nayajivitsare. ⁶ Vaxaitsi Dioso vajajumecovënëtsivi, bitso cajena vajaxinaevi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxinaenexa mapanacuataje. ⁷ Pamatacabi vaxaitsi naexanatsi mapanacuataje, itsacueneyavayo ata apo capatsitsi. Pamatacabi pijinia tēpaenatsi, apocaponae tsanetsi itsacueneyavayo ata mapanacuapijicueneye. ⁸ Bajaraxuata nexata itsa xainatsi vajaxaejava, vajanaxatabijava ata, besivajamatabëcuenebarëyatsi. ⁹ Itsiata baitsi jane pamonae najamatabëxaina ëpexinaejavanexa, bajarapamonae dovathi jamatabëcueneçetatsi. Nexata pibisiacuene exana palata pepitsinexa. Jamatabëcuenebijnatsi. Nexata bajarapamonae Diosovecua naxuabiaya jinavanapa. ¹⁰ Pamonae bitso palata jitsipa, daxita xua pibisiacuene exana palata pepitsinexa. Itsamonae bitso najamatabëxaina ëpexinaecuepe xainanexa. Nexata baja copaba Dioso pejumecovënëtsijivami. Nexata bajarapajamatabëcuene bēpënëa bitso yajamatabëcuenebëjai.

Pacuenia Timoteo muxujibatsi piagamatabëcuensaënexa Diosojavabelia penajamatabëcuene copatsijava yabara pelivaisi

¹¹ Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabëcuene. Biji jane ajamatabëcuensaëmëre Dioso nejumecovënëtaponaponaejava. Dioso asivamëre. Diosojavabelia najamatabëcuene copatsiaya ponaponare. Itsamonae ata asivamëre tsaponaponae. Itsamonae caitsacueniababiabi ata, bajayajebi casaëmëre tsaponaponae Dioso nejumecovënëtaponaponaejava. "Xanë ayaijamatabëcuenenënë," nejaiyaniva, beveliajamatabëcuenenënë nataeya ponaponare. ¹² Catoayapëbeje ata Diosojavabelia nenajamatabëcuene copatsijava, ajamatabëcuensaëmëre nepitsinexa xua Dioso carajutsijitsia, matacabi apo peverevere caejava. Pamatacabi navajunupaebame nejumecovënëtsijava Jesús Dioso pexënatocuene, Dioso cajunata pecarajutsinexa matacabi apo peverevere caejava. Ayaibitsaëtöxaneto Dioso pejumecovënëtsivi pitabarata, Dioso cajunata pecarajutsinexa matacabi apo peverevere caejava. ¹³ Dioso baja cajena pesaëta daxita vaxaitsi asaë tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuapaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴ Caitorobatsi xaniavaetsia nejumecovënëtaponaponanexa daxita pacuenia jumaiti pexanialivaisi, Cristo pelivaisi. Nexata acuenebi tsane itsajivi ata pecaitavetsinexa. Bajarapacuenia vajënaeevetaponaponare vajatuxanenë Jesucristo matapania pepatsimatacabitsicajavabelianexa. ¹⁵ Pamatacabi Dioso caëjëta, itsa copiapatsiana, Cristo icatsia patsianica. Caenë Dioso bitso ayaijamatabëcuenenënë daxitanacuanë pevetsivivecua. ¹⁶ Caenë Dioso

apo tēpae tsane daxita matabijavabelianexa. Dioso peyacotiyaponaponaenē. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tsipaji apo caējēpaetsi petaejava. ¡Daxitamatacabi Dioso pijajivi yaiyatanetsi! ¡Dioso cajena ayaijamatābēcuenenē daxitamatacabi javabelianexa!

¹⁷ Pamonaē bitso pexainaēvi mapanacuapijicueneje, bajarapamonaē muxujibare beayaijamatābēcuenēvi penataeyaniva. Muxujibarenuā pejamatabējumait-siyaniva: "Palata baja taxainaēxae, apo namatavenon-aenē itsacuenejava ata," pejamatabējaiyaniva. Tsipaji saya palata peveverecaējava. Biji rajane itorobare bitso pexainaēvi penajamatābēcuenecopatsinexa pi-asaētsaponaponaenē Diosojavabelia. Dioso nacarajuta daxita vajaxinaējava barēyaya vajacajinavana-paenexa. ¹⁸ Itorobarenuā bajarapamonaē pijapalata pecanacuenēbinexa, itsamonaējavabelia pexani-acuene petoexanabiabinexa bajarapapalatata. Itorobarenuā penajamatābēcueneveretsinexa palata perajutsinexa bepejibivijavabelia, bajarapacuenia peyavenonaenexa. Itorobarenuā petsicobetsanapon-

aenexa pexainaējava bepejibivijavabelia. ¹⁹ Bajara-pacuenia itsa exanaena, nexata athēbētatsia Dioso to-buataponaenatsi pepacuene penamatamotsijava pex-ainaenexa daxitamatacabi javabelianexa. Xainaenānuā matabi apo peveverecaējava.

Pacuenia Pablo Timoteo pemuxujibilivaisi toyaquina, pecopatsivajēnaē petoyaquinaelivaisi mapabaxutotaje, yabara pelivaisi

²⁰ Timoteo, exanaponaēnare daxita xua Dioso catocopata nexanaenexa. Pētsa namuxunaēvetame pamonaē bitso pecuaicuaijaivi saya mapanacuapijicuene yabaraje. Pētsa namuxunaēvetame pecuaicuaijaivi natsiquejemalivaisixi. Pētsa namuxunaēvetame pamonaē jivi tsipaebapona penajumetsēnēsilivaisi. Bajarapamonaē tsipaebapona itajara pepacuene bepexaniajailivaisi. Itsiata cajena apo pexaniajailivaisi. ²¹ Itsamonaē bajarapalivaisi jumecovēnēta. Nexata baja copaba Dioso pejumecovēnētsijavami.

Catovajētatsi Dioso pecayavenonaenexa.

2 TIMOTEO

Pacuenia icatsia Pablo cotocaevibaxuto toyaquina Timoteojavabelia yabara pelivaisi

1 Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaitsi vajanacarajutsinexa matababi apo peverevereaejava. Dioso nacarajutsiana matababi apo peverevereaejava, Jesucristo vajajumecovënëtsivi. ² Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaabeje. Catovajëtatsi pecaitaxutotsoniataenexabeje, pecajamatabëcuene xanepanaeyaexanaenexanua bajaraponëbejevabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia tonaponajë. Itsa canajamatabënapitatsi tavajëtsijavata Diosojavabelia, meravi, matababita ata, Diosojavabelia pexaniajamatabëcuene rajutabiabajë xamë yabara. ⁴ Najamatabënapitabiabajë tanepënuayabaxuabijavamë pamatacabi navecuanatsatatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. ⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaeviyaniva Dioso pecacajëpaeyaexanaejamatabëcuene. Nexata xaniavaetsia evetaponaponaename Dioso pejumecovënëtsivi. Pajamatabëcuene Dioso cacaëjëpaeyaexana, Dioso carajuta pamatacabi catsimatanacobebuatatsi tacatovajëtsijavata Diosojavabelia. ⁷ Dioso cajena nacarajuta Espiritu Santo. Espiritu Santo nexata vajanacayavaponaponaexae, apo cjunavitsi itsacuenejava ata. Espiritu Santo pesaëta nacacajëpaeyaexana pacuenia Dioso nacatojitsipa vajaexanabiabinexa. Nacayavenonanua vajaasivanexa itsamonae ata. Nacanajamatabëcuene

cataitsiaexananua pibisiacuene ata vajaexanaeyaniva. ⁸ Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxaenë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana. ⁹ Dioso cajena nacapanepaena pibisiacuene vajaexanaeneconimivecua. Nacajunata vajatojinavanapaenexa xaniavaetsia. Itsacuenejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua Jesucristo pejamatabëcueneta. Pepo bajarayaticujinae, pamatacabi abaxë Dioso nacua ata apo exanae, Dioso baja cajena nacajitsipa. ¹⁰ Dioso cajena nacatsitanajamatabëcueneitajëta vajanacaasivajava. Dioso vajanacaasivaxae, pexënato itorobica vajanacapanepaenexa. Nexata tēpae ata tsanetsi, apo nacatoitsacuene. Tsipaji itsa najamatabëcuenecopatatsi Jesucristojavabelia, nacapanepaena Diosojavabelia. Nexata xainaenatsi matababi apo peverevereaejava.

¹¹ Dioso cajena nitapeta jivi tatsipaebaponaenexa bajarapapexanialivaisi. Nitoroba apóstolenëxanë tatsipaebaponaenexa bajarapalivaisi apo judövijavabelia. ¹² Bajarapalivaisi jivi tatsipaebaponaexae, itsamonae nebejiobiaexanapona mapacueniaje. Itsiata baitsi jane apo auranë tanebejiobiaexanaejava yabara. Tsipaji ponëjavabelia najamatabëcuenecopatajë, jamatabëcueneyapëtaniji. Jamatabëcueneyapëtaniji pacuenia bajaraponë jamatabëcuenecaëjëpatsi taneyavenonaenexa. Nexata bajaraponë neyavenonabiabiana pacuene netocopata taexanaponaenexa matapania icatsia Cristo pepatsimatacabitsicajavabelianexa.

¹³ Timoteo, casaëmëre tsaponaponaenexa nejumecovënëtsijava pexaniajailivaisi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabënaponaponaenexa. Xaniavaetsia jumecovënëtsiaponaponaenexa. Asivaya taeyabiabare itsamonae ata Jesucristo pijajivitonëxaemë. ¹⁴ Espiritu Santo cajena nacayavaponaponaenexa. Nexata nacayavenonaponaenexa. Bajaraxuata pexaniajailivaisi xaniavaetsi tsipaebaponaenexa. Pacuenia Dioso caitoroba, exanabiabare. Saicayalivaisicuenia pëtsa tsipaebaponaenexa. Espiritu Santo cayavenonaena.

¹⁵ Xamë baja cajena yapëtaneme pacuenia Asiävënë nacuapijivi, daxita Dioso pejumecovënëtsivi, nexu-abarëcëpeca. Tanexuabarëcëpecaevi yajuvënënebeje Figelobeje Hermógenesbeje. ¹⁶ Onesíforo, pijamonae yajava, Dioso pitaxutotsoniataenexatsi, tovajëtajë Diosojavabelia. Onesíforo nejamatabëcuenebabataba. Penaneconitsivi pejebabiabibota ecae atanë, nesi-vaxaina anijatonë. Onesíforo cajena apo neyabaraaura, penaneconitsivi pejebabiabibota ecae atanë. ¹⁷ Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejaitarsijava. ¹⁸ Diosojavabelia Onesíforo tovajëtajë Dioso pitaxutotsoniataenexatsi pamatacabi icatsia Cristo patsianica. Xamë baja cajena yapëtaneme pacuenia Onesíforo nacayavenonabeje pamatacabi ponaponatsibeje Efeso tomarata.

Pacuenia Jesucristo pijajivitonë jamatabëcueneitsi, ponë xaniavaetsia jumecovënëta, yabara pelivaisi

2 Timoteo, xamë betaxënatomëcuena tacataenë. Catovajëtatsi Diosojavabelia pecajamatabëcuene asaëyaexanaenexa. Nacayavenonaena Jesucristo pijajivixaetsi. ² Xamë rabaja cajena nejumetaeyabiabame palivaisi tsipaebabiabajë jivi ayaibitsaëtöxanetonëjavabelia. Bajarapalivaisi juya tsipaebare itsamonaejavabelia. Pamona apo piacuenejitsibivi pexanaenexa pacuenia itorobatsi, pecaëjëpaevitsinua xaniavaetsia jivi livaisi petsipaebinexa, bajarapamona itorobare juya mataropotsia bajarapalivaisi petsipaebinexa itsamonaejavabelia.

³ Dioso pejumelivaisi jivi netsipaebaponaejavata, itsa catoayapëbeje, itsamonae itsa cabejiobiaexanaejitsianua, pëtsa najetabajiravame. Jesucristo pijajivitonëxaemë, jamatabëcueneevetaponaponare pacuenia caitoroba nexanaenexa. Pacuenia pexaniavajabitsaënë itsi, bajaraitsimëre. ⁴ Vajabitsaënë pitorobabinëtsi jamatabëcueneevetaponapona pacuenia itorobatsi pexanaenexa. Nexata apo vecuanajamatabëcueneepatajërëtsi saicayacuene pevetaponaeenexa. ⁵ Bajara pijinia pacuenia pebitsojinaevi pecujinaejinaejava, penayacobijavata, cujinaejina pacuenia itorobatsi pijatuxanevi. Penacanabinë jamatejema perajutsinexatsi itsacuenejavayo. Pajivi xaniavaetsia apo cujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. ⁶ Ponë pijinia pabi nacueneba peubinexa peubijava, bajaraponë copiaya nacueneba asaëyata. Nexata peubijava itsa tonaveretatsi, pita baja penacuenebimatamo. Bajara pijinia pacuenia xamë ata asaëya tonacuenebare vajatuxanenë. Nexata vajatuxanenë carajutsiana netonacuenebimatamo. ⁷ Najamatabëxainare tacatsipaebilivaisi. Nexata vajatuxanenë cayapëtaeyaexanaena bajarapalivaisi.

⁸ Canaëjère Jesucristo. Bajaraponë cajena Dioso asaëyaexanatsi petëpaecujinae. Bajaraponë cajena Davidpijinë pemomoxiyajuvënëne. Bajaraponë pelivaisi jivi tsipaebabiabajë. Itsa jumecovënëta bajarapali-

vaisi, pecapanepaelivaisinexatsi Diosojavabelia. ⁹ Bajarapalivaisi tatsipaebaponaexae, penaneconitsivi pejebabiabibota neeta tavajënaeyabelia daxitanacuanëjava tatsipaebaponaeyaniva. Cadenamaëtonëta xanë necëta, pacuenia bitso pibisiacuene pexanaenë bacë-tatsi. Itsiata Jesucristo pelivaisi apo cëtsicapanepae. Nexata xanë majotaje naneconitsia ponapona atanë, aeconoxae baja Jesucristo pelivaisi yacaëjëpaponaxitanacuanëjava. ¹⁰ Bajaraxua tayapëtaexae, tonacaevetajë itsamonae ayaicuenia tanebejiobiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovënëtsixae. Nexata bajarapamona ata Dioso capanepaenatsi pexanaenexa matababi apo peverevereaejava daxita matababijavabelianexa. Nexata bajarapamona Jesucristo yajavajinapanapaena pinijicotia yajava. ¹¹ Palivaisi aeconoxae jumaitsinëjitsia, pexaniajailivaisi cajena:

Itsaxaniajai Cristo yajavatëpatsibeje, nexata icatsia Cristo yajavaasaëtsibeje tsaponapona tsane. ¹² Itsa casaë tsaponaponaetsibeje tsane Cristo pelivaisi vajajumecovënëtsijavabeje, itsamonae nacabejiobiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatsia. Itsa vaxaitsibeje bajaraponë pelivaisi vajajumecovënëtsijavabeje nayavajunuaxainaenatsibeje jivijavabelia, nexata juya bajaraponë pijajivitonëcueneetsibeje nacayavajunuaxainaenabeje paxa Diosojavabelia. ¹³ Vaxaitsi itsajamatabëcuene Dioso vecuanajamatabëxainae atatsi, itsiata Dioso nacatoexanaena pacuenia baja cajena najumecapanepaeya jumaitsi.

Pacuenia jamatabëcueneitsi xaniavaetsia Dioso petonacuenebinë yabara pelivaisi

¹⁴ Daxita Dioso pejumecovënëtsivi najamatabënapitsiaexanaename palivaisi catsipaebatsi. Vajatuxanenë pitabarata tsipaebare bajarapamona. Pëtsa bajarapamona anaeya jumenota saya itsamonae pecuaicuaijajava. Pejumeanaenotsijava itsamonae, apo jamatabëcueneavenona tsipaetsi itsajivi ata. Saya jamatabëcuenebijinaejitsipatsi daxita pejumetaevitsi.

¹⁵ Pacuenia cacaëjëpa, Dioso pecaitorobicuenia exanaponaponare. Nexata pamatacabi naitajëtsianame Dioso pitabarata, cabarëyataena xaniavaetsia nejumecovënëtsixae pacuenia caitoroba. Ajibi tsane neyabaraaurajava Diosojavabelia. Tsipaji xaniavaetsia jivi tsipaebaponaenoname Dioso pejumelivaisi, pepo pexaniajailivaisi. ¹⁶ Pëtsa namuxunaevetame pamona tsipaebapona natsiquejemalivaisi, mapanacuapijilivaisi. Tsipaji raja bajarapamona petsipaebaponaelivaisita, jivi Dioso pejumecovënëtsijavami copabiaexanapona pevajënaeyabelia. ¹⁷ Bitso cajena abeje bajarapalivaisi. Pacuenia ayaivajënë banaexanapona pevajënëtsabanajetarucaejava, bajara pijinia jamatabëcueneitsi bajarapamona petsipaebaponaelivaisi. Tsipaji pevajënaeyabelia jivi ayaibitsaëto jamatabëcuenebijinanapontsi bajarapalivaisi petsipaebaponaexaetsi. Bajarapalivaisi petsipaebaponaevi ya-

juvënënebeje Himeneobeje Filetobeje. ¹⁸ Bajara-ponëbeje copatabeje baja pexaniajailivaisi pejumecov-ënëtsijavamibeje. Jamatabëcuenenavëxaniababeje saya. Tspaji jumaitsibeje tsabiabi: "Panepa rabaja jivi petëpaecujinae icatsia Dioso piasaëyaexanaponae-javaminexa," jaibeje tsabiabi. Nexata bajarapacuenia Dioso pejumelivaisivecua najamatabëcuene epata-jërërëcaponabeje. Nexata bajaraponëbeje itsamonae ata Dioso pejumecovënëtsijavamivecua najamatabëcueneepatajërërëcaeya exanaponabeje.

¹⁹ Pacuenia ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: "Pepo petuxanenë cajena yapë-tane pijajivi," pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: "Pajivi jumaitsi: 'Xanë raja Cristo pijajivitonë,' jai, bajarapajivi becopata pibisiacuene pexanaejava," pejailivaisiyo ruca.

²⁰ Riconë pijaboxaneto jivi pecanabaninëanënexa, xaina daxitacuenevirianëanë. Itsanëanë penioponae-platananitota pexanaenëanë. Itsanëanë oronanitota pexanaenëanë. Pamatacabi riconë topatatsi petux-anevi, ayaijamatabëcuenevi, pexaejava abatabiaba bajaraponëanëta. Itsanëanë bevelianëanë, naeja-vanëanë. Itsanëanë atsaninëanë. Bajaraponëanë xaina daxitamatacabi jivi pecanabaninexa. ²¹ Bajara pijinia jamatabëcueneitsi Dioso pejumecovënëtsivi ata. Pajivi xaniavaetsia najamatabëcuenevetaponapona pibisiacuene pexanaeyaniva, bajarapajivi jamatabëcueneitsi pacuenia oronanitota pexanaenëanë itsi. Baitsi baja ajamatabëcueneuxirajibi. Nexata pijatuxanenë tsitaxanepana pitorobinexatsi xua pexaniacuene pijatuxanenë petonacuenebinexa. Timoteo, bajaraxuata xaniavaetsia benaevetaponapona pibisiacuene nexanaeyaniva.

²² Pacuene pevëjëavi najamatabëxaina pibisiacuene pexanaenexa, bajarapacuenie vecuanajetabajiravaponare. Casaëmëre tsaponaponaepexaniacuene nexanaponaponaejava. Diosojavabelia najamatabëcuene copatsiayaponapona. Asivamëre tsaponaponaepexaniacuene itsamonae ata. Jamatabëcuene-xanepanaeya ponaponaepexaniacuene Dioso pitabarata. Bajara-pacuenia barëajamatabëcuenesaëmëre tsaponaponaepexaniacuene xaniavaetsia penaevetavanapaevi pibisiacuene pexanaeyaniva, penavajëcabiabivina Diosojavabelia peyavenonaenexatsi. ²³ Namuxujemare natsiquejemalivaisixi pecuacuajai. Yapëtaneme rabaja. Bajarapitsilivaisixi jivi itsa cuaicuajai, belia najumeanaenotabiabapona. ²⁴ Jesús cajena pijajivitonë, itsamonae apo bejumeanaenotsi. Biji rajane pexaniajamatabëcuene bexaina daxitajivijavabelia. Livaisi jivi betsipaeba xaniavaetsia. Bajayajebi ata apo becopatsi livaisi petsipaeabaponaejava. ²⁵ Xaniavaetsia muxujiobi-aya livaisi betsipaeabapona pamonae Dioso apo pejitsipaevi ata. Nexata bevetaponapona bajarapamonae ata pecopabinexa pibisiacuene pexanabiabijava penajamatabëcuene pënëyorotsinexa Diosojav-

abelia. Nexata bajarapamonae ata Dioso yapëtaeyaexanaenatsi Jesús pelivaisi pexaniajailivaisicuene. ²⁶ Nexata icatsia najamatabëxainaena xaniavaetsia Dioso pejumecovënëtsinexa. ²⁵ Xaniavaetsia muxujiobiaya livaisi betsipaeabapona pamonae Dioso apo pejitsipaevi ata. Nexata bevetaponapona bajarapamonae ata Nexata dovathi pejamatabëcuene itorobabiabijavatsivecua najamatabëcuene pënëyorotsiana Diosojavabelia.

Pacuenia jivi itsane itsa baja imoxoyo pevajënae nacua pevereverecaenexa yabara pelivaisi

3 Timoteo, xaniavaetsia beyapëtaneme mapacueneje. Itsa baja imoxoyo pevajënae tsane nacua pevereverecaenexa, bajarapamatacabi bitso ayapëbeje tsane daxitacuenejavabelia. ² Bajarapamat-acabi cajena caejivi canacujitsia pexinaejava, natoasiva tsane ëbajarapamonae ayajava pexinaenexa. Navajunupaebiana saya peyayataenexatsi pejumetaevitsi. Beayaijamatabëcuenevi nataena. Navajunupaebiana pexanaejava yabara peyayataenexatsi. Bajarapamonae pibisiacuene baracuaicuajai tsane Dioso. Apo jumecovënëtsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabënajinae tsane pijamonae. Bajarapamonae apo yayatae tsane itsamonae Diosojavabelia pevajëcabiabijava. ³ Bajarapamatacabitaja bajarapamonae apo asiva tsane pijamonae ata. Apo itaxutotsoniatate tsane itsamonaejavabelia ata. Najumetsënëtsiaya baracuaicuajai tsabiabi tsane itsamonae. Apo cajëpaetsi tsane penajamatabëcueneecatatsinexa pibisiacuene pexanaejava. Anaepanabiabiana bitso pebejio-biaexanaenexa itsamonae. Itoya tsane daxita pexaniacuene pexanaevi. ⁴ Bajarapamonae canajetsiana penajuajinavanapaevi ata pijavajabitsaë pecobeyabelia. Xaniavaetsia najamatabëxainaenejeva, exanaena daxitacuene. Bijiaya naëcotsiana itsamonae. Dioso apo jamatabënajinae tsane. Jaitsiana biji pebarëyajamatabëcuene saya pebarëyanexa. ⁵ Bajarapamonae itajara najonena Dioso pejumecovënëtsivijavabelia. Itsiata baitsi jane apo jumecovënëtsi tsane Dioso pejumelivaisi, jumetae ata.

Bajarapamonae navecuatsatsianame. ⁶ Bajarapamonae navecuatsatsianame tspaji bajarapamonaeayajuvënëvi itsamonae pijabonëjavabelia joneyabiabiana. Nexata bajarapabonëpijivi, petiriavi, bajarapamonae yamaxëitojorobabiabiana. Bajarapapetiriavi jamatabëcuenefaefaenaena. Daxitacuene pibisiacuene jamatabëexanabiabiana. Nexata pamatacabi bajarapapetiriavi pibisiacuene jamatabëexana, patabiabiana penajumetsënëtsilivaisi petsipaebinexatsi. Nexata bajarapapetiriavi itsa tsipaebianatsi penajumetsënëtsilivaisi, beDioso itajara pejumelivaisi petsipaebivi taeyabiabiana. ⁷ Bajarapapetiriavi picani jitsipaena petsipaeabiabinexatsi Dioso pejumelivaisi. Itsiata baitsi jane apo tsijamatabëjonetsi tsane pepo pexaniajailivaisi pecapanepaelivaisinexatsi Diosojavabelia. ⁸ Bajayata penajorobinëmibeje, Janespijinëmibeje Jambrespi-

jinēmibeje, nayajiviitavetabeje Moiséspijinē pexaniajailivaisi petsipaebiyānivatsibeje. Bajara pijinia pacuenia pamonaē petirivijavabelia penajumetsēnētsilivaisi tsipaebaponaena. Bajarapamonaē nayajiviitavetaponaepepo pexaniajailivaisi petsipaebiyānivatsi. Bajara-papebijivi apo caējēpaetsi tsane penajamatabēx-ainaenexa xaniavaetsia. Bajarapamonaē saya yamaxēitorobiaya jumai tsabiabi tsane itsamonaējavabelia: “Paxanē raja Dioso patajumecovēnētsivi,” jai tsabiabi tsane. ⁹ Itsiata bajarapamonaē ayaibitsaēto jivi apo pēnaponaetsi tsane. Daxitajivi cuenyapētaenatsi bajarapamonaē saya jema livaisi petsipaebaponaējava. Nexata pacuenia bajayata Janespijinēmibeje Jambrespijinēmibeje daxitajivi cuenyapētanetsibeje pibisiacuene pexanaponaējavabeje, bajara pijinia pacuenia bajarapamonaē ata daxitajivi cuenyapētaenatsi penajumetsēnētsilivaisi petsipaebaponaējava.

Pacuenia baja Pablo copatsijitsia Timoteo pemuxujibijava yabara pelivaisi

¹⁰ Timoteo, xamē baja cajena yapētaneme palivaisi tsipaebabiabajē jivibitsaēto xanetojavabelia. Yapētanemenua baja cajena pacuenia xaniavaetsia ponaponajē. Yapētanemenua pacuene yabara Dioso tonacuenebaponaenajē. Yapētanemenua pacuenia Dioso jumecovēnētaponaenajē. Yapētanemenua pacuenia itsamonaējavabelia livaisi tsipaebaponaē bajayajebi copatsinejevanē. Yapētanemenua pacuenia itsamonaē ata asivanē. Yapētanemenua pacuenia casaēnē tsaponaponaē jivi livaisi tatsipaebaponaējava netoayapēbeje ata. ¹¹ Yapētanemenua pacuenia itsamonaē pibisiacuena nebaracuacuajai tsabiabi Jesucristo tajumecovēnētsinēxae. Yapētanemenua pacuenia nebejiohiaexanapona. Yapētanemenua pacuenia nebejiohiaexana Antioquía tomarata, Iconia tomarata ata, Lистра tomarata ata. Bajarapatomaranēpijivi bitso nebejiohiaexana. Itsiata baitsi jane Dioso necapanepa daxita bajarapacuenivecua. ¹² Xaniajai cajena. Daxita pamonaē najamatabēcuenecopata xaniavaetsia petojinavanapaenexa Jesucristo, bajarapamonaē bejiohiaexanaponaenatsi. ¹³ Nexata pibisiamatabēcuenēvi, pamonaē dovathi pejamatabēcueneta jivi yamaxēitorobapona, orijibia bitso pevajēnaeyabelia pibisiacuene exanaponaena. Bajarapamonaē dovathi pejamatabēcueneta jivi yamaxēitorobaponaena. Nexata pijinia bajarapamonaē ata bitsoyo dovathi yamaxēitorobaponaenatsi.

¹⁴ Timoteo, itsiata baitsi jane xamē casaēmēre tsaponaponaē palivaisi baja capanepaeya jumecovēnētame. Tsipaji baja cajena xamē jamatabēcueneyapētaneme pacuenia jamatabēcuenēitsi pamonaē catsipaeba bajarapalivaisi. ¹⁵ Tsiquirinēyomējavaveliacujinae baja cajena yapētaneme Dioso pejumelivaisi. Bajarapalivaisi cayapētaeyaexana pecapanepejavanaxa Diosojavabelia nenajamatabēcuenecopatsixae Jesucristojavabelia. ¹⁶ Dioso pijajivi Espiritu Santo itorobatsi peyaquinaenexa Dioso pejumelivaisi. Nexata pacuenia Espiritu Santo itorobat-

si, bajarapacuenia Dioso pijajivi yaquina daxita Dioso pejumelivaisibaxutonēnēxa. Nexata nacatoxanepana Dioso pejumelivaisi itsamonaē vajanacatsipaebinexa vajayapētaenexa pexaniajailivaisicuene. Nacatoxanepanana Dioso pejumelivaisi vajanacaitavetsinexa apo pexanepanaecuene itsa exanatsi. Nacatoxanepanana Dioso pejumelivaisi vajanacajamatabēcuenēitorobinexa ēDiosopejitsipaecuene vajatoexanabiabinexa. Nacatoxanepanana Dioso pejumelivaisi vajanacayapētaeyaexanaenexa xaniavaetsia vajatojinavanapaenexa Dioso. ¹⁷ Nexata Dioso pejumecovēnētsinē itsa yapētane Dioso pejumelivaisi, jamatabēcuenēcaējēpaenatsi daxita xua pexaniacuene pexanaenexa.

⁴ Pepo petuxanenē Jesucristo patsianica penaneconitsiaexanaenexa daxita pibisiacuene pexanaevi. Naneconitsiaexanaena piasaētsavanapaevi, petēpaevi ata. Bajaraponē itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanē jamatabēcuenereviaya caitorobatsi mapacueniaje. ² Daxitamatacabi jivi tsipaebare Dioso pitorobilivaisi. Ajamatabēcuenesaēya Dioso pitorobilivaisi tsipaebaponaē. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovēnētsiaexanare. Itavere pibisiacuene pexanaejava. Muxujibare piamatabēcuenesaēnēxa Diosojavabelia. Tsipaebaponaē xaniavaetsia Dioso pejumelivaisi bajayajebi jamatabēcuenecueranaenejevamē. ³ Bajarapacuenia tsipaebaponaē tsipaji raja itsamatacabi jivi apo namuxunaevetsi tsane pexaniajailivaisi petsipaebijavatsi. Biji rajane itsamatacabi jivi pijacuata natojaitsiana saicayalivaisi Dioso pejumelivaisivecua ayaibitsaēto petsipaebinexatsi. Bajarapamonaē pijacuata junatsiana petsipaebinexatsi palivaisi muxujitsipa. ⁴ Nexata pexaniajailivaisi petsipaebiyānivatsi, navecuaitavetsiana. Jumecovēnētsiana saya ēnatsiquejemalivaisixi. ⁵ Itsiata baitsi jane xamē saicaya nayajivitaeyaponaponaē. Daxita pacuenia Dioso catocopata nexanaenexa, veretsianame. Catoayapēbeje ata, itsamonaē cabejiohiaexanaē ata, casaēmēre tsaponaponaē nevajēnaeyabelia. Casaēmēre tsaponaponaē jivi netsipaebijava pexanialivaisi pecapanepaelivaisinexatsi Diosojavabelia.

⁶ Xanē baja netoimoxoyo tsaponae tatonacaevetsinexa tanebeyaxuabinexa. ⁷ Pacuenia pebitsojinaenē pecujinaejinaejava daxitasaēta cujinaejinaeya pata, bajarapacuenia xanē ata xaniavaetsia daxita tasaēta tonacuenebajē tajatuxanenē. Toveretaponaē baja tatonacuenebijava taneitorobicuenia. Apo copatsinē cajena tanajamatabēcuenecopatsijava Diosojavabelia. ⁸ Pacuenia penayacobijavata, pebitsojinaenē pecujinaejinaejava, barajutatsi corona pecujinaematamo, bajara pijinia pacuenia xanē ata vajatuxanenē athēbētatsia nerajutsiana pexaniacuene taneitorobicuenia tatoponaenaxae. Bajarapacuenē nerajutsiana pamatacabi vajatuxanenē patsianica. Itsi-

ata baitsi jane äxanë apo nerajutsi tsane bajara-pacuene. Daxita pamonaë ata ajamatabëcuenesaëya vajënaeevetavanapa pepatsijavatsica Jesucristo, bajarapamonaë ata rajutsianatsi bajarapacuene. Vajatuxanenë itsa patsianica, naneconitsiaexanaena daxita pamonaë naneconita bajaraponëjavabelia. Vajatuxanenë itsa naneconitsiaexanaena daxita pamonaë naneconita bajaraponëjavabelia, itaxutojema apo naneconitsiaexanae tsane. Paneconivajëto caejivi canacujsitsia xainapona, bajarapaneconivajëtota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹Itsa cacuenecaëjëpa neponaejava, bepijiayo netaeyojopaeremena. ¹⁰Demasvënënë rabaja nexuabatabajirava. Tspaji Dioso pejumelivaisi matatoxenetsia jitsipa bitso mapanacuapijicueneje. Pona baja nexata Tesalónica tomarabelia. Crescentevënënë baja itorobajë Galacia nacuyabelia. Tito pijinia itorobajë Dalmacia nacuyabelia. ¹¹Caenë Lucas xanëjavata ponapona. Jaire Marcos. Bajaraponë caëjëpatsi taneyavenonaenexa Dioso tatonacuenebijava. Nexata barërenamë tsane. ¹²Tíquico baja itorobajë Efeso tomarabelia. ¹³Itsa renamë tsane xanëjavaberena, Troas tomarata taja-camisajumavelia tanaxatatsijava netopitaponaeremena. Carpovënënë raja pijabota puenetarutajë. Tajalibronënu, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

¹⁴Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamatomotsiana tanebejiobiaexanaematamo. ¹⁵Nayajivitaema bajaraponë. Tspaji raja bitso itoya patatsipaebaponaelivaisi.

¹⁶Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuacuajai. Daxita nexuabanuta. Nexata bajarapamonaë tovajëtajë Diosojavabelia penaneconitsiaexanaeyanivatsi tanexuabanutsijamatabëcuene. ¹⁷Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judíovi ata pejumecovënëtsinexa, bajarapalivaisi tsipaebaponajë Diosojavabelia pecapanepaelivaisinexatsi. Tanexuabanutsijavata picani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua. ¹⁸Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: "Diosomë, pinijicuene baja cajena nexanaenë," jai tsabiabi tsanetsi.

Pacuenia Pablo Timoteo tonajumeitoroba Efeso tomarabelia pebajacobinexatsi peyapëtaevitsi yabara pelivaisi

¹⁹Nebajacobiana Prisca. Prisca pamona ata, Aquila, nebajacobiana. Nebajacobiana Onesíforo pijamonaë ata. ²⁰Erasto nacopatajopa Corinto tomaratalia. Trófi-mo pijinia puenetajë Mileto tomaratalia. Tspaji avitane. ²¹Itsa cacuenecaëjëpa, naxanitsiayo renamë tsane emarapae pecopiajopaevajënaeya. Cajamatabë-najina pina Eubulo, Pudente ata, Lino ata, Claudia ata, daxita itsamonaë Dioso pejumecovënëtsivi yajava.

²²Catovajëtatsi vajatuxanenë Jesucristo pecayavaponaponaenexa. Daxita paxamë pacatovajëtatsi Dioso papecayavenonaenexa.

TITO

Pacuenia Pablo mapabaxutoje toyaquina Titojavabelia yabara pelivaisi

1 Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinxexa pexaniajailivaisi Dioso pitabarata bajarapamonae xaniavaetsia pejinavana-paenexa. ²Jesucristo nitoroba tatsipaebinxexa pexaniajailivaisi bajarapamonae ata pexainaenexa matabi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaisi vajanacarajutsinexa matabi apo peverevereaejava. Dioso baja cajena apo penajumetsënëtsinë. ³Nexata baja Dioso pecaëjëtsimatabibita, bajarapalivaisi nacayapëtaeyaexana. Nexata Dioso, vajanacapanepaenënxexa, xanë nitoroba jivi tatsipaebinxexa bajarapalivaisi. Nexata xanë daxitajivi tsipaebaponajë bajarapalivaisi. ⁴Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacapanepaenënxexa, pecayavenonaenexa. Catojitsipatsi pecaïtaxutotsoniataenexa, pecaïjatabëcuenia xanepanaeyaexanaenexana.

Pacuenia Pablo Tito puenetanuta Cretatunaeto nacua petonacuenebinxexa Dioso pijacuene yabara pelivaisi

⁵Capuenetatsi baja cajena Cretatunaeto nacujavata. Capuenetatsi nexanaponaponaenexa, xua abaxë catosajina nejamatabëcueniasaëyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa. ⁶Nejumenajamatabënapire pacuenia caitorobatsi. Itsa itapetsijitsiamë ponë ancianonënxexa, itapetsianame ponë toajibitsi jivi peyabaranconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷Tsipaji ponë itapetsianame ancianonënxexa, Dioso pijacuene tonacuenebiana. Bajaxuata ancianonënxexa, itapetsianame ponë xaniavaetsia peponaponaenë, planeconijibinë. Beayaijamatabëcuenenë apo penataenë. Bepijia apo pinaepanaenë. Apo piapaenë piaitajibinxexa. Pevëna pe-

bi apo pebenë. Apo pejitsipaenë itsajivi ata yamaxëitorobiaya pevecuanacobetoxotsinexa palata. ⁸Ancianonënxexa, xanepana ponë xaniavaetsia copiapitabiaba pijabota pepatsivi. Pexaniacuene pexanaenë. Xaniavaetsia copiyaya penajamatabëxainaenë pacuene exanaejetsia. Xaniavaetsia peponaponaenë jivi pitabarata, Dioso ata pitabarata. Pexanaponaponaenë daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecataitsinexa pibisiacuene pexanaeyaniva. ⁹Ancianonënxexa, xanepana ponë casaë tsaponaponaepelumecovënëtsijava palivaisi tsipaebatsi, pexaniajailivaisi. Bajarapacuenia nexata bajaraponë caëjëpaenatsi itsamonae ata pejamatabëcuenebabatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamonaë jamatabëcuenenavëxaniabiaya pibisiacuena baracuaicuaijai Dioso pejumelivaisi. Nexata ancianonë xaniavaetsia itsa jumecanaviatsiana pamonaë pibisiacuena baracuaicuaijai Dioso pejumelivaisi, bajarapamonae ata jumecovënëtsiana Dioso. ¹⁰Bajarapitsijamatabëcueni itapetaponaenename ancianovinexa. Tsipaji raja Cretatunaeto nacua, Dioso pejumecovënëtsivi tuatuajëta, ayabitsaëto jinavanapa apo pejumecovënëtsivi pacuenia itorobatsi pevetsivitsi. Bajarapamonaeayajuvënëvi ayabitsaëto judíovi. Bajarapajudíovi jumai tsabiabi: "Pamonaë apo judíovi ata Jesús pelivaisi itsa jumecovënëta, bajarapamonae ata benaperabëcaucubiaexana," jai tsabiabi. Bajarapajudíovi natsiquejemalivaisi saya cuaicuaijai tsabiabi. Nexata yamaxëitorobapona Dioso pejumecovënëtsivi. ¹¹Bajarapajudíovi bejumeitavetame. Tsipaji saya penajumetsënëtsilivaisi jivi tsipaebapona Dioso apo pejitsipaecuenia. Bajarapajudíovi, caebopijivi canacujitsia, Dioso pejumecovënëtsivi, najamatabëcueniepatajërërëcaeyaexanapona Dioso pejumecovënëtsijavavecu. Bajarapajudíovi penajumetsënëtsilivaisi jivi tsipaebapona saya pematamotsinexatsi palata. ¹²Bajayata pina livaisi bitso peyapëtaenëmi ponapona Cretatunaeto nacua. Nexata pina bajaraponëmi jumaisi Cretatunaeto nacupijivi yabara mapacueniaje: "Cretatunaeto nacupijivi cajena bitso penajumetsënëtsivi. Bitso piacujirubejevi. Ayaijavanua jamatabëxaeyabiaba. Bitso afaetabinua," jai pina cajena bajayata Cretatunaeto nacupijinëmi. ¹³Xaniajai baja cajena pacuenia jumaisi bajaraponëmi. Bajara jamatabëcuenieitsi Cretatunaeto nacupijivi. Tito, nexata xamë asaëyata itorobare bajarapamonae xaniavaetsia penajamatabëcuenecopatsinexa Diosojavabelia. ¹⁴Itavere bajarapamonae penamuxunaevetsiyaniva judíovi

pijasalinaivimi pijalivaisixi. Itaverenua bajarapamonae pejumecovënëtsiyaniva pacuenia itorobaponatsi pamonae copaba pexaniajailivaisi pejumecovënëtsijavami.

¹⁵ Pajivi jumecovënëta Jesucristo pesivatëpaejavatsi, bajarapajivi ajamatabëcuenexuirajibi. Bajarapajivi daxita xua tane, ëpexaniacuenia sivanajamatabëxaina. Nexata itsacuenejavayo ata apo jamatabëcuenebijianaetsi. Pajivi pijinia apo jumecovënëtsi Jesucristo pesivatëpaejavatsi, bajarapajivi ajamatabëcuenexuira. Nexata bajarapajivi daxita xua tane, pibisiacuenia sivanajamatabëxaina. Nexata daxitacuene jamatabëcuenebijianatsi. Pibisiacuenia exanabiabi ata, jamatejema saya ponapona. ¹⁶ "Xanë rabaja bitso Dioso yapëtanijiji," jai tsabiabi. Itsiata baitsi jane bajarapamonae pibisiacuenia exanavanapa. Nexata nayapëtanane Dioso apo peyapëtaejava. Bajarapamonae itoya Dioso. Bajarapamonae apo jumecovënëtsi pacuenia Dioso itorobatsi. Nexata apo caëjëpaetsi itsacuenejavayo ata pexaniacuenia pexanaenexa.

Pacuenia Pablo Tito itoroba pexanialivaisi jivi petsipae-baponaenexa yabara pelivaisi

2 Tito, xamë jivi livaisi itsa tsipaebabiabianame, tsipaebabiabianame ëpexaniajailivaisi. ² Perujupebi jivi muxujiobabiabianame penajamatabëcuenereviabinexa. Muxujiobabiabianame xaniavaetsia pejinavanapaenexa jivi peyaiyataenexatsi. Muxujiobabiabianame penajamatabëcuenecataitsinexa pibisiacuenia pexanaeyaniva. Muxujiobabiabianame pexaniajailivaisi, Jesús pelivaisi, xaniavaetsia pejumecovënëtsinexa. Muxujiobabiabianame daxitajivi asivaya petaenexa. Muxujiobabiabianame, itsamonae bejiobiaexanae atatsi Dioso pejumelivaisi yabara, pevajënaeyabelia pecaasaënexa Dioso pejumecovënëtsijava. ³ Bajara pijinia pacuenia muxujiobabiabianame perujupetiriavi ata jamatabëcuenereviaya pejinavanaenexa Dioso pitabarata. Bajarapamonae pibisiacuenia itsamonae apo bebaracuaicuaijai. Apo biaitajibi tsabiabinua. Bajarapapetiriavi itsamonae pexaniacuenia betsitaexanavanapa. ⁴ Nexata perujupetiriavi itsamonae pexaniacuenia itsa tsitaexanavanapa, jamatabëcuenecujarubiana pecovëpijipetiriavi ata xaniavaetsia pamonajivi piasivanexa, penacoxiasivanexanua. ⁵ Perujupetiriavi itorobianame pemuxujiobabiabinexa pecovëpijipetiriavi ata penajamatabëcuenereviabinexa, pexaniajamatabëcuenia ata penajamatabëxainaenexa. Perujupetiriavi muxujiobabiabianame pijabo ata xaniavaetsia pevetsinexa, pexaniacuenia ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujiobabiabianame pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuenia Dioso pejumelivaisi apo baracuaicuaijai tsane.

⁶ Bajara pijinia pacuenia muxujiobabiabianame pevëjëavi penajamatabëcuenecataitsinexa pibisiacuenia pexanaeyaniva. ⁷ Xamë xaniavaetsia bajarapa-

monae ëpexaniacuenia tsitaexanaponaponaenama. Nexata bajarapacuenia daxitajivi cacuenetaena xaniavaetsia neponaponaejava. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajumeta jamatabëcuenereviaya.

⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, pecaitoyavi ata aura tsane. Tsipaji ajibi tsane pecayabarananeconitsiaexanaejava.

⁹ Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuenebabiabinexa pesivajamatabëcuenerebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumaitsi pijatuxanenëjavabela: "Jume raja. Bajarapacuenia apo xanepanae tacatoexanaenexa. Mara jane pacuenia xanepanae tacatoexanaenexaje," jai pëtsa. ¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabela tsitanajamatabëcuenieitajëtsi daxitacuene xaniavaetsia petonacuenebabiabijava nacobetoxotsinejeva. Bajarapacuenia itsa exanaena bajarapajivi, nexata daxitajivi yapëtaena Dioso vajanacacapanepaenënexa pejumelivaisi pexaniajailivaisicuenia.

¹¹ Dioso baja cajena nacayapëtaeyaexana vajanacaitaxutotsoniataejava. Nexata Dioso nacacapanepaena daxitanacuapijivitsi. ¹² Dioso vajanacayapëtaeyaexanaexae vajanacaitaxutotsoniataejava vajanacacapanepaenexa, nexata becopatatsi pibisiacuenia vajaexanaejavami. Bitso vajajitsipaejava ata mapanacuapijicuenia vajaxainaenexa, becopatatsi. Dioso rajane jitsipa mapanacuata nayajivitaeya vajajinavanapaenexa pibisiacuenia vajaexanaeyaniva. Nexata Dioso pejitsipaecuenia betoexanavanapatsi. Dioso cunjnaviaya xaniavaetsia bejinavanapatsi. ¹³ Bajara pacuenia Dioso cunjnaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenerebarëyatsi tsane. Pacuenia Dioso tajëvelia najumecapanepaeya nacajumaitsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacacapanepaenexa. Bajaraponë penivenivenaecotia yajavapatsianica. ¹⁴ Bajaraponë pijacuata tonacaeveta pijavajabitsaë pebeyaxuabinexatsi. Nexata Jesucristo itsa beyaxuabatsi, pijanata nacacomuata pibisiacuenia vajaexanaeneconivecua. Nacavecuaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua ëpexaniacuenia Jesucristo vajatoexanaenexa.

¹⁵ Daxita bajarapacuenia muxujiobaponaenama. Jamatabëcuenebabataponaenama asaëya bajarapamonae. Asaëya muxujiobabiabianame pibisiacuenia itsa exanapona. Bajarapacuenia muxujiobabiabianame Dioso pecatocopatsixae bajarapacuenia nexanapon-

aenexa. Pëtsa copatame itsajivi ata bijiyaya pecataenexa.

Pacuenia Dioso pejumecovënëtsivi pexaniacuene bex- anavanapa yabara pelivaisi

3 Dioso pejumecovënëtsivi, Cretatunaeto nacuapijivi, najamatabënapitsiaexanaename yaiyataeya pejumecovënëtsinexa gobierno pitorobilivaisi, pejumecovënëtsinexana gobierno pijajivi ata. Itorobianamenua bajarapamonae pexanaenexa daxitaxua pexaniacuene. ² Muxujjobabiabianame bajarapamonae itsajivi ata pibisiacuenia pebaracuaicuaijajivaniva. Muxujjobabiabianame bajarapamonae, itsamonae itsacueniabi atatsi, pecuene canaviatsivaniva. Muxujjobabiabianame bajarapamonae pexaniajamatabëcuenia pebarëcuaicuaijainexa daxitajivijavabelia. Itorobianamenua daxitajivivecua beveliajamatabëcueneni nataeya pejinavanapaenexa.

³ Itsa abaxë vaxaitsi ata Dioso apo jumecovënëtsitsi, saya picani jema jinavanapatsi. Apo exanavanapaetsi pacuenia Dioso nacaitoroba. Apo exanavanapaetsinua pacuenia nacuaevevtsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyayaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cuenecaëbabiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi.

⁴ Bajara vajaitsivimi ata, itsiata Dioso, vajanacapanepaenënexa, nacayapëtaeyaexana vajanacaitaxutotsoniataecuene. Nacayapëtaeyaexananua pacuenia ata Dioso nacaasiva daxitatsi mapanacuapijivitsije.

⁵ Dioso nacacapanepaena vajaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane.

Nexata nacajamatabëcuenequiata. Dioso vajanacaitaxutotsoniataexae, nacacapanepaena. Espiritu Santo pejamatabëcueneta pejanajamatabëcuenevitsi baja nacaexana. ⁶ Dioso baja cajena ayaicuenia vajanacayavenonaenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsueneta.

⁷ Bajaraxuata Dioso vaxaitsi yabara jumaitsi: "Bajarapamonae baja aneconijibia taniji," jai Dioso. Tsipaji nacaitaxutotsoniatane. Nexata vaxaitsi xainenatsi matakabi apo pevereverecejave, xua copiaevetavana-patsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumesaëya jivi netsipae-baponaenexa bajarapalivaisi. Nexata Dioso pejume-

covënëtsivi ëpexaniacuene pexanaenexa pejamatabëcueneenaenexatsi. Bajarapalivaisi bitso xanepana daxitajivi pejumecovënëtsinexa. ⁹ Nexata navecuaitavetsianame saya jema natsiquejemalivaisixi itsamonae pecabarëcuaicuaijajivaniva. Navecuaitavetsianamenua judíovi pijasalinaivimi pevënëxi yabara pecabarëcuaicuaijajivaniva. Navecuaitavetsianamenua Dioso Moiséspijinëta penajumecopatsilivaisi yabara anaeya pecajumenotsivaniva. Bajarapacuenia pecabarëcuaicuaijajava apo xanepanae tsipae itsacuenejavayonexa ata.

¹⁰ Itsamonae penajumetsënëtsilivaisi jivi tsipae-bapona. Nexata bajarapamonae penajumetsënëtsilivaisita Dioso pejumecovënëtsivi navecuant-sanaeyaexanapona. Bajarapamonae jumeitavetsianame. Anijatobeje ata jumeitavetsianame. Nexata bajarapamonae copatsiana penajumetsënëtsilivaisi jivi petsipaebaponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa. ¹¹ Yapëtaneme rabaja mapacueneje. Ponë peneta copata pexaniajailivaisi pejumecovënëtsijavami, pibisiacuene exana. Nexata bajaraponë naneconita Diosojavabelia pibisiacuene pexanaexae.

Pacuenia icatsia Pablo itsalivaisi toitoroba Tito asaëya Dioso petonacuenebinexa yabara pelivaisi

¹² Catoitorobialiatzi Artemas. Itsa jume, catoitorobialiatzi Tíquico. Bajaraponë itsa patsialia xamëjavabelia, nexata xamë bepíjia renamë tsane xanëjavaberena. Nacaxitajarabianatsibeje Nicápolis tomarata. Daxita emarapae raja ponaponaenajë Nicápolis tomarata. ¹³ Itsa baja pacavecuaponaena Zenasbeje Apolosbeje, nexata yavenonaename pacuenia namatavenonaenabeje pijanamutobejenexa. Zenas raja abogadonë, penaneconitsivi peyavenonaeyacuicuaijainë. Rajutsianame pacuenia namatavenonabeje, itsacuenejavayo ata petosajinaeyanivatsibeje itsa najetarucabeje namuto. ¹⁴ Pamona vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonae tojitsipajë asaëya penacuenebinexa, peyavenonaenexa pamona bitso bepejiobivi. Pëtsa saya bajarapamonae jinavanapa nacuenebinejeva.

Pacuenia Pablo itsamonae jamatabënajina yabara peli- vaisi

¹⁵ Daxita pamona vjavaponaponajë, cajamatabënajinalia. Pajamatabënajinaliajë daxita pamona pataniasivavi, Dioso pejumecovënëtsivi. Pacatovajëtatsi Diosojavabelia daxita paxamë Dioso papecayavenonaenexa.

FILEMÓN

Pacuenia Pablo mapabaxutoje toyaquina Filemónjavabelia yabara pelivaisi

1 Xanë Pablonë, Jesucristo pijajivitonëxaenë, Jesucristo pelivaisi jivi tsipaebabiabajë. Bajaraxuata nenaneconitsiaexana. Nexata penaneconitsivi pejebabiabibota naneconitsiaponaponajë. Filemón, paxanëbeje vajabanenë Timoteobeje, bitso pacaasivatsibeje patacayajavanacuenebabiabinëxaebeje. Paxanëbeje, pacatoyaquinatsibeje mapabaxutoje. ² Patoyaquinajëbejenua mapabaxutoje pamonae Dioso pejumecovënëtsivi, nijabota penacaetuatabiabi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipovënëna ata. Pacuenia xanë Dioso pijacuene tonacuenebabiabajë, bajarapacuenia Arquivo ata Dioso pijacuene tonacuenebabiaba. ³ Pacatovajëtabiatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo tovajëta Filemón Diosojavabelia yabara pelivaisi

⁴⁵ Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopat-sijava pepo petuxanenë Jesúsjavabelia. Bajaraxuata it-sa cajamatabënajinatsi, catovajëtabiatsi Diosojavabelia. Nexata pexaniajamatabëcuene rajutabiabajë Diosojavabelia xamë yabara. ⁶ Pamonae ata Diosojavabelia najamatabëcuenecopaba xamë pexanialivaisi netsipaebixae, bajarapamonae ata tovajëtabiabajë Diosojavabelia. Tovajëtabiabajë bajarapamonae xaniavaetsia peyapëtaenexa Dioso vajanacayavenonabiabijava Jesucristo pijajivixaetsi. ⁷ Itsamonae ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcuenesaëtsi. Tsipaji daxita Dioso pejumecovënëtsivi jamatabëcuenebabatabiabame.

Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

⁸ Xanë Cristo taneitorobinëxae, nejamatabëcuenecaëjëpa picani tacaitorobinexa xua bexaname Dioso pecasivabarëyanexa. Itsiata baitsi jane apo caitorobi tsanetsi. ⁹ Tacaasivaxae, saya pexanacuena cavajëtatsi pexaniacuene tanetoexanaenex-

amë. Xanë Pablonë, perujunëna baja. Maparucaeje naneconitsiaponaponajë penaneconitsivi pejebabiabibota Jesucristo pijajivitonëxaenë. ¹⁰ Majotaje, xanëjavata, nijajivitonë Onésimo patajopa, pecavecuanajetabajiravinë. Nexata cavajëtatsi pexaniacuene tanetoexanaexamë Onésimojavabelia. Onésimo raja betaxënatocuenia tataenë pejumecovënëtsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovënëta baja Jesucristo pelivaisi. Jesucristo pelivaisi Onésimo jumecovënëta majotaje, penaneconitsivi pejebabiabibota.

¹¹ Onésimo baja cajena bajayata bedajubinëcuenia comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenejavayo ata xaniavaetsia apo catonacuenebi. Itsiata baitsi jane maparucaeje Jesucristo baja pelivaisi Onésimo pejumecovënëtsixae, xanënexa xaniavaetsia netonacuenebaponapona. Nexata baja aeconoxae itsa naviatsipa xamëjavabelia, xamënexa ata xaniavaetsia catonacuenebijitsipa. ¹² Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tsipaji Onésimo bitso tasivanë. Itsa baja ponaponaena xamëjavatalia, jamatabënajinabiabianajë bitso.

¹³ Naneconitsiaya ponaponajë penaneconitsivi pejebabiabibota pexanialivaisi, Jesucristo pelivaisi, jivi tatsipaebabiabixae. Bitso picani Onésimo asivanë xanëjavata peponaponaenexa. Nexata Onésimo itsa ponaponaejitsipa xanëjavata, neyavenonaponaponaejitsipa xaniavaetsia. Taneyavenonaenexa, betaneitoitorobinëmcuenia neyavenonabiabijitsipa. ¹⁴ Itsiata baitsi jane apo jitsipaenë Onésimo taneyavenonaponaponaenexa copiaya cavajëtsinejevatsi. Apo jitsipaenëna tacavajëtsinexa tanetocopatsinexamë bajaraponë taneyavenonabiabinexa. Biji rajane picani jitsipajë cavajëtsinejevatsi nijacuate tanetocopatsinexamë bajaraponë. ¹⁵ Onésimo picani itsa cavacuana-jetabajirava, cavacuanaatsata caematacabibeje. Itsiata baja icatsia aeconoxae xamëjavabelia naviatsijitsialia. Nexata jane baja daxitamatacabijavabelianexa nijajivitonë tsaponapona tsane. ¹⁶ Pëtsa baja taneme saya nijajivitonëcuenia. Biji rajane nijajivitonë ata, Dioso pejamatabëcueneta asivaya taename benejuyapijinëcuenia. Xanë picani bitso asivanë Onésimo. Itsiata xanë bajaraponë tasivajava matatoxenetsia, xamë bitso asivamë tsane. Tsipaji xamë bajaraponë nijajivitonë. Ne-juyapijinëna baja Dioso pejamatabëcueneta.

¹⁷ "Pablobeje rabaja patanajuaponaponaenëbeje," itsa nesivajamatabëjamë tsane, nexata Onésimo xani-

avaetsia copiapitsianame, pacuenia xanë necopiapitabiabame. ¹⁸ Onésimo itsa catonaneconita, itsa camoneyabanua, nexata xanë bajaraxuamatamo neyanijobianame. ¹⁹ Peneta raja paitanebërëtoyo jumaitsi: “Xanë Pablonë. Camatamotsianatsi cajena,” jai, xanë tajacuata tacobeta yaquinajë. Itsiata pijinia pacuenia niamoneyabame, apo catoitajëtsitsi. Tsipaji itsa catoitajëtsipatsi pacuenia niamoneyabame, nexata jitsipaejitsipame daxitanëmë, nejamatabëcuene yajava, tanerajutsinexamë. ²⁰ Tajabananë, pacuenia cavajëtatsi, xaniavaetsia copiapitsianame Onésimo Jesucristo pijajivitonëxaemë. Xaniavaetsia Onésimo itsa copiapitsianame, bitso nejamatabëcuenebarëyaya exanaename.

²¹ Catoyaquinatsi mapabaxutoje tsipaji yapëtaniji tanejumecovënëtsijavanexa tacaitorobicuenia. Casivajamatabëjumaitsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabëjaitsi. ²² Caecuenia tavajënaeyabelia cavajëtatsi tavajënaelia nijabota

tanetoxaniavaetsinexamë, itsajota patsijitsianë itsa ponajë paxamëjavabelia. Tsipaji bajayajebi panetovajëcabiabame Diosojavabelia tapatsinexa paxamëjavabelia. Nexata jamatabëjumaitsinë: “Pacuenia bajaramonae netovajëcabiaba Diosojavabelia, bajaramonae Dioso netocopatsiana,” jamatabëjanë taponaeenexa paxamëjavabelia.

Pacuenia itsamonae jamatabënajinatsi Filemón yabara pelivaisi

²³ Epafra, ponëbeje panajuaponaponajëbeje penaneconitsivi pejebabiabibota Jesucristo pijinia pijajivitonëxae, bajaraponë cajamatabënajinalia. ²⁴ Cajamatabënajinalia Marcos ata, Aristarco ata, Demas ata, Lucas ata. Cajamatabënajinalia daxita bajarapamonae patanajuanacuenebivi Dioso pijacuene. ²⁵ Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

HEBREOS

Pacuenia Dioso pexënato itoroba jivijavabelia petocuaicuaijainexatsi yabara pelivaisi

1 Bajayatami Dioso anijatonë najamatabëcueneitajëtabiaba Diosojumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatatabëcueneitajëtabiaba profetavijavabelia matabiaba bemajitsinaebocuenia. Itsajavata Dioso najamatabëcueneitajëtabiaba profetavijavabelia meravi majitsinaebota. Itsajavata pepacuenia Dioso roviaia barëcuaicuaijai tsabiabi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. ² Nexata jane baja aeconoxae, mapamatacabitaje, Dioso itorobica pexënato vajanacatsitanajamatabëcuene itajëtsinexa, vajayapëtaenexa Dioso vajanacatojitsipaejava. Bajayata Dioso itoroba pexënato pexanaenexa mapanacuaje, daxitacuene yajava. Nexata daxitacuene mapanacuateje Dioso pexënato tocopata pevetsinexa. ³ Nexata pacuenia Dioso bitso ayaijamatabëcuenenë, pexaniamatabëcuenenëna, bajara pijinia Dioso pexënato ata jamatabëcueneitsi. Dioso pexënato caëjëpatsi daxitacuene pexanaenexa pijumesaëta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponë pexanaecujinae mapanacuaje, bajaraponë pejamatabëcueneta abaxë tsiteca xanepana mapamatacabijavaberena ataje. Bajaraponë nacasivatëpa cruzata vajanacavecuaxuabinexa pibisiacuene vajaexanaeconimi. Bajaraxucujinae pona jane baja athëbëabetsia peecaenexa paxa Dioso pemuxuneneta, pecujuanenia, penajuaevevtsinexabeje daxitacuene.

Pacuenia Dioso pexënato bitso ayaijamatabëcuenenë ángelevi matatoxenetsia yabara pelivaisi

⁴ Dioso pexënato bitso ayaijamatabëcuenenë ángelevi matatoxenetsia. Bajarapajamatabëcuene yapëtanetsi. Tsipaji Dioso pexënato tocopata daxitacuene pevetsinexa. Dioso saya ángelevi tocopata beveliajamatabëcuenejava pevetsinexa. ⁵ Dioso baja cajena jumaitisi pexënatojavabelia mapacueniaje:

Xamë raja taxënatomë. Xanë raja axanë,jai Dioso. Dioso icatsia jumaitisi pexënato yabara mapacueniaje:

Xanë raja bajaraponë paxanë. Xanë raja bajaraponë taxënato,jai Dioso pexënato yabara.

Bajarapacuenia Dioso apo jumaitisi ángelevi yabara. Biji rajane Dioso pexënato yabara jumaitisi. Bajaraxuata nayapëtane Dioso pexënato bitso ayaijamatabëcuenenëcuene ángelevi matatoxenetsia. ⁶ Pacujinae Dioso itorobijitsiatsica pepo caenë pexënato mapanacuata penaexanaenexa, Dioso jumaitisi pexënato yabara mapacueniaje:

Daxita tajajivi, ángelevi, pematabacabëta tonubenaena ayaijamatabëcuene perajutsinexa bajaraponëjavabelia,jai Dioso pexënato yabara.

⁷ Dioso icatsia jumaitisi ángelevi yabara mapacueniaje:

Tajajivi, ángelevi, tanelivaisipaebinexa, bepijia pona pacuenia jovibo. Bajarapamonae beisotocotiata verebiabiana daxita pamonaenaneconita xanëjavaberena,jai Dioso ángelevi yabara.

⁸ Itsiata baitisi jane icatsia Dioso pexënatojavabelia jumaitisi mapacueniaje:

Diosomë, daxita xua evetame, daxitamatacabijavabelianexa evetsianame. Xua xamë evetame, xaniavaetsia evetabianame. ⁹ Xamë jitsipame jivi pexaniacuene pexanaejava. Apo jitsipaemë pibisiacuene pexanaejava. Bajaraxuata xanë, nijaDiosonë, cajamatabëcuenebarëyayaexanatsi. Cajamatabëcuenebarëyayaexanatsi daxita itsamonae matatoxenetsia, jai Dioso pexënatojavabelia.

¹⁰ Icatsia Dioso pexënatojavabelia jumaitisi mapacueniaje:

Xamë petuxanenëmë. Itsa abaxë daxitacuene ajibi, xamë exaname mapanacuaje. Nesaëta exaname daxita itaboxopijicuene yajava. Xua jivi apo tae, bajaraxuata exaname. ¹¹ Daxita bajaraxua, nexanaejava, vereverecaena. Itsiata baitisi jane xamë apo vereverecaemë tsane daxitamatacabijavabelianexa. Daxita xamë nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava. ¹² Pacuenia jivi baquiona penaxatatsijava, bajarapacuenia itsamatacabi xamë quionaenama itaboxo, ira yajava, pejananacua icatsia nexanaenexa. Itsiata baitisi jane xamë tsitecaenama. Apo vereverecaemë tsane,jai Dioso pexënatojavabelia.

¹³ Dioso baja cajena caeto ata ángeleviyajuvënënëjavabelia apo jumaitisi mapacueniaje:

Ecara abaxë tacujuanenia daxitacuene vajanjuaevevtsinexabeje. Nijavajabitsaë abaxë copiaya vecatsivajënae jumecovënëtsiaexanaenatsi nitorobicuenianexa,apo jai Dioso ángeleviyajuvënënëjavabelia.

Biji rajane Dioso pexënatojavabelia bajarapacuenia jumaitisi. ¹⁴ Daxita ángelevi apo taetsi vajaitaxutota. Ba-

jarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonae jumecovënëta Dioso pecapanepaejavanexatsi.

**Pacuenia apo benamuxujematsitsi pexaniajailivaisi
Dioso vajanacacapanepaenexa yabara pelivaisi**

2 Dioso pexënato bitso ayaijamatabëcuenenë ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajënaeyabelia asaëyata bejumecovënëtatsi bajarapapexaniajailivaisi vajajumecovënëtsijava, itsamatacabijavabelia ata vajacopatsiyaniva. ² Bajayata palivaisi Dioso najumecopata Moiséspijinëta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinëjavabelia. Xaniajai baja cajena bajarapalivaisi. Pamonae apo jumecovënëtsi bajarapalivaisi, paneconivajëto xaina, bajarapaneconivajëto Dioso naneconitsiaexanatsi. ³ Itsa namuxujematatsi papinijicueneta Dioso nacacapanepaejitsia, ¿detsa pacuenia nacacaëjëpaejitsipa vajacuata vajanacapanepaenexa? Ajibi. Vajatuxanenë Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapëtane bajarapalivaisi pexaniajailivaisicuene. Nexata juya bajarapamonae vaxaitsijavaberena nacatsipaeba bajarapalivaisi. ⁴ Nexata nayapëtane bajarapamonae vajanacatsipaebilivaisi pexaniajailivaisicuene. Tspaji Jesucristo petsipaebilivaisitsi, jivi ita tsipaebavanapa, Dioso pesaëta pinijicuene pexanaejavanë tsitaexanapona. Bajarapamonae piavitanevi ata jamatejemayaexanapona. Petëpaevi ata icatsia asaëyaexanapona. Espíritu Santo ata jamatabëcuene caëjëpaeyaexanapontsi, caejivi canacujitsia, bajarapamonae pexanaenexa pacuenia Dioso tojitsipatsi.

**Pacuenia baja Jesucristo naexana bejivitonëcuenia
yabara pelivaisi**

⁵ Papejananacua yabara pacatsipaebatsi, Dioso baja ita exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. ⁶ Tspaji Dioso pejumelivaisibaxutota, tajëvelia jumaitsi pacuenia jivi ayaijamatabëcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomë, jivi matatoxenetsia bitso ayaijamatabëcuenenë atamë, ¿detsa xuajitsia itsiata jivi sivanajamatabëxainame nevetsinexa? ⁷ Jivi ita exaname, ángelevivecua jivi beveliajamatabëcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovënëtsixae, ayaijamatabëcuenevi baja exaname ángelevi matatoxenetsia. ⁸ Nexata itsamatacabi tocopatsianame jivi pevetsinexa daxitacuene nexanaejava, jai Dioso pejumelivaisibaxutota Dioso pejumecovënëtsivi yabara.

Bajarapacuenia Dioso ita tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxë apo taetsi vajaitaxutota jivi pevetsijava daxita bajaraxua. ⁹ Pamatacabi Jesús bejivitonëcuenia naexana mapanacuataje, bajaraponë ata ángelevivecua beveliajamatabëcuenenë picani naexana. Dioso pitaxutotsoniataexae daxita mapanacuapijivije, Dioso pexënato itorobica penaexanaenexa mapanacuata, pesivatëpaenexa daxitajivi pijaneconi yabara. Jesús baja daxitajivi pesivatëpaexae, aeconoxae baja Dioso tocopatatsi Jesús athëbëtatsia peecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponënexa. Dioso daxitacuene pexanaecujinae, Dioso abaxë pejamatabëcueneta daxitacuene tsiteca xanepana mapamatacabijavaberena ataje. Daxita pamonae jumecovënëtatsi, pexicuenia petaevi, Dioso jitsipa pebarëevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonae najamatabëcuenecopata Jesucristojavabelia, peyajavaponaponaenexa Dioso pijapenivenivenaenacuatatsia. ¹¹ Jesucristo baja cajena jivi tsata Dioso pijajivinexa. Nexata pamonae Jesucristo tsata Dioso pijajivinexa, bajarapamonae, Jesús yajava, benacaeaxapijivi baja tanetsi Dioso. Bajaraxuata Jesús, Dioso pexënato, pijajivi yabara ita cuaicuajai, apo ajumeura: "Tajuyapijivi," pejaijava. ¹² Jesús pijajivi yabara pejumaitisijavanexa, Dioso pejumelivaisibaxutota tajëvelia jumaitsi mapacueniaje:

Taxa Diosomë, tajuyapijivijavabelia cavajunupaebianatsi. Nexata daxita bajarapamonae tabarënacuetuatsijavata, xamënexa catonaxëanaenatsi, tanaxëanaejavata ayaijamatabëcuene tacarajutsinexa, jai Dioso pejumelivaisibaxutota Jesús paxa Diosojavabelia pejumaitisijavanexa.

¹³ Jesús icatsia pijajivi yabara pejumaitisijavanexa, Dioso pejumelivaisibaxutota tajëvelia jumaitsi mapacueniaje:

Xanë ata najamatabëcuenecopatsianajë taxa Diosojavabelia taneyavenonaenexa pacuenia najamatabëcuenecopaba tajuyapijivi, jai Dioso pejumelivaisibaxutota.

Jesús icatsia pijajivi yabara pejumaitisijavanexa, Dioso pejumelivaisibaxutota tajëvelia jumaitsi mapacueniaje:

Yajavaponaponajë baja mapamonaeje, Dioso pexi tanetocopatsivi tatoevetsinexa, jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponaenexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caëjëpatsi pebeyaxuabinexatsi vajanacasivatëpaenexa. Jesús baja ita nacasivatëpa, jamatabëcuenematatoxeneta dovathi. Nexata baja copiaruca dovathi vajanacaitorobabiijava. Nexata jivi tēpae ata tsane, it-

siata icatsia asaë tsane petèpaecujinae. ¹⁵ Bajara-pacuenia Jesús vajanacasivatèpaexae, nacavecuuaajibi-aexana baja vajacujunavabiabijavami, vajatèpaejava. Vajatèpaejava picani cujunavabiabatsi daxita vajajinavanapaematacabianè. ¹⁶ Jesús baja cajena patsica mapanacuayabetsicaje, jivi peyavenonaenexa, pamona Abrahampijinè pepo pemomoxi, baitsi Dioso jume-covènètsivi. Jesús apo patsi peyavenonaenexa ángelevi. ¹⁷ Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuajainexa Diosojavabelia. Jesús nacaitaxutotsoniatane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponè pejamatabècueneta Dioso vajanacavecuuaajibiaexanaenexa pibisiacuene vajaexanaeoneconimi. ¹⁸ Nexata Jesús jamatabècuenecaèjèpatsi peyavenonaenexa pija-jivi, dovathi pejamatabècuenèjètsivitsi. Tsipaji baja copiaya Jesús ata jamatabècuenèjètatsi dovathi. Bejioxiaexanatsinua.

Pacuenia bitso Jesús ayaijamatabècuenenè Moisés-pijinè matatoxenetsia yabara pelivaisi

3 Tajamona, Dioso papijajivimè, Dioso pacajunata papijajivinexamè. Nexata xaniavaetsia pacanaèjère Jesucristo yabara. Bajaraponè Dioso naca-toitorobica vajanacatsipaebinexa Dioso pejumelivaisi, vajanacatocuaicuajainexanua vajatuxanenè Diosojavabelia. ² Bajayatami Moisés-pijinè daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovènèta Dioso pitorobicueniatsi. ³ Nexata Jesús jivi peca-panepaenèxae, ayaijamatabècuenenè Moisés-pijinè matatoxenetsia. Pacuenia bo pexainaenè, ayaijamatabècuenè xaina pijajivitonè matatoxenetsia, bajara pijinia pacuenia Jesús ayaijamatabècuenenè Moisés-pijinè matatoxenetsia. ⁴ Caebo canacujitsia tanetsi jivi pexanajebixae bajarapabonè. Itsiata baitsi jane mapanacuata Dioso pexanaejavanèta, jivi exanejeba bonè. ⁵ Bajayata Moisés-pijinè Dioso itorobatsi daxita Dioso pijajivi petoevetsinexa xaniavaetia. Nexata Moisés-pijinè Dioso pijajivi itsa tovetaponapona, tajèvelia itorobatsi petsipaebinexa jivijavabelia pacuenia itsamatacabijavabelia Dioso jumaitisijitsia pijajivijavabelia. ⁶ Cristo Dioso pexenatoxae, xaniavaetsia to-eveta paxa Dioso pijajivi. Vaxaitsi baja Dioso vajajumecovènètsivi, Dioso nacatane pijajivitsi. Tsipaji baja nacayajavaponapona Jesucristo. Bajarapacuenia vajavajènaeyabelia Dioso nacataeponaena xaniavaetsia Jesucristo itsa jumecovènètavanapaenatsi vajatèpaejavabelianexa. Jamatabècuenèbarèyaya jinavanapatsi. Tsipaji yapètanetsi Dioso pexaniajaicuene vajanacapanepaenexa.

Pacuenia Dioso jume-covènètsivi tocopatatsi pejonenexa Dioso pijanacuayabetsia yabara pelivaisi

⁷⁻⁸ Jesucristo baja cajena ayaijamatabècuenenè Moisés-pijinè matatoxenetsia. Angelevi ata matatoxenetsia ayaijamatabècuenenè. Bajaraxuata Espiritu Santo Dioso pejumelivaisibaxutota jumaitis mapacueniaje:

Ajena, mapamatacabitaje, itsa pajumetaneme pacuenia Dioso jumaitis, pètsa pajamatabècuenetajamè panejumecovènètsinexa. Pacuenia bajayata panijasalinaivimi ajamatabècuenetaja baja, pètsa paitsimè. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovènètsi ata, bajarapamonaemi itsiata abaxè Dioso apo verebiabitsi. ⁹ Bajarajota petusato nacuata panijasalinaivimi jamatabèitonotabiaba Dioso. Apo jumecovènètsi pacuenia Dioso itorobatsi pejinavapanepaenexa. Cuarenta picani pavaiabeje Dioso ayaicuene pexanaejavanè, tsitaexanapona bajarapamona peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovènètsi. ¹⁰ Bajaraxuata Dioso baranaepana panijasalinaivimijavabelia. Nexata panijasalinaivimi yabara Dioso najumecapanepaeya jumaitis: “Najamatabèxainabiaba saya èpibisiacuene yabara. Apo jitsipae pejinavanapaenexa pacuenia picani tojitsipajè,” jai Dioso. ¹¹ Bajaraxuata Dioso bitso baranaepana panijasalinaivimijavabelia. Nexata Dioso najumecapanepaeya jumaitis: “Bajarapamona apo jone tsane xanèjavaberena. Nexata apo jinavanapae tsane itsajota picani toxaniavaetajè pejinavanapaenexa,” jai Dioso, jai Espiritu Santo panijasalinaivimi yabara Dioso pejumelivaisibaxutota.

¹² Tajamona, dovathivecu panajamatabècuenèevertavanapare, paxamèyajuvènèjivi ata, pacuenia panijasalinaivi najamatabèxaina pibisiacuene pexanaenexa, penajamatabèxainaeyaniva. Tsipaji Dioso itsa apo pajumecovènètsimè tsipae, nexata pacopabijitsipame panejumecovènètsijavami Dioso, daxitamatacabijavabelianexa piasaètsaponaponaenè. ¹³ Nexata namataenetsia panajamatabècueneyavenonare daxitamatacabi canacujitsia panecasaètsavanapaenexa Dioso panejumecovènètsijava. Bajarapacuenia panajamatabècueneyavenonare itsajivi ata paxamèyajuvènèjivi dovathi peyamaxèitorobiyantivatsi pibisiacuene pexanaeyaniva. Panajamatabècueneyavenonare itsajivi ata paxamèyajuvènèjivi pecopabiyaniva Dioso pejumecovènètsijava. ¹⁴ Vajataxuxuabijavaveliacujinae Dioso vajajumecovènètsijava, tsiteca abaxè Dioso jumecovènètavanapatsi vajatèpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujibinexa, Dioso pejumelivaisibaxutota jumaitis mapacueniaje:

Ajena, mapamatacabije, itsa pajumetaneme Dioso papecajumaitisijava, pètsa pajamatabècuenetajamè.

Pacuenia panijasalinaivimi petusato nacuata ajamatabëcuenetaja, pëtsa paxamë bajarapacuenia paitsimë,jai Dioso pejumelivaisibaxutota.

¹⁶ ¿Detsa pamonaë bajayata bajarapacuenia jumetae ata Dioso pejumaitsijavatsi, itsiata apo jumecovënëtsi? Baitsi pamonaëmi bajayata Moiséspijinë matacapona Egipto nacuaverena. ¹⁷ ¿Detsa jane pamonaëmijavabelia Dioso baraanaëpana cuarenta pavaibeje? Dioso baraanaëpana pamonaëmijavabelia pibisiacuene exana petusato nacuata. Nexata daxita bajarapamonaëmi pijaneconi yatëpa petusato nacuata. ¹⁸ ¿Detsa jane pamonaëmijavabelia Dioso najumecapanepaëya jumaiti: “Apo pajonemë tsane xanëjavaberena,” jai? Bajarapacuenia Dioso najumecapanepaëya jumaiti apo pejumecovënëtsivitsijavabelia. ¹⁹ Nexata yapëtanetsi panijasalinaivimi apo pejonejava Diosojavabelia. Tsipaji apo jumecovënëtsi Dioso pitorobicueniatsi.

4 Dioso baja cajena najumecapanepaëya jumaiti vajajonenexa bajaraponë pijanacuayabetsia vajanacueraëvetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabëcuenexaniavaetavanapatsi. Tsipaji itsamonae paxamëyajuvënëvi apo jonecapanepae tsipae Dioso pijanacuayabetsia itsa apo jumecovënëtsi Dioso. ² Vaxaitsi ata rabaja jumetanetsi pexanialivaisi vajanacacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tsipaji jumetae ata, apo jumecovënëtsi. ³ Nexata vaxaitsi Dioso vajajumecovënëtsivi, nacacaëjëpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovënëtsivi apo jone tsane. Tsipaji bajarapitsivi yabara Dioso bajayata jumaiti mapacueniaje:

Anaëpanaenajë apo tanejumecovënëtsivijavabelia. Nexata najumecapanepaëya jumaitinë baja: “Bajarapamonaë apo jone tsane xanëjavaberena,” janë,jai Dioso.

Dioso nacia pexanaëjavaveliacujinae, toxaniavaetsi atatsi picani panijasalinaivimi pejinavanapaenexa bajaraponëjavatatsia, itsiata apo jone. ⁴ Yapëtanetsi pacuenia Dioso petoxaniavaetsicujinaetsi, copiaëvetatsi picani panijasalinaivimi pejonenexa pejinavanapaenexa bajaraponëjavatatsia. Tsipaji Dioso pejumelivaisibaxutota jumaiti mapacueniaje:

Dioso baja daxita mapanacuaje, daxitacuene yajava, itsa vereta pexanaëjava, vemaxënacueraëveta siete matacabita,jai Dioso pejumelivaisibaxutota.

⁵ Icatsia Dioso pejumelivaisibaxutota jumaiti Dioso apo pejumecovënëtsivi yabara mapacueniaje:

Bajarapamonaë apo jone tsane xanëjavaberena, pejinavanapaenexa xanëjavata,”jai Dioso pejumelivaisibaxutota.

⁶ Pamonaë baja picani copiaya jumetane pexanialivaisi pecapanepaelivaisinexatsi, itsiata apo pejumecovënëtsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaëya

jumaiti mapacueniaje: “Pamonaë tajajivi, jonena xanëjavaberena,” jai. Nexata pamonaë jumecovënëtapona Dioso, jonena Dioso pijanacuayabetsia. ⁷ Bajarapacuenia bajayata itsamonae Dioso apo pejumecovënëtsixae, nexata icatsia Dioso caëjëta itsamatacabi itsamonae pejonenexa. Bajarapacuenia Dioso itsa caëjëta itsamonae pejonenexa, mapamatacabitaje cajena caëjëta itsamonae pejonenexa. Bajayata Davidpijinë Dioso itorobatsi tajëvelia pevajunupaëbinexa itsamonae mapamatacabitaje pejoneponaëjavanexa Diosojavabelia. Nexata bajayata Davidpijinë tajëvelia itsa vajunupaëba itsamonae mapamatacabi pejonejavanexa Diosojavabelia, jumaiti mapacueniaje:

Mapamatacabitaje itsa pajumetaneme Dioso papecajumaitisijava, pëtsa pajamatabëcuenetajamë panejumecovënëtsinexa Dioso,jai Davidpijinë tajëvelia.

⁸ Bajayata Josuëpijinë vajasalinaivimi petusato nacuajavaverena matacapona Israel nacuajavaberena. Panacia bajarapamonaenexa Dioso toxaniavaetatsi pejonenexa, bajarapanacua dexitamatacabitajavabelianexa. Bajarapanacua cajena xaina Dioso pijanacuataatsia. Nexata panacia yabara jumaiti: “Dioso pijajivi pejinavanapaenacuanaexa, toxaniavaeta,” itsa jai, Israelnacua yabara apo jumaiti. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonae pejonenexa Diosojavabelia. Tsipaji baja vajasalinaivimi bajayata baja pata Israel nacuata. ⁹ Bajaraxuata yapëtanetsi pacuenia abaxë Dioso tocopata mapamatacabitaje itsamonae ata Dioso pejumecovënëtsinexa pejonenexa Dioso pijanacuayabetsia. ¹⁰ Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabiabijava vemaxënacueraëvetsiana. Pacuenia bajayatami Dioso ata nacia baja pexanaëjava itsa vereta, vemaxënacueraëveta, bajarapacuenia vemaxënacueraëvetsiana. ¹¹ Daxita vaxaitsi vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatatsia vajajinavanapaenexa. Bajayata pamonaëmi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamonaëmi apo becuenejëpaetsi.

¹² Dioso cajena pejumelivaisi bitso asaë. Nexata Dioso pejumelivaisi caëjëpatsi ayaicuene pexanaenexa pijumesaëta. Dioso pejumelivaisi bitso pexiuajilivaisi anijabarëneniabeje espada matatoxenetsia. Nexata bajarapalivaisi itsa yapëtanetsi, nacayapëtaëyaexana pacuenia pepacuene jamatabëcueneitsitsi. ¹³ Vaxaitsi Dioso vajanacaexanaëvi, apo nacacaëjëpae Dioso vajavecuanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaëbianatsi daxita xua exanatsi.

Pacuenia Jesús ayajamatabëcuenenë, jivi petocuaicuaijinë Diosojavabelia, yabara pelivaisi

¹⁴ Jesús cajena Dioso pexënato, ayajamatabëcuenenë. Pepo sacerdotenë vajanacatocuaicuaijinë Diosojavabelia. Jesús baja pona Diosojavabetsia va-

janacayavenonaenexa. Bajaraxuata nexata vaxaitsi becaasaë tsavanapaetsi Dioso vajajumecovënëtsijava mapanacuataje. ¹⁵ Jesús, Diosojavabelia vajanacatocuaicuaijainë, nacajamatabëcueneyapëtane pacuenia vaxaitsi jamatabëcueneitsi. Nexata dovathi itsa nacajamatabëcueneëjëta pibisiacuene vajaexanaenexa, Jesús nacajamatabëcueneyapëtane. Bajarapacuenia nacajamatabëcueneyapëtane tsipaji Jesús ata abaxë itsa ponapona mapanacuataje, jamatabëcueneëjëtatsi dovathi. Itsiata baitsi jane Jesús caeto ata pibisiacuene apo exanae. ¹⁶ Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

5 Sacerdotevivyajuvënë, caenë, itapetatsi sacerdotevi penamatacaitorobinënexa, daxitajivi petocuaicuaijaitisabiabinexa Diosojavabelia. Nexata jivi Diosojavabelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia bajarapaofrenda. Dajubinë, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeneconi Dioso pevecuaajibiaexanaenexatsi. ² Sacerdotenë caëjëpatsi dovathi pejamatabëcueneëjëtsinexatsi pibisiacuene pexanaenexa. Tsipaji bajaraponë ata saya jivitonë. Nexata sacerdotenë jamatabëjumaitsi jivi yabara: "Jamatabëcueneyapëtanijji pamonae abaxë apo yapëtae Dioso pejumelivaisi. Nexata pibisiacuene exana. Jamatabëcueneyapëtanijjina pamonae dovathi jamatabëcueneëjëtatsi pibisiacuene pexanaenexa," jamatabëjai sacerdotenë. Bajaraxuata jivi pibisiacuene itsa exana, sacerdotenë itaxutotsoniatane jivi. ³ Sacerdotenë ata apo ajamatabëcuenesaë. Sacerdotenë dajubinë, pijana yajava, Diosojavabelia ofrendacuenia rajutabiaba jivi pibisiacuene pexanaeneconi Dioso pevecuaajibiaexanaenexatsi. Bajarapacuenia itsa rajutabiaba, bajaraponë ata pibisiacuene pexanaeneconi Dioso pevecuaajibiaexanaenexatsi, yajavarajutabiaba.

⁴ Itsanë ata pijacuata pepo sacerdotenë apo naexanae daxitajivi petocuaicuaijainexa Diosojavabelia daxitajivi peyayataenexatsi. Biji rajane sacerdotevivyajuvënë, caenë, Dioso itapetatsi pepo sacerdotevi penamatacaitorobinë pexanaenexatsi, pacuenia bajayata Aarónpijinë ata Dioso itapetatsi pepo sacerdotenë pexanaenexatsi. Nexata bajayata Aarónpijinë ata daxitajivi yayatanetsi. ⁵ Bajara icatsia itsi Cristo ata. Pijacuata apo naexanae pepo sacerdotenë, vajanacatocuaicuaijainexa Diosojavabelia. Biji rajane Dioso itapetatsi Cristo pepo sacerdotenënexa daxitajivi peyayataenexatsi. Cristojavabelia copiaya Dioso jumaitsi mapacueniaje:

Xamë raja taxënatomë. Xanë raja axanë,jai Dioso.

⁶ Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexënato pepo sacerdotenënexa. Jumaitsi mapacueniaje:

Xamë raja pepo sacerdotenëmë tsane daxitamatacabijavabelianexa. Jivi netocuaicuaijainë tsane xanëjavaberena. Pacuenia bajayatami itsi Melquisedec, bajara xamë ata itsimë tsane,jai Dioso pexënatojavabelia.

⁷ Jesucristo abaxë itsa ponapona mapanacuataje, piniijjumeta yaitaxutonueya vajëta Diosojavabelia. Bajarapacuenia vajëta Diosojavabelia pecapanepaenexatsi petëpaejavavecua. Nexata Jesucristo xaniavaetsia Dioso jumetanetsi. Tsipaji Jesucristo jamatabëjumaitsi Dioso yabara: "Jitsipajë taneexanaenexa pacuenia taxa netojitsipa," jamatabëjai. ⁸ Jesucristo, Dioso pexënato, ayajamatabëcuenenë ata, itsiata paxa jumecovënëta. Nexata pijacuata nacopata pebejiobiaexanaenexatsi pacuenia Dioso tojitsipatsi. ⁹ Nexata Jesucristo paxa itsa jumecovënëta, nacopata pebeyaxuabinexatsi jivi pesivatëpaenexa. Nexata daxita pamonae jumecovënëtavanapa pacuenia Jesucristo itorobatsi, Dioso rajutsianatsi matacabi apo peverevecaejava. ¹⁰ Dioso baja cajena itapetatsi Jesús pepo sacerdotenënexa, jivi petocuaicuaijainexa Diosojavabelia, pacuenia bajayata itsi Melquisedecpijinë.

Pacuenia Dioso pejumecovënëtsivi muxujiobatsi pecipabiyanima Dioso pejumecovënëtsijava yabara pelivaisi

¹¹ Xainajë picani ayailivaisi patacatsipaebinexa paneyapëtaenexa pacuenia Cristo pepo sacerdotenë vajanacatocuaicuaijainexa Diosojavabelia. Itsiata baitsi jane ayapëbeje patacajumeyapëtaeyaexanaenexa bajarapalivaisi. Pacuenia pejevaxi beaxayo bayapëtaepona vajacujarubijava, bajara pajamatabëcueneitsimë. ¹² Bajayajebi baja picani Jesucristo pajumecovënëtame. Juya baja picani bepatsipaebaponame itsamonaejavabelia. Itsiata baitsi jane abaxë panamatavenoname icatsia papecatsipaebinexa bajarapalivaisi. Palivaisi picani yapëxanepana, Dioso pejumelivaisi, itsiata apo pajumeyapëtaemë. Nexata abaxë panamatavenoname icatsia papecatsipaebinexa bajarapalivaisi. Pacuenia pejevaxinacuetoxi emitobarëmene apa, apo xae abaxë pexaejava, bajara pajamatabëcueneitsimë. Tsipaji palivaisi ayapëbejevajëto, apo pacacajëpae orijibia panejumeyapëtaenexa. ¹³ Pamonae abaxë namatavenona petsipaebinexatsi peyapëxanepanaelivaisixi, Dioso pejumelivaisi, bajarapamonae pejamatabëcuene abaxë mito bepiapaenacuetoxi. Bajarapamonae abaxë apo yapëtae pexanaenexa pacuenia Dioso tojitsipatsi.

¹⁴ Pacuenia penaveretsivi pijacuata xane pexaejava, bajara jamatabëcueneitsi pamonae pejamatabëcuenevitsabivi Diosojavabelia. Nexata pacuenia Dioso itorobatsi, jumecovënëta. Najamatabëxainabiaba pexanaenexa ëpexaniacuene. Apo jitsipae pibisiacuene pexanaejava.

6 Vaxaitsi Dioso vajajumecovënëtsijavaveliacujinae, vajavajënaeyabelia jumecovënëtaponatsi vajajamatabëcuenevitsabaponaenexa Diosojavabelia, pacuenia jamatabëcuenevitsabapona bitso Dioso pejumecovënëtsivi. Bajaraxua baja vaxaitsi yapëtanetsi. Nexata baja apo namatavenonaetsi icatsia vajanacatsipaebinexa Cristo pelivaisi, pacuenia copiaya nacatsi-

paeba pamatacabi ajena najamatabëcuenecopatatsi Diosojavabelia. Vaxaitsi baja copabatsi pibisiacuene vaxaxanabiabijava. Najamatabëcuenepënëyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapëtaenexa. ² Apo namatavenonaetsinua baja icatsia vajanacatsipaebaponaenexa vajayapëtaenexa pajamatabëcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapëtaenexa pajamatabëcuene yabara pijinia tsimatanacobeuata ancianovi Dioso pejumecovënëtsivijavabelia. Pacuenia ata icatsia Dioso asaëyaexanaejitsia petëpaevimi, vajayapëtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamonae naneconita Diosojavabelia, naneconitsiajinavanapaejitsia daxitamatacabijavabelianexa, vajayapëtaexae baja, apo namatavenonaetsi vajanacatsipaebaponaenexa. ³ Dioso itsa nacatocopataponaena, vajavajënaeyabelia jamatabëcuenevitsabaponaenatsi pacuenia Dioso nacatojitsipa.

⁴ Itsamonae baja picani yapëtane pexaniajailivaisi. Jumecovënëtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabëcatsi. ⁵ Yapëtanenua baja picani pacuenia Dioso pejumelivaisi bitso xanepana. Yapëtanenua baja picani pacuenia taejitsia Dioso pinijicuene pexanaejava pamatacabi pejananacua Dioso exanaena. ⁶ Itsiata baitsi jane bajarapamonae itsa copaba baja Jesucristo pelivaisi pejumecovënëtsijavami, nexata baja acuenebi icatsia penajamatabëcuenepënëyorotsijava pibisiacuene Diosojavabelia. Pecopabixae Jesucristo pelivaisi pejumecovënëtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamonae jamatabëcuenejëpa pamonae bajayata Jesucristo beyaxuabatsi cruzata. Tsipaji pamonae Jesucristo beyaxuabatsi, quenetsiataeya capocaponatsi daxitajivi pitabarata. ⁷ Ema itsa runa mapairataje, Dioso pejamatabëcueneta pecopatsixae, runa bajarapaema. Nexata Dioso pejamatabëcueneta perunaexae, bajarapaema banacale naxaniabiaexana mapairataje. Nexata capitsapa pexaniabanacale. ⁸ Itsiata baitsi jane mapanacuataje saya itsa juva piabejejava, apo xanepanae itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonae Jesucristo pelivaisi pejumecovënëtsicujinae, copabiana bajarapalivaisi pejumecovënëtsijavami, nexata tajuenatsi infernojavabelia.

Pajamatabëcuene yabara Dioso pejumecovënëtsivi casaë tsavanapae Dioso pejumecovënëtsijava yabara pelivaisi

⁹ Tajamonae bitso patacaasivavi, pacuenia itsamonae jumecovënëtsi ata Dioso pecapanepaejavanexatsi, itsiata copaba, bajara paxamë apo paitsimë tsane. Dioso panejumecovënëtsijava apo pacopabimë tsane. Yapëtaniji baja cajena paxamë xaniavaetsia panejinavana-paejavanexa. Dioso baja nexata panejumecovënëtsix-

ae, Dioso pacacapanepaena. ¹⁰ Dioso epexaniacuene exana. Apo nacofënëtsinua xua baja paexaname paneyavenonaenexa itsamonae Dioso pejumecovënëtsivi. Tsiteca abaxë payavenonaponame bajarapamonae. Bajarapacuenia itsa payavenonaponame itsamonae, patsitanacueneitajëtaaponame Cristo bitso panejitsipaejava. ¹¹ Pacatojitsipatsi, pacaevimë canacujitsia, itsamonae panetsitanacueneitajëtaaponae narmataenetsia bitso panenasivajava panetëpaejavabelianexa. Nexata bajarapacuenia itsa paexaname, pacacapanepaena Diosojavabetsia. ¹² Apo pacatojitsipatsi paneayabarafaetabijava Dioso panejumecovënëtsijava. Biji rajane pacatojitsipatsi paneajamatabëcuenesaënexa, pacuenia itsamonae ajamatabëcuenesaë bajayajebi penajamatabëcuenecopatatsijava Diosojavabelia. Bajarapamonae rajutsianatsi xua Dioso najumecapanepaeya jumaittsi pera-jutsinexatsi.

¹³ Bajayata Dioso pexaniajajumeta tajëvelia najumecapanepaeya jumaittsi pacuenia Dioso toexanaejitsia Abrahampijinëjavabelia. Dioso navënëcacuaicuaijia jumaittsi mapacueniaje: "Xanë Diosonëxaenë, najumecapanepaeya cajumaittsi pepacuene tacatoexanaenexa pacuenia najumecapanepaeya cajumaittsi," jai Dioso Abrahampijinëjavabelia. Bajarapacuenia Dioso najumecapanepaeya jumaittsi Abrahampijinëjavabelia pepacuene petoexanaenexa pacuenia najumecapanepaeya jumaittsi. Jivi namataenetsia penajumexaniataenexa Dioso pevënë bacacuaicuaijai. "Xaniajanë. Pepacuene Dioso pitabarata cajumaittsi," banajai. Itsiata baitsi jane ponë pevënë Dioso cacuaicuaijijitsia, ajibi. Tsipaji baja pematatsënëa Dioso matatoxenetsia ayajamatabëcuenenë ajibi. Bajaraxuata Dioso pexaniajajumeta navënëcacuaicuaijia jumaittsi pacuenia toexanaejitsia Abrahampijinëjavabelia. ¹⁴ Nexata Dioso jumaittsi Abrahampijinëjavabelia mapacueniaje: "Pepacuene xanë cayavenonabiabianatsi. Xainaenamenua ayabitsaëto nemomoxi," jai Dioso pexaniajajumeta. ¹⁵ Nexata Abrahampijinë Dioso jamatabëcueneevetsiaponapona bajayajebi. Nexata jane baja belia Abrahampijinë Dioso rajutatsi pacuenia najumecapanepaeya jumaittsi. ¹⁶ Itsamonae Dioso pevënë bacacuaicuaijai pejumexaniataenexatsi xua toexanaejitsia itsajivijavabelia. "Paxaniajanë. Pepacuene Dioso pitabarata pacajumaittsi," bajai. Nexata bajarapacuenia itsa jumaittsi, acuenebi itsajivi ata pejumaittsijava bajarapamonaejavabelia: "Apo pacajumexaniataetsi," pejaijava. Tsipaji Dioso pevënë cacuaicuaijai pexaniajajumeta. ¹⁷ Dioso baja cajena pexaniajajumeta najumecapanepaeya jumaittsi jivi peyavenonaenexa. Dioso najamatabëcueneitajëta jivijavabelia xaniajai peyavenonaejava jivi pejumeaebivanivatsi, "Jemajai raja. Dioso epatua itsajamatabëcuene xainaena," pejaiyanivatsi. Bajaraxuata nexata Dioso tajëvelia navënëcacuaicuaijia jumaittsi Abrahampijinëjavabelia mapacueniaje: "Xanë Diosonëxaenë, najumecapanepaeya cajumaittsi pepacuene tacatoexanaenexa pacuenia najumecapanepaeya cajumaittsi," jai Dioso

Abrahampijinējavabelia. ¹⁸ Bajarapacuenia Dioso najumecapanepaeya pejumaitscujinae, acuenebi epatua itsajamatabēcuene pexinaejava. Tsipaji baja Dioso acuenebi penajumetsēnētsijava. Nexata vaxaitsi Dioso vajanacacapanepaejavanexa vajajumecovēnētsivi, bejamatabējematsi. Apo bejamatabēcuenebējaitsi. Tsipaji baja yapētanetsi Dioso pexaniajaijava vajanacapanepaenexa, pacuenia baja bajayata tajēvelia najumecapanepaeya jumaitsi. ¹⁹ Cristo vajanacasivatēpaenē, athēbētatsia peecaexae Dioso pemuxuneneta, nexata baja yapētanetsi vajanacacapanepaejavanexa Diosojavabelia. Nexata ajamatabēcuenesaētsi tsavana-pae Dioso vajajumecovēnētsijava. ²⁰ Jesús athēbēbet-sia vajavajēnaeyabetsia pona vajanacatoexa-narutsinexatsia namuto. Nexata jane baja Jesús athēbētatsia pepo sacerdotenē Dioso exanatsi, jivi petocuaicuaijainexa Diosojavabelia daxitamatacabijavabelianexa. Nexata Jesús pepo sacerdotenē pacuenia bajayatami itsi Melquisedecpijinē.

Pacuenia Jesús pepo sacerdotenē pacuenia bajayatami itsi Melquisedecpijinē yabara pelivaisi

7 Bajayatami Melquisedecpijinē ponapona. Salemtomara pevetsinēmi. Bajaraponēmi sacerdotenē, jivi petocuaicuaijainexa, athēbētatsia peecaenē, Diosojavabelia. Nexata bajarapamatacabi Abrahampijinē vajabitsaē exana itsanacuanē pevetsivijavabelia. Itsa baja Abrahampijinē verebiaba pijavajabitsaē, naviarena. Nexata penaviatsinērena caxitajarabatsi Melquisedecpijinē. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai. ² Abrahampijinē pijavajabitsaē peverebiabivimi pecobecovē penotsijavanē, caponapona. Nexata bajaraxua diez xuabejeyajuvēnjavanē tsaponae, Abrahampijinē caejavayo ofrendacuenia rajutapona Melquisedecpijinējavabelia. “Melquisedec,” itsa jai hebreojumeta, mapajumetaje pejumaitsi jume: “Dioso pitabarata aneconijibia xaniavaetsia jivi pevetsinē,” pejaijume. “Salemtomara pevetsinē,” itsa jai hebreojumeta, mapajumetaje pejumaitsi jume: “Jamatabēcuenexanepanaeya tomara pevetsinē,” pejaijume. Nexata Melquisedecpijinē Salemtomara pevetsinēmi. ³ Melquisedecpijinē paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petēpaejava ata yabara, apo jumaitsi. Nexata pacuenia Dioso pexēnato, Jesucristo, jivi petocuaicuaijainē Diosojavabelia daxitamatacabijavabelianexa, bajara pijinia itsi Melquisedecpijinē. Melquisedecpijinē jivi petocuaicuaijainē Diosojavabelia daxitamatacabijavabelianexa.

⁴ Nexata aeconoxae pacanaējēre mapacuenije. Melquisedecpijinē bitso ayaijamatabēcuenenē vajasalinainēmi Abrahampijinē matatoxenetsia. Bajaraxuata Abrahampijinē ayaijamatabēcuenenēmi ata, ofrenda rajuta Melquisedecpijinējavabelia. Pamatacabi Abrahampijinē pijavajabitsaē verebiaba, pecobecovē nota. Nexata Abrahampijinē itsa caxitajaraba

Melquisedecpijinē, diez xuabejeyajuvēnjavanē tsaponae, caejavayo rajutapona Melquisedecpijinējavabelia. ⁵ Bajayatami Dioso najumecopata Moiséspijinēta. Bajarapalivaisi juya itorobatsi Levípijinēmi pexi, pemomoxi ata, sacerdotevi penaexanaponaevinexa, jivi petocuaicuaijainexa Diosojavabelia. Nexata Levípijinē pemomoxi, sacerdotevi naexanapona. Nexata bajarapamonae Dioso tocopatatsi perajutsinexatsi daxita judíovi pexinaeyajuvēnjavanē. Baitsi tocopatatsi pe-matamoyanijobinexa diez xuabejeyajuvēnjavanē tsaponae, caejavayo pevecuapitaponaenexa. Nacaeviriavi ata, daxita bajarapamonae Abrahampijinē ēpemomoxi ata, itsiata Dioso tocopatatsi nacaeviriavi ata pexinaeyajuvēnjavanē perajutsinexatsi.

⁶ Melquisedecpijinē picani Levípijinē apo pemomo. Itsiata Melquisedecpijinē ayaijamatabēcuenenēxae, Abrahampijinē ofrenda rajuta Melquisedecpijinējavabelia. Diez xuabejeyajuvēnjavanē tsaponae, caejavayo rajutapona. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenonabiabinexa,” jai Abrahampijinējavabelia, ponējavabelia Dioso najumecapanepaeya jumaitsi peyavenonaenexa. ⁷ Pajivi jumaitsi: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenejivi Dioso pitabarata pajiviyo tova-jētsijitsia matatoxenetsia. Daxita baja cajena yapētanetsi bajarapacuenē. ⁸ Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexinaeyajuvēnjavanē, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanē, petēpaevinexa. Tsipaji saya jivi. Itsiata baitsi jane Dioso pejumelivaisibaxutota Melquisedecpijinē yabara jumaitsi pacueniaje: “Melquisedec abaxē mapamatacabita ataje asaē tsaponapona. Nexata tsiteca jivi tocuaiicuaijai tsabiabi Diosojavabelia,” jai. ⁹⁻¹⁰ Bajayatami Abrahampijinē ofrenda rajuta Melquisedecpijinējavabelia. Bajarapamatacabi abaxē Levípijinē apo naexanae. Pexi ata abaxē ajibi. Pemomoxi ata abaxē ajibi, pamonae jane baja mapamatacabitaje sacerdotevi naexana jivi petocuaicuaijainexa Diosojavabelia. Itsiata paofrenda Abrahampijinē rajuta Melquisedecpijinējavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijinē daxitanexa yayataeya ofrenda rajuta Melquisedecpijinējavabelia.

¹¹ Pamatacabi Aarónpijinē, pexi ata, sacerdotevi baja tsavanapae, bajarapamatacabi judíovi pejumecovēnētsinexa Dioso Moiséspijinēta najumecopata. Pamonae Aarónpijinē pexi, Levípijinē baja cajena pemomoxi. Judíovi itsa jumecovēnētsipa Dioso Moiséspijinēta penajumecopatsilivaisi Dioso aneconijibia petanexatsi, nexata Dioso apo itorobitsica tsipae Cristo, ponē beMelquisedecjamatabēcuenenē, jivi petocuaicuaijainexa Diosojavabelia daxitamatacabijavabelianexa. Dioso Moiséspijinēta penajumecopatsilivaisi pejamatabēcueneta Dioso aneconijibia judíovi itsa taejitsipa, nexata icatsia Dioso saya mataropotsia pepo sacerdotenē exanaponaejitsipa Aarónpijinē pemomoxi.

¹² Nexata Cristo sacerdotenē itsa exanatsi, jivi petocuaicuaijainexa Diosojavabelia daxitamatacabijavabelianexa, yajavacopatatsi pijinia itsalivaisi Dioso Moiséspijinēta penajumecopatsilivaisivecua. ¹³ Vajatumaxanenē, ponē Dioso pejumelivaisibaxutota tajēvelia vajunupaebatsi, bajaraponē Levípijinē apo pemomo. Biji rajane saicayavirianē. Bajaraponē pijavirivi bajayata caenē ata sacerdotenē apo naexanae.

¹⁴ Vajatumaxanenē itsa naexana mapanacuataje, daxitajivi baja cajena yapētane penaexanaejava mapanacuataje. Vajatumaxanenē naexana Judápijinē pemomoyota. Daxitajivi yapētanenua pacuenia bajayata Moiséspijinē tajēvelia vajunupaeba pamonaē sacerdotevi naexanaponaējitsia. “Judápijinē pemomoxi ata sacerdotevi naexanaena,” apo jai picani.

¹⁵ Bajaraxuata vaxaitsi xaniavaetsia jane baja yapētanetsi pepatsijava itsaviriasacerdotenē. Tsiapaji Cristo, ponē jane baja pepo sacerdotenē jivi petocuaicuaijainexa Diosojavabelia daxitamatacabijavabelianexa, bajaraponē beMelquisedecjamatabēcuenenē. ¹⁶ Levípijinē pemomoxi sacerdotevi exanaponatsi. Tsiapaji bajayata Moiséspijinē tocopata bajarapamonaeyajuvēnēvi sacerdotevi pexanaenexatsi. Itsiata baitsi jane Cristo, pepo sacerdotenē itsa exanatsi jivi petocuaicuaijainexa Diosojavabelia daxitamatacabijavabelianexa, Levípijinē pemomoxae, pepo sacerdotenē apo exanaetsi. Jume baja cajena. Biji rajane Cristo pepo sacerdotenē exanatsi icatsia piasaēxae petēpaecuujinae. ¹⁷ Dioso baja cajena tajēvelia pexēnatojavabelia pejumaitsijava, Dioso pejumelivaisibaxutota jumaitsi mapacueniaje:

Xamē raja pepo sacerdotenēmē tsane daxitamatacabijavabelianexa. Pacuenia Melquisedec jamatabēcueneitsi, bajarajamatabēcueneitsimē tsane, jai baja cajena tajēvelia Dioso pejumelivaisibaxutota Dioso pejumaitsijava pexēnatojavabelia.

¹⁸⁻¹⁹ Nexata baja palivaisimi copiaya Dioso Moiséspijinēta najumecopata jivi pejumecovēnētsinexa, Dioso baja copiarucaeyaexana. Tsiapaji bajarapalivaisimi apo caējēpaetsi jivi pevecuaajibiaexanaenexatsi pibisiacuene pexanaeneconi. Nexata palivaisi aeconoxae Dioso nacatocopata, xanepana bitso bajarapalivaisimi matatoxenetsia. Tsiapaji baja Cristo vajanacasivatēpaexae, bajaraponē pejamatabēcueneta Dioso baja aneconijibia nacatane. Nexata nacatocopata vajajamatabēcuene saya vajaimoxoyotsinexa Dioso.

²⁰ Dioso baja cajena tajēvelia najumecapanepaeya jumaitsi Cristo pepo sacerdotenē pexanaenexatsi, jivi petocuaicuaijainexa Diosojavabelia daxitamatacabijavabelianexa. ²¹ Pamonaemi bajayata copiaya Cristo pevajēnaeya sacerdotevi exanaponatsi, bajarapamonaemi yabara Dioso bajarapacuenia apo jumaitsi. Itsiata baitsi jane tajēvelia Dioso najumecapanepaeya jumaitsi Cristo pepo sacerdotenē pexanaenexatsi. Bajaraxuata tajēvelia Dioso pejumelivaisibaxutota jumaitsi mapacueniaje:

Dioso baja cajena najumecapanepaeya itsa jumaitsi, itsajamatabēcuene icatsia epatua apo xinae. Bajarax-

uata tajēvelia Dioso pexēnatojavabelia pejumaitsijava, Dioso pejumelivaisibaxutota jumaitsi mapacueniaje: “Xamē baja cajena pepo sacerdotenēmē tsane daxitamatacabijavabelianexa. Pacuenia Melquisedec jamatabēcueneitsi, bajarajamatabēcueneitsimē tsane,” jai Dioso pejumelivaisibaxutota tajēvelia Dioso pejumaitsijava pexēnatojavabelia.

²² Bajarapacuenia tajēvelia Dioso najumecapanepaeya pejumaitsixae Cristo yabara, nexata yapētanetsi xua Cristo nacatoexana, bitso pexaniacuene. Bajaraxua bitso pexaniacuene, palivaisimi copiaya Dioso Moiséspijinēta najumecopata matatoxenetsia. ²³ Copiaya pamonaemi sacerdotevi exanaponatsi, ayaibitsaēto jonepona sacerdotevinexa. Tsiapaji tēpa-pona. Nexata apo caējēpaetsi pevetsinexa daxitamatacabijavabelianexa. ²⁴ Itsiata baitsi jane Jesús baja icatsia apo tēpae tsane. Nexata pepo sacerdotenē tsane daxitamatacabijavabelianexa. Nexata baja icatsia itsanē pepo sacerdotenē apo exanaetsi tsane. ²⁵ Nexata pajivi najamatabēcuenecopata Diosojavabelia pibisiacuene pexanaeneconi Dioso pevecuaajibiaexanaenexatsi, daxitamatacabijavabelianexa Dioso vecuaajibiaexanaenatsi. Bajarapacuenia daxitamatacabijavabelianexa pibisiacuene pexanaeneconi vecuaajibiaexanaenatsi Jesús pejamatabēcueneta. Tsiapaji Jesús daxitamatacabijavabelianexa asaē tsaponaponaē tsane jivi petocuaicuaijainexa Diosojavabelia.

²⁶ Pacuenia baja Jesús pepo sacerdotenē, bajarapitsinē vaxaitsi vajanamatavenonaexae, Jesús baja pat-sica. Jesús cajena Dioso pejamatabēcuenejēpaenē, pianeconijibinē Diosojavabelia. Pibisiacuene pexanaevi ata, apo jamatabēcuenebijianaetsi. Tocopatatsi peccaenexa athēbētatsia, paxa Dioso pemuxuneneta, penajuaevetsinexabeje daxitacuene. ²⁷ Pacuenia itsamonae pepo sacerdotevi jamatabēcueneitsi, bajara Jesús apo jamatabēcueneitsi. Itsamonae pepo sacerdotevi, daxitamatacabijavabelianexa dajubi beyabiaba ofrendacuenia bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaeneconi Dioso pevecuaajibiaexanaenexatsi, itsamonae ata pibisiacuene pexanaeneconi Dioso pevecuaajibiaexanaenexatsi. Bajarapacuenia Jesús apo exanae. Jesús saya nacopata pebeyaxuabinexatsi ofrendacuenia penarajutsinexa Diosojavabelia. Bajarapacuenia Jesús itsa nacopata pebeyaxuabinexatsi, caecuenia matamota daxitajivi pibisiacuene pexanaeneconimi daxitamatacabijavabelianexa. ²⁸ Bajayata palivaisi Dioso Moiséspijinēta najumecopata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonaē apo caējēpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexēnato pepo sacerdotenē penaexanaenexa daxitamatacabijavabelianexa. Jesús caeto ata pibisiacuene apo exanae.

Pacuenia Jesús daxitajivi petocuaicuaijainē Diosojavabelia yabara pelivaisi

8 Xua yabara baja pacatsipaebatsi, maitsije. Ae-conoxae baja xainatsi Jesús, pepo sacerdotenē vajanacatocuaicuaijainexa Diosojavabelia. Bajaraponē ecaeyaexanatsi athëbëtatsia, Dioso ayaijamatabëcuenenē pemuxuneneta, pecujanenia, penajuaevevsinexabeje daxitacuene. ² Nexata jane baja aeconoxae Jesús Dioso pijatemplobota athëbëtatsia nacueneba pepo sacerdotenē penacuenebijava. Bajarapatemplobo Dioso pexanaetemplobo. Jivi apo pexanaetemplobo. ³ Daxita pamonaē pepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuenia bajarapavi perajutsinexa Diosojavabelia. Bajaraxuata Jesucristo ata, vajanacatocuaicuaijainē Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuata nacopata pebexaxuabinexatatsi ofrendacuenia penarajutsinexa Diosojavabelia. ⁴ Itsa abaxë Jesucristo mapamatacabi ata ponaponaejitsipamapanacuataje, apo sacerdotenē tsipae. Jesucristo apo exanaē tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuenia bajarapavi perajutsinexa Diosojavabelia Moisëspijinē pitorobicueniatsi. ⁵ Xua Jesucristo athëbëtatsia exanaponapona, bajaraxua saya sacerdotevi cuenecataeya exanavanapa templobota mapanacuataje. Bajaraxua sacerdotevi cuenecataeya pexanavanapaenexa, Dioso tocopatatsi. Yapëtanetsi baja cajena xua Jesucristo athëbëtatsia exana, bajaraxua mapanacuapijisacerdotevi saya cuenecataeya exanavanapa. Tsipaji pamatacabi Dioso Moisëspijinē itorobatsi mapanacuata pexanaenexa Dioso pijacarpoboxaneto, Moisëspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanapona pacuenia Moisëspijinë Dioso tsitajëtatsi petsutojumata. ⁶ Itsiata baitsi jane Cristo, ponë pepo sacerdotenë, xua Dioso athëbëtatsia tocopatatsi petonacuenebinexa, bajaraxua bitso ayaijamatabëcuene. Xua bajayata sacerdotevi Dioso tonacuenebavanapa mapanacuataje, beveliamatabëcuenejava saya. Tsipaji Cristo jivi tocuaiicuaijai tsane Diosojavabelia daxitamatacabijavabelianexa. Cristo nacayavenonabiabi-ana. Pepacuene baja Cristo pejamatabëcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarajutsinexa xua yabara Dioso najumecapanepaeya jumaitsi vajanacarajutsinexa, baitsi matacabi apo pevereverecaejava. Bajaraxua bitso pexaniacuene. Palivaisimi copiaya Dioso Moisëspijinëta najumecopata, bevelialivaisimi saya.

⁷ Itsa baja xanepanaejitsipa copiaya palivaisi Dioso Moisëspijinëta najumecopata, nexata baja icatsia coto-caevi itsalivaisi Dioso najumecapanepaeya apo nacatonajumecopatsi tsipae. ⁸ Israelpijinë pemomoxi xani-

avaetsia apo jumecovënëtsi palivaisi bajayata Dioso najumecopata Moisëspijinëta. Bajaraxuata Dioso tajëvelia najumecapanepaeya pejumaitsijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinë tsane pejanalivaisi jivi pejumecovënëtsinexa. Pajivi jumecovënëtsiana bajarapalivaisi, rajutsianajë matacabi apo pevereverecaejava. Bajarapacuenia najumecapanepaeya jumaitsinë tsane Israel nacuapijivijavabelia, Judea nacuapijivijavabelia ata. ⁹ Bajarapamonae pijasalinaivimi bajayata matacarenanë Egipto nacuverena. Bajarapamatacabi baja najumecapanepaeya jumaitsinë pacuenia bajarapamonae yavenonaejitsianë picani. Itsiata baitsi jane bajarapamonae apo nejumecovënëtsi. Bajaraxuata copatajë baja bajarapamonaeimi tayavenonaejava, jai Dioso pejumelivaisibaxutota tajëvelia Dioso pejumaitsijava Israelpijinë pemomoxi yabara.

¹⁰ Dioso icatsia tajëvelia pejumaitsijava, Dioso pejumelivaisibaxutota jumaitsi mapacueniaje:

Nexata icatsia itsamatacabijavabelia najumecapanepaeya jumaitsinë tsane Israel nacuapijivi yabara mapacueniaje: “Caejivi canacujitsia pejamatabëthëto-ta yapëtaeyaexanaponaenajë pacuenia netojinavananapajitsia. Nexata bajarapamonae pejamatabëthëtovjavavetsina jitsipaena tanejumecovënëtsinexa. Nexata bajarapamonae pijaDiosonënë tsane. Bajarapamonae pijinia tajajivi tsane. ¹¹ Nexata bajarapamatacabi itsajivi ata apo jumai tsane itsanëjavabelia, pijamonanëjavabelia ata: “Xamë ata beyapëtaneme Dioso,” apo jai tsane. Tsipaji baja daxitajivi neyapëtaena. Neyapëtaena beveliamatabëcuenevi. Neyapëtaena ayaijamatabëcuenevi ata. Daxita bajarapamonae neyapëtaena. ¹² Xanë baja daxita tajajivi pibisiacuene pexanaeconimi, vecuajibiaexanaenajë. Apo najamatabënapitsinë tsane bajarapapibisiacuenemi, jai Dioso pejumelivaisibaxutota bajayata tajëvelia Dioso pejumaitsijava.

¹³ Bajarapacuenia Dioso itsamatacabijavabelia icatsia najumecapanepaeya pejumaitsijavananexa yabara jumaitsi. Tsipaji baja ajumematamobi palivaisimi copiaya Dioso najumecapanepaeya jumaitsi judíovi pijasalinaivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

Pacuenia mapanacuata eca Diosojavabelia jivi penavajëcabiabibo, bajara pijinia pacuenia athëbëtatsia ata pecaebo, yabara pelivaisi

9 Dioso copiaya najumecopata Moisëspijinëta. Bajarapalivaisita itoroba Israel pemomoxi pexanaenexa Dioso pijacarpoboxaneto, bajarapabota Diosojavabelia penavajëcabiabinexa. Itorobanua sacerdotevi Dioso pijacuene petonacuenebavanapaenexa bajarapacarpabota. ² Itsa baja vereteta carboxaneto Diosojavabelia penavajëcabiabibonexa, bajarapabo ënëtuatuajë yatuucutsiaya epatajërëtsiarena rurena ayaipapaëbërëpana. Bajarapaënëyatuucutsijava ju-

mavereca, paënētuatuajë pevenë Lugar Santo. Bajara-jota nuta candelerovenëjava pitayotanucaenexa. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia. ³ Bajara papapaëbërëpanacujinaereca, paënētuatuajë, pevenë pijinia Lugar Santísimo, itsajota baitsi Dioso peponaponaenexa yatuucuta. ⁴ Bajarapaënëyatuucutsijava tuatuajëta, nuca orota pexanaejava, altarvenëjava. Bajara paaltarjumata jeba petuxujuvijavanë, inciensovënëjavanë, petajuitsinexa. Bajarapaënëyatuucutsijava tuatuajëta boca baula, orota pexanaebaula. Bajarapabaula ënētuatuajëta nuca orota pexanaebotellabë. Bajarapabotellabëta yanuca pexaejava, manávënëjava. Bajarapabaula ënētuatuajëta bocanua Aarónpijinëmi pijanaeboyo. Bajarapanaeboyo bajayata Aarónpijinë: “Baxujuvare,” itsa jai, baxujuvatabiaba. Bajarapabaula ënētuatuajëta bocabejenua ibopanabeje. Bajarapaibopanatabeje Dioso jivi pitavetsilivaisi najumeyaquinabuata. ⁵ Bajarapabaula matatsënëta anijanëbeje pecorofeto pexainaenëbeje nucabeje. Bajaraponëbeje beàngelnëbeje, jumapecataeya pexanaenëtsibeje. Bajaraponëbeje nutatsibeje Dioso pijapenivenivenaecotia pitajëtsinexabeje. Bajaraponëbeje pecorofetota baula matatsënëcaranatanucabeje. Nexata pepo sacerdotenë caevai canacujitsia bajarapabaula jumatsicababiaba dajubinë pijanata. Pepo sacerdotenë bajarabaula itsa jumatsicababiaba, jamatabëjumai tsabiabitsi: “Dioso nacaitaxutotsoniataena. Nacavecuajibiaexanaena pibisiacuene vajaexanaeneconimi,” jamatabëjai tsabiabi pepo sacerdotenë dajubinë pijanata baulajuma petsicababiabijavata. Itsiata aeconoxae apo necuenecajëpae patacatoyaquinaponaenexa pajamatabëcuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajëcabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pënëyatuucutsijava penamataxainaeënētuatuajëtatsina, sacerdotevi jinavanapabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi. ⁷ Nexata bajarapabo pënëyatuucutsijava penamataxainaeënētuatuajëtsina cujinaereca, paënētuatuajëjavabereca, sacerdotevi pepo penamatacaitorobinë caenë joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinë jumatsicababiaba bajarapabaula. Bajarapacuenia exanabiaba bajarapajana ofrendacuenia perajutsinexa Diosojavabelia. Bajarapacuenia exanabiaba pibisiacuene pexanaeneconi Dioso pevecuajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapëtae, Dioso pevecuajibiaexanaenexatsi. ⁸ Espiritu Santo pejamatabëcueneta nacayapëtaeyaexana mapacueneje. Pamatacabi abaxë Dioso pijacarpaboxaneto piapiapapaëbërëpanaxanetota ënētuatuajë yatuucutarurena, sacerdotevi Dioso

pijacuene tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajëtsinexa Diosojavabelia. Bajaraxua vajayapëtaenexa Espiritu Santo pejamatabëcueneta nacayapëtaeyaexana. ⁹ Bajaraxua bajayata sacerdotevi exana comparacióncuenia ajena mapamatacabijavaberenaje vajanacayapëtaeyaexanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapëtanetsi mapacueneje. Bajarapacuenia jivi exanae ata, nacueratabiaba. Tsipaji jivi dajubinëvi ofrendacuenia rajutabiabi ata Diosojavabelia, tsiteca pijaperujujamatabëcuene xainavanapa. ¹⁰ Paperujulivaisimi bajayata Dioso Moiséspijinëta najumecopata, jivi apo itorobitsi penajamatabëcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, pia-paeranexa ata xaniavaetsia pevetsinexa, xaniavaetsia penaperabëquiatsinexanua. Bajarapacuenia itorobatsi bajarapalivaisimi pejumecovënëtavanapaenexa abaxë Cristo pepatsivajënaeyatsica. Nexata Cristo pepatsicujinaetsica, Dioso jane baja bajarapalivaisimi pevereverecaeyaexanaenexa pejanalivaisita.

¹¹ Capanepaeya baja pata Cristo, pepo sacerdotenë. Bajaraponë vajanacatocuaicuaijinënexa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athëbëabetsia, Dioso pepo pijaboyabetsia. Bajarapabobitso pexaniabo mapanacuata jivi pexanaebo matatoxenetsia. Dioso saicaya pexanaebo. ¹² Bajarabetsia Cristo itsa junua bajarapabotatsia, caecueneta junua bajarapaboënëalia, Lugar Santísimojavabelia, itsajota baitsi Dioso peponaponaenexa yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacanecanimatamota daxitamatacabijavabelianexa Dioso vajanacacapanepaenexa. ¹³ Xaniajai. Bajayata Israelpijinë pemomoxi itsa naneconita Diosojavabelia, abaxë apo tocopatabiabitsi penajonenexa Diosojavabelia penavajëcabiabibojavabelia. Nexata Israelpijinë pemomoxi copiaya matatsicababiabatsi chivojanata, torojanata ata. Becerrami altarvenëjavajumata petajuitsiipumana ata tsimataoothoothabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajëcabiabibojavabelia. ¹⁴ Bajarapacuenia bajayata Dioso tocopatatsi dajubinë pijana pejamatabëcueneta Israelpijinë pemomoxi pejonenexa Diosojavabelia penavajëcabiabibojavabelia. Dajubinë pijana matatoxenetsia Cristo bitso cajëpatsi vajanacayavenonaenexa Dioso pexënatoxae. Espiritu Santo, apo pevereverecaenë daxitamatacabijavabelianexa, Cristo yavenonatsi. Nexata Cristo nacopata pebeyaxuabinoxatsi vajanacasivatëpaenexa. Cristo cajena caeto ata pibisiacuene apo exanae. Nexata Cristo pijanata nacavecuajibiaexana baja pibisiacuene vajaexanaeneconimi. Bajarapaneconi yabara picani Diosovecu vajanaxuabiviminexa. Bajarapacue-

nia Cristo vajanacatoexanaexae, tonacuenebavanapat-si piasaëtsaponaponaenë Dioso.

¹⁵ Nexata Jesucristo pejamatabëcueneta nacavecuuaajibiaexana baja vajaneconimi. Nexata baja aneconijibia Dioso nacatane. Bajaraxuata daxita pamonaë Dioso junatatsi, rajutsianatsi matabi apo peveverecaëjava, pacuenia baja Dioso najumecapanepaëya jumaitsi perajutsinexatsi. Cristo itsa nacasivatëpa, nacaneconimatamota baja. Nexata nacavecuuaajibiaexana daxita paneconimi xainatsi itsa abaxë jumecovënëtavanapat-si copiaya palivaisimi Dioso Moiséspijinëta najumecopata. ¹⁶⁻¹⁷ Itsajivi petëpaevajënae, yaquina pecobecovë yabara. Bajarapajivi itsa tëpa, pijamonae pevënamuto penatsicobetsanaenexa. Nexata yaquina pacuenia caejivi canacujitsia pitaponaëjitsia. Itsiata baitsi jane abaxë itsa asaë tsaponaponaë pecobecovë pexinaejivi, ajumematamobi abaxë bajarapalivaisi. Matapania baja itsa tëpa pecobecovë pexinaejivi, jumenamatomota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petëpaëjivi yaquina petëpaevajënaëya pecobecovë yabara. ¹⁸ Bajara pijinia itsi paperujulivaisimi bajayata Dioso Moiséspijinëta najumecopata Israelpijinë pemo-moxi pejumecovënëtsinexa. Jumenamatamotapona Israelpijinë pemomoxi dajubi pebeyabiabixae ofrendacuenia bajarapavi perajutsinexa Diosojavabelia. ¹⁹ Bajayata Moiséspijinë copiaya tsipaëba daxitajivjavabelia daxitajivi bajarapalivaisi pejumecovënëtavanapaenexa. Nexata Moiséspijinë pita hisopovënë naeboxi pepacëtetsicunuyo petsobialanamaëtota. Bajaraxuacujinae bajarapacunuyo Moiséspijinë jabuta merata, becerrojanata, chivojanatanua, peyajavamatajërëabijanarata. Nexata Moiséspijinë tsiatatsicaba pabaxutota itanerubena palivaisi Dioso najumecopata Moiséspijinëta. Bajaraxuacujinae Moiséspijinë daxitajivi tsiatatsicabapona. ²⁰ Nexata Moiséspijinë jumaitsi jivijavabelia: "Mara pacuenia pacamatatsicabatsije. Nexata patacatatsicabixae, xaniavaetsia jane baja Dioso pajumecovënëtavanapaenexa. Nexata pacuenia Dioso najumecapanepaëya pacajumaitsi, pacatocopia-patsiana," jai Moiséspijinë jivijavabelia. ²¹⁻²² Bajaraxuacujinae icatsia Moiséspijinë tsicabanajaenajaëba Diosojavabelia penavajëcabiabibo ënëtuatuajë. Xuanë bajarapabo ënëtuatuajëta xaina pecanacuenebinexa Dioso pijacuene, daxita bajaraxuanë yajavatsicabana-jaenajaëba. Bajarapacuenia pexanaenexa itoroba baja cajena Dioso Moiséspijinëta penajumecopatsilivaisim-ita. Itoroba dajubinë pijanata daxitacuene petsicabinexa, petsicabicujinae Dioso axuirajibia petaenexa daxita bajaraxuanë, jivi ata Dioso aneconijibia petaenexa. Tsiapaji jivi pibisiacuene pexanaeneconi yabara, acuenebi Dioso aneconijibia petaenexatsi. Matapania dajubinë itsa beyaxuaba, pijanata itsa matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevecuaajibiaexanaenexa yabara pelivaisi

²³ Diosojavabelia penavajëcabiabibota, xuabeje xaina pecanacuenebinexa Dioso pijacuene, dajubinë pijanata bajayata Moiséspijinë tsicabanajaenajaëba. Bajarapacuenia Moiséspijinë itsa exana, tajëvelia comparacióncuenia itajëta pona jivi peyapëtaenexa itsamatacabiavabelia Cristo pesivatëpaëjavanexa mapanacuapijivi. Cristo dajubinë pijanata apo tsicabanajaenajaëbi Diosojavabelia penavajëcabiabibo ënëtuatuajë. Biji rajane Cristo nacopata pebeyaxuabinexatsi. Nexata Cristo pijana pejamatabëcueneta, mapanacuapijivi pibisiacuene pexanaeneconi, Dioso baja vecuaajibiaexanatsi. Cristo cajena bitso jananamatomota Dioso pitabarata, dajubinë pejana matatoxenetsia. ²⁴ Cristo baja cajena vajanacasivatëpaëcujinae, athëbëabetsia pona. Aeconoxae baja Cristo athëbëatatsia eca, paxa Dioso pemuxuneneta, vajanacatocuaicuajitsecanexa Diosojavabelia. Nexata Dioso pepo pijabotatsia Cristo nacatocuaicuajit tsaponae. Bajarapabo apo pexanaëbo itsajivi ata. Apo bemapanacuapijibo. Tsiapaji pacarpaboxaneto mapanacuata jivi exana Diosojavabelia penavajëcabiabibonexa, bajarapabo saya cuenecatayea exana pacuenia athëbëatatsia Dioso pepo pijabo itsi. ²⁵ Sacerdotevi pepo penamatacaitorobinë, bajaraponë judionë. Caevai canacujitsia cajoneyabiaba dajubinë pijana Lugar Santísimovënëjavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinexatsi vajanacasivatëpaenexa, icatsia baja pematatsënëa apo nacopatsi petëpaenexa. ²⁶ Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatëpaponanexa caevai canacujitsia, nexata Cristo bitso anijatonë jivi pijaneconi yabara sivatëpaponaejitsipa. Itsiata baitsi jane Cristo caeto petëpaëcujinae, icatsia baja apo tëpae. Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinexatsi vajanacasivatëpaenexa, pibisiacuene vajaexanaeneconimi vajanacavecuuaajibiaexanaenexa. ²⁷ Bajara pijinia pacuenia vaxaitsi ata caeto tëpaponanatsi. Bajaraxuacujinae jane baja Dioso naneconitsiaexanaponaëna daxita pamonaë pijaneconi pexinaevi. ²⁸ Bajara pijinia pacuenia Cristo caeto nacopata pebeyaxuabinexatsi vajanacasivatëpaenexa, ayaibitsaëttoxanetotsi pibisiacuene vajaexanaeneconi vajanacavecuuaajibiaexanaenexa. Bajaraxuacujinae Cristo baja athëbëabetsia pona. Icatsia pat-sianica cotocaëvijava. Itsiata baitsi jane baja icatsia apo nacasivatëpae tsane pibisiacuene vajaexanaeneconi yabara. Saya baja nacasivapatsianica vavajënaëvetavanapaëvi vajanacacaponanexa athëbëabetsia.

10 Palivaisi bajayata Dioso Moiséspijinëta najumecopata, bajarapalivaisi saya Dioso najumecopata

tajëvelia vajayapëtaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinëta penajumecopatsilivaisi, sacerdotevi exanabiaba Cristo pepatsivajënaeyatsica. Caevai canacujitsia dajubinë beyaxuababiaba ofrendacuena pevi perajutsinexa Diosojavabelia, pibisiacuene pexanaeconi Dioso pevecuaajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabëcuenexaniavaetsitsi. ² Pacuenia bajayata itorobatsi Dioso Moiséspijinëta penajumecopatsilivaisi, sacerdotevi exanabiaba. Dajubinë beyaxuababiaba ofrendacuena pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuaajibiaexanaeajitsipatsi pibisiacuene pexanaeconi, nexata bajarapamonae apo yanajamatabëxainae tsipae pijaneconi. Nexata baja itsa aneonijibi tsipae, pematsënëa dajubinë apo beyaxuababiabi tsipae ofrendacuena pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. ³ Bajarapacuenia dajubinë caevai canacujitsia beyaxuababiabi ata ofrendacuena pevi perajutsinexa Diosojavabelia, itsiata jivi jamatabëcuenenarëyaya apo jinavanapae. Biji rajane bajarapacuenia exanabiabi ata, pevajënaeyabelia tsiteca yanajamatabëxainapona pijaneconi. ⁴ Bajarapacuenia beyaxuababiabi ata toro, chivo ata, bajarapajana apo cajëpaetsi jivi pijaneconi pepacuene pevecuaajibiaexanaenexatsi.

⁵ Bajaxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje:

Apo jitsipaemë xamë xua jivi carajutabiaba ofrendacuena. Apo jitsipaemënu dajubinë ata pebeyaxuababiabijava pevi pecarajutsinexa ofrendacuena. Bajaxuata xanë nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tasivatëpaenexa pijaneconi yabara. ⁶ Jivi picani dajubinë beyaxuababiaba ofrendacuena pevi pecarajutabiabinexa, altarvënëjavajumata pecatota-juitsinexa. Jamatabëjumai tsabiabi bajarapamonae: "Tajaneconi Dioso nevecuaajibiaexanaena mapacuenia itsa exanaenajëje," jamatabëjai tsabiabi. Itsiata baitsi jane apo sivajamatabëcuenenarëyamë bajaraxua yabara. ⁷ Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi, jai Cristo paxa Diosojavabelia.

⁸ Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenenarëya jivi dajubinë pebeyaxuababiabijava ofrendacuena pevi perajutabiabinexa Diosojavabelia. ⁹ Icatsia Cristo jumaitsi paxa Diosojavabelia mapacueniaje: "Bajara jane manucajëje pacuenia jitsipame tacatoexanaenexa," jai Cristo. Cristo baja mapanacuapijivi pibisiacuene pexanaeconi yabara sivatëpa cruzata pacuenia paxa Dioso itorobatsi. Nexata sacerdotevi dajubinë pebeyaxuababiabijava ofrendacuena pevi perajutabi-

abinexa Diosojavabelia, Cristo baja copiarucaeyaexana. ¹⁰ Pacuenia Dioso tojitsipatsi, Jesucristo nacopata pebeyaxuabinoxatsi vajanacasivatëpaenexa cruzata. Bajarapacuenia Jesucristo nacasivatëpa vajanacavecuajibiaexanaenexa pibisiacuene vajaexanaeconi. Caeto baja Jesucristo nacasivatëpa daxita mapanacuapijivitsije.

¹¹ Caematacabi canacujitsia picani sacerdotevi nubenabiaba altarvënëjava muxuneneta, dajubinë itsa beyaxuaba, ofrendacuena pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuene apo vecuaajibiaexanaetsi pibisiacuene pexanaeconi. ¹² Jesucristo baja cajena nacopata pebeyaxuabinoxatsi, vajanacaneconimatsinexa pibisiacuene vajaexanaeconi. Caeto baja Jesucristo tëpa pibisiacuene vajaexanaeconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuaevetsinexabeje daxitacuene. ¹³ Cristo abaxë aeconoxae athëbëtatsia ecaya. Jamatabëcuenenarëyaya abaxë pijavajabitsaë paxa Dioso petojamatabëcuenenarëyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. ¹⁴ Caeto baja Cristo nacopata vajanacasivatëpaenexa. Nexata vaxaitsi, Cristo pelivaisi vajajumecovënëtavapaeivi, Cristo pejamatabëcueneta Dioso nacavecuajibiaexana pibisiacuene vajaexanaeconimi daxitamatacabijavabelianexa. ¹⁵ Cristo baja cajena caeto vajanacasivatëpaejavanexa daxitamatacabijavabelianexa, Espiritu Santo tajëvelia nacayapëtaeyaexana. Espiritu Santo tajëvelia nacayapëtaeyaexana pexaniajaicuene, xua baja aeconoxae Cristo nacatoexana. Tsipaji baja cajena Dioso pejumelivaisibaxutota tajëvelia jumaitsi mapacueniaje:

¹⁶ Najumecapanepaeya tajajivi yabara pejanalivaisi itsamatacabi jumaitsinë tsane mapacueniaje: "Caejivi canacujitsia pejamatabëthëtota yapëtaeyaexanaponaponaenajë pacuenia netojinavanapaejitsia. Nexata bajarapamonae pejamatabëthëttojavavetsina jitsipae na tanejumecovënëtsinexa," jai Dioso.

¹⁷ Bajaraxuacujinae icatsia Dioso jumaitsi mapacueniaje:

Apo najamatabënapitsinë tsane itsamatacabijavabelia ata daxita papibisiacuene bajarapamonae exana, jai Dioso tajëvelia pija-jivi yabara.

¹⁸ Nexata jane baja Cristo nacasivatëpa pibisiacuene vajaexanaeconimi Cristo pejamatabëcueneta Dioso vajanacavecuajibiaexanaenexa. Nexata baja pematatsënëa dajubinë apo beyaxuababiabi tsanetsi ofrendacuena pevi vajarajutabiabinexa Diosojavabelia, pibisiacuene vajaexanaeconi Dioso vajanacavecuajibiaexanaenexa.

Pacuenia saya vajajamatabëcuenenarëyamë imoxoyotsijitsiatsi Dioso yabara pelivaisi

¹⁹ Tajamonae, Jesucristo baja vajanacasivatëpaexae, aeconoxae baja Dioso nacatocopata ajunavijibia vaja-

jonenexa Dioso pijanacuayabetsia. Nacatocopatanua bajarajotatsia vajajonenexa Lugar Santísimovënëjavabelia, itsajota baitsi Dioso ponapona. ²⁰ Jesucristo nacatoexana pejananamuto vajaponaenexa athëbëabetsia, Dioso vajanacarajutsinexa maticabi apo peverevereaejava. Jesucristo baja itsa nacasivatëpa cruzata, nacasivatëpa vajapatsinexa Diosojavabetsia. ²¹ Bajayata sacerdotevi toevetavanapa Dioso pijacarpoboxaneto. Bajara pijinia pacuenia aeconoxae Jesucristo, pepo sacerdotenë jane baja, nacaevetaponapona vaxaitsi vajanacatocuaicuajainexa Diosojavabelia. ²² Bajaraxuata vajajamatabëthëtojavavetsina vajajamatabëcuene saya bimoxoyotatsi Dioso. Bëpënëa vajajamatabëcueneta Dioso yamaxëtojobi-aya apo bejumecovënëtsitsi. Tspaji yapëtanetsi Dioso vajanacapanepaejavanexa. Bajarapacuenia Dioso nacapanepaena tspaji baja pibisiacuene vajaexanaeneconimi Dioso nacavecuajibiaexana. Nexata baja nacaajamatabëcuene xuirajibiaexana Jesucristo vajanacasivatëpaexae. Vajanacabautisabijavata, naperabëquiatanua piaxuirajibimerata. ²³ Vajavajënaeyabelia asaëyata copiaevetavanapaenatsi Dioso vajanacapanepaejavanexa. Bajarapacuenia asaëyata copiaevetavanapaenatsi Dioso jumeaebinejevatsi. Nexata itsamonaejavabelia navajunupaebabiabianatsi Dioso vajanacapanepaejavanexa. Tspaji baja pacuenia Dioso najumecapanepaeya nacajumaitsi, xaniajai baja cajena. Dioso nacapanepaena. ²⁴ Nexata vaxaitsi namataenetsia benayavenonatsi vajanajamatabëcueneitajëtsinexa vajanasi vacuene. Namataenetsianua pexaniacuene benatoexanabiabatsi. ²⁵ Itsamonae baja vaxaitsiyajuvënëvi copabapona penajoneyabibijava vajanacaetuatabibibojavabelia. Vaxaitsi nexata bajarapamonae apo becuenejëpaetsi. Namataenetsia benajamatabëcueneasaëyaexanaponatsi. Aeconoxae baja bitsoyo biamatabëcueneasaëtsi tsavanapae. Tspaji baja imoxoyo pevajënae vajatuxanenë pepatsinexatsica.

²⁶ Vaxaitsi tsiteca vajavajënaeyabelia pibisiacuene itsa exanaponaejitsipatsi, yapëtae atatsi Cristo vajanacasivatëpaexaejava, nexata nacatoacuenebi tspiae Dioso vajanacavecuajibiaexanaenexa pibisiacuene vajaexanaeneconimi. ²⁷ Bajarapacuenia vajavajënaeyabelia tsiteca pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso ëvajanacananeconitsia exanaejavanexa. Pamat-cabi Dioso pijavajabitsaë naneconitsiaexanaena pini-jiisotojavabelia peverebiabinexa, bajarapamaticabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. ²⁸ Bajayata Dioso Moiséspijinëta najumecopata jivi pejumecovënëtsinexa. Nexata pajivi apo jumecovënëtsi Dioso Moiséspijinëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaitsi pibisiacuene pexanaejivi yabara: "Pataniji pepacuene pibisiacuene pexanaejava mapajivije," itsa jai, nexata bajarapajivi apo itaxutotsoniataetsi. Beyaxuabatsi pibisiacuene pexanaeneconimi yabara.

²⁹ Pacanaëjere mapacueneje. Pajivi apo jumecovënëtsi Dioso Moiséspijinëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconimi yabara. Pajivi copata pejumecovënëtsijava Dioso pexënato pesivatëpaejavatsi pijaneconimi yabara, bajarapajivi tane Dioso pexënato pesivatëpaejavatsi bepiamatamobicujiru. Apo canaëjëtsinua Espiritu Santo piasivajavatsi. ³⁰ Yapëtanetsi baja cajena Dioso pejumaitsiyava mapacueniaje: "Pamonae pibisiacuene exanapona itsamonaejavabelia, bajarapamonae xanë naneconitsiayaexanaenajë," pejaijava. Jumaitsinua Dioso mapacueniaje: "Xanë Diosonënë, naneconitsiaexanaenajë tajajivi," jai. ³¹ Pajivi Dioso apo jumecovënëtsi, nexata Dioso itsa naneconitsiaexanaenatsi, jibitso piayaicuene taeyaexanaenatsi piasaët-saponaponaenë Dioso!

³² Panajamatabënapire pacuenia pajamatabëcueneit-simë tsavanapae pamaticabi ajena Cristo pajumecovënëtame. Bajarapamaticabi pajamatabëcueneasaëmë tsavanapae panejumecovënëtsijava vajatuxanenë pelivaisi, itsamonae pacabejiobiaexanae ata bajarapalivaisi yabara. ³³ Paxamëyajuvënëvi baja cajena jivi ayaibitsaëto pitabarata itsamonae capocaponatsi. Ayaicuenia baja cajena bejiobiaexanatsinua bajarapamonae pitabarata. Nexata pijinia itsamonae paxamëyajuvënëvi bitso sivanajamatabëxaina bajarapacuenia papecayajuvënëbejiobia exanaexaetsi. ³⁴ Paxamë paitaxutotsoniataneme pamonae jebatsi penaneconitsivi pejebabiabibota Dioso pejumelivaisi yabara. Paxamë itsamonae pacavecuantotsi ata panijairanëmi, panecobecovëjavaximi yajava, itsiata paxamë pajamatabëcuenebarëyamë. Bajarapacuenia pajamatabëcuenebarëyamë tspaji baja payapëtaneme xua athëbëtatsia paxinaejitsiamë. Bajaraxua mapanacuapijicuene matatoxenetsia bitso pexaniacuenejava. Tspaji dexitamaticabijavabelianexa apo peverevereaejavanexa. ³⁵ Bajaraxuata pëtsa pacopabame panesivanajamatabëcuene copatsijava Diosojavabelia papecayavenonaenexa. Dioso cajena athëbëtatsia pacarajutsiana ayaicueniejava panenajamatabëcuene copatsixae bajaraponëjavabelia. ³⁶ Bajajajebi ata panevajënaeyabelia paexanaponare pacuenia Dioso pacatojitsipa. Nexata xua yabara tajëvelia Dioso najumecapanepaeya jumaitsi papecarajutsinexa, bajaraxua Dioso pacarajutsiana. ³⁷ Cristo icatsia pepatsijavanexatsica yabara, Dioso pejumelivaisibaxutota tajëvelia jumaitsi mapacueniaje: Bepijia patsianica ponë patsijitsiatsica. Apo cuenena-jematsi tsane pepatsinexatsica. ³⁸ Nexata pajivi Dioso aneconijibiatanetsi Diosojavabelia penajamatabëcuene copataponaponaexae, bajarapajivi xainaena maticabi apo peverevereaejava. Itsiata baitsi jane pajivi nevecuanaviata pecovëyabelia, apo sivanajamatabëcuenebarëyanë tsane, jai Dioso pejumelivaisibaxutota.

³⁹ Itsiata baitsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyani-va. Biji rajane vaxaitsi najamatabëcuenecopabatsi Diosojavabelia ëvajanacapanepaejavabelianexa.

Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi

11 Itsa pepacuene vaxaitsi xaniavaetsia najamatabëcuenecopatatsi Diosojavabelia, nexata najamatabëxainatsi mapacueniaje: “Abaxë daxitacuene apo copiapatsi ata, xua yabara Dioso najumecapanepaeya jumaitsi, itsiata yapëtaniji pexaniajaicue. Pacuenia Dioso najumecapanepaeya jumait-si, xaniajai baja cajena. Pepacuene Dioso exanaena,” jamatabëjaisi. ² Bajayata vajasalinaivimi jumecovënë-ta Dioso. Nexata bajarapamonaemi jamatabëjumait-si tsabiabi: “Pacuenia Dioso najumecapanepaeya jumait-si, pepacuene neyavenonaena,” jamatabëjai tsabiabi. Bajaraxuata bajarapamonaemi yabara Dioso jumait-si: “Sivajamatabëcuenecovënë,” jai.

³ Vaxaitsi ata jumecovënëtsi Dioso. Nexata yapëtanetsi pexaniajaicue mapacuenia pejumait-silivaisi-je: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita xua aeconoxae vajaitaxutota tanetsi, Dioso baja cajena ex-ana. Abaxë pamatacabi ajibi itsacuenejavayo ata ma-panacuataje, Dioso baja cajena exana daxitacuene,” pejailivaisi yapëtanetsi pexaniajaicue.

⁴ Bajayatami Abelpijinë najamatabëcuenecopata Diosojavabelia. Abelpijinë jumecovënëta pacuenia Dioso itorobatsi. Nexata Abelpijinë dajubinë beyaxua-ba. Nexata ofrendacuena pevi rajuta Diosojavabelia. Dioso nexata sivajamatabëcuenecovënëtsi. Abelpijinë pijinia pematapijinëmi, Caïnpijinë, apo jumecovënëtsi pacuenia Dioso itorobatsi. Saicaya pijinia itsavirijava ofrendacuena rajuta Diosojavabelia. Dioso nexata apo sivajamatabëcuenecovënëtsi Caïnpijinë. Nexata Abelpi-jinë bajayatami baja tēpae ata, itsiata mapamatacabi-javaberena ataje vënëlivaisitaepontsi Dioso pejumecovënëtsijava. Nexata baja vaxaitsi yapëtanetsi, vaxait-si ata Dioso itsa jumecovënëtsi, Dioso vajanacasiv-abarëyajanexa.

⁵ Bajayata Enocpijinë ata najamatabëcuenecopata Diosojavabelia. Bajaraxuata apo tēpaenejeva Dioso capontsi athëbëabetsia. Jemata pitajabatsi. Nexata itsamonaemi jait-si atatsi, itsiata apo caxitajabatsi. Dioso pejumelivaisibaxutota jumait-si pacuenia Enocpijinë Dioso pepitsivajënaeyatsi, Dioso sivaja-matabëcuenecovënëtsi. ⁶ Pajivi apo najamatabëcuenecopatsi Diosojavabelia, bajarapajivi yabara Dioso apo jamatabëcuenecovënëtsi. Pajivi najamatabëcuenecopatsijitsia Diosojavabelia, bajarapajivi copiaya bejamatabëjumait-si mapacueniaje: “Xaniajai tsaena baja. Dioso ponapona. Bajaraponë jivi pitaxu-totsoniataenë. Nexata pamonaemi asaëyata vajëta Diosojavabelia pibisiacuene pexanaeconi pevecuaa-jibiaexanaenexatsi, bajarapamonaemi pijaneconi Dioso vecuaajibiaexanatsi,” bejamatabëjai copiaya.

⁷ Bajayata Noépijinëmi ata najamatabëcuenecopata Diosojavabelia. Nexata Noépijinëmijavabelia tajëvelia Dioso jumait-si pacuenia mapairaje Dioso bubutsiaex-anaejitsia. Nexata Noépijinëmi abaxë apo tae ata ma-pairaje pebubutsijava, itsiata jumecovënëta pacuenia Dioso jumait-si. Nexata baja pinijibarcovaneto exana pebarëpanepaenexa pijamonaemi mapaira pebubutsi-javavecuaje. Bajarapacuenia Noépijinëmi pijamonaemi pebarëjumecovënëtsixae Dioso, nexata Dioso aneconi-jibia tanetsi. Bajarapamatacabi daxita mapanacuapi-jivimi apo jumecovënëtsi Dioso. Caenë Noépijinë pi-ja-monaemi barëjumecovënëta Dioso. Nexata daxita pa-monaemi apo jumecovënëtsi Dioso, nayapëtane bitso penaneconitsijava Diosojavabelia.

⁸ Bajayata Abrahampijinëmi ata najamatabëcueneco-pata Diosojavabelia. Nexata Dioso itsa itorobatsi Abra-hampijinë pevecuapitsapaenexa pijanacuami, jumecovënëta. Nexata baja Abrahampijinë pona it-sanacuayabelia. Panacua Dioso rajutsiapaebatsi, ba-jarapanacuayabelia pona. Abrahampijinë abaxë apo natsivajënaeyapëtae ata panacuayabelia patsijitsia, it-siata vecuapitsapa pijanacuami Dioso pitorobixatsi.

⁹ Panacua Abrahampijinë Dioso patsiaexanatsi, ba-jarapanacuata itsiata Abrahampijinë pepo pijabo apo exanae. Carpabota saya ponapona. Becaemata-cabibejenexa saya pepatsinëcuenia carpabota Abra-hampijinë ponapona. Itsiata bajayajebi bajarapanacu-ata carpabota ponapona. Abrahampijinë pexënato ata, Isaacpijinë, bajarapaira Dioso rajutsiapaebi atatsi, itsi-ata Isaacpijinë ata carpabota ponapona. Bajara icatsia itsi Isaacpijinë pexënato ata, Jacobpijinë, Abrahampi-jinë jane baja pemomo. Jacobpijinë bajarapaira Dioso rajutsiapaebi atatsi, itsiata Jacobpijinë ata carpabota ponapona. ¹⁰ Bajarapacuenia Abrahampijinë bajayaje-bi carpabota saya ponapona. Tsipaji abaxë vajënaeeve-taponapona pecaponaenexatsi athëbëabetsia, Dioso pexanaetomarabetsia, apo pevereverecaetomarabet-sia, daxitamatacabijavabelianexa jane baja pepon-aponapona bajarapatomaratatsia.

¹¹ Bajayata Abrahampijinë pijava pevënë Sara. Ba-jarapovami ata najamatabëcuenecopata Diosojav-abelia. Bajarapova mavecova picani. Nexata bitso pepua perujuva ata, itsiata Dioso cajëpaeaxanatsi pexënato pexainaenexa. Jumecovënëta pacuenia Dioso najumecapanepaeya jumait-si pexënato pex-ainaenexa. Bajaraxuata xaina pexënatonëyo. ¹² Bajara-pacuenia Abrahampijinë bitso pepua perujunë ata, pexënato xaina. Nexata Abrahampijinë pevënamuto pemomoxibitsaëto baja tsaponae. Athëbëtatsia, itabxota, bitso navita tulupu. Mapanacuata pijinia tajetabota bitso navita tajetaboatsapërë. Nexata acuenebi itsajivi ata penamatajëtsicapanepaenexa tulupu, tajetaboatsapërë ata. Bajara pijinia itsaponae Abrahampijinë pemomoxi. Bitso cajena Abrahampijinë pemomoxi navita.

¹³ Daxita pamonaemi bajayata Dioso jumecovënëta, tēpa baja. Bajarapamonaemi xua yabara Dioso na-jumecapanepaeya jumait-si perajutsinexatsi, pitsine-

jeva tēpa baja. Abaxē apo tocopiapatsi atatsi xua yabara Dioso najumecapanepaeya jumaitsitsi perajutsinexatsi, itsiata sivajamatabēcuenebarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacuene Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuene apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapaevinexa. Bevajanapatsivi mapanacuataje,” najai tsabiabi bajarapamonaemi. ¹⁴ Pamonaemi bajarapacuenia namataenetsia najumai tsabiabi, itsamona tsitanajamatabēcueneitajētavanapa. Bajarapamonaemi tsitanajamatabēcueneitajētavanapa peveta vanapaejava athēbēabetsia Dioso pecaponaejavanexatsi, bajarajotatsi jane baja pejinavanapaenexa daxitamatacabijavabelianexa. ¹⁵ Bajarapamonaemi apo najamatabēxainavanapae caevēalia icatsia penaviabinexa pijanacuamijavabelia. Itsa najamatabēxainaejitsipa caevēalia icatsia penaviabinexa pijanacuamijavabelia, nexata naviabijitsipa. ¹⁶ Biji rajane bajarapamonaemi najamatabēxainavanapa peponaenexa athēbēabetsia. Tspaji athēbētatsia panacua, bitso pexanianacua, mapanacua matatoxenetsia. Bajaraxuata bajarapamonaemi: “TajaDiosomē,” pejaijava Diosojavabelia, Dioso sivabarēyatsi. Vaxaitsi ata baja yapētantsi bajarapamonaemi Dioso pesivabarēyajavatsi. Tspaji baja athēbētatsia bajarapamonaemi Dioso toxaniavaetatsi pepo pijatomaranexa.

¹⁷⁻¹⁸ Copiaya Dioso tajēvelia najumecapanepaeya jumaitsi Abrahampijinējavabelia. Abrahampijinē pexēnato, Isaac, yabara Dioso jumaitsi mapacueniaje: “Nexēnato Isaac xainaena pexi. Nexata nemomoxi xainaname,” jai Dioso. Bajaraxuacujinae icatsia Abrahampijinē Dioso itorobatsi penacoxibeyaxuabinexa picani. Bajarapacuenia Abrahampijinē Dioso itorobatsi penacoxibeyaxuabinexa picani saya pejamatabēcueneējētsinexatsi. Abrahampijinē Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinē jejai. Nacoxibeyaxuabijitsia picani. ¹⁹ Bajarapacuenia picani Abrahampijinē exanaejitsia Dioso pitorobicueniatsi. Tspaji Abrahampijinē jamatabējumaitsi: “Dioso baja cajena caējēpatsi piasaēyaexanaenexatsi taxēnato icatsia piasaēnexa,” jamatabējai Abrahampijinē. Ajena baja picani Abrahampijinē nacoxicacuatsijitsia cusipata penacoxibeyaxuabinexa, nexata Abrahampijinē jamatabējumaitsi: “Taxēnato baja aeconoxae tēpaena,” jamatabējai. Nexata bajarapaepatota Abrahampijinē Dioso itavetatsi penacoxibeyaxuabianiva. Nexata baja itsiata Abrahampijinē apo nacoxibeyaxuabi. Nexata itsiata Abrahampijinē bepetēpaenē baja nacoxitane. Nexata bajaraxuacujinae icatsia Dioso bepetoasaēyaexanaenētsi nacoxitane.

²⁰ Bajayata Abrahampijinē pexēnato ata, Isaacpjinē, najamatabēcueneecopata Diosojavabelia. Bajaraxuata

Isaacpjinē itsa baja perujunē, pexēnatobejejavabelia tajēvelia najumecapanepaeya jumaitsi: “Dioso pacayavenonabiabianabeje,” jai Isaacpjinē pexēnatobejejavabelia. Isaacpjinē pexēnatobeje itsanē pevēnē Jacob. Itsanē pevēnē Esaú. Jacobpjinē itsavēnē, Israel. ²¹ Nexata Jacobpjinē ata najamatabēcueneecopata Diosojavabelia. Nexata baja pamatacabi Jacobpjinē perujunē, itsa baja nayapētane petēpaejavanexa, bajarapamatacabi Diosojavabelia tovajēta pemomobeje Dioso peyavenonabiabinexatsibeje. Ponēbeje Jacobpjinē pemomobeje tovajēta Diosojavabelia, Josēpjinē pexēnatobeje. Bajarapacuenia Jacobpjinē itsa tovajēta Diosojavabelia, pemomobeje, caenē canacujitsia, tovajēta pona. Pecobenaeboupita saya Jacobpjinē nayaētanucaeya vajētanuca Diosojavabelia. ²² Bajayata Josēpjinē ata najamatabēcueneecopata Diosojavabelia. Bajarapamatacabi Egipto nacua Josēpjinē daxita pijamonaē barēpona pona, Israelpjinē pemomoxi. Nexata baja Josēpjinē itsa nayapētane petēpaejavanexa, tajēvelia vajunupaeba daxita Israelpjinē pemomoxi Dioso pejamatabēcueneta pecapitsapaejavanexatsi Egipto nacuavecua. Josēpjinē petēpaevajēnae, najumepuēnetanua pijamonaē pesicaponaeenexatsi pamatacabi Dioso pejamatabēcueneta daxita Israelpjinē pemomoxi capitsapatsi Egipto nacuavecua.

²³ Bajayata Moiséspjinē paxapjinē, penapijiva ata, tajēvelia yapētanebeje Dioso peyavenonaejavanexatsibeje. Nexata bajaraxuacujinae pexēnatonēyo xainabeje, Moisésnexa jane baja. Nexata matayatsia caponaponabeje acueyabi pajuametobeje. Bajarapacuenia matayatsia caponaponabeje tspaji bitso tsitapexanianēyotsibeje. Egiptonacua pepo pevetsinē itoroba picani daxita Israelpjinē pemomoxi penacoxibeyaxuabaponaenexa itsa tonaexanatsi pebinēyo. Itsiata bajarapajivibeje apo jumecovēnētsibeje penacoxibeyaxuabinexabeje. Tspaji apo jumecujunavibeje. ²⁴ Bajaraxuacujinae Moiséspjinē jane baja vitsatatsi Egiptonacua pepo pevetsinē pexēnatoyo. Moiséspjinē bajarapova vitsatatsi bepexēnatonēyocuenia.

Moiséspjinē baja itsa penaveretsinē, yapētane Dioso peyavenonaejavanexatsi. Nexata Moiséspjinē apo jitsipae Egiptonacua pepo pevetsinē bepemomocuenia petanexatsi. ²⁵ Nexata Moiséspjinē najamatabēcueneveretsia jamatabējumaitsi: “Tajamonaē, Israelpjinē pemomoxi, Dioso pijajivinexa. Nexata yavenonaenajē tajamonaē. Egipto nacuapijivi nebejiobiaexanae ata tsane, pacuenia tajamonaē bejiobiaexanabiabatsi, itsiata yavenonaenajē,” jamatabējai Moiséspjinē. Nexata baja Moiséspjinē Egiptonacua pevetsinē bepemomocuenia petaejavatsi itsa vecuapitsapa, copata baja pibisiamatabēcuene, mapanacuapijjamatabēcuene. Tspaji saya bajarapajamatabēcuene caepatoyonexa jamatabēcuenebarēya. ²⁶ Moiséspjinē Dioso jumecovēnēta pacuenia tajēvelia Dioso jumaitsi pijajivi pēcapanepaenexa Egipto nacuavecua. Nexata Moiséspjinē tajēvelia jamatabējumaitsi: “Itsamatacabi Cristo itsamonaē bejiobiaexanaenatsi. Bajarapacuenia xanē ata Egipto nacuapijivi nebejiobiaexanaejitsia ata tsane, it-

siata Dioso pejisipaecuena toexanaenajë. Tshipaji xua Dioso athëbëtatsia nerajutsijitsia, bajaraxua bitso pexaniacuene daxita Egipto nacuapijivi pexainaecuene matatoxenetsia," jamatabëjai Moiséspijinajëvelia Dioso jumaiti pijajivi pecapanepaenexa Egipto nacuavecu. Nexata Moiséspijinë tajëvelia jamatabëjumaiti: "It-samatacabi Cristo itsamonae bejiobiaexanaenatsë.²⁷ Nexata baja Moiséspijinë Egipto nacuavecu pit-sapa. Tshipaji najamatabëcuenecopata Diosojavabelia peyavenonaenexatsi. Egiptonacua pepo pevetsinë Moiséspijinë baraanaepanae atatsi, apo cjunavi. Pe-vajënaeyabelia ajamatabëcuenesaë tsanajetarucacae pacuenia Dioso itorobatsi pexanaenexa. Moiséspijinë baja apo naviatsi pecovëyabelia. Tshipaji abaxë Moiséspijinë apo tae ata Dioso, itsiata yapëtane Dioso bitso piasaënëcuene Egiptonacua pepo pevetsinë matatoxenetsia.

²⁸ Moiséspijinë Dioso peyavenonaenexatsi, tajëvelia najamatabëcuenecopata Diosojavabelia. Bajaraxuata pamatacabi Moiséspijinë pijamonae barëpitsapa Egipto nacuavecu, ayaicuenia Dioso yavenonatsi pijamonae pebarëpanepaenexa. Bajaraxuata Moiséspijinë pacuenia Dioso itorobatsi, juya daxita pijamonae itoroba. Moiséspijinë pijamonaejavabelia jumaiti mapacueniaj: "Daxita paxamë, pacaebopijivimë canacujitsia, pabename ovejaxi, pejanapebitoxi. Nexata panijabobaupanë, caebaupa canacujitsia, pamuxunenetsicabianame ovejajanata. Nexata ajena, pameravi, ángelnë najetarucacae ata tsane peverebiabinexa pebinacuetoxi, matapijinacuetoxi, itsiata apo pacoxitëpaemë tsane," jai Moiséspijinë pijamonaejavabelia. Nexata Moiséspijinë pijamonae pijabobaupanë, caebaupa canacujitsia, tsicaba ovejajanata. Nexata ángelnë najetarucacae ata peverebiabinexa pebinacuetoxi, matapijinacuetoxi, itsiata Moiséspijinë pijamonae apo coxitëpae.²⁹ Bajayata pamatacabi Moiséspijinë pijamonae barëpitsapa Egipto nacuaverena, Egipto nacuapijivi picani barajinatsi pebeyejebinexatsi. Nexata bajarapamatacabi Moiséspijinë pijamonae barënamatabëcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabëcueneta nicaba Rojovënë manuamenemaxërana tuatuajëalia. Dioso pejamatabëcueneta benamutocuenia totseviaexanaxualitsi. Nexata jane baja Egipto nacuapijivi, pamonae jane baja picani barajinatsi pebeyejebinexatsi, nanicabarubenapona. Ajena baja epatota najetarubena, mera baja icatsia avajubua tsaxuabi. Bubuna baja nexata Egipto nacuapijivi.

³⁰ Bajayata Jericó tomarapijivi piatayaëibopanaxaneto exana pijatomara matatoyorotsia penayajivicanatsinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijinë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenonaenexatsi. Israelpijinë pemomoxi itsa

pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijinë pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matakabita, caematakabita, matatoyorotsia najetarubena siete xuabeje. Nexata jane baja siete matakabita bajarapayacaranatsijavaxanetomi jopaica.³¹ Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonae apo yajavatëpae. Tshipaji pexaniacuene exana. Dioso pejamatabëcueneta Jericó tomarapijivimi peverebiabivajënaetsi, Israelpijinë pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinë pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

³² Apo necuenecaëjëpae baja pematatsënëa itsamonae pelivaisi patacatoyaquinaenexa patacamuxujiobinexa, panenajamatabëcuenecopatsinexa Diosojavabelia papecayavenonaenexa. Apo necuenecaëjëpae patacatoyaquinaenexa Gedeónpijinë pelivaisi, Baracpijinë ata pelivaisi, Sansónpijinë ata pelivaisi, Jeftépijinë ata pelivaisi, Davidpijinë ata pelivaisi, Samuelpijinë ata pelivaisi. Apo necuenecaëjëpaenua patacatoyaquinaenexa itsamonae, Diosojumepaebivimi profetavi, pelivaisi.³³ Daxita bajarapamonaemi ata najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabit-saëtabuatapona itsanacuanëpijivijavabelia, bajarapanacuanëpijivimi verebabia Dioso peyavenonaexaetsi. Bajarapamonae pijanacuanëjava pijajivi itsa eveta, xaniavaetsia evetabiaba. Tshipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapëbejetsi itsacuenejavayo yabara, Dioso yavenonabiabatsi. Yavenonabiabatsi pacuenia Dioso tajëvelia najumecapanepaeya jumaititsi peyavenonaenexatsi. Bajaraxuata bajarapamonaeyajuvënëvi xuabi atatsi nevëthëbitsaëto penubenaebayabelia, bajarapacuenia picani pebeyaxuabinexatsi, itsiata Dioso yavenonatsi. Nexata Dioso peyavenonaexaetsi Dioso pejamatabëcueneta nevëthëvecua cuibocataitatsi. Nexata baja nevëthë apo itsacueniabitsi.³⁴ Itsamonae pijinia bajarapamonaeyajuvënëvi xuabi atatsi pinijiso-tualia, Dioso peyavenonaexaetsi, itsiata apo tajuetsi. Itsamonae pijinia jamatabëbeyaxuabi atatsi espadata, vecuapanepa Dioso peyavenonaexaetsi. Pamonae pijinia apo aitatsaca picani penavajabitsaëtsinexa, bajarapamonae ata bitso baja piatatsacavi naexanapona vajabitsaë penaexanabuataponaejavata Dioso peyavenonaexaetsi. Nexata bajarapamonae pijavajabitsaë cueneamoneyaba. Vecuarëcëpecatsi.³⁵ Bajayata pijinia petiriavi penajamatabëcuenecopatsixae

Diojavabelia peyavenonaenexatsi, itsa coxitépa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënët-siviyajuvënëvi bejiobiaexanatsi Dioso pejumecovënët-sixae. Bajarapacuenia pebejiobiaexanaejavatatsi, itsamonae tēpabiaba. Bajarapacuenia yajuvënēexanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënëtavapaejava. Bajarapacuenia apo copabi Dioso pejumecovënëtsijava. Tsipaji bajarapamonae jamatabējumaitsi tsavanapae: “Mapanacuataje taponaponaejava mata-toxenetsia bitso jitsipajē maticabi apo pevereverecaejava Dioso tanerajutsinexa,” jamatabējai tsavanapae bajarapamonae. ³⁶ Itsamonae pijinia Diojavabelia penajamatabēcuenecopatsixae, itsamonae capoc-aponabiabatsi. Jumaititibabeyabiabatsinua penaneconitsivi pejumaconitabiabimacata. Itsamonae pijinia cadenamaētota cēbejebabiabatsi. Penaneconitsivi pejebabiabibota jebabiabatsi. ³⁷ Itsamonae pijinia ibotonēta saya tseconabiabatsi pebeyaxuabinexatsi. Itsamonae pijinia petēpaenexa, epacaucubatsi sierrata. Itsamonae pijinia jamatabēcuenējētatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitsapatsi. Apo pexainaexae penaxatabi- java, bajarapamonae naxataba ovejaboco, chivoboco ata. Pexainaejava ata apo xinae. Nexata bitso bejiobi bajarapamonae. Barajinabiabatsi. Bejiobiaexanatsinua. ³⁸ Bajarapamonaemi petusato nacuanējjava jinaruta. Petsutonē nacuanējjava ata, jinaruta. Pitajanitonējjava perubenaevajuanē jaita meravī pemajitabiabinexa. Bajarapamonae yabara itsamonae najumaitsi: “Mapamonaeje vajatomarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi. ³⁹ Daxita bajarapamonaemi najamatabēcuenecopaba Diojavabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxē bajarapamonaemi itsa asaē tsavanapae, mapanacuataje Dioso abaxē apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tēpa, Dioso jane baja rajutatsi maticabi apo pevereverecaejava. ⁴⁰ Dioso abaxē evetavanapaeyaexanatsi xua rajut-sijitsiatsi bajarapamonae. Tsipaji Dioso apo najamatabēxainae ēbajarapamonaejavabelia perajutsinexa bajaraxua. Vaxaitsi ata mapamatacabita vajajinavapaevi, bajarapamonae yajava, Dioso jamatabēnacarajuta bajarapapexaniacuene, maticabi apo pevereverecaejava.

Pacuenia vajavajēnaeyabelia becaasaē tsavanapaetsi Dioso vajajumecovënëtsijava Jesucristo cruzata vajanacasivatēpaexae yabara pelivaisi

12 Pamonaē yabara pacatoyaquinatsi, bajayata najamatabēcuenecopaba Diojavabelia peyavenonaenexatsi. Nexata bajarapamonaemi vajavënēlivaisitaexae, bemuxunanajamatabēcuenesaētatsi vaxaitsi ata Dioso vajanacayavenonaenexa. Itsa

nayacobijitsiatsi vajacujinaejinaejava, nexata najonotatsi piarevejava bitsojinaeja vajacujinaejinaenexa, vajapatsinexa itsabelia nacatocaējēta vajanacaitorobinē. Bajara pijinia pacuenia Dioso pitabarata xaniavaetsia bejinavanapatsi asaējata vajatonacuenebinexa pacuenia Dioso nacaitoroba. Nexata copiya benavecuacopatatsi papibisiajamatabēcuenē xainatsi. Tsipaji bajarapapibisiajamatabēcuenē nacaitorobabiaba pibisiacuene vajaexanaenexa. Bajarapapibisiajamatabēcuenē baja becopabatsi vajaexanavana-paenexa xua Dioso nacaitoroba. ² Itsa najamatabēcuenecopatatsi Diojavabelia vajanacayavenonaponaenexa, nexata benajamatabēnapitabiabatsi Jesús. Tsipaji Jesús vajanacasivatēpaexae, Dioso aneconijibia nacatane. Jesús pejamatabēcuenēta Dioso nacayavenonana vajaajamatabēcuenesaē tsavanapaenexa Dioso vajajumecovënëtsijava matapania vajanacacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piaracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tsipaji natsivajēnaeyapētane pejamatabēcuenēbarējavanexa icatsia itsa asaē petēpaecujinae, daxitajivi pijaneconi pematamotsixae. Aconoxae baja nexata Jesús tronovënējjava-ta athēbētatsia eca, Dioso pemuxuneneta, pecujuanēnia, penajuaevetsinexabeje daxitacuene.

³ Pacanaējēre Jesús pajamatabēcuenesaē tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacuenē pacanaējētsianame itsamonae itsa pacabejiobiaexana Jesús panejumecovënëtsijava yabara. Nexata apo pacueranaemē tsane Dioso panetonacuenebijava. Apo pajamatabēcuenēfaefaenemēnua tsane. ⁴ Paxamē panajamatabēcuenesaētavanapame pibisiacuene paneexanaeyaniva. Bajarapacuenia panajamatabēcuenesaētavanapae atamē pibisiacuene paneexanaeyaniva, itsiata abaxē pibisiacuene pexanaevi apo pacayajuvënēbeyaxuabi. Bajaraxuata panevajēnaeyabelia bepanajamatabēcuenesaētavanapame pibisiacuene paneexanaeyaniva.

⁵ Pētsa panacofënētame Dioso papecamuxujiojibijava papecajamatabēcuenēasaēya exanaenexa itsa pacamuxujiojiba bepapeximēcuenia. Tsipaji Dioso pejumeli- vaisibaxutota paxamē yabara jumaitsi mapacueniaje:

Taxi, xanējavaberena pananeconitsixae, itsa pacananeconitsiaexanaenatsi, pētsa payaanaepaname. Pētsa pasivajamatabēcuenēfaefae-namēnua itsa pacabijatanetsi xua yabara pananeconitame. ⁶ Pacananeconitsiaexanaenatsi. Tsipaji xanē muxujiojibiaya bananeconitsiaexanaejē pajivi asivanē, baitsi daxita pamonaē taxicuenia tataevi, jai Dioso pejumelivaisibaxutota paxamē yabara.

⁷ Nexata patonacaevere Dioso muxujiojibiaya papecananeconitsiaexanaenexa. Tsipaji Dioso papeximēcuenia pacatane. Jivi ata baja cajena pexi muxujiojibiaya banacoxivitsata. ⁸ Nexata Dioso muxujiojibiaya itsa apo pacaevetsi tsipae, Diojavabelia pananeconitsi

atamē, nexata Dioso papeximēcuenia apo pacatae tsi-pae. Tsi-paji jivi ata, pexi pexinaevi, muxujiobiaya banacoxiconita. ⁹ Vaxaitsi abaxē pamatacabi pejevaxitsi mapanacuata, vaxajivi nacamuxujiobiaya banacaconita. Nexata vaxajivi yaiyatanetsi. Nexata biji vaxaitsi bitsoyo bejumecovēnētatsi vaxa Dioso, ponē eca athēbētatsia, vajanacarajutsinexa matacabi apo peverevere-caejava. ¹⁰ Itsa abaxē vaxajivi mapanacuata nacavitsata, muxujiobiaya banacaconita. Tsi-paji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujiobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujiobiaya nacananeconitsiaexana pepacuene vajacopatsinexa pibisiacuene vaxaexanaejava. Nexata bajarapacuenia Dioso nacajamatabēcueneyavenona vajaperujamatabēcuenemivecua vajanajamatabēcuenē pēnēyorotsinexa Diosojavabelia. Nexata pacuenia Dioso jamatabēcuenēitsi, bajara vaxaitsi ata vajajamatabēcuenēitsinexa. ¹¹ Paepatota vaxa Dioso nacamuxujiobiaya nacananeconitsiaexana, bajarapaepatota abaxē apo sivajamatabēcuenēbarēyatsi xua nacatocopiapata. Itsiata baitsi jane pajivi Dioso muxujiobiaya naneconitsiaexanatsi, yapētane baja xua yabara naneconitsiaexanatsi. Nexata baja copata bajaraxua. Nexata baja jamatabēcuenēbarēyaya xaniavaetsia ponapona.

Pacuenia tsiayaitsi tsane pajivi namuxujemata Dioso pejumelivaisi yabara pelivaisi

¹² Pacopabare baja panejamatabēcuenecueranaejavami. Panevajēnaeyabelia panajamatabēcuenesaē-taponare. Tsi-paji baja panajamatabēcuenecopatame Diosojavabelia papecajavavenonaenexa. ¹³ Pētsa pajumecovēnētame itsalivaisi Dioso pejumelivaisivecua. Ēpexaniajailivaisi, Dioso pejumelivaisi, panevajēnaeyabelia pajumecovēnētavanapare. Nexata itsamonae Dioso pejumecovēnētsivi, pamonaē abaxē apo jamatabēcuenesaē Dioso pejumecovēnētsijava, pacaitaxutua jamatabēcuenesaē tsaponae tsane.

¹⁴ Daxitajivijavabelia pexaniajamatabēcuenē patoxainare. Nexata aneonijibia pajinavanapaenē Dioso pitabarata. Pajivi aneonijibia apo ponaponaē tsane Dioso pitabarata, bajarapajivi Dioso apo yajavaponaponaē tsane. ¹⁵ Xania baja panayajivitaema. Pētsa pacopabame Dioso panejumecovēnētsijava, Dioso papecacopatsiyaniva papecaitaxutotsoniatāejava panepuajumecovēnētsivi Dioso. Pacuenia piatsaxaēnēboto daxitamera bijianaējitsipa, bajara pajamatabēcuenēitsimē tsi-pae caenē ata, paxamēyajuvēnēnē, pibisiacuene itsa exanaējitsipa. Pacajamatabēcuenē bijianaējitsipa padaxitamē. ¹⁶ Panayajivitaemanua itsanē ata, paxamēyajuvēnēnē, pejaitsiyani-va itsava pepo pijavavecua. Petiriva ata pejaitsiyani-va itsanē pepo pamonavecua. Panayajivitaemanua panejumēabiyaniva Dioso najumecapanepaeya papecajumaitisijava. Pētsa Dioso pajumēaeabame pacuenia bajayata Esaúpijinē jumēaeaba Dioso najumeca-

panepaeya pejumaitisijavatsi. Esaú picani matapijinēxae, Dioso yavenonabiabijitsiatsi. Nexata itsajota Esaú bitso piyani, pejuyapijinējavabelia pexaejava caenabani namitsavajēta. Nexata pejuyapijinē jumaitisitsi: “Pacuenia nexaejava nevajētame, carajutsianatsi. Nexata xua Dioso cayavenonabiabiapaeba, bajaraxua juyaxanē netocopatsianame,” jaitsi. Nexata Esaú jejai. Pejuyapijinējavabelia baja tocopata xua picani Dioso yavenonabiabijitsiatsi. ¹⁷ Payapētaneme rabaja pacuenia Esaúpijinē exana pejuyapijinē petocopatsicujinae xua picani Dioso yavenonabiabiapaebatsi. Esaúpijinē picani paxa itoroba Diosojavabelia petovajētsinexatsi Dioso peyavenonabiabinexatsi paxa pevēnamuto. Itsiata baitsi jane paxa apo jumejejaitsi. Nexata Esaúpijinē bitso nua pejuyapijinē petocopatsixae xua picani Dioso yavenonabiabijitsiatsi. Itsiata baja acuenebi pexanaejava. Bajaraxuata paxamē ata pētsa pacopabame Dioso panejumecovēnētsijava Dioso najumecapanepaeya papecajumaitisijava.

¹⁸ Paxamē panejumecovēnētsixae Dioso, pacatocopata roviaia panevajētsinexa Diosojavabelia. Nexata apo panamatavenonaemē paneponaenexa itsanacua-javabelia panevajētsinexa Diosojavabelia. Bajayata Israelpi-jinē pemomoxi pata ibotsutoxanetotabuyabere-na. Nexata bajarapatsutotabuta navajēca Diosojavabelia. Nexata bajarapatsutojumatsia Israelpi-jinē pemomoxi tane beisotocotia itsajota aitaquiri. Bajara-paepatota bitso emaxaneto, ayaijovibo yajava. ¹⁹ Bajarapaepatota Israelpi-jinē pemomoxi jumetane penajumetsijava trompeta. Jumetanenua Dioso pecuaicuajaijavatsica athēbēvetsica bajarapamonaejavabelia. Nexata judiovi pecajunavi bitso, vajēta Diosojavabelia Dioso pecuaicuajaiyaniva pematatsēnēa. ²⁰ Bajara-pacuenia Israelpi-jinē pemomoxi vajēta Diosojavabelia tsi-paji bitso jumecujunava Dioso pejumaitisijavatsicatsi mapacueniaje: “Pajivi ponaena mapatsutoyenepanajavaje, bajarapajivi tseconaenatsi ibotonēta. Itsa jume, becuerebonēta cacuatsianatsi pebeyaxuabinexatsi bajarapacuenia. Dajubinē ata itsa ponaena mapatsutoyenepanajavaje, bajarapacuenia exanaenatsi,” pejaijavatsica Dioso athēbēvetsica, Israelpi-jinē pemomoxi bitso jumecujunava. ²¹ Nexata Israelpi-jinē pemomoxi bajarapajume itsa jumetane, pecajunavi, bitso neconecojai. Moiséspijinē ata jumaitisitsi: “Xanē ata raba-ja tacajunavi, bitso neconecojanē,” jai.

²² Itsiata baitsi jane paxamē baja aeconoxae Dioso panejumecovēnētsixae, Dioso baja pacatocopata panepatsinexa Dioso pijatomarabetsia roviaia panevajētsinexa Diosojavabelia. Bajarapatomaratsia eca Dioso, piasaētsaponaponaenē. Bajarapatomara pevēnē Jerusalén. Eca Siónvēnē tsutojumata. Bajarapatomaratsia Dioso pijajivi ángelevi, miles paángle-viceje, yajavaponapona. ²³ Bajarapatomaratsia payajavanacaetuatsianame itsamonae, pamonaē panevajēnaeya jumecovēnēta Dioso. Bajarapamonaē vēnēyaquinarubatsi bajarapatomaratsia. Panacaetuatsianame Dioso pitabarata, ponē naneconitsiaexanaena daxita pamonaē naneconita bajaraponējav-

abelia. Payajavanacaetuatsianamenua daxita pamonaeami tēpa Dioso pepua pejumecovēnētsivi. ²⁴ Panajamatabēcuenecopatame baja Jesucristojavabelia, ponē pejamatabēcueneta Dioso nacavecuajibiaexana vajaneconimi. Nexata Dioso aneconijibia nacatane. Bajayata Abelpijinē ita beyaxuabatsi, ponē beyaxuabatsi, juya picani xanepana peyamatomobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabēxinae Jesús peyamatomobeyaxuabinexatsi. Tshipaji Jesús petēpaejava pejamatabēcueneta, Dioso aneconijibia taejitsia daxita pamonae jumecovēnēta Dioso.

²⁵ Bajaraxuata Dioso pejumelivaisi vajanacatsipaebijava, bejumecovēnētatsi. Bajayata pamonae apo jumecovēnētsi Dioso Moiséspijinēta penajumecopatsilivaisi, naxuaba Diosovecua. Dioso apo capanepaetsi bajarapamonae. Vaxaitsi ata bitsoyo Dioso nacananeconitsiaexanaejitsipa ita apo jumecovēnētsi ponē nacajunata athēbēvetsica. ²⁶ Paepatota pina Dioso athēbēvetsica Sinaivēnē tsutojumavetsica cuaicuajiai, baja pina paepatota ira najēaba. Nexata icatsia xuacujinae bexēa Dioso tajēvelia najumecapanepaeya jumaitsi mapacueniaje: "Itsamatacabi icatsia ira najēabiaexanaenajē. Nexata jane baja caecuenia ira, itaboxo yajava, najēabiana," jai Dioso tajēvelia najumecapanepaeya. ²⁷ Xua yabara tajēvelia Dioso najumecapanepaeya jumaitsi, maitsi tsaneje. Mapairaje, itaboxo yajava, ita najēabiana, daxitacuene xua Dioso exana mapanacuataje, vereverecaena. Itsiata Dioso pejumelivaisi, pijatomara ata, apo vereverecae tsane. ²⁸ Xua itsamatacabi Dioso nacatocopatsiana athēbētatsia vajatoevetsinexa, bajaraxua apo vereverecae tsane. Bajaraxuata vaxaitsi pexaniajamatabēcuene rajutatsi Diosojavabelia. Yaiyataeya vajajamatabēthētovetsina Diosojavabelia jumai tsabiabi tsanetsi: "Diosomē, bitso ayaijamatabēcuenenēmē," jai tsabiabi tsanetsi Dioso vajanacasivajamatabēcuene barēyanexa. ²⁹ VajaDioso jivi penaneconitsiaexanaenē. Pacuenia isoto vayafo ita tajunenajetaruca, verebiaba daxita piabejjava petajuejavata, bajara pijinia pacuenia Dioso verebiabiana pamonae pibisiacuene pexanaevi.

Pacuenia bexanavanapatsi Dioso vajanacasivajamatabēcuene barēyanexa yabara pelivaisi

13 Pētsa pacopabame namataenetsia panenasivajava Dioso panejumecovēnētavanapaevi.

Panevajēnaeyabelia namataenetsia panaasivamēre. ² Pētsa panacofēnētame xaniavaetsia panecopiapitabiabinexa apo paneyapētaevi ata ita pata panijaboyaberena. Bajayata pina bajarapacuenia xaniavaetsia jivi pecopiapitabiabivi, xaniavaetsia copiapita ángelevi, apo yapētae ata ángelevicuene.

³ Panajamatabēnapitabiabare pamonae jebatsi penaneconitsivi pejebabiabibota Dioso pejumecovēnētsixae. Paxamē ata, bajarapamonae yajava, bepanenajuananeconitsivi panataema. Pamonae ata bejio-biaexanatsi Dioso pejumelivaisi yabara, bajarapamonae ata pajamatabēcueneyavenonare. Paxamē ata, ba-

jarapamonae yajava, bepapecabejiobiaexanaevi panataema.

⁴ Daxitajivi beyaiyatane penacojobijivi. Pajivibeje baja napitabeje, apo benavecyanamatayajitsibeje. Pebi apo bejaitsi itsava pijavavecua. Petiriva pijinia apo bejaitsi itsanē pamonavecua. Tshipaji Dioso naneconitsiaexanaena bajarapitsipibisiacuene pexanaevi.

⁵ Pētsa bitso pajitsipame palata. Pasivajamatabēcuenebarēyamēre saya xuayovajēto paxainame. Tshipaji Dioso jumaitsi mapacueniaje: "Apo copatsinē tsane patacayjavaponaponaevajava," jai Dioso. ⁶ Bajaraxuata ajumejunavijibia namataenetsia najumaitaitsi mapacueniaje:

Dioso cajena vajanacayavenonaenē. Nexata apo junavitsi tsane, itsajivi nacaitsacueniabijitsia ata, najaitsi vaxaitsi namataenetsia.

⁷ Panajamatabēnapitabiabare pamonae bajayata pacatsipaeba Dioso pejumelivaisi. Pacanaejēre pacuenia bajarapamonae Dioso pejumecovēnētsijavaveliacujinae, xaniavaetsia jinavanapa Dioso pitabarata matapania petēpaejavabelianexa. Bajarapacuenia paxamē ata Dioso pitabarata xaniavaetsia pajinavanapare matapania panetēpaejavabelianexa.

⁸ Jesucristo epatua itsajamatabēcuene apo xinae tsane. Pamatacabibeje ponapona, caejamatabēcuene xinaaponaponaena. Pevajēnaeyabelia ata daxitamatacabijavabelianexa, caejamatabēcuene xinaaponaponaena. ⁹ Pētsa pacopabame panejumecovēnētsijava palivaisi baja pajumecovēnētame. Pētsa pajumecovēnētame itsalivaisi bajarapalivaisivecua. Paxamē baja Dioso panejumecovēnētsijava, pajamatabēcuene-saēmē tsavanapae Dioso asivaya papecayavenonaexae. Diosojavabelia apo pajamatabēcuene-saēmē tsavanapae tsipae, panexaejava paatsobi atamē. Itsamonae jumecovēnēta pexaejava piatsobinexa pitavetsilivaisi. Nexata pexaejava atsobabiaba. Itsiata baitsi jane pexaejava piatsobijava pejamatabēcueneta apo jamatabēcueneasaēyaexanaetsi Dioso pejumecovēnētsijava.

¹⁰ Jesús ita cobematabiabarutatsi cruzajavabelia, vaxaitsi nacasivatēpa. Nexata pamonae tsiteca eperujulivaisimi sivajamatabējumaitis: "Itsa jumecovēnētaponaponaenajē Dioso Moiséspijinēta penajumecopatsilivaisi, nexata xanē ata Dioso necapanepaena," sivajamatabējai, bajarapamonae saya jamatabēcuene-navēxaniaba. Bajarapitsijamatabēcuene penajamatabēxinaevi, apo capanepaetsi tsane Diosojavabetsia. Tshipaji Jesús pesivatēpaejavatsi, apo jumecovēnētsi. ¹¹ Sacerdotevi pepo penamatacaitorobinē dajubinē beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaenēta sacerdotenē dajubinē pijana rajutabiaba ofrendacuenia Diosojavabelia, Dioso pevecuajibiaexanaenexatsi pibisiacuene pexanabiabineconi. Nexata bajarapadajubinē pevi sacerdotenē ita tajuita, tomarapēnyabelia tajuitabiaba. ¹² Bajaraxuata Jesús ata Jerusalén tomarapēnyabelia bejiobiaexanatsi. Ba-

jaraxuacujinae beyaxuabatsi. Nexata daxita pamonaē jumecovēnēta Jesús pesivatēpaējavatsi, bajarapamonaē Jesús pijana pejamatabēcueneta Dioso vecuaajibi-aexanatsi pibisiacuene pexanaeēconimi. ¹³ Nexata vaxaitsi ata becopatatsi baja perujulivaisi vajajumecovēnētsijavami. Nexata bejumecovēnētatsi Jesús pelivaisi. Nexata pacuenia Jesús nacopata itsamonaē pebejioaexanaenexatsi vajanacasivatēpaenexa vajaneconi yabara, bajara pijinia pacuenia vaxaitsi ata benacopatatsi itsamonaē vajanacabejioaexanaenexa Jesús pelivaisi yabara. ¹⁴ Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxē vajēnaēvetavanapatsi athēbēpijtomara, patomarata patsijitsiatsi athēbētatsia. ¹⁵ Jesucristo vajanacasivatēpaexae, Dioso nacatocopata vajavajētabianexa Diosojavabelia. Nexata itsa vajētabianatsi Diosojavabelia, jumaitsi tsabiabi tsane: “Diosomē, bitso ayaijamatabēcuenenēmē,” jaitsi tsabiabi tsane Diosojavabelia. Bajarapacuenia vajajumaitabiabijava Diosojavabelia, Dioso taena ofrendacuenia bevarajutaponaejava Diosojavabelia. Bajaraxuata itsa vajētabianatsi Diosojavabelia, bajarapacuenia jumai tsabiabi tsane. ¹⁶ Pētsa panacofēnētame pexaniacuene panetoexanavanapaejava itsamonaējavabelia. Itsajivi penamatavenonaējava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaējava, Dioso pacasivajamatabēcuenēbarēya tsane.

¹⁷ Pamonaē ancianovi, xua pacaitoroba, pajumecovēnētabiabare. Itsamonaē ata, pamonaē pijinia Dioso tocopatatsi papecaevetsinexa Dioso panejumecovēnētsivixae, xua pacaitoroba, pajumecovēnētabiabare. Bajarapamonaē yapētanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovēnētabianame papecaevetsivi papecaitorobicuenia, nexata papecaevetsivi jamatabēcueneyavenonaēya pajinavanapaename. Nexata pacasivajamatabēcuenēbarēya tsane papecaevetanapaejava yabara. Paxamē itsa apo pajumecovēnēt-simē tsipae, nexata papecaevetsivi pacasivajamatabēcuenēbējai tsipae. Nexata papecaevetsivi toacuenebi tsipaetsi papecajamatabēcueneyavenonaenexa Dioso panejumecovēnētsijava yabara.

¹⁸ Panetovajētaponae name Diosojavabelia. Paxanē pajamatabējumaitsinē: “Vaxaitsi baja apo naneconitsitsi Diosojavabelia, jivijavabelia ata,” pajamatabējanē. Bajarapacuenia patavajēnaeyabelia Dioso pitabarata aneconijibia patajinavanapaenexa, panetovajēt-sianame Diosojavabelia. ¹⁹ Panetovajētaponae name Diosojavabelia Dioso patanetocopatsinexa pataponaeenexa paxamējavabelia. Tsipaji icatsia pajitsipajē bepījia patapatsinexa paxamējavabelia.

Pacuenia Pablo Dioso pejumecovēnētsivi tovajēta Diosojavabelia, pacuenia ata jamatabēnajina itsamonaē Dioso pejumecovēnētsivi, yabara pelivaisi

²⁰⁻²¹ Jesucristo vajanacasivatēpaecujinae, vaxa Dioso icatsia asaēyaexanatsi. Bajaraxuata yapētanetsi pexaniajaicuene Dioso athēbēabetsia vajanacacapanepaejavanaxa daxitamatacabijavabelianexa. Dioso yavenona daxitajivi jamatabēcuenexanepanaēya pejinavanapaenexa. Nexata pacatovajētatsi Diosojavabelia papecarajutsinexa xua panamatavenoname, panetoexanavanapaenexa pacuenia Dioso pacatojitsipa. Vajētajēnua Diosojavabelia Jesucristo pejamatabēcueneta vajanacajamatabēcuenexanebinexa pacuenia jitsipa. Pacuenia oveja pexainanē xaniavaetsia evetaponapona pijaoveja, bajara pijinia pacuenia vajatuxanenē Jesucristo xaniavaetsia nacaevetaponapona. ¡Jesucristo bitso ayaijamatabēcuenenē tsaponaponaē daxitamatacabijavabelianexa! Bajara itsi tsane.

²² Tajamonaē, pacaitorobatsi xaniavaetsia panamuxunaevetsinexa palivaisi pacatoyaquinatsi mapabaxutotaje. Tsiquirilivaisiyo saya pacatoyaquinatsi patacamuxujiobinexa panevajēnaeyabelia panejamatabēcuenesaēnēxaxa Dioso panejumecovēnētsijava. ²³ Pexanialivaisiyo pacatoyaquinatsi patacatsipaebinexa mapacueneje. Vajabananē Timoteo rabaja pitsapa penaneconitsivi pejebabiabibovecua. Itsa pat-siarena bepījīayo xanējavaberena, nexata barēponae-najē paxamējavabelia.

²⁴ Nebajacobiana daxita Dioso pejumelivaisita papecaevetsivi, daxita vajamonae Dioso pejumecovēnētsivi yajava. Vajamonae ata, Italia nacuapijivi, pacajamatabēnajinalia.

²⁵ Daxita paxamē pacatovajētatsi Diosojavabelia papecaevetsivi yavenonaenexa Dioso. Bajara itsi tsane.

SANTIAGO

**Pacuenia Santiago toyaquina mapabaxutoje Dioso pe-
jumečovënëtsivi nacayajatsia pejinavanapaevi yabara
pelivaisi**

1 Xanë Santiagonë, Dioso pijajivitonënë, vajatuxa-
nenë Jesucristo ata pijajivitonënë. Pacatoy-
aquinatsi pajudíovimë patacabajacobinexa. Israelpi-
jinëmi pexi doce ponëmibeje papemomoxiyaju-
vënëvimë. Pepo panijanacuata picani panejinavana-
paevimi. Aeconoxae baja pepo panijanacuamivecua,
nacayajatsia pajinavanapame daxita nacuanëjava.

**Pacuenia Dioso pejumečovënëtsivi itsa jamatabëypä-
tane pacuene xanepana pexanaenexa, bevajëta Dioso-
javabelia yabara pelivaisi**

² Tajamonae, pasivajamatabëcuenebarëyamë tsane
daxitacuene, apo panejitsipaecuene ata, itsa pacato-
copiapatsiana. Tsipaji raja bajarapacuene pacatocopia-
patsiana papecajamatabëcueneëjëtsinexa Dioso pane-
jumečovënëtsijava yabara. ³ Bajarapacuenia Dioso
panejumečovënëtsivi pacajamatabëcueneëjëtaponae-
na panejamatabëcuenesaë tsaponaeenexa panevajë-
naeyabelia Dioso panejumečovënëtsijava. Payapë-
taneme rabaja bajarapacuene yabara. ⁴ Apo panejitsi-
paecuene pacatocopiapatsi ata, pajamatabëcuene-
saëmë tsavanapae tsane bajayajebi. Nexata paja-
matabëcuenevitsabaponaename Diosojavabelia. Nex-
ata apo pacatosai cae tsane itsalivaisi ata paneja-
matabëëthëtota.

⁵ Paxamë itsa pajamatabëypätaneme pacuene
xanepana paneexanaenexa, nexata bepavajëtame
Diosojavabelia papecaypätaeyaexanaenexa Dioso.
Nexata Dioso pacayapëtaeyaexanaena pacuene
xanepana paneexanaenexa. Dioso cajena bayapë-
taeyaexana daxita pamonaevajëta bajaraponëjav-
abelia. Apo jumeitavetsi cajena itsa vajëtatsi. ⁶ Itsa
pavajëtame Diosojavabelia, pajamatabëjumaitsimëre:
"Dioso cajena nacayapëtaeyaexanaena xua vajëtatsi,"
pajamatabëjamëre. Pëtsa pajamatabëjumaitsimë:
"Dioso cajena itsiata apo nacayapëtaeyaexanae tsane
xua vajëtatsi," pajamatabëjamë pëtsa. Pajivi jumeaeba
Dioso peyapëtaeyaexanaejavanexatsi, bajarapajivi xa-
niavaetsia apo najamatabëxainae. Bajarapajivi peja-
matabëcuene bemalataca picani. Pacuenia malataca
xaniavaetsia apo rucae jovibota, bajara saya ja-
matabëcueneitsi bajarapajivi. Apo najamatabëxainae
caelivaisi, palivaisi Dioso yapëtaeyaexanaejitsiatsi.
⁷⁻⁸ Bajarapajivi anijajamatabëcuenebeje xaina. Naja-

matabëcuene epatajërërëcabiaba itsa exana daxi-
tacuene. Nexata pajivi jumeaeba Dioso peyapë-
taeyaexanaejavanexatsi, pëtsa patocopatame peja-
matabëjumaitsinexa: "Dioso cajena nerajutsiana tava-
jëtsijava," pejamatabëjainexa. Dioso cajena apo rajut-
sitsi tsane xua vajëta bajarapajivi.

⁹ Dioso pejumečovënëtsinë apo xainae ata pecobe-
covëjavayo, jivi apo yayatae atatsinua, itsiata beja-
matabëcuenebarëya Dioso pejumečovënëtsinëxae.
Tsipaji Dioso pejunatsixaetsi Dioso pijajivitonënëxa,
apo bejiobi tsane daxitamatacabijavabelianexa.
¹⁰ Dioso pejumečovënëtsinë itsa bitso pexainaeenë pex-
ainaejava, itsamonae itsa yacajërëtatsi pexainaeuene,
itsiata bejamatabëcuenebarëya Dioso pejumečov-
ënëtsinëxae. Tsipaji pacuenia ponatoxi bepíjia
matonoverevereca, bajara pijinia itsi tsane bitso pex-
ainaeuene ata. Bepíjia vereverecaena. ¹¹ Itsa baja
juameto tajë rucaina, icotia bitso ataju. Nexata pona-
toxi tsaquena. Pematono ata othopa. Nexata pexa-
niamatonojavami ata verevereca bepíjia. Bajara pijinia
itsi tsane bitso pexainaejava pexainaevi ata. Ya-
javavereverecaena pexainaejava pecanajetanucaepa-
tota ata.

**Pacuenia Dioso jivi apo jamatabëcueneëjëtsi pibisi-
acuene pexanaeyaexanaenexa yabara pelivaisi**

¹² Pamonaevajëta jamatabëcueneëjëtsi atatsi, naja-
matabëcueneecatata pibisiacuene pexanaeyaniva, ba-
jarapamonaevajëta jamatabëcuenebarëya. Tsipaji itsa vecua-
panepa pejamatabëcueneëjëtsijavatsi, pibisiacuene
exanaenejeva, nexata bajarapamonaevajëta Dioso rajut-
sianatsi pexaniacuenejava. Rajutsianatsi matacabi apo
pevereverecaevajëta. Bajarapacuene yabara Dioso na-
jumecapanepaeya jumaitsi perajutsinexatsi pamonaevajë-
jitsipa Dioso. ¹³ Itsa pacajamatabëcueneëjëta pibisi-
acuene paneexanaenexa, pëtsa jamatabëcuenenavëx-
aniabiaya pajumaitsimë: "Dioso raja neja-
matabëcueneëjëta pibisiacuene taexanaenexa," pa-
jamë pëtsa. Dioso cajena apo jamatabëcueneëjëtsi it-
sajivi ata pibisiacuene pexanaeyaexanaenexa. Itsajivi
ata pijinia apo caëjëpaetsi pejamatabëcueneëjëtsinexa
Diosojavabelia pibisiacuene pexanaenexa Dioso. ¹⁴ Pa-
jivi jamatabëcueneëjëtatsi pibisiacuene pexanaenexa,
bajarapajivi copiaya pejamatabëëthëtota jamatabë-
naponapona papibisiacuene jamatabëexana. Nexata
jane baja itsa jamatabëcueneëjëtatsi pibisiacuene pex-
anaenexa, bajarapapibisiacuene exana. ¹⁵ Pajivi pibisi-
acuene exana, bajarapajivi exana pacuenia copiaya pe-

jamatabëethëtota najamatabëxaina. Nexata tsiteca pibisiacuene ita exanapona, pepacuene Diosovecua naxuabiana bajarapapibisiacuene pexanaponaexae.

¹⁶ Tajamonae bitso patacaasivavi, jamatabëcuene navëxaniabiaya pëtsa pajamatabëjumaitsimë: “Dioso nejamatabëcueneëjëta pibisiacuene taexanaenexa,” pajamatabëjamë pëtsa. ¹⁷ Tsipaji daxita pacuene pepo pexaniacuene, Dioso baja cajena vajanacatoitobicienetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatabëjavabelianexa caejamatabëcuene penajamatabëxainaenë. Caejamatabëcuene Dioso nacasi-vanajamatabëxaina vaxaitsijavaberena. ¹⁸ Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaeyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso ita jumecovënëtsati, Dioso pexitsi nacaexana. Pamonaë ata cotocaevi Dioso jumecovënëta, bajarapamonae ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Cotocaevi pijinia Dioso pejumecovënëtsivi, Dioso tanetsi bejuyapijivi.

Pacuenia bexanavanapa pamonaë xaniavaetsia jumecovënëta Dioso yabara pelivaisi

¹⁹ Tajamonae bitso patacaasivavi, pacanaëjëtsianame mapalivaisije, palivaisi pacatsipaebijitsiatsi. Daxita paxamë xaniavaetsia bepanamuxunaevetame Dioso pejumelivaisi. Apo bepacuacuajiamë abaxë copiaya xaniavaetsia panajamatabëxainaenejevamë. Apo bepaanaepanaemënuu bepijia. ²⁰ Tsipaji ita anaepanatsi, Dioso apo toexanaetsi pexaniacuene, pacuene Dioso jitsipa. ²¹ Bajaraxuata pacopabare daxita pibisiacuene panenajamatabëxainaejava. Pacopabarena daxita pibisiacuene paneexanaejava itamonaejavabelia. Dioso raja pejumelivaisi pacatsijamatabëuba. Bajaraxuata beveliajamatabëcuenevi nataeya pajumecovënëre Dioso pejumelivaisi. Bajarapalivaisi ita pajumecovënëtame, nexata pacapanepaena Diosojavabelia.

²² Pacuenia Dioso pejumelivaisita jumaiti, jumecovënëtsiaya paexanaponare. Pëtsa pajamatabëjumaitsimë: “Pacuenia Dioso pejumelivaisita jumaiti, apo exanaë atanë, apo itsacuene,” pajamatabëjamë pëtsa. Tsipaji saya pajamatabëcuenenavëxaniabijitsipame. Nexata ita apo paexanaemë tsipae pacuenia Dioso pejumelivaisita jumaiti, pananeconitsipame Diosojavabelia. ²³ Pajivi jumetaë ata Dioso pejumelivaisi, itsiata ita apo exanaë pitorobicueniatsi, bajarapajivi jamatabëcueneitsi pacuenia itsi ponë naitabaratane tsaxuta. ²⁴ Ponë tsaxuta naitabaratane, pe-naitabarataecujinaë pona baja. Nexata bajaraponë bepijia nacofënëta pacuenia itabarajumapeitsi.

²⁵ Dioso cajena pejumelivaisi bitso xanepana. Caëjëpatsinua vajanacacapanepaenexa bajaraponëjavabelia. Pajivi daxita bajarapalivaisi pitorobicueniatsi

exanapona copatsinejeva, bajarapajivi bitso Dioso yavenonaenatsi daxitacuenejavabelia.

²⁶ Pajivi jumaiti ata: “Xanë bitso toexanaponaenatsi Dioso pejitsipaecuenia,” jai ata, itsiata itaxutojema ita cuaicuaijai tsabiabi, bajarapajivi saya jamatabëcuenenavëxaniaba. Tsipaji Dioso apo pejitsipaecuenia cuaicuaijai. Nexata bajarapajivi xua Dioso toexanapona apo tonamatamotsi tsanetsi Diosojavabelia.

²⁷ Dioso pejumecovënëtsijivi, pajivi Dioso aneconijibitanetsi, exanapona mapacueniaje. Yavenona tsonijivixi. Yavenonana pamonae pevecuatëpaevitsi bitso ita namatavenona itsacuenejavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

Pacuenia Dioso pejumecovënëtsivi muxujjobatsi daxitajivi najëpaeya jamatabëcuenexanepanaeya petaenexa yabara pelivaisi

2 Tajamonae, ayajamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. ² Nexata panenacaetuatsijavata, riconë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejibinë, perujuesetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? ³ Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejibinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia ita paexanaejitsipame, pexaniacuene apo paexanaemë tsipae Dioso pitabarata. ⁴ Bajarapacuenia ita paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia ita paexanaejitsipame, pibisiacuena panajamatabëxainaejitsipame.

⁵ Tajamonae bitso patacaasivavi, panejumetaema. Dioso raja itapetatsi pamonaë apo pexainaevi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae ita najamatabëcuenecopatsiana Cristojavabelia, bitso pexainaevi tsane athëbëtatsia, Dioso pijanacuatatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene, pacuenia Dioso najumecapanepaeya jumaiti Dioso pijajivi yabara. ⁶ Itsiata baitsi jane bajarapacuenia bepejibivi yabara pejumaitijava payapëtaë atamë, paxamë bijiaya pataeyabiabame bepejibivi. Ricovi baja cajena xanapona bitso pexainaejava panejumata. Bajarapamonae pacaneconitababanua juezmonaejavabelia juezmonae papecananeconitsiaexanaenexa. ⁷ Ricovi cuaicuaijai tsabiabi pibisiacuena Cristo yabara, ponë vaxaitsi yayiataeya jumecovënëtanapatsi.

⁸ Dioso pejumelivaisibaxutota jumaitsi mapacueniaje: "Asivamëre itsamonae ata pacuenia xamë nijacuata nasivamë," jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuenie itsa pajumecovënëtsianame, pexaniacuene paexanaename. ⁹ Itsa payaiyataejitsipame itsamonae, itsamonae pijinia bijiyaya itsa pataejitsipame, nexata paexanaejitsipame pibisiacuene. Pananeconitsipame Diosojavabelia. Tsipaji najëpaeya apo pataemë tsipae daxitajivi Dioso papecaitorobicuenia. ¹⁰ Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivicuenia, Dioso taenatsi. ¹¹ Dioso jumaitsi: "Pëtsa jaitame itsava nijavavecu," jai. Petiriavinexa pijinia jumaitsi: "Pëtsa jaitame itsanë amonavecu," jai. Dioso icatsia itsajumeyo jumaitsi: "Pëtsa beyaxuabame jivitonë," jai. Nexata ponë apo jaitsi ata itsava pijavavecu, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia. ¹² Jesucristo papecaitorobicuenia itsa paexanaename, nexata apo pananeconitsimë tsane Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuaicuajiamë, pacuaicuajiamëre pexanialivaisi. Paexanavanaparenua pexaniacuene pacuenia Jesucristo pacaitoroba. ¹³ Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeneconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapa yabara pelivaisi

¹⁴ Tajamonae, pajivi jumaitsi ata: "Xanë jumecovënëtajë Jesús pelivaisi," jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. ¹⁵⁻¹⁶ Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tsipae: "Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata," jai ata tsipae, nexata itsiata bajarapajivi apo jumenamatamotsi tsipae. Tsipaji apo itaxutotsoniatae. Saya itoroba peponaenexa. ¹⁷ Bajara pijinia itsi Jesús pelivaisi vajajumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: "Xanë jumecovënëtajë Jesús pelivaisi," jai ata, itsiata apo ju-

menamatamotsi. Tsipaji pacuenia Dioso itorobatsi, apo exanae.

¹⁸ Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: "Xamë jumaitsimë tsabiabi: 'Xanë jumecovënëtajë Jesús pelivaisi,' jamë tsabiabi. Itsiata pexaniacuene apo toexanabiabimë itsamonaejavabelia pacuenia Dioso nacaitoroba. Nexata apo cajamatabëcueneyapëtaetsi nexaniajaicuene nejumecovënëtsijava Jesús pelivaisi. Tsipaji pexaniacuene apo toexanabiabimë itsamonaejavabelia pacuenia Dioso nacaitoroba. Xanë rajane pexaniacuene toexanabiabajë itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabëcuenieitajëtsi taxaniajaicuene tajumecovënëtsijava Jesús pelivaisi," jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovënëtsi ata. ¹⁹ "Caenë rabaja tsaponaponae Dioso," pejailivaisi paxamë pajumecovënëtsi. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, pijajivi yajava, jumecovënëta: "Caenë rabaja tsaponaponae Dioso," pejailivaisi. Bajaraxuata dovathi pijajivi barëneconecojai pecajunavi. ²⁰ Paxamë pajamatabëcuenelivaisijibimë. Vaxaitsi jumaitsi atatsi: "Xanë jumecovënëtajë Jesús pelivaisi," jai paxamë pajumecovënëtsi. Xanepana rabaja picani. Itsiata pexaniacuene itsa apo patoexanaemë tsipae itsamonaejavabelia, pajemajamë tsipae. Tsipaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia. ²¹ Bajayata vajasalinainëmi Abrahampijinë xaina pexënatonëyo. Pevënë Isaac. Nexata Abrahampijinë Dioso jamatabëcuenieejëtsiaya itorobatsi penacoxibeyaxuabinexa picani. Dioso jumaitsi Abrahampijinëjavabelia: "Nexënatonëyo beyaxuare ofrendacuenia tanerajutsinexamë," jai Dioso Abrahampijinëjavabelia. Nexata Abrahampijinë ajena nacoxibeyaxuabijitsia, Dioso itavetatsi. Abrahampijinë pejumecovënëtsixae pacuenia Dioso itorobatsi, nacoxicëtabuata picani penacoxibeyaxuabinexa. Bajaraxuata Abrahampijinë Dioso aneconijibiatanetsi. ²² Abrahampijinë cajena Dioso jumecovënëta pacuenia tajëvelia Dioso najumecapanepaeya jumaitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinë, najamatabëcuenieitajëta pepacuenie Dioso pejumecovënëtsijava pejamatabëëthëtojavavetsina. ²³ Nexata bajarapajamatabëcuenelivaisi yabara Dioso pejumelivaisibaxutota jumaitsi Abrahampijinë yabara mapacueniaje: "Abrahampijinë jumecovënëta pacuenia Dioso najumecapanepaeya jumaitsi. Bajaraxuata Dioso aneconijibia tanetsi," jai baja cajena Dioso pejumelivaisibaxutota Abrahampijinë yabara. Nexata Abrahampijinë yabara jivi jumai tsabiabi: "Abraham rabaja Dioso piasivanëtsi," jai tsabiabi.

²⁴ Nexata baja paxamë payapëtaneme mapacueneje. Pajivi jumecovënëtsi ata pacuenia Dioso najumeca-panepaeya jumaitsi, itsiata itsa apo exanabiabi pexaniacuene, bajarapajivi aneconihibia Dioso apo taetsi. Pajivi jumecovënëta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconihibia tanetsi. ²⁵ Bajara pijinia pacuenia bajayata Dioso aneconihibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pevito-ta. Itsiata baitsi jane bajarapovami pexaniacuene exana. Tsipaji copiapita xaniavaetsia Israelpijinë pemo-mobeje. Bajaraponëbeje jivi peyaenebinëbeje vajabitsaë pexanaenexa bajara patomarapijivijavabelia. Rahabpijivami yavenonana bajaraponëbeje pepon-aenexabeje saicaya namutua pijavajabitsaë pebeyaxu-abiyaniavatsibeje. Bajarapacuenia Rahabpijivami pexaniacuene pexanaexae Dioso aneconihibia tanetsi. ²⁶ Piasaëtsaponaponaevivi ata itsa baja ajumalijibi, tēpa baja. Apo exanae baja itsacuenejavayo ata pexaniacuene pevājēnaeyabelia. Bajara pijinia vaxaitsi ata jamatabëcueneitsitsi Jesús pelivaisi vajajumecovënëtsivi. “Xanë jumecovënëtajë Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabëcuenetēpaevi Dioso tsitanavanapatsi.

Pacuenia itsi vajeabarëto yabara pelivaisi

3 Tajamonae, paxamëyajuvënëvi vënëlivaisitaniji pacuenia ayaibitsaëto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaibitsaëto apo benaexanae jivi livaisi petsipae-baponaevinexa. Paxamë rabaja payapëtaneme mapacueneje. Paxanë Jesús pelivaisi jivi patatsipaebaponaevi, paitavetaponajë pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa paexanaejitsipajë, Dioso bitso ayaicuenia panenaneconitsiaexanaejitsipa daxitajivi matatoxenetsia. ² Daxitatsi vaxaitsi itsajavata banacajumemaba pibisiacuena vajacuaicuaijainexa, pacuenia picani apo becuaiicuaijaitsi. Pajivi pibisiacuena apo cuaiicuaijai, bajarapajivi jamatabëcuenesaë baja Diosojavabelia. Nexata bajarapajivi caējëpatsi penajamatabëcuenesaëtsinexa daxita pibisiacuene pexanaeyaniva. ³ Caballo vajavësimuxufetsinexa tsicuibox-atatatsi freno. Nexata freno caballovecua tsiquirijavayo ata, itsiata caējëpa caballo vajavësimuxufetsinexa itsabelia jitsipatsi vajaponaenexa. ⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenë tsiquiritenapayo ata, barcotabufe cajēnapona itsabelia jamatabëpona peponaenexa. ⁵ Bajara pijinia itsi tsiquiriisotoyo ata. Itsa tajua, naexana ayaiisoto petajunenexa pinijiunu ata. Bajara pijinia itsi vajeabarëto ata. Tsiquirijavayo picani vajeabarëto. Itsiata caējëpatsi pecuaicuaijainexa ayailivaisi. ⁶ Vajeabarëto cajena ayai, pacuenia isoto ayai. Vajeabarëtota raja pibisiacuene exanatsi daxita vajavi matatoxenetsia. Nexata vajacuaicuaijajava nacajamatabëcuenebi-

jiana. Tsiquirijiviyotsijavaveliacujinae vajatëpaejavabelianexa, bajarapacuenia cuaiicuaijaitsi. Dovathi vajanacaitorobijava vajajumecovënëtsixae, cuaiicuaijaitsi pibisiacuena. ⁷ Pacanaējëre mapacueneje. Jivi caējëpatsi penaitajuaniaexanaenexa daxitaviriadajubiyajuvënëvi. Caējëpatsinua penaitajuaniaexanaenexa unupijivi ata, pepunaevi ata. Caējëpatsinua penaitajuaniaexanaenexa pecotobëxëta pejinavanapaevi ata, man-uamenepijidujuai ata. Itsamonae bajarapacuenia naitajuaniaexana baja pejumecovënëtsinexatsi. ⁸ Itsiata baitsi jane itsajivi ata apo caējëpaetsi penaabarëtoitavetsinexa jumejemabiaya pibisiacuena pecuaicuaijajava pecopatsinexa. Vajeabarëto cajena bitso abeje. Apo nacacaējëpae vajanajumecataitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajeabarëto. ⁹ Vajeabarëtota pexaniacuena jumaitsi vaxa Diosojavabelia: “Xamë bitso ayaijamatabëcuenenëmë,” jaitsi. Vajeabarëtota icatsia pibisiacuena cuaiicuaijaitsi itsamonaejavabelia. Bajarapamonae picani beyaiyatanetsi. Tsipaji Dioso nacuenecataeya pexanaevitsi. ¹⁰ Caebareëtota pexaniacuena cuaiicuaijaitsi Diosojavabelia. Pibisiacuena ata cuaiicuaijaitsi itsamonaejavabelia. Tajamonae, apo bexanaetsi cajena bajarapacuenia.

¹¹ Pacanaējëre mapacueneje. Mera pepit-sapaemëthëatsina pitsapaina caera, pexaniara. Apo pitsapae pexaniara, piatsaxara yajava. ¹² Bajara pijinia itsi peubijava ata. Higeranaejavaverena apo pitsapae saicayacuai. Uvanaejavaverena ata apo pitsapae saicayacuai. Jume cajena. Bajara pijinia itsi mera pepit-sapaemëthë. Caejavatsina apo pitsapae pexaniara, piatsaxara yajava. Bajara pijinia itsi vajeabarëto ata. Caebarëtota apo becuaiicuaijaitsi pibisialivaisi, pexanialivaisi yajava. Nexata becuaiicuaijaitsi epexanialivaisi.

Pacuenia Dioso pijajivi yapëtaeyaexana pexanaenexa pexaniacuene yabara pelivaisi

¹³ Paxamë rabaja xaniavaetsia pajumeyapëtaneme Dioso pejumelivaisi. Nexata itsamonae pexaniacuene bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonae pexaniacuene bepatsitaexanavanapame beveliajamatabëcuenevi nataeya. Nexata daxitajivi pacacueneyapëtaena bitso panejumeyapëtaevicuene Dioso pejumelivaisi. ¹⁴ Itsiata baitsi jane bitso itsa pacuenecaëbabiabame itsamonae, itsa pajitsipabiabamenua jivi paneevetsivinexa papecaexanaenexa, pëtsa jamatabëcuenenavëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tsipaji saya panajamatabëcuene capaebijitsipame xaniavaetsia Dioso pejumelivaisi paneyapëtaejava. ¹⁵ Dioso pejumelivaisi itsa payapëtaejitsipame xaniavaetsia, nexata apo panajamatabëxainaemë tsipae bajarapacuenia. Dovathi rajane pejamatabëcueneta pacaitoroba panenajamatabëxainaenexa bajarapacuenia. Itsa jume, nexata paxamë panajamatabëcueneta panajamatabëxainame

bajarapacuenia. ¹⁶ Itsajota jivi cuenecaëba itsamonae, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcuenejèpaeya apo jinavanapae. Daxitacuene pibisiacuene ata exanavana-pa. ¹⁷ Biji rajane Dioso itsa nacayapëtaeyaexana pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaiyatanetsi vaxaexanaeyaniva bajarapamonaejavabelia apo pejitsipaecuenia. Najamatabëxainatsi itsamonae ata vajanacamuxujobilivaisi vajajumeyapëtaenexa. Itaxutotsoniatanetsi itsamonae ata. Pexaniacuene exanatsi. Apo najamatabëcuene epatajërëcaetsi. Apo yamaxëitojorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtaeyaexana. ¹⁸ Vaxaitsi jivi itsa nabarajamatabëcuene xanepanaeyaexanaenatsi, namataenetsia penaitoyavi ata, nexata vaxaitsi ata nabarajamatabëcuenexanepanaeya jinavanapaenatsi. Pexaniacuene nua exanavanapaenatsi.

Pacuenia jamatabëcueneitsi pajivi jitsipa mapanacuapijicueneje yabara pelivaisi

4 ¿Detsa xuajitsia paxamëyajuvënëvi anaeya namataenetsia pijanajumenotabiabi pecanabeyabiabi? Bajarapacuenia najumeanaenotabiaba tsipaji pejamatabëëthëtota bitso jitsipa pexanaenexa daxita xua pibisiacuene. Bajaraxuata nabeyabiaba. ²³ Paxamë picani pajitsipame itsacuenejava panexainaenexa. Itsiata apo pacacaëjèpae panepitsinexa. Bajaraxuata nexata pexainaevi payabarabeyaxuababiabame. Pacobecaëbabiabame itsamonae pexainaejava. Nexata pexainaevi payabarabeyabiabame paneyacajërëtsinexa pecobecovë. Paxamë apo paxainaemë panejitsipacuene. Tsipaji pavajëcabiabi atamë Diosojavabelia, itsiata apo pacarajutabiabi xua pavajëcame. Tsipaji saya bajaraxua pavajëcabiabame paneexanaenexa daxita xua pibisiacuene. ⁴ Caejamatabëcuene Diosojavabelia apo paxainaemë. ËDioso pijacuene apo pajitsipaemë. Mapanacuata pexainaecuene ata bitso payajavajitsipame. Bajarapacuenia panenajamatabëxainaexae, pacuenia petiriva jamatabëcueneitsi, pova pamonavecua jaita itsanë, bajarapajamatabëcueneitsimë. Payapëtaneme rabaja mapanacuapijicuene bitso pejitsipaevi, bajarapamonae Dioso bepijavajabitsaë naexana. Bajara pijinia paxamë ata paitsimë. ⁵ Bajarapajamatabëcuene yabara Dioso pejumelivaisibaxutota jumaiti mapacueniaje vajacanaëjëtsinexa xaniavaetsia Diosojavabelia: “Espíritu Santo, ponë nacatsijamatabëca, bajaraponë bitso nacaasiva. Bitso nacatojitsipa vajaasivanexa ëDioso,” jai Dioso pejumelivaisibaxutota vajajitsipaeyaniva mapanacuapijicueneje. ⁶ Dioso cajena nacayavenona vajanajamatabëcuene cataitsinexa pibisiacuene vaxaexanaeyaniva. Dioso pejumelivaisibaxutota jumaiti mapacueniaje: “Dioso yavenona pamona beveliajamatabëcuenevi natane. Pamona pijinia beayaijamatabëcuenevi natane, Dioso apo yavenona,” jai Dioso pejumelivaisibaxutota. ⁷ Nexata beveliajamatabëcuenevi nataeya paexana-

vanapare pacuenia Dioso pacatojitsipa. Panavecuaitavere dovathi. Nexata dovathi pacavecuanajetabajiraviana. ⁸ Pavajëre Diosojavabelia. Nexata Dioso pacayavenonaena. Paxamë pibisiacuene paneexanaevi, pacopare bajarapacuenia. Paxamë anijajamatabëcuenebeje panexainaevi, Dioso pijalivaisi, pibisiajamatabëcuene yajava. Pacopare bajarapajamatabëcuene Dioso papecajamatabëcuene xaniavaetsinexa pibisiajamatabëcuenevecua. ⁹ Pibisiacuene paneexanaeconi yabara, bitso panatsinajamatabëxainare. Bitso payaauramërenua. Pëtsa payabarëyamë. ¹⁰ Beveliajamatabëcuenevi panataema Dioso pitabarata. Nexata pibisiacuene paneexanaeconimivecua, Dioso pacajamatabëcuene yavenonaena. Nexata panajamatabëcuene yotsianame Diosojavabelia.

Pacuenia nacaitaveta itsamonae Dioso pejumecovënëtsivi pibisiacuena vajabaracuaicuaijayaniva yabara pelivaisi

¹¹ Tajamonae, pëtsa najumetsënëtsia namataenetsia panabaracuaicuaijamë. Pajivi najumetsënëtsia baracuaicuaijai Dioso penajuajumecovënëtsivi, bajarapajivi naneconita Diosojavabelia. Dioso penajuajumecovënëtsivi, pibisiacuene pexanaejava xaniavaetsia cueneyapëtaenejeva, itsa jamatabëjumaitsinua: “Bajarapamonae Diosovecua naxuabiana pibisiacuene pexanaexae,” itsa jamatabëjai, nexata bajarapajivi ata naneconita Diosojavabelia. Dioso penajuajumecovënëtsivi, najumetsënëtsia itsa baracuaicuaijai, nexata apo jumecovënëtsi pacuenia Dioso itorobatsi. Pacuenia Dioso itorobatsi, itsa apo jumecovënëtsi, nexata apo bepexaniajailivaisi tane. Caranata bajarapajivi jivi bepenaneconitsiaexanaenë natane. ¹² Caenë Dioso nacatonajumecopata vajajumecovënëtsinexa. Bajara jane ponë nacananeconitsiaexanaena pibisiacuene vaxaexanaeconi yabara. Bajaraponë caenë caëjèpatsinua pejumaitsinexa itsajiviyojavabelia: “Xamë pepacuene naneconitame. Nexata nevecuanaxuabianame infiernojavabelia,” pejainexa. Itsa jume, caëjèpatsi pejumaitsinexa: “Xamë baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamë Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovecua naxuabiana pibisiacuene pexanaexae,” panejainexa.

Pacuenia itsajivi ata apo natsivajënaeyapëtae pacuene meravia pitsijavata tocopiajitsiatsi yabara pelivaisi

¹³ Panenamuxunaevere mapalivaisije. Paxamë abaxë xaniavaetsia payapëtaenejevamë xua Dioso pacatocopatsijitsia paneexanaenexa, ayaijamatabëcuenevi nataeya tajëvelia panavajunupaebabiabame. Tajëvelia pajumaitsimë tsabiabi: “Ajena. Itsa jume, pepacuene jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacan-

abinexa," pajamë tsabiabi. ¹⁴ Pëtsa bajarapacuenia ayaijamatabëcuenevi nataeya tajëvelia panavajunupaebabiabame. Tsipaji raja apo panatsivajënaeyapëtaemë xua pacatocopiapatsijitsia meravia pitsijavata. Vajajinavanapaeepatoyo saya tsiquirimatacabiyoata jinavanapatsi vajatëpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caeepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. ¹⁵ Nexata saya bepajumaitsimë: "Itsa Dioso nacatocopatsiana abaxë vajaasaëtsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi," bepajamë saya. ¹⁶ Paxamë saya bepaayaijamatabëcuenevimë panataeyabiabame. Nexata paneexanaejavanexa, abaxë tajëvelia panavajunupaebabiabame panatsivajënaeyapëtaenejevamë xua Dioso pacatocopatsijitsia paneexanaenexa. Bajarapacuenia ayaijamatabëcuenenë nataeya paneonavajunupaebabiabijava, pibisiacuene. Tsipaji panajamatabëxainabiabame bepanijacuata itajara paneexanaejavanexa. Apo pacanaëjëtsimë bajaraxua Dioso papecatocopatsijava, bajarapacuenia paneexanaenexa. ¹⁷ Pajivi yapëtae ata pacuenia picani bexana, itsiata itsa apo exanae, bajarapajivi naneconita Diosojavabelia.

Pacuenia bitso pexainaevi muxujibatsi yabara pelivaisi

5 Bitso panexainaevi, ipanenamuxunaevere mapalivaisije! Panatsinuema bitso ayaijumeta. Tsipaji raja Dioso pacabejiobiaexanaena. ² Bitso panexainae cuene panexaniavaetsijavami, pacatotsabanaena. Pexaniavirijavanë, panenaxatabijavanëmi ata, daxita pacatoucubaxaena. ³ Palatanëanë ata, bitso penamatamotsinëanë, pacatotasibianatsi. Nexata nayapëtaena bajarapapalata apo panecanacuenebijava. Bajarapapalata apo paneyavenonaexae itsamonae, pacatotasibianatsi. Isoto pacaveriajaviana daxita panexainaejava yajava. Pacaetuataponame picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevajënae tsaponae pecopiapatsinexa. Dioso pacananeconitsiaexanaena. Tsipaji ëpaxamënexa panatoxaniavaetame panexainae cuene. ⁴ Panajumetaema. Pamonaepacatonacueneba panijacuene, bajarapamonaepacapaeba itsamonaejavabelia paneyamaxëitojorobijava. Apo pamamatamotsimë xaniavaetsia pacuenia picani pamamatamotsiapaebame. Nexata vajatuxanenë Dioso, daxita athëbënacuatatsia pevetsinë, jumetanetsi bajarapamonaepapaebijava xaniavaetsia apo panematamotsijava. ⁵ Mapanacuata picani panatsijinavanapame xaniavaetsia. Pacabarëyamë tsavanapae panexainae cuene. Paexanavanapame panajitsipaecuena. Pacuenia baca bitso penasitsiepatota beyaxuabatsi, bajara pijinia pacuenia paxamë ata pacatoimoxoyo baja Dioso papecananeconitsia exanaematacabinexa, bitso panenaneconitsixae Diosojavabelia. ⁶ Jivi pananeconitsiaexanabiabame.

Pabeyaxuababiabamenua planeconijibivi ata. Bajarapacuenia paexanabiabame pamonaejavabelia apo cajëpëpaetsi papecanayajiviitavetsinexa.

Pacuenia icatsia petuxanenë patsijitsiatsica yabara pelivaisi

⁷ Tajamonae, pajamatabëcuenesaëmëre tsavanapae panecopiaevetavanapaejava vajatuxanenë matapania icatsia pepatsimatocabiticajavabelianexa. Pabi penacuenebinë, vajënaeeveta ema peubinexa peubijava. Peubiveretsicujinae peubijava, bajayajebi ajamatabëcuenesaëya evetaponapona petonaveretsijavabelianexatsi. ⁸ Bajara pijinia pacuenia paxamë ata bajayajebi itsamonae pibisiacuene pacaexanae ata, pajamatabëcuenesaëmë tsane. Pëtsa pajamatabëcuene faefaename. Tsipaji rabaja imoxoyo pevajënae tsaponae vajatuxanenë pepatsinexatsica. ⁹ Tajamonae Dioso panenajuajumecovënëtsivi, pëtsa namataenetsia panabaracuacuajamë Diosojavabelia panenaneconitsianiva. Tsipaji rabaja Jesucristo, ponëjavabelia panavajunupaebijitsiamë daxita pacuene paexanavanapame mapanacuataje, imoxoyo baja pevajënae tsaponae pepatsinexatsica. Bajaraponë pacaajivimë canacujitsia pacarajutaponaena xuavajëto pacatoxainapona. ¹⁰ Tajamonae, pacanaëjëre profetavimi, pamonaemi bajayata Diosojumelivaisi paeba. Bajarapamonaemi bajayajebi bejiobiaexanae atatsi, ajamatabëcuenesaë tsavanapae. Itsajamatabëcuene apo xainae. ¹¹ Pamonaepajamatabëcuenesaë, bajayajebi bejiobiaexanae atatsi, bajarapamonaepaconoxae baja topexaniacuene tsane Diosojavabelia. Pavënëlivaisitaneme rabaja pacuenia bajayata Jobpijinë bejiobiaexanae atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcueneëjëtsicujinaetsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsoniataenëcuene.

¹² Tajamonae, palivaisi baja pacatsipaebatsi, mata-toxenetsia mapalivaisiyoje bitso pajumecovënëtsianame. Itsa pacuaicuajamë itsamonaejavabelia, pexaniajailivaisi pacuaicuajamë tsabiabi tsane. Pëtsa Dioso pevënë pacuaicuajamë itsamonae papecajumexaniataenexa. Nexata pëtsa pajumaitsimë mapacueniaje: "Xaniajanë raja. Cajumaittsi mapacueniaje Dioso pitabarata," pajamë pëtsa. Tsipaji baja pexaniajailivaisi itsa pacuaicuajamë tsabiabi tsane, itsamonae ata pacacuene yapëtaena apo panenajumet-sënëtabiabicuene. Nexata itsa pacayanijoba itsacuenejavayo yabara, roviaalia pajumaitsimëre pacuenia panajamatabëxainame. Itsa pajejamëjitsia, pajejamëre roviaalia. Itsa jume, "jume!" pajamëre roviaalia. Bajarapacuenia roviaalia itsa paxaniajamë tsabiabi tsane, nexata apo pananeconitsimë tsane Diosojavabelia. Tsipaji Dioso pevënë apo pacuaicuajamë tsabiabi tsane papecajumexaniataenexa itsamonae.

¹³ Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojav-

abelia: "Xamë ayaijamatabëcuenenëmë," bejai Diosojavabelia penaxëanaejavata. ¹⁴ Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevenëta. ¹⁵ Petovajëcaejavata, daxita ancianovi itsa jamatabëjumaitsi: "Dioso cajena pepacuene jamatejemayaexanaenatsi mapajivije," itsa jamatabëjai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajënaeya, itsiata Dioso vecuaajibiaexanaenatsi bajarapaneconimi. ¹⁶ Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemënua, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorobicueniatsi, daxita pejamatabëëthëtojavavetsina itsa vajëta, bajaraponë jumenamatamota Diosojavabelia. Ayaicuenia Dioso pexaniacuene toexanaenatsi. ¹⁷ Diosojumepaebinëmi, profeta Elíaspijinë, bevaxaitsijamatabëcuenenëmi. Bajaya-

ta bajaraponëmi asaëyata vajëta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponëmi pijanacuata. Nexata daxita peubijavaximi, totëpatsi. Nexata daxita bajarapanacuapijivi bitso janibo. ¹⁸ Bajaraxuacujinae icatsia asaëyata Elíaspijinë vajëta Diosojavabelia ema pejopaenexa. Nexata icatsia ema jopa. Ira icatsia capit-sapa pexaejavanexa. Bajarapacuenia vaxaitsi ata asaëyata bevajëtatsi Diosojavabelia.

¹⁹ Tajamonae, paxamëyajuvënëjivi itsa copaba Dioso pejumelivaisi pejumecovënëtsijavami, nexata icatsia bepajumecovënëtsiaexaname bajarapalivaisi. ²⁰ Bepayapëtaneme mapacueneje. Pajivi icatsia copabiaexana itsamonae pibisiacuene pexanaejavami, pejumecovënëtsinexa icatsia Dioso, bajarapajivi jamatabëcueneyavenonaena bajarapamonae penaxuabianiva pibisianacuayabelia. Jamatabëcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacuene pexanaeconimi.

1 SAN PEDRO

**Pacuenia Pedro mapabaxutoje toyaquina Dioso pe-
jumecovënëtsivi, nacayajatsia penaevijavabelia, yabara
pelivaisi**

1 Xanë Pedronë, Jesucristo taneitorobinë. Nitoroba jivi tatsipaebaponaenexa Jesucristo pelivaisi. Pacatoyaquinatsi mapabaxutoje paxamë pepo panijatomaravecua, Jerusaléntomara, nacayajatsia panenarutsivi. Nacayajatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. ²Vaxa Dioso baja cajena bajayata tajëvelia panenaexanaevjänaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espíritu Santo pejamatabëcueneta pacatsata Jesucristo panejumecovënëtanapaenexa. Dioso pacaitapeta papecavecuajibiaexanaenexa, daxita pibisiacuene paneexanaeconimi Jesucristo papecasivatëpaexae. Pacatovajëtatsi Diosojavabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevecua.

**Pacuenia Jesucristo pelivaisi pejumecovënëtsivi Dioso
rajutsianatsi matacabi apo peverevereaejava yabara
pelivaisi**

³Vaxaitsi vajatuxanenë Jesucristo paxa Diosojavabelia jumaitsitsi tsabiabi: "Xanepana rabaja. Pexaniacuene panetoexaname," jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpaecujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacarajutsinexa matacabi apo peverevereaejava. ⁴Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. ⁵Bajaraxua Dioso nacatoxaniavaeta athëbëtatsia vajanajamatabëcuenecopatsixae Diosojavabelia. Nexata abaxë vajajinavanapaeepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacapanepaenexa. Pamatacabi mapanacuataje vereverecaena, nayapëtaena jane baja xua Dioso nacarajutsiana.

⁶Bajaraxuata paxamë Dioso papecacapanepaejavanexa, pasivajamatabëcuenenbarëyamëre tsavanapae. Aeconoxae abaxë mapamatacabitaje pacajamatabëcuenenebejiobitsi ata daxitacuene papecaja-

matabëcuenenëjëtsijava, itsiata pasivajamatabëcuenenbarëyamëre tsavanapae. ⁷Pacajamatabëcuenenëjëtaponapapecajamatabëcuenenepätaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcuenenëjëtaponapapecajamatabëcuenenepätaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuanepaenepapecajamatabëcuenenëjëtsijava, panevajënaeyabelia pajamatabëcuenesaëmë tsaponae tsane Jesucristojavabelia panenajamatabëcuenecopatsijava. Nexata pamatacabi vajatuxanenë Jesucristo patsianica, pacasivajamatabëcuenenbarëya tsane. Dioso ata pacasivabarëya tsane. Daxitajivinua pacayaiyataena.

⁸Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcuenecopatame bajaraponëjavabelia. Jesucristo bitso pasivajamatabëcuenenbarëyamëre tsavanapae. Jesucristo panesivajamatabëcuenenbarëyajava, itsa panajamatabëcuenenepätaenexa itsamonaejavabelia, epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuenenepätaenexa itsamonaejavabelia peyapëtaenexa pacuenia bëpënëa pajamatabëcuenenbarëyamë. ⁹Jesucristo papecasivatëpaexae, panajamatabëcuenecopatame Diosojavabelia papecacapanepaenexa. Bajaraxuata Dioso pacapanepaena Dioso papecananeconitsia exanaejavaminoxavecu pibisiacuene paneexanaeconimi yabara.

¹⁰Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaejitsia, nexata profetavi tajëvelia vajunupaebapona jivijavabelia. Profetavi tajëvelia vajunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. ¹¹Espíritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espíritu Santo pejamatabëcueneta. Nexata profetavimi yaquina pacuenia itsamonae Cristo bejibiaexanaejitsiatsi pebeyaxuabinexatsi. Yaquinanua pacuenia Cristo petëpaecujinae, icatsia itsa asaë, athëbëabetsia caponaejitsiatsi peecaenexa paxa Dioso

pemuxunenetatsia. Nexata bajarapaprotetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vajunupaebaponatsi?” jamatabëjai tsabiabi. ¹² Itsiata baitsi jane bajarapaprotetavimi Dioso yapëtaeyaexanatsi pacuenia bajarapamonaemi pevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vajunupaebapona profetavimi. Nexata baja paxamë bajarapalivaisi itsamonaë pacatsipaeba papecacapanepaelivaisinexa. Espiritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamonaë. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavanapaenexa yabara pelivaisi

¹³ Panajamatabëcuene copare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiayanua xaniavaetsia pajinavanapare. ¹⁴ Pajumecovënëtanavapare Dioso. Pëtsa panajamatabëxainame panenatojitsipaecuena pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë. ¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinexamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. ¹⁶ Dioso baja cajena pejumelivaisibaxutota jumaitsi mapacueniaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

¹⁷ Paxamë itsa pavajëtame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamonaë jumecovënëtatsi, ayaijamatabëcuenevi, beveliajamatabëcuenevi ata. Dioso cajena yapëtane paneconivajëto exanapona caejivi canacujitsia. Bajaraxuata Dioso cujunaviaya bepajinavanapame pamatacabibeje abaxë pasaëmë tsavanapae mapanacuataje. ¹⁸ Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacaasaëmë tsavanapae. Itsiata baitsi jane aeconoxae baja bajarapacuenivecua Dioso baja pacacapanepa. Payapëtaneme rabaja Dioso ayaimatamota papecaneconimatamotsijava papecacapanepaenexa. Apo pacacomuatsi baja cajena peverevereaejavata, pacuenia oro itsi, palata ata. ¹⁹ Dioso baja cajena pacacomuata bitso penamatamotsijavata, Cristo pijanata. Pajivi pijaneconixaina Diosojavabelia, bajarapajivi oveja, pejanapebito, peperabëxanepanaenë, beyaxuaba ofrendacuena pevi perajutsinexa Diosojavabelia. Nexata bajarapajivi pijaneconi Dioso baja vecuaajibiaexanatsi bajarapaoveja

pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, planeconijibinë, nacopata pebeyaxuabinoxatsi. Nexata Cristo petëpaejamatabëcueneta, pacavecuajibiaexana panijaneconimi. ²⁰ Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. ²¹ Itsiata baitsi jane Cristo petëpaejujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujuanena, Cristo ecaëyaexanatsi. Bajaraxuata panajamatabëcuene copatame Diosojavabelia papecarajutsinexa matacabi apo peverevereaejava.

²² Nexata baja aeconoxae paxamë pajumecovënëtamë pexaniajailivaisi, Jesucristo pelivaisi, Espiritu Santo papecajamatabëcueneitayotsixae. Nexata pibisiacuene paneexanaeconimi, Dioso pacavecuajibiaexana. Nexata xaniavaetsia pasivamë tsavanapae itsamonaë ata, Dioso pejumecovënëtsivi. Bajarapacuenia asaëyata namataenetsia bepanaasivamë tsavanapae daxita panejamatabëëthëtovetsina. ²³ Pacuenia pejananaexanaenacueto yo itsi, bajara paxamë pajamatabëcueneitsimë Dioso pejumelivaisita pejanajamatabëcuene panexainaexae. Itsiata baitsi jane bajarapapejanajamatabëcuene paneaxajivi apo pacarajutsi. Dioso raja pejumelivaisi, apo peverevereaelivaisinexa panejumecovënëtsixae, pejanajamatabëcuene baja paxainame. ²⁴ Dioso pejumelivaisi apo peverevereaejavanexa yabara, Dioso pejumelivaisibaxutota jumaitsi mapacueniaje:

Pacuenia vafajopijipona bepiglia tsaquena, petsaque-naecujinae tëpa, bajara pijinia saya itsi jivi ata. Bepiglia tëpa. Pacuenia pematono ata bepiglia tsaquena, nexata othopa, bajara pijinia saya itsi ayaijamatabëcuene pexainaenë ata. Bepiglia tëpa. ²⁵ Itsiata baitsi jane Dioso pejumelivaisi apo peverevereae tsane daxitamatacabijavabelianexa, jai Dioso pejumelivaisibaxutota.

Bajarapalivaisi papecacapanepaelivaisinexa, itsamonaë baja pacatsipaeba.

2 Bajaraxuata pacopare baja daxita pibisiacuene paneexanabiabijava itsamonaëjavabelia. Pacoparenua paneyamaxëitojorobiabijava. Pacoparenua saya yamaxëitojorobiaya panecuaicuajitsabiabijava. Tsipaji paxamë yamaxëitojorobiaya pacuaicuajimë tsabiabi itsamonaë bepaxaniajamatabëcuenevimë papecataenexa. Pacoparenua panecuenecaëbabiabijava itsamonaë. Pacoparenua panebaracuicuajitsabiabijava pibisiacuena itsamonaë. ² Pacuenia pejananaexanaenacueto bitso bajitsipa mitobarëmene piapaenexa, bajara pijinia pacuenia paxamë bitso pajitsipare Dioso pejumelivaisi. Bajarapalivaisi baja cajena bevaxaëjava tanetsi vajajamatabëëthëtonexa. Nexata bajarapalivaisi panelebabiabixae, pacatsijamatabëcuenevitsabaponaena pevajënaeyabelia. Nexata bajarapalivaisi pejamatabëcueneta Dioso pacajamatabëcuene naveretsiaexanaena pacuenia Dioso pacatojitsipa. ³ Nexata baja pepacuene paja-

matabëcueneyapëtaename vajatuxanenë pexaniajamatabëcuenenëcuene. Bajaraxuata pajitsipaponare orijibia panevajënaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo pevereverecaenë daxitamatabijavabelianexa yabara pelivaisi

⁴ Vajatuxanenë Cristo raja bepiatajaiboto tsaponaponae. Apo pevereverecaenë daxitamatabijavabelianexa. Nexata paimoxoyore bajaraponë. Vajatuxanenë Cristo itsamonae apo pejumecovënëtsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. ⁵ Paxamë ata rabaja Jesucristojavabelia panenajamatabëcuenecopatsixae, bepaibotonëmë Dioso pacatane. Nexata padaxitamë Cristo papijajivix-aemë, Dioso pacatane bepijateplobo, ibotonëta bepexanaetemplobo. Tsipaji pacuenia Dioso ponapona templobota, bajara pijinia pacuenia Espiritu Santo pacatsijamatabëca. Paxamë rabaja cajena Dioso panetonacuenebavanapaevi, baitsi papijasacerdotevimë. Nexata Jesucristo pejamatabëcueneta aneconijibia papecataexae, Diosojavabelia najamatabëcuenegerajutsiya pavajëtabiabianame Dioso papecasivajamatabëcuenebarëyanexa. ⁶ Cristo, ponë athëbëvetsica Dioso itorobijitsiatsica jivi peca-panepaenexa, bajaraponë yabara tajëvelia Dioso jumaitsi: "Ponë itorobianajë, beiboto tsane," jai. Nexata tajëvelia Dioso pejumaitisijava, Dioso pejumelivaisibaxutota jumaitsi mapacueniaje:

Taitapetsinë netoponaponaena Jerusalén tomarata. Bajaraponë beiboto tsane. Nexata pacuenia ibota bo pexanaevi, itsaiboto bitso tsitanepanatsi daxitai-botonëvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata pajivi najamatabëcuenecopatsiana bajaraponëjavabelia, bajarapajivi apo nacueratsi tsane, jai mapacueniaje Dioso pejumelivaisibaxutota tajëvelia Dioso pejumaitisijava Cristo yabara.

⁷ Paxamë Cristo pelivaisi panejumecovënëtsivi, pataneme Cristo bepiatajaiboto tsaponaponae, bitso bepenamatamotsiibotonua. Itsiata baitsi jane pamona-ae Cristo pelivaisi apo pejumecovënëtsivi, bajarapamonae bepiabejeiboto tanetsi Cristo. Tsipaji baja copiajopa pacuenia Dioso pejumelivaisibaxutota tajëvelia najumecapanepaeya jumaitsi Cristo yabara. Tajëvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaetsia yaëta botabu daxita itsaibo matatoxenetsia, jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovënëtsijavanexatsi yabara. ⁸ Copiajopanua jane baja Dioso pejumelivaisibaxutota tajëvelia Cristo yabara pejumaitisijava mapacueniaje: "Bajarapaiboto

jivi pefirapecaeyaexanaeiboto tsane," pejaijiva Cristo yabara. Bajarapacuenia Dioso pejumelivaisibaxuta jumaitsi jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaitsi. Tsipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, pecapanepaelivaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta papijajivinexamë. Dioso baja papijasacerdotevimë tsavanapaenua, daxitacuene pepo pevetsinë panetonacuenebavanapaexae. Dioso baja papijajivimë tsavanapae panevajunupaebavana-paenexa Dioso ayaiacuene pexanaejavanë. Dioso baja cajena pacajunata pibisiajamatabëcuenecua, mapanacuataje pitaquirijamatabëcuenecua. Nexata baja pajunuame pexaniajamatabëcuenecua, Dioso pitayotsijamatabëcuenecua. ¹⁰ Paxamë abaxë Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

Pacuenia Dioso pejumecovënëtsivi jinavanapa Dioso petonacuenebavanapaenexa yabara pelivaisi

¹¹ Tajamonae bitso patacaasivavi, mapanacuataje abaxë pajinavanapae atamë, athëbëtatsia baja Dioso pijanacuatatsia bepanejinavanapaevi panataema. Saya raja caeapatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajarapitsijamatabëcuenecua jamatabëcuenecua bijianaeyaexana vajajamatabëcuenecua javavetsina. ¹² Dioso apo peyapëtaevi petuatuajëa itsa pajinavanapame, xaniavaetsia patsitajinavanapae-name. Aeconoxae pacabaracuaicuaijai ata bepibisiacuene paneexanaevi papecataexae, itsiata itsamatabijavabelia itsa najamatabënapitsiana pexaniacuene paneexanaejava, bajarapamonae ata Dioso jumecovënëtsiana. Nexata bajarapamonae jumaitsi tsane Diosojavabelia: "Diosomë, bitso ayaijamatabëcuenenëmë," jai tsane. Bajarapacuenia jumaitsi tsane itsa copiapatsiana pamatacabi Dioso naneconitsiaexanaejitsia daxita pamona Dioso apo pejumecovënëtsivi.

¹³ Dioso papijajivixaemë, pajumecovënëre pacuenia pacaitoroba pamona nacia pevetaavanapaevi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë. ¹⁴ Pajumecovënërenua nacia pevetsivi. Bajarapamonae presidentenë itorobatsi penaneconitsiaexanaenexa pibisiacuene pexanaevi. Itorobatsinua pejumaitsinexa pexaniacuene pexanavanapaevijavabelia: "Xanepana rabaja xua paexaname," pejainexa. ¹⁵ Bajarapamonae pajumecovënëre. Tsipaji raja Dioso

pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuajijajava, pamona apo pejumecovënëtsivi pexanialivaisi, Cristo pelivaisi.

¹⁶ Paxamë picani pajumecovënëtavanapame Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane Dioso pacatocopata pacuenia Dioso jitsipa panetonacuenebavanaenexa. ¹⁷ Daxitajivi yayiyataeya pajinavanapare. Itsamonae ata, pamona Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsaponapona, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pajamatabëcuenesaë tsavanaenexa, yabara pelivaisi

¹⁸ Paxamë itsamonae panetonacuenebavanapaevi, pacamuxujibatsi mapacueniaje. Pajumeyaiyataeyabiabare pacuenia pacaitorobabiaba panijatuxanevi. Ēpexaniajamatabëcuenevi pëtsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. ¹⁹ Panijatuxanevijavabelia itsacueneneconi apo paxinae atamë, panijatuxanevi pacabejiobiaexanabiabijitsipa. Nexata panijatuxanevi papecabejibiaexanabiabijavata: "Dioso nitaxutobejiobiataena," itsa pajamatabëjamë tsabiabi tsipae, nexata Diosojavabelia pacatonamatamotsipa. ²⁰ Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabejibiaexanaejavata: "Dioso nitaxutobejiobiataena," pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabejibiaexanaejavata: "Dioso nitaxutobejiobiataena," itsa pajamatabëjamë tsipae Diosojavabelia, nexata Diosojavabelia pacatonamatamotsipa. ²¹ Bajarapacuenia itsacueneneconi apo paxinaenejevamë, itsamonae pacabejiobiaexanaponaena. Tsipaji Dioso bajarapacuenia pacatocopata itsamonae papecabejibiaexanaponaenexa. Payapëtaneme rabaja mapacuenije. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata Dioso pacatocopata itsamonae papecabejibiaexanaenexa. ²² Itsacuenejava ata pibisiacuene apo exanae Cristo. Apo yamaxëitojorobi cajena itsajiviyojavabelia ata. ²³ Pibisiacuena Cristo bijatae atatsi itsamonae, itsiata juya pibisiacuena apo jumecanaviatsi. Bejiobiaexanae atatsi jivi, "Neyamatamotsiana Dioso," apo jai Cristo bajarapamonaejavabelia.

Biji rajane bajarapamonaejavabelia Cristo cujirucanaviatsinejeva, copata bajarapamona Dioso penaneconitsiaexanaenexatsi pamatacabi Dioso naneconitsiaexanaena pijaneconi pexainaevi. ²⁴ Cristo cruzata itsa tēpa, tsijumaxuabatsi vaxaitsi pibisiacuene vajaexanaeneconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexananua vajavajënaeyabelia vajajinavanapaenexa Dioso pejitsipaecuenia. Cristo pacasivavajënrubatsi paxamë papecajamatabëcuene xaniavaetsinexa pibisijamatabëcuenevecua, xaniavaetsia panejinavanapaenexa Dioso pitabarata.

²⁵ Paxamë picani Diosovecua naxuabiaya pajinavanapame. Pacuenia oveja pevetsinëtsivecua naxuabiaya jinavanapa, bajara picani paitsimë. Itsiata baitsi jane aeconoxae baja Cristo pejamatabëcueneta panaviabame Diosojavabelia. Pacuenia pijaoveja pevetsinë xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabëcuene ata Cristo evetaponapona.

Pacuenia penacojobivi xaniavaetsia benabarëjivanapa yabara pelivaisi

3 Paxamë papetirivimë, pacamuxujibatsi mapacueniaje. Pacaevamë canacujitsia paneamonajivi jumecovënëtsiaya pajinavanapare. Pova pamona abaxë apo jumecovënëtsi Jesús pelivaisi, bajarapova xaniavaetsia tsitaponapona pamona, pamona ata Jesús pelivaisi pejumecovënëtsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovënëtsiana Jesús pelivaisi xaniavaetsia petsitaponaponaexae pamona. ² Bajarapacuenia pamona ata Jesús pelivaisi jumecovënëtsiana, pijava itsa cuenetaena Dioso paneyaiyataejava, itsa cuenetaenanua pijava Dioso pitabarata aneconijibia peponaponaejava. ³ Papetirivimë, pëtsa pajamatabëjumaitsimë mapacueniaje: "Bepexaniavanë jivi tanetaenexa, naxatatsianajë naitabëtsiaya. Namatafaratsianajë naitabëtsiaya. Oronanita pexanaejavanëta naitabëtsianajë. Itsa jume, nexata bitso pexaniaviriana naxatatsianajë," pajamatabëjamë pëtsa. Pëtsa bajarapacuenia panajamatabëxainame saya naniavelia panenaitabëtsinexa. ⁴ Biji rajane bēpēnēaverena panajamatabëcueneitabëre. Bēpēnēaverena panenajamatabëcueneitabëtsinexa, xaniavaetsia aneconijibia pajinavanapaename Dioso pitabarata. Nexata itsamonae pacaitsacueniabi ata, pëtsa pacuenecanaviatame. Nexata xua bēpēnēaverena panajamatabëcueneitabëtame, apo pacatovereverecae tsane. Bajarapitsijamatabëcuene pexinaeava tonamatamotsianatsi Diosojavabelia. ⁵ Pamonaemi petirivi bajayatami Dioso pejitsipaecuenia exanavanapa, bajarapacuenia bēpēnēaverena Dioso pejumelivaisita najamatabëcueneitabëta. Bajarapamonaemi najamatabëcueneecopata Diosojavabelia. Jumecovënëtavanapanua pamonajivi. ⁶ Bajarapamonaeyajuvënëvami, Sarapijivami, Dioso pejumelivaisita najamatabëcueneitabëta bēpēnēaverena. Sarapijivami

jumecovënëtsia ponapona pamona, Abrahampijinë. Itsa junata pamona, "Tajatuxanenë," jai tsabiabi pamonajavabelia. Papetiriavimë, panajamatabëcuene copatavanapare Diosojavabelia. Paexanavanaparena pexaniacuene. Pëtsa pacujunavamenua pacaitsacueniabijitsia ata itsajivi papecaitoxaxae. Nexata bajarapacuenia itsa paexanavanapaename, pajamatabëcuenejêpae-name Sarapijivami.

⁷ Paxamë papebijivimë, pacamuxujibatsi mapacueniaje. Xaniavaetsia pabarëjnavanapare panijavajivi. Pacuenia Dioso nacaitoroba, bajarapacuenia payaiy-ataema panijavajivi. Bajarapacuenia payaiyataema tsipaji raja bajarapamonae vaxaitsi pëbijivitsi nacave-cuaasaëjibi. Payaiyataema tsipaji raja bajarapamonae ata yajava Dioso pacarajutsiana matacabi apo pev-ereverecajava. Bajarapacuenia panijavajivi yaiyataeya pabarëjnavanapare paneajumeurayaniva panenavajëtsijava Diosojavabelia.

Pacuenia pexaniacuene pexanaevi ata itsamonae be- jjobiaexanaenatsi yabara pelivaisi

⁸ Tajamonae bitso patacaasivavi, pematatsënëa pacamuxujibatsi mapacueniaje. Najamatabëcuenejê-paeya pajinavanapare. Paxamëyajuvënëjivi itsacuene itsa tocopiapatatsi, nexata bajarapacuenia yabara bitso itsa najamatabëxaina, paxamë ata pacobenanjamaatabëxainare. Daxita Dioso panenajuajumecovënëtsivixae, namataenetsia panaasivamëre. Naitaxutotsoniataeyanua pajinavanapare. Beveliajamatabëcuenevinua nataeya pajinavanapare. ⁹ Itsajivi pibisiacuene itsa pacaexana, pëtsa pacuenecanaviatame. Pibisiacuena itsa pacabijatanenua, pëtsa pajumecanaviatame. Biji rajane bajarapajivi patovajëre Diosojavabelia Dioso peyavenonaenexatsi. Tsipaji pamatacabi Dioso pacajunata papijajivinexamë, bajarapacuenia paneexanaenexa, pacaitoroba. Nexata juya paxamë Dioso pacaitaxutotsoniataena pacuenia najumecapanepaeya pacajumaitsi papecayavenonaenexa. ¹⁰ Bajarapacuenia yabara Dioso pejumelivaisibaxutota jumaitsi mapacueniaje:

Pajivi jitsipa peponaponaenexa jamatabëcuenebarëyaya, bajarapajivi benaëbarëtoeveta pibisialivaisi pecuaicuaijayaniva. Benaëbarëtoevetanua penajumetsënëtsiyaniva ata. ¹¹ Bajarapajivi becopata pibisiacuene pexanabiabijavami pexanaponaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi. ¹² Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxunaevetanua penavajëtsijavatsi bajaraponëjavabelia. Dioso cajena baraanaepana pamona pibisiacuene pexanavanapaevi, jai Dioso pejumelivaisibaxutota.

¹³ Itsa pajamatabëcuenesaëmë tsavanapae tsane pexaniacuene paneexanavanapaevajava, nexata itsamonae pacabejjobiaexanae ata, itsiata apo pacajamatabëcuene bijianaecapanepae tsane. ¹⁴ Itsa pacabejjobiaexanaena xaniavaetsia pajinavanapae atamë, itsiata pajamatabëcuenebarëyamë tsane. Tsi-

paji raja Dioso pacayavenonaena. Pëtsa pacujunavame bajarapamonae. Pëtsa panasivajamatabëcuenebëjamënua papecabejjobiaexanaevajava yabara. ¹⁵ Biji rajane panejamatabëëthëtojavavetsina yaiyataeya pajumecovënëre vajatuxanenë Cristo. Panajamatabëcuene veretavanaparena xaniavaetsia panejumecanaviatsinexa itsajivi itsa pacayanijoba vajatuxanenë Cristo panejumecovënëtsijava yabara. Nexata itsa pacayanijoba mapacueniaje: "¿Detsa xuajitsia xamë jumecovënëtame Cristo?" itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamë beveliajamatabëcuenevi panataename. Nexata bajarapajivi yaiyataeya pajumecanaviatsianame. ¹⁶ Cristo papijajivixamë, pexaniacuena pajinavanapaename. Nexata payapëtaenava Dioso pitabarata aneconijibia panejinavanapaevajava. Nexata itsamonae najumetsënëtsiayapacabaracuaicuaijai tsabiabi ata tsane, bajarapamonae belia najumecopatsiana papecabaracuaicuaijajava. Naurabiana papecabaracuaicuaijaitsabibijava yabara. ¹⁷ Pexaniacuene paexanabiabi atamë, Dioso itsa patacopicopatsiana itsamonae papecabejjobiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejjobiaexanaejitsipa pibisiacuene paneexanaevajava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejjobiaexanatsi itsa nacasivatëpa pibisiacuene vajaexanaeneconi yabara. Caeto rabaja Cristo tëpa. Pematatsënëa baja apo nacasivatëpae tsane. Bajaraponë pepo pexaniacuene pexanaenë. Itsiata bejjobiaexanatsi vaxaitsi yabara, pibisiacuene vajaexanaevi, vajanacapanepaenexa Diosojavabelia. Peperabëtomibaja picani tëpa. Itsiata baitsi jane pepo pejamatabëcuene jane baja icatsia Dioso asaëyaexanatsi.

¹⁹ Nexata abaxë Cristo petëpaenë itsa boca, pepo pejamatabëcuene jane baja pona petëpaevijavabelia pexanialivaisi petsipaebinxaxa. Tsipaji bajarapamonae naneconitsia jinavanapa petëpaevi pijanacuata. ²⁰ Bajarapamonae bajayata jinavanapa, pamatacabi Noëpijinë ponapona. Bajarapamonae petëpaevajënae Dioso apo jumecovënëtsi. Noëpijinë abaxë itsa exanabatapona pinijibarcoxaneto, Dioso picani bajayajebi jamatabëcueneeveta pejumecovënëtsinexatsi daxita mapanacuapijivije. Itsiata baitsi jane apo jumecovënëtsitsi. Saya ocho pajiviyobeje, Noëpijinë, pijamonae yajava, bajarapamota Dioso capanepatsi mapanacuaje pebubutsijavavecua. Yajavacapanepatsinua mapanacuataje pibisiacuene pexanaevajavavecua. ²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajëtatsi vajacopabijava pibisiacuene vajaexanaevajami. Apo nacabautisabi baja cajena saya vajanacaperabëquiatsinexa. Biji rajane nacabautisaba vajanacajamatabëcuenequiatsinexa vajavajëtsixae Diosojavabelia. Nexata Dioso vajanacajamatabëcuenequiatsijava, pexaniajaicuene. Tsipaji Jesucristo vajanacasivatëpaecujinae, icatsia Dioso asaëyaexanatsi. Bajarapacue-

nia Jesucristo Dioso piasaëyaexanaexaetsi, nexata yapëtanetsi pepacuene Dioso vajanacacapanepaejavanexa. ²² Jesucristo Dioso piasaëyaexanaecujinaetsi, pona jane baja athëbëabetsia. Nexata athëbëtatsia Jesucristo eca paxa Dioso pecujuanenia. Daxita ángelevi Jesucristo jamatabëcueneevetatsi pitorobinexa.

Pacuenia Dioso asaëyata betonacuenebavanapatsi, pacuenia Dioso nacajamatabëcuene caëjëpaeyaexana, yabara pelivaisi

4 Cristo abaxë itsa ponapona mapanacuataje, itsamonae bejiobiaexanatsi. Bajara pijinia pacuenia paxamë ata tajëvelia bepaevetavanapame itsamonae papecabegiobiaexanaenexa. Pajivi bejiobiaexanatsi Cristo pelivaisi pejumecovënëtsixae, bajarapajivi pevajënaeyabelia ajamatabëcuenesaë baja tsaponae. Copata baja pibisiacuene pexanaejava. ² Pevajënaeyabelia jamatabëexanaponapona pacuenia Dioso tojitsipatsi. Pibisiacuene baja apo exanae pacuenia Dioso apo pejumecovënëtsivi penatojitsipaecuenia baexana. ³ Dioso panejumecovënëtsivajënaeya, pibisiacuene paneexanavanapaeneconi yabara, ayaiacuenia picani pananeconitame Diosojavabelia. Dioso panejumecovënëtsivajënaeya, panevitota pibisiacuene paexanabiabame. Panajamatabëxainabiabamenua ëpibisiacuene yabara. Paitajibimënu tsabiabi panijabonëjava. Paitajibimënu tsabiabi fiestajava ata. Jumapecataeya pexanaenëjavabelia ata panavajëcabiabame. Itsiata baitsi jane aeconoxae baja daxita bajarapacuene pacopabame. ⁴ Nexata pamonae Dioso apo peyapëtaevi, pibisiacuene panenajuaexanabiabivimi, aeconoxae baja pacasivajamatabëcuenenabenajaca. Tsipaji papibisiacuene bajarapamonae exana, paxamë baja apo pajamatabëcuene yavenonaemë. Bajaraxuata bajarapamonae pibisiacuena pacabaracuaicuaijai. ⁵ Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavanapaeneconi yabara, Dioso naneconitsiaexanaenatsi. Piasaëtsavanapaevi, petëpaevimi ata, daxita Dioso naneconitsiaexanaena. ⁶ Petëpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxë asaë tsavanapae bajarapamonae. Itsiata daxita bajarapamonae apo jumecovënëtsi Cristo pelivaisi. Itsiata bajarapamatacabi itsamonae baja jumecovënëta Cristo pelivaisi. Nexata xuacujinae daxita bajarapamonae tëpaponae. Itsiata baitsi jane pamonae baja pepuajumecovënëtsi Cristo pelivaisi, tëpa, bajarapamonae xaina baja matacabi apo pevereverecaejava. ⁷ Imoxoyo rabaja pevajënae pevereverecaenexa mapanacuataje. Bajaraxuata itsacuenejava ata pibisiacuene paexanaenejevamë, xaniavaetsia pajinavanapare. Namataenetsianua najamatabëcueneevetsiaya xaniavaetsia pajinavanapare panenajuavajëtabiabinexa Diosojavabelia. ⁸ Namataenetsia panaasivamëre tsavanapae. Bajarapacuene daxitacuene matatoxenetsia bitso nacatoxanepana vajaexanaenexa. Tsipaji itsa asivatsi itsajivi ata, nexata pibisiacuene nacaexanabiabi

ata, bajarapajivi apo barajamatabësitecaetsi. ⁹ Namataenetsia xaniavaetsia panacopiapire panijaboyaberena jamatabëcueneexanepanaeya. ¹⁰ Pacaenëmë canacujitsia Dioso saicayacuenia pacajamatabëcuene caëjëpaeyaexanapona Dioso pijacuene panetonacuenebavanapaenexa. Nexata namataenetsia panajamatabëcuene yavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. ¹¹ Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapëtaeyaxanatsi. Itsajivi pijinia itsa yavenonaejitsia itsanë, bajarapajivi beyavenona pacuenia Dioso jamatabëcuene caëjëpaeyaexanatsi peyavenonaenexa. Daxita xua paexanaejitsiamë Jesucristo papijajivix-aemë, paexanare jivi peyayataenexa Dioso. Dioso baja cajena daxitacuene pitorobinë, penivenivenaecotia pexainanë daxitamatacabijavabelianexa. Bajara itsi tsane.

Pacuenia Jesucristo pelivaisi pejumecovënëtsivi itsamonae bejiobiaexanaponatsi yabara pelivaisi

¹² Tajamonae bitso patacaasivavi, pëtsa pajamatabëcuenenabenajacame, itsamonae bitso pacabegiobiaexanaponae ata. Bajarapacuene pacatocopiapatsiana papecajamatabëcueneëjëtsinexa papecajamatabëcuene yapëtaenexa pepacuene panenajamatabëcuene copatsijava Diosojavabelia. Nexata pëtsa pajamatabëjumaitsimë: "Xanë cajena Dioso tajumecovënëtsinë. Nexata bajarapacuenia caenënë netocopiapatapona," pajamatabëjamë pëtsa. Tsipaji raja daxita Dioso pejumecovënëtsivi bajarapacuenia tocopiapataponatsi pejamatabëcueneëjëtsinexatsi pejamatabëcuene yapëtaenexatsi pepacuene penajamatabëcuene copatsijava Diosojavabelia. ¹³ Nexata saya panasivajamatabëcuene barëyamëre tsavanapae paxamë ata itsa pacabegiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaecotia yajava, pasivajamatabëcuene barëyamë tsane. ¹⁴ Pibisiacuena itsamonae itsa pacabijatane Jesucristo pelivaisi panejumecovënëtsivixae, pasivajamatabëcuene barëyamëre. Tsipaji raja paepatota itsamonae pacabijatane, ayaijamatabëcuenenë Espiritu Santo, ponë pacayajavaponapona, ayaiacuenia pacayavenonaena. ¹⁵ Pëtsa jivitonë pabeyaxuabame. Pëtsa panacobetoxotame. Pëtsa paexaname itsacuenejava ata pibisiacuene. Pëtsa patoetevame itsamonae pijacuene pacajunatsinejeva panetoevetsinexa, bajarapacuenia itsamonae panejamatabëitonotsiyani-va. Pëtsa bajarapitsicuene paexaname itsajivi ata paxamë yabara pejumaitsiyaniva: "Pibisiacuene pexanaevixae, bejiobiaexanatsi bajarapamonae," pejaiyaniva itsa pacabegiobiaexana itsamonae. ¹⁶ Pajivi bejiobiaexanatsi Jesucristo pelivaisi pejumecovënëtsixae, bajarapajivi apo benacaura pebejiobiaexanaejavatsi. Pexani-

ajamatabëcuene berajuta Diosojavabelia Jesucristo pe-
livaisi pejumecovënëtsixae.

¹⁷⁻¹⁸ Dioso yapètane pacuenia daxita pijajivi tojina-
vanapatsi. Nexata aeconoxae Dioso tocopiapatatsi pi-
jajivijavabelia pejumaitsinexa: “Paxamë xaniavaetsia
panetojinavanapame. Pexaniacuenua patoexanabi-
abame itsamonaejavabelia. Nexata pacasivaja-
matabëcuenebarëyatsi,” pejainexa Dioso, pexani-
acuene pijajivi itsa toexanavanapatsi. Itsiata pamona
Dioso pijajivi ata, xaniavaetsia Dioso apo tojinavana-
pae, pexaniacuenua apo toexanabiabi itsamona-
javabelia, bajarapamonaejavabelia Dioso jumaitsi
tsane: “Paxamë apo pacasivajamatabëcuenebarëyatsi.
Tsipaji tajitsipaecuenia apo paexanavanapaemë,” jai
tsane. Bajarapacuenia Dioso itsa jumaitsi tsane pe-
jumecovënëtsivitsijavabelia ata, ¿detsa nexata Dioso
jumaitsi tsane Dioso apo pejumecovënëtsivitsijav-
abelia? Nexata Dioso ayaicuenia naneconitsiaexanae-
na bajarapamona. Pamonaejavabelia Dioso jumaitsi
tsane: “Pacasivajamatabëcuenebarëyatsi,” jai tsane,
bajarapamona Dioso capanepaena pijanacuayabet-
sia. Pamonaejavabelia ata Dioso jumaitsi tsane: “Pax-
amë apo pacasivajamatabëcuenebarëyatsi,” jai tsane,
bajarapamona ata itsiata tsiquirijavayota Dioso ca-
panepaena pijanacuayabetsia. Bajarapacuenia Dioso
itsa exanaena pejumecovënëtsivitsijavabelia ata, nexa-
ta biji pamona apo jumecovënëtsi Dioso pejumeliv-
aisi, pamona pibisiacuene pexanaevi, Dioso apo ca-
panepae tsane pijanacuayabetsia. ¹⁹ Nexata paxamë
Dioso pacatocopatsi ata itsamona papecabebiobiaex-
anaponaenexa, pëtsa pajamatabëcuenebëjamë. Tsite-
ca panevajënaeyabelia pexaniacuene paexanavana-
pare. Panajamatabëcuene copare papecaexanaenë,
Diosojavabelia, papecayavenonaenexa. Dioso cajena
pacuenia najumecapanepaeya jumaitsi, bajarapacue-
nia pacatoexanaena.

Pacuenia Dioso pejumecovënëtsivi muxujibatsi yabara pelivaisi

5 Aeconoxae ancianovi papecayajavajinavanapaevi,
muxujibijitsianë. Xanë ata rabaja ancianonë.
Pacuenia itsi bajarapaancianovi, xanë ata rabaja itsinë.
Taniji pacuenia Cristo cruzata bejiobiaexanatsi. Pamat-
acabi icatsia Cristo patsianica, daxitatsi, Cristo pijajivi-
tsi, nacabarëevetsiana xua Cristo evetsiana. ² Pacuenia
oveja pevetsivi xaniavaetsia baevetavanapa, bajara pi-
jinia pacuenia paxamë ata xaniavaetsia paevetavana-
pare Dioso pejumecovënëtsivi, pamona Dioso paca-
tocopata panetoevetsinexa. Jamatabëcuenebarëyaya
Dioso pejitsipaecuenia patoetevavanapare Dioso pe-
jumecovënëtsivi. Pëtsa pajamatabëjumaitsimë: “Apo
jitsipae atanë tatoevetsinexa Dioso pejumecovënëtsivi,
itsiata toevetsianajë. Tsipaji Dioso netojitsipa tato-
evetsinexa,” pajamatabëjamë pëtsa. Pëtsa paja-
matabëjumaitsimënu: “Tanematamotsinexa toevet-
sianajë,” pajamatabëjamë pëtsa. Paxamë paneja-
matabëëthëtojavavetsina panejitsipaexae Dioso pe-
jumecovënëtsivi panetoevetsinexa, patoetevavana-

pare. ³ Pamona Dioso pacatocopata paneto-
evetsinexa, bajarapamona pëtsa bepapijatuxanevimë
panataneme saya jema paneitorobabiabinexa. Biji ra-
jane xaniavaetsia patsitajinavanapare pacuenia pato-
jitsipame bajarapamona pejinavanapaenexa. ⁴ Nexa-
ta pamatacabi icatsia Cristo patsianica, ponë jane baja
pepo vajanacaevetsinënexa, nacarajutsiana pini-
jicuene. Xua Cristo nacarajutsiana, apo vereverecae
tsane daxita matacabijavabelianexa.

⁵ Paxamë papevëjëavimë, pacuenia ancianovi
pacaitoroba, pajumecovënëtabiabare. Pacaejivimë
canacujitsia namataenetsia panayavenonabiabianame
beveliajamatabëcuenevi nataeya. Bajarapacuenia
panataema tsipaji raja Dioso pejumelivaisibaxutota ju-
maitsi mapacueniaje:

Dioso apo yavenona pamona beayaija-
matabëcuenevi penataevi. Itsiata baitsi jane Dioso
pitaxutotsoniataexae, pexaniajamatabëcuene
yavenona pamona beveliajamatabëcuenevi penatae-
vi, jai Dioso pejumelivaisibaxutota.

⁶ Nexata saya paxamë beveliajamatabëcuenevi
panataema ayaijamatabëcuenenë Dioso pitabarata.
Nexata Dioso pecaëjëtsimatacabita, paayaija-
matabëcuenevimë pacaexanaena. ⁷ Dioso papecaasi-
vaxae, paevetaponapona. Bajaraxuata daxita pane-
jamatabëcuenebëjajava, pacopare. Pavajëre Diosojav-
abelia papecayavenonaenexa.

⁸ Nayajivitaeyanua pajinavanapare panijavajabit-
saenë, dovathi, papecayamaxëitojorobianiva. Pacue-
nia nevëthë itsa pijani, jaitaponapona pexaeyabu-
atsinënexa, bajarajamatabëcueneitsi dovathi pa-
papecayamaxëitojorobinexa. ⁹ Paepatota dovathi ja-
matabëpacayamaxëitojoroba panecopabinexa Jesús
pelivaisi panejumecovënëtsijava, bajarapaepatota pa-
jamatabëcuenesaëmëre Jesús pelivaisi panejumecov-
ënëtsijava. Diosojavabelia najamatabëcuene copatsi-
aya dovathi panayajiviitavere. Itsamona itsa
pacabebiobiaexana dovathi pejamatabëcuene-
ta, panajamatabënapire pacuenia itsamona ata, Dioso pe-
jumecovënëtsivi, daxitanacuanëjava dovathi peja-
matabëcuene ta bejiobiaexanapona. ¹⁰ Itsiata baitsi
jane saya caepatoyo Dioso pacacopatsiana pa-
papecabebiobiaexanaenexa. Bajaraxuacujinae Dioso
pacajamatabëcueneasaëyaexanaena. Bajaraponë
Dioso vajanacayavenonaenë daxitacuenejavabelia.
Nacajunatanua Jesucristo yajava athëbëtatsia va-
janacayajavaeacena, penivenivenaenacuataatsia,
daxitamatacabijavabelianexa. ¹¹ Dioso baja cajena dax-
itacuene pevetsinë daxitamatacabijavabelianexa. Ba-
jara itsi tsane.

Pacuenia Pedro toyaquina peveretsinexa baja petoy- aquinaelivaisi mapabaxutotaje yabara pelivaisi

¹² Silvano betajuyapijinë taniji bajaraponë ata Dioso
pejumecovënëtsixae. Silvano yaquinaeyaexanajë pali-
vaisi pacatoitorobijitsiatsilia. Bajaraponë ponaejitsia
baja paxamëjavabelia. Nexata pacatoyaquinatsi ma-
pabaxutoje patacajamatabëcuene asaëyaexanaenexa.

Dioso vajanacayavenonabiabixae, yapëtanetsi baja xaniajai pepacuene Dioso vajanacaasivacuene. Bjaraxu-ata pacabejiochiaexanabiabi ata, pajamatabëcuene-saëmëre tsavanapae paneyapëtaexae baja bjarapacuene.

¹³ Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta papijajivinexamë, bjarapacuenia

bjarapamonae ata Dioso itapetatsi pijajivinexa. Marcos, ponë betaxënatocuenia tataenë, bjaraponë ata pacajamatabënajina. ¹⁴ Namataenetsia naasivaya panabajacobare bepanacaemonaemë panenataexae.

Pacatojitsipatsi daxita paxamë jamatabëcuenex-anepanaeya panejinavanapaenexa Jesucristo papijajivixaemë. Bjarapacuenia itsi tsane.

2 SAN PEDRO

Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

1 Xanë Simón Pedronë, Jesucristo taneitorobicuenia tatonacuenebaponaponaenë. Nitorobanua jivi tatsipaebabiabinexa Jesucristo pelivaisi. Pacatoy-aquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacapanepaenë, nacaneconimatamota baja. ² Pacatovajëtatsi Diosojavabelia bitso papecayavenonaponaenexa daxitacuene yabara. Pacatovajëtatsinua jamatabëcuene xanepanaeya panejinavanapaenexa. Bajarapacuenia Dioso pacayavenonaponaena panevajënaeyabelia, Dioso itsa pajamatabëcuenyapëtaeponaename, vajatuxanenë Jesucristo ata itsa pajamatabëcuenyapëtaeponaename.

Pacuenia Dioso pejumecovënëtsivi jamatabëcueneitsi tsavanapae yabara pelivaisi

³ Dioso, ponë nacajunata pijajivinexatsi, yapëtanetsi baja bitso ayajamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcueneitajëta bitso ayajamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. ⁴ Bajarapacuenia Dioso pinijicuene pexanae javanë pexanaexae mapanacuataje, nexata yapëtanetsi Dioso xaniajai vajanacapanepae javanexa pacuenia najumecapanepaeya jumaitsi. Dioso vajanacapanepae javanexa pinijicuene bitso. Jumecovënëtatsi Dioso vajanacapanepae javanexa. Nexata Dioso nacayajavaponapona. Bajaraxuata Dioso pesaëta nacajamatabëcuene asaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso ja-

matabëcueneitsi tsaponapona, bajara vaxaitsi atajamatabëcueneitsi tsavanapae tsane. ⁵ Nexata pacuenia Dioso jamatabëcueneitsi tsaponapona, bajara panejamatabëcueneitsinexa, asaëyata Dioso pajumecovënëtaeponaename, nexata icatsia itsajava payapëtaeponaename. Asaëyata paexanavanapare epexaniacuene. Asaëyata itsa paexanavanapaenexa epexaniacuene, nexata icatsia orijibia pajamatabëcuenyapëtaeponaename Dioso. Nexata payapëtaenexa pacuenia Dioso pacatojitsipa asaëyata panetoexanavanapaenexa. ⁶ Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaenexa panenajamatabëcuene cataitsinexa pibisiacuene panenajamatabëxainae yaniva. Paneyapëtaecujinae panenajamatabëcuene cataitsinexa pibisiacuene panenajamatabëxainae yaniva, icatsia payapëtaenexa dovathi pejamatabëcuene bajayajebi pacajamatabëcuene jëtaponae ata, asaëyata panenajamatabëcuene saëtsinexa ë Diosojavabelia. Paneyapëtaecujinae dovathi pejamatabëcuene bajayajebi pacajamatabëcuene jëtaponae ata, asaëyata panenajamatabëcuene saëtsinexa ë Diosojavabelia, icatsia payapëtaenexa xaniavaetsia panejinavanapaenexa pacuenia Dioso pacatojitsipa. ⁷ Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaenexa asaëyata panenayavenonaenexa itsamonae ata Dioso pejumecovënëtsivi. Paneyapëtaecujinae paneyavenonaenexa itsamonae ata Dioso pejumecovënëtsivi, icatsia payapëtaenexa asaëyata namataenetsia bitso panenasi-vanexa bajarapamonae javabelia.

⁸ Daxita bajaraxua asaëyata panevajënaeyabelia itsa paexanavanapaenexa, nexata pacuenia Dioso jamatabëcueneitsi tsaponapona, bajara pajamatabëcueneitsimë tsane. Bajarapacuenia asaëyata itsa paexanavanapaenexa, nexata pajamatabëcuene vitsabaponaenexa Dioso panejumecovënëtsijava. Nexata Dioso ata tsitanepanaenatsi xua patonacuene bavanapame. Nexata vajatuxanenë Jesucristo panejamatabëcuenyapëtaejava, apo panacueratsimë tsane. ⁹ Itsiata baitsi jane pajivi apo exanae tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevecuaajibiaexanae javatsi pibisiacuene pexanaeconimi. ¹⁰ Tajamonae, bajaraxuata pacaasaëmëre tsavanapae Dioso panejumecovënëtsijava, jivijavabelia panetsitanaitajëtsinexa Dioso papecajunatsijava, papecaitapetsijava ata papijajivinex-

amë. Nexata bajarapacuenia itsa paexanavanapae-name, Dioso panejumecovënëtsijavavecua, apo pajopaemë tsane. Pacacapanepaena Dioso. ¹¹ Nexata Dioso pacatocopatsiana panejonenexa vajatuxanenë Jesucristo vajanacacapanepaenënexa, pijanacuayabetsia, apo pevereverecaenacuayabetsia, paneyajavajinavanapaenexa.

¹² Daxita rabaja bajaraxua payapëtaneme. Pajamatabëcuensaëmënuua baja panejumecovënëtsijava pexaniajailivaisi. Itsiata icatsia pematatsënëa pacanajamatabënapsiaexanaponatsi. ¹³ Abaxë tasaëtsaponaponaepato mapanacuataje, netsitaxanepana patacamuxujobinexa, bajarapacuenia patacanajamatabënapitsia exanaponaenexa. ¹⁴ Tsipaji baja vajatuxanenë Jesucristo tajëvelia neyapëtaeyaexana bepijia tatëpaejavanexa. ¹⁵ Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniava. Nexata itsa tējapjē, paxamë tavënamuto panenajamatabënapitabiabinexa pacuenia pacamuxujobatsi.

Pacuenia Jesucristo pijajivijavabelia tsitanajamatabëcueneitajëta ayaijamatabëcuene pexainaenëcuene yabara pelivaisi

¹⁶ Imata vajatuxanenë Jesús pelivaisi itsa pacatsipae-batsi, xaniavaetsia pacatsipaebatsi mapacueniaje: "Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica," pacajaitsi. Saya jivi pejamatabëcueneta penajumetsënëtsilivaisi, apo pacatsipaebitsi. Tsipaji baja pataitaxutota pataniji vajatuxanenë ayaijamatabëcuene pexainaenëcuene.

¹⁷ Xaniavaetsia baja cajena pajumetaniji pamatacabi paxa Dioso athëbëvetsica barëcuaicuaijaiti. Bajarpaepatota daxitanë Cristo nivenivenareca. Athëbëvetsica paxa Dioso jumaitsitsica mapacueniaje: "Mara ponë taxënatoje, tasivanë. Bitso sivajamatabëcuenebarëyanë," jaitsica paxa Dioso athëbëvetsica. ¹⁸ Vajatuxanenë Jesucristo payajavanubenajë petsutojumata, itsajota jane baja paxa Dioso athëbëvetsica barëcuaicuaijaititsica. Nexata bajarapatsutojumata paxanë patajacuata pajumetaniji vajatuxanenë Jesucristo paxa Dioso athëbëvetsica pebarëcuaicuaijajavatsitsica.

¹⁹ Nexata pataniji. Payapëtanijinua. Xua bajayata Diosojumepaebivimi profetavi tajëvelia vajunupaeba pecopiapatsinexa, bajaraxua jane baja aeconoxae copiapata. Paxamë pibisiacuene panenayajivitaenexa, pajumecovënëre profetavimi pepaebilivaisi. Profetavimi pepaebilivaisi, pexaniajailivaisixae, belámpara picani. Pacuenia lámpara itayota pitaquirijavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovënëre xaniavaetsia profetavimi pepaebilivaisi. Nexata bajarapalivaisi pacajamatabëcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabëcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarëyamë tsane pamata-

cabi icatsia Jesucristo patsianica. ²⁰ Xaniavaetsia pacanaëjëre daxitacuenavecua paneyapëtaenexa mapalivaisije. Daxita xua copiapatsijitsia mapanacuataje, tajëvelia Dioso pejumelivaisibaxutota vajunupaeba. Itsajivi ata cajena apo caëjëpaetsi saya pejamatabëcueneta bajaraxua xaniavaetsia pevajunupaebinexa itsamonaejavabelia, itsamonae ata peyapëtaenexa pajamatabëcuenelivaisi xaina bajaraxua. Matapania pajivi Espiritu Santo yapëtaeyaexanatsi, caëjëpatsi xaniavaetsia pevajunupaebinexa bajaraxua.

²¹ Bajayata Diosojumepaebivimi profetavi tajëvelia itsa vajunupaeba daxita xua copiapatsijitsia mapanacuataje, pejamatabëcueneta apo exanae bajarapalivaisi. Profetavimi Dioso pijajivixae, pacuenia Espiritu Santo yapëtaeyaexanatsi, paebabiaba.

Pacuenia Dioso pejumecovënëtsivi muxujobatsi penajumetsënëtsilivaisi petsipaebaonaevi pejumecovënëtsiyaniava yabara pelivaisi

2 Bajayata itsamonae tsipaebaona penajumetsënëtsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamëjava. Itsamonae pacatsipaebiana penajumetsënëtsilivaisi. Bajarapamonae yamaxëto-jorobiaya pacatsipaebiana penajumetsënëtsilivaisi. Nexata bajarapalivaisita pacacopabiaexanaena Dioso panejumecovënëtsijavami. Bajarapamonae apo pejumecovënëtsivi tsane vajatuxanenë Jesucristo, ponë picani sivatëpatsi pecapanepaenexatsi. Bajarapacuenia pexanaexae tsane bajarapamonae, nexata bepijia Dioso verebiabiana bajarapamonae. ² Bajarapamonae pemitota pibisiacuene exanavanapaena. Nexata bajaraxua yabara jumaiti tsane: "Apo itsacuene itsiata, bajaraxua exanae atatsi," jai tsane bajarapamonae. Nexata ayabitsaëto paxamëyajuvënëvi jumecovënëtsiana. Naexanaenanua papibisiacuene bajarapamonae exana. Nexata bajarapacuenia paxamëyajuvënëvi pibisiacuene petsitaexanaexae tsane, pamonaë Dioso apo pejumecovënëtsivi pibisiacuena baracuicuaijai tsane pexanialivaisi, Jesucristo pelivaisi. ³ Nexata pamonaë penajumetsënëtsilivaisi tsipaebaonaena, bitso jitsipaena palata. Bajaraxuata pacatsipaebiana penajumetsënëtsilivaisi papecatsipaebijamatabëcuene papecavecuapitsinexa panijapalata. Itsiata baitsi jane Dioso tajëvelia najamatabëcuenevereta bajarapamonae penaneconitsiaexanaenexa. Nexata bajarapamonae bajarapitsixae tsane, pepacuene jemata Dioso naneconitsiaexanaena.

⁴ Angelevi ata baja cajena itsa naneconita, aneconi-jibia Dioso apo copatsi. Angelevi ata itsa naneconita, nexata Dioso xuaba infiernojavabelia. Nexata bajarajota, pitaquirinacuata, cëbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexainaevi. ⁵ Dioso cajena aneconi-jibia apo copatsi bajayatami ata pamonaë pibisiacuene exana. Dioso ira bubutsiaexana bajarapamonae penaxuabinexa. Caenë, Noépijinë, Dioso ca-

panepa pijamonae yajava, siete pajiviyobeje. Noépijiné picani itavetabiaba jivi pibisiacuene pexanaeyaniva.

⁶ Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaxana bajarapatomaramibeje. Tsipaji bitso pibisiacuene exana bajarapatomaramibejepijivi. Bajarapatomaramibeje nacopata eipumana. Bajarapacuenia Dioso verebiaba bajarapamonaemi, pamonaecotocaevi jinavanapa, peyapëtaenexa, bajarapamonaeta pibisiacuene pexanaeyaniva. ⁷ Pamatacabi Dioso verebiaba bajarapatomaramibejepijivi, caenë, Lotpijinë, Dioso capanepa pexaniacuene pexanabiabixae. Lotpijinë itsa taeyabiaba bajarapamonaemi bitso pibisiacuene pexanaejava, nexata bitso sivanajamatabëxainabiaba. ⁸ Lotpijinë pexaniacuene pexanaenë, bajarapamonaemi tuatuajëta naponapona. Nexata caematacabi canacujitsia Lotpijinë bitso sivanajamatabëxainabiaba, itsa tane bajarapamonaemi pibisiacuene pexanaejava, itsa vënëlivaisitanenua pibisiacuene pexanaejava. ⁹ Bajaraxuata vaxaitsi baja yapëtanetsi mapacueneye. Vajatuxanenë caëjëpatsi pejamatabëcuenesaëyaxanaenexa pajivi najamatabëcuenecopata vajatuxanenëjavabelia. Nexata pajivi najamatabëcuenecopata vajatuxanenëjavabelia, dovathi itsa jamatabëcuenëjëtatsi, vajatuxanenë jamatabëcuenesaëyaxana. Vajatuxanenë caëjëpatsinua pibisiacuene pexanaevi, nabejibitsiaya pejinavanapaeyaxanaenexa, mapanacuataje abaxë itsa asaë tsavanapae. Bajarapacuenia vajatuxanenë nabejibitsiaya jinavanapaeyaxanaena penaneconitsiaexanaenexa icatsia petëpaecujinae ata, pamatacabi naneconitsiaexanaena daxita pijaneconi pexanaevi.

¹⁰ Pamonaebi bitso casaë tsavanapae pibisiacuene pexanaejava pijacuata penatojitsipacuenia, bajarapamonaebi bitso ayaiacuenia Dioso naneconitsiaexanaena itsamonae penaneconitsiaexanaejava matatoxenetsia. Pamonaeta apo jumecovënëtsi vajatuxanenë pevet-sicuenetsi, bajarapamonaeta Dioso bitso ayaiacuenia naneconitsiaexanaena. Pamonaepenajumetsënëtsilivaisi petsipaebaponaevi, apo yayatae itsamonae ata. Ajamatabëcuenetajanua. Apo jumejunavinua bajarapamonaebi pibisiacuenia pebaracuaicuaijainexa ángelevi. ¹¹ Angelevi biji picani bitso piasaëvi penajumetsënëtsilivaisi petsipaebaponaevi matatoxenetsia. Nexata ángelevi vajatuxanenë pitabarata pejinavanapaexae, bitso piasaëvi ata penajumetsënëtsilivaisi petsipaebaponaevi matatoxenetsia, itsiata pibisiacuenia apo baracuaicuaijai penajumetsënëtsilivaisi petsipaebaponaevi.

¹² Pamonaepenajumetsënëtsilivaisi petsipaebaponaevi, beveliamatabëcuenevi saya. Pacuenia saya jinavanapa unupijidujuai, bajara saya jamatabëcueneitsi bajarapamonaebi. Apo najamatabëxainae pexanialivaisi. Saicaya xua jamatabëexana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaepenajumetsënëtsilivaisi petsipaebaponaevi, pibisiacuenia

baracuaicuaijai tsabiabi xaniavaetsia apo peyapëtaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajarapamonaebi. ¹³ Nexata Dioso bajarapamonaebi juya bejibia jinavanapaeyaxanaena. Tsipaji bajarapamonaebi itsamonae bejibiaexanabiaba. Bajarapamonaebi pibisiacuene itsa exanabiaba, barëya tsabiabi. Bajarapamonaebi apo pacajamatabëcuenejëpae ata, nanacaetuatsiana itsa panacaetuataeme. Nexata yamaxëitojorobiaya pacayajavanabanebiabiana fiesta paneexanaemat-acabi. Bajarapamonaebi pibisiacuene pexanabiabixae tsane, nexata panetuatuajëta bepiauxirajava tsane.

¹⁴ Bajarapamonaebi itsa tane petiriva, pibisiacuene jamatabëexanabiaba pevitota bejarapovajavabelia. Apo yabaracueranaebi pibisiacuene pexanaejava. Penajumetsënëtsilivaisi petsipaebaponaevi, pibisiacuene exanaeyaxanabiaba pamonaebi abaxë apo ajamatabëcuenesaë Dioso pejumecovënëtsijava. Bajarapamonaebi bitso jitsipa daxitacuene pexanaejava epamonaenexa. Bitso yapëtanenua pepitsinexa xua jitsipa. Nexata bajarapamonaebi Dioso bitso ayaiacuenia naneconitsiaexanaena. ¹⁵ Bajarapamonaebi baja Diosovecua naxuabiaya jinavanapa. Tsipaji baja copaba pexaniajailivaisi pejumecovënëtsijavami. Apo jumecovënëtsi Dioso. Nexata bajarapamonaebi cuenejëpa Diosojumepaebinëmi, profeta Balaampijinëmi, Beorpijinëmi pexënatoto. Balaampijinëmi bajayata itsamonae tsipaebatsi palata pibisiacuene picani pexanaenexa. Nexata baja picani Balaampijinëmi jejai pibisiacuene pexanaenexa. ¹⁶ Itsiata baitsi jane Balaampijinë Dioso itavetatsi bajarapapibisiacuene bitso pexanaeyaniva Dioso pitabarata. Balaampijinë pijaburrota yanajetaruca. Dioso cuaicuaijaiyaxana burro. Nexata pacuenia jivitonë bacuaicuaijai, bajarapacuenia Balaampijinë pijaburro barëcuaicuaijaitsi pitavetsinexatsi pibisiacuene pexanaeyaniva. Nexata picani xua Balaampijinë jamatabëexana, copata baja.

¹⁷ Pamonaepenajumetsënëtsilivaisi petsipaebaponaevi, apo jumenamatamotsi. Yapëtanetsi pacuenia baitsi meramatathaibëmi itsa tseveca. Meramatathaibëmi itsa tseveca, apo jamatabëcuene yavenonae itsajiviyo ata. Tsipaji itsajivi mera jitsipae ata, piapaenexa apo puatsi bajarajota. Bajara pijinia itsi pamonaebi petsipaebaponaevi penajumetsënëtsilivaisi. Itsajivi ata apo jamatabëcuene yavenonae bajarapamonaebi petsipaebilivaisita. Pacuenia itarërëbo ata jovibota xaniavaetsia caecovëta apo rucae, bajara jamatabëcueneitsi bajarapamonaebi. Caejamatabëcuene apo xainae. Nexata Dioso bajarapamonaebi bitso ayaiacuenia naneconitsiaexanaena. Bajarapamonaebi pitaquirinacuata naneconitsia jinavanapaena daxitamatacabijavabelianexa. ¹⁸ Bajarapamonaebi ayaijamatabëcuenevi nataeya cuaicuaijai tsabiabi. Itsiata baitsi jane saya natsiquejemalivaisi cuaicuaijai tsabiabi. Bajarapamonaebi yamaxëitojorobiaya jumai tsabiabi: "Apo itsacuene raja apo payaiyatae atamë petiriva. Pibisiacuene itsa jamatabëpaexaname panevitota petirivajavabelia,

paexanare," jai tsabiabi bajarapamonae. Bajarapacuenia bajarapamonae othopaeyaexanapona pamonaexanajumecovënëtsivi Dioso. Tsipaji pibisiacuene exanaeyaexanapona. ¹⁹ Bajarapamonae yamaxëitojorobiaya jumai tsabiabinua: "Itsa panejumecovënëtsianame patacatsipaebilivaisi, nexata pacatoxanepanaena paneexanabiabinexa daxitacuene," jai tsabiabi pamonaepenajumetsënëtsilivaisi petsipaebaponaevi. Itsiata baitsi jane bajarapamonae apo jamatabëcuenecaëjēpaetsi daxita xua pexaniacuene pexanaenexa. Saya ëpibisiacuene exanabiaba. Bajaraxuata Dioso bajarapamonae verebiabiana. Tsipaji bajarapamonae pibisiacuene exanabiaba pijacuata penatojitsipaecuenia, pacuenia pejamatabëcuene itorobatsi. Caejivitsi canacujitsi vajacuata vajanatojitsipaecuenia itsa exanaponatsi, vajajamatabëcuene beprijavivitonëtsi naexanatsi. Tsipaji pacuenia vajajamatabëcuene nacaitoroba, exanaponatsi. ²⁰ Pamonaexa baja yapëtane vajatuxanenë Jesucristo, ponë capanepaejitsiatsi pibisiacuene pexanaeconimivecua, bajarapamonae baja Dioso vecuaajibiaexanatsi pibisiacuene pexanaeconimi. Pajamatabëcuenemi ata jitsipaeyaexanabiabatsi pibisiacuene pexanaenexa, bajarapajamatabëcuenemi ata baja vecuaajibiaexanatsi. Itsiata baitsi jane bajarapamonaeajuvënëvi icatsia pibisiacuene itsa exanapona, nexata icatsia bajarapajamatabëcuene pejumecovënëtaponaexae, bitso naneconitsiana Diosojavabelia. Nexata jane baja copiaya pexainaeconimi matatoxenetsia, bitsoyo ayaineconi natsixainaena. ²¹ Pamonaexa copaba pexaniajailivaisi pejumecovënëtsijavami, bitso ayaineconi natsixaina Diosojavabelia. Bajarapamonae itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tsipaji apo yapëtae tsipae bajarapalivaisi. Nexata baja peyapëtaexae bajarapalivaisi, pecopabixaenua pejumecovënëtsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonae itsa apo tsipaebi tsipaetsi bajarapalivaisi bevelia penaneconitsinexa Diosojavabelia. ²² Bajayatapijilivaisi jumaitsi mapacueniaje: "Aviri peyacabicujinae, icatsia nayacabixane. Marrano pijinia tsorobota peboacaecujinae, itsa matavanetsi pexaniamerata, pematavaecujinaetsi, icatsia caevëalia tsorobota boca," jai bajayatapijilivaisi. Xaniajai baja cajena bajarapalivaisi. Bajara pijinia jamatabëcueneitsi pamonaexa icatsia caevëalia pibisiacuene exana.

Pacuenia icatsia Jesucristo patsijitsiatsica yabara pelivaisi

3 Tajamonae bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutobeje patacamuxujibinexa nexata xaniavaetsia panenajamatabëxainaenexa. ² Panajamatabënapire pacuenia Diosojumepaebivimi profetavi bajayata tajëvelia jumaitsi. Panajamatabënapirenuu pacuenia baja cajena apóstolevi pacatsipaeaba vajatuxanenë Cristo pelivaisi. Cristo, ponë papeca-

capanepaenënexa, copiaya tsipaeba apóstolevijavabelia. Nexata juya apóstolevi paxamëjavabelia pacatsipaeba. ³ Xaniavaetsia panamuxunaevere daxitacuenivecua paneyapëtaenexa mapacueneje. Nacua pecopiarucaevajënaeyotanexa, najetarubenaena itsamonae pecapocaponaevinexa pexaniajailivaisi. Bajarapamonae exanavanapaena pibisiacuene pacuenia pijacuata natojitsipa. ⁴ Bajarapamonae Cristo pepatsijavanexatsica apo pejumecovënëtsixae, najumequenetsiataeya saya jumaitsi tsane: "¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamonaexa jumecovënëta Cristo pepatsijavanexatsica, vajënaeetavanapa picani. Itsiata Cristo apo patsitsica. Nexata bajarapamonae belia baja tēpa Cristo patsinejevatsica. Daxitanacua abaxë itsiata tsitecanuca Dioso pexanaecujinae," jai tsane saya bajarapamonae apo pejumecovënëtsixae Cristo pepatsijavanexatsica. ⁵ Bajarapacuenia jumaitsi tsane tsipaji bajarapamonae apo canaëjētsi tsane pacuenia bajayata Dioso itoroba saya pijumeta itaboxo penaexanaenexa mapanacua yajavaje. Nexata mapairanexaje, manuamene tuatujëatsina Dioso ira jumapitsapaeyaexanaina. ⁶ Bajayata pijinia mapanacuae Dioso itsa bubutsiaexana, daxitajivi Dioso verebiaba merata. ⁷ Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanuca. Dioso abaxë xaniavaeta itsamatacabi isotota peveriapaenexa. Dioso isotota veriaepaena mapanacuae, itaboxo yajava, pamatacabi naneconitsiaexanaena daxita pijaneconi pexainaevi. Bajarapamatacabi Dioso naneconitsiaexanaena pibisiacuene pexainaevi. Dioso verebiabiana daxitacuene.

⁸ Tajamonae bitso patacaasivavi, pëtsa panacofënëtamemapacueneje. Vajatuxanenë saya tsitacaematacabitsi mil pavaibeje ata. Mil pavaibeje ata apo tsitabajajebitsi. Betsitacaematacabi tsanucaetsi saya vajatuxanenë. ⁹ Itsamonae jamatabëcuenenavëxaniabiaya jamatabëjumaitsi: "Dioso bitso cuenenajemata pexanaenexa pacuenia najumecapanepaeya jumaitsi," jamatabëjai. Vajatuxanenë raja apo cuenenajematsi. Xua raja vajatuxanenë bajayajebi becuenenajematsi, abaxë saya eveta jivi pejumecovënëtsinexatsi. Tsipaji vajatuxanenë apo jitsipae itsajivi ata pevecuanaxuabijavatsi. Vajatuxanenë raja jitsipa daxitajivi pecopabinexa pibisiacuene pexanabiabijava, penajamatabëcuenepeñëyorotsinexa Diosojavabelia.

¹⁰ Vajatuxanenë baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenë patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenë. Jemata patsianica. Nexata jane baja bajarapamatacabita itaboxo copiarucaena. Ayajume najumetsiana. Daxita athëbëpijicuene vereverecaena isotota. Mapanacuami je, daxita xua tanetsi mapanacuataje, yajavatajuena isotota.

¹¹ Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipaecuenia! ¹² Bepacopiaevetavanapame vajatuxanenë pepatsijavanexatsica. Vajatuxanenë pijacuene bepatonacuenebavanapame bepijia pepatsinexatsica. Pamatacabita vajatuxanenë patsianica, itaboxo vereverecaena isotota. Daxita athëbëpijicuene veriajaviana isotocotiata. ¹³ Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajëvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ëpexaniacuene exanavanapaena, xua Dioso tojitsipatsi.

¹⁴ Tajamonae bitso patacaasivavi, pejanaitaboxo, pejanairanua, panetaenexa, panecopiaevetavanapaeepato xaniavaetsia pajinavanapaename. Nexata pamatacabi vajatuxanenë icatsia patsianica, pacasivabarëya tsane. Bajarapacuenia pacasivabarëya tsane itsa pacacaxitajarabiana jamatabëcuenexanepanaeya aneconibia panejinavanapaejavata. ¹⁵ Pacanaëjere xua yabara abaxë vajatuxanenë apo patsitsica. Abaxë raja apo patsitsica daxitajivi apo pejumecovënëtsixae Dioso. Tsipaji daxitatsi vajatuxanenë jamatabënacacapanepa pijanacuayabetsia. Pacuenia daxitatsi vajatuxanenë jamatabënacacapanepa pijanacuayabetsia, bajaraxua vajaasivanë, vajabananë Pablo, peyapëtaenexa Dioso yavenonatsi. Nexata Pablo peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia. ¹⁶ Pablo baja cajena peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia. Pablo peyaquinaeli-

vaisianë, itsalivaisi ayapëbeje tsabiabi vajajumeyapëtaenexa xua yabara Pablo yaquina. Nexata palivaisi apo jumeyapëtaetsi, apo yapëtaetsi pajamatabëcuene-livaisi xaina. Nexata pamonaë xaniavaetsia apo jumeyapëtae Pablo peyaquinaelivaisianë, juya tsipaebabiaba itsamonaejavabelia apo jumeyapëtae ata. Pamonaë ata caejamatabëcuene apo xainae Dioso pejumecovënëtsijava, juya itsamonaejavabelia tsipaebabiaba Pablo peyaquinaelivaisianë. Nexata bajarapamonae itsamonaejavabelia itsa tsipaebabiaba, Pablo peyaquinaelivaisianë mataropotsia saicayacuenia tsipaebabiaba. Bajarapacuenia itsabaxutonëta ata, perubenaelivaisianë ata, bajarapamonae saicayacuenia mataropotsia tsipaebabiaba. Bajarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebiabianatsi.

¹⁷ Tajamonae bitso patacaasivavi, paxamë baja cajena tajëvelia payapëtaneme bajaraxua yabara. Bajaraxuata panayajivitaema pibisiacuene pexanaevi penajumetsënëtsilivaisi papecatsipaebiyanima. Tsipaji papecatsipaebilivaisita, pacajopaeyaexanaejitsipa Dioso panejumecovënëtsijavavecua. ¹⁸ Pacatojitsipatsi panejamatabëcuenesaë tsavanapaenexa Dioso panejumecovënëtsijava Jesucristo papecaitaxutotsoniataexae. Panevajënaeyabelia payapëtaeponarenuajajatuxanenë Jesucristo, ponë pacacapanepaejitsia pibisiacuene paneexanaeneconivecua. Jesucristojavabelia daxitajivi jumai tsabiabi tsane: “¡Xamë Jesucristomë, bitso cajena ayaijamatabëcuenenëmë!” jai tsabiabi tsane daxitamatacabijavabelianexa. Bajara itsi tsane.

1 SAN JUAN

Cristo vajanacajamatabëcuene asaëyaexanaenë yabara pelivaisi

1 ¹⁻² Pacatoyaquinatsi Dioso pexënato pelivaisi. Bajaraponë athëbëtatsia ponapona baja cajena pe-po bajayatami ata, itsa abaxë Dioso apo exanae mapanacuaje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajënuua patacobeta. Nexata bajaraponë pelivaisi pacatsipaebatsi. Bajaraponë matababi apo pevereveceajava pexainaenë. Paxa Dioso yajavaponapona. ³ Pacatojitsipatsi paxamë ata paneyajavajinavanapaenexa Dioso. Pacatojitsipatsi Dioso pexënato, Jesucristo, ata paneyajavajinavanapaenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. ⁴ Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

⁵ Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo piajamatabëcueneitaquirinë. ⁶ Bajaraxuata vaxaitsi jumaitsi atatsi: "Dioso raja vaxaitsi yajavajinavanapatsi," jai atatsi, itsiata pibisiacuene itsa exanavanapatsi, nexata najamatabëcuenecepaebatsi. Najumetsënëtatsi saya Dioso vajayajavajinavanapaejava. Najumetsënëtatsinua pexaniacuene vaxaexanaejava ata. ⁷ Itsiata vaxaitsi xaniavaetsia itsa jumecovënëtavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najujinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuajibiaexanaena daxita vajapibisijamatabëcuenemi.

⁸ Vaxaitsi pibisiacuene exanae atatsi, itsiata itsa jumaitsi: "Vaxaitsi cajena aneconijibitsi. Tsiipaji pibisi-

acuene apo exanaetsi," itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëceae. ⁹ Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanabiabanua. Bajaraxuata pibisiacuene vaxaexanaejavami, itsa navajunupaebatsi Diosojavabelia, nexata Dioso nacavecuajibiaexana pibisiacuene vaxaexanaeconimi. Nacavecuajibiaexananua daxita pibisijamatabëcuene vajaxinaejavami. ¹⁰ Vaxaitsi pibisiacuene exanae atatsi, itsiata itsa jumaitsi: "Vaxaitsi cajena caeto ata pibisiacuene apo exanaetsi," itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëceae. Bajarapacuenia itsa jumaitsi, nexata Dioso tanetsi bepenajumetsënëtsinë. Tsiipaji Dioso pejumelivaisibaxutota jumaitsi pacuenia daxitatsi pibisiacuene ëvajaexanaevi.

Cristo vajanacatocuaicuaijainë Diosojavabelia yabara pelivaisi

2 Tajamona, pacatoyaquinatsi mapalivaisije patacamuxujiobinexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuaijainë Diosojavabelia. Bajaraponë cajena caeto ata pibisiacuene apo pexanaenë. ² Jesucristo vajanacasivatëpaexae, nacavecuajibiaexana baja daxita pibisiacuene vaxaexanaeconimi. Itsiata ëvaxaitsi apo nacasivatëpae. Daxita mapanacuapijivije pibisiacuene pexanaecononi pevecuajibiaexanaenexa, Jesucristo sivatëpa.

³ ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi. ⁴ Itsajivi jumaitsi ata: "Xanë raja cajena Dioso yapëtaniji," jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëceaitsi. ⁵ Pajivi exanaponapona Dioso pitorobicueniatsi, bajarapajivi pepacuene jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata itsa jumecovënëtavanapaenatsi Dioso, nexata nayapëtaevanapaenatsi vajayajavajinavanapaejava Dioso. ⁶ Pajivi jumaitsi: "Xanë rabaja Dioso yajavaponapona," jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuenia jivi pejumecovënëtsinexa, yabara pelivaisi

⁷Tajamonae, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumejëpa. ⁸Nexata mapalivaisije pacatoyaquinatsi pejanalivaisicuenia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëtavana pame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuajibi baja tsaponae. Tspaji bajarapalivaisita Jesucristo nacajamatabëcueneitayotapona.

⁹Itsajivi jumaiti ata: "Xanë raja Dioso pitorobicuenia exanaponapona," jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneitaquiri tsaponapona.

¹⁰Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneitayotatsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeyaexanaenexatsi.

¹¹Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneitaquiri tsaponapona. Apo yapëtae pibisiacuene pexanaejava. Apo yapëtaenua itsabelia caponaejitsiatsi pibisiacuene pexanaeconi yabara. Bajara jamatabëcueneitsi tspaji pevajënaeyabelia dovathi yaajamatabëcueneitaquiriaya exanaponatsi pijamatabëcueneitaquirixae.

¹²Tajamonae, pacatoyaquinatsi mapalivaisije. Tspaji baja Dioso pacavecuajibiaexana pibisiacuene paneexanaeconimi Jesucristo papecasivatëpaexae.

¹³Patavajënaepijivimë, pacatoyaquinatsi mapalivaisije. Tspaji baja payapëtaneme Jesucristo, ponë baja cajena athëbëtsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, pacatoyaquinatsi mapalivaisije. Tspaji baja dovathi pajamatabëcueneamoneyabame.

Bepataxicueniamë patacataevi, imata baja cajena itsabaxuto pacatoyaquinatsi. Tspaji baja vaxa Dioso payapëtaneme. ¹⁴Patavajënaeyapijivimë, imata baja cajena itsabaxuto pacatoyaquinatsi. Tspaji baja payapëtaneme Jesucristo, ponë baja cajena athëbëtsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, imata baja cajena itsabaxuto pacatoyaquinatsi. Tspaji baja pajamatabëcuenesaëmë Dioso panejumecovënëtsijava. Pacatsijamatabëca baja Dioso pejumelivaisi. Nexata baja dovathi pajamatabëcueneamoneyabame.

¹⁵Pëtsa pajitsipame mapanacuapijicueneje. Pëtsa pajitsipame mapanacuapijipibisiacuene ataje. Itsa pajitsipaejitsipame mapanacuapijipibisiacueneje, nexata apo pajitsipaemë tsipae Dioso. ¹⁶Pajamatabëcuene jivi

jitsipaeyaexanabiabatsi pibisiacuene pexanaenexa, bajarapajamatabëcuene apo pitsapae Diosojavaverena. Bajarapajamatabëcuene pitsapa mapanacuataje. Pajamatabëcuene ata jivi najamatabëxainaeaexanabiabatsi penaxinaeyabinexa xua itajitsipa, bajarapajamatabëcuene ata pitsapa mapanacuataje. Pajamatabëcuene ata jivi najamatabëxainaeaexanabiabatsi beayaijamatabëcuenevi penataenexa, bajarapajamatabëcuene ata pitsapa mapanacuataje. Daxita bajarapajamatabëcuene pitsapa mapanacuataje. Bajaramatabëcuene apo pitsapae vaxa Diosojavaverena. ¹⁷Imoxoyo rabaja pevajënae tsaponae pevereverecaenexa mapanacuaje. Nexata daxita pajamatabëcuene jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamona exanavanapa Dioso pitorobicueniatsi, jinavanapaena daxitamatacabijavabelianexa.

Pexaniajailivaisi, penajumetsënëtsilivaisi ata, yabara pelivaisi

¹⁸Tajamonae, imoxoyo rabaja pevajënae tsaponae pevereverecaenexa mapanacuaje. Pavënëlvaitaneme rabaja pacuenia najetarucaejitsia ponë cueneitoyatsi Cristo. Pata rabaja cajena ayaibitsaëto, pamonae Cristo cueneitoyatsi. Bajarapamonae pepatsixae, yapëtanetsi imoxoyo baja pevajënae tsaponae pevereverecaenexa mapanacuaje. ¹⁹Pamonae Cristo cueneitoyatsi, bajarapamonae vaxaitsiyajuvënevimi picani. Itsiata baja nacavecuapitsapa. Bajarapamonae pepacuene apo vaxaitsiyajuvënevimi cajena. Itsa peneta bajarapamonae vaxaitsiyajuvënevimi tsipae, nexata tsitecaeya najinavanapaejitsipa vaxaitsita. Bajaraxuata bajarapamonae nacavecuapona baja. Nexata daxitajivi xaniavaetsia yapëtaneme bajarapamonae pepacuene Dioso apo pejumecovënëtsivicuene.

²⁰Cristo rabaja pacarajuta Espiritu Santo. Bajaraxuata daxita paxamë payapëtaneme baja pexaniajailivaisi, Dioso pejumelivaisi. ²¹Pacatoyaquinatsi mapabaxutoje tspaji baja payapëtaneme pexaniajailivaisicuenia Jesús pelivaisi. Nexata apo pacatoyaquinaetsi matapania patacayapëtaeyaexanaenexa pexaniajailivaisicuenia Jesús pelivaisi. Tspaji baja bajaya payapëtaneme bajarapalivaisi pexaniajailivaisicuenia. Payapëtanemenua baja Jesús pelivaisijavaverena acuenebi pepitsapaejava penajumetsënëtsilivaisi. Tspaji pexaniajailivaisijavaverena acuenebi pepitsapaejava penajumetsënëtsilivaisi.

²²¿De jane peneta jumaiti pepo penajumetsënëtsijivi? Pajivi peneta pepo penajumetsënëtsijivi, jumaiti mapacueniaje: "Jesús raja apo Cristo, ponë Dioso athëbëvetsica itorobijitsiatsica vajanacapanepaenexa," jai. Bajara peneta pejumaitisijivi, pepo penajumetsënëtsijivi jane baja. Bajarapajivi Cristo pijavajabitsaëjivi. Bajarapajivi apo jumecovënëtsi Dioso. Apo jumecovënëtsinua Dioso pexënato ata. ²³Pajivi peneta jumaiti: "Jesús raja Dioso apo pexënato," jai, bajarapajivi Dioso apo yajavaponaponaetsi. Pajivi pi-

jinia peneta jumaitsi: "Jesús raja Dioso pexënato," jai, bajara jane pajivi Dioso yajavaponaponatsi.

²⁴ Bajaraxuata paxamë baja palivaisi pajumetaneme panejumecovënëtsijavaverenacujinae, panevajënaeyabelia tsiteca pacajinavanapare. Bajarapalivaisi tsiteca itsa pacatsijamatabëecaena, nexata panevajënaeyabelia payajavajinavanapaename Dioso. Payajavajinavanapaenamenua Dioso pexënato ata, Cristo. ²⁵ Jesucristo rabaja najumecapanepaeya jumaitsi vajanacaratjinxexa maticabi apo pevereverecaejava.

²⁶ Pacatoyaquinatsi mapabaxutoje patacayapëtaeyaexanaenexa panenayajivitaenexa pamonaë jamaatabëpacayamaxëitojoroba. ²⁷ Paxamë rabaja Espiritu Santo pacatsijamatabëeca, ponë pacarajuta Jesucristo. Bajaraxuata apo panamatavenonaemë baja itsajivi ata papecatsipaebinxexa paneyapëtaenexa daxitacuene. Tsipaji baja daxita xua Espiritu Santo pacayapëtaeyaexanapona, pexaniajaicuene baja cajena. Penajumetsënëtsicuene baja cajena Espiritu Santo apo pacayapëtaeyaexanapona. Pacuenia Espiritu Santo pacayapëtaeyaexanapona, bajarapacuenia pajumecovënëtaaponare panevajënaeyabelia paneyajavajinavanapaenexa Cristo.

²⁸ Tajamonae, ajamatabëcuenesaëya yajavajinavanapaenatsi Cristo. Bajarapacuenia yajavajinavanapaenatsi vajacujunaviyaniva pamatacabi bajaraponë patsianica. Nexata apo aura tsanetsi bajaraponëjavabelia pamatacabi patsianica. ²⁹ Paxamë rabaja payapëtaneme Jesucristo, Dioso pexënatoxae, pexaniacuene pexanabiabijava. Nexata bepayapëtaneme mapacueneje. Pamonaë peneta pexaniacuene exana, bajarapamonae Dioso pexi.

Dioso pexi yabara pelivaisi

3 Pacanaëjere vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapëtaexae, nexata bajarapamonae vaxaitsi ata apo nacayapëtae Dioso pexicuenetsi. ² Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapëtaetsi abaxë pacuenia itsamatacabi vaxaitsi cueneitsijitsiatsi. Itsiata Cristo itsamatacabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejëpaenatsi. Tsipaji cuenetaenatsi pacuenia Cristo cueneitsi. ³ Cristo pibisiacuene apo pexanaenë caeto ata. Bajaraxuata daxita pamonaë copiaevetavanapa Cristo pepatsijavanexatsica, pevajënae tonajamatabëcuene xaniavaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumecovënëtsi palivaisi Dioso najumecopata jivi pejumecovënëtsinxexa. Pibisiacuene itsa exana, nexata Dioso pitavetsijava exana. ⁵ Payapëtaneme rabaja mapacueneje. Cristo patsica mapanacuayabetsicaje vajanacavecuajibiaexanaenexa pibisiacuene vajaexanaeoneconimi. Cristo baja cajena caeto ata pibisiacuene apo pexanaenë. ⁶ Bajaraxuata pajivi baja Cristo yajavaponapona, pibisi-

acuene apo exanaponapona. Pajivi tsiteca pevajënaeyabelia pibisiacuene exanaponapona, bajarapajivi apo tae baja cajena Cristo. Apo yapëtaenua cajena.

⁷ Tajamonae, pëtsa panacopatame itsajivi ata papecayamaxëitojorobinxexa. Pajivi exanabiaba pexaniacuene, Dioso pejitsipaecuene, bajarapajivi Dioso aneconijibia tanetsi. Pacuenia Cristo jamatabëcueneitsi, bajarajamatabëcueneitsi bajarapajivi. ⁸ Pajivi tsiteca pevajënaeyabelia pibisiacuene exanaponapona, bajarapajivi dovathi pijajivitonë tsaponapona. Dovathi pibisiacuene pexanaecujinae, apo copatsi. Tsiteca pevajënaeyabelia pibisiacuene exanaponapona mapanacuataje. Bajaraxuata Dioso pexënato patsica mapanacuayabetsicaje daxitajivi dovathi pejamatabëcueneta pibisiacuene pexanabiabijavami pijibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo exanaponapona. Tsipaji baja Dioso najamatabëcuenerajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi. ¹⁰ Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

Pacuenia vaxaitsi namataenetsia benaasivatsi tsavana-pae yabara pelivaisi

¹¹ Dioso baja cajena panejumecovënëtsijavaveliacujinae, pajumetaeyabiabame pejumaitsilivaisi mapacueneiaje: "Vaxaitsi namataenetsia benaasivatsi tsavana-pae," pejalilivaisi. ¹² Vaxaitsi nexata apo bitoyatsi itsamonae ata. Pacuenia bajayatami Caínpijinë itoya pejuyapijinëmi, bajara apo bitsitsi vaxaitsi. Caínpijinë dovathi pijajivitonë tsaponapona. Nexata beyaxuaba pejuyapijinëmi. Pacatsipaebijitsiatsi pacuene yabara Caínpijinë beyaxuaba pejuyapijinëmi. Caínpijinë dovathi pitorobicueniatsi, pibisiacuene exanaponapona. Pejuyapijinëmi pijinia pexaniacuene, Dioso pitorobicueniatsi, exanaponapona. Bajaraxuata Caínpijinë beyaxuaba pejuyapijinëmi.

¹³ Tajamonae, pëtsa pajamatabëcuenenabenajacame paxamë ata itsa pacaitoya mapanacuapijivije. ¹⁴ Vaxaitsi picani bajayata Dioso pitabarata jamatabëcuenetëpavanapatsi. Itsiata baja aeconoxae Dioso nacajamatabëcueneasaëyaexana vajanajamatabëcuenecopatsixae bajaraponëjavabelia. Yapëtanetsi baja cajena Dioso vajanacajamatabëcuene asaëyaexanaejava. Tsipaji itsamonae ata Dioso vajanajuajumecovënëtsivi, asivatsi tsavanapae. Pajivi apo asiva itsamonae ata, Dioso penajuajumecovënëtsivi ata, bajarapajivi Dioso pitabarata jamatabëcuenetëpaponapona. ¹⁵ Pajivi itoya itsajivi, Dioso penajuajumecovënëtsivi ata, bajarapajivi jamatabëcuenejëpaponapona jivibenë. Paxamë rabaja payapëtaneme mapacueneje. Jivibenë baja cajena apo xainae tsane maticabi apo pevereverecaejava. ¹⁶ Yapëtanetsi baja cajena mapacueneje. Jesucristo vajanacaasivaxae, nacopata pebeyaxuabinexatsi

vajaneconi yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaitsi si mapacueniaje: "Itsamonae nebeyaxuabijitsia ata tsane, yavenonaenäjë Dioso patanajuajumecovënëtsivi," bejamatabëjaitsi. ¹⁷ Ponë Dioso pejumecovënëtsinë, bitso pexainaenë pexinaejava, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaitsijava: "Xanë bitso Dioso jitsipajë tamatabëëthëtojavavetsina," pejaijava. ¹⁸ Tajamonae, "Asivanë raja itsamonae ata," apo bejaitsi saya vajacuibovojotota pexaniacuene toexanaenejevatsi bajarapamonaejavabelia. Biji rajane bajarapamonae vajanacayapëtaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaejavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Ajunavijibianua jivananapaenatsi Dioso pitabarata. Dioso baja cajena pexaniajailivaisi jivijavabelia petsipaebinë. ²⁰ Dioso baja cajena bitso ayaijamatabëcuene. Dioso peyapëtaenë daxitacuene. Bajaraxuata vaxaitsi jamatabëjumaitsi atatsi: "Xanë bitso ajamatabëcuenebejenë pibisiacuene taexanaejava yabara," jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniataenë. Tsiteca nacaasiva. Nacaevetanua. ²¹ Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. ²² Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtanapatsi pacuenia nacaitoroba. Pacuene yabara Dioso sivajamatabëcuenebarëya, bajarapacuene ata vaxaitsi exanavanapatsinua. ²³ Dioso raja nacaitoroba vajajamatabëjumaitsinexa mapacuenieje: "Jesús baja patsica, ponë copiaevetavanapatsi vajanacapanepaenexa. Bjaraponë Dioso baja cajena pexënato," vajajamatabëjainexa. Nacaitorobanua namataenetsia vajanaasivatsavanapaenexa. ²⁴ Pajivi jumecovënëta Dioso pitorobilivaisi, bajarapajivi Dioso yajavaponaponaena. Bajarapajivi ata pijinia Dioso yajavaponaponaenatsi. Yapëtanetsi pepacuene Dioso vajanacayajavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeyaexana pepacuene Dioso vajanacayajavaponaponaejava.

Espiritu Santo yabara, Cristo pijavajabitsaë ata, yabara pelivaisi

⁴ Tajamonae bitso patacaasivavi, itsamonae itsa pacajumai tsane mapacueniaje: "Espiritu Santo raja, ponë netsijamatabëeca, netsipaeba. Nexata juya bajarapalivaisi pacatsipaebatsi," itsa pacajai tsane, pëtsa abaxë caecuenia pajumecovënëtamë. Copiaya

abaxë pajamatabëcueneëjëbianame paneyapëtaenexa itsa xaniajai bajarapamonae Espiritu Santo petsipae-bilivaisitsi pacatsipaebiana. Bajarapacuenia pajamatabëcueneëjëbianame tsipaji raja daxitajava mapanacuajavaje yacaëjëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. Be-Dioso itajara pejumelivaisi petsipaebivicuenia, tsipaebanajetarubena. ² Nexata bajarapacuenia copiaya itsa pajamatabëcueneëjëbianame, payapëtaename pamonaes tsijamatabëcatsi Espiritu Santo. Pamonaes raja peneta pepacuene Espiritu Santo tsijamatabëcatsi, jumaitsi mapacueniaje: "Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje," jai peneta pamonaes pepacuene Espiritu Santo tsijamatabëcatsi. ³ Pamonaes peneta jumaitsi mapacueniaje: "Jesucristo raja Dioso apo pexënato," jai, bajarapamonae cajena apo tsijamatabëecaetsi Espiritu Santo. Bajarapamonae tsijamatabëcatsi ponë cueneitoyatsi Cristo. Ponë baja pavënëtlivaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje. ⁴ Tajamonae, paxamë rabaja Dioso papijajivimë. Nexata baja penajumetsënëtsilivaisi papacatsipaebivi, apo pacayamaxëitojorobicapanepae. Apo caëjëpaetsi papecayamaxëitojorobijava. Tsipaji ponë pacatsijamatabëeca, bajaraponë bitso piasaenë, ponë ponapona mapanacuajavaje, matatoxenetsia. ⁵ Pamonaes tsipaebapona penajumetsënëtsilivaisi, bajarapamonae saya Dioso apo peyapëtaevi. Bajaraxuata mapanacuapijicuene cacuaicuaijai. Nexata pamonaes bitso jitsipa maëpanacuapijicueneje, namuxunaevetabiabatsi. ⁶ Vaxaitsi raja Dioso pijajivitsi. Pajivi yapëtanë Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëtanë pajivi tsijamatabëcatsi Espiritu Santo. Espiritu Santo baja cajena jivi pexaniajailivaisi petsipaebinë. Bajara pijinia pacuenia nayapëtanë pajivi ata tsijamatabëcatsi dovathi. Dovathi baja cajena penajumetsënëtsilivaisi jivi petsipaebinë.

Dioso vajanacaasivanë yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëtanë Dioso. ⁸ Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. ⁹ Dioso raja vajanacaasivajava, nacayapëtaeyaexana mapacueniaje. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matacabi apo peverevereaejava vajaxainaenexa pexënato vajanacasivatëpaexae. ¹⁰ Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsi-

pa. Bajaraxuata Dioso nacatoitorobica pexênato cruza-ta vajanacasivatêpaenexa. Nexata Jesús vajanacasi-vatêpaexae, Dioso baja nacavecuajibiaexana daxita pibisiacuene vajaexanaeneconimi.

¹¹ Tajamonae bitso patacaasivavi, itsa Dioso bajara-pacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. ¹² Itsajivi ata cajena abaxê Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacaya-javaponapona. Dioso vajanacatojitsipaecuenia itsa-monae ata vajaasivanexa, Dioso nacajamatabêcuenesaêyaexanapona. ¹³ Vaxaitsi yajavajinavanapatsi Dioso. Bajara pijinia pacuenia Dioso ata nacaya-javaponapona. Yapêtanetsi pexaniajaicuene Dioso vajanacayjavaponapona. Tsipaji baja Dioso nacarajuta Espíritu Santo. ¹⁴ Vaxaitsi baja cajena tanetsi Dioso pexênato. Nexata vaxaitsi tsipaebabiabatsi itsamonae-javabelia Dioso pexênato pitorobijavatsica mapanacuayabetsicaje pecapanepaenexa daxita mapanacuapijivije. ¹⁵ Pajivi jumaitsi mapacueniaje: "Jesús raja Dioso pexênato," jai, bajarapajivi Dioso yajavaponapona. Bajarapajivi pijinia Dioso ata yajavaponapona.

¹⁶ Nexata vaxaitsi jamatabêcueneyapêtanetsi pacuenia bitso Dioso nacaasiva. Dioso cajena piasivanê daxitanacuapijivi. Pamonaes itsamonae ata namataenetsia naasiva tsavanapae, bajarapamonae Dioso yajavaponapona. Bajarapamonae ata pijinia Dioso yajavajinavanapa. ¹⁷ Nexata pacuenia Dioso nacatojitsipa itsamonae ata vajanasivatsavanapaenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacuene pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. ¹⁸ Itsa yapêtanetsi Dioso vajanacaasivajava, apo cjunavitsi itsacuenejala ata. Tsipaji Dioso itsa nacaasiva, nacavecuajibiaexana vajajunavijavami. Pajivi Diosojavabelia naneconita, yapêtane Dioso penaneconitsiaexanaejavanexatsi. Bajaraxuata daxitacuene cjunava. Pajivi cjunava daxitacuene, abaxê xaniavaetsia apo yapêtae pacuenia Dioso asivatsi. Bajaraxuata cjunava.

¹⁹ Vaxaitsi Dioso asivatsi tsipaji Dioso copiaya nacaasiva. ²⁰ Pajivi jumaitsi ata mapacueniaje: "Xanê raja Dioso asivanê," jai ata, itsiata itsa itoya itsajivi Dioso pejumecovênêtsijivi ata, nexata saya bajarapajivi penajumetsênêtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. ²¹ Pajivi asiva Dioso, bajarapajivi biasiva itsajivi ata, Dioso penajuajumecovênêtsijivi. Tsipaji baja cajena Cristo nacaitoroba vajaasivanexa itsamonae ata.

Pacuenia vaxaitsi mapanacuataje dovathi jamatabêcueneamoneyabatsi yabara pelivaisi

5 Pajivi jumecovênêta: "Jesús raja Cristo, ponê Dioso athêbêvetsica itorobijitsiatsica vajanacacapanepaenexa," pejailivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva. ² Bajara pijinia pacuenia vaxaitsi ata bexanatsi itsa asivatsi Dioso. Itsa jumecovênêtatsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovênêtsivi. Tsipaji bajarapamonae Dioso pexi exanatsi. ³ Vaxaitsi itsa asivatsi Dioso, nexata pacuenia Dioso nacaitoroba, jumecovênêtatsi. Pacuenia Dioso nacaitorobapona vajatoexanaenexa, apo nacatsitaayapêbeje. ⁴ Apo nacatsitaayapêbeje tsipaji baja Dioso pexitsi. Nexata caejivitsi canacujitsia Dioso nacacajêjêpaeyaexanapona vajaexanaenexa pacuenia Dioso nacaitorobapona. Najamatabêcuenecopatatsi baja Cristojavabelia vajanacayavenonaenexa mapanacuapijijamatabêcuenevecuaje. Nexata bajarapacuenia mapanacuataje dovathi jamatabêcueneamoneyabapona. ⁵ Pajivi jumecovênêta Jesús Dioso pexênatocuene, bajarapajivi caêjêpatsi dovathi pejamatabêcueneamoneyabinexa.

Pacuenia yapêtanetsi Jesús pepacuene Dioso pexênatocuene yabara pelivaisi

⁶ Jesucristo baja cajena athêbêvetsica pepatsinë. Yapêtanetsi Jesús pepacuene Dioso pexênatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús êpebautisabicujinaetsi apo ponapona. Biji rajane copiaya bautisabatsi. Bajaraxuacujinae cruzata beyaxuabatsi. Espíritu Santo ata nacayapêtaeyaexana Jesucristo pepacuene Dioso pexênatocuene. Espíritu Santo baja cajena pexaniajainê. Nexata Espíritu Santo vajanacayapêtaeyaexanaejava, Jesús Dioso pexênatocuene, bejumecovênêtatsi. ⁷ Athêbêtatsia jinavanapa acueyabi ponêbeje, penajamatabêcuenejêpaevi, pevajunupaebivi Jesucristo Dioso pexênatocuene. Pamonaes jinavanapa athêbêtatsia, mapamonaeje: Dioso, Jesucristo, Espíritu Santo. Bajarapamonae acueyabi ponêbeje, penajamatabêcuenejêpaevi, caenê rabaja picani tsaponapona. ⁸ Mapanacuata ataje acueyabi xuabeje pejamatabêcueneta yapêtanetsi Jesucristo pepacuene Dioso pexênatocuene. Yapêtanetsi Espíritu Santo pejamatabêcueneta. Yapêtanetsinua Jesús pebautisabijavatsi ata pejamatabêcueneta. Yapêtanetsinua Jesús cruzata pebeyaxuabijavatsi ata pejamatabêcueneta. Bajarapaacueyabi xuabeje pejamatabêcueneta yapêtanetsi Jesucristo pepacuene Dioso pexênatocuene. ⁹ Dioso baja cajena nacayapêtaeyaexana Jesús Dioso pexênatocuene. Mapanacuapijivi ata, itsa nacatsipaeba itsacuenelivaisiyo, nexata jumecovênêtabiabatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecov-

enētatsi xaniavaetsia pacuenia nacatsipaeba. Tsipaji Dioso bitso pejumenamatamotsinē. Bitso pexania-jainē. ¹⁰ Pajivi jumecovēnēta Jesús Dioso pexēnatocuene, bajarapajivi pejamatabēēthētota yapētane bajarapalivaisi pexaniajailivaisicuene. Pajivi apo jumecovēnētsi Jesús Dioso pexēnatocuene, bajarapajivi Dioso bepenajumetsēnētsinē tane. Tsipaji bajarapajivi Dioso peyapētaeyaexanaejavatsi, apo jumecovēnētsi, Jesús Dioso pexēnatocuene. ¹¹ Dioso itsa nacayapētaeyaexana Jesús Dioso pexēnatocuene, nacayapētaeyaexana mapalivaisije. Nacayapētaeyaexana Dioso vajanacarajutsijavanexa maticabi apo pevereverecejavejava. Nexata Dioso pexēnato pejamatabēcueneta xainaenatsi maticabi apo pevereverecejavejava. ¹² Pajivi yajavaponaponaena Dioso pexēnato, bajarapajivi xainaena maticabi apo pevereverecejavejava. Pajivi apo yajavaponapona tsane Dioso pexēnato, bajarapajivi apo xinae tsane maticabi apo pevereverecejavejava.

Pacuenia Juan muxujioba pecopatsivajēnae baja petoyaquinaelivaisi mapabaxutotaje yabara pelivaisi

¹³ Pacatoyaquinatsi mapalivaisije panejumecovēnēt-sivi Dioso pexēnato. Pacatoyaquinatsi paneyapētaenexa maticabi apo pevereverecejavejava panexainae-javanexa.

¹⁴ Yapētanetsi Dioso vajanacajumetaejavejava itsa vajētatsi vajanacatojitsipaecuenia. Bajaraxuata apo jumecunavitsi vajavajētsinexa Diosojavabelia. Jamatejematsi Dioso pitabarata. ¹⁵ Yapētanetsi Dioso vajanacajumetaejavejava itsa vajētatsi. Nexata yapētanetsi Dioso vajanacarajutsijavanexa xua vajētatsi.

¹⁶ Dioso panenajuajumecovēnēt-sivi itsa pataename pibisiacuene pexanaejavejava, patovajētsianame Diosojav-

abelia, Dioso pejamatabēcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajētsianame itsa payapētaename paneconi yabara abaxē Dioso apo vecuanaxuabijitsia. Itsajavejava raja jivi pibisiacuene itsa exana, bajarapaneconi yabara pepacuene jivi Diosovecua naxuabi-ana. Nexata baja itsa payapētaename paneconi yabara pepacuene baja bajarapajivi Diosovecua naxuabijitsia, pētsa patovajētame Diosojavabelia. Bajarapitsineconi baja pexainaevi panetovajētsinexa Diosojavabelia, apo pacaitorobitsi. ¹⁷ Daxitacuene xua apo pexanepanaecueni jivi exana, pibisiacuene baja cajena. Itsiata baitsi jane bajarapapibisiacuene jivi pexanaejavejava itsa copabi-ana, nexata bajarapaneconi yabara itsiata jivi pepacuene Dioso apo vecuanaxuabi tsane.

¹⁸ Yapētanetsi baja cajena mapacuneje. Pajivi Dioso pexijivi exanatsi, bajarapajivi copata baja pibisiacuene pexanaejavejava. Tsipaji baja Dioso pexēnato, Jesucristo, evetatsi bajarapajivi. Nexata dovathi apo itsacueniabit-si.

¹⁹ Yapētanetsi daxita vaxaitsi Dioso pexicuenetsi. Yapētanetsinua itsamonae dovathi pitorobabiabijavatsi pibisiacuene pexanaenexa.

²⁰ Yapētanetsinua baja Dioso pexēnato, Jesucristo, athēbēvetsica pepatsijavatsica. Patsica vajanacajamatabēcueni yapētaeyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexēnato, Jesucristo. Bajaraponē ata pepo Dioso baja cajena, vajanacarajutsinēnexa maticabi apo pevereverecejavejava. ²¹ Tajamonae, panayajiviitavere papecatsipaebiyaniva palivaisi tsipaebaona pamonaevajēcabiaba jumapecataeya pexanaenēnējavabelia.

2 SAN JUAN

Pexaniajailivaisi yabara, jivi ata penaasivacuene, yabara pelivaisi

1 Xanë ancianonënë, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonaе jumecovënëta Dioso pejumelivaisi, bajarapamonae ata pacaasiva. ² Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi caji-
navanapatsi vajajamatabëëthëtota daxitamatacabijavabelianexa. ³ Pacatovajëtabiabatsi Diosojavabelia, Jesucristo, Dioso pexënatovajabelia ata. Pacatovajëtabiabatsi papecayavenonabiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua. ⁴ Bitso sivajamatabëcuenenabarëyanë itsa caxitarabaxuabajë nexiyajuvënëvi, pejumecovënëtavana-
paevi pacuenia vaxa Dioso nacaitoroba. ⁵ Tajabanava, aeconoxae catsipaebatsi namataenetsia vajanasi-
vanexa. Bajarapalivaisi apo pejanalivaisi picani. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. ⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëta-
vanapatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenasi-
vatsavanapaenexa.

Penajumetsënëtsilivaisi daxitanacuanëjava petsipae- banajetarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava.

“Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuene pexainaevi peyamaxëitojorobivi baja cajena. Bajarapamonae Cristo pijavajabitsaë. ⁸ Panayajivitaevanapare papecavecuaxuabiyaniava xua pasivanacuenebavanapame Dioso papecarajutsinexa. Bajarapacuenia panayajivitaevanapare Dioso papecarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënato ata yajavaponaponatsi. Pajivi pijinia copata pejumecovënëtsijava palivaisi Cristo tsipaebapona, bajarapajivi Dioso apo yajavaponaponaetsi. ¹⁰ Nexata bajarapitsijivi itsa pona paxamëjavabelia livaisi papecatsipaebinexa, pëtsa pacajunuame panijaboyaberena. Pëtsa pabajacobamenua bajarapitsijivi. ¹¹ Pajivi bajacobijitsipa bajarapitsijivi, jamatabëcueneyavenonaejitsipa pibisiacuene pexanaejava. Bajaraxuata pëtsa pabajacobame bajarapitsijivi.

Pacuenia Juan jumaitsi pecopiarutaponaelivaisita yabara pelivaisi

¹² Xanë picani xainajë ayailivaisi patacamuxujjobinexa. Itsiata abaxë apo jitsipaenë bajarapalivaisi patacatoyaquinaenexa mapabaxutotaje. Evetajë abaxë taponaejava paxamëjavabelia patacataenexa, patacabarëcuaijuainexanua, vajajamatabëcuenenabarëyanexa bitso.

¹³ Nejuyapijiva Dioso pitapetsivatsi pexi, catonajumeitoroba nebajacobinexa.

3 SAN JUAN

Pacuenia Juan pexaniajamatabëcuenia tane Gay-ovënënë yabara pelivaisi

1 Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

² Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponaenexanua. Cavënëlivaisitanetsi rabaja Dioso pitabarata xaniavaetsia Dioso ne-tonaponaejava pibisiacuene exanaenejevamë. ³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaeponaejava pexaniajailivaisi, Dioso pejumelivaisi. Nexata bitso casivajamatabëcuenenabarëyatsi. ⁴ Pamonaesipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlivaisitaniji bajarapamonae Dioso pejumecovënëtavanapaejava, nexata bitso sivajamatabëcuenenabarëyanë tsabiabi. Itsacuenejava ata pematatsënëa bajarapacuenia apo nejamatabëcuenenabarëyayaexanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname.

⁶ Pamonaes Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivarëya tsane. ⁷⁻⁸ Bajarapamonae naropoba Jesucristo petonacuenebinexa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamonaes Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacatane bajarapamonaeata Dioso pijacuene bevajatonacuenebivi.

Pacuenia Diótréfes pibisiacuene exana yabara pelivaisi

⁹ Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata

bajarapabaxutota taitorobicuenia Diótréfes apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa. ¹⁰ Bajaraxuata itsa patsianajë xamëjavata, catsipaebianatsi daxita pacuenia Diótréfes exana. Bajaraponë pibisiacuene tanebaracuaicuajaijava, taneyabaranajumetsënëtsijava ata, catsipaebianatsi. Itsacuenejavanënuapematatsënëa pibisiacuene exanabiaba. Diótréfes apocopiapitabiabi xaniavaetsia pamonaes Dioso pejumecovënëtsivi. Itsamonae ata itaveta pecopiapitsiyaniva pepatsivi. Nexata picani pamonaes Diótréfes itaveta, itsiata copiapitabiaba Dioso pejumecovënëtsivi. Nexata pamonaes Diótréfes itavetsi ata, itsiata copiapitabiaba, bajarapamonae Diótréfes jamatabëvecuacapitsapa Dioso pejumecovënëtsivi penacaetuatsibovecua bajarapamonae pematatsënëa penajoneyaniva bajarapabota.

¹¹ Gayo, pëtsa exanaponaename pacuenia pibisiajamatabëcuene pexinaevi baexanavanapa. Exanaponaepone jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanapona. Pajivi Dioso pexijivi apo exanaetsi, bajarapajivi pibisiacuene exanapona. Tsipaji bajarapajivi Dioso apo yapëtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuene Demetrio vënëlivaisipaebatsi pexaniacuene pexanaponaeponaejava. Espiritu Santo baja cajena pexaniajailivaisi jivi peyapëtaeyaexanaenë. Nexata Espiritu Santo jivi yapëtaeyaexanaponaetsi pexaniacuene Demetrio pexanaponaeponaejava. Paxanë ata baja cajena payapëtaniji Demetrio pexaniacuene pexanaponaeponaejava. Nexata daxitajivijava patsipaebaponaajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

Pacuenia Juan jumaitsi pecopiarutsilivaisiyota yabara pelivaisi

¹³ Xanë picani xainajë ayailivaisi tacamuxujiobinexa. Itsiata abaxë apo jitsipaenë bajarapalivaisi tacatoyaquinaenexa mapabaxutotaje. ¹⁴ Tsipaji jamatabëcatanetsi bepijia. Nexata abaxë tajacuata cabarëcuacuajaitsi tsane.

¹⁵ Catovajëtsi Diosojavabelia pecayavenonaenexa jamatabëcuenexanepanaeya neponaponaenexa. Daxi-

ta pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

JUDAS

**Pacuenia Judas mapabaxutoje toyaquina Dioso pe-
jumecovënëtsivijavabelia yabara pelivaisi**

1 Xanë Judasnë, Jesucristo pijajivitonënë, Santiago pejuyapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënëta-vanapame Jesucristo papecayajavaponaponaexae.

² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavanapaenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsivaniva penajumetsënëtsilivaisi petsipaebavanapaevitsi yabara pelivaisi

³ Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsivaniva bajarapamonae papecatsipaebilivaisi. Tsipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi. ⁴ Tsipaji bajarapamonae, penajumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: "Dioso baja cajena nacaitaxutotsoniatane vajanacapanepaenexa. Bajaraxuata pibisiacuene exanae atatsi, apo itsacuene," jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

⁵ Payapëtaneme rabaja mapacueneye. Bajayata vajatuxanenë Dioso pijajivi capanepa Egipto nacuavecua,

Israel nacuayaberena. Nexata baja payapëtae atamë bajarapacueni, itsiata jitsipajë panenajamatabënapitsinexa icatsia bajarapacueni. Bajarapacuenia vajatuxanenë Dioso pijajivi capanepae ata, papepanepaecujinae icatsia verebiaba bajarapamonae miyajuvënëvi. Bajarapacuenia verebiaba tsipaji bajarapamonae apo jumecovënëtsi. ⁶ Panajamatabënapirenuu pacuenia Dioso exana ángelevijavabelia ata. Angelevi Dioso tonacuenebavanapa athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapenua itsajota picani Dioso tocopata pejinavanapaenexa. Bajaraxuata Dioso ángeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamonaenaneconita Diosojavabelia, bajarapamatacabi Dioso bajarapaángelevi ata naneconitsiaexanaena daxitamatacabijavabelianexa.

⁷ Panajamatabënapirenuu Sodoma tomarami ata, Gomorra tomarami ata, pemuxuneneta penae-tomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua ángelevi ata. Bajarapamonaemi pevitota bitso pibisiacuene exanabiaba pevëna pebijvijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamonaevi cotocaevi jinavanapa mapamatacabitaje, peyapëtaenexa. Nexata bajarapamonae ata pibisiacuene pexanaeyaniva, apo peverevereacaisotojavabelia Dioso penaneconitsiaexanaeyanivatsi.

⁸ Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanae ata pamonaemi bajayata pibisiacuene exanavanapa, itsiata pamonaevi penajumetsënëtsilivaisi pacatsipaebavanapa, apo canaëjët-si Dioso penaneconitsiaexanaejavanexatsi. Pamonaevi penajumetsënëtsilivaisi pacatsipaebavanapa, pibisiacuene exanabiaba. Bajarapamonae pina majitsinaebota tane papibisiacuene bajarapamonae exanaejitsia. Bajaraxuata nexata bajarapamonae pibisiacuene exanabiaba pevitota. Apo jumecovënëtsi pacuenia Dioso itorobatsi. Dioso pijaángelevi ata bajarapamonae pibisiacuenia baracuaicuaijai tsabiabi. ⁹ Angelnë Miguel, ángelevi penamatacaitorobinë. Angelnë Miguel bitso ayaijamatabëcuenenë ata, yaiyatane dovathi. Pibisiacuenia apo baracuaicuaijai. Apo bi-

jataenua. Bajayata Moiséspijinē petēpanucaenē jamatabēpitatsi picani dovathi. Nexata ángelnē Miguel apo copatsi Moiséspijinē dovathi pepitsinexatsi. Nexata dovathibeje, ángelnē Miguelbeje, najumenotabeje Moiséspijinēmi yabara. Itsiata bajarajota ángelnē Miguel pibisiacuena apo bijatae dovathi. Saya xaniavaetsia ángelnē Miguel jumaitsi dovathijavabelia: “Dioso raja cabijataena,” jai. ¹⁰ Itsiata baitsi jane pamonaē penajumetsēnēsilivaisi pacatsipaebavanapa, xaniavaetsia ángelevi apo tae ata, apo yapētae atanua, pibisiacuena baracuaicuaijai tsabiabi. Nexata pacuēnia unupijidujuai apo cujarubi atatsi, itsiata pijacuata yapētane pexanaejavanexa, bajara pijinia pacuēnia bajarapamonaē ata saya pijacuata yapētane mapanacuapijicuēne pexanaenexa. Nexata exanavanapa pibisiacuēne pacuēnia jamatabēexana. Nexata itsamatacabi Dioso verebiabiana bajarapamonaē bajarapapibisiacuēne pexanaexae.

¹¹ ¡Bitso bejiobi tsane pamonaē penajumetsēnēsilivaisi pacatsipaebavanapa! Bajarapamonaē Dioso naneconitsiaexanaena. Tsipaji pacuēnia bajayata Caínpijinē jamatabēcuēneitsi, bajarapamonaē ata jamatabēcuēneitsi tsavanapae. Bajayata Caínpijinē pibisiacuēne exanaponapona pacuēnia jamatabēexana. Pacuēnia bajayata Balaampijinē ata jamatabēcuēneitsi, bajarajamatabēcuēneitsi tsavanapae pamonaē penajumetsēnēsilivaisi pacatsipaebavanapa. Bajayata Balaampijinē Dioso apo jumecovēnētsi pacuēnia itorobatsi. Balaampijine palata pepitsinexa, jivi matacapona pibisiacuēne pexanaenexa. Pacuēnia bajayata Corépijinē ata jamatabēcuēneitsi, bajara jamatabēcuēneitsi tsavanapae pamonaē penajumetsēnēsilivaisi pacatsipaebavanapa. Bajayata Corépijinē apo jumecovēnētsi pacuēnia Moiséspijinē itorobatsi. Nexata Corépijinē beyaxuabatsi Dioso. Bajara pijinia pacuēnia pamonaē penajumetsēnēsilivaisi pacatsipaebavanapa, pibisiacuēne pexanaexae, nexata Dioso verebiabiana bajarapamonaē. ¹² Pamonaē penajumetsēnēsilivaisi pacatsipaebavanapa, payajavanacaetuatabiabame itsa panacaetuatabiabame panenabinexa. Paxamē panacaetuatabiabame namataenetsia panenasivaxae. Nexata bajarapamonaē najoneyabiaba panenacaetuatsijavata. Bajarapamonaē pibisiacuēne pexanabiabixae, bepiaxuirajava paxamē tuatujēta. Bajarapamonaē aurajibia ayaijava xaeyabiaba. Petocopsinexa itsamonaē ata penaxaenexa, apo namatabēxainabiabi. Pacuēnia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Ēpamonaē saya naeveta. Bajarapamonaē pexanaejava, itsacuēnejavayonexa ata apo xanepanaē. Yapētanetsi pacuēnia itsi vaita. Vaita itarērēbo pitsapae ata, itsiata ema apo jopae. Jovibo saya caponatsi. Nexata itsamonaē peubijavaxi totsauenae atatsi, apo jamatabēcuēneyavenonaetsi. Bajara saya jamatabēcuēneitsi tsavanapae pamonaē penajumetsēnēsilivaisi pacatsipaebavanapa. Tsipaji apo jamatabēcuēneyavenonaē itsajivi ata. Peubinaē, ponae

apo nacuaityabiabi penacuaitysimatacabita ata, bajaraponaē apo xanepanaē itsacuēnejavayonexa ata. Bajara saya jamatabēcuēneitsi tsavanapae pamonaē penajumetsēnēsilivaisi pacatsipaebavanapa. Tsipaji apo jamatabēcuēneyavenonaē itsajivi ata. Peubinaē, ponae apo nacuaityabiabi penacuaitysimatacabita ata, bajaraponaē peubinē yatabutopaya juta petajuitsinexa isotojavabelia. Bajara pijinia pacuēnia Dioso naneconitsiaexanaena pamonaē penajumetsēnēsilivaisi pacatsipaebavanapa pibisiacuēne pexanabiabixae. Nexata bajarapamonaē Dioso xuabianatsi infiernojavabelia. ¹³ Pacuēnia malataca caecovēta apo rucae, caponanaē piaxuirapērē pitapayabelia, bajara saya jamatabēcuēneitsi tsavanapae pamonaē penajumetsēnēsilivaisi pacatsipaebavanapa. Caejamatabēcuēne apo xainabiabi. Bajarapamonaē piauracuēne pexanabiabixae, nexata bepiaxuirajava paxamē tuatujēta. Bajarapamonaē pejamatabēcuēneta jamatabēcuēnebijiabiaba itsamonaē Dioso pejumecovēnētsivi. Pacuēnia athēbēvetsica tulupu othopaena pevereverecaenexa, bajara pijinia pacuēnia bajarapamonaē ata vereverecaena. Diosovecua naxuabiana. Tsipaji copaba pejumecovēnētsijavami pexaniajailivaisi. Bajaraxuata Dioso bajarapamonaē naneconitsiaexanaenatsi. Nexata bajarapamonaē pitaquirinacuatata jinavanapaena daxitamatacabijavabelianexa.

¹⁴ Enocpijinē bajayata ponapona. Bajaraponēmi Adánpijinē pemomoxiyajuvēnēnē. Nexata Enocpijinē Dioso pejamatabēcuēneta bajayata tajēvelia vajunupaeba, pamonaē aeconoxae mapamatacabitaje penajumetsēnēsilivaisi pacatsipaebavanapa. Enocpijinē baja cajena bajayata tajēvelia bajarapamonaē yabara jumaitsi mapacuēniaje: “Vajatuxanenē Cristo, pijajivi ángelevi, ayaiBITSaētoXaneto yajava, najetarucaena. ¹⁵ Najetarucaena penaneconitsiaexanaenexa daxita pamonaē apo exanaē Dioso pitorobicueniatsi. Najetarucaena penaneconitsiaexanaenexanua daxita pamonaē pibisiacuēnia baracuaicuaijai Dioso,” jai baja cajena bajayata tajēvelia Enocpijinē. ¹⁶ Pamonaē penajumetsēnēsilivaisi pacatsipaebavanapa, apo sivajamatabēcuēnebarēya itsacuēnejavayo ata. Nexata pibisiacuēnia baracuaicuaijai tsabiabi daxita xua bajarapamonaē tocopiapataponatsi. Apo jumecovēnētsi pacuēnia Dioso itorobatsi. Nexata bajarapamonaē exanavanapa pijacuata penatojitsipaecuēnia. Bajarapamonaē ayaijamatabēcuēnevi nataeya navajunupaebabiaba xua exana. Itsamonaējavabelia itsa cuaicuaijai, pexaniacuēnia cuaicuaijai tsabiabi. Bajarapacuenia pexaniacuēnia cuaicuaijai tsabiabi saya pebarēyatenexatsi, perajutsinexatsinua penamatavenonaējavānē.

Pacuēnia Dioso pejumecovēnētsivi muxujibatsi pejumecovēnētsiyaniva penajumetsēnēsilivaisi petsipaebavanapaevitsi yabara pelivaisi

¹⁷ Tajamonaē bitso patacaasivavi, panajamatabēnapire pacuēnia baja cajena tajēvelia pacatsipaeba apóstolevi, vajatuxanenē Jesucristo pijajivi. Apóstolevi

baja cajena tajëvelia pacatsipaeba pepatsijavanexa penajumetsënëtsilivaisi papecatsipaebivinexa. ¹⁸ Apóstolevi baja cajena tajëvelia pacajumaitsi mapacueniaje: “Nacua pecopiarucaevajënaeyota, itsamonae capocaponaena pexaniajailivaisi, Dioso pejumelivaisi. Bajarapamonae exanavanapaena pibisiacuene, pacuenia pijacuata natojitsipa,” pacajai baja cajena tajëvelia apóstolevi. ¹⁹ Pamonaenajumetsënëtsilivaisi pacatsipaebavanapa, bajarapamonae papecatsipaebilivaisita, Dioso panejumecovënëtsivi pacanavecuantanaeayaexanapona. Bajarapamonae saya najamatabëxaina ëmapanacuapijjamatabëcueneje. Nexata pibisiacuene exanavanapa pacuenia pijacuata natojitsipa. Bajarapamonae Espiritu Santo apo tsijamatabëcaetsi.

²⁰ Tajamonae bitso patacaasivavi, asaëyata Dioso panejumecovënëtanapare. Pacuenia Espiritu Santo pacaitoroba, pavajëtabiabare Diosojavelia. ²¹ Paxamë bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajayajebi pacopatsinejevamë, pacopievetavanapare matabacabi apo peverevereceajava papecarajutsinexa vajatuxanenë papecaitaxutotsoniataexae.

²² Itsamonae jumecovënëtsi ata pexaniajailivaisi, Dioso pejumelivaisi, itsiata jumeaebapona. Bajarapitsivi payavenonare xaniavaetsia pejumecovënëtsinexa bajarapalivaisi. ²³ Bajarapamonae isotojavavelia bepejopaevinexa. Tsipaji pibisiacuenejavavelia jamatabëjopa. Bajaraxuata payavenonare bajarapitsivi.

Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejiobiataema. Payavenonaponaenare bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

Pacuenia apóstolenë Judas itoroba daxita Dioso panejumecovënëtsivi: “Dioso, bitso ayaijamatabëcuenenëmë,” pejainexa Diosojavelia yabara pelivaisi

²⁴ Dioso caëjëpatsi papecaevetsinexa pibisiacuene paneexanaeyaniva. Nexata pamatabacabi Dioso naneconitsiaexanaena daxita pijaneconi pexinaevi, paxamë ata pacanubenaeyaexanaena bajaraponë Dioso, penivenivenaecotia pexinaenë, pitabarata. Itsiata baitsi jane paxamë paneconijibimë tsane. Bitso pabarëyamë tsane. ²⁵ Bajaraponë pepo caenë Dioso. Bajaraponë Dioso nacacapanepaena vajatuxanenë Jesuscristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavelia: “Diosomë, bitso ayaijamatabëcuenenëmë,” bejai. Betsipaebaponanua itsamonaejavavelia Dioso bitso ayaijamatabëcuene pexinaenëcuene. Dioso cajena daxitanacua pevetsinë. Betsipaebaponanua itsamonaejavavelia Dioso pecaëjëpaejavatsi pevetsinexa daxitajivi. Bajarapacuenia Dioso jamatabëcueneitsi tsaponaponaenare mapanacuaje pexanaevajënaeya, mapamatabacabi ataje, daxitamatabacabijavelianexa ata. Bajara itsi tsane.

APOCALIPSIS

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

1 Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexananua pajamatabëcuenelivaisi xaina bajaraxuanë. **2** Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaisi, yaquinajë. Pacuenia Jesucristo ata jumaisi, bajaraxua ata yaquinajë.

3 Pajivi tsimumulebiana mapabaxutoje Dioso pejumecovënëtsivi penacaetuatsijavata, jamatabëcuenenarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaisi, bajarapamonae ata jamatabëcuenenarëya tsane. Bajarapacuenia jamatabëcuenenarëya tsane tsipaji baja imoxoyo pevajënae tsaponae pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina siete patomarabejepijivi, Dioso pejumecovënëtsivi, yabara pelivaisi

4 Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiavënë nacuata panejinavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecajavavenonaenexanua. Siete paespiritubeje nubena Dioso pecaejava, tronovënëjava, pitabarata. Pacatojitsipatsi bajarapamonae papecajamatabëcuene barëyayaexanaenexa, papecajavavenonaenexanua. **5** Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevivecua, Jesús baja namataxainae Dioso asaëyaexanatsi petëpaevavecua. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacavecuaajibiaexana daxita pibisiacuene vajaexanaeconomi.

6 Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabiabinexa. Nexata vaxaitsi daxitamatacabijavabelianexa ayaijamatabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

7 ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yenecacuatatsi, bajarapamonae ata taenatsi. Daxita nacuanëpijivi, pamonaë Dioso apo pejumecovënëtsivi, itsa taena Cristo penajetarucaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetarucaejava.

8 Jesús nayabarajumaisi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenënexa,” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtatsi yabara pelivaisi

9 Xanë Juannë, panijabananënë. Tsipaji najuajumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso pijajivixae, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamatacabi vajanacabarëevetsinexa daxitacuene. Jesucristo papecajavavenonaexae, pacaasaëmë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconitsia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconitsiaponaponajë. **10** Nexata Patmosvënë tunaetota domingota Espiritu Santo netsijamatabëvënëca. Nexata tapënëverena pecuaicuaijajava ayaijume, betrompetajume penajumetsijava, jumetaniji.

11 Pecuaicuaijajava nejumaisi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. Xua baja taneme, bajaraxua baja pelivaisi copiyayaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. Bajaraxuacujinae bajarapalivaisi toitorobianame Dioso

pejumecovënëtsivi, siete patomarabejepijivijavabelia, Asiavënë nacuata pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatora tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

¹² Nexata napënëyorotajë tataenexa ponë tapënëverena nebarëcuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena. ¹³ Bajaraxuanë petuatujëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana. ¹⁴ Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi.

¹⁵ Petaxubeje ata nivenivenabeje pacuenia banivenivena broncevënëjava pesetsijava, beoronanitomi.

Pecuaicuaijajava najumeta pacuenia banajumeta jonca. ¹⁶ Pecujanenia cobenanuca siete patuluputobeje. Pecuibuatsina pitsapa anijabarëneniabeje pexiujaiespada. Pacuenia matacabipijiuameto itsa aitavajënae, xaniavaetsia baitayota, bajarapacuenia itabaranaitayota.

¹⁷ Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baitsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenënexa. ¹⁸ Xanë rajane baja pepo tasaëtsaponaponaenë daxitamatacabijavabelianexa. Xanë picani tëpajë. Itsiata baitsi jane icatsia asaënë tatëpaecujinae. Nexata baja asaënë tsaponaponae daxitamatacabijavabelianexa. Dioso netocopata tacapanepaenexa tajajivi peponaeyaniva infiernojavabelia. Netocopatanua tananeconitsiaexanaenexa pijaneconi pexinaevi peponaenexa infiernojavabelia.

¹⁹ Xua baja taneme, bajaraxua baja pelivaisi yaquinare. Xuanë ata icatsia aeconoxae taeponaename, bajaraxuanë ata pelivaisi yaquinaename. ²⁰ Xuanë, siete patuluputobeje, tacujanenia cobenanucajë, mapajamatabëcuenelivaisi xainaje. Siete rabaja pijinia patomarabejepijivi Dioso pejumecovënëtsivi penamatacaitorobivi tsavanapae. Xuanë pijinia siete xuabeje orota pexanaejavanë pematatuta naitayotanubena, mapajamatabëcuenelivaisi xainaje. Siete rabaja pijinia patomarabejepijivi Dioso jumecovënëtavanapa, nejai Jesús, ponë taenutajë, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi peto yaquinaenexa Efeso tomarata Dioso pejumecovënëtavanapaevi penamatacaitorobinëjavabelia yabara pelivaisi

2 Jesús icatsia nejumaitsi:

—Efeso tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare. Nexata daxita pijajivi yajava yapëtaena mapalivaisije, nejai Jesús, ponë siete patuluputobeje pecujanenia cobenanuca, siete xuabeje orota pexanaejavanë pematatuta penaitayotanubenaejavanë tuatujëta penucaenë.

Jesús nitoroba Efeso tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije:

² “Yapëtaniji daxita xua paexanavanapame. Yapëtanijinua ayaicuenia Dioso panetonacuenebijava. Yapëtanijinua ajamatabëcuenesaëya Dioso panejumecovënëtavanapaejava. Yapëtanijinua panecueneataejitsibijava pibisiacuene pexanaevi. Yapëtanijinua nayajivitaeya panejinavanapaejava itsamonae papecaya-

maxëitojorobianiva. Itsamonae picani papecaya-

paapëstolevinë,’ pacajai tsabiabi. Itsiata panajumet-sënëstivicuene payapëtaeyabiabame panenayajiviyapëtaexae. ³ Paxamë bajayajebi pacaajamatabëcuenesaëmë tsavanapae Dioso panejumecovënëtavanapaejava, itsamonae pacabejioviaexanabiabi

ata. Ayaicuenia panacuenebame patacaitorobicuene. Apo payabaracueranaemë cajena. Bajarapacuenia panacuenebavanapaexae, pacasivajamatabëbarëyatsi.

⁴ Itsiata baitsi jane caejavayo yabara pananeconitame xanëjavaberena. Tsipaji aeconoxae apo panejitsipaemë pacuenia picani bajayata coplaya panejitsipame. ⁵ Panenajamatabënapire icatsia pacuenia bajayata panejitsipame. Panajamatabëcuenepënëyorore xanëjavaberena. Panetonacuenebavanapare icatsia

pacuenia bajayata xaniavaetsia panetonacuenebavanapame. Itsa baja apo panejitsipaemë tsane icatsia, nexata baja apo patajajivimë tsane. ⁶ Itsiata baitsi jane pacasivajamatabëcuenenëbarëyatsi patanejamatabëcuenepëpaexaemë mapacuene yabaraje. Pacujiruitoyamë nicolaítavi pibisiacuene pexanaponaejava. Bajaraxua pexanaejava xanë ata cujiruitoyanë. ⁷ Itsa pamuxuvojorubename, panatojumetaema pacuenia

Espíritu Santo jumaitsi Dioso pejumecovënëtsivijavabelia. Jumaitsi mapacueniaje: ‘Pajivi Cristo jumecovënëtaponapona epetëpaejavabelianexa, bajarapajivi Dioso tocopatsianatsi pejonenexa Dioso pijanacuayabetsia,’ jai Espíritu Santo,” pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi peto yaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi

8 Jesús icatsia nejumaitsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxu-

abinë, daxitacuene icatsia pecopiarucaeyaex-
anaenëna.

Bajaraponë picani tēpa. Itsiata baitsi jane icatsia
asaë petëpaecujinae. Nexata baja asaë tsaponapona
daxitamatacabijavabelianexa. Jesús nitoroba Esmirna
tomarata peecaenë, Dioso pejumecovënëtavanapae
penamatacaitorobinëjavabelia, tatoyaquinaenexa
mapejumaitsilivaisije: ⁹ “Yapëtaniji daxita xua paexana-
vanapame. Yapëtanijinau itsamonae papecabejiobi-
aexanaponajava. Yapëtanijinau bepanejobivicuene.
Itsiata baitsi jane itsamatacabi Diosojavatatsia bitso
panexainaevi tsane. Yapëtanijinau pibisiacuenia pa-
pecabaracuaicuaijajava judóvi, Dioso apo pejumecov-
ënëtsivi. Bajarapamonae cajena saya dovathi pijajivi.
¹⁰ Pëtsa pacujunavame itsamonae, pacabejiobiaex-
anaejitsia ata. Dovathi raja pejamatabëcueneta
paneconitsivi pejebabiabibota, pacananeconitsiaex-
anejebiana. Bajarapacuenia pacananeconitsiaexaneje-
biana dovathi papecajamatabëcuenëjëbinexa, pa-
pecajamatabëcueneyapëtaenexa xaniájai pepacuene
patanejumecovënëtsijavamë. Pacabejiobiaexanapona
aena diez pamatacabibeje. Bajarapacuenia pacaex-
anae ata tsane, itsiata panejumecovënëtsianame mat-
pania panetëpaejavabelianexa. Nexata xanë pacara-
jutsianatsi matacabi apo peverevereceajava. ¹¹ Itsa pa-
muxuvojorubename, panatojumetaema pacuenia Es-
píritu Santo jumaitsi Dioso pejumecovënëtsivijav-
abelia. Jumaitsi mapacueniaje: ‘Pajivi Cristo jumecov-
ënëtaponapona ëpetëpaejavabelianexa, bajarapajivi
apo itsacueniabi tsanetsi cotocaevi patëpaejava,’ jai Es-
píritu Santo,” pejailivaisi toyaquinare Esmirna tomara-
ta peecaenë, Dioso pejumecovëtavanapaevi penamat-
acaitorobinëjavabelia, nejai Jesús, siete xuabeje orota
pexanaejavanë tuatuajëta penucaenë.

**Pacuenia Juan vajatuxanenë Jesús itorobatsi petoy-
aquinaenexa Pérgamo tomarata Dioso pejumecovënë-
tavanapaevi penamatacaitorobinëjavabelia yabara pe-
livaisi**

¹² Jesús icatsia nejumaitsi:

—Pérgamo tomarata peecaenë, Dioso pejumecov-
ënëtavanapaevi penamatacaitorobinëjavabelia, toy-
aquinare daxita pijajivi yajava peyapëtaenexa mapali-
vaisije, nejai Jesús, ponë pecuibuatsina pitsapa ani-
jabarëneniabeje pexiujaespada.

Jesús nitoroba Pérgamo tomarata peecaenë, Dioso
pejumecovënëtavanapaevi penamatacaitorobinëjav-
abelia, tatoyaquinaenexa mapejumaitsilivaisije:

¹³ “Yapëtaniji daxita xua paexanavanapame. Yapëtanijinau
dovathi pijajivi tuatuajëta panejinavanapaejava.
Itsiata baitsi jane pajamatabëcuenesaëmë tsavanapae
patanejumecovënëtavanapaejavamë. Bajayata An-
tipaspijinë tajumelivaisi jivijavabelia tsipaebabiaba.
Nexata Antipaspijinë paxamë tuatuajëta dovathi pija-
jivi pebeyaxuabijavatsi, patae atamë, itsiata apo pacop-
atsimë patanejumecovënëtavanapaejavamë. Bajara-
pacuenia patanejumecovënëtavanapaejavamë, pacasi-
vajamatabëcuenebarëyatsi. ¹⁴ Itsiata baitsi jane itsaja-

matabëcueneyavaxi yabara pananeconitame xanëjav-
aberena. Bajarajota Pérgamo tomarata paxamëyaju-
vënëvi muxubijiapenetapona itsamonae pibisiacuen
pexanaenexa. Bajayata Balaampijinëmi jivi peyamaxëi-
tojobabiabinëmi ponapona. Nexata Israelpijinë pe-
momoxi penaneconitsinexa Diosojavabelia, Balaampi-
jinëmi itoroba Balacpinyinëmi pemuxubijiapenetapon-
aenexa Israelpijinë pemomoxijavabelia. Nexata Bal-
acpinyinëmi muxubijiapeneta Israelpijinë pemomoxi pe-
naponaenexa fiestajavabelia. Nexata fiestajavata itsa-
monae dajubinë itsa beyaxuaba, jumapecataeya pex-
anaenëjavabelia ofrendacuenia perajutsiyaju-
vënëvi naxane Israelpijinë pemomoxi. Balacpinyinëmi
muxubijiapenetanua Israelpijinë pemomoxi pibisi-
acuenia pexanaenexa pevitota. Bajara pijinia pacuenia
aeconoxae paxamëyajuvënëvi ata exanapona. Pérg-
amo tomarapajivi pibisiacuenia pexanaenexa, muxubij-
iapenetapona. ¹⁵ Itsamonae pijinia paxamëyajuvënëvi
nicolaítavi petsipaebaponaelivaisi jumecovënëtavana-
pa. Nexata tanejumecovënëtsivi pibisiacuenia pex-
anaenexa, bajarapamonae muxubijiapenetapona.

¹⁶ Bajaraxuata paxamë xaniavaetsia panaja-
matabëcuenepënëyorore Diosojavabelia. Itsa jume,
xanë nexata naxanitsiayo ponaenajë paxamëjavabere-
ca tabarënenexa bajarapamonae tacuibuatsina
pepitsapaeespadata. ¹⁷ Itsa pamuxuvojorubename,
panatojumetaema pacuenia Espíritu Santo jumaitsi
Dioso pejumecovënëtsivijavabelia. Jumaitsi mapacue-
niaje: ‘Pajivi Cristo jumecovënëtaponapona ëpetëpae-
javabelianexa, bajarapajivi rajutsianajë pexaenexa
manávënëjava, athëbëpijijava, pejamatabëcuene
asaëyaexanaejavanexatsi. Rajutsianajënu peniopo-
naeiboto. Bajarapaiboto pijumata bajarapajivi vënëru-
tsianajë pejanavënë. Itsajivi ata apo vënëyapëtae
tsanetsi. Caejivi, bajarapaiboto pepitsijivi, navënëyapë-
taena,’ jai Espíritu Santo,” pejailivaisi toyaquinare Pérg-
amo tomarata peecaenë, Dioso pejumecovënëtavana-
paevi penamatacaitorobinëjavabelia, nejai Jesús, siete
xuabeje orota pexanaejavanë tuatuajëta penucaenë.

**Pacuenia Juan vajatuxanenë Jesús itorobatsi petoy-
aquinaenexa Tiatira tomarata Dioso pejumecovënëta-
vanapaevi penamatacaitorobinëjavabelia yabara peliv-
aisi**

¹⁸ Jesús icatsia nejumaitsi:

—Tiatira tomarata peecaenë, Dioso pejumecovënëta-
vanapaevi penamatacaitorobinëjavabelia, toyaquinare
pijajivi yajava peyapëtaenexa mapalivaisije, nejai Dioso
pexënato, ponë pitaxutobeje naitayota. Pacuenia iso-
tocotia bacotia itsi, bajara pitaxutocotiaitsinë, ponë
petaxubejenivenivena ata pacuenia banivenivena
broncevënëjava pesetsijava, beoronanitomi.

Jesús nitoroba Tiatira tomarata peecaenë, Dioso pe-
jumecovënëtavanapaevi penamatacaitorobinëjav-
abelia, tatoyaquinaenexa mapejumaitsilivaisije:

¹⁹ “Yapëtaniji daxita xua paexanavanapame. Yapëtanijinau
itsamonae ata paneasivatsavanapaejava. Yapëtanijinau
patanesivanajamatabëcuene copatavanapae-

javamë. Yapëtanijinua panetonacuenebija Dioso. Yapëtanijinua paneajamatabëcuenesaë tsavanapaejava, itsamonae pacaitsacueniababiabi ata. Yapëtanijinua pacuenia panetonacuenebavanapame pamatacabi ajena panejumecovënëtame. Yapëtanijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabëbarëyatsi. ²⁰ Itsiata baitsi jane itsajamatabëcueneyo yabara pananeconitame xanëjavaberena. Tsipaji apo pacujiruitavetsimë Jezabelvënëva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimë bajarapova pacayajuvënëyamaxëitojorobapona baja. Bajarapova papecayajuvënë yamaxëitojorobinexa jumai tsabiabi: 'Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanë jaitsi ata pamonavecua, itsiata apo itsacuene. Bajara pijinia itsi pevi ata. Dajubinë itsa beyaxuaba ofrendacuenia pevi perajutsinexa jumapecataeya pexanaenëjavabelia, bajarapaviyajuvënëjava xae atatsi, itsiata apo itsacuene,' jai tsabiabi bajarapova patajajivimë papecayajuvënë yamaxëitojorobinexa. ²¹ Bajarapova picani pecopatsijava pibisiacuene pexanabiabijavavecua, bajayajebi evetaponaponajë. Itsiata baitsi jane apo jamatabëcopatsi pevitota pibisiacuene pexanabiabijava. Apo najamatabëcuenepënëyorotsi xanëjavaberena. ²² Bajarapova nexata avitaniaexanaenajë camata pebobocaenexa. Nexata pamona paxamëyajuvënëvi itsa apo copatsi tsane bajarapova pitorobicueniatsi pexanavanapaejava, pamatabëxëyo pevitota pibisiacuene exana bajarapova pitorobicueniatsi, nexata bajarapamonae ata bitso nabejobitsiaexanaenajë. ²³ Bajarapova pexi ata verebiabianajë. Nexata daxita Dioso pejumecovënëtsivi nejamatabëcueneyapëtaena. Nejamatabëcueneyapëtaena daxitajivi bëpënëa pejamatabëëthëtota, penajamatabëxainaecuene ata, tayapëtaenëcuene. Pacaejivimë canacujitsia xuavajëto panetonacuenebavanapame, bajara pijinia pitsijavavajëto pacarajutsianatsi. Xuavajëto pijinia panijaneconi paxainame, bajara pijinia paneconivajëtota pacananeconitsiaexanaponaenatsi. ²⁴ Paxamë apo panejumecovënëtsivi, Jezabel pacaitorobi ata pibisiacuene picani paneexanaenexa, mapacuenia pacajumaitssijije. Paxamë apo pajumecovënëtsimë dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevajënaeyabelia peyapëtaeyaexanaponaenexa. Bajaraxuata apo pacaitorobitsi panejumecovënëtsinexa pematat-sënëa itsalivaisi, piyapëbejelivaisi. ²⁵ Nexata pacaasaëmëre tsavanapae panejumecovënëtsijava Dioso pejumelivaisi matapania etapatsimatacabitsica javabelianexa. ²⁶ Itsamonae èpetëpaejavabelianexa, catsitecavanapaena tanesivanajamatabëcuene copatavanapaejava. Tajitsipaecuene ata netoexanavanapae-na. Bajarapamonae itsamatacabi tocopatsianajë pevetsinexa daxitanacuapijivi. ²⁷ Bajarapamonae itsamatacabi daxitanacuapijivi itsa evetsiana, ajume-

saëya itorobabiabiana pejumecovënëtsinexatsi. Pacuenia xanë ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajë.

Pacuenia atsanaito pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanetsi pamona Dioso apo pejumecovënëtsivi. Tajajivi verebiabiana daxita Dioso apo pejumecovënëtsivi.

²⁸ Pamona tajajivi, rajutsianajë pexainaenexa papinijicotia xainajë ayajamatabëcuenevinexa. ²⁹ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia," pejalivaisi toyaquinare Tiatira tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Sardis tomarata Dioso pejumecovënëtavanapaevi penamatacaitorobinëjavabelia yabara pelivaisi

3 Jesús icatsia nejumaitsi:

—Sardis tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë xaina siete paespiritubeje, Dioso pijaespiritu, ponë cobenanuca siete patuluputobeje.

Jesús nitoroba Sardis tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: "Yapëtaniji daxita xua paexanavanapame. Yapëtanijinua itsamonae papecasivajamatabëjumai tsabiabijava: 'Bajarapamonae bitso tonacuenebavanapa Dioso pijacuene,' papecasivajamatabëjai tsabiabijava. Itsiata baitsi jane xanë yapëtaniji pibisiacuene paneexanaejava. Yapëtanijinua bëpënëa panejamatabëcuenefaefae-naejava patanejumecovënëtsijavamë. ² Nexata namataenetsia panajamatabëcueneasaëyaexanare. Pajamatabëcueneitsamonae papecasivajamatabëjumai tsabiabijava: 'Bajarapamonae bitso tonacuenebavanapa Dioso pijacuene,' papecasivajamatabëjai tsabiabijava. Itsiata baitsi jane xanë yapëtaniji pibisiacueneasaëya exanaenamenua itsamonae ata, pamona pijinia jamatabëcuenefaefaenapona tanejumecovënëtsijava. Tsipaji baja bajarapamonae imoxo pecopatsi tanejumecovënëtsijavami. Xua paexanavanapame, bajaraxua picani paxamë pacatsitapexaniacuene. Itsiata baitsi jane bajaraxua Dioso apo tsitapexaniacuentsi. ³ Panajamatabënapire palivaisi baja copiaya itsamonae pacatsipaeba xanë patacacapanepaejavanexa yabara. Pacaasaëmëre tsavanapae bajarapalivaisi panejumecovënëtavanapaejava. Pacopabare pibisiacuene paneexanabiabijava. Panajamatabëcuenepënëyorore Diosojavabelia. Namataenetsia itsa apo panajamatabëcueneasaëyaexanaemë tsane patanejumecovënëtsijavamë, nexata jemata patsiarecajë patacananeconitsiaexanaenexa. Apo payapëtaemë tsane paepatota patsijitsianëreca. Tsipaji paepatota apo

panejamatabënajinaemë, jemata patsiarecajê. Pacuenia penacobetoxotsinënexa jemata bapata, paepatota apo jamatabënajinaetsi, bajara pijinia xanë ata itsinë tsane. ⁴ Paxamë Sardis tomarata panejinavanapaevi, itsamonae paxamëyajuvënëvi pibisiacuene apo exanae. Pacuenia itsi pamonaevi apo toxuiratsi penaxatabijavanë, bajara pijinia jamatabëcueneitsi tsavana pae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanëjavata jinavanapaena. Bajarapamonae itsamatacabi xanëjavata itsa jinavanapaena, planeconijibixae, naxatabiana penioponaevajanë. ⁵ Pamonaevi nejumecovënëtavanapaena ëpetëpaejavabelianexa, bajarapamonae naxatabiana penioponaevajanë. Bajarapamonae apo vënëiquinaenë tsane pabaxutota vënërubena pamonaevi matakabi apo pevererecaejava pexainaevinexa. Biji rajane pamonaevi tajajivi, vënëyapëtaeyaexanaponaenajê taxajavabelia, taxa pijaängelevijavabelia ata. ⁶ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovënëtsivijavabelia,” pejailivaisi toyaquinare Sardis tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaevajanë tuatujêta penucaenë.

Pacuenia Juan vajatuxanenë Jesús itorobatsi petoyaquinaenexa Filadelfia tomarata Dioso pejumecovënëtavanapaevi penamatacaitorobinëjavabelia yabara pe-livaisi

⁷ Jesús icatsia nejumaiti:

—Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, toy-aquinare pijajivi yajava peyapëtaenexa mapalivaisije, nejai Jesús, ponë planeconijibinë, ponë copiaevetavanapatsi icatsia pepatsijavanexatsica vajanacapanepaenexa.

Pacuenia bajayata Davidpijinë eveta Israelnacia, bajara pijinia pacuenia Jesús evetsiana mapanacuaje. Evetsiana athëbëtatsia ata, Dioso pijanacia. Nexata itsamatacabi Jesús pijajivi itorobiana daxitanacuanëjava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanëjava Jesús pijajivi itorobiana, bajarapanacuanëjava pejinavanapaevi Jesús pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo cajëpaetsi tsane Jesús pijajivi pitavetsinexa petsipaebanajetarubenaevaniva bajarapanacuanëjava pejinavanapaevi. Panacuanëjava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanëjava pejinavanapaevi Jesús pijajivi apo tsipaebanajetarubenaevi tsane. Nexata itsajivi ata apo cajëpaetsi tsane Jesús pijajivi pitorobinexa petsipaebanajetarubenaenexa bajarapanacuanëjava pejinavanapaevi. Jesús nitoroba Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, tatoy-

aquinaenexa mapejumaitisilivaisije: ⁸ “Yapëtaniji daxita xua paexanavanapame. Apo pasaëmë. Itsiata panejumecovënëtavanapame. Apo panayavajunuaxainaemë patajajivicuene. Bajaraxuata pacatocopatatsi talivaisi jivi panetsipaebaponaenexa panevajënaeyabelia. Nexata itsajivi ata apo cajëpaetsi tsane papecacopatsiaexanaenexa talivaisi jivi panetsipaebaponaevajava. ⁹ Panejumetaema. Itsamonae rabaja judíovi ata, dovathi pijajivi. Tsipaji apo nejumecovënëtsi. Bajarapamonae jamatabëcuenenavëxaniabiaya jumai tsabiabi: ‘Paxanë raja pajudíovinë, Dioso papijajivinë,’ jai tsabiabi. Itsiata baitsi jane Dioso apo pijajivi. Tsipaji apo nejumecovënëtsi. Bajarapamonae itsamatacabi paneitabarata pematatabacabëta pacatonubenaeyaexanaenatsi. Nexata bajarapamonae yapëtaena paxamë patacaasivacuene. ¹⁰ Pacaitorobatsi patanejumecovënëtsijavamë bajayajebi panecasaëtsavana-paenexa. Nexata baja bajarapacuenia panejumecovënëtavanapame. Bajaraxuata nexata pamatacabi daxitanacuapijivi piyajuacuene taeponaena, paxamë pacaevetsianatsi. Nexata paxamë apo pacaitsacueniabi tsane. ¹¹ Naxanitsiayo rabaja ponaenajê paxamëjavabereca. Xaniavaetsia baja pacaasaëmëre tsavana pae patanejumecovënëtavanapaejavamë. Nexata itsajivi ata apo pacavecuapitsi tsane xua taxa Dioso pacarajutsiana athëbëtatsia. ¹² Pamonaevi nejumecovënëtavanapaena ëpetëpaejavabelianexa, bajarapamonae taxa Dioso bepijatemplobonaesiturutonë taenatsi athëbëtatsia. Bajarapacuenia taxa Dioso bepijatemplobonaesiturutonë taenatsi bitso pija-matabëcuenesaë tsavanapaexae tsane tanejumecovënëtavanapaejava. Bajarapamonae taxa Dioso athëbëtatsia yajavajinavanapaena daxitamatacabijavabelianexa. Nexata taxa Dioso pevënë yaquinarutsianajê bajarapamonaejavabelia. Yajavayaquinarutsianajê taxa Dioso pijatomara pevënë. Bajarapatomara, pejana Jerusaléntomara. Bajarapatomara athëbëvetsica patsianica, taxa Diosojavavetsica. Tavënë ata, pejanavënë, yaquinarutsianajê bajarapamonaejavabelia. ¹³ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovënëtsivijavabelia,” pejailivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaevajanë tuatujêta penucaenë.

Pacuenia Juan vajatuxanenë Jesús itorobatsi petoyaquinaenexa Laodicea tomarata Dioso pejumecovënëtavanapaevi penamatacaitorobinëjavabelia yabara pe-livaisi

¹⁴ Jesús icatsia nejumaiti:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toy-aquinare pijajivi yajava peyapëtaenexa mapalivaisije, nejai Jesús, ponë copiaevetavanapatsi icatsia pepatsijavanexatsica vajanacapanepaenexa.

Bajaraponë pexaniajailivaisi jivi tsipaebabiaba. Pexanaenëna daxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumait-silivaisije: ¹⁵ “Yapëtaniji daxita xua paexanavanapame. Yapëtanijinua patanejumecovënëtsivi atamë, panejamatabëcuenevetsina bevelia patanejitsipaejavamë. Yapëtanijinua bevelia patanetonacuenebavanapaejavamë. Pacuenia apo tanejumecovënëtsivi jamatabëcueneitsi xanëjavaberena, itsiata picani bitso apo pajamatabëcueneitsimë. Pacuenia pijinia xaniavaetsia tanejumecovënëtsivi jamatabëcueneitsi xanëjavaberena, itsiata apo pajamatabëcueneitsimë. Pacuenia jamatabëcueneitsi pamonae apo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi pamonae xaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji roviafia panajamatabëcuene yapëtaejitsipame pacuenia pajamatabëcueneitsimë tsavanapae xanëjavaberena. ¹⁶ Nexata pacuenia mera perëbënaera apo cainejebi, bitso apo atajunua, bajara pajamatabëcueneitsimë xanëjavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenë pacuenia bëpënëa panejamatabëcuenevetsina pajamatabëcueneitsimë tsavanapae. Baitsi apo jitsipaenë bevelia patanejitsipaejavamë. Bajaraxuata pacanavecuaxuabianatsi. ¹⁷ Paxamë pajamatabëjumaitsimë tsabiabi: ‘Xanë baja cajena bitso daxitacuene taxinaenë. Daxita xua nacuenebaponapajë taxinaejavanexa, netocapitsapapona. Nexata itsacuenejava ata apo namatavenonaenë,’ pajamatabëjamë tsabiabi. Itsiata baitsi jane Diosojavabelia apo panejamatabëcuenexanepanaexae, pepacuene apo pajamatabëcuenebarëyamë tsavanapae. Apo payapëtaemëna bitso bepanejobicuene Dioso pitabarata. Paxamë cajena Dioso pacatane bepaneitaxutotsëcënaevi bitso, bepanejumasajinaevinua. ¹⁸ Bajaraxuata pacamuxujobijitsiatsi. Panevecuapire bitso penamatomatsijava paricovinexamë jane baja Diosojavatatsia. Panevecuapirenuua penioponaenaxatatsijava panenaxatatsinexa, panenaperabëcaranatsinexa Dioso pitabarata paneaurajavecua. Panevecuapirenuua paneitaxutotsëcënaevaë panetaenexa jane baja xaniavaetsia. Nexata dovathi pijacuene panayajivitaename papecayamaxëitojorobianiva. ¹⁹ Daxita pamonae tasi-vavi, muxujobajë peyapëtaenexa. Naneconitsiaexanjënuua pecopatsinexa apo tajitsipaecuene pexanaejava. Nexata asaëyata panejumecovënëre. Pacopabare pibisiacuene paneexanabiabijava. Panajamatabëcuenebënyorore Diosojavabelia. ²⁰ Panejumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanë ata panejamatabëëthëto itsa paneto-
baupatsianame, pacatsijamatabëjonenatsi. Nexata

pacayajavaponaponaenatsi daxitamatacabijavabelianexa. ²¹ Xanë baja cajena taxa Dioso taneitorobicuenia jumecovënëtaponapajë ètatëpaejavabelianexa. Nexata baja aeconoxae yajavaecajë taxa peecaejavata, pijatronovënëjavata. Pamonae pijinia nejumecovënëtavanapaena èpetëpaejavabelianexa, bajarapamonae pijinia tocopatsianajë tayajavaecaenexa tronovënëjavata. ²² Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Laodicea tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan tane Dioso pijajivi Dioso pijanacuatatsia yabara pelivaisi

4 Icatsia taniiji baupa penabaupatanucaejava athëbëtatsia. Ponë baja copiaya jumetaniji pecuaicuaijijava betrompetajume, bajaraponë icatsia pecuaicuaijijava jumetaniji. Nejumaitsi mapacueniaje: —Junaimina xanëjavabetsina. Catsitajëtsianatsi majotatsinaje pacuenia pevajënaeyabelia itsi tsaponaejitsia bajarapanacuatareca, nejai ponë jumetaniji pecuaicuaijijava.

² Nexata bajarapaepatota nayapëtaniji athëbëtatsia Espiritu Santo pesaë tayajavaponaponaejava. Athëbëtatsia taniiji tronovënëjava. Bajarapatronota Dioso taeyetajë. ³ Dioso, ponë eca bajarapatronota, itabaracotiabatsi. Pacuenia cotiaitsi penamatamotsiibotonë, bajara itabaracotiaitsi. Pacuenia cotiaitsi jaspevënëiboto, pacuenia cotiaitsi cornalinavënëiboto ata, bajaraitabaracotia itsi. Bajarapatrono matatoyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanucae bajarapaaravalibo. ⁴ Bajarapatrono matatoyorotsia taenubajënuua veinticuatro patronobeje. Caetronota canacujitsia ecapona ancianonëanë. Bajarapaancianovi naxatabena penioponaejavanë. Orotaxuabeje pexanaecoronanë mataena. ⁵ Patronota eca Dioso, bajarapatronojavaverena yamaxë binebinejai. Najumetajunujunua. Siete xuabeje pitayotanubenaejavanë taenubajë bajarapatronoitabarata. Bajarapaitayotanubenaejavanë mapajamatabëcuenelivaisi xainaje. Siete rabaja pijinia patomarabejepijivi, Dioso pejumecovënëtavanapaevi, Espiritu Santo peyavenonabiabijavanexatsi. ⁶ Bajarapatronoitabarata taeyetajë bemanuamene picani. Itsiata baitsi jane pitatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje pi-aitothiavi, ayainëanë. Trono matatoyorotsia nubena. Bajarapamonae pitabarayareca, pejumareca ata, itaxutorubenaponareca. ⁷ Copiaya ponë, benevëthë petso-bianë. Bajaraxuacujinae cotocaevinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi. ⁸ Ponëanë, cuatro ponëbeje pi-aitothiavi taniiji, xainapona seis pacorofetobeje caenë canacujitsia. Bajarapamonae daxitanëanëreca itaxutorube-

naponareca. Bëpënëaverena ata bajarapacuenia itaxu-torubenaponareca. Maticabijebi, meravijebi ata, apo copatanubena pejumaitsanubenaajava Diosojavabelia.

Bitso nianeconijibinë. Bitso ayaijamatabëcuenenëmë. Nexata cacaëjëpa daxitacuene nexanaenexa. Ajena, mapamatacabitaje, ponaponame. Mapanacuae nexanaevajënaeya ata, ponaponame. Daxitamatacabijavabelianexa ata ponaponame, jai tsanubena bajarapamonae Diosojavabelia.

⁹ Pamonae cuatro ponëbeje piatothiavi, pexaniajamatabëcuenenua rajutabiaba Diosojavabelia. Bajarapamonae pexaniajamatabëcuene ita rajutabiaba Diosojavabelia, jumai tsabiabi mapacueniaje:

—¡Diosomë, nenivenivenaecotia bitso pinijicuene! ¡Ayaijamatabëcuenenëmë bitso! jai tsabiabi.

Bajarapacuenia jumai tsabiabi tronota peacaenëjavabelia, daxitamatacabijavabelianexa peponaponanëjavabelia. ¹⁰ Pamonae cuatro ponëbeje piatothiavi, bajarapacuenia ita jumai tsanubena Diosojavabelia, nexata pijinia bajarapaepatota pamonae veinticuatro ponëbeje ancianovi pematabacabëta tonubenajunua Dioso pitabarata, daxitamatacabijavabelianexa peponaponanë pitabarata. Bajarapacuenia tonubenajunua Dioso pitabarata peyaiyataexae. Bajarapaancianovi Dioso pijatronojavabelia topenelia pijacoronanë. Bajarapaancianovi Diosojavabelia jumai tsanubena:

¹¹ Patajatuxanenëmë, patajaDiosonëmë. Xanepana itsamonaejavabelia patacavajunupaebaponaejava nenivenivenaecotia pexinaejava. “Diosomë, bitso ayaijamatabëcuenenëmë,” pacajai tsaponaetsinua. Xanepanua patajumaitsaponaajava: “Dioso cajena bitso piasaënë,” patajaitsaponaajava. Tsipaji baja daxitacuene nexanaenë. Nejsipaecuenia daxitacuene exaname. Mapamatacabijavaberena ata abaxë tsiteca daxitacuene nexanaajava nexanaecujinae. Bajarapacuenia abaxë tsiteca daxitacuene nexanaajava xamë nejamatatabëcueneta, jai tsanubena ancianovi Diosojavabelia.

Pacuenia Juan athëbëtatsia cobetaeyeta Dioso pequionaecuyalatobaxuto pecobenaecaejava yabara pelivaisi

5 Athëbëtatsia taeyetajë Dioso. Tronota eca. Pequionaecuyalatobaxuto cobenaeca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete paselotabeje upicatsanaruba. ² Nexata taenutajë bitso piasaëangelnë. Bajarapaangelnë pinijijumeta jumaitsi mapacueniaje:

—¿Jipatsa nexata jamatabëcuenecaëjëpatsi Dioso petocopatsinexatsi pesaracaenexa sellovënëjavaxi, bajarapacuyalatobaxuto piupicatsanarubiselloxi? jai.

³ Itsiata baitsi jane ajibi pejamatabëcuenecaëjëpaejivitsi bajarapacuyalatobaxuto piupicatsanarubiselloxi pesaracaenexa. Athëbëpijivi ata, mapanacuapijivi ataje, petëpaevimi ata, apo jamatabëcuenecaëjëpaetsi cajena. Nexata itsajivi ata Dioso apo tocopatsi pesara-

caenexa bajarapacuyalatobaxuto piupicatsanarubiselloxi bëpënëa paitane rubena petaenexa. ⁴ Nexata xanë bajaraxua ita taniji, bitso cajena nuajë. Bitso nuajë tsipaji baja ajibi pejamatabëcuenecaëjëpaejivitsi bajarapacuyalatobaxuto pequionaajava pebaxuisinaenexa pelebnexa. ⁵ Nexata itsanë ancianoviyajuvënëne nejumaitsi:

—Pëtsa baja nuame. Caenë raja jamatabëcuenecaëjëpatsi bajarapacuyalatobaxuto pequionaajava pebaxuisinaenexa. Bajaraponë Judápijinë pemomoxiyajuvënëne. Piasaënë bitso. Nexata bajaraponë yabara itsamonae jumai tsabiabi: “León,” jai tsabiabi. Bajaraponë nacuaevetsinëmi Davidpijinë pemomoxiyajuvënëne. Bajaraponë jamatabëcueneamoneyaba baja dovathi. Nexata bajaraponë jamatabëcuenecaëjëpatsi pesaracaenexa bajarapacuyalatobaxuto piupicatsanarubiselloxi, nejai ancianoviyajuvënëne Jesucristo yabara.

⁶ Nexata jane baja taenutajë Corderonë. Nuca veinticuatro ponëbeje ancianovi pitabarata. Nucanua trono pitabarata. Nucanua pamonae cuatro ponëbeje piatothiavi pitabarata. Cordero nayapëtane pebeyaxuabinëmitsicuene. Tsipaji cruzajavabelia pecobematababarutsivajënëmitsi ruca pecobeta. Corderonë xaina siete pamataetobeje, siete pijinia paitaxutobeje. Xuanë, siete paitaxutobeje, mapajamatabëcuenelivaisi xainaje. Siete rabaja pijinia paespíritubeje, Dioso pijae-spírituanë. Bajarapasiete paespíritubeje Dioso baja itoroba daxitanacuanëjava. ⁷ Nexata jane baja Dioso, ponë eca tronota, ponë pequionaecuyalatobaxuto cobenaeca pecujanenia. Corderonë kujitabalia. Corderonë jane baja vecuapita bajarapacuyalatobaxuto. ⁸ Corderonë baja ita pita bajarapacuyalatobaxuto, nexata pamonae cuatro ponëbeje piatothiavi, Corderonë pitabarata pematabacabëta tonubenajunua. Bajara pijinia pacuenia pamonae veinticuatro ponëbeje ancianovi, Corderonë pitabarata pematabacabëta tonubenajunua. Caeciano canacujitsa saicaya xainapona pijaarpa. Bajarapaancianovi capona orota pexanaecopanë. Bajarapacopanë vënëca petuxujuvijava. Bajarapatuxujuvijava xaina mapajamatabëcuenelivaisije. Dioso pijajivi pevajëtaponaejavami Diosojavabelia, Dioso tane bajarabepsituxujuvijava. ⁹ Nexata pamonae cuatro ponëbeje piatothiavi, pamonae pijinia veinticuatro ponëbeje ancianovi, daxita bajarapamonae, naxëana Corderojavabelia mapapejanavajije. Penaxëanaejavata vajita jumaitsi Corderojavabelia mapacueniaje:

Cajamatabëcuenecaëjëpa rabaja Dioso pecatocopatsixae nepitsinexa mapacuyalatobaxutoje. Nexata baja cajamatabëcuenecaëjëpanua bajarapacuyalatobaxuto piupicatsanarubiselloxi ata nesaracaenexa. Bajarapacuenia cajamatabëcuenecaëjëpa baja tsipaji baja cabeyaxuaba pataneneconimatamotsinexamë. Nexata padaxitavirijumevi atanë, padaxitanacuanëpijivi atanënu, nijanata baja panecomuatame Diosonexa. ¹⁰ Paneexanamenua baja Dioso papijajivinë itsamatacabi Dioso patanebarëevetsinexa daxitacuene. Pane-

exanamenua baja pasacerdotevinē jivi patatocuaicuaijaitisabiabivinexa Diosojavabelia. Paneexanamenua baja nacuanē pataevetsivinexa, jai ancianovi Corderonējavabelia penaxēanaejavata mapapejanavajije.

¹¹ Trono matatoyorotsia nubena cuatro ponēbeje pi-aitothiavi. Nexata piaitothiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Angelevi bitso ayaibitsaēto, millones paángelbeje nubena. Nexata bajarapaángelvi pecuaicuaijajava jumetaniji.

¹² Angelevi ayaijumeta jumaitsi mapacueniaje:

Corderonē, ponē picani beyaxuabatsi, bitso ayaijamatábēcuenenē. Bajaraxuata Dioso tocopatsi pevetsinexa daxitacuene mapanacuataje. Tocopatatsinua daxitacuene pexainaenexa. Tocopatatsinua daxitacuene peyapētaenexa. Tocopatatsinua pinijisaē pexainaenexa. Tocopatatsinua itsamonaē pejumatsinexatsi: “Xamē bitso ayaijamatábēcuenenēmē,” pejainexatsi. Tocopatatsinua pevajunupaebinxatsi penivenivenaecotia pexinaejava. Tocopatatsinua daxita pamonaē jumecovēnētatsi, pexaniajamatábēcuene perajutsinexatsi bajaraponējavabelia. Bajarapacuenia tocopatatsi tsipaji ayaijamatábēcuenenē bitso, jai tsanubenaē mapacueniaje ángelevi Jesús yabara.

¹³ Jumetanijinua icatsia daxita Dioso pexanaevi pecuaicuaijajava. Athēbēpijivi cuaicuaijai. Mapanacuapijivi ata cuaicuaijai. Petēpaevimi ata cuaicuaijai. Manuamenianēpijivi ata cuaicuaijai. Nexata daxita bajarapamonaē Diosobeje Jesúsbeje yabara jumaitsi mapacueniaje:

Diosomē, tronota neecaenē. Xamē pijinia Corderonēmē. Paxamēbejejavabelia pexaniajamatábēcuene pacarajutatsi. Paxamēbeje bitso ayaijamatábēcuene panexainaenēbeje. Panenivenivenaecotiabeje paxainamebeje. Nexata panenivenivenaecotiabeje panexinaejavabeje itsamonaējavabelia pacavajunupaebaponatsi. Pinijisaē bitso panexainaenēbeje. Bajarapajamatábēcuene panejamatábēcuenetsitecaenēbeje daxita matabacijavabelianexa, jai daxita Dioso pexanaevi Diosobeje Jesúsbeje yabara.

¹⁴ Pamonaē pijinia cuatro ponēbeje piaitothiavi jumaitsi tsaponae mapacueniaje:

—¡Bajara itsi tsane! jai bajarapamonaē.

Nexata pamonaē veinticuatro ponēbeje ancianovi, pematabacabēta tonubenajunua Dioso pitabarata. Pexaniajamatábēcuene rajutanubena Diosojavabelia, daxitamatabacijavabelianexa peponaponaenējavabelia.

Siete pasellobeje yabara pelivaisi

⁶ Corderonē taenutajē. Penamataxainaesello sarananua. Nexata pamonaē cuatro ponēbeje pi-aitothiaviyujuvēnēnē, caenē pecuaicuaijajava ayaijumeta, jumetaniji. Pecuaicuaijajava, beyamaxējume najumeta. Nexata jumetaniji: “¡Naxanitsia!” pejajava caballojumata peponaenējavabelia.

² Nexata bajaraxuacujinae icatsia taniji perenajava penioponaecaballota peyanajetarucaenē. Caballojumata peecaenē, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaē pebarēnabenexa. Nexata pijavajabitsaē cue-neamoneyabanajetaruca pepacuene ēpecopiarucaeya exanaejavabelianexa.

³ Bajaraxuacujinae icatsia Corderonē sarananua it-sasello, pecotocaevijava. Nexata pamonaē cuatro ponēbeje piaitothiaviyujuvēnēnē, icatsia itsanē: “¡Naxanitsia!” pejajava, jumetaniji.

⁴ Nexata bajaraxuacujinae icatsia taniji perenajava petsobiacaballota peyanajetarucaenē. Caballojumata peecaenē, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapaecuenemi. Jivi jane baja namataenetsia nabeyaexanaejitsia daxita nacuanējava.

⁵ Bajaraxuacujinae icatsia Corderonē sarananua it-sasello, acueyabijava. Nexata pamonaē cuatro ponēbeje piaitothiaviyujuvēnēnē, acueyabinē icatsia: “¡Naxanitsia!” pejajava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenē. Caballojumata peecaenē, cobenaeca pepesabaponaejava. ⁶ Icatsia jumetaniji pamonaē cuatro ponēbeje piaitothiavijavata pejumatsijava mapacueniaje: “Janibomatabixae, caedenariota pecomuatsinexa caējēpa saya caekilo trigoxu. Itsa pijinia cebadaxu, caējēpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caējēpae. Tsipaji bajaraparanē bitso namatamota,” pejajava, jumetaniji.

⁷ Bajaraxuacujinae icatsia Corderonē sarananua it-sasello, cuatrojava. Nexata pamonaē cuatro ponēbeje piaitothiavi, pecopiarucaenē jane baja: “¡Naxanitsia!” pejajava, jumetaniji.

⁸ Nexata bajaraxuacujinae icatsia taniji perenajava pevayanaecaballota peyanajetarucaenē. Caballojumata peecaenē, pevēnē Jivi Petēpaeyaexanaponaenē. It-sanē pēnaponatsi. Bajaraponē pijinia ponē pevēnē Infiernonē. Bajaraponēbeje Dioso tocopatsianatsibeje jivi ayaibitsaēto pebeponaenexabeje. Pitsibitsaētovajēto beponaenabeje, bajarapitsibitsaētovajēto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponēbeje pejamatabēcueneta beyaexanaponaenabeje jivi vajabitsaēcuenia, janibocuenia ata, piavitancuenia ata. Unupijinēanē piayainēanē pitsapaena. Nexata bajarapapiayainēanē jivi beponaenatsi. Bajarapacuenia itsi tsane mapanacuataje pamatababi Dioso jivi nananeconitsiaexanaena pibisiacuene pexanaeneconi yabara.

⁹ Bajaraxuacujinae icatsia Corderonē sarananua it-sasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajē pebobenaejava altarjavabēxēpanata. Bajarapamonaemi bajayata beyejebatsi apo pecopatsixae Dioso pejumelivaisi jivi petsipaebaponaejava. ¹⁰ Daxita pamon-

aemi bajayata beyejebatsi, Diosojavabelia pinijijumeta jumai tsanubena:

—Diosomë, pepo pexaniajamatabëcuenenëmë. Pacuenia najumecapanepaeya jumaitsimë, bajara-pacuenia exanabiabame. ¿Detsa pamatacabibeje abaxë saica nenaneconitsiaexanaenexa mapanacuata pejinavanapaevije, pamona panebeyejeba? jai tsanubena altarjavabëxëpanata pebobenaevi.

¹¹ Nexata jane baja bajarapamona Dioso rajutatsi penioponaenaxatabijavanë. Abaxë Dioso itorobatsi bajarapamona penacueraevetanubenaenexa. Tsipaji abaxë saica itsamona Dioso pijajivi, Jesucristo ata petonacuenebivi, pebeyejebinexatsi. Bajaraxuata bajarapamona abaxë nacueraevetsiaexanejebatsi Dioso.

¹² Bajaraxuacujinae icatsia Corderonë sarananuca it-sasello, seisjava. Nexata icatsia taniiji bitso ira penajëabijava. Matabapijijuumeto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijijuumeto pijinia bitso itaxutotsobia. Pacuenia pijana batsobia, bajara itaxutoitsi.

¹³ Nexata tulupu irabetsica othopaica. Pacuenia naejavacuai baothopaica, naejava itsa najëaba pinijijovibota, bajarapacuenia othopaica tulupu. ¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonëmi, petunaetonëmi ata, najëaba. ¹⁵ Nexata daxita mapanacuanëjavaje jivi pevetsivi, namatayaba ibovajuanëjava. Namatayaba ibotoxanetonë tuatujëjava ata. Daxita ayaijamatabëcuenenëanë, bitso rionëanë ata, namatayaba. Vajabitsaë penamatacaitorobinëanë ata, piasaënëanë ata, namatayaba. Dajubicuenia pecanajetsivitsi ata itsamonaejavabelia amoneya petonacuenebavanapaenexa, namatayaba. Apo pecanajetsivitsi ata itsamonaejavabelia amoneya petonacuenebavanapaenexa, namatayaba. Bajarapacuenia daxita namatayaba. ¹⁶ Nexata penamatayabivi jumaitsi ibotsutonëjavabelia, ibotoxanetonëjavabelia ata:

—Panetsimataothopare. Dioso, ponë eca tronota, bajaraponëvecua panematayatsianame. Pinijicuenia raeta panenaneconitsiaexanaena Corderonë. Bajaraxuavevecua panematayatsianame, jai picani pamona penamatayabivi.

¹⁷ Tocopiapatatsi jane baja pinijicuenia Dioso penaneconitsiaexanaematacabitsi. Itsajivi ata cajena apo caëjëpaetsi pevecupanepaenexa Dioso penaneconitsiaexanaecuenetsi.

Pacuenia Juan tane athëbëtatsia pacuenia itsamatacabi itapaitanerubijitsiatsi Israel nacuapijivi Dioso pijivixae yabara pelivaisi

7 Icatsia taniiji cuatro ponëbeje ángelevi. Bajarpaángelevi nacua matatoyorotsia nubena. Caenë canacujitsia ángelevi caranatanubena jovibo. Irajava jovibo peponaeyaniva, caranatanubena. Manuamene atavevecua caranatanubena. Caenae ata naejava penajëabiyaniva jovibota, caranatanubena ángelevi. ² Tani-

jina icatsia itsaángelnë penajetarucaenë orientejavavetsina. Bajarapaángelnë caponapona piasaënë Dioso pijasello. Bajarapasellota Dioso pijajivi pitapaitanerubaponaenexa. Bajarapaángelnë vavajai ayaijumeta cuatro paángelnëbejebavabelia. Pamona cuatro ponëbeje, ángelevi, Dioso tocopatatsi pebijianaenexa ira, manuamene ata. Nexata orientejavavetsina paángelnë najetaruca, cuatro paángelnëbejebavabelia jumaitsi mapacueniaje:

³ —Dioso pijajivi yajava peitsacueneyaniva, pëtsa abaxë pabijianame ira, naejavanë ata, manuamene ata. Matapania baja Dioso pijajivi Dioso pijasellota vaxaitsi itapaitanerubianatsi, bajara jane pabijianaename, jai ángelnë orientejavavetsina penajetarucaenë.

⁴ Bajaraxuacujinae jumetaniji jivi ayaibitsaëtoxaneto Dioso pijasellota pitapaitanerubijavatsi. Ciento cuarenta y cuatro mil pina pajivibeje itapaitanerubatsi Dioso pijasellota. Pamona itapaitanerubatsi Dioso pijasellota, daxita bajarapamona Israelpijinëmi pexi doce ponëmibeje pemomoxiyajuvënëvi. ⁵ Nexata Dioso pijasellota itapaitanerubatsi doce mil pajivibeje, Judápijinëmi pemomoxiyajuvënëvi. Doce mil pijinia pajivibeje, Rubépijinëmi pemomoxiyajuvënëvi. Doce mil pijinia pajivibeje, Gadpijinëmi pemomoxiyajuvënëvi. ⁶ Doce mil pijinia pajivibeje, Aserpijinëmi pemomoxiyajuvënëvi. Doce mil pijinia pajivibeje, Neftalípijinëmi pemomoxiyajuvënëvi. Doce mil pijinia pajivibeje, Manasépijinëmi pemomoxiyajuvënëvi. ⁷ Doce mil pijinia pajivibeje, Simeónpijinëmi pemomoxiyajuvënëvi. Doce mil pijinia pajivibeje, Levípijinëmi pemomoxiyajuvënëvi. Doce mil pijinia pajivibeje, Isacarpijinëmi pemomoxiyajuvënëvi. ⁸ Doce mil pijinia pajivibeje, Zabulónpijinëmi pemomoxiyajuvënëvi. Doce mil pijinia pajivibeje, Josépijinëmi pemomoxiyajuvënëvi. Doce mil pijinia pajivibeje, Benjamípijinëmi pemomoxiyajuvënëvi. Nexata bajarapacuenia caejavata Dioso pijasellota itapaitanerubatsi ciento cuarenta y cuatro mil pajivibeje, Israelpijinëmi pexi doce ponëmibeje pemomoxiyajuvënëvi.

Pacuenia Juan athëbëtatsia tane jivi ayaibitsaëtoxanetonë, penioponaejavanë penaxatabivi, yabara pelivaisi

⁹ Icatsia taniiji jivi ayaibitsaëtoxanetonë. Bajarapamona daxitanacuanëpijiviyajuvënëvi, daxitavirijumeviyajuvënëvi. Bajarapamona nubena Dioso pecaetrono pitabarata, Corderonë ata pitabarata. Jivi cajena ayaibitsaëtoxanetonë bitso. Itsajivi ata cajena apo caëjëpaetsi penamataëjëtsicapanepaenexa bajarapajivibitsaëtoxanetonë. Daxita bajarapamona epenioponaejavanë penaxatabivi. Cobenanubena benaxarebobaxutonë. ¹⁰ Daxita bajarapajivibitsaëtoxanetonë vavajai tsanubena ayaijumeta. Jumaitsi tsanubena mapacueniaje:

VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeneconimivevecua. Bajarapacuenia nacacapanepa Corderonë pejamatabëcueneta, jai tsanubena bajara-pajivibitsaëtoxanetonë.

¹¹ Trono matatoyorotsia nubena cuatro ponēbeje pi-aitothiavi. Nexata piaithiavi pepēnēvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ángelevi. Daxita ángelevi ira taenubenaeya bobena irata Dioso peecaetrono pitabarata. Bobenaeya pexaniajamatábēcuene rajutanubena Diosojavabelia. ¹² Bajara paángelevi ira taenubenaeya jumai tsanubenaepacueniaje:

¡Bajara itsi tsane! PatajaDiosomē, pexaniajamatábēcuene pacarajutabianatsi daxitamatabijavabelianexa. Nenivenivenaecotia nexainaejava, daxitacuene neyapētaenēcuene ata, pacavajunupae baponaenatsi daxitajivijavabelia. Daxitajivi casivajamatábēcuenebarēya tsabiabi tsane itsa yavenonabianame bajarapamonae. Daxitajivi cayaiyataeyabianame. Bitso cajena niasaēnē daxitamatabijavabelianexa. Cajamatábēcuenecaējēpa nexanaenexa daxitacuene ata daxitamatabijavabelianexa. Bajara itsi tsane, jai tsanubenaepacueniaje irataeya daxita bajarapaángelevi Diosojavabelia.

¹³ Nexata itsanē ancianonē nejumlahitsi:

—¿Detsa mapamonae penioponaejava penaxatabivije? ¿Detsa verena pata bajarapamonae? nejai ancianonē.

¹⁴ Xanē nexata jumlahsinē:

—Xamē raeta jane yapētaneme, janē ancianonējavabelia.

Nexata ancianonē nejumlahitsi:

—Mara pamonaeye nacua pecopiarucaevajēnaeya, piyajunavixaneto pecanicabanubenaevimije. Corderonē pesivatēpaexaetsi, bajarapamonae pibisacuene pexanaeneconimi vecuajibiaexanatsi baja. Bajaraxuata penioponaejavanē naxataba. ¹⁵ Bajaraxuata baja bajarapamonae nubena Dioso peecaetrono pitabarata. Copatsinejeva Dioso petonacuenebijava, tonacuenebavanapa Dioso pijatemplobota. Dioso, ponē eca tronota, bajaraponē evetsianatsi peyajavajivananapaexae. ¹⁶ Bajarapamonae baja apo namatavenonae tsane pexaejava. Apo namatavenonae tsane mera ata. Icotia ata apo tsajavi tsanetsi. Icotia piatajujava ata apo jamatabēitonotsi tsanetsi. ¹⁷ Bajara itsane tsipaji Corderonē, ponē nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinē xaniavaetsia baeveta pijaoveja, bajarapacuenia evetsianatsi. Bajaraponē mataponabiabianatsi itsabelia rubena iravetsina pepit-saparubenaemeranē, jivi piatavayaexanaemeranējavabelia. Daxita bajarapamonae Dioso pijanacuatsia jamatabēcuenebarēya tsavanapae tsane. Tsipaji ajibi tsane peyabaranuejavanexa, nejai ancianonē pacueniaje.

Sietejava sello yabara pelivaisi

8 Icatsia Corderonē sarananuca cuyalatobaxuto pi-upicatsatarutsisello, sietejava. Nexata jane baja athēbētatsia ajumejibi. Bajayaepatovajēto ajumejibi.

² Bajaraxuacujinae icatsia taniji siete ponēbeje ángele-

vi. Dioso pitabarata nubena. Nexata bajarapaángelevi rajutatsi siete patrompetabeje. ³ Icatsia xuacujinae itsanē ángelnē najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitaire. Nexata nucojopa altarvēnējava pitabarata. Nexata jane baja rajutatsi ayaijava petuxujuvijava. Nexata bajarapatuxujuvijava Dioso tane daxita Dioso pijajivi pevajētaeponaejumemi Diosojavabelia bepe-matajērēabijava. Nexata bajarapatuxujuvijava ángelnē buata altarjumata. Bajarapaaltar, orota pexanaealtar, nuca Dioso peecaetrono pitabarata. ⁴ Nexata jane baja bajarapatuxujuvijavami ángelnē tajuita. Nexata pet-sēxē athēbēabetsia junaya. Patsēxē athēbēabetsia junaya altarjavavetsia, ángelenē pecobejavavetsia junaya Diosojavabetsia. Bajarapatsēxē yajavajunaya Dioso pijajivi pevajētaeponaejumemi Diosojavabelia. ⁵ Bajaraxuacujinae ángelnē altarjumavecua nota pitatsajaviitaire. Bajarapaitatsajaviitaire vēnēta pijavaxi. Bajaraxuacujinae ángelnē bajarapaitatsajaviitaire bajarapavaxi ēnētuaatujēvecua othotajarabareca irabereca. Nexata yamaxē iratareca najumeta. Yamaxē binebinejai iratareca. Iranē jane baja ayaicuenia najēaba.

Siete patrompetabeje yabara pelivaisi

⁶ Siete paángelbeje canaveretanubena pija-trompetanē piobinexa.

⁷ Nexata jane baja penamataxainaeángelnē oba pija-trompeta. Nexata bitso pecainejebimatarejetonē othopareca irabereca. Bajara pacainejebimatarejetonē matajērēaba isoto. Matajērēabanua pijana yajava. Nexata jane baja ira tajuepona daxita nacuanējava. Panacuanējava ira tajuepona, pairavajēto tajuepona matatoxenetsia itsiata yajuvēnēnacopatapona. Daxitaira apo veriajavapona. Nexata panacuanējava ira tajuepona, daxita naejavanēmi, pejuvujavanēmi ata, yajavatajuepona.

⁸ Bajaraxuacujinae icatsia pecotocaeviángelnē oba pijatrompeta. Taniji bepinijitsutoxaneto petajueyecaejava. Bajaraxua jopareca manuamienareca. Manuamenemi nexata pijana. Pamenevajēto ēpijanamene tsarucae, bajarapamenevajēto matatoxenetsia itsiata pijananejeva yajuvēnēnacopata. ⁹ Pamanuamene ēpijanamene tsarucae, bajara pamanuamenepijidujuaimi tēpa baja. Pamanuamene pijinia pijananejeva nacopata, bajara pamanuamenepijidujuai apo tēpae. Pamanuamene ēpijanamene tsarucae, bajarapamanuamene ta perubenaebarcoxanetonēmi ata napeneta. Pamanuamene pijinia pijananejeva nacopata, bajarapamanuamene ta perubenaebarcoxanetonēmi ata napeneta. Pamanuamene pijinia pijananejeva nacopata, bajarapamanuamene ta perubenaebarcoxanetonēmi ata napeneta.

¹⁰ Bajaraxuacujinae icatsia acueyabiángelnē oba pija-trompeta. Nexata pinijituluputoxaneto jopareca irabereca. Bajarapatuluputoxaneto tajuerucaponareca. Pacuenia bepinijiisotocotiaxaneto bacotia itsi, bajaracotia itsi tsarunaereca. Panacuata jopa bajarapatuluputo, bajarapanacuata daxita perubenaemeniemi, bijiana baja. Iravetsina mera pepit-saparubenaejavanēmi ata, bijiana baja. Nexata baja abeje daxita bajarapameranēmi. Panacuata apo jopae bajarapat-

uluputo, bajarapanacuata perubenaemenianë, apo bijiana. Nexata xanepana daxita bajarapameranë. Mera iravetsina pepitsaparubenaëjavanëjava ata, xanepanarubena. ¹¹ Bajarapatuluputo pevënë Ajenjo. Pamerajavareca jopareca bajarapatuluputo, bajarapamera at-saxa baja. Jivi ayaibitsaëtoxanetonë tēpa penatsia-paexae bajarapamera.

¹² Bajaraxuacujinae icatsia cuatroángelnë oba pija-trompeta. Nexata jane baja itaxutobijiana matacabipijiuameto. Itaxutobijiana meravipijiuameto ata. Itaxutobijiana tuluputonë ata. Nexata matacabipijiuameto bijiaya naitayota. Meravipijiuameto ata bijiaya naitayota.

¹³ Bajaraxuacujinae icatsia taniji itsanë ángelnë pepunanajetarucaenë. Pepunanajetarucaenë ángelnë jumai tsanajetarucaë ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnëbeje penacopabivi! jai tsanajetarucaë ángelnë pepunanajetarucaenë.

9 Bajaraxuacujinae icatsia cincoángelnë oba pija-trompeta. Nexata taniji athëbëvereca ángelnë perunaëjavareca irabereca. Nexata bajarapaángelnë Dioso rajutatsi llave, iravetsina pepitsapaemëthëxaneto pijallave. ² Nexata jane baja bajarapallaveta ángelnë mëthëxaneto vëpacasarana. Ángelnë jane baja vëpata mëthëxaneto. Nexata bajarapamëthëxanetojavatsina pitsapaina ètsëxëxaneto. Pitsitsëxëxaneto bapitsapa pinijipabixaneto itsa tajuita, bajarapitsitsëxëxaneto pitsapaina bajarapamëthëxanetojavatsina. Nexata bajarapatsëxëta matacabipijiuametomi itaxutoaitaquiri-ayaexana. Itaboxo ata aitaquiriayaexana. ³ Bajarapat-sëxëjavaverena pitsapa bosesë. Bajarapabosesë daxitanacuanëjava punanajetarubena. Bajarapabosesë caëjëpaëyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa. ⁴ Bajarapabosesë apo itorobitsi pebijianaenexa itsacuenejava ata xua pejuvijava. Nexata bajarapabosesë apo bijianaponae pona. Apo bijianaponae naëjavanë ata. Tsipaji itorobatsi pecacuatsinexa saya ëjivi. Nexata pamonaë Dioso pijasellota apo itapaitanerutsitsi, bajarapamonae pecacuatsinexa. ⁵ Itsiata baitsi jane apo tocopatsitsi caecuenia pe-beyaxuabaponaenexa. Tocopatatsi saya jivi itsa cacuata, penavixaetaëyaexanaenexa cinco pajuametobeje. Nexata bajarapabosesë jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bajarapavixaevajëto jivi navixaetaena. ⁶ Nexata pamonaë cacuatsianatsi bajarapabosesë, jitsipaena picani petëpaenexa bajayajebi penavixaetaëyaniva. Itsiata baitsi jane bajarapamonae Dioso abaxë apo tocopatsi tsane petëpaenexa. Penabeyaxuabinexa ata, Dioso apo tocopatsi tsane.

⁷ Bajarapabosesë ajumabocotaja. Pacuenia vajabitsaë itsa nabejitsia, pijacaballo bajumaxataba hierropananë pijavajabitsaë petojorojoronaëyanivatsi, bajara itsanubenaë bajarapabosesë. Beorota pexanaëronanë namataxatabanubena. Pacuenia pebi itabarait-

si, bajaraitabaraitsi. ⁸ Pematana xaina. Pacuenia petiriva matanaitsi, bajara matanaitsi. Pevonotonë pijinia benevëthëvonotonë. ⁹ Bajarapamonae pejumabocotonë yajavanaexana baja cajena behierrojumabocotonë pejorojoronaëyanivatsi itsajivi ata. Pecorofenajumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosesë pecorofe. ¹⁰ Bajarapabosesë pebosotonëcopiata xaina peetonë jivi pecacuatsinexa. Pacuenia aqueto pebosotocopiata xaina peeto, bajnia benevëthëvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. ¹¹ Bosesë cajena xaina ángelnë pitorobinëxatsi, pinijimëthëxaneto pevetsinë. Bajarapaángelnë hebreojumeta pevënë Abadón. Griegojumeta pijinia Apolión, “Peverebiabinë,” pejaijume.

¹² Bajarapapiayaicueene penamataxainaejava. Itsiata baitsi jane abaxë saica anijavabeje.

¹³ Bajaraxuacujinae icatsia seisángelnë oba pija-trompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaëaltar. Bajarapaaltar cuatro pamataetobeje xaina. Caeupi canacujitsia mataerucapona. Bajarapamataetonë tuatuajëta jumepitsapa.

¹⁴ Bajarapaaltarjavaverena jumaitsi seisángelnë trompeta pexainaenëjavabelia mapacueniajaje:

—Isicare cuatro ponëbeje ángelevi, pamonaë cëbejebatsi pinijimenejavata, Eufratesvënë menejavata, jai bajarapaaltarjavaverena.

¹⁵ Nexata jane baja pecëbejebiángelevimitsi isicatsi. Isicatsi bajarapaángelevi pebenexa jivi. Bajarapaángelevi jivi ayaibitsaëtonë beponaejitsia daxitanacuanëjava. Bajara saya cajena ëxuanexa, paángelevi Dioso jamatabëcueta pexainaenëjavabelia mapacueniajaje:

—Isicare cuatro ponëbeje ángelevi, pamonaë eneevetanubena Dioso pitorobinexatsi jivi pebeponaenexa paepatota tocajëtatsi. ¹⁶ Nexata icatsia jumetaniji bajarapaángelevi pijajivi, vajabitsaëvi, pitorobijava peponaenexa caballota. Doscientos millones ponëbeje vajabitsaëvi pona jivi pebeponaenexa daxitanacuanëjava.

¹⁷ Bemajitsinaebota taniji bajarapamonae caballota peponaëjava. Vajabitsaëvi namëpabëxataba hierropananë pejorojoronaëyanivatsi pijavajabitsaë. Vajabitsaëvi penamëpabëxatabijavanë itabëta acueyabi paviriabejavata. Itabëta mapaviriabejavatajaje. Itabëta petsobiajavata. Itabëta perajenaëjavata. Itabëta pevayanaëjavata. Bajarapaviriabejavata itabëta. Pacuenia nevëthëmatabocoto itsi, bajaramataboco itsi bajarapacaballuanë. Pecuibovojotonëjavavetsina pitsapa pitarunutsicotia, ètsëxë yajava, azufre ata yajava. ¹⁸ Xuanë caballuanë pecuibovojotonëjavavetsina pitsapa, bajaraxuanë jivi ayaibitsaëtoxanetonë yatëpaponaxitanacuanëjava. Pabitsaëtovajëto tēpa, bajarapabitsaëtovajëto matatoxenetsia nacopatama-panacuatajaje. ¹⁹ Bajarapacaballuanë caëjëpatsi jivi pebeponaenexa pecuibovojotonëta, pebosotonëta ata.

Bajarapacaballuanë pebosotonëupianë bejomo-matabocotonë. Pacuenia jomo pematocabocotota caëjê-patsi jivi pesininexa pebeyaxuabinexa, bajara itsi bajarapacaballuanë pebosotonëupianë.

²⁰ Itsiata baitsi jane pamonaë peyajuvënëtêpaevi, pamonaë penacopabivi, bajarapamonaë tsiteca pibisi-acuene exanavanapa. Apo copatsi dovathivijavabelia penavajêcabiabijava. Apo copatsinua pecobeta jumapecataeya pexanaenëanëjavabelia ata penavajêcabiabijava. Bjaraxuanë saya pexanaenëanë oronantonëta, platanantonëta ata, broncejavanëta ata, ibotonëta ata, naejavanëta ata. Nexata bajaraxuanë apo caëjêpaetsi petaenexa. Apo caëjêpaetsi pejumetaenexa ata. Apo caëjêpaetsi peponaenexa ata.

²¹ Pamonaë peyajuvënëtêpaevi, pamonaë penacopabivi, bajarapamonaë apo copatsi jivi pebejava. Apo copatsi penajorobijava ata. Apo copatsi pevitota pibisi-acuene pexanaejava ata. Apo copatsi penacobetoxotsijava ata.

Pacuenia Juan tane ángelenë pecobenanucaejava cuyalatobaxutoyo yabara pelivaisi

10 Icatsia taniji itsaángelnë athëbëvetsica perunaëjavatsica. Runaica mapanacuayabetsicaje. Bajarapaángelnë bitso piasaëángelnë. Itarërëbo tuatujêta najetaruca. Natsimatatsënërotanajetaruca aravalibo. Itabaranaitayotanajetaruca. Pacuenia matabipijijuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsofia, bajarapacuenia cotiatsobia. ² Cuyalatobaxutoyo baxupatanuca. Pecujanenia pataxu nataxunutanuca manuameneboxovereca. Pet-savenonenia pijinia pataxu nataxunutanuca irajumavereca. ³ Nexata vavajai tsaxuabi ayaijumeta. Pacuenia nevêthë itsa fiaba ayaijume, bajarapacuenia ayaijume. Pevavajacujinae siete payamaxëbeje najumeta athëbëtatsia. ⁴ Yamaxë penajumetsicujinae, yaquinaejitsianë picani pajamatabëcuene yabara yamaxë penajumetsijava neyapêtaeyaexana. Itacarajeta athëbëvetsica tanejumaitsijava, jumetaniji. Nejumaitsi athëbëvetsica mapacueniaje:

—Muetsia saya xainare pajamatabëcuene yabara yamaxë penajumetsijava, cayapêtaeyaexana. Pêtsa yaquiname bajarapalivaisi, nejai athëbëvetsica.

⁵ Bjaraxuacujinae ángelnë, ponë nataxunutanuca manuameneboxovereca, irajumavereca ata, bajaraponë nacobeyotanuca athëbëabetsia pecujanenia pacobe. ⁶ Bajarapaángelnë nacobeyotsiaya jumai tsanucaë:

—Dioso, daxitamatacabijavabelianexa peponaponenë, caecuenia exana mapanacuaje, itaboxo yajava. Nexata caecuenia yajavaexana mapanacuapijicueneje, itaboxopijicuene ata yajava. Caecuenia yajavaexana manuamene ata, manuamenepijicuene ata yajava. Bjaraponë pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajëvelia najamatabëxaina pexanaenexa. ⁷ Itsa rabaja paepatota siete ángelnë obiana pijatrompeta,

bajarapaepatota Dioso jane baja taxuxuabiana pexanaejava pacuenia baja cajena tajëvelia Dioso najamatabëxaina pexanaponaenexa jivijavabelia. Muetsia pexainabuatsilivaisimi itajëtsiana. Copiapatsiana jane baja pacuenia bajayata Dioso tajëvelia najumecapanepaeya jumaiatsi profetavimijavabelia, jai tsanucaë nacobeyotsiaya ángelnë.

⁸ Copiaya pajume jumetaniji athëbëvetsica tanejumaitsijava, bajarapajume icatsia jumetaniji. Nejumaitsi icatsia athëbëvetsica mapacueniaje:

—Ponë ángelnë nataxunutanuca manuameneboxovereca, irajumavereca ata, bajarapaángelnë cujiremelia. Vecuapire pacuyalatobaxutoyo bajarapaángelnë baxupatanuca, nejai athëbëvetsica.

⁹ Nexata cujiliajê ángelnë. Vajêtajê nexata tanerajutsinexa bajarapacuyalatobaxutoyo. Bajarapaángelnë nejumaitsi mapacueniaje:

—Ăjã, pire baja. Xaema necuiboxaicaenexa. Pacuenia jabëra xaica, bajara itsi mapacuyalatobaxutoyoje. Itsiata baitsi jane necotsorotuabereca atsaxa tsane, nejai ángelnë.

¹⁰ Nexata baja ángelnë bajarapacuyalatobaxutoyo vecuapitajê. Xaniji jane baja. Nexata jane baja cuiboxaicajê. Pacuenia jabëra xaica, bajara itsi. Itsiata baitsi jane taquijonicujinae tacotsorotuabereca atsaxa.

¹¹ Nexata icatsia ángelnë nejumaitsi:

—Tsipaebare pacuenia Dioso sivanajamatabëxaina daxitanacuanëpijivi. Tsipaebare pacuenia Dioso sivanajamatabëxaina daxitavirijumevi ata. Tsipaebare pacuenia Dioso sivanajamatabëxaina caenacua canacujitsia pevetsinëanë ata, nejai ángelnë.

Pacuenia itsamatacabi anijanëbeje jivi tsipaebaponenabeje palivaisi Dioso yapêtaeyaexanaenatsibeje yabara pelivaisi

11 Icatsia taniji ángelnë. Nerajuta piapianaëbo. Nejumaitsi mapacueniaje:

—Nonotapunare. Caponare mapanaeboje necaëjêbinexa Dioso pijatemplobo, necaëjêbinexa altarvënëjava ata. Namataëjêtsianamenua pajivibeje bajarapatemplobota navajêca Diosojavabelia. ² Itsiata pêtsa caëjêtame templobopanabo. Tsipaji bajarapanabo tocopata baja Dioso apo pejumecovënët-sivinexa, pamonaë saicayanacuaverena pepatsivi pejinavanapaenexa. Bjarapamonaë jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yayatae tsane judíovi pijatomara. ³⁻⁴ Bajayata profetanëmi peyaquinaebaxutota, comparacióncuenia tajëvelia jumaiatsi mapacueniaje: “Anijanaebeje, olivonaëbeje, anijavabeje pijinia pitayotanucaejavabeje, nubenaena mapanacuapijivi pijatuxanenë Dioso pitabarata,” jai. Bjarapacuenia comparacióncuenia tajëvelia itsa jumaiatsi, tajëvelia vajunupaëba anijanëbeje jivi petsipaebanajetarucaejavanexabeje palivaisi Dioso yapêtaeyaexanaenatsibeje. Nexata anijanëbeje Dioso itorbiana jivi petsipaebanajetarucaenexabeje palivaisi Dioso yapêtaeyaexanaenatsibeje. Palivaisi bajara-

ponëbeje Dioso yapëtaeyaexanaenatsibeje, bajarapali-
vaisi mil doscientos sesenta pamatacabibeje jivi tsi-
paebanajetarucaenabeje. Naxatatsianabeje piayopa-
paëbërëjava. Bajarapacuenia naxatatsianabeje bitso
pesivajamatabëcuenebëjaixaebeje tsane pamona
apo peyaiyataevi Jerusaléntomara, nejai ángelnë.

⁵ Itsajivi itsa jamatabëitsacueniabianatsibeje, bajara-
ponëbeje nayajivitajuitsianabeje pecuibovojotovetsina
pepitsapaecotiata, pitarunutsicotiata. ⁶ Bajara-
ponebanajetarucaenabeje. Naxatatsianabeje piayopa-
paëbërëjava. Bajëbeje caëjëpaenatsibeje pitavetsinex-
abeje ema pejopaeyaniva. Pamatacabibeje jivi tsipa-
banajetarucaenabeje palivaisi Dioso yapëtaeyaexanae-
natsibeje, bajarapamatacabibeje abaxë ema apo
jopaeyaexanaeabeje tsane. Caëjëpaenatsibejenua mera
ata pijanara pexanaenexabeje. Caëjëpaenatsibejenua
daxitaviria piayaiuene pecapitsapaenexabeje pamata-
cabita jitsipaenabeje. ⁷ Bajaraponëbeje itsa veretsian-
abeje palivaisi Dioso yapëtaeyaexanaenatsibeje jivi
petsipaebanajetarucaejavabeje, bitso piayainë pit-
sapaenina pinijimëthëxanetojavatsina. Bitso piayainë
pitsapenina pebenexatsibeje bajaraponëbeje. Nexata
amoneyabianatsibeje. Nexata baja beyaxuabianatsi-
beje. ⁸ Nexata petëpaenëbeje bocaenabeje Jerusalén
tomaraxaneto callejavata. Bajarapatomarata bajayata-
mi vajatuxanenë ata cobematabiabarutatsi cruzajav-
abelia. Bajarapatomara yabara jivi itsajavata:
“Sodomatomara raja,” jai tsabiabi. Itsajavata: “Egipto-
tomara raja,” jai tsabiabi. Bajarapacuenia jumai tsabi-
abi Jerusaléntomara yabara tsipaji bajarapatomarapi-
jivi bitso pibisiacuene exana. ⁹ Nexata bajaraponëbeje,
Jerusaléntomara callejavata petëpaenëbeje, bocaen-
abeje acueyabi pamatacabibeje epatua. Tsipaji
Jerusaléntomara pevetsivi apo tocopatsi tsane itsajivi
ata pemëthëtsinexatsibeje bajaraponëbeje. Nexata
daxitaviriajumevi, daxitanacuanëpijivi ata, taeyabuats-
ianatsibeje. ¹⁰ Dioso apo pejumecovënëtsivi sivaja-
matabëcuenebarëyatsibeje tsane petëpanucaejav-
abeje. Bitso cajena barëya tsane Dioso apo pejume-
covënëtsivi. Nexata pebarëyajamatabëcuene fiesta ex-
anaena. Namataenetsia narajutsiana amoneya it-
sacuenejavanë. Bajarapacuenia exanaena Dioso apo
pejumecovënëtsivi bajaraponëbeje petëpaejavabeje
yabara. Tsipaji Dioso apo pejumecovënëtsivi jumaitsi
tsane: “Copiaruca rabaja maponëbeje livaisi vajanacat-
sipaebabiabijavaje. Copiaruca baja vajanacaja-
matabëitonotabiabijava,” jai tsane. ¹¹ Itsiata baitsi jane
petëpaecujinaeabeje, acueyabi pamatacabibejecujinae
itsamatacabi epatua, icatsia Dioso piasaëjumali rajut-
sianatsibeje. Nexata petëpaejavabejevecua namata-
cotsianabeje. Daxita cajena pamona taeyabuatsianat-
sibeje petëpanucaejavabeje, bitso cjunavianatsibeje.
¹² Bajaraxuacujinae bajaraponëbeje jumetaenabeje
athëbëvetsica pinijijumeta pejumaitsijavatsibeje: “Pa-
junaiminabeje,” pejaijavatsibeje. Nexata bajara-
ponëbeje junaeniabeje athëbëabetsia itarërëbo tuatu-
ajëjavabetsia. Daxita pitoyavitsibeje pëtaenubenaenat-
sibeje. ¹³ Bajara jane paepatota ira najëabiana. Nexata

Jerusalén tomarata, itsajota diez pabobeje najuaena-
na, caebo yajuvënëjopaponaena. Nueve nexata
pabobeje nacopataponaena. Nexata Jerusalén tomara-
ta ayaijava bo othopaena. Siete mil pijinia pajivibeje
bajarapairanajëabita tëpaena. Jerusalén tomarapijivi,
pamona nacopabiana, bitso cajena junaviana. Nexata
bajarapamona pecajunavi, Diosojavabelia jumaitsi
tsane:

—Diosomë, ayaijamatabëcuenenëmë bitso, jai tsane
pecajunavi Diosojavabelia, athëbëtatsia peecaenëjav-
abelia.

¹⁴ Anijapiayaicuenebeje rabaja panepaena. Itsiata
baitsi jane icatsia itsajava piayaiuenejava bepijia naje-
tarucaena, acueyabijava.

Sietenë baja ángelnë pijatrompeta piobijava yabara pelivaisi

¹⁵ Sietenë jane baja ángelnë oba pijatrompeta. Nexa-
ta athëbëvetsica pinijijumeta pejumaitsijava, jumetani-
ji. Jumaitsi mapacueniaje:

Daxitanacuanëpijivi rajane baja vajatuxanenë Cristo-
beje, Diosobeje, evetaponaponaenabeje. Bajara-
ponëbeje evetaponaponaenabeje daxitamatacabijav-
abelianexa,pejaijava athëbëvetsica, jumetaniji.

¹⁶ Nexata pamona veinticuatro ponëbeje ancianovi,
pamona ena pijatronota Dioso pitabarata, daxita ba-
jarapamona irataeya bobena. ¹⁷ Bajarapamona an-
cianovi irataeya jumai tsanubenae Diosojavabelia:

Xamë Diosonëmë, nijamatabëcuenesaënë daxita
mapanacuanë pevetsivivecuaje. Ajena, pamatacabi,
ponaponame. Bajayata mapanacuaje nexanaevajë-
naeya ata, ponaponame. Daxitamatacabijavabelianexa
ata ponaponame. Pexaniajamatabëcuene pacarajutat-
si. Tsipaji baja taxuxuabame pinijisaëta nevetapon-
aponaenexa daxita mapanacuanëpijivije. ¹⁸ Daxita ma-
panacuanëpijivije cabaraanaepana bitso. Bajaraxuata
tocopiapatatsi baja nenaneconitsiaexanaenexa daxita
bajarapamona. Tocopiapatatsinua baja petëpaevimi
ata nenaneconitsiaexanaenexa. Tocopiapatatsinua ba-
ja nijajivi, xuavajëto catonacuenebavanapa, bajarapit-
sijavavajëto nerajutsinexa pecatonacuenebavanapae-
matamo. Pamona catotsipaebavanapa nijumelivaisi
itsamonaejavabelia, bajarapamona jane baja rajut-
sianame xua toxainame bajarapamona nera-
jutsinexa. Pamona ayaijamatabëcuene pexainaevi
ata, cavënëlivaisiyaiyatane. Pamona beveliaja-
matabëcuene pexainaevi ata, cavënëlivaisiyaiyatane.
Bajarapamona ata jane baja rajutsianame xua tox-
ainame bajarapamona nerajutsinexa. Tocopiap-
atatsinua baja pijinia neverebiabinexa daxita pamona
bijiana mapanacuaje, pamona ata jamatabëcuenebi-
jana pecajumecovënëtsivi, jai tsanubenae irataeya an-
cianovi Diosojavabelia.

¹⁹ Nexata athëbëtatsia Dioso pijatemplobo nabaupa-
ta. Bajarapatemplobo enëtatsia taeyabuatsiajë baula.
Bajarapabaulaënëta jeba Dioso pejumelivaisi
peyaquinajebijava. Bajarapaitane jumai tsarubena
pacuenia Dioso najumecapanepaeya jumaitsi pijajivi

pecapanepaenexa pijaneconivecua. Yamaxë binebine-
jai. Najumetanua. Ira najëabanua. Bitso pecainejebi-
matarejetonë irabetsica othopaica pinijicuenia.

**Pacuenia Juan athëbëtatsia tane dragón bitso pi-
anaepanaejava yabara pelivaisi**

12 Athëbëtatsia ayaicuene naitajëta vajanacayapë-
taeyaexanaenexa pacuenia itsamatacabi pevajë-
naeyabelia itsi tsaponaejitsia mapanacuataje. Athëbë-
tatsia petiriva taenutajë. Petiriva jumanava naitay-
otanuca. Pacuenia matacabipijjuameto baitayota, ba-
jarapacuenia jumanava naitayotanuca. Meravipiji-
juametojavavelia nataxunutanuca. Namataxatat-
tanuca doce patuluputobeje pexainacorona. ² Bajarapova pe-
tiriva penacueto peyacotajinaeva. Pevixaenotsijavat-
si bitso yaaëäjai. ³ Nexata bajarajotatsia naitajëta pi-
ayainë, petsobianë, pinijnëxaneto dragón, baitsi
dovathi. Xaina siete pamatabocotobeje, diez pamatae-
tobeje. Caematabocoto canacujitsia namataxatat-
apona corona. ⁴ Bajaraponë, dragón, nabosovebabia.
Nexata penabosovebabejavata tulupu ayajava penet-
sica irabetsica. Xuavajëto tulupu othopaica irabetsica,
bajaraxuavajëto matatoxenetsia nacopabarubenaya
athëbëtatsia. Bajaraponë, dragón, nucojopa penacue-
to pevixaenotsivatsi pitabarata, bajarapova itsa vecua-
naexanatsi penacueto, pecoxixaenexatsi picani. ⁵ Nex-
ata jane baja petiriva vecuanaexanatsi pebinëyo. Ba-
jaraponëyo caponatsi Diosojavabetsia Dioso pijatrono-
ta peecaenexa. Nexata baja bajaraponëyo apo xaetsi
dragón. Bajaraponë itsamatacabi mapanacuata jivi pe-
po pevetsinë tsane. Itsa evetsiana, ajumesaëya itorob-
abiabiana pejumecovënëtsinexatsi. ⁶ Nexata petiriva
penacuetonëyo pevecuanaexanaecujinaetsi, najetaba-
jirava petusato nacuyabelia, itsabelia Dioso tsivajë-
naexaniavaetatsi peponaponaenexa. Bajarajota pexae-
java baja Dioso rajutatsi mil doscientos sesenta pa-
matacabibeje.

⁷ Bajaraxuacujinae athëbëtatsia vajabitsaë exana.
Angelevi penamatacaitorobinë, Miguelvënë, pijaán-
gelevi yajava, barënnabia dragónjavabelia. Dragón pi-
jinia, pijaángelevi yajava, barënnabia Migueljavabelia.
⁸ Itsiata baitsi jane dragón cujiruamoneyabatsi. Nexata
apo tocopatsitsi caenë ata dragón pijajivitonë penaco-
patsinexa athëbëtatsia. ⁹ Dragón cajena ayainëxaneto.
Itsiata baitsi jane xuabicsatsi athëbëvetsica daxita pi-
jivi yajava. Nexata bajaraponë pevënë Dovathi. It-
savënë Satanás. Bajaraponë bajayata itsa naitajëta jivi-
javabelia, naitajëta bejomocuenia. Bajaraponë jivi ya-
maxëitojorobabiaba daxitanacuanëjava.

¹⁰ Nexata jumetaniji pinijijumeta athëbëvetsica peju-
maitsijava. Jumaitsi mapacueniaje:

—Copiapata rabaja Dioso vajanacacapanepaeja-
vanexa vaneconivecua. Copiapata rabaja Dioso pe-
saëta jivi pevetaonaponaenexa. Copiapata rabaja
Dioso pijajivi pitorobaponaenexa. Copiapata rabaja
Cristo ata pitorobaponaenexa mapanacuajavaje. Ba-
jarapacuenia copiapata baja daxita bajarapacuenie tsi-
paji baja ponë neconitabiaba Diosojavabelia Dioso va-

janaajuajumecovënëtavanapaevi, bajaraponë baja xu-
abicatsi athëbëvetsica. Baitsi dovathi. Bajaraponë pi-
cani Dioso pitabaratsia nuca. Nexata bajaraponë
daxita matacabibeje, daxitameravijebi ata, Diosojav-
abelia neconitabiaba Dioso vajanajuajumecovënëta-
vanapaevi. ¹¹ Dioso vajanajuajumecovënëtavanapaevi
pejumecovënëtsixae Cristo pesivatëpaejavatsi cruzata,
cueneamoneyabapona dovathi. Bajarapacuenia cue-
neamoneyabapona tsipaji navajunupaebaponanua it-
samonaejavabelia Cristo pecapanepaejavanexatsi pi-
janeconivecua. Dioso vajanajuacovënëtavanapaevi ja-
matabëjumai tsabiabi: “Itsa nebeyaxuabiana Dioso pe-
jumelivaisi yabara, jema baja nebeyaxuabiana,” ja-
matabëjai tsabiabi. ¹² Athëbënacuatsia panejina-
vanapaevi, pasivajamatabëcuenebarëyamëre Dioso
mapanacuayabetsicaje papecavecuaxuabijavatsica
dovathi. Mapanacuataje panejinavanapaevi, bitso caje-
na bepajibimë tsane. Paxamë ata, manuameneta
panejinavanapaevi, bitso cajena bepajibimë tsane.
Bajarapacuenia bitso bepajibimë tsane tsipaji baja
panetuatuajëatsica dovathi xuabicsatsi. Nexata baja ae-
conoxae bitso bajaraponë anaepanapona. Tsipaji
baja yapëtane caematacabibeje saya petonacopatsija-
vatsi pexuabinexatsi infiernojavabelia, pejaijume
athëbëvetsica pinijijumeta, jumetaniji.

¹³ Nexata dragón, ponë dovathi, itsa yapëtane
athëbëvetsica pexuabijavatsitsica irabetsica, nexata
barajinapona pova vecuanaexanatsi pebinëyo. ¹⁴ Itsia-
ta baitsi jane bajarapova rajutatsi anijacorofetobeje,
becotsalacorofetobeje. Bajarapova nexata dragón ve-
cuapuna tajëbelia, petusato nacuyabelia, bajarajo-
talia peponaponaenexa. Nexata bajarajotalia Dioso ra-
jutabiabatsi pexaejava acueyabi pavaibeje epatua.
¹⁵ Dragón pecuibovojotuatsina capitsapa mera, ayaira.
Pecuibovojotuatsina pepitsapaemera naexana
pepamene pecaponaenexatsi picani petiriva. ¹⁶ Itsiata
baitsi jane petiriva Dioso yavenonatsi. Ira nexata navo-
conareca ayajava. Nexata pamerami dragón pecui-
bovojojotuatsina pitsapaina, bajarapamëthëareca
joneca. ¹⁷ Bajaraxuata nexata dragón bitso anaepana
petirivajavabelia. Nexata baja icatsia dragón pona pe-
tiriva pexi penacopabivi pebeyejebinxexa. Bajarapa-
monae jumecovënëtavanapa Dioso pejumelivaisi
pitorobicueniatsi. Bajarapamonae caasaë tsavana-
paenua penavajunupaebijava Jesucristo pejumecov-
ënëtavanapaejava. Nexata bajarapamonae dragón tsi-
maxëponatsi pebeyejebinxexatsi.

**Pacuenia piayainëbeje pelivaisi Juan yaquina yabara
pelivaisi**

13 Nucajë manuamene tajetabota. Nexata taenu-
cajë manuamenejavatsina pepitsapaejavatsina
piayainë. Siete pamatabocotobeje diez pamataetobeje
pexainaenë. Caemataeto canacujitsia xainapona coro-
na. Caematabocoto canacujitsia Dioso apo pejitsi-
paevënëanë itanerubena. ² Ponë piayainë taenucajë
pepitsapaejavatsina, benevëthë picani. Itsiata petaxu
betsonëtaxu. Pecuibovojoto pijinia benevëthë petso-

bianëcuibovojoto. Bajaraponë nasaërajutatsi dragón. Pijatrono ata rajutatsi. Jamatabëcuene caëjëpaeyaexanatsinua ayaicuenia pitorobinexa daxitajivi mapanacuajavaje. ³ Piayainë caematabocoto matabocovajënëbatsi apo bepeyaasaëvajënënexa itajara. Itsiata baja bajarapavajënë matanacëta. Nexata daxitanacuanëpijivi itsa tane bajaraponë pematavajënënacëtsijava, bitso jamatabëcuenenabenajaca. Nexata bajarapamonae jumecovënëta bajaraponë. ⁴ Dragón tocopatatsi pitorobinexa daxitajivi mapanacuajavaje. Bajaraxuata daxitajivi pematatabacabëta navajëcabiaba dragónjavabelia. Pematatabacabëta navajëcabiabanua piayainëjavabelia ata. Bajarapamonae najumaitsi mapacueniaje:

—Ajibi cajena itsanë ata pejamatabëcuenecaëjëpaenëtsi pacuenia itsi mapapiayainëje. Ajibi cajena itsanë ata pecaëjëpaenëtsi pebarënabenexa maponëje pecueneamoneyabinexa, najai bajarapamonae piayainë yabara.

⁵ Piayainë tocopatatsinua pibisiacuenia Dioso pebaracuaicuaijainexa. Tocopatatsinua pejumaitsiabinexa: “Xanë cajena bitso ayaijamatabëcuenenënë Dioso matatoxenetsia,” pejaitsabiabinexa. Tocopatatsinua pitorobinexa jivi mapanacuajavaje cuarenta y dos pajuametobeje, baitsi acueyabi pavaibeje epatua. ⁶ Bajaraponë exanapona pacuenia tocopatatsi. Bitso pibisiacuenia Dioso baracuaicuaijai tsabiabi. Dioso pijatemplobo ata pibisiacuenia baracuaicuaijai tsabiabi. Athëbëtatsia pejinavanapaevi ata pibisiacuenia baracuaicuaijai tsabiabi. ⁷ Tocopatatsinua vajabitsaë pexanaenexa Dioso pijajivijavabelia. Tocopatatsinua pecueneamoneyabinexa vajabitsaë itsa exana Dioso pijajivijavabelia. Tocopatatsinua pitorobinexa daxitaviriajumevi ata. Tocopatatsinua pitorobinexa daxita nacuanëpijivi ata. ⁸ Nexata daxita mapanacuapijivije pematatabacabëta navajëcabiaba piayainëjavabelia. Dioso nacua pexanaevajënaeya, Dioso nacua pexanaecujinae ata, bajarapamonae apo vënërubenae Corderonë pijacuyalatobaxutota. Corderonë jivi rajuta matakabi apo pevereverecejava pesivatëpaexae cruzata.

⁹ Itsa pamuxuvojorubename, panatojumetaema mapalivaisije. ¹⁰ Pamonaë Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonaë pijinia Dioso pijajivi espadata bena, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabëcuenecopatsinexa Diosojavabelia epatua copatsinejeva.

¹¹ Bajaraxuacujinae icatsia taenucajë iravetsina pepitapaejava itsanë piayainë. Anijamataetobeje pexainaenë. Pacuenia oveja pebito mataeitsi, bajara pemataeitsinë. Itsiata baitsi jane pecuaicuaijijava, pacuenia dragón pecuaicuaijijava jumeitsi, bajara-jumeitsi. ¹² Papiayainë copiaya pitsapaina manuamenejavatsina, bajaraponë yjavaponapona. Nexata

papiayainë copiaya pitsapaina manuamenejavatsina, nasaërajuta iravetsina papiayainë cotocaevi pitsapainajavabelia. Nexata papiayainë cotocaevi iravetsina pitsapaina, daxita mapanacuapijivi itoroba papiayainë copiaya manuamenejavatsina pitsapainajavabelia pematatabacabëta penavajëcaenexa. Baitsi ponë apo bepeyaasaëvajënënexa itajara matavajënënacëta baja, bajaraponëjavabelia daxita mapanacuapijivije pematatabacabëta penavajëcaenexa. ¹³ Nexata papiayainë iravetsina cotocaevi pitsapaina, ayaicuenia pexanaejava jivi tsitaexanapona. Pitatsajaviitaire ata athëbëvetsica othopaeyaexana irabetsica daxitajivi petaenubenaevajava. ¹⁴ Bajarapacuenia ayaicuenia pexanaejava pejinavanapaevi. Bajarapaayaicuenia exanapona, papiayainë copiaya manuamenejavatsina pitsapaina, pitabarata. Bajaraxuacujinae, papiayainë cotocaevi iravetsina pitsapaina, itorobapona Dioso apo pejumecovënëtsivi pexanaenexa pejumapecataenë. Nexata Dioso apo pejumecovënëtsivi, papiayainë copiaya manuamenejavatsina pitsapaina, bajaraponë jumapecataeya exana jane baja. ¹⁵ Nexata papiayainë cotocaevi iravetsina pitsapaina, caëjëpatsi piasaëyaexanaenexa Dioso apo pejumecovënëtsivi jumapecataeya pexanaenë. Nexata asaëyaexana. Bajarapacuenia asaëyaexana papiayainë copiaya manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuaijainexa. Pamonaë pematatabacabëta apo nanavajëcae bajarapajumapecataenëjavabelia, beyaxuabiaexanapona. ¹⁶ Papiayainë cotocaevi iravetsina pitsapaina, bajaraponë jane baja pejamatabëcueneta, daxitajivi mapanacuata pejinavanapaevi, cobejumaitanerubaponatsi, pecujuanenia pacobe. Itsa jume, pitapathaitota ata itapaitanerubaponatsi. Nexata bajaraponë pejamatabëcueneta itanerubaponatsi daxitajivi. Itanerubaponatsi beveliajamatabëcueneni. Itanerubaponatsi ayaijamatabëcueneni ata. Itanerubaponatsi ricovi ata. Itanerubaponatsi bepejibivi ata. Itanerubaponatsi pamonaë ata dajubicuenia canajetatsi itsamonaejavabelia amoneya petonacuenebabiabinexa. Itanerubaponatsi pamonaë ata dajubicuenia apo canajetsitsi itsamonaejavabelia amoneya petonacuenebabiabinexa. ¹⁷ Nexata pajivi aitanejibi, apo tocopatsitsi itsacuenejavayo ata pecomuatsinexa. Apo tocopatsitsinua itsacuenejavayo ata pecanajetsinexa. Paitanetota jivi itanerubaponatsi, papiayainë copiaya manuamenejavatsina pitsapaina, bajaraponë pevënë. Itsa apo pevënë, nexata pijanúmero. ¹⁸ Mapajamatabëcuenelivaisi bepacanaëjëtameje xaniavaetsia paneyapëtaenexa. Pajivi yapëtane, canaëjëtsi piayainë pijanúmero. Tsipaji bajaraponë panúmero xaina pevënënexa. Panúmero bajaraponë xaina seiscientos sesenta y seis.

Pacuenia Juan tane 144.000 pajivibeje Dioso pijajivi penaxëanaejava yabara pelivaisi

14 Taenutajë Corderonë penuceajava Siónvënë tsutojumata. Barënuca ciento cuarenta y cuatro mil pajivibeje. Bajarapamonae pitapathaitota itanerubena Corderonë pevënë, Corderonë paxa ata pevënë. ² Bjaraxuacujinae jumetaniji athëbëvetsica pecuaicuaijajava. Pecuaicuaijajava najumeta pacuenia bitso banajumeta pinijijonca. Najumetana beyamaxë penajumetsijume ata. Pecuaicuaijajava najumetana pacuenia arpa banajumeta, ayabitsoaëttoxaneto ita najuaracata. ³ Corderonë pijajivi naxëananubena pejanavaji trono pitabarata, cuatro ponëbeje paitothiavi pitabarata ata, ancianovi ata pitabarata. Itsajivi ata cajena apo caëjëpaetsi pecujaninexatsi bajarapavaji. Pamonaeciento cuarenta y cuatro mil pajivibeje, ëbajarapamonae, caëjëpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje. ⁴ Bajarapapabijivi penaexanaejavaverenacujinae apopaperabëquenetsiatae petirivajavabelia. Apojamatabëcuenebijiianaetsi itsajivi ata. Bajarapamonae pënjajinavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Dioso javabelia mapanacuavecuaje. Bajarapamonae baja namataxainae capanepatsi Dioso pijajivinexa, Corderonë ata pijajivinexa. ⁵ Bajarapamonae caeto ata apojumetsënëtsi. Aneconijibi tsavanapae Dioso javabelia.

Pacuenia acueyabi ponëbeje ángelevi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ángelnë taniji pepunanajetarucaejava. Canajetaruca pexanialivaisi, apopevereverecaelivaisi. Tsipaebijitsia bajarapalivaisi mapanacuajava pejinavanapaevi. Tsipaebijitsia daxitanacuanëpijivi, daxitavirijumevi ata. ⁷ Ángelnë pinijijumeta jumai tsanajetaruca:

—Dioso cunjaviaya pajinavanapare. “Xamë bitso ayajamatabëcuenenëmë,” pajamëre tsabiabi Dioso javabelia. Copiapata rabaja Dioso penaneconitsiaexanaponaenexa daxitajivi. Ponë itaboxo exana, ira ata, manuamene ata, mera pepitsaparubenaejavanë ata, bajaraponëjavabelia panematabacabëta panavajëtabiabare, jai tsanajetarucae ángelnë pinijijumeta.

⁸ Icatsia cotocaevi taniji itsanë ángelnë pepunanajetarucaejava. Jumai tsanajetarucae bajarapaángelnë:

—Verebiabatsi rabaja Babilonia tomaraxanetomita pejinavanapaevimi. Tsipaji Babilonia tomarapijivimi navajëcabiaba jumapecataeya pexanaenëjavabelia. Nexata belia daxita nacuanëpijivi ata navajëcabiaba jumapecataeya pexanaenëjavabelia. Babilonia tomarapijivimi jumapecataeya pexanaenëjavabelia penavajëcaejamatabëcueneata, jamatabëcuenebijiianaepojivi. Nexata pacuenia pevitota pibisiacuene pexanabiabiva jumatabëcueneata, daxitajivi jamatabëcuenebijiianaepojivi, bajaraxuata bajarapacuenia verebiabatsi, jai tsanajetarucae ángelnë, ponë cotocaevi taniji pepunanajetarucaejava.

⁹ Bjaraxuacujinae icatsia taniji acueyabiángelnë pepunanajetarucaejava. Bajarapaángelnë pinijijumeta jumai tsanajetarucae:

—Pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata, bajarapajivi naneconitsiana Dioso javabelia. Bajarapajivi ita nacopatanua piayainë pevënëta pitapitanerutsinexatsi, ita jume, pecobejumata ata pecobejumaitanerutsinexatsi, nexata bajarapajivi naneconitsiana Dioso javabelia. ¹⁰ Dioso bitso pebaraanaepanaexaetsi, bajarapajivi bevelia aponeconitsiaexanaetsi tsane. Ayaicuenia naneconitsiaexanaenatsi isotojavabelia, azufre petajueisotojavabelia. Nexata bajarapajivi isoto petajuta bitso jamatabëfaenaena Dioso pijaángelevi pitabarata, Corderonë ata pitabarata. ¹¹ Athëbëabetsia bajarapaisototsëxë junaenia daxitamatacabijavabelianexa. Ayaicuenia bajarapajivi Dioso penaneconitsiaexanaevatsi, tsitecaena daxitamatacabijavabelianexa. Bajarapajivi isoto petajuta bitso pejamatabëfaenaejava, caepatoyo ata apo copatsi tsane. Bajarapacuenia Dioso naneconitsiaexanaenatsi pajivi pematabacabëta navajëcabiaba piayainëjavabelia, bajaraponë jumapecataeya pexanaenëtsijavabelia ata. Bajarapajivi ita nacopatanua piayainë pevënëta pitanerutsinexatsi, bajarapacuenia Dioso naneconitsiaexanaenatsi. ¹² Bjaraxuata Dioso pijajivi xaniavaetsia bejumecovënëtavanapa Dioso pitorobilivaisitsi. Becaasaënua tsavanapae Jesúsjavabelia penajamatabëcuene copatsijava, jai tsanajetarucae acueyabi ángelnë pepunanajetarucaejavata.

¹³ Bjaraxuacujinae jumetaniji athëbëvetsica tanejumaitisijava. Nejumaitsi athëbëvetsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajënaeyabelia ata, jamatabëcuenebarëya baja tsavanapae tsane pamonaetëpapona Dioso pepua pejumecovënëtsivi,” pejaitane, yaquinarure, nejai athëbëvetsica.

Espíritu Santo ata nejumaitsi bajarapamonae yabara mapacueniaje:

—Xaniajai rabaja tsane. Bajarapamonae nacueravevetsiana penacuenebija. Pamatacabi abaxë bajarapamonae asaë tsavanapae mapanacuataje, daxitaxua pexaniacuene exanavanapa, bajaraxuajamatabëcuene Dioso athëbëtatsia matamotsianatsi. Bjaraxuata jamatabëcuenebarëya tsavanapae tsane bajarapamonae, nejai Espiritu Santo.

Pacuenia itsamatacabi Dioso naneconitsiaexanaejitsia daxita pamonae pijaneconi pexainaevi yabara pelivaisi

¹⁴ Icatsia taniji penioponaeitarërëbo. Bajara-paitarërëbo tuatuajëta jivitonë eca. Itarërëbo tuatuajëta peecaenë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Namataxatateca orocorona. Cobenaeca bemasete pexiujaijava pecaucubinexa penaveretsiruanë. ¹⁵ Nexata icatsia itsanë ángelnë pitsaparena temploboënëverena. Bajarapaángelnë asaëyata vavajai itarërëbo tuatuajëta peecaenëjavabelia. Jumaitsi bajarapaángelnë:

—Caucubare jane baja penaveretsiruanë mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnë, ponë pitsaparena temploboënëverena.

¹⁶ Nexata bajaraxuacujinae ponë eca itarërëbo tuatuajëta, bemasete pexiujaijava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainaje. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

¹⁷ Bajaraxuacujinae icatsia athëbëtatsia itsaángelnë pitsaparena temploboënëverena. Bajaraponë ata capona bemasete pexiujaijava pecaucubinexa penaveretsiruanë. ¹⁸ Icatsia itsaángelnë pitsaparena altarjavaverena. Bajarapaángelnë altarpijiisoto pevetsinë. Junata pinijijumeta itsaángelnë, bemasete pexiujaijava pecaponaenëjavabelia. Jumaitsi bajarapaángelnëjavabelia mapacueniaje:

—Mapanacuayaberecaje caucubaremeca daxita uvaruanë, penaveretsiruanë, jai.

¹⁹⁻²⁰ Nexata jane baja bajarapaángelnë bemasete pexiujaijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pemarëbeneyujubataxubinexa. Nexata jane baja uvacuaimarëbene yujubataxuba tomara jumaverena. Nexata pemarëbeneyujubataxubijavata, pinijijinaraxaneto pitsapona. Nexata bajarapajaraxaneto navotanucapona. Bajarapajaraxaneto penavotanucaponaeva, piapiajava xaina trescientos pakilómetrobeje. Piavajubujava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pemarëbeneyujubataxubinexa, xaina mapajamatabëcuenelivaisije. Itsamatacabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaibitsaëtoxonetonë tēpaena. Nexata bajarapacuenia ayaijana xuabiana.

Pacuenia Juan tane athëbëtatsia siete ponëbeje ángelevi, siete xuabeje piayaijavanë pecaponaevi peverebiabinexa mapanacuaje, yabara pelivaisi

15 Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenajacajë bitso. Siete paángelnëbeje capona siete xuabeje piayaijavanë peverebiabinexa mapanacuaje. Bajarapapiayaicuene pepanepaecujinae, Dioso bitso jivi pebaraanaepanaejava, copiarucaena baja.

² Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tspaji pamonae nubena bajarapamene boxojumavereca, itorobi atatsi bajaraponëbejejavabelia pematatabacabëta pevajëcaenexa, apo jumecovënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënënexa. Bajaraxuata bajarapamonae canubena arpa, Dioso perajutsiarpatsi. ³ Bajarapamonae naxëananubena Moiséspijinë, Dioso pijajivitonë, pevaji. Bajarapavaji Corderonë ata pevaji. Penaxëanaejavata, bajarapamonae vajita jumai tsanubena mapacueniaje:

Xamë Diosomë, nijamatabëcuenesaënë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuanë nevetsinë. Daxita xua pexaniacuene, nexanaenë. Penajumetsënëtsicuene jivi neyamaxëitorobinexa, apo nexanaenë. ⁴ Daxitajivi xamë pecacujunavinë tsane. “Dioso cajena bitso ayaijamatabëcuenenë,” cajai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita nacuanëpijivi xamëjavaberena patsiana pematatabacabëta xamëjavabelia penavajëcaenexa. Bajarapacuenia catoitsane tspaji baja daxitajivi tane épexaniacuene nexanaponaponaeva, jai tsanubena Diosojavabelia bajarapamonae penaxëanaejavata.

⁵ Bajaraxuacujinae icatsia taniji athëbëtatsia templobo ënëtuatuajëalia peyatuucutsipana penapatsijava. Bajara paënëyatuucutsijavaënëta bajayatami Dioso Moiséspijinëta penajumecopatsilivaisi peyaquinaebopananë xaniavaetejeba. ⁶ Bajarapatemploboënëverena pitsaparena siete paángelnëbeje. Bajarapamonae capona siete xuabeje piayaijavanë, bajaraxuanëta mapanacuaje peverebiabinexa. Bajarapaángelevi naxataba pexaniaviriapapaëbërëjavanë, piaxuirajibijavanë. Peniojaijavanë bitso. Nacorobëcëbanubena oropananë. ⁷ Bajaraxuacujinae pamonae cuatro ponëbeje piaitothiaviyajuvënënë, ángelevijavabelia rajutapona caecopa. Bajarapacopanë orocopanë. Dioso, ponë daxitamatacabijavabelianexa peponaponaenë, ayaiacuenia anaeya naneconitsiaexanaena pamonae

naneconita bajaraponëjavabelia. Xuanë vënëba bajarapacopanë, bajaraxuanëta Dioso naneconitsiaexanaena bajarapamonae. ⁸ Bajarapatemplobo tuatuajëmi bitso vënëca ëtsëxë. Bajarapatsëxë pitsapa Dioso ayaijamatabëcuenenëjavaverena. Itsajivi ata cajena apo caëjëpaetsi pejonenexa bajarapatemplobo ënëtuatuajëabelia. Xuanë siete paängelnebeje capona, piayaijavanë, itsa baja panepaena, matapania jivi caëjëpaenatsi pejonenexa bajarapatemplobo ënëtuatuajëabelia.

Pacuenia Juan tane athëbëtatsia pacuenia itsamatacabi Dioso naneconitsiaexanaejitsia daxita pijaneconi pexainaevi yabara pelivaisi

16 Icatsia jumetaniji templojavaverena pinijijumeta pejumaisijava. Siete paängelnebejevabelia jumaisi mapacueniaje:

—Paponare baja iranëjavabereca paneepacaponenexa jane baja xuanë siete pacopabeje vënëca, piayaijavanë. Dioso jane baja anaeya ayaiacuenia penaneconitsiaexanaenexa, daxita pamonae naneconita bajaraponëjavabelia, pejajjava, templojavaverena jumetaniji.

² Nexata jane baja pona penamataxainaeängelne. Pecaponaera epatajaraba iranëjavabereca. Nexata daxita pamonae piayainë pevënëitanetota itanerubatsi, daxita bajarapamonae bajarapaepatota bitso perabëtsabanareca. Nexata bitso aperabëtane bajarapamonae. Bajarapamonae bajarapapiayainë jumapecataeya pexanaenëtsijavabelia ata pematabacabëta penavajëcaevi.

³ Bajaraxuacujinae icatsia pecotocaeviängelne pijacopapijira epatajaraba manuamenejavabereca. Manuamenemi nexata naexana bepetëpaenë pijanara. Daxita baja tëpa manuameneta pejinavanapaevimi.

⁴ Bajaraxuacujinae icatsia acueyabiängelne pijacopapijira epatajaraba menianëjavabereca mera, iravetsina pepitsaparubenaevanëjavabereca ata. Nexata daxita bajarapameranëmi naexana ëpijanaranë. ⁵ Bajaraxuacujinae jumetaniji mera pevetsiängelne pejumaisijava Diosojavabelia. Jumaisi mapacueniaje:

—Diosomë, caeto ata pibisiacuene apo nexanaenë. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Pibisiacuene pexanaevi, paneconivajëto xaina, bajarapaneconivajëtota naneconitsiaexaname. Bajaraxuata meranëmi pijanaranë naexanaeyaexaname. Tobijianame meranë piayainë pijajivi bajarapameranë penatsiapaenexa. ⁶ Bajarapamonae bajayata beyejeba nijajivimi. Pamonae ata cavajunupaebapona, beyejeba. Bajaraxuata bajarapacuenia meranë pijanaranë naexanaeyaexaname penatsiapaenexa bajarapamonae, jai Diosojavabelia mera pevetsiängelne.

⁷ Icatsia jumetaniji itsaängelne altarjavaverena pejumaisijava. Jumaisi mapacueniaje:

—Xamë Diosomë, nijamatabëcuenesaenë daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajëto xaina, ba-

jarapaneconivajëtota bananeconitsiaexaname. Itsa aneconijibi tsipae, nexata cajena apo naneconitsiaexanaemë tsipae, pejajjava itsaängelne altarjavaverena jumetaniji.

⁸ Bajaraxuacujinae icatsia cuatroängelne pijacopapijira epatajaraba. Epatajaraba matacabipijijumetovabetsica. Nexata matacabipijijumetovabetsica jivi bitso ayaiacuenia tsjavavatsi. ⁹ Itsiata bajarapamonae apo copabi pibisiacuene pexanabiabijava. Apo najamatabëcuenepënëyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Biji rajane Dioso, ponë caëjëpatsi daxitacuene pexanaenexa, bajaraponë caranata pibisiacuena baracuaicuaijai.

¹⁰ Bajaraxuacujinae icatsia cincoängelne pijacopapijira epatajaraba. Epatajaraba piayainë pijatronovabereca. Piayainë jane baja pevetsinacuami aitaquiri tsanuca. Piayainë jane baja pijajivi bitso penavixae-taexae, navonosine. ¹¹ Itsiata baitsi jane bajarapamonae apo copabi papibisiacuene exavanapa. Apo najamatabëcuenepënëyorotsi Diosojavabelia. Biji rajane Dioso, ponë athëbëtatsia peecaenë, bajaraponë caranata bajarapamonae pibisiacuena baracuaicuaijai. Bajarapacuenia bajarapamonae Dioso pibisiacuena baracuaicuaijai penavixae-taexae, bitso peperabëtsabanaexaenua.

¹² Bajaraxuacujinae icatsia seisängelne pijacopapijira epatajaraba. Epatajaraba pinijimenexanetovabetsica, Eufratesmenejavabetsica. Nexata Eufratesmenexanetovabetsica. Nexata bajarapacuenia namuto torucarenatsi iranë pevetsivi penicabinexa, penajetarubenaevi orientejavavetsina.

¹³ Bajaraxuacujinae taniji acueyabi padovathibeje. Bajarapadovathivi becuaitoxicuenia pitsapa. Itsanë pitsapa dragón pecuibovojotuatsina. Itsanë pitsapa piayainë pecuibovojotuatsina. Itsanë pitsapa peyamaxëitojorobiprofetanë pecuibovojotuatsina. ¹⁴ Bajarpadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarpadovathivi caetuatapona jivi vajabitsaë pebarëexanaenexa Diosojavabelia. Dioso piagamatabëcuenesaenë daxitanacuanë pevetsivi matatoxenetsia. Bajarapamatacabi Dioso exanaena daxita pacuenia tajëvelia najumecapanepaeya jumaisi. ¹⁵ Bajaraxuacujinae jumetaniji Jesús pejumaisijava: “Panenamuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcuenaitavaya ponaponena tanecopiapitsinexa, bajarapajivi barëya tsane. Pacuenia itsajavabelia peponaejivinexa, baxaniavaeta penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejajjava Jesús, jumetaniji. ¹⁶ Nexata jane baja dovathi pijajivi caetuatsi daxitanacuanë pevetsivi. Caetuatsi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteanġelnē pijacopapijira epatajaraba. Epatajaraba itaboxojavabetsia. Nexata athēbētatsia templobo ēnētuaatujēta Dioso peecaetronojavaverena pinijijumeta jumaitsi:

—Daxita rajane baja vereta, jai athēbētatsia templobo ēnētuaatujēta.

¹⁸ Nexata jane baja binebinejai yamaxē. Pinijijovibo bitso najumeta. Yamaxē ata najumeta. Iranē ata najēaba pinijicuenia. Jivi pejinavanapaejavaveliacujinae mapanacuataje, caeto ata bajarapacuenia ira penajēabijava pinijicuenia apo tae. ¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanēpijitolmaranēmi ata othopa irata. Dioso nexata najamatabēnapita pinijitomaraxanetopijivimi, Babilonia tomarapijivimi. Ayaicuenia Dioso baraanaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuenia Dioso naneconitsiaexana Babilonia tomarapijivimi. ²⁰ Itsa ira najēaba, daxitanaetonēmi, daxitatsutonēmi ata, ajibi baja. Ira namatajēpa baja. ²¹ Athēbēvetsica othopaica jivijavabetsica bitso pecainejebimatarejetonē. Bajarapamatarejetonē xaina piarevejave cuarenta pakilobeje. Nexata mapanacuapijivi pibisiacuena Dioso baracuaicuaijai. Tspajai athēbēvetsica piothopaejava, bitso pecainejebimatarejetonē, bitso piayaicue.

Pacuenia itsamatacabi Dioso naneconitsiaexanaena pamonae navajēcabiaba jumapecataeya pexanaenēanējavabelia yabara pelivaisi

17 Pamonae siete paāngelnēbeje, siete pacopabeje pecaponaevi, bajarapaāngeleviyajuvenēnē, caenē rena xanējavaberena. Bajarapaāngelnē nejumaitsi:

—Naxanitsia. Catsitajētsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonē imoxoyojavata. Bajarapatomarapijivi Diosojavabelia apo navajēcabiabi. Caranata saya navajēcabiaba jumapecataeya pexanaenēanējavabelia. Nexata pacuenia petiriva pevitota bitso pibisiacuene pexanabiabiva jamatabēcueniitsi, bajarajamatabēcueniitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabēcueneta jamatabēcuenebijiana itsamonae ata. Bajara pijinia pacuenia Babilonia tomarapijivi ata pexanabiabijava pejamatabēcueneta, jamatabēcuenebijiana ayaibitsaētōxaneto itsanacuanēpijivi ata. ² Tspajai itsanacuanē pevetsivi patabiaba Babilonia tomaraberena. Nexata bajarapamonae ata copaba Diosojavabelia penavajēcabiabijava. Caranata saya Babilonia tomarapijivi cuenejēpaeya navajēcabiaba jumapecataeya pexanaenēanējavabelia. Nexata jamatabēcuenebijianatsi bajarapamonae ata, nejai bajarapaāngelnē.

³ Bajaraxuacujinae Espiritu Santo netsijamatabēvēnēca. Nexata bemajitsinaebota āngelnē nebarēpona petusato nacuyabelia. Bajarajotalia taeyetajē petiriva. Bajarapova eca piayainē, petso-

bianē, pejumata. Bajaraponē peperabētuaereca, Dioso apo pejitsipaevēnēanē, itanerubena. Bajarapapiayainē xaina siete pamatabocotobeje diez pamataetobeje.

⁴ Nexata bajarapova penaxatatsijavareca itsajava pabanaeya saējai. Itsajava tsobia. Naitabēteca orojavanēta, perlavēnējavanēta ata, penamatamotsiibotonēta ata. Cobenaeca orocopa. Pibisiacuene bitso pexanaejava pevitota, bajarapajamatabēcuenelivaisi vēnēca bajarapacopata. ⁵ Bajarapova pitapathaitota vēnēyaquinarutatsi. Pajamatabēcuenelivaisi yabara bajarapova pitapathaitota vēnēyaquinarutatsi, itsajivi ata apo yapētae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabēcuenebijianaevjavatsi, jumapecataeya pexanaenēanējavabelia penavajēcabiabinexa. Bajarapatomaraverena pitsapanua jivi pejamatabēcuenebijianaevjavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vēnēyaquinarutatsi. ⁶ Taeyetajē icatsia bajarapova. Aitajibi tsecae Dioso pijajivimi pijanarata. Pamonae ata beyejebatsi pevajunupaebixae Jesús, bajarapamonae ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabēcuenenajunaviacajē. ⁷ Nexata āngelnē nejumaitsi:

—¿Detsa xuajitsia jamatabēcuenenajunaviacame? Cayapētaeyaexanaenatsi pajamatabēcuenelivaisi xaina mapovaje. Ponē piayainē siete pamatabocotobeje diez pamataetobeje pexainaenē, ponējumata bajarapova eca, bajaraponē ata pajamatabēcuenelivaisi xaina, cayapētayaexanaenatsi. ⁸ Mapapiayainē tane-meje, bajaraponē picani bajayata ponapona mapanacuataje. Itsiata baja aeconoxae bajaraponē ajibi. Itsiata baitsi jane itsamatacabi pinijimēthēxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponēmi beyaxuabianatsi pepacuene jane baja bajaraponē pecopiarucaenexa. Daxita mapanacuapijivije, pamonae Corderonē pijacuyalatobaxutota apo vēnērubenae Dioso nacua pexanaevajēnaeya, Dioso nacua pexanaecujinae ata, bajarapamonae matacabi apo peverevere-caejava apo xinae tsane. Bajarapamonae jamatabēcuenenajunaviacaena piayainē itsa pitsapaeni-na pinijimēthēxanetojavatsina, nejai āngelnē.

⁹ Icatsia āngelnē nejumaitsi:

—Pamonae baja peyapētaevi, pamonae baja caējēpatsi pejumeyapētaenexa, bajarapamonae pejumeyapētaenexa mapalivaisije. Papiayainē xaina siete pamatabocotobeje, ponējumata taeyetame petiriva, anijajamatabēcuenelivaisibeje itajēta. Bajaraponē pematabocotonē, siete pamatabocotobeje, mapajamatabēcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabēcuenelivaisi yajavaxainaje. ¹⁰ Siete rabaja pijinia ponēbeje Babiloniatomara pevetsivi. Nexata Babiloniatomara pevetsiviyajuvēnēvi cinco baja ponēbeje pitsapa. Seisnē abaxē aeconoxae eveta Babiloniatomara. Sietenē abaxē apo taxuxuabi

pevetsinexa. Itsiata sietenë itsa evetsiana, bajayajebi apo evetsi tsane. ¹¹ Papiayainë, petsobianë, taneme, mapajamatabëcuenelivaisi xainaje. Bajaraponë picani bajayata eveta Babiloniatomara. Itsiata baja aeconoxae bajaraponë apo evetsi. Tspaji baja tëpa. Itsiata baitsi jane icatsia bajaraponë pinijimëthëxanetojavavetsina pitsapaenina Babiloniatomara icatsia pevetsinexa. Nexata icatsia bajaraponë itsa evetsiana, ochonë baja evetsiana Babiloniatomara. Bajaraponë abaxë bajayata itsa ponapona, siete ponëbeje Babiloniatomara pevetsiviyajuvënëni baja cajena. Bajaraponë icatsia Babiloniatomara itsa evetsiana, pevetsicujinae bajaraponëni beyaxuabianatsi pepacuene jane baja bajaraponë pecopiarucaenexa, nejai ángelnë.

¹² Icatsia ángelnë nejumaitsi:

—Ponë piayainë pemataetonë taneme diez pamataetobeje, mapajamatabëcuenelivaisi xainaje. Diez rabaja pijinia ponëbeje, itsamatacabi nacuanë evetsiana. Nexata bajarapamonae itsamatacabi nacuanë itsa evetsiana, evetsiana diez panacuabeje. Tspaji caenë canacujitsia evetaponaena caenacua. Bajarapamonae abaxë apo taxuxuabi bajarapanacuanë peveta vanapaenexa. Itsiata baitsi jane itsa taxuxuabijitsia nacuanë jane baja peveta vanapaenexa, copatsianatsi pijanacuanëjava pevetsinexa saya caeepato yovajëto. Bajarapamonae itsa evetsiana pijanacuanëjava, piayainë barëevetsianatsi. ¹³ Pamonae diez ponëbeje, diez pijinia panacuabeje itsamatacabi itsa evetsiana, barënamatabëcuenëjëpaenatsi piayainë. Nexata bajarapadieze ponëbeje jumaitsi tsane piayainëjavabelia:

—Xamë pacatocopatsianatsi patanematacaitorobinëexamë, jai tsane.

¹⁴ Pamatacabi bajarapadieze ponëbeje evetavanapae na pijanacuanë, piayainë vajabitsaë barëexanaenatsi Corderonëjavabelia. Daxita pamonae Corderonë pijajivi, pamonae Dioso pejunatsivi, bajarapamonae pijinia Corderonë barëbena piayainëjavabelia. Nexata Corderonë cueneamoneyabiana piayainëjavabelia. Cueneamoneyabiana tspaji Corderonë daxita petuxanevi pijatuxanenë baja cajena. Nexata Corderonë daxita nacuanë pevetsivi matatoxenetsia pepo pevetsinë, nejai ángelnë.

¹⁵ Angelnë icatsia nejumaitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabëcuenelivaisi xainaje. Mapanacuata jinavanapa jvibitsaëto xanetonë daxitaviriajumevi, daxitanacuanëpijivinua. Bajarapajamatabëcuene yabara taneme bajarapamanuamene. ¹⁶ Pamonae diez panacuabeje pevetsivinexa, bajarapamonae piayainë barëito ya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajaraxuacujinae tajuitsiana isotota. ¹⁷ Pamonae diez ponëbeje itsamatacabi nacuanë itsa evetsiana, bajarapamonae najamatabëcuenejëpaena petocopatsinexa piayainë pijanacuanë petoevetsinexatsi. Bajarapacuenia najamatabëcuenejëpaena tspaji baja cajena Dioso ja-

matabëcueneitorobatsi bajarapacuenia pexanaenexa bajarapamonae. Nexata piayainë bajarapamonae pijanacuanë bajayajebi toevetsianatsi matapania pecopiapatsijavabelianexa daxita pacuenia Dioso tajëvelia najumecapanepaeya jumaitsi. ¹⁸ Pova pibisiacuene pexanaeva taeyetame manuameneboxovereca, bajarapova mapajamatabëcuenelivaisi xainaje. Pinijitomaxaneto Babiloniatomara. Bajarapatomarapijivi pejamatabëcueneta mapanacuanë pevetsivi pibisiacuene exanapona, nejai ángelnë.

Pacuenia Babilonia tomaraxanetomi copiaruca yabara pelivaisi

18 Icatsia itsaángelnë taniji perunaejavatsica athëbëvetsica. Caëjëpatsi pinijicuenia piayaicuene pitorobinexa. Bajarapaángelnë pinijicotia yajavarunaica. Ira itayota daxitanacuanëjava. ² Ayaijumeta vavajai. Jumaitsi mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ëjoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiviariavi pepunaevi, pamonae daxitajivi apo itajitsipae petaenexa, juya bajarapatomarata jinavanapaena.

³ Babilonia tomarapijivi navajëcabiaba jumapecataeya pexanaenëanëjavabelia. Nexata belia daxitanacuanë pevetsivi ata, pijajivi yajava, navajëcapona jumapecataeya pexanaenëanëjavabelia. Nexata Babilonia tomarapijivi jumapecataeya pexanaenëanëjavabelia penavajëcabiabijamatabëcueneta, daxita xua pibisiacuene pexanaejamatabëcuenetanua, jamatabëcuenebijianapona daxitanacuanëpijivi. Babilonia tomarapijivi bitso xainapona ayaijava palata pibisiacuene pexanaejamatabëcueneta. Nexata pijinia pamonae Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaiacuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai ángelnë.

⁴ Bajaraxuacujinae icatsia athëbëvetsica jumetaniji itsajume. Jumaitsi mapacueniaje:

—Paxamë patajajivimë, papitsapare baja Babilonia tomaravecua. Papitsapare baja pibisiacuene paxamë ata paneexanaeyaniva, bajarapatomarapijivi yajava Dioso papecananeconitsiaexanaeyaniva. ⁵ Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaejitsipa, nexata copiapatsipa itaboxojavabetsia. Dioso cajena yapëtane daxita Babilonia tomarapijivi pibisiacuene pexanaejava. ⁶ Bajarapamonae bejiobiaexanabiaba itsamonae. Nexata Dioso itsa naneconitsiaexanaena, bajarapamonae bitso ayaiacuenia bejiobiaexanaena.

⁷⁻⁸ Babilonia tomarapijivi bitso beayaijamatabëcuenevina natane. Natocomuacabiaba ayaijava penamatamotsijavanë pibisiacuene pexanabiabimatamota. Bajarapamonae pejamatabëthëtota jamatabëjumaitsi tsabi-

abi: "Xanë raja majota ecajê nacua betaevetsinë. Nexata apo jamatabëcuenebëjanê tsane itsacuenejavayo ata yabara. Apo namatavenonaenê tsane itsacuenejavayo ata," jamatabëjai tsabiabi bajarapamonae pejamatabëëthëtota. Bajarapacuenia Babilonia tomarapijivi pejamatabëjumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petêpaeuene, pematanueyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenê Dioso bitso piasaenê.

⁹ Babilonia tomarapijivi pejamatabëcueneta daxitanacuanê pevetsivi jamatabëcuenebijianapona. Nexata daxitanacuanê pevetsivi copaba Dioso pejumecovënëtsijavami. Natocomuacabibanua ayaijava penamatamotsijavanê. Nexata bajarapamonae itsa tsëxëtaena Babilonia tomarapijivimi petajuejavatsi, yaitaxutonueya vavajai tsane. ¹⁰ Bajarapamonae pecajunavi, tajê vecuanubenaena Babilonia tomarapijivimi itsa tajuenatsi. Bajarapamonae najumai tsane:

—¡Bitso baja rovia bejiobi mapamonaeje! ¡Pinijitomaraxanetota, Babilonia tomaraxanetota, pejinavana-paevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

¹¹ Daxitanacuanëjava, pamonaecanajetabiabanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacavevitsi tsane. ¹² Bajarapamonae capatabiaba oronanita pexanaejavanê, platananita pexanaejavanê ata, perlavënëjavanê ata, penamatamotsiibotonê ata. Capatabiabanua pexaniaviriapapaëbërê ata. Itsapapaëbërê linovënëjavanê. Itsajava sedajavanê. Bajarapapaëbërê itsajavanê peraënaejavanê. Itsajavanê petsobiajavanê. Capatabiabanua dexitavirianaejava petuxujuvinaejavanê. Capatabiabanua pexaniajavanê, marfilvënëjavata pexanaejavanê, penamatamotsinaejavanê ata, broncenani ata, hierronani ata, marmolvënëibo ata. ¹³ Capatabiabanua canelavënëjavanê, especiavënëjavanê ata, inciensovënëjavanê ata, mirravënëjavanê ata. Capatabiabanua petuxujuviranê, vinoranê ata, aceiteranê ata, pexaniaviriatrigobenonê ata, trigobultonê ata. Capatabiabanua baca, oveja ata, caballo ata, perobobocaemonê ata, carrozavënëmonê. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinexa.

¹⁴ Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—¡Daxitacuene pejitsipaecuenemi tovereverecatsi baja! ¡Tovereverecatsi baja bitso pexinaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

¹⁵ Babilonia tomarapijivimi abaxê itsa apo tajuetsi, pamonaecanajetabiabavanapaevi, ayaijava palata xainapona, xua capata, pecanajetabiabixae Babilonia

tomarapijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajê vecuanubenaena pecajunavi. ¹⁶ Bajarapamonae daxita najumai tsanubenaecanê tsane:

—¡Bejiobitatsi bitso pinijitomaraxanetota pejinavana-paevimi! Bajarapatomarapijivimi naxatabiaba pexaniaviriapapaëbërê, linovënëjavanê. Itsajava peraënaejava. Itsajava petsobiajava. Naitabëtabiaba orojavaenêta, perlavënëjavanêta ata, penamatamotsiibotonêta ata. ¹⁷ ¡Caepatoyocujinae saya verevereca baja bitso pexinaejavami! najai tsanubenaecanê tsane daxita bajarapamonae.

Daxita pamonaecanajetabiabanapaevi, bajarapamonêta penaponaevi ata, bajarapamonêta penacuenebivi ata, bajarapamonêta pecaponaejavanê pecanajetaponaevi ata, daxita bajarapamonae tajê vecuanubenaena pecajunavi Babilonia tomarapijivimi itsa tajuenatsi. ¹⁸ Bajarapabarcoxanetonêta peponaevi, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubenaecanê tsane bajarapamonae:

—¡Itsanacuanëjava ata baja ajibi itsatomara mapit-sipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubenaecanê tsane.

¹⁹ Pamonaecanajetabiabanapaevi, yaitaxutonueya najumai tsanubenaecanê tsane:

—¡Bitso pinijicuenia bejiobitatsi pinijitomaraxanetomita pejinavanapaevimi! Babilonia tomarapijivimi ayaijava palata pexinaexae, bitso pexinaevi naexana daxita pamonaecanajetabiabixae, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubenaecanê tsane bajarapamonae.

²⁰ Dioso baja cajena itsamatacabia naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabia, Babilonia tomarami itsa vereverecaena, pevereverecaejava yabara, sivajamatabëcuenebarëya tsane daxita athëbëtatsia pejinavanapaevi. Daxita Dioso pijajivi, mapanacuata pejinavanapaevi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabia itsa vereverecaena.

²¹ Bajaraxuacujinae piasaëángelnê yotaxuaba ibotoxaneto. Bajarapaiboto pinijibotoxaneto bitso. Nexata ángelnê manuameniabereca asaëyata xuabareca bajarapaibotoxaneto. Ángelnê jumaitsi mapacueniaje:

—Pacuenia asaëyata xuarecajê mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabia pinijicuenia xuabianatsi. Apo taetsi baja tsane icatsia matavëjê. ²² Ajumejibi baja tsane pijacallejava arpa peracatabiabijava. Ajumejibi baja tsane flauta ata piobabiabijava. Ajumejibi baja tsane trompeta ata piobabiabijava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjê trigoxu pecaquiatabiabijava

pecaquiatabiibotoxanetota. ²³ Itsalámpara ata baja apo naitayotsi tsane bajarajota. Ajumejibi baja tsane jivi penabarëcuaijaijaitisabiabijava. Penacasabifiesta ata baja pexanabiabijava, ajibi tsane. Bajarapatomarpijivi pexainaejava pecanajetabiabavanapaevi, daxitanacuanëjava pevenëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitojorobiaya penajorobabiabijava, jai bajarapaángelnë.

²⁴ Dioso yapëtane pacuenia Babilonia tomarapijivi pejamatabëcueneta, Diosojumepaebivimi profetavi beyejebiabatsi. Babilonia tomarapijivi pejamatabëcueneta, Dioso pijajivimi ata beyejebiabatsi. Bajaraxuata juya Dioso ayaiacuenia naneconitsiaexanaena Babilonia tomarapijivi.

19 Bajaraxuacujinae jumetaniji jivi ayaibitsaëtoxaneto athëbëtatsia. Pinijijumeta jumai tsaponae mapacueniaje:

“Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. Bajaraponë nacacapanepa vajaneconivecua. Penivenivenaecotia pexainanë. Pijamatabëcuenesaënë bitso. Daxitacuene pexanaenexa pecaëjëpaenëtsi. ² Itsa naneconitsiaexana jivi, paneconivajëto jivi xaina bajaraponëjavabelia, bajarapaneconivajëtota bananeconitsiaexana. Pajivi aneconi-jibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabëcueneta jamatabëcuenebijianapona daxitanacuanëpijivi. Bajarapamonaemi pejamatabëcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamona, jai jivi ayaibitsaëtoxaneto athëbëtatsia.

³ Bajaraxuacujinae bajarapamona icatsia jumai: —“¡Diosomë, ayaijamatabëcuenenëmë bitso!” jaitsi vaxaitsi Diosojavabelia. Athëbëabetsia petsëxëjunaevatsia Babilonia tomarapijivimi petajuetsëxëtsi, apo vereverecanuae tsane daxitamatacabijavabelianexa, jai bajarapamona.

⁴ Pamona veinticuatro ponëbeje ancianovi, pamona pijinia cuatro ponëbeje piatothiavi, daxita bajarapamona Dioso yayataeya irata bobena. Ira taenubena. Bajarapamona irata jumai tsanubena Diosojavabelia, tronota pecaenëjavabelia:

—¡Xanepana rabaja nexanaejava! ¡Bitso ayaijamatabëcuenenëmë! jai tsanubena irata bajarapamona Diosojavabelia.

⁵ Bajaraxuacujinae icatsia tronojavaverena daxita Dioso pijajivijavabelia jumai:

Dioso panecujunavivi, ayaijamatabëcuene panexainaevi, beveliamatabëcuene panexainaevinua, pexaniajamatabëcuene parajutabiabare vajaDiosojavabelia, jai tronojavaverena.

Corderonë penacasabifiesta yabara pelivaisi

⁶ Icatsia jumetaniji ayaibitsaëtoxaneto jivi pecuaicuaijajava. Bajarapamona pecuaicuaijajava, jumetaniji bepiniijoncajume. Beyamaxëjume ata, ayai-

jume, najumeta. Jumai tsaponae bajarapamona mapacueniaje:

VajaDioso pijamatabëcuenesaënë daxita mapanacuatata jivi pevetsivi matatoxenetsia. Taxuxuaba rajane baja daxitanacuanëjava Dioso jivi pevetsinexa. Bajaraxuata vaxaitsi jumai: “Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. ⁷ Sivajamatabëcuenebarëyatsi Dioso. Nexata tsipaebatsi itsamonaejavabelia pacuenia sivajamatabëcuenebarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bajarapacuenia jumai: tsi-paji baja copiapata fiesta pexanaematacabinexa, Corderonë penacasabifiestanexa. Petiriva rabaja naxaniavaeta Corderonë penacasabivanexa. ⁸ Bajarapova rajutatsi bitso pexaniaviriapapaëbërëjava penaxatatsinexa, piaxuirajibijava, bitso peniojaijava, jai bajarapamona.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai, comparacióncuenia pejumai: sinexa picani mapacueniaje: “Dioso pijajivi aneconi-jibi tane Cristo pesivatëpaexaetsi pijaneconi yabara,” pejinexa picani. Bajarapajamatabëcuenelivaisi: “Bajarapova rajutatsi bitso pexaniaviriapapaëbërëjava penaxatatsinexa,” pejaijava comparacióncuenia.

⁹ Nexata bajaraxuacujinae ángelnë nejumai:

—Yaquinare mapejumai silivaisi: “Jamatabëcuenebarëya pamona junatatsi Corderonë penacasabifiestajavaberena,” pejailivaisi. Daxita xua catsipaebatsi, bajaraxua pepacuene Dioso taneitorobijava, nejai ángelnë.

¹⁰ Nexata tamatabacabëta tonucajunuajë ángelnë pitabarata. Pexaniajamatabëcuene picani tarajutsinexa ángelnëjavabelia. Itsiata baitsi jane ángelnë nejumai:

—Pëtsa bajaraxua exaname. Tsi-paji saya xanë ata Dioso pijajivitonë. Pacuenia xamë, pacuenia itsamonae ata, Dioso panenajuajumecovënëtsivi xaniavaetsia pajumecovënëtavanapame papexaniajailivaisi Jesús pacatsipaeba, bajara saya xanë ata taitsinë. Nexata pexaniajamatabëcuene rajure Diosojavabelia, nejai ángelnë.

Papexaniajailivaisi Jesús pacatsipaeba, bajarapalivaisi jamatabëcueneasaëyaexanatsi pamona jivijavabelia tsipaebapona Dioso pejumelivaisi.

Pacuenia athëbëtatsia Juan tane Cristo penioponaecaballojumata pecaejava yabara pelivaisi

¹¹ Taniji itaboxo penapatsijava. Tanijinua penioponaecaballo. Bajarapacaballojumata jivitonë eca. Ponë bajarapacaballojumata eca, pevenë Najumecapanepaya Pejumai: sicuenia Pexanaenë. Itsavënë Pepo Pexaniajailivaisi Petsipaebinë. Bajaraponë jivi naneconitsiaexana paneconivajëtota jivi naneconita. Vajabitsaë ata exana pibisiacuene pexanaevijavabelia. ¹² Pitaxutobeje naitayota. Pacuenia isoto bacotiatsobia, bajara itaxutocoiatsi. Bajaraponë matapona ayaijava coronanë. Pitapata vëneruca. Itsiata baitsi jane itsajivi ata apo

vënëyapëtaetsi. Ēbajaraponë pijacuata navënëyapë-tane. ¹³ Penaxatatsijavareca tsobia. Pijanarata pejabut-sijava. Bajaraponë pevënë Diosojamatabëcuenelivaisi itajëtsinë. ¹⁴ Bajaraponë pënaponatsi vajabitsaë ayaibitsaëtoxaneto, athëbëpijivi. Bajarapamonae nax-ataba bitso pexaniaviriapapaëbërëjavanë, piaxuirajibi-javanë, bitso peniojaijavanë. Bajarapamonae ata yapona penioponaecaballuanëta. ¹⁵ Ponë vajabitsaë barëexana, bajaraponë pecuibuatsina pitsapa pexiu-jaiespada penaneconitsiaexanaenexa daxi-tanacuanëpijivi. Bajaraponë daxitanacuanëjava jivi pevetsinënexa. Itsa evetsiana, ajumesaëya itorobabi-abiana pejumecovënëtsinexatsi. Pacuenia uvaruanë it-sa barëmeneyujubataxuaba, ayaibarëmene pitsapa pexanaenexa vinoranë, bajara pijinia pacuenia daxi-tanacuanëpijivi, pijaneconi pexainaevi, Dioso ita vere-biabiana, ayaijana xuabiana. Dioso, ponë pija-matabëcuenesaenë daxitanacuanë pevetsivi matatox-enetsia, ayaiacuenia naneconitsiaexanaena bajarapa-monae pebaraanaepanaexae. ¹⁶ Ponë vajabitsaë barëexana, bajaraponë pijacamisajumavelia penax-atatsijavata, pevënëitanebërëtoyo ruca. Pethaëtojumata ata pevënëitanebërëtoyo ruca. Jumai tsarucae ba-jarapaitanebërëtoyo: “Maponëje daxitanacuanë pevetsivi ata pepo pevetsinë. Daxita petuxanevi ata pijatux-anenë,” jai tsarucae.

¹⁷ Bajaraxuacujinae taenutajë ángelnë, icotiata penu-caenë. Pinijijumeta vavajai tsanucuae daxita quequere-monaejavabelia. Jumai tsanucuae mapacueniaje:

—Naxanitsia. Panacaetuanare payaibitsaëtoxane-tomë ayaijava panenabaninexa Dioso peja-matabëcueneta. ¹⁸ Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamatacaitorobivimi ata, vajabitsaë piatatsacavimi ata, pevi panexaenexa. Caballuanëmi, ca-balluanëjumata peponaevimi ata, pevi panexaenexa. Pamonaemi dajubicuenia pecanajetsivimitsi itsamon-aejavabelia amoneya petonacuenebinexa, apo pecanajetsivimitsi ata, beveliajamatabëcuene pex-ainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponare-mena, jai tsanucuae ángelnë quequeremonaejavabelia.

¹⁹ Bajaraxuacujinae taniji piayainë. Tanijinua daxi-tanacuanë pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë pe-naexanaenexa. Nexata barënabia penioponaecabal-lota peponaenëjavabelia, bajaraponë pijajivijavabelia ata. ²⁰ Nexata penioponaecaballota peponaenë vaeta-ba piayainë. Vaetaba peyamaxëitorobiprofetanë ata. Ponë peyamaxëitorobiprofetanë, jivi peyamaxëito-jorobinexa, bajayata pinijicuene exanaponapona pi-ayainë pitabarata. Bajarapacuenia bajayata pinijicuene pexanaexae, peyamaxëitorobiprofetanë jivi yamaxëi-tojorobapona. Nexata jivi nacaeveta piayainë pevënëi-tanetota pitanerubaponaenexatsi. Bajarapacuenia ba-jayata peyamaxëitorobiprofetanë jivi yamaxëito-jorobapona piayainë jumapecataeya pexanaenëtsijav-abelia ata jivi pematabacabëta penavajëcabiabinexa.

Bajaraxuata nexata piayainëbeje, peyamaxëitoro-biprofetanëbeje, xuabaliatsibeje abaxë piasaënëbeje isotopucabelia. Bajarapapuca tajueyabiaba azufre ya-java. ²¹ Nexata daxita bajaraponëbeje pijajivi, pamonaenacopaba, beyejebatsi. Beyejebatsi penioponaecabal-lota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapamonaemi pevi.

Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi

20 Icatsia taniji ángelnë perunaejavatsica athëbëvetsica. Cobenarunaica pinijimëthëxane-to pijallave. Cobenarunaicanua ayaiacadenamaëtoxane-to. ² Bajarapaángelnë vaetaba dragón, ponë pevënë Dovathi. Itsavënë Satanás. Bajaraponë dovathi bajayata ita naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. ³ Pinijimëthëxanetojavareca xuareca. Yavëpaxatatabu-ata bajarapamëthëxanetojavareca. Pematatsënëa icat-sia sellovënëjavata yamëthëvëpajumacatsata. Nexata dovathi apo caëjëpaetsi tsane peyamaxëitorobinexa mapanacuapijivi mil pavaibeje. Bajaraxuacujinae icat-sia isinaenatsi caeepatoyo icatsia jivi peyamaxëito-jorobaponaenexa.

⁴ Bajaraxuacujinae icatsia taniji jivi tronojumata pe-naevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tanijinua itsamonae ata, pamonaenae bajayata vësiu-cubejebatsi. Bajarapacuenia bajarapamonaemi bajayata vësiucubejebatsi tsipaji jivi tsipaebapona Jesús peli-vaisi. Tsipaebanajetarubenana Dioso pejumelivaisi. Bajarapamonae apo navajëcae pematabacabëta pi-ayainëjavabelia, piayainë jumapecataeya pexanaenë-t-sijavabelia ata. Apo nacopatsinua piayainë pevënëi-tanetota pitapaitanerubinexatsi. Apo nacopatsinua pecobejumaitanerubinexatsi. Nexata bajarapamonae-mi icatsia Dioso piasaëyaexanaejavatsi, taniji. Pacue-nia ata bajarapamonae mil pavaibeje Cristo barëeve-tatsi mapanacuaje, taniji. ⁵⁻⁶ Bajarapamonae Dioso asaëyaexanatsi Dioso copiaya jivi piasaëyaexanaemat-acabita. Bajarapamonae Dioso asaëyaexanatsi caecue-nia ayaibitsaëto. ¡Pamonaenae copiaya Dioso jivi pi-asaëyaexanaematacabita asaëyaexanatsi, bajarapa-monae pejamatabëcuenebarëyavi, planeconijibivinua! Cotocaevi patëpaejavanexa, acuenebi baja itsacuene pexanaenexatsi bajarapamonae. Biji rajane bajarapa-monae Dioso, Cristo ata, pijasacerdotevinexa, jivi petocuaicuajitsabiabivinexa Diosojavabelia. Bajarapamonae Cristo barëevetsianatsi mapanacuaje mil pavaibeje. Itsamonae petëpaevimi, pamonaenae abaxë nacopabanubena, Dioso icatsia asaëyaexanaenatsi ba-jarapamil pavaibejecujinae.

⁷ Itsa baja panepaena mil pavaibeje, dovathi icatsia isinaenatsi mëthëvecua pepitsapaenexa. ⁸ Pitsapaena icatsia jivi peyamaxëitorobinexa daxitanacuanëjava. Bajarapacuenia yamaxëitorobiana jivi ayaibitsaëtox-anetonë, Dioso apo pejumecovënëtsivi. Nexata bajara-

pacuenia dovathi vajabitsaë caetuatsiana. Dovathi pijajivi bitso ayaibitsaëtoxaneto tsane. Pacuenia tajetaboatsapërë navita, bajara itsi tsane dovathi pijajivi, vajabitsaë. ⁹ Bajarapamonae vajabitsaë copiata jivi benajetarubenaena daxitanacuanëjava. Bajaraxuacujinae matatoyoronaena jane baja Jerusaléntomara pev erebiabinexa picani Dioso pijajivi, Dioso piativatamarata, Jerusalén tomarata, pejinavanapaevi. Itsiata baitsi jane dovathi pijajivi Dioso tsixuabianicatsi isoto athëbëvetsica. Nexata tajuenatsi daxita vajabitsaëmi, dovathi jane baja pijajivimi. ¹⁰ Nexata dovathi, ponë jivi yamaxëitojorobaponaena daxitanacuanëjava, xuabialiatsi isotopucalia, azufre yajava petajueyabiabipucalia. Bajarapapucalia baja cajena copiaya xubatsibeje piayainëbeje peyamaxëitojorobiprofetanëbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenaëjava isoto petajuta tsitecaena daxitamatacabijavabelianexa.

Pacuenia Juan tane pacuenia itsamatacabi jivi nubenaëjitsia penioponaetrono pitabarata Dioso penaneconitsiaexanaenexatsi yabara pelivaisi

¹¹ Icatsia taniji penioponaetronoxanetorumata peecaenë. Bajaraponë nacua baja vereverecaëyaexana. Itaboxo ata baja vereverecaëyaexana. ¹² Taenubajë daxita petëpaevimi penubenaëjava Dioso pitabarata. Nubena Dioso penaneconitsiaexanaenexatsi. Bajarapamonae ayaijamatabëcuene pexainaevimi. Itsamonae beveliamatabëcuene pexainaevimi. Taeyejebajënu cuyalatobaxutonë. Bajarapacuyalatobaxutonë baxupanejeba. Bajarapacuyalatobaxutonë itanerubena daxita petëpaevimi pacuenia exanavana pa petëpaevajënaëya mapanacuataje. Itsacuyalatobaxuto ata taeyabuatajë. Bajarapacuyalatobaxuto ata baxupatabuata. Bajarapabaxutota vënërubena pamonaë matacabi apo pev ereverecaëjava pexainaëvinexa. Nexata caejivi canacujitsia Dioso pijaneconi petorutaponaëxatsi, caejivi canacujitsia paneconivajëto xaina. Bajarapaneconivajëtota Dioso naneconitsiaexanaponatsi. ¹³ Manuameneta petëpaevimi ata, daxita pitsapaina. Jivi ata petëpaecujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëtota Dioso naneconitsiaexanaponatsi. ¹⁴ Bajaraxuacujinae jivi petëpaëyaexanaëjamatabëcuenemi, jivi petëpaecujinae pejinavanapaenacuami ata yajava, Dioso xualia isotopucalia. Bajarapapuca jivi cotocaëvi patëpaejava petëpaëyaexanaëpuca. ¹⁵ Pamonaë apo vënërubenaë, pabaxutota vënërubena pamonaë matacabi apo pev ereverecaëjava pexainaëvinexa, bajarapamonae peneliatsi bajarapucalia.

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaëjitsia yabara pelivaisi

21 Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. ² Xanë rabaja Juannë. Taniji Dioso pijatomara, pejana Jerusaléntomara. Athëbëvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevajënaë banaxaniavaeteca, bajara pijinia pacuenia Dioso xaniavaeta baja Jerusaléntomara pijajivi petojinavana paenexatsi. ³ Nexata jumetaniji pinijijume athëbëvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatacabijavabelianexa. Bajarapamonae pepo Diosonë pijajivi tsane. Dioso pijinia bajarapamonae pijatuxanenë tsane. ⁴ Dioso itaxutobarëmëneiquinaponaena bajarapamonae. Ajibi baja tsane petëpaecuene, penuecuene ata, bitso penajamatabëxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athëbëvetsica.

⁵ Bajaraxuacujinae Dioso, tronojumata peecaenë, jumaitsi:

—Taema. Daxitacuene bajayata taexanaëjavami, xuami baja picani vereverecaëyaexanaë, pejanajava icatsia exanaë, jai.

Bajaraxuacujinae xanëjavaberena icatsia nejumaitsi: —Yaquinare bajaraxuanë pelivaisi. Tspaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxitajivi pejumecovënëtsinexa bajarapalivaisi, nejai.

⁶ Bajaraxuacujinae icatsia nejumaitsi Dioso, tronojumata peecaenë:

—Daxita rabaja icatsia pejanajava taexanaëjava, veretajë. Xanë rajane baja daxitacuene tataxuxuabinë. Daxitacuene icatsia tacopiarucaëyaexanaenënexa. Pacuenia jivi pejamatabëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanexa, nexata bajarapamonae rajutsianajë matacabi apo pev ereverecaëjava. Tocopatsianajë bajarapamonae amoneya pexainaenexa matacabi apo pev ereverecaëjava itsa jumecovënëta taxënato, Cristo, pesivatëpaejavatsi. Bajaraponë Cristo jivi pejamatabëcueneasaëyaexanaenë. ⁷ Pajivi tsiteca jumecovënëtaponapona tajumelivaisi ëpetëpaejavabelianexa, bajarapajivi xanë pijaDiosonë tsane. Bajarapajivi pijinia taxënatojiviyo tsane. ⁸ Itsiata baitsi jane pamonaë pejunavivi tajumelivaisi yabara itsamonae pebejiobiaexanaëyanivatsi, pamonaë ata apo tanejumecovënëtsivi, pamonaë ata pitoyavi itsamonae, pamonaë ata pevitota pibisiacuene pexanaëvi, bajarapamonae ponaena petajueyabiabipucajavabelia. Pamonaë ata penajorobivi, pamonaë ata jumapecataëya pexanaenëjavabelia penavajëcaëvi, pamonaë ata penajumetsënëtsivi, daxita bajarapa-

monae ponaena petajueyabiabipucavabelia. Bajara-papuca tajueyabiaba azufre yajava. Bajarapatëpaejava cotocaevi jane baja petëpaejava tsane, nejai Dioso, tronojumata peecaenë.

Pacuenia Juan tane pejana Jerusaléntomara pacuenia itsamatacabi itsijitsia yabara pelivaisi

⁹ Nexata jane baja rena caenë ángelnë. Bajarapaángelnë siete paángelnëbeje siete pacopabeje piayaijavanë pevenëcaecopanë pepacaeviyajuvënënë. Bajara-paángelnë nexata nejumlahitsi:

—Naxanitsia. Catsitajëtsianatsi pova Corderonë pija-vanexa, nejai ángelnë.

¹⁰ Bajaraxuacujinae Espíritu Santo netsijamatabëvënëca. Nexata bemajitsinaebota ángelnë nebarëpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ángelnë netsitajëta Dioso pijatomara, pinijitomaraxaneto, Jerusaléntomara. Athëbëvetsica Diosojavavetsica runaica bajarapatomara. ¹¹ Bajarapatomara cotianiveniveneca Dioso pijapenivenivenaecotiata. Pacuenia penamatamotsiiboto jaspevënëiboto cotianivenivena, bajarapacuenia cotianiveniveca. Nasabanua pacuenia nasaba vidriojava. ¹² Bajarapatomara matatoyorotsia yacaranata piatayaëibopanaxanetota. Bajara payacaranatsijavaxaneto mataropotsia catsanaruba ibopananë. Bajara payacaranatsijavaxaneto apia athëbëabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ángelevi, caenë canacujitsia, nucapona caebaupa canacujitsia. Bajarapabau-panëjava Israelpijinë pexi, doce ponëmibeje, pevenëanë vënërubena. ¹³ Acueyabi pabaupabeje xainapona caeyenepana canacujitsia. Estevënënenia payenepana xaina acueyabi pabaupabeje. Nortevënënenia pijinia payenepana xaina acueyabi pabaupabeje. Survënënenia pijinia payenepana xaina acueyabi pabaupabeje. Oestevënënenia pijinia payenepana xaina acueyabi pabaupabeje. ¹⁴ Jerusaléntomara matatoyorotsia peyacaranatsiibopanaxanetonexa, ibo penajumaetaponaevjavata, copiaya pinijiibotoxanetonë sasavia jebapona, doce paibotoxanetobeje. Bajarapai-botoxanetonë, caeibotoxaneto canacujitsia pejumavelia, Corderonë pijajivi doce ponëbeje, apóstolevi, pevenëanë rubena.

¹⁵ Paángelnë nebarëcuaicuajiai, cobenaponapona oronaebota. Bajarapaoronaebota pecaëjëbinexa Jerusaléntomara, pecaëjëbinexa baupanë ata, pecaëjëbinexa Jerusaléntomara matatoyorotsia peyacaranatsiibopanaxaneto ata. ¹⁶ Jerusaléntomara matatoyorotsia peyacaranatsiibopanaxaneto, daxitayenepananë namatajëpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajërëtsialia ata payenepanabeje. Nexata jane baja ángelnë pecaëjëbinaebota caëjëba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajërëtsialia ata xaina bajarapacue-

nia, dos mil doscientos pakilómetrobeje. Athëbëabetsia ata piapiajava bajarapacuenia xaina, dos mil doscientos pakilómetrobeje. ¹⁷ Bajaraxuacujinae ángelnë caëjëba Jerusalén tomara matatoyorotsia peyacaranatsiibopanaxaneto peyapëtaenexa paitayaëtovajëto xaina. Jerusaléntomara matatoyorotsia peyacaranatsiibopanaxaneto, piatayaëjava xaina sesenta y cuatro pametrobeje. Pavirianaebota mapanacuapijivi bacaëjëba, bajarapavirianaebota ángelnë caëjëba.

¹⁸ Jerusaléntomara matatoyorotsia peyacaranatsiibopanaxaneto, exana jaspevënëibota. Jerusaléntomara ëorojavanëta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividriojava, bajara itsi. ¹⁹ Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonë sasavia tsivajënaejeba. Bajarapai-botoxanetonë itabëtsiaya jumacatsanaruba daxitaviria ibotonëta, bitso penamatamotsiibotonëta. Penamataxainaeibotoxaneto itabëta jaspevënëibotonëta. Pecotocaeviibotoxaneto itabëta zafirovënëibotonëta. Acueyabiibotoxaneto itabëta ágatavënëibotonëta. Cuatroibotoxaneto itabëta esmeraldavënëibotonëta. ²⁰ Cincoibotoxaneto itabëta ónicevënëibotonëta. Seisibotoxaneto itabëta cornalinavënëibotonëta. Sieteibotoxaneto itabëta crisólitovënëibotonëta. Ochoibotoxaneto itabëta berilovënëibotonëta. Nueveibotoxaneto itabëta topaciovënëibotonëta. Diezibotoxaneto itabëta crisoprasavënëibotonëta. Onceibotoxaneto itabëta jacin-tovënëibotonëta. Doceibotoxaneto itabëta amativënëibotonëta. ²¹ Doce rabaja pabaupabeje. Doce rabaja pijinia paperlavënëjavatabeje, bitso penamatamotsijavanëta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle ëorojavanëta pexanaecalle. Nasaba bitso. Pacuenia nasaba vidriojava, bajara itsi.

²² Bajarapatomarata apo taenë templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuatata jivi pevetsivi matatoxenetsia piagamatabëcuensaenë, Corderonëbeje, ponaponabeje bajarapatomarata. ²³ Dioso ayaijamatabëcuenenë pijapenivenivenaecotiata itayota bajarapatomara. Corderonë ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matababipijiuameto, meravipijiuameto ata. ²⁴⁻²⁶ Daxitanacuanëpijivi, pamonaebaja Dioso capanepatsi pijaneconivecua, bajarapamonae itsamatacabi jinavanapaena Diosobeje Corderonëbeje pijapenivenivenaecotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yaiyataeya perajutsinexa. Daxitamatababijavabelianexa, bajarapatomara baupatanutsiana. Bajarapatomarata ajibi tsane meravi. ²⁷ Itsiata baitsi jane bajarapatomaraberena pibisijamatabëcuene pexainaevi, apo jone tsane. Piauracuene pexanaevi, pena-

jumetsënëtsivi ata, apo jone tsane. Jonena ëpamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamona-ae maticabi apo peveverecajava pexainaevinexa.

22 Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidriojava nasaba, bajara itsi. Bajarapamene jivi petëpaejavavecua piaitavayaexanaemene. Bajara-pamene pitsaparena Diosobeje Corderonëbeje pija-tronojavaverena. ² Bajarapamene bocapona ayaicallex-aneto tuatuajëareca. Bajarapamene itapayareca anijamuxubërëneniabeje nubena naejavanë, jivi petëpaejavavecua piaitavayaexanaenaenë. Bajaraponaenë caevaita nacuaitapona doce panacuaitsibeje. Caejuameto canacujitsia nacuaitapona. Bajaraponaenë pebaxuta xanepana daxitanacuanëpíjivi penavaëbinexa, pejamatejemanexa piavitanëjavavecua. ³ Nexata bajarapatomarata ajibi tsane jivi pejamatabëcuenebijaenajavanexatsi. Nexata jivi pibisiacuene apo exanae tsane. Diosobeje Corderonëbeje pijatronota caenabeje pijajivi pitorobabiabinexabeje daxitamatacabijavabelianexa bajarapatomarata. Nexata daxita pamona Dioso pijajivi, pexaniajamatatabëcuene rajutsiana Diosojavabelia. ⁴ Bajarapamonae Dioso itabarataena. Dioso pevënë ata rucaena bajarapamonae pitapathaitota. ⁵ Bajarapatomarata ajibi tsane meravi. Pepo petuxanenë Dioso pijapenivenivenaecotia itayotsiana. Nexata bajarapatomarata pejinavanapaevi apo namatavenona tsane lámpracotia, maticabipijijuametocotia ata. Pamona jinavanapaena Dioso pijanacuata, Dioso pijanacua barëevetsianatsi daxitamatacabijavabelianexa.

Pacuenia baja imoxoyo pevajënae Jesucristo pepatsijavanexatsica yabara pelivaisi

⁶ Icatsia ángelnë nejumaitsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuene copiapatsiana. Dioso baja cajena bajayata tajëvelia yapëtaeyaexana profetavimi peyapëtaenexa pacuenia itsamatacabi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

⁷ Icatsia ángelnë nejumaitsi:

—Jesús raja jumaitsi: “¡Bepijia patsianicajë!” jai. ¡Nexata pajivi jumecovënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

⁸ Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yaiyataeya picani tamatabacabëta tonucajë. ⁹ Itsiata baitsi jane ángelnë nejumaitsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonae ata, pamona Diosojumepaebivi profetavi, pacuenia ata pamona jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yaiyataeya nematabacabëta tonucare nevajëtsinexa Diosojavabelia, nejai ángelnë.

¹⁰ Icatsia ángelnë nejumaitsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënae pecopiarucaenexa mapanacuataje. Pacuenia baja cajena Dioso tajëvelia najumecapanepaeya jumaitsi, bajarapacuenia Dioso exanaena. ¹¹ Neponaponaepato abaxë mapanacuataje, tocopare pibisiacuene pexanaponaevi, pibisiacuene pexanaejava pecatsitecaenexa. Ëpibisiacuene yabara penajamatabëxainaejiva Ëpibisiacuene yabara. Itsiata baitsi jane pijinia pamona pexaniacuene pexanavana-paevi, catsitecae pevajënaeyabelia pexaniacuene pexanavanapaejava. Pamona ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

¹² Icatsia ángelnë nejumaitsi:

—Jesús raja jumaitsi: “Panejumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsia, pamona xaniavaetsia netonacuenebavanapa. Pamona pijinia pibisiacuene exanavanapa, naneconitsiaexanaenajë. ¹³ Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenënexa,” jai raja Jesús, nejai ángelnë.

¹⁴ Icatsia ángelnë nejumaitsi:

—Jamatabëcuenebarëya baja pamona pibisiacuene pexanaeconimi Dioso vecuaajibiaexanatsi, pejumecovënëtsixae Jesucristo pesivatëpaejavatsi. Bajarapamonae itsamatacabi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecua piaitavayaexanaena pecuaixaenexa. ¹⁵ Itsiata baitsi jane daxita pamona Dioso apo pejumecovënëtsivi, nacopabanubenaena Dioso pijatomarajumavelia. Nacopabanubenaena pamona bitso ëpibisiacuene pexanaevi, penajorobivi ata, pevitota pibisiacuene pexanaevi ata, jivibeivi ata, jumapecataeya pexanaenëanëjavabelia penavajëcabiabivi ata, bitso penajumetsënëtsivi ata. Daxita bajarapamonae nacopabanubenaena Dioso pijatomarajumavelia, nejai ángelnë.

¹⁶ Nexata Jesús nejumaitsi:

—Xanë rabaja Jesúsne. Itorobajë tajaángelnë pecatsipaebinxua palivaisi baja catsipaeba. Bajarapacuenia itorobajë daxita Dioso pejumecovënëtsivi peyapëtaenexa palivaisi baja tajaángelnë catsipaeba. Xanë rabaja nacuaevetsinëmi Davidpijinë pemomoxiyavivënë. Xanë rabaja tajamatabëcueneitayotsinë daxitajivi pexaniajailivaisita, nejai Jesús.

¹⁷ Espíritu Santo jumaitsi. Petiriva ata, pova Corderonë pijavanexa, bajarapova ata jumaitsi. Jumait-sibeje Jesúsjavabelia mapacueniaje:

—Naxanitsiayo patsianimica, jaibeje.

Pamonae jumetane bajarapacuenia pejumaitsijavabeje Jesúsjavabelia, bajarapamonae ata bejumaitsi Jesúsjavabelia:

—Naxanitsiayo patsianimica, bejai bajarapamonae ata.

Pacuenia jivi pejamatabëëthëtojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamonae Dioso rajutsianatsi matababi apo peveverecaejava. Tocopatsianatsi bajarapamonae amoneya pexainaenexa matababi apo peveverecaejava itsa jumecovënëta Cristo pesivatëpaejavatsi. Tsi-paji Cristo jivi petëpaejavavecua piatavayaexanaenë.

¹⁸ Daxita pamonae leba Dioso pejumelivaisi, tayaquinaelivaisi mapabaxutotaje, jamatabëcuenereviva tsipaebijitsianë roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaex-

anaenatsi. Papiayaicuene yabara jumaitsi mapabaxutotaje, bajarapacuenia Dioso taeyaexanaenatsi bajarapajivi. ¹⁹ Mapabaxutotaje tayaquinaelivaisi, itsajivi itsa xuabiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabëcueneta bajarapajivi vënëyaquinae atatsi pabaxutota vënërubena daxita pamonae matababi apo peveverecaejava pexainaevinexa, matababi apo peveverecaejava apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vënërubena matababi apo peveverecaejava pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

²⁰ Jesús, ponë itoroba pijaángelnë tanetsipaebinexa pacuenia itsamatababi itsijitsia mapanacuataje, bajaraponë nejumaitsi mapacueniaje:

—Bepijia patsianicajë, jai.

Nexata xanë jumaitsinë:

—Je. Xanepana rabaja. Jesús pepo petuxanenëmë, inaxanitsiayo patsianimica! janë.

²¹ Pacatovajëtatsi daxita paxamë vajatuxanenë Jesucristo papecayavenonaenexa. Bajara itsi tsane.